


Kukwe kuin
ngöbökwé



New Testament in Ngäbere (PM:gym:Ngäbere)

Kukwe kuin ngöbökwé

New Testament in Ngäbere (PM:gym:Ngäbere)

copyright © 2004 Wycliffe Bible Translators, Inc.

Language: Ngäbere

Translation by: Wycliffe Bible Translators, Inc.

Ngäbere [gym], Panama

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ngäbere

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
dc5ef235-14f7-5b3f-997a-59dae7b091fe

Contents

MATEO	1
MARCOS	64
LUCAS	103
JUAN	167
HECHOS	214
ROMANOS	269
1 CORINTIOS	296
2 CORINTIOS	320
GALATAS	336
EFESIOS	346
FILIPENSES	355
COLOSENSES	362
1 TESALONICENSES	368
2 TESALONICENSES	373
1 TIMOTEO	376
2 TIMOTEO	383
TITO	388
FILEMÓN	392
HEBREOS	394
SANTIAGO	414
1 PEDRO	421
2 PEDRO	428
1 JUAN	433
2 JUAN	440
3 JUAN	441
JUDAS	442
APOCALIPSIS	445

Kukwe Kuin Jesubtä Tikani Mateokwe Mateo

Ni iti kädian nämane Mateo käkwe tära ne tikani. Niara kädian nämane Leví arato. Mateo abko ni israelita kārābare Jesukwe ja tōitīkakāre jabe. Jesu ngāmi Mateo kārere, kānenkri niara abko ngwian kārākā gobran romanobokrā, akwa Jesukwe kārābare ja tōitīkakāre jabe, ye btārābe nikani Jesu jiebtī. Kā ye ngwane nitre romanobo nämane gobrane nitre israelitabti.

Jesukwe dre dre nuenbare abko Mateokwe tuani ja okwā jenbti, ye abko tikani tära nebtā. Erere arato, Jesukwe kukwe diribare ño ño abko kukwei nuani kwe, ye abko tikani tārābtā kwe. Mateo käkwe tära ne tikani bāri nitre israelitakrā, ñobtä ñan angwane niaratre nämane ni ngibiare iti ja dīantarikā. Ni jatadre iti nitre israelita Dīantarikā abko Ngōbōkwe niebare kira. Ni ye abko kā Mesías hebreore amne kā Kristo griegore. Ni Dīantarikā juandre Ngōbōkwe ye abko Jesu ara abko Mateo tō namani mikai gare nitre israelitareye tära nebtī.

*Jesu mrākā kānekāne
(Lucas 3.23-38)*

¹ Jesukristo mrākā kānekāne jrei Davikri amne Abrahamkri abko nere:

² Abraham abko Isaac rün,

Isaac abko Jacob rün,

Jacob abko Judā rün amne

Judā etbakantre mda mda rün arato,

³ Judā abko Fares amne Zara rün amne,

Fares btā Zara meye abko Tamar,

Fares abko Esrom rün amne,

Esrom abko Aram rün,

⁴ Aram abko Aminadab rün amne,

Aminadab abko Naasón rün amne,

Naasón abko Salmón rün,

⁵ Salmón abko Booz rün,

(Booz ne meye abko Rahab. Rahab ne abko ñakare israelita.)

Booz abko Obed rün,

(Obed meye abko ni ñakare israelitare kädian nämane Rut.)

Obed abko Isai rün amne,

⁶ Isai abko jrei David rün.

Jrei David abko Salomón rün.

(Salomón ne meye abko nämane kāne Uriabe.)

⁷ Salomón abko Roboam rün,

Roboam abko Abías rün,

Abías abko Asa rün,

⁸ Asa abko Josafat rün amne,

Josafat abko Joram rün amne,

Joram abko Úzías rün,

⁹ Uzías abko Jotam rün amne,

Jotam abko Acaz rün amne,

Acaz abko Ezequías rün,

¹⁰ Ezequías abko Manasés rün amne,

Manasés abko Amón rün amne,

Amón abko Josías rün,

¹¹ Josías abko Jeconías amne mrākā mda mda rün,

(Jeconías näire abko nitre israelita jānikani ngite kā Babiloniate.)

¹² Abti nūkaninta kā Israelite,

yebti abko Jeconías abko Salatiel rün,

Salatiel abko Zorobabel rün,

¹³ Zorobabel abko Abiud rün amne,

Abiud abko Eliaquim rün amne,

Eliaquim abko Azor rün,

¹⁴ Azor abko Sadoc rün,

Sadoc abko Aquim rün amne,
 Aquim abko Eliud rün,
¹⁵ Eliud abko Eleazar rün amne,
 Eleazar abko Matán rün amne,
 Matán abko Jacob rün,
¹⁶ Jacob abko José rün.

José ne mden abko ben María namani.
 María ne mden abko Jesu meye amne,
 Jesu ne mden abko ie nita Kristo niere.

¹⁷ Ne aisete Abraham náire nebebe jrei David náire nitre israelita ja mrákärebe namani ni jätábtí nibká ja táritári. Yebti David náire abti nitre israelita jánikani ngite ká Babiloniate, ye náire nitre israelita ja mrákärebe namani ni jätábtí nibká ja táritári arato. Abti nitre israelita jánikani ngite ká Babiloniate ye tábtí nitre ja mrákärebe namani ni jätábtí nibká ja táritári nebe Kristo därebare ye náire.

*Jesukristo därebare
 (Lucas 2.1-7)*

¹⁸ Jesukristo därebare abko nakaninká krörö: Jesu ngámi dárere, kánenkri María, Jesu meye abko námáne mikani jakrá kwárikwári Josébe. Akwa María ngámi nebe Josébe, ye kánenkri María ñan namani mobe, bren kwe kisete Ngöbö Úai Deme köböire.

¹⁹ Angwane José, ben María rabadre, José ye abko námáne nüne metre Ngöbö ngwárekri amne ñan tó namani María mikai ene ni jókrá ngwárekri, aisete María tuadremetre kwe ká bube tiebe abko namani nútüre.

²⁰ Ye erere José jatanina nuene, btárábe angele ni Dánkienkwe jatani, kákwe niebare krörö köböire ie:

José, jrei David mráká, makwe ñan ká jürá ngwian jabtá María kare ngábtí ja nán mukore, ñóbtá ñan angwane ngábákre rabadi kwe, ye abko namani btá Ngöbö Úai Deme di kri köböire.

²¹ Mdakäre abko, ngábákre dáredi brare Mariákwe ye abko makwe kádian Jesu,* ñóbtá ñan angwane juta kwe ngite ngite kukwe kámekáme kisete, ye abko niarakwe dianditari, aisete makwe kádian kore. Abko kore se, niebare angelekwe Joséye.

²² Ni Dánkien abko kákwe blitabare kira niara kukwei nieká köböire, ye erere rabadre bare táte, abkokäre kukwe nakaninká kore. Kukwe niebare ni Dánkienkwe abko tá tikani krörö niara Kukweibtä:

²³ Meri iti kaibe deme ñan rabadi mobe bren kwe kisete amne ngobo rabadi iti kwe.

Ngábákre ye abko kádiandi Emanuel,
 abko niebare ni Dánkienkwe. (Emanuel abko “Ngöböta nibe” nieta.)

Isaías 7.14

²⁴ Yebti José nukaninta ngwáte angwane, angelekwe dre dre nuemna ie, ye erere nuenbare kwe, kákwe María kani ngábtí ja nán mukore.

²⁵ Akwa María ngobo ngámi dárere kwe, ye kánenkri namanintre ñakare jabe abti ngobo därebare kwe. Ngábákre ye abko Josékwe kádiani Jesu.

2

Nitre ja tóitíkaka mukebtá nükani Jesu mike útiáte jae

¹ Jesu därebare juta Belénte ká Judeate angwane, ni iti kádian námáne Herodes námáne jreire. Jesu därebare, abti nitre tóbtá núnanka mobe ká Judeabtá ká driri nükani juta Jerusalén yete. Nitre ye abko námáne ja tóitike mukebtá abko nükani,

² kákwe kukwe ngwianintari krörö:

¿Jrei nitre israelitakwe därebare abko tá mdente? Muke kwati kákwe niara därebare mikaba gare, ye abko nunkwe tuaba nuke káin ká driri yete, aisete nun jatani mike útiáte jae, niebare kwetre.

³ Nitre tóbtá ja tóitíkaka mukebtá kákwe kukwe niebare kore, ye gani jrei Herodekwe angwane, niara namani tóbike kri. Erere arato, nitre núnanka juta Jerusalénte namani tóbike kri arato.

⁴ Abtä jrei ye kákwe nitre blitaka Ngöböbe ni mda mda diäre dánkientre kárábare amne Kukwe Biani Ngöbökwé Moiséye dirikátre kárábare kwe arato, bti kukwe ngwianintari krörö kwe ietre:

¿Ni Dianinká Ngöbökwé abko dáredre mdente metre? niebare kwe ietre.

⁵ Angwane niaratre kákwe niebare mda Herodeye:

Jrei dáredre juta Belénte ká Judeate abko gare nunye, ñóbtá ñan angwane ni Ngöbö kukwei nieká kákwe tikani krörö:

* **1:21 Jesu** abko káta ni Dánkien Ngöbö tá ni dentari niere hebreore.

⁶ Belén, ma abko juta chi kä Judä kánti nete.

Akwa ma abko ütiäte kri, juta mda mda ngätäite kä Judä ye kánti,

ñobtä ñan angwane gobran kri däredi yete abko kákwe nitre israelita tikwetikwe
ngibiadibti, *Miqueas 5.2*

abko tä tikani Ngöbö Kukweibtä, niebare kwetre Herodeye.

⁷ Yebti Herodekwe nitre töbtä ye káräbare tiebe, bti muke tuani ñongwane metre kwetre abko ngwianintari kwe ietre.

⁸ Angwane Herodekwe niebare ietre:

Mun nän Belén sete amne ngäbäkre ye tä mdente abko munkwe ngwiantari kuin jökrä. Abti kwan munye angwane, tä mdente abko mun jatata niere tie, ti rikadre mike ütiäte siba abkokäre, niebare kwe ietre.

Bti juani kwe Belén.

⁹ Jrei Herodes kákwe blitabare ünän kore, yebti nitre töbtä ye nikani ta; nikanintre ta angwane muke tuani nuke käin kä driri kwetre, ye ara nikaninta niaratre jie ngwenante abti batibe ngäbäkre nämane, ye kánti muke ye namani nünaninkä käin.

¹⁰ Nitre töbtä kákwe muke tuani kore angwane, kä namani nuäre kri btätre.

¹¹ Nikanintre gwä angwane, ngäbäkre ye nämane gwi meye Mariabe, btä okwä namani. Angwane namani ngukudokwäbti temen, kákwe ngäbäkre ye mikani ütiäte jae. Yebti kaja ngwian nämane kwetre, ye jue tikani kwetre, bti oro amne kri ngwäri ütiäte kri rä bäne bäne kädianta incienso amne mirra biani ngwarbe kwetre ngäbäkre yeye.

¹² Yebti jatanintre nikenta angwane, ñan rikadreta Herodes kánti ta abko Ngöbökre mikani gare köböre ietre, aiseite nikaninta ji mdabti nebeta ja käite.

Jesu jänikani ngitie Egipto

¹³ Abti nitre töbtä ye nikaninante angwane, angele ni Dänkienkwe nükani blite köböre Josébe, kákwe niebare ie:

Nän krö amne ngäbäkre ye btä meye kwe, ye ben nän ngitie jötrö Egipto sete. Ye kánti mun raba nüne abti tikwe kukwe mda niedi mae abko makwe ngibia, ñobtä ñan angwane Herodes bike ngäbäkre ye känentari kämikadre. Abko kore se, niebare angelekwe Joséye.

¹⁴ Ye btäräbe José nükani dikekä krö, nikani jibti Egipto kukwäre ngitie ngäbäkre yebe amne ngäbäkre ye meyebe kä ikote deo.

¹⁵ Ye kánti namanintre nünentbe abti Herodes krütani. Kukwe nakaninkä kore, angwane kukwe niebare krörö ni Dänkienkwe niara kukwei niekä köböre ye namani bare:

Ti Odei nämane Egipto, tikwe káräbaretä mento,

Oseas 11.1

abko niebare kwe.

¹⁶ Nitre töbtä abko kákwe Herodes ngökani, ye gani Herodekwe angwane, Herodes mäta namani kri krübäte, aiseite ñongwane nitre töbtä kákwe muke tuani abko niebare kwetre Herodeye, yebtä Herodekwe töbikabare, kákwe ngäbäkre kiakia därebe nebebe kä kubu ie nämane nüne Belén amne Belén kenta temen abko Herodekwe kämikamna jökrä.

¹⁷ Herodekwe ngäbäkre kiakia kämikamna jökrä kore, ye köböre abko ni Ngöbö kukwei niekä kädian nämane Jeremias kákwe Ngöbö kukwei tikani abko namani bare krörö:

¹⁸ Ni kukwei ruen ngetrekä krikri krübäte juta Ramate, ye abko Raquel ngäbriänkä kiakia kämikani jökrä kán, mden abko tä müaire ye.

Niara moto mika tö nebeta jäme, akwa ngäbriänkä kämikani jökrä kán, aiseite moto ñan rabadreta jäme,

Jeremias 31.15

abko tikani kore, mden erere namani bare.

Jesu jänikani nüne juta Nazarete

¹⁹ Abti Herodes krütani angwane, angele ni Dänkienkwe nükani bliteta köböre Josébe Egipto,

²⁰ kákwe niebare ie:

Nän krö amne ngäbäkre ye btä meye kwe ye ben nanta kä Israelite, ñobtä ñan angwane nitre tö namani ngäbäkre ye kämikai abko krütanina jökrä, aiseite mun rikata, niebare angelekwe Joséye.

²¹ Ye btäräbe José nükani dikekä krö, bti nikani jibti ngäbäkre yebe amne ngäbäkre ye meyebe nebeta kä Israelite.

²² José nikaninta kore, nikani, nikani, nikani akwa ni iti kädian nämane Arquelao nämane gobrane mda rün mrö Herodes täte, ye gani kwe angwane, kä jürä namani kri btä. Abtä ñan nikani nebe kä Judeate. Angwane niara ñan rabadre nüne yete abko Ngöbökre mikani gare köböre ie, abtä kākä Galilea, kánti nikani jirekäbe.

²³ Namani Galilea angwane, nikani nüne juta Nazarete. Jesu abko nazarebo niedre btä abko nitre Ngöbö kukwei niekä köböre Ngöbökre kukwe niebare, ye erere namani bare jökrä kore.

3

*Juan Bautista kākwe ji tikani Jesu kāne
(Marcos 1.1-8; Lucas 3.1-17; Juan 1.19-28)*

¹ Abti kā nikanina raire ta angwane, batibe ni iti kādian nāmane Juan Bautista* jatani dirire kā kaibete kā Judea kānti.

² Juan nikani dirire krörö: Ngöbö kā kاینbتي kebera nūke gobrane ni ngätäite, aiseite kukwe kāmekāme kite temen, bti ja tōi kwiteta Ngöbö kukwäre abko nikani niere kore.

³ Juan ne mden abko btā Ngöbökwē kukwe niebare kira niara kukwei niekā Isaías köböire abko krörö:

Ni iti nāin nāke jume ja dibti kā kaibete, kākwe niedi krörö:

Ji ukateta kuin biare jrei kānenkri, ye kwrere ja tōi mike kuin biare ni Dänkien kāne munkwe.

Ji ukateta niken metre ta, ye kwrere ja tōi ukete metre ni Dänkien kāne munkwe abko nāin niere, *Isaías 40.3*

abko Ngöbökwē niebare kore Juanbtā Isaías köböire.

⁴ Juan abko nāmane kameo drüen dikani dānre kite jabtā amne nāmane mākete nbikwatabti jae amne mrö kweta nāmane kwe abko tröda btā munkö kāsenta.†

⁵ Juan nāmane dirire kore angwane, ni kwati nūnanka juta Jerusalén amne kā Judeate btā ni kwati nūnanka kāmekānime Nō Jordān bäre temen abko nūkani jökrā niara kukwei nuen.

⁶ Angwane nitre ye abko namani ja ngite niere Ngöböye angwane, Juan namani ngökö Nō Jordānte.

⁷ Akwa Juan nāmane nitre ngökö nōte, ye kānti nitre bariseo amne nitre saduseo nūkani kwati siba abko btā Juan okwā namani angwane, Juankwe niebare krörö ietre:

¡Mun abko tbi krübāte kwrere! ¿Ngöbö kebera mun mike ja ngie nuen kri krübāte, yebtä nirekwe mun mikani mokre amarebti mun kite nūke siba nete ye?

⁸ Munkwe ja tōi kwitadreta era metre Ngöbö kukwäre bkānā tödekakäre bti abko erere munkwe nūna ni mda mda okwābti.

⁹ Erere arato, munkwe nān töbika krörö jabtā: Nun abko Abraham mrākā, aiseite Ngöbökwē nān nun mikadi ja ngie nuen, munkwe nān nütü, nōbtā nān angwane ja tuen temen sete, se abko ngwarbe, akwa Ngöbö raba kwite Abraham mrākäre arato abko ti tö nibi niei metre kore munye.

¹⁰ Mdakäre abko, kri mden mden nān ngwā nebe kuin, ye abko krāke ü mikanina biare tikakkrā ngātrite ta. Abti tikakata jökrā angwane, nūkwā mikata btā, ye kwrere jire Ngöbökwē mun mikadi ja ngie nuen, munkwe nān ja tōi kwitadre Ngöbö kukwäre angwane.

¹¹ Nire nire kāta ja tōi kwiteta Ngöbö kukwäre, kāta kukwe kāmekāme kite temen, ye abko tita ngökö nō aibe te, akwa ni jatadi iti ti jiebti abko bāri di kri ti ngwā, aiseite ti abko ja nān rükadre töre jire chi tie sandalia ngwena krāke. ‡ Ni ye abko kākwe Ngöbö Üai Deme mikadi nūne munbtā amne nun mikadi deme kwe.

¹² Ne abko, niarakwe dre nuendi abko ti bike niere munye abko krörö: Nura kādianta trigo juankata mürete amne trigo kwā kuinquin aibe ukokröta jenena, bti ukata gwī. Kwata abko kukwata nūkwā jutrate, ye kwrere ni ye abko tā juto biare ni Ngöbökwē erere ukokrökā jökrā nūnakäre jabe amne tā juto biare ni kukwe kāmekāme nuenkā abko erere kitakäre nūkwā jutra nōtöte nākare te ja tare nikakäre kākäre. Munkwe nān ja tōi kwitadre Ngöbö kukwäre ne ngwane, kukwe rakadikā kore munbtā arato. Abko kore se, niebare Juankwe ietre.

*Juankwe Jesu ngökani nōte
(Marcos 1.9-11; Lucas 3.21-22)*

¹³ Kā ye ngwane abko, Jesu nāmane Galilea, nikani nebe Juan kānti Nō Jordānte mda, Juankwe ngökadre nōte abkokäre.

¹⁴ Akwa namanina yete angwane, Juan nān tö namani ngökai nōte, kākwe niebare ie: Ma bāri ütiāte ti ngwā, aiseite makwe ti ngökadre nōte bā amarebti ma kite ja mike ngökadre nōte tie se, niebare kwe Jesuye.

¹⁵ Angwane Jesukwe niebare mda ie:

Jändrān mden mden tuen kuin Ngöböye, yebtä abko nikwe Ngöbö Kukwei mikadre tāte, aiseite makwe ti ngökadre nōte, niebare kwe Juanye.

Ye erere nūkaninbti Juanye angwane, Jesu ngökani nōte kwe.

* **3:1** Kukwe *Bautista* kāta ni ngökaka nōte niere. Juan kādian nāmane Bautista nōbtā nān angwane niara nāmane ni ngökö nōte. † **3:4** Juan nāmane ja ngwā kite kore, ye kwrere nitre Ngöbö kukwei niekā kirakira nāmane ja ngwā kite arato.

‡ **3:11** *sandalia ngwena*. Jesu nāire ni klaborē abko bāri ene ni mda mdakrā. Niaratre aibe nāmane sandalia ngwena ni mdakrā, aiseite Juan nāmane ja bā mike bāri ene ni klaborē ngwā.

¹⁶ Jesu ngökani ñöte, jataninta ñöte käin angwane, kä käin se namani tuen ñäkänintbe ie angwane, Ngöbö Üai jatani ütü bä kwrere timonkwäre, nükani mate Jesubti, namani tuen ie.

¹⁷ Ye btäräbe ni kukwei jarabare kä käinbti, käkwe niebare:

Ni ne abra ti Ngobo tikwe. Niara tare kri tikwe. Niara käi nuäre kri tibtä, niebare kore kä käinbti.

4

Diablukwe Jesu nuaninte ja käne

(Marcos 1.12-13; Lucas 4.1-13)

¹ Yebti diablukwe Jesu nuadrete ja käne, abkokäre Ngöbö Üai nikani ngwena kä kaibete mda.

² Ye kanti köbö gre ketebu dibire rare Jesukwe mröbare ñakare amne mrö jatani krübäte ie.

³ Angwane diablu jatani nuke Jesu ken, Jesu nuatekäre ja käne, käkwe niebare ie:

Ma abko Ngöbö Odei era metre bkänä ne ngwane, jä se kwite mröre jae, niebare kwe ie.

⁴ Akwa Jesu käkwe niebare mda diabluye:

Ñakare. Ngöbö Kukwei tä tikani krörö:

Ñan mrö aibehti ni rabadre nüne, akwa kukwe kwatirekwatire niebare Ngöbökwé, yebti ni rabadre nüne, *Deuteronomio 8.3*

abko tä tikani Ngöbö Kukweibtä, niebare Jesukwe ie.

⁵ Yebti diablu nikani Jesu ngwena juta deme Jerusalén mda, kanti nikani Jesu ngwena mobe ju blitakrä Ngöböbe bti käin,

⁶ käkwe niebare ie:

Ma abko Ngöbö Odei era metre bkänä ne ngwane, ja täkete timon nete, ñöbtä ñan angwane Ngöbö Kukwei tä tikani krörö mabtä:

Ngöbökwé angeletre juandi ma ngibiare abko käkwe ma kadi ngäbti kisete, ma ngoto ñan matadre jäte temen abkokäre, *Salmos 91.11-12*

aisete ja täkete timon, ma abko Ngöbö Odei ara mikakäre gare ni jökräye, niebare diablukwe Jesuye.

⁷ Abtä Jesukwe niebare mda ie:

Ñakare. Ngöbö Kukwei tä tikani abko käta niere krörö arato:

Ni Dänkien Ngöbö käkwe ja kukwei mikadre täte ya, ñakare ya amne niara di tarä ja kukwei ngwiandre bare ya, ñakare ya abko makwe ñan nuate ja käne ja gakäre ben, *Deuteronomio 6.16*

abko tä tikani kore, aisete tikwe ñan ma kukwei mikai täte, niebare kwe diabluye.

⁸ Yebti mrä, ngitio bäri mente käin, yebti diablu nikani Jesu ngwena mda. Ye kanti abko diablukwe juta kä jökräbti temen mikani tuadre Jesuye amne, jändrän ütiäte krikri juta kwatirekwatire te, ye, abko mikani tuadre jökrä kwe arato ie.

⁹ Bti niebare kwe ie:

Ma rabadi ngukudokwäbti temen ti ngwärekre käkwe ti mikadi ütiäte jae ne ngwane, tikwe juta se btä jändrän ütiäte krikri se biandi jökrä mae, niebare mda kwe Jesuye.

¹⁰ Abtä Jesukwe niebare ie:

Satana, nän mento nete, ñöbtä ñan angwane Ngöbö Kukwei tä tikani abko käta niere krörö:

Ni Dänkien Ngöbö aibe mikadre ütiäte jae amne niara aibe kräke sribidre, *Deuteronomio 6.13*

abko nieta kore, aisete tikwe ñan ma kukwei mika täte, niebare mda kwe diabluye.

¹¹ Angwane diablukwe kä mikaninkä Jesubtä, bti angele nükani ruäre abko namani Jesu die mike.

Jesu nikani Ngöbö kukwei kuin dirire kena

(Marcos 1.14-15; Lucas 4.14-15)

¹² Yebti Juan Bautista kitani ngite kä teri gani Jesukwe angwane, Jesu nikaninta Galilea,

¹³ akwa ñan namani nüne mda juta Nazarete, akwa nikani nüne juta Capernaümte Nö Okwä Kri Galilea köräbti. Nö Okwä Kri Galilea, ye bäre temen abko Zabulón btä Neftalí mräkätre käkwe nünabare kira, kanti juta Capernaüm nämane Jesu näire abko te Jesu nikani nüne.

¹⁴ Kukwe niebare Ngöbökwé niara kukwei niekä Isaiás köböire rabadre bare, abkokäre Jesu nikani nüne yete. Kukwe ye abko tä tikani krörö:

¹⁵ Kä Zabalónkwe amne kä Neftalíkwe abko tä Ñö Jordán kwärä nakriri amne tä Ñö Okwä Kri köräbäre.

Kä ye abko tä kä Galileate arato, kánti nitre ñakare israelitare tätre nüne.

¹⁶ Nitre israelita ye abko nämane näin kä ikote, akwa ñotra trä kri dirare jatabare ietre.

Erere arato, niaratre nämane nüne kä ikote mento Ngöböye angwane, Ngöbö trä ngitianinkä ngwen kräke, kukwe metre Ngöbökwé mikakäre gare ietre, *Isaias 9.1-2*
abko tä tikani Ngöbö Kukweibtä abko erere namani bare.

¹⁷ Kä ye ngwane mentokwäre Jesu nikani dirire, kä nikani niere krörö: Ngöbö kä káinbti kebera nūke gobrane nibti, aiseté munkwe kukwe kámekáme kita temen, bti ja tói kwiteta Ngöbö kukwäre munkwe abko Jesu nikani niere kore.

*Jesukwe ni käräbare nibkä ja tóitike jabe
(Marcos 1.16-20; Lucas 5.1-11)*

¹⁸ Abti bati Jesu nämane dikekä Ñö Okwä Kri Galilea köräbäre angwane, ni ja etbare nämane nibu ñö köräbti, btä okwä namani. Ni ye abko iti kädian nämane Simón, akwa kädian nämane Pedro arato amne, etba kwe kädian nämane Andrés. Niaratre abko gwa gaka, aiseté nämane krade kite ñöte, btä Jesu okwä namani.

¹⁹ Angwane Jesu nikani kánti, kákwe niebare ietre:

Mun brän tibe amne munta gwa gaen ño, ye kwrere tikwe mun mikadi ni ngwianka Ngöböye, niebare Jesukwe ietre.

²⁰ Ye btäräbe, niaratre kákwe krade kitani temen, bti nikani Jesube.

²¹ Yebti Jesu nikani mda mentokwäre se kwrere angwane, ni ja etbare nämane nibu mda, btä okwä namani. Nitre ye abko iti kädian nämane Santiago amne etba kwe abko kädian nämane Juan. Niaratre nibu abko Zebedeo ngäbrjänkä. Nitre nibu ye abko nämane rute rünbe krade gudike, btä Jesu okwä namani angwane, Jesukwe käräbare ja tóitike jabe arato.

²² Ye btäräbe niaratre kákwe ru amne rün mikaninte yete, bti nikani Jesube.

*Jesukwe ni bren bren mikaninta kuinta
(Lucas 6.17-19)*

²³ Abti Jesu nikani dikekä kä jökräbti temen kä Galileate angwane, Ngöbö kä káinbti kebera gobrane nibti abko nikani dirire sinagoge* kä ketareketare te. Erere arato, ni bren bätäkä ngwarbe abko Jesu namani miketa kuinta.

²⁴ Yebtä abko blita namani jökrä kä Siriate angwane, ni bren ño ño erere jänamani kite jökrä Jesuye. Erere arato, ni bren úai káme kisete jänamani nūke Jesuye amne kä nótöte nibti amne ni ruen ñakare ngrabare jänamani nūke jökrä Jesuye angwane, Jesu namani miketa kuinta jökrä.

²⁵ Yebtä abko, ni kwati nünanka kä Galileate juta ketareketare te Decápolite amne nitre Jerusalénbo btä ni nünanka kä Judeate amne ni nünanka Ñö Jordánbtä kä driri abko namani dikekä kwati Jesu jiebti.

5

*Kukwe diribare Jesukwe ngitiobtä
(Lucas 6.20-23)*

¹ Nitre namani dikekä kwati dikaro Jesube namani tuen ie angwane, nikani mintokwäre nebe ngitiobtä, kánti namani tákänintbe temen. Angwane nitre ja tóitikaka ben kákwe krötäbare ken.

² Angwane Jesu nikani dirire krörö ietre:

³ Nire nire káta ja mike bobre Ngöböbtä, ye abko Ngöbökwé die mikadi amne kä rabadi nuäre btä, ñöbtä ñan angwane Ngöbö kä káinbti tä gobrane bti.

⁴ Nire nire tätre ja müaire, ni ye abko Ngöbökwé die mikadi amne kä rabadi nuäre btä, ñöbtä ñan angwane Ngöbökwé moto mikadita jáme.

⁵ Nire nire ñan tä bike kri ni mda mda okwäbti abko Ngöbökwé die mikadi amne kä rabadi nuäre btä, ñöbtä ñan angwane Ngöbökwé kä temen ne biandi ie.

⁶ Mröta nebe krübäte nie amne tomna tä nebe krübäte nie, ye kwrere nire nire abko ie nūna metre Ngöbö ngwärekre ye mdei krübäte ie,

ni ye abko Ngöbökwé die mikadi amne kä rabadi nuäre btä, ñöbtä ñan angwane Ngöbökwé mikadi nūne metre täte jökrä.

⁷ Nire nire abko ie ni mda mda tä nebe ruentari tare, ni ye abko Ngöbökwé die mikadi amne kä rabadi nuäre btä, ñöbtä ñan angwane niara rabadi ruentari tare Ngöböye arato.

* **4:23 Sinagoga** abko ju kánti nitre israelita nämane gätäre köbö jadükakräte ñäkäkäre Ngöbö Kukweibtä amne Ngöbö mikakäre kri. Ye kánti nitre israelita nämane kukwe úkete jakrä arato. Nitre israelita nämane nūne juta kwatirekwatire, kántikánti sinagoga nämane.

⁸ Nire nire káta ja tói ngbiare kuin deme, ni ye abko Ngöbökwe die mikadi amne ká rabadi nuäre btá, ñobtä ñan angwane niaratre kákwe Ngöbö tuadi.

⁹ Nire nire káta sribire ni mda mda mikakäre ja máketa, ni ye abko Ngöbökwe die mikadi amne ká rabadi nuäre btá, ñobtä ñan angwane niaratre abko ja ngábriánká niedi Ngöbökwe ietre.

¹⁰ Nire nire káta nüne metre Ngöbökrá abtä tá ja tare nike, ni ye abko Ngöbökwe die mikadi amne ká rabadi nuäre btá, ñobtä ñan angwane Ngöbö ká káinbti tá gobrane bti.

¹¹ Amne ni mdakwe ñáká taretare munye amne mun mika ja tare nike amne tödekabtä tibti ni mda mdakwe kukwe káme nie ngwarbe bátáká ngwarbe mun rüere, ye ngwane Ngöbökwe mun die mikadi amne ká rabadi nuäre munbtá.

¹² Mun raba ja tare nike kore angwane, munkwe ká ngwian bári nuäre jabtä amne ká raba juto munbtá, ñobtä ñan angwane munkwe ja tare nikadi ye útiäre abko Ngöbökwe jándrán kuin biandi munye ká káinbti sete. Munkwe ká ngwiandre nuäre kore jabtä arato, ñobtä ñan angwane nitre Ngöbö kukwei nieká kira abko rüe kákwe mikani ja tare nike kore arato.

*Mren amne ñotra trá
(Marcos 9.50; Lucas 14.34-35)*

¹³ Mdakäre abko, mren abko kuin ngri ngbiakrá amne jándrán mikakrá bänánte, ye kwrere mun abko mren kwrere ká nebtá, akwa bänán riadreká rabadre tibo amne ñan bänán rabadreta mren kwrere. Mren bänán rabadre tibo, ye abko rikadre ngwarbe, aiseté ñan rabadre kuin mda, aiseté kitadreká amne ni jókrá rabadre dikeká bti ta. Ne aiseté mren bänán kuin ye kwrere munkwe ja ngibia, ni mda mda rabadre Ngöbö tuen munbtá abkokäre.

¹⁴ Mdakäre abko, ñotra tráte káta nebe tuen nie ká ikote, ye kwrere munta ñotra trá kwrere ká nebtá amne juta mikata ngitio kribti káin, ye abko ñan raba ja rükente ni okwá báre ká ikote, ye kwrere munta ká nebtá.

¹⁵ Erere arato, ñotra jutra mikata angwane, mikata ñakare kaja táni, akwa mikata mobe üräbtá káin trá rabadre ngitie jókrá gwita temen, ni jókrá gwi, ie ká rabadre tuen abkokäre.

¹⁶ Ye kwrere arato, munta nüne Ngöbö tráte, ye rabadre tuen ni mda mdaye, abkokäre munkwe ja tói mika nüne era metre Ngöbökrá mun rabadre ñotra trá ye kwrere ni mda mda okwábtí amne, munkwe jándrán kuin kuin nuendre kore ni mda mda okwábtí, ye köböire abko jatadi mun Rün ká káinbti ye káikiteká siba.

Jesu jatani Ngöbö Kukwei mikakäre bare táte

¹⁷ Mdakäre abko, ti jatani nete, ye abko ñan Kukwe Biani Ngöbökwe Moiséye mikakäre ngwarbe. Erere arato, Ngöbö kukwei nieká mda mda kákwe Ngöbö Kukwei tikani ye abko ti ñan jatani mikakäre ngwarbe, akwa ti jatani kukwe ye mikakäre bare táte jókrá.

¹⁸ Ye abko, ti bike kukwe era erere niere krörö munye: Ká káinta amne ká temen ne tádi kore angwane, tárá okwá bári kiakia tá tikani Ngöbö Kukweibtá, ye abko ñan diandreká jire chí kwati abti jándrán jókrá mikaninbte Ngöbökwe rabadi bare táte jókrá ie.

¹⁹ Ne aiseté, kukwe biani nuendre Ngöbökwe nie, yebtá kukwe bári chí tá tikani abko nire nire ñan tá mike táte amne ni mda mda kákwe ñan mikadre táte abko dirita ietre arato, ne ngwane ni ye abko rabadi bási útiäre ñakare ká káinbti, Ngöböta gobrane ye kánti; akwa nire nire tá kukwe ye mike táte amne ni mda mdakwe mikadre táte arato abko tá dirire ietre, ni ye abko rabadi útiäre kri ká káinbti sete, Ngöböta gobrane ye kánti.

²⁰ Tita niere kore, ñobtä ñan angwane Kukwe Biani Ngöbökwe Moiséye dirikátre btá nitre bariseo táte nüne ño, yebti tá munkwe ñan nünandre bári era metre Ngöbö okwábtí ne ngwane, Ngöbö ká káinbti tá gobrane ye kánti mun ñan rabadi nüne.

*Ñan ni mda kámikadre
(Lucas 12.57-59)*

²¹ Mdakäre abko, mun mráká kirakira abko ie Ngöbö Kukwei diribare krörö abko munkwe kukwei nuanina: Makwe ñan ni mda kámika, niebare ietre amne nire nire káta ni mda kámike abko dokwäre mikadre ja ngie nuen.

²² Akwa ti abko káta niere krörö munye: Nire nire rabadre romon mrákákrá, ye dokwäre Ngöbökwe mikadi ja ngie nuen. Nire nire abko kákwe “Ma ngwarbe, dokwá tói ñakare,” niedre kwe mrákáye, ye dokwäre abko járikadre ngite Sanedrin ngwärekri kukwe úkatekäre kráke. Amne nire nire kákwe niedre mrákáye: “Ma ngututu káme ngwarbe,” niedre kwe, ni ye abko rabadi mikani biare kitadre Ngöbökwe ñukwá jutrate ká ja tare nikakrá ye kánti mráká ye dokwäre.

²³ Ne aisete, ma rika jändrän ngwena kukwadre Ngöböye ñukwä gräbti ja ngite ütiäre ju blitakrä Ngöböbe kánti ne ngwane, ma rabara yete, ye btäräbe ma mräkä iti romon makrä, ye rükata töre mae,

²⁴ ne ngwane jändrän ye makwe mikate ñukwä grä ken yete, abti ma jana ja mäketä käne ma mräkäbe, bti ma jatata, käkwe jändrän ye bian kukwadre Ngöböye.

²⁵ Mdakäre abko, nane rürümon ütiä mabti ni mdakwe abtä ni ye jata niken ma kite ngise kritobo ye angwane, mun ngämi nebe kritobo kánti, känenkri makwe kukwe ükate ben, niara ñan rikadre ma ngwena kritobo kánti abkokäre, ñobtä ñan angwane makwe ñan nuendre kore ne ngwane, nane ni ye rikadre ma ngwena nebe kritobo ngwäreki amne kritobo abko käkwe ma kitadre ngise guardiaye amne nane guardiakwe ma kitadre ngite kä teri.

²⁶ Ye kánti abko makwe ñan ngwian biandre täte jökrä ja ütiäre, känenkri ma ñan tikadreteta jire chi abko ti tö nibi niei metre munye.

Ni gure ñan rabadre ja mike gure ni mdabe

²⁷ Mdakäre abko, Ngöbö Kukwei tä tikani abko mun tärä kukwei nuen abko krörö: Mata gure, makwe ñan ja mika gure bati bati abko niebare kore.

²⁸ Akwa ti abko bike niere krörö munye: Nire nire käkwe meri tuadre ja käne amne tö rabadre ie jakrä, ni ye käkwe meri ye mirira ja ken ja töite, aisete ngite Ngöböye abko tita niere munye.

²⁹ Ne aisete, ma okwä küde ruenkri, köböite makwe ja mika ngite Ngöbö rüere ne ngwane, ma okwä ye makwe dianka mento jae, bti makwe kitaka mobe, ñobtä ñan angwane ma ngrabare chi ye abko diandrekä mento ye abko rabadre bäri kuin makrä amne ñan ma ngrabare rikadre ngöi jökrä kä ja tare nikakrä kánti.

³⁰ Erere arato, ma kise ruenkri, köböite makwe ja mika ngite Ngöbö rüere ne ngwane, makwe ja kise ye tikaka ta, bti makwe kitaka mobe mentokwäre, ñobtä ñan angwane ma ngrabare chi diandrekä mento ye abko rabadre bäri kuin makrä amne ñan ma ngrabare rikadre ngöi jökrä kä ja tare nikakrä kánti.

Meri ñan tuametre

(Mateo 19.9; Marcos 10.11-12; Lucas 16.18)

³¹ Mdakäre abko, kukwe diribare krörö Ngöbö Kukweibtä abko garera munye: Nire nire tö rabadre meri kwe tuametre, ye ngwane täräkwata biandre kwe merire kweye, niarata merire kwe ye tuametre era metre abko mikakrä gare.

³² Akwa ti abko käta niere krörö: Meri ja mike ngite ñakare brare mda mdabe, akwa brare kwe käkwe tuadremetre, ye ngwane merire ye käkwe ja mikadre gure brare mdabe angwane, ni gure käta ja mike ngite bati bati ni mda mdabe, ye kwrere brare käne köböite meri ye rabadre ja mike ngite. Erere arato, meri tuanimetre brarekwe, ye ben ni mdakwe ja mikadre gure ne ngwane, ni gure käta ja mike ngite bati bati ni mda mdabe, ye kwrere ja mikadi ngite kwe.

Ja kukwei biandre ño era metre

³³ Mdakäre abko, kukwe niebare mun mräkä kirakiraye abko munkwe kukwei nuanina arato abko krörö: Jändrän jökrä rabadre bare täte mae mata niere ni Dänkien käbti, ye erere makwe ja kukwei mika täte jökrä, käkwe ñan ja kukwei kitadre temen, niebare kira.

³⁴ Akwa ti abko käta niere krörö munye: Munkwe ñan ja kukwei bian jändrän käbti. Erere arato, kä käinta se käbti tita ja kukwei bien, munkwe ñan nie, ñobtä ñan angwane Ngöbö abko tä gobrene kä käinbti yete, aisete bäri ütiäte.

³⁵ Erere arato, kä temen ne käbti tita ja kukwei bien, munkwe ñan nie, ñobtä ñan angwane kä temen ne abko Ngöbökwäre arato. Erere arato, Jerusalén se käbti tita ja kukwei bien, munkwe ñan nie, ñobtä ñan angwane juta Jerusalén abko juta Jrei kri Ngöbökwäre kräke, aisete bäri ütiäte arato.

³⁶ Mdakäre abko, mun dokwä jen munkwe ye käbti, munta ja kukwei bien, munkwe ñan nie, ñobtä ñan angwane mun di ñakare jire ja dokwä drüen mikakäre krati ngwen amne drüne.

³⁷ Ne aisete, munkwe “jän” nie ne ngwane, munkwe “jän” nie kwatibe; munkwe “ñakare” nie ne ngwane munkwe “ñakare” nie kwatibe arato. Yebti munkwe kukwe mda niedre ne ngwane, munkwe ja mikadre ngite.

Ñan ja ngie mikadre

(Lucas 6.29-30)

³⁸ Ngöbö Kukwei tä tikani abko mun tärä kukwe nuen abko krörö: Ni iti käkwe ni okwä diandrete ne ngwane, niara okwä diandrete ie ja dokwäre arato. Erere arato, ni tu diandrekä kwe ne ngwane, tu diandrekä ie ja dokwäre arato abko munkwe kukwe nuani.

³⁹ Akwa ti abko käta niere krörö munye: Nane ni mdakwe kukwe nuen blo ma rüere, akwa makwe ñan ja ngie mika amne jirekåbe makwe jändrän kuin nuen krörö kråke: nane ni mdakwe ma meta ngwåre küde ruenkri yebtä ma mikakåre ngwarbe jae, ne ngwane makwe ja ngwåre kwåråkri mika ie.

⁴⁰ Erere arato, nane ni mdakwe ma kita ngise, bti tö raba dån denkå ötati makån ne ngwane, dån mdara jire makwe, ye makwe bian ie arato.

⁴¹ Mdakåre abko, nane ni mdakwe tribe ngwiamna milla krati jakrä mae ne ngwane, ja moto kuinbti ma rika tribe ngwena milla kröbu kråke.

⁴² Erere arato, nane ni mdakwe jändrän makwe kärå mae angwane, makwe bian ie. Nane ni mdakwe jändrän kärå ütiådre mae ne ngwane, makwe bian ie abko ti tö niei kore munye.

Nikwe ni rüe taredre
(Lucas 6.27-28,32-36)

⁴³ Mdakåre abko, Ngöbö Kukwei tä tikani abko mun tarå kukwe nuen abko krörö: Makwe ma mråkä tare amne ma rüe abkobtä makwe båtå ngwian abko munkwe kukwe nuanina kore.

⁴⁴ Akwa ti abko bike niere krörö munye: Munkwe mun rüe tare amne nire nire tä näin kisere mun jiebti mun mikakåre ja tare nike, ye abko kråke munkwe blita Ngöböbe.

⁴⁵ Munkwe nuendre kore ne ngwane, mun Rün tä kä käinbti sete, ye kwrere mun rabadi amne mun rabadi niara ngåbrånkåre era metre arato. Munkwe nuendre kore, ñobtä ñan angwane mun Rün kä käinbti tä ñånå mike nüke käin ye abko tä trä ngitiekå jökrå ni käme kråke amne ni kuin kråke. Erere arato, tä nü mike näkäen temen, ye abko ni nünanka metre niara ngwåre kri kråke tä näkäen amne ni nünanka käme niara rüere kråke tä näkäen arato.

Mun Rün abko käta ni jökrå tarere kore, ye kwrere munkwe nuendre arato,

⁴⁶ ñobtä ñan angwane ÿnire nire käta mun tarere ye aibe munkwe taredre angwane, Ngöböke ütiå biandi munye, munta nütüre ya? Ñakare, ñobtä ñan angwane nitre ñakare ngwian käråkä gobran romanobokrå abko tä nebe tuen käme dikaro munye, ye abko tä nuene kore abko kwrere munkwe nuendre siba.

⁴⁷ ÿErere arato, mun mråkä aibe ie munkwe köbö ngwianretari, ye angwane munta jändrän nuene bäri kuin ni mdakrä ya? Ñakare, ñobtä ñan angwane nitre ñakare israelitare abko tuen ngututüre munye abko käta nuene kore, ye kwrere munkwe nuendre siba.

⁴⁸ Ne aisete mun Rün kä käinbti abko kuin era metre, ye kwrere munkwe nuna.

6

Ngwian biandre tiebe

¹ Mdakåre abko, munkwe ñan jändrän kuinquin nuen tuadre ni jökråye ja bä mikakåre kuin ni mda mda okwåbti, ñobtä ñan angwane munkwe nuendre kore ne ngwane, mun Rün tä kä käinbti ye kåkwe ñan sribi ye ütiå biandre jire chi munye.

² Ne aisete munkwe jändrän bian ni bobre die mikakrä angwane, ñan mun rika niere kä jökråbti temen kwåråkwårå mikakåre gare. Nitre ja bä mikaka kuin käta jändrän bien kore amne tätre niken mike gare sinagogate amne tätre niken ji ngrabare temen mike gare. Yebtä abko ni mda mda kåkwe niaratre käikitadrekå abkokåre tätre nuene, aisete tätre jändrän kuin nuene kore, ye abko ütiå nena kwetre abko tita niere metre, aisete munkwe ñan jändrän nuen niaratre kwrere.

³ Ne aisete nane munkwe ni bobre die mika angwane, makwe ñan nie jire chi ma kukwe muko bäri kuinye,

⁴ akwa makwe nuen kaibe kä bube. Makwe nuendre kore ne ngwane, ma Rün, ie jändrän kaibe tiebe tuen, ye kåkwe sribi makwe ye ütiå biandi mae.

Blitadre ño Ngöböbe
(Lucas 11.2-4)

⁵ Mdakåre abko, mun rika blite Ngöböbe angwane, nitre ja bä mikaka metre tä niken blite krikri Ngöböbe sinagogate. Erere arato, tätre nebe nünaninkå jibtå blitare Ngöböbe. Ye abko, ni jökrå kåkwe tuadre blite Ngöböbe, ie töta nebe, käta nuene kore. Ye kwrere munkwe ñan nuen, ñobtä ñan angwane tätre nuene kore ye abko ütiå nena kwetre abko tita niere metre munye.

⁶ Ne aisete, ma rika blite Ngöböbe angwane, makwe ja ketaka kaibe kä teri gwi, kåkwe jukwe dika jabti, bti ma Rün Ngöbö tuen ñakare mae, ben makwe blita kaibe angwane, ma Rün ie jändrän nuenta kaibe makwe abko tuen, kåkwe ütiå biandi mae.

⁷ Erere arato, mun rika blite Ngöböbe angwane, nitre ñakare israelitare tä kukwe arabe niere bäre bäre, yebtä abko ngöbötre ngwarbe kåkwe kukwe nuadre amne die mikadre

kwetre tä nebe nütüre, aisete tätre blite kore, ye kwrere munkwe ñan blita Ngöböbe amne munkwe ñan kukwe arabe nie bäre ngwarbe.

⁸ Munkwe ñan ja mika niaratre kwrere, ñobtä ñan angwane munta dre dre mdei nike, ye mun ngämi käreere mun Rünye, ye känenkri tarä nebe gare ie.

⁹ Ne aisete, munkwe blitadre Ngöböbe angwane, munkwe blitadre krörö ben:

Nun Rün kä käinbti, ma aibe kä raba mikani ütiäte ni jökräwe.

¹⁰ Jakwe gobrane nun ngätäite nete.

Erere arato, ma töta nebe dre dre nuein kä käinbti, erere tä nebe bare täte jökrä, ye kwrere raba nebe bare täte jökrä kä nebtä arato.

¹¹ Mdakäre abko, makwe mrö bian täte nünankrä nunye mtare.

¹² Amne ni mdata ja mike ngite nun rüere abko nunta den bti ta, ye kwrere makwe nun ngite ma rüere, ye dianka mento nunbtä arato.

¹³ Amne kukwe kämekäme tö nun nuaite ja käne ma rüere, ye kanti makwe ñan nun jie ngwian.

Akwa makwe nun ngibia nun rüe diablu ngäniene, ñobtä ñan angwane ma aibe tä gobrane amne ma aibe di kri amne ma aibe raba käikitaninkä kärekäre. Abko kore se. Amen.

¹⁴ Munkwe blitadre kore Ngöböbe, ñobtä ñan angwane ni mda tä ja mike ngite mun rüere angwane, munta den jökrä bti ta ne ngwane, munta ja mike ngite Ngöbö mun Rün rüere, ye mun Rün kä käinbti käkwe diandikä jökrä mento munbtä arato.

¹⁵ Akwa ni mda tä ja mike ngite mun rüere abko munkwe ñan diandre bti ta amne mun rabadre romon janknu kräke ne ngwane, mun ngite Ngöbö rüere, ye mun Rün kä käinbti käkwe ñan diandrekä mento munbtä arato.

Ja bäindre ño Ngöbökrä

¹⁶ Mdakäre abko, munkwe ja bäin Ngöbökrä angwane, munkwe ñan ja bä mika diäne nitre ja bä mikaka metre käta nuene ye kwrere, ñobtä ñan angwane nitre bikaka metre, ye tätre ja bäine angwane, ni jökrä käkwe gadre, abkokäre tätre nebe ja bä mike diäne tuadre ni mda mdaye, akwa tätre nuene kore ye abko ütiä nena kwetre abko tita niere metre munye.

¹⁷ Ne aisete makwe ja üka bäin Ngöbökrä angwane, makwe ja ngwäre bätäte amne makwe ja ukate kuin.

¹⁸ Mata ja bäine ye ñan gadre mabtä ni mda mdakwe amne, ma Rün tuen ñakare mae aibe käkwe gadre kaibe, abkokäre makwe nuen kore. Ye ngwane abko ma Rün, ie jändrän kaibe tiebe tuen, ye abko käkwe ütiä biandi mae.

Jändrän kuin kä käinbti, jiebti ni rankwadre

(Lucas 12.33-36)

¹⁹ Mdakäre abko, munkwe ñan jändrän ütiäte kri ükärö kabre jakrä kä nebtä, ñobtä ñan angwane kä u käta jändrän juen ngwarbe. Erere arato, jändrän tä niken ngwarbe amne gokä tä niken jändrän goire, aisete munkwe ñan jändrän ükärö kabre jakrä kä nebtä.

²⁰ Akwa jändrän kuinquin ütiäte krikri rabadre bäri kabre munkrä kä käinbti abko kräke munkwe sribi, ñobtä ñan angwane kä käinta kä u ñakare jändrän rüere, erere arato jändrän niken ngwarbe ñakare amne ni gokä ñakare arato, aisete munkwe sribi jändrän kä käinbti ye ükakrökäre kabre jakrä,

²¹ ñobtä ñan angwane jändrän ütiäte krikri tädi ükani mdente jakrä munkwe, ye kanti mun töi tädi arato.

²² Mun okwä abko ñotra kwrere munkrä. Ne aisete ma okwä kuin dirare ne ngwane kä trä kuin tä tuen mae, ye kwrere abko ma töita mikani kwatibe Ngöböbti ne ngwane, Ngöbö trä kuin tä nuke gare kuin mae.

²³ Akwa ma okwä käme ne ngwane, kä rabadi tuen kä iko kwrere ma bäre temen mae, ne aisete kä trä ngwen tarä mabtä, akwa kä trä ye rabadre tuen drüne kwrere mae, ye abko kä iko ara jire abko rabadre tuen bäri drüne mda mae. Ye kwrere ma töi ñan tä mikani kwatibe Ngöböbti ne ngwane, bäri ma rabadre nüne kä ikote amne Ngöbö trä kuin ñan rabadre nuke gare jire chi mae.

²⁴ Mdakäre abko, ni ñakare jire abko rabadre sribire bkänkä nibu kräke ja näire, ñobtä ñan angwane sribi bkänkä iti rabadre tare kwe amne mdabtä mätä rabadre; iti kukwei mikadre täte jökrä kwe, akwa mda abko ñan kukwei mikadre täte kwe. Ne aisete ni ñan raba ja töi mike kwatibe sribire Ngöbökrä, ja töi mikare kwatibe ngwian ganankrä kwärä jae.

Ñan töbikadre dikaro mröbtä amne dänbtä

(Lucas 12.22-31)

²⁵ Ne mden kisete, ti bike niere krörö munye: Munkwe mrö ño kwetadre nünankrä amne munkwe dre ñadre tomnane nünankrä jae, yebtä munkwe ñan töbika dikaro. Erere arato, munkwe dän ño kitadre jabtä, yebtä munkwe ñan töbika dikaro, ñobtä ñan angwane nita

nüne kā nebtā angwane, nūnandre metre Ngōbōbe abko bāri ūtiāte mrōkrā amne ni ngrabare ye abko bāri ūtiāte dānkrā, aisele munkwe űan tōbika krūbāte dikaro jāndrān yebtā.

²⁶ Nukwā tā nikenkā kāinta, se mika űārāre munkwe. Nukwā tā nura nōkō űakare jakrā amne tā ngwā ōtō űakare arato amne ju űakare kwe mrō ūkākā jakrā, akwa mun Rūn kā kāinbti kāta mrō bien ietre kwetadre. Mun abko bāri ūtiāte nukwā krāke, űse abko mun Rūn kākwe űan mrō biandre munye ya amarebti munta tōbika krūbāte dikaro se?

²⁷ Munkwe űan tōbikadre krūbāte dikaro kore, űōbtā űan angwane ni tō rabare ja tuai bāri kri, akwa di űakare ja mike niren taiti mda kukwāne.

²⁸ Mdakāre abko, űōbtā munta tōbika krūbāte dikaro dānbtā jakrā se? Kri blū tā niren űo, yebtā munkwe tōbika. Tā sribire űakare jakrā, tā dān dike űakare jakrā,

²⁹ akwa jrei kri Salomōn abko nāmāne jāndrān jōkrā tuāretuāre bkāne, akwa dān tuāretuāre kri blū se kwrere abko Salomōnkwe kitani űakare jabtā.

³⁰ Kri blū tā neme jōtrō kōbōitibe, abti jāndrinane angwane mikata ngire űukwāte, akwa Ngōbōta ngibiare kuin, űye mun abko ie dān űan biandre Ngōbōkwe ya amarebti munta tōdeke űakare tāte Ngōbōiti ye?

³¹ Munkwe űan tōbika dikaro, kā rika kukwe ngwentari krōrō jae au: űNikwe mrō űo kwetadi amne nikwe dre űadi tomnane? Erere arato, űnikwe dān űo kitadi jabtā se? munkwe űan nie kore jae au,

³² űōbtā űan angwane nire űakare israelitare abko bāri tā nakwen kisere jāndrān ye jiebtī, akwa mun kāta dre mdei nike, ye abko garera jōkrā Ngōbō mun Rūn kā kāinbti seye amne niarakwe jāndrān ye biandi munye, aisele munkwe űan tōbika dikaro jāndrān nūnankrā yebtā jakrā.

³³ Ne aisele, jāndrān jōkrā Ngōbōkwe tā mikani jenena munkrā, ye munkwe kānāntari kāne amne, mun rabadre nūne metre Ngōbō ngwārekri, ye munkwe kānāntari arato angwane, jāndrān jōkrā mdei nīkata munkwe ye Ngōbōkwe biandi munye arato.

³⁴ Mdakāre abko, kōbō mdara jire jatadi jetbe angwane, dre dre rakadikā, yebtā munkwe űan tōbika dikaro, űōbtā űan angwane kōbō jetbe ye abko jatadi munkwe mdara jire ngwena tōbikākā munye, aisele kōbō kwatirekwatire te kukwe tārā keta kabre ni mikakāre tōbika, aisele kukwe jatadre mate űo űo munbtā jetbe, yebtā munkwe űan tōbika dikaro.

7

*űNan űākādre ni mda mda rūere
(Lucas 6.37-38,41-42)*

¹ Mdakāre abko, Ngōbōkwe űan kukwe ūkadrete mun rūere, abkokāre munkwe űan bika kri, kākwe űākā blo ni mda mda rūere,

² űōbtā űan angwane munkwe űākādre űo űo ni mda mda rūere, ye kwrere Ngōbōkwe kukwe ūkadite munkrā. Erere arato, munkwe űākādre krūbāte ni mda mda rūere ne ngwane, Ngōbōkwe kukwe ūkadite krūbāte mun rūere amne, munkwe űākādi chi ni mda rūere ne ngwane, ye nāre Ngōbōkwe kukwe ūkadite mun rūere.

³ Mdakāre abko, kukwe kāme btā nita ja mike ngite kri, ye abko ti bike bā mike kri oto kri kwrere amne kukwe chi ye abko ti bike bā mike kā būre chi ye kwrere abko krōrō: űKri oto bāri kri tā ma okwāte, ye űo abko ma tōbikare űakare jae amarebti kā būre chi ma mrākā okwāte, abkobtā mata nebe ja ngwen ruen tare yere?

⁴⁻⁵ űYe űōbtā kri oto bāri kri tā ma okwāte abko mata dianka nūtūre űakare jae amarebti, kā būre chi ma mrākā okwāte abko ie mata niere: Ti mrākā, kā būre ma okwāte ye, ti tuemetre denkā jae, mata niere ie? űYe űan ngwarbe, mata ja bā mike kuin ma mrākābtā, kāta kukwe nuene kore yera! Kri oto kri ma okwāte ye ara jire makwe dianka kāne jae. Yebti kā raba tuenta kuin mae angwane, batibe makwe kā būre chi ma mrākā okwāte ye dianka mda ie. Ye kwrere, munta kukwe nuene bāri kāmekāme abko okwābti, ni mdata ja mike ngite chi abko mun űan bika bāri kise ngwen ni yebtā. Munkwe űan űākā jire chi ni yebtā, akwa kukwe kāme, yebtā mun raba moto ulire, bti kukwe ye tuemetre jire jōkrā kāne, abti mun raba mun mrākā die mike.

⁶ Ni ruāre abko krūbāte amne romon dikaro nukro kwrere. Ni ye ie munkwe űan jāndrān kuin Ngōbōkwe bian, űōbtā űan angwane nane rikwitadre mun rūere amne nukro kākwe ni tikadreki kiakia ngrabare tubti, ye kwrere jatadre nuene munbtā. Erere arato, ni tārā ruāre abko mtū kwrere kāta jāndrān ūtiāte ni mdakwe perla ūtiāte kri kwrere mike ngwarbe jae. Ni ye abko ie jāndrān kuin Ngōbōkwe ūtiāte kri tā munkwe ye abko munkwe űan kita temen krāke, űōbtā űan angwane űan rabadi ūtiāte krāke, aisele dikadikā jōkrā bti ta kwe.

*Jāndrān kārādre janknu Ngōbōye
(Lucas 11.9-13; 6.31)*

⁷ Käre munkwe jändrän kärä Ngöböye amne Ngöböke biandi munye. Erere arato, munkwe jändrän kánántari Ngöbö kánti amne kwandi munye. Erere arato, nita neme jukwebtä jändrän kärere ni mdaye, ye kwrere käre munkwe jändrän kärä jukwebtä Ngöböye angwane, Ngöböke jukwe tikadi, kákwe biandi munye,

⁸ ñobtä ñan angwane nireta jändrän kärere, ye erere bianta ie amne, nireta jändrän kánentari jakrä, ye erere tä kwen ie amne nireta ñäke jukwebtä abko ie Ngöböta jukwe tike amne tä jändrän bien ietre.

⁹ Ngöböta jändrän bien kore, yebtä abko ti bike kukwe bä mike krörö mda: ¿Mun mden ie ngäbäkre munkwe tä ban ribere kwetadre jae amne munta jä bien kwetadre ie?

¹⁰ Erere arato, ¿mun mden ie ngäbäkreta gwa kärere kwetadre jae amne munta tbi krübäte bien kwetadre ie?

¹¹ Mun abko moto käme, akwa ngäbäkre munkwe, ie jändrän kuin bian gare munye. ¿Se mun Rün kä káinbti bári moto kuin munkrä se abko munkwe jändrän kuin kärädre ie abko ñan biandre kwe munye ya? ¡jännri! Munkwe dre dre kärädre ie, erere biandi kwe munye.

¹² Mdakäre abko, ni mda mdakwe jändrän kuin nuendre munkrä, ie mun töta nebe, ye kwrere munkwe jändrän kuin nuen ni mda mdakrä, ñobtä ñan angwane munkwe nünandre kore angwane, Kukwe Biani Ngöböke Moiséye amne kukwe tikani nitre Ngöbö kukwei niekákwe, ye mun rabare mike täte metre.

Jukwe krä chi

(Lucas 13.24)

¹³ Mdakäre abko, mun tö näin Ngöbö kánti ne ngwane, jukwe krä chi abko kánti ta mun rika, ñobtä ñan angwane jukwe kwata kri amne ji kwata kri abko käta niken ni ngwena kä ja tare nikakrä kánti amne ni kwati tä niken jukwe kwata kri yete ta amne ji kwata kri yehti.

¹⁴ Akwa jukwe amne ji käta niken ni ngwena nüne kärekäre Ngöböbe abko krä chi amne ni ñan raba dikekä nuäre bti, ye abko nebe tare ni kwati kräke, aisete ni braibe tä niken jukwe krä chi yete ta amne ji krä chi yehti.

Jesukwe ni töi bä mikani kri ngwäbtä

(Lucas 6.43-44)

¹⁵ Mdakäre abko, nitre ni ngökaka tä näin blite Ngöbö kábti tä niere, ye ngäniene munkwe ja ngibia, ñobtä ñan angwane obeja jáme kwrere tätre ja bä mike, bti tätre nüke mun kánti, akwa era metre niaratre töi abko lobo krübäte kwrere jire, bti tätre nüke.

¹⁶ Niaratre tä nüne ño, yebtä rükadre gare munye abko ti bike bä mike krörö: Kri mden mden tukwätetukwäte btä nita uba ngwä ötö ñakare. Erere arato, kri ochitukwä krie kwrere, btä ni higo ngwä ötö ñakare jire chi arato,

¹⁷ aisete kri kuin uba o higokrie kwrere abko käre ngwäta nebe kuin amne kri käme abko käre ngwäta nebe käme.

¹⁸ Ye abko, kri kuin ñan ngwä rabadre käme jire chi amne kri käme abko ñan ngwä rabadre kuin jire chi arato.

¹⁹ Kri mden kämekäme abko ngwä nebe ñakare kuin kuin abko erere tikakata, bti kitata ñukwäte abko garera munye.

²⁰ Ne aisete, nitre ni ngökaka ye tätre nüne ño, yebtä rüka gare munye.

²¹ Mdakäre abko, ñan ni jökrä kákwe niedi krörö tie: Ti Dänkien, niedi kwe tie abko köböire näin kä káinbti, akwa ti Rün tä kä káinbti abko tö dreye, ye erere nire nire tä nuene, käta mike täte, ni ye kwrere aibe näin kä káinbti.

²² Ne aisete Ngöböke kukwe ukadite ni jökrä kräke, ye näire ni kwati rabadi niere tie: Ti Dänkien, nunkwe Ngöbö kukwei kuin mikani gare ma kábti amne nunkwe üai kämekäme juantari mento ma kábti. Erere arato, nunkwe sribi kri ñan tuabare nuenbare kabre ma kábti arato, aisete nun rabadre nüne kärekäre kä káinbti mabe abko ni kwati rabadi niere kore tie.

²³ Akwa ye ngwane tikwe niedi krörö ietre: ¡Mun gare ñakare jire chi tie amne, mun abko kukwe nuenkä kämekäme, aisete nän mobe mento tibtä! tikwe niedi ietre.

Ju mikaka nibu

(Marcos 1.22; Lucas 6.47-49)

²⁴ Ye mden tita dirire abko ni iti tä ti kukwei nuen amne tä mike täte, ni ye abko ti bike bä mike krörö: Ni iti töbtä kákwe ju mikani jákwata ribi bti.

²⁵ Yehti ñü jatani jobe temen amne ño nikani niren niren kri jate amne müre nükani mate ribi krübäte ju yebtä, akwa ju ye mikani jákwatabti, aisete namani janknu amne ñan nikani temen. Ni ti kukwei mikaka täte abko ti tö nibi bä mikai kore.

²⁶ Akwa tita kukwe dirire ne ni iti kākwe kukwe nuadre, akwa ti kukwei mikadre tāte ñakare kwe, ni ye abko ti bike bā ñakare krörö: Ni iti tōi ñakare kākwe ju mikani angwane, ju ye abko mikani ūmanbti kwe.

²⁷ Yebti ñū jatani jobe temen amne ñō nikani niren kri jate amne müre nūkani mate ribi krübāte ju yebtä, kākwe ju kwitaninkä jōkrä temen, kākwe ju juani ngwarbe jōkrä kän. Ye kwrere abko nire nire ñan tā ti kukwei mike tāte abko ti tō nibi bā mikai kore. Abko kore se.

²⁸ Jesu kākwe blitabare ünän jōkrä kore angwane, ni kwati nāmane nāin ben, ye ñan tōi namani krütare jōkrä kukwe diribare kwe yebtä,

²⁹ ñobtä ñan angwane ni töbtä di kri kākwe diri ja di ngöi, kwrere jire Jesukwe diribare ietre amne, Kukwe Biani Ngöbökwé Moiséye dirikātre abko nāmane dirire, ye kwrere Jesukwe diribare ñakare. Yebtä abko ñan tōi namani krütare Jesu kukweibtä.

8

*Ni iti kwata bren lebra kisete abko Jesukwe mikani quinta
(Marcos 1.40-45; Lucas 5.12-16)*

¹ Jesu nāmane ngitiobtä, yebti nikaninta nebata ngitiobtä ngüsürü mda angwane, ni kwati nikani niara jiebti.

² Ye btäräbe ni iti bren lebra kisete, abtä ngütüete abko jatani Jesu ngäbti angwane, namani ngukudokwäbti temen Jesu ngwärekrei, kākwe niebare ie:

Ti Dänkien, ma tō ti mikaita quinta ne ngwane, ma di tärä nuendre gare tie, aisete makwe ti mikata quinta, ie ti tō nibi, niebare kwe ie.

³ Angwane Jesukwe kise mikani btä, kākwe niebare mda ie:

Ma rabata quinta, ie ti tō nibi, aisete gwängwarbe ma bike nebata quinta, niebare kwe ie. Ye btäräbe ni ye kwata ngütüete namaninta quinta jōkrä ngrabare.

⁴ Angwane Jesukwe niebare krörö mda ie:

Tikwe ma mirita quinta, ye makwe ñan nie jire chi ni mda mdaye, akwa ma rika ja kwata quinta mike tuare ni blitaka Ngöböbe ni mda mda diäreye amne ni bren kore tā nebata quinta abko kākwe jändrän mden mden biandre niebare Moisékwe, ye erere ma rika ngwena biandre Ngöböye. Yebtä abko ma nenante quinta abko rabadre gare ni jōkräye, abkokäre ma rika jändrän ye ngwena. Abko kore se, niebare kwe ie.

*Rükä dänkien romanobo kākwe tödekani metre Jesubti
(Lucas 7.1-10; Juan 4.43-54)*

⁵ Yebti Jesu nikani nebe juta Capernaümte angwane, rükä dänkien romanobo jatani iti nūke Jesu kanti ja di käräkäre ie,

⁶ kākwe niebare krörö:

Ti Dänkien, sribikä tikwe bren jume dikaro tikän amne ruen ñakare ngrabare abko kisete tā ja tare nike krübāte abko ti ki niere mae, makwe mikadre quinta abkokäre, niebare kwe Jesuye.

⁷ Angwane Jesukwe niebare mda ie:

Ye ti nāin miketa quinta makrä mtare, niebare kwe ie.

⁸ Abtä niarakwe niebare mda Jesuye:

Ti Dänkien, ni ütiāte ñakare ti ne kwrere abko gwiriete ni ütiāte ma ye kwrere nin rükadre jire chi ruen tie. Akwa sribikä tikwe rabadreta quinta abko makwe niedre jirekābe nete angwane, rabadita quinta abko gare tie abko ti tō nibi ribei mae,

⁹ ñobtä ñan angwane ni mda bāri ütiāte ütiāte, ben tita sribire, kätä dre nuemna tie, erere tita nuene. Erere arato, nitre rükä tā sribire tibe abko, tita juen, ye tā niken jōtrö ngwarbe. Jakwe, tita niere ie, jōtrö ngwarbe tā kite. Mdakäre abko, ni klabore tikwe, ie sribi ne nuene, tita niere, jōtrö ngwarbe tā nuene. Ne aisete, tita dre niere, erere tā nebe bare tāte jōkrä. Ye kwrere arato, makwe dre dre niedre sribikä bren tikwebtä abko erere rabadi bare tāte mae ruen tie, aisete tita ja di ribere kore mae. Abko kore se, niebare kwe Jesuye.

¹⁰ Yebtä abko, Jesu ñan tōi namani krütare mda ni ye kukwei nuare kore angwane, nitre nāmane nāin Jesube, ie Jesukwe niebare krörö mda:

Ti bike kukwe era erere niere munye abko krörö: Ni tödeke kwatibe Ngöböbti ni ne kwrere, nin ngāmi kwen jire tie nitre israelita ngätāite, amarebti ni menteni nūnanka juta mdara jire te tā tödeke kwatibe Ngöböbti nūke kwen mtare tie nere.

¹¹ Nebtä abko ti bike kukwe metre niere krörö munye: Nitre ñakare israelitare kā jōkräbti temen abko nāin nebe mröre ketetibe Abrahambe, Isaabe amne Jacobobe kā kāinbti sete, Ngöböta gobrane ye kanti.

¹² Akwa mun israelita ye ara jire rabadre käne Ngöbö kanti kā kāinbti sete, akwa ñan rabadre bare kore, akwa kā bāri iko te Ngöbökwé mun kitadi ju bāre niara okwä bāre mento.

Ye kánti mun rabadi ja müaire krikri be amne ja tare nikabtä mun rabadi ulire dikaro. Abko kore se, niebare Jesukwe ni kwatiye.

¹³ Yebti rükä dänkien ye ie Jesukwe niebare:

Ti di tärä ni sribikä makwe mikakrä kuinta kore nibi era makrä, ye erere nibira kuinta, aiseite nänta ja gwiriete, niebare Jesukwe ie.

Ye erere bkänä sribikä namaninta kuinta batibe.

Jesukwe Simón köbrän merire mikaninta kuinta

(Marcos 1.29-31; Lucas 4.38-39)

¹⁴ Abti Jesu nikani Pedro gwiriete angwane, Pedro köbrän merire abko nämane bren drangwan kisete, abtä nämane kitanintbe jänbti temen, kánti Jesu namani.

¹⁵ Jesu namani kánti angwane, Jesukwe nuaninbtä jirekäbe kisebtä. Ye btäräbe drangwan nikaninbe batibe btä, namanintabe kuinta, aiseite nükani dikekäta krö, kä nikani mrö känene Jesu bukakrä.

Jesukwe ni bren bren mikaninta kuinta

(Marcos 1.32-34; Lucas 4.40-41)

¹⁶ Yebti kä jatanina iko angwane, ni kwati nämane ja tare nike üai käme kisete abko jänikani Jesu kánti angwane, Jesu nikani üai käme ye juentari mento, erere üai käme ngitiani jökrä mento btäre. Erere arato, ni bren ño ño erere jänikani Jesu kánti yete abko Jesukwe mikaninta kuinta jökrä arato.

¹⁷ Kukwe nakaninkä kore, ye abko ni Ngöbö kukwei niekä kira kädian nämane Isaías abko köböire Ngöbö käkwe kukwe krörökrörö niebare kira Jesubtä abko erere rabadre bare, abkokäre kukwe nakaninkä kore se:

Niarakwe bren dianinkä nibtä amne, ni mikaninta kuinta jökrä kwe, *Isaías 53.4*
abko Ngöbökwie niebare kore Jesubtä Isaías köböire abko erere namani bare.

Ni rikadre Jesu jiebtä abko tare

(Lucas 9.57-62)

¹⁸ Yebti ni jatani nuke kwati dikaro Jesu bäre temen namani tuen ie angwane, ja ngwiamna Nö Okwä Kri Galilea kwärä nakri kwe.

¹⁹ Ye btäräbe ni iti Kukwe Biani Ngöbökwie Moiséye dirikä käkwe krötabare Jesu ken, käkwe niebare ie:

Dirikä, ma näin mdente erere, ye kánti ti rikai siba mabe, niebare kwe Jesuye.

²⁰ Abtä Jesukwe niebare mda ie:

Nukro känsenta, kwe kä mkä tärä nünankrä amne, nukwä nikenkä käinta abko juda tärä kwe nünankrä arato, akwa ti Ni Kä Nebtä Ngobo ne abko kwe kä ñakare jire chi jadükakrä. Ne aiseite ma tö jatai tibe ne ngwane, ma rabadre juto biare nüne ti kwrere arato, niebare Jesukwe ie.

²¹ Yebti ni mda nämane näin Jesube käkwe niebare mda ie:

Ti Dänkien, ti tuemetre nikenta ken ja gwiriete, abti ti rün krütadi, tikwe doboi mikadi, ye täbti ti näin mabe, niebare kwe Jesuye.

²² Angwane Jesukwe niebare mda ie:

Nitre ie Ngöbö gare ñakare abko tä ni ngwäkäre kwrere Ngöbö ngwärekrei, ye tuemetre ni ngwäkäre doboi mike amne ma abko jata janknu ti jiebtä, niebare Jesukwe ie.

Jesukwe müre amne ñö mikani kwekbe

(Marcos 4.35-41; Lucas 8.22-25)

²³ Yebti Jesu nakwani rute amne nitre ja töitikaka ben abko nikani siba niarabe.

²⁴ Nikanina ñöbti se kwrere angwane, batibe müre jatani mate ribi krübäte ñübe mni mni, ye abko namani ñö kite jökrä rute, aiseite ru jatani niken ñöte nguse, akwa Jesu abko nämane kibien.

²⁵ Yebtä abko nitre ja töitikaka ben nikani gaenkrö, käkwe niebare ie:

¡Nun Dänkien, ni dentari! Ni kite niken ñöte nguse, namani niere Jesuye.

²⁶ Abtä Jesukwe niebare ietre:

¡Se ñöbtä munta tödeke ñakare dikaro Ngöböbti amarebti mun nibi nekwetekä krübäte dikaro ja jiebtä ye! niebare Jesukwe ietre.

Jesukwe ñäkäbare kore ietre, bti nükani dikekä krö, käkwe ñäkäbare müreye amne ñöye. Ye btäräbe müre amne ñö namani kwekbe jökrä.

²⁷ Yebtä abko, nitre ja töitikaka Jesube ñan töi namani krütare mda Jesubtä, kä namani niere jae kwärikwäri:

¿Ni ne abko ni ñö amarebti müre amne ñö käta kukwei mike täte jökrä se? namani niere jae kwärikwäri.

*Ni Gadarabo nibu, btä Jesukwe üai käme juanintari mento
(Marcos 5.1-20; Lucas 8.26-39)*

²⁸ Yebti Jesu nikani nebe Nö Okwä Kri Galilea kwärä nakri kākä Gadara kanti angwane, ni nibu btä üai käme nämane nüne abtä nämane nüne kā mkäte rōkabti abko jatani nūke Jesu ken. Nitre nibu btä üai käme nämane nüne ye abko nämane romon krübäte, aisete nämane nüne rōkabti, ye kāntita ni ñakare jire iti ie ja namani nūke töre dikekä yere.

²⁹ Akwa Jesu nikani yere angwane, nitre nibu ye namani niere krörö Jesuye:

Jesu Ngöbö Odei, ¿ye ñobtä ma kite nun nike nete ye? ¿Ngöbökwē kā kitani nun mikakäre ja ngie nuen, ye kānenkri ma kitera nun mike ja tare nike ya ño yere? namanintre niere Jesuye.

³⁰ Kä ye kanti abko känime se kwrere mtü nämane kabre mröre

³¹ angwane, üai käme kākwe niebare Jesuye:

Ma bike nun juentari mento nitre nebtä ne ngwane, mtü tuen sete sebtä makwe nun juan, niebare kwe ie.

³² Angwane Jesukwe niebare üai kämeye:

Mun nän mento nitre nebtä, niebare mda kwe.

Ye btäräbe üai käme ye nakwaninkäbe mentokwäre nitre yebtä, bti nikanintre jōkrä mtü kabre yebtä. Ye btäräbe mtü jōkrä kākwe ja tākäninte, nikani betekä jōkrä ja jiebtä kā btä motokwäre, nikani ngitiekä jōkrä ñöte, kanti müre neketani jōkrä.

³³ Angwane nitre mtü ngibiaka nämane yete abko ngitiani jōkrä, nikanintre nebata jutate angwane, nitre nibu btä üai käme nämane abko btä kukwe nakaninkä ño ño amne kukwe nakaninkä ño ño mtübtä ye abko tanbare jōkrä kwetere jutate yete.

³⁴ Yebtä abko nitre nünanka juta yete nikani kwati Jesu kanti, namanintre Jesu kanti angwane, Jesukwe kā mikadrekä kā ye kanti abko namani ribere ie.

9

*Ni ruen ñakare ngrabare abko Jesukwe mikaninta kuinta
(Marcos 2.1-12; Lucas 5.17-26)*

¹ Yebti Jesu nakwaninta rute nitre ja töitakaka benbe, bti nikanintreta mda Nö Okwä Kri Galilea kwärä nakri amne nikani nebata ja käite Capernaümte.

² Abti ni iti ruen ñakare ngrabare abko kisete ñan dikaka kā abko nämane mikani jänkwatabti abko ni mda mda nükani ngwena Jesuye. Nitre nükani ni bren ngwena amne ni bren ye namani tödeke kwatibe Jesubti namani tuen ie angwane, Jesukwe niebare ni bren yeye:

Ma ngite Ngöbö rüere, ye tikwe dininkä mabtä, aisete kā raba nuäre mabtä ti mräkä, niebare kwe ie.

³ Angwane Kukwe Biani Ngöbökwē Moiséye dirikatre nämane ruäre yete abko namani töbike krörö Jesubtä: Ni noko kākwe ñäri kore se abko ñäri Ngöbö ara jire rüere kwe, namanintre nütüre Jesubtä.

⁴ Akwa niaratre namani töbike kore ye abko gani Jesukwe, abtä niebare kwe ietre:

¿Ye ñobtä amarebtä mun töi kämekäme dikaro kore ye?

⁵ ¿Dre abko bäri nuäre niedre: Ma ngite Ngöbö rüere ye tikwe dininkä mabtä abko bäri nuäre niedre ya? o ¿Näin krö, nanta abko bäri nuäre niedre ya? Ye abko, ma ngite Ngöbö rüere ye tikwe dininkä mabtä abko bäri nuäre niere, ñobtä ñan angwane raba bare ya, ñakare ya ñan jatadre munye.

⁶ Akwa ti Ni Kä Nebtä Nogo, ne ie Ngöbökwē ja di biani mun ngite Ngöbö rüere diankakäre munbtä kā nebtä, ye abko ti bike bä mike tuadre munye, niebare Jesukwe.

Ye btäräbe ni ruen ñakare ngrabare ye ie Jesukwe niebare:

Näin krö. Jänkwata makwe ye den kisete amne nanta ja gwiriete, niebare kwe ie.

⁷ Angwane jötrö ngwarbe ni ruen ñakare ngrabare ye naninkrö krö amne nikaninta ja gwiriete.

⁸ Nitre nämane yete okwäbtä kukwe nakaninkä kore, yebtä abko namanintre nekwetekä krübäte, akwa Ngöbökwē ja di biani kri ni kā nebtäye namani tuen ietre, abtä namani Ngöbö käikitekä.

*Jesukwe Mateo käräbare ja töitike jabe
(Marcos 2.13-17; Lucas 5.27-32)*

⁹ Abti Jesu nikaninta angwane, kā jändrän ütiä biankrä gobran romanobokrä, kanti ni nämä tākänintbe iti jändrän ütiä kärere. Ni kädian nämane Mateo, ye abko ti ara, btä Jesu okwä rababa. Angwane Jesukwe nieba tie:

Brän tibe, nieba kwe tie.

Angwane jötrö ngwarbe ti Mateo rükaba dikekä krö, rikaba Jesu jiebtä.

¹⁰ Yebti Jesu nāma mröre ti gwiriete angwane, nitre jändrän ütiä käräkä gobran romanobokrä rükaba kwati amne ni mda mda nāma tuen käme ni israelita ruäreye abko rükaba amne rababa tākänintbe jökrä mesabtä mröre ketetibe Jesube amne nitre ja töitikaka Jesube ye ben gwaire arato.

¹¹ Jesu nāma mröre kore, ye tuaba nitre bariseokwe angwane, nieba kore kwetre nun ja töitikaka Jesube yeye:

ζNitre jändrän ütiä käräkä gobran romanobokrä abko käme amne ni mda mda kukwe nuenkä kämekäme se gare ñakare dirikä munkwe seye ya amarebti tä mröre jäme ketetibe ben se? nieba kwetre.

¹² Nitre bariseo kākwe ñākāba kore, ye jaraba Jesuye angwane, Jesukwe ja bä mikaba ni kräkä bianka kwrere amne nitre jändrän ütiä käräkä amne nitre kukwe nuenkä kämekäme, ye bä mikaba ni bren kwrere, kākwe nieba krörö mda ietre:

Ni kuin bren ñakare ye abko ñan tä ni kräkä bianka ribere jabtä, akwa ni bren bren abtä tä ni kräkä bianka ribere jabtä abko ti tö nibi niei munye.

¹³ Ne aisete Ngöbö Kukwei tä tikani krörö ti bike niere, nebtä mun rika ja töitike gwi: Munkwe ni mda mda ngwiandre ruentari tare jae, ye abko ie ti tö bäri.

Akwa mun tädre jändrän bien jirekābe kukwadre tie, ye abko ie ti ñan tö bäri, *Oseas 6.6* niebare Ngöbökwē. Yebtä mun rika ja töitike, ñöbtä ñan angwane ni ie ja ruen kuin deme au Ngöbö ngwäreki mun kwrere, ye abko ñan ti jatani kärere Ngöbö kukwäre, akwa ni kukwe kämekäme nuenkä Ngöbö rüere ye mden abko ti jatani kärere Ngöbö kukwäre. Abko kore se, nieba Jesukwe nitre bariseoye.

*Ñöbtä nitre ja töitikaka Jesube ñan nāmane ja bäine
(Marcos 2.18-22; Lucas 5.33-39)*

¹⁴ Yebti nitre nänkä Juan Bautistabe kākwe krötaba Jesu ken, kākwe nieba ie:

Nun nänkä Juanbe btä nitre bariseo, nunta ja bäine Ngöbökrä, ζse ñöbtä abko nitre ja töitikaka mabe abko ja bäine ñakare Ngöbökrä sere? nieba kwetre Jesuye.

¹⁵ Abtä Jesukwe kukwe bä mikaba ietre, kākwe ja bä mikaba ni ja mikaka gure kwrere amne nitre ja töitikaka ben abko bä mikaba kwe ni ja mikaka gure kukwe muko kwrere, kākwe nieba ietre:

Ni iti tä niken ja mike gure angwane, tä kukwe muko kwekwe nübaire kä ngwiankäre nuäre gwaire jabtä, ζye ngwane ni ja mikaka gure ye tädre siba bentre angwane, kukwe muko ye raba moto ulire ja bäine ya? Ñakare, akwa ni ja mikaka gure ye järıkadre kukwe muko okwäbti, ye ngwane rabadre ja bäine abko kore rakadikä nitre ja töitikaka tibe yebtä.

¹⁶ Mdakäre abko, ti bike kukwe mdara jire bä mike krörö munye:

Dän ngututu gudıkadre dän kukwän btinbti angwane, dän kukwän btin tä dän ngututu kwaenkä bäri mda abko kisete dän ngututu rötadreteta angwane, rötadrete bäri kri mda, aisete ni ñan raba dän ngututu gudike dän kukwän btinbti.

¹⁷ Erere arato, chibo kwata dikani kira uba döi ngwäre, te ni ñan raba uba döi mräre keke mikadre kwaka, ñöbtä ñan angwane uba döi bänän jatadre dime amne rikadre nokrekä, ye kākwe chibo kwata ngututu trekadre amne rikadre ngwarbe uba döi kwaka ben ngöi jökrä arato. Mden kisete, uba döi mräre mikadre kwaka abko kekadre chibo kwata btinte, uba döi amne chibo kwata ñan rikadre ngwarbe. Abko kore se, nieba Jesukwe nitre nänkä Juanbe yeye.*

Ngäbäkre krütani abko Jesukwe mikaninta nire amne meri bren abko mikaninta kuinta kwe

(Marcos 5.21-43; Lucas 8.40-56)

¹⁸ Jesu nāma blite kore, ye btäräbe ni iti ji dokwäte nitre israelita ngätäite jataba, rikaba ngitiekä ngukudokwäbti temen Jesu ngwäreki, kākwe nieba krörö ie:

Ti ngänkän küre güwä tikän, akwa ma rikadre tibe, kākwe kise mikadre bti angwane, rükadreta nire nibi ruen tie, aisete ti ki ma kärere btä ye, nieba kwe Jesuye.

¹⁹ Ye mden kisete, Jesu rikaba dikekä amne rikaba ni ji dokwäte yebe amne, nun ja töitikaka Jesube rikaba siba ben arato.

²⁰ Angwane abko meri rikaba iti Jesu jiebtı. Meri ye abko kä kwä jätäbti kubura nikani bren dbä tibiere abko kisete nāmane ja tare nıke. Meri ye abko kākwe krötaba ja ken Jesu trökri, kākwe dän Jesubtä nuabtaba tiebe köräbtä,

* **9:17** Kukwe dirıbare Jesukwe abko dän btin amne chıbo kwata btin kwrere. Erere arato, kukwe dirıbare mekera abko dän ngututu amne chıbo kwata ngututu kwrere, aısete nitre ja töitıkaka Jesube nin rabadre Jesu kukwei mıke täte gwaire kukwe dirıbare mekera ye ben, ñöbtä ñan angwane kukwe dirıbare Jesukwe abko bä jene kukwe mdakrä aısete.

²¹ ñobtä ñan angwane rababa töbike krörö: Tikwe dän körä aibe nuadrebtä Jesubtä angwane, ti rabadreta quinta, nibi ruen tie, rababa nütüre kore, aisete dän nuabtaba kwe Jesubtä.

²² Meri ye käkwe dän nuabtaba Jesubtä angwane, Jesu rikwitateba ja jiebti, käkwe niara tuaba ja käne, bti nieba krörö kwe ie:

Ti mräkä, makwe tödiri kwatibe tibti, köböire ma nibirate quinta, aisete makwe kä ngwian nuäre jabtä, nieba Jesukwe ie.

Ye btäräbe meri ye rababata kuin batibe.

²³ Yebti Jesu rikaba janknu mentokwäre nebe ni ji dokwäte ye gwiriete angwane, nitre nörä jükaka dobo mikakrä ye namanina biare nörä jüke dobobti, btä Jesu okwä rababa. Erere nitre mürü ngwäkä müaikä nämane ngetrekä krikri be, btä Jesu rababa.

²⁴ Angwane Jesukwe nieba ietre:

Ngäbäkre merire noko küre ñakare, akwa tä kibien, aisete mun nän jökrä mento nete, nieba kwe ietre.

Abtä nitre ye rababa Jesu kötaire jökrä mda.

²⁵ Akwa Jesukwe juantariba jökrä mento, bti Jesu rikaba nebe gwi, käkwe mürü ngwäkä ye kaba küdebtä angwane, ngäbäkre merire ye rükabata krö batibe.

²⁶ Kukwe rakakaba kore ye abko kädrie rikaba batibe jökrä kä ngrabare temen Galileate.

Ni nibu ie kä tuen ñakare abko Jesukwe mikaninta quinta

²⁷ Ni ji dokwäte gwiriete Jesu nämä, yebti rikabata angwane, ni nibu ie kä tuen ñakare abko rikaba ngwänenkä kri krörö Jesu jiebti:

jrei David tukwe mräkä, nun ngwen ruentari tare jae! rikaba niere Jesu jiebti.

²⁸ Yebti Jesu rikaba gwä angwane, nitre nibu ie kä tuen ñakare ye käkwe krötäba Jesu ken angwane, Jesukwe nieba ietre:

¿Ti di tärä mun okwä mikakräta quinta ye abko era munkrä amne yebti munta tödeke ya? nieba Jesukwe ietre.

Niaratre käkwe nieba mda:

jñäri nun Dänkien! nieba kwetre Jesuye.

²⁹ Angwane Jesukwe kise mikaba niaratre okwäbtä, bti nieba kwe mda ietre:

Munta tödeke ño tibti, ye erere raba bare munkrä, nieba Jesukwe.

³⁰ Ye btäräbe niaratre okwä rababata kuin batibe amne kä rababa tuenta kuin ietre. Yebti Jesukwe mäträba krörö mda btätre:

Tikwe mun okwä mirita quinta, ye munkwe ñan nie jire chi ni mda mdaye, nieba kwe ietre.

³¹ Akwa niaratre nikaninta krire ji ngrabare angwane, Jesukwe mikabata quinta ño ye tanbare jökrä kwetre kä ngrabare temen Galilea yete.

Ni kukwe ñakare abko Jesukwe mikani blite

³² Nitre nibu ye rikabata krire, ye btäräbe ni mdara jire jatäba nuke Jesu kanti ni iti kukwe ñakare abko btä üai käme nämane nüene abko rükaba ngwena Jesu kanti.

³³ Jesukwe üai käme juantariba mento ni yebtä, ye btäräbe rababa blite kuin angwane, ni nämä kwati yete abko ñan töi rababa krütare mda, kä rababa niere krörö:

Kukwe nibi nakenkä ni okwäbtä noko kwrere ni ngämi tuen jire chi bati kä Israelite nete, rababa niere kore.

³⁴ Akwa nitre bariseo abko rababa niere krörö:

Üai käme dänkien kri ara jire käkwe ja di bini ie, ye mden diebtä abko üai käme junintari mento kwe ye, rababa niere kore Jesubtä.

Sribikä ñakare bököän Ngöbökrä

³⁵ Yebti sinagoga nämä juta krikrite amne juta kiakiate Galilea, kantikanti Jesu rikaba dikekä kwäräkwärä dirikäre mda. Ngöbö jatanina nuke gobrane nibti abko kukwe kuin btä Jesu nämä dirire angwane, ni bren bätäkä ngwarbe kisete nämane ja tare nike abko Jesu rababa miketa quinta.

³⁶ Akwa ni nämane kwati dikaro rababa tuen Jesuye angwane, nitre ye rababa ruentari tare kri Jesuye, ñobtä ñan angwane obeja ngibiaka ñakare abko jändrän krübäte tä nike bäri amne di ñakare ja ngibiakrä rüe ngäniene, aibe kisete tä nebe dräre, ye kwrere jire nitre ye rababa tuen Jesuye.

³⁷ Abtä nun ja töitakaka ben, ie nieba krörö kwe:

Nura nena biare kabre ötädre, ye kwrere ni kwati tä juto biare ngwiandre Ngöböye, akwa sribikä ñakare bököän,

³⁸ aisete sribi Bkänkä Ngöbö käkwe sribikä mda mda juandre jötrö sribire abko munkwe ribe ie, nieba Jesukwe nunye.

10

Jesukwe nitre ja tōitikaka ben juani Ngōbō kukwei dirire

(Marcos 3.13-19; 6.7-13; Lucas 6.12-16; 9.1-6)

¹ Yebti nun ni jātābti nibu ja tōitikaka Jesube abko Jesukwe kārāba, bti ja di bianba kwe nunye ūai kāme juantarikrā mento. Erere arato, ni bren bātākā ngwarbe abko nunkwe mikadreta kuinta, abkokāre ja di bianba kwe nunye.

² Nun ni jātābti nibu ja tōitikaka Jesube abko nere:

Bāri kāne abko Simón (Simón ne arabe kādian nāmane Pedro arato)
amne Andrés. Andrés ne abko Simón etba,

Santiago amne etba kwe Juan.

Niaratre nibu ne abko Zebedeo ngobo.

³ Felipe amne Bartolomé; Tomás amne ti Mateo.

Ti ne mden nāmane jāndrān ūtiā kārere gobran romanobokrā.

Santiago (Santiago ne abko Alfeo ngobo) amne Lebeo. Lebeo ne arabe kādian nāmane Tadeo arato.

⁴ Simón cananista amne mrā abko Judas Iscariote. Judas ne mden kākwe Jesu kitani ngise rūeye mrā.

⁵ Jesukwe nun ni jātābti nibu juanba dirire angwane, nun tōi tikaba krōrō kwe:

Nitre űakare israelita tā nūne, ye kāntikānti mun űan rika. Erere arato, nitre Samariabo tā nūne, ye kāntikānti mun űan rika.

⁶ Akwa nitre israelita tā nianinte obeja kwrerekwrere, ye ara jire kānti mun rika,

⁷ kākwe diri krōrō ietre: Ngōbō kebera nūke gobrane nibti, munkwe nie ietre.

⁸ Amne ni bren bren abko munkwe mikata kuinta. Erere arato, ni krūtānikrūtāni abko munkwe mikata nire amne, ni ngūtūete ngrabare lebra kisete abko munkwe mikata kuinta amne nire nire btā ūai kāmekāme tā nūne abko munkwe juantari mento btātre. Mdakāre abko, tikwe ja di bini munye sribi ne nuenkrā, ye abko tikwe bini ngwarbe munye, aisete munkwe sribi ne nuen angwane, munkwe űan ūtiā kārā arato.

⁹ Mdakāre abko mun rika angwane, mun űan rika ngwian orore, platāre amne cobrere ngwena jire chi jae.

¹⁰ Ye kwrere arato, mun űan rika mrō ngwena droare jae amne, mun rika dān jabtābe te amne mun űan rika dān mdara jire ngwena kitadre jabtā. Erere arato, mun űan rika sandalia mda mda ngwena jae amne mun űan rika mōkān mda ngwena biare jae, űobtā űan angwane ni sribikā mun kwrere abko nitre mun kukwei kaka ngābti abko kākwe bukadre aisete.

¹¹ Mdakāre abko, mun rika nebe juta krite ya o juta chite, ye kānti nire tā biare mun kaen ngābti tōi kuinbti abko munkwe kānā iti. Ye kānti mun raba nūnentbe. Munkwe nūnantbe niara ye aibe gwiriete abti mun rika ta.

¹² Akwa mun rika nebe gwi angwane, ni nūnanka gwi ye ie munkwe kōbō ngwiantari jāme amne,

¹³ nitre nūnanka ju yete, ie munkwe kōbō ngwianditari, ye abko kadre ngābti kwetre ne ngwane rabadi nūnentbe jāme yete, akwa űan kadre ngābti kwetre ne ngwane, munkwe űan ja kukwe gadrete ngwarbe arato.

¹⁴ Erere arato, nane ju mdente mun rika nebe amne juta mdente mun rika nebe, ye kānti nire nire űan tō raba mun kain ngābti ja gwiriete amne űan tō raba mun kukwei tibtā mikai era ne ngwane, munkwe kā mikaka jirekābe ju o juta yete, kākwe dobro mnū ngrūkate ja ngotobtā, niaratre ngite au Ngōbō ngwārekri bā mikakāre ietre.

¹⁵ Ni yebtā ti bike kukwe era erere niere munye abko krōrō: Ngōbōkwe kukwe űkadite ni jōkrā krāke, ye nāire abko Ngōbōkwe nitre ye mikadi ja tare nike bāri kri krūbāte. Ngōbōkwe nitre juta Sodomabo amne nitre Gomorrabo mikani ja tare nike, yebti ta Ngōbōkwe niaratre mikadi ja tare nike abko ti bike niere era metre kore munye, nieba Jesukwe nunye.

Nitre ja tōitikaka Jesube kākwe ja tare nikadi Jesu dokwāre

¹⁶ Yebti Jesukwe nieba mda nunye:

¡Olo ketete ti kukweiye munkwe! Ni mda mda abko krūbāte lobo kwrere abko ngātāite tita mun juen obeja kwrere, akwa tbi tā juto biare mokrere jabtī, ye kwrere munkwe dikaka mokrere kwārā jabtī, akwa munkwe dikaka jāme ūtū jāme ye kwrere arato.

¹⁷ Munkwe űan dikaka okwā kwāre, űobtā űan angwane nitre krikri tā jī dokwāte jutate jutate, ye ie mun kitadi ngise amne niaratre kākwe mun ngō tikakamna sinagogate yete.

¹⁸ Mdakāre abko, tōdekabtā tibti mun jānāin ngite gobran ngwārekri amne jrei ngwārekri amne ye kānti munkwe blitadre tibtā nitre űakare israelitare ngwārekri, abkokāre mun jānāin ngite yete.

¹⁹⁻²⁰ Akwa nitre kukwe ukatekã, ngwãrekri mun járïka ngite angwane, munkwe blitadre ño jakrà amne munkwe dre niedre, yebtä munkwe ñan töbika dikaro, ñobtä ñan angwane mun járabara ja ngwãrekri yete angwane, ñan munkwe blitadi kaike au jakrà akwa, Ngöbö mun Rün abko Úai kwe ara jire kãkwe kukwe biandi munye ja kwetakrà jakrà amne blitadi kwe mun köböire munkrä.

²¹ Mdakãre abko, nitre tödekaka tibti abko etba kwekwe tödeke ñakare tibti abko kãkwe kitadi ngise müre ketadre amne ngãbãkre tödekaka tibti abko rün kwe amne meye kwe kãkwe kitadi ngise müre ketadre arato. Erere arato, ngãbãkre rün amne meye tödekaka tibti ye abko ngobo kwekwe tödekaka ñakare tibti rikwitadi rüere, kãkwe kitadi ngise müre ketadre. Ne abko rabadi nakenkä kore nitre tödekaka tibti btã.

²² Angwane, ni kwati mãtä rabadi munbtã tödekabtã tibti, akwa nire nire kãkwe nünandikã dite jabtã, kãkwe ñan ti rükandrete abti krütadre, ni ye abko Ngöbökre dianditari.

²³ Ne aiseite juta te mun raba, ye kãnti mun rüere raba nãin kisere mun jiebti mun mikakãre ja tare nike tödekabtã tibti ne ngwane, mun gitia juta mdate. Mun ngãmi dikekã juta kwatirekwatire te kã ngrabare temen kã Israelite, ye kãnenkri ti Ni Kã Nebtä Ngobo abko jatadita ne abko ti tö nibi niei metre kore munye.

Ñan ni mda jürã ngwiandre jabtã

²⁴ Mdakãre abko, ni ja töitikaka ye abko ñakare bãri ütiãte ni dirikã ye krãke amne ni klaborre ye ñakare bãri ütiãte bkãnkã kwe ye krãke.

²⁵ Ne aiseite ni dirikã ti kwrere kãkwe ja tare nikadre ño, ye kwrere ni ja töitikaka ben tädre juto biare ja tare nike. Erere arato, sribi bkãnkã kãkwe ja tare nikadre ño, ye kwrere ni klaborre kwe tädre juto biare ja tare nike sribi bkãnkã ye kwrere. ¿Ti abko ju dãnkien kwrere akwa ti abko Beelzebú* ara nieta tibtä mtare, se mun ti mrãkãtre ñan kãdiandre kore arato ya? Jãñri, kãdiandre jökrã kore ni mdakwe, nieba Jesukwe.

Ñan kã jürã ngwiandre blite Jesubtä

(Lucas 12.2-7)

²⁶ Yebti Jesukwe nieba krörö mda nunye:

Ni kwati rabadi mun rüere tikwe nini munye, akwa munkwe ñan ni mda mda ye jürã ngwian jabtã, ñobtä ñan angwane jãndrãn nuenta kaike tiebe ye abko ñan tä nebe kãrekãre tiebe. Erere arato, jãndrãn rükaninte kaike, ye abko ñan tä nebe rükaninte kãrekãre,

²⁷ aiseite tita kukwe niere kaike kã ikote kwrere munye, ye abko mun rika kãdriere ni jökrã ngwãrekri kã ngwenbti amne, blitata tiebetiebe ni olote, kwrere jire tita blite munbe, ye abko mun rika niere jubti kãin amne munkwe ngrate kriki kukwe nuadre ni mda mdaye.

²⁸ Mdakãre abko, ni mda raba mun ngrabare aibe kãmike, akwa ñan raba mun úai mike ja tare nike kãrekãre, aiseite munkwe ñan ni mda jürã ngwian jabtã; akwa Ngöbö abko raba mun úai kite mun ngrabare ye ben ngöi kã ja tare nikakrà kãnti, Ngöbö ye aibe abko jürã ngwian jabtã munkwe.

²⁹ Ye abko, nukwã kiakia rürümointa kubu abko ütiã bianta bãri brai, aiseite ngwian bianta mnamube ütiãre, akwa Ngöböta nukwã ye tarere, aiseite mun Rün kã kãinbti ñan töta nebe nukwã ye tuaimetre ngataen angwane, ñan tä ngataen jire chi kwati kã nebtã.

³⁰ Amne mun ara jire abko dokwã drüen kratirekratire abko tä gare jökrã Ngöböye,

³¹ aiseite Ngöbökrã mun abko bãri ütiãte kri nukwã kabre kabre bti ta, aiseite mun raba ja tare nike angwane, munkwe ñan kã jürã ngwian jabtã.

Nikwe ñan Jesu rükandrete

(Lucas 12.8-9)

³² Mdakãre abko, nire nire tä nekete tibe abko niedre metre kwe ni mda mda ngwãrekri, ni ye abko jen tikwe abko tikwe niedi arato Ngöbö ti Rün ngwãrekri kã kãinbti sete.

³³ Akwa nire nire kãkwe ti rükandrete ni mda mda ngwãrekri, ni ye abko gare ñakare tie abko tikwe niedi Ngöbö ti Rün ngwãrekri kã kãinbti sete arato.

Ni kwati rabadi rüere jabe kwãrikwãri Jesu dokwãre

(Lucas 12.51-53; 14.26-27)

³⁴ Erere arato, ti jatani kã nebtã, ye abko ñan ti jatani ni jökrã mikakãre nüne jãme jabe kwãrikwãri abko munkwe nütü; akwa ti jatani abtä ni kwati tädi rüere jabe kwãrikwãri.

³⁵ Ne aiseite ti dokwãre ngãbãkre rikwitaita rün kwe rüere amne ti dokwãre ngãbãkre merire rikwitaita meye kwe rüere. Erere arato, bosi rikwitaita bie rüere arato.

³⁶ Ne aiseite nitre ja mrãkãre gwi arabe rikwitadita ja rüere kwãrikwãri ti dokwãre, ñobtä ñan angwane ruãre abko rabadi tödeke tibti, ruãre ñakare.

* **10:25 Beelzebú.** Nitre israelita nãmame Satana kãden Beelzebú arato, aiseite Beelzebú abko Satana ara.

³⁷ Mdakäre abko, nire nire këta rün amne meye tarere bëri tikrä, ni ye abko ñan rabadre jire chi tikwe. Erere arato, nire nire këta ngobo amne ngänkän tarere bëri tikrä, ni ye abko ñan rabadre jire chi tikwe.

³⁸ Erere arato, ni kämikata niken krusobtä angwane, nita niken kruso doboko ngwena au jakrä, ye kwrere nire nire këkwe ñan kötä mikadre au jakrä ja tare nikakäre tikrä amne krütakäre tikrä ne ngwane, ni ye ñan rabadre jire chi tikwe.

³⁹ Ne aiseté, nire nire ie ja kwata rabadi ruentari tare, këkwe ja ngibiadi au nünakäre nuäre kä nebtä, ni ye abko këkwe ñan nünandi kërekäre Ngöböbe; akwa nire nire ie ja kwata rabadi ruentari tare ñakare ja tare nikakäre ti dokwäre, ni ye abko këkwe nünandi kërekäre Ngöböbe.

⁴⁰ Mdakäre abko, nire nire këkwe mun kadre ngäbti, ni ye abko këta ti ne ara jire kaen ngäbti, ñobtä ñan angwane mun tä näin blite tikrä aiseté. Erere arato, nire nire këkwe ti kadre ngäbti, ni ye abko këta Ngöbö ti juanka kaen ngäbti arato.

⁴¹ Erere arato, ni Ngöbö kukwei niekä rükadre angwane, niara abko Ngöbö kukwei niekä abtä nirekwe kadi ngäbti ja gwiriete, ye ütiäre abko ni Ngöbö kukwei niekä ie jändrän biandre Ngöbökwé, ye kwrere Ngöbökwé biandi arato ni niara kaka ngäbti yeye. Erere arato, ni nüne metre Ngöbö ngwäreki, ye nire nire këkwe kadre ngäbti ja gwiriete angwane, niara nüne metre abtä tä kaen ngäbti, aiseté ni nüne metre Ngöbö ngwäreki, ie sribi ütiä biandi Ngöbökwé, ye kwrere biandi kwe arato ni niara kaka ngäbti yeye.

⁴² Erere arato, nitre bobre bobre tödekaka tibti ne ie nire nire këkwe ñö tibo aibe biandi chi tomnane, akwa ye abko Ngöbökwé ütiä biandi ie abko ti tö nibi niei metre kore munye. Abko kore se, nieba Jesukwe nunye.

11

Jesukwe blitabare Juan Bautistabtä

(Lucas 7.18-35)

¹ Nun ni jätäbti nibu abko töi tikaba ünän jökrä kore Jesukwe, yehti Jesu rikaba Ngöbö kukwei kuin ye dirire amne mike gare kä ngrabare temen kä Galileate.

² Kä ye ngwane abko Juan Bautista nämáne ngite kä teri angwane, Kristo namani sribi kri ñan tuabare nuene kri abko gani kwe. Abtä nitre nänkä Juanbe abko Juankwe juani ruäre nebe Jesu kënti.

³ Ye erere bkänä nitre ye nikani, nikani nebe Jesu kënti angwane, nieba krörö kwetere Jesuye:

Ma abko ni Dianinkä juandre Ngöbökwé rükadre ni ngätäite niebare, ye erere ma ara nükani ya o nunkwe ni mdara jire ngibiadre abko nun juanba ngwentari mae, nieba kwetere ie.

⁴ Angwane Jesukwe nieba mda ietere:

Tita dre dre niere abko kukwei nuri munkwe amne tita dre dre nuene tuata munkwe, ye erere mun nän niereta Juanye.

⁵ Amne munkwe nie krörö ie arato: Ni okwä kä drünente abko ie kä nibi tuenta kuin amne ni nakwente abko nibi dikekäta kuin kröta. Erere arato, ni bren bren lebra kisete abko kwata nibi nebeta kuin jökrä amne ni olo ngidianinte abko ie ni kukwei nibi ruenta kuin. Erere arato, ni krütanikrütani abko nibi nüketa nire amne ni bobre bobre abko ie Ngöbö kukwei kuin mika nibi gare abko munkwe nie Juanye.

⁶ Erere arato, nire nire këta tödeke tibti amne ti ne ara nükani tä nütüre amne ñan tä trö kwite tie, ni ye abko ie Ngöbökwé ja di biandi amne ni yebtä kä rabadi nuäre tikwe nini abko munkwe nie kore Juanye. Abko kore se, nieba Jesukwe ietere.

⁷ Yehti nitre juani Juankwe ye nikaninta angwane, nitre nämáne yete ye ben Jesu rikaba blite krörö Juanbtä:

¿Mun nikani ni ñö tuakäre kä kaibete? ¿Mikä juankata mürekwe nekwäre sekwäre, ye këta ni töi kwitaka jene jene nekwäre sekwäre bä mike, ni ye kwrere tua nikani munkwe ya?

⁸ ¿Mun nikani ni kore tuen ñakare ne ngwane, mun nikani ni ñö tuakäre? ¿Ni ja ükaninte kuin këkwe dän ütiäre kri kitani jabtä nämáne yete abko mun nikani tuen ya? Ñakare, ñobtä ñan angwane ni dän ütiäre kri kitani jabtä, ni ye kwrere abko tä nüne jrei gwiriete amne ñan tä nüne kä kaibete abko garera munye ruen tie.

⁹ ¿Akwa mun nikani ni ñö mike ñäräre metre kä kaibete? ¿Mun nikani ni Ngöbö kukwei niekä mike ñäräre ñan ñan? Jänri, mun nikani ni kore mike ñäräre, akwa Juan ye abko bëri Ngöbö kukwei niekä kri abko mun nikani tuen.

¹⁰ Juan ye mdenbtä tarä tä tikani krörö Ngöbö Kukweibtä. Ngöbökwé niebare:

Tikwe ja kukwei ngwianka juandi iti ma känenkri.

Niarakwe ni töi mikadi biare ma këne, ji ükateta biare ye kwrere,

Malaquías 3.1

abko tā tikani kore Ngöbö Kukweibtä Juanbtä.

¹¹ Ne aisete, ti bike kukwe era erere niere munye abko krörö: Ni jökrä därebare kä nebtä, ye ngätäite ni ñakare jire iti abko bäri ütiäte Juan Bautistakrä; akwa nire nire bäri bobre, ütiäte ñakare, bti Ngöböta gobrane, ni ye abko bäri ütiäte Juankrä.

¹² Juan Bautista nükani, ye ngwane mentokwäre abti kä nüke mtare abko Ngöbö rükadre gobrane nibti abko tā niren mentokwäre Ngöbö di krihti, akwa Ngöböta gobrane nibti ye rüe tarä arato abko töta nebe juain ngwarbe.

¹³ Mdakäre abko, Ngöbö Kukwei jire jökrä tā blite tibtä, yebti Juan jatani nüke.

¹⁴ Ni Ngöbö kukwei niekä kira kädian nämane Elías abko rükadreta nieta Ngöbö Kukweibtä, ye abko Juan ye ara btä tā niere kore abko tita niere munye. Ne abko mun mden mden tö raba ti kukwei mikai era käkwe mika era.

¹⁵ Nire nire käta ti kukwei nuen, ye käkwe ti kukwei ketate ja olote.

¹⁶ Mdakäre abko, mun nünanka kä ne näire abko ti bike bä mike krörö: Kä jändrän rürümoinkrä jutate, kanti ngäbäkre tā nebe takänintbe temen, käta ñäke krikri mräkä mda mdaye, yebtä ti bike mun bä mike krörö:

¹⁷ Ngäbäkre tā niere mräkäye: Nunkwe nörä jürü tarä mikakrä munye, akwa mun ñan tö nibi tarä mikai, abtä ka ni moto mikakrä ulire abko nunkwe nini mda, akwa munkwe müaniri ñakare arato abko ngäbäkreta niere. Ye mden kwrere munta niere Juanbtä amne tibtä, aisete tita mun bä mike kore.

¹⁸ Juan nükani angwane, üai käme tā btä, aisete ñan tā mröre kri amne ñan tā dö ñaen, munta niere rüere.

¹⁹ Yebti ti, Ni Kä Nebtä Ngobo rükaba mda angwane, ti abko mröre büle krikri amne ti dö ñaen krübäte munta niere tibtä. Mdakäre abko, ti ja getaka ni diän diän ben amne nitre jändrän ütiä käräkä gobran romanobokrä tā tuen käme munye abko ben tita ja gete, abtä munta ñäke ti rüere arato. Ye mdenbtä abko mun ngäbäkre kwrere tita niere, akwa ni nüne töbtä era metre Ngöbö diehti nun kwrere, yebtä abko nun abko ni jen Ngöbökre era metre abko nunta bä mike.

*Jesukwe ñäkäbare nitre israelita rüere
(Lucas 10.13-15)*

²⁰ Yebti juta kanti sribi kri ñan tuabare nuenbare kabre Jesukwe, akwa nitre nünanka ye te käkwe ja töi kwitaninta ñakare Ngöbö kukwäre, yebtä abko Jesukwe ñäkäba ietre, käkwe nieba krörö:

²¹ ¡Aingwaree mun nünanka juta Corazinte amne juta Betsaidate! Mun bobre jakän, ñöbtä ñan angwane sribi kri ñan tuabare nuenbare tikwe mun ngätäite, ne kwrere nuendre juta Tiro amne Sidón kanti, akräke nitre ye te käkwe ja töi kwitadreta Ngöbö kukwäre amne, dän ngutu jüräre kitadre kwetre jabtä amne rabadre takänintbe ngübrunte ja moto ulire kukwe kämekäme nuenbtä bä mikakrä.

²² Ye mden kisete, Ngöbökre kukwe ükadite ni jökrä kräke kä mrä angwane, Ngöbökre mun nünanka juta Corazinte amne juta Betsaidate mikadi ja tare nike bäri kri nitre nünanka juta Tirote amne Sidónte ye kräke.

²³ ¿Amne mun nünanka juta Capernaümte, mun ye abko Ngöbökre mikadi bäri ütiäte, munta nütüre ya? Ñakare, ñöbtä ñan angwane Ngöbökre mun ye kitadikä kä ja tare nikakrä kanti, ñöbtä ñan angwane sribi kri ñan tuabare namani bare mun ngätäite nete, ye kwrere rabadre bare juta Sodomate, akräke juta ye tädre mtare.

²⁴ Ye mden kisete, Ngöbökre kukwe ükadite ni jökrä kräke kä mrä angwane, Ngöbökre mun mikadi ja tare nike bäri nitre nünanka juta Sodoma ye kräke abko tita niere metre munye. Abko kore se, niebare Jesukwe.

*Jesu aibe ie Rün gare metre
(Lucas 10.21-22)*

²⁵ Yebti Jesukwe blitaba Ngöböbe, käkwe nieba krörö:

Ti Rün, ma abko kä käin amne kä temen Dänkien. Tita ma käikitekä, ñöbtä ñan angwane nitre bikaka töbtä krikri abko okwäte makwe kukwe metre makwe ye rükaninte, akwa ni bobre bobre töi ñakare ñakare ruen ie abko ietre makwe mikani gare,

²⁶ ma tö namani ño, erere makwe nuenbare. Yebtä tita ma käikitekä, nieba Jesukwe Rün Ngöböye.

²⁷ Yebti nitre nämä Jesu kukwe nuen, ye ie Jesukwe nieba mda:

Ti Rün käkwe jändrän jökrä mikani gare tie. Niara aibe ie ti gare. Erere arato, ti Rün gare ñakare ni mda mdaye, akwa ti niara Odei ne aibe ie niara gare amne ti tö rabare mikai gare nire nireye, ye erere ie rabadi gare.

²⁸ Mun mden mden dräre amne tribe doboko mun kötärä, mun ye abko jakwe jökrä tie amne tikwe mun mikadi jadüke.

²⁹ Amne kri oto mäkätä nbi dokwäbtä tä niken ngwena, ye kwrere ti bike sribi tikwe bien ngwiandre munye, ye abko munkwe ka ngäbti abti munkwe ja töitika tibe, ñöbtä ñan angwane ti abko moto jäme amne tita bike tidrä ni mda mdabtä, yebtä munkwe ja töitika tibe amne munkwe jadükadi jäme,

³⁰ ñöbtä ñan angwane ja töitika tibe ye abko kri oto doboko mäkätä nbi dokwäbtä abko tä niken ngwena, ye kwrere tita tribe mike mun kötärä ngwiandre munye, ye abko juto amne nuäre ngwiandre. Abko kore se, nieba Jesukwe.

12

*Jesu abko bäri ütiäte köbö jadükakrä yebti ta
(Marcos 2.23-28; Lucas 6.1-5)*

¹ Abti bati Jesu rikaba dikekä nura ngätäite köbö jadükakrä näire mda angwane, nun ja töitikaka ben, ie mrö rababa krübäte. Abtä nun rikaba trigo ngwä ötö ji ngrabare amne nun rikaba kwete.

² Angwane nitre bariseo nämä näin siba nunbe käkwe nun tuaba amne nieba kwetre Jesuye:

Jändrän ñan nuendre jire chi köbö jadükakrä näire nieta abko nitre ja töitikaka mabe nibi nuene tuen sete, nieba kwetre ie.

³⁻⁴ Abtä Jesukwe nieba mda ietre:

Bati David btä rükä kwekwe ie mrö namani krübäte angwane, kukwe nuenbare krörö kwetre: Ju nuäre ngwiandre kánti ban deme nämane mikani Ngöbö ngwärekre, ye kánti David nikani gwä, ban diani kwe, bti kwetani kwe rü muko kwekwe ben. Ban ye abko, David btä nitre nämane ben käkwe ñan kwetadre jire chi, ñöbtä ñan angwane nitre blitaka Ngöböbe ni mda mda diäre aibe käkwe kwetadre niebare Ngöbökwé, akwa niaratre käkwe kwetani, akwa namani ngite ñakare. Kukwe yebtä mun tarä ñäke Ngöbö Kukweibtä ruen tie.

⁵ Erere arato, ju blitakrä Ngöböbe kánti nitre blitaka Ngöböbe ni mda mda diäre tä sribire köbö jadükakrä näire, akwa Kukwe Biani Ngöbökwé Moiséye ye kätä mike ngite ñakare arato, yebtä abko mun tarä ñäke arato ruen tie.

⁶ Ye abko, ju blitakrä Ngöböbe abko ütiäte kri, akwa nitre blitaka Ngöböbe ni mda mda diäre ñakare ngite, akwa nita iti nete abko bäri ütiäte ju blitakrä Ngöböbe ye kräke abko ti tö nibi niei munye.

⁷ Ngöbö Kukwei kätä niere krörö ne abko ngämi nüke gare munye. Ngöbökwé niebare: Munkwe ni mda mda ngwiandre ruentari tare jae, ye abko ie ti tö bäri.

Akwa mun tädre jändrän bien jirekäbe kukwadre tie, ye abko ie ti ñan tö bäri, *Oseas 6.6* niebare Ngöbökwé. Kukwe ye ngämi nüke gare metre munye ruen tie, ñöbtä ñan angwane rabadre gare metre munye, akräke ni ja mike ngite ñakare ye munkwe ñan kitadre ngise ngwarbe, munta nitre ja töitikaka tibe kite ngise ye kwrere.

⁸ Akwa köbö jadükakrä näire yebti ta ti Ni Kä Nebtä Ngobo abko bäri ütiäte, aiseite nitre ja töitikaka tibe rabadre dre dre nuene köbö jadükakrä näire abko ti di tarä niere ietre. Abko kore se, nieba Jesukwe nitre bariseoye.

*Jesukwe ni mikaninta kuinta köbö jadükakrä näire
(Marcos 3.1-6; Lucas 6.6-11)*

⁹ Yebti Jesukwe kä mikakaba kä ye kánti, bti rikaba sinagoga mdate.

¹⁰ Sinagoga ye kánti Jesu rababa angwane, ni iti küde ngrötani kwärä nämä yete angwane, nitre bariseo tö rababa Jesu kitai ngise, käkwe nieba ie:

¿Kukwe Biani Ngöbökwé Moiséye tä kä bien nie ni bren miketa kuinta köbö jadükakrä näire ya? nieba kwetre Jesuye.

¹¹ Angwane Jesukwe nieba mda ietre:

¿Mun mden kwe obeja tädre krati abko köbö jadükakrä näire betadrekä nguse munkän, ye mun ñan janandre dentari jakrä ya? Jänri, mun janandre dentari jakrä.

¹² Ni bäri ütiäte obejakrä, ye mdenbtä abko ni rabadre ni bren miketa kuinta köbö jadükakrä näire abko Kukwe Biani Ngöbökwé Moiséye kätä köböi bien nie, nieba Jesukwe nitre bariseoye.

¹³ Ye btäräbe Jesukwe nieba ni kise ngrötani yeye:

Küde ngököte, nieba kwe ie.

Ye btäräbe ni ye käkwe küde ngökateba angwane, kise rababata kuin jökrä ie, kise kuin kwäräkri ye kwrere kise rababata.

¹⁴ Yebtä abko nitre bariseo rikaba ju bäre mda amne Jesu kämikadre ño kwetre abko rikaba kädriere kena jabe kwäräkri.

Jesu dianinkä Ngöbökwé

¹⁵ Nitre bariseo rababa kukwe miketbe kore Jesu rüere, ye gaba Jesukwe angwane, kä mikakaba kwe yete, akwa rikaba angwane, ni rikaba kwati ben. Ye ngwane abko ni bren bren erere Jesu rababa miketa kuinta jökrä.

¹⁶ Akwa Jesu käkwe ñan ja kädriemna ni mda mda ngwärekre nitre mikaninta kuinta kwe yeye.

¹⁷ Kukwe niebare krörö Ngöbökwé niara kukwei niekä Isaiás köböire rabadre bare, abkokäre kukwe rakakaba kore:

¹⁸ Monso tikwe abko tä nete ne tuen.

Tikwe niara ne dianinkä jenena jakrä.

Niara tare kri tikwe amne käi nuäre kri tibtä.

Niara nebtä tikwe ja Üai mikadi nüne amne nitre ñakare israelitare, kräke Ngöböta kukwe miketbe kuin abko mikadi gare kwe ietre.

¹⁹ Erere arato, niarakwe ñan ñäkädi ja dokwäre amne kukwe ñan jaradre ji ngrabare ngrente ja dokwäre.

²⁰ Nitre bobre bobre tä mikä kroko trekani kwrere, ye abko niarakwe ñan juandi ngwarbe. Erere arato, ñotra jutra mikata krire amne ngübü aibe tä nebe neen krä chi käne, ye kwrere nitre tödekaka krire niarabti tä, ye abko niarakwe ñan di gadrekäta jire chi abti Ngöbö jatadi kukwe ükete metre nikrä ni rüebe.

²¹ Amne nitre ñakare israelitare abko käkwe tödekadi niarabti, abko niebare kore Isaiakwe abko erere rababa bare Jesubtä.

Isaiás 42.1-4

*Beelzebú nämane Jesubtä nie namani rüere
(Marcos 3.20-30; Lucas 11.14-23; 12.10)*

²² Yebti ni iti ie kä tuen ñakare amne kukwe ñakare arato abko btä üai käme nämane nüne abko järükaba Jesu kánti angwane, Jesukwe mikabata kuinta, aisete kä rababa tuenta ie, rababa blite kuin amne üai käme juantariba mento btä Jesukwe arato.

²³ Yebtä abko nitre nämä Jesube yete abko ñan töi rababa krütare jökrä Jesubtä, kä rababa niere:

¿David mräkäkri Ngöbökwé ni diandrekä iti abko rükadre niebare, ni ye abko Jesu noko ara ya ño amarebti se? rababa niere.

²⁴ Akwa kukwe ye jarabare nitre bariseoye angwane, rababa niere krörö Jesu rüere:

Üai käme dänkien kädianta Beelzebú, ye aibe käkwe ja di biani ni nokoye abko diebti tä üai kämekäme juentari mento se, rababa niere Jesu rüere.

²⁵ Nitre bariseo rababa töbike blo kore Jesu rüere, ye Jesukwe gaba btätre, abtä nieba kwe mda ietre:

Kä mdente erere kánti nitre nünanka yete käkwe ja ñäkädrebtí ketebu rükäre jabe kwäríkwäri, ye ngwane nitre ye tä kä juen ngwarbe au jakän. Erere arato, juta amne ni ja mräkäre nünanka ketetibe käkwe ja ñäkädrebtí ketebu rükäre ja rüere kwäríkwäri, ye ngwane nitre ye ñan rabadre nüne jire chi mda ketetibe, aisete juta amne ju juandre ngwarbe au jakän kwetre.

²⁶ Ye kwrere arato, Satana ara käkwe ja juandretari mento angwane, Satana ara jire tätre rüere ja rüere ñan ñan. Satana käkwe ja ñäkädrebtí ketebu ja rüere kwäríkwäri au, ye ngwane Satana di tädre kri janknu ya niere tie munkwe.

²⁷ Üai käme dänkien kädianta Beelzebú, diebti tita üai käme juentari mento munta niere tibtä, aisete nitre reketaka munkri ye abko ie nireta ja di bien üai käme juantarikrä mento abko ti tö nibi ngwiantari munye. Niaratre tä üai käme juentari arato, aisete munta ñäke blo tibtä abko bä mikata niaratrebtä, aisete mun kitadre ngise kwetre ruen tie.

²⁸ Akwa tita üai käme juentari mento Ngöbö Üai Deme diebti era metre, ye ngwane Ngöbö nükänina gobrane mun ngätäite abko bä mikata tikwe.

²⁹ Kukwe nebtä abko ti bike kukwe bä mike krörö: Satana abko ni dite kwrere. Ni dite tä ju jen kwe ngbiare ni gokä ngäniene angwane, ni dite nünanka gwi ñan mäkärete angwane, ni gokä ñan raba jire iti, kä rabadre jändrän kwe denkä kän. Akwa mäkärete angwane, ni gokä rabadre jändrän kwe denkä jire jökrä kän. Ye kwrere ni ye btä üai käme tä abko ju Satanakwe kwrere. Ti bäri dite Satanakrä aisete, ti raba üai käme juentari mento nißtä Satanakän, ni gokäta jändrän denkä ni dite kän ye kwrere.

³⁰ Ye abko nire nire ñan tä nekte tibe, ni ye abko tä rüre ti rüere amne, nire nire ñan tä sribire gwaire tibe abko tä sribi tikwe metekä jirekäbe tikän.

³¹ Ne aisete ti bike niere krörö munye: Ni kä nebtä käkwe ja mikadre ngite ño erere Ngöbö rüere amne ñäkäre taretare kwe Ngöbö rüere, akwa ye Ngöbökwé diandrekä mento btätre; akwa ñäkäre käme taretare kwe Ngöbö Üai Deme ara jire rüere ne ngwane, Ngöbökwé ñan diandrekä jire chi mento btä.

³² Erere arato, ti Ni Kä Nebtä Ngobo, rüere nire nire kákwe ñákádre taretare, akwa ye abko Ngöbökwé diandiká mento btá; akwa nire nire kákwe ñákádre káme taretare Ngöbö Úai Deme ara jire rüere ne ngwane, Ngöbökwé ñan kukwe ye diandreká jire chi mento btá, aiseite rabadi ngite kárekáre Ngöböye ká ne ngwane amne kárekáre rabadi ngite janknu Ngöböye abko ti tó nibi niei munye, nieba Jesukwe.

Jesukwe kukwe bá mikani kri ngwá kuin amne kri ngwá káme btá
(Lucas 6.43-45)

³³ Yebti Jesukwe niaratre kukwei bá mikani kri ngwá kwrere, kákwe nieba mda ietre: Kri kuin aibe ngwáta nebe kuin amne kri káme aibe ngwáta nebe káme arato, aiseite kri ngwá ño ño yebtä abko kri mden kuin amne mden káme abko tá núke gare nie.

³⁴ Mun abko tbi krübáte kwrere jire, aiseite mun moto amne mun tói kámekáme, ye abko munkwe kukwe kuin niedre ño se. Ni moto ño amne ni tói ño, ye kwrere nita blite.

³⁵ Ne aiseite ni moto kuin ne ngwane, nita blite kuin ni mda mda die mikakrá, akwa ni moto káme ne ngwane nita blite ngwarbe dián dián jirekábe, ye abko ñan tá ni mda mda die mike, ñobtä ñan angwane niara abko tói káme, yebe tá nüne.

³⁶ Akwa ti bike kukwe era erere niere munye abko krörö: Kä mrá angwane, Ngöbö jatadi kukwe úkete ni jökrá kráke angwane, ñobtä munkwe kukwe dián dián niebare ngwarbe ye abko mikadi gare jökrá Ngöbö ngwárekri.

³⁷ Ne aiseite mun kukwei jen munkwe ye ara jire köböire mun ngite ñakare, niedi Ngöbökwé munye o, mun ngite, niedi kwe munye arato. Abko kore se, niebare Jesukwe nitre bariseoye.

Sribi kri ñan tuabare káräbare Jesuye
(Marcos 8.12; Lucas 11.29-32)

³⁸ Yebtä abko nitre bariseo amne Kukwe Biani Ngöbökwé Moiséye dirikátre kákwe nieba mda Jesuye:

Diriká, Ngöbökwé ma juani bkánä ya, ñakare ya abko nun tó nibi gai metre, aiseite sribi kri ñan tuabare nuene jötrö nun okwábtí tuadre nunye nete, nieba kwetre Jesuye.

³⁹ Abtä Jesukwe nieba mda ietre:

Mun núnanka ká ne ngwane abko moto kámekáme amne munta Ngöbö tarere munta niere, akwa káre munta niara tuemetre, abtä tikwe sribi kri ñan tuabare aibe nuendre mun okwábtí, ie mun tóta nebe, akwa sribi kri ñan tuabare ye tikwe ñan nuendre jire chi mun okwábtí, munta ribere ye kwrere. Akwa Ngöbö námáne Jonábe, kákwe sribi kri ñan tuabare nuenbare Jonákrá, ye kwrere aibe Ngöbökwé bá mikadi mun kráke.

⁴⁰ Jonás kákwe núnabare köbömä dibire rare gwa kri teri, ye kwrere arato ti, Ni Kä Nebtä Ngobo ne rabadi köbömä dibire rare dobote nguse.

⁴¹ Ngöbökwé kukwe úkadite ni jökrá kráke ká mrá angwane, nitre núnanka kira juta Nínivete abko kákwe mun núnanka mtare ye kitadi ngise, ñobtä ñan angwane Jonás nikani Ngöbö kukwei niere nitre Níniveboye angwane, niaratre kákwe Ngöbö kukwei mikani táte amne kukwe kámekáme kitani jökrá temen kwetre Jonás kukwei köböire. Akwa tita nete mtare abko bári útiáte kri Jonákrá amne mun ñan tó ti kukwei mikai era jae, aiseite rakadiká kore munbtá.

⁴² Erere arato, Ngöbökwé kukwe úkadite ni jökrá kráke ká mrá angwane, jreina núnanka mobe mötarikri* nükani kira basare jrei Salomónye ye kákwe mun kitadi ngise arato, ñobtä ñan angwane Salomón námáne kukwe töbtá töbtá niere, ye jreina mobe jatani kukwe nuen jakrá, akwa tita nete abko bári útiáte kri Salomónkrá abko mun ñan tó ti kukwei nuai, aiseite rakadiká kore munbtá, nieba Jesukwe.

Úai káme tá niken mento, bti tá nüketa nibtä
(Lucas 11.24-26)

⁴³ Yebti Jesukwe nieba:

Mdakáre abko, ni iti btá úai káme tádre nüne, abti úai káme ye juandretari mento btá, úai káme rikadre ngwarbe kwärákwärá ká kánene jadükakrá jae ká kaibete, akwa ká ñan kwandre jire chi ie jadükakrá.

⁴⁴ Abtä rabadre töbike krörö: Ni námáne ju kwrere tikwe abko te ti námáne nüne, ye kánti ti bike nikenta, úai káme rabadre nütüre. Ye erere bkánä, úai káme ye rikadreta ni ye kánti, rabadreta yete angwane ká sókaninká merebe gwita temen amne ká úkaninte kuin gwita, akwa ká tókare, ni ñakare nüne gwí, kwrere jire ni ye kwandre úai kámeye.

⁴⁵ Angwane jötrö ngwarbe úai káme ye rikadre beteká, kákwe úai bári kámekáme niarakrá kánáandre krá kükü mda ja mukore, bti rikadre núnenta jökrá ni yebtä. Úai káme ye rabadrera

* 12:42 *Jreina núnanka mobe mötarikri.* Jreina ne abko námáne gobrane ká kádian námáne Saba kánti. Kukweta tikani btá 1 Reyes 10.1-13 yebtä.

nünenta kore ni yebtä angwane, ni ye rabadre ja tare nike bäri krübäte mda üai käme kisete, ye kwrere rakadikä mun nünanka kä ne ngwane yebtä. Abko kore se, nieba Jesukwe.

*Nire abko Jesu mräkä era metre
(Marcos 3.31-35; Lucas 8.19-21)*

⁴⁶ Jesu näma blite kore angwane, niara meye btä etbakantre rükaba jiebti abko tö rababa blitai ben, akwa niara meye btä etbakantre rababa ju bäre,

⁴⁷ aisetse ni iti käkwe nieba Jesuye:

Ma meye amne ma etbakantre tä ju bäre nokote abko tö nibi blitai mabe, nieba kwe ie.

⁴⁸ Abtä Jesukwe nieba mda ni yeye:

¿Nire abko ütiäte tikrä ti meye kwrere amne nire abko ütiäte tikrä ti etbakantre kwrere amarebti ye? nieba kwe.

⁴⁹ Bti nitre ja töitikaka ben näma yete, yebtä kise kitaba kwe, käkwe nieba mda:

Nire nire ütiäte ti meye tikwe kwrere amne ti etbakantre kwrere era metre abko erere tä nete ne,

⁵⁰ ñobtä ñan angwane ti Rün kä känbti ye nire nire käta kukwei mike täte, ni ye abko ti etba tikwe, ti ngwai tikwe amne ti meye tikwe. Abko kore se, nieba Jesukwe.

13

*Dobo ketabkä, btä Jesukwe kukwe bä mikani
(Marcos 4.1-9; Lucas 8.4-8)*

¹ Abti Jesu rikaba ju bäre angwane, rikaba Ñö Okwä Kri Galilea, kanti rababa tākänintbe ñö okwä köräbti.

² Ye ngwane abko, ni kwati käkwe ja ükkröba niara kukwei nuakäre. Abtä Jesu rankwaba rute, rababa tākänintbe amne, nitre käkwe ja ükkröba kwati btä ye abko rababa jökrä ñö köräbäre jateta temen.

³ Angwane Jesukwe kukwe keta kabre bä mikaba dirikäre ietre, käkwe nieba krörö:

Bati ni nikani iti nura metekä.

⁴ Nura metaninkä kwe angwane nura ruäre nikani mate ji ngrabare temen, ye abko nukwä jatani, käkwe kwetani jökrä kän.

⁵ Nura ruäre abko nikani mate jäkwatabti temen, ye kanti abko dobo ñakare bökän, aisetse nura ye nükani mure jötrö, akwa dobo ñakare mente nguse,

⁶ bti ñänä jatani ngire, käkwe nura mu ye kukwani jökrä amne ngätri ñakare arato, aisetse ngrötaninkä jökrä.

⁷ Nura ruäre abko nikani mate kökrä tukwätetukwäte ngätäite, ye abko nükani mure arato, akwa kökrä ye abko rirabare bäri jötrö nura mu yebti ta, käkwe kämikani.

⁸ Akwa nura ruäre abko nikani mate dobo kuinte, ye abko nükani mure amne, rirabare tuärebe amne ngwä namani kabrekabre btä. Datire datire ngwä namani gre ketarike, ruäre abko ngwä namani gre ketamä amne ruäre abko ngwä namani gre bti krä jätä btä. Ne abko nakaninkä kore.

⁹ Nire nire käta ti kukwei nuen, ye abko olo tärä ne ngwane, ti kukwei ne ketate ja olote kwe, kukwe ne rükadre gare kuin munye abkokäre, nieba Jesukwe ni kwati yeye.

*Ñobtä Jesukwe kukwe bä mikani
(Marcos 4.10-12; Lucas 8.9-10)*

¹⁰ Angwane nun ja töitikaka Jesube käkwe krötaba ja ken ben, käkwe nieba krörö ie:

Ñobtä mata kukwe bä mike bti mata dirire nitre kwati seye, nunkwe nieba Jesuye.

¹¹ Abtä Jesukwe nieba mda nunye:

Ngöbö rükadre gobrane ño nibti abko tä tiebe, akwa Ngöböta mike gare munye, akwa nitre se abko ie Ngöböta mike gare ñakare, aisetse tita dirire kore.

¹² Mdakäre abko, nire nire ie Ngöbö Kukwei nüke gare, ye abko ie Ngöbökwä ja kukwei biandi bäri mda amne Ngöbö Kukwei rabadi gare bäri kabre mda ie; akwa nire nire ie Ngöbö Kukwei gare ñakare, ye abko ie Ngöbö Kukwei gare kiakia abko Ngöbökwä diandikä jökrä kän.

¹³ Ye mden kisete, tita kukwe bä mike btä tita dirire nitre kwati seye, ñobtä ñan angwane nitre se ie kä tuen kuin kwrere, akwa tita sribi nuene okwäbti abko tuen ñakare ietre. Erere arato, ni kukwei ruen kuin ietre kwrere, akwa tita blite abko ñan tä nebe nüke gare ietre.

¹⁴ Kukweta nakenkä kore nitre sebtä mtare angwane, kukwe niebare ni Ngöbö kukwei niekä Isaiakwe abko tä neme bare abko krörö:

Munkwe ti kukwei nuadi blite bäri, akwa tita dre niere ñan rükadi gare munye.

Erere arato, tita sribi nuene mun okwäbti, ye abko munkwe tuadi bäri, akwa drekäre tita sribi ye nuene abko ñan jatadre munye,

¹⁵ ñobtä ñan angwane nitre noko käkwe ja dokwä mikanina ribi ti kukwei kräke, aiseté ñan tö namani sribi tikwe tuai.

Erere arato, ñan tö namani ti kukwei nuai, käkwe ja olo gu dikani ti kukwei ngäniene amne, ñan tö namani sribi tikwe tuai, abkokäre ja okwä jue mikani kwetre.

Mdakäre abko, ti kukwei ñan rükadre gare ietre amne tikwe ñan diandretari, abkokäre nuenbare kore kwetre, *Isaías 6.9-10*
niebare Isaiakwe.

¹⁶ Akwa mun abko btä kä rabadre nuäre, ñobtä ñan angwane mun abko okwä tärä sribi tikwe tuakäre amne mun olo tärä ti kukwei nuakäre, ye abko käi rabadre nuäre munbtä.

¹⁷ Ne aiseté ti bike kukwe era erere niere munye abko krörö: Sribi tikwe tuata ja okwä jenbti munkwe amne ti kukwei nuata ja olo jenbti munkwe, ye abko nitre Ngöbö kukwei niekä kwati nünanka kira amne nitre nünanka metre Ngöbö ngwäreki kwati abko tö namani tuai amne tö namani kukwei nuai, akwa erere tuani ñakare kwetre amne kukwe nuani ñakare kwetre kira, nieba Jesukwe nunye.

*Dobo ketabkä tä dre niere abko nere
(Marcos 4.13-20; Lucas 8.9-15)*

¹⁸ Jesukwe nieba mda:

Mdakäre abko, ni nura metakaka, btä tikwe kukwe bä miri ye abko tä dre niere metre abko kukwe nuen munkwe.

¹⁹ Ngöbö kite gobrane ni ngätäite, ye abko nire nire käta kukwe nuen, akwa ñan tä nuke gare ie, ni ye abko nura nikani mate ji ngrabare ye kwrere, ñobtä ñan angwane Ngöbö Kukwei tä nebe nura kwrere btä, akwa diablu tä kite, käta Ngöbö Kukwei ye denkä jökrä töite, mden nini tikwe ye.

²⁰ Amne ni ruäre abko käta Ngöbö Kukwei nuen, ye btäräbe käta nebe nuäre btä kare ngäbti, ni ye abko nura nikani mate jäkwatabti ye kwrere,

²¹ ñobtä ñan angwane nura nikani mate jäkwatabti abko ngätri ñan nämäne bökän, ye kwrere jire ni ruäre tä Ngöbö Kukwei kaen ngäbti, bti bä jötrö tä näin Ngöböbe, akwa tädre niken ja tare nike tödekabtä Ngöböbti, ye btäräbe tä Ngöbö Kukwei kiteta temen, bti tä nikenta ja jiebti.

²² Amne ni ruäre abko tä Ngöbö Kukwei nuen, akwa tä nakwen bäri jändrän kä nebtä jiebti, erere tä ja töi mike bäri sribi kä nebtä jiebti amne tä ngwian tarere bäri, ye abko käta ngökö. Ne aiseté ni ye abko nura nikani mate kökrä tukwätetukwäte ngätäite amne ngatani, ye tä nakenkä ni yebtä, aiseté nura ngatani ngwä namani ñakare, ye kwrere jire ni ye tä sribi nuene ñakare Ngöbökrä.

²³ Akwa ni ruäre tä Ngöbö Kukwei nuen amne tä nuke gare ie, käta niken sribi kuinquin nuene bätäkä ngwarbe Ngöbökrä, ye abko nura nikani mate dobo kuinte abko rirabare kuin amne ngwä kuinquin namani gre ketarike, ruäre gre ketamä, ruäre abko gre bti krä jätä, kwrere jire ni ye tä sribi nuene Ngöbökrä abko kukwe kore bä miri tikwe ye, nieba Jesukwe nunye.

Jesukwe kukwe bä mikani trigo amne nura kämenbtä

²⁴ Yebti ni jen Ngöbökwé rabadre nüne ni kämekäme ngätäite abti kä mrä angwane Ngöbökwé mikadi nüne jenena jabe, ye bä mikakäre Jesukwe nieba krörö ni kwati ye ye:

Ngöböta kite gobrane nibti ye rüere abko kukweta niken nakenkä, ne kwrere ni bike niere munye: Bati ni iti käkwe trigo nurai kuin metaninkä tirete jakrä,

²⁵ akwa ni jökrä nikani kibien angwane, kä bkänkä ye rüe jatani tiebe käkwe nura käme nökanii trigo nurai kuin ye ngätäite, bti nikaninta.

²⁶ Yebti trigo rirabare, namani ngwäre angwane, nura käme ye ngwä namani arato abko sribikätre käkwe gani.

²⁷ Angwane sribikätre ye nikani kä bkänkä kánti, käkwe niebare ie: Nun dänkien, makwe trigo nurai kuin metaninkä tirete jakrä, ¿se ño kánti abko nura käme se namanina tirete mae arato se? niebare kwetre.

²⁸ Abtä kä bkänkä käkwe niebare ietre: Ti rüe nükanii iti nura käme metekä tiebe tirete tie kwrere ye, niebare kwe. Angwane sribikätre ye käkwe niebare mda ie: ¿Nun rikadre nura kämekäme se erere jäkekä jökrä, ie ma tö nibi ya? niebare kwetre.

²⁹ Akwa kä bkänkä käkwe niebare mda ietre: Ñakare. Mun ñan rika jäkekä, ñobtä ñan angwane mun rikadre nura mu kämekäme ye jäkekä mtare angwane, trigo mu kuin ye räkädrekä ben gwaire siba.

³⁰ Ne aiseté tuadremetre niren ketetibe abko trigo öta näire angwane, tikwe trigo öta juandi ye abko käkwe nura kämekäme ye erere ükadikrö käne jenena mento, bti mäkädite

jökrä kwetre, kákwe kukwadi ñukwäte amne trigo ngwá kuinkuin ye erere abko ötadi kwetre, bti ju nura ngwá úkkrä tikwe, ye kánti kitadi gwi kwetre tikrá, niebare ká bkánkákwe abko nakaninká kore se, nieba Jesukwe.

Jesukwe kukwe bá mikani mostasa nuraitbá amne lebadurabtá
(*Marcos 4.30-34; Lucas 13.18-21*)

³¹ Yebti Jesukwe kukwe mdara jire bá mikaba, kákwe nieba:

Ngöböta kite gobrane nibti ye abko mostasa nurai chi kwrere. Ni iti kákwe mostasa nurai nökani tirete jakrá.

³² Nura jökrä munkwe, ngätäite mostasa nurai ye abko bäri kiakia, akwa nökadre tirete angwane, rabadre bäri kri nura jökrä bti ta angwane, nukwá jatadre nüne mostasa krie ye küde ngrabare, ye kwrere jire káne Ngöböta kite gobrane ni braibe bti, akwa mrá angwane Ngöbö rabadi gobrane ni kwatibti abko bá mikata nura chi yebtä, nieba Jesukwe.

³³ Erere arato, Jesukwe kukwe mdara jire bá mikaba, Ngöböta gobrane ni braibe bti káne, akwa mrá rabadi gobrane ni kwatibti ye bá mikakäre, kákwe nieba krörö:

Ngöböta kite gobrane nibti, ye abko rabadi niren lebadurata niren ye kwrere abko krörö: Meri iti kákwe lebadura kitani chi arina kabre te, bti mritani kwe abti lebadura nikani arina kabre ye ñäre jökrä, nieba Jesukwe.

³⁴ Jesukwe kukwe bá mikaba jökrä kore, btá blitaba kwe ni kwatibe amne niara námáne dirire angwane, käre kukwe bá mikaba kwe, aibehti diriba kwe.

³⁵ Jesukwe diriba kore, yebtä abko ni Ngöbö kukwei nieká kira kákwe kukwe niebare abko erere rababa bare abko krörö:

Tikwe kukwe bá mikadi, bti tikwe blitadi amne, Ngöbökwé ká dátebare kena, abti ká nüke mtare kukwe ruäre námáne kaibe tiebe Ngöbökwé abko tikwe niedi, *Salmos 78.2* abko ni Ngöbö kukwei nieká kákwe niebare kore Jesubtä, ye erere rababa bare.

Kukwe nura kuin amne nura káme ye tá dre niere abko Jesukwe niebare

³⁶ Yebti Jesukwe nitre kwati ye mikateba yete, bti rikabata nebeta gwi. Angwane nun ja töitikaka ben kákwe krötaba ken, kákwe nieba ie:

Nura mu kámekáme namani tirete makwe nini, ye abko tá dre niere metre abko makwe niedreta nunye abko nun tö nibi ribei mae, nunkwe nieba Jesuye.

³⁷ Angwane Jesukwe nieba mda nunye:

Ti, Ni Kä Nebtä Ngobo ne abko nura kuin metakaka

³⁸ amne ká temen ne abko tire kwrere. Nire nire bti Ngöböta gobrane ye abko trigo nurai mu kwrere amne nire nire tá nekete diablukri ye abko nura kámekáme mu ye kwrere.

³⁹ Amne ti rüe nura kámekáme metakaka ye abko diablu ara jire amne, ká nura öta näire ye abko ká mrá ká ne näin ta abko bá mikata amne nitre nura ngwá ötaka ötaka abko angeletre Ngöbökwé.

⁴⁰ Amne nura kámekáme ötata, bti kitata ñukwäte kukwadre, ye kwrere rakadikä ká mrá angwane,

⁴¹ aisete ká mrá angwane ti Ni Kä Nebtä Ngobo ne kákwe angeletre tikwe juandi angwane, nitre bti Ngöböta gobrane, ye ngätäite nire nire köböite ni mda mda tá ja mike ngite Ngöbö rüere amne nire nire kukwe nuenká kámekáme Ngöbö rüere abko angeletre ye kákwe úkadikró jökrä,

⁴² bti ñukwá jutra ngire krübäte te nitre ye kitadi jökrä kwetre. Ye kánti abko ni jökrä rabadi ja müaire krikri be amne tu ngöbe rabadi cherere jabtá ja tare nika kisete.

⁴³ Angwane nitre nünanka metre Ngöbö ngwäreki abko btäre ká rabadi nuäre amne ñänä träta nebe dirare, ye kwrere jire ká rabadi btäre ká nuärete Rün Ngöbö kwe kánti. Nire nire káta ti kukwei nuen kákwe kukwe ne ketate ja olote. Abko kore se, nieba Jesukwe nunye.

Jesukwe kukwe bá mikani ngwian kabrebtá amne perlabtä

⁴⁴ Yebti Jesukwe nieba krörö mda:

Ká gobrankrá Ngöbökwé abko ngwian kabre tädre rükaninte dobote nguse ye kwrere abko krörö: Ni iti námáne sribire ye kánti ngwian kabre ütiäte kri ye kwani ie angwane, niara kákwe ngwian ye úkaninta kánime ká ye kánti. Abti nikani, kákwe jändrän kwe erere rürümoinbare jökrä, bti nikani kákwe ká ye kökani jakrá, niara rabadre ngwian kabre ye káne abkokäre.

⁴⁵ Mdakäre abko, ni bti Ngöböta gobrane, ngätäite kukweta nakenká krörö arato: Ni iti jändrän ütiäte ütiäte rürümoinká rikai perla kuin* kánene kökadre jae.

⁴⁶ Erere bkänä, perla kuin ütiäte kri kwani ie angwane, nikani kákwe jändrän kwe erere rürümoinbare jökrä, bti nikani kákwe perla ye kökani jakrá.

* **13:45 perla.** Jändrän kädianta perla ye abko já kwrere amne bäri ütiäte kri.

Jesukwe kukwe bā mikani kradebtā

⁴⁷ Erere arato, krade kitata nōte angwane gwa bātākā ngwarbe tā niken te, ye kwrere ti bike Ngōbō gobrain bā mike abko krōrō:

⁴⁸ Nitre gwa gaka tā krade kite nōte gwaye. Yebti gwa tārā niken kabre kradete angwane, tādre jāke jate nō kōrābti. Tārā nebe ngwena nō kōrābti angwane, tātre niken ūekrō. Gwa kuinkuin erere tātre ūekrō kutiate jakrā amne gwa kāmekāme abko erere tātre kitekā.

⁴⁹ Ye kwrere kukwe rakadikā kā mrā angwane. Angeletre jatadi, kākwe nitre moto kāmekāme Ngōbō rüere diandikā jenena nitre nūnanka metre Ngōbō ngwārekri ye bāre mento,

⁵⁰ bti nitre moto kāmekāme Ngōbō rüere ye angeletre kākwe kitadi nūkwā jutrate. Ye kānti niaratre rabadi ja müaire krikri be amne tu ngō rabadi cherere jabtā nūkwā jutrate ja tare nika kisetē.

⁵¹ Yebti Jesukwe nieba mda:

¿Tikwe kukwe nini, ye nū gare jōkrā munye ya? nieba kwe nunye.

Jānri, nunkwe nieba kāre.

⁵² Angwane Jesukwe nieba krōrō mda nunye:

Ngōbōta gobrane nō nibti, yebtā Kukwe Biani Ngōbōkwe Moiséye dirikātre mden mden tātre ja tōitike, ye ngwane ni ju bkānkā ye kwrere jire tātre nebe, nōbtā nān angwane jāndrān nō nō tā ūkani kwetre gwi, ye ngātāite jāndrān mden abko mrāre amne mden abko kira diankata kwetre abko tā mike gare ietre, ye kwrere nitre dirikā kāta kukwe mrāre amne kukwe nakaninkā kira dirire, nieba Jesukwe nunye.

Jesu mikani ūtiāte nākare ja kāite Nazarete

(*Marcos 6.1-6; Lucas 4.16-30*)

⁵³ Jesukwe kukwe bā mikaba jōkrā kore, bti blitaba ünān jōkrā kwe, bti kā mikakaba kwe kā ye kānti amne rikabata ja kāite.

⁵⁴ Rikaba nebata ja kāite Nazaret angwane, rikaba dirire sinagogate angwane, ni jōkrā nān tōi rababa nebe krūtare niara kukwei nuare, kā rababa niere jae kwārikwāri:

¿Ni noko kākwe ja tōitikani mdenete amarebti kukwe gare krūbāte dikaro ie se? ¿Erere arato, sribi kri nān tuabare se abko tā nuene nō amarebti tārā nebe bare ie se?

⁵⁵ José sribikā kri kukwānbtā abko ngobo kwrere nibi tuen nunye. Erere arato, niara meye abko Mariā amne etbakantre abko Santiago, José, Simón amne Judas nān nān.

⁵⁶ Mdakāre abko, ¿niara se ngwai tātre nūne jōkrā ni ngātāite nete ruen tie ya amarebti mtare di kri dikaro se abko kwani mdenkri ie se? nitre nūnanka Jesu kāite ye rababa niere Jesubtā.

⁵⁷ Amne Jesu kukwei namani tare btātre. Abtā Jesukwe nieba krōrō ietre:

Ni Ngōbō kukwei niekā mikata ūtiāte kā mda mdabtī, akwa ja kāite btā mrākā juete abko mikata ūtiāte nākare nieta. Ye kwrere, mun nān tā ti mike ūtiāte jae. Abko kore se, nieba Jesukwe ietre.

⁵⁸ Angwane nitre nūnanka kā ye kānti nān rababa tōdeke Jesubti. Abtā sribi kri nān tuabare abko Jesukwe nuenba nākare kabre kā ye kānti.

14

Juan Bautista müre ketani

(*Marcos 6.14-29; Lucas 9.7-9*)

¹ Kā ye ngwane abko, Herodes Antipas nāmane gobrane kā Galileate angwane, Jesu namani sribi kri nān tuabare nuene abko gani kwe.

² Angwane nitre sribikā Herodekrā, ie Herodekwe niebare krōrō Jesubtā:

Juan Bautista tikwe kāmikamna, ye ara jire Ngōbōkwe mikaninta nire, aisete di tārā sribi kri nān tuabare nuenkrā ye, niebare kwe sribikāye.

³⁻⁴ Herodes kākwe niebare kore, nōbtā nān angwane niara etba Felipe nān muko kādian nāmane Herodías abko diani kwe kán. Yebtā abko Juan Bautista kākwe niebare Herodeye: Ma etba nān muko se makwe nān mikadre jire ja ken kán, Juan nāmane niere. Ye dokwāre abko Juan Bautista kamna ngite Herodekwe, bti kitamna ngite kā teri kwe, ye nūkaninta tōre ie, kākwe nākābare kore.

⁵ Herodes tō namani Juan müre ketani nākā dokwāre jae Herodíabtā, akwa ni kwati nāmane Juan mike ūtiāte jae ni Ngōbō kukwei niekā kwrere, aisete nitre ye abko jūrā namani Herodebtā. Abtā Juan müre ketani nākare kwe.

⁶ Akwa bati Herodes dārebare ye kōbōi erere nūkaninta angwane, Herodekwe bieta nuenbare jae kā ngwiankāre nuāre jabtā. Ye erere ni jōkrā nūkani angwane, Herodías ngānkān bati nikani tārā mike kwārākwārā se kwrere nitre nūbaibare Herodekwe ye

okwäbti. Herodías ngänkän namani tärä mike nuäre kwäräkwärä, ye abko kai namani nuäre krübäte Herodebtä,

⁷ kākwe ja kukwei biani krörö ie:

Ma tö dreye erere makwe kārā tie angwane, tikwe biandi mae, niebare kwe ie.

⁸ Angwane Herodías ye abko kākwe ngänkän ye tōi diani, aisete niebare krörö kwe Herodeye:

Makwe Juan Bautista dokwä mika blatote. Makwe bian tie nete, ie ti tö nibi, niebare kwe Herodeye.

⁹ Yebtä abko, Herodes moto namani ulire mda, akwa nitre nübaibare kwe ye okwäbti ja kukwei biani kwe, aisete ñan tö namani ja kukwei kitaita temen, kākwe Juan dokwä biamna blatote Herodías ngänkänye.

¹⁰ Ye erere bkänä, Juan Bautista nämane ngite kä teri abko Herodekwe dokwä tikakamna, erere dokwä tikaninkä,

¹¹ bti Juan dokwä ye mikani blatote, jänikani, biani Herodías ngänkän bati yeye angwane, niara kākwe bianinbe meye Herodiaye mda.

¹² Yebti Juan nämane ngite, ye kánti nitre nänkä ben nikani nebe angwane, Juan ngwäkä jänikani kwetre, bti doboi mikani kwetre. Abti Juan müre ketanina abko nikani niere Jesuye mda.

Jesukwe ni mili krärike bukani

(Marcos 6.30-44; Lucas 9.10-17; Juan 6.1-15)

¹³ Juan Bautista ara nükaniinta nire abko Herodes namani nütüre Jesubtä, ye gaba Jesukwe angwane, kä mikakaba kwe kä ye kánti mda amne rankwaba rute, bti rikaba kä kaibete Ñö Okwä Kri Galilea kwärä nakri. Angwane nun aibe rikaba Jesube, akwa Jesu rikaba ye nitre nünanka ja ken juta ngrabare yere kākwe gaba angwane, rikaba jökrä kä nõtäbti ta nebe Jesu ngäbti.

¹⁴ Yebti Jesu rikaba nebe ñö köräbti angwane nämä rute, rankwaba timon, ye btäräbe nitre rababara kwati yete ngibiare ngäbti, btä okwä rababa. Angwane rababa tuen bobre Jesuye amne nitre bren bren ngwian nämane kwetre, ye Jesukwe mikabata kuinta jökrä kräke.

¹⁵ Yebti kä jataba dere angwane, nun ja töitikaka Jesube kākwe krötäba ja ken ben, kākwe nieba ie:

Kä kitera dere amne nita kä kaibete nete. Ne kánti mrö ñakare, aisete nitre noko rikadre mrö kökö jae jutate, abkokäre juenta jirekäbe, nunkwe nieba.

¹⁶ Abtä Jesukwe nieba mda nunye:

Ñöbtä niaratre rikadreta, ie nun tö nibi. Niaratre buke munkwe, nieba kwe nunye.

¹⁷ Abtä nunkwe nieba mda ie:

Ban kunrikebe amne gwa krobu aibe tä nikwe, ¿se abko ni kwati se bukadre ño te? nunkwe nieba Jesuye.

¹⁸ Angwane Jesukwe nieba mda nunye:

Ban kunrike amne gwa krobu ye ngwen tie nete, nieba kwe.

Ye erere nunkwe bianba ie.

¹⁹ Angwane nitre nämä kwati yete, ye Jesukwe juanba täke jökrä temen temen mikäbti, bti ban kunrike btä gwa krobu, ye Jesukwe dianba kisete, kākwe nikraba kä käinbti amne kuin nieba btä kwe Ngöböye, bti ötakaba oto kiakia kwe, bti bianba kwe nun ja töitikaka benye angwane, nunkwe dräiba jökrä nitre kwati yebti.

²⁰ Nitre kwati ye kākwe mröba trinetrine jökrä, bti ni jökrä kākwe mröba ünän angwane, ban btä gwa oto rabateba abko nun ja töitikaka Jesube kākwe ükacröba kutia kwä jätäbti kubu jire.

²¹ Nitre kwati kākwe mröba yete abko ni brare brare aibe nämä mili krärike jire kākwe mröba amne, nitre merire merire btä ngäbäkre bati kiakia kākwe mröba arato, akwa ye tanba ñakare abko rakakaba kore se.

Jesukwe dikakabare ñöbti

(Marcos 6.45-52; Juan 6.16-21)

²² Yebti nun ja töitikaka Jesube abko rikadre niara käne nebe Ñö Okwä Kri Galilea ye kwärä nakri, ie Jesu tö namani, aisete nun juanba rute kwe, akwa niara abko rababa nitre kwati ye juenta.

²³ Abti nitre kwati ye nikaninante jökrä angwane, Jesu nikani kaibe nebe ngitiobti blitakäre Ngöböbe. Yebti kä namanina iko angwane, Jesu nämane kaibe ngitiobti blite Ngöböbe.

²⁴ Angwane ru te nun nāma nāin ye abko rikabara mente ñöbti amne kä jate abko rababa mobe köre. Angwane ñö jataba romon, rababa ru kitekä nekwäre sekwäre, ñöbtä ñan angwane müre rababa mate nun ngäbti, ye abko rababa ñö kitekä kore, kä rababa ru ngrükete nunbe.

²⁵ Yebti kä jatabara ngwen ja ken dekä angwane, batibe Jesu rikaba dikekä ñöbti nun ngäbti.

²⁶ Jesu jataba dikekä ñöbti, yebtä nun ja töitikaka ben okwä rababa angwane, nun rekwetakaba krübäte amne nun rababa ngrente krikri be amne kä jürä rababa krübäte nunbtä käkwe nieba:

¡Ni bākāi kite ni ngäbti ye! nun rababa niere.

²⁷ Akwa Jesu abko käkwe nieba nunye:

Mun ñan rekwetaka ngwarbe. Tita nāin, aisete munkwe ñan ti jürä ngwian, nieba kwe nunye.

²⁸ Angwane Pedro käkwe nieba mda Jesuye:

Ti Dänkien, ma ara tä dikekä ñöbti bkänä ne ngwane, ti rikadre dikekä siba ñöbti nebe ma kánti abko niere tie, nieba kwe ie.

²⁹ Jakwe, nieba Jesukwe ie.

Ye erere bkänä, Pedro nāma rute, rankwaba timon ñöte, rikaba dikekä ñöbti Jesu kukwäre.

³⁰ Akwa müre rababa mate dite Pedrobtä rababa tuen Pedroye, abtä rekwetakaba mda. Ye btäräbe jataba niken neen ñöte nguse, abtä ngrateba kri krörö kwe Jesuye:

¡Ti dentari ti Dänkien! nieba kwe Jesuye.

³¹ Ye btäräbe Jesukwe kaba küdehti, käkwe nieba mda ie:

¡Ye ñöbtä mata tödeke chi dikaro tibti ye! Ti di tarä täte ma mikakrä dikekä ñöbti abko makwe ñan miri era jae ye, nieba Jesukwe Pedroye.

³² Yebti Jesu rankwaba rute Pedrobe angwane, müre rabababe kwekbe jökrä.

³³ Angwane nun nāma rute ye erere rababa jökrä ngukudokwäbti temen Jesu ngwärekrei, käkwe nieba ie:

¡Ma abko Ngöbö Odei era metre bkänä! nunkwe nieba Jesuye.

*Jesu btä nitre ja töitikaka ben nükani juta Genesarete
(Marcos 6.53-56)*

³⁴ Yebti nun rikaba nebe Ñö Okwä Kri Galilea ye kwärä nakri kä Genesarete.

³⁵ Angwane nitre nünanka yete, ie Jesu rükaba gare, aisete jötrö ngwarbe Jesu nükani abko mikaba gare kwetere jabtä kä ngrabare temen kä ye kánti. Angwane ni kwati rükaba mräkä bren bren ngwena Jesu kánti, Jesukwe mikadre quinta abkokäre.

³⁶ Angwane nitre bren bren ye abko Jesukwe tuadremetre dän körä aibe nuenbtä jabtä amne rabadreta quinta abko mräkä rababa ribere ie. Ye erere bkänä, nitre bren bren rababa dän körä aibe nuenbtä Jesubtä angwane, rababa nebata quinta batibe jökrä abko rakakaba kore.

15

*Dre dre tä ni mike ngite Ngöbö ngwärekrei niebare Jesukwe
(Marcos 7.1-23)*

¹ Abti bati nitre bariseo btä Kukwe Biani Ngöbökwé Moiséye dirikätre nāmane Jerusalén abko rükaba Jesu kánti, käkwe kukwe ngwiantariba krörö ie:

¿Nun mräkä kirakira käkwe kukwe úkaninte nuendre,

² se ñöbtä abko nitre ja töitikaka mabe káta kite temen se? ¡Ni rabadre dbe Ngöbö ngwärekrei, abkokäre ni ngāmi mröre, kānenkri köbötikadre abti mrödre abko tä úkaninte kore amarehti nitre ja töitikaka mabe abko ñan tä köbötike jire chi mrökrä se! nieba kwetere Jesuye.

³ Abtä Jesukwe nieba mda ietere:

Ti bike kukwe ngwentari kwati munye arato abko krörö: ¿Ñöbtä kukwe biani Ngöbökwé nuendre nie abko munta kite jökrä temen, bti kukwe úkaninte au jakrä munkwe abko mikata bāri útiäte jae munkwe? Ye niere tie.

⁴ Tita ngwentari, ñöbtä ñan angwane Ngöbökwé niebare krörö:

Mun rün btä mun meye mika útiäte jae munkwe *Exodo 20.12; Deuteronomio 5.16*

amne, nire nire käkwe ñākādre tare rün amne meye rüere, ni ye abko kāmikadre, *Exodo 21.17;*

Levítico 20.9

niebare Ngöbökwé.

⁵ Akwa mun abko tä niere krörö: Ni iti kákwe niedre rünye amne meye: Jändrän tikwetikwe se erere tikwe biani jökrä Ngöböye, aisete ti ñan raba mun die mike jire chi bti, niedre kwe, ye abko dbe, munta niere.

⁶ Ne aisete nire nire kákwe nuendre kore, ni ye abko ñan rabadre rün amne meye die mike jire chi mda abko dbe Ngöbökrä munta niere, ye ngwane Ngöbökwé kukwe biani nuendre abko munta kite temen, kukwe úkaninte munkwe mikakäre útiäte jae.

⁷ ¡Mun ngwarbe ja bá mike kuin nete! Munta ja bá mike kuin, ye mdenbtä abko ni Ngöbö kukwei niekä Isaiás kákwe niebare krörö:

⁸ Juta ne káta ti mike útiäte ja kada aibehti, aisete tä ti tarere ñakare era metre.

⁹ Täre ti káikitekä ngwarbe amne, kukwe úkaninte au jakrä kwetwe, aibe täre dirire ti Kukwei täte, *Isaiás 29.13*

niebare kore Isaiákwé munbtä, nieba Jesukwe ietre.

¹⁰ Yebti Jesukwe ni jökrä káräba, kákwe nieba krörö ietre:

Ti bike kukwe niere, ne kukwei nuen munkwe angwane, munkwe mika núke gare jae abko krörö:

¹¹ Mrö jökrä kwetata níkwé, ye abko ñan tä ni mike ngite Ngöbö ngwärecri, akwa kukwe jökrä káme nita niere ja kadabti ye abra tä ni mike ngite Ngöbö ngwärecri, nieba Jesukwe ni kwatiye.

¹² Yebtä abko nun ja töitikaka Jesube kákwe krötäba ja ken ben, kákwe nieba ie:

¿Makwe blitaniri ye abko nitre bariseo kákwe kukwe nuri abtä moto nibi romon jökrä, ye makwe gari ya? nunkwe nieba Jesuye.

¹³ Abtä Jesukwe nieba mda nunye:

Nitre bariseo amne Kukwe Biani Ngöbökwé Moiséye dirikäre ye abko ti bike bá mike kri mu kwrere amne, kri mden mden abko ti Rün ká káinbti kákwe nökaní ñakare, ye abko jákádiká ngátri ngói jökrä, bti kitadiká mento, ye kwrere rakadiká niaratrebtä.

¹⁴ Erere arato, ni ie ká tuen ñakare, kwrere jire nitre bariseo amne Kukwe Biani Ngöbökwé Moiséye dirikäre täre dikeká, ñöbtä ñan angwane Ngöbö gare ñakare ietre amarehti tö Ngöbö kukwei dirire ni mda mdaye. Ne aisete tuemetre dikeká kore, ñöbtä ñan angwane ni nibu ie ká tuen ñakare rikadre ja jite ngwena kwárikwári, ye ngwane niaratre nibu betadreká gwaire ká mkäte nguse, nieba Jesukwe.

¹⁵ Angwane Pedrokwe nieba mda Jesuye:

Makwe kukwe bá miri mröbtä, ye abko makwe dre nini abko niereta nunye, nieba kwe ie.

¹⁶ Abtä Jesukwe nieba mda ie:

¿Munta nain raire tibe, akwa tita dre niere abko ñan tä núke gare jire chi munye arato ya?

¹⁷ Tikwe kukwe nini abko krörö: ¿Nita mrö kwete, ye abko tä niken jökrä ni búlete, akwa nita nainkrö angwane, mrö ye kitakata jökrä ta, ye abko gare ñakare munye ya?

¹⁸ Nita mröre abti nita kitekätä, akwa kukwe kámekáme nita niere ja kadabti, ye abko tä ni töite amne ni motote abko erere nita niere, aisete kukwe kámekáme nieta níkwé ye abra tä ni mike ngite Ngöbö ngwärecri,

¹⁹ ñöbtä ñan angwane kukwe kámekáme abko tä ni töite amne ni motote abko erere nita niere amne nita nuene. Abtä nita ja mike ngite Ngöbö ngwärecri abko krörö: nita ni mda mda kámike, ni gure káta ja mike gure bati bati tiebe ni mda mdabe. Erere arato, ni merire brare ja mike ngite bátäká ngwarbe jabe kwárikwári amne ni jändrän goire ni mda mdakán amne ni blite ngwarbe ni mda mda rüere, erere arato ni ñáke ni mda mdabtä.

²⁰ Munta kukwe nuene kore angwane, munta ja mike ngite Ngöbö ngwärecri, akwa munkwe köbötikadre mrökrä abko úkaninte kira ye erere munkwe ñan mikadre täte, yebtä mun ñan rabadre ngite jire chi Ngöbö ngwärecri. Abko kore se, nieba Jesukwe nunye.

*Meri ñakare israelitare kákwe tödekani Jesubti
(Marcos 7.24-30)*

²¹ Yebti Jesu náma yete, ye kánti ká mikakaba kwe, bti rikaba juta Tiro amne juta Sidón kukwäre.

²² Rababa yete angwane, meri iti Canaanbo, ñakare israelitare nünanka ká ye kánti kákwe krötäba Jesu ken, ká rababa ngrente krikri be krörö:

Ti Dánkien, ma jrei David tukwe mráká. Ti ngwen ruentari tare jae, ñöbtä ñan angwane ti ngánkán tikwe btä úai káme tä nüne, káta mike ja tare nike krübäte tikán. Yebtä ti die mike, rababa niere.

²³ Akwa Jesukwe ñákäba ñakare jire chi meri ye käre. Abtä nun ja töitikaka ben kákwe krötäba Jesu ken, kákwe ribeba krörö ie:

Meri se nibi ngrente krübäte dikaro ni jiehti, aisete ngánkán kwe miketa kuinta makwe, bti juenta jirekábe, nunkwe nieba Jesuye.

²⁴ Angwane Jesukwe nieba meri ye:

Juta israelita tā nianinte obeja kwrere, ye aibe krāke Ngōbōkwe ti juani die mike, nieba kwe ie.

²⁵ Akwa meri ye abko rikaba ngitiekā ngukudokwābti temen Jesu ngwārekri, kākwe nieba mda ie:

Ti Dānkien, ti die mike, rababa niere.

²⁶ Abtā Jesukwe nieba mda ie:

Mun űakare israelitare abko kāme nukro kwrere nieta nitre israelitakwe munbtā, aisete tikwe ma die mikadre angwane, bāsi ban dianka ngābākre nikwe kān, bti kita nukroye, ye kwrere tikwe nuendre, nieba kwe meri ye.

²⁷ Angwane meri ye kākwe nieba mda Jesuye:

Jān, ti abra nukro kwrere bkānā nitre israelita okwāte ti Dānkien. Akwa nukro bkānkā tā niken mrōre mesabtā angwane, mrō būre tā betekā timontimon abko tātre kwete, ye kwrere tita nete mtare amne makwe ti die mika chi abko ie ti tō nibi, nieba kwe Jesuye.

²⁸ Abtā Jesukwe nieba mda ie:

Ti mrākā, mata tōdeke kri era metre tibti, nibi tuen tie, aisete tikwe ma die mikadre, ie ma tō nibi, ye erere bikera nebe bare makrā, nieba Jesukwe ie.

Ye btārābe meri ye ngānkān rababata quinta batibe abko rakakaba kore.

Ni mili krābkā bukani Jesukwe

(Marcos 8.1-10)

²⁹ Yebti Jesukwe kā mikakaba kā ye kānti angwane, rikaba nebe űō Okwā Kri Galilea ye kōrābti. Abti rikaba mda ngitiobti, kānti rababa tākānintbe.

³⁰ Jesu rababa tākānintbe, ye kānti ni kwati kākwe ja űakrōba btā. Nitre kākwe ja űakrōba kwati Jesubtā ye rikaba mrākā bren bren krōrōkrōrō ngwena Jesuye: ni ngūre bren abko kisete nāin nakwente, ni okwā kā drūnente abtā kā tuen űakare ie amne ni kūde ngrōtani aisete kūde ruen űakare ie. Erere arato, ni kukwei űakare amne ni bren bātākā ngwarbe bren mda mda kisete abko jārababa kwetre, kākwe mikaba Jesu ngotobtā temen angwane, Jesukwe mikabata quinta jōkrā.

³¹ Ne aisete ni kukwei űakare abko rababa blite amne ni kūde ngrōtani abko rababa nebeta quinta amne ni nakwente abko rababa dikekāta kuin amne ni okwā kā drūnente abko ie kā rababa tuen. Yebtā nitre kwati ye űan tōi rababa krūtare mda kukwe ye tuare amne rababa Ngōbō nitre israelitakwe ye kāikitekā jōkrā.

³² Yebti Jesukwe nun ja tōitikaka ben kārāba, bti nieba kwe nunye:

Nitre tā kwati nete se nibi tuen bobre tie, űobtā űan angwane kā nena kōbōmā jire tātre tibe nete amne mrō űakare kwetadre ietre. Abtā ti űan tō nibi juenta mrōi ja gwiriete. Nane di krūtadre amne kā rōtadrete bti ji ngrabare, abtā ti űan tō nibi juenta mrōi, nieba kwe nunye.

³³ Abtā nun ja tōitikaka Jesube kākwe nieba mda ie:

Nete kā kaibete amne ni mda nūne űakare kānime nete, ¿se abko mrō kwandre mdente ni ni kwati se bukakrā jōkrā? nunkwe nieba Jesuye.

³⁴ Angwane Jesukwe nieba mda nunye:

¿Banta kunbe munkwe? nieba kwe nunye.

Angwane nunkwe nieba mda ie:

Banta kun kükü be nunkwe amne gwa kiakia tā ruāre nunkwe, nunkwe nieba ie.

³⁵ Angwane Jesukwe ni jōkrā mikaba tāke temen,

³⁶ kākwe ban kun kükü ye dianba kisete amne gwa kiakia ye dianba kisete kwe arato, kākwe kuin nieba btā Ngōbōye, bti ban amne gwa űtakaba oto kiakia, kākwe bianba nun ja tōitikaka ben ye ye angwane, nunkwe drāiba nitre kwati yebti.

³⁷ Angwane nitre kwati ye kākwe mrōba trinetrine jōkrā, bti ban amne gwa oto rabateba ye abko nun ja tōitikaka Jesube kākwe űakrōbata kutia kwā kükü jire.

³⁸ Nitre kwati kākwe mrōba ye abko ni brare aibe mili krābkā kākwe mrōba amne, nitre merire amne ngābākre kiakia nāma yete kākwe mrōba arato, akwa tanba űakare.

³⁹ Yebti Jesukwe nitre kwati ye juanbata jōkrā ja gwiriete, bti Jesu rankwaba rute nun ja tōitikaka benbe, bti nun rikaba nebe kākā Magdala ye kānti.

16

Sribi kri űan tuabare kārābare Jesuye

(Marcos 8.11-13; Lucas 12.54-56)

¹ Jesu rababa Magdala yete angwane, nitre bariseo amne nitre saduseo rababa Jesu kānti ja tuākāre ben, akwa Jesukwe ja dokwā mikadre kō okwāte, abkokāre rikaba kānti. Jesu

abko juani era metre Ngöbökwe ya, ñakare ya abko Jesukwe bä mikadre, käkwe sribi kri ñan tuabare nuendre niaratre okwäbti abko rikaba niere Jesuye.

² Akwa Jesukwe nieba krörö ietre:

Käta kite dere angwane, munta niere krörö: Kä jübateniri tain käinta, aisetse kä rabadi kuin moren jetbe, munta niere.

³ Erere arato, dekä angwane munta niere krörö: Mtare kä bä nibi tain käinta amne kä nibi mütare, aisetse kä rabadi käme ñüre, munta niere. Kä bäta nebe ño käinta abtä kä rabadi ño köbö kwatirekwatire tä nüke gare kuin munye, ¿se ñöbtä abko Ngöböta sribi ño ño nuene ti köböire mtare kä ne ngwane abko ñan tä nüke gare munye se?

⁴ Mun nünanka kä ne ngwane abko moto kämekäme amne munta Ngöbö tarere munta niere, akwa käre munta niara tuemetre, abtä tikwe sribi kri ñan tuabare aibe nuendre mun okwäbti, ie mun töta nebe. Akwa sribi kri ñan tuabare ye tikwe ñan nuendre jire chi mun okwäbti, munta ribere ye kwrere. Akwa Ngöbö nämäne Jonäbe, käkwe sribi kri ñan tuabare nuenbare kräke, ye kwrere aibe Ngöbökwé bä mikadi mun kräke. Abko kore se, nieba Jesu ietre.

Bti Jesukwe kä mikakaba btätre yete amne rikaba kä mdabti.

*Dirikätre blo, yebtä Jesukwe nitre ja töitikaka ben mikani mokre
(Marcos 8.14-21)*

⁵ Yebti nun ja töitikaka Jesube rababa Ñö Okwä Kri Galilea kwärä nakri angwane, nun rikadre ban ngwena abko käi rikwitakaba nunbti.

⁶ Ye btäräbe Jesukwe nieba krörö nunye:

Olo ketete ti kukweije munkwe. Lebadura nitre bariseokwe amne nitre saduseokwe, ye ngäniene munkwe ja ngibia kuin, nieba kwe nunye.

⁷ Angwane nun ja töitikaka Jesube kä rababa blite krörö:

¡Nun ñan ki ban ngwena abtä Jesuta blite kore! nun rababa niere jae kwäräkwäri.

⁸ Nun rababa blite kore, ye gaba Jesukwe. Abtä nieba kwe mda nunye:

⁹ Ye ñöbtä munta tödeke ñakare dikaro tibti, kä nibi ban ñakare niere dikaro kore ye?

¹⁰ Ban kunrike be te tikwe ni brare brare aibe mili krärike jire bukaba angwane, ban oto rabateba abko ükäröbata kutia kobe, ye munkwe tuaba ja okwä jenbti. ¿Akwa ti di tärä mun bukärä ñan nükani gare munye amne töre ñakare munye arato ya ño ye?

¹¹ ¿Erere arato, ban kun kükü be te tikwe ni brare brare aibe buri mili kräbkä jire amne ban oto nebete abko ürükro kutia kobe, ye nebe töre ñakare munye arato ya ño ye?

¹² ¿Ban ñakare nieta munkwe, ñan yebtä tita blite abko ñan nü gare munye ya? Lebadura nitre bariseokwe btä nitre saduseokwe abko ngäniene munkwe ja ngibiadre kuin tikwe nini munye, akwa ñan tita blite lebadura bante yebtä, nieba Jesukwe nunye.

¹³ Angwane batibe ñan Jesu nämä blite lebadura bante btä, akwa kukwe diri nämä nitre bariseokwe amne nitre saduseokwe, ye abko Jesu nämä bä mike lebadura kwrere abko ngäniene munkwe ja ngibiadre kuin abko Jesu nämä niere nun ja töitikaka benye abko rükaba gare nunye.

*Jesu abko Ni Dianinkä Ngöbökwé, niebare Pedrokwe
(Marcos 8.27-30; Lucas 9.18-21)*

¹⁴ Yebti Jesu rikaba nebe juta Cesarea Filipote kántita nun ja töitikaka benbe angwane, nieba krörö kwe nunye:

¿Ti Ni Kä Nebtä Ngobo ne abko nire nieta tibtä ni mda mdakwe? nieba kwe nunye.

¹⁵ Angwane munkwe nieba mda ie:

Ma abko Juan Bautista nükäninta nire nieta ni ruärekwé amne ni mda abko käta ma Elías nükäninta niere mabtä. Ni mda abko ma ni Ngöbö kukwei niekä Jeremías nükäninta nire ara niere, akwa ni mda abko tä niere Ngöbö kukwei niekä kirakira mda mda abko nükäninta nire nieta kwe mabtä, munkwe nieba Jesuye.

¹⁶ Angwane Jesukwe nieba mda nunye:

¿Mun abko käta ti nire niere tibtä? nieba kwe nunye.

¹⁷ Angwane jötrö Simón Pedro käkwe nieba Jesuye:

Ma abko Ni Dianinkä Ngöbökwé ara amne ma abko Ngöbö nire Odei abko nunta niere, nieba kwe Jesuye.

¹⁸ Angwane Jesukwe nieba mda Pedroye:

Simón, Jonás ngobo, kä raba nuäre mabtä amne Ngöbökwé ja di biani mae, ñöbtä ñan angwane makwe kukwe nini tie, ye abko ñan ni kä nebtä köböire namani gare mae, akwa ti Rün tä kä käinbti ara jire käkwe mikani gare mae amne makwe nini tie.

¹⁹ Mdakäre abko, ti bike Pedro niere mae amne já yebti nitre gätäkä ti käbti käkwe tödekadi amne rikadi niren kwati amne gata di kri krübäte ye abko käkwe ñan nitre gätäkä ti käbti ye ganaindre jire chi.

¹⁹ Erere arato, Ngöbö kä käinbti tä gobrane, ye kánti ni kwati rabadi nuke, abkokäre tikwe llabe biandi mae jukwe tikadre niaratre ngwiankäre nebe kä ye kánti Ngöböta gobrane. Makwe dre dre mäkädrete kä nebtä, ye abko rabadira mäkäninte käne kä käinbti Ngöbökwé amne, makwe dre dre tikadrete kä nebtä abko rabadira tikaninte käne kä käinbti sete Ngöbökwé. Abko kore se, nieba Jesukwe Simón Pedroye.

²⁰ Yebtä nun ja töitikaka Jesube, ie nieba krörö kwe:

Ti abko Ni Dianinkä Ngöbökwé ara tä nete, ye munkwe ñan nie jire chi ni mda mdaye, nieba kwe nunye.

Jesu müre ketadi, niebare käne kwe
(Marcos 8.31-9.1; Lucas 9.22-27)

²¹ Ye ngwane mentokwäre nun ja töitikaka Jesube, ie Jesu rikaba niere krörö: Ti rikadre Jerusalén, akwa ni näin nebe sete angwane, nitre unbre ji dokwäte btä nitre blitaka Ngöböbe ni mda mda diäre dänkien amne Kukwe Biani Ngöbökwé Moiséye dirikätre ye käkwe ti mikadi ja tare nike kri krübäte, käkwe ti müre ketadi, akwa köbömäkäre angwane, ti rükadita nire, nieba Jesukwe nunye.

²² Abtä Pedro käkwe Jesu ngwianba kaibe mentokwäre, bti rikaba mäträre krörö btä:

¡Ti Dänkien, Ngöbö se okwäbti kukwe kore ñan rakadrekä jire chi mabtä näre! nieba kwe Jesuye.

²³ Akwa Jesu rikwitataba, käkwe Pedro tuaba ja käne, bti nieba mda kwe ie:

¡Satana, nän mento tibtä nete! Tikwe ja mikadre ngite Ngöbö rüere, abkokäre ma kite ñäke kore tie ñan ñan. Kukwe mden tä nebe tuen dbe Ngöböye, ye kwrere tuen ñakare mae amne, ni kä nebtä ie jändrän tuen dbe abko erere tä tuen mae, aiseté makwe ñan ñäkä kore tie, nieba Jesukwe.

²⁴ Yebti nun ja töitikaka Jesube, ie Jesukwe nieba mda:

Nire nire tö ja töi mikai kwatibe nänkra tibe, ni ye abko tö dre dreye jakrä abko raba käikwitekä jabti amne köbö kwatirekwatire ja kwata raba ruentari tare ñakare ie nünakäre tikrä abko jata ti jiebtä,

²⁵ ñobtä ñan angwane nire nire tö ja kwata ngibiai jen jakrä abko krütadi kärekäre, erere rabadi kärekäre Ngöbö okwä bäre mento akwa, nire nire krütadi ti dokwäre abko rabadi dianintari nünakäre kärekäre Ngöböbe.

²⁶ Ye abko, ni rabadre jändrän jökrä bkäne kabre kä nebtä, akwa ni krütadre angwane nikwe ñan nünandre mda Ngöböbe, ne ütiäre abko dre rükadre nie. Erere arato, nikwe nünandre kärekäre Ngöböbe, ye abko ni ñan raba kökö jire chi jakrä, ñobtä ñan angwane jändrän ñakare jire abko ni rabadre bien Ngöböye nuna kärekäre ben ye ütiäre.

²⁷ Akwa ti Ni Kä Nebtä Ngobo ne jatadita Ngöbö di kri bä nuärebtä amne ti jatadita angeletre tikwe ben, ye ngwane abko ni itire itire käkwe dre dre nuenbare, ye erere tikwe kukwe ükadite kräke, käkwe ütiä biandi ietre.

²⁸ Akwa mun tä nete ne ruäre ngämi krüte, känenkri ti Ni Kä Nebtä Ngobo ne jatadita gobrane, ye abko munkwe tuadi ja okwä jenbti abko ti tö nibi niei metre munye. Abko kore se, nieba Jesukwe nun ja töitikaka benye.

17

Jesu bä nikwitani
(Marcos 9.2-13; Lucas 9.28-36)

¹ Yebti kä rikaba köbö ti ta mda angwane, Jesukwe Pedro, Santiago amne Santiago etba Juan aibe ngwianba jabe abko ben rikaba ngitio bäri mente käin yebti.

² Niaratre nämanena ngitio yebti käin angwane, batibe Jesu bä nikwitani bä jene niaratre okwäbti, aiseté ñänä trä dirare ye kwrere Jesu ngwäre bä namani amne, dän Jesubtä abko trä namani ngwen büreke kä trä dirare kwrere.

³ Ye btäräbe Moisés btä Elías namani gökökä yete blite Jesube, btä okwä namani.

⁴ Angwane Pedro käkwe niebare Jesuye:

Ti Dänkien, nunta nete abko käi nibi nuäre tibtä, aiseté ma tö ne ngwane nunkwe ju mikadi kiakia komä munkrä: kwati makrä, kwati Moisékrä amne kwati Elíakrä, niebare Pedrokwe.

⁵ Pedro nämane blite kore Jesube, ye btäräbe müta trä ngwen jatani jüben niaratrebti angwane, müta yete abko ni kukwei jarabare krörö ietre:

Ni ne abko ti Odei tare kri tikwe. Niara käi nuäre krübäte tibtä, aiseté niara kukwei nua munkwe abko ni kukwei namani kore mütate.

⁶ Ni kukwei namani kore mütate, ye jarabare nitre ja töitikaka Jesube yeye angwane, kä jürä namani krübäte btätre, abtä nikaninbe ngitiekä ngwäreré temen.

⁷ Ye btäräbe Jesukwe krötäbare ken, käkwe nuaninbtä, bti niebare kwe ietre:

Näin krö. Mun ñan rekwetaka, niebare kwe ietre.

⁸Ye btäräbe niaratre käkwe nikrabareta angwane, ni mda ñakare amne Jesu aibe nämane kaibe, btä okwä namani.

⁹Yebti Jesu nikaninta niaratrebe ngitiobtä motokwäre angwane, Jesukwe niebare ietre:

Ti Ni Kä Nebtä Ngobo ne ngämi krüte, bti nüketa nire, ye känenkri kukwe turi munkwe ngitiobti käin sete, ye munkwe ñan nie jire chi ni mda mdaye. Abko kore se, niebare kwe ietre.

¹⁰Abtä nitre nimä ja töitkaka ben ye käkwe niebare mda ie:

¿Ma krütadi bti rükadita nire mata niere ne ngwane, ñobtä abko Elías rükadre Ni Dianinkä Ngöbökwä käne kukwe ükatekäre biare kräke abko Kukwe Biani Ngöbökwä Moiséye dirikätre kätä niere? niebare kwetre Jesuye.

¹¹Amne Jesukwe niebare mda ietre:

Elías rükadre käne ye abra era bkänä. Erere arato, niara rükadre, käkwe jändrän jökrä ükadrete kuin metre, ye abra era bkänä.

¹²Akwa Elías abko nükana, akwa Kukwe Biani Ngöbökwä Moiséye dirikätre, ie niara ñan nükani gare, aiseté tö namani dre dre nuein btä, erere nuenbare kwetre amne mrä müre ketani kwetre. Ye kwrere arato ti Ni Kä Nebtä Ngobo ne käkwe ja tare nikadi kri niaratre kiseté arato abko ti tö nibi niei munye. Abko kore se, niebare Jesukwe nitre ja töitkaka ben yeye.

¹³Angwane Jesu nämane blite Juan Bautistabtä abko nükani gare ietre.

Jesukwe üai käme juantari ngäbäkrebtä

(Marcos 9.14-32; Lucas 9.37-45)

¹⁴Yebti nitre nämä kwati ngitiobtä ngüsrüri, ye kánti Jesu rikabata angwane, ni iti käkwe krötäba ken amne rikababe ngitiekä ngukudokwäbti temen ngwärecri, käkwe nieba krörö ie:

¹⁵Ti Dänkien, ngäbäkre tikwe noko ngwen ruentari tare jae tikrä, ñobtä ñan angwane tä nikrenkä krübäte temen tikän abko kiseté tä ja tare nike kri. Erere arato, tä kite nikrenkä temen angwane, tä niken mate ñukwäte, ere angwane abko tä niken temen ñöte tikän

¹⁶abko nitre ja töitkaka mabe, ie ti nü ngwena, akwa ñan di nibi mikakäreta quinta, aiseté miketa kuin tikrä abko tita ribere mae, nieba kwe Jesuye.

¹⁷Abtä Jesukwe nieba mda:

¡Aingwaree, ti moto iko munbtä! Mun ye ño abko moto kämekäme dikaro abti munta tödeke ñakare dikaro Ngöböbti ye. ¿Ti rabadi kä nuäi mda munbe amarebti ye? nieba kwe.

Ye btäräbe Jesukwe nieba mda:

Ngäbäkre ye ngwen tie, nieba kwe.

¹⁸Ye erere bkänä, ngäbäkre järükaba Jesu kánti angwane, Jesukwe ngrateba üai kämenbti, käkwe üai käme ye juantariba ngäbäkre yebtä amne ngäbäkre ye rababata quinta batibe.

¹⁹Yebti nun ja töitkaka Jesube käkwe nieba kaibe ie:

¿Ñobtä üai käme ñan niki mento nunye ngäbäkre sebtä ruen? nunkwe nieba.

²⁰Abtä Jesukwe nieba mda nunye:

Munta tödeke ñakare bkänä Ngöböbti, ye mden kiseté üai käme ñan niki mento munye. Ye munkwe tödekadre chi mostasa nurai chi ye näre, akwa munkwe tödekadre era metre Ngöböbti, ye ngwane mun rabadre niere ngitio nokoye: Ja denkä mento yete, bti ma rika kä mdabti, munkwe niedre ie, ye erere ngitio noko rikadre mento amne jändrän ñan rabadre jire tare nuendre munkrä, ye abko ti tö niei metre kore munye.

²¹[Akwa üai käme ne kwrere juantarikrä mento abko blitadre Ngöböbe amne ja bäindre Ngöbökrä käne aibe köböire munkwe juandretari mento.] Abko kore se, nieba Jesukwe nunye.*

²²Yebti nun nämä dikekä gwaire Jesube kä Galilea kántita temen mda angwane niarakwe nieba nunye:

Ti Ni Kä Nebtä Ngobo ne kitadi ngise ni mdaye

²³amne niaratre käkwe ti müre ketadi, akwa köbömäkäre angwane ti rükadita nire, nieba Jesukwe nunye.

Jesukwe kukwe nieba kore nunye, yebtä abko nun moto rababa ulire jökrä.

Ju blitakrä Ngöböbe ye ütiä biandre

²⁴Abti Jesu amne nun ja töitkaka ben rababata juta Capernaúmte angwane, nitre ngwian käräkä ju blitakrä Ngöböbe kräke, ye rikaba nebe Pedro kánti, käkwe nieba krörö ie:

¿Dirikä makwe ye tarä ju blitakrä Ngöböbe ye ütiä bien arato ya? nieba kwe.

²⁵Angwane Pedro käkwe nieba mda ie:

* **17:21** Versículo ne abko ñan tä tikani manuscrito bäri kuinquin btä, akwa jatani Marcos 9.29 yekri.

ƶjännri, tärä ütiä bien yeri! nieba kwe.
 Yehti Pedro rikaba nebeta gwi angwane, Jesu ara jire kākwe ñākāba kāne ie, kākwe nieba: Simón, kukwe nebtā mata tōbike ño abko ti tō nibi ngwaintari mae abko krörö: ƶJrei krikri kā nebtā ye abko kätä ja ütiä biamna nireye? ƶNgäbākre jen kwrere kākwe ja ütiä biandre ie nieta kwe ya? o ƶNi mda mda abko kākwe ja ütiä biandre nieta kwe? abko niere tie Simón, nieba Jesukwe Pedroye.

²⁶ Angwane Pedrokwe nieba mda Jesuye:

Ni mda mda abko kākwe ja ütiä biandre nieta kwe ne abko, nieba Pedrokwe.

Angwane Jesukwe nieba mda:

Ngäbākre jreikwe abko kākwe ja ütiä biandre ñakare kore ñan ñan. Ye mden kisete, ju blitakrä ti Rün Ngöbökwē noko tikwe ütiä biandre ñakare arato abko rabadre dbe, ruen tie.

²⁷ Akwa nikwe ñan ja ütiä biandre angwane, ni mda mda rabadre tōbike blo ni btā abko ngāniene nān gwa kite Nō Okwā Kri Galilea sete. Makwe kötu kita ñöte angwane, gwa mden raba kāne kötubtä, ye makwe dian jate. Gwa ye abko kadate ngwian tädi abko kwandi mae, aisetē ngwian tädi täte ma amne ti ütiä biankrä. Ngwian yehti ma rika ja ütiä bien amne makwe ti ütiä bian arato. Abko kore se, nieba kwe Pedroye.

18

Nire bäri ütiäte niebare Jesukwe

(Marcos 9.33-37; Lucas 9.46-48; 17.1-2)

¹ Abti kä ye ngwane nun ja tōitikaka Jesube kākwe krötaba ken mda, bti nunkwe nieba ie: ƶNgöböta gobrane nunbti, ne ngätäite nire abko bäri ütiäte ruen? nunkwe nieba Jesuye.

² Angwane Jesukwe ngäbākre chi kārāba iti, bti mikaba tākānintbe nun ngätäite kwe,

³ kākwe nieba krörö:

Ti bike kukwe era erere niere munye abko krörö: Ngäbākre kiakia tä ja mike bobre, ne kwrere munkwe ñan ja mikadre bobre Ngöböbtā ne ngwane, Ngöbökwē ñan gobrandre jire chi munbti.

⁴ Ne aisetē, ni bti Ngöböta gobrane, ye ngätäite nire nire kätä ja mike bobre Ngöböbtā abko tä ja mike bobre ngäbākre chi ne kwrere, ye abko bäri ütiäte.

⁵ Ye abko, nire nire kätä ni ja mikaka bobre Ngöböbtā ngäbākre chi ne kwrere ye kaen ngäbti ti käfti, ye ngwane ti ne ara jire kata ngäbti kwe.

⁶ Akwa nire nire kätä ja mike bobre Ngöböbtā ngäbākre ne kwrere, ye nirekwe ngwian-dreta ti kākitekä jabti, käfti rabadre kukwe nuene bäri kāmē mda, ni ye abko Ngöbökwē mikadi ja tare nike krübäte. Mden kisete, ni ye ngāmi ni tödekaka tibti ngwen ti kākitekä jabti, kānenkri jākwa kri nura ukwakrä ye mākādre ngärä, bti kitadre mrente nguse käfti müre reketadre abko rabadre bäri kuin kräke. Ye kwrere ni ye ñan rabadre ni tödekaka tibti ngwen ti kākitekä jabti.

⁷ Ni kä nebtā, kräke kukwe tärä keta kabre kätä ni nuente ja kāne abko nita ja mike ngite, ye abko kāmē nikrä bkänä, akwa ye abko tä käre. Akwa nire nire köböite ni mda mda tä ja mike ngite Ngöbö rüere, ƶni ye abko bobre jakän! ñöbtā ñan angwane Ngöbökwē niara mikadi ja ngie nuen krübäte ni mda mda ye dokwäre.

⁸ Ne aisetē ma kise ya o ma ngoto ya, köböite makwe ja mika ngite Ngöbö rüere ne ngwane, makwe tikaka ta jae, bti makwe kitaka mobe ja okwä bäre mento abko bäri rabadre kuin, ñöbtā ñan angwane makwe nūnandre deme kise kwäräbe amne ngoto kwäräbe rikakäre nūne Ngöböbe kä känbti abko bäri kuin angwane, ñan ma kise krobu amne ma ngoto krobu ben ngöi jökrä Ngöbökwē ma kitadre ñukwä jutra ngitiekä käreäre te.

⁹ Erere arato, ma okwä köböite ma raba ja mike ngite Ngöbö rüere, ne ngwane makwe ja okwä ye diante kwati mento, bti makwe kitaka mobe arato, ñöbtā ñan angwane ma okwä kwatibe ben ma rikadre nūne käreäre Ngöböbe, ye abko rabadre bäri kuin makrä amne, ñan ma okwä kubu ben ngöi ma kitadre käreäre ñukwä jutrate kä ja tare nikakrä käfti. Ye mdenbtā tita kukwe bä mike kore mae, nieba Jesukwe nunye.

¹⁰ Mdakäre abko, ti bike kukwe era erere niere krörö munye: Nitre tödekaka tibti tä ja mike bobre Ngöböbtā, ye abko ngäbākre kiakia kwrere, se munkwe ñan bätā ngwian btā tikän, ñöbtā ñan angwane käre angeletrē niaratrekwe tä ti Rün ngwärekiä kä känbti.

Obeja nianinte, btā Jesukwe kukwe bä mikani

(Lucas 15.3-7)

¹¹ Mdakäre abko, ti Ni Kä Nebtä Ngobo jatani ni nianinte ye diantarikäre.

¹² Yehtā abko ti bike kukwe bä mike krörö munye: Ni iti kwe obeja tädre gre ketarike, akwa obeja krati rikadre ngwarbe kwäräkwarä kän, ye ngwane obeja rabadre gre ketabkä bti krä jätäbti krä ökän (99), ƶye ñan mikadre kwe ja ngibiare kaibe ngitiöbti, bti rikadre obeja nianinte krati ye känentari ya? Jännri, rikadre obeja nianinte ye känentari.

¹³ Abti obeja ye kwandretari ie angwane, obeja kratibe ye abko bari kai rabadre nuere bta obeja gre ketabka bti kra jatäbti kra okan yehti ta abko ti to nibi niei metre.

¹⁴ Ye kwrere arato, mun Rün tä kä käinbti sete abko ñan tö nitre tödekaka tibti tä ja mika hobre Ngöbötä ngäbäkre kiakia kwrere se tuai nente jire iti jakän. Abko kore se, nieba Jesukwe.

*Ja mräkä tödekaka Jesubti töi diandre ño
(Lucas 17.3)*

¹⁵ Yehti Jesukwe nieba mda:

Ma mräkä mden erere käkwe ja mika ngite ma rüere angwane, ma rika käkwe blita kaike ben amne ja mikani ngite ño ma rüere kwe, ye makwe mika gare ie. Yehti ja ngite niedre kwe mae amne kukwe ükadrete kwe mabe, ne ngwane mun nibirate kuin jabtä.

¹⁶ Akwa ñan tö raba ma kukwei nuai amne ñan tö raba kukwe ükaite mabe ne ngwane, makwe ni mda känä iti, nibu ja mukore abko ben ma rika bliteta ma mräkä yebe. Abti makwe blitadi ño ben, ye abko rabadi gare metre ni nibuye, ni nimäye.

¹⁷ Akwa ma näin ni mda mda ngwana jabe, ye okwäbti ma mräkä ñan tö raba kukwe ükaite janknu mabe ne ngwane, nitre gätäkä ti käbti tä ja ükekrö ye ie makwe mika gare gätäte; akwa nitre gätäkä ye käkwe blitadre ma mräkä yebe, akwa ñan tö rabadre kukwe ükaite janknu mabe ne ngwane, ni tödekaka ngöbö ngwarbehti, kwrere jire raba tuen munye amne ni ngututu jändrän ütiä käräkä gobran romanobokra ye kwrere jire raba mun okwäte arato.

¹⁸ Ye abko, ti bike kukwe era erere niere munye abko krörö: Munkwe dre dre makädite kä nebtä, ye abko rabadi makäninte kä käinbti Ngöbökre amne munkwe dre dre tikadrete kä nebtä abko rabadi tikaninte Ngöbökre kä käinbti sete.

¹⁹ Ye kwrere arato, ti bike kukwe era erere niere munye abko krörö: Mun nibu käkwe kukwe ükadrete jabe kwärikwäri kä nebtä käkwe ja töi mikadre gwaire, bti mun tö rabadre dreye, ye abko munkwe kärädre Ngöböye, käkwe blitadre ben amne ti Rün kä käinbti sete käkwe biandi munye,

²⁰ ñobtä ñan angwane ni tädre nibu ya o nimä ja ükaninkrö gätäre ti käbti ye abko ti tädi siba ketetibe bentre. Abko kore se, nieba Jesukwe.

Kukwe blo diandre jabti ta kwärikwäri

²¹ Angwane Pedro rikaba, käkwe kukwe ngwiantariba Jesuye, käkwe nieba:

Ti Dänkien, ¿ti mräkä iti käkwe kukwe nuendre blo ti rüere, se abko tikwe diandre bäbe bti ta ruen? ¿Tikwe diandre hä kükü bti ta ya? nieba kwe Jesuye.

²² Abtä Jesukwe nieba mda Pedroye:

Ñan makwe diandre hä kükübe bti ta abko ti bike niere mae, akwa makwe diandre gre ketamä bti hä jatäbti hä kükü (77) bti ta.

²³ Ne aisete ni bti Ngöböta gobrane, ngätäte kukweta nakenkä krörö abko ti bike hä mike: Bati jrei nämane iti abko nikani rürümon ütiä ükete sribikä kwekwe ben.

²⁴ Nikani rürümon ütiä ükete krörö, ye btäräbe sribikä iti kwe abko bti rürümon ütiä nämane millone kabre krübäte abko janükani jrei ye kanti.

²⁵ Akwa sribikä ye abko ie ngwian ñan namani jire chi ja ütiä biankrä jrei yeye. Abtä jrei ye käkwe sribikä ye rürümoimna meri kwe amne ngäbriänkä kwekwe amne jändrän kwekwe erere ben ngöi rürümoimna jreikwe rürümon ütiäre. Amne sribikä ye abko rabadre ni klobre ni mdakrä kore, jreikwe sribi ütiä diandre rürümon ütiäre abkokäre.

²⁶ Akwa sribikä ye nikani mate ngukudokwäbti temen jrei ye ngwäreki, kä namani ribere kisere krörö jrei yeye: Makwe ti ngibia bätäre abko ti tö nibi ribei mae amne rürümon ütiä tibti ye tikwe ütiä biandita jökrä mae, niebare kwe jreiyeye.

²⁷ Angwane sribikä ye namani ruentari tare jrei yeye, käkwe rürümon ütiä kabre ye diani jökrä bti ta, käkwe tikaninte.

²⁸ Yehti sribikä ye nikaninta angwane, sribi muko kwe abko bti rürümon ütiä nämane chi kwe abko ben namani ngätäi. Angwane sribikä ye nikani betekä, käkwe sribi muko kwe ye kani roro mkäbti, nikani roro mkä kekete se kwrere, kä namani niere: ¿Rürümon ütiä mabti, ye makwe ütiä bianta jökrä tie! namani niere ie.

²⁹ Akwa sribikä ye nikani mate ngukudokwäbti temen sribi muko ye ngwäreki, kä namani ribere kisere krörö ie: Makwe ti ngibia bätäre abko ti tö nibi ribei mae amne rürümon ütiä tibti ye tikwe ütiä biandita jökrä mae, niebare kwe sribi mukoye.

³⁰ Akwa sribikä ye ñan tö namani sribi muko kwe ye ngwen ruentari tare jae, käkwe kitani ngite kä teri, bti rürümon ütiä ye biandreta jökrä kwe angwane batibe tikadreteta, abkokäre kitani ngite kwe.

³¹ Sribikä käkwe nuenbare kore, ye abko matani tare sribikä mda mdabtä. Abtä sribikä käkwe dre nuenbare ye abko sribikä mda mda ye nikani, käkwe niebareta jökrä jreiyeye.

³² Abtä jrei ye kākwe sribikā ye kārāmna mda. Nūkani jrei kānti angwane, niebare kwe ie: ¡Ma moto káme! Rürūmon ütiā kabre krübāte mabti abko tikwe diandre mabti ta abko ma rababa ribere kisere tie, erere tikwe nuenba makrä.

³³ Tikwe ma ngwianba ruentari tare jae, kākwe rürūmon ütiā kabre diani mabti ta, ye kwrere makwe sribi muko makwe ye ngwiandre ruentari tare jae arato bā amarebti makwe kitani ngite rürūmon ütiā chi dokwäre se, niebare jreikwe ie.

³⁴ Yebti jrei moto namani romon krübāte sribikā ye krāke, kākwe kitani ngite. Ye kānti ngö tikadrekā krübāte mikakäre ja ngie nuen abti rürūmon ütiā biandreta jökrā kwe jreiye amne batibe rabadre tikaninte abkokäre abko nakaninkā kore.

³⁵ Ye kwrere arato, mun mrākā mden mden kākwe kukwe nuendre blo mun rüere, akwa munkwe ñan diandre bti ta ja moto kuinbti, ye ngwane ti Rün tä kā känbti se kākwe ñan mun ngite niara rüere diandrekā jire chi munbtā arato. Abko kore se, nieba Jesukwe.

19

*Meri tuadremetre ya, ñakare ya
(Marcos 10.1-12; Lucas 16.18)*

¹ Jesu nāma Galilea yete, kākwe blitaba ünän jökrā kore, bti kā mikakaba kwe kā ye kānti, bti rikaba nebe kā Judeate, Ñö Jordānbtā kā driri.

² Angwane nitre rikaba kwati Jesube amne Jesukwe ni bren bren mikabata kuinta kā ye kānti.

³ Ye ngwane abko nitre bariseo rükaba ruäre Jesu kānti abko tö rababa Jesu nuaite ja käne, kākwe nieba krörö ie:

¿Kukwe mden erere nuendre merikwe angwane, rabadre tuen káme nie, yebtä nikwe meri nikwe tuadremetre ye abko dbe abko Ngöbö Kukwei tä niere ya? nieba kwetre Jesuye.

⁴ Abtä Jesukwe nieba mda ietre:

Ngöbö Kukwei kätä dre niere kukwe yebtä abko btā mun tärä ñāke, aisete gare kuin munye ruen tie abko krörö: Kena dekā Ngöbökwē kā dātebare angwane, “ni brare btā ni merire dātebare kwe,” abko ie niebare krörö:

⁵ Ne aisete ni brare kākwe ja mikadre gure angwane, rikadre nüne jenena rünbtā amne meyebtä mento merire kwebe.

Angwane ni nibu ye abko rabadi ni itibe kwrere,

Génesis 2.24

abko niebare Ngöbökwē ietre.

⁶ Ye kwrere ni nibu ye ñan rabadi ni nibu kwrere mda, akwa rabadi ni itibe kwrere. Ye mden kisete, Ngöbökwē ni mikani ni itibe kwrere, ye ni ñan rabadre denkā jire chi jene jene mentokwäre, aisete ni brare kākwe ñan meri tuadremetre, niebare kwe.

⁷ Abtä nitre bariseo kākwe nieba mda Jesuye:

Mata niere kore, ¿se ñöbtā abko meri tuadremetre angwane, tärä biandre ie bti juandretari abko Moisékwē köböi biani munye arato? nieba kwetre ie.

⁸ Angwane Jesukwe nieba mda ietre:

Mun dokwākā ribi ribi Ngöbökrā, ye mdenbtā abko munkwe meri tuadremetre abko Moisékwē köböi biani munye ye. Akwa kena Ngöbökwē ñan kukwe mikanintbe kore,

⁹ aisete ti bike niere krörö munye: Meri ja mike ngite ñakare brare mda mdabe, akwa brare kwe kākwe tuadremetre, bti ja mikadre gure meri mdabe kwe, ye ngwane ni brare ye tä ja mike ngite meri yebe meri käne kwe rüere. Abko kore se, nieba Jesukwe nitre bariseoye.

¹⁰ Angwane nun ja töitikaka Jesube kākwe nieba ie:

Meri nikwe abko rabadre ni mdabe aibe dokwäre ni rabadre tuemetre amne kukwe mda mda dokwäre ñakare ne ngwane, nikwe ñan ja mikadre gure jirekābe abko bāri kuin ñan ñan, nunkwe nieba Jesuye.

¹¹ Abtä Jesukwe nieba mda munye:

Munkwe kukwe nini, ye abko era bkänā, akwa ni kwati ñan raba kaen ngäbti mikakäre täte, aisete nire nire ie Ngöbökwē ja di biandre kukwe ye mikakäre täte aibe tä kaen ngäbti.

¹² Ne aisete kukwe tärä kabre btā ni brare brare kwati ñan tä ja mike gure abko krörö: Ni ruäre tä dāre kise tökare biare, abtä ñan tä ja mike gure amne tä nebe kaibe käre käre. Akwa ni ruäre abko ni mdara jire kätä dātere kaibe, abtä tä nebe kise tökare amne ñan töta nebe ja gurebtā, aisete tä nebe nüne kaibe; akwa ni ruäre abko ñan tä ja mike gure jirekābe nünakäre Ngöbö gobranka kā känbti ye krāke, aisete nire nire tö raba kukwe ne kaen ngäbti nünakäre kore Ngöbökrā, ye kākwe ka ngäbti. Abko kore se, nieba Jesukwe nun ja töitikaka benye.

*Jesukwe ja di biani ngäbäkre kiakiaye
(Marcos 10.13-16; Lucas 18.15-17)*

¹³ Yehti ngäbäkre järeka ruäre nebe Jesu kanti abko Jesukwe kise mikadre bti, kärke blitadre Ngöböbe kräke, akwa nun ja töitakaka Jesube rababa ñäke nitre ngäbäkre ngwianka ye.

¹⁴ Abtä Jesukwe nieba nunye:

Ngäbäkre ye tuemetre kite tie. Munkwe ñan ji öta käne, ñöbtä ñan angwane nire nire këta ja mike bobre Ngöböbta ngäbäkre ne kwrerekwrere, ni yehti abko Ngöböta gobrane, aiseite munkwe ñan ji öta käne, nieba Jesukwe.

¹⁵ Yehti Jesukwe kise mikaba ünän jökrä ngäbäkrebti, ja di biankäre ietre, bti kä mikakaba kwe.

*Ni bati jändrän bkänkä kabre kärke blitabare Jesube
(Marcos 10.17-31; Lucas 18.18-30)*

¹⁶ Yehti ni rikaba iti nebe Jesu kanti, kärke nieba krörö ie:

Dirikä, ¿sribi mden bäri kuin nuendre tikwe abko ütiäre ti rabadre nüne kärekäre Ngöböbe? nieba kwe Jesuye.

¹⁷ Angwane Jesukwe nieba mda ie:

¿Ye ñöbtä abko sribi mden bäri kuin nuendre btä mata kukwe ngwentari tie ye? Ni kuin abra tarä itibe abko Ngöbö ara, akwa ma tö nünai kärekäre Ngöböbe ne ngwane, kukwe biani nuendre nie Ngöbökre, ye makwe mika täte jökrä, nieba Jesukwe ie.

¹⁸ Angwane ni bati ye kärke nieba mda Jesuye:

¿Kukwe mden mden mikadre täte tikwe? nieba kwe ie.

Jesukwe nieba mda ie:

Makwe ñan ni mda kämika.

Ma gure, makwe ñan ja mika gure bati bati ni mda mdabe.

Makwe ñan go.

Makwe ñan blita ngwarbe ni mda mda rüere kitakäre ngite.

¹⁹ Erere arato, ma rün amne ma meye mika ütiäre jae.

Amne mata ja tarere au,

ye kwrere makwe ni mda mda tare arato, *Exodo 20.12-16; Deuteronomio 5.16-20; Levítico 19.18*

nieba kwe ie.

²⁰ Angwane ni ye kärke nieba mda Jesuye:

Makwe kukwe nini, ye erere tita mike täte jökrä. ¿Se abko tikwe dre nuendre mda se? nieba kwe ie.

²¹ Abtä Jesukwe nieba mda ie:

Ma tö rabai metre Ngöbö ngwäreki ne ngwane, jändrän tä makwe ye erere nän rürümoine jökrä, bti makwe ngwian ye dräi ni bobre bobrebti angwane, ma rabadi jändrän ütiäre kri bkäne kabre kä käinbti sete. Makwe jändrän rürümoin ünän jökrä kore, bti ma jata ti jiebti. Abko kore se, nieba kwe ni bati ye.

²² Jesukwe nieba kore ie angwane, niara abko jändrän bkäne kabre krübäte, aiseite moto rötäteba jändrän kwekwe ye jiebti amne moto rababa ulire, ben rikabata.

²³ Yehti nun ja töitakaka Jesube, ie Jesukwe nieba:

Ti bike kukwe era erere niere krörö munye: Ni jändrän bkänkä krikri ye kärke ja mikadre bobre Ngöböbta, Ngöbökre gobrandre bti abko tare krübäte kräke,

²⁴ aiseite ti bike niereta mda bati munye: Aku okwä chi, yete ta kameo krikri ye ara rikadre nuäre, akwa nitre jändrän bkänkä kri ye kärke ja mikadre bobre Ngöböbta, Ngöbökre gobrandre bti, ye abko bäri tare kräke, nieba Jesukwe nunye.

²⁵ Kukwe yehti nun ja töitakaka Jesube ñan töi rababa krütare mda Jesu kukwei nuare. Abtä nunkwe nieba mda ie:

¿Ni jändrän bkäne kri ñan rabadre dianintari nini makwe, se nire abko rabadi dianintari amarebti se? nunkwe nieba ie.*

²⁶ Angwane Jesukwe nun tuaba ja käne, kärke nieba mda nunye:

Mun kä nebtä ye kräke abko kukwe ye tare, akwa Ngöbö abko kräke jändrän ñakare tare jire chi, aiseite niara aibe raba ni dentari, nieba Jesukwe.

²⁷ Abtä Pedro kärke nieba mda Jesuye:

¿Nunkwe jändrän jökrä mikaninte, bti nunta näin ma jiebti, se abko Ngöbökre dre biandi ütiäre nunye? nieba kwe.

²⁸ Angwane Jesukwe nieba mda:

* **19:25** Jesu näire ni ngwian bkäne kri abko nämane ngwian bkäne, ñöbtä ñan angwane Ngöbö nämane ja di bien ietre, aiseite bäri Ngöbö kukwe muko, aiseite rabadre dianintari käne, nitre israelita nämane nütüre Jesu näire. Ne aiseite, nitre ja töitakaka Jesube abko ñan töi namani krütare Jesu kukweibtä.

Ti bike kukwe era erere niere munye abko krörö: Ngöbökwé jändrän jökrä ükadite btin kä mrä ngwane, ti Ni Kä Nebtä Ngobo ne rabadi takänintbe kürä gobrankräbti kä nuärete, ye ngwane mun ja töitikaka tibe ye abko rabadi takänintbe gwaire siba tibe kürä kwä jätäbti kubu yebti. Ye kanti abko juta keta jätäbti ketebu nitre israelitakwe abko kräke munkwe kukwe ükadite siba tibe.

²⁹ Amne nänbtä ti jiebti, nire nire käkwe ju mikaninte amne etbakantre amne ngwai mikaninte kwe, erere arato rün, meye amne ngäbriänkä kwekwe mikaninte kwe amne kä kwe erere mikaninte jökrä kwe nänbtä ti jiebti, nitre ye abko ie Ngöbökwé jändrän biandi gre ketarike rike bäri mda amne Ngöbökwé mikadi nüne kärekäre jabe arato.

³⁰ Akwa ni kwati tuen bäri ütiäte ütiäte kä ne ngwane, ye abko rabadi ütiäte ñakare Ngöbö ngwäreki; akwa ni kwati tuen ngwarbe, ütiäte ñakare kä ne ngwane, ye abko rabadi bäri ütiäte Ngöbö ngwäreki. Abko kore se, nieba Jesukwe nun ja töitikaka benye.

20

Sribikä uba gräte, btä Jesukwe kukwe bä mikani

¹ Yebti Ngöbö abko ñan tä sribi ütiä bien ni kä nebtä kwrere abko Jesukwe bä mikaba mda, käkwe nieba krörö: Ngöböta gobrane ño ni kwe ngätäite abko ti bike bä mike ni kä bkänkä kwrere. Bati ni kä bkänkä nikani dekä ni känene sribikäre jakrä uba gräte.

² Ye erere sribikä kwani ie angwane, sribi ütiä biandre nuäi köböiti, ye erere ükaninte kwe bentre, bti juani kwe sribire uba gräte.

³ Yebti ñänä okwä krä ökän näre angwane, nikaninta jutate. Nikani nebata yete angwane, ni mdara jire nämane nünaninkä ngwarbe kwani ie

⁴ angwane, niebare kwe ietre: Uba gräta tikwe sete, ye te mun nän sribire siba amne sribi ütiä bianta ño, ye näre tikwe ütiä biandi munye, niebare kwe ietre. Ye erere bkänä, nitre ye nikani sribire.

⁵ Yebti ñänä ruäre näre angwane, kä bkänkä ye nikaninta jutate ni mda mda känene. Erere arato ñänä okwä krämä dere angwane, nikaninta amne nitre kwani ie yete, erere juani sribire kwe arato uba gräte.

⁶ Yebti ñänä okwä kränike näre dere angwane, kä bkänkä ye nikaninta jutate amne ni mda nämane ngwarbe abko kwani ie angwane, niebare kwe ietre: ¿Ñöbtä munta sribire ñakare amarebti munta ngwarbe nete köböiti jire se? niebare kwe ietre.

⁷ Angwane nitre ye käkwe niebare mda kä bkänkäye: Sribi bkänkä nun känene ñakare sribikäre jakrä, ¿se abko nunkwe sribidre mdente? niebare kwetre ie. Angwane kä bkänkä käkwe niebare ietre: ¡Mun nän sribire jötrö arato uba gräte tikrä sete! niebare kwe ietre. Ye erere bkänä nitre ye nikani sribire.

⁸ Yebti kä jatanina iko dere angwane, kä bkänkä ye käkwe niebare nitre sribikä ye dänkiene: Sribikätre ye kärere jökrä, bti makwe sribi ütiä bian ietre. Akwa nitre nü sribire bäri mrä, ye ara jire ie makwe sribi ütiä bian käne. Abti nitre niki sribire bäri käne ye abko ie makwe sribi ütiä bian mrä, niebare kwe ie.

⁹ Ye erere bkänä, nitre nükani sribire mrä ñänä okwä kränike dere, ye ie sribi ütiä köböiti biani täte jökrä.

¹⁰ Yebti nitre nikani sribire bäri käne dekä ye nikani sribi ütiä tuen jae angwane, sribi ütiä biandi bäri kabre ietre namani nütüre, akwa sribi ütiä biandre nuäi köböiti, ye erere biani täte ietre.

¹¹ Sribi ütiä dianina kore kwetre angwane, nikani ñäke kä bkänkä ye rüere,

¹² kä namani niere: Nitre nü mrä köre käkwe sribiniri ñänä okwä kratibe, akwa nun abko käkwe sribiniri tare ñänä ngirete ta nebebe kä dere. ¿Se ñöbtä abko munkwe sribi ütiä bini ja näre nunye niaratrebe se? niebare kwetre.

¹³ Abtä kä bkänkä ye käkwe niebare krörö sribikä iti ie: Ja mräkä, ñan tita kukwe nuene blo ma rüere ruen tie, ñöbtä ñan angwane sribi ütiä bianta nuäi köböiti, ye erere tikwe biandi mae abko nikwe ürüte kore dekä, ye tä töre mae ruen tie.

¹⁴ Ne aisete sribi ütiä makwe, ye erere kaen ngäbti, bti ma rikata ja gwiriete, ñöbtä ñan angwane nitre nü sribire mrä dere abko ie tikwe sribi ütiä bini ja kwrere mabe, ye abko kukwe tikwe,

¹⁵ ñöbtä ñan angwane ngwian ye abko tikwe, aisete ti tö rabadre dre dre nuein bti, ye erere ti rabadre nuene ruen tie. ¿Akwa tita ja moto mike kuin sribikä mrä se kräke, yebtä ma nibi mokrere ben ya ño ye? niebare kwe abko nakaninkä kore. Ne ngörä.

¹⁶ Ne aisetse nire nire rabadre mrä, ye abko rabadita käne amne nire nire tä käne ye abko rabadit mrä, [ñobtä ñan angwane Ngöböta ni kwati nübaire, akwa ni braibe abko diankata jakrä kwe.] Abko kore se, nieba Jesukwe.*

*Jesu müre ketadi abko niebare bämäkäre kwe
(Marcos 10.32-34; Lucas 18.31-34)*

¹⁷ Yebti Jesu rikabara ji ngrabare Jerusalén kukwäre angwane, nun ni jätäbti nibu ja töitikaka ben, ye abko käräba kaibe mento kwe, käkwe nieba nunye:

¹⁸ Mtare nita näin Jerusalén kukwäre. Ni näin nebe Jerusalén, ye kanti ti Ni Kä Nebtä Ngobo ne kitadi ngise nitre blitaka Ngöböbe ni mda mda diäre dänkienye amne Kukwe Biani Ngöbökwé Moiséye dirikätre yeye. Niaratre ye abko käkwe ti kitadi ngise müre ketadre amne,

¹⁹ Nire romanobo ñakare israelitare abko ie ti kitadi ngise amne niaratre käkwe ti mikadi yakrä kri jae amne ti kwata metadi krübäte kwetre. Yebti ti müre ketadi krusobtä kwetre, akwa köbömäkäre angwane, ti rükadita nire. Abko kore se, nieba Jesukwe nunye.

*Juan btä Santiago meye käkwe kukwe ribebare Jesuye
(Marcos 10.35-45)*

²⁰ Abti Zebedeo ngäbriänkä nibu Santiago btä Juan abko ben meye jataba käkwe krötaba Jesu ken angwane, rikaba ngitiekä ngukudokwäbti temen Jesu ngwärekri ja di käräkäre ie.

²¹ Angwane Jesukwe nieba ie:

¿Ma tö nibi dreye amarebti ye? nieba kwe ie.

Angwane Zebedeo ngäbriänkä ye meye käkwe nieba krörö mda ie:

Ma raba gobrane angwane, makwe ngäbäre tikwe noko mika bäri ütiäte, käkwe mika tükänintbe iti ja küde ruenkri amne iti ja küde ngeberekri abko ti tö nibi ribei mae, nieba kwe Jesuye.

²² Abtä Jesukwe nieba mda Zebedeo ngobo nibu yeye:

¿Tikwe ja tare nikadi kri krübäte, ye kwrere munta biare ja tare nike siba ya? nieba kwe ietre.

Jänri, nieba kwetre ie.

²³ Angwane Jesukwe nieba mda ietre:

Munkwe ja tare nikadi kri ti kwrere arato, akwa nire rabadre tükänintbe ti küde ruenkri amne nire rabadre ti küde ngeberekri, ye abko ñan tä ti kisete akwa tä ti Rün kisete. Ye aisetse, nire nire kräke kä ye tä ükaninte ti Rünkwe abko erere ie biandi kwe, aisetse ti ñan raba bien munye, nieba kwe ietre.

²⁴ Jesu nämä blite kore, ye nun ni jätä ja töitikaka ben käkwe gaba angwane, Juan btä Santiago ye kräke nun moto rababa romon mda.

²⁵ Abtä Jesukwe nun käräba, käkwe nieba krörö nunye:

Nitre ñakare israelitare käta gobrane angwane, tätre kukwe miketbe tare ni mda mda mikäkäre ja ngoto täni. Erere arato, nire ütiäte krikri ñakare israelitare abko ni mda mdakwe mikadre ütiäte jae, abkokäre tätre bike krikri, ye abko gare kuin munye.

²⁶ Akwa mun ja töitikaka tibe, ye ngätäite abko ñan rabadre bare jire chi kore, aisetse mun ngätäite abko kukwe rabadre bä jene abko krörö: Nire nire tö rabai bäri ütiäte kri mun ngätäite ye abko käkwe sribidre ni bobre kwrere ni mda mdakrä

²⁷ amne, nire nire mun ngätäite tö rabai bäri käne jändrän jökräbtä, ni ye abko rabadre ni klabore kwrere ni mda mdakrä,

²⁸ ti Ni Kä Nebtä Ngobo ne jatani kore ye kwrere, ñobtä ñan angwane ñan ni mda mdakwe sribidre tikrä, abkokäre ti jatani, akwa ti jatani sribikäre ni mda mda kräke amne ti jatani ja mike müre ketadre ni kwati kökatarikäre Ngöbökrä. Abko kore se, nieba Jesukwe nun ja töitikaka benye.

*Ni nibu okwä kä drünente abko Jesukwe mikaninta kuin
(Marcos 10.46-52; Lucas 18.35-43)*

²⁹ Yebti nun nämä Jericó, bti nun rikaba ta angwane, ni kwati rikaba siba Jesube.

³⁰ Angwane ni okwä kä drünente nämä nibu tükänintbe jibtä. Jesu rikaba ta ji yebti gaba kwetre angwane, rikaba ngwänenkä kri krörö Jesu jiebtä:

jrei David tukwe mräkä, nun ngwen ruentari tare jae! rababa niere.

³¹ Angwane nitre nibu ye käkwe kada ketadre, abkokäre nitre kwati rababa ngren ngren bti, akwa niaratre abko rababa ngwänenkä bäri krikri mda, kä rababa niere:

jNun Dänkien, ma abko jrei David tukwe mräkä, nun ngwen ruentari tare jae! rababa niere Jesu jiebtä.

* **20:16** Kukweta tikani corcheta ngätäite abko ñan tä tikani manuscrito bäri kuinquin btä.

³² Abtä Jesu rababa nūnaninkā, kākwe nitre nibu okwā kā drūnente ye kārāba, ye erere rūkaba Jesu kānti angwane, Jesukwe nieba ietre:

¿Tikwe dre nuendre munkrā, ie mun tō nibi? nieba Jesukwe ietre.

³³ Angwane niaratre kākwe nieba mda ie:

Nun Dānkien, makwe kā mikadre tuen nunye, ie nun tō nibi, nieba kwetre Jesuye.

³⁴ Angwane nitre nibu ye rababa ruentari tare Jesuye, kākwe kise mikaba okwābtā. Ye btārābe kā rababa tuen kuin batibe ietre angwane, rikaba siba Jesube.

21

Jesu nikani nebe Jerusalén

(*Marcos 11.1-11; Lucas 19.28-40; Juan 12.12-19*)

¹ Abti nun jatabara neme ja ken Jerusalén angwane, nun rababa juta Betfagé kānti Ngitio Olibobtä. Ye kānti Jesukwe nun ja tōitikaka ben juanba nibu,

² kākwe nieba krörö ietre:

Juta tuen kånime ni ngware ta. Se kānti mun nān. Mun rabadi sete angwane, buro möre tādi mākāninte kwandi munye angwane, buro ye abko ngābāli tādi btā kwandi munye. Buro möre ye tikate munkwe, mun jata ngwena tie.

³ Akwa nane nitre yete kākwe ñākā munye dokwäre angwane, munkwe nie krörö ietre: Ni Dānkien tō nibi ie, aisetu nun bike niken ngwena, akwa gwāngwarbe juandita kwe munkrā, nie kore, nieba Jesukwe nitre nibu yeye.

Bti juani kwe.

⁴ Kukwe rababa bare kore, kukwe niebare kira ni Ngöbö kukwei niekākwe rabadre bare abkokäre. Kukwe ye tā tikani krörö Ngöbö Kukweibtä:

⁵ Nitre nūnanka juta Siónte, ye ie niere krörö:

Jrei munkwe kitera nūke tuen sete. Tā nāin bobre buro ngābālibti.

Buro tribe ngwianka abko ngābālibti tā nāin ye, *Zacarías 9.9*

abko nāmane tikani kore abko erere rabadre bare, abkokäre Jesukwe nitre juanba kore.

⁶ Ye erere bkānā, ni ja tōitikaka Jesube juanba nibu kwe, ye abko kākwe dre nuendre nieba kwe ietre, ye erere nuenba kwetre,

⁷ kā rikaba buro möre ye ngwena ngābāli ben gwaire, kākwe dān jabtā ye tikateba ötati, bti kitaba buro ngābāli ye tröbti kwetre ja tākräre Jesuye angwane, Jesu rankwaba buro ngābāli yehti.

⁸ Ye ngwane abko nitre nāma kwati krübāte amne ni ruäre rababa dān jakwe metete ji ngrabare temen dikakkrā Jesuye amne, ni ruäre abko rababa kri küde tikeka, bti rababa mike ji ngrabare temen dikakkrā Jesu kakäre ngābti jrei kwrere.

⁹ Angwane nitre nāma nāin ruäre Jesu kānenkri amne ruäre Jesu jiehti, ye abko rababa ngrente ja dibti, kā rababa niere krörö:

¡Hosana! ¡Jrei David tukwe mrākā, ma kite ni Dānkien Ngöbö kābti!

Ma ye aibe raba mikani ütiāte.

¡Hosana! ¡Ari Ngöbö kri kā kāinbti kākitekā bāri krikri!

Salmos 118.26

abko nitre ye rababa niere.

¹⁰ Yehti Jesu rikaba nebe Jerusalén angwane, jötrö kā rababa nokre jabtā jutate yete amne ni kwati rababa niere krörö:

¿Nire nü amarebti se? rababa niere jae kwärükwäri.

¹¹ Angwane nitre nāmane yete kākwe niebare ietre:

Ni Ngöbö kukwei niekā kādianta Jesu abko nü nete. Niara abko Nazarebo kā Galileate abko mden nü nete, niebare kwetre.

Jesukwe nitre juantari ju blitakrā Ngöböbe kānti

(*Marcos 11.15-19; Lucas 19.45-48; Juan 2.13-22*)

¹² Yehti ju blitakrā Ngöböbe, ye bäre Jesu rikaba angwane, nitre nāma jāndrān rürümoine yete amne ruäre abko nāma jāndrān kökö abko Jesukwe juantariba jökrā mento. Erere arato, nitre nāma ngwian kwite* ni mda mdakrā abko kān Jesukwe mesa kwitakaba temen se kwrere amne ütü rürümoinkā kwe ja tākrā nāmane, ye abko Jesukwe kwitakaba jökrā temen se kwrere arato.

¹³ Yehti Jesukwe nieba nitre jāndrān rürümoinkā yeye:

Ngöbö Kukwei tā tikani krörö:

Ju tikwe ne abra tā blitakrā tibe,

Isaías 56.7

niebare Ngöbökwē, akwa mun abko tā ju ne mike nitre gokā jue kwrere. Abko kore se, nieba Jesukwe.

* **21:12 ngwian kwite.** Ngwian kā mdabti kwita nāmane ngwian ju blitakrā Ngöböbe yebe.

¹⁴ Ye ngwane abko nitre okwä kä drünete amne nitre näin nakwente nakwente rababa nûke ju blitakrä Ngöböbe ye bäre Jesu kanti angwane, Jesu rababa miketa kuinta jökrä.

¹⁵ Akwa sribi kri ñan tuabare Jesu rababa nuene, ye abko nitre blitaka Ngöböbe ni mda mda diäre dänkientre btä Kukwe Biani Ngöböke Moiséye dirikätre käkwe tuaba angwane, ju blitakrä Ngöböbe ye kántita abko ngäbäkre rababa ngrente krikri, kä rababa niere: ¡Hosana, jrei David tukwe mräkä abko tä nete! Ari käikitekä abko ngäbäkre rababa niere, ye kukwei jaraba ietre angwane, moto rababa romon,

¹⁶ käkwe nieba Jesuye:

¡Ngäbäkre tä ma käikitekä kore ye kukwei ruen ñakare mae ya amarehti ye! nieba kwetre Jesuye.

Angwane Jesukwe nieba mda ietre:

Jänri, kukwe ruen tie. ¿Akwa kukwe kore btä Ngöbö Kukwei tä tikani, yebtä munta ñäke ñakare ya amarehti ye? Ngöbö Kukwei këta niere krörö:

Ngäbäkre kiakia käkwe kantadre mae amne ngäbäkre kianbtä kianbtä arato abko ma tö namani kukwei nuai, *Salmos 8.2*
abko nieta kore, nieba Jesukwe.

¹⁷ Yebti Jesukwe kä mikakaba nitre yebtä, bti rikabata juta bäre mento angwane, rikaba nebe juta Betaniate, kënti kibiaba kwe.

Jesukwe ñäkäbare higokrieye
(*Marcos 11.12-14,20-26*)

¹⁸ Yebti dekä angwane, Jesu rikabata juta Jerusalén kukwäre angwane mrö rababa ie.

¹⁹ Angwane higokrie näma känime jibtä, btä okwä rababa angwane, rikaba nebe higokrie ye kënti. Rababa higokrie ye kënti angwane, higo kä aibe kwanba btä ie, akwa ngwä abko ñakare. Abtä Jesukwe nieba krörö higokrie yeye:

¡Ma ñan ngwä rabata jire chi mda! nieba kwe ie.

Jötrö higokrie ye bä grötakaba nõtare.

²⁰ Kukwe rakakaba kore nun okwäbti, yebtä abko nun ja töitikaka Jesube ñan töi rababa krütare mda, käkwe nieba Jesuye:

¿Ñobtä makwe ñäri jirekäbe higokrie seye amarehti jötrö ngwarbe bä ngrökä nõtare mda se? nunkwe nieba ie.

²¹ Abtä Jesukwe nieba mda nunye:

Ti bike kukwe era erere niere munye abko krörö: Munkwe tödekadre kwatibe Ngöböbti amne munkwe ñan ja töi mikadre ngwarbe kwäräkwarä, ye ngwane ñan kukwe nuni higokriebtä tikwe, ye kwrere aibe rabadre bare munye, akwa mun rabadre niere ngitio nokoye: Ja denkä mento yete. Ma rika mrente, munkwe niedre ie, ye erere rabadre bare munye.

²² Munkwe tödekadre kwatibe Ngöböbti, käkwe blitadre ben angwane, dre dre munkwe kärädre ie, ye rükadre mun kisete. Abko kore se, nieba Jesukwe nun ja töitikaka benye.

Nire diebti Jesu nämane sribire abko ngwianintari ie
(*Marcos 11.27-33; Lucas 20.1-8*)

²³ Yebti ju blitakrä Ngöböbe ye bäre Jesu rikabata mda. Jesu nämä dirire yete angwane, nitre blitaka Ngöböbe ni mda mda diäre dänkientre amne nitre unbren ji dokwäte ye jataba nûke Jesu kënti, käkwe nieba ie:

¿Nirekwe ma mikani sribi nuene kore amne nire diebti mata kukwe nuene kore nete? nieba kwetre ie.

²⁴⁻²⁵ Angwane Jesukwe nieba mda ietre:

Ti bike kukwe ngwentari kwati arato munye. ¿Nirekwe Juan Bautista juani ni ngökö ñöte? ¿Ngöböke juani ya o ni kä nebtäkwe mikani sribire ya? Ye niere tie munkwe. Nirekwe juani, ye munkwe niedi tie ne ngwane, nire diebti tita sribi ne nuene abko tikwe niedi munye arato, nieba kwe ietre.

Yebtä abko rikabata blite jabe kwäräkwarä, kä rababa niere krörö: Ngöböke juani, nikwe niedre ie angwane, niarakwe niedre krörö mda: Ngöböke juani munta niere, ¿se ñobtä abko munkwe ñan kukwei mikani era jae? niedre kwe nie.

²⁶ Akwa, ni kä nebtäkwe mikani, ni ñan rabadre niere jire chi ie, ñobtä ñan angwane Juan abko ni Ngöbö kukwei niekä era metre, ye abko ni jökrä këta mike era, aiseté nitre ye abko nita jürä ngwen, aiseté Juan mikani sribi ye nuene ni kä nebtäkwe abko ni ñan raba niere jire chi, rababa niere jae kwäräkwarä.

²⁷ Abtä nieba krörö kwetre Jesuye:

Nirekwe Juan juani, ye gare ñakare nunye, nieba kwetre.

Angwane Jesukwe nieba mda ietre:

Kore ne ngwane, nirekwe ja di biani tie sribi ne nuenkäre abko tikwe ñan niedre munye arato, nieba Jesukwe ietre.

Jesukwe kukwe bä mikani ngäbäkäre nibubtä

²⁸ Yehti Jesukwe nieba mda nitre blitaka Ngöböbe ni mda mda diäre dänkientreye amne nitre unbre ji dokwäteye:

¿Kukwe ne raba tuen ño munye? Bati ni nämane iti abko ngobo nibu kwe. Bati nikani, käkwe niebare ngobo itiyi: Ma rika sribire mtare tirete tikrä uba gräte, nieba kwe ie.

²⁹ Akwa ngobo käkwe niebare ie: Ti ñan tö nibi rikai sribire tirete, niebare kwe rünye. Akwa yehti ja töi kwitaninta kwe amne nikani sribire.

³⁰ Yehti ngäbäkäre ye rün nikani, käkwe niebare kwrere ngobo mdaye angwane, ni ye ngobo käkwe niebare ie: Jän, ti näin sribire tirete makrä, niebare kwe rünye. Akwa ñan nikani sribire abko nakaninkä kore se.

³¹ Ye abko, ¿ngäbäkäre nibu ne mden käkwe rün kukwei mikani täte? nieba Jesukwe ietre.

Angwane niaratre käkwe nieba:

Ngäbäkäre käne ye mden käkwe rün kukwei mikani täte, nieba kwetre Jesuye.

Abtä Jesukwe nieba mda ietre:

Ti bike kukwe era erere niere munye abko krörö: Nitre jändrän ütiä käräkä gobran romanobokrä abko tä nebe tuen käme munye amne meri bti kä ngwarbe ngwarbe abko tä nebe tuen käme munye arato, akwa niaratre abko bti Ngöbö kä känbti rabadi gobrane bäri käne mun ye ngwä,

³² ñobtä ñan angwane Juan Bautista nükani ji kuin era metre Ngöbökwé mike gare munye angwane, munkwe ñan niara kukwei mikani era jae, akwa nitre jändrän ütiä käräkä amne meri bti kä ngwarbe ngwarbe abko käkwe niara kukwei mikani era amne kani ngäbti kwetre, aisete niaratre abko ngäbäkäre käne ye kwrere. Akwa kukwe nuenbare Juankwe abko munkwe tuani, akwa munkwe ñan Juan kukwei mikani era jae, käkwe trö kwitani ñakare kukwe kämeye, aisete mun ye abko ngäbäkäre mda ye kwrere. Abko kore se, nieba Jesukwe ietre.

Nitre ji dokwäte, btä Jesukwe kukwe bä mikani

(Marcos 12.1-12; Lucas 20.9-19)

³³ Ti bike kukwe mdara jire bä mike ne kukwe nuen munkwe: Bati ni kä bkänkä nämane iti, käkwe uba nurai nökan, bti ki mikani kwe amne kä ükaninte biare uba ñöi ngwäre kwe. Ju mikani nura ngibiabtikä kräke kwe, bti biani kwe ni mda mdaye sribikrä. Kä biani sribikrä kwe abko ütiäre uba döi biandreta ruäre ie. Yehti nikani kä mdabti.

³⁴ Abti uba ngwä ötare abko käi nükani angwane, sribikä käkwe uba biandreta ruäre kä bkänkäye ye abko kä bkänkä käkwe sribikä kwekwe juani tuenta jakrä.

³⁵ Akwa sribikätre kä bkänkäkwe ye nikani nebe angwane, sribikätre ubabtä ye ie neketaninte, nikani sribikä iti mete ja ñäte kwäräkwärä se kwrere. Iti mda abko kämikani kwetre amne iti mda abko tükäni jäbti kwetre kämikäkäre.

³⁶ Yehti kä bkänkä käkwe sribikätre juani bäri mda uba tuenta ruäre jakrä, akwa sribikätre ubabtä ye käkwe nuenbareta kwrere arato btäre.

³⁷ Abtä mrä angwane, kä bkänkä ye käkwe odoi jen kwe ara jire juani, kä namani töbike krörö: Ti odoi ne aibe abko mikadi ütiäte sribikätrekwe, aisete ti bike juen, namani nütüre.

³⁸ Ye erere bkänä juani kwe, akwa kä bkänkä ye odoi nikani tuen sribikätre ubabtä yeye angwane, niebare kwetre jae kwäräkwärä:

Ni se abko rabadi jändrän rünkwe bkäne jökrä, aisete ari kämike amne ni rabadi kä ne bkäne jökrä, niebare kwetre.

³⁹ Ye erere bkänä, kä bkänkä odoi ye neketaninte ietre, nikani ngwena uba grä bäre mento, bti kämikani kwetre se kwrere.

⁴⁰ ¿Yehti kä bkänkä rikadre mda angwane, dre nuendre kwe sribikätre käme yehtä raba ruen munye? nieba Jesukwe.

⁴¹ Angwane nitre yete ye käkwe nieba mda:

Kä bkänkä ye ie sribikä moto kämekäme ye rabadre ruentari tare ñakare, käkwe kämikadre jire jökrä. Abti sribikä mden mden käkwe nura ütiä biandre ie nura ngwä öta näire, ye ie tire ye biandre kwe mda, nieba kwetre.

⁴² Bti Jesukwe ja bä mikaba jä kwrere amne, nitre dirikä krikri abko bä mikaba ju mikaka kwrere, käkwe nieba ietre:

Kukwe nebtä Ngöbö Kukwei tä tikani abko btä mun tarä ñäke ruen tie abko krörö: Jä ütiäte kri ju mikakrä metre abko nitre ju mikaka käkwe kitaninkä, akwa jä ye abko ni

Dänkien käkwe mikani bäri ütiäte ju mikakrä metre.

Ye abko namani tuen bäri nuäre nie,

abko tä tikani kore.

Salmos 118.22-23

⁴³ Ne aiseti ti bike niere krörö munye: Munkwe sribibare ñakare era metre, sribikätre käme ye kwrere, aiseti Ngöbökwé ñan gobrandre munbti amne juta mda kákwe sribidre era metre Ngöbökrä, ye abko bti Ngöbö rabadi gobrane.

⁴⁴ Angwane ni ütiäte kri já kwrere tikwe nini, ye abko btä nire nire ritadrete amne rikadre temen já yehti angwane, já ye kákwe ni ye ötädbtä kiakia jökrä ngrabare. Erere arato, nire nire bti já ye rikwidarekë angwane, gütädikä mnüne jökrä já ye täni arato. Abko kore se, nieba Jesukwe ietre.

⁴⁵ Jesukwe kukwe bä mikaba btä blitaba kwe ye abko nitre blitaka Ngöböbe ni mda mda diäre dänkientre rüere amne nitre bariseo rüere nämä blite gaba kwetre.

⁴⁶ Angwane niaratre tö rababa Jesu kitai ngite kä teri, akwa Jesu abko Ngöbö kukwei niekä abko ni kwati nämä mike era jae, abtä ni kwati ye jürä rababa btätre.

22

*Ni ja mikaka gure, btä Jesukwe kukwe bä mikani
(Lucas 14.15-24)*

¹ Yehti Jesu rikaba bliteta amne kukwe mda bä mikaba kwe, kákwe nieba krörö:

² Ngöbö kä käinbti käta gobrane ño nibti abko ti bike bä mike krörö: Bati jrei nämäni iti abko ngobo jatani ja mike gure angwane, jrei ye kákwe mrö sribebare kri kä ngwiankäre nuäre jabtä.

³ Yehti nitre nübaibarera kwe kä ngwen nuäre jabtä ye abko sribikätre juani kärere kwe, akwa nitre nübaibare kwe ye ñan tö namani näin.

⁴ Abtä sribikä mdara jire juani jreikwe, kákwe niebare krörö ietre: Nitre nübaibare tikwe, ye ie munkwe nie krörö: Tikwe nbi kämikamna amne tikwe jändrän mda mda köteköte kämikamna kwetadre, aiseti mrö nena biare jökrä amne nitre nübaibare tikwe ye jata kä ngwen nuäre jabtä tibe, munkwe nie ietre, niebare kwe sribikätre yeye.

⁵ Ye erere sribikätre nikani, kákwe niebare, akwa nitre nübaibare jreikwe ye kákwe sribikätre ye kukwei mikani ngwarbe. Ni ruäre nikani jirekäbe tirete amne ni ruäre abko nikani jändrän mda mda nuene.

⁶ Akwa ni ruäre abko ie sribikätre jreikwe ye neketaninte, nikani mete kwäräkwarä se kwrere, bti mrä kämikani kwetre.

⁷ Abtä jrei ye moto namani romon krübäte. Abtä rükä kwekwe ye juani kwe, kákwe nitre moto kämekäme ye kämikani jökrä, bti juta ye kukwani jökrä kwetre sribikätre kwe ye dokwäre.

⁸ Yehti jrei ye kákwe niebare sribikätre mda mdaye: Ti ngobo tikwe bike ja mike gure, kräke mrö nena biare jökrä kä ngwiankäre nuäre jabtä, akwa nitre nübaibare tikwe abko rükadre kä ngwen nuäre jabtä, akwa ti kukwei kitani temen kwetre, yehtä abko moto käme bä mikani kwetre jabtä.

⁹ Mtare mun nän ji kri ngrabare sere amne nire nire kwan ji ngrabare munye, ye erere munkwe nübai jökrä kä ngwen nuäre jabtä tibe nete, niebare jreikwe sribikäye.

¹⁰ Ye erere bkänä, sribikätre ye nikani ji ngrabare angwane, nire nire kwani ietre ji ngrabare, ye erere ükaninkrö jökrä kwetre, ni moto käme amne ni moto kuin, ni ño erere jänikani jökrä kwetre angwane, ju kä ngwiankrä nuäre jabtä, ye te ni namani iti jökrä.

¹¹ Yehti nitre nübaibare kä ngwen nuäre jabtä, ye namanina jökrä gwi angwane, jrei nikani mike ñäräre. Jrei namani gwi angwane, ni nämäni iti yete abko dän kitadre jabtä nänkrä kä ngwiankrä nuäre jabtä ni ja mikaka gure kanti, ye abko nämäni ñakare btä.

¹² Abtä jrei ye kákwe niebare ni yeye: Ja mräkä, dän kitadre jabtä makwe abko ñakare mabtä, ye abko ma nü ño gwi nete siba, niebare kwe ie. Angwane ni ye rababa kwekbe jirekäbe.

¹³ Angwane nitre mrö mikaka mesabtä mesabtä, ye ie jreikwe niebare: Ni noko ngoto amne kise mämete, bti munkwe kitaka kä bäri iko te ju bäre sere. Ye kanti niara rabadi ja müaire krikri be amne tu ngö rabadi cherere jabtä ja tare nika kisete,

¹⁴ ñöbtä ñan angwane Ngöböta ni kwati nübaire, akwa ni braibe abko diankata jakrä kwe. Abko kore se, nieba Jesukwe.

*Ja ütiä biandre gobranye ya, ñakare ya
(Marcos 12.13-17; Lucas 20.20-26)*

¹⁵ Yehti nitre bariseo kákwe gätäbare angwane, tö namani Jesu tuai ja dokwä mike kö okwäte, aiseti Jesukwe ñäkädre blo gobran romanobo rüere abtä kitadre ngise kwetre, abkokäre ja töi mikani kwatibe kwetre Jesu rüere,

¹⁶ kákwe nitre reketaka jakri juani ruäre nitre reketaka Herodekri ben gwaire niekäre krörö Jesuye:

Diriká, mata kukwe era erere niere, ye gare kuin nunye amne ji Ngöbökwé abko dirita era metre arato makwe, ye gare nunye arato. Erere arato, ni mda mda tá ño niere ma rüere diribtá kore, ye abko ñakare útiáte makrá, ñobtä ñan angwane ñan mata blite ni mda mda moto mikakäre nuäre, ye garera nunye.

¹⁷ Ne aisete kukwe nebtá makwe dre niedre abko nun tö nibi gai abko krörö: ¿Emperador romanobo César abko ie nunkwe ja útiá biandre ye abko dbe ya, ñakare ya niere nunye? nieba kwetre Jesuye.

¹⁸ Nitre ye náma töbike blo Jesu rüere, ye Jesukwe gaba btátre. Abtä nieba mda kwe ietre: Mun ngwarbe ja bá mike kuin tibtä nete. ¿Se ñobtä tikwe ja dokwá mikadre kö okwäte au, abkokäre mun kite kukwe ngwentari kore tie ye?

¹⁹ Ngwian bti munta ja útiá bien, ye mike tuadre tie, nieba Jesukwe ietre. Ye erere bkäná, ngwian denario bianba kwetre Jesuye.

²⁰ Angwane Jesukwe nieba mda ietre:

¿Nire bá amne nire káta tikani ngwian nebtá? nieba Jesukwe ietre.

²¹ Angwane niaratre kákwe nieba mda Jesuye:

Emperador César bá amne káta btá, nieba kwetre.

Abtä Jesukwe nieba mda ietre:

Jändrän emperadorekwe erere munkwe bian emperadoreye amne jändrän Ngöbökrá erere munkwe bian Ngöböye. Abko kore se, nieba kwe ietre.

²² Jesukwe ñákába kore ietre, ye kukwei nuaba kwetre angwane, ñan töi rababa krütare Jesu kukweibtá, ñobtä ñan angwane ja kitani ngite ñakare Ngöbö rüere o César rüere aisete. Yebti niaratrekwe ká mikakaba Jesubtä yete, rikabata jökrá.

*Ni krütani rükadreta nire ya abko ngwianintari Jesuye
(Marcos 12.18-27; Lucas 20.27-40)*

²³ Abti köbö ye arabe náire, nitre saduseo rikaba ruäre ja tuakäre Jesube. Nitre saduseo ye abko ni krütanikrütani mikadreta nire Ngöbökwé abko ñan námame mike era, aisete jataba kukwe ngwentari Jesuye, kákwe nieba ie:

²⁴ Diriká, Moisékwe niebare krörö: Ni iti tádre gure, akwa ngábákwe ñakare kwetre amne ni ye krütadre angwane, merire rabadre kaibe, meri ye abko yärákwe diandre jae mda. Yebti ngábákwe rabadre kwetre angwane, ngábákwe ye abko rabadre niara etba krütani ngobo kwrere, niebare Moisékwe.

²⁵ Ye erere bati nun ngátáite nete nitre ja etbarebe námame ni kükü. Nitre ye etba mubai kákwe ja mikani gure, akwa ngábákwe ngámi nebe kwetre angwane, ni ye krütani, aisete merire namani kaibe ie, ye abko namani etba siba kráke.

²⁶ Ye erere bkäná meri ye namani yära mda yebe, akwa brare krütani kán arato. Abtä meri ye namani yära mdabe, akwa brare krütaninta kán arato. Ye kwrere nikani nakenká janknu ja táritári. Abti nitre ni kükü ye krütani jökrá meri ye kisete.

²⁷ Abti mrá angwane, meri ye krütani arato.

²⁸ Akwa ni krütani rükadreta nire mata niere, aisete ni brare ni kükü, ben meri ye namani jökrá, abti niaratre ni kükü ye rükadreta nire jökrá angwane, meri ye rabadi nire nán mukore abko niere nunye, nieba kwetre Jesuye.

²⁹ Angwane Jesukwe nieba mda ietre:

Ngöbö Kukwei gare ñakare munye amne Ngöbö di kri gare ñakare munye arato, aisete munta töbike ngwarbe blo kore.

³⁰ Ni krütanikrütani rükadita nire angwane, ni merire, brare kákwe ñan ja mikadre gure, ñobtä ñan angwane niaratre abko rabadi angele ká káinbti kwrere.

³¹ Mdakäre abko, ni krütanikrütani rükadreta nire abko Ngöbö ara jire kákwe niebare kára, niara námame blite Moisébe angwane. Yebtä mun tará ñáke ruen tie. Ngöbö Kukwei káta niere krörö:

³² Ti abko Ngöbö Abrahamkwe, Isaakwe amne Jacobokwe, niebare Ngöbökwé Moiséye. Abraham, Isaac amne Jacob krütanina abti Ngöbökwé niebare kore Moiséye. Ngöbö abko ñan ni ngwákäre Ngöböi akwa Ngöbö abko ni nire Ngöböi gare nie. Ye aisete Abraham, Isaac amne Jacob tá nüne janknu Ngöbö ngwárekri abko gare nie, nieba Jesukwe nitre saduseoye.

³³ Jesukwe blitaba kore, ye nitre kwati kákwe kukwe nuaba únán jökrá angwane, Jesukwe diriba ño, yebtä niaratre töi ñan rababa krütare Jesu kukweibtá.

*Kukwe mden bári útiáte mikadre táte
(Marcos 12.28-34)*

³⁴ Jesukwe nitre saduseo kada ketaba kwärábe jökrá kore, ye abko nitre bariseo kákwe gaba angwane, ja úkkröbata kwetre Jesu kánti mda.

³⁵ Angwane ni bariseo abko Kukwe Biani Ngöbökwé Moiséye diriká arato náma iti yete abko tö rababa Jesu tuai ja dokwá mike kö okwäte, kákwe nieba krörö ie:

³⁶ Dirikā, ¿Kukwe Biani Ngöbökwe Moiséye nuendre nie, ye mden abko bäri ütiäte? nieba kwe Jesuye.

³⁷ Angwane Jesukwe nieba mda ie:

Makwe ma Dänkien Ngöbö tare ja di ngöi jökrā, ja üai ngöi jökrā amne ja töi ngöi jökrā abko nieta kore,

³⁸ aisete kukwe ye abko bäri ütiäte amne tā bäri kāne arato kukwe jökrā mda mda ngätāite.

³⁹ Akwa kukwe tärā kwati mda abko bäsi kukwe kāne ye kwrere arato abko kätä niere krörö: Mata ja tarere au, ye kwrere makwe ni mda mda tare arato abko nieta kore Ngöbö Kukweibtā.

⁴⁰ Munkwe kukwe ketebu ye mikadre tāte ne ngwane, kukwe mda mda biani Ngöbökwe Moiséye nuendre nie, ye munkwe mikadre tāte jökrā. Erere arato, kukwe biani Ngöbökwe nie ja kukwei niekā niekā köböire, ye munkwe mikadre tāte jökrā arato. Abko kore se, nieba Jesukwe nitre bariseoye.

¿Nirekri Ni Dianinkā Ngöbökwe däredre?

(Marcos 12.35-37; Lucas 20.41-44)

⁴¹ Yebti nitre bariseo nāma ja ükaninkrö Jesu kánti yete angwane,

⁴² Jesukwe nieba mda ietre:

¿Ni Dianinkā Ngöbökwe abko däredre nirekri nütüta munkwe? nieba Jesukwe ietre.

Ni Dianinkā Ngöbökwe abko däredre jrei Davikri, nieba kwetre Jesu käre.

⁴³ Abtā Jesukwe nieba mda ietre:

Ni Dianinkā Ngöbökwe abko däredre Davikri munta niere, ¿ye ñobtä abko Ngöbö Üai köböire Davikwe “ti Dänkien” niebare Ni Dianinkā Ngöbökwe yebtä? Ni ngätāite nete ni ñakare jire iti kätä “ti dänkien” niere ngäbākre kweye, akwa David abko kākwe niebare krörö: ⁴⁴ Ti Dänkien Ngöbö kākwe nieba ti Dänkienye:

Kā bäri ütiäte kri ti küde ruenkri, ne kánti jakwe tāke nete.

Ye kánti ma raba abti tikwe ma rüe mikadi jökrā ma ngoto täni, *Salmos 110.1*

niebare Davikwe Ni Dianinkā Ngöbökwe yebtä.

⁴⁵ David ara jire kākwe ja Dänkien niebare Ni Dianinkā Ngöbökwebtā, ¿se ñobtä abko Ni Dianinkā Ngöbökwe abko jatadre Davikri nieta munkwe se, ñobtä ñan angwane nita Dänkien niere ñakare jire ni mrākā bäri mrā nikrā yeye? nieba Jesukwe nitre bariseoye.

⁴⁶ Angwane nitre bariseo ye ñan kukwe gitiaba jire kwati mda Jesu käre, ñobtä ñan angwane kukwe niedre ño ño ñan rababa gare jire chi ietre aisete. Abti köbö ye näire mentokwäre ni ñakare jire iti, ie ja rababa nūke töre kukwe ngwentari Jesuye ja gakäre ben.

23

Jesukwe nitre ja töitikaka ben mikani mokre

(Marcos 12.38-40; Lucas 11.37-54; 20.45-47)

¹ Yebti nitre nāma yete btā nitre ja töitikaka Jesube, ie Jesukwe nieba mda:

² Kukwe Biani Ngöbökwe Moiséye dirikātre amne nitre bariseo abko tātre dirire Moisés tāte, aisete niaratre aibe kukwei ütiäte abko niaratre tā niere jabtā.

³ Ne aisete nitre ye kukwei mika tāte munkwe amne dre nuemma kwetre, erere munkwe nuen. Akwa niaratre tā nüne ño, ye kwrere munkwe ñan nūna, ñobtä ñan angwane niaratre tā kukwe niere abko erere tātre nuene ñakare, akwa tātre jändrän mda nuene.

⁴ Mdakäre abko, tribe kri doboko abko ni ñan raba kaenkā, ye kwrere jire tātre kukwe taretare ükete nuendre munye, bti tātre kite ni mda mda kötärā. Abti niaratre ñan töta nebe kise mikai jire chi tribe yebtä ni mda mda die mikakäre.

⁵ Erere arato, niaratre tā jändrän nuene, ye abko ni mda mda kākwe tuadre abko ie töta nebe abko krörö: kaja chi te Ngöbö Kukwei tā tikani täräbtā abko mikata ja okobtä amne küdebtā, akwa niaratre abko kaja krikri be tātre mäketē ja okobtä amne ja küdebtā tuadre ni mda mdaye. Erere arato, kö kitani kabre dän köräbäre abko tātre kite jabtā bikakäre bäri deme.

⁶ Erere arato, niaratre nūbaita bietabtā angwane, ja tākärā ni ütiäte ütiäte krāke, kánti tö tākāi temen. Erere arato, ja tākärā ni ütiäte ütiäte krāke sinagogate, kánti töta nebe rabai tākänintbe amne ja tākärā ni ütiäte ütiäte krāke, kánti tātre nebe tākänintbe.

⁷ Mdakäre abko, ni ütiäte krikri, ie köbö ngwiandretari, ye kwrere ni jökrā kākwe köbö ngwiandretari kāne ietre kā jändrän rürümoinkrā ye kántita temen, ie töta nebe. Erere arato, ni mda mdakwe kädianre dirikā abko ie töta nebe.

⁸ Akwa dirikā niedre munye mun mrākākwe ye abko munkwe ñan ribe jae, ñobtä ñan angwane Dirikā itibe tā munkwe abko Ngöbö ara amne mun abko ja etbare jökrā.

⁹ Mdakäre abko, Ngöbö mun Rün itibe abko tā kā känbti sete, aisete ni mda mda kā nebtā abko mun rün munkwe ñan nie ietre mikakäre tāte Ngöbö kwrere.

¹⁰ Erere arato, mun abko ni mda mda jie ngwianka niedre munye abko munkwe ñan ribe jae, ñobtä ñan angwane mun Jie Ngwianka era metre abko tärä munkwe. Mun Jie Ngwianka ye abko Ni Dianinkä Ngöbökwé.

¹¹ Mdakäre abko, nire nire tö rabai bäri ütiäte mun ngätäite, ni ye abko käkwe ja mika sribikä ni mda mdakrä,

¹² ñobtä ñan angwane nire nire tö ja mikai kri au, ni ye abko Ngöbökwé mikadi bobre ja ngwäreki, akwa nire nire käkwe ja mikadre bobre, ye abko Ngöbökwé mikadi ütiäte kri ja ngwäreki.

¹³ ¡Aingwaree! Mun Kukwe Biani Ngöbökwé Moiséye dirikätre amne mun bariseo käta ja bä mike kuin. Mun ye abko bobre jakän, ñobtä ñan angwane Ngöbö rükadre gobrane ni jökräbti, ye ngäniene munta jukwe dike jite, Ngöbö ñan rabadre gobrane btitre abkokäre. Ngöböta gobrane nibti, ye kánti mun ñan tö rikai amne ni mda mda tö rikai abko mun ñan tä tuemetre niken arato, aiseté mun bobre jakän.

¹⁴ ¡Aingwaree! Ngöbö bike mun Kukwe Biani Ngöbökwé Moiséye dirikä amne mun bariseo mike ja ngie nuen kri, ñobtä ñan angwane munta ja bä mike kuin abko krörö: Meri kän brare krütani abko kän munta ju denkä, abti munta nebe bike kuinkuin, käta nebe blite raire Ngöböbe ni jökrä ngwäreki, akwa munta kukwe nuene kore, akwa yebtä Ngöbökwé mun mikadi ja ngie nuen kri.*

¹⁵ ¡Aingwaree! Ngöbö bike mun Kukwe Biani Ngöbökwé Moiséye dirikä amne mun bariseo mike ja ngie nuen kri, ñobtä ñan angwane munta ja bä mike kuin abko krörö: Munta niken kä mdabti amne munta niken mrenbti kä mda mda kánti ni mda mda känene töi kwitakäre jakri. Ye erere tärä nebe nekete munkri angwane, kukwe dirita munkwe ietre abko erere tätre nuene. Abtä mun köböite tätre ja mike ngite bäri krübäte mun ngwä.

¹⁶ ¡Aingwaree! Mun okwäta kä drümente käta ni mda mda jie ngwena. Mun ye abko bobre jakän, ñobtä ñan angwane munta niere krörö angwane munta ni mda mda mike ja mike ngite Ngöbö rüere: Ju blitakrä Ngöböbe se käbti nire käkwe ja kukwei biandre abti kitadre temen kwe, ye ngwane rabadre ngite ñakare Ngöböye, munta niere. Akwa ju blitakrä Ngöböbe kánti, orota mikani, oro ye käbti ja kukwei biandre abti ja kukwei kitadre temen kwe, ye ngwane rabadre ngite Ngöböye abko munta niere angwane, munta dirire blo.

¹⁷ ¡Mun ngwarbe töi ñakare amne mun abko ni okwä kä drümente kwrere, aiseté Ngöbö Kukwei gare ñakare metre munye, käta kukwe niere kore! ¿Dre bäri ütiäte? ¿Oro tä mikani ju blitakrä Ngöböbe kánti ya o ju blitakrä Ngöböbe ara jire köböire oro tä nebe deme Ngöbö ngwäreki ya? Ju blitakrä Ngöböbe abko bäri ütiäte, akwa ütiäte ñakare munta niere.

¹⁸ Erere arato, ñukwä grä jändrän kukwakrä Ngöböye, ye käbti nire käkwe ja kukwei biandre abti ja kukwei kitadre temen kwe, ye ngwane ñan rabadre ngite Ngöböye, munta niere. Akwa jändrän kukwata ñukwä gräbti ye ara jire käbti nirekwe ja kukwei biandre abti ja kukwei kitadre temen kwe, ye ngwane rabadre ngite Ngöböye munta niere.

¹⁹ ¡kä iko mun okwäte Kukwe Ngöbökwébtü ñan ñan! ¿Dre bäri ütiäte? ¿Jändrän biandre Ngöböye kukwadre abko bäri ütiäte ya o ñukwä grä köböire jändrän bianta Ngöböye abko tä nebe deme Ngöbö ngwäreki abko bäri ütiäte ya? Ñukwä grä abko bäri ütiäte.

²⁰ Ne aiseté nire nire käta ja kukwei bien ñukwä grä käbti, ye abko ñan ñukwä grä aibe käbti tä ja kukwei bien, akwa jändrän jökrä tä mikani ñukwä gräbti ye käbti tä ja kukwei bien.

²¹ Erere arato, nire nire käta ja kukwei bien ju blitakrä Ngöböbe käbti, ye abko ñan ju ye aibe käbti tä ja kukwei bien, akwa Ngöbö ara jire tä nüne ju yete abko käbti tä ja kukwei bien arato.

²² Amne nire nire käta ja kukwei bien kä käinbti se käbti, ye abko kürä gobrankrä Ngöbökwé bti Ngöböta tákäninbte kä käinbti, aiseté Ngöbö ara jire käbti tä ja kukwei bien arato, nieba Jesukwe.

²³ Yebti Jesukwe nieba mda:

¡Aingwaree! Ngöbö bike mun Kukwe Biani Ngöbökwé Moiséye dirikä amne mun bariseo mike ja ngie nuen kri, ñobtä ñan angwane munta ja bä mike kuin abko krörö: Kri mu ütiäte ñakare kädianta menta, anís amne comino abko munta ukete keta jätä jätä, abti munta mike keteti jenena Ngöbökrä. Akwa jändrän bäri ütiäte kri nuendre abko Kukwe Biani Ngöbökwé Moiséye tä dirire abko munta nuene ñakare abko krörö: Kukwe ukadrede era metre ni mda mdakrä amne ni mda mda ngwiandre ruentari tare jae, erere arato tödekadre kwatibe Ngöböbti, ye abko munkwe nuendre jändrän kiakia nuenta munkwe ye ben gwaire, akwa ye kwrere munta nuene ñakare.

²⁴ Ne aiseté mun abko ni okwä kä drümente kwrere. Ngöbö tö dreye gare ñakare metre munye, akwa munta ja mike Ngöbö kukwei dirikätre, käta ni mda mda jie ngwena blo. Kä

* 23:14 Versículo 14 abko ñan tä tikani manuscrito kuinkuinbtä. Tä tikani Marcos 12.40 abko tikani nete.

u kiakia jākāteta deme bātārekā dendente ta, ye kwrere jire kukwe kiakia bāsi ūtiāte űākare bōkān Ngōbō Kukwebtā, bti munta mokrere krūbāte, akwa kukwe bāri ūtiāte nuendre tā tikani Ngōbō Kukweibtā ye abko kameo krikri űāka ngōi jōkrā, kwrere jire munta nuene kukwe ūtiāte krikribtā, aiseite munta mike ūtiāte űākare.

²⁵ ¡Aingwaree! Ngōbō bike mun Kukwe Biani Ngōbōkwe Moiséye dirikā amne mun bariseo mike ja ngie nuen kri, űōbtā űān angwane munta ja bā mike kuin abko krōrō: Mun abko baso amne siā bātāteta btārita aibe amne terita abko tā nebe dobrere kwrere jire, aiseite mun tōita gobtā amne jāndrān ni mda mdakwe abko ie mun tōta nebe jōkrā jakrā.

²⁶ Mun bariseo, munta ni okwā kā drūnente kwrere, aiseite ti bike niere krōrō munye: Baso amne blato bātāteta kuin jōkrā terita amne btārita tā nebe merebe jōkrā, ye kwrere jire munkwe ja tōi ara jire mika kuin merebe amne mun ngrabare rabadi kuin merebe jōkrā Ngōbō ngwāreki arato.

²⁷ ¡Aingwaree! Ngōbō bike mun Kukwe Biani Ngōbōkwe Moiséye dirikā amne mun bariseo mike ja ngie nuen kri, űōbtā űān angwane munta ja bā mike kuin abko krōrō: Ni doboi mikata abko kānti kā ūkateta abti jūkata bāta nebe ngwen būrere bāne, akwa ni krūtani aibe kroko tā nguse amne jāndrān kāmekāme rā kure dbe űākare Ngōbō ngwāreki tā nguse, ye kwrere jire munta nebe.

²⁸ Ye abko, mun abko kā ūkateta kuin rōkabti amne jūkata tā nebe bāne btārita kwrere jire abko krōrō: Munta ja bā mike ni moto kuin kwrere ni mda mda okwāte, akwa mun moto amne tōi abko te jāndrān kāmekāme tā munkwe, aiseite munta bike deme amne kukwe jōkrā kāme btā mun tōita, aiseite mun rōka jūkani ye kwrere.

²⁹ ¡Aingwaree! Ngōbō bike mun Kukwe Biani Ngōbōkwe Moiséye dirikā amne mun bariseo mike ja ngie nuen kri, űōbtā űān angwane munta ja bā mike kuin abko krōrō: Nitre Ngōbō kukwei niekā kirakira abko krāke munta kā ūkete kuin rōkabti niaratre mikakāre ūtiāte jae. Erere arato, ni ruāre kākwe nūnabare metre Ngōbō ngwāreki abko doboibti munta kā ūkete bā nuāre nuāre,

³⁰ bti munta niere krōrō: Ni mrākā kirakira kākwe nitre Ngōbō kukwei niekā kāmikani, ye ngwane ni tādre nūne akrāke nikwe űān kāmikadre jire chi gwaire bentre, munta niere jabtā.

³¹ Munta blite kore, yebtā mun mrākā kirakira kākwe nitre Ngōbō kukwei niekā kāmikani, ye arabe mrākākri mun jatani abko tā nūke gare munye űān űān.

³² Mun mrākā kirakira kākwe kukwe mikanintbe űō mun kāne nitre Ngōbō kukwei niekā rūare, ye kwrere munkwe mika nebe bare tāte jōkrā tibtā arato.

³³ ¡Mun abko tbi bōkān krūbāte ye kwrere jire! Ne aiseite Ngōbōkwe mun mikadi ja ngie nuen kā ja tare nikakrā kānti. Yebtā munkwe űān kwārābedre jire chi.

³⁴ Ne aiseite nitre Ngōbō kukwei niekā amne nitre tōbtā tōbtā amne nitre Ngōbō kukwei dirikā ye abko tikwe juandi Ngōbō Kukwei niekāre munye nete, akwa munkwe mūre ketadi amne munkwe metadi krusobtā ruāre. Ruāre abko sinagoga kāntikānti munkwe kwata metadi amne ruāre rikadi ngitie amne jiebti mun nāin kisere juta kwatirekwatire te niaratre mikakāre ja tare nike.

³⁵ Ne aiseite nitre nūnanka metre Ngōbō ngwāreki abko kāmikanina mun mrākā kirakirakwe, ye dokwāre Ngōbōkwe mun mikadi ja ngie nuen kri krūbāte. Abel kākwe nūnabare metre, ye nāire mentokwāre ni mūre ketani nebe Berequías ngobo Zacarías nāire amne Zacarías abko mūre ketani munkwe ju blitakrā Ngōbōbe kānti űūkwā grā amne kā deme te ruāre.

³⁶ Nitre mūre ketani kore, ye dokwāre abko Ngōbōkwe nitre nūnanka kā ne ngwane mikadi ja ngie nuen kri krūbāte abko ti bike niere metre munye.

*Jesukwe nitre Jerusalēnbo mūaibare
(Lucas 13.34-35)*

³⁷ Ye btārābe Jesukwe nitre Jerusalēnbo mūaiba, kākwe nieba krōrō:

¡Aingwaree, mun nūnanka Jerusalēn nete! Kāre munta nitre Ngōbō kukwei niekā mūre kete amne nitre juanta Ngōbōkwe ja kukwei ngwena abko mūre ketata jābti. Ye abko, kwita ngābāli kiakia ngibiare ja ngike tāni, ye kwrere kāre ti tō namani mun ngibiai, akwa mun űān tō namani ti tuai ja ngibiare.

³⁸ Ye mden kisete, ju munkwe nete ne rabadi tōkare jōkrā mun tābtā nete abko tita niere munye,

³⁹ űōbtā űān angwane mtare mentokwāre ti ngāmi kiteta, kānenkri munkwe űān ti tuadre jire chi mda, yebti munkwe ti tuadi angwane munkwe niedi krōrō:

Ni kitera nūke ni Dānkien Ngōbō kābti raba mikani ūtiāte kri, munkwe niedi kore ti ngābti. Abko kore se, nieba Jesukwe.

24

Dre rakadikā kā mrā kānenkri
(*Marcos 13.1-23; Lucas 21.5-24; 17.22-24*)

¹ Yebti Jesu nāma ju blitakrā Ngöböbe bäre, rikabata akwa ngāmi nikenta mente, kānenkri nun ja tōitikaka ben kākwe krōtaba ken amne nun rababa nākweiteta ja jiebti, kā rababa ju blitakrā Ngöböbe ye driereta ie tuadre.

² Ye erere bkānā Jesukwe ju ye mikabata ñāräre, kākwe nieba krörö nunye:

Ti bike kukwe era erere niere munye abko krörö: Ju kuin btā mun okwā nibi, köböitira jire ju se juandi ngwarbe jire jōkrā, aisetē jā ketani jabtī jabtī se juandi jōkrā temen abko ti tō nibi niei munye, nieba Jesukwe nunye.

³ Yebti nun rikaba ta nakri Jesube nebe Ngitio Olibobti, ye kānti Jesu rababa tākānintbe angwane, nun ja tōitikaka ben kākwe krōtaba ken, kākwe nieba kaibe ie:

¿Ngöbökwē kā ne juandi ngwarbe jōkrā makwe nini, ye abko rakadikā ñongwane? Erere arato, ma jatadreta bobuta amne kā ne rikai ta, ye abko bā mikadi ño nunye abko makwe niedre nunye, ie nun tō nibi, nunkwe nieba Jesuye.

⁴ Abtā Jesukwe nieba krörö nunye:

Bāri kāne abko, nitre ni ngōkaka, ye ngāniene munkwe ja ngibia kuin,

⁵ ñobtā ñan angwane ni jatadi kwati ti kābti kākwe niedi krörö: Ti abko Ni Dianinkā Ngöbökwē ara tā nete, niedi kwetre, ye kākwe ni kwati ngōkadi.

⁶ Mdakāre abko, munkwe kukwe krörö gadi: Nitre tādi rüre jabe kwārikwāri nete sete abko gadi munkwe amne blita rabadi kabre rūbtā, akwa mun ñan rekwetaka, ñobtā ñan angwane kukwe ye rakadikā kore abko erere rabadi nakenkā. Akwa ye ngwane kā mrā ngāmi nūke abko raba gare munye,

⁷ ñobtā ñan angwane juta kwatirekwatire rabadi rüre jabe kwārikwāri amne nitre nūnanka kā ketareketare te rabadi rüre jabe kwārikwāri. Erere arato, ni kwati rabadi mrō nike krūbāte amne dobo rabadi nakaenkā kā ketareketare temen kwārākwārā arato.

⁸ Akwa ye ngwane abko ja tare nika jatadi krire kena kā nebtā.

⁹ Ye ngwane mun abko mikadi ja tare nike tōdekabtā tibti amne mun ruäre abko müre ketadi amne munta tōdeke tibti, ye dokwäre ni kwati nūnanka kā ketareketare temen mātā rabadi munbtā.

¹⁰ Erere arato, kā ye ngwane ni kwati kāta ja tōdekaka tibti niere abko kākwe trō kwitadita tie, kākwe ti rükandite amne mātā rabadi jabtā kwārikwāri, kākwe ja kitadi ngise ngwarbe kwārikwāri.

¹¹ Erere arato, ni kwati jatadi ja bā mike ni Ngöbö kukwei niekā era metre kwrere ye kākwe ni kwati ngōkadi krūbāte.

¹² Ni kwati rabadi kukwe nuene kāmekāme krūbāte, aisetē bāsi ni jōkrā ñan rabadi ja tarere kwārikwāri mda.

¹³ Akwa nire nire kākwe nūnandrekā dite jabtā, kākwe ñan ti rükandrete nebebe kā mrā, ni ye abko rabadi dianintari Ngöbökwē.

¹⁴ Mdakāre abko, Ngöbö kebera nūke gobrane nibti, ye abko kukwe kuin abko tita niere, ne abko rabadi diribare kā jōkrābti temen Ngöböta sribire ño ni ngātāite mikakāre gare angwane, batibe kā mrā jatadi nūke.

¹⁵ Mdakāre abko, ni iti ngwarbe kāme kākwe jāndrān deme Ngöbökwē mikadi ngwarbe jae, ye mdenbtā abko ni Ngöbö kukwei niekā kādian nāmāne Daniel kākwe tārā tikani kira. Drebtā tita blite rūka gare munye, ñobtā ñan angwane ni ye tādi nūnaninkā kā deme ju blitakrā Ngöböbe ye kānti, Daniel kākwe kukwe tikani ye kwrere.

¹⁶ Angwane mun tādre Judeate ye abko gitia mintokwäre

¹⁷ amne mun mden mden tādre jubti kāin* ye abko ñan rika jāndrān tuenta jire chi gwi jae amne mun gitia jirekābe.

¹⁸ Mun mden mden tādre sribire tirete ye abko ñan rika dān tuenta jire chi gwi jae, akwa mun gitia gwāngwarbe jirekābe.

¹⁹ Akwa meri doboko doboko amne meri kwe ngābākre kiakia kianbtā, ye abko bobre jakān, ñobtā ñan angwane niaratre ñan raba ngitie jōtrō.

²⁰ Akwa mun gitiadre ye abko ñan rakadrekā kā ñüre nāire abko munkwe ribe Ngöböye, ñobtā ñan angwane tare nāin jōtrō kā ñüre nāire amne mun gitiadre ñan rakadrekā köbö jadükakrā nāire.†

* **24:17 tādre jubti kāin.** Ju nitre israelitare abko kiare bti kāin, aisetē nuäre dikakrā bti ta. † **24:20 mun gitiadre ye abko ñan rakadrekā köbö jadükakrā nāire.** Nitre israelita ñan rikadre mente köbö jadükakrate abko ūkaninte kwetre. Rikadre mente angwane, ja mikadre ngite kwe, aisetē Jesukwe niebare kore nūtūta.

²¹ Munkwe ribe kore Ngöböye, ñobtä ñan angwane kä dätebare kena angwane ja tare nika ñakare krübäte kore abko erere ja tare nikadi kri krübäte kä ye ngwane. Yebti ñan ja tare nikadreta mda ye kwrere.

²² Ye abko, Ngöbökwé ñan köbö krötadre jötrö käne ja tare nikakrä, ye ngwane ni ñan rabadre dianintari jire iti, akwa ni dianinkä jakrä Ngöbökwé abko Ngöböta tarere, aiseté köbö ja tare nikakrä krötadi jötrö kwe.

²³ Ne aiseté, kä ye ngwane kukwe raba nakenkä kore angwane, nane ni mdakwe niedre krörö munye: ¡Ni Dianinkä Ngöbökwé abko tä nete tuen! niedi kwe, o ¡Ni Dianinkä Ngöbökwé tä sete tuen! niedre kwe, akwa munkwe ñan kukwei mika era,

²⁴ ñobtä ñan angwane kä ye ngwane ni kwati jatadi ja bä mike Ni Dianinkä Ngöbökwé kwrere amne ni kwati jatadi ja bä mike ni Ngöbö kukwei niekä kwrere, käkwe sribi kriki ñan tuabare nuendi kabre bätäkä ngwarbe ni mda mda ngökakäre amne rabadre ni dianinkä jen jakrä Ngöbökwé ara jire ngökö, ne ngwane ngökadre kwetre, akwa ñan rabadi ngökö.

²⁵ Ne aiseté kukwe ye ngämi nakenkä, känenkri tita mun mike mokre biare.

²⁶ Ne aiseté ni mdakwe nie krörö munye: Ni Dianinkä Ngöbökwé abko tä kä kaibete sete, nie kwe angwane, mun ñan rika tuen kánti. Erere arato, nie krörö munye: Ni Dianinkä Ngöbökwé abko tä ja rükaninte nete, nie kwe angwane, munkwe ñan kukwei mika era,

²⁷ ñobtä ñan angwane merata trä ngitiekä ngwen käinta angwane, träta jataen batibe nindrini amne kä driri, ye kwrere arato, ti Ni Kä Nebtä Ngobo ne jatadita angwane, ni jökrä käkwe gadi batibe jökrä.

²⁸ Ye abko, ni ngwäkä tä mdente, btä jüden rabadi ja ükekrö ngwäkä kwete abko nita tuen, ye kwrere ti jatadita ni jökrä käkwe gadi.

Jesukristo jatadita

(Marcos 13.24-37; Lucas 17.26-30,34-36; 21.25-33)

²⁹ Ja tare nikadi kri nini tikwe, yebti btäräbe ñänä se rötadite amne kä rabadi iko jökrä. Erere arato, sö se ñan trä rabadre mda amne muke käinta se abko rabadi betekä timontimon amne jändrän kä käinbti se abko rabadi grüekä arato.

³⁰ Angwane ti, Ni Kä Nebtä Ngobo jatadita abko bä mikadi kore kä käinbti sete abko ni jökrä käkwe tuadi. Ye ngwane abko ni kä jökräbti temen rabadi nekwetekä krübäte ja jiebti, käkwe ja müaidi angwane, ti Ni Kä Nebtä Ngobo abko jatadi tuen ja di kri bä nuärebti mütabti abko ni jökrä käkwe tuadi.

³¹ Angwane tikwe angeletre tikwe juandi drü jüke kriki käkwe ni dianinkä jen jakrä ükadikrö jökrä ketetibe. Ni dianinkä jen jakrä nünanka nindrini, kä driri, sekri, nekri abko ükadikrö jökrä kwe.

³² Mdakäre abko, higokrie btä kukweta nakenkä ño, yebtä munkwe ja töitika abko krörö: Higo küdeta niren mräre mda amne käta nebe mräre btä arato angwane, kä töre tärä kite nuke ja ken abko munta gaen,

³³ ye kwrere arato kukwe nini tikwe ye jata nakenkä jökrä mun okwäbti angwane, ti Ni Kä Nebtä Ngobo nükerate ja ken jukwebtä abko rabara gare munye.

³⁴ Ti bike kukwe era erere niere munye abko krörö: Nitre nünanka kä nebtä ngämi krüte jökrä, ye känenkri kukwe nini tikwe ye erere rakadikä jökrä.

³⁵ Mdakäre abko, kä käinta se btä kä temen ne abko Ngöbökwé gadikä jökrä, angwane rikadi ta, akwa ti kukwei abko rabadi kärekäre.

³⁶ Akwa ti jatadreta köbö mdente amne ñänä okwä nuäi, ye abko gare ñakare jire chi ni mda mdaye, angele kä käinbti ie gare ñakare amne Ngöbö Odei ie gare ñakare arato, akwa Ngöbö ni Rün aibe ie tä gare kaibe.

³⁷ Mdakäre abko, kukwe nakaninkä ño ño Noé näire angwane ni jökrä nämane nüne jäme, ye kwrere arato ti Ni Kä Nebtä Ngobo ne jatadita angwane, kukwe rakadikä abko krörö:

³⁸ Kä ye ngwane abko ñü ngämi näkäen temen, känenkri abti Noé nikani rute, ye ngwane ni jökrä tö namani nünai ño, erere nämane nüne, aiseté nämane mröre, dö ñaen amne nämane ja mike gure.

³⁹ Ne aiseté nämane jäme, te batibe ñü jatani jobe temen, käkwe ñö mikani niren kri abko nikani nitre ye ngwana jökrä abko müre neketani ñöte, ñobtä ñan angwane niaratre kwani jäme nüye, ye kwrere arato ti Ni Kä Nebtä Ngobo ne jatadita angwane, kukwe rakadikä kore arato.

⁴⁰ Ye abko ti bike bä mike krörö munye: Ti jatadita ye ngwane ni tädi nibu sribire jäme tirete abko btäräbe iti jänäin amne iti abko mikadite.

⁴¹ Erere arato, meri tädi nibu trigo ukwe jäme abko btäräbe iti jänäin amne iti abko mikadite.

⁴² Ti mun Dänkien jatadita ñongwane, ye abko gare ñakare munye, aiseite munkwe mokre jabti ti ngibiakäre ngäbti.

⁴³ Kukwe mdara jire rabadre gare munye arato abko krörö: Ni gore rükadre kä ñongwane, ye rabadre gare ju bkänkäye akräke ju bkänkä käkwe kraidre gwi angwane, jändrän ñan goidre jire kån kwe.

⁴⁴ Ni gore rükadre ñongwane gare ñakare, ye kwrere ti Ni Kä Nebtä Ngobo ne jatadre ñakare jötrö mun tädi nütüre, aiseite mun tädi ngibiare ngäbti ñakare angwane, batibe rükadita, aiseite munkwe mokre jabti ti ngibiakäre ngäbti.

*Sribikä kuin amne sribikä käme, btä Jesukwe kukwe bä mikani
(Lucas 12.41-48)*

⁴⁵ Kukwe ye abko ti bike bä mike krörö: Sribikä kuin bti bkänkä rabadre tödeke amne sribikä töbtä ye abko bkänkä tä mikete ju ngibiare jakrä amne sribikä ye abko kä mrökrä erere käita nūke angwane, mrö tarä nebe biare kwe ni gwi bukakrä, sribikä kore yebtä abko ti bike niere krörö munye:

⁴⁶ Sribikä kisetete bkänkä tä sribi mike, bti bkänkä tä niken kä mdabti, bti tä kite nüketa angwane tä kwen sribi ye nuene täte bkänkäye, sribikä yebtä abko kä rabadre nuäre,

⁴⁷ ñobtä ñan angwane sribikä kore abko sribikä kuin abko ie bkänkä käkwe jändrän kwe mikadi gare jökrä ngibiadre jakrä abko ti tö nibi niei metre kore munye.

⁴⁸ Akwa sribikä moto käme ye abko rabadre töbike krörö: Ti dänkien nikani amne ñan rükadreta jötrö, rabadre nütüre,

⁴⁹ kä rikadre sribikä mda mda ngö tikekä amne nitre dröbaka dröbaka, ben rikadre ja gete amne rikadre mröre, dö ñaen krübäte,

⁵⁰ aiseite tädre jäme, ñan tädre bkänkä ngibiare ngäbti amne kä nuäi angwane bkänkä rükadreta, ye ñan tädre gare ie. Akwa batibe bkänkä rükadita

⁵¹ angwane, bkänkä ye käkwe mikadi ja tare nike krübäte amne nitre ja bä mikaka kuin abko mikadre ja ngie nuen, ye ben ketetibe ja tare nikadi kwe. Angwane batibe sribikä ye rabadi ja müaire amne tu ngö rabadi cherere jabtä ja tare nika kisetete. Munkwe ñan ti ngibiadre ngäbti ne ngwane, kukwe rakadrekä kore munbtä arato. Abko kore se, nieba Jesukwe.

25

Meri ni jätä gure ñakare

¹ Mdakäre abko, kä ye ngwane ni bti Ngöböta gobrane abko btä kukweta nakenkä ni ja mikaka gure kwrere abkobtä ti bike bä mike abko krörö: Bati ni iti nikani ja mike gure angwane, meri bati bati ni jätä* käkwe ja mikani juto niara ngibiare ngäbti kä ngwiankäre nuäre jabtä ben amne ñotra diani kisetekisete kwetre abko ben nikani ni ja mikaka gure ye ngäbti.

² Akwa meri nirike abko töi ñakare amne meri nirike mda abko töbtä,

³ aiseite meri töi ñakare ye abko nikani ñotra aibe ngwena;

⁴ akwa meri nirike töbtä ye abko nikani aseite ngwena biare boteate kekadre ñotrate jae.

⁵ Abti meri ni jätä ye namani ni ja mikaka gure ye ngibiare ngäbti, akwa ni ye abko ñan namani nūke jötrö angwane, meri ye ie köbö jatani abti mrä angwane nikaninta kibien jökrä mda.

⁶ Yebti kä jatanina nūke ruäre deo angwane, batibe ni kukwei jarabare ngwänenkä krörö ietre:

¡Ni ja mikaka gure kitera nūke! ¡Mun jakwe kaen ngäbti! ni kukwei jarabare kore ietre.

⁷ Ye btäräbe meri bati bati ni jätä ye naninkrö jötrö, kä nikani ñotra mike biare nänkärä ni ja mikaka gure ye ngäbti.

⁸ Akwa meri nirike töi ñakare ye käkwe niebare meri nirike töbtä yeye:

Aseite kitera krüte ñotrate nunkän amne ñotra nibi nötöte nunkän, aiseite aseite ngwianta munkwe ye munkwe bian ruäre nunye, niebare kwetre.

⁹ Abtä meri nirike töbtä ye käkwe niebare mda ietre:

Nunkwe ñan aseite biandre munye, ñobtä ñan angwane nunkwe biandre munye angwane, ñan rabadre täte ni jökrä kräke, aiseite aseite rürümointa ye kanti mun rikadre kökö jötrö jakrä abko rabadre bäri kuin, niebare kwetre ietre.

¹⁰ Ye erere bkänä, meri nirike töi ñakare ye nikani aseite kökö jae. Ye btäräbe ni ja mikaka gure nūkani angwane, meri nirike töbtä abko nikani nebe gwi kä ngwiankäre nuäre jabtä ni ja mikaka gure yebe angwane, jukwe dikaninbe kwe.

¹¹ Yebti meri nirike töi ñakare ye jatani nūke mda, kä namani niere krörö jukwebtä:

* 25:1 Meri bati bati ni jätä ne abko nämane meri ja mikaka gure kukwe muko abko nämane näin niara mukore.

Nun Dänkien, jukwe tike nunye, namani niere.

¹² Akwa ni ja mikaka gure ye kākwe niebare mda ietre:

Era metre mun gare ñakare tie, aisete tikwe ñan jukwe tikadre munye. Abko kore se, niebare kwe ietre.

¹³ Ye abko, nane kukwe rakadrekä kore munbtä, ye känenkri munkwe mokre jabti, kākwe ti ngibia ngäbti, ñobtä ñan angwane köbö mdente amne ñänä okwä nuäi angwane ti jatadita abko gare ñakare munye aisete.

*Ngwian ngibiaka kuin, btä Jesukwe kukwe bä mikani
(Lucas 19.11-27)*

¹⁴ Mdakäre abko, kä ye ngwane ni bti Ngöböta gobrane abkobtä kukweta nakenkä krörö arato: Bati ni nämane iti abko jatani niken mente kä mdabti. Jatanina niken jibti, kākwe sribikä kwekwe käräbare, bti ngwian biani ngibiadre kwe jakrä ietre.

¹⁵ Akwa ni itire itire tōi ño ño ye erere btä ngwian biani kwe ietre, aisete ni iti, ie ngwian biani mili krärike kwe amne sribikä mda abko ie biani mili krobu kwe amne sribikä mda abko ie biani mili krati kwe, abti nikani.

¹⁶ Yebti sribikä ie ngwian biani mili krärike, ye nikani sribire ngwian yebti, aisete ngwian mili krärike yebti ngwian mda ganaibare mili krärike kwe.

¹⁷ Ye kwrere arato, sribikä ie ngwian biani mili krobu, ye nikaninbe sribire ngwian yebti arato, aisete ngwian mili krobu, yebti ngwian mda ganaibare mili krobu kwe.

¹⁸ Akwa sribikä ie ngwian biani mili krati, ye abko nikani, kākwe ngwian bkänkä kwe ye nökan jirekäbe dobote nguse.

¹⁹ Yebti kä nikanina raire ta angwane, sribikä bkänkä nukaninta. Angwane ngwian biani kwe ngibiadre sribikäye, yebtä nikani kukwe ükete bentre.

²⁰ Angwane sribikä ie ngwian biani mili krärike kwe ye ara jire nükani käne, kākwe ngwian mili krärike ye bianinta bkänkäye amne ngwian mda biani mili krärike kwe arato, kākwe niebare bkänkäye: Ti Dänkien, makwe ngwian bianba mili krärike tie, akwa ngwian yebti abko tikwe ngwian mda ganaibare mili krärike arato makrä abko tä nete ne, niebare kwe bkänkäye.

²¹ Abtä sribikä bkänkä kākwe niebare mda ie: Bäri kuin. Ma abko sribikä kuin amne ma kuin tödekakrä. Ngwian braibe bti makwe sribibare kuin tikrä, aisete tikwe sribi bäri kri mikadi ma kisete mda, aisete jakwe kä ngwen nuäre jabtä tibe, niebare kwe ie.

²² Angwane sribikä ie ngwian biani mili krobu kwe ye ara jire nükani mda, kākwe ngwian mili krobu ye bianinta bkänkäye amne ngwian mda biani mili krobu kwe arato, kākwe niebare ie: Ti Dänkien, makwe ngwian bianba mili krobu tie, akwa ngwian yebti abko tikwe ngwian mda ganaibare mili krobu arato makrä abko tä nete ne, niebare kwe bkänkäye.

²³ Abtä sribi bkänkä kākwe niebare mda ie: Bäri kuin. Ma abko sribikä kuin amne ma kuin tödekakrä. Ngwian braibe, bti makwe sribibare kuin tikrä, aisete tikwe sribi bäri kri mikadi ma kisete mda, aisete jakwe kä ngwen nuäre jabtä tibe, niebare kwe ie.

²⁴ Akwa sribikä ie ngwian biani mili krati bkänkä kwe, ye nükani mda angwane niebare krörö kwe ie: Ti Dänkien, ma töta nünai ni mda mda aibe diebti, ye gare kuin tie, ñobtä ñan angwane ni mda mda tä nura nökö amne ma abko tä ngwä ötö kabre kän kä ütiäre, akwa ma abko nura nökö ñakare. Erere ni mda mda tä nura metekä amne mata ngwä ötö kabre kän kä ütiäre, akwa ma abko nura metekä ñakare jakrä.

²⁵ Ye mdenbtä ma jürä rababa tibtä. Abtä tikwe ngwian makwe ye nökaba jirekäbe dobote nguse, akwa ngwian makwe erere tä jökrä nete ne, niebare kwe bkänkäye.

²⁶ Abtä bkänkä kākwe niebare romone ie: Ma abko sribikä käme amne kä krene mabtä. Tita nura nökö ñakare, akwa tita ngwä ötö ni mda mdakän amne ti nura metekä ñakare, kanti tita ngwä ötö ni mda mdakän gare kuin mae mata niere,

²⁷ aisete ma rikadre kākwe ngwian tikwe ye mikadre bankote tikrä, abti ti jatadre nüketa angwane ngwian mda biandre tie ngwian tikwe ye bärire mda näre abko makwe ñan ngwian mikani bankote tikrä, niebare kwe sribikä yeye.

²⁸ Abti nitre nämane yete, ie sribi bkänkä kākwe niebare: Ngwian mili krati tä ni nokokwe, se denkä kän munkwe, bti sribikä kwe ngwianta mili krä jätä, seye bian munkwe,

²⁹ ñobtä ñan angwane nire nire kwe jändrän tärä kabre abko ie jändrän biandi bäri mda amne rabadi jändrän bkäne bäri kabre mda; akwa nire nire jändrän bkäne chi ye abko kän jändrän chi ye diandikä jökrä.

³⁰ Ye mden kisete, sribikä käme krene noko kitekä kä bäri iko te ju bäre sere munkwe. Ye kanti niara rabadi ja müaire amne tu ngö rabadi cherere jabtä ja tare nika kisete. Abko kore se, niebare sribikä bkänkä kwe.

Kä mrä näire Jesukwe kukwe ükadite ni jökrä kräke

³¹ Mdakäre abko, ti Ni Kä Nebtä Ngobo jatadita ja di kri bä nuärebti angwane, angeletere tikwetikwe rabadi jökrä bäre temen angwane, kürä gobrankrä bti ti rabadi tākānintbe kā bä nuärete.

³² Ye ngwane abko nitre nūnanka kā jökräbti temen rükadi ja ükekrö ti ngwärekre angwane, ni obeja ngibiaka kāta obeja erere ükekrö jenena amne kabra erere tā ükekrö jenena, ye kwrere jire tikwe ni ükadikrö ketebu jene jene.

³³ Amne ni jen tikwe obeja kwrere erere tikwe mikadi ja küde ruenkri amne ni ñakare tikwe kabra kwrere abko tikwe mikadi ja küde ngeberekri, ni obeja ngibiaka kāta nuene obeja amne kabrabtä ye kwrere.

³⁴ Yebti nitre tädi jrei küde ruenkri, ye ie jreikwe niedi krörö: Mun die mikani ti Rünkwe ye erere jakwe jökrä nete. Ngöbökwē kā dātebare kena angwane, kā ye kānti niarata gobrane ye abko niarakwe kā ükaninte biare munkrä ne mun jakwe kaen ngäbti,

³⁵ ñöbtä ñan angwane mrö rababa tie angwane, munkwe ti bukaba; tomna rababa tie angwane, munkwe tomna bianba tie; ti nämā dikekä ngwarbe krö kwäräkwärä ni menteni kwrere angwane, munkwe kā bianba kibiakrä tie.

³⁶ Erere arato, ti jatani bütie ngitiete angwane, munkwe dän biani tie; ti nämāne nebe bren bren angwane, mun nämāne nebe basare tie amne ti kita nämāne ngite kā teri angwane, mun nämāne nebe ti tuenbti tuenbti, aisetē mun jakwe kā gobrankrä ne kānti nūnakäre tibe, niedi Jreikwe nitre niara küde ruenkri yeye.

³⁷ Angwane nitre nūnanka metre ye kākwe niedi krörö jrei yeye: Nun Dänkien, ¿ñongwane nunkwe ma tuani mröi amne nunkwe ma bukani? ¿Erere arato, ñongwane nunkwe ma tuani tomna mdei nike amne nunkwe tomna biani ñadre mae?

³⁸ ¿Mdakäre abko, ñongwane nunkwe ma tuani dikekä ngwarbe krö kwäräkwärä ni menteni kwrere amne nunkwe kā biani kibiakrä mae amne, ñongwane nunkwe ma tuani ja bütie nike angwane, nunkwe dän biani mae?

³⁹ ¿Erere arato, ñongwane nunkwe ma tuani bren o ngite kā teri angwane, nun nämāne niken ma tuenbti tuenbti? niedi kore kwetre jrei yeye.

⁴⁰ Abtä jrei ye kākwe niedi mda ietre: Ti mräkätre bäri bobre, kräke munkwe jändrän kuin nuenbare kore, ye ti ne ara jire munkwe die mikani abko ti tö nibi niei metre kore munye, niedi kore Jreikwe.

⁴¹ Yebti nitre tädi jrei küde ngeberekri abko ie Jreikwe niedi krörö: Mun nena biare ja tare nikakäre, aisetē ñukwä jutra ngitiekä kärekäre tā ükaninte biare diablu amne üai kāmekāme kwe mikakäre ja tare nike, se kānti nän siba amne kā mīkekä tibtä nete,

⁴² ñöbtä ñan angwane mrö rababa tie angwane, munkwe ñan ti bukaba; tomna rababa tie angwane, munkwe ñan tomna bianba tie.

⁴³ Ti nämā dikekä ngwarbe krö kwäräkwärä ni menteni kwrere angwane, munkwe ñan kā bianba kibiakrä tie. Erere arato, ti jatani bütie ngitiete angwane, munkwe ñan dän biani tie; ti nämā nebe bren bren amne ti kita nämāne ngite kā teri angwane, mun ñan nämāne niken ti tuenbti, niedi Jreikwe nitre yeye.

⁴⁴ Abtä niaratre kākwe niedi krörö: Nun Dänkien, ¿ñongwane nunkwe ma tuani mrö nike, tomna mdei nike amne ñongwane nunkwe ma tuani ja bütie nike? ¿Erere arato, ñongwane nunkwe ma tuani dikekä ngwarbe krö kwäräkwärä ni menteni kwrere amne ñongwane nunkwe ma tuani bren bren amne ngite kā teri, akwa nunkwe ñan ma die mikani, mata niere ye? niedi kwe jrei yeye.

⁴⁵ Angwane jrei ye kākwe niedi krörö mda ietre: Ti mräkätre bäri bobre bobre abko kräke munkwe ñan jändrän kuin nuenbare jire chi, aisetē ti ne ara jire kräke munkwe ñan jändrän kuin nuenbare arato abko ti tö nibi niei metre kore munye, Jreikwe niedi nitre yeye.

⁴⁶ Yebti nitre ye abko nāin kā ja tare nikakrä kärekäre ye kānti amne nitre nūnanka metre metre abko nāin nūne kärekäre Ngöböbe. Abko kore se, nieba Jesukwe.

26

Jesu rüe tö namani kain ngite tiebe

(Marcos 14.1-2; Lucas 22.1-2; Juan 11.45-53)

¹ Jesukwe diribare ünän jökrä, yebti nun ja töitikaka ben ie nieba krörö kwe:

² Bieta Pascua abko köböi nebera köböbube, ye garera munye angwane, Pascua ye näire abko ti Ni Kä Nebtä Ngobo ne kitadi ngise müre ketadre krusöbtä, nieba Jesukwe nunye.

³ Ye erere bkänä, kā ye ngwane abko nitre ji dokwäte nitre blitaka Ngöböbe ni mda mda diärebti amne nitre unbren ji dokwäte kākwe ja ükaninkrö gätäbtä nitre blitaka Ngöböbe ni mda mda diäre dänkien kädian nämāne Caifás gwiriete.

⁴ Ye kānti ni ngökadre ño kwetre köböire Jesu kadre ngite kwetre, bti müre ketadre kwetre abko nikani ükete Jesu rüere.

⁵ Akwa nane ni kwati krübäte nämane Jerusalén Pascua köböikrä kākwe rüdre bentre Jesu dokwäre, aisete Pascua näire ñan nuendre, niaratre namani niere.

Meri iti kākwe ñö rä bāne kekani Jesubti
(*Marcos 14.3-9; Juan 12.1-8*)

⁶ Kä ye ngwane abko Jesu nämä juta Betaniate Simón juete. Jesu ngämi Simón ye miketa kuinta, känenkri Simón ye abko kädian nämane lebroso arato abko kánti Jesu nämä.

⁷ Ye btäräbe meri jataba iti nüke Jesu ken angwane, jä bā ngwen kädianta alabastro abko dätebare boteare abko krati meri ye nämä näin ñö rä bāne ütiäte kri ngwena abko rükaba Jesu kánti. Jesu abko nämä tākänintbe mesabtä angwane, meri ye kākwe ñö rä bāne ye kekaba Jesu dokwäbti.

⁸ Merikwe ñö rä bāne ütiäte kri ianteba Jesubti nun okwäbti angwane, nun ja tötikaka Jesube moto rababa romon, kä rababa niere krörö:

¿Se ñöbtä meri se tä ñö rä bāne ütiäte kri iente ngwarbe se?

⁹ Ñö rä bāne se rürümoinde ngwian kabre btä kwe abti ni bobre bobre die mikadre kwe bā amarebti ininte ngwarbe kwe se, nun rababa niere.

Nun rababa ñäke kore ye kukwei jaraba Jesuye. Abtä nieba kwe nunye:

Meri ne kākwe jändrän kuin nuni tikrä. ¿Se ñöbtä abko mun nibi nike krübäte dikaro?

¹¹ Nitre bobre bobre tädi käre mun ngätäite nete abko munkwe die mikadre, akwa ti abko ñan tädi käre käre munbe nete, aisete niarakwe ti miri ütiäte kore abko tä dbē.

¹² Meri ne kākwe ñö rä bāne kiri ti ngrabare, yehti abko ti miri juto biare kwe doboi mikadre.

¹³ Ye abko, ti bike kukwe era erere niere munye abko krörö: Kukwe kuin tibtä ye kädriedi mdente mdente erere, ye kánti meri ne kākwe jändrän kuin nuni tikrä mtare ne kädriedi arato, aisete jändrän kuin nuni meri nekwe, yebtä rükadita töre. Abko kore se, nieba Jesukwe nunye.

Judakwe Jesu kitani ngise
(*Marcos 14.10-11; Lucas 22.3-6*)

¹⁴ Abti nun ja tötikaka Jesube ni jätäbti nibu, ye ngätäite ni iti kädian nämane Judas Iscariote abko rikaba nitre blitaka Ngöböbe ni mda mda diäre dänkientre ye kánti,

¹⁵ kākwe niebare krörö tetre:

Ti tö Jesu kitai ngise munye, akwa ¿ye abko munkwe ütiä biandre nuäi tie? niebare kwe. Angwane nitre ji dokwäte ye kākwe ngwian mnüne biani gre ketamä Judaye Jesu ütiäre.

¹⁶ Ye näire mentokwäre Judas namani kä kuin ngibiare kisere jae, Jesu kitakäre ngise.

Jesukwe mröbare mrä nitre ja tötikaka benbe
(*Marcos 14.12-25; Lucas 22.7-23; Juan 13.21-30; 1 Corintios 11.23-26*)

¹⁷ Yehti bieta Te Lebadura Ñakare Bante kweta nämane ye köböi kena rükaba angwane, nun ja tötikaka Jesube kākwe krötäba ken kākwe nieba ie:

¿Mrö kwetadre bieta Pascuakrä ye abko nunkwe sribedre mdente makrä, ie ma tö nibi? nieba nunkwe ie.

¹⁸ Angwane Jesukwe nieba krörö nunye:

Mun nän juta Jerusalén sete, ye kánti ni kwandi iti munye abko ie munkwe nie krörö: Dirikä nunkwe kākwe niemna krörö mae: Kä kitera nüke ja ken ti käne, aisete mrö Pascuakrä abko ti tö kwetai ketetibe nitre ja tötikaka tibe ben, aisete ti näin mröre niaratrebe ma juete, tikwe nini abko munkwe nie ie. Abko kore se, nieba Jesukwe nunye.

¹⁹ Ye erere bkänä, Jesukwe nun juanba mrö ükete biare, ye kwrere nun janama nuene, kākwe mrö sribeba kwetadre bieta Pascuakrä.

²⁰ Yehti kä jatäbara diore dere angwane, Jesu nämä tākänintbe mesabtä nun ja tötikaka ni jätäbti nibu ben.

²¹ Nun nämä mröre angwane, Jesukwe nieba krörö:

Ti bike kukwe era erere niere munye abko krörö: Mun iti tä nete kākwe ti kitadi ngise ti rüeye, nieba kwe nunye.

²² Yehti abko nun moto rababa ulire jökrä angwane, nun itire itire rikaba niere ja täritäri Jesuye:

Ti Dänkien, ¿tikwe nuendi ya gwari? nun rababa niere.

²³ Abtä Jesukwe nieba mda nunye:

Ni iti kätä ban mike tibo gwaire tibe blato kwatibe te, ye abko kākwe ti kitadi ngise,

²⁴ akwa ti, Ni Kä Nebtä Ngobo abko müre ketadi ño, ye tä tikani Ngöbö Kukweibtä abko erere rakadikä. ¡Akwa ni ti kitaka ngise abko ñan bobre jakän ya! Ni ye nin däredre näre abko därebare, nieba Jesukwe.

²⁵ Angwane Judas kä nämane Jesu kite ngise tiebe ye kākwe nieba mda Jesuye:

Dirikā, ¿tikwe ma kitadi ngise ya? nieba kwe.

Abtä Jesukwe nieba mda ie:

Ma ara kākwe ti kitadi ngise erere makwe nini metre, nieba kwe ie.

²⁶ Yebti nun nāma mröre jōkrā angwane, Jesukwe ban dianba kunti kisete, kākwe kuin nieba btā Ngōböye, bti ōtabtäba kwe, bti bianba kwe nun ja tōitikaka benye, kākwe nieba:

Ban ne abko ti ngätä ara. Ne kaen ngäbti munkwe, bti munkwe kweta, nieba kwe nunye.

²⁷ Yebti uba dōi nāma basote abko Jesukwe dianba kisete, bti kuin nieba btā kwe Ngōböye, bti bianba kwe nunye, kākwe nieba:

Uba dōi tā basote ne ñaen ja täritäri munkwe.

²⁸ Uba dōi ne abko ti dārie tikwe ara. Ngōbökwē kukwe ūkadite btin munbe ye abko rabadi bare täte jōkrā ti dārie nebti. Erere arato, ti dārie rimiadite ni kwati krāke köböire ni kwati ngite Ngōbö rüere ye Ngōbökwē diandikā mento btā.

²⁹ Akwa Ngōböta gobrane ye kanti tikwe uba dōi btin ñadita munbe, akwa ti ngāmi ñaen munbe, kānenkri tikwe ñan ñadreta jire chi abko ti tō nibi niei munye. Abko kore se, nieba kwe nunye.

³⁰ Yebti nunkwe ka Salmobtä nieba ünän jōkrā, bti nun rikaba Ngitio Olibobti.

Pedro kākwe Jesu rükandite, niebare Jesukwe

(Marcos 14.26-31; Lucas 22.31-34; Juan 13.36-38)

³¹ Angwane Jesukwe nieba nunye:

Kukwe rakadikā tibtä, yebtä mtare deo mun gitiadi iti iti kwäräkwärä tibtä mentokwäre, ñobtä ñan angwane Ngōbö Kukwei kätä ti bā mike obeja ngibiaka kwrere amne mun abko obeja tikwe kwrere abko krörö:

Tikwe obeja ngibiaka kāmikadi angwane, obeja kwe abko gitiadi kratikrati kwäräkwärä, *Zacarias 13.7*

abko Ngōbö Kukwei tā niere kore munbtā.

³² Akwa ti müre ketadi, bti ti rükadita nire angwane, ti näin mun ngäbti Galilea, kanti ni rabadita ketetibe jōkrā, nieba Jesukwe nunye.

³³ Abtä Pedro kākwe nieba Jesuye:

Ni mda mda kākwe ñan tōdekadre mabti, aisete gitiadi mabtä mento, akwa ti abko kākwe ñan nuendi jire chi kore, nieba kwe.

³⁴ Abtä Jesukwe nieba mda ie:

Mtare deo antlan ngāmi ngwāne, kānenkri makwe ti rükandite bāmā jire abko ti tō nibi niei metre mae, nieba kwe Pedroye.

³⁵ Abtä Pedrokwe nieba mda Jesuye:

Ti kāmikadre gwaire mabe ya ño, akwa tikwe ñan ma rükandite jire chi, nieba kwe.

Amne nun ja tōitikaka Jesube abko rababa ñāke gwaire jōkrā Pedro kwrere siba.

Jesu nikani blite Ngōböbe Getsemaní

(Marcos 14.32-42; Lucas 22.39-46)

³⁶ Yebti nun ja tōitikaka Jesube, ben Jesu rikaba nebe kākā Getsemaní kanti angwane, Jesukwe nieba nunye:

Tāke temen yete munkwe amne ti abko bike niken känime nokore blite Ngōböbe, nieba kwe.

³⁷ Yebti Pedro amne Zebedeo ngobo nibu Juan amne Santiago aibe ngwianba kwe jabe.

Yebti Jesu moto jatani ulire amne moto namani bete krübäte ja jiebti,

³⁸ kākwe niebare nitre nimä yeye:

Ti moto nibi ulire krübäte dikaro tie, aisete ti kebera krüte nibi ruen tie, aisete mun raba ti ngibiare nete, akwa munkwe ja ngwätei siba tibe amne munkwe ñan kibia, niebare kwe ietre.

³⁹ Ye btäräbe Jesu nikani bā mente temen se kwrere, kanti nikani ngitieäkā ngukudokwäbti temen, kākwe ja okokrā mikani nebe doobtä temen amne blitabare krörö kwe Ngōböbe:

Ti Rün tikwe, ti kite ja tare nike kri krübäte jakän, akwa tikwe ñan ja tare nikadre kore, ie ma tō ne ngwane, makwe dian ti bäre. Akwa ma tō dreye tikrā, ye erere raba bare tibtä amne ñan ti tōi abko erere rabadre bare, niebare kwe Rün Ngōböye.

⁴⁰ Yebti nitre nimä ja tōitikaka Jesube nāma, ye kanti Jesu nikaninta angwane, niaratre nāmane kibien kuin jōkrā, btā Jesu namaninta angwane, Jesukwe niebare Pedroye:

¿Ñänā okwā kratibe abko te kā ñan nü munye ja ngwätäre blitakäre Ngōböbe gwaire tibe ya?

⁴¹ Diablu jatadi mun nuente ja käne ye ngwane, munkwe ñan ja mikadre ngite, abkokäre munkwe ja ngwätei amne munkwe blita jakrā Ngōböbe, ñobtä ñan angwane mun tōi abko tā biare jändrän kuin nuene, akwa mun di ñakare, aisete munkwe blita jakrā Ngōböbe, niebare Jesukwe ietre.

⁴² Yehti Jesu nikani bliteta bobukäre Ngöböbe, käkwe niebare krörö:

Ti Rün, tikwe ja tare nikadre kri krübäte jakän, ye makwe dian ti bäre, akwa tikwe ja tare nikadre kri, abti makwe diandrekä tibti, ye ngwane ma tö dreye, ye erere raba bare tibtä, niebare Jesukwe Rün Ngöböye.

⁴³ Yehti nitre nimä ja töitikaka Jesube, ye kanti Jesu nikaninta angwane, namani kibien kuin jökrä, ñobtä ñan angwane köbö namani krübäte ietre, aiseti okwä kwata namani neketekäbe jabtä köbö kisete, btä Jesu namaninta.

⁴⁴ Abtä Jesukwe ñan ñäkäbare mda ietre angwane, nikani bliteta bämäkäre Ngöböbe amne Jesukwe blitabare ño käne, ye kwrere blitabareta kwe Ngöböbe.

⁴⁵ Abti nitre nimä ja töitikaka Jesube, ye kanti Jesu nikaninta angwane, Jesukwe niebare ietre:

¿Mun tä kibien amne mun tä jadüke janknu ya? Nitre kukwe kämekäme nuenkä abko kisete ti Ni Kä Nebtä Ngobo ne kitadi ngise ye abko käi nüra,

⁴⁶ aiseti ni ti kitaka ngise tiebe ti rüeye abko nükerä tibtä, aiseti näin krö, bränta, niebare kwe ietre.

Jesu kani ngite

(Marcos 14.43-50; Lucas 22.47-53; Juan 18.2-11)

⁴⁷ Jesu nämä blite kore, ye btäräbe ni iti ja töitikaka ben kädian nämä Judas Iscariote ye ara jataba nüke Jesu kanti. Judas ye abko nämä näin ni kwati ben. Nitre jataba ben ye abko nämä näin ngitra ngwena kisete amne ruäre abko nämä näin krito ngwena kisete. Nitre ye abko nämä näin nitre blitaka Ngöböbe ni mda mda diäre Dänkien käbti amne nitre unbren ji dokwäte käbti arato.

⁴⁸ Angwane Judas, Jesu kitaka ngise, ye abko käkwe nitre töi dianina käkwe niebare ietre: Nire demain tikwe mun okwäbti ye abko Jesu ara, aiseti munkwe niara ye ka ngite, niebare kwe ietre.

⁴⁹ Ye erere bkänä, Judas jataba nüke, ye btäräbe rikaba Jesu kanti, käkwe nieba krörö ie:

¡Ñantöre Dirikä! nieba kwe.

Bti Jesu demainba kwe.

⁵⁰ Abtä Jesukwe nieba mda ie:

Ja mräkä ma tö nibi dre nuein, ye erere makwe mika nebe bare jötörö, nieba kwe Judaye. Angwane nitre jataba Jesu rüere ye käkwe krötäba Jesu ken, rankwaba btä, käkwe kaba ngite.

⁵¹ Ye btäräbe ni iti ja töitikaka Jesube käkwe ngitra diankaba kwatate, bti ni klabore ni blitaka Ngöböbe ni mda mda diäre dänkienkwe ye olo tikakaba ta kwe ie.

⁵² Abtä Jesukwe nieba ie:

Ngitra ye miketa jötörö kwatate yete, ñobtä ñan angwane ni rükä ngitrabti abko kämikata ngitrabti arato, aiseti ngitra ye üketa.

⁵³ ¿Tikwe ja di kärädre ti Rünye angwane, gwängwarbe niarakwe angele juandre kabrekabre krübäte rüre ti dokwäre, ye gare ñakare mae ya amarebti ye?

⁵⁴ Akwa tikwe ja di kärädre kore ti Rünye angwane, Ngöbö Kukwei tä tikani tibtä abko erere ñan rabadre bare, aiseti tikwe ñan angele kärädre ti Rünye rükäre ti dokwäre, nieba Jesukwe nun ja töitikaka ben yeye.

⁵⁵ Yehti nitre rikaba Jesu kaen ngite, ye ie Jesukwe nieba krörö:

¿Ñobtä abko bäsi ni gokä kri krübäte rüere ngitra jäta niken amne krito jäta niken, kwrere jire mun kite ngwena ti rüere ti kakäre ngite ye? Käre köbö kwatirekwatire tita dirire ju blitakrä Ngöböbe kántita temen, akwa mun ñakare ti kaen ngite.

⁵⁶ Akwa nitre Ngöbö kukwei niekä käkwe tarä tikani tibtä, ye erere rabadre bare täte jökrä tibtä, abkokäre mun nüke ti kaen ngite kore, nieba Jesukwe ietre.

Jesukwe ñäkäba kore, ye btäräbe nun ja töitikaka ben käkwe kä mikakaba batibe jökrä amne nun gitiaba iti iti kwäräkwärä amne nunkwe Jesu mikateba kaibe rüeye.

Jesu jänikani Sanedrín ngwärekre

(Marcos 14.53-65; Lucas 22.54-55,63-71; Juan 18.12-14,19-24)

⁵⁷ Yehti nitre Jesu kaka ngite ye nikani Jesu ngwena nebe Caifás gwiriete. Caifás abko ni blitaka Ngöböbe ni mda mda diäre dänkien. Angwane Caifás gwiriete abko Kukwe Biani Ngöbökwé Moiséye dirikätre nämäne ja ükaninkrö ketetibe nitre unbren ji dokwätebe abko kanti Jesu jänikani.

⁵⁸ Jesu jänikani angwane, Pedro abko jatani bä mente temen siba Jesu jiehti. Yehti nikani nebe ju bäre ni blitaka Ngöböbe ni mda mda diäre dänkien ye kanti. Pedro nikani siba ki teri angwane, guardia ju blitakrä Ngöböbe ngibiabtikä nämäne täkänintbe, ye kanti Pedro namani täkänintbe siba amne dre rakadikä mda Jesubtä abko tö namani tuai, aiseti nikani yete.

⁵⁹ Angwane nitre blitaka Ngöböbe ni mda mda diäre dänkien amne Sanedrin namani kukwe kănene ngwarbe Jesu rüere Jesu kitakäre ngise müre ketadre,

⁶⁰ akwa kukwe era erere ñan namani kwen ietre Jesu rüere. Ni kwati namani nuke blite ngwarbe Jesu rüere, akwa kukwe ñan namani kwen jire chi ietre Jesu kitakäre ngise. Yebti ni mdara jire namani nibu

⁶¹ abko kákwe niebare krörö Jesu rüere:

Ni noko kákwe nieba krörö: Ju blitakrä Ngöböbe se ti raba juen ngwarbe jökrä, abti köbömákäre angwane, ti raba miketa täte, nieba kwe nun okwäbti, niebare kwetre.

⁶² Yebtä abko ni blitaka Ngöböbe ni mda mda diäre dänkien ye nükani dikekä krö, kákwe niebare Jesuye:

¿Kukwe nie nibi ma rüere, se ño metre amarebti ma nibi kwekbe jirekåbe ye? niebare kwe ie.

⁶³ Akwa Jesu abko namani kwekbe janknu. Abtä ni blitaka Ngöböbe ni mda mda diäre dänkien ye kákwe niebare mda Jesuye:

Ngöbö nire tä nüne se kåbti makwe kukwe era erere nie tie abko krörö: ¿Ma abko Ni Dianinkä Ngöbökwé ara ya amne ma abko Ngöbö Odei ara ya? ye niere nunye, niebare kwe Jesuye.

⁶⁴ Angwane Jesukwe niebare mda:

Jän ti abko ni ño nini makwe, ye kwrere bkänä, akwa ti bike kukwe mdara jire niere arato mun jökråye abko krörö: Kä bäri ütiäte kri Ngöbö Di Kri Jändrän Jökrä Nuenkrå ye küde ruenkri munkwe Ni Kä Nebtä Ngobo tuadi tåkänintbe. Erere arato, jatadita mütabti kånta sete amne munkwe tuadi, niebare Jesukwe.

⁶⁵ Angwane ni blitaka Ngöböbe ni mda mda diäre dänkien ye moto namani romon, kákwe dån ngianinkä seen jabtä romone, kákwe niebare krörö:

¿Ni ne kåta ñåke taretare Ngöbö rüere! ¿Se abko ni mda mda kákwe niara kitadre ngise amne batibe ngite, nikwe niedre ya? ñakare, ñobtä ñan angwane niarakwe ñari tare Ngöbö rüere, ye nunkwe kukwe nurira ñan ñan.

⁶⁶ ¿Munkwe töbikadi ño mda kråke? niebare kwe.

Angwane nitre jökrä nämane yete kákwe niebare:

Niarata ja mike ngite, aisete krütadre jirekåbe, niebare kwetre mda.

⁶⁷ Ye btåråbe nitre ye kákwe kåli kitani Jesu ngwårebtå amne nikani mete ja kåne amne ni mda mda abko namani Jesu mete ngwårebtå mikakäre ngwarbe jae,

⁶⁸ kå namani niere ie:

Ma abko Ni Dianinkä Ngöbökwé bkänä ne ngwane, nirekwe ma miti ngwårebtå ye niere metre nunye, namanintre niere Jesu mikakäre yakrä jae.

Pedro kákwe Jesu rükaninte

(Marcos 14.66-72; Lucas 22.54-62; Juan 18.15-18,25-27)

⁶⁹ Kukwe nämane nakenkä kore Jesubtä angwane, Pedro abko namani tåkänintbe ju bäre.

Ye btåråbe meri sribikå yete jatani nuke Pedro ken, kákwe niebare ie:

Jesu Galileabo se ben ma nämane dikekä siba arato, niebare kwe ie.

⁷⁰ Akwa nitre nämane yete, ye ngwårekri jökrå Pedrokwe ja rükaninte, kákwe niebare:

Mata blite drebtå abko ñan nebe nuke gare tie, niebare kwe.

⁷¹ Yebti Pedro nikani, namani nünaninkä jukwete kibtä, kånti meri sribikå mdara jire ie niara jatabare angwane, ni ye kákwe niebare ni mda mdaye:

Jesu Nazarebo abko ben ni noko nämane dikekä siba, niebare kwe.

⁷² Angwane ja rükanrete kwärå Pedrokwe ja kukwe biani, kå namani niere krörö:

Ni kådekata Jesu makwe, ni ye gare ñakare jire chi tie, namani niere.

⁷³ Yebti nitre nämane yete kákwe krötabare mda Pedro ken, kákwe niebare ie:

Ma ye tä nekete arato Jesube kwrere, ñobtä ñan angwane mata blite ño, ye aibehti ma reketaka niarakri abko ma nibi bå mike jabtä, niebare kwetre Pedroye.

⁷⁴ Angwane Pedrokwe ja kukwei bianinta amne niarakwe ñan kukwe niedre metre ne ngwane, Ngöbökwé ngürün mikadre btå namani niere, kákwe niebare mda:

Ni kådekata Jesu munkwe, ni ye abko gare ñakare jire chi tie, niebareta kwe.

Ye btåråbe antlankwe ngwånånbare.

⁷⁵ Angwane Jesukwe kukwe niebare krörö Pedroye abko nükaninta töre ie: Antlan ngåmi ngwåne, kånenkri makwe ti rükandite bāmå jire, niebare Jesukwe ie, ye nükaninta töre ie angwane, nikani mentokwåre se kwrere, kákwe ja müaibare kri kå bäre mento.

27

Jesu jånikani ngite Pilato ngwårekri

(Marcos 15.1; Lucas 23.1-2; Juan 18.28-32)

¹ Kä jatani ngwen deka angwane, nitre blitaka Ngöböbe ni mda mda ma diäre dänkientre amne nitre unbre ji dokwäte nitre israelita ngätäite ye kärke kukwe ükaninte Jesu müre ketakäre. Yebtä abko ja töi mikani kwatibe jökrä kwetre,

² kärke Jesu kise mäkäninte jökrä, bti jänikani ngite Pilato ngwärecri. Pilato abko gobran romanobo.

Judas Iscariote kärke ja müre ketani

³ Angwane Judas Jesu kitaka ngise tiebe ye abko Jesu kitani ngite müre ketadre gani kwe angwane, ja namani ruen ngite krübäte ie. Abtä nikaninta, kärke ngwian mnüne gre ketamä ye bianinta jökrä nitre ji dokwäteye amne nitre unbre ji dokwäte yeye,

⁴ kärke niebare ietre:

Jesu abko ngite ñakare, akwa tikwe kitaba ngise müre ketadre. Yebtä abko tikwe ja mikaba ngite Ngöbö rüere, aiseite ti bike ngwian bienta jirekäre munye, niebare kwe.

Akwa nitre ye kärke niebare Judaye:

Mata kukwe niere ye abko ngwarbe, ütiäte ñakare nunkrä, ñöbtä ñan angwane ye abko kukwe kaibe makwe. Abko kore se, niebare kwetre Judaye.

⁵ Angwane ju blitakrä Ngöböbe ye kanti Judakwe ngwian ye kitani temen, bti Judas nikani, kärke ja müre ketani köte.

⁶ Abtä nitre ji dokwäte nitre blitaka Ngöböbe ni mda mda diärebtu ye kärke ngwian ye ükaninkrö, kärke niebare krörö:

Ni müre ketadre abko ütiä biani ngwian nebti, aiseite ngwian biani Ngöbökrä ye ben ketetibe ni ñan raba ngwian ne mike, niebare kwetre.

⁷ Abti ja töi mikani kwatibe kwetre käre kökakra ngwian yebti. Kä kädeka nämane ni kantra sribekä abko käi nie nämane, ye abko kökani kwetre ngwian yebti nitre menteni doboi mikakra,

⁸ aiseite käre ye abko kädianta krörö: Ni Müre Ketani Käi abko nieta kore abko käre nuke mtare.

⁹ Kä kökani kore kwetre angwane, kukwe niebare ni Ngöbö kukwei niekä kira Jeremiakwe namani bare abko tä tikani krörö Ngöbö Kukweibtä:

Niara ütiä mikani nuäi nitre israelitakwe, ye erere ngwian mnünebe biani gre ketamä niara ütiäre amne,

¹⁰ ngwian yebti abko käre kädekata Ni Kantra Sribekä Käi nieta abko kökani, ni Dänkien Ngöbö kärke nuemna ño tie, ye erere namani bare, *Jeremias 19.1-13; 32.6-9*
abko niebare kore Jeremiakwe, ye erere namani bare.

Jesu Pilato ngwärecri

(Marcos 15.2-5; Lucas 23.3-5,13-25; Juan 18.29-19.16)

¹¹ Jesu abko jänamani gobran Pilato ngwärecri angwane gobran ye kärke niebare ie:

¿Ma abko jrei nitre israelitakwe bkänä ya? niebare kwe Jesuye.

Angwane Jesukwe niebare mda ie:

Jän. Era metre ti ara, niebare kwe ie.

¹² Angwane nitre blitaka Ngöböbe ni mda mda diäre dänkientre btä nitre unbre ji dokwäte namani Jesu kite ngise krübäte, akwa Jesu abko namani kwekbe jirekäre.

¹³ Abtä Pilato kärke niebare krörö ie:

¿Kukwe nie nibi bätäkä ngwarbe ma rüere ye jaraen ñakare mae ya amarebtu ma nibi kwekbe jirekäre? niebare kwe Jesuye.

¹⁴ Akwa Jesu namani kwekbe janknu, nin ñäkäbare jire chi kwe Pilato käre. Abtä gobran Pilato ye ñan töi namani krütare mda Jesubtä.

Jesu kitani ngite müre ketadre

(Marcos 15.6-15; Lucas 23.13-25; Juan 18.39-19.16)

¹⁵ Kä kwatirekwatire bieta Pascua näire abko nitre ngite ye ngätäite nire tikadreteta abko nitre israelita kwati nämane niere abko erere käre gobran ye nämane tikete.

¹⁶ Ne aiseite käre ye ngwane ni iti ja mikaka ngite kri krübäte abko nämane kitani ngite käre teri yete. Ni ye abko kädian nämane Barrabás.

¹⁷ Gobran Pilato ye ñan töi namani krütare mda Jesubtä. Yebti ni jökrä namani ja ükaninkrö yete, ie Pilato kärke niebare mda:

Tikwe nire tikadreteta munkrä ie mun tö nibi. Barrabás ya o Jesu Ni Dianinkä Ngöbökrä nieta se tikadreteta, niere tie munkwe, niebare Pilatokwe.

¹⁸ Pilato abko kärke niebare kore, ñöbtä ñan angwane nitre ji dokwäte ye namani mokrere Jesube, abtä kitani ngite kwetre abko ganina Pilatokwe btäre, aiseite niebare kore kwe.

¹⁹ Yebti kürä kukwe ükatekrä gobrankwe, yebti Pilato nämane tükänintbe angwane, merire kwe kärke kukwe juani krörö kräre: Ni ye abko töi metre amne ngite ñakare, aiseite makwe

ñan kukwe nuen káme rüere, ñobtä ñan angwane ni yebtä tikwe ja kábätiri krübäte deo abko Pilato merirei ye kákwe niemna kore ie.

²⁰ Akwa nitre blitaka Ngöböbe ni mda mda diäre dänkientre amne nitre unbre ji dokwäte kákwe nitre kwati ye töi kwitani jakri amne Barrabás abko tikadreteta amne Jesu abko müre ketadre abko ni jökrä kákwe niedre, niebare kwetre ie.

²¹ Abtä gobran ye kákwe niebareta mda ietre:

¿Ni nibu tä ngite kä teri nete, ne mden tikadreteta ie mun tö nibi? niebare kwe.

Angwane ni jökrä israelita nämane yete kákwe niebare:

¡Barrabás ye tikiteta! namanintre niere.

²² Angwane Pilatokwe niebare mda ietre:

¿Jesu abko Ni Dianinkä Ngöböke nieta, sebtä abko tikwe dre nuendre, ie mun tö nibi amarebti yere? niebare kwe.

Angwane ni jökrä kákwe niebare:

¡Jesu ye müre kete krusobtä! namanintre niere mda.

²³ Abtä Pilato kákwe niebare mda ietre:

¿Drebtä ni nekwe ja mikani ngite amarebti, mun nibi müre ketamna krusobtä tie yere? niebare kwe ietre.

Yebtä namani ngrente bäri jume mda, kä namani niere:

¡Müre kete krusobtä, müre kete krusobtä! namanintre niere Pilatoye.

²⁴ Abtä ni jökrä ñan namani tuen töi kwitare jire chi Pilatoye angwane, niarakwe kukwe niebare, yebtä bäri ni jökrä jatani kä mike bäri nokre. Abtä Pilato kákwe ñö káräbare, bti ja kise bätäninte kwe nitre israelita ngwäreki, kákwe niebare krörö ietre:

Jesu müre ketadi, yebtä ti ñan rabadre ngite, ñobtä ñan angwane ye abko kukwe munkwe, aisete mun rabadi ngite Jesu dokwäre, niebare kwe.

²⁵ Angwane nitre israelita kákwe niebare krörö mda Pilato käre:

Jesu müre ketadi ye abko nun amne ngäbäkre nunkwe abko rabadi ngite Ngöböye, aisete nunkwe kötä mikadi ie, niebare kwetre Pilatoye.

²⁶ Angwane Pilatokwe Barrabás tikaninte. Akwa Jesu abko kwata metamna köbti kwe amne biani kwe rükä romanoboye müre ketadre krusobtä.

²⁷ Ye erere bkänä, nitre rükä gobrankwe ye nikasi Jesu ngwena nebe ju gobrankwe kánti angwane, nitre rükä kákwe ja úkaninkrö jökrä Jesu bäre mikakäre yakrä jae,

²⁸ kákwe dän tikaninte btä, bti dän bä tain drüne kita nämane jabtä jreikwe, ye kwrere kitani Jesubtä.

²⁹ Erere arato, jrei kri kákwe korona mikadre ja dokwäbti, ye kwrere kri tukwä krübäte sribbare aronare kwetre, bti mikani Jesu dokwäbti kwetre, bti mökän mikani krati Jesu kise ruenkri kwetre niara mikakäre yakrä jae jrei di kri kwrere. Yebti namanintre jökrä ngukudokwäbti temen Jesu ngwäreki, kä namani niere krörö ie mikakäre ngwarbe jae:

¡Ma jrei nitre israelitakwe, nunta ma mike ütiäte kri mtare! namanintre niere.

³⁰ Kä namani käli kite Jesubtä amne mökän mikani kisete kwetre ye arabebti namanintre Jesu mete dokwäte.

³¹ Jesu mikani yakrä kore kwetre jae, bti dän bä tain drüne ye tikaninteta Jesubtä kwetre, bti dän Jesukwe ara kitaninta btä kwetre. Yebti nikanintre ngwena müre ketadre krusobtä.

Jesu metani krusobtä

(Marcos 15.21-32; Lucas 23.26-43; Juan 19.17-27)

³² Yebti namanina ji ngrabare angwane, ni iti nünanka juta Cirenete abko kädian nämane Simón abko namani ngätäi bentre angwane, Simón ye mikani kruso ngwena Jesukrä rükäkwe.

³³ Bti nikanintre nebe kákä Gólgota kánti. Kä Gólgota ye abko “Ni dokwä kroko käi” nieta abko kánti nikanintre nebe Jesube.

³⁴ Angwane krikä kwaka mritani uba döibe mni mni biani ñadre kwetre Jesuye. Jesu kákwe dö ye bänän nuani angwane, nin ñani jire chi mda kwe.

³⁵ Angwane nitre rükä romanobo kákwe Jesu metani krusobtä. Yebti tö namanintre dän Jesukwe ñäkäitbe jabtä, kákwe ja gani dän yebtä.

³⁶ Yebti nitre rükä ye namanintre tákänintbe temen Jesu ngibiabtikäre.

³⁷ Angwane ñobtä Jesu kitani ngise müre ketadre abko nämane tikani kri kukwänbtä abko mikani krusobtä Jesu dokwä kánti käin abko btä kukwe nämane tikani krörö: “NI NE ABKO JESU. NIARA ABKO JREI NITRE ISRAELITAKWE” abko nämane tikani kore.

³⁸ Jesu metani krusobtä angwane, nitre gokä metani nibu krusobtä käin arato niarabe gwaire. Iti mikani niara küde ruenkri amne iti abko mikani niara küde ngeberekri.

³⁹ Angwane nire nire namani kite dikekä Jesu bäre, kä namani dokwä ngrüketbe ñäkäre kwärä Jesuye, Jesu mikakäre ngwarbe jae,

⁴⁰ kā namanintre niere ie:

Ju blitakrä Ngöböbe se makwe juandi ngwarbe abti köbömäkäre makwe mikadreta täte jökrä, makwe niebare, aiseite ma Ngöbö Odei bkänä ne ngwane, ja denkä au mento krusobtä yete, bti ma jatata timon, namanintre niere Jesuye.

⁴¹ Erere arato, nitre blitaka Ngöböbe ni mda mda diäre dänkientre amne Kukwe Biani Ngöbökw Moiséye dirikätre amne nitre unbre ji dokwäte abko namanintre Jesu mike yakrä jae, kā namani niere krörö ie:

⁴² Ni mda mda dianintari kwe, ¿se ñobtä abko ñan nebe ja dentari au se? Niara abko Jrei nitre israelitakwe nieta kwe jabtä, aiseite ja diandrekä au krusobtä mento kwe sete angwane, nunkwe mikadi ütiäte jae.

⁴³ Mdakäre abko, niarakwe ja töi mikani kwatibe Ngöböbtä, aiseite Ngöbö tö era metre ie bkänä ne ngwane, Ngöbö ara jire käkwe diandikä gwängwarbe krusobtä mento mtare. Niara nämáne ja Ngöbö Odei niere jabtä amarebti nibi kwekbe krusobtä käin se, namanintre niere Jesuye.

⁴⁴ Angwane nitre gokä nämáne metani kruso mda mdabtä käin arato Jesu ken, ye namani ñäke arato Jesuye, mikakäre yakrä jae.

Jesu krütani

(Marcos 15.33-41; Lucas 23.44-49; Juan 19.28-30)

⁴⁵ Yebti ñänä ruäre angwane, kā ngidianinte mda amne kā namani iko jökrä temen nükebe ñänä okwä krämä dere.

⁴⁶ Ñänä okwä krämä nükanani, ye btäräbe Jesukwe ngratebare kri ja dibti, käkwe niebare krörö:

Elí, Elí ¿lama sabactani? niebare kwe.

Kukwe niebare kore Jesukwe ye abko “Ngöbö tikwe, Ngöbö tikwe, ¿ñobtä makwe kā mirikä tibtä jakän amarebti yere?” niebare kwe.

⁴⁷ Jesukwe ñäkäbare kore, ye abko nitre ruäre nämáne yete käkwe kukwe nuani angwane, namanintre niere:

¿Ñan tä ni Ngöbö kukwei niekä kira kädian nämáne Elías kärere jabtä, ja die mikakäre ya? namanintre niere kore.

Niebare kore kwetere, ñobtä ñan angwane Jesukwe “Elí” niebare angwane, namani ruen “Elías” kwrere ietre aiseite.

⁴⁸ Ye btäräbe nitre ye nikani betekä iti, käkwe jändrän dän kukwän kwrere kā dianta esponja abko mritaninkä uba ñoi dimente, bti mäkäninte kwe nörä kräbtä, bti biani kwe ñadre tomnane Jesuye.

⁴⁹ Akwa ni mda mda abko käkwe niebare krörö ni yeye:

Elias rükadre dentari ya ño ari ngibiare, aiseite tuemetre yete, niebare kwetere.

⁵⁰ Ye btäräbe Jesukwe ngratebareta jume ja dibti bobuta, käkwe ja üai mikaninta Ngöbö kisetre angwane krütani.

⁵¹ Jesu krütani, ye btäräbe dän ngutu ngetbo, bti ju blitakrä Ngöböbe nämáne ñäkänintbe abko nianinkä kumu käin nükebe temen amne dobo abko namani nakenkä amne jäkwata abko ngetrani.

⁵² Angwane kā mkä kánti nitre nämáne doboi mikani, ye mkä ngitianinkä jökrä angwane, ni kwati käkwe nünabare deme Ngöbökrä abko nämáne doboi mikani ye nükaninta nire

⁵³ abko käkwe kā mikaninkä rökabti yete. Yebti Jesu nükaninta nire arato angwane, niaratre nikani nebe juta demente Jerusalén. Ye kánti ni kwati käkwe tuani.

⁵⁴ Ye ngwane nitre rükä dänkien romanobo amne nitre rükä mda mda nämáne Jesu ngibiarebti, ye okwäbti dobo namani nakaenkä amne kukwe mda mda namani nakenkä bätäkä ngwarbe niaratre okwäbti angwane, kā jürä namani krübäte btäre, käkwe niebare: ¡Ni noko abko Ngöbö Odei era metre bkänä! niebare kwetere.

⁵⁵ Amne meri ruäre nämáne dikekä kwäräkwärä Jesube kā Galileate, kā nämáne Jesu die mike sribibtä, ye abko nükanani siba Jerusalén abko namani bä mente temen se kwrere okwä Jesubtä.

⁵⁶ Meritre ye abko kädian nämáne María Magdalabo amne María Santiago amne José meye, erere arato Zebedeo ngäbriänkä Juan amne Santiago mdara jire abko meye nämáne siba arato.

Jesu doboi mikani

(Marcos 15.42-47; Lucas 23.50-56; Juan 19.38-42)

⁵⁷ Yebti kā jatani dere angwane, ni iti ngwian bkänkä kri kädian nämáne José nünanka juta Arimateate abko nükanani. José ye abko nämáne dikekä siba Jesube.

⁵⁸ José ye abko nikani Pilato José, käkwe Jesu ngwäkä käräbare Pilatoye. Ye erere Pilatokwe Jesu ngwäkä biamna Joséye.

⁵⁹ Ye erere bkänä, Josékwe Jesu ngwäkä diani timon angwane, dän kädianta lino abko nämane merebe, te ngwäkä mrianinte kwe.

⁶⁰ Yebti kä muani btin jäkwatate ni doboi mikakrä Josékwe, ye kánti Jesu doboi mikani kwe. Jesu doboi mikanina angwane, kä mkä ye dikaninta kuin jite kwe jäkwata kribti, bti nikaninta.

⁶¹ Akwa María Magdalabo amne María mda nämane yete, ye abko namani tákänintbe yete Jesu doboi mikani ye kánti.

Guardia mikani röka ngibiarebti

⁶² Jesu doboi mikani, yebti jändrinane köbö jadükakrä näire, nitre blitaka Ngöböbe ni mda mda diäre dänkientre amne nitre bariseo nikanintre gwaire nebe Pilato kánti,

⁶³ kákwe niebare krörö ie:

Nun dänkien, ni ngwarbe ni ngökaka müre ketaba jändrin kädianta Jesu, ye abko nämane nüne angwane, nieba krörö kwe: Ti müre ketadi, akwa köbömäkäre angwane ti rükadita nire, nieba kwe, ye abko nūta töre nunye.

⁶⁴ Ne aisete, makwe guardia mikadre röka ye ngibiarebti kuin nebebe köbömä näire abko nun tö nibi niei mae, ñobtä ñan angwane nane nitre ja töitikaka Jesube kákwe ngwäkä goidre abti nūkaninta nire tädre näin niere ni mda mdaye, nane nitre ja töitikaka ben abko rikadre ni ngökö bäri mda, ye abko rabadre bäri káme, aisete nun tö nibi niei kore mae ye, niebare kwetre Pilatoye.

⁶⁵ Abtä Pilatokwe niebare mda ietre:

Nitre rükä tärä guardiare munkwe yete, ye abko ben mun rika, kákwe kä tärä mika gare kuin röka yebti ni mda mda mikakäre mokre amne munkwe röka ye ngibiadre bäri kuin. Abko kore se, niebare Pilatokwe ietre.

⁶⁶ Ye erere bkänä, nitre ye nikani amne jäkwata mikani rökabti, yebtä kä tärä mikani gare kuin kwetre, ni mdakwe ñan Jesu ngwäkä goidre abkokäre. Erere arato, nitre rükä mikaninte ruäre guardiare kwetre röka ngibiarebti yete.

28

Jesu nūkaninta nire

(Marcos 16.1-8; Lucas 24.1-12; Juan 20.1-10)

¹ Yebti köbö jadükakrä nikani ta, abti kä jatani ngwen krire bämänte dekä angwane, María Magdalabo amne María mdara jire ye nikaninta dobohti.

² Ye btäräbe dobo namani nakaenkä kri krübäte, ñobtä ñan angwane angele ni Dänkien Ngöbökwé nämane kä käinbti abko nūkani kä temen nebtä. Angele ye abko nikani nebe rökabti angwane, jäkwata kri mikani kä mkäbti ye abko angelekwé dianinkä mento, bti namani tákänintbe jäkwata yebti.

³ Angele ye abko bä namani trä ngitiekä mera trä kwrere amne dän btä abko bä namani ngwen bürere täräkwata kwrere.

⁴ Angele ye jatabare nitre rükä nämane guardiare rökabti yeye angwane, niaratre namani nekwetekä krübäte, aisete namani grüekä jökrä ngrabare amne kä nōtaninte jökrä bti, aisete namanintre kitaninte temen ni ngwäkäre kwrere.

⁵ Angwane angele kákwe niebare meritre yeye:

Mun ñan rekwetaka. Jesu müre ketani krusobtä abko munta näin tuenta kánti, ye gare kuin tie,

⁶ akwa Jesu nūrate nire, aisete ñakare nete, niarakwe niebare munye ye kwrere nibi bare, aisete kä mkä aibe nebe tökare niara täbtä nete mun jakwe tuen.

⁷ Bti nitre ja töitikaka Jesube ye ie mun rika niereta jötrö krörö: Jesu nūrate nire, bike niken Galilea ja ükakrökäreta ketetibe munbe, kánti munkwe ja tuadita ben abko munkwe nie kore ietre amne kukwe ne aibe tä niedre tikwe munye. Abko kore se, niebare angelekwé meritre yeye.

⁸ Ye erere bkänä, meritre nämane dobohti ye nikaninta jötrö angwane, kä jürä namani krübäte btäre, akwa erere arato kä namaninta nuäre krübäte btäre, aisete nikanintre betekä kukwe ngwenante nun ja töitikaka Jesube ye kräke.

⁹ Niaratre nämane näin betekä ji ngrabare angwane, batibe Jesu ara nūkani ngätai bentre, kákwe "Ñantöre" niebare ietre. Ye btäräbe niaratre kákwe krötabare Jesu ken, nikani ngitiekä Jesu ngotobtä temen, kákwe Jesu ngoto kani ja káne angwane, mikani ütiäte kwetre jae.

¹⁰ Angwane Jesukwe niebare ietre:

Mun ñan rekwetaka tibtä. Ti mräkätre ja töitikaka tibe abko rikadre ti ngäbti kä Galileate. Ye kánti ti tuadita kwetre abko mun nän niere ietre. Abko kore se, niebare Jesukwe meritre yeye.

¹¹ Nitre merire nikani kukwe ngwena kore, akwa nämane ji ngrabare angwane, nitre rükä mikani guardiare röka ngibiarebti abko bti kä nükani ruenta amne nikani betekä nebeta jutate Jerusalén amne nitre blitaka Ngöböbe ni mda mda diäre dänkientre, ie kukwe nakaninkä ño ño, ye erere niebare jökrä kwetre.

¹² Angwane nitre blitaka Ngöböbe ni mda mda diäre dänkientre ye abko nikani blite mda nitre unbre ji dokwäte yebe ja tõi mikakäre kwatibe gwaire bentre. Angwane niaratre käkwe ngwian biani kabre nitre rükä nämane guardiare rökabti yeye niaratre näkwitakäre,

¹³ käkwe niebare ietre:

Mun nämane kibien deo angwane nitre ja tötikaka Jesube jananbare Jesu ngwäkä goireta rökabti, munkwe nie ni mda mdaye.

¹⁴ Erere arato, gobran Pilato käkwe kukwe ye gadi angwane, nunkwe blitadi ben niara näkwitakäre. Ye köböire abko kukwe ñan rabadre jire chi mun rüere amne nun rüere, niebare kwetre guardiaye.

¹⁵ Ye erere bkänä, nitre rükä nämane guardiare ye käkwe ngwian kabre ye kani ngäbti. Abti niaratre käkwe dre niedre niebare ietre, ye erere nikanintre niere, aisete nitre ja tötikaka Jesube abko käkwe Jesu ngwäkä goibare abko nie nikani kore kena nitre israelita ngätäite, ye erere nieta janknu abti kä nüke mtare.

Kukwe mrä Jesukwe

(Marcos 16.14-18; Lucas 24.36-49; Juan 20.19-23)

¹⁶ Nitre merire käkwe kukwe nieba nun ja tötikaka Jesube yeye angwane, nun ni jätäbti iti abko rikaba bkänä Jesu ngäbti Galilea angwane, ngitio mdenbti nun rikadre niebare Jesukwe, ye kánti nun rikaba.

¹⁷ Nun rikaba nebe yete angwane, Jesu jataba nunye angwane, Jesu ara nükäninta nire ye nun ruäre kräke ñan rababa nebe era, akwa nun jökrä rababa Jesu käikitekä.

¹⁸ Angwane Jesukwe krötäba nun ken, käkwe nieba krörö nunye:

Kä káinta se amne kä temen ne Ngöbökwé mikani gare jökrä tie,

¹⁹ aisete mun nän, amne nitre nünanka kä jökräbti temen, ye kánti mun nän ti mike gare ietre amne munkwe niaratre mika ja tötikaka siba tibe amne munkwe niaratre ngöka ñöte ni Rün käbti, Ngöbö Odei käbti amne Ngöbö Üai Deme käbti.

²⁰ Amne kukwe diribare tikwe munye, ye erere munkwe diri jökrä ietre amne niaratre käkwe ti kukwei ye mikadre täte jökrä arato, abkokäre munkwe diri ietre. Ti abko tädi kärekwäre munbe köbö kwatirekwatire nebebe kä mrä. Abko kore se, nieba Jesukwe.

Abko kukwe nakaninkä kore se. Ne ngörä.

Kukwe Kuin Jesubtä Tikani Marcokwe Marcos

Tärä ne tikaka abko kädian nämane Marcos. Niara kädian nämane Juan Marcos arato. Marcos abko nikani ñakare Jesu mukore nitre ja töitkaka Jesube ni jäbäbti nibu kwrere, akwa niara abko Pedro kukwe muko nütüta, aiseite Pedro käkwe Marcos die mikani tärä ne tike abko ni kwati tä nütüre. Erere arato, Marcos abko Jerusalénbo, aiseite Jesukwe dre dre nuenbare amne dre dre niebare kwe abko nükani gare ie.

Nitre ñakare israelitare nünanka juta Romate, ye kräke Marcokwe tärä ne tikani, kukwe kuin Jesukristobtä mikakäre gare ietre. Nitre romanobo nämane nitre tödekaka Jesubti mike ja tare nike kri juta Romate, aiseite nane Marcos käkwe tärä ne tikani niaratre die mikakäre nünenkä dite Jesukrä.

Tärä nebtä abko Ngöbö Odei Jesu nükani nüne kä nebtä angwane, kukwe kuinkuin nuenbare kwe ni kwatikä niaratre okwäbti abko Marcos tö namani mikai gare ni jökräye. Erere arato, Jesu mikani ja tare nike kri, bti krütani krusobtä, yebtä Marcos tä blite bäri kabre. Erere arato, Jesukwe ja tare nikani kri, bti krütani, abti nükani nire, aiseite niara bäri dite ni rüe Satana ye ngwä amne tä ni die mikaka mtare abko Marcos tö namani mikai gare tärä nebtä.

Marcos ne mdenbtä abko kukweta tikani Hechos 12.12,25; 13.5,13; 15.36-39 amne 2 Timoteo 4.11. Marcos käkwe tärä ne tikani ñongwane metre gare ñakare nie, akwa tikani kä 50-70 angwane nütüta.

Juan Bautista käkwe ji tikani Jesu käne

(Mateo 3.1-12; Lucas 3.1-9,15-17; Juan 1.19-28)

¹ Kukwe kuin nuenbare Ngöbö Odei Jesukristokwe abko nakaninkä ño kena ja täritäri abko ti bike tike täräbtä. Jesukristo nämane nüne ño abko ti bike tike täräbtä.

² Bati kira Ngöbökwé Juan ni ngökaka ñöte juandi ni mike biare niara Odei kakäre ngäbti, ye Ngöbökwé niebare niara Odeiyé angwane, tikamna krörö täräbtä kwe ja kukwei niekä kädian nämane Isaiäye:

Tikwe ja kukwei ngwianka juandi iti ma känenkri.

Niarakwe ni töi mikadi biare ma käne, ji ükateta biare ye kwrere.

Malaquías 3.1

³ Ni ye näin ñäke jume ja dibti kä kaibete, käkwe niedi krörö:

Ji ükateta kuin biare jrei känenkri, ye kwrere ja töi mike kuin biare munkwe.

Ji ükateta niken metre ta, ye kwrere ja töi ükete metre ni Dänkien käne munkwe, niebare kwe

Isaiás 40.3

abko tikani kore täräbtä Isaiäkwé Juanbtä.

⁴ Ye erere bati, Juan ni ngökaka ñöte nükani kä kaibete, kä nikani niere: Munta kukwe kämekäme nuene, yebtä mun moto raba ulire. Kukwe käme kite jire jökrä temen munkwe, bti mun jata ja mike ngökäre ñöte. Munkwe ye nuendi angwane, Ngöbökwé mun ngite ye diandikä jire jökrä munbtä, bti tikwe mun ngökadi ñöte, niebare Juankwe. Ngöbö Kukwei tikani Isaiäkwé Juanbtä abko erere namani bare.

⁵ Ye ngwane, nitre nünanka käkä Judeate btä juta Jerusalénte nükani kwati Juan kukwei nuakäre, kä namanintre ja ngite niere Ngöböyé angwane, Juan namani ngökö Ñö Jordánte.

⁶ Juan abko nämane kameo drüen dikani dänre* kite jabtä amne nämane mäketé nibi kwatabti jae amne mrö kweta nämane kwe abko tröda btä munkö känsenta.

⁷ Juan nämane ñäke angwane, käre namani niere krörö: Ni jatadi iti ti jiebti abko bäri di kri ti ngwä, aiseite ja ñan rükadre töre jire chi tie sandalia tikete ni ye ngotobtä. †

⁸ Tita mun ngökö ñö aibe te, akwa ni ye abko käkwe Ngöbö Üai Deme mikadi nüne munbtä. Abko kore se, niebare Juankwe.

Juankwe Jesu ngökani ñöte

(Mateo 3.13-17; Lucas 3.21-22)

⁹ Juan nämane nitre ngökö ñö Jordánte angwane, Jesu nämane juta Nazarete kä Galilea yete. Jatani nuke Juan kanti angwane, Juankwe ngökani ñöte,

¹⁰ jatani göökäta ñöte käin, ye btäräbe kä käin ñäkäninthe Ngöbökwé namani tuen ie, bti Ngöbö Üai jatani ütü bä kwrere nuke mate btä, namani tuen ie jabtä.

* **1:6 kameo drüen dikani dänre.** Kukwe tä tikani Mateo 3.4 btä, yebtä ñäke. † **1:7 sandalia tikete.** Jesu näire ni klaboré kökani ni mdakwe abko bäri ene. Niaratre aibe nämane sandalia ni mdakwe tikete, aiseite Juan nämane ja bä mike bäri ene ni klaboré ngwä.

¹¹ Ngöbö kukwei jarabare krörö kä káinbti: Ma ti Ngobo tikwe. Ma tare kri tikwe. Ma käi nuäre kri tibtä, niebare kore kä káinbti Jesuye.

Diablukwe Jesu nuaninte ja käne
(Mateo 4.1-11; Lucas 4.1-13)

¹² Yebti Ngöbö Üai nikani Jesu ngwena nebe kä kaibete.

¹³ Kä ye kánti Jesukwe nünantbebare köbö gre ketebu jándrán kánsenta káite. Ye ngwane abko, Satana namani Jesu nuente ja käne, akwa Jesukwe ñan Satana mikani táte. Yebti angele nükani ruäre abko namani Jesu die mike.

Jesu nikani Ngöbö kukwei kuin dirire kena
(Mateo 4.12-17; Lucas 4.14-15)

¹⁴ Yebti abko, Juan kitani ngite kä teri. Yebti Jesu nikani Galilea, namani kukwe kuin Ngöbökwé niere krörö:

¹⁵ Ti rabadre gare kä nebtä köböi kitani Ngöbökwé abko nūra amne Ngöbö kitera gobrane nibti. Kukwe kámekáme kita temen munkwe, bti kukwe kuin Ngöbökwé nebti tódeka munkwe, Jesu namani dirire kore.

Jesukwe ni káräbare nibkä ja töitike jabe
(Mateo 4.18-22; Lucas 5.1-11)

¹⁶ Abti bati Jesu nikani Nö Okwä Kri Galilea kóräbare, nikrabare kwe angwane, ni jatabare nibu ie. Iti abko kädian nämáne Simón. Etba kwe abko kädian nämáne Andrés. Niaratre abko gwa gaka abko nämáne krade kite ñöte, btä Jesu okwä namani.

¹⁷ Jesukwe niebare ietre:

Mun brän tibe amne munta gwa gaen ño, ye kwrere tikwe mun mikadi ni ngwianka Ngöböye, niebare kwe ietre.

¹⁸ Ye btäräbe, niaratre kákwe krade kitani temen, bti nikani Jesube.

¹⁹ Nebti Jesu nikani mda mentokwäre ñö kóräbare angwane, ni iti kädian nämáne Santiago amne etba kwe abko kädian nämáne Juan abko nämáne krade gudike rute. Niaratre nibu ye abko Zebedeo ngäbriänkä, btä Jesu okwä namani angwane,

²⁰ Jesukwe káräbare ja töitike jabe arato. Niaratre kákwe sribikä aibe mikaninte rute rün Zebedeobe, bti nikanintre Jesube.

Jesukwe üai káme juantitari mento
(Lucas 4.31-37)

²¹ Yebti nikani jökrä juta kädian nämáne Capernaúmte. Abti köbö jadükakráte angwane, Jesu nikani sinagoga yete, kánti nikani dirire.

²² Jesu namani dirire, yebtä ni jökrä ñan töi namani krütare, ñöbtä ñan angwane ni töbtä di kri kákwe diri ja di ngöi, kwrere jire Jesukwe diribare ietre amne, Kukwe Biani Ngöbökwé Moiséye dirikätre nämáne dirire, ye kwrere Jesukwe diribare ñakare.

²³ Angwane ni nämáne iti sinagoga yete, btä üai káme nämáne nüne. Te batibe ni ye kákwe ngratebare krörö mda:

²⁴ ¡Jesu Nazarebo, nun tuemetre kaipe nete! ¿Ye ñöbtä abko ma kite ja mike kukwe nunkwete ta yere? ¿Ma kite nun gaenkä ya ño yere? Jesu, ma gare kuin tie. Ma abko Ni Deme Ngöbökwé gare tie, niebare üai kámenkwe Jesuye.

²⁵ Abtä Jesukwe niebare mda üai kámeye:

¡Üai káme, kada mkä kete makwe! Ni ye tuemetre gwängwarbe. Nän mento btä, niebare kwe.

²⁶ Üai káme ye kákwe ni ye ngrükantinte jume ngrabare, bti ngratebare kri kwe, bti ngitiani mento ni yebtä.

²⁷ Nebtä ni jökrä töi ñan namani krütare Jesubtä, kä namani niere jae kwärikwäri: ¡Ni neta kukwe btin dirire ño ño amarebti niara di tärä üai káme juentari jötrö au, tá ñäke kwatibe üai káme juantarikrä mento amne üai káme tá niara kukwei mike táte sere! abko namanintre niere kore jae kwärikwäri.

²⁸ Kukwe nakaninkä kore, abtä Jesu kädrie nikani jötrö ngwarbe, niken kä ketareketare te kä Galilea yete.

Jesukwe Simón köbrän merire mikaninta quinta
(Mateo 8.14-15; Lucas 4.38-39)

²⁹ Jesu nämáne sinagoga kánti. Nikani angwane, nikani Santiagobe btä Juanbe nebe Simón btä Andrés kánti.

³⁰ Namani kánti angwane, Simón köbrän merire abko nämáne bren drangwan kisete, niebare kwetre Jesuye.

³¹ Abtá Jesu nikani mike ñäräre mda, nikani nebe jänbtá ken se kwrere, kákwe Simón köbrän kani küdebtí, bti ganinkró krö kwe. Ngöbö diebtí drangwan nikaninbe batibe btá, namanintabe quinta, bti nikani mrö kánene niaratre bukakrá.

Jesukwe ni bren bren mikaninta quinta

(Mateo 8.16-17; Lucas 4.40-41)

³² Ká jatanina iko angwane, † ni kwati núnanka juta yete nükani Simón kánti mráká bren bren ngwena amne mráká námáne ja tare nike úai káme kisete abko jánikani Jesuye mikadreta quinta kwe abkokäre.

³³ Ni namani kwati krübäte ja úkaninkró jukwebtä angwane,

³⁴ Jesu namani ni bren bátáká ngwarbe miketa quinta. Arato úai káme juanintari mento kwe ni kwatibtä. Jesu námáne sribire Ngöbö diebtí abko námáne gare úai kámeye, aisete Jesukwe úai káme kukwei ótani jókrá arato.

Jesu nikaninta Ngöbö Kukwei dirire

(Lucas 4.42-44)

³⁵ Abti de, ká námáne diore angwane, Jesu naninkró, nikani ká kaibete blitakäre Ngöböbe.

³⁶⁻³⁷ Simón btá kukwe muko mda mda nükani ngwäte angwane, nikanintre Jesu kánentari kisere. Te kwanintari ietre angwane, niebare kwetre Jesuye:

Ni kwati nibi ma kánentari kisere, niebare kwetre ie.

³⁸ Jesukwe niebare mda ietre:

Ti jatani blitakäre kukwe kuin Ngöbökwetä juta mda mdate arato, aisete mun ani juta mdabti nokore temen, niebare kwe ietre.

³⁹ Ye erere bkänä, Jesu nikani dikeká ká jókrábtí temen ká Galileate angwane, namani blite kukwe kuin Ngöbökwetä sinagagate ká ketareketare te. Arato úai káme nibtä abko namani juentari mento btá.

Ni iti kwata bren lebra kisete abko Jesukwe mikani quinta

(Mateo 8.1-4; Lucas 5.12-16)

⁴⁰ Kukwe namani bare kore angwane, ni iti bren lebra kisete, abtä ngütüete ngrabare jatani Jesu ngábtí angwane, namani ngukudkwábtí temen Jesu ngwärekre, kákwe niebare ie:

Ma tö ti mikaita quinta ne ngwane, makwe ti mikata quinta, ie ti tö nibi, niebare kwe Jesuye.

⁴¹ Abtä ni ngütüete ye namani ruentari tare kri Jesuye, kákwe kise mikani ni yebtí, bti niebare kwe ie:

Ma rabata quinta, ie ti tö nibi, aisete gwängwarbe ma bike nebata quinta, niebare Jesukwe ie.

⁴² Ye btäräbe ni kwata ngütüete ngrabare lebra kisete ye kwata namaninta quinta jókrá ngrabare.

⁴³⁻⁴⁴ Bti Jesukwe niebare ie:

Ma nibira quinta jókrá, ye makwe ñan nie jire chi ni mda mdaye, akwa ma rika ja kwata quinta mike tuadre ni blitaka Ngöböbe ni mda mda diäreye. Erere arato, ni bren kore tá nebata quinta abko kákwe jändrän mden mden biandre niebare Moisékwe, ye erere ma rika ngwena biandre Ngöböye, ma rabadre dbe niara ngwärekre abkokäre. Yebtá abko ma nenante quinta abko rabadre gare ni jókräye, abkokäre ma rika jändrän ye ngwena. Abko kore se, niebare kwe ie.

⁴⁵ Akwa Jesukwe niara mikani quinta, ye nikani kädriere ni jókrá ben. Yebtá abko, ni kwati tö namani ja tuai Jesube. Abtä Jesu ñan namani dikeká jáme juta ngwäre temen, aisete namani ja gwirie miketbe bári ká kaibete juta bare akwa, ni kwati krübäte namani nuke niara kánti.

2

Ni ruen ñakare ngrabare abko Jesukwe mikaninta quinta

(Mateo 9.1-8; Lucas 5.17-26)

¹ Abti Jesu nukaninta gwi juta Capernaúm yete. Ye abko gani ni Capernaúmbokwe

² angwane, ni nükani kwati gwi nukebe jukwebtä, aisete ká ñan namani kwen rabakäre Jesu kánti gwi. Angwane Jesu námáne dirire Ngöbö Kukweibtä ni kwati yeye.

³ Angwane ni jatani nibká ni bren ngwena iti ja ñäte Jesuye. Ni bren ye abko ni ruen ñakare ngrabare abko kisete dikeká ñakare abko jatani ngwena ja ñäte Jesuye.

† 1:32 *Ká jatanina iko*, ye bti nitre israelita nikani mráká bren bren ngwena nebe Jesuye, ñöbtá ñan angwane ñäná nikani timon dere angwane köbö jadükakrá nikani ta abko námáne ngibiare aisete.

⁴ Akwa ni nāmane kwati dikaro aisete, ñan namani neme Jesu kanti. Abtä nikanintre jubti käin, kākwe ju mkā tikaninkā, bti ni bren ye gibaninkā jānkwata ngōi ju mkāte ta timon kwetre Jesu ngwārekri.

⁵ Nitre nūkani ni bren ngwena amne ni bren ye nāmane tōdeke kwatibe Jesubti namani tuen Jesuye angwane, Jesukwe niebare ni bren yeye:

Tikwe ma ngite Ngōbö rüere ye dininkā mento mabtā ti mrākā, niebare kwe ie.

⁶ Yebtā abko, Kukwe Biani Ngōbökwē Moiséye dirikātre nāmane siba, kā namani tōbike krōrō mda Jesu kukweibtā:

⁷ Ngōbö aibe tā ni ngite niara rüere denkā mento nibtā amarebti, ¿se ñobtā abko ni se tā ñāke kore Ngōbö rüere sere? namanintre tōbike kore Jesubtā.

⁸ Namanintre tōbike kore, ye abko gani Jesukwe. Abtä niebare kwe ietre:

¿Ñobtā munta tōbike kore tibtā yere?

⁹ ¿Dre abko bāri nuāre niedre ni ruen ñakare ngrabare nokoye? ¿Ma ngite Ngōbö rüere, ye tikwe dininkā mabtā abko bāri nuāre niedre ya? o ¿Nāin krō, jānkwata makwe ye den kisete, bti nān dikekā abko bāri nuāre niedre ya? Ye abko, ma ngite Ngōbö rüere ye tikwe dininkā mabtā abko bāri nuāre niere, ñobtā ñan angwane raba bare ya, ñakare ya ñan jatadre munye.

¹⁰ Akwa ti, Ni Kā Nebtā Ngobo ne ie Ngōbökwē ja di biani mun ngite Ngōbö rüere diankakāre mento munbtā kā nebtā, ye abko ti bike bā mike tuadre munye, niebare Jesukwe.

Bti niebare kwe ni ruen ñakare ngrabare yeye:

¹¹ Nāin krō. Jānkwata makwe ye den kisete amne nānta ja gwiriete, niebare kwe ie.

¹² Angwane jōtrō ngwarbe ni jōkrā okwābti, ni ruen ñakare ngrabare ye naninkrō krō, kākwe jānkwata diani kisete, bti nikaninta. Yebtā ni jōkrā ñan tōi namani krūtare, aisete namani Ngōbö kākitekē, kā namani niere: Kukwe ne kwrere ñan tuabare erere nakaka mtare, namanintre niere kore jae kwārikwāri.

Jesukwe Levī kārābare ja tōitike jabe

(Mateo 9.9-13; Lucas 5.27-32)

¹³ Abti Jesu nikaninta Nō Okwā Kri Galilea kōrābare mda angwane, ni nūkani kwati niara kānti angwane, niara namani dirire ietre.

¹⁴ Yebtā nikani mentokwāre angwane, kā jāndrān ütiā kārākrā gobran romanobokrā, kānti ni nāmane tākānintbe iti jāndrān ütiā kārere. Ni ye abko Alfeo ngobo kādian nāmane Levī abko nāmane jite, btā Jesu okwā namani angwane, Jesukwe niebare Levīye:

Brān tibe, niebare kwe ie.

Angwane jōtrō ngwarbe Levī nikani dikekā krō, nikani Jesu jiebti.

¹⁵ Abti Jesu nikani mrōre Levī kānti angwane, nitre jāndrān ütiā kārākā gobran romanobokrā nāmane kwati amne ni mda mda nāmane tuen kāme ni israelita ruāreye nāmane arato, ñobtā ñan angwane ni kwati ye kwrere nāmane nāin Jesube. Nitre ye abko bāri kāme nie namani nitre bariseokwe abko ben Jesu btā nitre ja tōitikaka ben nāmane tākānintbe mrōre ketetibe.

¹⁶ Jesukwe mrōbare kore nitre bariseo Kukwe Biani Ngōbökwē Moiséye dirikātre ruāre okwābti, abtā niebare kwetre nitre ja tōitikaka Jesubeye:

¿Nitre jāndrān ütiā kārākā gobran romanobokrā abko kāme amne ni mda mda kukwe nuenkā kāmekāme se gare ñakare ni seye ya amarebti tā mrōre jāme ketetibe ben se? niebare kwetre ietre.

¹⁷ Nitre bariseo kākwe ñākābare kore, ye jarabare Jesuye angwane, Jesukwe ja bā mikani ni krākā bianka kwrere amne nitre jāndrān ütiā kārākā amne nitre kukwe nuenkā kāmekāme, ben nāmane mrōre ye bā mikani ni bren kwrere, kākwe niebare krōrō mda ietre:

Ni kuin bren ñakare ye abko ñan tā ni krākā bianka ribere jabtā, akwa ni bren bren abtā tā ni krākā bianka ribere jabtā abko ti tō nibi niei munye. Ni ie ja ruen kuin deme au Ngōbö ngwārekri mun kwrere, ye abko ñan ti jatani kārere Ngōbö kukwāre, akwa ni kukwe kāmekāme nuenkā Ngōbö rüere ye mden abko ti jatani kārere Ngōbö kukwāre. Abko kore se, niebare Jesukwe nitre bariseoye.

Ñobtā nitre ja tōitikaka Jesube ñan nāmane ja bāine

(Mateo 9.14-17; Lucas 5.33-39)

¹⁸ Abti bati nitre nānkā Juan Bautistabe btā nitre bariseo nāmane ja bāine ja mikakāre metre Ngōbö ngwārekri angwane, ni mdara jire kākwe tuani, aisete jatani, kākwe niebare krōrō Jesuye:

¿Ñobtā nitre nānkā Juanbe btā nitre bariseobe kāta ja bāine Ngōbökrā amarebti, nitre ja tōitikaka mabe ja bāine ñakare Ngōbökrā sere? niebare kore kwetre Jesuye.

¹⁹ Abtä Jesukwe kukwe bä mikani ietre, käkwe ja bä mikani ni ja mikaka gure kwrere amne nitre ja töitikaka ben abko bä mikani kwe ni ja mikaka gure kukwe muko kwrere, käkwe niebare ietre:

Ni iti tä niken ja mike gure angwane, tä kukwe muko kwekwe nübaire kä ngwiankäre nuäre gwaire jabtä, ye ngwane ni ja mikaka gure ye tädre siba bentre angwane, ¿kukwe muko ye raba moto ulire ja bäine ya? Ñakare. Ni ja mikaka gure ye tä siba bentre angwane, kukwe muko ñan raba nebe moto ulire ja bäine.

²⁰ Akwa ni ja mikaka gure ye jërikadre kukwe muko okwäbti, ye ngwane rabadre ja bäine abko kore rakadikä nitre ja töitikaka tibe yebtä.

²¹ Mdakäre abko, dän ngututu gudikadre dän kukwän btinbti angwane, dän kukwän btin tä dän ngututu kwaenkä bäri mda abko kisete dän ngututu rötadreteta angwane, rötadrete bäri kri mda, aisete ni ñan raba dän ngututu gudike dän kukwän btinbti.

²² Erere arato, chibo kwata dikani kira uba döi ngwäre, te ni ñan raba uba döi keke mikadre kwaka, ñobtä ñan angwane chibo kwata ngututu rötadrete, rikadre ngwarbe uba döi kwaka ben ngöi jökrä arato. Mden kisete, uba döi mikadre kwaka abko kekadre chibo kwata btinte. Ne abko kore, niebare Jesukwe ni mda mdaye.*

*Jesu abko bäri ütiäte köbö jadükakrä yebti ta
(Mateo 12.1-8; Lucas 6.1-5)*

²³ Abti bati Jesu nikani dikekä nura ngätäite köbö jadükakrä näire mda angwane, nitre ja töitikaka ben nämane näin siba, kä nikani trigo ngwä ötö ji ngrabare kwetadre jae.

²⁴ Abtä nitre bariseo käkwe niebare Jesuye:

Jändrän ñan nuendre jire chi köbö jadükakrä näire nieta abko nitre ja töitikaka mabe nibi nuene tuen sete, niebare kwetre Jesuye.

²⁵⁻²⁶ Abtä Jesukwe niebare mda käre:

Bati David btä rükä kwekwe ie mrö namani krübäte angwane, kukwe nuenbare krörö kwetre: Ju nuäre ngwiandre kánti ban deme nämane mikani Ngöbö ngwärekrei, ye kánti David nikani gwä, ban diani kwe, bti kwetani kwe rü muko kwekwe ben. Ban ye abko, David btä nitre nämane ben käkwe ñan kwetadre jire chi, ñobtä ñan angwane nitre blitaka Ngöböbe ni mda mda diäre aibe käkwe kwetadre niebare Ngöbökwë, akwa niaratre käkwe kwetani, akwa namani ngite ñakare Ngöböye. Abiatar nämane sribire nitre blitaka Ngöböbe ni mda mda diäre dänkien angwane kukwe ne nakaninkä. Kukwe yebtä mun tarä ñäke Ngöbö Kukweibtä ruen tie.

²⁷ Ye erere, Ngöbökwë köbö jadükakrä mikani jadükakrä nie, ñan Ngöbökwë ni dätebare kukwe driebare munkwe köbö jadükakräbtä mikakrä täte.

²⁸ Amne köbö jadükakrä näire yebti ta abko ti Ni Kä Nebtä Ngobo abko bäri ütiäte, aisete nitre ja töitikaka tibe rabadre dre dre nuene köbö jadükakrä näire abko ti di tarä niere ietre. Abko kore se, niebare Jesukwe nitre bariseoye.

3

*Jesukwe ni mikaninta quinta köbö jadükakrä näire
(Mateo 12.9-14; Lucas 6.6-11)*

¹ Abti köbö jadükakrä mdara jire te Jesu nikaninta sinagoga mdate angwane, ni iti küde ngrötani kwärä nämane yete. Arato nitre bariseo nämane yete.

² Jesukwe ni ye mikadreta quinta köbö jadükakräte ne ngwane, Jesukwe ja mikani ngite Ngöbö rüere niedre kwetre Jesu rüere ni mda mdaye, abkokäre nitre bariseo namani ngibiaretari kisere ni küde ngrötani yebtä.

³ Angwane Jesukwe niebare ni küde ngrötani kwärä yeye:

Jakwe ni jökrä ngwärekrei nete, niebare kwe ie.

⁴ Erere bkänä, ni ye nikani angwane, Jesukwe niebare krörö mda nitre bariseoye:

¿Köbö jadükakrä, yebtä Kukwe Biani Ngöbökwë Moiséye këta dre niere? ¿Jändrän kuin nuendre ni mdakrä ya? ¿Kukwe käme nuendre ni mdabtä ya? ¿Ni bren mikadreta quinta ya? ¿Ni bren kämikadre ja okwäbti ya? Dre nuendre metrere niere tie munkwe, niebare Jesukwe ietre.

Akwa namanintre kwekbe jökrä niara kukweibtä, ñobtä ñan angwane ñan tö namani ja kitai ngise au.

* **2:22** Kukwe diribare Jesukwe abko dän btin amne chibo kwata btin kwrere. Erere arato, kukwe diribare ja bänbtä nitre bariseokwe abko dän ngututu amne chibo kwata ngututu kwrere, aisete nitre ja töitikaka Jesube nin rabadre Jesu kukwei mike täte gwaire kukwe diribare nitre bariseokwe amne Juankwe ye ben, ñobtä ñan angwane kukwe diribare Jesukwe abko bä jene kukwe mdakrä aisete.

⁵ Nitre bariseo moto ribi, aiseite ni bren ñan namani ruentari tare ie. Abtä Jesu namani ulire krübäte, kákwe mikani ñäräre romone ja bäre temen, bti niebare kwe ni küde ngrötani yeye:

Küde ngököte, niebare kwe ie.

Ye btäräbe ni ye kákwe küde ngökatebare angwane, kise namaninta kuin jökrä ie.

⁶ Yebtä abko, nitre bariseo nikani ju bäre amne Jesu kämikadre ño ja ñäte nitre reketaka jrei Herodes ben abko nikani kädriere jötrö jabe kwärikwäri.

Ni kwati bren bren nükani Jesu kánti

⁷ Abti Jesu btä nitre ja töitikaka ben nikaninta Ñö Okwä Kri Galilea köräbti rabakäre kaibe, akwa ni nikani kwati jiebtí.

⁸ Jesu nämane jändrän kuinkuin nuene, abkotari ni Galileabo, ni Judeabo, ni juta Jerusalénbo, ni Idumeabo, ni nünanka Ñö Jordán bti kä driri, ni juta Tirobo bäre temen, btä juta Sidónbo bäre temen nükani kwati ja tuakäre Jesube.

⁹ Ni nükani kwati dikaro abko nane rabadre Jesu kete dime ja ngätäite, aiseite Jesukwe ru chi mikamna biare kratí jakrä nitre ja töitikaka benye.

¹⁰ Jesukwe ni bren bren mikaninta kuinta kwati, abkotari ni mda mda bren rabadreta kuinta abkokäre tö namani kise mikai Jesubtä, aiseite namanintre ja kitekäbe kwärikwäri rabakäre Jesu kánti.

¹¹ Ye ngwane Jesu namani tuen üaitre kámeye angwane, ni btä nämane ye namanintre ngwen ja mike bobre ngukudokwäbti Jesu ngwäreki, kä namani ngrente krörö: ¡Ma Ngöbö Odei abko gare nunye! namani ngrente kore.

¹² Jesu Ngöbö Odei, ye abko Jesu ñan tö namani mikai gare jötrö ngwarbe ni jökräye, aiseite Jesu kákwe ñan ja kädrienna ni mda mda ngwäreki üai kámeye. Ye ngwane Jesukwe ni kwati mikaninta kuinta btä üai káme juantari mento ni kwatibtä kwe.

Jesukwe ni dianinkä ni jätäbti nibu ja töitikakäre jabe

(Mateo 10.1-4; Lucas 6.12-16)

¹³ Abti Jesu nikani mintokwäre nebe ngitiobti angwane, tö namani nire nire ngwiain jabe, erere käräbare kwe abko nikanintre ben mintokwäre.

¹⁴ Ni ngwiani jabe Jesukwe, ne ngätäite ni dianinkä ni jätäbti nibu kwe abko rabadre ja töitike ben, bti juandre ja kukwei kädriere kwe, abkokäre dianinkä kwe.

¹⁵ Ni dianinkä ni jätäbti nibu Jesukwe abko ie ja di biani kwe üai káme juantarikrä mento nibtä

¹⁶ abko nere: Simón

(ni ye Jesukwe kädiani Pedro mda),

¹⁷ Santiago btä etba kwe Juan. Ne abko Zebedeo ngäbriänkätre, ne arabe Jesukwe kädiani Boanerges. (Ne abko kukwe unsuni ngö káinta kwrere, aiseite kädiani Unsuni Ngobo arato;)

¹⁸ btä Andrés, Felipe, Bartolomé,

Mateo, Tomás, Santiago,

Santiago ne abko Alfeo ngobo;

btä Tadeo btä Simón Zelote.

¹⁹ Mrä abko, Judas Iscariote. Judas ne mden kákwe Jesu kitani ngise rüeye mrä.

Jesukwe ni dianinkä ni jätäbti nibu kore.

Beelzebú nämane Jesubtä nie namani rüere

(Mateo 12.22-32; Lucas 11.14-23; 12.10)

²⁰ Nebti Jesu nikaninta gwä angwane, ni nukaninta kwati kánti ja tuakäre ben abko ñan namani niara btä nitre ja töitikaka ben tuemetre mröre jire chi.

²¹ Jesu mräkákwe kukwe ne gani angwane, kä namani jáme Jesu dokwäbti namani nütüre, aiseite nikani niara jiebtí, tö namani Jesu ngwianta ja gwiriete.

²² Angwane Kukwe Biani Ngöbökwé Moiséye dirikätre nünanka juta Jerusalén abko nükani ruäre Jesu kánti, kä namani niere ni jökräye:

Üai káme dänkien kädianta Beelzebú, ye mden kákwe ja di biani ni nokoye abko diebti tä üai kámekáme juentari mento se, namanintre niere kore Jesubtä.

Abtä Jesukwe dirikä ye käräbare, kákwe kukwe bä mikani krörö mda ietere:

¿Satana kädianta Beelzebú arato ye abko raba ja juentari au ya? Ñakare.

²⁴ Erere arato, gobran btä ni nünanka kä ketetibe te rikwitare ja rüere kwärikwäri, ne ngwane gobran kä ye kánti ñan rabadre gobrane mda.

²⁵ Ne ben, ni jakwebe nüne ju kwatibe te rikwitare ja rüere angwane, ñan rabadre nüne ketetibe käre.

²⁶ Ye mden kwrere abko, Satana rikwitareta ja rüere au ne ngwane, kä rükadre mrä käne, akwa Satana ñan tä rüre jabe au, aiseite ti ñan tä üai käme juentari mento nibtä Satana diebti, aiseite munta blite ngwarbe.

²⁷ Yebti Jesukwe kukwe mda bä mikani, käkwe Satana bä mikani ni dite kwrere amne ja bä mikani ni gokä kwrere kwe, käkwe niebare:

Satana abko ni dite kwrere. Ni dite tä ju jen kwe ngbiare ni gokä ngäniene, aiseite ni dite nünanka gwi ñan mäkärete angwane, ni gokä ñan raba jire iti, kä rabadre jändrän kwe denkä kän, akwa mäkärete angwane, ni gokä rabadre jändrän kwe denkä jire jökrä kän. Ye kwrere ni ye btä üai käme tä abko ju Satanakwe kwrere. Ti bäri dite Satanakrä aiseite, ti raba üai käme juentari mento nibtä Satanakän, ni gokäta jändrän denkä ni dite kän ye kwrere.

²⁸⁻³⁰ Jesu abko btä üai käme nämäne, nie namani Kukwe Biani Ngöbökwé Moiséye dirikäkwe, mdenbtä Jesukwe ñäkäbare krörö ietre:

Ti bike kukwe era erere niere munye abko krörö: Nire nire käkwe ñäkädre blo Ngöbö rüere, btä ja mikadre ngite ño erere Ngöbö rüere kwe, yebtä Ngöbö raba ni ngite ye denkä mento btä; akwa nire nire käkwe ñäkädre blo Ngöbö Üai Deme rüere, ne ngwane ni ye rabadre ngite kärekwé Ngöböye, aiseite ni ngite ye ñan diandrekä btä kwe. Abko kore se, niebare Jesukwe ietre.

*Nire abko Jesu mräkä era metre
(Mateo 12.46-50; Lucas 8.19-21)*

³¹ Kä namani jäme Jesu dokwäbti, Jesu mräkä namani nütüre, aiseite Jesu meye amne etbakantre nükani ju bäre temen jiebti, käkwe kärämna ngwiandreta ja gwiriete.

³² Angwane ni nämäne tākänintbe Jesu bäre temen käkwe niebare ie:

Ma meye amne ma etbakantre tä ju bäre nokote abko tö nibi blitai mabe, niebare kwetere Jesuye.

³³ Jesukwe niebare mda ietre:

¿Nire abko ti meye amne nire abko ti etbakantre amarebti tö nibi blitai tibe ye? niebare kwe.

³⁴ Bti ni nämäne tākänintbe, ye Jesukwe mikani ñäräre kuin, käkwe niebare ietre:

Ti meye tikwe amne ti etbakantre era metre abko erere tä nete ne,

³⁵ ñobtä ñan angwane nire nire käta Ngöbö kukwei mike täte, ni ye abko ti etba tikwe, ti ngwai tikwe amne ti meye tikwe. Abko kore se, niebare Jesukwe.

4

*Dobo ketabkä, btä Jesukwe kukwe bä mikani
(Mateo 13.1-9; Lucas 8.4-8)*

¹ Abti bati Jesu nikaninta dirire mda Ñö Okwä Kri Galilea köräbti angwane, ni kwati käkwe ja ükaninkrö Jesubtä niara kukwei nuakäre. Abtä Jesu nakwani rute, namani tākänintbe. Nitre käkwe ja ükaninkrö kwati btä ye abko namani jökrä ñö köräbti jateta temen.

² Angwane Jesukwe kukwe keta kabre bä mikani dirikäre ietre, käkwe niebare krörö:

³ ¡olo ketete munkwe! Bati ni nikani iti nura metekä.

⁴ Nura metaninkä kwe angwane nura ruäre nikani mate ji ngrabare temen, ye abko nukwä jatani, käkwe kwetani jökrä kän.

⁵ Nura ruäre abko nikani mate jäkwatabti temen, ye kanti abko dobo ñakare bökan, aiseite nura ye nükani mure jötrö, akwa dobo ñakare mente nguse,

⁶ bti ñänä jatani ngire, käkwe nura mu ye kukwani jökrä amne ngätri ñakare arato, aiseite ngrötaninkä jökrä.

⁷ Nura ruäre abko nikani mate kökrä tukwäte tukwäte ngätäite, ye abko nükani mure arato. Akwa kökrä ye abko rirabare bäri jötrö nura mu yebti ta, käkwe kämikani, aiseite ñan ngwä namani.

⁸ Akwa nura ruäre abko nikani mate dobo kuinte, ye abko nükani mure amne, rirabare tuärebe amne ngwä namani kabrekabre btä. Datire datire ngwä namani gre bti krä jätä, ruäre abko ngwä namani gre ketamä, ruäre abko ngwä namani gre ketarike. Ne abko nakaninkä kore se.

⁹ Nire nire käta ti kukwei nuen, ye abko olo tarä ne ngwane, ti kukwei ne ketate ja olote kwe, kukwe ne rükadre gare kuin munye abkokäre. Abko kore se, niebare kwe ni kwati yeye.

*Ñobtä Jesukwe kukwe bä mikani
(Mateo 13.10-17; Lucas 8.9-10)*

¹⁰ Yebti Jesu namani kaibe angwane, ni ja töitikaka ni jätäbti nibu ben btä ni mda mda nämäne näin siba Jesube käkwe niebare ie:

¿Makwe kukwe bä miri, ye dre nini kore makwe yere? niebare kore kwetre Jesuye.

¹¹ Jesukwe niebare mda ietre:

Ngöbö rükadre gobrane ño nibti abko tä tiebe, akwa tita mike gare munye, akwa ni kwati mda abko ie Ngöböta mike gare ñakare, aiseite tita kukwe bä mike kore, Ngöbö Kukwei tä tikani krörö rabadre bare abkokäre:

¹² Kukwe bä mikata kore tikwe, ye jatadre ni mda mdaye, akwa ñan rükadre gare.

Ne ben, kukwe nieta tikwe jaradre ie, akwa teбайдre ñakare kwetre.

Yebtä ñan jatadreta Ngöbö kukwäre.

Arato niaratre ngite Ngöbö rüere, ye Ngöbökwé ñan diandrekä mento btä, *Isaías 6.9-10*
abkokäre tita kukwe bä mike kore, niebare kwe ietre.

Dobo ketabkä tä dre niere abko nere

(Mateo 13.18-23; Lucas 8.9-15)

¹³ Jesukwe kukwe bä mikani, ye ñan nükani gare metre nitre ja töitikaka benye. Abtä niebare kwe ietre:

¿Tikwe kukwe bä miri nura metaninkäbtä ñan nü gare munye, ye kukwe mda mda bäri tare bä mikadre tikwe abko rükadre gare ño munye amarebti yere?

¹⁴ Ye mden kisete, kukwe bä miri tikwe käta ño niere metre abko ti bike mike gare munye. Ni Ngöbö kukwei ngwianka, ye abko ni nura metakaka kwrere.

¹⁵ Nura nikani ngitiekä ji ngrabare, ye nukwä jatani, käkwe kwetani jökrä. Ye kwrere abko, ni ruäreta Ngöbö Kukwei nuen, akwa ñan tä nuke gare metre ie. Btäräbe Satana tä kite, käta Ngöbö Kukwei denkä jökrä kän, mden nini tikwe ye.

¹⁶ Amne ni ruäre abko käta Ngöbö Kukwei nuen, ye btäräbe käta nebe nuäre btä kare ngäbti, ni ye abko nura nikani mate jäkwatabti ye kwrere,

¹⁷ ñobtä ñan angwane nura nikani mate jäkwatabti abko ngätri ñan nämane bökan, ye kwrere jire ni ruäre tä Ngöbö Kukwei kaen ngäbti, bti bä jötrö tä näin Ngöböbe, akwa tädre niken ja tare nike tödekäbtä Ngöböbti, ye btäräbe tä Ngöbö Kukwei kiteta temen, bti tä nikenta ja jiebtä.

¹⁸⁻¹⁹ Amne ni ruäre abko tä Ngöbö Kukwei nuen, akwa tä nakwen bäri jändrän kä nebtä jiebtä, erere tä ja töi mike bäri sribi kä nebtä jiebtä amne, tä ngwian tarere bäri amne töta nebe rabai jändrän mda mda bkäne, ye abko käta ngökö. Ne aiseite ni ye abko nura nikani mate kökrä tukwäte tukwäte ngätäite amne ngatani, ye tä nakenkä ni yebtä, aiseite nura ngatani, ngwä namani ñakare, ye kwrere jire ni ye tä sribi nuene ñakare Ngöbökrä.

²⁰ Akwa ni ruäre tä Ngöbö Kukwei nuen amne tä kaen ngäbti, käta niken sribi kuinquin nuene bätäkä ngwarbe Ngöbökrä, ye abko nura nikani mate dobo kuinte abko rirabare kuin amne ngwä kuinquin namani gre bti krä jätä, ruäre gre ketamä, ruäre abko gre ketarike, kwrere jire ni ye tä sribi nuene Ngöbökrä abko kukwe kore bä miri tikwe ye, niebare Jesukwe nitre ja töitikaka benye.

Jesukwe ja kukwei bä mikani ñotra kwrere

(Lucas 8.16-18)

²¹ Jesukwe kukwe bä mikani krörö mda ni kwati yeye, käkwe niebare: ¿Ñotra jutra mikata gwi, ye jue mikata kaja täni ya? Ñakare. ¿Mikata jän täni jae ya? Ñakare. Ñotra mikata, ye mikata üräbtä käin trä rabadre ngitie jökrä gwita temen, ni jökrä gwi, ie kä rabadre tuen abkokäre.

²² Ye kwrere abko, Ngöbö Kukwei ñotra kwrere, aiseite Ngöbö Kukwei nieta kaiibe tikwe mtare abko batira jire kädriedi ji krihti ni mda mdabe. Erere arato, Ngöbö Kukweita tiebe mtare abko batira jire niedi ni kwati ngwärekre, ñotra mikata üräbtä käin trä rabadre jökrä gwita temen ye kwrere.

²³ Ni kukwei ruen munye angwane, munkwe kukwe ne ketate olote. Abko kore se, niebare Jesukwe ni kwatiye.

²⁴ Bti Jesukwe kukwe bä mikani mda, käkwe niebare: Olo ketete kuin kukwe neye munkwe. Ti kukwei mikare täte ño munkwe, ye kwrere Ngöbökwé ti kukwei mikadi gare mda munye. Arato niarakwe ti kukwei mikadi gare bäri mda munye.

²⁵ Mdakäre abko, nire nire ie Ngöbö Kukwei nuke gare, ye abko ie Ngöbökwé ja Kukwei biandi bäri mda; akwa nire nire ie Ngöbö Kukwei gare ñakare, ye abko ie Ngöbö Kukwei gare kiakia abko Ngöbökwé diandikä jökrä kän, niebare Jesukwe ietre.

Ngöböta gobrane ño ni kwe ngätäite abko Jesukwe bä mikani nurabtä

²⁶ Jesukwe kukwe mdara jire niebare krörö ni kwati yeye ño okwä kri köräbti: Ngöbö gobrinta kite niren ño ni kwe ngätäite abko ti bike bä mike nura metakata btä.

²⁷ Ni nura metakaka käta nura metekä, bti tä nikenta gwä. Bti dibire rare tä kibien ya, tä ngwäte ya ño, akwa nura abko tä nuke mure, bti tä niren ño gare ñakare ie.

²⁸ Akwa nurata nūke mure ja di jenbti, ye erere batibe nura muta nūke chi, bti tā niken niren, bti tā nebe blūre, bti ngwāta nebe btā.

²⁹ Yebti ngwāta neme nōtare jōkrā angwane, kā nura ōtakrā tā nūke. Angwane nura bkānkā tā ōtamna sribikātre kweye, ye erere ōtata niken. Ye abko, nurata nūke mure, bti ngwāta neme nōtare kaibe amne ōtata űo, ye kwrere Ngōbō gobrain tā kite niren ni kwe ngātāite. Ne abko kore, niebare Jesukwe ni kwatiye.

Jesukwe kukwe bā mikani mostasa nuraibtā
(Mateo 13.31-32; Lucas 13.18-19)

³⁰ Mdakāre abko, űNgōbōta kite gobrane nibti ye abko tikwe bā mikadre dre kwrere ruen munye?

³¹ Ngōbōta kite gobrane nibti ye abko mostasa nurai chi kwrere. Ni iti kākwe mostasa nurai nōkani tirete jakrā. Nura jōkrā munkwe, ngātāite mostasa nurai ye abko bāri kiakia,

³² akwa nōkadre tirete angwane, rabadre bāri kri nura jōkrā bti ta angwane, kūdetā nebe ngetre kwārākwarā, aisete nukwā raba kite nūne kūdetē kāinta kā tiborete, ye kwrere jire kāne Ngōbōta kite gobrane ni braibe bti, akwa mrā angwane Ngōbō rabadi gobrane ni kwatibti abko bā mikata nura chi yebtā.

Jesu nāmane kukwe bā mike jirekābe, btā nāmane dirire
(Mateo 13.34-35)

³³ Jesu nāmane kukwe bā mike jāndrān mda mdabtā, erere nāmane dirire, akwa kukwe bāri tare abko űan nāmane dirire ni kwatiye.

³⁴ Kukwe bā mika nāmane jirekābe Jesukwe, btā nāmane dirire ni mda mdaye, akwa nāmane nebe kaibe nitre ja tōitikaka benbe angwane, kukwe bā mika nāmane ni mda mdaye kwe abko nāmane dre niere metre abko nāmane mike gare jōkrā ietre.

Jesukwe mūre amne űō mikani kwekbe
(Mateo 8.23-27; Lucas 8.22-25)

³⁵ Jesukwe blitabare kukwe keta kabrebtā, ye nāirerabe kā jatani iko angwane, niebare kwe nitre ja tōitikaka benye:

Brān űō okwā kri kwārākri, niebare kwe ietre.

³⁶ Erere bkānā, ru te Jesu nāmanena, arabe te jānikani. Arato ru mda mda nikani siba ben. Ni nāmane kwati, ye abko namani jōkrā űō okwā kōrābti ie.

³⁷ Niarate nikani, nikani te batibe mūre jatani mate ribi krūbāte, kā nikani űō mike nakwen kukwāne, aisete namani űō kite nakwen jōkrā rute, kā namani ru krien űōte nguse.

³⁸ Akwa Jesukwe ja dokwākrā mikani, bti nāmane kibien kuin ru kōrekri. Ye nitre ja tōitikaka ben nikani, kākwe ganinkrō, bti niebare kwetre Jesuye:

űDirikā, ni kite niken űōte nguse dbe makrā ya, amarebti ma nibi kibien dikaro yere! niebare kwetre Jesuye.

³⁹ Abtā Jesu naninkrō, kākwe űākābare krōrō mūreye amne űōye:

Kwekbe munkwe, niebare kwe.

Ye btārābe kā namaninta kwekbe jōkrā. űō abko namani nenta jirekābe jōkrā.

⁴⁰ Jesukwe niebare nitre ja tōitikaka benye:

űNgōbōta mun ngibiare, bti munta tōdeke yera, amarebti mun moto nibi bete dikaro ja tari yere! niebare Jesukwe ietre.

⁴¹ Akwa namanintre nekwetekā Jesubtā, tōi űan namani krūtare, kā namani niere jae kwārīkwāri:

űNi se abko, ni űo amarebti, mūreta mike tāte btā űōta mike tāte sere? namanintre niere jae kwārīkwāri.

5

Ni Gadarabo btā Jesukwe űai kāme juanintari mento
(Mateo 8.28-34; Lucas 8.26-39)

¹ Yebti Jesu nitre ja tōitikaka benbe nebe űō Okwā Kri Galilea kwārā nakri kākā Gadara kānti.

²⁻³ Niara nakwani timon, ye btārābe ni nūkani iti Jesu kānti abko btā űai kāme nāmane. Mden kisete nāmane nūne rōkabi abko nikani Jesu ngābti. Ni ye abko, ni krūbāte űai kāme kisete, aisete mākāte nāmane kadenanbti, akwa űan nāmane neketete jire chi ni mda mdaye,

⁴ űōbtā űan angwane kūde mākāte nāmane kadenanbti ie angwane, nāmane kadena ōtōte jōkrā ja kūdebtā. Ne ben ngoto mākāte nāmane ie angwane, nāmane kadena ōtōte kia būrere jōkrā ja ngotobtā, aisete űan namani nuene ni mda mdakrā. Kāre mākāte nāmane, akwa nāmane ngitieta ben gwaire.

⁵ Dibire rare ni ye nāmane niken ngwānenkā krikri be rōkabtita btā ngudrebtita ja metare kwārā jābti ngrabare.

⁶ Jesu jatabare mente ie se kwrere angwane, niara nakwaninkā, nikani betekā Jesu ngābti, namani kānti angwane, nikani ngitiekā ngukudokwābti temen Jesu ngwārekri ja mikākāre bobre Jesubtā.

⁷⁻⁸ Jesukwe niebare ūai kāmeye mda:

Nān mento ni nebtā, niebare kwe.

Abtā ni yekwe ngratebare kri mda, kākwe niebare:

Jesu, ma Ngōbö Kri Kā Kāinbti Odei, ūye űobtā ma kite ti nike nete ye? Ngōbö se okwābti, makwe űan ti mika ja tare nike abko ti tō nibi ribei mae, niebare kwe.

⁹ Abtā Jesukwe niebare mda ūai kāmeye:

ŪMa kā űo?

Ūai kāme ye kākwe niebare mda Jesuye:

Nun kabre jae, aisete ti kā Kabre, niebare kwetre.

¹⁰ Bti namani ribere kisere mda Jesuye:

Makwe űan nun juantari mento kā mdabti, ūaitre kāme namani ribere kisere Jesuye.

¹¹ Ye kānti abko, mtū nāmane kabre krūbāte mrōre bā kānime ngudrebtā,

¹² aisete namani ribere Jesuye:

Mtūta sere, sebtā nun juen, namani niere ie.

¹³ Ye erere, Jesukwe ūai kāme juantari mento ni yebtā abko juani mda kwe mtūbtā. Ūai kāme nikani mento ni yebtā, bti nikani mda mtūbtā angwane, mtū nikani betekā jōkrā ja jiebtī kā btā motokwāre, nikani ngitiekā jōkrā űōte, kānti mūre neketani jōkrā. Mtū mili krobū nāre mūre neketani jōkrā kore.

¹⁴ Yebtā abko, mtū ngibiakatre ngitiani, nikani kukwe ne niere jutate ta btā ji ngrabare. Abtā ni jatani kwati mda kukwe nakaninkā ye tuakāre.

¹⁵ Nūkanintre Jesu kānti angwane, ni btā ūai kāme nāmane kabre abko ja ngwā kitani kwe, nāmane tākānintbe temen, kā ruen kuin bti, btā nūkanintre. Abtā Jesu di kri nūkani gare ietre, aisete Jesu jūrā namani ni jōkrābtā.

¹⁶ Ni btā ūai kāme nāmane kabre btā kukwe nakaninkā, erere arato kukwe nakaninkā űo űo mtūbtā abko nitre tuakatuaka namani taentari jire jōkrā ja tāritāri ni jōkrā yeye.

¹⁷ Yebtā abko, Jesu jūrā namani kri btā, aisete Jesukwe kā mikarekā, rikadre kā mdabti abko ni jōkrā namani ribere Jesuye.

¹⁸ Ye erere bkānā, Jesu nakwaninta rute angwane, ni btā ūai kāme juantari mento kwe, ye abko Jesu rikadre ngwena jabe abko namani ribere Jesuye,

¹⁹ Akwa Jesukwe niebare mda ie:

űNakare. Ma raba jirekābe nete. Ma Dānkienkwe dre nuni makrā btā ma tareniri űo kwe, ye nān niereta jire jōkrā ma mrākāye ja gwiriete, niebare kore Jesukwe ie.

²⁰ Ye erere bkānā, Jesukwe kukwe kuin nuenbare ni yekrā, ye niara nikani niere ni jōkrāye juta kwatirekwatire te kā kādian nāmane Decāpolite. Yebtā ni jōkrā tōi űan namani krūtare kukwebtā abko nakaninkā kore se.

*Jesukwe Jairo ngānkān mikaninta nire amne meri bren abko mikaninta quinta kwe
(Mateo 9.18-26; Lucas 8.40-56)*

²¹ Yebti Jesu jataninta rute nūketa űō Okwā Kri Galilea kwārā nakri. Jesu nāmane űō okwā kōrābāre angwane, ni nūkaninbe ja ūekrō kwati ja tuakāre ben.

²² Angwane ni nūkani iti abko kādian nāmane Jairo. Jairo abko nāmane ji dokwāte sinagogate. Jesu jatabare ie angwane, nikaninbe ja mike bobre ngukudokwābti Jesu ngotobtā,

²³ kā namani ribere kisere Jesuye:

Ngābākre chi merire tikwe kite krūte tikān abko rabadreta quinta tikrā, abkokāre ti ki ma kārere kise mike bti jakrā, niebare kwe ie.

²⁴ Ye erere Jesu nikaninbe ben angwane, ni kwati nikani siba, kā namani kete dime ja ngātāite.

²⁵ Angwane nitre nikani kwati Jesube, ye ngātāite meri nāmane nāin iti siba abko kā kwā jātābti kubura nāmane bren dbā tibiere kōbö kwatirekwatire

²⁶ abko kisete nāmane ja tare nike. Kāre nikani krākā bianka kwati kānti angwane, krākā bian nāmane ie, akwa nāmane kitetebe bāri mda. Ngwian nāmane kwe, erere ganinte jōkrā kwe krākābtā jakān, akwa nikani bāri bren jume mentokwāre.

²⁷⁻²⁸ Akwa Jesu nāmane ni miketa quinta kādrie namani meri ye okwābti. Abtā nikani siba, namani ja ken Jesube angwane, namani nūtūre: Tikwe dān Jesubtā se aibe nuadrebttā angwane, ti rabadreta quinta, namani nūtūre. Ne erere ni kwati ngātāite ta, krōtabare ja ken Jesu trōkri kwe, bti dān Jesubtā nuandinbtā tiebe kwe.

²⁹ Ye btäräbe namaninta quinta batibe se kwrere, aisete ja namani ruenta kuin jökrä ngrabare ie.

³⁰ Jesu die näkänintbe ruäre abko Jesukwe gani angwane, ni nämane kwati bäre temen mikani ñäräre kwe, bti niebare kwe ietre:

¿Nirekwe dänkä nuribtä tibtä ye? niebare kwe.

³¹ Abtä nitre ja töitikaka ben käkwe niebare mda ie:

¿Ni nibi kwati ma bäre temen, ká nibi ma kete dime ja ngätáite ñan tuen mae ya, amarebti nirekwe dán mabtä nuribtä ma nibi niere yere? niebare kwetre Jesuye.

³² Akwa nirekwe dán nuandinbtä Jesubtä abko Jesu tö namani gai aisete, ká namani mike ñäräre janknu ja bäre temen.

³³ Jesu namani nikren dikaro, abtä meri ye moto namani bete, aisete namani grükekä jökrä ngrabare, nikani ja mike bobre ngukudokwäbti Jesu ngwärecri, bti jakwe dán nuandinbtä Jesubtä, käkwe ja mikaninta quinta, niebare metre kwe Jesuye.

³⁴ Abtä Jesukwe niebare mda ie:

Ti mräkä, makwe tödiri kwatibe tibti, köböire ma nibirate quinta, aisete nánta jáme, niebare kore kwe ie.

³⁵ Jesu nämane blite kore angwane, ni ji dokwäte sinagocate, ye jiebti ni ruäre mda nükani kukwe ngwena, käkwe niebare ie:

Ma ngänkän kürera makän. Makwe ñan dirikä nika mda, niebare kwe ie.

³⁶ Ne jarabare Jesuye, abtä Jesukwe niebare ni ji dokwäte yeye:

Ma ñan rekwetaka ngäbäkre jiebti jakän. Makwe tödeka kwatibe janknu tibti, niebare kwe ie.

³⁷ Bti Jesu nikani, käkwe Pedro, Santiago, btä Juan, Santiago etba aibe ngwiani jabe, ben nikani.

³⁸ Namanintre ni ji dokwäte juete angwane, ni nämane kwati ngetrekä jume ja dibti, aisete ká nämane nokre gwi, btä namanintre.

³⁹ Niara nikani gwä angwane, ngäbäkre krütanina namani gare Jesuye, akwa niebare kwe nitre ngetrakaka ie:

Ngäbäkre merire ye kürera munta nütüre, akwa tä kibien. ¿Ñobtä mun ngetrakwe nibi nokre kore gwi yere? niebare kwe ietre.

⁴⁰ Yebtä ni jökrä namani Jesu kötaire ñäkäbtä kore, akwa Jesukwe ni nämane gwi ye juani jökrä ju bäre, bti ngäbäkre meye, rün btä ni ja töitikaka nimä nämane näin Jesube aibe ben nikani nebe ngäbäkre ngwäkä ye kánti.

⁴¹ Namanintre kánti angwane, Jesukwe ngäbäkre merire ngwäkä kani küdebti, bti ñäkäbare arameo kwe ie krörö:

Talita, kumi, niebare kwe ie. (Ne abko nieta: Ngäbäkre merire chi, näin krö, tita niere mae.)

⁴² Ne btäräbe, ngäbäkre merire ye nükani krö, nikaninbe dikekäta. Yebtä nitre nämane kwati, ye töi ñan namani krütare jire chi kukwe nakaninkä yebtä. Ngäbäkre merire ye abko ká kwä jätäbti kubu ie.

⁴³ Jesukwe ngäbäkre mikaninta nire, bti bukamna kwe. Akwa nitre kukwe tuakatuaqa abko käkwe ñan kukwe ye kädriedre jire chi ni mda mdabe, niebare kwe ietre. Ne abko nakaninkä kore.

6

*Jesu mikani ütiáte ñakare ja käite Nazarete
(Mateo 13.53-58; Lucas 4.16-30)*

¹ Yebti Jesu nikaninta ja käite juta Nazarete nitre ja töitikaka benbe.

² Abti köbö jadükakrä nükani angwane, nikani dirire sinagocate. Angwane ni kwati nämane kukwe nuen. Ruäre abko ñan töi nämane krütare Jesu kukweibtä, ká namanintre niere jae kwärikwäri:

¿Ni nokokwe ja töitikani mdente amarebti töbtä dikaro sere? Arato, töi ngitiekä dikaro dirikrä, btä tä sribi kri ñan tuabare nuene Ngöbö diebti. ¿Se abko ño kánti gare ie amarebti sere? ¿Niaraata bike kri ñan ñan?

³ Niara María ngobo sribikä kri kukwänbtä ara. Niara abko Santiago, José, Judas btä Simón etba ara. Niara ngwai tä nüne jökrä ká ne kánti arato, namanintre niere jirekäbe jae kwärikwäri.

Ne aisete Jesu kukwei namani tare btä.

⁴ Abtä Jesukwe niebare mda ietre:

Ni Ngöbö kukwei niekä mikata ütiäte kä mda mdabti, akwa ja käite amne mräkä kwekwe ngätäite amne mräkä juete abko mikata ütiäte ñakare nieta. Ye kwrere mun ñan tä ti mike ütiäte jae. Abko kore se, niebare kwe ietre.

⁵⁻⁶ Nitre Nazarebo käkwe ñan Jesu kukwei mikani ütiäte abko namani teбайдre kri Jesukrä. Abtä ni bren bren nämáne ruäre, aibehti Jesukwe kise mikani abko namaninta kuinta, akwa sribi kri nuenbare ñakare mda kwe kä ye kánti.

Jesukwe nitre ja töitikaka ben juani Ngöbö kukwei dirire
(Mateo 10.5-15; Lucas 9.1-6)

Yebti Jesu nikani dirire janknu juta kwatirekwatire Galileate angwane,

⁷ ni ja töitikaka ben ni jätäbti nibu käräbare kwe, ie Ngöbö di biani kwe üai käme juantarikrä, bti juani nibu nibu kwe Ngöbö Kukwei dirire.

⁸⁻⁹ Akwa rikadre känenkri abko töi diani krörö kwe:

Mun rikadre angwane, mun ñan rika mrö ngwena, mun ñan rika kra ngwena, mun ñan rika ngwian ngwena, akwa mökän aibe järke munkwe jae amne sandalia mun ngotobtä aibe te mun rika. Arato, dän jabtäbe, te mun rika, ñobtä ñan angwane munkwe nünentbe nirebe abko käkwe mun die mikadre jändrän jökrä yebtä.

¹⁰ Ne mden kiseté, juta mdente mun rika, ye kánti munkwe nünantbe ju kwatibe te, bti mun rika ta juta mdate.

¹¹ Akwa nane juta mden kánti mun ñan ka ngäbti, btä mun ñan kukwe nua tö raba angwane, munkwe dobro ja ngotobtä ye bäbrükate nitre nünanka juta yete okwäbti, niaratre ngite au Ngöbö ngwärekrei bä mikakrä tuare ietre. Yebtä abko, kukwe era erere ti bibe niere munye. [Ngöbökwé ni jökrä mikadi ja tare nike, ye ngwane nitre Sodomabo btä Gomorrabo abko Ngöbökwé ngwiandi ja tare nike krübäte bkänä, akwa ni kä ye kánti tä mun kukwei nuen ñakare abko Ngöbökwé ngwiandi ja tare nike bäri krübäte mda. Abko kore se, niebare Jesukwe ietre.]*

¹² Ye erere bkänä, nitre ja töitikaka Jesube nikani, kä namani niere krörö: Kukwe kämekäme kite temen munkwe, bti tödeke Ngöböbti munkwe, namanintre niere.

¹³ Ye ngwane, üai käme juanintari mento ni kwatibtä kwetre. Arato ni bren bren mikaninta kuinta kwetre aseite kekare kwärä ni bren bren yebti.†

Juan Bautista müre ketani
(Mateo 14.1-12; Lucas 9.7-9)

¹⁴ Kä ye ngwane abko, jrei kädian nämáne Herodes Antipas nämáne gobrane angwane, Jesu nämáne dre dre nuene gani kwe, ñobtä ñan angwane ni jökrä nämáne Jesu käikitekä kä ketareketare Galileate. Yebtä ni ruäre namanintre niere krörö Jesubtä: Ngöbökwé Juan Bautista mikaninta nire, aisete di tarä sribi kri ñan tuabare nuenkrä ye, namanintre niere.

¹⁵ Ni mda mda abko namani niere: Ni Ngöbö kukwei niekä kira kädian nämáne Elías ara se, namanintre niere.

Ni mdara jire abko namani niere: Nitre Ngöbö kukwei niekä kirakira abko kwrere sere, namanintre niere.

¹⁶ Blita namani Jesubtä, ye namani gare Herodeye angwane, niebare kwe:

Juan dokwä tikakamna tikwe, ara nukaninta nire mtare, niebare Herodekwe.

¹⁷⁻¹⁹ Ñobtä jrei Herodes käkwe Juan dokwä tikakamna abko nakaninkä krörö: Herodes käkwe niebare kore, ñobtä ñan angwane niara etba Felipe nän muko kädian nämáne Herodías abko diani kwe kän. Yebtä abko Juan Bautista käkwe niebare Herodeye: Ma etba nän muko se makwe ñan mikadre jire ja ken kän, Juan nämáne niere. Ye dokwäre abko Juan Bautista kamna ngite Herodekwe, bti kitamna ngite kä teri kwe, ye nukaninta töre ie, käkwe ñäkäbare kore. Ye mdenbtä Herodías abko tö namani Juan müre ketani, akwa ñan namani nuene kräke,

²⁰ ñobtä ñan angwane Juan abko ni era metre nünanka deme Ngöbö ngwärekrei nämáne gare Herodeye, abtä nämáne mike ütiäte, aisete jrei Herodes nämáne Juan ngibiare Herodías ngäniene. Arato kä nämáne nebe nuäre Herodebtä Juan kukwei nuare, akwa nämáne nebe töbibe kri btä.

²¹ Te bati, Herodes därebare köböi nukani angwane, Herodekwe sribikä bäri ütiäte krikri käräbare, btä nitre rükä rükä dänkien käräbare kwe. Arato ni ütiäte krikri Galileate käräbare kwe mröre jae. Ye ngwane köbö kuin nukani Herodiakrä.

²²⁻²³ Herodías ngänkän bati nikani tarä mike kwäräkwärä se kwrere nitre nübaibare Herodekwe ye okwäbti. Herodías ngänkän namani tarä mike nuäre kwäräkwärä, ye abko käi namani nuäre krübäte Herodebtä amne ni mda mda nämáne mröre ben yebtä. Abtä Herodekwe niebare Herodías ngänkänye:

* **6:11** Kukwe corcheta ngätäite abko ñan tä tikani manuscrito bäri kuinquin btä. † **6:13 aseite kekare ni bren bren yebti.** Aseite kekani ni bren brenbtä, Ngöbö di nämáne ni yebtä Ngöbö Üai köböire bä mikakäre ietre.

Ngöbö se okwäbti, ma tö dre dre ie, erere kärere jökrä tie angwane, tikwe biandi mae. Kä te tita gobrane, ye ma tö käräi ruäre ta tie angwane, tikwe biandi mae. Dre erere ma tö käräi tie, tikwe biandi mae. Ne tita niere mae Ngöbö se okwäbti, niebare kwe bäre bäre ngäbäkre merire yeje.

²⁴ Dre kärädre kwe abko ñan nukani gare ie. Abtä nikani, käkwe niebare meyeye:

¿Tikwe dre kärä ruen? niebare kwe meyeye.

Meyekwe niebare mda ie:

Juan Bautista dokwä kärere ie, niebare mda kwe ie.

²⁵ Ye erere bkänä, Herodías ngänkän nikaninbe mda. Namaninta jrei Herodes kanti, käkwe niebare ie:

Gwängwarbe, makwe Juan Bautista dokwä mika blatote. Makwe bian tie nete, ie ti tö nibi, niebare kwe Herodeye.

²⁶ Yebtä abko, Herodes moto namani ulire mda, akwa nitre nübaibare kwe ye okwäbti ja kukwei biani kwe Herodías ngänkanye, aisete ñan tö namani ja kukwei kitaita temen.

²⁷ Yebtä jrei Herodes käkwe, ni rükä juani iti abko käkwe Juan dokwä tikarekä, bti jatadre ngwena niebare kwe ie.

²⁸ Ye erere Juan nämane ngite, ye kanti ni rükä nikani, käkwe Juan dokwä tikaninkä, bti mikani blatote kwe, jänikani, biani kwe Herodías ngänkän bati yeje angwane, niara käkwe bianinbe meye Herodiaye mda.

²⁹ Juan müre ketani, ye nitre ja töitikaka ben käkwe gani angwane, Juan ngwäkä jänikani kwetre, bti doboi mikani kwetre.

Jesukwe ni mili krärike bukani

(Mateo 14.13-21; Lucas 9.10-17; Juan 6.1-14)

³⁰ Jesukwe nitre ja töitikaka ben töi diani, bti juani kwe kä ketareketare Galileate. Abti nukantinba jökrä kanti angwane, dre dre nuenbare kwetre btä diribare ño ño kwetre, ye kädribare jire jökrä kwetre Jesube.

³¹ Ye ngwane, ni kwati nämane nuke basare ietre, namani nikenta, täte ni mda namani nuke, namani nikenta aibe janknu, aisete kä ñan namani mrökrä ietre. Abtä Jesukwe niebare nitre ja töitikaka benye:

Brän jadüke chi kä kaibete, niebare kwe ietre.

³² Ye erere bkänä, nakwani jökrä rute, bti nikanintre kä kaibete.

³³ Nikanintre angwane, Jesu ara namani rute nukani gare ni kwatiye, aisete nikanintre betekä jiebti. Erere arato, ni kwati nünanka juta mda mdate käkwe gani abko nikanintre betekä Jesu ngäbti, namanina käne kä kaibete ngibiare, btä nikanintre ngitiekä.

³⁴ Jesu nikani mate, nakwani timon angwane, ni nämane kwati ngibiare ngäbti. Nitre ye abko namani tuen bäsi obeja ngibiaka ñakare raba ngwarbe ye kwrere, namani tuen Jesuye, aisete namani tuen bobre ie. Abtä nikani kukwe dirire kabre bätäkä ngwarbe ietre.

³⁵ Bti kä jatani dere nitre ja töitikaka Jesube okwäbti angwane, nikanintre, käkwe niebare krörö Jesuye:

Kä kitera dere. Nita kä kaibete nete,

³⁶ aisete nitre se juen mrö kökö jae. Känime nere ya, jutate ya, mdente erere juen mrö kökö jae, niebare kwetre Jesuye.

³⁷ Jesukwe niebare mda ietre:

Niaratre buke munkwe, niebare kwe ietre.

Niaratre käkwe niebare mda:

¿Ni iti käkwe ngwian ganandre sö krä kwä jire abko näre bti, nun rikadre ban kökö nitre kwati se bukakrä jökrä bäre sera? niebare kwetre.

³⁸ Jesukwe niebare ietre:

¿Ban tä kunbe munkwe? Ye mun nän tuen, niebare kwe ietre.

Erere janbare tuen, bti jatanintre nuketa, käkwe niebare:

Banta kunrike btä gwa kroub, niebare kwetre Jesuye.

³⁹ Jesukwe nitre juani täke ketareketare temen ja täritäri mikä rerebarebti.

⁴⁰ Erere nitre namani tükänintbe gre ketarike ja täritäri, ruäre abko namani tükänintbe gre ketebu bti ni jätä ja täritäri.

⁴¹ Bti Jesukwe ban kunrike btä gwa kroub diani kisete, nikrabare kä känbti kwe, bti kuin niebare btä Ngöböye kwe, bti ban ñäkänintbe kwe, biani kwe nitre ja töitikaka benye ni jökrä bukakrä. Erere gwa kroub te ni jökrä bukani arato.

⁴² Ni kwati käkwe mröbare, namanintre trinetrine jökrä,

⁴³ bti ban oto btä gwa oto namanintre abko ükaninkröta kutia kwä jätäbti kubu jire mda.

⁴⁴ Ni kwati käkwe mröbare, ye abko ni brare brare aibe mili krärike. Meri btä ngäbäkre nämane kwati abko tanbare ñakare.

Jesukwe dikakabare ñöbti
(Mateo 14.22-27; Juan 6.16-21)

⁴⁵ Nebti ni nämane kwati, ye Jesu jämi juenta ja gwirieta kwäräkwarä, känenkri nitre ja töitikaka ben juani rute kwe, bti juani Ñö Okwä Kri Galilea kwärä nakri ja ngibiare juta Betsaidate.

⁴⁶ Jesukwe ni kwati ye juaninta jökrä ja gwirieta, bti niara nikani mintokwäre mda blitakäre Ngöböbe.

⁴⁷ Kä jatani iko angwane, nitre ja töitikaka Jesube namani ru ngwena Ñö Okwä Kri Galilea te ruäre. Jesu abko namani kaibe, nämane jate abko okwäbti

⁴⁸ müre namani mate ribi krübäte nitre ja töitikaka ben ngäbti, aiseite namani ñö sökö tare rubtä, namani tuen Jesuye. Kä jatanina ngwen ja ken dekä angwane, batibe Jesu nikani dikekä ñöbti kukwäre. Jatanina nüke ru ken, tö namani näin ru bäre ta, akwa jatabare nitre ja töitikaka benye angwane,

⁴⁹ ni bākäi nämane dikekä ñöbti, namanintre nütüre, aiseite nekwetaninkätäre, kākwe ngratebare, ñöbtä ñan angwane

⁵⁰ Jesu jatabare ietre angwane, nekwetaninkä jökrä. Abtä Jesu kākwe niebare ietre:

Ti ara tä näin. Mun ñan rekwetaka, niebare kwe ietre.

⁵¹ Bti Jesu nikani rute käin, btäräbe müre nōtaninkäbe. Abtä nitre ja töitikaka Jesube ñan töi namani krütäre,

⁵² ñöbtä ñan angwane ñan namani Jesu kukwei kaen ngäbti metre, aiseite Jesukwe ban ñäkänintbe Ngöbö diebti angwane, niara ñakare niaratre kwrere abko ñan nükani gare ietre.

Jesu btä nitre ja töitikaka ben nükani juta Genesarete
(Mateo 14.34-36)

⁵³ Yehti niaratre nükani Ñö Okwä Kri Galilea kwärä nakri juta Genesarete, kanti ru mäkäninte kwetre ñö köräbtä,

⁵⁴ bti nakwanintre timon. Btäräbe nitre nünanka yete, ie Jesu nükani gare,

⁵⁵ aiseite jötrö ngwarbe nikanintre betekä juta ngwäre. Jesu namani niken mdente mdente, ye nükani gare ni bren bren mräkäye angwane, namanintre ni bren bren ye tike jänbti jänbti Jesu kukwäre.

⁵⁶ Jesu namani niken juta kiakiate, namani niken juta krikrite, namani niken kä kiakiate, mdente erere ni bren bren mika namani jite jite mräkäkwe Jesu ngäbti. Angwane nitre bren bren ye abko Jesukwe tuadremetre dän körä aibe nuenbtä jabtä amne rabadreta kuinta abko mräkä namani ribere Jesuye. Ye erere bkänä, nitre bren bren namani dän körä aibe nuenbtä Jesubtä angwane, namani nebata kuinta batibe jökrä abko nakaninkä kore.

7

Dre dre tä ni mike ngite Ngöbö ngwäreki niebare Jesukwe
(Mateo 15.1-20)

¹ Abti bati nitre bariseo btä Kukwe Biani Ngöbökwé Moiséye dirikätäre nämane Jerusalén, nükani Jesu kanti Capernaümte.

² Ye ngwane, Kukwe Biani Ngöbökwé Moiséye dirikätäre kirakira kākwe köbötikamna bti mrömna kwetre nitre israelitaye, ye kwrere nitre ja töitikaka Jesube nikani mröre abko ruäre kākwe ñan köbötikani nitre bariseo okwäbti. Abtä namani ñäke btä.

³ (Nitre israelita ngämi mröre abko känenkri köbötikadre kuin abko Kukwe Biani Ngöbökwé Moiséye dirikätäre kirakira kākwe ükaninte nuendre kore, ñöbtä ñan angwane kore rabadre dbe Ngöbö ngwäreki, erere nitre bariseo btä nitre israelita këta mike täte jökrä.)

⁴ Nitre israelita tä nebe jändrän kökö jae, bti tä nüketa gwi angwane, ñan köbötikadre këne kwetre, ñan mrödre kwetre. Arato kukwe mda mda mikata täte kwetre abko nere: baso bätädrete, mrü bätädrete, unkwen bätädrete, jän bätädrete. Ye abko, Kukwe Biani Ngöbökwé Moiséye dirikätäre kirakira abko kākwe kukwe ükaninte nuendre ja mikakäre dbe Ngöbö ngwäreki nitre israelitaye, erere tä nuene janknu ja täritäri.)

⁵ Ne mdenbtä abko, nitre bariseo btä Kukwe Biani Ngöbökwé Moiséye dirikätäre jatani, kākwe niebare Jesuye:

Nun mräkä kirakira kākwe kukwe ükaninte nuendre, ¿se ñöbtä abko nitre ja töitikaka mabe këta mike ñakare täte se? Ni rabadre dbe Ngöbö ngwäreki, abkokäre ni ngämi mröre, känenkri köbötikadre abti mrödre abko tä ükaninte kore amarebti nitre ja töitikaka mabe abko ñan tä köbötiké jire chi mrökrä se, niebare kwetre Jesuye.

⁶ Jesukwe niebare mda ietre:

Mun ngwarbe ja bä mike kuin. Mun ye mdenbtä Isaías kākwe Ngöbö Kukwei niebare metre munbtä abko tä tikani kröro:

Juta ne këta ti mike ütiäte ja kada aibehti, aiseite tä ti tarere ñakare era metre.

7 Tātre ti káikiteká ngwarbe amne kukwe úkaninte au jakrá kwetre, aibe tātře dirire ti Kukwei tāte,
Isaias 29.13
 niebare Isaiákwe munbtá.

8 Ye abko, kukwe biani Ngöbökwe nuendre nie abko munta kite jökrá temen, amne kukwe úkaninte ni ká nebtákwe abko mikata bári útiáte jae munkwe.

9 Ye abko, kukwe biani Ngöbökwe nuendre nie, erere munta mike ngwarbe jae, akwa kukwe úkaninte au jakrá munkwe abko mikata tāte munkwe.

10 Ye mdenbtá, Ngöbökwe ja kukwei tikamna krörö tärábtá Moiséye:

Mun rún btá mun meye mika útiáte jae munkwe.

Nire nire kákwe ñákádre tare rún amne meye rüere, ni ye abko kámikadre, *Exodo 21.17;*

Levítico 20.9

abko tikamna Ngöbökwe Moiséye.

11 Akwa mun abko tá niere krörö: Ni iti kákwe niedre rünye amne meye: Jándrán tikwetikwe se erere Korban, * aisete tikwe biani jökrá Ngöböye, aisete ti ñan raba mun die mike jire chi btí, niedre kwe, ye abko dbe, munta niere.

12 Nire nire kákwe niedre kore angwane, ñan ni rún btá ni meye die mikadre jire chi mda kwe abko munta dirire kore. Ye kwrere munta Ngöbö Kukwei mike ngwarbe jae.

13 Ye abko, kukwe úkaninte au jakrá munkwe abko mikata tāte munkwe, btá kukwe mda mda ne kwrerekwrere, munta nuene janknu ja tärítári. Akwa munta ye nuene angwane, munta Ngöbö Kukwei kite temen. Abko kore se, niebare Jesukwe nitre bariseoye btá Kukwe Biani Ngöbökwe Moiséye dirikátreye.

14 Yehti Jesukwe ni jökrá kárábareta mda, bti niebare kwe ietre:

Ti bike kukwe niere, ne kukwei nuen munkwe angwane, munkwe mika nuke gare jae abko krörö:

15 mrö jökrá kwetata níkwe, ye abko ñan tá ni mike ngite Ngöbö ngwäreki, akwa kukwe jökrá káme ni töibtá, nita nuene ye abra tá ni mike ngite Ngöbö ngwäreki. Abko kore se, niebare Jesukwe.

16 [Ni kukwei ruen munye angwane, munkwe kukwe ne ketate olote. Abko kore se, niebare Jesukwe nitre kwatiye.]†

17 Yehti Jesu nikaninta gwá nitre ja töitikaka benbe. Ni mda mda námáne kwati abko namani jökrá ju báre. Jesu namaninta gwi angwane, nitre ja töitikaka ben kákwe niebare ie:

¿Kukwe diriniri makwe, ye ño yere? niebare kwetre Jesuye.

18 Jesukwe niebare mda ietre:

¿Abko kukwe ñan nü gare munye arato ya? Mrö jökrá kwetata níkwe, ye ñan tá ni mike ngite Ngöbö ngwäreki,

19 ñobtä ñan angwane nita mrö kwete, ye abko tá niken jökrá ni búlete, akwa nita nainkrö angwane, nita mrö ye kitekata jökrá, ¿ye abko gare ñakare munye ya? (Ne aisete, mrö jökrá kuin kwetadre, niebare Jesukwe.)

20 Kukwe kámekáme ni töibtá, nita nuene, ye káta ni mike ngite Ngöbö ngwäreki,

21 ñobtä ñan angwane kukwe kámekáme abko tá ni töite amne ni motote abko erere nita nuene abtä nita ja mike ngite Ngöbö ngwäreki abko krörö: Ni merire brare ja mike ngite bätáká ngwarbe jabe kwárikwári amne ni jándrán goire ni mda mdakán. Erere arato, nita ni mda mda kámike, ni gure káta ja mike gure bati bati tiebe ni mda mdabe.

22 Nita gore, jándrán ni mda mdakwe, ie ni tö jökrá jakrá, nita kukwe kámekáme aibe nuene, nita ni ngökó, ni dián dián, ni tö rabai ni mda mda kwrere, nita ñáke ni mdabtá, nita bike kri, ni töbike ñakare metre ja káne.

23 Kukwe kámekáme keta kabre nita nuene, ñobtä ñan angwane ye tá ni töibtá, káta ni mike ngite Ngöbö ngwäreki. Abko kore se, niebare Jesukwe nitre ja töitikaka benye.

Meri ñakare israelitare kákwe tödekani Jesubti

(Mateo 15.21-28)

24 Abti Jesu nikani juta Tiro báre temen. Namani yete angwane nikani gwá, akwa ñan tö namani ja mikai tuare ni núnanka ká yete ie, aisete nikani tiebe, akwa nitre ká ye kánti kákwe gani.

* **7:11 Korban** abko káta "jándrán biandre Ngöböye" niere hebreore. Ngábákre ngwarbe ñan tö namani rún btá meye die mikai angwane, námáne korban niere ngwian ganaibare kwe yehtá. Abtä ngwian ganaibare kwe, yehti ñan rún btá meye die mikadre, akwa biandre Ngöböye. Ye abko námáne dbe abko nitre diriká námáne niere, akwa Ngöböta ni rún btá ni meye die mikamna nie. † **7:16** Kukwe tikani corcheta ngátáite abko ñan tá tikani manuscrito bári kuinquin btá.

²⁵⁻²⁶Ye kánti meri námáne iti abko ngánkánbtá úai káme námáne nüne. Meri ye abko griega amne Sirofeneciabo. Niara ñakare israelita. Jesu nukani gani kwe angwane, jötrö ngware nikani, kákwe ja mikani bobre ngukudokwäbti Jesu ngwärekrei, bti niebare kwe ie:

Úai káme juentari ngábákre tikwe sebtá, namani kärere kisere Jesuye.

²⁷Abtä Jesukwe niebare mda ie:

Tikwe kukwe kri nuendre makrá, ye abko mrö ngábákrekra kita nukro ngábáli kiakia ie kán, ye kwrere tikwe nuendre nitre israelitabtá, aiseite ti ñan raba úai káme juentari ngábákrebttá makrá, ñobttá ñan angwane ma abko nukro ngábáli kiakia ye kwrere aiseite.

²⁸Meri ye kákwe niebare mda Jesuye:

Ján, ti dánkien, akwa mrö büreta beteká timon ngábákre kisete abko nukro ngábáli kiakia tá kwete mesa táni. Ye mden kisete, tita kukwe ribere mae nete, niebare kwe ie.

²⁹Jesukwe niebare mda ie:

Mata kukwe era niere. Ngöböta sribire ño ni kwe ngätäite tá gare kuin mae, nibi tuen tie. Arato mata tödeke kwatibe Ngöböbti, nibi tuen tie. Ye köböire tikwe úai káme junina mento ma ngánkánbtá, aiseite nibirate quinta, aiseite nánta ja gwiriete. Abko kore se, niebare Jesukwe ie.

³⁰Ye erere bkäná, meri ye nikaninta, namaninta gwi angwane, úai káme nikanina mento ngánkánbtá aiseite, námáne jáme jánbti, btá namaninta. Ne abko nakaninká kore.

Ni olo ngidianinte amne kukwe ritete abko Jesukwe mikaninta quinta

³¹Jesu námáne juta Tiro bäre temen, nikaninta angwane, nikani juta Sidón kánti ta, nikani ká kädian námáne Decápolis kánti. Te nukani, namani Nö Okwá Kri Galilea btá.

³²Ye kánti ni iti abko olo ngidianinte amne kukwe ritete jänükani mrákákwe Jesuye. Angwane Jesukwe kise mikadre bti mikakäre quinta abko mrákákwe ribebare kisere ie.

³³Ye kánti ni námáne kwati Jesu bäre ta, aiseite Jesukwe ni ye ngwiani mento, bti kise krijani olote kwárikwári kwe, tüdrá abko nuaninbtá kálíbtí kwe,

³⁴nikrabare ká káinbti kwe blitakäre Ngöböbe, bti büre jákani nga kwe, bti ñákábare krörö arameo kwe ni neye: ¡Efata! niebare Jesukwe ie. (Kukwe arameo ne abko káta: ¡olo ngiente tita niere mae! niere).

³⁵Ye btáräbe ni ye olo gu ngitianinta, tüdrá namaninta quinta amne namani blite kuin metre.

³⁶⁻³⁷Kukwe nakaninká kore, ye Jesukwe ñan kädriemna jire chi ni mda mdabe, akwa ni námáne yete, okwäbti Jesukwe kukwe kri nuenbare, ye töi ñan namani krütare, ká namanintre niere: Ni seta jándrán kuinquin nuene ño, amarebti ni olo ngidianinte ie tá ni kukwei mike ruenta. Ni kukwei ñakare abko tá kukwe tike sere, namanintre niere kore. Mden kisete, kukwe nakaninká ñan kädriedre abko Jesu namani niere ietre, akwa bäri namani kädriere ni mda mdabe.

8

Ni mili krákká bukani Jesukwe

(Mateo 15.32-39)

¹Ká ye ngwane, bati ni nukantina ja úkekrö kwati Jesubttá abko kán mrö krütani jókrá. Abttá Jesukwe nitre ja töitíkaka ben káräbare, bti niebare kwe ietre:

²Köbömára jire ni kwati tá tibe nete, ie mrö ñakare kwetadre, aiseite nibi tuen bobre tie.

³Ni ruäre núnanka mente jatani tá nete. Tikwe juandreta mröi ja gwiriete angwane, nane ká rötarete bti ji ngrabare, aiseite nibi tuen bobre tie. Ti ñan tö juainta mröi, niebare Jesukwe ietre.

⁴Nitre ja töitíkaka ben kákwe niebare mda ie:

Níta ká kaibe nete. ¿Ká krörö kánti abko ni bukare drete sere? niebare kwetre ie.

⁵Jesukwe niebare mda ietre:

¿Banta kobe munkwe?

Niaratrekwe niebare mda ie:

Banta kun kükübe nunkwe, niebare kwetre Jesuye.

⁶Jesu kákwe tákámna temen nitre námáne yeye, bti ban kun kükü diani kisete kwe, kuin niebare btá kwe Ngöböye, ñákánintbe kwe, bti ngökani kwe nitre ja töitíkaka benye dráidre ni námáne kwati yebti. Erere bkäná, ñan dráibare kwetre.

⁷Gwa kiakia námáne krobu, krámá kwetre, btá Jesukwe kuin niebare Ngöböye, bti ngökani kwe nitre ja töitíkaka benye, bti juani dráire kwe arato.

⁸Ni jókrá kákwe mröbare, namanintre trinetrine jókrá, bti ban oto namaninte, ye abko nitre ja töitíkaka Jesube kákwe úkaninkröta kutia kwá kükü.

⁹ Ni kwati kākwe mrōbare, ye abko ni brare brare aibe mili krābkā nāre amne meri btā ngābākre nāmane kwati abko tanbare űakare. Ni jōkrā kākwe mrōbare trine, bti Jesukwe juaninta ja gwiriete,

¹⁰ bti niara btā nitre ja tōitikaka ben nakwani rute, nikani kā kādian nāmane Dalmanuta kānti.

*Sribi kri űan tuabare kārābare Jesuye
(Mateo 16.1-4; Lucas 12.54-56)*

¹¹ Jesu btā nitre ja tōitikaka ben namani Dalmanuta angwane, nitre bariseo nūkani ja kwete ben amne Jesukwe ja dokwā mikadre kō okwāte, abkokāre nūkani ja kwete ben. Jesu abko juani era metre Ngōbōkwe ya, űakare ya abko Jesukwe bā mikadre, kākwe sribi kri űan tuabare nuendre niaratre okwābti abko nūkani ribere Jesuye.

¹² Ye namani tare kri Jesubtā, aisete būre jākāni nga kwe, bti niebare mda kwe ietre:
jjo! ¿Ye űobtā mun nūnanka kā ne ngwane tā kukwe ye kwrere ribere dikaro tie yere? Ngōbō tō dre nuein, ye tikwe nin niedi jire chi munye, niebare Jesukwe ietre.

¹³ Kukwe namani tare kri Jesubtā. Yebti nitre bariseo mikaninte kānime kwe, nakwaninta rute, bti nikaninta ja jiebtī űō okwā kri kwārā nakri.

*Dirikātre blo, yebtā Jesukwe nitre ja tōitikaka ben mikani mokre
(Mateo 16.5-12)*

¹⁴ Nāmane Dalmanuta angwane abko nitre ja tōitikaka Jesube, bti kā nikwitaninkā ban ngwiandre jabe, abkokānti namanina rute angwane, banbe nāmane kuntibe kwetre.

¹⁵ Ye ngwane, Jesukwe nitre ja tōitikaka ben mikani mokre, kākwe niebare ietre:
Lebadura nitre bariseokwe btā nitre reketaka Herodebe, ye ngāniene munkwe ja ngibia kuin, niebare Jesukwe.

¹⁶ Abtā nitre ja tōitikaka Jesube namani niere jae kwārikwāri:
Ni űan ki ban mda ngwena, abtā Jesuta blite kore, namani niere jae kwārikwāri.
¹⁷ Ye gani Jesukwe, abtā niebare kwe ietre:

¿Ti abko nire metre ngāmi nūke gare munye ya? ¿Ti raba mrō bien munye Ngōbō diebti ngāmi nūke gare munye ya? ¿Ye űobtā ban űakare munye, munta niere dikaro jae abko mun tōi ngitiekā űakare arato ya?

¹⁸ ¿Kā tuen munye amarebti tita dre nuene abko nūke gare űakare munye yere? ¿Ni kukwei ruen munye amarebti mun ti kukwei tebaire űakare yere? ¿Tikwe dre nuenba, ye tōre űakare munye ya? ¿Ye űobtā abko ban űakare mun nibi niere yere?

¹⁹ ¿Ni mili krārike jire bti tikwe ban kunrikebe drāiba, ye rabateba abko űakrōbata kutia kobe munkwe? niebare Jesukwe nitre ja tōitikaka benye.

Niaratre kākwe niebare mda:
Ban rabateba abko űakrōbata kutia kwā jātābti kubu nunkwe, niebare kwe Jesuye.
²⁰ Bti Jesukwe niebare mda ietre:
¿Erere arato, ni mili krābkā jire bti tikwe ban kun kūkūbe drāiba, ye rabateba abko munkwe űakrōbata kutia kobe? niebare kwe ietre.

Niaratre kākwe niebare mda Jesuye:
Ban rabateba abko űakrōbata kutia krikri kwā kūkū nunkwe, niebare kwetre.
²¹ Abtā Jesukwe niebare mda ietre:
Tikwe jāndrān ne nuenba mun okwābti amarebti, ¿se űobtā abko drebtā tita blite abko ngāmi nūke gare metre munye? Abko kore se, niebare kwe ietre.

Ni iti, ie kā tuen űakare abko Jesukwe mikaninta kuinta

²² Yebti Jesu btā nitre ja tōitikaka ben nikani mate juta Betsaidate angwane, ni iti, ie kā tuen űakare jānūkani mrākākwe Jesuye. Jesukwe okwā nuadrebtā ja kisebti mikakāre kuinta abko mrākā namani ribere kisere ie.

²³ Ni ie kā tuen űakare, ye Jesukwe kani kūdebti, nikani ben mento juta bāre, namani juta bāre angwane, Jesukwe kāli mikani ni ye okwābtā, bti kise mikani okwābtā kwe, kākwe niebare ie:

¿Kā nibi tuen mae ya?
²⁴ Ni ye kākwe niebare:
Ni nibi tuen kri kwrere dikekā tie, niebare kwe ie.
²⁵ Ni ye, ie kā namani tuen diore, abtā Jesukwe kise mikaninta mda bati okwābtā angwane, okwā namaninta kuin jōkrā, aisete kā namani tuenta kuin jōkrā ie.
²⁶ Bti Jesukwe niebare ie:
Tikwe ma okwā mirita kuinta, ye makwe űan kādrie jire chi ni mda mdabe juta Betsaidate. Nānta jirekābe ja gwiriete, niebare kwe ie.

*Jesu abko Ni Dianinkä Ngöbökwé, niebare Pedrokwé
(Mateo 16.13-20; Lucas 9.18-21)*

²⁷ Yehti juta kiakia tä juta Cesarea Filipino bäre temen, ye kukwäre Jesu nikani nitre ja töitkaka benbe sribikäre juta kiakia yete. Namanintre dikekä ji ngrabare angwane, Jesukwe niebare ietre:

¿Ti ne abko nire nieta ni mda mdakwe tibtä? niebare kwe ietre.

²⁸ Niaratre käkwe niebare mda Jesuye:

Ma abko Juan Bautista nukaninta nire nieta ni ruärekwé amne ni mda abko käta ma Elías nukaninta niere mabtä. Akwa ni mda abko tä niere Ngöbö kukwei niekä kirakira mda mda abko nukaninta nire nieta kwe mabtä, niebare kwetwe ie.

²⁹ Jesukwe niebare mda ietre:

¿Mun abko käta ti nire niere tibtä? niebare kwe ietre.

Pedro abko käkwe niebare Jesuye:

Ma abko ni Dianinkä juani Ngöbökwé nun ngätäite, niebare kwe ie.

³⁰ Jesukwe niebare mda nitre ja töitkaka benye:

Ti abko Ni Dianinkä Ngöbökwé abko, munkwe ñan kädrie jire chi ni mda mdabe, niebare kwe ietre.

*Jesu müre ketadi, niebare käne kwe
(Mateo 16.21-28; Lucas 9.22-27)*

³¹ Ye känti mentokwäre Jesu nikani dirire nitre ja töitkaka benye angwane, nikani niere: Nitre unbre ji dokwäte, nitre blitaka Ngöböbe ni mda mda diäre dänkien amne Kukwe Biani Ngöbökwé Moiséye dirikätre, käkwe ti Ni Kä Nebtä Ngobo ne mikadi ja tare nike kri amne trö kwitadi kwetwe tie, käkwe ti müre ketadi, akwa köbömäkäre angwane, ti rükadita nire, niebare kwe ietre.

³² Kukwe ne rakadrekä ño Jesubtä, erere niebare metre ta kwe nitre ja töitkaka benye. Abtä Pedrokwé Jesu käräbare, nikani kaibe ben mentokwäre, bti nikani mäträre btä.

³³ Abtä Jesu nikwitaninte, käkwe nitre ja töitkaka ben mikaninta ñäräre, bti ñäkäbare krörö kwe Pedroye:

Satana, ñan mento tibtä nete. Tikwe ja mikadre ngite Ngöbö rüere, abkokäre ma kite ñäke kore tie ñan ñan. Ni kä nebtä ie jändrän tuen dbe abko erere tä tuen mae, aiseté makwe ñan ñäkä kore tie, niebare Jesukwe Pedroye.

³⁴ Bti Jesukwe nitre ja töitkaka ben btä ni mda mda nämáne yete, ye käräbare, bti niebare kwe ietre:

Nire nire tö ja töi mikai kwatibe nänkrä tibe, ni ye abko tö dreye jakrä abko raba käikwitekä jabtí amne ja kwata raba ruentari tare ñakare ie nünakäre tikrä abko jata ti jiehti,

³⁵ ñobtä ñan angwane nire nire tö ja kwata ngibiai jen jakrä abko krütadi kärekäre, erere rabadi kärekäre Ngöbö okwä bäre mento akwa, nire nire krütadi ti dokwäre amne kukwe kuin Ngöbökwé tibtä ye dokwäre abko rabadi dianintari nünakäre kärekäre Ngöböbe.

³⁶ Ye abko, ni rabadre jändrän jökrä bkäne kabre kä nebtä, akwa ni krütadre angwane nikwe ñan nünandre mda Ngöböbe, ne ütiäre abko dre rükadre nie.

³⁷ Erere arato, nikwe nünandre kärekäre, ye abko ni ñan raba kökö jire chi jakrä, ñobtä ñan angwane jändrän ñakare jire abko ni rabadre bien Ngöböye nuna kärekäre ben ye ütiäre.

³⁸ Ne aiseté, nire nire käta ti rükente amne kukwe dirita tikwe ne rükente nitre tödekaka ñakare Ngöböhti käta kukwe kämekáme nuene ye ngwäreki, ni ye abko ti Ni Kä Nebtä Ngobo ne jatadita angwane, tikwe ni ye rükandite arato. Ti jatadita angwane ti jatadita ti Rün di kri bä nuärehti, erere arato angele deme Ngöbökwé bä nuärehti, niebare Jesukwe nitre ja töitkaka benye btä ni mda mda nämáne yete yeye.

9

¹ Yehti Jesukwe niebare mda:

Mun tä nete ne ruäre ngämi krüte, känenkri Ngöböta gobrane ño ja dibti ni kwe ngätäite, ye abko munkwe tuadi ja okwä jenbti abko ti tö nibi niei metre munye. Abko kore se, niebare Jesukwe ni jökrä nämáne yete yeye.

*Jesu bä nikwitani
(Mateo 17.1-13; Lucas 9.28-36)*

² Yehti kä nikani köbö ti ta mda angwane, Jesukwe Pedro, Santiago amne Juan aibe ngwiani jabe abko ben nikani ngitio bäri mente käin yehti. Niaratre nämánena ngitio yehti käin angwane, Jesu bä nikwitani bä jene niaratre okwäbti,

³ Angwane dän Jesubtä namani trä ngitiekä jökrä ngrabare, namani ngwen bürere. Ni ñakare jire iti kä raba dän bätete ngwen bürere dikaro erere dän bä namani Jesubtä.

⁴ Ye btäräbe Elías btä Moisés namani gökökä yete blite Jesube, btä okwä namani.

⁵ Pedrokwe niebare Jesuye:

Ti Dänkien, nunta nete abko käi nibi nuäre tibtä, aiseté ma tö ne ngwane nunkwe ju mikadi kiakia komä munkrä: kwati makrä, kwati Moisékrä amne kwati Elíakrä, niebare Pedrokwe.

⁶ Pedro abko kákwe ñákäbare kore, ñobtä ñan angwane nitre ja töitikaka Jesube abko namani nekwetekä, aiseté ño niedre kwetre abko ñan namani nuke gare ietre. Abtä Pedro namani ñäke kore.

⁷ Ye btäräbe müta jatani jüben niaratrebtí angwane, müta yete abko ni kukwei jarabare krörö ietre:

Ni ne abko ti Odei tare kri tikwe. Niara kukwei nua munkwe abko ni kukwei namani kore mütate.

⁸ Ye btäräbe nitre ja töitikaka kákwe nikrabareta ja bäre angwane, ni mda ñakare amne Jesu aibe nämane kaibe, btä okwä namani.

⁹ Yehti Jesu nikaninta niaratrebe ngitiobtä motokwäre angwane, Jesukwe niebare ietre: Ti Ni Kä Nebtä Ngobo ne ngämi krüte, bti nüketa nire, ye känenkri kukwe turi munkwe ngitiobti käin sete, ye munkwe ñan nie jire chi ni mda mdaye. Abko kore se, niebare Jesukwe ietre.

¹⁰ Ja rükadreta nire niebare Jesukwe, ye niaratre kákwe ngibiabare tiebe, akwa ye abko dre niebare Jesukwe abko ñan nükani gare ni nimä ja töitikaka benye, aiseté namani ngwentari jirekäbe jae kwärikwäri.

¹¹ Abtä niaratre kákwe niebare mda ie:

¿Ma krütadi bti rükadita nire mata niere ne ngwane, ñobtä abko Elías rükadre bäri Ni Dianinkä Ngöbökwe käne kukwe ukatekäre biare kräke Kukwe Biani Ngöbökwe Moiséye dirikätre käta niere? niebare kwetre Jesuye.

¹² Amne Jesukwe niebare mda ietre:

Elías rükadre käne ye abra era bkänä. Erere arato, niara rükadre Ni Dianinkä Ngöbökwe käne, kákwe jändrän jökrä ukadrete kuin metre. Akwa ti tö kukwe mda ngwiantari munye: ¿Ñobtä ti, Ni Kä Nebtä Ngobo, mikadi ja tare nikadi kri amne ti mikadi ngwarbe ni mdakwe abko tä tikani Ngöbö Kukweibtä? Yebtä töbika munkwe.

¹³ Akwa Elías abko nukanina, * akwa Kukwe Biani Ngöbökwe Moiséye dirikätre, ie niara ñan nükani gare, aiseté tö namani dre dre nuein btä, erere nuenbare kwetre amne mrä müre ketani kwetre, nämane tikani Ngöbö Kukweibtä abko erere namani bare jökrä btä.

*Jesukwe üai käme juantari ngäbäkrebtä
(Mateo 17.14-21; Lucas 9.37-43)*

¹⁴ Jesu jatani nüketa möta nitre ja töitikaka nimä ben angwane, nitre ja töitikaka ben ni ökän namani abko ben Kukwe Biani Ngöbökwe Moiséye dirikätre nämane ruäre abko nämane ja kwete amne, ni mda mda nämane kwati, btä Jesu nukaninta.

¹⁵ Jesu nukaninta, ye ni nämane kwati kákwe gani angwane, töi ñan namani krütare, kä nikani betekä jökrä köbö ngwentari Jesuye.

¹⁶ Jesukwe niebare mda ietre:

¿Drebtä munta ja kwete nete? niebare kwe ietre.

¹⁷⁻¹⁸ Jötrö ngwarbe ni nämane kwati, ye ngätäite ni nämane iti kákwe niebare Jesuye:

Dirikä, üai kämenta jadenkä ngäbäkrebtä tikän abko kisete kukwe ngitie ñakare. Tä niken mdente erere, ye kánti tä neketete üai käme yeye, tä kaenkä käinta bti tä kite temen, tä nikrenkä jökrä ngrabare, däbe tä nebe betekä kadate angwane, tä nebe tu ukwe jökrä jabtä. Mden abko makwe mikadreta kuinta tikrä, abkokäre ti ki ngwena mae yere. Akwa nitre ja töitikaka mabe aibe tä nete, ie tikwe üai käme juantarimna ngäbäkrebtä jakrä, akwa ñan niki mento ietre, niebare kwe Jesuye.

¹⁹ Abtä Jesukwe niebare mda ietre:

¡Aingwaree, ti moto iko munbtä! Munta tödeke ñakare dikaro Ngöböbti ye. ¿Ti rabadi kä nuäi mda munbe amarebti ye? niebare Jesukwe.

Ye btäräbe Jesukwe niebare mda:

Ngäbäkre ye ngwen tie, niebare kwe.

²⁰ Erere ngäbäkre ye jänikani Jesuye, jänikani nebe ken angwane, Jesu jatabare üai kämeye, ye btäräbe üai käme kákwe kä ötanintbe ngäbäkre yehti, nikani ngitiekä temen, namani ja den ngwarbe jabtí tata nekwäre, sekwäre, nekwäre, sekwäre. Däbe namani betekä kadate.

²¹⁻²² Ye ngwane Jesukwe niebare ngäbäkre ye rünye:

¿Kä kobera üai käme nikani jadenkä kore ngäbäkre nebtä? niebare kwe rünye.

Niarakwe niebare mda Jesuye:

* **9:13** *Elías abko nukanina.* Jesu nämane blite Elíabtä angwane, nämane blite Juan Bautistabtä era metre. Ñäke Mateo 17.12,13 yehtä.

Nämane chi angwane, üai käme nikani jadenkä btä tikän yere, abko täbe känime. Üai käme tōta nebe müre ketai, käta kite ñukwäte, tä kite ñöte tikän, aisetu ma di tärä mikakräta kuinta tikrä, ne ngwane nun ngwen ruen bobre jae. Nun die mike. Üai käme juentari mento btä, niebare kwe Jesuye.

²³ Jesukwe niebare mda ie:

Nirekwe tödekadre kwatibe tibti, kräke jändrän jökrä nuäre nuene. ¿Se ñöbtä abko ti di tärä üai käme juantarikrä mata ngwentari tie yere? niebare kore Jesukwe ie.

²⁴ Abtä ngäbäkre rünkwe ñäkäbare jume ja dibti krörö mda Jesuye:

Tita tödeke mabti, akwa mtare ti tö nibi tödekai bäri kwatibe mabti, yebtä ti die mika makwe, niebare kwe Jesuye.

²⁵ Ye btäräbe ni jatani nūke ja ükekrö bäri kabre mda, namani tuen Jesuye. Abtä jötrö ñäkäbare krörö kwe üai käme:

Üai käme, ma ngäbäkre ne kukwe ötaka amne ma ngäbäkre ne olo dikatekä, ma yeye tita niere, nän mento ngäbäkre nebtä. Ma ñan jata jadenkäta jire chi mda btä, tita niere mae, niebare Jesukwe üai käme.

²⁶ Angwane üai kämenkwe ngratebare kri ngäbäkre yebtä, bti kä ötaninbe bti kwe bobuta, nikani ngitiekä temen angwane, üai käme nikani mento. Ngäbäkre abko namani kwekbe temen ngwäkäre kwrere ni kwati ye okwäbti. Abtä namanintre niere: ¡Aiteje! Ngäbäkre krüta tare yera, ni kwati namani niere kore.

²⁷ Akwa Jesu nikani, käkwe ngäbäkre ye kani küdebti, bti ganinkrö krö kwe. Ngäbäkre ye nūkaninbe dikekäta krö. Namani kuin jökrä abko nakaninkä kore.

²⁸ Yebti Jesu namaninta kaibe gwi nitre ja töitikaka benbe angwane, niebare mda kwetwe Jesuye:

Nunkwe üai käme junintari mento, ¿ye ñöbtä ñan niki mento nunye ruen? niebare kwetwe ie.

²⁹ Jesukwe niebare mda ietere:

Munkwe blitadre Ngöböbe btä ja bäindre Ngöbökrä käne, aibe köböire üai käme ye kwrere mun raba juentari mento. Ye munkwe nuni ñakare kore, mden kisete ñan niki mento munye, niebare kwe ietere.

*Jesu krütadi niebare bobukäre kwe
(Mateo 17.22-23; Lucas 9.43-45)*

³⁰ Jesu btä nitre ja töitikaka ben nämane Cesarea Filipino kántita temen, nikaninta angwane nikaninta kä Galilea kántita. Akwa ni mda mdakwe ñan gadre ie tö namani,

³¹ ñöbtä ñan angwane Jesu nämane dirire krörö kaibe nitre ja töitikaka benye:

Ni mda mda abko ie ti, Ni Kä Nebtä Ngobo, ne biandi müre ketadre, akwa köbömä angwane, ti rükadita niere, niebare kwe.

³² Jesukwe dre niebare kore ñan nūkani gare nitre ja töitikaka benye, akwa namani ja gaire, aisetu ñan namani ngwentarita Jesuye.

*Nire bäri ütiäte niebare Jesukwe
(Mateo 18.1-9; 10.42; Lucas 9.46-50; 17.1-2)*

³³ Abti nūkaninta mda juta Capernaümte. Namaninantre ja gwiriete angwane, Jesukwe niebare nitre ja töitikaka benye:

¿Drebtä mun täni ja kwete ji ngrabare yere? niebare Jesukwe ietere.

³⁴ Namanintre kwekbe jökrä, ñöbtä ñan angwane niaratre ngätäite nire bäri ütiäte, abkobtä nämane näin ja kwete ji ngrabare, aisetu namanintre kwekbe.

³⁵ Drebtä namanintre ja kwete namanina gare Jesuye, aisetu Jesu namani tākänintbe, käkwe niebare mda ietere:

Mun jakwe ti ken nete. Nire nire tö ja tuai bäri ütiäte kri ni mda mdakrä Ngöbö okwäbti, ye käkwe ja mika bäri bobre ni mda mdakrä amne ja mika ni sribikä ene kwrere ni mda mdakrä, niebare Jesukwe.

³⁶ Bti Jesukwe ngäbäkre chi käräbare nūke nitre ja töitikaka ben ngätäite, bti kukwe ye bä mikakäre, ngäbäkre ye diani kisete kwe, bti niebare kwe ietere:

³⁷ Nire nire käta ti tarete metre abko käkwe ngäbäkre ne kwrere kadre ngäbti ti käbti. Nirekwe kadre ngäbti kore, ye ngwane ñan ngäbäkre aibe kata ngäbti kwe angwane, ti kata ngäbti kwe arato. Ye kwrere arato, nire nire käkwe ti kadre ngäbti kuin abko käta Ngöbö ti juanka kaen ngäbti arato. Abko kore se, niebare Jesukwe ietere.

*Nireta rüre ñakare Jesu rüere abko tä nekete Jesukri
(Lucas 9.49-50)*

³⁸ Ye angwane Juan abko käkwe niebare mda Jesuye:

Diriká, nunkwe ni turi iti úai káme juentari ma kábtí, akwa nekete ñakare nibe, aiseite ñan úai káme juandretari mda kwe ma kábtí, nunkwe nini ie, niebare kwe Jesuye.

³⁹ Abtä Jesukwe niebare mda ietre:

Munkwe ñan ñáká kore ie amne ñan bika kri niarabtä munkwe, ñobtä ñan angwane nirekwe sribi kri ñan tuabare nuendre ti kábtí, yebti ñan tá nain ñáke blo ti rüere, akwa tá blite kuin tibtä. ¿Se ñobtä abko, munkwe ñan úai káme juantarimna mda ti kábtí ie yere?

⁴⁰ Ni ja rüere ñakare nibe, ye abko tá nekete nibe, aiseite munkwe ñan ñáká ie.

⁴¹ Jesukwe niebare:

Munta ti mike táte, abtä nirekwe ñö aibe biandre chi tomnane munye, akwa ni ñö bianka munye te nekete nibe, ni yeye Ngöböke sribi kuin ye ütiá biandi abko ti tö nibi niei metre munye.

⁴² Akwa nire nire káta ja mike bobre Ngöböbtá ngábákre ne kwrere, ye nirekwe ngwian-dreta ti káikwiteká jabti, kánti rabadre kukwe nuene bári káme mda, ni ye abko Ngöbökre mikadi ja tare nike krübáte ká nakebtá. Mden kisete, ni ye ngámi ni tödekaka tibti ngwen ti káikwiteká jabti, kánenkri já oto kri doboko nura ukwakrá ye mákadre ngärá, bti kitadre mrente nguse kánti müre reketadre abko rabadre bári kuin kráke. Ye kwrere ni ye ñan rabadre ni tödekaka tibti ngwen ti káikwiteká jabti aiseite.

⁴³ Ye kwrere mun kise mden köböite makwe ja mika ngite Ngöbö rüere ne ngwane, munkwe ja kise ye tikaka ta abko bári rabadre kuin, ñobtä ñan angwane munkwe nünandre deme kise otore kwärá rikakäre nüne Ngöböbe ká káinbti abko bári kuin angwane, ñan mun kise krobu ngöi jökrá ben mun rikadre ja tare nike kárekäre ñukwá jutra nótöte ñakare köbö kwatirekwatire ye te.

⁴⁴ [Ká nakebtá, yete jándrän jökrá tá niken ngwarbe amne nginta kwete kárekäre. Ye kwrere abko ñukwá jutra ngítieká käre, ni káme Ngöbö ngwärecri mikakäre ja tare nike kárekäre.]†

⁴⁵ Erere arato, mun ngoto mdenkri, köböite mun raba ja mike ngite, ne ngwane munkwe tikaka ta jae abko bári rabadre kuin, ñobtä ñan angwane mun ngoto kwärábe akwa mun rabadre nüne metre Ngöbökrá abtä munkwe nünandre kárekäre ben, ye abko rabadre bári kuin munkrá amne, ñan mun ngoto krobu ben ngöi Ngöbökre mun kitadre ká ja tare nikakrá kánti.

⁴⁶ [Ká nakebtá yete jándrän jökrá tá niken ngwarbe amne nginta kwete kárekäre. Ye kwrere abko, ñukwá jutra ngítieká käre, ni káme Ngöbö ngwärecri mikakäre ja tare nike kárekäre.]‡

⁴⁷ Erere arato, mun okwá köböite mun raba ja mike ngite Ngöbö rüere, ne ngwane munkwe ja okwá ye diante kwati mento, bti munkwe kitaka mobe arato, ñobtä ñan angwane Ngöböta gobrane, ye kánti mun okwá kwatibe ben mun rikadre nüne kárekäre ben, ye abko rabadre bári kuin munkrá amne, ñan mun okwá kubu ben ngöi mun kitadre ká ja tare nikakrá kánti.

⁴⁸ Ká nakebtá yete jándrän jökrá tá niken ngwarbe amne nginta kwete kárekäre. Ye kwrere abko, ñukwá jutra ngítieká käre, ni káme Ngöbö ngwärecri mikakäre ja tare nike kárekäre.

⁴⁹ Jándrän kukwadre Ngöböye, btá mren mikata mikakäre bánánte, ye kwrere abko munkwe ja tare nikadi mun mikakäre metre.

⁵⁰ Mdakäre abko, mren abra kuin jándrän jökrá mikakrá bánánte, akwa mren bánán riadreká, ye ngwane ñan bánán rabadreta kuin mda. Ye kwrere munta bike kri jabtä kwárikwári angwane, mun ñan raba sribi nuene Ngöbökrá, aiseite mun rabadre ngwarbe mren bánán riadreká kwrere. Mden kisete munkwe ti mikadi táte metre, ye köböire mun rabadi nüne jáme jabe kwárikwári. Abko kore se, niebare Jesukwe nitre ja töitíkaka benye.

10

Meri tuadremetre ya, ñakare ya

(Mateo 19.1-12; Lucas 16.18)

¹ Jesu námáne Capernaúm, níkaní mda nitre ja töitíkaka benbe ká Judeate. Arato níkaní Ñö Jordánbtá ká driri. Ye kánti ni núkaninta ja úkekröta kwati Jesubtä abko, ie Jesu námánena dirire ñö, erere níkaní dirireta ietre.

² Ye ngwane, nitre bariseo núkani ruäre abko tö namani ja gain Jesube niara kitakäre ngite, kákwe niebare ie:

¿Kukwe Biani Ngöbökre Moiséye káta dre niere abko níkwe mikadre táte ya? ¿Ni gure kákwe ja tuametreta, ye abko dbé ya ñö niere nunye? niebare kwetre Jesuye.

³ Jesukwe niebare mda ietre:

† 9:44 Kukweta tikani corcheta ngátáite abko ñan tá tikani manuscrito bári kuinquin btá. ‡ 9:46 Kukweta tikani corcheta ngátáite abko ñan tá tikani manuscrito bári kuinquin btá.

¿Ni gure kákwe ja tuametreta, ye nuemna Moisékwe munye ya ño arato? niebare kwe ietre.

⁴ Niaratrekwe niebare mda Jesuye:

Ni gure kákwe ja tuadremetre abko dbe niebare Moisékwe, akwa nita ja tuemetre abko tikadre táräbtä biandre meriye, niebare Moisékwe, niebare kore nitre bariseokwe ie.

⁵ Abtä Jesukwe niebare mda ietre:

Mun dokwä ribi ribi Ngöbökrä. Ye mdenbtä ni gure kákwe ja tuadremetre abko Ngöbökwé tikamna táräbtä Moiséye munkrä yere.

⁶ Akwa Ngöbökwé kä dätebare kena btä abko tikamna krörö kwe táräbtä Moiséye arato: Ngöbökwé ni brare btä ni merire dätebare.

⁷ Ne aiseté ni brare kákwe ja mikadre gure angwane, rikadre nüne jenena rünbtä amne meyebtä mento merire kwebe.

⁸ Angwane ni nibu ye abko rabadi ni itibe kwrere, *Génesis 2,24*
abko tikamna kore kwe táräbtä Moiséye. Ye kwrere ni nibu ye ñan rabadi ni nibu kwrere mda, akwa rabadi ni itibe kwrere.

⁹ Ye mden kiseté, Ngöbökwé ni mikani ni itibe kwrere, ye ni ñan rabadre denkä jire chi jene jene mentokwäre, aiseté ni brare kákwe ñan meri tuadremetre. Abko kore se, niebare Jesukwe nitre bariseoye.

¹⁰ Yebti Jesu namanina gwi angwane, kukwe ngwianintari nitre bariseokwe, ye arabe nitre ja töitikaka ben nikani ngwentarita ie.

¹¹ Abtä Jesukwe niebare nitre ja töitikaka benye mda:

Ni brare kákwe merire kwe tuadremetre, bti meri mdara jire ben ja mikadre gure kwe, ni ye kákwe ja mikadre ngite merire káne rüere.

¹² Ye erere arato, ni merire kákwe brare káne kwe tuadremetre, bti rabadre brare mdabe, meri ye abko kákwe ja mikadre ngite brare káne rüere. Abko kore se, niebare Jesukwe ietre.

Jesukwe ja di biani ngäbäkre kiakiaye

(Mateo 19.13-15; Lucas 18.15-17)

¹³ Yebti ngäbäkre jänikani mräkäkwé Jesuye abko bti Jesukwe kise mikadre ja di biankäre ietre. Akwa nitre ja töitikaka Jesube namani ñäke ngäbäkre mräkäye.

¹⁴ Ye gani Jesukwe angwane, namani romon nitre ja töitikaka benkrä, kákwe niebare mda ietre:

Ngäbäkre ye tuemetre kite tie. Munkwe ñan ji öta káne, ñobtä ñan angwane nire nire käta ja mike bobre Ngöböbtä ngäbäkre ne kwrerekrere, ni yebti abko Ngöböta gobrane, aiseté munkwe ñan ji öta káne.

¹⁵ Nire nire ñan tä ja mike bobre Ngöböbtä ngäbäkre chi kwrerekrere, ni yebti Ngöbökwé ñan gobrandi amne ñan nünandi kärekäre Ngöböbe kwe abko ti tö niei metre munye. Abko kore se, niebare Jesukwe.

¹⁶ Bti Jesukwe ngäbäkre diani kiseté, kise mikani dokwäbti kwe, bti ja di käräbare kräke kwe Ngöböye.

Ni jändrän bkänkä kabre kákwe blitabare Jesube

(Mateo 19.16-30; Lucas 18.18-30)

¹⁷ Yebti Jesu jatani nikenta mda angwane, ni jatani iti betekä, nükani ngitiekä nguku-dokwäbti temen ngwäreki, kákwe niebare ie:

Dirikä kuin, ¿tikwe dre nuendre abko ütiäre ti rabadre nüne kärekäre Ngöböbe? niebare kwe Jesuye.

¹⁸ Jesukwe niebare mda ie:

Ngöbö aibe kuin, yebti ni mda ñakare jire kuin. ¿Ye ñobtä abko mata ti kuin niere tie ye? niebare Jesukwe ie.

¹⁹ Bti Jesukwe niebareta ie:

Ma tö nünai kärekäre Ngöböbe angwane, Kukwe Biani Ngöbökwé Moiséye, ye garera mae abko erere makwe mika täte abko krörö:

Makwe ñan ni mda kämika.

Ma gure, makwe ñan ja mika gure bati bati ni mda mdabe.

Makwe ñan go.

Makwe ñan blita ngwarbe ni mda mda rüere kitäkäre ngite.

Makwe ñan ni ngöka jändrän diankakäre kán.

Erere arato, ma rün amne ma meye mika ütiäre jae. *Exodo 20.12-16; Deuteronomio 5.16-20*
Ye abko Kukwe Biani Ngöbökwé Moiséye nuendre nie kore, erere makwe mikadre täte jökrä, niebare kwe ie.

²⁰ Ni yekwe niebare mda Jesuye:

Diriká, makwe kukwe nini, ye ti nãmáne bati ngábákrere angwane, ti nikani mike táte jökrá abti ká nũke tie mtare, niebare kwe ie.

²¹ Niara namani ruentari tare kri Jesuye, kákwe mikani ñáräre, bti niebare kwe ie:

Jándrán tá keteti nuendre mae. Jándrán tá makwe ye erere nãn rürũmoine jökrá, bti makwe ngwian ye drá ni bobre bobrebtí angwane, ma rabadi jándrán útiáte kri bkáne kabre ká káinbti sete. Makwe jándrán rürũmoin únán jökrá kore, bti ma jata ti jiebtí. Abko kore se, niebare Jesukwe ie.

²² Yebtä ni ye moto namani ulire Jesu kukwei nuare, ñobtä ñan angwane niara abko jándrán bkáne kabre krübáte, aiseite moto nõtaninte jándrán kwekwe ye jiebtí amne moto namani ulire, ben nikaninta.

²³ Nikaninta angwane, Jesukwe nitre ja tóitíkaka ben mikani ñáräre, bti niebare kwe ietre: Ni jándrán bkánká krikri ye kákwe ja mikadre bobre Ngöböbtá, Ngöbökwe gobrandre bti abko tare krübáte kráke, niebare kwe.

²⁴ Kukwe niebare Jesukwe, yebtä nitre ja tóitíkaka ben namani töbike kri, ñobtä ñan angwane ni jándrán bkánká kri nãmáne nũne metre Ngöbö ngwárekri, nãmáne nútũre. Ye aiseite Jesukwe niebareta mda ietre:

Ti mráká tikwe, ni ye btá Ngöböta gobrane, yebe ketetibe tare krübáte ni jándrán bkánká krikri neme ketetibe.

²⁵ Aku okwá chi, yete ta kameo krikri ye ara rikadre nuäre, akwa nitre jándrán bkánká kri ye kákwe ja mikadre bobre Ngöböbtá, Ngöbökwe gobrandre bti, ye abko bári tare kráke.

²⁶ Kukwe yebtä bári nitre ja tóitíkaka Jesube ñan tõi namani krütare mda, kákwe niebare: ¿Ni jándrán bkáne kri ñan rabadre dianintari nini makwe, se nire abko rabadi dianintari amarebti se? namanintre niere jae kwárikwári.*

²⁷ Abtä Jesukwe mikani ñáräre, bti niebareta kwe ietre:

Mun ká nebtá, ye kráke abko kukwe ye tare, akwa ñakare Ngöbökrá, ñobtä ñan angwane Ngöbö abko kráke jándrán ñakare tare jire chi, niebare Jesukwe.

²⁸ Jötrö ngwarbe Pedrokwe niebare mda ie:

Nunkwe jándrán jökrá mikaninte, bti nunta nãn ma jiebtí, ¿se abko Ngöbökwe dre biandi útiäre nunye? niebare kwe Jesuye:

²⁹ Jesukwe niebare mda ie:

Ti bike kukwe era erere niere munye abko krörö: Nánbtá ti jiebtí amne Ngöbö kukwe kuin kabtä ngábtí, nire nire kákwe ju mikaninte o etbakantre o ngwai mikaninte kwe, erere arato meye o rün o ngábriánká o ká kwe erere mikaninte jökrá kwe nánbtá ti jiebtí, nitre ye abko, ie Ngöbökwe jándrán biandi gre ketarike rike bári mda amne Ngöbökwe mikadi nũne kárekäre jabe arato.

³⁰ Nitre ye tá nũne ká nebtá angwane abko ie Ngöbökwe jándrán biandi gre ketarike rike bári mda abko krörö: Rabadi ju bkáne bári kabre mda. Erere arato, etba btá ngwai rabadi bári mda kwe. Arato meye, ngábriánká rabadi kwati kwe. Arato ká sribikrá biandi bári kabre kwe ie. Arato ja tare níkadí kwe tikrá, akwa ká jatadí mrá angwane, nũnandí kárekäre Ngöböbe ká káinbti kwe.

³¹ Akwa ni kwati tuen bári útiáte útiáte ká ne ngwane, ye abko rabadi útiáte ñakare Ngöbö ngwárekri; akwa ni kwati tuen ngwarbe, útiáte ñakare ká ne ngwane, ye abko rabadi bári útiáte Ngöbö ngwárekri sete. Abko kore se, niebare Jesukwe nitre ja tóitíkaka benye.

*Jesu müre ketadi abko niebare bãmákäre kwe
(Mateo 20.17-19; Lucas 18.31-34)*

³² Abti Jesu nãmáne nãn juta Jerusalén kukwäre angwane, nikani bá mente nitre ja tóitíkaka ben káne. Angwane nitre ja tóitíkaka ben ñan tõi namani krütare Jesubtä angwane, ni mda mda nãmáne nãn jiebtí kóre, abkobtä ká jürá namani. Te Jesukwe nitre ja tóitíkaka ben ni jätábtí nibu kárábareta mda kaibe mento, bti dre dre rakanidiká btá abko nikani niere jökrá ietre krörö:

³³ Mtare nita nãn Jerusalén kukwäre. Ni nãn nebe Jerusalén ye kánti ti Ni Ká Nebtä Ngobo ne kitadi ngise nitre blitaka Ngöböbe ni mda mda diäre dánkienye amne Kukwe Biani Ngöbökwe Moiséye dirikátre yeye. Niaratre ye abko kákwe ti kitadi ngise müre ketadre amne, nitre romanobó ñakare israelitare abko ie ti kitadi ngise.

³⁴ Niaratre kákwe ti mikadi yakrá kri jae, káli kitadi tibtä kwetre amne ti kwata metadi krübáte kwetre. Yebti ti müre ketadi kwetre, akwa köbömákäre angwane, ti rúkadita nire. Abko kore se, niebare Jesukwe nitre ja tóitíkaka benye.

* **10:26** Jesu náire abko ni ngwian bkáne kri abko nãmáne ngwian bkáne, ñobtä ñan angwane Ngöbö nãmáne ja di bien ietre, aiseite bári Ngöbö kukwe muko, aiseite rabadre dianintari káne, nitre israelita nãmáne nútũre, aiseite nitre ja tóitíkaka Jesube abko ñan tõi namani krütare Jesu kukweibtä.

*Santiago btä Juan tö namani rabai gobrane siba Jesube**(Mateo 20.20-28)*

³⁵ Yehti Zebedeo ngäbriänkä nibu Santiago btä Juan namani bike kri, käkwe krötabare Jesu ken, bti niebare kwetre ie:

Dirikä, nun tö jändrän ribei mae abko erere makwe nuendre, ie nun tö nibi abko nun ki kärere mae, niebare kwetre Jesuye.

³⁶ Jesukwe niebare mda ietre:

¿Dre nuendre tikwe munkrä, ie mun tö nibi amarebti yere? niebare kwe ietre.

³⁷ Niaratrekwe niebare mda Jesuye:

Ma rabadi gobrane kri ja di jenbti ni jökrä ngwäkri, ye ngwane makwe nun mika bäri ütiäte, käkwe nun mika tākānintbe iti ja küde ruenkri amne iti ja küde ngeberekri abko nun tö ribei mae, niebare kwetre ie.

³⁸ Abtä Jesukwe niebare mda Zebedeo ngobo nibu yeye:

¡Jo! Munta kukwe tare krübäte ribere tie gare ñakare jire chi munye. ¿Tikwe ja tare nikadi kri krübäte, ye kwrere munta biare ja tare nike siba ya? niebare kwe ietre.

³⁹ ¡Jänri! niebare kwetre Jesuye.

Jesukwe niebare mda ietre:

Munkwe ja tare nikadi kri ti kwrere arato,

⁴⁰ akwa nire rabadre tākānintbe ti küde ruenkri amne nire rabadre ti küde ngeberekri, ye abko ñan tä ti kisete, akwa tä Ngöbö kisete. Ye aisete nire nire kräke kä ye tä ükaninte ti Rünkwe abko erere ie biandi kwe, aisete ti ñan raba bien munye. Abko kore se, niebare Jesukwe Santiagoye btä Juanye.

⁴¹ Jesu nämane blite kore, ye ni mda mda ja töitikaka Jesube käkwe kukwe ye gani angwane, moto namani romon Santiagokrä btä Juankrä.

⁴² Abtä Jesukwe käräbare, bti nikani niere ietre:

Nitre ñakare israelitare käta gobrane angwane, tätre kukwe miketbe tare ni mda mda mikakäre ja ngoto täni. Erere arato, nitre ütiäte krikri ñakare israelitare abko ni mda mdakwe mikadre ütiäte jae, abkokäre tätre bike krikri, ye abko gare kuin munye.

⁴³ Akwa mun ja töitikaka tibe, ye ngätäite abko ñan rabadre bare jire chi kore, aisete mun ngätäite abko kukwe rabadre bä jene abko krörö: Nire nire tö rabai bäri ütiäte kri mun ngätäite ye abko käkwe sribidre ni bobre kwrere ni mda mdakrä

⁴⁴ amne, nire nire mun ngätäite tö rabai bäri käne jändrän jökräbtä, ni ye abko rabadre ni klobre kwrere ni mda mdakrä.

⁴⁵ Munkwe nünandre kore, ñobtä ñan angwane ti, Ni Kä Nebtä Ngobo ñan jatani ni mda mda mikakäre sribire jakrä, akwa ti jatani sribikäre ni mda mdakrä amne ti jatani ja mike müre ketadre ni kwati kökatarikäre Ngöbökrä. Abko kore se, niebare Jesukwe ietre.

*Ni okwä kä drümente abko Jesukwe mikaninta kuinta**(Mateo 20.29-34; Lucas 18.35-43)*

⁴⁶ Yehti Jesu nükani juta Jericöte nitre ja töitikaka benbe, nikani ta angwane, ni mda mda nikani kwati jiebti arato nitre ja töitikaka benbe. Niara abko nämane näin käne angwane, ni nämane iti abko kädian nämane Bartimeo (ne abko Timeo ngobo nieta) abko okwä kä drümente, aisete nämane tākānintbe jibtä ngwian kärere jakrä.

⁴⁷ Jesu Nazarebo jatani ta gani kwe angwane, namani ngrente ja dibti krörö jite yete Jesuye:

¡Jesu, jrei David tukwe mräkä, ti ngwen ruentari tare jae! namani niere jite.

⁴⁸ Ni kwati namani kada ketamna ie akwa, niara namani ngwänenkä bäri krikri mda, kä namani niere:

¡Jrei David tukwe mräkä, ti ngwen ruentari tare jae! namani niere bäri mda kore.

⁴⁹ Abtä Jesu namani nünaninkä käkwe niebare:

Ni ye kärere munkwe, niebare kwe.

Erere ni mdakwe niebare ni okwä kä ikote yeye:

Jesuta ma kärere, aisete kä ngwen nuäre jabtä. Näin krö. Brän jötrö kanti, niebare kwetre ie.

⁵⁰ Ye btäräbe, ni okwä kä drümente ye käkwe ja tākāninte kainta, tö namani näin jötrö, aisete dän nga ötati kitani temen kwe, bti nikani nebe Jesu ken.

⁵¹ Angwane Jesukwe niebare ie:

Tikwe dre nuendre makrä, ie ma tö nibi, niebare kwe ie.

Ni ye käkwe niebare mda Jesuye:

Ti Dänkien, kä rabadre tuen tie, ie ti tö nibi, niebare kwe.

⁵² Jesukwe niebare mda ie:

Ma nibi tödeke kwatibe Ngöböbti, ye köböire ma okwä nibirate kuin, aiseite nänta, niebare Jesukwe ie.

Ye btäräbe kä namani tuen kuin jökrä ie, bti nikani siba Jesube.

11

Jesu nikani nebe Jerusalén

(Mateo 21.1-11; Lucas 19.28-40; Juan 12.12-19)

¹ Bti Jesu btä nitre ja töitikaka ben nükানা ja ken Jerusalén angwane, ni namani juta Betania amne juta Betfagé kánti Ngitio Olibobtä. Ye kánti, Jesukwe nitre ja töitikaka ben juani nibu,

² kákwe niebare ietre:

Juta tuen kánime ni ngware ta. Se kánti mun nän. Mun raba yete angwane, buro ngábäli näkwita ngämi kwan mäkáninte munye, ye tikate munkwe, bti mun jata ngwena tie.

³ Akwa ¿Nöbtä munta tikete? nie munye angwane, munkwe nie krörö ietre: Ni Dänkien tö nibi ie, aiseite nun bike niken ngwena, akwa gwängwarbe juandita kwe munkrä, munkwe nie kore, niebare Jesukwe ietre.

⁴ Erere nikanintre angwane, buro nämáne mäkáninte jukwebtä jite, btä namanintre abko tikanintre kwetre.

⁵ Abtä ni ruäre nämáne yete kákwe ñäkábare krörö ietre:

¿Munta dre nuene yete amarebti yere? ¿Nirekwe buro ye tikatemna munye, amarebti munta tikete yere? niebare kwetre ietre.

⁶ Jesukwe ño niemnabare ietre, erere niebare kwetre, aiseite buro tuanimetre ngwiandre ietre.

⁷ Nikanintre buro ngwena, nükani nebe Jesu kánti angwane, dän jakwe mikani ötati buro ngábäli ye tröbti kwetre ja tákräre Jesuye, bti Jesu nakwani buro yehti, bti nikani mda Jerusalén.

⁸ Ye ngwane ni kwati namani Jesu ngibiare jite, kákwe dän jakwe metanintre ji ngrabare temen dikakakrä Jesuye. Ni ruäre abko kákwe kriküde tikaninkä Jerusalén bäre temen abko namani mike ji ngrabare temen dikakakrä Jesuye kakäre ngäbti jrei kwrere.

⁹ Angwane nitre nämáne näin ruäre Jesu känenkri amne ruäre abko nämáne näin Jesu jiehti, ye abko namani ngrente ja dibti, kä namani niere krörö:

¡Hosana! ¡Ari Ngöbö káikitekä gwaire jökrä!

Ni ne kite ni Dänkien Ngöbö káhti.

Ma ye aibe raba mikani ütiäte.

¹⁰ Ni mräkä jrei David nämáne gobrane kira, ye kwrere Ngöböke ni ne mikadi gobrane ni ngätäite nete.

¡Hosana! ¡Ari Ngöbö kri kä káinbti káikitekä bäri krikri!

Salmos 118.25-26

abko namani ñäke kore Jesu ngäbti.

¹¹ Jesu namani Jerusalén angwane, nikani ju blitakrä Ngöböbe kánti angwane, mikani ñäräre kuin jökrä bäre ta kwe, bti kä jatanina dere, aiseite nikaninta nitre ja töitikaka ni jätäbti nibu yebe nebebe juta Betania kibiakäre yete.

Jesukwe ñäkábare higokrie

(Mateo 21.18-19)

¹² Abti jändrinane Jesu nämáne Betania, nikaninta Jerusalén angwane, mrö namani ie,

¹³ nikrabare kwe angwane, higokrie abko kä namani tuen mobe ie se kwrere. Higokrie ye abko ngwä nämánena, namani nútüre, aiseite nikani mike ñäräre btä. Namani kánti angwane, higokrie ye ngwä rabadre abko käi ngämi, aiseite ngwä ñakare btä angwane, kä aibe kabre btä.

¹⁴ Abtä Jesukwe ñäkábare tare higokrie yeye:

Ma ñan ngwä raba jire mda kwetadre ni mdaye, niebare kwe higokrie yeye nitre ja töitikaka ben okwäbti.

Bti nikaninta janknu ji ngrabare Jerusalén.

Jesukwe nitre juantari ju blitakrä Ngöböbe kánti

(Mateo 21.12-17; Lucas 19.45-48; Juan 2.13-22)

¹⁵ Nükani Jerusalén angwane, nikanintre nebe ju blitakrä Ngöböbe kánti. Ju bäre temen nitre nämáne jändrän rürümoine* yete amne ruäre abko nämáne jändrän kökö abko Jesukwe juantari jökrä mento. Erere arato, nitre nämáne ngwian kwite ni mda mdakrä abko kán

* **11:15 jändrän rürümoine.** Nitre israelita nünanka ñakare juta Jerusalén nükani Jerusalén jändrän biankäre Ngöböbe angwane, ñan nükani obeja, ütú amne nbi kwekwe ngwena kukwakrä, akwa nämáne kökö Jerusalén yete ju blitakrä Ngöböbe kánti.

Jesukwe mesa kwitaninkä temen se kwrere amne ütö rürümoinkä kwe ja täkrä nämane, ye abko Jesukwe kwitaninkä jökrä temen se kwrere arato.

¹⁶ Bti nire nire tö namani jändrän ngwiain ju blitakrä Ngöböbe kanti, ye abko Jesu ñan namani tuemetre nuke jire chi kä ye kanti, kä ngibiakäre deme Ngöbökrä.

¹⁷ Yebti Jesu nikani dirire krörö mda nitre ju blitakrä Ngöböbe dänkientre rüere, käkwe niebare:

Ngöbö Kukwei tä tikani krörö:

Ju tikwe ne abra tä blitakrä tibe nitre nünanka kä jökräbti kräke, *Isaiás 56.7*
nieta Ngöbökwé ja Kukweibtä. Akwa mun abko tä ju blitakrä Ngöböbe ne mike nitre gokä jue kwrere. Abko kore se, niebare Jesukwe.

¹⁸ Jesu namani dirire bä jene abko namani tuen kuin ni jökräye, aisete ñan töi namani krütäre Jesu kukweibtä. Ye mden kisete Jesu jürä namani nitre blitaka Ngöböbe ni mda mda diäre dänkientre yebtä amne Kukwe Biani Ngöbökwé Moiséye dirikätre, yebtä Jesu jürä namani arato, aisete namani ji känene jae Jesu kämikäre.

¹⁹ Yebti kä jatani dere angwane, Jesu btä nitre ja töitikaka ben nikaninta juta Jerusalén bare mentokwäre.

Nikwe tödekadre kwatibe Ngöböbti abko Jesukwe diribare higo kriebtä

(Mateo 21.20-22)

²⁰ Yebti jändrinane Jesu nikaninta dekä angwane, higokrie ngwä ñakare, ye namanina nõtare jökrä nukebe dobote temen.

²¹ Higokrie, ie Jesukwe ñäkäbare nitre ja töitikaka ben okwäbti ye nukaninta töreta Pedroye, käkwe niebare Jesuye:

¡Jo! Dirikä, higokrie ie makwe ñäkäba jändrin, ye nibira nõtare jökrä nukebe dobote temen tuen, niebare kwe ie.

²² Abtä Jesukwe niebare mda ietre:

Ngöbö di tarä jändrän jire jökrä nuenkrä, yebti munkwe tödeka kwatibe, ye ngwane mun rabadre kukwe nuene jire jökrä ti kwrere.

²³ Ti bike kukwe era erere niere munye abko krörö: Nirekwe niedre ngitio nokoye: Ja denkä mento yete. Ma rika mrente, niedre kwe ngitio nokoye, tödekare kwärä Ngöböbti amne Ngöbö di tarä sribi ye nuendre, ye munkwe mikadre ngwarbe ñakare jae angwane, mun rabadre ñäke kore ngitioye angwane, ye erere rabadre bare munye.

²⁴ Ne aisete, dre dre munkwe kärädre Ngöböye, erere biandi kwe munye, bti munkwe tödekadre kwatibe kore, ne ngwane Ngöbökwé biandi munye.

²⁵ Mdakäre abko, mun rika blite Ngöböbe angwane, ni mdakwe kukwe nuenbare blo munbtä, ye töre käre munye btä mun moto romon kräke, ye ngwane kukwe ye käikwitaka jabt munkwe angwane, mun Rün kä käinbti käkwe mun ngite niara rüere ye diandrekrä jire jökrä munbtä.

²⁶ [Akwa ni mdakwe kukwe nuenbare blo munbtä, ye töre käre munye, btä mun moto romon kräke, ye munkwe ñan käikwitadrekrä jabt angwane, mun Rün kä käinbti käkwe mun ngite niara rüere ye ñan diandrekrä munbtä arato. Abko kore se, niebare Jesukwe nitre ja töitikaka benye.]†

Nire diebti Jesu nämane sribire abko ngwianintari ie

(Mateo 21.23-27; Lucas 20.1-8)

²⁷ Yebti Jesu nikani janknu nebe Jerusalén. Nikani dikekä ju blitakrä Ngöböbe bare temen angwane, ni blitaka Ngöböbe ni mda mda diäre dänkientre btä Kukwe Biani Ngöbökwé Moiséye dirikätre, arato nitre unbre ji dokwäte käkwe krötabare Jesu ken,

²⁸ käkwe niebare ie:

¿Nirekwe ma mikani sribi nuene kore amne nire diebti mata kukwe nuene kore nete? niebare kwetre Jesuye.

²⁹⁻³⁰ Angwane Jesukwe niebare mda ietre:

Ti bike kukwe ngwentari kwati arato munye. ¿Nirekwe Juan Bautista juani ni ngökö ñöte? ¿Ngöbökwé juani ya o ni kä nebtäkwe mikani sribire ya? Ye niere tie munkwe. Nirekwe juani, ye munkwe niedi tie ne ngwane, nire diebti tita sribi ne nuene abko tikwe niedi munye arato, niebare kwe ietre.

³¹ Yebtä abko nikani blite jabe kwärikwäri, kä namani niere krörö: Ngöbökwé juani nikwe niedre ie angwane, niarakwe niedre krörö mda: Ngöbökwé juani munta niere, ¿se ñöbtä abko munkwe ñan kukwei mikani era jae? niedre kwe nie.

³² Akwa, ni kä nebtäkwe mikani, ni ñan rabadre niere jire chi ie, aisete nikwe ño niedre ie ruen, namanintre niere kore jae kwärikwäri.

† 11:26 Kukweta tikani corcheta ngätäite abko ñan tä tikani manuscrito bäri kuinkuin btä.

Niaratre kákwe blitabare kore, ñobtä ñan angwane Juan abko ni Ngöbö kukwei niekä era metre ni jökrä nämane mike era. Mden kiseti ni mdakwe juani niedre kwetre angwane, ni jökrä rabadre ja rüere ben abko jürä namani btä, aisete ño niedre kwetre ñan namani nüke gare ietre.

³³ Abtä niebare krörö kwetre Jesuye:

Nirekwe Juan juani, ye gare ñakare nunye, niebare kwetre.

Angwane Jesukwe niebare mda ietre:

Kore ne ngwane, nirekwe ja di biani tie sribi ne nuenkäre abko tikwe ñan niedre munye arato. Abko kore se, niebare kwe ietre.

12

Nitre ji dokwäte, btä Jesukwe kukwe bä mikani

(Mateo 21.33-46; Lucas 20.9-19)

¹ Yebti Jesu nikani kukwe bä mike krörö mda ietre: Bati ni nämane iti, kákwe uba nurai nökani, bti ki mikani kwe amne kä ükaninte biare uba ñöi ngwäre kwe. Ju mikani nura ngbiabtikä kräke kwe, bti biani kwe ni mda mdaye sribikrä. Kä biani sribikrä kwe abko ütiäre uba döi biandreta ruäre ie. Yebti nikani kä mdabti.

² Abti uba ngwä ötare abko käi nükan angwane, sribikä kákwe uba biandreta ruäre kä bkänkäye ye abko kä bkänkä kákwe sribikä mdera jire juani iti tuenta jakrä.

³ Akwa ni juani kä bkänkäkwe ye nikani nebe angwane, sribikätre ubabtä ye ie neketaninte, nikani mete ja ñäte kwäräkwärä se kwrere, bti juanintarita kwetre. Nin uba döi biani jire chi kwetre kä ütiäre, bti juanintarita kise tökare kwetre.

⁴ Yebti kä bkänkä kákwe sribikä mdera jire juani tuenta ruäre jakrä akwa, ni ye neketaninte sribikäye, metani jökrä dokwäkäte kwetre, bti ñäkäbare diän kwetre ie, bti nikaninta ngwarbe arato.

⁵ Yebti abko, kä bkänkä kákwe sribikä mdera jire juani abko müre ketani sribikätrekwe ja ñäte arato. Abtä niarakwe sribikä mda juani kwati mda uba döi tuen jae kä ütiäre, akwa neketaninte sribikätre, nikani kwata mete kwäräkwärä se kwrere, ruäre abko müre ketani kwetre, akwa nin uba döi biani jire kwetre ietre.

⁶ Abtä mrä angwane, ni kä bkänkä, ie ni namanina itibe juandre uba döi tuen jakrä. Ye abko odei itibe tare kri kwe aibe namani ie. Namani nütüre: Ti odei ne aibe abko mikadi ütiäte sribikätrekwe, aisete ti bike juen, namani nütüre. Erere juani kwe.

⁷ Akwa kä bkänkä odei nikani ngitiekä rün käite angwane, sribikätre ye kákwe niebare jae kwärükwäri:

Ni se abko rabadi jändrän rünkwe bkäne jökrä, aisete ari kämike amne ni rabadi kä ne bkäne jökrä, niebare kwetre.

⁸ Ye erere bkänä, ni kä bkänkä odei itibe ye neketaninte sribikätre, müre ketani kwetre, bti ngwäkä kitaninkä kä ye bäre mento kwetre. Ne ngöra.

⁹ ¿Ne ngwane, uba bkänkä kákwe dre nuendre sribikätre käme yebtä raba ruen munye? Niara rikadre, kákwe sribikätre ye kämikadre jökrä, bti uba grä ye biandre ni mda mdaye kwe sribikrä. Abko kore se, niebare Jesukwe.

¹⁰⁻¹¹ Bti Jesukwe ja bä mikani jä kwrere amne nitre dirikä krikri abko bä mikani ju mikaka kwrere, kákwe niebare ietre:

Ngöbö Kukwei käta niere krörö gare munye, raba ruen tie:

Jä ütiäte kri ju mikakrä metre abko nitre ju mikaka kákwe kitaninkä, akwa jä ye abko ni

Dänkin kákwe mikani bäri ütiäte ju mikakrä metre.

Ye abko namani tuen bäri nuäre nie,

abko nieta kore Ngöbö Kukweibtä, niebare Jesukwe ietre.

Salmos 118.22-23

¹² Jesukwe kukwe bä mikani, ye abko nitre dänkin krikri btä dirikätre krikri yebtä matani tare, ñobtä ñan angwane Jesukwe niaratre bä mikani sribikätre käme ye kwrere abko gani kwetre jabtä. Abtä tö namani Jesu kitai ngite, akwa ni mda mda jürä namani btä, aisete kä mikaninkä Jesubtä yete kwetre, nikaninta mentokwäre.

Ja ütiä biandre gobranye ya, ñakare ya

(Mateo 22.15-22; Lucas 20.20-26)

¹³ Abti Jesukwe ñäkäre blo emperador César rüere abtä kitadre ngise, ye abko nitre dirikä krikri btä nitre dänkin krikri tö namani, abkokäre nitre bariseo btä nitre reketaka jrei Herodekri juani kwetre ja gaen Jesube.

¹⁴ Erere nikanintre, namani Jesu kánti angwane, niebare kwetre ie:

Dirikä, mata kukwe era erere niere, ye gare kuin nunye. Ni mda mda tä ño niere ma rüere diribtä kore, ye abko ñakare ütiäte makrä, ñobtä ñan angwane ñan mata blite ni mda mda moto mikakäre nuäre, akwa ji Ngöbökwäre abko dirita era metre makwe, ye garera nie.

¿Akwa emperador romanobo César abko ie nunkwe ja ütiä biandre ye abko dbe ya, ñakare ya niere nunye? niebare kwetre Jesuye.

¹⁵ Akwa namanintre bike moto kuin abko ganina btäre Jesukwe. Abtä niebare mda kwe ietre:

¿Se ñobtä tikwe ja dokwä mikadre kö okwäte au, abkokäre mun kite kukwe ngwentari kore tie ye? Ngwianta munkwe, ye ngwen kunti tuadre tie, niebare Jesukwe ietre.

¹⁶ Ye erere bkänä, ngwian denario biani kwetre Jesuye angwane, Jesukwe niebare mda ietre:

¿Nire bä amne nire käi tä tikani ngwian nebtä? niebare kwe.

Niaratrekwe niebare mda:

Emperador César bä amne käi tä btä, niebare kore kwetre Jesuye.

¹⁷ Abtä Jesukwe niebare mda ietre:

Jändrän emperadorekwe erere munkwe bian emperadoreye amne jändrän Ngöbökrä erere munkwe bian Ngöböye. Abko kore se, niebare kwe.

Ye kwrere Jesukwe ja kitani ngite ñakare Ngöbö rüere amne César rüere, akwa kukwe niebare kwe abko bäri nuäre btä bäri metre aiseté, nitre bariseo btä nitre reketaka Herodekri ñan töi namani krütäre Jesubtä.

Ni krütani rükadreta nire ya abko ngwianintari Jesuye

(Mateo 22.23-33; Lucas 20.27-40)

¹⁸ Yebti nitre saduseo nikani ruäre ja tuakäre Jesube. Nitre saduseo ye abko ni krütanikrütani mikadreta nire Ngöbökwé abko ñan nämane mike era, aiseté jatani kukwe ngwentari Jesuye, kákwe niebare ie:

¹⁹ Dirikä, Ngöbökwé tikamna krörö täräbtä nunkrä Moiséye: Ni iti tädre gure, akwa ngäbäkre ñakare kwetre amne ni ye krütadre angwane, merire rabadre kaibe. Meri ye abko yäräkwe diandre jae mda. Yebti ngäbäkre rabadre kwetre angwane, ngäbäkre ye abko rabadre niara etba krütani ngobo kwrere abko tikani täräbtä Moisékwé nunkrä.

²⁰ Ne aiseté bati nitre ja etbarebe nämane ni kükü. Nitre ye etba mubai kákwe ja mikani gure, akwa ngäbäkre ngämi nebe kwetre angwane, ni ye krütani.

²¹ Merire namani ie abko namani yärä mda yebe, akwa nin ngämi ngäbäkrei ngibiare angwane, brare krütani kän arato. Meri ye namaninta kaibe bobukäre. Namani yärä mdara jire ben, akwa nin ngämi ngäbäkrei ngibiare angwane, krütani kän arato.

²² Ye kwrere nikani nakenkä janknu ja täritäri. Abti nitre ni kükü ye krütani jökrä meri ye kiseté, akwa nin ngäbäkrei ngibiabare jire iti kwe. Abti mrä meri ye krütani abko kukwe nakaninkä kore nieta.

²³ Akwa ni krütani rükadreta nire mata niere, aiseté ni brare ni kükü ben meri ye namani jökrä, abti niaratre ni kükü ye rükadreta nire jökrä angwane, meri ye rabadi nire nän mukore abko niere nunye, niebare kore nitre saduseokwe Jesuye.

²⁴ Jesukwe niebare mda ietre:

¿Ngöbö Kukwei gare ñakare munye amne Ngöbö di kri gare ñakare munye arato, aiseté munta töbiké ngwarbe blo kore ñan ñan?

²⁵ Tita niere kore, ñobtä ñan angwane ni krütanikrütani rükadita nire angwane, ni merire, brare kákwe ñan ja mikadre gure, ñobtä ñan angwane niaratre abko rabadi angele kä käinbti kwrere.

²⁶ Mdakäre abko, ni krütanikrütani rükadreta nire abko btä ti tö nibi kukwe nie munye. Kira, kri chi namani jutra ngitiekä, te Ngöbökwé blitabare Moisébe: Ti abko Ngöbö Abrahamkwe, Isaakwe amne Jacobokwe, niebare kwe Moiséye abko btä mun tärä ñäke.

²⁷ Ye abko, Abraham, Isaac amne Jacob krütanina abti Ngöbökwé niebare kore Moiséye. Ngöbö abko ñan ni ngwäkäre Ngöböi akwa Ngöbö abko ni nire Ngöböi gare nie. Ye aiseté Abraham, Isaac amne Jacob tä nüne janknu Ngöbö ngwäreki abko gare nie. Abko kore se, niebare Jesukwe nitre saduseoye.

Kukwe mden bäri ütiäte mikadre täte

(Mateo 22.34-40)

²⁸ Nitre saduseokwe kukwe ngwianintari Jesuye abko, btä Jesu nämane blite angwane, Kukwe Biani Ngöbökwé Moiséye dirikä nukani kukwe nuen. Jesukwe kukwe kani ngäbti kuin, Kukwe Biani Ngöbökwé Moiséye dirikä nämane iti ye okwäbti. Abtä niebare krörö kwe Jesuye:

¿Kukwe biani keta kabre Ngöbökwé Moiséye nuendre nie, ye mden abko bäri ütiäte abko nikwe mikadre täte bäri? niebare kwe Jesuye.

²⁹ Jesukwe niebare mda ie:

Kukwe bari ütiäte mikadre täte bari niebare Ngöbökwe Moiséye abko nieta krörö: Mun israelita olo ketete ti kukweye munkwe. Ni Dänkien Ngöbö abko itibe. Yebti ngöbö ñakare jire mda.

³⁰ Amne ni Dänkien Ngöbö aibe tare ja üai ngöi jökrä, ja töi ngöi jökrä amne ja di ngö jökrä.

³¹ Kukwe ketebu bari ütiäte mikadre täte abko krörö: Mata ja tarere au, ye kwrere makwe ni mda mda tare arato. Ye abko, Kukwe Biani Ngöbökwe Moiséye nuendre nie bari ütiäte nere. Nebti kukwe mda mda tära nuendre, akwa ñakare bari ütiäte, niebare Jesukwe ie.

³² Abtä Kukwe Biani Ngöbökwe Moiséye dirikä käkwe niebare mda Jesuye:

Dirikä, mata kukwe era erere niere metre. Erere makwe kukwe nini, ye abra era bkänä. Ngöbö abko itibe. Nebti ngöbö ñakare jire mda

³³ amne niara taredre kri. Arato niarabe taredre käre ja moto kuinbti. Arato niarabe tädre käre ni töibtä köbö kwatirekwatire. Erere arato, nikwe sribidre ja di ngöi jökrä niarakrä. Mdakäre abko, nita ja tarere ño au, ye kwrere nikwe ni mda mda taredre, nini makwe, ye abra era bkänä, aiseté Ngöbö ngwäreki ye bari ütiäte jändrän kämikata kukwakrä Ngöböye ye ngwä. Erere arato, Ngöbö ngwäreki ye bari ütiäte jändrän jökrä bianta Ngöböye ye ngwä.

³⁴ Kukwe Biani Ngöbökwe Moiséye dirikä ye käkwe Jesu kukwe kani ngäbti kuin dikaro namani tuen Jesuye. Abtä niebare mda kwe ie:

Ngöbö kebera nuke gobrane mabtä, nibi tuen tie, niebare Jesukwe ie.

Yebti nitre dirikä krikri, ie nin ja nukani töre mda kukwe ngwentari mda ja gakrä Jesuye.

¿Nirekri Ni Dianinkä Ngöbökwe däredre?

(Mateo 22.41-46; Lucas 20.41-44)

³⁵ Yebti ju blitakrä Ngöböbe ye bäre temen Jesu nämane dirire angwane, niebare kwe ni kwatiye:

Ni Dianinkä Ngöbökwe abko däredre jrei David tukwekri nieta abko Kukwe Biani Ngöbökwe Moiséye dirikätre kätä niere. Ye ñobtä abko munta niere kore abko ti tö ngwiaintari.

³⁶ ¿Ye ñobtä abko Ngöbö Üai Deme köböire Davikwe “ti Dänkien” niebare Ni Dianinkä Ngöbökwe yebtä? Ni ngätäite nete ni ñakare jire iti kätä “ti dänkien” niere ngäbäkre kweye, akwa David abko käkwe niebare krörö:

Ti Dänkien Ngöbö käkwe nieba ti Dänkienye:

Kä bari ütiäte kri ti küde ruenkri, ne kanti jakwe täke nete.

Ye kanti ma raba abti tikwe ma rüe mikadi jökrä ma ngoto täni,

Salomos 110.1

niebare Davikwe Ni Dianinkä Ngöbökwe yebtä.

³⁷ David ara jire käkwe ja Dänkien niebare Ni Dianinkä Ngöbökwebtä. ¿Se ñobtä abko Ni Dianinkä Ngöbökwe abko jatadre Davikri nieta munkwe se, ñobtä ñan angwane nita “Dänkien” niere ñakare jire ni mräkä bari mrä krä yeye? niebare Jesukwe.

Jesukwe diribare kore, ye ni nämane kwati olote namani ngitie nuäre, aiseté kä namani nuäre btä Jesu kukwei nuare.

Jesukwe ni mikani mokre Kukwe Biani Ngöbökwe Moiséye dirikätre ngäniene

(Mateo 23.1-36; Lucas 11.37-54; 20.45-47)

³⁸ Jesu nämane dirire angwane niebare kwe:

Kukwe Biani Ngöbökwe Moiséye dirikätre, ye ngäniene munkwe ja ngibia kuin, ñobtä ñan angwane niaratre tä dän nga ütiäte kri kite jabtä, bti ni jökrä käkwe köbö ngwiandretari käne ietre kä jändrän rürümoinkra ye kántita temen, ie töta nebe.

³⁹ Erere arato, ja täkrä ni ütiäte ütiäte kräke sinagoga, kanti töta nebe rabai täkänintbe amne ja täkrä ni ütiäte ütiäte kräke, kanti tätre nebe täkänintbe. Erere arato, niaratre nübaita bietabtä angwane, ja täkrä ni ütiäte ütiäte kräke, kanti tö täkäi temen.

⁴⁰ Erere arato, meri kän brare krütani abko kän tätre ju denkä, abti tätre bike kuin, kätä blite raire Ngöböbe, akwa yebtä Ngöbökwe mikadi ja tare nike krübäte, aiseté munkwe ja ngibia kuin Kukwe Biani Ngöbökwe Moiséye dirikätre ngäniene. Abko kore se, niebare Jesukwe ietre.

Meri bobre käkwe sentabo ngörä kubu biani Ngöbökrä

(Lucas 21.1-4)

⁴¹ Yebti ju blitakrä Ngöböbe bäre temen jändrän dätebare ngwian ükärökrä nämane mikani ngwian biandre Ngöbökrä ngwäre, ye kanti Jesu nikani, namani täkänintbe. Angwane ni kwati namani nuke ngwian kite jändrän ngwian ükärökräte. Erere arato, ni ngwian bkänkä kabrekabre namani nuke kwati, namani ngwian kite kabre yete okwäbti.

⁴² Te batibe meri bobre kän brare krütani abko jatani, käkwe ngwian sentabo kwrere kitani kubube arato kajate Ngöbökrä Jesu okwäbti.

⁴³ Angwane Jesukwe nitre ja tōitikaka ben kārābare, bti niebare kwe mda ietre:

Ti bike kukwe era erere niere munye abko krōrō: Meri bobre kār brare krūtani se kākwe ngwian bini bāri kabre ni ngwian bkāne krikri kākwe ngwian kiti kajate Ngōbōkrā se ngwā,

⁴⁴ űōbtā űān angwane niaratre kāta ngwian namaninte ie aibe bien, akwa meri bobre ye abko kākwe ngwian ngōrā nūnankrā kwe erere bini jōkrā, aisetē niarakwe ngwian bini bāri kabre. Abko kore se, niebare Jesukwe ietre.

13

*Ju blitakrā Ngōbōbe juandi ngwarbe, niebare Jesukwe
(Mateo 24.1-2; Lucas 21.5-6)*

¹ Jesu nāmane ju blitakrā Ngōbōbe kāntita, jatani nikenta angwane ni iti ja tōitikaka ben kākwe niebare ie:

jō! Dirikā, ju krikri be bā nuāre nuāre janknu. Jā krikri ketani jabti jabti tuen, niebare kwe Jesuye.

² Jesukwe niebare mda ie:

Ju kuinquin mun okwā nibi btā, ye abko kōbōitira jire ju se juandi ngwarbe jire jōkrā, aisetē jā ketani jabti jabti se juandi jōkrā temen, niebare Jesukwe nitre ja tōitikaka benye.

*Dre rakadikā kā mrā kānenkri
(Mateo 24.3-28; Lucas 21.7-24; 17.22-24)*

³ Yehti Jesu nikani ju blitakrā Ngōbōbe btā nakri, kānti namani tākānintbe Ngitio Olibo bti kāin, okwā namani ju blitakrā Ngōbōbe kukwāre angwane, Pedro, Santiago, Juan btā Andrés kākwe niebare kaibe ie:

⁴ Ju blitakrā Ngōbōbe juandi ngwarbe nini makwe, *ye* abko rakadikā űōngwane nun tō gai? Arato kukwe ye rakadrekā űōngwane amne bā mikadi űō nunye abko makwe niedre nunye, ie nun tō nibi, niebare kwetre Jesuye.

⁵ Abtā Jesukwe niebare mda ietre:

Bāri kāne abko, nitre ni ngōkaka ye ngāniene munkwe ja ngibia kuin,

⁶ űōbtā űān angwane ni jatadi kwati ti kābti kākwe niedi krōrō: Ti abko Ni Dianinkā Ngōbōkwe ara tā nete, niedi kwetre, ye kākwe ni kwati ngōkadi.

⁷ Mdakāre abko, munkwe kukwe krōrō gadi: nitre tādi rūre jabe kwārikwāri nete sete abko gadi munkwe angwane mun űān rekwetaka, űōbtā űān angwane kukwe ye rakadikā kore abko erere rabadi nakenkā. Akwa ye ngwane kā mrā ngāmi nūke abko raba gare munye,

⁸ űōbtā űān angwane juta kwatirekwatire rabadi rūre jabe kwārikwāri amne nitre nūnanka kā ketareketare te rabadi rūre jabe kwārikwāri. Erere arato, dobo rabadi nakaenkā kā ketareketare temen kwārākwarā amne ni kwati rabadi mrō nike krūbate arato. Akwa ye ngwane abko ja tare nika jatadi krire kena kā nebtā, niebare Jesukwe.

⁹ Bti Jesukwe niebareta mda nitre ja tōitikaka benye:

Munkwe űān dikaka okwā kware mun rūe ngātāite, űōbtā űān angwane nitre israelita kākwe mun kitadi ngise sinagoga yete nitre kritoboreye. Ne kānti mun kwata metadi kwetre. Erere arato, jrei kri amne gobran kri űākare israelita, ye ngwārekri mun jānāin ngite tōdekabtā tibti, akwa ye ngwane abko tikwe dre dre nuenbare abko krāke kā rabadi kuin munye blitakāre tibtā nitre ye ngwārekri, abkokāre mun jānāin ngite.

¹⁰ Angwane kā ne ngāmi niken tā, kānenkri kukwe kuin tibtā, ye rabadi diribare ni kā jōkrābtiye angwane batibe ti jatadita.

¹¹ Akwa mun jārikadi ngite nitre kritobore ngwārekri angwane, munkwe dre niedi ja kriere, yehtā munkwe űān tōbika, űōbtā űān angwane Ngōbō űāi Deme tādi munbe. Mden kisete munkwe űō niedre, ye niarakwe mikadi gare munye, erere munkwe nie ja kriere.

¹²⁻¹³ Kukwe ye rakadikā kore munbtā, űōbtā űān angwane ni kwati mātā rabadi tibtā abko mātā rabadi munbtā tōdekabtā tibti arato. Aisetē ni tōdekaka tibti abko etba kwe kākwe kitadi ngise mūre ketadre; ngābākre tōdekaka tibti abko rūn kwe kākwe kitadi ngise mūre ketadre tōdekabtā tibti. Erere arato, ngābākrewe rūn kwe kitadi ngise mūre ketadre tōdekabtā tibti abko rabadi nakenkā kore ja tārītāri nitre tōdekabtā tibti yehtā; akwa nire nire tā nūn angwane, ti űān rūkandite ni jōkrā ngwārekri kwe, ni ye abko tikwe dianditari.

¹⁴ Yehti Jesukwe niebareta mda ietre:

Ti bike kukwe niere, btā munkwe tōbikadre kri abko krōrō: Ni iti ngwarbe kāme kākwe jāndrān deme Ngōbōkwe mikadi ngwarbe jae, btā Ngōbō mātā jatadi tikani Danielikwe abko kā nin te rabadre abko te rabadi. Ni ye kwrere rūka mun okwābti, ye ngwane abko mun tādre Judeate ye abko gitia mintokwāre.

¹⁵ Amne mun mden mden tädre jubti käin * ye abko ñan rika jändrän tuenta jire chi gwi jae amne mun gitia jirekåbe;

¹⁶ amne mun mden mden tädre sribire tirete ye abko ñan rika dän tuenta jire chi gwi jae, akwa mun gitia gwångwarbe jirekåbe.

¹⁷ Akwa meri doboko doboko amne meri kwe ngåbåkre kiakia kianbtå, ye abko bobre jakån, ñobtä ñan angwane niaratre ñan raba ngitie jötrö.

¹⁸ Akwa mun gitiadre ye abko ñan rakadrekå kä ñüre näire abko munkwe ribe Ngöböye, ñobtä ñan angwane tare näin jötrö kä ñüre näire aisete.

¹⁹ Munkwe ribe kore Ngöböye, ñobtä ñan angwane Ngöbökre kä dätebare kena angwane ni kä nebtå ngåmi ja tare nike krübåte dikaro abti kä nuke mtare abko erere ja tare nikadi kri krübåte kä ye ngwane. Yebti ñan ja tare nikadreta mda ye kwrere.

²⁰ Ye abko, Ngöbökre ñan köbö krötadre jötrö käne ja tare nikakrä, ye ngwane ni ñan rabadre dianintari jire iti, akwa ni dianinkå jakrä Ngöbökre abko Ngöböta tarere, aisete köbö ja tare nikakrä krötadi jötrö kwe.

²¹ Ne aisete, kä ye ngwane kukwe raba nakenkä kore angwane, nane ni mdakwe niedre krörö munye: ¡Ni Dianinkå Ngöbökre abko tä nete tuen! niedi kwe, o ¡Ni Dianinkå Ngöbökre tä sete tuen! niedre kwe, akwa munkwe ñan kukwei mika era,

²² ñobtä ñan angwane kä ye ngwane ni kwati jatadi ja bä mike Ni Dianinkå Ngöbökre kwrere amne ni kwati jatadi ja bä mike ni Ngöbö kukwei niekä kwrere. Niaratre kåkre sribi krikri ñan tuabare nuendi kabre båtåkä ngwarbe ni mda mda ngökakåre amne rabadre ni dianinkå jen jakrä Ngöbökre ara jire ngökö, ne ngwane ngökadre kwetre, akwa ñan rabadi ngökö.

²³ Ne aisete kukwe ye ngåmi nakenkä, känenkri tita mun mike mokre biare, abtä munkwe ñan dikadrekå okwå kware, niebare Jesukwe nitre ja töitikaka benye.

Jesukristo jatadita

(Mateo 24.29-35,42,44; Lucas 21.25-36)

²⁴ Jesukwe niebareta ietre:

Ja tare nikadi kri nini tikwe, yebti ñanå se rötadite amne kä rabadi iko jökrå. Erere arato, sö se ñan trä rabadre mda

²⁵ amne muke kåinta se abko rabadi betekå timontimon amne jändrän kä käinbti se abko rabadi grükekå arato.

²⁶ Ye angwane, ti Ni Kä Nebtä Ngobo abko jatadi tuen ja di kri bä nuårebtå mütabti kä käinbti sete abko ni jökrå kåkre tuadi.

²⁷ Angwane tikwe angeletré juandi, kåkre ni dianinkå jen jakrä ükadikrö jökrå ketetibe. Ni dianinkå jen jakrä nünanka nindrini, kä driri, sekri, nekri abko ükadikrö jökrå kwe.

²⁸ Bti Jesukwe niebareta mda:

Mdakåre abko, higokrie btå kukweta nakenkä ño, yebtä munkwe ja töitika abko krörö: Higo küdeta niren mråre mda amne kåta nebe mråre btå arato angwane, kä töre tårå kite nuke ja ken abko munta gaen,

²⁹ ye kwrere arato kukwe nini tikwe ye jata nakenkä jökrå mun okwåbti angwane, ti Ni Kä Nebtä Ngobo nükerate ja ken jukwebtå abko rabara gare munye.

³⁰ Ti bike kukwe era erere niere munye abko krörö: Nitre nünanka kä nebtå ngåmi krüte jökrå, ye känenkri kukwe nini tikwe ye erere rakadikå jökrå.

³¹ Mdakåre abko, kä kåinta se btå kä temen ne abko Ngöbökre gadikå jökrå, angwane rikadi ta, akwa ti kukwei abko rabadi kårekåre.

³² Akwa ti jatadreta köbö mdente amne ñanå okwå nuåi ti jatadreta ye abko gare ñakare jire chi ni mda mdaye, angele kä käinbti ie gare ñakare amne Ngöbö Odei ie gare ñakare arato, akwa Ngöbö ni Rün aibe ie tå gare kaibe.

³³ Ye kwrere arato, ti jatadita ñongwane gare ñakare munye. Mden kisete, munkwe ja mika juto kåre ti ngibiare ngåbti amne munkwe blita kåre Ngöböbe,

³⁴ ñobtä ñan angwane ti näinta, bti ti jatadita, ye abko rakadikå ño ti bike bä mike krörö munye: Ni iti jatani yåke mente kä mdabti kåkre sribikå kwekre mikaninte ju ngibiare jakrä, bti sribi biani jene jene kwe ietre angwane, jukwe ngibiaka abko ie ju ngibiamna kuin kwe jakrä. Ni ye namani niara ngibiare ngåbti.

³⁵ Ye kwrere abko, ti ju bkånkå kwrere kåta mun mikete, aisete munkwe mokre jåbti ti ngibiakåre ngåbti, ñobtä ñan angwane mun Dånkien ju bkånkå rükadita dere ya, kä ruåre ya, kä ngwen ja ken deká ya o kä ngwenbti deká ya, ñongwane abko gare ñakare jire chi munye.

³⁶ Ye mden kisete, nane batibe ti jatadreta ñongwane abko, ie mun kwan jåme ngwarbe, mden känenkri munkwe ti ngibia ngåbti kåre.

* **13:15 tädre jubti käin.** Ju nitre israelitare abko kiare bti käin, aisete nuåre dikakrä bti ta.

³⁷ Munkwe ti ngibia ngäbti tita niere munye, ye ñan mun aibeye tita niere amne ni jökrä käkwe ti ngibiadre ngäbti abkokäre tita niere munye. Abko kore se, niebare Jesukwe.

14

Jesu rüe tö namani kain ngite tiebe

(Mateo 26.1-5; Lucas 22.1-2; Juan 11.45-53)

¹ Yebti Pascua* köböi namanina köböbube. Pascua köböi angwane abko bieta Te Lebadura Ñakare Bante kweta nämane Ngöbö mikakäre ütiäte nämane bämän krati angwane, ye känenkri ni blitaka Ngöböbe ni mda mda diäre dänkientre btä Kukwe Biani Ngöbökwé Moiséye dirikätre abko käkwe Jesu kadre ngite müre ketadre ño tiebe abko namanintre ngibiaretari kisere.

² Akwa nane ni kwati krübäte nämane Jerusalén Pascua köböikrä käkwe rüdre bentre Jesu dokwäre, aisete Pascua näire ñan nuendre, niaratre namani niere.

Meri iti käkwe ñö rä bäne kekani Jesubti

(Mateo 26.6-13; Juan 12.1-8)

³ Kä ye ngwane abko, Jesu nämane Betaniate tākänintbe mesabtä mröre ni kädian nämane Simón kanti. Jesu ngämi Simón ye miketa kuinta, känenkri kädian nämane lebroso arato abko kanti Jesu nämane. Angwane batibe meri nükani iti ñö rä bäne ütiäte kri kädian nämane nardo ngwena jä bä ngwen kädianta alabastro dätebare boteare te. Nardo ye abko ñan nämane mritani jire ñöbe abko meri ye jatani ngwena. Meri ye abko käkwe ñö rä bäne jue tikani, bti kekani kwe Jesu dokwäbti se kwrere.

⁴ Yebtä ni nämane siba gwi abko ruäre moto namani romon. Abtä namani niere jae kwärikwäri: ¿Se ñöbtä meri se tä ñö rä bäne ütiäte kri iente ngwarbe se?

⁵ Ngwian ganainta bäsi kä kwati jire näre, btä ñö rä bäne se rürümoindre, bti ni bobre bobre die mikadre bä amarebti ininte ngwarbe kwe se, namanintre niere kore jae kwärikwäri meri yebtä, bti namani ngren ngren bti.

⁶ Abtä Jesukwe niebare mda ietre:

Munkwe ñan meri ne nika. ¿Se ñöbtä abko mun nibi nika krübäte dikaro? Meri ne käkwe jändrän kuin nuni tikrä,

⁷ ñöbtä ñan angwane nitre bobre bobre tädi käre mun ngätäite nete, ye abko mun tö rabadre die mikäi ñongwane, erere munkwe die mikadre; akwa ti abko ñan tädi kärekäre munbe nete.

⁸ Ne aisete jändrän kuin rabadre bare tikrä meri neye, erere nuni kwe tikrä, ñöbtä ñan angwane ñö rä bäne kiri kwe ti ngrabare, yebti abko ti miri juto biare kwe doboi mikadre.

⁹ Ye abko, ti bike kukwe era erere niere munye abko krörö: Kukwe kuin tibtä ye kädriedi mdente mdente erere, ye kanti meri ne käkwe jändrän kuin nuni tikrä mtare ne kädriedi arato, aisete jändrän kuin nuni meri nekwe, yebtä rükadita töre. Abko kore se, niebare Jesukwe ietre.

Judakwe Jesu kitani ngise

(Mateo 26.14-16; Lucas 22.3-6)

¹⁰ Yebti, ni blitaka Ngöböbe ni mda mda diäre dänkientre btä Kukwe Biani Ngöbökwé Moiséye dirikätre abko käkwe Jesu kadre ngite müre ketadre ño tiebe abko namanintre ngibiaretari kisere. Ye ngwane ni ni jätäbti nibu ja töitikaka Jesube abko iti kädian nämane Judas Iscariote abko nikani nitre blitaka Ngöböbe ni mda mda diäre dänkientre kanti Jesu kitakäre ngise ietre.

¹¹ Judas nikani Jesu kite ngise gani kwetre angwane, kä namani nuäre btätäre, käkwe ngwian bian braibare Judaye, bti Judas nikani. Ye ngwane Judas namani kä kuin ngibiare kisere jae, Jesu kitakäre ngise.

Jesukwe mröbare mrä nitre ja töitikaka benbe

(Mateo 26.17-29; Lucas 22.7-23; Juan 13.21-30; 1 Corintios 11.23-26)

¹² Abti bämän krati lebadura ñakare bante kweta nämane Ngöbö mikakäre ütiäte jae, ye köböi nukaninta kena. Köbö ye näire kordero kämika nämane kwetadre Pascua köböite angwane, nitre ja töitikaka Jesube käkwe niebare ie:

¿Mrö kwetadre Bieta Pascuakrä ye abko nunkwe sribedre mdente makrä, ie ma tö nibi? niebare kwetre Jesuye.

¹³ Abtä nitre nibu ja töitikaka Jesube, ie Jesukwe niebare:

* **14:1 Pascua.** Nitre israelita käkwe Pascua köböi mikani ütiäte, ñöbtä ñan angwane kira nämane ngite kä Egiptote angwane, Ngöbökwé tikaninte Pascua köböibtä. Pascua abko käta “niken bäre ta” niere. Köbö yebtä angele ni kämikaka nikani nitre israelita bäre ta amne kämikani ñakare kwe, aisete Ngöbökwé köbö Pascua mikamna ütiäte nitre israelitaye.

Mun nän juta Jerusalén sete. Ye kánti ni brare tádi iti ñö ngwena kantrate abko rükadi ngätäi munbe ji ngrabare. Ni ye rika mdente gwä, kánti mun rika.

¹⁴ Mun rika nebe gwi angwane, munkwe nie krörö ju bkänkäye: Dirikäkwe mrö Pascua köböikrä kwetadi nitre ja töitikaka benbe abkokrä käta ükaninte mdente, ngwiantarimna kwe, munkwe nie kore ie.

¹⁵ Angwane ju mikani bobu jabti käin, te kä tädira ükaninte biare mrökrä, kánti mun jänäin kwe. Ye kánti munkwe mrö sribe biare nunkrä. Abko kore se, niebare Jesukwe.

¹⁶ Erere bkänä, nitre nibu ja töitikaka nikani, namani jutate Jerusalén angwane, Jesukwe kukwe niebare ño ño ietre, erere kwani ietre, kánti mrö sribebare kwetre kwetadre Pascuate.

¹⁷ Yebti kä jatanina diore dere angwane, Jesu nikani mröre mda nitre ja töitikaka benbe.

¹⁸ Nämame mröre angwane, niebare kwe ietre:

Ti bike kukwe era erere niere munye abko krörö: Mun mrökä tibe ketetibe, ne ngätäite nita iti käkwe ti kitadi ngise ti rüeye gare kuin tie, niebare Jesukwe.

¹⁹ Abtä nitre ja töitikaka ben namani ulire jökrä batibe, kä namani niere itire itire ja täritäri Jesuye:

¿Tikwe nuendi ya gwari? namani ngwentari itire itire Jesuye.

²⁰ Abtä Jesukwe niebare mda ietre:

Mun ni jätäbti nibu, ye ngätäite nita iti käta ban mike tibo gwaire tibe blato kwatibe te, ye abko käkwe ti kitadi ngise.

²¹ Akwa ti, Ni Kä Nebtä Ngobo abko müre ketadi ño, ye tä tikani Ngöbö Kukweibtä abko erere rakadikä. ¡Akwa ni ti kitaka ngise abko ñan bobre jakän ya! Ni ye nin däredre näre abko därebare, niebare Jesukwe ietre.

²² Yebti nämame mröre jökrä angwane, Jesukwe ban diani kunti kisete, käkwe kuin niebare btä Ngöböye, bti ötaninbtä kwe, bti biani kwe nitre ja töitikaka benye, käkwe niebare ietre:

Ban ne abko ti ngätä ara. Ne kaen ngäbti munkwe, bti munkwe kweta, niebare kwe ietre.

²³ Bti uba döi nämame basote abko Jesukwe diani kisete, bti kuin niebare btä kwe Ngöböye, bti biani kwe ietre. Niaratre jökrä käkwe ñani,

²⁴ bti Jesukwe niebare ietre:

Uba döi ne abko ti däräie tikwe ara amne Ngöbökwé kukwe ükadite btin munbe ye abko rabadi bare täte jökrä ti däräie nebti. Erere arato, ti däräie rimiadite ni kwati kräke.

²⁵ Mdakäre abko, ti bike kukwe era erere niere munye abko krörö: Ngöböta gobrane ye kánti tikwe uba döi btin ñadita, akwa ti ngämi ñaen yete, känenkri tikwe ñan ñadreta jire chi abko ti tö nibi niei munye. Abko kore se, niebare Jesukwe nitre ja töitikaka benye.

Pedro käkwe Jesu rükandite, niebare Jesukwe

(Mateo 26.30-35; Lucas 22.31-34; Juan 13.36-38)

²⁶ Yebti Jesu btä nitre ja töitikaka ben käkwe ka Salmobtä niebare ünän, bti nikanintre Ngitio Olibobti.

²⁷ Angwane Jesukwe niebare nitre ja töitikaka benye:

Mun jökrä gitiadi iti iti kwäräkwärä tibtä mentokwäre gare kuin tie, ñobtä ñan angwane Ngöbö Kukwei käta niere krörö, käta ti bä mike obeja ngibiaka kwrere amne mun abko obeja tikwe kwrere:

Tikwe obeja ngibiaka kämikadi angwane, obeja kwe abko gitiadi kratikrati kwäräkwärä, *Zacarias 13.7*

abko Ngöbö Kukwei tä niere kore munbtä.

²⁸ Akwa ti müre ketadi, bti ti rükadita nire angwane, ti näin mun ngäbti Galilea, kánti ni rabadita ketetibe jökrä, niebare Jesukwe.

²⁹ Abtä Pedro abko käkwe niebare mda Jesuye:

Ni jökrä käkwe ñan tödekadre mabti abko gitiadi, akwa ti abko ñan gitiadre jire chi mabtä, niebare kwe ie.

³⁰ Jesukwe niebare mda Pedroye:

Mtare deo, antlan ngämi ngwäne bobu, känenkri ma reketaka tibe abko makwe rükandite bämä jire abko ti tö nibi niei metre mae, niebare kwe Pedroye.

³¹ Akwa Pedro abko namani ja kwete janknu Jesube, kä namani niere:

Ti müre ketadre siba mabe akwa ti reketaka mabe, tikwe ñan rükandrete jire chi, Pedro namani niere.

Erere ni mda mda ja töitikaka Jesube namani niere gwaire jökrä Jesuye.

Jesu nikani blite Ngöböbe Getsemaní

(Mateo 26.36-46; Lucas 22.39-46)

³² Yebti Jesu btä nitre ja töitikaka ben nikani nebe käkä Getsemaní kánti angwane, Jesukwe niebare ietre:

Täke temen yete munkwe. Ti bike niken blite Ngöböbe, niebare kwe ietre.

³³ Yebti Pedro, Santiago btä Juan aibe ngwiani kwe jabe. Angwane Jesu moto jatani ulire amne moto namani bete krübäte ja jiebtä,

³⁴ käkwe niebare nitre ja töitikaka ben nimä yeye:

Ti moto nibi ulire krübäte dikaro tie, aiseite ti kebera krüte nibi ruen tie, aiseite mun raba ti ngbiare nete, akwa munkwe ja ngwätei siba tibe amne munkwe ñan kibia, niebare kwe ietre.

³⁵ Ye btäräbe Jesu nikani bä mente temen se kwrere, kanti namani kitanintbe ngwäwäre timonkwäre temen angwane, niara müre ketadre ye abko Ngöböke diandre niarabti ta abko btä blitabare krörö kwe Ngöböbe:

³⁶ Tata tikwe, ma raba jändrän jökrä nuene, aiseite tikwe ja tare nikadre, bti ti müre ketadre, ye ma tö diain ti bäre angwane, makwe dian ti bäre. Akwa ma tö dreye tikrä, ye erere raba bare tibtä amne ñan ti töi abko erere rabadre bare, niebare kwe Rün Ngöböye.

³⁷ Bti nitre mikaninte nimä kwe ja ngbiare, kanti nikaninta angwane, nämane kibien kuin jökrä, btä namaninta angwane, niebare kwe Pedroye:

¿Ñänä okwä kratibe abko te kä ñan nü mae ja ngwätere blitakäre Ngöböbe ya? niebare kwe ie.

³⁸ Bti niebareta kwe ietre:

Diablu jatadi mun nuente ja käne, ye ngwane munkwe ñan ja mikadre ngite, abkokäre munkwe ja ngwäte amne munkwe blita jakrä Ngöböbe, ñobtä ñan angwane mun töi abko tä biare jändrän kuin nuene, akwa mun di ñakare, aiseite munkwe blita jakrä Ngöböbe, niebare Jesukwe ietre.

³⁹ Yebti Jesu nikani bliteta bobukäre Ngöböbe angwane, ño niebare käne kwe Ngöböye, ye arabe nikani niereta ja täritäri bobukäre.

⁴⁰ Yebti nitre nimä ja töitikaka Jesube, ye kanti Jesu nikaninta angwane, namani kibien kuin jökrä, ñobtä ñan angwane köbö namani krübäte ietre, aiseite okwä kwata namani neketekäbe jabtä köbö kisete, btä Jesu namaninta angwane, ño niedre kwetre Jesuye ñan namani nuke gare ietre.

⁴¹ Yebti Jesu nikaninta bämäkäre bliteta Ngöböbe. Blitabareta kwe Ngöböbe, bti jatani nüketä angwane, niebare kwe ietre:

¿Mun tä kibien amne mun tä jadüke janknu ya? Munkwe kibianirira dbe. Nitre kukwe kämekäme nuenkä abko kisete ti Ni Kä Nebtä Ngobo ne kitadi ngise ye abko käi nüra,

⁴² aiseite ni ti kitaka ngise tiebe ti rüeye abko nükerä tibtä, aiseite näin krö, bränta, niebare Jesukwe ietre.

Jesu kani ngite

(Mateo 26.47-56; Lucas 22.47-53; Juan 18.2-11)

⁴³ Jesu nämane blite kore, ye btäräbe ni ja töitikaka ben ni jätäbti nibu, ye ngätäite ni iti kädian nämane Judas Iscariote ye ara jatani nuke Jesu kanti. Judas ye abko nämane näin ni kwati jie ngwena. Nitre jatani Judabe ye abko nämane näin ngitra ngwena kisete amne ruäre abko nämane näin krito ngwena kisete. Nitre ye abko nämane näin nitre blitaka Ngöböbe ni mda mda diäre dänkien käbti amne Kukwe Biani Ngöböke Moiséye dirikätre ye käbti amne nitre unbre ji dokwäte käbti arato.

⁴⁴ Angwane Judas, Jesu kitaka ngise ye abko käkwe nitre töi dianina käkwe niebare ietre: Nire demain tikwe mun okwäbti ye abko Jesu ara, aiseite munkwe niara ye ka ngite. Mun rika ngwena, niebare kwe ietre.

⁴⁵ Ye erere bkänä, Judas jatani nuke, ye btäräbe nikani Jesu kanti, käkwe niebare krörö ie: ¡Dirikä! niebare kwe.

Bti Jesu demainbare kwe.

⁴⁶ Angwane nitre jatani Jesu rüere ye käkwe krötani Jesu ken, nakwani btä, käkwe kani ngite.

⁴⁷ Ye btäräbe ni ja töitikaka Jesube nämane iti käkwe ngitra dianinkä kwatate, bti ni klabore ni blitaka Ngöböbe ni mda mda diäre dänkienkwe ye olo tikaninkä ta kwe ie.

⁴⁸ Yebti nitre nikani Jesu kaen ngite, ye ie Jesukwe niebare krörö:

¿Ñobtä abko bäsi ni gokä kri krübäte rüere ngitra jäta niken amne krito jäta niken, kwrere jire mun kite ngwena ti rüere ti kakäre ngite ye?

⁴⁹ Käre köbö kwatirekwatire tita dirire ju blitakrä Ngöböbe kántita temen mun ngätäite, akwa mun ñakare ti kaen ngite. Akwa dre dre rakadrekä tibtä tä tikani mekera Ngöbö Kukweibtä abko erere rabadre bare tibtä, abkokäre munta ti kaen ngite mtare, niebare Jesukwe.

⁵⁰ Jesukwe ñäkäbare kore, ye btäräbe nitre ja töitikaka ben käkwe kä mikaninkä batibe jökrä btä amne ngitiiani iti iti kwäräkwärä amne niaratre käkwe Jesu mikaninte kaike rüeye.

⁵¹ Jesu jänikani angwane abko, ni bati nämane näin ja mrianinte dän aibe te abko nikani siba Jesu jiebt. Ni ye gani Jesu rüekwe angwane neketaninte ietre,

⁵² akwa niarakwe dän jabtä tikanintbe, bti ngitiani bütiere.

Jesu jänikani Sanedrin ngwärekre

(Mateo 26.57-68; Lucas 22.54-55, 63-71; Juan 18.12-14, 19-24)

⁵³ Angwane Jesu jänikani ni blitaka Ngöböbe ni mda mda diäre dänkien gwiriete. Jänamani angwane, ni blitaka ni mda mda diäre dänkientre käkwe ja ükaninkrö, btä nitre unbre ji dokwäte käkwe ja ükaninkrö. Arato Kukwe Biani Ngöböke Moiséye dirikätre nükani ja ükekrö bentre.

⁵⁴ Jesu jänikani angwane, Pedro abko jatani bä mente temen siba Jesu jiebt. Yebti nikani nebe ju bäre ni blitaka Ngöböbe ni mda mda diäre dänkien ye kanti. Pedro nikani siba ki teri angwane, guardia ju blitakrä Ngöböbe ngibiabtikä nämane tükänintbe, ye kanti Pedro namani tükänintbe siba ñukwäbtä, ñukwä träse.

⁵⁵ Angwane nitre blitaka Ngöböbe ni mda mda diäre dänkientre amne nitre sribikä Sanedrinbe namani kukwe kënëne Jesu rüere Jesu kitakäre ngise müre ketadre. Akwa kukwe era erere ñan namani kwen ietre Jesu rüere,

⁵⁶ ñobtä ñan angwane ni kwati namani kukwe ngwarbebe niere Jesu rüere, aisetje ja kukwei ñan namani nükebti gwaire jökrä ietre.

⁵⁷ Yebtä ni ruäre käkwe kukwe känäbare ngwarbe mda Jesu kitakrä ngise bäri abko namani niere krörö:

⁵⁸ Ju blitakrä Ngöböbe mikani ni kä nebtäkwe, se abko tikwe juandi ngwarbe jökrä, abti köbömkäre angwane, tikwe ju mdara jire mikadita täte, akwa ñan ni kä nebtäkwe mikadi, nieba kwe nun okwäbti, niebare kwetre Jesu rüere.

⁵⁹ Kukwe känäbare ngwarbe kwetre ni ngökakrä Jesu rüere, akwa ñan namani nükebti gwaire jökrä ietre.

⁶⁰ Yebtä abko ni blitaka Ngöböbe ni mda mda diäre dänkien nükani dikekä krö ni jökrä ngätäite, käkwe niebare Jesuye:

¿Kukwe nie nibi ma rüere, se ño metre amarebti ma nibi kwekbe jirekäbe ye? niebare kwe Jesuye.

⁶¹ Akwa Jesukwe nin ñäkäbare käre, namani kwekbe jirekäbe. Abtä ni blitaka Ngöböbe ni mda mda diäre dänkien käkwe niebareta bobukäre Jesuye:

¿Ma abko Ni Dianinkä Ngöböke ara ya amne ma abko Ngöbö Kri Odei ara ya? niebare kwe Jesuye.

⁶² Jesukwe niebare mda ie:

Jän. Ti abko niara ara amne kä bäri ütiäte kri Ngöbö Di Kri Jändrän Jökrä Nuenkrä ye küde ruenkri munkwe Ni Kä Nebtä Ngobo tuadi tükänintbe. Erere arato, jatadita mütabti käinta sete angwane munkwe tuadi, niebare Jesukwe.

⁶³ Angwane ni blitaka Ngöböbe ni mda mda diäre dänkien ye moto namani romon, käkwe dän ngianinkä seen jabtä romone, käkwe niebare krörö:

¿Tä ñäke kore, se abko ni mda mda käkwe niara kitadre ngise amne batibe ngite, nikwe niedre ya?

⁶⁴ Ñakare, ñobtä ñan angwane niarakwe ñäri tare Ngöbö rüere, ye nunkwe kukwe nurira ñan ñan, aisetje munkwe töbikadi ño mda kräke, niebare kwe.

Ni jökrä käkwe niebare:

Niara ngite, aisetje müre ketadre, namanintre niere gwaire jökrä.

⁶⁵ Ye ngwane ni ruäre namani käli kite Jesubtä. Ni ruäre abko namani dän kukwän mäke Jesu okwäbti, bti namani mete, namani mete, bti namani niere ie:

Ma Ngöbö Odei mata niere, aisetje nirekwe ma miti, niere metre nunye, namani niere ie.

Angwane guardia ju blitakrä Ngöböbe ngibiabtikä abko namani Jesu mete arato.

Pedro käkwe Jesu rükaninte

(Mateo 26.69-75; Lucas 22.54-62; Juan 18.15-18, 25-29)

⁶⁶ Jesu nämane gwi Sanedrin ngwärekre angwane, Pedro abko nämane ju bäre ngüsrüta temen angwane, ni merire iti sribikä ni blitaka Ngöböbe ni mda mda diäre dänkienkwe abko jatani angwane,

⁶⁷ Pedro nämane tükänintbe ñukwäbtä ñukwä träse, btä meri ye okwä namani, mikani ñäräre kuin kwe, bti niebare kwe ie:

Jesu Nazarebo se ben ma nämane dikekä siba arato, niebare kwe ie.

⁶⁸ Angwane Pedrokwe ja rükaninte, käkwe niebare mda ie:

Ni kädianta makwe, ye gare ñakare jire chi tie, aisetje mata blite drebtä, ye ñan nebe nüke gare tie, niebare kwe.

Bti naninkrö, nikani jukwebtä angwane, btäräbe antlankwe ngwänäbare.

⁶⁹ Bā raire erere, meri sribikā ye arabe jataninta angwane, okwā namaninta Pedrobtā bobukāre angwane, namani niere ni mda mdaye:

Ni noko reketaka Jesube arato se, namani niere.

⁷⁰ Akwa Pedrokwe ja rükaninteta.

Bti bā raire erere angwane, nitre nāmane yete kā namani niere Pedroye:

Ma Galileabo, ñobtä ñan angwane ma blite niaratre kwrere, bā amarebti rä jire mata nekete ñakare Jesube, ma nibi niere yere, namanintre niere ie.

⁷¹ Angwane Pedrokwe ja kukwei bianinta amne niarakwe ñan kukwe niedre metre ne ngwane, Ngöbökwe ngürün mikadre btā namani niere, kākwe niebare mda:

Ni kākekata Jesu munkwe, ni ye abko gare ñakare jire chi tie, niebareta kwe.

⁷² Ye btärābe antlankwe ngwānānbare bobukāre angwane, Jesukwe kukwe niebare krörö Pedroye abko nūkaninta töre ie: antlan ngāmi ngwāne bobu, kānenkri makwe ti rükandite bāmā jire, niebare Jesukwe ie, ye nūkaninta töre ie angwane, niara moto nōtaninte, kākwe ja müaibare kri.

15

Jesu jänikani ngite Pilato ngwäreki

(Mateo 27.1-2,11-14; Lucas 23.1-5; Juan 18.28-38)

¹ Kā nūkani ngwen dekā angwane, nitre sribikā Sanedrinbe amne nitre blitaka Ngöböbe ni mda mda diäre dānkientre, nitre unbre ji dokwāte btā Kukwe Biani Ngöböke Moiséye dirikātre kākwe ja ūkaninkrö ketetibe jökrā mda, kākwe Jesu mākātemnabare, bti jänikani ngite Pilato ngwäreki kwetre.

² Angwane Pilatokwe niebare ie:

¿Ma abko jrei nitre israelitakwe bkānā ya? niebare kwe Jesuye.

Jesukwe niebare mda Pilatoye:

Jän. Era metre ti ara, niebare kwe ie.

³ Angwane ni blitaka Ngöböbe ni mda mda diäre dānkientre namani kukwe niere btākā ngwarbe Jesu rüere kitakrä ngise.

⁴ Abtä Pilatokwe niebareta Jesuye:

Kukwe keta kabre, btā ma ngite nie nibi ma rüere. ¿Se ñobtä abko ma nibi kwekbe dikaro yere? niebareta Pilatokwe Jesuye.

⁵ Akwa Jesu namani kwekbe janknu, nin ñākābare jire chi kwe Pilato kāre. Jesu ñan tö namani rabai tikaninte namani tuen Pilatoye, aisete Pilato ñan töi namani krütare mda Jesubtä.

Jesu kitani ngite müre ketadre

(Mateo 27.15-31; Lucas 23.13-25; Juan 18.38-19.16)

⁶ Kā kwatirekwatire bieta Pascua näire ni ngite ngätāite nire tikadrete Pilatokwe, kārä nāmane ie abko erere nāmane tikete

⁷ abko erere ye näire ni kādian nāmane Barrabás abko nāmane ngite ni mda mdabe. Ni ye abko nāmane ja rüere gobran romanobobe angwane, ni müre ketani kwe abtä nāmane ngite.

⁸ Ye ngwane ni nūkani kwati niere Pilatoye:

Kāre mata ni ngite tikete iti kā kwatirekwatire. Ye kwrere makwe ni ngite tikadrete iti abko nun nibi ribere mae, niebare kwetre ie.

⁹ Pilatokwe niebare mda ietre:

¿Jrei nitre israelitakwe ye tikadrete tikwe abko ie mun tö nibi ya? niebare kwe ietre.

¹⁰ Pilato abko kākwe niebare kore, ñobtä ñan angwane ni blitaka Ngöböbe ni mda mda diäre dānkientre namani mokrere Jesube, abtä kitani ngite kwetre abko ganina Pilatokwe btātre, aisete niebare kore kwe.

¹¹ Akwa ni blitaka Ngöböbe ni mda mda diäre dānkientre namani ni jökrā töi den jakri abko kākwe Barrabás tikatamna abkokāre.

¹² Akwa Pilato tö namani Jesu tikaite, kākwe niebare mda ietre:

¿Jrei nitre israelitakwe nieta munkwe, sebtā abko tikwe dre nuendre, ie mun tö nibi amarebti yere? niebare kwe ietre.

¹³ Jötrö ngwarbe ni jökrā namani ngrente, kā namani niere Pilatoye:

¿Müre kete krusobtä! namanintre niere gwaire jökrā.

¹⁴ Abtä Pilatokwe niebareta mda ietre:

¿Drebtā ni nekwe ja mikani ngite amarebti, mun nibi müre ketamna krusobtä tie yere? niebare Pilatokwe ietre.

Yebtā namani ngrente bäri jume mda, kā namani niere:

¿Müre kete krusobtä, müre kete krusobtä! namanintre niere Pilatoye.

¹⁵ Akwa Pilato tō namani ni jōkrā moto mikai nuāre, aiseite Barrabás tikaninte kwe, akwa Jesu abko kwata metamna kōbti kwe amne biani kwe rükā romanoboeye müre ketadre krusobtä.

¹⁶ Nitre rükā nikani Jesu ngwena mda ju gobrankwe ye kánti. (Kā ye abko kādian nāmane pretorio). Angwane nitre rükā kākwe ja ūkaninkrō jōkrā ketetibe Jesu mikakāre yakrā jae,

¹⁷ kākwe dān bā tain kita nāmane jabtä jreikwe, ye kwrere kitani Jesubtä, bti jrei kri kākwe korona kitadre ja dokwābti, ye kwrere kri tukwā krübāte sribebare koronare kwetre, bti mikani Jesu dokwābti kwetre.

¹⁸ Yebti namanintre Jesu mike yakrā jae, kā namani niere:

¡Ma jrei nitre israelitakwe, nunta ma mike ūtiāte kri mtare! namani niere kore Jesuye.

¹⁹ Bti nikanintre Jesu mete dokwāte ta kritobti, nikani kāli kite Jesubtä, bti nierare namanintre nebe ngukudokwābti temen Jesu ngwārekri.

²⁰ Jesu mikani yakrā kore kwetre jae, bti dān bā tain drūne ye tikaninteta Jesubtä kwetre, bti dān Jesukwe ara kitaninta btā kwetre. Yebti nikanintre Jesu ngwena müre ketadre krusobtä.

Jesu metani krusobtä

(Mateo 27.32-44; Lucas 23.26-43; Juan 19.17-27)

²¹ Jesu jānikani kwetre angwane, ni iti kādian nāmane Simón abko Alejandro btā Rufo rün Cirenebo nāmane Jerusalén bāre, jataninante, nūkani ngātāi bentre angwane, kruso btā Jesu müre ketadre abko nitre rükā romanobo kākwe Simón mikani ngwena Jesukrā.

²² Bti nikanintre nebe kākā Gólgota kánti. Kā Gólgota ye abko “Ni dokwā kroko kāi” nieta abko kánti nikanintre nebe Jesube.

²³ Angwane krikā kwaka kādianta mirra mritani uba dōibe mni nni biani ñadre kwetre Jesuye, akwa Jesukwe ñan kani ngābti.

²⁴ Ye btārābe nitre rükā romanobo kākwe Jesu metani krusobtä, bti tō namanintre dān Jesukwe ñākāitbe jabti, kākwe ja gani dān yebtä.

²⁵ Ñānā okwā krā ōkān nāre dekā angwane, Jesu metani krusobtä nitre rükākwe.

²⁶ Angwane “NI NE ABKO JREI NITRE ISRAELITAKWE,” tikani kore kri kukwānbtä metani Jesu dokwā kánti kāin krusobtä. Ye abko ñobtä Jesu nāmane ja ngie nuen krusobtä gadre abkokāre.

²⁷ Jesu metani krusobtä angwane, nitre gokā metani nibu krusobtä kāin arato niarabe gwaire. Iti mikani niara küde ruenkri amne iti mikani niara küde ngeberekri.

²⁸ [Ne abko nāmane tikani krōrō kira Ngōbö Kukweibtä, Ni kāmekāme ngātāite niarakwe ja ngie nuadi siba,

nāmane tikani abko erere namani bare kore.]*

²⁹ Angwane nire nire namani kite dikekā Jesu bāre, kā namani dokwā ngrüketbe ñākāre kwārā Jesuye, Jesu mikakāre ngwarbe jae, kā namanintre niere ie:

¡Jan jan! Ju blitakrā Ngōböbe se makwe juandi ngwarbe abti kōbōmākāre makwe mikadreta tāte jōkrā, makwe niebare,

³⁰ aiseite ja denkā au mento krusobtä yete, bti ma jatata timon, namanintre niere Jesuye.

³¹ Ye erere arato, ni blitaka Ngōböbe ni mda mda diāre dānkientre btā Kukwe Biani Ngōböke Moiséye dirikātre namani Jesu mike yakrā jae, aiseite namanintre niere kwrere arato jae kwārikwāri Jesubtä:

Ni mda mda dianintari kwe, ¿se ñobtä abko ñan nebe ja dentari au se?

³² ¡Ni se Ni Dianinkā Ngōböke mikadre jrei nitre israelitakwe nieta kwe jabtä, aiseite ja diandrekkā au krusobtä mento kwe sete angwane, nunkwe mikadi ūtiāte jae! namanintre niere kore jae kwārikwāri.

Ye kwrere arato, ni nāmane nibu ja tare nike krusobtä kāin Jesube gwaire, ye namani Jesu mike yakrā jae siba.

Jesu krütani

(Mateo 27.45-56; Lucas 23.44-49; Juan 19.28-30)

³³ Bti ñānā nūkani ruāre kāin angwane, kā ngidianinte mda. Kā namani iko jōkrā temen. Kā namani iko nebebe ñānā okwā krāmā dere.

³⁴ Ñānā okwā krāmā nūkani, ye btārābe Jesukwe ngratebare kri ja dibti krōrō: Eloi, Eloi, ¿lama sabactani? niebare kwe. (Ne abko: Ngōbö tikwe, Ngōbö tikwe, ¿ñobtä makwe kā mirikā tibtä jakān amarebti yere? nieta.) Abko mden niebare Jesukwe.

³⁵ Jesukwe ñākābare kore, ye abko nitre ruāre nāmane yete kākwe kukwe nuani angwane, namanintre niere:

* 15:28 Versículo 28 abko ñan tā tikani manuscrito bāri kuinkuin btā.

¿Ñan tä ni Ngöbö kukwei niekä kira kädian nämane Elías kärere jabtä, ja die mikakäre ya? namanintre niere kore.

Niebare kore kwe, ñobtä ñan angwane Jesukwe "Eloi" niebare angwane, namani ruen "Elías" kwrere ietre aisete.

³⁶ Ye btäräbe, ni nämane yete, ngätäite ni nikani betekä iti, käkwe jändrän dän kukwän kwrere kä dianta esponja abko mritaninkä uba ñoi dimente, bti mäkäninte kwe nörä kräbtä, jatani ben, biani kwe ñadre tomnane Jesuye. Bti ni ye käkwe niebare:

Tuemetre yete. Elías rükadi den timon krusobtä yete ni okwäbti ya, ari ngibiaretari, niebare kwe.

³⁷ Akwa Jesu abko käkwe ngratebare bäri kri ja dibti mda, btäräbe krütani.

³⁸ Jesu krütani, ye btäräbe dän ngutu ngetbo, bti ju blitakrä Ngöböbe nämane ñäkänintbe abko nianinkä kumu käin nükebe temen.

³⁹ Jesukwe ngratebare, bti krütani ño nitre rükä dänkien romanobo okwäbti. Abtä niebare mda kwe:

Ni ne abko Ngöbö Odei era metre bkänä, niebare kwe.

⁴⁰ Ye ngwane, ni merire merire nämane ruäre, namani bä mente temen se kwrere okwä Jesubtä siba. Nitre merire nämane, ye ngätäite María Magdalabo nämane, btä José btä Santiago bäri bati meye María nämane, arato Salomé nämane.

⁴¹ Meri ye abko, Jesu nämane nüne Galilea angwane nämane nekete ben angwane, nämane niara die mike. Ye ngwane meri mda mda nämane kwati siba abko nämane nekete Jesube, aisete nikani gwaire Jesube nebe Jerusalén. Meri ye abko nämane siba okwä Jesubtä.

Jesu doboi mikani

(Mateo 27.57-61; Lucas 23.50-56; Juan 19.38-42)

⁴² Ye ngwane abko, köbö jadükakrä känenkri, ni jökrä nämane sribi nuene biare jakrä jadüka mäträ, aisete kä jatani dere angwane,

⁴³ José Arimateabo abko ie ja nükani töre, nikani Pilato kanti, käkwe Jesu ngwäkä käräbare ie. José Arimateabo abko ni ütiäte kri sribikä siba Sanedrinbe. Ni ye abko, Ngöbö rükadre gobrane ni kwe ngätäite diribare Jesukwe nämane ngibiare kisere arato, aisete nikani Jesu ngwäkä kärere Pilatoye.

⁴⁴ Josékwe Jesu ngwäkä käräbare Pilatoye angwane, Pilatokwe ja ngwiani nikenkä, ñobtä ñan angwane Jesu krütani jötrö krübäte, käkwe ni rükä romanobo dänkien käräbare iti, bti Jesu krütanina bkänä abko ngwianintari kwe ie.

⁴⁵ Nitre rükä dänkien käkwe Jesu krütanina bkänä niebare Pilatoye angwane, batibe Pilatokwe Jesu ngwäkä biamna Joséye.

⁴⁶ José käkwe dän bäri ütiäte kädianta lino kökani, bti Jesu ngwäkä krusobtä käin diani timon, mrianinte kwe dante, bti kä muanina biare jäkwatate ni doboi mikakrä, te Jesu doboi mikani kwe, bti jä kri münaninkä kwe abko mikani kä mkä juere kwe Jesu doboibti.

⁴⁷ Angwane María Magdalabo btä María, José meye, nikani siba, okwäbti Jesu doboi mikani.

16

Jesu nükaninta nire

(Mateo 28.1-10; Lucas 24.1-12; Juan 20.1-10)

¹ Yehti köbö jadükakrä nikanina ta angwane, María Magdalabo, María Santiago meye, btä Salomé käkwe jändrän rä mane kökani mda mikadre Jesu ngwäkä ngrabare.

² Abti ñänä jatani gökökä krire käin bämante dekä angwane, nükanintre mda Jesu doboibti jändrän rä mane mikakäre ngrabare.

³ Nikanina nebe ja ken dobobti angwane, nikani niere jae kwärikwäri:

¿jä kri dikaro mikani dobobti ye, nirekwe mikadikä mento nie amarebti yere? namani niere kore jae ji ngrabare.

⁴ Namanina kanti angwane, nikrabare kwetre angwane, jä kri abko ñakare täte kä mkäbti amne kä mkäbe tökare se kwrere, btä okwä namanintre.

⁵ Bti nikanintre nikrenkä nguse kä mkäte angwane, ni bati btä dän nga ngwen bürere abko angele aibe nämane tākänintbe niaratre küde ruenkri, btä okwä namani angwane nekwetaninkä ni yehtë.

⁶ Akwa angele kwe niebare nitre merire yeye:

Mun ñan rekwetaka tibtä. Jesu Nazarebo müre ketani krusobtä, doboi mikani nete abko munta näin tuenta kanti, ye gare kuin tie, akwa Jesu ye nürate nire, aisete ñakare nete amne kä mkä be nebe tökare niara täbti, mun jakwe tuen.

⁷ Mun rikata, kākwe nie krörö nitre ja töitikaka Jesube yeye btä Pedroye: Jesu nürate nire, bike niken Galilea ja ükärökäreta ketetibe munbe, kánti munkwe ja tuadita ben, niebare kwe munye ye kwrere, munkwe nie kore ietre, niebare angelekwé nitre merire yeye.

⁸ Yebti nitre merire nimä ye nikaninta angwane, nikani betekä ngitieta dobobti mentokwäre, ñobtä ñan angwane nekwetaninkä krübäte. Moto namani bete tükü tükü. Mden kisete namanintre grükekä jökrä ngrabare angwane, kã jürä namani krübäte dikaro btätre, aisete kukwe nakaninkä ño ño nin niebare jire chi kwetre ni mda mdaye abko kukwe nakaninkä kore Jesubtä. Ne abko kore.

Jesukwe ja mikaninta tuadre María Magdalaboye

⁹ Bämänte dekä, Jesu nukaninta nire angwane, María Magdalabo, btä üai käme nämane krä kükü juanintari Jesukwe, ye ara jire, ie ja mikani tuare käne Jesukwe.

¹⁰ Yebti nitre ja töitikaka Jesube nämane diäne müen abko, ie Jesu nukaninta nire, María jananbare niere.

¹¹ Jesu nukaninta nire jakwe tuani niebare Mariakwe, akwa María nämane blite ngwarbe namanintre nütüre btä, aisete ñan kukwei mikani era kwetre.

Nitre nibu ja töitikaka Jesube, ie Jesukwe ja mikaninta tuadre

¹² Abti ni nibu ja töitikaka Jesube nikani juta Jerusalén bäre mento angwane, batibe Jesukwe ja bä kwitani jene, kākwe ja mikani tuare ietre ji ngrabare,

¹³ bti nikani mda, kākwe niebare nitre ja töitikaka Jesube mda mda yeye, akwa ñan kukwe mikani era kwetre arato.

Jesukwe sribi biani nitre ja töitikaka benye

¹⁴ Abti nitre ja töitikaka Jesube ni jätäbti iti nämane mröre angwane, batibe Jesu nükani ja mike tuare ietre. Akwa Jesu nukaninta nire, ye ni tuakatuaka kākwe niebare nitre ja töitikaka ben yeye abko ñan kukwei kani ngäbti jire chi kwetre, yebtä Jesukwe ñäkäbare ietre.

¹⁵ Bti Jesukwe niebare mda ietre:

Kukwe kuin tibtä, ye mun rika mike gare kã ketareketare temen.

¹⁶ Munkwe kukwe ye mikadi gare, ye nire nire kākwe kadi ngäbti angwane, ja ngökadi ñöte kwe ti käbti, ni ye abko Ngöbökwe dianditari, akwa nire nire kākwe ñan kukwe ye kadre ngäbti abko ñan diandretari kwe, akwa Ngöbökwe mikadi ja tare nike kri.

¹⁷ Angwane, nitre tödekaka tibti abko kākwe jändrän nuendi krörö ti diebti: Üai käme juanditari mento nibtä kwe, ni kukwei jenena gare ñakare ietre abko bti blitadi kwe Ngöbö Üai köböire.

¹⁸ Nane tbi krübäte diandre kisete kwe, arato nane kräkä krübäte ni kãmikakrä ñadre kwe, akwa ñan jraindre kisete. Mräkäre abko, ni bren bren bti kise mikadi kwe abko rabadita quinta ti diebti. Ye abko, nitre tödekaka tibti, ie kukwe rabadi bare kore. Abko kore se, niebare Jesukwe nitre ja töitikaka benye.

Jesu nikaninta kã käinbti

¹⁹ Ni Dänkien Jesu kākwe blitabare ünän kore nitre ja töitikaka benbe, bti Ngöbökwe kaninkä käin, nikani ben kã käinbti, kánti mikani tãkäninte kwe ja küde ruenkri. Ye kwrere mikani bäri ütiäte kwe jae.

²⁰ Abti nitre ja töitikaka Jesube abko nikani mda kã ketareketare te. Kukwe kuin nuenbare Jesukwe abko nikanintre mike gare ni jökräye. Angwane jändrän ñan rabadre bare ja di jenbti abko namani nebe bare ietre Jesu diebti, niaratre kukwei rabadre era ni mda mdakrä, abkokäre ni Dänkien Jesu namani die mike kore abko kukwe nakaninkä kore Jesubtä. Ne ngörä.*

* 16:20 Versículo 9-20 abko ñan tä tikani manuscrito bäri kuinquin btä.

Kukwe Kuin Jesubtä Tikani Lucakwe Lucas

Ni kädian nämane Lucas abko kākwe tärä ne tikani niara kukwe muko Teófilo kräke. Teófilo abko ni romanobo ütiäte kri nütüta. Jesukwe dre dre nuenbare amne dre dre diribare kwe rabadre gare metre Teófiloye, abkokäre Lucakwe tärä ne tikani kräke.

Jesu jatani ni jökrä diantarikäre abko Lucas tä mike gare tärä nebtä. Ñan Jesu jatani nitre israelita aibe kräke, akwa Jesu därebare kä nebtä ni jökrä die mikakäre abko Lucas tä niere. Erere arato, Jesukristo jatani niara Rün Ngöbö mike gare ni jökräye abko Lucas tö namani mikai gare bäri.

Lucas abko sribi muko Pablokwe abko gare nie, ñobtä ñan angwane tä tikani kore Colosenses 4.14; Filemón 24 amne 2 Timoteo 4.11. Lucas abko ñakare israelitare nütüta amne niara abko kräkä bianka tä gare nie. Lucas kākwe tärä ne tikani juta Romate kä 60-79 ne ngwane nütüta. Lucas kākwe tärä Hechos tikani Teófiloye arato.

Kukwe känkäne

¹⁻² Ngöbökwé kukwe mikanintbe ño ño abko erere namani bare Jesu köböire ni ngätäite, ye abko nitre nikani dikekä käne Jesube kākwe tuani ja okwä jenbti. Kukwe kuin Jesubtä, ye abko ni tuakatuaka ye nämane sribire mikakäre gare. Erere arato, jändrän kuin nakaninkä ño ño Jesubtä ye ni tuakatuaka kākwe niebare nunye, erere ni kwati kākwe tikani täräbtä.

³⁻⁴ Ye kwrere ti tö namani tikai arato, aiseté kä nera kukwe nakaninkä ño ño Jesubtä abko ti nikani ngwentari kuin, aiseté mtare ti tö tikai metre ja täritäri makrä, ti kukwe muko ütiäte Teófilo, jändrän nakaninkä ño ño Jesubtä diribarera mae, ye rabadre gare bäri kuin mae, abkokäre tita kukwe ne tike krörö mae:

Juan Bautista däredi abko niebare Zacariäye

⁵ Bati jrei kädian nämane Herodes Kri nämane gobrane kä Judea yete angwane, ni blitaka Ngöböbe ni mda mda diäre kädian nämane Zacariäs nämane nüne yete. Niara abko ni blitaka Ngöböbe ni mda mda diäre kira kädian nämane Abias tukwe mräkä. Niara abko sribikä ju blitakrä Ngöböbe kanti. Nitre blitaka Ngöböbe ni mda mda diäre därebare Abias mräkäcri, ye ben nämane sribire. Meri Zacariakwe kädian nämane Elisabet abko ni blitaka Ngöböbe ni mda mda diäre kira kädian nämane Aarón tukwe mräkä arato.

⁶ Niaratre nibu nämane nüne era metre Ngöbö ngwärecri, ñobtä ñan angwane Ngöbö Kukweita dre nuemna, erere nämänentre mike täte metre. Mden kisete kukwe kwani ñakare ni mda mdaye kitakrä ngite.

⁷ Ye kwrere nämänentre Ngöbö Kukwei mike täte, akwa Zacariäs btä Elisabet nämane bati angwane namani jabe, akwa Elisabet küde mriani jabtä, aiseté ngäbäkre ñakare kwetre. Mdakäre arato, namanina unbre jökrä.

⁸ Akwa batira jire Abias tukwe mräkä blitaka Ngöböbe ni mda mda diäre nämane sribire ju blitakrä Ngöböbe kanti, ben Zacariäs nämane sribire gwaire angwane,

⁹ nämänentre ni den iti ja ngätäite kri ngwäri mnü rä bäne kukwe Ngöbö ngwärecri. Ne abko nämänentre nuene käre köbö kwatirekwatire. Te Zacariäs kábä namani sribi yebtä, ñobtä ñan angwane kä ngidianinkä aiseté. Ne erere niara diani sribi ye nuenkä kwetre kä demente ju blitakrä Ngöböbete.

¹⁰ Ye erere kä nükani angwane, Zacariäs nikani kri ngwäri mnü kukwe kä demente angwane, ni kwati mda namani blite Ngöböbe ju bäre.

¹¹ Zacariäs nämane kri ngwäri mnü kukwe jäme, te batibe angele ni Dänkienke jatabare ie. Angele ye nämane ñukwä grä kri mnü rä bäne kukwakrä ne kwäräkri, niara küde ruenkri se kwrere. Btä okwä namani angwane,

¹² ¡aiteeje, ni rä nekwetaninkä ya! Namani grükekä jökrä ngrabare.

¹³ Btä räbe angelekwe niebare ie:

Zacariäs ma ñan rekwetaka tibtä. Ma btä Elisabet kākwe ngäbäkre käräbare Ngöböye, erere Ngöbökwé mun kukwei nuanina, aiseté meri makwe Elisabet yekwe ngäbäkre brare ngibiadi. Ye makwe kädian Juan.

¹⁴ Ngäbäkre däredi ye kä rabadi nuäre mabtä amne, ni kwati mda mda, btä kä rabadi nuäre siba,

¹⁵ ñobtä ñan angwane niara rabadi ütiäte kri ni Dänkien ngwärecri. Mdakäre abko, niarakwe nin uba döi btä dö kwakakwaka mda ñadre jire chi. Arato niara ngämi däre, känenkri Ngöbö Üai Deme tädira täte btä.

¹⁶ Juan rabadi ütiäte kri ni Dänkien ngwärecri, ñobtä ñan angwane niarakwe ni israelita kwati mikadita ja mäketä niaratre Dänkienbe.

¹⁷ Ne abko Ngöbö kukwei niekä kädian nämane Elías nämane sribire mekera Ngöbö Üai köböire amne Ngöbö diebti, ye kwrere Juankwe sribidi niara Dänkien känenkri, nitre israelita mikakäre biare niaratre Dänkien kaen ngäbti. Mdakäre abko, ni kwati tä ja rüere ngäbriänkätrebe, arato ngäbriänkä tä ja rüere rünbe abko ie ja mäkämanta jabe kwärikwäri kwe. Erere arato, ni kwati tä ja dokwä mike ribi Ngöbökrä abko ie ja toi kwitamnanta kwe tödekakäre Ngöböbti. Ye kwrere, Juankwe ni kwati mikadi juto, ne abko kwe rabadre biare ni Dänkien kaen ngäbti. Ne mden kisete, kä rabadi nuäre ni kwatibtä, niebare angelekwé Zacariaye.

¹⁸ Zacariás kákwe ngwianintari mda ie:

Ne abko ño sere ti tö nibi gai bäri metre tie. Nun nena unbre, dokwä ngwen bürere jakän. ¿Se ño amarebti, ngäbäkre däredre nunkwe sere? niebare kwe ie.

¹⁹ Angwane angele kákwe niebare mda ie:

Ti kä Gabriel. Ti ne mmenta sribire Ngöbö ngwäreki kä käinbti. Niarakwe ti juni blite mabe kukwe kuin ne mikakäre gare mae.

²⁰ Akwa makwe ñan ti kukwei miri era, aisete mtare mentokwäre ngäbäkre makwe ngämi därere, känenkri ma kukwei rötadi. Akwa kukwe ne rabadi bare täte jökrä angwane, batibe ma kukwei gitadita. Abko kore se, niebare kwe ie.

²¹ Kukwe ne nämane nakenkä angwane, nitre nämane ju bäre temen Zacariás ngibiare abko namanintre niere jae kwärikwäri:

¿Ne ñobtä amarebti, Zacariás nibi ngrötöte krübäte kä demente nere? namanintre niere jae kwärikwäri.

²² Abti raire erere angwane Zacariás jataninta ju bäre. Niara tö namani blitai bentre, akwa nin kukwe namani ngütietä jire chi angwane, Ngöbökwé kukwe mikani tuare jabtä ie kä demente aisete, namanime blite jirekäbe kisebti kore mda abko nükani gare ietre.

²³ Kä kitani sribikäre namani bare angwane, Zacariás nikaninta ja gwirierte.

²⁴⁻²⁵ Abti mda Elisabet namani bren, bren kwe kisete. Yebtä niara namani ja bäine dikakabtä sö krärike gwi. Nin namani näin kwäräkwarä. Namani nütüre: Ti Dänkien kákwe ti die mikaba, aisete tita ngäbäkre ngibiare. Kä näirare ni kwati kákwe ti mikaba ngwarbe, ñobtä ñan angwane ngäbäkre ñakare tikwe. Mtare ñan rabare ñäke tibtä, ñobtä ñan angwane tita ngäbäkre ngibiare aisete, nütübare kore kwe.

Jesu däredi Mariakwe abko angele nükani niere ie

²⁶⁻²⁷ Nebti Elisabet bren sö krä tira angwane, Ngöbökwé angele Gabriel juani mda kä Galilea yete nebe juta Nazarete, kukwe mike gare meri iti kädian nämane Mariaye. Ni merire ne abko bati kaibe, deme arato; ja mike gure ñakare jire chi, akwa nämänena mikani jakrä kwärikwäri ni kädian nämane Josébe. José abko jrei David tukwe mräkä.

²⁸ Ne erere angele nükani María kánti, kákwe niebare ie:

Ñantöre mae. Ngöböta ja moto mike bäri kuin makrä meri mda mda ngwä, aisete niarata ma die mike, niebare angelekwé ie.

²⁹ Mariakwe angele ne mikani ñäräre angwane, nekwetaninkä niara kukweibtä. Abtä namani nütüre: ¿Se ñobtä angele kákwe köbö ngunintari kore tie sere? namani nütüre.

³⁰ Angwane angele kákwe niebare mda ie:

María, ma ñan kä jürä ngwian jabtä. Ma käi nuäre Ngöböbtä.

³¹ Makwe ngäbäkre brare ngibiadi iti abko makwe kädian Jesu.

³² Niara rabadi ütiate kri. Niara kädiandi Ngöbö Kri Kä Käinbti Odeire amne niara mräkä jrei David tukwe nämane gobrane kira, täte niarakwe gobrandi.

³³ Niara rabadi gobrane kärekäre nitre israelita ngätäite amne gobrain ñan krütadi jire chi, niebare kore angelekwé ie.

³⁴ Mariakwe niebare mda angele yeye:

¿Ti ngämi ja mike gure, amarebti mata niere kore tie yere?

³⁵ Angele kákwe niebare mda ie:

Ne ñobtä tita niere raba ruen mae, ñobtä ñan angwane Ngöbö Üai Deme rükadi mabtä. Ye ngwane Ngöbö Kri Kä Käinbti di tädi mabtä arato. Ye mden kisete ngäbäkre däredi makwe, ye abko deme amne Ngöbö Odei jen kwe. Mdakäre abko ti bike kukwe mda niere mae abko krörö:

³⁶ Ma mräkä Elisabet kákwe ngäbäkre ngibiadi. Niara nena biyore akwa, sö krä tira tä bren, bren kwe kisete arato. Meri ne mden di ñakare ngäbäkre ngibiakrä, aisete odei neme ñakare jire chi, nieta btä amarebti tä kore.

³⁷ Tita niere mae, Ngöbö di tarä jändrän jökrä nuenkrä abko rabadre gare mae, aisete niara di tarä kukwe ne ngwiankrä bare mabtä arato raba gare mae, abkokäre tita niere mae. Ne abko kore, niebare kore angelekwé Mariaye.

³⁸ Mariakwe niebare mda ie:

Makwe kukwe nini tie, ne erere raba bare jire jökrä tibtä angwane, ti Dänkien tö ti mikai dre dre nuene, erere ti tö nuein tie. Abko kore se, niebare kwe angele yeye.

Bti angele nikaninta kä käinbti.

María nikani basare Elisabeye

³⁹ Nebti María nikani jötrö ngwarbe Zacarías btä Elisabet kánti kukwe niebare ie Elisabebtä tuakäre. Zacarías amne Elisabet abko nämane nüne mintokwäre kä Judea yete.

⁴⁰⁻⁴¹ María namani Zacarías kánti, nikani gwä, kákwe köbö ngwianintari Elisabeye. María kukwei jarabare Elisabeye angwane, btäräbe ngäbäkrekwe betatebare Elisabebtä amne Ngöbö Üai Deme nukaninbe täte btä.

⁴²⁻⁴⁴ Yebtä kä namani nuäre Elisabebtä, kákwe ñäkäbare jume mda Mariäye:

¡Jo! Ngöböta kukwe kuin nuene era metre makrä ni merire jökrä ngwä. Ye kwrere ngäbäkre ngämi därene makwe, kräke Ngöböta kukwe kuin nuene arato. Angwane meri ti ne kwrere ie basa dre sera amarebti Ngöböta kukwe kuin nuene makrä, ma ye abko nüke basare tie. Ne ñöbtä ñan angwane ma abko ti Dänkien meye aiset. ¿Se ñöbtä ma nüke basare tie sere? Ne ñöbtä raba ruen mae, ñöbtä ñan angwane makwe köbö ngunintari tie, btäräbe ngäbäkrekwe bitite tibtä, kä ngwini juto jabtä kwe ma kukweibtä aiset.

⁴⁵ Ngöbö köböire käta neme nuäre mabtä, ñöbtä ñan angwane Ngöbökre ja kukwei niebare mae ngäbäkre makwebtä abko namani era makrä angwane, dre dre niebare kwe mae, ye erere rabadi bare jire jökrä ie, aiset tita niere mae. Abko kore se, niebare kwe Mariäye.

⁴⁶ Abtä Mariakwe niebare mda:

Ti bike ti Dänkien Ngöbö käikitekä.

⁴⁷ Ngöbö ti Diantarikä käi nibi nuäre kri tibtä,

⁴⁸⁻⁴⁹ ñöbtä ñan angwane ti bobre, ütiäte ñakare, akwa ti Dänkien Ngöbö kákwe ti tarebare kri. Ngöbö Di Kri kákwe kukwe nuenba kri tikrä.

Nebtä mtare mentokwäre, Ngöbökre kukwe nuenba kuin krübäte tikrä abko ni jökrä rabadi niere tibtä.

Ma abko deme käre Ngöbö.

⁵⁰ Ni nünanka kira amne ni nünanka kä ne ngwane käta Ngöbö mike ütiäte jae amne tä niara jürä ngwen jabtä.

Ni ye abko tä ruentari tare kärekäre Ngöböye abko krörö:

⁵¹ Ngöbökre sribi kri nuenbare ja di kribti amne, nire nire nämane bike krikri Ngöbö rüere abko Ngöbökre juani ngwarbe.

⁵² Erere arato, gobran krikri abko kitani timon, akwa ni bobre bobre abko Ngöbökre mikani ütiäte kri, kákwe die mikani.

⁵³ Mdakäre abko, nitre tu neketebe mrö miare abko ie jändrän kuinquin biani täte kwe amne, nitre jändrän bkäne kabre abko kän jändrän dianinkä jökrä kwe.

⁵⁴⁻⁵⁵ Ngöbökre nitre israelita dianinkä sribikä jabe abko die mikani kwe amne ngwiani ruentari tare kwe jae ño kukwe ükaninte kwe ni ruai mrö känekänebe ye kwrere.

Mdakäre abko, Abraham btä Abraham ngäbriänkäre ja täritäri kädianta nitre israelita die mikadi Ngöbökre.

Mden erere ni käi kwitakata ñakare jabtä Ngöbökre amne ni die mikata kärekäre kwe ja täritäri. Abko kore se,

niebare Mariakwe.

⁵⁶ Yebti Mariakwe nünabare sö krämä Elisabet kánti, bti jataninta ja gwiriete Nazarete.

Juan Bautista därebare Elisabekwe

⁵⁷ Abti mda ja ngibia käi nükan Elisabeye angwane, ngäbäkre brare därebare iti kwe.

⁵⁸ Ne gani Elisabet mräkätrekwe btä kukwe muko mda mda kákwe gani angwane, jatanintre käi ngwen nuäre jabtä ben, ñöbtä ñan angwane Ngöbökre kukwe kuin nuenbare Elisabekrä, aiset niaratrekwe käi ngwiani nuäre jabtä arato.

⁵⁹ Kwäira erere angwane, ngäbäkre ne kwata tikaninkä ñäräkrä mikakrä, ne abko kwe rabadre juta israelitare siba abkokäre. Ye ngwane niara kädian jababare rünbti mräkätrekwe,

⁶⁰ akwa meye Elisabet abko ñan tö namani, kákwe niebare mda:

¡Ñakare! Ngäbäkre ne kädiandi Juan, niebare kore meyekwe.

⁶¹ Zacarías mräkätre kákwe niebare:

¿Ma mräkä mden mden kädian tärä kore abko erere ma tö nibi ma ngobo kädiain sere? niebare kwetre mda ie.

⁶² Ne ngwane ngäbäkre rün abko tö namani ngobo ne kädiain ño abko tö namanintre gai, aiset Zacarías kákwe ngäbäkre kä tikadre kri kukwänbtä abko niebare kisebti kwetre ie.

⁶³ Abtä Zacariakwe kri kukwän käräbare ietre, ngobo käi tikakäre btä. Ne erere tikani kwe kri kukwänbtä: Ngäbäkre kädian Juan, tikani kore kwe. Nebtä namanintre töbike kri mda.

⁶⁴ Te batibe, Zacarías kukwe ngitianinkäta se kwrere, käkwe Ngöbö käikitaninkä mda.

⁶⁵ Yebtä abko, mräkäre nekwetaninkä, tõi ñan namani krütare batibe Zacariäbtä amne ngäbäkre kwebtä. Kukwe ne nakaninkä Zacarías juete abko kädrie namani jire jökrä ngwitäräta temen kä kiakiate Judea yete.

⁶⁶ Angwane ni jökrä käkwe kukwe ne gani angwane abko ngäbäkre ne ñakare ngäbäkre mda mda kwrere, ñobtä ñan angwane ni Dänkien nämane niarabe namani tuen ietre, aisete namanintre töbike krörö: ¿Ngäbäkre se rabadi ño sere? namanintre töbike ngäbäkre chi Juanbtä.

Zacariäkwé Ngöbö demainbare

⁶⁷ Yebti Juan rün Zacarías kukwe ngitianinkäta angwane, Ngöbö Üai Deme nükani btä angwane, Ngöbökre dre nuendi nitre israelitakrä abko niebare krörö kwe:

⁶⁸ Ngöbö nitre israelitakwe, ma ti Dänkien.

Tita ma demaine, ñobtä ñan angwane ma kitera nitre israelita jen makwe dentari,

⁶⁹ käkwe ni Diantarikä di kri juni nun kräke.

Niara abko jrei David tukwe sribikä makwe ye mräkä.

⁷⁰ Mekera makwe ni Diantarikä juandi abko makwe niebare nitre israelitaye ma kukwei niekä deme köböire abko mden nere:

⁷¹ Nitre ja rüere nun israelitabe btä nitre mätä nunbtä, ye ngäniene makwe nun ngibiadi amne nun dianditari kwe abko makwe niebare nunye.

⁷² Erere arato, nun ruai mrö känekäne, ye rabadi ruentari tare mae, makwe niebare ietre. Mden kisete makwe kukwe ükaninte kuin metre nun ruai mrö känekänebe, ye ñan käi rikwitadrekäta jire mabti, makwe niebare ietre.

⁷³ Ti Dänkien, makwe ja kukwei biani kwatibe nun ruai mrö Abrahamye kira abko krörö:

⁷⁴⁻⁷⁵ Ni rüe jürä ñan rabadre mda niabtä amne, ni rabadre nüne jäme amne deme sribikäre makrä, abkökäre makwe ni dianditari ni rüe ngäniene, makwe niebare Abrahamye abko erere mata ngwena bare.

⁷⁶ Bti Zacariäkwé niebare krörö Juanye:

Ma ti ngobo chi tikwe, ma rabadi ünän angwane, ma abko Ngöbö Kri Kä Käinbti kukwei niekä, niedi mabtä, ñobtä ñan angwane makwe nitre israelita tõi mikadi biare ni Dänkien käne ño, ji ükateta niken kuin ni dänkien jrei käne ye kwrere.

Ma nändi nitre israelita mike biare abko krörö:

⁷⁷ Makwe Ngöbö kukwei niedi kore nitre israelitaye angwane, ni ngite kukwe kämekäme nuenbtä, ye Ngöbökre diandikä jire jökrä btä, ñan ja tare nikadre kwetre abkökäre, abko erere makwe niaratre mikadi biare ni Dänkien käne.

⁷⁸ Ye kwrere Ngöbökre nuendi, ñobtä ñan angwane nitre israelita ruentari tare kri Ngöböye aisete.

Ñänänta kite kuin dekä dekä amne, käta nebe tuen kuin jökrä nie, ye kwrere abko Ngöbökre ni Diantarikä juandi, käkwe Ngöbö mikadi gare metre nie.

⁷⁹ Ño kä ikote käta nebe tuen ñakare nie, angwane kä jüräta nebe krübäte niabtä, ye kwrere ni ie Ngöbö gare ñakare abko gata jürä krübäte btä.

Ni ye abko, ie ni Diantarikä juandi Ngöbökre abko käkwe Ngöbö mikadi gare metre, ñänänta kite kuin dekä dekä amne, käta nebe tuen kuin jökrä nie ye kwrere.

Ye köböire abko, ni rabadre nüne jäme Ngöbö ngwärekre kä nebtä amne ñan kä jürä rabadre mda niabtä, abkökäre ni Diantarikä juandi kwe. Abko kore se, niebare Zacariäkwé ngäbäkre chi Juanbtä.

⁸⁰ Ngäbäkre Juan ne abko nikani niren, nikani niren ja tõi metrebti. Niara namani ünän angwane, nikani nüne kä kaibete. Namani nüne yete abti kä nükani ie blitakäre Ngöböbtä nitre israelita ngätäite.

2

Jesu därebare juta Belénte (Mateo 1.18-25)

¹ Ne ngwane emperador romanobo kädian nämane Augusto César käkwe ni jire jökrä kä tikamna taräbtä kä jökräbti temen gadre jae.

² Kä ye ngwane abko, ni iti kädian nämane Cirenio nämane gobrane kākä Siria yete angwane, emperador Augustokwe kukwe ne mikanintbe krirre kena.

³ Ye mdenbtä ni jökrä nikani ja käite, ruäre ja gwiriete ja kä tikakäre taräbtä.

⁴ Ne mden erere, José abko nikani Belén ja kä denkä taräbtä. Niara nämane nüne juta Nazaret kä Galilea yete. Niara abko, jrei David tukwe kira mräkä, aisete niara gwirrie jen kwe abko Judea juta Belénte. Juta Belén kánti jrei David tukwe därebare kira akwa,

José nãmane nũne Nazaret angwane, emperador Augustokwe kukwe ne mikanintbe, aisetse niara nikaninta Belén ja kã diankakãreta tãràbtã.

⁵ Niara btã Mariã nãmane mikani jakrà kwãrikwãri, jãnikani kwe siba jabe Belén. Mariã abko ñan mobe, bren kwe kisete, akwa jãnikani kwe nebe Belén.

⁶ Namani Belén, btãràbe ja ngibia kãi nũkani Mariãye.

⁷ Ngãbãkre mubai dãrebare brare Mariakwe, mriantinte kwe dãn kukwãnte. Angwane kri kukwãn sribebare jãndrãn bukakrà, te mikani kwe, ñobtä ñan angwane ju ütiã biandre kibiakrà ñan kwani jire chi ietre nũnantbekrà ngãbãkre kwe yebe.

Jesu dãrebare abko angele nũkani niere obeja ngibiakatreje

⁸⁻⁹ Kã ye ngwane, nitre nãmane obeja ngibiare jakrà dibire ta juta Belén kenta temen. Nãmamentre jãme, te batibe angele jatabare iti ietre se kwrere. Btãràbe kã trã Ngõbõkwe niabare ngwen jõkrã niaratre bãre temen. Abtä nekwetaninkã amne moto namani bete krübãte.

¹⁰⁻¹¹ Btãràbe angelekwe niebare ietre:

Mun ñan rekwetaka tibtä, ñobtä ñan angwane ti ki kukwe kuin mike gare munye. Kukwe ne abko, ni jõkrãkwe kãi ngwiandi nuãre kri jãbtã, ñobtä ñan angwane mtare ngãbãkre dãreniri iti juta Belén, David kãite sete. Ngãbãkre ne abko mun Diantarikã. Niara abko Ni Dianinkã Ngõbõkwe amne niara abko ni jõkrã Dãnkien.

¹² Mdakãre abko, ti kukwei metre ya, ñakare ya rũkadre gare krõrõ munye: Mun rika mike ñãràre. Ngãbãkre ye kwandi mriantinte dãn kukwãnte. Kri kukwãn sribebare jãndrãn bukakrà te tãdi mikani, kwandi munye angwane, ti kukwei metre gadi munkwe. Ne abko kore, niebare kwe ietre.

¹³ Ye btãràbe, angele mda mda mata namani kwati angele ne kãnti okwãbtitre se kwrere, kã namanintre Ngõbõ kãikitekã krõrõ:

¹⁴ Ngõbõ kri kã kãinbti, ma aibe ütiãte kri.

Nunta ma kãikitekã, ñobtä ñan angwane makwe ngãbãkre ne juni kã nebtã, aisetse kã jãmenta kã temenbtã ni ngãtãite.

Erere mata blite jãme nitre nebe kã temenbtã,

namanintre niere kore obeja ngibiakatre okwãbti, bti nikanintreta kã kãinbti.

¹⁵ Nikanintreta jõkrã angwane, obeja ngibiakatre namani blite jabe kwãrikwãri, kã namani niere:

Dreta nakenkã Belén sete abko ni Dãnkienkwe miri gare nie, ye brãn mike ñãràre, niebare kwetre jae kwãrikwãri.

¹⁶ Erere bkãnä, nikanintre jõtrõ ngwarbe Belén. Namanintre yete angwane, ngãbãkre kwani ietre mikani kri kukwãnte. Mariã btã José abko nãmane tãkãninbe ken, btã namanintre.

¹⁷ Ngãbãkre jatabare ietre, bti nikani angwane, angele kãkwe kukwe niebare ietre ngãbãkre yehtë, ye kãdriebare kwetre ni mda mdabe.

¹⁸ Kukwe ye gani ni kwatikwe angwane, tõi ñan namani krütare erebe jõkrã.

¹⁹ Akwa kukwe niebare ie obeja ngibiakatrekwe, yehtë abko Mariã namani tõbikwe kri kaibe.

²⁰ Obeja ngibiakatre kãkwe kukwe tuani amne ni kukwei nuani kwetre, yehtë nikani Ngõbõ kãikitekãta ja jiebti se kwrere. Angele kãkwe kukwe niebare ietre, ye erere nakaninkã jõkrã btãtre.

Mariã btã José nikani Jesu ngwena ju blitakrà Ngõbõbe kãnti Jerusalén

²¹ Kõbõ kwãira erere angwane, Mariã btã José kãkwe ngãbãkre ne mikani kwata tikadre kã ñãràkrã mikakrà angwane, kãdiani Jesu kwetre arato, angelekwe nuemna Mariãye, niara ngãmi bren, bren kwe kisete ye kãnenkri. Ye erere abko nãmane ja tõibtã kwe, erere nuenbare kwetre.

²²⁻²⁴ Abti kõbõ ja mikakràta dbe Ngõbõ ngwãreki mikani nuendre Ngõbõkwe nitre israelitaye, ye nũkani Mariãye angwane, nikani Joséje ju blitakrà Ngõbõbe juta Jerusalén yete, ja mikakãreta dbe Ngõbõ ngwãreki. Ne erere niaratre nikani ju blitakrà Ngõbõbe juta Jerusalén yete ütü kiare kubu o ütü ngãbãli kubu bien kukwadre Mariã krãke Ngõbõye, Kukwe Biani Ngõbõkwe Moiséye ye mikakãre tãte jõkrã. Erere arato, Mariã btã José nikanintre Jerusalén angwane, nikanintre ngãbãkre mubai Mariãkwe ngwena siba jabe mikakãre gare Ngõbõye, ñobtä ñan angwane “Ngãbãkre mubai jire jõkrã abko rãn btã meye kãkwe mikadre gare Ngõbõye” abko Dãnkien Ngõbõ kãkwe nuemna kore nitre israelitaye ja Kukweibtä, erere nuenbare kwetre ju blitakrà Ngõbõbe yete.

²⁵ Kã ye ngwane abko, ni nãmane nũne iti juta Jerusalén yete abko kãdian nãmane Simeón. Ni ye abko nãmane nũne era metre Ngõbõ ngwãreki amne Kukwe Biani Ngõbõkwe Moiséye

ye nămane mike tăte arato. Erere arato, Ni Dianinkă Ngôbôkwe kăkwe nitre israelita moto mikadi jăme abko Simeón nămane ngibiare ngăbti amne Ngôbô Ūai Deme nămane btă.

²⁶ Mdakăre abko, Ni Dianinkă Ngôbôkwe ne ngămi tuen, kănenkri űan jraindre abko Ngôbô Ūai Deme kăkwe mikani gare ie.

²⁷ Ye năire Ngôbô Ūai Deme kăkwe Simeón tói mikani niken ju blitakră Ngôbôbe ye kănti. Angwane Mariă btă José nikani ngăbăkre Jesu ngwena yete arato, Kukwe Biani Ngôbôkwe Moiséye ngăbăkre mubaibtă mikakăre tăte angwane,

²⁸ nikanintre gwăkăre angwane, Simeón ne jatani nemente, kăkwe Jesu diani, ketani jabtă kwe, bti Ngôbô kăikitaninkă okwăbti kwe se kwrere, kăkwe niebare krôro:

²⁹⁻³⁰ Ti Dănkien Ngôbô, makwe kukwe niebare tie, erere mtare năbira bare mae.

Ne aisetse ti sribikă makwe ne tuemetre jraine jăme jakăn, űobtă űan angwane makwe ni juani nitre Diantarikă, ni ye mden abko tikwe turira.

³¹ Ni ne mden abko makwe juani ni jôkră krăke.

³² Mdakăre abko, űotra tră kakata ni kăne kă ikote, ye kwrere ma űo abko niarakwe mikadi gare nitre űakare israelitareye.

Ni kwati kăkwe nitre israelita mikadi űitiăte, űobtă űan angwane niara dărebare nitre israelita ngătăite aisetse. Abko kore se,

niebare Simeónkwe Ngôbôye.

³³ Abtă José btă Jesu meye abko tói űan namani krûtare Simeón kukwei nuare Jesubtă.

³⁴⁻³⁵ Nebti Simeón kăkwe ja di kărăbare Ngôbôye krăketre angwane, niebare kwe Jesu meye Mariaye:

Ngôbôkwe ngăbăkre ne juani akwa niara űnăn angwane, ni kwati űitiăte űakare abko rabadi mikani űitiăte amne ni kwati űitiăte abko rabadi mikani űitiăte űakare niara kôbôire. Mdakăre abko, ni kwati moto űo űo abko Ngôbôkwe niara mikani mikakăre gare amne, ni kwati tă tôbike űo űo Ngôbôbtă abko niarakwe mikadi gare. Abtă ni kwati rabadi ja rüere ben, aisetse űo ni giatiaka nguse ngitrabti tă ja tare nike krúbăte, ye kwrere ma moto ôtatite niara jiebti. Abko kore se, niebare Simeónkwe Mariaye.

³⁶⁻³⁷ Ne kănti abko, ni kădian nămane Aser tukwe abko mrăkă kădian nămane Fanuel abko ngănkăn Ngôbô kukwei niekă kădian nămane Ana nămane siba ju blitakră Ngôbôbe kăntita. Ana abko nămane bati ngăbăkrere angwane, namani gure akwa nănabare kă kwă kükübe kwe brarebe amne brare krütani kăn, bti namani kaibe. Ana ne abko namanina dokwă ngwen bürere, kă namani gre ketabkă bti kobkăra ie, nămane siba ne năire. Batibe nikani ju blitakră Ngôbôbe kăntita. Ye kănti nămane kăre kôbô kwatirekwatire Ngôbô kăikitekă amne, nămane ja băine Ngôbôkră amne nămane blite Ngôbôbe.

³⁸ Ne aisetse Simeón nămane blite Mariabe ngăbăkre Jesubtă, ne btărăbe Ana mata nükani, kă nikani Ngôbô kăikitekă ngăbăkre Jesubtă. Erere arato, nitre israelita nănanka Jerusalén nămane ni ni diantarikă ngibiare ngăbti abko erere ben Ana nikani blite ngăbăkre Jesubtă.

³⁹ Nebti Kukwe Biani Ngôbôkwe Moiséye, erere Mariă btă José kăkwe mikani tăte jôkră, bti nikaninta ngobo kwebe ja kăite, juta Nazarete Galilea.

⁴⁰ Namaninta ja kăite, kănti ngăbăkre Jesu nikani niren kuin dite ngrabare amne, namani niren bări tóbtă. Ne abko Ngôbô namani ja moto mike kuin krăke, aisetse namani niren kore.

Ju blitakră Ngôbôbe, kănti Jesukwe ja mikaninkă blitakăre dirikă krikri be

⁴¹ Jesu nămane niren angwane, bieta ban te lebadura mikani űakare kweta nămane kădianta Pascua, bieta ne kăre nuen nămane kă kwatirekwatire juta Jerusalén. Kănti kăre kă kwatirekwatire Jesu meye btă José nămane niken siba.

⁴² Ne erere bati, kă kwă jătăbti kubu Jesuye angwane, Pascua kôbô nükantinta mda. Ye năire abko, José btă Mariă nămane niken kăre kă kwatirekwatire, ye erere nikaninta mda Jesube.

⁴³ Abti Pascua kôbô nükani ta angwane, José btă Mariă ngidianinkă, nikaninta ja gwirire kukwăre amne Jesu ngăbăkrere namani Jerusalén abko nin gani kwetre.

⁴⁴ Akwa Jesu nămane năin ja kukwe muko ngătăite nămanentre nütüre, aisetse namanintre năin jăme. Te nănbarera kôbôiti jire kwetre ji ngrabare angwane, nikani Jesu kănentari mrăkă btă kukwe muko ngătăite nekwăre sekwăre.

⁴⁵ Nikani kănenentari, nikani kănenentari se kwrere, akwa nin kwanintari jire ietre. Abtă nikanintreta ja jiebti nebeta Jerusalén Jesu kănentari.

⁴⁶ Kă nikani kôbômă ta angwane, nikanintre nebeta Jerusalén, nikanintre nebeta amne Kukwe Biani Ngôbôkwe Moiséye dirikătre nămane ju blitakră Ngôbôbe băre abko ngătăite Jesu nămane tăkănantbe. Niara nămane nitre dirikă kukwei nuen. Erere arato nămane kukwe ngwentari kabre mda ietre.

⁴⁷ Kukwe ngwiantari namani Jesukwe ne abko, ni tóbtă tóbtă raba blite, se kwrere namani blite. Mden kisete ni niara kukwei nuaka nuaka űan tói namani krûtare kukweibtă.

⁴⁸Jesu nămane blite kore, btă meye amne José nikani nebeta angwane, ñobtä abko nămane blite dirikă rikri be abko ñan tōi namani krūtare tuare ja kăne, bti meyekwe niebare mda ie:

Ti ngobo tikwe, ¿ñobtä mata nuene kore nunbtă yere, amarebti ma rŭn noko btă ti mata nun ngwen ja kănenatri kri tōbikare kwără ja jiebti yere? niebare Mariakwe Jesuye.

⁴⁹Abtä Jesukwe niebare mda meye:

¿Ye ño munta ti kănenatri krŭbăte dikaro kore yere? ¿Ti tădre ti Rŭn gwiriete arato, ye gare ñakare munye ya amarebti yere? niebare kwe ie.

⁵⁰Jesukwe ñăkăbare ne abko dre niebare kwe niara Rŭn kwebtă ñan namani nŭke gare ietre.

⁵¹Bti Jesu nikaninta meyebe btă Josėbe juta Nazarete. Jesu meye btă José nămane dre dre niere ie, erere nămane mike tăte jire jōkră. Akwa kukwe nakaninkă Jesubtä Jerusalén, abkobtä meye nămane tōbikare kri kalbe mda.

⁵²Jesu abko nikani niren bări kri amne nikani tōi ngitiekă bări kri arato. Mdakăre abko, Ngōbō nămane niara ngibiarebti kuin janknu amne ni kwati namani niara tarere kri arato.

3

Juan Bautista kăkwe ji tikani Jesu kăne

(Mateo 3.1-12; Marcos 1.1-8; Juan 1.19-28)

¹Abti kă kwă jătăbti kwărikera emperador Tiberio nikani gobrane ne ngwane, ni nămane gobrane krăke abko nere: Gobernador Poncio Pilato nămane gobrane kăkă Judeate. Dănkien tetararca Herodes Antipas abko nămane gobrane kăkă Galileate. Herodes etba kădian nămane Felipe abko nămane gobrane kăkă Itureate btă kăkă Traconite yete amne dănkien tetararca Lisaniás abko nămane gobrane kăkă Abilenete.

²Kă ne ngwane Anás btă Caifás nămane nitre blitaka Ngōbōbe ni mda mda diäre dănkien. Te bati Zacariás ngobo kă Juan abko ben Ngōbōkwe blitabare kă kaibete.

³Abtä Juan nikaninbe Ngōbō kukwei niere krōrō nitre nŭnanka Ñō Jordán ngrabare yeye: Kukwe kămekăme nuenta munkwe, yebtă mun moto raba ulire, bti mun jata Ngōbōye amne mun jata ja mike ngōkadre ñōte tie. Ye ngwane mun ngite kukwe kămekăme nuenbtă, ye Ngōbōkwe diandikă jire jōkră munbtă, Juan namani niere.

⁴Ye abko, Juan nikani ñăke ño abko nămanena tikani Ngōbō Kukweibtă tără Isaiabtă abko krōrō:

Ni iti năin ñăke jume ja dibti kă kaibete, kăkwe niedi krōrō:

Ji ũkateta kuin biare jrei kănenkri, ye kwrere ja tōi mike kuin biare ni Dănkien kăne munkwe.

Ji ũkateta niken metre ta, ye kwrere ja tōi ũkete metre ni Dănkien kăne munkwe,

⁵ñō kă ngitio ngŭrebtă mōta, te dobo keka kabre ũkate ruäre ngitio mintrinibe amne raba kiare, ji rabadre metre jreikră abkokăre.

Ye kwrere arato, ngitio rikri btă ngitio kiakia tikakata, bti ũkateta kiare jōkră, ji rabadre metre dănkien jreikră abkokăre.

Mdakăre abko, ji tolentolen tikakata niken metre tata amne ji turururure ũkateta niken kiare, ye kwrere munkwe ja tōi ũkete kuin biare ni Dănkien kăne.

⁶Ne abko ni Diantarikă juandi Ngōbōkwe, ye ni nŭnanka kă jōkrăbti kăkwe tuadi, niarakwe niedi,

Isaiás 40.3-5

abko Ngōbōkwe tikamna kore Isaiaye.

⁷Ye erere Juan nămane blite angwane, ni namani kite kwati ja mike ngōkadre ñōte Juanye abko ie Juan namani ñăke krōrō:

Mun abko tbi krŭbăte kwrere. ¿Ngōbō kebera mun mike ja ngie nuen kri krŭbăte, yebtă nirekwe mun mikani mokre amarebti mun kite nŭke siba nete ye?

⁸Munkwe ja tōi kwitadre era metre Ngōbō kukwăre bkănă tōdekakăre bti abko erere munkwe nŭna ni mda mda okwăbti. Erere arato, munkwe ñan nie au jabtă: Nun abko Abraham mrăkă, aisete Ngōbōkwe ñan nun mikadi ja ngie nuen, munkwe ñan nie au jabtă, ñobtä ñan angwane jă tene temen sete, se abko ngwarbe akwa Ngōbō raba kwite Abraham mrăkăre abko ti tō nibi niei metre kore munye.

⁹Mdakăre abko, kri mden mden ñan ngwă nebe kuin, ye abko krăke ũ mikanina biare tikakkră ngătrite ta. Abti tikakata jōkră angwane, kitata ñukwăte, ye kwrere jire Ngōbōkwe mun mikadi ja ngie nuen, munkwe ñan ja tōi kwitadre Ngōbō kukwăre angwane.

¹⁰Abtä ni nămane yete kăkwe niebare Juanye:

Ni nun kwrere abko kăkwe kukwe kuin nuendre ño, kōbōire nunta Ngōbō mike ũtiâte jae bă rabadre nunbtă, niere nunye niebare kwetre Juanye.

¹¹Juankwe niebare mda ietre:

Mun mdenkwe danta ötabu, ye abko ni dän ñakare, ie munkwe dän jakwe bian ötati. Erere arato, mun mden mrö bkâne, mrö ye abko munkwe ni mrö nikaka buka te siba, ye ngwane munta Ngöbö mike ütiäte rükadi gare munbtä, niebare kwe ietre.

¹² Ne ngwane nitre israelita jändrän ütiä käräkä gobran romanobokrä, ye nükanintre siba ja ngökakäre ñöte arato, käkwe niebare Juanye:

¿Nun abko käkwe kukwe kuin nuendre ño, köböire nunta Ngöbö mike ütiäte jae bä rabadre nunbtä? niebare kwetre Juanye.

¹³ Juankwe niebare mda ietre:

Gobranta ngwian kärämma nuäi nuäi ni mda mdaye, ye erere munkwe kärä. Akwa munkwe ñan ngwian dianka bäri bti ni mda mdakän, ye ngwane munta Ngöbö mike ütiäte rükadi gare munbtä, niebare kore kwe ietre.

¹⁴ Erere arato, nitre rükä nükanu ruäre, käkwe niebare Juanye:

¿Nun abko käkwe kukwe kuin nuendre ño, köböire nunta Ngöbö mike ütiäte jae bä rabadre nunbtä? niebare kwetre ie.

Juankwe niebare mda ietre:

Ni mda mda rätäkätä munkwe amne munta ngwian btä jändrän kwekwe denkä kän, ye kwrere munkwe ñan nuen jire chi mda. Erere arato, munkwe ñan ni mda mda kita ngise ngwarbe amne sribi ütiä bianta nuäi nuäi munye, yebe ben munkwe nüna jäme. Ye ngwane munta Ngöbö mike ütiäte rükadi gare munbtä. Abko kore se, niebare kwe ietre.

¹⁵ Kä ye ngwane abko, ni jökrä nämane Ni Dianinkä Ngöbökwé ngibiare ngäbti kisere, aisete nane Juan abko Ni Dianinkä Ngöbökwé ara nükanu, nitre israelita jökrä namani nütüre, btä nämane töbike kri.

¹⁶ Ye mden kisete Juankwe niebare ietre:

Tita mun ngökö ñö aibe te bkänä, akwa ni jatadi iti ti jiebti abko bäri di kri ti ngwä. Niarabko Ni Dianinkä Ngöbökwé, aisete sandalia ngotobtä yebtä nin ja nüke töre jire chi tie kö tikarete ie. * Ni ye abko käkwe Ngöbö Üai Deme mikadi nüme munbtä amne Ngöbö Üai Deme rabai ñukwä jutra kwrere munbtä, mun mikakäre deme Ngöbökrä.

¹⁷ Ne abko, niarakwe dre nuendi abko ti bike niere munye abko krörö: Niaratä jändrän ngwena kisete trigo juankakrä. Trigo juandikä kwe angwane, trigo kuinquin erere ükadikrö jenena kwe amne trigo kwata abko ükadikrö jenena kwe. Yebti ñukwä nötöte ñakare abko te trigo kwata ye kukwadi kwe. Tita mun bä mike trigo kwrere amne trigo kwata kwrere. Abko kore se, niebare Juankwe nitre israelitaye.

¹⁸ Ye kwrere Juan namani blite ni kwati ben töi diankäre, kä namani kukwe kuin Ngöbökwé mike gare ietre kore.

¹⁹ Akwa kä ye ngwane abko, jrei Herodes käkwe etba kwe kädian nämane Felipe abko merie kädian nämane Herodías diani etba kän. Erere arato, nämane kukwe kämekäme nuene batäkä ngwarbe Ngöbö rüere. Abtä Juankwe ñäkäbare Herodeye

²⁰ abko dokwäre Juan kitani ngite kä teri kwe ne ngwane, ja mikani ngite bäri kri mda kwe Ngöbö rüere.

Juankwe Jesu ngökani ñöte

(Mateo 3.13-17; Marcos 1.9-11)

²¹ Akwa Juan kita ngämi ngite kä teri, känenkri nämane ni ngökö ñöte angwane, Jesu ngökani ñöte kwe arato. Jesu jämi nikenta jate angwane, nämane blite Ngöböbe, btäräbe jukwe tika kwrere kä ngitianu kä käinbti,

²² amne Ngöbö Üai Deme, jatani tuen ütö bä kwrere timonkwäre, nikani mate Jesubti. Ne btäräbe ni kukwe jarabare krörö kä käinbti: Ma abko ti Ngobo tikwe. Ma tare kri tikwe. Ma käi nüäre kri tibtä, niebare kore kä käinbti timonkwäre Jesuye.

Jesu mräkä känekäne

(Mateo 1.1-17)

²³ Kä kwä gre bti kwä jätära Jesuye kwrere angwane, jatani sribi Ngöbö Kukweibtä kömiketbe kena. Jesu abko José ngobo nütü nämane ni jökräkwe amne José abko Elí ngobo.

²⁴ Elí abko Matat ngobo,

Matat abko Leví ngobo,

Leví abko Melqui ngobo,

Melqui abko Jana ngobo,

Jana abko José mdara jire ngobo,

²⁵ José abko Matatías ngobo,

Matatías abko Amós ngobo,

* **3:16 sandalia tikete.** Jesu näire ni klaboré kökani ni mdakwe abko bäri ene ni mda mdakrä. Niaratre aibe nämane sandalia ni mdakwe tikete, aisete Juan nämane ja bä mike bäri ene ni klaboré ngwä.

Amós abko Nahum ngobo,
Nahum abko Esli ngobo,
Esli abko Nagai ngobo,
²⁶ Nagai abko Maat ngobo,
Maat abko Matatías mdara jire ngobo,
Matatías abko Semei ngobo,
Semei abko José mdara jire ngobo,
José abko Judá ngobo,
²⁷ Judá abko Joana ngobo,
Joana abko Resa ngobo,
Resa abko Zorobabel ngobo,
Zorobabel abko Salatiel ngobo,
Salatiel abko Neri ngobo,
²⁸ Neri abko Melqui mdara jire ngobo,
Melqui abko Adi ngobo,
Adi abko Cosam ngobo,
Cosam abko Elmodam ngobo,
Elmodam abko Er ngobo,
²⁹ Er abko Josué ngobo,
Josué abko Eliezer ngobo,
Eliezer abko Jorim ngobo,
Jorim abko Matat mdara jire ngobo,
³⁰ Matat abko Leví mdara jire ngobo,
Leví abko Simeón ngobo,
Simeón abko Judá mdara jire ngobo,
Judá abko José mdara jire ngobo,
José abko Jonán ngobo,
Jonán abko Eliaquim ngobo,
³¹ Eliaquim abko Melea ngobo,
Melea abko Mainán ngobo,
Mainán abko Matata ngobo,
Matata abko Natán ngobo,
³² Natán abko David ngobo,
David abko Isaí ngobo,
Isaí abko Obed ngobo,
Obed abko Booz ngobo,
Booz abko Salmón ngobo,
Salmón abko Naasón ngobo,
³³ Naasón abko Aminadab ngobo,
Aminadab abko Aram ngobo,
Aram abko Esrom ngobo,
Esrom abko Fares ngobo,
Fares abko Judá mdara jire ngobo,
³⁴ Judá abko Jacob ngobo,
Jacob abko Isaac ngobo,
Isaac abko Abraham ngobo,
Abraham abko Taré ngobo,
Taré abko Nacor ngobo,
³⁵ Nacor abko Serug ngobo,
Serug abko Ragau ngobo,
Ragau abko Peleg ngobo,
Peleg abko Heber ngobo,
Heber abko Sala ngobo,
³⁶ Sala abko Cainán ngobo,
Cainán abko Arfaxad ngobo,
Arfaxad abko Sem ngobo,
Sem abko Noé ngobo,
Noé abko Lamec ngobo,
³⁷ Lamec abko Matusalén ngobo,
Matusalén abko Enoc ngobo,
Enoc abko Jared ngobo,
Jared abko Mahalaleel ngobo,

Mahalaleel abko Cainán mbara jire ngobo,
³⁸ Cainán abko Enós ngobo,
 Enós abko Set ngobo,
 Set abko Adán ngobo,
 Adán abko Ngöbökwe dätebare.

4

*Diablukwe Jesu nuaninte ja käne
 (Mateo 4.1-11; Marcos 1.12-13)*

¹ Jesu nämane Nö Jordánbtä, kánti Juankwe ngökani fñöte angwane, Ngöbö Üai Deme nämánena täte btä, kä nikani Jesu ngwena kä kaibete mda.

² Ne kánti Jesukwe nünantebare köbö gre ketebu angwane, diablu namani nüke Jesu nuente ja käne. Köbö gre ketebu Jesukwe mröbare ñakare jire chi, akwa kä ye namani bare angwane, btäräbe mrö namani dikaro ie.

³ Ne aisete diablu jataninta, kákwe niebare ie:

Ma abko Ngöbö Odei era metre ne ngwane, jä se kwite mröre jae, niebare kwe ie.

⁴ Akwa Jesu kákwe niebare mda diabluye:

Ñakare. Ngöbö Kukwei tä tikani krörö:

Ñan mrö aibehti ni rabadre nüne, akwa kukwe kwatirekwatire niebare Ngöbökwé, yehti ni rabare nüne, *Deuteronomio 8.3*

abko tä tikani Ngöbö Kukweibtä, niebare Jesukwe ie.

⁵ Nebti ngitio bäri mente käin, yehti diablu nikani Jesu ngwena mda. Ye kánti, jötrö ngwarbe kä jökrä amne juta kä jökräbti temen mikani tuadre kwe Jesuye,

⁶⁻⁷ bti niebare kwe ie:

Jändrän ne biani jökrä tie amne ti tö rabai bien nireye, erere tikwe biandre jökrä aisete, makwe ja mikadi ngukudokwäbti temen ti ngwärekre, kákwe ti mikadi ütiäte jae angwane, kä jökrä tä ti kisete btä jändrän jökrä ütiäte krikri tä kä nebtä, se tikwe biandi jire jökrä mae, niebare diablukwe Jesuye.

⁸ Abtä Jesukwe niebare mda ie:

Ñakare. Ngöbö Kukwei tä tikani krörö:

Ni Dänkien Ngöbö aibe mikadre ütiäte jae. Niara aibe kräke sribidre, *Deuteronomio 6.13* abko nieta kore, aisete tikwe ñan ma kukwei mikai täte, niebare Jesukwe diabluye.

⁹⁻¹¹ Nebti diablu nikani Jesu ngwena juta Jerusalénte mda, kánti nikani Jesu ngwena mobe ju blitakrä Ngöböbe bti käin, bti niebare kwe ie:

Ma abko Ngöbö Odei era metre bkänä ne ngwane, ja täkete timon nete, ñöbtä ñan angwane Ngöbö Kukwei tä tikani krörö mabtä:

Ngöbökwé angeletre juandi ma ngibiarehti abko kákwe ma kadi ngäbti kisete, ma ngoto ñan matadre jäte temen, abkokäre angeletrekwe ma ketadite kaintabe kisete, *Salomos 91.11-12*

abko tä tikani Ngöbö Kukweibtä mabtä, aisete ja täkete timon, ma Ngöbö Odei ara mikakäre gare ni jökräye, niebare diablukwe ie.

¹² Abtä Jesukwe niebare mda diabluye:

Ñakare. Ngöbö Kukwei tä tikani abko käta niere krörö arato:

Ni Dänkien Ngöbö kákwe ja kukwei mikadre täte ya, ñakare ya amne, niara di tära ja kukwei ngwiandre bare ya, ñakare ya abko makwe ñan nuate ja käne ja gakäre ben, *Deuteronomio 6.16*

abko tä tikani kore, aisete tikwe ñan ma kukwei mikai täte. Abko kore se, niebare Jesukwe diabluye.

¹³ Nebti diablukwe Jesu nuaninte ünän jökrä ja käne, bti nikani mentokwäre, köbö bäri kuin Jesu nuatekäreta, ye ngibiare jae mda.

*Jesu nikani Ngöbö kukwei kuin dirire kena
 (Mateo 4.12-17; Marcos 1.14-15)*

¹⁴ Nebti Jesu nikaninta Galileate angwane, Ngöbö Üai Deme di namani kri btä, aisete namani dre dre nuene, abkobtä ni jökrä namani kädriere juta ketareketare temen.

¹⁵ Erere arato, sinagoga juta ketareketare te, kántikánti Jesu namani niken dirire. Kukwe diri nämane kwe, yehtä ni jökrä namani niara käikitekä.

*Jesu mikani ütiäte ñakare ja käite Nazarete
 (Mateo 13.53-58; Marcos 6.1-6)*

¹⁶ Jesu nāmane Galilea, nikaninta juta Nazarete niara rirabare ye kanti. Namaninta yete angwane, kōbō jadūkakrā nāire niara nāmane niken sinagagate, kanti nāmane niken kāre. Ye erere, bati kōbō jadūkakrāte nikaninta, kanti namani nūnaninkā ñākākāre Ngōbō Kukweibtä.

¹⁷ Ne btārābe, ni Ngōbō kukwei niekā kādian nāmane Isaías kākwe tārā tikani abko ngōkani Jesuye. Jesu nikani tārākwa ne metete angwane, batibe tārā krōrō kwani ie, bti nikani ñāke btā:

¹⁸ Dānkien Ngōbōkwe ti dianinkā ja kukwei kuin mikakāre gare ni bobre bobreye, aisete ja Ūai mikani tibtä kwe sribi nuenkāre.

Ngōbōta biare ni ngite ngite tigatekāre abko ti juani niere kwe ietre.

Ni ie kā tuen ñakare abko ie kā rabadre tuenta abko ti juani niere kwe ie.

Erere arato, nire nire tā ja tare nike ni mda mda ngoto tāni kwrere abko ti juani tikete kwe kā rabadre nuāre btā abkōkāre.

¹⁹ Mdakāre abko, Dānkien Ngōbōta ja moto mike kuin ni krāke abko ti juani niere kwe, *Isaías* 61.1-2

abko tārā yebtä Jesukwe ñākābare.

²⁰ Bti tārā, btā Jesukwe ñākābare, ye mrianinkāta kwe, ngōkaninta kwe sinagoga ngibiaka yeye, bti namaninta tākānintbe dirikāre se kwrere. Angwane Jesukwe ño niedi mda abko ni jōkrā namani ngibiare, aisete okwā namani kwekbe jōkrā Jesubtä Jesu kukwei ngibiare se kwrere.

²¹ Ne btārābe Jesukwe niebare mda:

Kukwe btā tikwe ñāri gwā, ye abko mtare mentokwāre nibira bare jōkrā, niebare Jesukwe.

²² Jesu namani kukwe kuinquin niere dikaro, yebtä ni jōkrā ñan tōi namani krūtare, aisete namanintre Jesu kādriere kuin jōkrā. Akwa yebti, namanintre niere krōrō jae kwārikwāri Jesubtä:

¿Ni noko ñan José ngobo ya amarebti nibi dirire kore jabtā noko? namanintre niere Jesu rūere.

²³ Abtä Jesukwe niebare mda ietre:

Ni krākā bianka, btā nita tōbike blo, ie nita niere krōrō: ¡A! Ma krākā bianka kri era metre ne ngwane, makwe ja mika kuinta au angwane, nunkwe ma mikai era jae abko nieta. Ne kwrere munta tōbike tibtä, ye gare kuin jabtā tie. Ye kwrere, Ngōbōkwe ma juani ni die mikakāre mata niere jabtā, aisete ye bā mike tuadre abko munta nūtūre tibtä. Mdakāre abko, sribi kri nuenta Ngōbō diebti, erere namani bare mae Capernaúm kādrieta nun okwābti, ye kwrere nuene ja kāite nete nun krāke tuadre nunye, ne munkwe niedi tie, ye gare kuin tie arato.

²⁴ Mden kisete ti bike kukwe era erere niere munye: Ni Ngōbō kukwei niekā, ye abko ja kāite mikata ūtiāte ñakare jae mrākākwe abko krōrō:

²⁵ Bati ni Ngōbō kukwei niekā kira kādian nāmane Elías* nāmane nūne abko nāire Ngōbōkwe kā mikani bāri moren kā komā bti ōtare amne nin ñū nākāni jire chi temen, aisete mrō nikani kri kā jōkrābti temen Israel kanti.

²⁶ Kā ye ngwane abko, meri kán brare krūtani krūtani nāmanena kabre nitre israelita ngātāite, akwa nin Ngōbōkwe Elías juani nūne meritre israelita ye kanti, ñobtä ñan angwane nitre israelita ñan nāmane Elías mīke ūtiāte jae. Akwa meri nāmane iti kán brare krūtani arato, akwa ñakare israelitare nāmane nūne mobe Israel bāre juta Sareptate juta kri Sidón bāre abko kanti Ngōbōkwe Elías juani nūne.

²⁷ Ye kwrere arato, ni Ngōbō kukwei niekā nāmane nūne kira kādian nāmane Eliseo abko nāire ni ngūtūete ngrabare lebra kisete nāmanena kwati nitre israelita ngātāite abko nin mikaninta kuinta jire iti Ngōbōkwe, ñobtä ñan angwane nitre israelita ñan nāmane Eliseo mīke ūtiāte jae. Akwa ni menteni ñakare israelitare nūnanka mobe kā Siria kanti ngūtūete jōkrā ngrabare arato abko kādian nāmane Naamán aibe mikaninta kuinta Ngōbōkwe.† Mrākā israelitakwe mikani ñakare era jae, aisete Ngōbōkwe die mikani ñakare. Ye kwrere tā nakenkā tibtä nete. Abko kore se, niebare Jesukwe.

²⁸ Nebtä ni Jesu kukwei nuaka nuaka sinagagate namanintre moto romon krübāte jōkrā krāke,

²⁹ aisete ni jōkrā namani ja rūere Jesube, kā nikani kitekā romone ja kāne juta bāre mento nebe kā oko romonbtā ngitiobti. Ne kanti abko Nazaret nāmane. Kanti tō namanintre Jesu kitai jrāte.

³⁰ Akwa Jesu abko nikaninta jāme ni kwati ye ngātāite ta mentokwāre.

* **4:25 Elías.** Ma raba ñāke kukwe nebtā tārā 1 Reyes 17.7-24 ye kanti. † **4:27 Eliseo.** Ma raba ñāke kukwe nebtā tārā 2 Reyes 5.1-14 ye kanti.

Jesukwe ùai káme juanintari mento
(*Marcos 1.21-28*)

³¹ Nebti Jesu nikaninta mda motokwäre juta Capernaúmte Galilea. Abti köbö jadükakrà näire nämane niken sinagogate, kánti namani dirire ni nämane ja ùekrö yeye

³² amne, niaratre jökrä ñan tõi namani krütare kukwe diribare kwe yebtä, ñobtä ñan angwane ni töbtä di kri kákwe diri ja di ngöi, kwrere jire Jesukwe diribare ietre.

³³ Jesu nämane dirire angwane, ni nämane iti sinagoga yete, btä ùai káme nämane nüne. Te batibe ni ye kákwe ngratebare kri ja dibti Jesuye:

³⁴ ¡Jesu Nazarebo, nun tuemetre kaibe nete! ¿Ye ñobtä abko, ma kite ja mike kukwe nunkwete yere? ¿Ma kite nun gaenkä ya ño yere? Jesu, ma gare kuin tie. Ma abko Ni Deme Ngöbökwé gare tie, niebare ùai kämenkwe Jesuye.

³⁵ Abtä Jesukwe niebare mda ùai kámeye:

¡Ùai káme, kada mkä kete makwe! Ni ye tuemetre gwängwarbe. Nän mento btä, niebare kwe.

Ye btäräbe, ni jökrä ngwärekri, ùai káme ni yebtä kákwe nitani temen, bti nikani mento, akwa ñan ni ye mikani bren kwe.

³⁶ Nebtä ni jökrä tõi ñan namani krütare Jesubtä, kä namani niere jae kwärükwäri:

¿Ni neta kukwe ño ño dirire amarebti niara di tärä ùai káme juentari jötrö au, tä ñäke kwatibe ùai káme juantarikrä mento amne, ùai káme tärä niken mento ie sere? namanintre niere kore Jesubtä.

³⁷ Yebtä abko, Jesu kädrie namani kä jökräte juta Capernaúm kántita temen.

Jesukwe Simón köbrän merire mikaninta quinta
(*Mateo 8.14-15; Marcos 1.29-31*)

³⁸ Jesukwe diribare ùnän sinagoga yete, bti nikani nebe Simón kánti mda angwane, Simón köbrän merire abko nämane bren jume drangwan kisete. Angwane Jesukwe mikadreta quinta abko mräkä namani ribere ie.

³⁹ Ye erere Jesu nikani, namani jänbtä Simón köbrän merire ye ken, kákwe drangwan juanintari Simón köbränbtä. Ye btäräbe, drangwan nikaninbe batibe btä, namaninta kuin batibe, namanintabe quinta amne nükani dikekäta krö, nikani mrö känene niaratre bukakrä.

Jesukwe ni bren bren mikaninta quinta
(*Mateo 8.16-17; Marcos 1.32-34*)

⁴⁰ Nebti ñänä jatanina niken timon dere[‡] angwane, ni kwati nämane ja tare nike bren batakä ngwarbe kisete abko mräkä namani niken ngwena Jesuye. Ye abko, Jesu namani kise mike bti angwane, namani nebata quinta jökrä.

⁴¹ Erere arato, ni kwati btä ùai káme nämane nüne abko kisete bren jänükani siba Jesuye. Ni ye abko, btä ùai káme nämane niken mento, kä namani ñäke kri kri be krörö Jesuye:

¡Jesu, ma Ngöbö Odei, ye gare kuin tie! ùai káme namani niere kore Jesuye.

Abtä Jesukwe kada ketamna ùai kámeye. Nin Jesu namani ùai káme tuemetre ñäke jire chi mda, ñobtä ñan angwane Jesu abko Ni Dianinkä Ngöbökwé abko namanina gare kuin ùai kámeye, aisete ñan niedre kwe gadre ni jökräye, abkokäre Jesukwe kada ketani.

Jesu nikaninta Ngöbö Kukwei dirire
(*Marcos 1.35-39*)

⁴² Jändrinane dekä, Jesu nikani kä kaibete juta bäre mento rabakäre kaibe akwa, ni kwati namani känentari kisere kwäräkwärä, te nikani nebe Jesu jiebti. Namanintre Jesu kánti angwane, Jesu ñan rikadre, ie tö namani, kä namani Jesu ketete kisere.

⁴³ Akwa Jesukwe niebare ietre:

Ngöbö kite gobrane ni ngätäite, ye tikwe mikadre gare juta ketareketare te, abkokäre Ngöbökwé ti juani, aisete ti ñan rabadre kwekbe kä ketetibe kánti. Abko kore se, niebare kwe.

⁴⁴ Ye erere bkänä, Jesu namani niken kukwe ye mike gare nitre israelitaye sinagogate kwäräkwärä kä Judeate.[§]

5

Jesukwe ni käräbare nimä ja töitike jabe
(*Mateo 4.18-22; Marcos 1.16-20*)

[‡] 4:40 ñänä jatanina niken timon dere, yebti nitre israelita nikani mräkä bren bren ngwena nebe Jesuye, ñobtä ñan angwane ñänä nikani timon dere angwane, köbö jadükakrä nikani ta abko nämane ngbiare aisete. [§] 4:44 kä Judeate. Manuscrito bäri kuinquin, yebtä Judea tä tikani. Manuscrito ñakare bäri kuin, btä **Galilea** tä tikani.

¹ Abti bati, kā jatani ngwen dekā angwane, Jesu nāmane Ñō Okwā Kri Genesaret (arabe kādianta Ñō Okwā Kri Galilea) ye kōrābti angwane, ni kwati tō namani Ngōbō Kukwei nuai, kā namani Jesu kete dime ja ngātaite namani ruen Jesuye.

² Ne btārābe ni gwa gaka nāmane ruāre krade bātete, kākwe ru jakwe mikaninte krobu ñō kōrābti, btā Jesu okwā namani.

³ Jesu nikani, nakwani ru krati te. Ru te Jesu nakwani, ye abko ru Simónkwe. Jesu namanina rute, ru ngwiamna bāri ñōte kwe Simónye, bti namani tākāninbe Ngōbō Kukwei dirire ni kwatiye.

⁴ Jesukwe diribare ünān angwane, niebare kwe mda Simónye:

Ñō okwā bāri mente nguse, ye kānti ru ngwena, bti munkwe krade kita ñōte gwa gakra, niebare Jesukwe Simónye.

⁵ Abtā Simónkwe niebare Jesuye:

Dirikā, deo abko kā kuin gwa gakra. Nunkwe sribinirira kri dibire ta. Nin nun kābā nibi jire chi, akwa mata ti juen gwa gaenta, aiseti ti bike niken, niebare kwe ie.

⁶ Ye kwrere bkānā, Simón nikani sribi mukobe, namanintre ñō okwā nguse kānti, kākwe krade kitani ñōte angwane, batibe gwa neketaninte kabrekabre krade ietre se kwrere. Krade namani nōtōte bee kisete gwa tāni.

⁷ Amne sribi muko kwekwe nāmane ru mdate abko namanintre kārere, kā namani kise minienkā ietre abko rikadre die mike gwa ūkekrō abkokāre. Erere sribikā nāmane ru mdate, ye nikani gwa ūkekrō siba amne gwa ūkaninkrō ru krobu bti tabe kwetre. Gwa namani ñakare rute ya, aiseti bāsi ru namani niken neen jōkrā ñōte nguse gwa dābā tāni Simón okwābti.

⁸ Yebtā ja namani ruen kāme btā ngite Jesu ngwāreki Simón Pedroye, aiseti nikaninbe ngitiekā ngukudokwābti temen Jesu ngwāreki, kākwe niebare ie:

Ti Dānkien, ma deme ti ngwā. Ti abko moto kāmekāme dikaro, aiseti nān mento tibta, niebare Simónkwe Jesuye.

⁹⁻¹⁰ Simónkwe ñākābare kore Jesuye, ñobta ñān angwane Simón btā Zebedeo ngābriānkātre kādian nāmane Santiago btā Juan abko kākwe ñān gwa gabare jire erere gwa gani kwetre aiseti, Jesu diebtibe gwa gani kabre kore kwe nūkani gare ietre aiseti, tōi ñān namani krūtare. Kwrere ni mda mda nāmane nāin siba Simónbe ñān tōi namani krūtare arato, gwa gani kabre kwetre yebtā. Simónkwe ñākābare kore Jesuye, abtā Jesukwe niebare mda ie:

Simón, ma abko gwa gaka, akwa mtare mentokwāre ma jatadi ni gaen Ngōbōkrā, aiseti ma ñān rekwetaka tibta, niebare kwe ie.

¹¹ Yebti Simón, Santiago btā Juan nikani ru ngwenante nebe ñō kōrābti jate, kākwe jāndrān jōkrā kwe mikaninte, bti nikanintre Jesube.

Ni iti kwata bren lebra kisete abko Jesukwe mikani quinta

(Mateo 8.1-4; Marcos 1.40-45)

¹² Bati Jesu nāmane jutate angwane, ni iti bren lebra kisete, abtā ngūtūete ngrabare nūkani abko ie Jesu jatabare angwane, nikani ngitiekā ngwāre timonkwāre Jesu mikakāre ūtiāte, kākwe niebare ie:

Ti Dānkien, ma tō ti mikaita quinta ne ngwane, makwe ti mikata quinta, ie ti tō nibi, niebare kwe ie.

¹³ Angwane Jesukwe kise mikani btā, kākwe niebare mda ie:

Ma rabata quinta, ie ti tō nibi, aiseti gwāngwarbe ma bike nebata quinta, niebare Jesukwe ie.

Ye btārābe ni kwata ngūtūete ngrabare ye kwata namaninta quinta jōkrā ngrabare.

¹⁴ Angwane Jesukwe niebare krōrō mda ie:

Tikwe ma mirita quinta, ye makwe ñān nie jire chi ni mda mdaye, akwa ma rika ja kwata quinta mike tuare ni blitaka Ngōbōbe ni mda mda diāreye amne ni bren kore tā nebata quinta abko kākwe jāndrān mden mden biandre niebare Moisékwe, ye erere ma rika ngwena biandre Ngōbōye ma rabadre dbe niara ngwāreki abkokāre. Yebtā abko ma nenante quinta abko rabadre gare ni jōkrāye, abkokāre ma rika jāndrān ye ngwena. Abko kore se, niebare Jesukwe ie.

¹⁵ Jesukwe ja dokwā tākāni kore ni mikaninta quinta kwe yebe, akwa kukwe nakaninkā, yebtā abko bāri ni jōkrā namani Jesu kādriere niken juta ngrabare temen, abkotari ni mda mda namani nūke ja ūkekrō kwati mda Jesu kukwe nuakāre, ruāre bren abko Jesukwe mikadreta quinta abkokāre namanintre nūke.

¹⁶ Akwa Jesu abko nāmane niken kāre kā kaibete blitakāre Ngōbōbe.

Ni ruen ñakare ngrabare abko Jesukwe mikaninta quinta

(Mateo 9.1-8; Marcos 2.1-12)

¹⁷ Bati Jesu nämane dirire mda angwane, nitre bariseo btä Kukwe Biani Ngöbökwe Moiséye dirikätre nünanka juta ketareketare te Galilea amne Judea ngrabare temen, ruäre abko nünanka juta Jerusalénte nükani, namani tākānintbe Jesu kukwei nuen. Ye ngwane Dänkien Ngöbö di kri nämane Jesubtä ni bren bren mikakäreta kuinta.

¹⁸ Jesu nämane dirire gwi angwane, ni ruen ñakare ngrabare abko kisete ñan dikaka kä, mikani jänkwatäbti abko ni mda mda nükani ngwena ja ñäte, tö namanintre niken ngwena nebe gwi Jesu ngwäreكري.

¹⁹ Akwa ni namani kwati dikaro aiseté, ñan namani tuen ngwiane gwä ietre. Abtä nikanintre jubti käin, kākwe ju mkä tikaninkä abko te ta ni bren ye gibaninkä köbtä käin timon kwetre, nükani ngitiekä temen Jesu ngwäreكري ni kwati okwäbti se kwrere.

²⁰ Nitre nükani ni bren ngwena amne ni bren ye namani tödeke kwatibe Jesubti namani tuen ie, kākwe niebare ni bren ye:

Ma ngite Ngöbö rüere, ye tikwe dininkä mabtä ti mräkä, niebare kwe ie.

²¹ Angwane Kukwe Biani Ngöbökwe Moiséye dirikätre btä nitre bariseo namani töbike krörö Jesubtä: Ngöbö aibe tä ni ngite niara rüere denkä mento nibtä amarebti, ise ñöbtä abko ni se tä ñäke kore Ngöbö rüere se! namanintre töbike kore Jesubtä.

²² Akwa niaratre namani töbike kore ye abko gani Jesukwe. Abtä niebare kwe ietre:

¿Ñöbtä munta töbike kore tibtä yere?

²³ ¿Dre abko bäri nuäre niedre? ¿Ma ngite Ngöbö rüere, ye tikwe dininkä mabtä abko bäri nuäre niedre ya? o ¿Näin krö, nän dikekä abko bäri nuäre niedre ya?

²⁴ Akwa ti, Ni Kä Nebtä Ngobo ne ie Ngöböke ja di biani mun ngite Ngöbö rüere diänkakäre mento munbtä kä nebtä, ye abko ti bike bä mike tuadre munye, niebare Jesukwe.

Bti niebare kwe ni ruen ñakare ngrabare ye:

Näin krö. Jänkwata makwe ye den kisete amne nänta ja gwiriete, niebare kwe ie.

²⁵ Btäräbe, ni jökrä okwäbti, ni ruen ñakare ngrabare ye naninkrö krö, kākwe jänkwata bti nämane temen diani kisete, bti nikaninta ja gwiriete Ngöbö käikitarekä kwärä se kwrere.

²⁶ Yebtä ni nämane kwati ye ñan töi namani krütare amne namani Ngöbö käikitarekä jökrä, kä namani niere krörö jae kwärükwäri:

¿Aiteje, mtarebra ñan nikwe jändrän kuin turi ya! Jändrän ne kwrere ni ngämi tuen jire bati, erere nikwe tua mtare yera, ni jökrä namani niere kore jae kwärükwäri.

Jesukwe Leví käräbare ja töitike jabe

(Mateo 9.9-13; Marcos 2.13-17)

²⁷ Nebti Jesu nämane jutate, nikaninta angwane, kä jändrän ütiä käräkrä gobran romanobokrä, ye kanti ta nikani mda amne, ni kädian nämane Leví nämane tākānintbe jändrän ütiä kärere yete, kanti Jesu nikani mate angwane, Jesu okwä namani kwekbe Levíbtä, kākwe niebare ie:

Brän tibe, niebare kwe Levíye.

²⁸ Angwane jötrö ngwarbe Levíkwe jändrän jökrä mikaninte, nükani dikekä krö, bti nikani Jesu jitebti.

²⁹ Abti Leví tö namani Jesu mikai ütiäte, kākwe bieta köböi kitani ja juete mda Jesukrä. Ye ngwane ni jändrän ütiä käräkrä gobran romanobokrä namani kwati tākānintbe, btä ni mda mda nämane tākānintbe mröre siba mesabtä Jesube.

³⁰ Yebtä abko, nitre bariseo btä Kukwe Biani Ngöbökwe Moiséye dirikätre reketaka jakri bariseobe abko namanintre ñäke nitre ja töitikaka Jesube rüere, kākwe niebare ietre:

Nitre jändrän ütiä käräkrä gobran romanobokrä abko käme amne ni mda mda kukwe nuenkä kämekäme amarebti munta mröre siä kwatibe te amne munta dö ñaen bentre sere, niebare kwetre.

³¹ Nitre bariseo kākwe ñäkäbare kore, ye jarabare Jesuye angwane, Jesukwe ja bä mikani ni kräkä bianka kwrere amne nitre jändrän ütiä käräkrä amne nitre kukwe nuenkä kämekäme, ben nämane mröre ye bä mikani ni bren kwrere kwe, kākwe niebare krörö mda ietre:

Ni kuin, bren ñakare ye abko ñan tä ni kräkä bianka ribere jabtä, akwa ni bren bren abtä tä ni kräkä bianka ribere jabtä abko ti tö nibi niei munye.

³² Ni ie ja ruen kuin deme au Ngöbö ngwärecri mun kwrere, ye abko ñan ti jatani kärere Ngöbö kukwäre, akwa ni kukwe kämekäme nuenkä Ngöbö rüere ye mden abko ti jatani kärere Ngöbö kukwäre, niaratre kākwe ja ngite niedre Ngöböye, bti kukwe kämekäme kitadre temen kwetre amne tödekadre Ngöböbti kwetre, abkokäre ti jatani. Abko kore se, niebare kwe nitre bariseoye.

Ñöbtä nitre ja töitikaka Jesube ñan nämane ja bäine

(Mateo 9.14-17; Marcos 2.18-22)

³³ Abti nitre bariseo kākwe niebare krörö Jesuye:

Nitre nänkä Juan Bautistabe btä nitre nänkä nun bariseobe abko käre tä ja bäine Ngöbökrä, käre tä blite Ngöböbe. ¿Se ñobtä abko, nitre ja töitikaka mabe abko käre mröre, käre dö ñaen akwa, ja bäine ñakare Ngöbökrä sere? niebare kwetre ie.

³⁴ Abtä Jesukwe kukwe bä mikani ietre, kākwe ja bä mikani ni ja mikaka gure kwrere amne, nitre ja töitikaka ben abko bä mikani kwe ni ja mikaka gure kukwe muko kwrere, kākwe niebare nitre bariseoye:

Ni iti tä niken ja mike gure angwane, tä kukwe muko kwekwe nübaire kä ngwiankäre nuäre gwaire jabtä, ye ngwane ¿ni ja mikaka gure ye tädre siba bentre angwane, kukwe muko ye raba moto ulire ja bäine ya? Ñakare.

³⁵ Akwa ni ja mikaka gure ye jirikadre kukwe muko okwäbti, ye ngwane rabadre ja bäine abko kore rakadikä nitre ja töitikaka tibe yebtä, niebare Jesukwe ietre.

³⁶ Kukwe ngwianintari ja bänbtä, abtä Jesukwe kukwe bä mikani krörö dän btinbtä amne uba döi btinbtä, kākwe niebare:

Ni ñakare jire iti käta dän btin tikekä, bti tä dän ngututu gudike, ñobtä ñan angwane nikwe dän btin kukwän tikadrekä, ye ngwane dän btin juandre ngwarbe. Erere arato, dän ngututu gudikadre kukwän btin bti, ye ñan rabadre kuin.

³⁷ Erere arato, chibo kwata dikani kira uba döi ngwäre, te ni ñan raba uba döi mräre keke mikadre kwaka, ñobtä ñan angwane uba döi bänän jatadre dime amne rikadre nokrekä, ye kākwe chibo kwata ngututu trekadre amne rikadre ngwarbe uba döi kwaka ben ngöi jökrä arato.

³⁸ Mden kisete, uba döi mräre mikadre kwaka abko kekadre chibo kwata btinte, uba döi amne chibo kwata ñan rikadre ngwarbe.

³⁹ Mdakäre abko, nita uba döi sribebare kira ñaen, yebti ni ñan töta nebe uba döi mrä ñaen mda, ñobtä ñan angwane ni uba döi kira ñaka, ye käta uba döi kira abko bäri bänänte niere. Ye kwrere arato, mun ñan tö kukwe btin dirita tikwe kaen ngäbti, tuen tie. Mun ñan tö kukwe ngututu diribare kira titametre, kukwe dirita tikwe kakrä ngäbti, aisete tita kukwe ne niere munye. Abko kore se, niebare Jesukwe.

6

*Jesu abko bäri ütiäte köbö jadükakrä yebti ta
(Mateo 12.1-8; Marcos 2.23-28)*

¹ Abti bati Jesu nikani dikekä nura ngätäite köbö jadükakrä näire mda angwane, nitre ja töitikaka ben nämane näin siba, kä nikani trigo ngwä ötö ji ngrabare kwetadre jae; nikani münente, münente, nikani kwete ji ngrabare.

² Yebtä abko, nitre bariseo nämane näin ruäre, kākwe niebare nitre ja töitikaka Jesubeye: ¿Ye ñobtä jändrän ñan nuendre jire chi köbö jadükakrä näire nieta abko mun nibi nuene sere? niebare kwetre ietre.

³⁻⁴ Abtä Jesukwe niebare ietre:

Bati David btä rükä kwekwe, ie mrö namani krübäte angwane, kukwe nuenbare krörö kwetre: Ju nuäre ngwandre kánti ban deme nämane mikani Ngöbö ngwäreki, ye kánti David nikani gwä, ban diani kwe, bti kwetani kwe rü muko kwekwe ben. Ban ye abko, David btä nitre nämane ben kākwe ñan kwetadre jire chi, ñobtä ñan angwane nitre blitaka Ngöböbe ni mda mda diäre aibe kākwe kwetadre niebare Ngöbökwä, akwa niaratre kākwe kwetani, akwa namani ngite ñakare. Ngöbö Kukwei yebtä mun tärä ñäke ruen tie.

⁵ Ye kwrere abko, köbö jadükakrä näire yebti ta abko ti Ni Kä Nebtä Ngobo abko bäri ütiäte, aisete nitre ja töitikaka tibe rabadre dre dre nuene köbö jadükakrä näire abko ti di tärä niere ietre. Abko kore se, niebare Jesukwe nitre bariseoye.

*Jesukwe ni mikaninta quinta köbö jadükakrä näire
(Mateo 12.9-14; Marcos 3.1-6)*

⁶ Abti köbö jadükakrä mdara jire te, Jesu nikani sinagocate, kánti namani dirire angwane, ni iti küde ruenkri ara jire ngrötani ie nämane yete.

⁷ Ye ngwane Kukwe Biani Ngöbökwä Moiséye dirikäre btä nitre bariseo nämane yete arato. Jesukwe ni ye mikadreta quinta köbö jadükakräte ne ngwane, Jesukwe ja mikani ngite Ngöbö rüere niedre kwetre Jesu rüere ni mda mdaye, abkokäre namanintre Jesu ngibiaretari kisere ni küde ngrötani yebtä.

⁸ Akwa Kukwe Biani Ngöbökwä Moiséye dirikäre amne nitre bariseo nämane töbike ño Jesubtä, ye Jesukwe gani btätre, kākwe niebare krörö ni küde ngrötani yeye:

Jakwe ni jökrä ngwäreki nete, niebare kwe ie.

Erere ni ye nikani, namani nūnaninkä ni jökrä ngwäreki se kwrere angwane,

⁹ Jesukwe niebare nitre bariseoye amne Kukwe Biani Ngöbökwä Moiséye dirikätreye:

¿Köbö jadükakrä, yebtä Kukwe Biani Ngöbökwé Moiséye këta dre niere? ¿Jändrän kuin nuendre ni mdakrä ya? ¿Kukwe këme nuendre ni mdabtä ya? ¿Ni bren mikadreta quinta ya? ¿Ni bren tuametre krüte ja okwäbti ya? Dre nuendre metrere niere tie munkwe, niebare Jesukwe ietre.

¹⁰ Bti Jesukwe mikani ñäräre jire jökrä ja bäre temen, bti niebare kwe ie:

Küde ngököte, niebare Jesukwe ie.

Ye erere ni ye käkwe küde ngökaninte angwane, küde namaninta kuin batibe ie.

¹¹ Yebtä Kukwe Biani Ngöbökwé Moiséye dirikätre btä nitre bariseo käkwe kä mikaninkäbe romone, mätä namani kri Jesubtä, kä namani niere jae kwärükwäri:

¿Nikwe dre nuendi ni noko kitakrä ngite ruen? namanintre niere jae kwärükwäri Jesu rüere.

Jesukwe ni dianinkä ni jätäbti nibu ja kukwei ngwianka

(Mateo 10.1-4; Marcos 3.13-19)

¹² Abti bati Jesu nikani blite Ngöböbe ngitiobti käin. Ye kënti kä nükani ngwen ie blitabtä Ngöböbe.

¹³ Kä nükani ngwen dekä angwane, Jesukwe nitre nänkä ben ye käräbare ja kënti, bti nitre ye ngätäite ni dianinkä ni jätäbti nibu kwe ja kukwei ngwianka.

¹⁴ Ni dianinkä Jesukwe abko nere:

Simón, (ne mden Jesukwe kädiani Pedro arato); btä niara etba kwe Andrés; arato Jacobo, Juan, Felipe, Bartolomé;

¹⁵ btä Mateo, Tomás, btä Alfeo ngobo Jacobo; arato Simón Zelote

¹⁶ btä Jacobo etba kwe Judas btä Judas Iscariote. (Judas Iscariote ne mden käkwe Jesu kitani ngise müre ketadre.)

Jesukwe ni bren bren mikaninta quinta

(Mateo 4.23-25)

¹⁷ Nebti Jesu nämane ngitiobti ni dianinkä ni jätäbti nibu kwe ye ben, nikaninta motkwäre, namaninta kiabti ngüsürüi. Ye kënti ni kwati nänkä ben, btä ni kwati nünanka kä ketareketare kä Judeate, juta Jerusalénte amne ni nünanka mren köräbäre juta kädianta Tiro amne Sidón ye ken, käkwe ja úkaninkrö kwati Jesu ngibiare ngäbti, btä Jesu nükantina.

¹⁸ Ni nükani kwati ne abko jatani Jesu kukwei nuakäre. Ni bren bren abko Jesukwe mikadreta quinta, abkokäre jatani. Ni ruäre abko nämane ja tare nike úai këme kisete abko namani nebeta quinta Jesu diebti.

¹⁹ Erere arato, Jesu die namani kri ni mikare quinta, abkotari ni jökrä bren bren tö namani Jesu nuainbtä, erere namani nuenbtä angwane, namanintre quinta Jesu diebti.

Jesukwe diribare ni kwatiye

(Mateo 5.1-12)

²⁰ Jesukwe ni bren bren mikaninta quinta, yehti nitre ja töitikaka ben amne ni mda mda nämane näin ben, ye mikani ñäräre jökrä kwe, bti niebare kwe ietre:

Mun bobre bobre, ye abko Ngöbökwé die mikadi amne kä rabadi nuäre munbtä, ñöbtä ñan angwane Ngöbö tö gobrane munbti.

²¹ Mun ruäre tä mrö nike mtare, ye abko Ngöbökwé die mikadi amne kä rabadi nuäre munbtä, ñöbtä ñan angwane mun ye abko ie Ngöbökwé mrö biandi ere.

Mun ruäre tä ja müaire kä nebtä kukwe hätäkä ngwarbe btä, ye abko Ngöbökwé die mikadi amne kä rabadi nuäre munbtä, ñöbtä ñan angwane mun ye abko käkwe kötadi bänänte mrä.

²² Mdakäre abko, ti Ni Kä Nebtä Ngobo Kwrere ne mikabtä täte, ni mda mdakwe bätä ngwiandi munbtä, ñan tö rabadi mun tuai ketetibe jabe, käkwe mun juanditari amne ñäkädi taretare kwe munye.

Ni moto këmekäme btä ñäkä raba këmekäme, ye kwrere jire ñäkä rabadi munbtä, mun ye abko Ngöbökwé die mikadi amne kä rabadi nuäre munbtä, aisete mun ñan raba ulire.

²³ Munkwe ja tare nika kore angwane, munkwe kä ngwian bäri nuäre jabtä amne mun rika nakwenkä kwäräkwärä, ñöbtä ñan angwane munkwe ja tare nikadi ye útiäre abko Ngöbökwé jändrän kuin biandi munye kä käimbti sete. Munkwe kä ngwiandre nuäre kore jabtä arato, ñöbtä ñan angwane nitre mun mikaka ja tare nike, ye mräkä kirakira käkwe nitre Ngöbö kukwei niekä kira abko mikani ja tare nike kore arato, niebare Jesukwe.

²⁴ Bti ni ngwian bkäne krikri btä Jesukwe blitabare krörö:

Mun ngwian bkäne krikri tödeke ñakare Ngöböbti akwa, ngwian kabre munkwe aibehti munta tödeke, aisete kä nuäre kä nebtä aibe tä munkwe, ñöbtä ñan angwane mrä abko jändrän Ngöbökwé ñan rabadi jire chi munkrä.

²⁵ Ye abko, mun ngwian bkāne krikri kāta mröre trinetrine mtare kā nebtā, aiseite munta nūne jāme, mun Ngōbō Kukwei tōbikaire űakare. Mun ye abko kākwe mrō nikadi tare jakān.

Erere arato, mun ngwian bkāne krikri kāta kōtō kuin bānānte mtare, akwa mun Ngōbō kāi ngwen nuāre űakare jabtā.

Ye aiseite mun ye abko moto rabadi ulire ulire ja mūaire tare jakān.

²⁶ Mdakāre abko, kira nitre ni ngōkaka jatani ja Ngōbō kukwei niekā niere, mika nāmane űitiāte űitiāte ni jōkrākwe, ye kwrere mun mikata űitiāte űitiāte jae mtare.

Akwa mtare munta Ngōbō mike űakare űitiāte jae, aiseite mrā angwane, Ngōbōkwe űian mun mikadi űitiāte jae.

Mun ye abko hobrera jakān. Abko kore se, niebare Jesukwe ni ngwian bkāne krikribtā.

*Nikwe ni rüe taredre
(Mateo 5.38-48; 7.12)*

²⁷ Jesukwe niebare:

Mun ti kukwei nuaka nete, ye ie ti bike niere krörō: Munkwe mun rüe tare. Nire nire matā munbtā abko krāke munkwe jāndrān kuin nuen.

²⁸ Nire nire kākwe mun rātākā taretare, ye krāke munkwe jāndrān kuin kuin kārā Ngōbōye. Nire nire kākwe mun mikadre ja tare nike krūbāte, ye krāke munkwe blita Ngōbōbe.

²⁹ Erere arato, nane ni mdakwe ma meta ngwāre küde ruenkri yebtā ma mikakāre ngwarbe jae ne ngwane, makwe ja ngwāre kwārākri mika demandre ie ja mākākāreta ben. Akwa makwe űian ja ngie mika. Erere arato, nirekwe dān bāri kuin makwe ja mriatekrā tā mabtā ye dianka makān angwane, dān raba űtadi mabtā, ye makwe bian ie arato.

³⁰ Nirekwe jāndrān munkwe kārā munye, ye erere munkwe bian ie. Erere arato, nirekwe jāndrān jen munkwe dianka munkwe űian ja ngie mika amne munkwe űian kārāta ie. Munkwe kukwe ne nuendre kore angwane, munkwe mun rüe taredre.

³¹ Ni mda mdakwe jāndrān kuin nuendre munkrā, ie mun tōta nebe, ye kwrere munkwe jāndrān kuin nuen ni mda mdakrā.

³² Mdakāre abko, ni moto kāmekāme tā ni niara tarekātarekā tarere, ye kwrere munkwe ni mun tarekātarekā aibe taredre arato angwane, űNgōbōkwe űitiā biandi munye, munta nütüre ya? űakare, űnōbtā űian angwane űdre bā jene nuenta munkwe ni moto kāmekāme ngwā? űYe űian kukwe nuenta ni moto kāmekāmenkwe arabe munta nuene siba ya?

³³ Erere arato, ni jāndrān kuin kuin nuenkā aibe krāke ni moto kāmekāme tā jāndrān kuin kuin nuene, ye kwrere ni jāndrān kuin nuenkā munkrā aibe krāke munkwe jāndrān kuin nuendre angwane, űNgōbōkwe űitiā biandi munye, munta nütüre ya? űakare, űnōbtā űian angwane űdre nuendre munkwe ni moto kāmekāme ngwā kore? űYe űian kukwe nuenta ni moto kāmekāmenkwe arabe munta nuene siba ya?

³⁴ Ne kwrere arato, ni moto kāmekāme aibe tā ngwian bien űitiādre jae kwārīkwāri, bti tādre tōdeke ngwian jakwebti kwārīkwāri. Ye kwrere ni ie mun tō rabadre ja di kārāi amne ngwian tādrera kwe mun die mikakrā aiseite aibe ie, munkwe ngwian biandre űitiādre angwane, űNgōbōkwe űitiā biandi munye, munta nütüre ya? űakare, űnōbtā űian angwane űdre bā jene nuenta munkwe ni moto kāmekāme ngwā? űYe űian kukwe nuenta ni moto kāmekāmenkwe arabe munta nuene siba ya?

³⁵ Ne mden kisete, munkwe űian mun mrākā aibe die mikadre, akwa munkwe mun rüe taredre amne munkwe jāndrān kuin nuen mun rüe die mikakrā. Erere arato, munkwe ngwian bian űitiādre mun rüeye angwane, munkwe űian biandre űitiā diankrāta tōre kwārākrita jae. Munkwe nuendre kore ne ngwane, Ngōbōkwe sribi mun rüekrā ye űitiā biandi kri munye kā kāinbti. Erere arato, mun rabadi Ngōbō Kri Kā Kāinbti ngobore, űnōbtā űian angwane ni diān diān krāke Ngōbō űitiāte űakare amne ni moto kāmekāme tā nūne Ngōbō űgere, akwa Ngōbō mandama krāke, aiseite ye kwrere mun rabadre arato.

³⁶ Ni jōkrā ruentari tare Ngōbō mun Rünye, ye kwrere munkwe ni jōkrā ngwian ruentari tare jae, niebare Jesukwe.

*űNan űākādre ni mda mda rüere
(Mateo 7.1-5)*

³⁷ Jesukwe niebare:

Ngōbōkwe űian kukwe űkadrete mun rüere, abkokāre munkwe űian bika kri, kākwe ni mda mda bā mika kāme ja kāne. Erere arato, Ngōbōkwe űian mun mikadre ngite, kākwe mun mikadre ja tare nike kākāre, abkokāre munkwe űian bika kri, kākwe ni mda mda mika ngite ngwarbe. Ni mdakwe ja mika ngite mun rüere, ye munkwe dian jabti ta angwane, mun ngite Ngōbō ngwārekri, ye Ngōbōkwe diandikā jire jōkrā munbtā arato.

³⁸ Ye kwrere arato, nireta jändrän mdei nike, ie munkwe jändrän bian ngwarbe angwane, Ngöbökwe jändrän biandi munye. Ye abko, munkwe jändrän ñäkädi kuin täte, ye kwrere Ngöbökwe jändrän biandi kuin täte munye. Ye mden kisete, munkwe jändrän biandre ngwarbe ño ni mda mdaye, ye kwrere Ngöbökwe jändrän biandi munye arato, niebare Jesukwe.

³⁹⁻⁴⁰ Bti Jesukwe kukwe bä mikani krörö mda:

¿Ni ja töitakaka, ye bäri töbtä kri ni dirikä ie yekrä ya? Ñakare, akwa ni ja töitakaka, ye käkwe ja töi tikadre ünän jökrä angwane, batibe rabadre töbtä dirikä ie ye kwrere, aisete mun ngämi ja töitike ünän, känenkri mun abko ni krörökrörö kwrere: ¿Ni ie kä tuen ñakare, ye raba ni mda niara kwrere jie ngwen kuin ya? Ñakare, ñöbtä ñan angwane ni nibu ie kä tuen ñakare ja kwrere rikadre ja jie ngwena kwärikwäri ie kä oko romon mdente tuen ñakare ietre, aisete betadrekä jräte amne rikadre ngwarbe gwaire. Ne aisete, mun ngämi ja töitike ünän, känenkri munkwe ñan bika kri, kä rika ni mda mda jie ngwena, niebare kwe.

⁴¹ Jesukwe kukwe mda bä mikani krörö, käkwe kukwe käme nikwe bä mikani kri oto bäri kri kwrere amne, kukwe käme nuenta ni mdakwe abko bä mikani kä büre chi kwrere, käkwe niebare:

¿Kri oto bäri kri tä ma okwäte, ye ño abko ma töbikare ñakare jae amarebti kä büre chi ma mräkä okwäte, abkobtä mata nebe ja ngwen ruen tare yere?

⁴² ¿Ye ñöbtä kri oto bäri kri tä ma okwäte abko mata dianka nütüre ñakare jae amarebti, kä büre chi ma mräkä okwäte abko, ie mata niere: Ti mräkä, kä büre ma okwäte ye, ti tuemetre denkä jae, mata niere ie? ¿Ye ñan ngwarbe, mata ja bä mike kuin ma mräkäbtä, käta kukwe nuene kore yera! Makwe kri oto kri ma okwäte, ye ara jire dianka käne jae, bti kä raba tuenta kuin mae angwane, batibe makwe kä büre chi ma mräkä okwäte ye dianka mda ie. Ye kwrere, munta kukwe nuene bäri kämekäme abko okwäbti, ni mdata ja mike ngite chi abko munkwe ñan bika bäri kise ngwen btä. Munkwe ñan ñäkä jire chi ni yebtä, akwa kukwe käme, yebtä mun raba moto ulire, bti kukwe ye tuemetre jire jökrä käne, abti mun raba mun mräkä die mike, niebare Jesukwe.

Jesukwe ni töi bä mikani kri ngwäbtä

(Mateo 7.17-20; 12.34-35)

⁴³ Bti Jesukwe kukwe mda bä mikani abko krörö:

Kri ngwä kuin kwetadre ñan ngwäta nebe käme. Erere arato, kri ngwä käme kwetata ñakare, ye ñan ngwäta nebe kuin.

⁴⁴ Ye mden kisete, ngwäta kuin ya, käme ya, yebtä kri kuin ya, käme ya tä nüke gare nie. Ne aisete, ¿kri tukwäte tukwäte btä nita higo ngwä kuin kwetadre ötö ya? Ñakare. Erere arato, ¿kri mda mda tukwäte tukwäte btä nita uba ngwäkä ükekrö ya? Ñakare.

⁴⁵ Ye kwrere jire abko, ni moto kuin ne ngwane, nita blite kuin ni mda mda die mikakäre, akwa ni moto käme ne ngwane nita blite ngwarbe diän diän jirekäbe, ye abko ñan tä ni mda mda die mike, ñöbtä ñan angwane niara abko töi käme, yebe tä nüne. Ne aisete ni moto ño amne ni töi ño, ye kwrere nita blite, niebare Jesukwe.

Ju mikaka nibu

(Mateo 7.24-27)

⁴⁶⁻⁴⁷ Bti Jesukwe niebare mda:

Mun ti kukwe nuaka nuaka nete, ye ngätäite ni ruäre käta ti Dänkien, niere tie akwa, tita kukwe nuemna abko erere tä nuene ñakare. Ni ye kwrere abko, ti bike bä mike ni krörö btä munye:

⁴⁸ Bati ni nämene iti, kä nikani ju mike ñö köräbtä. Käne kä muani mente nguse nguse kwe, bti ürä kuin nökanani kwe ju gräre, bti ju mikani kuin jäkwatabti kwe. Abti bati ñü jatani temen, ñö nikani niren niren jate, jatani mate dite jubtä se kwrere, akwa ju mikani kuin kwe, aisete nin ño nikani ngwena kän. Ye kwrere abko ni ti kukwe nuaka nuaka abko ie tita dre dre nuemna, erere tä nuene, ni ye abko ni iti käkwe ju mikani kuin ye kwrere.

⁴⁹ Akwa ni mdara jire käkwe ju mikani ñö köräbtä arato abko käkwe ürä nökanani känime ümante abko ñü jatani temen, ñö nikani niren niren kri jate, jatani mate dite jubtä. Ju ye abko namani jueme, aisete ñö jatani mate btä, nikaninbe temen, nikani ngwarbe jire jökrä. Ye kwrere abko, ni ti kukwe nuaka nuaka abko ie tita dre dre nuemna akwa tä nuene ñakare, ni ye abko ni iti käkwe ju mikani jueme, nikani temen ye kwrere. Abko kore se, niebare Jesukwe ni kwatiye.

7

Rükä dänkien romanobo käkwe tödekani metre Jesubti

(Mateo 8.5-13; Juan 4.43-54)

¹ Jesukwe blitabare ünän ni kwatibe, yehti nikani mda juta Capernaúmte.

² Ye kánti rúkă dănkien romanobo nămane nŭne iti. Ni ye abko kwe, ni nămane iti sribikă jakră. Sribikă ye abko mika nămane ũtiâte kri kwe abko năkăni bren jume, namani tu neketebe kăn.

³ Ne btărăbe Jesu nămane Capernaúmte kădrie namani jabtă ni rúkă dănkien ye okwăbti. Jŏtrŏ ngwarbe, niara kăkwe nitre unbren ji dokwăte nitre Capernaúmbo ngătăite juani Jesu kărere sribikă jakwe miketa kuinta.

⁴⁻⁵ Erere nitre unbren ji dokwăte ye jatani, nŭkani Jesu kánti, kă namani ribere kisere krŏrŏ Jesuye:

Nitre rúkă dănkien abko űakare israelita. Niara romanobo bkănă akwa, ni israelita tare kri kwe. Niara arabe kăkwe ngwian biani sinagoga jue ũtiă biankră nunkră Capernaúm nete, aisete niara ũtiâte, aisete makwe sribikă kwe mikadreta kuinta krăke, ie nun tŏ nibi abko namanintre ribere kisere kore ie.

⁶ Te Jesu nikani bentre, nikanina nebe nitre rúkă dănkien ye gwirrie ken angwane, nitre rúkă dănkien ye kăkwe kukwe muko juani ruăre Jesu ngăbti ja kukwei niere, kăkwe niebare Jesuye:

Nitre rúkă dănkien kăkwe ja kukwei niemna mae abko nun ki niere ma ngăbti abko krŏrŏ: Ti Dănkien, ni ũtiâte űakare ti ne kwrere abko gwirrie ni ũtiâte ma ye kwrere nin rŭkadre jire chi ruen tie, aisete makwe űan ja nikadre dikaro rŭkakăre ti gwirrie, nibi ruen tie.

⁷ Ma bări ũtiâte, ye mdenbtă abko nin ja nŭke tŏre jire chi tie, niken ma kărere au sribikă tikwe miketa kuinta, aisete tikwe ni mda aibe juni ma kărere. Akwa sribikă tikwe rabadreta kuinta abko makwe niedre jirekăbe menteninbe angwane, rabadita kuinta abko gare tie abko ti tŏ nibi ribei mae,

⁸ űobtă űan angwane ni mda bări ũtiâte ũtiâte, ben tita sribire, kăta dre nuemna tie, erere tita nuene. Erere arato, nitre rúkă tă sribire tibe abko tita juen, ye tă niken jŏtrŏ ngwarbe. Jakwe, tita niere ie, jŏtrŏ ngwarbe tă kite. Mdakăre abko, ni klaborre tikwe, ie sribi ne nuene, tita niere, jŏtrŏ ngwarbe tă nuene. Ne aisete, tita dre niere, erere tă nebe bare tăte jŏkră. Ye kwrere arato, makwe dre dre niedre sribikă bren tikwebtă abko erere rabadi bare tăte mae ruen tie, aisete tita ja di ribere kore mae, niemna kore nitre rúkă dănkienkwe mae, niebare rúkă dănkien kukwe mukokwe Jesuye.

⁹ Yebtă Jesu űan tŏi namani krŭtare mda, kăkwe ni nămane năin ben mikani űărăre jŏkră, bti niebare kwe ietre:

Ni tŏdeke kwatibe Ngŏbŏbti ni ne kwrere, nin ngămi kwen jire tie nitre israelita ngătăite amarebti ni menteni nŭnanka juta mdara jire te tă tŏdeke kwatibe Ngŏbŏbti nŭke kwen mtare tie nere, niebare Jesukwe ni kwatiye kore.

¹⁰ Bti Jesu nikaninta ja jiehti amne ni Jesu kărăkă kărăkă abko nikaninta janknu, nikani nebeta nitre rúkă dănkien kánti angwane, ni klaborre nitre rúkă dănkienkwe, ye namaninante kuinta, btă nikani nebeta abko nakaninkă kore.

Meri ngobo itibe krŭtani kăn abko Jesukwe mikaninta nire

¹¹ Nebti Jesu nikani mda juta chi kădian nămane Naïn kánti nitre ja tŏitikaka benbe angwane, ni mda mda nikani kwati siba ben.

¹² Nikani ngitiekă jukwebtă juta chi Naïn yete angwane, mŭrŭ ngwăkă jăjatani doboi mikadre, jănŭkani ngătăi ben. Mŭrŭ ngwăkă ye abko, meri kăn brare krŭtani abko ngobo ngŏră itibe kwe ben nămane nŭne abko krŭtani kăn. Mden abko ngwăkă ngwian nămane abko ben ni mda mda nămane năin kwati uliere siba, nŭkani ngătăi ji ngrabare Jesube.

¹³ Meri ngobo ngŏră itibe kwe krŭtani kăn, meri ye abko jatabare Jesuye amne namani ruentari tare kri Jesuye, kăkwe niebare ie:

Ma bobre, ngăbăkre krŭta tare makăn ne abko, akwa makwe űan mŭai jakăn, niebare kwe meri ye.

¹⁴ Ne btărăbe jănkwata bti mŭrŭ ngwăkă ngwian nămane, ye ken Jesukwe krŏtabare, bti kise mikani jănkwatăbtă kwe mŭrŭ ngwăkă ye. Abtă ni mŭrŭ ngwăkă ngwianka namani nŭnaninkă jŏkră angwane, Jesukwe niebare mŭrŭ ngwăkă ye:

Ngăbăkre, nŭketa nire tita niere mae, niebare kwe ie.

¹⁵ Erere bkănă, mŭrŭ ngwăkă ye nŭkanintabe nire batibe. Ngăbăkre ye nŭkani tăkănantbe krŏ, bti nikaninbe bliteta se kwrere. Bti Jesukwe bianinta meyeye ni kwati okwăbti.

¹⁶ Yebtă abko, ni jŏkră namani nekwetekă, akwa namanintre Ngŏbŏ kăikitekă, kă namani niere krŏrŏ Jesubtă:

Ni Ngŏbŏ kukwei niekă kri nŭke ni ngătăite nete mtare, kŏbŏire Ngŏbŏta ni jen kwe die mike, namanintre niere, kă ngwiare nuăre jabtă Ngŏbŏ kăikitarekă kwără se kwrere.

¹⁷ Jesukwe mŭrŭ ngwăkă mikaninta nire, ye abko kădrie namani batibe jŏkră Judeate ta temen btă kă kiakia te Judea bare temen abko nakaninkă kore.

*Jesukwe blitabare Juan Bautistabtä**(Mateo 11.2-19)*

¹⁸ Kukwe kuin ne namani bare Jesuye, ne abko nitre nänkä Juan Bautistabe nikani, käkwe niebare jire jökrä ie. Abtä Juankwe nitre nänkä ben, ye kārābare nibu ja kānti,

¹⁹ bti ni nibu ye juani kwe ni Dänkien Jesu kānti abko ni Dianinkä juandre Ngöbökwē ne abko Jesu ya, ñakare ya abko tö namani gai. Ñakare ne ngwane, ni mdara jire ngbiadre ngābti ya, ño abko tö namani gai, kākwe ni juani nibu kukwe ye ngwentari Jesuye.

²⁰ Erere bkänä, ni nibu ye nükani Jesu kānti, kākwe niebare krörö ie:

Ni Dianinkä juandre Ngöbökwē rükadre ni ngätäite niebare, ye erere ma ara nükani ya o nunkwe ni mdara jire ngbiadre abko nun juanba ngwentari mae, niebare kwetwe Jesuye.

²¹ Jesukwe kukwe kani ngābti ñakare jötrö, akwa ne btārābe ni kwati nāmāne ja tare nike bren bātākā ngwarbe kisete abko Jesukwe mikaninta quinta. Ni ruäre abko, btā üai kāmē nāmāne, kisete nāmāne ja tare nike abko Jesu namani juentari mento btā. Erere arato, ni kwati ie kā tuen ñakare abko ie Jesu namani kā mike tuenta ni juani nibu Juankwe ye okwābti.

²² Bti Jesukwe niebare krörö mda ni nibu yeye:

Tita dre dre nuene tuata munkwe amne tita dre dre niere abko kukwei nuri munkwe, ye erere mun nān niereta Juanye. Amne munkwe nie krörö ie arato: Ni ie kā tuen ñakare abko ie kā nibi tuenta kuin amne, ni nakwente abko nibi dikekāta kuin kröta. Erere arato, ni bren bren lebra kisete abko kwata nibi nebeta kuin jökrā amne ni olo ngidianinte abko ie ni kukwei nibi ruenta kuin. Erere arato, ni krütanikrütani abko nibi nüketa nire amne ni bobre bobre abko ie Ngöbö kukwei kuin mika nibi gare abko munkwe nie Juanye.

²³ Erere arato, nire nire kāta tödeke tibti amne ti ne ara nükani tā nütüre amne ñan tā trö kwite tie, ni ye abko ie Ngöbökwē ja di biandi amne kā rabadī nuäre btā tikwe nini abko munkwe nie kore Juanye. Abko kore se, niebare Jesukwe ni nibu yeye.

²⁴ Ni juani nibu Juankwe nikaninta angwane, nitre nāmāne yete ye ben Jesu rikaba blite krörö juanbtā:

¿Mun nikani ni ño tuakäre kā kaibete? ¿Mikā juankata mürekwe nekwäre sekwäre, ye kāta ni tōi kwitaka jene jene nekwäre sekwäre bā mike, ni se kwrere tua nikani munkwe ya?

²⁵ ¿Mun janānbare Juan mike ñārāre angwane, ni ja ūkaninte kuin kākwe dān ūtiāte kri kitani jabtā nāmāne yete abko mun janānbare mike ñārāre ya? Ñakare, ñobtä ñan angwane ni dān ūtiāte kri kitani jabtā, ni ye kwrere abko tā nūne jāme jrei gwiriete amne ñan tā nūne kā kaibete abko garera munye ruen tie.

²⁶ ¿Akwa mun nikani ni ño mike ñārāre metre? ¿Mun nikani ni Ngöbö kukwei niekā mike ñārāre ñan ñan? Jānri, mun nikani ni kore mike ñārāre. Akwa Juan ye abko bāri Ngöbö kukwei niekā kri abko mun nikani tuen.

²⁷ Juan ye mdenbtā tārā tā tikani krörö Ngöbö Kukweibtā: Ngöbökwē niebare:

Tikwe ja kukwei ngwianka juandi iti ma kānenkri.

Niarakwe ni tōi mikadi biare ma kāne, ji ūkateta biare ye kwrere,

Malaquías 3.1

abko tā tikani kore Juanbtā.

²⁸ Ne mden kisete, ti bike kukwe niere krörö munye: Ni jökrā dārebare kā nebtā, ye ngätäite ni ñakare jire iti abko bāri ūtiāte Juankrä; akwa nire nire bāri bobre, ūtiāte ñakare, btā Ngöböta gobrane, ni ye abko bāri ūtiāte Juankrä, niebare Jesukwe.

²⁹ Jesukwe Juan mikani bāri ūtiāte kore, abtä ni kwati Jesu kukwei nuaka nuaka amne nitre ngwian kārākā gobran romanobokrā nāmāne yete kākwe kukwe mikanintbe Ngöbökwē ni dīantarikrā diribare Juankwe, ye abko era bā mikani, ñobtä ñan angwane niaratre kākwe ja mikani ngökadre ñöte Juanye aisete.

³⁰ Akwa nitre bariseo btā Kukwe Biani Ngöbökwē Moiséye dirikātre namani yete Jesu kukwei nuen arato amne kukwe mikanintbe Ngöbökwē ni dīantarikrā diribare Juankwe, ye abko niaratre namani mike ngwarbe jae, ñobtä ñan angwane ñan ja mikani ngökadre ñöte kwetwe Juanye, ñobtä ñan angwane nin namani moto ulire kukwe kāmekāmenbtā aisete.

³¹ Ni jökrā kākwe töbikabare ñakare ja kwrere Juanbtā kore, abtä Jesukwe niebareta ietere:

Ne mdenbtā abko ni nūnanka kā ne näire abko ti bike bā mike krörö: Kā jāndrān rürümoinkrā jutate, kānti ngābākre tā nebe tākānintbe temen, kāta ñāke krikri mrākā mda mdaye, yebtä ti bike ni nūnanka kā ne näire bā mike krörö:

³² Ngābākre tā niere mrākāye: Nunkwe nörā jürü tārā mikakrā munye, akwa mun ñan tö nibi tārā mikai. Abtä ka ni moto mikakrā ulire abko nunkwe nini mda, akwa munkwe müaniri ñakare arato abko ngābākreta niere. Ye mden kwrere munta niere Juanbtā amne tibtä, aisete tita nitre ye bā mike kore,

³³ ñobtä ñan angwane Juan Bautista nükani angwane, üai kāmē tā btā, aisete ñan tā mröre kri amne ñan tā dö ñaen, munta niere rüere.

³⁴ Yebti ti, Ni Kä Nebtä Ngobo rükaba mda angwane, ti abko mröre büle krikri amne ti dö ñaen krübäte munta niere tibtä. Mdakäre abko, ti ja getaka ni diän diän ben amne nitre jändrän ütiä käräkä gobran romanobokrä tä tuen käme munye abko ben tita ja gete, abtä munta ñäke ti rüere arato. Ye mdenbtä abko mun ngäbäkre kwrere tita niere.

³⁵ Akwa ni nüne töbtä era metre Ngöbö diebti nun kwrere, yebtä abko nun abko ni jen Ngöbökre era metre abko nunta bä mike. Abko kore se, niebare Jesukwe.

Ñö rä bäne ütiäte kri kekani Jesu ngotobti

³⁶ Nebti bati, bariseo kädian nämane Simón käkwe Jesu ngwiani mröre ja gwiriete. Erere Jesu nikani, namani tākānintbe mesabtä Simón juete angwane,

³⁷ meri bti kä ngwarbe nämane nüne juta ne arabe kanti abko Jesu nukani mröre Simón gwiriete gani kwe. Angwane ñö rä bäne ütiäte kri kädian nämane nardo nämane jä bä ngwen kädianta alabastro dätebare boteare te, ye jänükani kwe Jesu kanti.

³⁸ Müare kwärä nikani ngitiekä Jesu ngotobtä temen, kä nikani Jesu ngoto bätete ni klabore kwrere, akwa ja okwä ñöibti bätäninte kwe. Jesu ngoto bätäninte ünän kwe, bti rötaninta kwe ja dokwä drüenbti, ngoto demainbare kwe, bti ñö rä bäne kekani kwe Jesu ngotobti, namani Jesu tarere kri mikakäre tuare ie.

³⁹ Ye abko nakaninkä Simón, Jesu nübaikä mröre ja kanti ye okwäbti. Abtä Simón namani töbike krörö mda Jesubtä: ¡jo! Ni noko Ngöbö kukwei niekä bkänä ne ngwane, ni ño tä nuenbtä ngotobtä gadre kwe. Amne meri se bti kä ngwarbe ni jökrä tä kädriere kämekäme rükadre gare btä ie arato bä amarebti se, Simón namani nütüre kore Jesubtä. Ne Jesukwe gani Simónbtä,

⁴⁰ abtä niebare mda kwe bariseo yeye:

Simón, ti tö kukwe ngwiantari kwati mae, niebare Jesukwe ie.

Simón käkwe niebare mda Jesuye:

¿Abko dre? niebare kwe ie.

⁴¹ Ne btäräbe, Jesu nikaninbe kukwe bä mike meri yebtä Simónye:

Bati ni nämane iti abko ngwian bkäne kri. Ni ye abko nämane ngwian bien ütiädre ni mda mdaye. Ni ye abko, ie ni nibu käkwe ngwian käräbare ütiädre ie. Ni iti, bti rürümon ütiä nämane sientö krärike jire amne ni mda abko, bti rürümon ütiä nämane gre ketarike.

⁴² Rürümon ütiä nämane krörö ni nibubti, akwa nin ngwian namani kwenta jire ietre biandreta ja ütiäreta. Abtä ngwian bkänkä käkwe niebare ietre: Tikwe ngwian bianba ütiädre munye, akwa ngwian ñakare munye biandreta ja ütiäre tie, aiseti ti bike rürümon ütiä munbti ye käikwitekä jabti jökrä, niebare kore kwe ni nibu yeye. ¿Ni nibu ne mdenkwe ni ngwian bkänkä taredi bäri ruen mae? niebare Jesukwe Simónye.

⁴³ Simónkwe niebare mda Jesuye:

Ni bti bäri rürümon ütiä kri käikwitaninkä jabti ngwian bkänkäkwe, ni ye abko käta ngwian bkänkä tarere bäri raba ruen tie, niebare kwe Jesuye.

⁴⁴ Bti meri ye nukani Jesu ngoto bätete, ye Jesukwe mikani ñäräre, käkwe niebare Simónye:

Simón, ti nü gwi ma kanti nete, makwe ti miri ngwarbe jae, käkwe nin ñö bini jire chi tie ja ngoto bätätekrä ti kakrä ngäbti, akwa meri ne nü, käkwe ti ngoto bätrite ja okwä ñöibti, bti rütüta kwe ja dokwä drüenbti, mike ñäräre makwe, btä makwe töbika.

⁴⁵ Erere arato, ti ki gwäkäre mae angwane, nin makwe ti demainiri jire ti kakrä ngäbti kuin, akwa ti ki gwäkäre amne, meri ne nikirabe ti demaine ngotobtä abti kä nüke nere.

⁴⁶ Mdakäre abko, ti nü amne nin makwe olibo köi ütiä brai kiri ti dokwäbti ti kakrä ngäbti kuin, akwa meri ne abko käkwe ñö rä bäne ütiäte kri kiri ti ngotobti.

⁴⁷ Era metre meri ne käkwe ja mikani ngite kabre Ngöbö rüere bkänä akwa, tikwe niara ngite dininkä jire jökrä btä. Mdenbtä abko tä ti tarere bäri makrä bä mirita kore kwe, ni bti ngwian ütiä käikwitaninkä jabti ngwian bkänkäkwe ye kwrere abko ti tö nibi niei mae Simón, ñöbtä ñan angwane ni ngite ñakare bökan diankata nibtä, ni ye abko ñan tä ni tarere dikaro. Abko kore se, niebare Jesukwe Simónye.

⁴⁸ Bti Jesukwe niebare mda meri yeye:

Ma ngite kukwe kämekämenbtä, ye tikwe dininkä jökrä mabtä, niebare Jesukwe ie.

⁴⁹ Abtä ni mda mda nämane siba yete, ye namani niere krörö jae kwärikwäri:

¿Ni noko nire amarebti tä ni ngite denkä nibtä tä niere sere? namanintre niere kore Jesubtä.

⁵⁰ Akwa Jesu abko nikani niere janknu krörö meri yeye:

Ma nibi tödeke kwatibe tibti, köböire kukwe kämekäme btä ma ngite, ye tikwe dininkä mabtä, aiseti nänta jäme, niebare Jesukwe ie.

¹ Nebti Ngöbö jatanina nuke gobrane nibti abko kukwe kuin Jesu nikani niere juta krikrite amne juta kiakiate kä Galileate ta temen. Ye ngwane, nitre ja töitikaka Jesube ni jätäbti nibu nämane näin siba ben.

² Erere arato, ni merire merire bren bren mikaninta quinta Jesukwe, ruäre abko btä üai käme juanintari kwe, ye abko nämane näin ruäre. Ni merire nämane näin siba Jesube abko nere: María Magdalabo, María ne mdenbtä Jesukwe üai käme krä kükü juanintari mento.

³ Arato Juana nämane näin siba. Juana ne abko ni iti kädian nämane Chuza merie. Chuza abko ju ngibiabtikä jrei Herodes Antipas kräke. Arato Susana nämane näin siba. Ye ngwane meri mda mda nämane näin kwati siba abko jändrän nämane kwekwe, erere bti nämane Jesu btä nitre ja töitikaka ben die mike.

Dobo ketabkä, btä Jesukwe kukwe bä mikani
(Mateo 13.1-9; Marcos 4.1-9)

⁴ Ne ngwane bati ni nünanka juta ketareketare Galilea temen namani nuke ja ükekrö kwati ja tuakäre Jesube abko ie Jesukwe kukwe bä mikani krörö:

⁵ Bati ni nikani iti nura metekä. Nura metaninkä kwe angwane, nura ruäre nikani mate ji ngrabare temen. Nura ye abko ni jatani, käkwe rätäbare jökräbti. Bärire mda abko nukwä jatani, käkwe kwetani jökrä kän.

⁶ Nura ruäre abko nikani mate jäkwatäbti temen abko nükani mure, akwa dobo nötare dikaro, aisete ngrötaninkä jökrä.

⁷ Nura ruäre abko nikani mate kökrä tukwätetukwäte ngätäite, ye abko nükani mure arato, akwa kökrä ye abko rirabare bäri jötrö nura mu yehti ta, käkwe kämikani.

⁸ Akwa nura nikani mate dobo kuinte, ye abko nükani mure amne rirabare tuärebe, bti ngwä nikani nebe btä btä amne datire datire ngwä namani gre ketarike. Ne abko nakaninkä kore, niebare Jesukwe ni kwatiye kore.

Ye btäräbe, Jesukwe näkäbare jume ja dibti krörö mda ni kwati yeye:

Nire nire käta ti kukwei nuen, ye abko olo tärä ne ngwane, ti kukwei ne ketate ja olote kwe, kukwe ne rükadre gare kuin munye abkokäre. Abko kore se, niebare Jesukwe.

Ñobtä Jesukwe kukwe bä mikani
(Mateo 13.10-17; Marcos 4.10-12)

⁹ Jesukwe kukwe bä mikani kore ne ñan nükani gare nitre ja töitikaka benye, käkwe niebare ie:

Makwe kukwe bä miri, ye abko dre bä miri kore makwe yere, niebare kwetere Jesuye.

¹⁰ Abtä Jesukwe niebare mda ietre:

Ngöbö rükadre gobrane ño nibti abko tä tiebe, akwa Ngöböta mike gare munye, akwa ni mda mda abko ie Ngöböta mike gare ñakare, aisete tita kukwe bä mike kore, Ngöbö Kukwei tä tikani krörö rabadre bare abkokäre:

Nebtä nikradre bäri kwetere, akwa kukwe ño ñan jatadre metre ietre amne ni kukwei nuadre bäri kwetere akwa, ñan rükadre gare ietre, *Isaiás 6.9*
abkokäre tita kukwe bä mike kore ietre, Ngöbö kukwei niekä kirakira käkwe niebare ni nebtä ye kwrere.

Dobo ketabkä tä dre niere abko nere
(Mateo 13.18-23; Marcos 4.13-20)

¹¹ Kukwe nini tikwe ye abko tä kukwe krörö bä mike: Ngöbö Kukwei abko nura kwrere.

¹² Amne nura nikani ngitiekä ji ngrabare temen, ye abko ni ruäre tä Ngöbö Kukwei nuen akwa, diablu tä kite, käta Ngöbö Kukwei ye denkä jökrä töite, ni ye käkwe ñan Ngöbö Kukwei mikadre era amne ñan rabadre dianintari abkokäre, mden nini tikwe ye.

¹³ Amne ni ruäre abko käta Ngöbö Kukwei nuen amne käta nebe nuäre btä kare ngäbti. Ni ye abko nura nikani mate jäkwatäbti ye kwrere, ñobtä ñan angwane nura nikani mate jäkwatäbti abko ngätri ñan nämane bökan, ye kwrere jire ni ruäre tä Ngöbö Kukwei kaen ngäbti, bti bä jötrö tä tödeke Ngöböbti. Tädre niken ja tare nike tödekabtä Ngöböbti amne käta Ngöbö Kukwei kiteta temen, bti tä nikenta ja jiebti.

¹⁴ Amne ni ruäre abko tä Ngöbö Kukwei nuen, akwa tä nakwen bäri jändrän kä nebtä jiebti amne, tä ngwian tarere bäri amne jändrän nuäre nuäre kä nebtä yehtä tä ja kite, ye abko käta ngökö. Ne aisete ni ye abko nura nikani mate kökrä tukwätetukwäte ngätäite amne ngatani, ye tä nakenkä ni yehtä, aisete nura ngatani ngwä namani ñakare, ye kwrere jire ni ye tä sribi nuene ñakare Ngöbökrä.

¹⁵ Akwa nura nikani ngitiekä dobo kuinte, ye abko ni töi kuin amne tä biare, käta Ngöbö Kukwei nuen angwane, tä ketete dime jabtä amne tä nünenkä dite btä. Ni ye abko nura ngwäta neme kuin ötata kabre, ye kwrere jire ni yeta jändrän kuin nuene Ngöbökrä. Abko kore se, niebare Jesukwe ietre.

Jesukwe ja kukwei bä mikani ñotra kwrere
(*Marcos 4.21-25*)

¹⁶ Jesukwe niebareta:

Ni ñakare jire iti käta ñotra jutra mike abti tä jue miketa kaja täni. Erere arato, ñan tä mike jän täni jae, akwa ñotra jutra mikata angwane, mikata üräbtä käin trä rabadre ngitie jökrä gwita temen, ni jökrä gwi, ie kä rabadre tuen abkokäre.

¹⁷ Ye kwrere arato, tita kukwei jire jökrä dirire kaibe tiebe munye mtare, akwa batira jire munkwe mikadi gare ni jökräye. Erere arato, kukwei diribare tiebe tikwe, batira jire rabadi gare metre ja ngwärekre jökrä.

¹⁸ Ne aisete olo ketete kuin ti kukweye munkwe, ñobtä ñan angwane nire nire ie Ngöbö Kukwei nüke gare, ye abko ie Ngöbökwé ja Kukwei biandi bäri mda; akwa nire nire ie Ngöbö Kukwei gare ñakare, ye abko ie Ngöbö Kukwei gare kiakia abko Ngöbökwé diandikä jökrä kän. Abko kore se, niebare Jesukwe nitre ja töitikaka benye.

Nire abko Jesu mräkä era metre
(*Mateo 12.46-50; Marcos 3.31-35*)

¹⁹ Ye ngwane, Jesu meye amne etbakantre abko nikani jiebtä ja tuakäre ben angwane, ni nämane kwati Jesu bäre temen, aisete niaratre ñan namani nebe Jesu kánti.

²⁰ Angwane ni iti kákwe niebare Jesuye:

Ma meye amne ma etbakantre tä ju bäre nokote abko tö nibi blitai mabe, niebare kwe ie.

²¹ Jesukwe niebare ni jökräye:

Nire nire tä Ngöbö Kukwei nuen, erere tä mike täte, ni ye abko ti meye tikwe amne ti etbakantre tikwe era metre, niebare kwe.

Jesukwe müre amne ñö mikani kwekbe
(*Mateo 8.23-27; Marcos 4.35-41*)

²² Abti bati Ñö Okwä Kri Galilea kánti Jesu nakwani rute, kákwe niebare nitre ja töitikaka benye:

Brän ñö okwä kwärä sekri, niebare kwe.

Ye erere nikanintre.

²³ Nikanintre ñöbti angwane, Jesu nikani kibien. Batibe müre jatani mate ribi krübäte ñö okwä ye kánti, ye abko namani ñö kite jökrä rute, aisete ru jatani niken ñöte nguse se kwrere.

²⁴ Yebtä abko nitre ja töitikaka ben nikani gaenkrö, kákwe niebare ie:

¡Dirikä, ni kite niken ñöte nguse! niebare kwetre Jesuye.

Angwane Jesu nikaninta krö, kákwe ñäkäbare müreye amne ñöye. Ye btäräbe, müre amne ñö namani kwekbe jökrä.

²⁵ Bti Jesukwe niebare nitre ja töitikaka benye:

¿Munta tödeke kwatibe Ngöböbti ya ñö yere? niebare kwe ietre.

Akwa niaratre abko namani nekwetekä krübäte amne töi ñan namani krütäre, kä namani niere jae kwärikwäri:

¿Ni ne abko ni ñö amarebti tä ñäke müreye amne ñöye amne, tä niara kukwei mike täte se? namani niere jae kwärikwäri.

Ni Gadarabo btä Jesukwe üai käme juanintari mento
(*Mateo 8.28-34; Marcos 5.1-20*)

²⁶ Nebti niaratre nikani janknu rute ñöbti nebe kākä Gadarete Ñö Okwä Kri Galilea kwäräkri.

²⁷ Jesu nämane rute, nikani jate angwane, juta yete ni nämane iti abko btä üai käme nämane abko jatani Jesu ngäbti. Raire abko ni ye nämane dän kite ñakare jabtä amne nämane nüne ñakare gwi, akwa nämane nüne rökabti.

²⁸ Jesu jatabare ie angwane, nikani ngitiekä ngukudokwäbti temen Jesu ngwärekre, kákwe ngratebare kri krörö:

Jesu, Ngöbö Kri Kä Käinbti Odei, ¿ye ñobtä ma kite ti nike nete ye? Makwe ñan ti mika ja tare nike abko ti tö nibi ribei mae, namani niere Jesuye.

²⁹ Üai käme rikadre mento btä abko Jesukwe niebarera ie, aisete namani ñäke krikri kore. Batire batire üai käme nämane niken ni yebtä angwane, ñan gitidre künken, abkokäre kise amne ngotokwä mäkäte nämane jökrä ie kadenanbti, akwa nämane kadena ötöte jökrä angwane, üai käme nämane niken ngwena kä kaibete.

³⁰ Ni ye abko ie Jesukwe niebare:

¿Ma kä ñö? niebare kwe ie.

Angwane üai kämentre kákwe niebare mda ie:

Ti kä Kabre, niebare kwetre.

(Ja ká Kabre, niebare kwe, ñobtä ñan angwane úai káme námáne kabre btá aiseite.)

³¹ Ye mden kákwe ñan ja juamna ká ja tare nikakrá te Ká Timonbti Jesuye.

³² Ye kánti abko mtú námáne kabre krúbäte mröre bá kánime ngudrebttä, aiseite úai kámenkwe ja juamna mtú yebtä Jesuye, erere Jesukwe juani mtübtä.

³³ Úai káme námáne nibtä, ye abko nikani mento btá, bti nikani mda mtú kabre yebtä. Ye btäräbe mtú kabre ye nikani betekä jökrä ja jiebtí ká btá motokwäre, nikani ngítiekä jökrä ñöte, kánti müre neketani jökrä.

³⁴ Nitre mtú ngibiaka abko okwäbti kukwe nakaninkä kore. Yebtä abko niaratre nikani betekä ngítie, ká nikani kukwe ye niere jökrä juta ngrabare temen amne juta bäre mento arato.

³⁵ Abtä kukwe nakaninkä ño abko ni kwati nükani tuen, kánti nikanintre nebe Jesu kánti angwane, ni btá úai káme námáne abko nikani mento, ni ye abko kákwe dán kitani jabtä amne ká namani ruenta kuin bti námáne tákánintbe Jesu ken, btá namanintre angwane, ká jürä namani kri btätre.

³⁶ Angwane ni btá úai káme námáne ye abko namaninta quinta ño abko nitre tuakatuaka namani niere jökrä ni mda mdaye.

³⁷ Yebtä abko, Jesu di kri krúbäte gani kwetere, aiseite ká jürä namani kri nitre Gadarabobtä, aiseite jötrö ngwarbe Jesu rikadre ká mdbati abko namanintre ribere ie. Ye erere Jesu nakwaninta rute nitre ja töitíkaka benbe, bti nikaninta.

³⁸ Akwa Jesu ngämi níkena, kánenkri ni btá úai káme nikani mento ye abko Jesu rikadre ngwena jabe abko namani ribere Jesuye, akwa niara rabadre jirekábe yete, Jesukwe niebare ie. Angwane Jesukwe niebare krörö mda ie:

³⁹ Nánta jirekábe ja gwiriete amne Ngöböke dre nuni makrá, ye erere makwe nie jökrä ni mda mdaye. Abko kore se, niebare Jesukwe ie.

Ye erere bkänä, Jesukwe dre nuenbare niara kráke, erere nikani niere jökrä juta ngrabare temen.

Jesukwe Jairo ngänkän mikaninta nire amne meri bren abko mikaninta quinta kwe (Mateo 9.18-26; Marcos 5.21-43)

⁴⁰ Yebti Jesu nikani nebeta Nö Okwä Kri Galilea kwäräkri mda angwane, ni námáne kwati ngibiare ngäbti, aiseite ká namani nuäre btätre Jesu kare ngäbtita.

⁴¹ Ye btäräbe ni kädian námáne Jairo nükani Jesu kánti. Jairo abko námáne sinagoga dänkiene juta yete abko jatani, nikaninbe ngítiekä ngukudokwäbti temen Jesu ngotobtä ja mikakäre bobre btá, ká namani Jesu ngwen kisere nebe ja gwiriete.

⁴² Ngänkän itibe kwe abko ie ká kwä jätäbti kubu abko jatani krüte kán, aiseite namani Jesu ngwen ja kánti. Ye erere Jesu nikani angwane, ni nikani kwati krúbäte ben, ká namani kete dime ja ngätáite, namani ruen ie.

⁴³ Angwane nitre nikani kwati Jesube, ye ngätáite meri námáne näin iti siba abko ká kwä jätäbti kubura námáne bren dbä tibiere abko kisete námáne ja tare nike amne, ngwian námáne kwe, erere ganinte jökrä kwe kräkäbtä jakrá akwa, ñakare namani nökröta nitre kräkä biankaye.

⁴⁴ Te meri ye abko nikani, kákwe krötabare ja ken Jesu trökri, kákwe dán Jesubtä nuaninbtä tiebe köräbtä. Ye btäräbe namaninta quinta batibe se kwrere.

⁴⁵ Angwane Jesukwe niebare:

¿Nirekwe dänkä nuribtä tibtä ye? niebare kwe.

Akwa ni jökrä namani ja rükente. Abtä Pedrokwe niebare Jesuye:

Dirikä, ni kwati nibi ma kete dime ja ngätáite, ká nibi ma kitekä nekwäre, sekwäre. ¿Ye ñobtä abko nirekwe ma nuribtä ma nibi niere yere? niebare Pedrokwe ie.

⁴⁶ Akwa Jesukwe niebareta mda:

Ni iti kákwe ti nuribtä tikwe garí, ñobtä ñan angwane Ngöbö di tä tibtä abko niki ruäre mento tibtä, nibi ruen tie, niebare kwe.

⁴⁷ Angwane meri ye kákwe ja rükandrete ño mda ñan namani nuke gare ie, akwa ká jürä namani btá. Abtä namani grüekä jökrä ngrabare, nikani, namani ngukudokwäbti temen Jesu ngotobtä ja mikakäre bobre btá angwane, ñobtä Jesu nuaninbtä kwe amne namaninta quinta ño abko niebare jökrä kwe ni jökrä ngwärekrei Jesuye.

⁴⁸ Angwane Jesukwe niebare mda ie:

Ti mräkä, makwe tödiri kwatibe tibti, köböire ma nibirate quinta, aiseite nánta jáme, niebare kwe meri yeye.

⁴⁹ Jesu námáne blite kore angwane, sinagoga dänkien ye jiebtí ni mdara jire nükani kukwe ngwena, kákwe niebare ie:

Ma ngänkän kürera makän. Makwe ñan dirikä nika mda, niebare kwe ie.

⁵⁰ Blitabare kore kwe, ye jarabare Jesuye angwane, Jesukwe niebare:

Ma ñan rekwetaka ngäbäkre jiebti jakän, akwa makwe tödeka kwatibe janknu tibtu angwane, ma ngänkän rabadita kuinta, niebare kwe ie.

⁵¹ Yebti nikanintre nebe gwi angwane, Jesukwe Pedro, Santiago, Juan amne meri bati ye rün amne meye aibe tuanimetre niken nebe gwi jabe.

⁵² Angwane ni jökrä nämáne meri bati krütani ye uliere amne müaire krikri be gwi, btä Jesu namani. Akwa niarakwe niebare ietre:

Ngäbäkre merire ye kürera munta nütüre, akwa tä kibien, aisete munkwe ñan müai mda, niebare kwe ietre.

⁵³ Akwa meri ye krütani bkänä namani gare ietre, aisete namanintre Jesu kötaire jökrä.

⁵⁴ Akwa Jesu nikani, käkwe meri ngwäkä ye kani küdebtu, bti ñäkäbare krörö kwe ie:

Ti ngänkän, ¡Ñäin krö! niebare Jesukwe ie.

⁵⁵ Ye btäräbe üai nükanintabe btä, aisete nükanintabe nire angwane, nükaninbe täkänintbeta krö, bti Jesukwe bukamna mräkäye.

⁵⁶ Meri bati mikaninta nire kore Jesukwe, yebtä abko rün amne meye ñan töi namani krütare mda. Akwa kukwe nakaninkä ño, ye abko ñan kädriedre jire kwetre ni mda mdabe, Jesukwe niebare ietre.

9

Jesukwe nitre ja töitikaka ben juani Ngöbö kukwei dirire

(Mateo 10.5-15; Marcos 6.7-13)

¹ Yebti Jesukwe nitre ja töitikaka ben ni jätäbti nibu ükaninkrö, bti Ngöbö die biani kwe ietre üai käme bätäkä ngwarbe juantarikrä mento amne ni bren bren mikakräta kuinta arato.

² Bti Ngöböta gobrane ni ngätäite kädriedre kwetre amne ni bren bren mikadreta kuinta kwetre, abkokäre Jesukwe juani,

³ käkwe niebare krörö ietre:

Mun ñan rika tribe ngwena jire chi mda jabtä ji ngrabarekäre abko krörö: Mun ñan rika mökän amne kra ngwena jae. Erere arato, mun ñan rika mrö, ngwian amne dän mda ngwena jae, ñobtä ñan angwane munkwe tödekadre Ngöböbti, ie ti tö aisete.

⁴ Ju mdente mun raba nüentbe, ye aibe kánti mun raba. Mun ñan rika ju kwatirekwatire te, akwa mun raba ju kwatibe te, abti mun rikata.

⁵ Akwa juta kánti mun ñan ka tö raba ngäbti ni mdakwe, ye kánti munkwe kä mikaka, akwa munkwe dobro mnü ngrükate ja ngotobtä, nitre ye ara jire ngite Ngöböye ja töi jenbti bä mikakrä ietre, niebare Jesukwe ietre.

⁶ Ye erere nitre ja töitikaka Jesube nikani juta kwatirekwatire kä ngrabare temen kukwe kuin Jesubtä ye kädriere amne, nikani ni bren bren miketa kuinta arato.

Jesu abko nire jrei Herodes tö namani gai

(Mateo 14.1-12; Marcos 6.14-19)

⁷ Kukwe namani nakenkä kore Jesu köböire, ye gani Herodekwe angwane, nire köböire nämáne nakenkä ñan namani nüke gare ie, ñobtä ñan angwane Ngöbökwé Juan Bautista mikaninta nire abko ni ruäre namani niere Jesubtä.

⁸ Akwa Ngöbö kukwei niekä kira kädian nämáne Elías abko nükaninta ni ruäre namani niere. Mdakäre abko, Ngöbö kukwei niekä kira mda abko nükaninta nire, ni mda namani niere Jesubtä.

⁹ Abtä Herodekwe niebare:

¿Tikwe Juan dokwä tikakamna, aisete ni ye ñakare Juan amarebti nire abko btä blitata krübäte dikaro kore ne? niebare Herodekwe.

Yebtä abko Herodes tö namani ja tuai Jesube.

Jesukwe ni mili krärike bukani

(Mateo 14.13-21; Marcos 6.30-44; Juan 6.1-14)

¹⁰ Abti nitre juani ja kukwei ngwianka Jesukwe ye nükaninta jökrä Jesu kánti angwane, dre dre nuenbare kwetre, ye erere niebare jökrä kwetre Jesuye. Abti Jesukwe käräbare jenena angwane, nikani ngwena kä kaibete juta Betsaidate.

¹¹ Akwa Jesu nikani ye abko ni kwati käkwe gani angwane, nikani niaratre jiebti amne, Jesukwe kani ngäbti kuin, bti Ngöböta gobrane ni ngätäite, yebtä Jesukwe blitabare bentre amne ni bren bren abko mikaninta kuinta kwe.

¹² Yebti kä jatanina dere angwane, nitre ja töitikaka Jesube ni jätäbti nibu nikani, käkwe niebare ie:

Nita kä kaibete nete, jändrän ñakare kwetadre, aisete nitre se juenta jökrä jadüke amne mrö känene jae juta kántikánti sete kä ngrabare temen, niebare kwetre Jesuye.

¹³ Abtä Jesukwe niebare mda ietre:

Niaratre buka munkwe, niebare kwe ietre.

Abtä niebare kwetre ie:

¿Banta kunrikebe amne gwata krobube nikwe, se abko biandre ño ietre? ¿Ni kwati se kräke, ni rikadre mrö kökö ya? niebare kwetre mda Jesuye.

¹⁴ Ye ngwane abko, ni brare aibe nämane mili krärike jire, akwa Jesukwe niebare mda nitre ja töitikaka benye:

Nitre ye mika tākānintbe gre ketebu bti ni jätä jätä ja täritäri, niebare kwe ietre.

¹⁵ Ye erere Jesu kukwei mikani täte kwetre, kākwe nitre mikani tākānintbe jökrä temen.

¹⁶ Bti Jesukwe ban kunrike amne gwa krobu diani kisete, kākwe nikrabare kä känbti, kuin niebare kwe btä Ngöböye, bti ñäkänintbe kiakia kwe, bti biani kwe nitre ja töitikaka ben yeye dräidre ni kwati yehti.

¹⁷ Angwane ni jökrä kākwe mröbare, namani trinetrine, bti ban amne gwa oto namaninte abko ükaninkrö kutia kwä jätäbti kubu jire.

Jesu abko Ni Dianinkä Ngöbökwē, niebare Pedrokwe

(Mateo 16.13-19; Marcos 8.27-29)

¹⁸ Yehti bati Jesu nämane blite kaibe Ngöböbe angwane, nitre ja töitikaka ben nämane yete ben abko ie niebare krörö kwe:

¿Ti ne abko nire nieta ni mda mdakwe tibtä? niebare kwe.

¹⁹ Angwane nitre ja töitikaka ben kākwe niebare ie:

Ma abko Juan Bautista nūkaninta nire nieta ni ruärekwē amne ni mda abko käta ma Elías nūkaninta niere mabtä. Akwa ni mda abko tä niere Ngöbö kukwei niekä kirakira mda mda abko nūkaninta nire nieta kwe mabtä, niebare kwetre ie.

²⁰ Jesukwe niebare mda ietre:

¿Amne mun abko käta ti nire niere tibtä? niebare kwe ietre.

Angwane Pedro abko kākwe niebare Jesuye:

Ma abko Ni Dianinkä Ngöbökwē ara, niebare kwe ie.

Jesu müre ketadi, niebare käne kwe

(Mateo 16.20-28; Marcos 8.30-9.1)

²¹ Pedrokwe niebare kore, abtä Jesukwe niebare mda ietre:

Akwa kukwe ye abko ñan niedre jire kwetre ni mda mdaye, niebare kwe ietre.

²² Bti Jesukwe niebare krörö ietre:

Nitre unbre ji dokwäte, nitre blitaka Ngöböbe ni mda mda diäre dänkien amne Kukwe Biani Ngöbökwē Moiséye dirikätre, kākwe ti Ni Kä Nebtä Ngobo ne mikadi ja tare nike kri amne trö kwitadi kwetre tie, kākwe ti müre ketadi, akwa köbömäkäre angwane, ti rükadita nire, niebare kwe nitre ja töitikaka benye.

²³ Yehti Jesukwe niebare ni jökrä nämane yete yeye:

Nire nire tö ja töi mikai kwatibe nänkä tibe, ni ye abko tö dreye jakrä abko raba käikwitekä jabtī amne, köbö kwatirekwatire ja kwata raba ruentari tare ñakare ie nūnakäre tikrä abko jata ti jiebti,

²⁴ ñöbtä ñan angwane nire nire tö ja kwata ngibiai jen jakrä abko krütadi kärekäre, erere rabadi kärekäre Ngöbö okwä bäre mento. Akwa nire nire krütadi ti dokwäre abko rabadi dianintari nūnakäre kärekäre Ngöböbe.

²⁵ Ye abko, ni rabadre jändrän jökrä bkäne kabre kä nebtä, akwa ni krütadre angwane nikwe ñan nūnandre mda Ngöböbe, ne ütiäre abko dre rükadre nie.

²⁶ Ne aisete, nire nire käta ti rükente amne kukwe dirita tikwe ne rükente angwane, ti Ni Kä Nebtä Ngobo ne jatadita angwane, tikwe ni ye rükandite arato. Ti jatadita angwane, ti jatadita ja di kri bä nuärebtī amne Ngöbö di kri bä nuärebtī, erere arato angele deme Ngöbökwē bä nuärebtī.

²⁷ Akwa mun tä nete ne ruäre ngämi krüte, känenkri Ngöböta gobrane ño nibtä, ye abko munkwe tuadi ja okwä jenbti abko ti tö nibi niei metre munye, niebare Jesukwe ni jökrä nämane yete yeye.

Jesu bä nikwitani

(Mateo 17.1-8; Marcos 9.2-8)

²⁸ Jesukwe kukwe niebare kore, yehti kwäirare Jesu nikani ngitiohti blitakäre Ngöböbe angwane, Pedro, Santiago amne Juan nikani siba ben.

²⁹ Jesu nämane blite Ngöböbe, te batibe ngwäre bä nikwitani jene amne dän btä abko trä namani ngwen bürere mera trä bä kwrere.

³⁰ Ye btäräbe ni nibu namani gökökä yete blite Jesube. Ni nibu ye abko Moisés amne Elías.

³¹ Niaratre nämane ye bäre temen kä trä namani kuin bä nuäre amne Jesu tädi Jerusalén, kánti nänta kä känbti abko btä nämane blite kä ye kánti.

³² Ye ngwane abko Pedro, Santiago amne Juan okwä namani doboko köbö kisete angwane, batibe nükanianta ngwäte angwane, Jesu bä dite amne nuäre tuani kwetre. Erere arato, Moisés amne Elías tuani kwetre.

³³ Ni nükani nibu Jesu kánti, ye jatanina nikenta angwane, Pedrokwe niebare Jesuye: Ti Dänkien, nita nete abko käi nibi nuäre tibtä, aisete ma tö ne ngwane, nunkwe ju mikadi kiakia komä munkrä: kwati makrä, kwati Moisékrä amne kwati Elíakrä, niebare kwe. Pedro abko kákwe ñäkäbare kore akwa, drebtä nämane blite abko ñan nämane gare ie.

³⁴ Pedro nämane blite kore, ye btäräbe müta jatani jüben niaratrebti angwane, kä jürä namani krübäte niaratre nimäbtä.

³⁵ Angwane müta yete ni kukwei jarabare krörö ietre:

Ni ne abko ti Odei tikwe. Ne mden tikwe dianinkä jakrä, aisete niara kukwei nua munkwe abko ni kukwei namani kore mütate.

³⁶ Ni kukwei jarabare kore angwane, ni nibu ye nikaninta angwane, Jesu aibe namaninta kaibe. Kukwe nakaninkä kore, ye abko nitre ja töitikaka Jesube kákwe tuani, akwa ükani kaibe kwetre jakrä, aisete kä ye ngwane niebare ñakare kwetre ni mda mdaye.

*Jesukwe üai käme juanintari ngäbäkrebtä
(Mateo 17.14-21; Marcos 9.14-29)*

³⁷ Jesu nämane ngitiobti nitre ja töitikaka nimäbe, bti jändrinane jataninta motokwäre angwane, ni nükani kwati ngäbti.

³⁸ Ni kwati ye ngätäite ni nämane iti kákwe ngratebare jume, kákwe niebare Jesuye:

Dirikä, ti ngobo ngörä itibe tikwe noko jakwe tuen kánti tikrä abko tita ribere kisere mae, ³⁹ ñobtä ñan angwane üai käme ie niarata neketete, käta mike ngrente kri amne, btäräbe tä kä ötöte bti amne tä kitekä nekwäre, sekwäre amne däbe tä neme betekä kadate. Erere arato, ñan tä nebe gibiekä, ye abko tä mike ja tare nike titän.

⁴⁰ Abtä nitre ja töitikaka mabe kákwe üai käme juandretari mento btä abko tikwe ribeba kisere ietre, akwa üai käme ñan rikaba mento ietre, niebare kwe Jesuye.

⁴¹ Abtä Jesukwe niebare ietre:

¡Aingwaree, ti moto iko munbtä! Mun ye ño abko moto kämekäme dikaro abti munta tödeke ñakare dikaro Ngöböti ye. ¿Ti rabadi kä nuäi mda munbe amarebti ye? niebare Jesukwe.

Ye btäräbe Jesukwe niebare mda:

Ngäbäkre ye ngwen tie, niebare kwe.

⁴² Ye erere, ngäbäkre jänikani nebe ja ken Jesube angwane, üai kämenkwe kitaninta temen amne kä ötaninteta bti kwe, akwa Jesukwe ngratebare üai kämenbti, btäräbe ngäbäkre ye namaninta quinta angwane, Jesukwe bianinta rünye.

⁴³ Ngöbö di kri köböire ngäbäkre namaninta quinta, yebtä abko ni jökrä ñan töi namani krütare.

*Jesu krütadi niebare bobukäre kwe
(Mateo 17.22-23; Marcos 9.30-32)*

Ni jökrä ñan töi namani krütare kore angwane, Jesukwe niebare nitre ja töitikaka benye:

⁴⁴ Olo ketete kuin ti kukweiye munkwe amne munkwe ñan käikwitaka jabti. Jötrö ti, Ni Kä Nebtä Ngobo biandi müre ketadre ni mda mdaye, niebare Jesukwe ietre.

⁴⁵ Akwa dre niebare kore kwe, ye abko ñan nükani gare nitre ja töitikaka benye, ñobtä ñan angwane kukwe niebare Jesukwe, yebtä abko Ngöbö ngämi töi tikekä, aisete ñan nükani gare ietre. Mdakäre abko, namaninta ja gaire kukwe ye ngwiantarita Jesuye, aisete namaninta kwekbe jökrä.

*Nire bäri ütiäte niebare Jesukwe
(Mateo 18.1-5; Marcos 9.33-37)*

⁴⁶ Ye ngwane abko, nitre ja töitikaka Jesube mden bäri ütiäte, abkobtä nikani ja kwete kwärükwäri mda.

⁴⁷ Angwane nämane töbike ño, ye gani btä Jesukwe. Abtä Jesukwe ngäbäkre chi käräbare, mikani tākänintbe ja ken kwe,

⁴⁸ bti niebare krörö kwe ietre:

Nireta ütiäte ñakare ni mda mda okwäte ngäbäkre chi ne kwrere, ye nireta kaen ngäbti ti käbti, ye abko ti ara jire kata ngäbti kwe amne, nireta ti kaen ngäbti ja dänkiene, ye abko Ngöbö ti juanka abko kata ngäbti kwe arato. Ne aisete mun jökrä ngätäite, nire nire tuen ütiäte ñakare munye, ni ye abko bäri ütiäte Ngöbö ngwäreki. Abko kore se, niebare Jesukwe.

*Nireta rüre ñakare Jesu rüere abko tä nekete Jesukri
(Marcos 9.38-40)*

⁴⁹ Angwane Juan abko kákwe niebare:

Dirikä, nunkwe ni tuaba iti üai käme juentari ma käbti, akwa niara tä nekete ñakare nibe, aisete ñan üai käme juandretari mda kwe ma käbti, nunkwe nieba ie, niebare kwe Jesuye.

⁵⁰ Abtä Jesukwe niebare mda:

Nireta sribire ñakare mun rüere, ye abko tä nekete munkri, aisete munkwe ñan sribi ye kwrere dokwä takä mda kân, niebare Jesukwe ietre.

Jesukwe ni juani gre ketamä bti ni jätä Ngöbö Kukwei kädriere

⁵¹ Abti Jesu rikadreta kä känbti abko köböi jatani nuke ja ken, aisete niarakwe ja töi mikani kwatibe nikenta Jerusalén.

⁵² Angwane Jesukwe ni juani ruäre ja käne kä kânene juta Samariate nünantbekrä jae. Akwa

⁵³ Jesu nämane näin Jerusalén kukwäre, ye gani nitre Samariabokwe angwane, Jesu kani ngäbti ñakare kwetre, ñobtä ñan angwane nitre israelita amne nitre Samariabo nämane rüre jabe kwärikwäri aisete.

⁵⁴ Nitre Samariabo käkwe ñan Jesu kani ngäbti, ye gani Santiagokwe amne Juankwe angwane, niebare kwetre Jesuye:

Dänkien, niaratre ñan tö ma kain ngäbti, ye dokwäre Ngöbökwä ñukwä kä känbti juandre käkwe nitre se gadrekä jökrä abko nunkwe kärädre Ngöböye, ¿je ma tö nibi ya? niebare kwetre ie.

⁵⁵ Abtä Jesu nikwitaninte, käkwe mäträbare btätre.

⁵⁶ Yebti nikanintre juta mdate.

Ni rikadre Jesu jiebtä abko tare

(Mateo 8.19-22)

⁵⁷ Niaratre nämane dikekä ji ngrabare angwane, ni iti käkwe niebare Jesuye:

Ti Dänkien, ma näin mdente erere, ye kânti ti rikai siba mabe, niebare kwe.

⁵⁸ Abtä Jesukwe niebare mda ie:

Nukro känsenta, kwe kä mkä tarä nünankrä amne, nukwä nikenkä käinta abko juda tarä kwe nünankrä arato, akwa ti Ni Kä Nebtä Ngobo ne abko kwe kä ñakare jire chi jadükakrä. Ne aisete ma tö jatai tibe ne ngwane, ma rabadre juto biare nüne ti kwrere arato, niebare kwe.

⁵⁹ Bti Jesukwe niebare ni mdaye:

Brän tibe, niebare kwe ie.

Akwa ni ye abko käkwe niebare Jesuye:

Ti Dänkien, ti tuemetre nikenta ken ja gwiriete, abti ti rün krütadi, tikwe doboi mikadi, ye täbti ti näin mabe, niebare kwe ie.

⁶⁰ Abtä Jesukwe niebare ie:

Nitre ie Ngöbö gare ñakare abko tä ni ngwäkäre kwrere Ngöbö ngwäreki, ye tuametre ni ngwäkäre doboi mike. Ma abko Ngöböta gobrane ño nißtä, ye abko ma rika kädriere ni mda mdabe, niebare Jesukwe ie.

⁶¹ Abti ni mdara jire käkwe niebare Jesuye:

Ti Dänkien, ti tö rikai mabe akwa, ti ngämi niken känenkri ti tö rikai ja tuaita niere ti mräkäye, niebare kwe.

⁶² Abtä Jesukwe niebare ni neye:

Ni sribikä tä niken dobro tikekä aradorebti akwa tä nikrenta ja jiebtä, ye ñan tä sribire kuin metre, aisete sribi rabai ngwarbe, aisete nire nire töita niken jändrän mda mda jiebtä, ni ye kwrere abko ñakare kuin sribikä kä gobrankrä Ngöbökwäbtä. Abko kore se, niebare Jesukwe ie.

10

Jesukwe ni juani gre ketamä bti ni jätä Ngöbö Kukwei kädriere

¹ Yebti ni Dänkienkwe ni mdara jire dianinkä gre ketamä bti ni jätä. Jesu rikadre juta mdente mdente, ye kânti Jesukwe ni ye juani nibu nibu ja känenkri.

² Akwa käne abko ni kwati nämane juto biare kukwe kuin mike era, abkobtä kukwe bä mikani krörö, käkwe niebare ietre:

Nura nena biare kabre ötädre, ye kwrere ni kwati tä juto biare ngwiandre Ngöböye, akwa sribikä ñakare bökän, aisete sribi Bkänkä Ngöbö käkwe sribikä mda mda juandre jötrö sribire abko munkwe ribe ie.

³ Akwa mun nän. Obeja ngäbälita niken lobo ngätäite, ye kwrere tita mun juen ni krübäte krübäte ngätäite.

⁴ Mdakäre abko, mun rika angwane, mun ñan rika ngwian ngwena jabtä. Mun ñan rika kra ngwena jae amne mun ñan rika sabato mda ngwena jae. Erere arato, munkwe ñan kä gate ngwarbe köbö ngwentari ji ngrabare ni mda mdaye nünankakäre raire ji ngrabare.

⁵ Akwa ju mden te mun rika nebe, kanti munkwe köbö ngwiantari käne, kärke nie krörö: Kä jäme Ngöbökwé raba munbtä, nie munkwe.

⁶ Angwane ni nünanka gwi yete tädi biare kä jäme Ngöbökwé ye kaen ngäbti ne ngwane, kadi ngäbti kwe; ñakare ne ngwane, ñan kadre ngäbti kwe.

⁷ Ju mden te mun raba, ye kanti mun raba nünentbe. Munkwe ñan ja kwita ju mda mdate. Mdakäre abko, mrö mden mden kwetata kwetre, erere te mun buka angwane, munkwe kweta, ñobtä ñan angwane ni sribikä abko ie sribi ütiä biandre abko erere munkwe mrödi sribi munkwe ütiäre.

⁸ Erere arato, juta mden te mun raba, ye kanti mrö mden te mun buka, ye munkwe kweta jäme jökrä.

⁹ Angwane ni bren bren tarä juta yete ne ngwane, munkwe mikata quinta amne, Ngöbö kebera nuke gobrane ngätäite abko munkwe nie ietre.

¹⁰ Akwa juta mden kanti mun raba angwane, nitre yete kärke ñan mun ka ngäbti, yebtä abko mun rikata jibti ñäkäre kwärä krörö:

¹¹ Dobro mnü juta munkwete nete neketaninkä nun ngotobtä abko nunta ngrükete mun ngwäreki jökrä nete. Ne abko mun ñan tö Ngöbö kukwei kain ngäbti, aiseté mun ara jire ngite Ngöböye ja töi jenbti bä mikakrä, ye raba gare munye. Akwa Ngöbö kebera nuke gobrane mun ngätäite, ye raba gare munye, aiseté munkwe nie kore ietre.

¹² Akwa köbö mrä näire, nitre Sodomabo kärke ja tare nikadi, yebtä ta nitre nünanka juta yete kärke ja ngie nuadi abko ti tö niei munye, niebare Jesukwe nitre juani kwe yeye.

*Jesukwe ñäkäbare nitre israelita riäre
(Mateo 11.20-24)*

¹³ Bti Jesukwe niebare mda:

¡Aingwaree mun nünanka juta Corazinte amne juta Betsaidate! Mun bobre jakän, ñobtä ñan angwane sribi kri ñan tuabare nuenbare tikwe mun ngätäite, ne kwrere nuendre juta Tiro amne Sidón kanti, akräke nitre yete kärke ja töi kwitadreta Ngöbö kukwäre amne, dän ngutu jüräre kitadre kwetre jabtä amne rabadre takänintbe ngübrunte ja moto ulire kukwe kamekame nuenbtä bä mikakrä.

¹⁴ Ye mden kisete, Ngöbökwé kukwe ükadite ni jökrä kräke kä mrä angwane, Ngöbökwé mun nünanka juta Corazinte amne juta Betsaidate mikadi ja tare nike bäri kri nitre nünanka juta Tirote amne Sidónte ye kräke.

¹⁵ Amne mun nünanka juta Capernaúnte, ma kanti nete tikwe sribi kri ñan tuabare nuenbare kabre, ¿yebtä Ngöbökwé mun mikadi bäri ütiäre, munta nütüre ya? Ñakare, ñobtä ñan angwane Ngöbökwé mun ye kitadikä kä ja tare nikakrä kanti.

¹⁶ Yebtä Jesukwe niebareta mda nitre juani kwe yeye:

Nirekwe mun kukwei mikadre era ye kärke ti ne ara jire kukwei kadi ngäbti; akwa nirekwe ñan mun kukwei mikadre era, ye abko ti ne ara jire ñan kukwei kadi ngäbti kwe amne nire ñan tö rabadre ti kukwei kain ngäbti, ye abko Ngöbö ti juanka ñan kadi ngäbti kwe. Abko kore se, niebare Jesukwe.

Ni juani gre ketamä bti ni jätä nukaninta Jesu kanti

¹⁷ Abti nitre gre ketamä bti ni jätä juani Jesukwe ye jatani nuketa mda angwane, kä namani nuäre krübäte btäre, kärke niebare Jesuye:

Dänkien, nunkwe üai käme juantariba mento nibtä angwane, ma käfti üai käme nibi nun kukwei mike täte jökrä kore, niebare kwetre ie.

¹⁸ Angwane Jesukwe niebare ietre:

Munta kukwe era erere niere, ñobtä ñan angwane merata trä ngitiekä jötrö, ye kwrere Satana kä käninti jataninbe timon sribi munkwe köböire, rababa tuen tie.

¹⁹ Ye abko, üai käme krübäte tbi kwrere amne dribe kwrere, kräke tikwe ja di biani munye ganainkäre amne, mun rié Satana kärke ñan mun mikadre bren, abkokäre tikwe ja di biani munye ganainkäre.

²⁰ Akwa üai käme käta mun kukwei mike täte, ye munkwe ñan käi ngwian nuäre bäri jabtä, akwa munkwe nünandre kärekäre Ngöböbe, aiseté mun käi nena tikani taräbtä kä käninti, ye abko bäri käi ngwian nuäre jabtä munkwe, niebare Jesukwe ietre.

*Jesu aibe ie Rün gare metre
(Mateo 11.25-27; 13.16-17)*

²¹ Yebtä, Ngöbö Üai Deme namani täte Jesubtä, köböire kä namani nuäre kri btä, kärke niebare:

Ti Rün, ma abko kä käin amne kä temen Dänkien. Tita ma käikitekä, ñobtä ñan angwane nitre dikaka töbtä kriki abko okwäte makwe kukwe metre makwe ye rükaninte, akwa ni

bobre bobre tõi ñakare ñakare ruen ie abko ietre makwe mikani gare, ma tõi namani ño, erere makwe nuenbare. Yebtä tita ma käikitekä, niebare Jesukwe Rün Ngöböye.

²² Yebti nitre nämä Jesu kukwe nuen, ye ie Jesukwe niebare mda:

Ti Rün käkwe jändrän jökrä mikani gare tie amne ti abko nire ngobo era metre gare ñakare ni mda mdaye, akwa ti Rün aibe ie ti gare. Erere arato, ti Rün abko gare ñakare ni mda mdaye, akwa ti niara Odei ne aibe ie niara gare amne ti tõi rabare mikai gare nire nireye, ye erere ie rabadi gare, niebare Jesukwe.

²³ Yebti Jesu nikwitaninte, käkwe niebare kaibe nitre ja tõiitikaka benye:

Tita sribi kuin nuene bätäkä ngwarbe, ye abko munta tuen ja okwä jenbti, ye munkwe käi ngwian nuäre kri jabtä,

²⁴ ñobtä ñan angwane sribi kri ñan tuabare tuata munkwe, ye abko nitre Ngöbö kukwei niekä kirakira amne jrei kwati kirakira tõi namani tuai, akwa tuani ñakare kwetre. Erere arato, ti kukwei nuata munkwe, ye niaratre tõi namani kukwei nuai, akwa erere kukwei nuani ñakare kwetre. Abko kore se, niebare Jesukwe ietre.

Ni Samariabo moto kuin

²⁵ Yebti bati, Kukwe Biani Ngöbökwé Moiséye dirikä nämane iti, namani nünaninkä krö, käkwe kukwe ngwianintari ja gakäre Jesube, käkwe niebare ie:

Dirikä, ¿tikwe dre nuendre köböire ti rabadre nüne käreäre Ngöböbe? niebare kwe Jesuye.

²⁶ Abtä Jesukwe niebare mda ie:

¿Kukwe Biani Ngöbökwé Moiséye btä mata ñäke, ye käta dre niere arato? niebare kwe ie.

²⁷ Angwane dirikä ye käkwe niebare:

Ngöbö Kukweita niere krörö: Makwe ma Dänkien Ngöbö tare ja üai ngöi jökrä, ja di ngöi jökrä amne ja tõi ngöi jökrä. Erere arato, mata ja tarere au, ye kwrere makwe ni mda mda tare arato, nieta Ngöbö Kukweibtä, niebare kwe Jesuye.

²⁸ Jesukwe niebare mda ie:

Kukwe era erere nini makwe. Ye kwrere makwe nuendre ne ngwane, ma rabadi nüne käreäre Ngöböbe, niebare kwe ie.

²⁹ Akwa Kukwe Biani Ngöbökwé Moiséye dirikä käkwe kukwe ngwianintari, yebti tõi namani bikai deme, käkwe niebare Jesuye:

¿Ti mräkä mden abko tikwe taredre metre ruen? niebare kwe mda Jesuye.

³⁰ Abtä ni menteni amne ni rüe abko ni mräkä metre, ye Jesukwe bä mikani, käkwe niebare krörö ie:

Bati ni nämane iti Jerusalén, nikani motokwäre juta Jericó kukwäre angwane, batibe nitre gokä jatani, käkwe jändrän goibare jökrä kån amne, dån btä dianinkä jökrä kån kwetre, bti metani kwetre, namani bä ngwäkäre angwane, mikaninte jite kwetre se kwrere, bti ngitiani.

³¹ Ye ngwane ni blitaka Ngöböbe ni mda mda diäre jatani iti ji ye arabebti angwane, ni bä ngwäkäre nämane jite. Yebtä okwä mata namani akwa, nikani mobe menteninta temen bäre se kwrere, bti nikani janknu ta.

³² Yebti ni levita sribikä ju blitakrä Ngöböbe jatani iti mda, nükani ja ken ni bä ngwäkäre yebe angwane, mikani ñäräre jirekäbe kwe, akwa nikani janknu ta arato.

³³ Akwa yebti ni jenena Samariabo jatani iti mda ji ye arabebti abko okwä mata namani ni bä ngwäkäre btä angwane, namani ruen bobre ie,

³⁴ käkwe krötabare ken, bti olibo köi amne uba döi mikani träinbti kwe kräkäi mikakäre amne träin mrianinte kwe, bti mikani buro jakwebti kwe, bti nikani ngwena nebe ju ni basakakrä kánti. Ye kánti ngibiabare kwe ye näire.

³⁵ Yebti jändrinane dekä angwane, ngwian ganaindre köböbu näre ye ni Samariabo käkwe biani ju bkänkäye, käkwe niebare ie: Makwe ni ne ngibia tikrä. Nane makwe ngwian gate bäri mda niarakrä ne ngwane, ti jatadita, käkwe ütiä biandi mae, niebare kwe ie. Abko kukwe nakaninkä kore.

³⁶ Ne aiseti ni iti goibare nitre gokäkwe angwane, ni nikani nimä. ¿Nitre nimä ye ngätäite, ni mden käkwe ni mda tuani kánti ja mräkä kwrere ruen? niebare Jesukwe ie.

³⁷ Angwane Kukwe Biani Ngöbökwé Moiséye dirikä käkwe niebare mda Jesuye:

Ni ie ni bren namani ruen bobre, ye abko käkwe ni bren tarebare mräkä kwe kwrere, niebare kwe.

Abtä Jesukwe niebare ie:

Ni Samariabokwe kukwe nuenbare kuin mräkä mdakrä, ye kwrere nån nuene arato. Abko kore se, niebare Jesukwe ie.

Dre bäri ütiäte niebare Jesukwe

³⁸ Yebti Jesu nikani janknu ta nitre ja tõiitikaka benbe amne nükani juta mdate, kánti meri iti kädian nämane Marta nämane nüne. Marta ne abko käkwe Jesu kani ngäbti ja gwirierte.

³⁹ Marta etba nämane iti abko kädian nämane María. María ye abko nikani, namani tákänintbe Jesu ngotobtä Jesu kukwei nuen.

⁴⁰ Akwa Marta abko namani sribi kabre gwita ye aibe btä töbike, aiseite namani sribire janknu, bti nikani, kákwe niebare Jesuye:

Ti Dänkien, ¿ti mräkákwe ti mirete sribire kaibe, se ütiäte ñakare makrä ya? Niara juen jötrö ti die mike, niebare kwe Jesuye.

⁴¹ Akwa Jesukwe niebare mda ie:

Marta, ma nibi töbike krübäte dikaro sribibtä, kä nibi ma nike. Erere arato, jändrän keta kabre, btä mata töbike,

⁴² akwa jändrän ketetibe bäri ütiäte, ye mden abko Maríakwe kánäniri jakrä, káta ti kukwei nuen. Ye abko ni ñakare jire abko rabadre denkä kán. Abko kore se, niebare kwe Martaye.

11

Blitadre ño Ngöböbe

(Mateo 6.9-15; 7.7-11)

¹ Bati Jesu nämane blite Ngöböbe kä mda kánti, kákwe blitabare ünän angwane, ni iti ja töitikaka ben abko kákwe niebare ie:

Ti Dänkien, blitadre ño Ngöböbe abko Juan Bautistakwe diribare nitre ja töitikaka benye, aiseite makwe diridre nunye arato, niebare kwe Jesuye.

² Abtä Jesukwe niebare ietre:

Mun rika blite Ngöböbe angwane, munkwe nie krörö:

Ti Rün kä káinbti, ma kä aibe raba mikani ütiäte ni jökrákwe.

Jakwe gobrane nun ngätäite nete.

Ma tö dreye kä káinbti, erere tá neme bare mae kä káinbti, erere raba bare mae kä nebtä nun ngätäite arato abko nunta ribere mae.

³ Köbö kwatirekwatire makwe mrö bian táte nunye.

⁴ Nun ngite kukwe kámenbtä ye denkä mento nunbtä, ñobtä ñan angwane ni mda mda tá ja mike ngite nun rüere, käre nunta den jabti ta köbö kwatirekwatire.

Amne kukwe kámekáme tö nun nuajte ja káne ma rüere, ye kánti makwe ñan nun jie ngwian, abko munkwe blita kore Ngöböbe, niebare Jesukwe ietre.

⁵ Bti Ngöböta juto biare ni kukwei kaen ngäbti, ye abko Jesukwe bá mikani, kákwe niebare krörö mda ietre:

Nane mun kukwe muko jatadre iti kä ruäre deo, kákwe niedre: Ja mräkä, ban ngwen kumä ütiadre tie,

⁶ ñobtä ñan angwane gwä ti kukwe muko nü basare jire tie, akwa bukakrä ñan nebe tie. Abtä ti ki ban tárre mae, tikwe ñan ja gaidre krübäte abkokäre, niedre kwe mae.

⁷ Angwane ni tádre gwi kákwe ñan niedre: Ti nibira jänbti ngábákrebé, aiseite ti ñan raba nainkröta krö jändrän biankäre mae, aiseite makwe ñan ti nika, niedre ñakare jire kwe kukwe kare ngäbti.

⁸ Akwa niara ñan kädriedre blo, abkokäre rükadre krö amne jändrän jökrä kärädre ie kukwe mukokwe, ye erere biandre jökrä kwe ie. Ye abko ñan niara kukwe muko, aiseite nuendi kore kwe akwa, ñan ñákadre rüere abtä rabadre ja gaire, abkokäre nuendi kore kwe.

⁹ Blitadre Ngöböbe, ye mdenbtä abko ti tö kukwe mda niei krörö munye arato: Käre munkwe jändrän kára Ngöböye amne Ngöbökwé biandi munye. Erere arato, munkwe jändrän kánántari Ngöbö kánti amne kwandi munye. Erere arato, nita neme jukwebtä jändrän kárere ni mdaye, ye kwrere käre munkwe jändrän kára jukwebtä Ngöböye angwane, Ngöbökwé jukwe tikadi, kákwe biandi munye,

¹⁰ ñobtä ñan angwane nireta jändrän kárere, ye erere bianta ie amne, nireta jändrän kánentari jakrä, ye erere tá kwen ie amne, nireta ñáke jukwebtä abko ietre Ngöböta jukwe tie amne tá jändrän bien ietre.

¹¹ Mdakäre abko, Ngöböta jändrän bien kore, yebtä abko ti bike kukwe bá mike krörö mda: ¿Mun mden ngábákre rünre, ie ngábákreta gwa kárere kwetadre jae angwane, tá tbi krübäte bien kwetadre ie?

¹² Erere arato, ¿mun mden ngábákre rünre, ie ngábákreta kwi mrúke kárere angwane, tá drike bien kwetadre ie? Ni ñakare jire iti káta jändrän krübäte bien ngábákre kweye.

¹³ Mun abko moto káme, akwa ngábákre munkwe, ie jändrän kuin bian gare munye. Se abko mun Rün kä káinbti bäri moto kuin munkrä abko ie munkwe niara Üai Deme kárädre angwane, biandi kwe munye. Abko kore se, niebare Jesukwe nitre ja töitikaka benye.

Beelzebú námene Jesubtä nie namani rüere

(Mateo 12.22-30; Marcos 3.20-27)

¹⁴ Abti bati ni iti btä üai käme nämane, kākwe kukwe ötani abko btä Jesukwe üai käme juantari mento. Ye erere üai käme nikani mento btä angwane, namani bliteta kuin. Yebtä abko ni kwati ñan tõi namani krütare mda.

¹⁵ Akwa ni ruäre namani niere:

Üai käme dänkien kädianta Beelzebú, ye mden kākwe ja di biani niaraye abko diehti tä üai kämekäme juentari mento se, namani niere Jesubtä.

¹⁶ Akwa era metre Jesu namani sribire Ngöbö diehti rabadre era kräke, abkokäre Ngöböta kä känbti kākwe sribi kri ñan tuabare nuendre niaratre okwäbti Ngöbö nämane ben bä mikakäre abko ni ruäre namani kärere Jesuye.

¹⁷ Angwane nitre namani töbike blo Jesu rüere, ye ganina btätre Jesukwe. Abtä niebare kwe ietre:

Juta amne ni mräkä mden erere käta ja ñäketbe ketebu rükäre jabe kwärükwäri, ye abko tä ja juen ngwarbe au.

¹⁸ Ye kwrere abko, ¿Satana amne üai käme kwekwe kākwe ja ñäkäretbe ketebu jene jene ja rüere au, ye angwane tädre dite ya? Ñakare. Ye abko, tita üai käme juentari Beelzebú diehti munta niere tibtä, ye mdenbtä abko tita ñäke kore.

¹⁹ Üai käme dänkien kädianta Beelzebú, diehti tita üai käme juentari mento munta niere tibtä, aisetse ¿nitre reketaka munkri ye abko ie nireta ja di bien üai käme juantarikrä mento abko ti tö nibi ngwiaintari munye? Niaratre kākwe mun kitadre ngise ruen tie.

²⁰ Akwa tita üai käme juentari mento Ngöbö Üai Deme diehti era metre, ye ngwane Ngöbö nukanina gobrane mun ngätäite abko bä mikata tikwe.

²¹ Akwa ti bike kukwe mdara jire niere munye üai kämenbtä abko krörö: Ni dite kri kwe jändrän tärä kabre rükrä, bti tä jändrän jakwe erere ngibiare kuin jame gwi abko üai käme kwrere.

²² Akwa ni mda bäri dite ti kwrere jatadre rüre, kākwe ganaindre kwäräbe angwane, jändrän rükrä ni ditekwe, bti tädre tödeke abko diandrekä jökrä ni dite ye kän amne jändrän kwekwe diandrekä jökrä kän, bti dräidre jökrä jabti kwe.

²³ Ye abko nire nire ñan tä nekete tibe, ni ye abko tä rüre ti rüere amne, nire nire ñan tä sribire gwaire tibe abko tä sribi tikwe metekä jirekäbe tikän, niebare Jesukwe.

*Üai käme tä niken mento, bti tä nüketa nibtä
(Mateo 12.43-45)*

²⁴ Yebti Jesu nikani blite krörö mda üai kämenbtä:

Ni iti btä üai käme tädre nüne, abti üai käme ye juandretari mento btä, üai käme rikadre ngwarbe kwäräkwärä kä känene jadükakrä jae kä kaibete, akwa kä ñan kwandre jire chi ie jadükakrä, abtä rabadre töbike krörö: ¡A! Ni nämane ju kwrere tikwe abko te ti nämane nüne, ye kánti ti bike nikenta, üai käme rabadre nütüre.

²⁵ Ye erere bkänä, üai käme ye rikadreta ni ye kánti, rabadreta yete angwane kä sökaninkä merebe gwita temen amne kä ükaninte kuin gwita, kwrere jire ni ye kwandre üai kämeye.

²⁶ Angwane jötrö ngwarbe üai käme ye rikadre betekä, kākwe üai bäri kämekäme niarakrä känändre krä kükü mda ja mukore, bti rikadre nünenta jökrä ni yebtä. Üai käme ye rabadrera nünenta kore ni yebtä angwane, ni ye rabadre ja tare nike bäri krübäte mda üai käme kisete, niebare kore Jesukwe ni jökräye.

²⁷ Jesu nämane blite kore, ye btäräbe meri nämane iti ni mda mda ngätäite kākwe ñäkäbare jume ja dibti mda:

Ma meye kwe ma därebare amne ma mikani kianbtä kwe, meri ye abko Ngöbö diehti abko kä nuäre kri btä, niebare kwe.

²⁸ Abtä Jesukwe niebare:

Nire nire tä Ngöbö Kukwei nuen amne tä mike täte, ni ye abko Ngöbö diehti käta neme bäri nuäre btä abko ti tö nibi niei, niebare kwe.

*Sribi kri ñan tuabare käräbare Jesuye
(Mateo 12.38-42; Marcos 8.12)*

²⁹ Yebti ni nikani ja ükekrö bäri kwati mda Jesu bäre temen angwane, Jesu nikani niere krörö ietre:

Mun nünanka kä ne ngwane abko moto kämekäme, abtä tikwe sribi kri ñan tuabare aibe nuendre mun okwäbti, ie mun töta nebe, akwa sribi kri ñan tuabare ye tikwe ñan nuendre jire chi mun okwäbti, munta ribere ye kwrere. Akwa Ngöbö nämane Jonábe, kākwe sribi kri ñan tuabare nuenbare Jonákrä, ye kwrere aibe Ngöböke bä mikadi mun kräke,

³⁰ ñöbtä ñan angwane kukwe nakaninkä Jonábtä kākwe nitre Nínivebo tõi kwitani, abtä Jonás kukwei mikani era kwetre, ye kwrere Ngöböta sribire era metre ti Ni Kä Nebtä Ngobo köböire abko Ngöböke bä mikadi metre munye.

³¹ Erere arato, Ngöbökwe kukwe ükadite ni jökrä kräke kä mrä angwane, jreina nünanka mobe mötarikri* nükani kira basare jrei Salomónye ye käkwe mun kitadi ngise arato, ñobtä ñan angwane Salomón nämane kukwe töbtä töbtä niere, ye jreina mobe jatani kukwe nuen jakrä, akwa tita nete abko bäri ütiäte kri Salomónkrä abko mun ñan tö ti kukwei nuai, aisete rakadikä kore munbtä.

³² Erere arato, munta nüne kä ne ngwane abko, btä Ngöbökwe kukwe ükadite kä mrä angwane, nitre Ninivebo käkwe mun kitadi ngise arato, ñobtä ñan angwane Jonákwe Ngöbö kukwei niebare angwane, nitre Ninivebo käkwe ja töi kwitani Ngöböbtä, käkwe Ngöbö kani ngäbti, akwa tita nete abko bäri ütiäte Jonákrä, käta Ngöbö kukwei niere munye abko mun ñan tö kukwei nuai amne mun ñan tö ja töi kwitai Ngöböbtä, ye dokwäre abko Ngöböke kukwe ükadite munbtä, niebare Jesukwe.

*Jesukwe kukwe bä mikani ñotra jutrabtä
(Mateo 5.15; 6.22-23)*

³³ Bti Jesukwe ja bä mikani ñotra jutra kwrere, käkwe niebare mda:

Ni ñakare jire iti käta ñotra jutra mike, abti tä mike kä mkäte nguse. Erere arato, ñan tä mike kaja täni, akwa tä mike üräbtä käin, ye abko ni rikare gwäkäre angwane, kä rabadre ñen kuin nie abkokäre.

³⁴ Ye kwrere ma okwä abko ñotra kwrere nikrakrä ja bäre temen, aisete ma okwä kuin ne ngwane, käta tuen kuin mae. Ye kwrere abko makwe nünandre metre, ie Ngöbö tö ne ngwane, ni ie kä tuen kuin käta dikekä metre ñotra träbti, ye kwrere ma rabadi nüne kä ngwen Ngöbökwete. Akwa ma okwä bren angwane, kä ñan raba tuen kuin mae ne ngwane, mata kä ikote. Ye kwrere abko makwe kukwe kuin Ngöböke mikadre ngwarbe jae ne ngwane, ma töi rabadi käme amne ma rabadi nüne kä ikote Ngöbö rüere.

³⁵ Ne aisete munkwe ja ngibia kuin au, ñotra trä kuin tä munkwe ne ngwane, munta kä trä ngwen Ngöbökwete, ye ngwane mun ñan rabadre kä ikote Ngöbö rüere.

³⁶ Munkwe ja töi mikadre nüne metre Ngöbö ngwäreki angwane, munkwe ñan nünandi kä ikote kwrere amne, ji Ngöböke rabadi gare kuin munye, kä trä kuin tuen nie ye kwrere ne ngwane, munta kä ngwen Ngöbökwete amne kä iko ñakare mun töibtä, aisete jändrän jökrä Ngöböke rabai gare kuin munye, käta nebe tuen kuin ñotra träte munye ye kwrere. Abko kore se, niebare Jesukwe.

*Jesukwe ñäkäbare nitre bariseoye amne nitre dirikäye
(Mateo 23.1-36; Marcos 12.38-40; Lucas 20.45-47)*

³⁷ Jesukwe blitabare ünän angwane, ni bariseo käkwe ngwiani mröre ja kánti. Ye erere Jesu nikani, namani tákänintbe mesabtä mda.

³⁸ Akwa ni rikadre mröre, känenkri köbötikadre käne ja ngibiakäre dbe Ngöbö ngwäreki nämane ükaninte nitre israelitakwe, erere Jesukwe köbötikani ñakare. Yebtä abko bariseo ye ñan töi namani krütare Jesubtä.

³⁹ Abtä Jesukwe niebare ietre:

Mun bariseo abko baso amne siä bätäteta btärita aibe amne terita abko tä nebe dobröre kwrere jire, aisete mun töita gobtä amne mun töi kämekäme.

⁴⁰ Mun töi ngitiekä ñakare metre Ngöbö Kukweibtä. ¿Ngöböke mun ngrabare dätebare, käkwe mun töi, mun moto dätebare ñakare arato ya?

⁴¹ Munkwe jändrän jakwe bian ni bobre bobre die mikakrä, ye ngwane mun töi rabadi merebe arato baso amne siä bätäteta btärita amne terita arato ye kwrere, niebare Jesukwe bariseoye.

⁴² Bti Jesukwe niebare:

¡Aingwaree mun bariseo! Käre munta kri mu chi, ütiäte ñakare kädianta menta amne kri mda mu kädianta ruda amne kri mu mda mda kuin kwetadre amne kuin kräkäre, akwa ütiäte ñakare ükekrö keta jätä, bti munta mike keteti jenena biandre Ngöbökrä. Akwa jändrän bäri kuin ütiäte nuendre ni bobre kräke amne Ngöbö taredre abko erere munta nuene ñakare. Ye kwrere jändrän bäri ütiäte abko munta nuene ñakare, aisete munkwe jändrän ketebu ye nuendre amne mikadre täte keteti munkwe, akwa jändrän bäri ütiäte abko nuendre bäri munkwe.

⁴³ ¡Aingwaree mun bariseo! Käre ja täkrä ni ütiäte ütiäte kräke sinagagate, kánti mun töta nebe rabai käre ja mikakrä ütiäte. Erere arato, ni mda mdakwe mun mikadre ütiäte jae, käkwe köbö ngwiandretari käne munye ji ngrabare mrö rürümoinkrä kánti, ie mun töta nebe ja mikakrä ütiäte.

* **11:31 Jreina nünanka mobe mötarikri.** Jreina ne abko nämane gobrane kä kädian nämane Saba kánti. Kukweta tikani btä 1 Reyes 10.1-13 yebtä.

⁴⁴ ¡Aingwaree mun bariseo! Kä ni doboi mikakrä, kánti kä úkateta kuin ruäre, aiseite dobo mikani gare ñakare amne, ni raba dikekä jáme bti ta abtä ja mikata ngite amne tä dbe ñakare Ngöbö ngwäreki, ye kwrere jire mun bá kuin metre, akwa munta ni mda kite ja mike ngite abko gare ñakare ni mda mdaye, niebare Jesukwe nitre bariseoye.

⁴⁵ Abtä Kukwe Biani Ngöbökwé Moiséye dirikátre námáne yete abko iti kákwe niebare Jesuye:

Diriká, mata ñáke kore, ye abko mata ñáke nun rüere arato, niebare kwe.

⁴⁶ Akwa Jesukwe niebare mda ie:

¡Aingwaree mun Kukwe Biani Ngöbökwé Moiséye dirikátre! Käre munta tribe mike kabre ni mda mda tröbtá, tá nebe doboko krübáte kráke, akwa nin munta die mike jire chi abko krörö: Kukwe úkateta kabre nuendre ni jókráye munkwe, ye abko tribe doboko kwrere, akwa munta ja kukwei mike táte ñakare jire chi, niaratre kitakäre kukwe kuin nuene Ngöbökrá.

⁴⁷ Erere arato, nitre Ngöbö kukwei nieká kirakira kámikani mun mrákákwe abko doboibti ká úkateta kuin munkwe.

⁴⁸ Ye abko, mun mrákákwe kukwe nuenbare abko dbe munkrä tuen munbtá, aiseite mun mrákákwe ni Ngöbö kukwei nieká kirakira kámikani amne mun abko tá doboi úkateta kuin nuäre, niebare Jesukwe ietre.

⁴⁹ Munta töbike kore, ye mdenbtá abko Ngöbö töbtá kri kákwe niebare: Tikwe ja kukwei nieká nieká juandi amne ja kukwei ngwianka ngwianka tikwe juandi arato, ye abko müre ketadi ruäre amne ruäre abko jiebtí rikai kisere mikakäre ja tare nike.

⁵⁰⁻⁵¹ Ne aiseite nitre ti kukwei nieká däre metaninká temen, yebtä Ngöbökwé kukwe úkadite munkrä abko krörö: Nitre Ngöbö kukwei nieká kirakira kámikani Abel náire nebebe Zacarías náire. Zacarías ye abko kámikani kwetre ñukwá grá amne ju blitakrá Ngöböbe te ruäre. Abtä Ngöbökwé kukwe úkadite niaratre kámikakabe. Erere arato, yebtä Ngöbökwé kukwe úkadite ni ká ne ngwanebe abko ti tö nibi niei munye, niebare Jesukwe ietre.

⁵² Bti Jesukwe niebare mda:

¡Aingwaree mun Kukwe Biani Ngöbökwé Moiséye dirikátre! Munta kukwe era metre Ngöböbtá rükente ni mda mda káne. Mun ñan tö kukwe era metre mikai gare kuin jae amne mun ñan tá dirire era metre arato ni mda mdaye, aiseite rúkadre ño Ngöbö kánti ñan rúkadre gare ietre. Abko kore se, niebare Jesukwe.

⁵³ Nebti Jesu nikaninta mda angwane, nitre bariseo amne Kukwe Biani Ngöbökwé Moiséye dirikátre moto namani romon krübáte Jesu kukweibtä. Abtä nikanintre kukwe ngwentari kabre Ngöbö kukweibtä ie,

⁵⁴ ye abko Jesukwe ja kitadre au kó okwáte ja kukweibtä, abtä kitadre ngise kwetre, abkokäre namanintre kukwe ngwentari kore ie.

12

*Nikwe ñan bikadre deme, niebare Jesukwe
(Mateo 10.26-31)*

¹ Ye ngwane ni jatani núke ja úkekrö bári kwati mda Jesu kánti, aiseite ni namani kwati krübáte, ká namani ja kitekábe kwárikwári. Angwane nitre ja töitákaka Jesube, ie Jesu nikani niere krörö:

Lebadura mikata bante tá ngítie jókrá te, ye kwrere jire nitre bariseo töi kámekáme, káta bike kuin deme ye abko káta ngítie ni mda mda töite, káta ni mda mda töi mike ja kwrere, aiseite munkwe ja ngibia kuin nitre bariseo ngániene,

² ñobtä ñan angwane kukwe ñakare jire tiebe abko ni mdakwe ñan gadre. Erere arato, jándrän ñakare jire gore abko ni mdakwe ñan gadre.

³ Ne aiseite jándrän jókrá nieta kaibe munkwe akwa, ni jókrá kákwe kukwe nuadi. Erere arato, kukwe nieta tiebe kaibe gwi munkwe abko kádriedi ji kribti temen ja ngwäreki jókrá, aiseite munkwe ñan bika deme nitre bariseo se kwrere.

⁴ Ye abko, mun ti kukwe muko tikwe, ie ti tö niei krörö: Ni mda raba mun ngrabare aibe kámike, akwa yebti ñan raba jándrän nuene munbtá, aiseite munkwe ñan ni mda jürá ngwian jabtä;

⁵ akwa nire jürá ngwiandre era metre munkwe jabtä abko ti bike niere munye: Ngöbö aibe jürá ngwian munkwe jabtä, ñobtä ñan angwane mun krütadre, bti Ngöbö di tárá mun kitakrá ká ja tare nikakrá kánti aiseite.

⁶ Akwa mun bári tare kri Ngöbökwé abko ti bike bá mike krörö munye: Nukwá kiakia rürümointa kwárike abko útiá bianta bári brai, aiseite ngwian bianta mnamube útiäre, akwa nukwá kiakia ye káita nikwiteká ñakare Ngöböbti.

⁷ Amne mun ara jire abko dokwä drüen kratirekratire abko tä gare jökrä Ngöböye, aiseite Ngöbökrä mun abko bäri ütiäte kri nukwä kabrekabre bti ta, aiseite mun raba ja tare nike angwane, munkwe ñan kä jürä ngwian jabtä, niebare Jesukwe nitre ja töitikaka benye.

*Nikwe ñan Jesu rükandrete
(Mateo 10.32-33; 12.32; 10.19-20)*

⁸ Bti Jesukwe niebare mda:

Ti tö kukwe krörö niei mda munye: Nire nire tä nekete tibe abko niedre metre kwe ni mda mda ngwärekre, ni ye abko jen tikwe abko ti, Ni Kä Nebtä Ngobo käkwe niedi arato angeleltre Ngöbökre ngwärekre.

⁹ Akwa nire nire käkwe ti rükandrete ni mda mda ngwärekre, ni ye abko gare ñakare tie abko tikwe niedi angeleltre Ngöbökre ngwärekre arato.

¹⁰ Mdakäre abko, ti Ni Kä Nebtä Ngobo, rüere nirekwe ñakädre blo, akwa ja toi kwitadreta kwe angwane, Ngöbökre kukwe käme ye diandrekäta btä; akwa nirekwe ja dokwä mikadre ribi, käkwe Ngöbö Üai Deme mikadre ngwarbe jae, ye aibe Ngöbökre ñan ngite diandrekäta jire btä.

¹¹ Mdakäre abko, sinagoga kánti mun järjika nitre israelitakwe kukwe ükatekäre amne nitre kritobore ñakare israelitare, ye ngwärekre mun järjika kukwe ükatekäre angwane, munkwe blitadre ño jakrä amne munkwe dre niedre, yebtä munkwe ñan töbika dikaro,

¹² ñobtä ñan angwane munkwe dre niedre jakrä, ye abko Ngöbö Üai Deme käkwe mikadi gare munye abko erere munkwe niedi jakrä kritobo ngwärekre, niebare Jesukwe nitre ja töitikaka benye.

Nikwe ñan töbikadre jändrän bkäne kabre jakrä

¹³ Angwane nitre nämane kwati, ye ngätäite ni nämane iti käkwe niebare Jesuye:

Dirikä, jändrän namani nun rün mröye, se ti etbakwe dräidre jabtä tibe niere ie, niebare kwe ie.

¹⁴ Abtä Jesukwe niebare ie:

Ja mräkä, ¿nirekwe ti mikani kritobore mun ngätäite jändrän dräikäre munbti amarebti mata niere kore tie ye? niebare kwe ie.

¹⁵ Ni ye tö namani jändrän rünkwe diain kabre jae, aiseite Jesukwe niebare mda ietre:

Ni rabadre jändrän bkäne kabre, ñan ye köböire kä rabai nuäre nibtä, aiseite mun tö jändrän bkäne kabre jakrä, ye ngäniene munkwe ja ngibia, niebare kwe.

¹⁶ Bti Jesukwe kukwe ye bä mikani krörö:

Bati ni nämane iti abko jändrän bkäne kabre krübäte. Batira jire nura nökani kwe, abti ngwä ötani kabrekabre kwe.

¹⁷ Yebti ni jändrän bkänkä kabre ye namani töbike mda: Jändrän ngwä ötani kabre krübäte tikwe noko amne ju ñakare tikwe ükärä. ¿Tikwe ükadi mdente? namani nütüre.

¹⁸ Te batibe niebare kwe jae: ¡A! Tikwe dre nuendi nüra gare tie. Ju chi tä tikwe nura ükärä noko tikwe dikandite, bti tikwe ju mikadi bäri kri mda ju chi noko täte abko te tikwe mrö noko ükadi jökrä jändrän jakwebe.

¹⁹ Bti tikwe niedi krörö jae au: Ti nena jändrän bkäne kabre amne jändrän nena nünankrä raire tie, aiseite mtare mentokwäre ti bike jadüke, ti bike mröre, dö ñaen amne ti bike kä ngwen nuäre jabtä kwäräkwarä mda ruen tie, nütübare kwe.

²⁰ Akwa ye btäräbe Ngöbökre niebare ie: ¡Ma toi ñakare! Mtare deo ma krütadi angwane, ¿jändränäta ükani kabre makwe, se abko rabadi nirekrä? niebare Ngöbökre ie.

²¹ Ye kwrere tä nakenkä munbtä. Munkwe jändrän ükadre kabre jakrä kä nebtä, akwa jändrän kuin tä biandre Ngöbökre munye, ye abko munkwe kändäre ñakare jakrä, angwane mun rabadi bobre Ngöbö ngwärekre angwane, kukwe ne kwrere rakadikä munbtä, niebare Jesukwe ni jökräye.

*Ñan töbikadre dikaro mröbtä amne dänbtä
(Mateo 6.25-34)*

²² Yebti Jesu nikwitaninte, käkwe niebare nitre ja töitikaka benye:

Tikwe kukwe nini, yebtä munkwe mrö ño kwetadre nünankrä amne munkwe dän ño kitadre jabtä, yebtä munkwe ñan töbika dikaro abko ti tö nibi niei munye,

²³ ñobtä ñan angwane nita nüne kä nebtä angwane, nünandre metre Ngöböbe abko bäri ütiäte mrökrä amne ni ngrabare ye abko bäri ütiäte dänkrä, aiseite munkwe ñan töbika krübäte dikaro jändrän yebtä.

²⁴ Ye abko, nukwä kwerbo tä nüne ño, ye mika ñäräre munkwe. Kwerbo tä nura nökö ñakare, tä ngwä öto ñakare, ju ñakare kwe mrö ükärä jakrä, akwa Ngöböta mrö bien kwetadre ietre. ¡Mun abko bäri ütiäte nukwä kräke, se abko mun Rün käkwe ñan mrö biandre munye ya amarebti munta töbike krübäte dikaro se!

²⁵ Erere arato, munkwe ñan töbikadre krübäte dikaro kore, ñobtä ñan angwane ni tö rabare ja tuai bäri kri, akwa di ñakare ja mike niren taiti mda kukwäne.

²⁶ Jändrän ne abko chi akwa, mun di ñakare nuenkäre, ¿se ñobtä abko jändrän bäri taretare nuendre abko btä munta töbike krübäte dikaro se?

²⁷ Mdakäre abko, ¿ñobtä munta töbike krübäte dikaro dänbtä jakrä se? Kri blü tä niren ño, yebtä munkwe töbika. Tä sribire ñakare, tä dän dike ñakare jakrä, akwa jrei kri Salomón abko nämane jändrän jökrä tuäretuäre bkäne, akwa dän tuäretuäre kri blü se kwrere abko Salomónkwe kitani ñakare jabtä.

²⁸ Kri blü tä neme jötrö köböitibe, abti jändrinane angwane mikata ngire ñukwäte, akwa Ngöböta ükete tuäretuäre. ¿Ye mun abko ie dän ñan biandre Ngöbökwé ya amarebti munta tödeke ñakare täte Ngöböbti ye?

²⁹ Munkwe dre kwetadi amne munkwe dre ñadi tomnane, yebtä munkwe ñan töbika krübäte dikaro amne mun ñan raba ulire,

³⁰ ñobtä ñan angwane ni kwati kä nebtä tä tödeke ñakare Ngöböbti abko bäri tä nakwen kisere jändrän ye jiebti. Akwa mun käta dre mdei nike, ye abko garera jökrä Ngöbö mun Rün kä käinbti seye amne niarakwe jändrän ye biandi munye, aisete munkwe ñan töbika dikaro jändrän nünankrä yebtä jakrä.

³¹ Akwa jändrän Ngöbökwé tä kä käinbti, ye munkwe kánántari angwane, jändrän jökrä mdei nikata munkwe ye Ngöbökwé biandi munye arato.

*Jändrän kuin kä käinbti, jiebti ni rankwadre
(Mateo 6.19-21)*

³² Ne aisete mun obeja kiakia tikwe, munkwe ñan kä jürä ngwian jabtä, ñobtä ñan angwane jändrän jökrä kä käinbti, kánti Ngöbö mun Rünä gobrane abko mikani gare ja moto kuinbti kwe munye.

³³ Ye aisete, jändränä munkwe, ye erere munkwe rürümoin jökrä, bti munkwe ngwian drai ni bobre bobrebtü angwane, Ngöböta jändrän kuin ütiäte kri ngibiare munkrä kä käinbti, ye kánántari jakrä munkwe. Erere arato, jändrän kuinquin ütiäte krikri rabadre munkrä kä käinbti, ye munkwe kánántari jakrä, ñobtä ñan angwane Ngöböta jändrän kuin ütiäte kri ngibiare kä käinbti munkrä, ye kánti ni gore ñan rabadre gwi amne kebekwe ñan juandre ngwarbe munkän arato, aisete munkwe jändrän ütiäte kri kä käinbti kánántari bäri kabre jakrä.

³⁴ Munkwe nuendre kore, ñobtä ñan angwane jändrän ütiäte krikri tädi ükani mdente jakrä munkwe, ye kánti mun töi tädi arato, niebare Jesukwe nitre ja töitikaka benye.

Nikwe Jesu ngibiadre ngäbti kisere

³⁵⁻³⁶ Bti Jesukwe niebare mda ietre:

Ti bike kukwe mdara jire niere munye abko krörö: Munkwe dän kita biare jabtä amne munkwe ñotra jutra mika biare ti ngibiakäre ngäbti, ni klabore tä bkänkä ngibiare ngäbti ye kwrere, ñobtä ñan angwane ni mdata ja mike gure angwane, sribikäre bkänkä tä nuke kä ngwen nuäre jabtä, akwa sribikäre kwe abko tä biare ngibiare ngäbti jukwe tikakäre ie, ye kwrere munkwe ja mika biare ti ngibiare ngäbti.

³⁷ Ye abko, nitre sribikä tä kwen ngwäte bkänkäye, ye abko käita neme nuäre btä, aisete sribikä kwandre ngwäte bkänkäye ne ngwane, bkänkä ara jire kákwe dän sribikrä kitadi jabtä, bti sribikä kwekwe mikadi tákänintbe mesabtä kwe, mrö mikadi kwetadre kwe ietre mikakäre ütiäte. Ye kwrere munkwe ti ngibiadre ngäbti angwane, ti rükadita angwane, tikwe mun mikadi ütiäte arato abko ti tö niei metre munye.

³⁸ Ne aisete, nitre sribikä ye bkänkä rükadreta kä ruäre angwane ya o kä ngwen ja ken dekä angwane rükadreta ya, akwa sribikä kwe tä biare ngibiare ngäbti, ye abko bäri käi rabadre nuäre sribikäre yebtä, erere munkwe ti ngibiadre ngäbti kisere angwane, bäri käi rabadi nuäre munbtä arato.

³⁹ Kukwe mdara jire rabadre gare munye arato abko krörö: Ni gore rükadre kä ñongwane, ye rabadre gare ju bkänkäye akräke ju bkänkä kákwe kraidre gwi angwane, jändrän ñan goidre jire kán kwe.

⁴⁰ Ni gore rükadre ñongwane gare ñakare, ye kwrere ti Ni Kä Nebtä Ngobo ne mun tädi ngibiare ngäbti ñakare angwane, batibe rükadita, aisete munkwe mokre jabtü ti ngibiakäre ngäbti, niebare Jesukwe nitre ja töitikaka benye.

*Sribikä kuin amne sribikä käme, btä Jesukwe kukwe bä mikani
(Mateo 24.45-51)*

⁴¹ Angwane Pedrokwe niebare mda Jesuye:

Ti Dänkien, ¿makwe blitaniri, ye makwe nini kaibe nunkrä ya o makwe nini ni jökrä kräke? niebare kwe ie.

⁴² Angwane ni Dänkien kākwe niebare mda:

Ni sribikā kuin tā biare abko bkānkā tā mikete sribikātre mda mda ngibiare amne mrōdre ñongwane erere kāita nūke angwane, tā sribikā mda mda buke.

⁴³ Ni sribikā mikateta ja tāte bkānkākwe angwane, sribi mikateta kisete bkānkākwe erere tā nuene tāte jōkrā, bti bkānkā tā nūketa, kāta kukwe ūkete kuin krāke,

⁴⁴ kākwe ni sribikā kuin kore ye abko mikadi jāndrān jōkrā ngibiabtikā jakrā, aisete kāta neme nuāre btā abko ti tō niei metre munye.

⁴⁵ Akwa sribikā mikadrete sribire ja tāte bkānkākwe ye abko rabadre tōbike krōrō: Ti bkānkā ñan rükadreta jōtrō, rabadre nūtūre, kā rikadre sribikā mda mda merire, brare ngōtikekā kwārākwārā amne, rikadre mrōre, dō ñaen amne rikadre drōbare jirekābe angwane,

⁴⁶ bkānkā rükadreta ñongwane gare ñakare ie. Ne aisete tādre jāme angwane, batibe bkānkā jatadre nūketa, yebtā abko bkānkākwe mikadi ja tare nike kri, sribikā dokwā ribi mda mda ben.

⁴⁷ Mdakāre abko, ni sribikā abko bkānkā tō dreye gare kuin ie, akwa bkānkā kwe mikata tāte ñakare kwe, aisete metadi tare krübāte kwe.

⁴⁸ Akwa sribikā mda abko, bkānkā tō dreye metre gare ñakare ie, kākwe ja mikadre ngite, yebtā mikadre ja ngie nuen, akwa metadre bā rākā, ñobtā ñan angwane kukwe gare ñakare ie aisete. Ne mden kisete, nire nire abko ie sribi ya, jāndrān mda mda ya bianta kabre, ye ie kārāta bāri mda btā. Erere arato, nirebti tōdekata sribi nuenbtā abko ribeta bāri mda btā, niebare Jesukwe nitre ja tōitikaka benye.

*Ni kwati rabadi rüre jabe kwārikwāri Jesu dokwāre
(Mateo 10.34-36)*

⁴⁹⁻⁵¹ Yebti Jesukwe niebare mda ietre:

Tikwe ja tare nikadi kri angwane ti krūtadi, akwa ye ngāmi nakenkā, kānenkri ti moto neme nuāre ñakare. Mdakāre abko, ñan ti jatani mun mikakāre nūne jāme jabe kwārikwāri abko munkwe nūtū, akwa ti jatani ñukwā bukete mun ngātāite kā nebtā, ye abko ti tō nena tuai jutra ngitiekā. Ti jatani, abtā ni kwati rabadi nikwite ja rüre kwārikwāri.

⁵² Mtare mentokwāre ni ruāre rabadre tōdeke ñakare tibti kākwe rūdi mrākā tōdekaka tibti ben, aisete ni ja mrākāre tādi nūne niriike gwī, ye abko nimā rabadi rüre mrākā nibu rüre. Erere arato, ni nibu ye rabadi rüre mrākā nimā ye rüre.

⁵³ Angwane ngābākre rün rabadi rüre ngobo kwebe amne ngābākre rabadi rüre rün kwebe. Erere arato, meye rabadi rüre ngānkān kwebe amne ngābākre merire rabadi rüre meye kwebe. Ye kwrere arato, bi rabadi rüre bosibe amne bosī rabadi rüre bibe. Ne abko rabadi nakenkā kore munbtā tōdekabtā tibti, niebare Jesukwe nitre ja tōitikaka benye.

*Dreta nakenkā rükadre gare
(Mateo 16.1-4; Marcos 8.11-13)*

⁵⁴ Bti ni nāmāne kwati yete, ye ie Jesukwe niebare mda:

Mūtata kite jūben nindrini angwane, ñū rākāndi temen munta niere, erere ñūta nākāen.

⁵⁵ Erere arato, mūreta kite mate mōtarikri angwane, kā rabadi ngire krübāte munta niere, erere kāta neme ngire.

⁵⁶ Ye aisete ngwarbe munta bike tōi ñakare, ñobtā ñan angwane jāndrānta tuen kā kāinbti amne kā temenbtā, ye abko tādre dre bā mike tā nūke gare kuin jōkrā munye. ¿Ye ñobtā abko dreta nakenkā kā ne ngwane mun nāire Ngōbō diebti mun okwābti abko tā nūke gare ñakare munye? ¿Ye ñan ngwarbe munta bike tōi ñakare ya?

*Nikwe kukwe ūkadrete jōtrō ni rüebe
(Mateo 5.25-26)*

⁵⁷ Mdakāre abko, kukwe raba ja rüre kwārikwāri munkwe angwane, ūkadrete ño kuin, ye erere munkwe ūkate jabe kwārikwāri.

⁵⁸ Akwa nane ma rüekwe ma kita ngise kritobo ñakare israelitareye ne ngwane, ma ngāmi nebe kritobo ngwāreki, kānenkri makwe kukwe ūkate ma rüebe ji ngrabare, mun ñan rabadre kritobo ngwāreki abkokāre, ñobtā ñan angwane ma rabadre kritobo ngwāreki angwane, niarakwe ma kōbōi biandi guardiaye amne guardiakwe ma kitadi ngite kā teri.

⁵⁹ Ye kānti abko makwe ñan ngwian biandre tāte jōkrā ja ūtiāre, kānenkri ma ñan tikadreteta kwe abko ti tō niei munye. Abko kore se, niebare Jesukwe ni nāmāne kwati yete yeye.

13

Ni jōkrā kākwe kukwe kāme kitadre temen, bti Ngōbō kadre ngābti

¹ Kā ye ngwane ni israelita nāmāne ruāre Jesu kānti yete kākwe niebare ie:

Krire nitre Galileabo nămane jăndrăn jakwe kămike kukwadre Ngöböye, Ngöbö kăikitakăre ju blitakră Ngöböbe kănti angwane, Pilatokwe kămikamna, erere rŭkă romanobo kwekwe kăkwe kămikani.

² Abtă Jesukwe niebare ni jökrăye:

¿Nitre Galileabo kămikani kore, aiseite niaratre abko bări kukwe kămekăme nuenkă nitre Galileabo mda mdakră, munta nŭtŭre ya?

³ Akwa űakare kore ti tŭ niei munye. Akwa munkwe űan ja tŭi kwitadre, kăkwe űan kukwe kăme kitadre temen, bti Ngöbö kadre ngăbti munkwe ne ngwane, mun rabadi nianinte, kăkwe ja tare nikadi kri Ngöbö okwă băre mento kărekăre.

⁴ Erere arato, nitre ni jătăbti ni kwă, bti ki Siloéte nikani temen, kăkwe kămikani, ¿niaratre ye abko nămane Ngöbö Kukwei mike tăte űakare, abtă nămane ja mike ngite bări Ngöbö rŭere nitre Jerusalénbo mda mdakră, munta nŭtŭre ya?

⁵ Akwa űakare kore ti tŭ niei munye. Munkwe űan ja tŭi kwitadre, kăkwe űan kukwe kăme kitadre temen, bti Ngöbö kadre ngăbti munkwe ne ngwane, mun rabadi nianinte, kăkwe ja tare nikadi kri Ngöbö okwă băre mento kărekăre. Abko kore se, niebare Jesukwe ietre.

⁶ Yebti nitre israelitakwe űan Ngöbö kadre ngăbti ne ngwane, Ngöbökwe juandre ngwarbe abko mikakăre mokre, Jesukwe kukwe mda bă mikani ietre angwane, nitre israelita krikri bă mikani higo krie kwrere kwe amne Ngöbö bă mikani kă bkănkă kwrere kwe abko krŭrŭ:

Bati ni nămane iti kăkwe higo krie nŭkani uba nurai ngătăite. Abti higo ngwă namanina ya abko nikani tuenta, akwa higo ngwă kwani űakare ie.

⁷ Abtă nura ngibiabtikă nămane kwe yete, ie niebare kwe: Higo ne ngwă nena btă ya abko ti nŭkani tuen kă komă jire ja tăritări akwa, ngwăta kwen űakare tie amne tă kă den ngwarbe jae, aiseite makwe tikaka jirekăbe, niebare kwe sribikăye.

⁸ Akwa nura ngibiabtikă kăkwe niebare ie: Ti dănkien, makwe higo krie ye tuametre kă nete. Tikwe dobo muandi dokwă băre temen, bti tikwe abono mikadi btă.

⁹ Ye ngwă rabadi btă akwa, nane ngwă űan rabadre btă ne ngwane, makwe tikaka ngătrite ta, niebare sribikăkwe bkănkăye. Ne abko nakaninkă kore abko erere rabadre nakenkă munbtă. Abko kore se, niebare Jesukwe ietre.

Jesukwe meri bren mikaninta kuinta kŭbŭ jadŭkăkră năire

¹⁰ Bati kŭbŭ jadŭkăkră năire, Jesu nikani dirire mda sinagogate angwane,

¹¹ meri bren nămane iti yete. Meri ye abko kă kwă jătăbti kwă kwăra nikani bren. Ŭai kăme nikani btă, kăkwe trŭ dŭtaninkă, aibe kisetete űan namani nŭnenkă metre krŭ.

¹² Meri ye abko nămane siba yete, btă Jesu okwă namani angwane, kărăbare kwe, bti niebare kwe ie:

Ti mrăkă, ma bikera nementa kuinta mtare, niebare kwe ie.

¹³ Bti kise mikani kwe meri bren yebti. Ye btărăbe meri ye namani nŭnaninkăta metre krŭ batibe, kă nikani Ngöbö kăikitekă kwărăkwără se kwrere.

¹⁴ Yebtă abko, sinagoga ye dănkien namani romon, űobtă űan angwane Jesukwe meri bren mikaninta kuinta kŭbŭ jadŭkăkră năire, kăkwe niebare ni jökrăye:

Kă tără kŭbŭ ti sribikră, aiseite kŭbŭ ti ye năire mun bren bren jata ja mikakăreta kuinta, akwa kŭbŭ jadŭkăkră năire, mun bren bren űan jata ja mikakăreta kuinta, niebare kwe ni jökrăye.

¹⁵ Abtă ni Dănkienkwe niebare mda ie:

¿Mun ngwarbe ja bă mike kuin! ¿Buey amne buro măkăteta mun itire itirekwe angwane, kŭbŭ jadŭkăkră năire munta tikete űakare, bti munta niken ngwena tomna űaen űakare ya? Mun jökră tă niken jăndrăn ye ngwena tomna űaen ye munta sribire ruen tie.

¹⁶ Ye aiseite meri ne jatani Abraham mrăkăkri. Niara abko bări ŭtiăte jăndrăn ye ngwă abko kă kwă jătăbti kwă kwăra neketaninte Satanaye abtă bren, ¿se abko űan diandrekăta kŭbŭ jadŭkăkră năire Satana kisetete ya? niebare Jesukwe ietre.

¹⁷ Jesukwe űakăbare kore angwane, Jesu rŭe namanintre ja gaire jökră, akwa ni mda mda abko btă kă namani nuăre jăndrăn kuin nuen namani Jesukwe ye tuare.

Jesukwe kukwe bă mikani mostasa nurai amne lebadura btă

(Mateo 13.31-33; Marcos 4.30-32)

¹⁸ Erere arato, Jesukwe niebare:

¿Ngöböta gobrane űo nibti? ¿Ngöböta kite gobrane nibti, ye abko tikwe bă mikadre dre kwrere ruen munye?

¹⁹ Ngöböta kite gobrane nibti ye abko mostasa nurai chi kwrere. Ni iti kăkwe mostasa nurai nŭkani ju băre jakră abko nikani niren kri krikri kwrere angwane, nukwă namani nŭne kri ye kŭdebtı, ye kwrere jire kăne Ngöböta kite gobrane ni braibe bti, akwa mră angwane Ngöbö rabadi gobrane ni kwatıbtı abko bă mikata nura chi yebtă.

²⁰ Ye ngwane Jesukwe kukwe mdara jire bă mikani krŭrŭ:

20 Ngöböta kite gobrane nibti ye abko tikwe bä mikadre dre kwrere ruen munye?

21 Ngöböta kite gobrane nibti ye abko rabadi niren lebadurata niren ye kwrere abko krörö: Meri iti käkwe lebadura kitani chi arina kabre te, bti mritani kwe abti lebadura nikani arina kabre ye ñäre jökrä, niebare Jesukwe.

Jukwe Krä chi

(Mateo 7.13-14,21-23)

22 Yehti Jesu nikani janknu Jerusalén kukwäre mda angwane, nikani dirire juta kwatirekwatire te ji ngrabare.

23 Angwane bati ni iti käkwe niebare ie:

Ti Dänkien, ñni braibe rabadi dianintari ya?

Abtä Jesukwe niebare mda ni jökräye:

24 Munkwe ja di mika kri rikakäre gwä jukwe Krä chite ta, ñöbtä ñan angwane mrä ni kwati tö rabadi näin gwä akwa ñan rabadi,

25 ñöbtä ñan angwane ju bkänkä käkwe jukwe dikadi jite, ye ngwane mun rabadi ju bäre abko rabadi ju bkänkä ye käre, ká rabadi niere krörö ie: Ti Dänkien, jukwe tike nunye, mun rabadi niere. Akwa niarakwe niedi munye: Mun gare ñakare tie amne mun ká mdenbo gare ñakare tie, niedi kwe munye.

26 Angwane mun rabadi niere krörö ie: Nunkwe mröbare amne nunkwe tomna ñani gwaire mabe. Erere arato, makwe diribare nun kánti, ¡ye töre ñakare mae ya! munkwe niedi.

27 Akwa ju bkänkä käkwe niedi munye: Mun gare ñakare tie amne mun ká mdenbo gare ñakare tie. Mun kukwe kämekäme nuenkä nän mobe mento tibtä, niedi kwe munye.

28 Ye ngwane abko, Ngöböta gobrane, ye kánti Abraham, Isaac, Jacob amne Ngöbö kukwei niekätire tädi jökrä, btä mun okwä rabadi angwane, munkwe ja müadi krikri be amne mun moto rabadi romon krübäte ju bkänkäkrä, ñöbtä ñan angwane mun abko tädi kitaninkä ju bäre.

29 Mun tädi ngwarbe ju bäre, ye ngwane abko nitre nünanka mintokwäre, mötarikri, ká driri amne nindrini abko rükadi jökrä, rabadi tákänintbe mröre gwaire jökrä Ngöböta gobrane ye kánti.

30 Ye ngwane abko, ni ruäre ütiäte kri mtare abko rabadi ni bobre kwrere mrä amne, ni ruäre bobre mtare abko rabadi ütiäte kri mrä. Abko kore se, niebare Jesukwe.

Jesukwe nitre Jerusalénbo müaibare

(Mateo 23.37-39)

31 Kä ye ngwane abko, nitre bariseo nükani ruäre, käkwe niebare Jesuye:

Herodes tö ma kämikai, aiseté nän ngitie mento nete, niebare kwetre.

32 Angwane Ngöbö ñan tö ne ngwane, Herodes ñan rabadre Jesu kämike ja töi jenbti, ye mikakäre gare ietre, abkokäre Jesukwe niebare mda ietre:

Herodes abko nukro känsenta kwrere, ye ie mun nän niere krörö: Mtare, jetbe tikwe üai käme juanditari nibtä amne tikwe ni bren bren mikadita quinta amne münkme tikwe sribidi ünän.

33 Akwa mtare, jetbe, münkme ti näin sribire janknu ji ngrabare. Abti ti näin nebe Jerusalén, munkwe nie ie, ñöbtä ñan angwane ni Ngöbö kukwei niekä abko ñan krütadre juta Jerusalén bäre mento, aiseté ti näin kánti. Abko kore se, niebare Jesukwe ietre.

34 Ye btäräbe Jesukwe nitre Jerusalénbo müaiba, käkwe niebare krörö:

¡Aingwaree, mun nünanka Jerusalén nete! Käre munta nitre Ngöbö kukwei niekä müre kete amne nitre juanta Ngöbökwé ja kukwei ngwena abko müre ketata jäbti. Ye abko, kwita ngäbäli kiakia ngibiare ja ngiike täni, ye kwrere käre ti tö namani mun ngibiai, akwa mun ñan tö namani ti tuai ja ngibiare,

35 aiseté ju munkwe nete ne rabadi tökare jökrä mun täbtä abko tita niere nete munye amne, mtare mentokwäre ti ngämi kiteta, känenkri munkwe ñan ti tuadre jire chi mda, yehti munkwe ti tuadi angwane munkwe niedi krörö:

Ni kitera nüke ni Dänkien Ngöbö kábti raba mikani ütiäte kri abko munkwe niedi ti ngäbti. Abko kore se, niebare Jesukwe.

14

Ni nüen ngrabare abko Jesukwe mikaninta quinta

1 Bati köbö jadükakrä näire, Jesu nikani mröre bariseo ütiäte kri kánti angwane, nitre bariseo mda mda namani ngibiaretari kisere kitakäre ngite.

2 Angwane ni nämane iti yete abko nüen jökrä ngrabare, aiseté nämane bren, btä Jesu okwä namani,

3 käkwe niebare Kukwe Biani Ngöbökwé Moiséye dirikätreye amne nitre bariseoye:

¿Köbö jadükakrä näire ni raba ni bren miketa kuinta ya, ñakare ya? niebare kwe.

⁴ Angwane niaratre namani kwekbe jökrä. Abtä Jesukwe ni bren käräbare ja ken, mikaninta kuinta kwe, bti juaninta kwe.

⁵ Yebti Jesukwe niebare mda nitre bariseoye:

Buro ya o nbi betadrekä nguse munkän köbö jadükakrä näire, ye mun rikadre jötrö ngwarbe dentarita, ye ngwane munta sribire. ¿Akwa ni bäri ütiäte jändränkä abko tikwe mirita kuinta abtä ti ngite munta nütüre ya? niebare kwe ietre.

⁶ Angwane nitre bariseo namaninta kwekbe jökrä, ñobtä ñan angwane kukwe kwani ñakare ietre.

⁷ Angwane nitre nübaibare mröre siba abko nikani ja täkrä ni ütiäte ütiäte kräke mesabtä känene jae, bti namani nebe takänintbe Jesu okwäbti. Abtä Jesukwe kukwe bä mikani ietre, käkwe niebare krörö:

⁸ Nane ni iti rika ja mike gure, kanti ma nübai kä ngwiankäre nuäre jabtä siba angwane, ja täkrä ni ütiäte kräke, yete ma ñan raba takänintbe, ñobtä ñan angwane nane ni mda bäri ütiäte makrä nübaibare arato abko jatadre nüke angwane,

⁹ ni mun nübaikä ye jatadre, käkwe niedre mae: Ja täkrä kanti mata takänintbe, ye bien ni neye, niedre kwe mae angwane, ma rikadre nebe takänintbe mrä köre, ye abko rabadre gaidre kri makrä.

¹⁰ Ne aisetse ma nübaikä kanti ma rika angwane, ja täkrä mrä kanti ma raba takänintbe. Yebti ni ma nübaikä ye jatadre, käkwe niedre krörö mae: Ja mräkä, ja täkrä ni ütiätekrä tä mesabtä ne kanti jakwe siba, niedre kwe mae, ye ngwane ma rabadre ütiäte ni mesabtä ye okwäbti abko rabadre bäri kuin.

¹¹ Tita niere kore, ñobtä ñan angwane nire nire tö bikai kri au abko Ngöbökwé mikadi bobre amne, nire nire tö ja mikai bobre abko Ngöbökwé mikadi ütiäte kri, niebare Jesukwe.

¹² Yebti Jesukwe niebare niara nübaikä ye:

Makwe mrö sribere kri kä ngwiankrä nuäre jabtä, o ma rika ni mda mda buke mröte dere, ye ngwane ma kukwe muko, ma etba, ma mräkä mda mda amne nitre ngwian bkänkä kri nünanka känime ma bäre temen, ye aibe makwe ñan nübai mröre jabe, ñobtä ñan angwane niaratre bukadre makwe ye ütiäre ma kärädreta kwetre mröre jae, aisetse makwe mrö biani ye ütiä biandita kwe mae, aisetse nitre ngwian bkäne kri aibe ñan nübai makwe.

¹³ Akwa ma rika mrö sribere kri kä ngwiankrä nuäre jabtä angwane, makwe ni bobre nübai. Erere arato, ni bren bren ngrabare, ni nakwente amne ni okwä kä drünente nübai makwe mröre jae angwane,

¹⁴ kä rabadi nuäre mabtä, ñobtä ñan angwane niaratre ñan raba ma buketa jire mrö ye ütiäre, akwa nitre metre Ngöbö ngwärekre rükaita nire kä mrä angwane, ye näire Ngöbökwé ütiä biandi mae. Abko kore se, niebare Jesukwe ietre.

Jesukwe kukwe bä mikani ja bukabtä

(Mateo 22.1-10)

¹⁵ Ni metre metre Ngöbö ngwärekre rükadita nire, btä Jesukwe blitabare kore, yebtä abko nitre nämame mesabtä ye ngätäite ni iti käkwe niebare mda Jesuye:

Ngöbö jatadi gobrane ni ngätäite angwane, nire tädi mröre yete abko btä kä rabadi nuäre krübäte, niebare kwe.

¹⁶ Abtä Jesukwe kukwe bä mikani ietre, käkwe nitre israelita ütiäte kri bä mikani ni nübaibare känkäne kwrere, käkwe niebare mda:

Yebtä abko ti bike kukwe bä mike krörö munye: Bati ni iti käkwe mrö sribebare kri kwetadre, käkwe ni kwati nübaimna mröre jae.

¹⁷ Ye erere mrö namanina biare kwetadre angwane, ni ye käkwe niebare sribikä kweye: Nitre nübaibare tikwe, ye nän kärere amne makwe nie krörö ietre: Mrö nibira biare kwetadre, aisetse mun jakwe mröre, makwe nie ietre, niebare kwe sribikä kweye.

¹⁸ Ye erere bkänä, sribikä ye nikani akwa, nitre nübaibare abko kwe kukwe mdara jire nämamena nuendre, aisetse ñan rikadre namani niere. Ni iti käkwe niebare: Gwä tikwe kä kürü abko ti bike niken tuenbti, aisetse ti ñan rikadre, ye abko munkwe dian tibti ta, niebare kwe.

¹⁹ Ni mda abko käkwe niebare: Tikwe buey kürü krä jätä sribikrä jae abko tä sribire kuin ya, ñakare ya abko ti bike niken nuente, aisetse ti ñan rikadre, akwa munkwe dian tibti ta, niebare kwe.

²⁰ Ni mdara jire abko käkwe niebare: Gwä tikwe ja miri gure, aisetse ti ñan rikadre, niebare kwe.

²¹ Angwane sribikä ye nikaninta, käkwe niebareta jökrä bkänkäye. Abtä sribikä bkänkä moto namani romon krübäte, käkwe niebare sribikä kweye: Nän jötrö ji kri ngrabare amne ji krä kiakiabti juta ngrabare nokore ni bobre känene, ni bren bren ngrabare känene amne

ni okwä kâ drünente kânene. Erere arato, ni nakwente kânene. Ma jata ngwena mröre nete, niebare kwe sribikäye.

²² Ye erere bkänä, sribikä jananbare. Abti bā raire angwane, sribikä jataninta, kākwe niebare bkänkäye: Ti dänkien, makwe ni kārämna tie, erere tikwe kārānirira, akwa kâ tā ni mda mdakrā, niebare kwe.

²³ Angwane sribikä bkänkä kākwe niebare mda ie: Nān ni mda mda kânene ji ngrabare juta bäre mento sere. Ma jata ngwena nūke nete, űan tō raba kite akwa, ma jata ngwena ni mikakrā bāri kwati gwi ti kānti nete,

²⁴ űobtä űan angwane nitre nūbaibare kānekāne tikwe, ye abko űan rükadre jire iti mröre tibe mesabtā, niebare kwe. Ye kwrere Ngōbōkwe mun űtiāte űtiāte kārādi nūne ja kānti angwane, nane mun űtiāte űtiāte űan rabadre kānti, akwa ni bobre bobre rabadi. Abko kore se, niebare Jesukwe ietre.

Nire nire tō nāin Jesube kākwe tōbikadre kuin ja kāne

(Mateo 10.37-38)

²⁵ Jesukwe mrōbare űnān kore, bti nikani ta angwane, ni nikani kwati jiebtī. Abtā niara nikwitaninte, kākwe niebare ietre:

²⁶ Nire nire tō nāin tibe rabakāre ja tōitikaka tibe abko kākwe ti taredre bāri jāndrān jōkrā bti ta. Akwa nire nire tā rūn, meye, merire kwe, brare kwe, etba, ngwai kwe tarere bāri amne tā ja tarere bāri au ne ngwane, űan rabadre ja tōitikaka tibe.

²⁷ Erere arato, ni kāmikata niken krusobtä angwane, nita niken kruso doboko ngwena au jakrā, ye kwrere nire nire kākwe űan kōtā mikadre au jakrā ja tare nikakāre tikrā amne krūtākāre tikrā ne ngwane, ni ye űan rabadre ja tōitikaka tibe.

²⁸ Ye abko ti bike bā miki krōrō: Nane ni iti rikadre ju miki nura ngbiabtikrā angwane, ngwian tārā tāte ju ye mikakrā bare tāte jōkrā ya, btā tā tōbike kāne, abti ngwian tārā tāte ye ngwane tā ju miki.

²⁹ Akwa ngwian űakare tāte ju mikakrā, akwa ju kōmikadretbe kwe abti rabadre űtare űan rabadre kāte ie. Yebtä abko ni jōkrā rabadi ni ye kōtaire,

³⁰ kā rabadre niere: ¡A! Ni se nikani ju miki akwa, namani bare űakare ie abko ni jōkrā rabadre niere kōtaire kwārā kore btā. Ye kwrere mun mden tō nāin tibe kākwe tōbika kuin ja kāne.

³¹ Yebtä ti bike kukwe mdara jire bā miki abko krōrō: Jrei tādre iti kwe rükā tādre mili krā jātā abko jatadre niken rūre jrei mda rūere. Akwa jrei mda ye abko kwe rükā tādre mili krā gre, aisete jrei kwe rükā mili krā jātābe ye rabadre tōbike kāne, rükā mili krā gre ye ganaindi kwārābe kwetre ya abko rabadre tōbike.

³² Akwa nane rükā mili krā jātā ben jrei ye kākwe űan ganandre, rabadre tuen ie angwane jrei kwe rükā mili krā gre ye tādre mente angwane, űan rūdre kwe, aisete ja mākādreta jirekābe kwe abkōkāre nitre juandre niere kwe jrei mda yeye.

³³ Ye kwrere abko, nire nire tō nāin tibe rabakāre ja tōitikaka tibe, akwa űan tō jāndrān jakwe mikaite jōkrā ne ngwane, űan rabadre ja tōitikaka tibe. Ne aisete mun mden tō raba nāin tibe kākwe tōbika kuin kāne. Abko kore se, niebare Jesukwe ni jōkrāye.

Jesukwe kukwe bā mikani mrenbtā

(Mateo 5.13; Marcos 9.50)

³⁴ Yebti nire nire tō nāin Jesube abko Jesukwe bā mikani mrenbtā, kākwe niebare mda:

Mren abra kuin jāndrān jōkrā mikakrā bānānte, akwa bānān riadrekā rabadre tibo, ye abko rikadre ngwarbe, aisete űan rabadre kuin mda,

³⁵ amne űan rabadre kuin dobokrā amne űan rabadre kuin abono sribekrā, aisete rabadre ngwarbe. Abtā kitadrekā jirekābe. Tita kukwe niere ne mun mden mden tō nāin tibe kākwe ketate ja olote, bti tōbika kuin btā munkwe, niebare Jesukwe ni jōkrāye.

15

Obeja nianinte, btā Jesukwe kukwe bā mikani

(Mateo 18.10-14)

¹ Angwane ni kwati ngwian kārākā gobran romanobokrā amne ni kwati mda mda namani tuen moto kāmekāme nitre bikaka metre Ngōbō ngwārekriye, ye namani nūke Jesu ken niara kukwei nuakāre.

² Abtā nitre bariseo amne Kukwe Biani Ngōbōkwe Moiséye dirikātre namani űāke tiebe Jesu rūere, kā namani niere jae kwārikwāri:

Nitre kukwe kāmekāme nuenkā se kwrere abko ni noko tā kaen ngābti jōkrā amne tā mröre ketetibe ben, abtā tā ja miki ngite Ngōbō rūere űan űan, namanintre niere Jesubtä.

³ Angwane Jesukwe kukwe bā mikani krōrō mda ietre, nitre namani tuen kāmekāme abko űtiāte Ngōbōkrā era metre mikakāre gare:

⁴Ni iti mun ngätäite abko kwe obeja tädre gre ketarike abko riadrete krati kân, ye ngwane niarakwe ñan obeja gre ketabká bti krâ jätâbti krâ ökân (99) ye mikadrete ja ngbiare kaibe kâ kaibete, bti obeja kratibe nianinte, ¿ye niara ñan rikadre kânentari kisere ya?

⁵Kwandretari ie angwane, kâ rabadre nuäre btâ, kâkwe kitadre ja kôtâbti ta, bti rikadre ngwenante

⁶ja gwiriete angwane, niara kukwe muko nünanka kânimekânime abko kârâdre jökrâ kwe, bti niedre kwe ietre: Obeja nianinte krati tikân abko kuninantari tie, aiseite ari kâi ngwen nuäre jabtâ tibe, niedre kwe.

⁷Ye kwrere abko, ni iti kukwe kâmekâme nuenkâ ni ne kwrere kâta ja tõi kwite, kâta kukwe kâme kite temen amne tä Ngöbö kaen ngâbti, ye abko kâita neme bári nuäre Ngöböbtâ kâ kâinbti sete ni gre ketabká bti ni jätâbti ni ökân kâta Ngöbö mike täte era metre nütüta jabtâ munkwe kwrere ye abko ie Ngöbö garera, niebare Jesukwe.

Jesukwe kukwe bä mikani ngwian nianinte btâ

⁸Bti Jesukwe niebare mda:

Ye kwrere arato, meri tädre iti, kwe ngwian tädre kun jätâ abko riadrete kunti kân angwane, meri ye kâkwe ñotra mikadre, bti rikadre kâ sökökâ gwita ngwian ye kânântarikäre.

⁹Abti kwandretari ie angwane, kukwe muko merire merire nünanka kânimekânime abko kârâdre kwe, bti niedre kwe ietre: Ngwian nianinte tikân abko kuninantari tie, aiseite ari kâi ngwen nuäre jabtâ tibe, niedre kwe kukwe mukoye.

¹⁰Ye kwrere abko ni kukwe kâmekâme nuenkâ kâta ja tõi kwite, kâta kukwe kâme kite temen amne tä Ngöbö kaen ngâbti abko kâita nebe nuäre angeletr Ngöbökwetâ kâ kâinbti sete, ye abko ti tõi niei munye, niebare Jesukwe ietre.

Jesukwe kukwe bä mikani ni bati diänbtâ

¹¹Yebti Jesukwe kukwe mdara jire niebare angwane, nitre bariseo romon krâke abko bä mikani ngäbâkre mubai kwrere kwe amne nitre kukwe kâmekâme nuenkâ abko bä mikani ngäbâkre diän kwrere kwe abko krörö:

Bati ni nämâne iti abko kwe ngäbriänkâ nämâne nibu.

¹²Ni ye abko ngobo bári bati nikani, kâkwe niebare ie: Tata, jändrânta biandre tie makwe, ye erere makwe bian jötrö tie, niebare kwe rünye. Abtâ rünkwe jändrän jakwe ye dräibare niaratre nibubti.

¹³Yebti kâ ngämi niken raire ta angwane, ni bári bati ye kâkwe jändrän jakwe erere rürümoinbare jökrâ, bti ngwian diani kwe, bti nikani mobe kâ mdabti, kânti nikani kukwe nuene ngwarbe diän diän. Abtâ ngwian ganinte jökrâ jakân kwe.

¹⁴Ngwian krütanina jökrâ kân, ye btârâbe kâ ye kânti mrö nika jatani krübâte, aiseite niara nikani mrö nika krübâte arato.

¹⁵Angwane ni nämâne iti juta yete abko israelita ñakare akwa, niara nikani sribi kârere jakrâ ie. Erere bkänâ, sribi bári kâme krübâte ni israelitakrâ abko biani kwe ie, kâkwe niara mikani mtü ngbiare.

¹⁶Nämâne sribire angwane, mtü buka nämâne algarobate kwe abko niara tõi namani nebe kwetai siba akwa, ñan namani bien jire chi kwetadre ie, aiseite mrö namani krübâte ie.

¹⁷Abtâ bati namani töbik: ¡jo! Ni kwati tä ganane ti rün kânti kwe mrö tärâ kabre kwetadre amne ti abko kite jraine jakân mrö miare nete,

¹⁸aiseite ti bike nikenta ti rün gwiriete, kâkwe niedi krörö ie: Tata, tikwe ja mikani ngite Ngöbö rüere amne ma rüere,

¹⁹aiseite makwe ñan ti kata ngâbti ja ngobo kwrere ja juete, akwa nita ganane mae, ye kwrere makwe ti mika ganane jae, tikwe niedi kore tataye, namani nütüre.

²⁰Ye erere bkänâ, nikaninta jibti, nikani nebata rün gwiriete. Nämâne mente se kwrere angwane, jatabare rünye amne namani ruen bári bobre ie, aiseite nikani betekâ ngâbti, kâkwe küde kitani ngärâ demaine kwärâ.

²¹Angwane ngobokwe niebare ie: Tata, tikwe ja mikani ngite Ngöbö rüere amne ma rüere, aiseite ti ma ngobo makwe, ye makwe niedre ñakare mda ruen tie, niebare kwe rünye.

²²Akwa rün abko kâkwe niebare sribikâtre kweye: Dän bári kuinkuin kânene. Munkwe kita btâ amne anio ni bä mikakrâ ütiate kita kisebtâ munkwe, bti sandalia kita ngotobtä munkwe niara ñan bä rabadre ni klaborer kwrere abkokäre.

²³Bti nbi ngäbâli bári kuin ngibiata jenena mun rika tuen. Munkwe kâmika kwetadre. Ngäbâkre tikwe nütä ye ari kâi ngwen nuäre kri jabtâ,

²⁴ñöbtâ ñan angwane ni krüta kwrere jire ngäbâkre tikwe ne nianinkâ ti okwäte, akwa nütä mtare. Niara nianinte tikân, akwa nürate, aiseite ari kâi ngwen nuäre jabtâ, niebare kwe. Ye erere, ni jökrâ nikani kâ ngwen nuäre jabtâ.

²⁵ Angwane ngábàkre mubai abko nàmane tirete, jataninta gwákàre mda, nùkani bà kànime se kwrere angwane, tån ngò amne ka kukwei jarabare ie amne tärä mika nàmane namani ruen ie.

²⁶ Abtä ni sribikà rùnkwe kàràbare iti kwe, bti niebare kwe ie: ¿Dreta nakenkà gwi? niebare kwe ie.

²⁷ Angwane sribikà ye kàkwe niebare ie: Kàre ma rùnta nbi ngábàli bàri kòte ngibiare jenena, ye abko kàmikamna, ñòbtà ñan angwane ma etba nikani abko nùta. Niara tà kuin, aisetè kà nibi nokre gwi ye, niebare kwe ie mda.

²⁸ Yebtà abko ngábàkre mubai ye mätä namani kri krübàte, ñan tò namani rikai gwä. Abtä rùn nikani kánti ju bàre, kà namani ngwen kisere nebeta gwi.

²⁹ Angwane niebare kwe rùnye: Tikwe sribibarera kà kobe makrà, ye gare kuin mae. Erere arato, tikwe ñan ma kukwei kitabare temen. Kàre tita ma kukwe mike tate jòkrä, akwa ma ngämi chibo ngábàli bien jire krati tie kwetadre, kà ngwiankrä nuäre jabtä ti kukwe mukobe.

³⁰ Akwa ma ngobo ngutu ngwarbe jananbare, meri bti kà ngwarbe ngwarbe, btä ngwian makwe ganinte jòkrä makän abko kràke makwe nbi ngábàli bàri kuin kàmikamna kà ngwiankrä nuäre jabtä, niebare kwe rùnye.

³¹ Abtä rùnkwe niebare ie: Ma ti ngobo tikwe, kàre mata nùne gwi tibe nete amne jändrän jire jòkrä tà tikwe, se abko jòkrä makwe.

³² Akwa ni krüta kwrere jire ma etba nianinkä ti okwàte abko nùta, nàmane nianinte tikän, akwa nùrate, ye abko kà ngwian dre nuäre jabtä nikwe, abkokàre tikwe mrò sribemna, niebare kwe ngobo mubaiye. Abko nakaninkä kore. Ne ngörä, niebare Jesukwe nitre bariseoye amne kukwe biani Ngöbökwè Moiséye dirikàtreye.

16

Jesukwe kukwe bà mikani ni ju ngibiabtikä btä

¹ Jesukwe kukwe mda niebare krörö nitre ja töitikaka benye:

Bati ni ngwian bkänkä kri nàmane iti abko kràke ni mda nàmane jändrän ngibiabtikä. Ni jändrän ngibiabtikä ye abko ñan nàmane sribire kuin, aisetè jändrän jatani nente kri sribi bkänkäkän niebare kwetere ie.

² Abtä sribi bkänkä kàkwe sribikà kwe ye kàràbare, bti niebare kwe ie: ¿Mata jändrän ngibiarebti ño tikrà amarebti ma kädrieta nùke blo tibe nete? Mata sribire ño ño tikrà, ye niere jòkrä tie, ñòbtà ñan angwane makwe ñan jändrän ngibiadrebti jire mda, niebare kwe ie.

³ Abtä ni jändrän ngibiabtikä ye namani töbìke kri krörö mda: Sribi bkänkä bike sribi denkä tikän mtare, nebti tikwe ja nuendi mda. Ti di ñakare sribi taretare nuenkàre amne, tita neme ja gaire ngwian kàre ngwarbe jakrà ni mda mdaye, namani nütüre.

⁴ Te tòi ngítianinkä krörö: Sribi diandrekä tikän angwane, ni mda mda tädre biare ti kaen ngäbti ja gwirietè, abkokàre ti bike kukwe ne nuene, namani nütüre.

⁵ Erere bkänä, ni mda mda bti rürümon ütiä nàmane sribi bkänkäkwe, erere kàràbare kwe ja kánti. Erere ni nùkani kàne, ie niebare kwe: ¿Rürümon ütiäta nuäi mabti ti bkänkäkwe, niebare kwe ie? Angwane ni ye kàkwe niebare: Olibo kõi galon sientò krä kwä ütiäta tibti, niebare kwe.

⁶ Abtä ni jändrän ngibiabtikä kàkwe niebare ie: Makwe olibo kõi diani ütiädre angwane, makwe tärä úkaninte, ye makwe úkateta, aisetè jòtrö ngwarbe makwe olibo kõi mika galon sientò kräbkàbe tärä mdabtä, niebare kwe.

⁷ Yebti ni mda nùkani abko ie niebare kwe: ¿Ma abko bti rürümon ütiäta nuäi ti bkänkäkwe? niebare kwe. Angwane ni ye kàkwe niebare ie: Trigo sako mili krati ütiäta tibti, niebare kwe. Angwane ni jändrän ngibiabtikä kàkwe niebare ie: Tärä biani kàne mae, ye úkateta amne makwe trigo mika sako sientò krä kwäbe, niebare kwe ie.

⁸ Yebtà abko ni jändrän ngibiabtikä abko ni ngökaka akwa, sribi bkänkä kàkwe niara kàikitankä töbikabtä kuin jakrà kore, ñòbtà ñan angwane jändrän nuenta au jakrà, abkokrà ni tòi kàmekàme kà nebtä bàri tà juto biare jändrän úkete kuin jakrà ni jen Ngöbökwè ngwä.

⁹ Ne aisetè mun kukwe muko rabadre bàri kwati munkwe, abkokàre jändrän kabre munkwe tuen ütiäte ñakare Ngöböye, ye munkwe dräi ni bobre bobrebti. Yebti jändrän krütadre jòkrä munkän angwane, ju nünankrà kàrekàre kà kàinbti ye kánti Ngöbö tädira biare mun kakàre ngäbti.

¹⁰ Mdakàre abko, nire nire kàta jändrän braibe ngibiare kuin era metre, ni yebti abko tödekata jändrän kabre ngibiabtä kuin era metre arato. Erere arato, ni ni ngökaka jändrän braibe btä abko kàkwe ni ngökadre jändrän kabrebti arato.

¹¹ Ne aisetse jändrän kä nebtä ütiäte ñakare bökän akwa, mun ñan tö ngibiái kuin era metre, ¿se abko Ngöbökwe tödekadre munbti, kákwe mun mikadre jändrän bäri ütiäte kri ngibiarebti? ¡Ñakare jire!

¹² Mdakäre abko, ¿jändrän jenena ni mdakwe munkwe ñan ngibiadre kuin era metre, se abko nirekwe jändrän biandre ngibiadre jakrä munye?

¹³ Ne aisetse ni klobre ñakare jire abko rabadre sribire bkänkä nibukrä ja näire, ñobtä ñan angwane sribi bkänkä iti rabadre tare kwe amne mda btä mäta rabadre; iti kukwei mikadre täte jökrä kwe, akwa mda abko ñan kukwei mikadre täte kwe. Ne aisetse ni ñan raba ja töi mike kwatibe sribire Ngöbökrä, ja töi mikare kwatibe ngwian ganankrä jae kwärä. Abko kore se, niebare Jesukwe.

¹⁴ Ye ngwane abko, nitre bariseo ngwian tarekätarekä kákwe Jesu kukwei nuani. Abtä namani Jesu kukwe mike yakrä jae.

¹⁵ Abtä Jesukwe niebare mda ietre:

Mun ngwarbe tä bike deme ni mda mda okwäbti, akwa mun moto ño ño gare kuin jökrä Ngöböye. Ye abko, jändrän ütiäte kri nikrä abko tä nebe tuen bäri käme Ngöböye, niebare Jesukwe nitre bariseoye.

¹⁶ Yebti Jesukwe kukwe mda niebare krörö:

Kukwe Biani Ngöbökwé Moiséye amne kukwe tikani nitre Ngöbö kukwei niekákwe, ye namani mrä Juan Bautista näire. Abti mtare mentokwäre Ngöböta gobrane ño ni ngätäite abko kukwei kuin dirita niken mda amne, Ngöbökwé gobrandre nitbtä, ye ni kwati tö Ngöbö mikai nuene jabtä ja di jenbti.

¹⁷ Akwa nane Kukwe Biani Ngöbökwé Moiséye ye abko ñakare ütiäte mda munkrä, mun rabadre nütüre, akwa era metre ütiäte, ñobtä ñan angwane kä käinta amne kä temen ne juandre ngwarbe jökrä Ngöbökwé, akwa nin tärä okwä bäri chi tä tikani btä diandikä kwitakäre jene, ñobtä ñan angwane Kukwe Biani Ngöbökwé Moiséye abko ütiäte aisetse.

¹⁸ Mdakäre abko, ni brare kákwe merire kwe tuadremetre, bti meri mdara jire ben ja mikadre gure kwe, ni ye kákwe ja mikadre ngite merire käne rüere. Erere arato, meri tuanimetre brarekwe, ye ben ni mdakwe ja mikadre gure ne ngwane, ni gure kätä ja mike ngite bati bati ni mda mdabe, ye kwrere ja mikadi ngite kwe, niebare Jesukwe.

Kukwe bä mikani ni ngwian bkänkä kribtä amne Lázarobtä

¹⁹ Abti Jesukwe kukwe mdara jire hä mikani krörö:

Bati ni nämane iti abko ngwian bkäne kabre krübäte, aisetse nämane dän kuinkuin ütiäte krikri kite jabtä amne käre nämane mrö sribere krikri köbö kwatirekwatire kä ngwiankrä nuäre jabtä kukwe mukobe.

²⁰ Kä ye kánti abko, ni bobre nämane iti arato abko kädian nämane Lázaro. Lázaro ye abko ngütüete jökrä ngrabare abko nämane nebe tákänintbe jukwebtä ni ngwian bkänkä kabre ye kánti.

²¹ Angwane mrö büre nämane betekä timontimon mesabtä, ye abko ni bobre ye tö namani nebe kwetai trine ni ngwian bkänkä kabre ye kánti. Angwane nukro abko nämane nebe Lázaro träin bäse.

²² Yebti bati ni bobre ye krütani angwane, angele nikani ngwena kä nuäre kánti yete, mikani mröre ketetibe kwetre Abrahambe. Abti ni ngwian bkänkä kabre ye krütani mda abko mräkákwe doboi mikani jirekäbe.

²³ Angwane ni ngwian bkänkä kabre ye nikani kä ja tare nikakrä kánti. Ye kánti nämane ja tare nike krübäte, kákwe nikrabare amne Lázaro nämane tuen tákänintbe Abraham ken ie se kwrere.

²⁴ Angwane ngwänänkäbare krörö kwe Abrahamye: ¡Rua Abraham, ti ngwen ruen bobre jae! Tita ja tare nike krübäte ñukwä jutrate nete, aisetse Lázaro juen ja kise judabti aibe mike tibo ñöte sete, bti jata ketekä ti tüdrä mikakäre tibore nete niere ie, niebare kwe Abrahamye.

²⁵ Akwa Abraham kákwe niebare ie: Ti bräi tikwe, ma nämane nüne angwane, ma nämane jändrän bkäne kabre, bti ma nämane kä ngwen nuäre jabtä amne, Lázaro abko nämane ja tare nike kri. Mtare niarata kuin jame amne ma tä ja tare nike.

²⁶ Mdakäre abko, kä oko kri krübäte ni jiete, ¿ne abko ni rikadre ño ja kánti kwärükwäri? Ni nekri ñan raba nebe mun kánti yete amne mun ñan raba nüke nun kánti nete arato, niebare Abrahamkwe ie.

²⁷⁻²⁸ Abtä ni ngwian bkänkä kabre kákwe niebare mda Abrahamye: Rua Abraham, ti etbata nirike ti rün juete, ye ñan jatadre siba ja tare nika ne kánti, abkokäre Lázaro juen dirire ietre tikrä abko tita ribere mae, niebare kwe Abrahamye.

²⁹ Abtä Abrahamkwe niebare mda ie: Kukwe Biani Ngöbökwé Moiséye ye tärä kwetre amne nitre Ngöbö kukwei niekä kákwe tärä tikani tä kwetre arato, ye abko mikadre täte

kwetre, angwane nūnandre metre amne ñan rikadre kä ja tare nika kánti mabe, niebare kwe ie.

³⁰ Angwane ni ngwian bkänkä kabre kákwe niebare mda: Rua Abraham, tärä tä ti mräkákwe ye aibe ñan rabadre dbe kräke, aisete ni krütanina abko rükadreta nire rikadre dirireta ietre abko kukwei mikadre era kwetre amne kukwe käme kitadre temen kwetre ruen tie, niebare kwe Abrahamye.

³¹ Akwa Abraham kákwe niebare mda ie: Kukwe Biani Ngöbökwe Moiséye amne nitre Ngöbö kukwei niekä kákwe tärä tikani tä niaratre kisete abko ñan tä mike täte, ye kwrere ni krütanina rükadreta nire, rikadre dirireta ietre abko ñan kukwei mikadre täte kwetre arato. Abko kore se, niebare Abrahamkwe ie, abko nakaninkä kore. Ne ngörä, niebare Jesukwe ni jökräye.

17

Ja mikadre mokre kukwe käme ngäniene

(Mateo 18.6-7,21-22; Marcos 9.42)

¹ Bti Jesukwe niebare nitre ja töitikaka benye:

Käre ni mda mda jatadi, kä rabadre ni nuente ja käne, kákwe ni mikadre ja mike ngite Ngöbö rüere, akwa aingwaree ni ni mda ngwianka ja mike ngite Ngöbö rüere. Ni ye abko bobre jakän,

² ñobtä ñan angwane niara ngämi ni mda mike kukwe käme nuene Ngöbö rüere, ye känenkri jä oto kri trigo ukwakrä ye mäkadrete rorobtä, bti kitadre ñöte abko rabadre bäri kuin kräke, ñobtä ñan angwane Ngöbökwe mikadre ja tare nike bäri ni mikabtä kukwe käme nuene ye dokwäre aisete.

³ Ne aisete munkwe ja ngibia kuin.

Mdakäre abko, ma mräkákwe ja mika ngite ma rüere angwane, makwe mäträ btä, abti ja töi kwitata kwe amne moto raba ulire btä ne ngwane, ja mikani ngite kwe, ye makwe dian bti ta.

⁴ Ye abko, ja mika ngite bä kükü ma rüere kwe, akwa rikata bä kükü arato niereta krörö mae: Tikwe ja mikaba ngite ma rüere, ye kwrere tikwe ñan nuendre mda, nie kwe mae, angwane ja mikani ngite kwe ma rüere, ye makwe dianta jökrä bti ta, niebare Jesukwe.

Nikwe tödekadre metre Ngöböbti

⁵ Angwane nitre Jesu kukwei ngwianka kákwe niebare mda ie:

Dänkien, nun die mike tödeke bäri Ngöböbti, niebare kwetre.

⁶ Abtä Jesukwe niebare mda ietre:

Munkwe tödekadre bäri chi Ngöböbti mostasa nura chi näre, akwa munkwe tödekadre kwatibe bti angwane, munkwe niedre kri ngätri bäri mente nguse nokoye: Ja jákekä au yete, bti ma raba mrente sete, munkwe niedre kri yeye, ye erere mun kukwei mikadre täte kwe, niebare kwe ietre.

Sribidre krörö Ngöbökrä

⁷ Nebti Jesukwe blitabare kukwe mdabtä, kákwe niebare:

Mdakäre abko, mun iti kwe ni klabore tädre abko rikadre dobo ükete sribikrä o tädre obeja ngibiare. Ni klabore ye jatadreta dere gwäkäre angwane, bkänkä kákwe ñan niedre ie: Ma dräre, aisete jakwe mröre mesabtä nete, ñan niedre jire kwe ie.

⁸ Akwa niedre krörö ie: Dän mda kite jabtä, bti makwe mrö scribe tikrä. Makwe ti buka amne makwe tomna bian tie. Tikwe mrödi amne tikwe tomna ñadi ünän, yebti makwe mrödi amne makwe tomna ñadi, niedre kwe ie.

⁹ Erere arato, bkänkákwe sribi nuemna ie, erere nuendre kwe amne niara ñan käikitadrekä bkänkákwe.

¹⁰ Ne kwrere arato, Ngöbökwe dre nuemna, ye erere munkwe nuendre täte jökrä angwane, munkwe niedre krörö ie: Nun abko ni klabore ütiäte ñakare makwe Ngöbö, ñobtä ñan angwane sribi nuemna aibe munkwe nuenbare, aisete munkwe nie kore. Abko kore se, niebare Jesukwe ietre.

Jesukwe ni ni jätä bren lebra kisete mikaninta quinta

¹¹ Yebti Jesu nikani janknu Jerusalén kukwäre mda angwane, nikani kä Samaria amne kä Galilea ngätäite ta.

¹² Angwane nikani nebe ja ken juta mdabe. Ye kánti ni bren lebra kisete nämane ni jätä, jatani niara ngäbti abko nükani bä mente temen se kwrere,

¹³ kä namani ngrente krikri be krörö:

Jesu, dirikä, nun ngwen ruen bobre jae. Nun mikete quinta, namanintre niere.

¹⁴ Jesu okwä namani btäre angwane, niebare kwe ietre:

Ni blitaka Ngöböbe ni mda mda diäre, ye kánti mun nän ja kwata mike tuare ietre, niebare kwe ietre.

Erere bkänä nikanintre, nämane nän ji ngrabare angwane, batibe namaninante kuinta jökrä ngrabare gani kwetre.

¹⁵ Nitre namaninta kuinta, ye ngätäite ni jataninta itibe ja jiebti, jatani ngrente krikri be Ngöbö käikitarekä kwärä.

¹⁶ Jatani nüketa Jesu kánti angwane, nikani ngitiekä ngwärere timonkwäre Jesu ngotobtä, kuin niekäre ie. Ni ye abko, ni Samariabo aibe nukaninta Jesu kánti kuin niekäre ie.

¹⁷ Angwane Jesukwe niebare ie:

Ni ni jätä nibita kuin jökrä ñan ñan, çakwa ni ni ökän abko ame

¹⁸ amarebti ni menteni ñakare israelitare aibe nüketa itibe Ngöbö käikitekä noko? niebare kwe.

¹⁹ Yebti Jesukwe niebare ni yeye:

Makwe tödiri kwatibe Ngöböbti, köböire ma nibita kuinta, aiseite näinta krö, bti nänta, niebare kwe ie.

Ngöbö jatadi gibrane ni ngätäite

(Mateo 24.23-28,36-41)

²⁰ Angwane nitre bariseo nämane yete käkwe niebare Jesuye:

Ngöbö rükadi gibrane ñongwane ni ngätäite abko nunkwe gadi ño, niebare kwetre ie.

Abtä Jesukwe niebare ietre:

Ngöbö rükadre gibrane ni ngätäite, ye abko ñan tuadre jire chi ja okwä jenbti,

²¹ aiseite Ngöböta gibrane nete, sete, mun ñan rabadre niere, ñobtä ñan angwane Ngöbö nena gibrane munbti, akwa ye ñan raba tuen ja okwä jenbti, niebare kwe nitre bariseoye.

²² Bti Jesukwe niebare nitre ja töitikaka benye:

Batira jire kä jatadi angwane, ti Ni Kä Nebtä Ngobo jatadita ye mun tö rabadi tuai batibe siba, akwa munkwe ñan tuadre.

²³ Angwane ni ruäre rabadi niere munye: Ni Kä Nebtä Ngobo tä nete, Ni Kä Nebtä Ngobo tä sete, rabadi niere, akwa mun ñan rika tuen kánti amne ni ye kwrere, jiebti mun ñan rika,

²⁴ ñobtä ñan angwane merata trä ngitiekä ngwen kánta tä jataen batibe jökrä kwäräkwärä, ye kwrere arato ti Ni Kä Nebtä Ngobo ne jatadita angwane, ni jökrä käkwe gadi batibe jökrä aiseite.

²⁵ Akwa käne tikwe ja tare nikadi kri bätäkä ngwarbe amne nitre nünanka kä ne ngwane käkwe mikadi ngwarbe jae.

²⁶ Akwa ti Ni Kä Nebtä Ngobo ne jatadita angwane, kukwe nakaninkä ño ño Noé näire angwane ni jökrä nämane nüne jame, ye kwrere arato ti Ni Kä Nebtä Ngobo ne jatadita angwane, kukwe rakadikä abko krörö:

²⁷ Kä ye ngwane abko ñü ngämi näkäen temen, känenkri abti Noé nikani rute, ye ngwane ni jökrä tö namani nünai ño, erere nämane nüne, aiseite nämane mröre, dö ñaen amne nämane ja mike gure. Te batibe ñü jatani jobe temen, käkwe ño mikani niren kri abko nikani nitre ye ngwena jökrä abko müre neketani ñöte.

²⁸ Ye kwrere nakaninkä krörö Lot näire arato: Ni jökrä nämane mröre, dö ñaen, jändrän kökö, jändrän rürümoine, nura nökö amne ju mike. Ni jökrä nämane töbike jändrän ye aibehtä.

²⁹ Angwane Lot nikaninta mräkäbe juta Sodoma bäre mento, ye btäräbe Ngöbökwäre ñukwä kä käinbti juani asufrebe mni mni, käkwe nitre Sodomabo kämikani jökrä.

³⁰ Ye kwrere arato, ti Ni Kä Nebtä Ngobo ne jatadita angwane, kukwe rakadikä kore.

³¹ Kä ye ngwane abko, nitre tädre jubti käin* amne jändrän tädre gwi kwe ñan rika tuenta ngwianre jae, akwa gitia jirekäbe amne, ni tädre sribire tirete ye abko ñan rika jändrän tuenta jire chi gwi, akwa gitia gwängwarbe jirekäbe.

³² Angwane kukwe nakaninkä ño meri Lokwebtä, ye munkwe ngwianta töre jae, käkwe jändrän munkwe taredre ñakare,

³³ ñobtä ñan angwane nire nire abko ie ja kwata rabadi ruentari tare abko krütadi kärekäre Ngöbö okwä bäre mento, akwa nire nire tä biare krüte Ngöbökrä abko käkwe nünandi kärekäre Ngöböbe.

³⁴ Erere arato, ti Ni Kä Nebtä Ngobo jatadita, ye ngwane ni tädi nibu kibien jänbti deo abko jänän iti amne iti abko mikadite.

³⁵ Erere arato, meri tädi nibu trigo ukwe gwaire abko jänän iti amne iti abko mikadite, niebare Jesukwe.

³⁶ [Erere arato, ni tädi nibu sribire tirete abko jänän iti amne iti abko mikadite, niebare Jesukwe.]†

* 17:31 tädre jubti käin. Ju nitre israelitare abko kiare bti käin, aiseite nuäre dikakrä bti ta. † 17:36 Kukweta corcheta ngätäite abko ñan tä tikani manuscrito bäri kuinkuinbtä.

³⁷ Angwane nitre ja tōitikaka Jesube kākwe niebare mda ie:
 ¿Kukwe ye abko rakadikā mdenete, Dānkien? niebare kwetire ie.
 Abtā Jesukwe niebare mda ietire:

Ni ngwākā tādi mdenete, btā jūden rabadi ja ūkekrō ngwākā kwete, ye kānti rakadikā. Abko kore se, niebare kwe ietire.

18

Nikwe blitadre janknu Ngōbōbe abko Jesukwe bā mikani

¹ Yebti nitre ja tōitikaka Jesube űan di krūtadre blitabtā Ngōbōbe, abkokāre Jesukwe kukwe mda bā mikani dirikāre ietire,

² kākwe niebare krōrō: Bati ni iti nāmane kritobore juta kwati kānti. Kritobo ye abko nāmane Ngōbō jūrā ngwen űakare amne nāmane ni mda mda mike ūtiāte űakare jae.

³ Juta ye arabe kānti meri kān kwārāi krūtani nāmane iti arato abko ben ni mda nāmane rūre. Abtā meri ye nikani janknu kritobo kānti kukwe ūkatemna jakrā ie.

⁴ Akwa kā raire kritobo ye kākwe kukwe ūkaninte űakare meri ye krāke. Akwa yebti kritobo namani tōbikere: Tita Ngōbō jūrā ngwen űakare amne tita ni mda mda mike ūtiāte űakare jae,

⁵ akwa meri kān kwārāi krūtani se kākwe űan ti nikadre krūbāte mda, abkokāre ti bike kukwe ūkete krāke, niara űan jatadreta mda abkokāre, űobtā űan angwane tādre nūke janknu kore, kākwe ti moto mikadre iko. Erere arato ni mda mda kākwe űan tōbikadre blo tibtā, abkokāre ti bike kukwe ūkete krāke, kritobo namani nūtūre, abko nakaninkā kore. Ne ngōrā.

⁶ Kritobo moto kāme akwa, tōbikabare kore kwe.

⁷ ¿Akwa Ngōbō abko moto kuin, se abko ni dianinkā jen jakrā kwe kāta blite dibire rare ben abko űan ngite mikadre kwe ya? ¿Niarakwe űan juandretari jirekābe ja jiebti!

⁸ Ngōbō abra kuin kākwe ni kwekwe die mikadre jōtrō. ¿Akwa ti, Ni Kā Nebtā Ngobo jatadita angwane, ni tōdekaka tibti tādi blite janknu Ngōbōbe kwandi ruāre tie nete ya? abko ti tō ngwiantari munye, niebare Jesukwe nitre ja tōitikaka benye.

Ni bikaka metre amne ni ngwian kārākā, btā Jesukwe kukwe bā mikani

⁹ Abti ni ruāre, ie ja nāmane nebe ruen metre amne dbe Ngōbō ngwāreki nāmane Jesu kānti abko ietire ni mda mda nāmane tuen kāme, abtā Jesukwe kukwe bā mikani krōrō ietire:

¹⁰ Bati ni nikani nibu ju blitakrā Ngōbōbe kānti blitakāre Ngōbōbe. Ni iti abko bariseo amne ni mda abko ngwian kārākā gobran romanobokrā.

¹¹ Angwane bariseo ye namani nūnaninkā blitakāre Ngōbōbe, kākwe niebare jabtā: Ngōbō, tita kuin niere mae, űobtā űan angwane ni mda mda tā gore, tā kukwe nuene kāmekāme amne tā ja mike gure bati bati, ye kwrere tita nuene űakare. Erere arato, ti űakare ni ngututu kāme ngwian kārākā noko kwrere.

¹² Mdakāre abko, tita ja bāine bobu bāmān kratirekratire makrā amne, jāndrān bianta keta jātā jātā tie amne jāndrān ganainta keta jātā jātā tikwe abko tita bien keteti makrā, ye abko tita nuene kore makrā, niebare kwe Ngōbōye.

¹³ Akwa ni ngwian kārākā ye abko namani bā mente temen se kwrere amne ja űan namani nūke tōre ie nikren kā kāinbti, kā namani ja mete mātrāte namani ulire kukwe kāme nuenbtā bā mikakāre, kākwe blitabare krōrō Ngōbōbe: Ngōbō, ti abko kukwe kāmekāme nuenkā krūbāte, aiseti ti ngwen ruentari tare jae amne ti ngite denkā mento tibtā, namani niere Ngōbōye abko kukwe nakaninkā kore. Ne ngōrā.

¹⁴ Kukwe yebtā ti bike kukwe ūtiāte niere munye abko krōrō: Ni ngwian dianka jāmi niken ja gwiriete, kānenkri ngite űakare mda Ngōbōkwe niebare amne kani ngābti kwe, akwa bariseo abko űan mikani metre ja ngwāreki kwe amne kani ngābti űakare kwe, űobtā űan angwane nirekwe ja mikadre kuin deme au abko Ngōbōkwe mikadi ene, akwa nirekwe ja mikadre bobre Ngōbō ngwāreki abko Ngōbōkwe mikadi ūtiāte jae. Abko kore se, niebare Jesukwe nitre bariseoye.

Jesukwe ja di biani ngābākre kiakiaye
 (Mateo 19.13-15; Marcos 10.13-16)

¹⁵ Ye ngwane abko ngābākre kiakia, bti Jesukwe kise mikadre ja di biankāre ietire, abkokāre jānikani mrākākwe Jesuye. Akwa nitre ja tōitikaka ben kākwe gani angwane, namani űake ngābākre mrākāye.

¹⁶ Abtā Jesukwe ngābākre kiakia kārābare, bti niebare kwe:

Ngābākre ye tuemetre kite tie. Munkwe űan ji ōta kāne, űobtā űan angwane nire nire kāta ja mike bobre Ngōbōbtā ngābākre ne kwrerekwrere, ni yebti abko Ngōbōta gobrane, aiseti munkwe űan ji ōta kāne.

¹⁷ Ti bike kukwe era erere niere munye abko krörö: Nire nire ñan tä ja mike bobre Ngöböbtä ngäbäkre chi kwrerekwre, ni yebti Ngöbökre ñan gobrandi amne ñan nünandi kärekäre Ngöböbe kwe. Abko kore se, niebare Jesukwe nitre ja töitikaka benye.

*Ni jändrän bkänkä kabre käkwe blitabare Jesube
(Mateo 19.16-30; Marcos 10.17-31)*

¹⁸ Yebti ni iti ji dokwäte käkwe kukwe ngwianintari krörö Jesuye:
Dirikä kuin, çtikwe dre nuendre abko ütiäre ti rabadre nüne kärekäre Ngöböbe? niebare kwe.

¹⁹ Abtä Jesukwe niebare mda ie:
Ngöbö aibe kuin, yebti ni mda ñakare jire kuin. çYe ñobtä abko mata ti kuin niere tie ye?
²⁰ Akwa ma tö nünai kärekäre Ngöböbe angwane, Kukwe Biani Ngöbökre Moiséye nuendre nie, ye garera mae abko erere makwe mika täte abko krörö:

Ma gure, makwe ñan ja mika gure bati bati ni mda mdabe.

Makwe ñan ni mda kämika.

Makwe ñan go.

Makwe ñan blita ngwarbe ni mda mda rüere kitakäre ngite.

Erere arato, ma rün amne ma meye mika ütiäte jae, *Exodo 20.12-16; Deuteronomio 5.16-20* niebare Ngöbökre Moiséye abko gare kuin mae ruen tie, niebare Jesukwe ie.

²¹ Angwane ni ye käkwe niebare:

Makwe kukwe nini, ye ti nämane bati ngäbäkrere angwane, ti nikani mike täte jökrä abti kä nuke mtare tie, niebare kwe.

²² Niebare kore kwe, abtä Jesukwe niebare mda ie:

Jändrän tä keteti nuendre mae. Jändrän tä makwe ye erere nän rürümoine jökrä, bti makwe ngwian ye dräi ni bobre bobrebtü angwane, ma rabadi jändrän ütiäte kri bkäne kabre kä käinbti sete. Makwe jändrän rürümoin ünän jökrä kore, bti ma jata ti jiebtü. Abko kore se, niebare kwe ie.

²³ Jesukwe kukwe niebare kore ie angwane, niara abko jändrän bkäne kabre krübäte, aisete moto namani ulire Jesu kukwei nuare.

²⁴ Yebti namani tuen ulire dikaro Jesuye angwane, Jesukwe niebare:

Ni jändrän bkänkä krikri ye käkwe ja mikadre bobre Ngöböbtä, Ngöbökre gobrandre bti abko tare krübäte kräke.

²⁵ Era metre, aku okwä chi, yete ta kameo krikri ye ara rikadre nuäre, akwa nitre jändrän bkänkä kri ye käkwe ja mikadre bobre Ngöböbtä, Ngöbökre gobrandre bti, ye abko bäri tare kräke, niebare Jesukwe.

²⁶ Angwane nitre Jesu kukwei nuaka käkwe niebare mda ie:

çNi jändrän bkäne kri ñan rabadre dianintari nini makwe, se nire abko rabadi dianintari amarebtü se? niebare kwetre Jesuye.*

²⁷ Jesukwe niebare mda ietre:

Jändrän tare nuene abtä ñan neme bare ni kä nebtäye, ye abko nuäre nuendre Ngöbökrä, niebare kwe.

²⁸ Angwane Pedro käkwe niebare Jesuye:

Ti Dänkien, çnunkwe jändrän jakwe jakwe erere mikaninte jökrä, bti nunta näin ma jiebtü, aisete se abko Ngöbökre dre biandi ütiäre nunye? niebare kwe.

²⁹ Abtä Jesukwe niebare ie:

Ti bike kukwe era erere niere munye abko krörö: Ngöböta gobrane, ye nireta kaen ngäbti, abtä ju mikaninte kwe o rün, meye o etbakanre mikaninte kwe, erere arato, meri kwe o ngäbriänkä kwekwe mikaninte kwe,

³⁰ nitre ye abko ie Ngöbökre jändrän biandi bäri kabre mda kä ne ngwane amne mikadi nüne kärekäre jabe kwe arato. Abko kore se, niebare Jesukwe ie.

*Jesu müre ketadi abko niebare bämäkäre kwe
(Mateo 20.17-19; Marcos 10.32-34)*

³¹ Yebti Jesukwe nitre ja töitikaka ben ni jätäbti nibu käräbare kaibe jenena, käkwe niebare ietre:

Nita näin Jerusalén kukwäre. Angwane nitre Ngöbö kukwei niekä kirakira käkwe tära tikani ño ti Ni Kä Nebtä Ngobo nebtä, ye erere rabadi bare jökrä tibtä abko krörö:

³² Nitre romanobo ñakare israelitare abko ie ti kitadi ngise amne niaratre käkwe ti mikadi yakrä jae, ñäkädi taretare kwe tie amne käli kitadi tibtä kwetre,

* **18:26** Jesu näire abko ni ngwian bkäne kri abko nämane ngwian bkäne, ñobtä ñan angwane Ngöbö nämane ja di bien ietre, aisete bäri Ngöbö kukwe muko, aisete rabadre dianintari käne, nitre israelita nämane nütüre. Ne aisete nitre ja töitikaka Jesube abko ñan töi namani krütare Jesu kukweibtä.

³³ bti ti kwata metadi krübäte kwetere. Yebti ti müre ketadi kwetere, akwa köbömäkäre angwane, ti rükadita nire. Abko kore se, niebare Jesukwe ietere.

³⁴ Akwa niaratre abko töi namani braibe, aisete drebtä Jesu nämane blite ñan namani nüke gare ietere.

Ni okwä kä drümente abko Jesukwe mikaninta kuinta

(Mateo 20.29-34; Marcos 10.46-52)

³⁵ Abti Jesu nikanina mate ja ken juta Jericóte mda angwane, ni nämane iti abko okwä kä drümente nämane täkänintbe jibtä ngwian kärere jakrä, kánti ta Jesu nikani nebe.

³⁶ Angwane batibe ni ye ie ni namani ruen näin kwati dikaro ji ngrabare niara bäre temen. Abtä dre namani nakenkä amarebti ni nikani kwati dikaro, niebare kwe.

³⁷ Angwane Jesu Nazarebo jatani ji ngrabare yete, niebare ie.

³⁸ Abtä niarakwe ngratebare kri krörö:

jJesu, jrei David tukwe mräkä, ti ngwen ruentari tare jae! namani ngrente jite.

³⁹ Abtä nitre nämane näin Jesu käne kä namani kada ketamna ie, akwa niara namani ngwänenkä bäri krikri mda, kä namani niere:

jJrei David tukwe mräkä, ti ngwen ruentari tare jae! namani niere.

⁴⁰ Angwane Jesu namani nünaninkä, käkwe ngwiamna nüke ja kánti. Erere jänükani Jesu ken angwane, Jesukwe niebare ie:

⁴¹ ¿Tikwe dre nuendre makrä, ie ma tö nibi? niebare kwe ie.

Ni okwä kä drümente ye käkwe niebare mda ie:

Ti Dänkien, kä rabadre tuen tie, ie ti tö nibi, niebare kwe Jesuye.

⁴² Angwane Jesukwe niebare ie:

Ma nibi tödeke kwatibe Ngöböbti, ye köböire ma okwä nibirate kuinta, aisete kä raba tuen mae, niebare kwe ie.

⁴³ Ye btäräbe kä namani tuen kuin batibe ie, bti nikani siba Jesube Ngöbö käikitekä angwane, ni jökrä käkwe kukwe ye tuani abko namani Ngöbö käikitekä arato.

19

Zaqueo tö namani ja tuai Jesube

¹ Abti Jesu nikani nebe juta Jericóte mda angwane, nikani ji ngrabare jutate.

² Juta yete abko, ni nämane iti abko kädian nämane Zaqueo. Niara abko nämane nitre ngwian käräkä gobran romanobokrä dänkiene aisete, nämane ngwian bkäne bäri kabre krübäte.

³ Nire abko Jesu, Zaqueo tö namani tuai, akwa Zaqueo abko chi amne ni namani kwati, aisete niara okwä ñan namani nebe Jesubtä.

⁴ Abtä nikani betekä käne amne okwä rabadre Jesubtä, abkokäre ji kánti ta Jesu rikadre, ye kánti Zaqueo nikani kribtä käin Jesu ngibiare jite.

⁵ Zaqueo nämane, ye kánti Jesu nikani nebe angwane, batibe Jesukwe nikrabare kribtä käin, käkwe niebare Zaqueoye:

Zaqueo, ti rabadi ma juete mtare, aisete jakweta jötrö timon, niebare kwe ie.

⁶ Ye erere Zaqueo jataninta jötrö timon amne kä namani juto btä Jesu kare ngäbti ja gwiriete.

⁷ Jesu nikani Zaqueo kánti ni mda mda okwäbti, yebtä abko ni jökrä namani ñäke Jesu rüere, kä namani niere:

jJo! Jesu bike niken ni kukwe kämekäme nuenkä gwiriete, namanintre niere Jesubtä.

⁸ Ye erere Jesu nämane mröre Zaqueo kánti angwane, Zaqueo namani nünaninkä, käkwe niebare ni Dänkiene:

Ti Dänkien, jändrän jökrä tä tikwe, ye tikwe biandi ruäre ta ni bobre bobreye amne, nire nire kän tikwe ngwian dianinkä bäri mda ne ngwane, tikwe ngwian dianinkä kän ye bärire mda tikwe ngwian mda biandita ketabkä ietere abko ti tö niei metre mae, niebare kwe Jesuye.

⁹ Abtä Jesukwe niebare Zaqueoye:

Mtare ma amne ma mräkä nibira dianintari abko mata bä mike kore. Zaqueo ne abko Abraham mräkä arato, akwa nämane mente Ngöböye.

¹⁰ Ni nianinte niara kwrere abko ti Ni Kä Nebtä Ngobo ne jatani kändantarikäre amne diantarikäre, mden erere nibi bare mtare Zaqueobtä. Abko kore se, niebare kwe ie.

Ngwian ngibiaka kuin, btä Jesukwe kukwe bä mikani

(Mateo 25.14-30)

¹¹ Jesu nämane blite kore, ye abko ni niara kukwei nuaka nuaka, ie Jesukwe kukwe bä mikani, ñobtä ñan angwane nikanina nebe känime Jerusalén ken, aisete Ngöbö jatadre

gobrane gwängwarbe niaratre ngätäite abko ni ruäre nämane nütüre, akwa nämane töbike blo, aisete Jesukwe kukwe krörö bā mikani ietre tōi tikakakäre metre.

¹² Jesukwe niebare:

Bati ni nämane iti. Niara abko jrei mräkā amne niara mikadre gräbti jreire, abkokäre nikani mobe kä mdate. Abti mikadrera jreire, abti jatadreta gobrane, abkokäre jatani niken.

¹³ Akwa ngāmi niken, kānenkri ni klaborē kwekwe kärābare ni jätā kwe, bti ngwian biani kabre kwe ja näre näre itire itire ietre, kākwe niebare: Ti bike niken mente, aisete ti mikakäre nüketa, munkwe sribi nuen ngwian nebti ti kāne, abti ti jatadi nüketa, niebare kwe ietre, bti nikani.

¹⁴ Akwa nitre ye bti jrei ye nämane gobrane abko mätā namani kri ni yebtā, kākwe ni mdara jire juani ni ye jiebtī blitakäre krörö niara rüere: Nun ñan tō ni ne tuai jreire ja ngätäite, niedre kwetre, abkokäre juani jiebtī.

¹⁵ Akwa ni ye mikani jreire, bti jatani nüketa ja käite. Nūkaninta angwane, ni klaborē kwekwe, ie ngwian biani kwe sribikrä ye abko itire itire kākwe ngwian ganaibare nuāi mda ngwian kwebti abko tō namani gai, kākwe kärābare jökrā nūke ja kānti.

¹⁶ Ye erere ni nūkanī iti kāne kākwe niebare ie: Ti dānkien, ngwian makwebti tikwe ngwian ganainba keta jätā mda, tā nete ne, niebare kwe ie.

¹⁷ Angwane jrei ye kākwe niebare ie: Ma sribikā kuin krübāte. Jändrän braibe, btā mata sribire kuin era metre, aisete ti raba tödeke mabti tā gare tie, aisete juta keta jätā, bti tikwe ma mikadi gobrane tikrä, niebare kwe ie.

¹⁸ Ye bti ni klaborē mda jatani, kākwe niebare jreiyē: Ti dānkien, ngwian makwebti tikwe ngwian ganainba ketarike mda, tā nete ne, niebare kwe ie.

¹⁹ Angwane jrei ye kākwe niebare krörö mda ie arato: Kore ne ngwane, tikwe ma mikadi gobrane juta ketarikebti tikrä, niebare kwe ie.

²⁰ Ye bti ni klaborē mdara jire nūkanī jrei kānti, kākwe niebare ie: Ti dānkien, tikwe ngwian makwe ūkaba dān kukwāntē jirekābe abko tā nete ne. Tikwe sribibare ñakare bti,

²¹ ñobtä ñan angwane mata mokrere krübāte jändrän makwebti amne ma kābāre, aisete ma ngwian bien ñakare, kānti mata ngwian ūkekrö ni mdakān. Erere arato, ni mda mda tā nura metekā amne mata ngwā ötō kabre kån kā ūtiäre, akwa ma abko nura metekā ñakare jakrä. Ye mdenbtā ma jürā rababa krübāte tibtä, kākwe ngwian ūkaba jirekābe, niebare kwe jreiyē.

²² Abtä jreikwe niebare mda ie: Ma sribikā kāmē. Ti ño ño makwe nini tie, ye kwrere tikwe kukwe ūkadite makrä. Tita mokrere krübāte jändrän tikwebti amne ti kābāre, aisete ti ngwian bien ñakare, kānti tita ngwian ūkekrö ni mdakān. Erere arato, ni mda mda tā nura metekā amne tita ngwā ötō kabre kån kā ūtiäre, akwa ti abko nura metekā ñakare jakrä, ye gare kuin mae.

²³ ¿Se ñobtä abko ma ñan jananbare ngwian tikwe mike bankote abko ti rükadreta angwane, ngwian mda biandre chi btā tie? niebare jreikwe sribikā ngwarbeye.

²⁴ Bti ni mda mda nämane yete, ie jreikwe niebare: Ngwianta ni nokokwe, se denkä kån, bti sribikā kuin kākwe ngwian ganaibare keta jätā mda, seye bien munkwe, niebare kwe.

²⁵ Abtä ni mda mda ye kākwe niebare jreiyē: Nun dānkien, ni noko nena ngwian bkāne kabre krübāte, ¿se ñobtä abko mda biandre ie? niebare kwetre.

²⁶ Abtä jreikwe niebare mda ietre: Ti tō kukwe era erere niei krörö munye: Nire nire jändrän bkāne kabre abko ie mda biandi bāri; akwa nire nire kwe jändrän ñakare abko kån jändrän chi kwe diandikā jökrā kån.

²⁷ Mdakäre abko, nire nire namani ti rüere, ñan tō namani ti tuai jreire ye abko mun jata ngwena nūke ti kānti nete, bti munkwe kāmika ti ngwärecri nete. Abko kore se, niebare jreikwe abko kukwe nakaninkā kore se. Ne ngörā, niebare Jesukwe.

Jesu nikani nebe Jerusalén

(Mateo 21.1-11; Marcos 11.1-11; Juan 12.12-19)

²⁸ Jesukwe blitabare ūñān kore, bti nikani janknu mda Jerusalén kukwäre.

²⁹ Nikanina mate ja ken juta Betfagébe amne juta Betaniabe, Ngitio Olibo kānti angwane, nitre ja tōitikaka ben kärābare nibu kwe,

³⁰ bti niebare kwe ietre:

Juta tuen kånime ni ngware ta. Se kānti mun nān. Mun raba yete angwane, buro ngābāli nākwiā ngāmi kwan mākāninte munye, ye tikate munkwe, bti mun jata ngwena tie nete.

³¹ Akwa ¿Ñobtä munta tikete? nie munye angwane, munkwe nie krörö ietre: Ni Dānkien tō nibi ie, aisete nun bike niken ngwena, munkwe nie kore, niebare Jesukwe ietre.

³² Erere bkānā, nitre ja tōitikaka Jesube nikani, nikani nebe angwane, Jesukwe kukwe niebare ño ño ietre, ye erere kwani ietre.

³³ Nāmane buro tikete angwane, buro bkānkātre jatani, kākwe niebare ietre:

¿Ñobtä munta buro ye tikete nunkān ye? niebare kwetre.

³⁴ Angwane niebare kwetre buro bkānkāye:

Nun Dānkien tō nibi ie, kākwe kārāniri, aise te nunta tikete, niebare kwetre.

³⁵ Yebti nikanintre buro ngwena, nikani nebe Jesu kānti angwane, dān jakwe mikani ötati buro ngābāli ye tröbti kwetre ja tākräre Jesuye, bti Jesu nakwani buro yebti.

³⁶ Bti Jesu nikani janknu mentokwäre angwane, ni jökrā namani dān jakwe metete ji ngrabare temen Jesu kakäre ngābti jrei kwrere.

³⁷ Angwane Jesu nikanina Ngitio Olibobti kāin, jatanina niken motokwäre amne, nitre nāmāne nāin ben, btā kā namani nuäre, kā nikani ngrente kriki be Ngöbö kākikarekā, ñobtä ñan angwane sribi kri ñan tuabare nuenbare Jesukwe tuani kwetre yebtä,

³⁸ kā namani niere:

Jrei ne kite ni Dānkien Ngöbö kābti.

Ma ye aibe raba mikani ütiäte.

¡Kā raba jāme kā kāinbti amne, nunta Ngöbö kā kāinbti kākikarekā!

Salmos 118.26

namanintre niere.

³⁹ Kukwe yebtä, nitre bariseo nāmāne ruäre ni mda mda ngätäite yete kākwe niebare Jesuye:

Dirikä, nitre nānkā mabe se kākwe kada ketadre niere ietre, niebare kwetre.

⁴⁰ Akwa Jesu kākwe niebare nitre bariseoye:

Nitre noko rabadre kwekbe angwane, ja oto kabre nere temen kākwe ngradrete Ngöbö kākikatakäre, aise te ngwarbe tikwe kada ketamna ietre abko ti tō nibi niei metre munye, niebare kwe ietre.

⁴¹ Yebti Jesu namanina Jerusalén ken, okwā namani juta Jerusalénbtā angwane, müaibare kwe,

⁴² kākwe niebare:

Nirekwe kā jāme biandre mun nūnanka Jerusalénte yeye, ye rükadre gare mtare munye nāre, akwa tā rükaninte mun okwā bäre, aise te tuen ñakare munye.

⁴³ Batira jire kā jatadi kāme mun rüere angwane, mun rüekwe ki mikadi mun bäre temen amne, mun rüe rabadi jökrā mun bäre temen, kākwe rüdi mun rüere angwane,

⁴⁴ mun juandi ngwarbe jökrā kwetre amne, nitre nūnanka nete noko kāmikadi kwati kwetre. Erere arato, ja mikani jure amne kire noko dikandite jökrā kwetre arato, ñobtä ñan angwane Ngöbö nükani basare munye, mun diantarikäre akwa, ñan nükani gare munye, aise te rakadikā kore mun nūnanka Jerusalénte yebtä, niebare Jesukwe.

Jesukwe nitre jändrän rürümoinkā juanintari

(Mateo 21.12-17; Marcos 11.15-19; Juan 2.13-22)

⁴⁵ Jesu nükani Jerusalén, bti nikani ju blitakrä Ngöböbe ye bäre angwane, nitre nāmāne jändrän rürümoine yete abko Jesu nikani juentari jökrā nekwäre, sekwäre mentokwäre,

⁴⁶ kākwe mätrābare krörö btätre:

Ngöbö Kukwei tā tikani krörö:

Ju tikwe ne abra tā blitakrä tibe,

Isaiás 56.7

nieta Ngöbö Kukweibtā, akwa mun abko tā ju blitakrä Ngöböbe ne mike nitre gokā jue kwrere. Abko kore se, niebare Jesukwe ietre.

⁴⁷ Yebti ju blitakrä Ngöböbe bäre Jesu namani dirire käre köbö kwatirekwatire. Angwane nitre blitaka Ngöböbe ni mda mda diäre dānkien amne Kukwe Biani Ngöböke Moiséye dirikātre, erere arato nitre unbre ji dokwäte nitre israelita ngätäite abko nāmāne ji kānene jae Jesu kāmikakäre.

⁴⁸ Akwa ji ñan namani kwen ietre Jesu kāmikakrä, ñobtä ñan angwane Jesu namani blite, ye abko ni jökrā nāmāne biare kukwe nuen, aise te Jesu kāmikadre ño kwetre abko kái ñan namani kwen ietre.

20

Nire diebti Jesu nāmāne sribire abko ngwianintari ie

(Mateo 21.23-27; Marcos 11.27-33)

¹ Bati ju blitakrä Ngöböbe ye bäre Jesu nāmāne dirire ni kwatiye amne nāmāne kukwe kuin Ngöböke mike gare angwane, nitre blitaka Ngöböbe ni mda mda diäre dānkientre amne Kukwe Biani Ngöböke Moiséye dirikātre nikani nitre unbre ji dokwätebe,

² kākwe niebare Jesuye:

¿Nirekwe ma mikani sribi nuene kore amne nire diebti mata kukwe nuene kore nete? niebare kwetre Jesuye.

³⁻⁴ Abtä Jesukwe niebare ietre:

Ti bike kukwe ngwentari kwati arato munye. ¿Nirekwe Juan Bautista juani ni ngökö ñöte? ¿Ngöbökwé juani ya o ni ká nebtákwe mikani sribire ya? niebare kwe ietre.

⁵ Yebtä nikaninta blite jabe kwárikwári, ká namani niere krörö:

Ngöbökwé juani, níkwé niedre ie angwane, niarakwe niedre krörö mda: Ngöbökwé juani munta niere, ¿se ñöbtá abko munkwe ñan kukwei mikani era jae? niedre kwe nie.

⁶ Akwa ni ká nebtákwe mikani, ni ñan rabadre niere jire chi ie, ñöbtá ñan angwane Juan abko ni Ngöbö kukwei nieká era ni jókrá kráke, aiseté ni mda mdakwe ni kámikadre jábti ñákábtá kore rüere, namanintre niere jae kwárikwári.

⁷ Abtä niebare krörö kwetre Jesuye:

Nirekwe Juan juani, ye gare ñakare nunye, niebare kwetre.

⁸ Angwane Jesukwe niebare mda ietre:

Kore ne ngwane, nirekwe ja di biani tie sribi ne nuenkáre abko tikwe ñan niedre munye arato, niebare kwe ietre.

Nitre ji dokwäte, btá Jesukwe kukwe bá mikani

(Mateo 21.33-46; Marcos 12.1-12)

⁹ Yebti nitre námáne yete, ie Jesu níkwé kukwe bá mike Kukwe Biani Ngöbökwé Moiséye dirikátrebtá amne nitre blitaka Ngöböbe ni mda mda diäre dánkientrebtá, kákwe niebare krörö:

Bati ni námáne iti kákwe uba nurai nökwani, bti biani kwe ni mda mdaye sribikrá. Ká biani sribikrá kwe abko útiäre uba döi biandreta ruäre ie. Yebti mikani raire ká mdabti.

¹⁰ Abti uba ngwá ótadre abko kái núkwani angwane, sribiká kákwe uba biandreta ruäre ká bkánkáye, ye abko ká bkánká kákwe sribiká kwe juani iti tuenta jakrá. Akwa sribikátre ubabtá ye kákwe sribiká ye metani ja ñáte kwárákwára se kwrere, bti juanintarita kise tókare kwetre.

¹¹ Yebti ká bkánká kákwe sribiká mdara jire juani uba tuenta ruäre jakrá, akwa sribikátre ubabtá kákwe sribiká ye metani ja ñáte arato, kákwe ñákábare diän diän ie, bti juanintarita kise tókare kwetre arato.

¹² Yebti uba bkánká kákwe sribiká mdara jire juani uba tuenta, akwa sribiká mda mda ye kákwe metani arato, bti kitaninká kwetre uba grá báre mento.

¹³ Yebti ni uba bkánká kákwe niebare jae: ¿Mtare tikwe dre nuendre mda? namani nútüre. Te batibe tói ngítianinká, kákwe niebare: Ti odei tare kri tikwe abko ti bike juen. Nane niara mikadre útiäte jae sribikátrekwe, raba ruen tie, aiseté ti bike niara juen, niebare kwe jae.

¹⁴ Ye erere bkáná juani kwe. Akwa ká bkánká ye odei níkwani tuen sribikátre ubabtá yeye angwane, niebare kwetre jae kwárikwári: Ni se abko rabadi jándrán rúnkwe bkáne jókrá, aiseté ari kámike amne ni rabadi ká ne bkáne jókrá, niebare kwetre.

¹⁵ Ye erere niaratre níkwani ká bkánká odei ye ngwena uba grá báre mento, bti kámikani kwetre se kwrere abko nakaninká kore. Ne ngörá, niebare Jesukwe.

Bti Jesukwe niebare ni jókráye:

¿Ne ngwane, uba bkánká kákwe dre nuendre sribiká yebtä raba ruen munye?

¹⁶ Niara rikadre, kákwe sribikátre ye kámikadre jókrá, bti uba grá ye biandre ni mda mdaye kwe sribikrá. Abko kore se, niebare Jesukwe.

Ye jarabare ni jókráye angwane, niebare kwetre:

¡Kukwe ñan rakadreká jire kore! niebare kwetre.

¹⁷ Akwa Jesu kákwe mikani ñáräre, bti niebare kwe ietre:

Kukwe tá tikani Ngöbö Kukweißtá ne káta dre niere abko niere tie munkwe:

Já útiäte kri ju mikakrá metre abko nitre ju mikaka kákwe kitaninká, akwa já ye abko ni Dánkien kákwe mikani bári útiäte ju mikakrá metre. *Salmos 118.22*

nieta Ngöbö Kukweißtá.

¹⁸ Angwane ni útiäte kri já kwrere tikwe nini, ye abko btá nire nire ritadrete amne rikadre temen já yebti angwane, já ye kákwe ni ye ótadibtá kiakia jókrá ngrabare. Erere arato, nire nire btá já ye rikwidadreká angwane, gütadiká mnüne jókrá já ye táni arato. Abko kore se, niebare Jesukwe ietre.

¹⁹ Yebtä abko, Kukwe Biani Ngöbökwé Moiséye dirikátre amne nitre blitaka Ngöböbe ni mda mda diäre dánkiente, rüere Jesukwe kukwe bá mikani kore gani kwetre jabtä. Abtä jótrö ngwarbe tö namani Jesu kain ngite ye náire, akwa ni námáne kwati Jesu kukwei nuen, ye abko júrá namani btátre, aiseté namani kwekbe.

Ja útiä biandre gobranye ya, ñakare ya

(Mateo 22.15-22; Marcos 12.13-17)

²⁰ Angwane ni juani ruäre kwetre Jesu ngibiaretari mda. Niaratre abko namani bike moto jáme, akwa Jesu ngwiandre kukwe nainte kwetre, abtä kitadre ngise kwetre guber-nador romanobo ngwárekri, abkokáre namani bike moto jáme.

²¹ Namani Jesu kanti angwane, niebare kwetre ie:

Diriká, mata kukwe niere amne mata dirire, ye abko era metre gare kuin nunye amne, ma ñan tá dirire ni ruäre aibe moto mikakrá nuäre, akwa ji Ngöbökwé abko dirita era metre makwe, ye garera nie.

²² Ye aiseite nun tó kukwe ngwiantari mae abko krörö: ¿Emperador romanobo César abko ie nunkwe ja ütiá biandre ye abko dbe ya, ñakare ya niere nunye? niebare kwetre Jesuye.

²³ Angwane tó namani Jesu ngökai, ye gani Jesukwe btátre, kákwe niebare ietre:

²⁴ Ngwian ye mike tuadre kunti tie munkwe, niebare Jesukwe ietre.

Erere biani tuadre kwetre Jesuye angwane, Jesukwe niebare mda ietre:

¿Nire bá amne nire kái tá tikani ngwian nebtá? niebare kwe.

Angwane niebare kwetre ie:

Emperador César bá amne kái tá btá, niebare kwetre mda Jesuye.

²⁵ Abtá Jesukwe niebare mda ietre:

Jändrän emperadorekwe erere munkwe bian emperadoreye amne jändrän Ngöbökrá erere munkwe bian Ngöböye. Abko kore se, niebare kwe ietre.

²⁶ Jesukwe kukwe kani ngäbti kuin ni jökrá okwäbti, yebtá abko tói ñan namani krütare amne, kukwe kwani ñakare ietre Jesu kitakrá ngise, aiseite namanintre kwekbe jökrá.

Ni krütani rükadreta nire ya abko ngwianintari Jesuye

(Mateo 22.23-33; Marcos 12.18-27)

²⁷ Yebti nitre saduseo nikani ruäre ja tuakäre Jesube. Nitre saduseo ye abko ni krütanikrütani mikadreta nire Ngöbökwé abko ñan nämane mike era, aiseite jatani kukwe ngwentari Jesuye, kákwe nieba ie:

²⁸ Diriká, Ngöbökwé tikamna krörö täräbtá nunkrá Moiséye: Ni iti tädre gure akwa, ngäbäkre ñakare kwetre amne ni ye krütadre angwane, merire rabadre kaibe. Meri ye abko yäräkwe diandre jae mda. Yebti ngäbäkre rabadre kwetre angwane, ngäbäkre ye abko rabadre niara etba krütani ngobo kwrere abko tikani täräbtá Moisékwe nunkrá.

²⁹ Ne aiseite nun tó nibi kukwe ne ngwiantari krörö mae: Bati nitre ja etbarebe nämane ni kükü. Nitre ye etba mubai kákwe ja mikani gure, akwa ngäbäkre ngämi nebe kwetre angwane, ni ye krütani.

³⁰ Merire namani ie abko namani yärä mda yebe, akwa nin ngämi ngäbäkrei ngibiare angwane, brare krütani kán arato. Meri ye namaninta kaibe bobukäre.

³¹ Namani yärä mdara jire ben, akwa nin ngämi ngäbäkrei ngibiare angwane, krütani kán arato. Ye kwrere nikani nakenká janknu ja tärítari. Abti nitre ni kükü ye krütani jökrá meri ye kisete, akwa nin ngäbäkrei ngibiabare jire iti kwe.

³² Abti mrá meri ye krütani abko kukwe nakaninká kore nieta.

³³ Akwa ni krütani rükadreta nire mata niere, aiseite ni brare ni kükü, ben meri ye namani jökrá, abti niaratre ni kükü ye rükadreta nire jökrá angwane, meri ye rabadi nire nän mukore abko niere nunye, niebare kwetre Jesuye.

³⁴ Angwane Jesukwe niebare mda ietre:

Ká ne ngwane, ni brare amne ni merire káta ja mike gure,

³⁵ akwa ká mrá, ni rükadreta nire angwane, nire nire tuen ütiáte Ngöböye nünakäre kärekáre jabe abko ni merire, brare kákwe ñan ja mikadre gure.

³⁶ Ni ñan krütadre mda, akwa ni rabadre angeletré Ngöbökwé kwrere. Erere arato, ni rükadita nire angwane, ni rabadi Ngöbö odeire jökrá, aiseite ni rabadi ja etbare amne ja ngwaire, aiseite ñan ja mikadre gure.

³⁷ Akwa kri chi namani jutra ngitieká, ye kanti ni rükadreta nire era metre abko Moisékwe bá mikani, kákwe niebare: Ni Dänkien Ngöbö abko Ngöbö Abrahamkwe, Isaakwe amne Jacobkwe, niebare kwe.

³⁸ Ye abko, Abraham, Isaac amne Jacob krütanina abti Ngöbökwé niebare kore Moiséye. Ngöbö abko ñan ni ngwäkäre Ngöböi akwa Ngöbö abko ni nire Ngöböi gare nie. Ye aiseite Abraham, Isaac amne Jacob tá nüne janknu Ngöbö ngwärekre abko gare nie. Abko kore se, niebare Jesukwe.

³⁹ Ye ngwane, Kukwe Biani Ngöbökwé Moiséye dirikátre nämane yete, btá kái namani nuäre, ñobtä ñan angwane ni rükadreta nire abko era kräke. Yebtá abko niebare kwetre:

Diriká, makwe blitaniri kuin krübäte, niebare kwetre Jesuye.

⁴⁰ Angwane ká jürá namani ni jökräbtá, kákwe kukwe ngwianintari ñakare mda Jesuye ja gakäre ben.

¿Nirekri Ni Dianinká Ngöbökwé däredre?

(Mateo 22.41-46; Marcos 12.35-37)

⁴¹ Yebti Jesukwe kukwe ngwianintari krörö mda nitre Saduseo yeye:

¿Ñobtä Ni Dianinká Ngöbökwé abko däredre jrei David tukwekri nieta munkwe

⁴² amarebti David ara jire kākwe kukwe tikani krörö tärä Salmobtä?:

Ti Dänkien Ngöbö kākwe nieba ti Dänkienye:

Kä bäri ütiäte kri ti küde ruenkri, ne kánti jakwe täke nete.

⁴³ Ye kánti ma raba abti tikwe ma rüe mikadi jökrä ma ngoto täni,

Salmos 110.1

niebare Davikwe Ni Dianinkä Ngöbökwē yebtä.

⁴⁴ David ara jire kākwe ja Dänkien niebare Ni Dianinkä Ngöbökwēbtä, ¿se ñobtä abko Ni Dianinkä Ngöbökwē abko jatadre Davikri nieta munkwe se? Tita ngwentari kore, ñobtä ñan angwane nita Dänkien niere ñakare jire ni mräkä bäri mrä nigrä yeye, niebare Jesukwe.

*Jesukwe ni mikani mokre Kukwe Biani Ngöbökwē Moiséye dirikätre ngäniene
(Mateo 23.1-36; Marcos 12.38-40; Lucas 11.37-54)*

⁴⁵ Ni jökrä nämāne Jesu kukwei nuen angwane, batibe Jesukwe niebare mda nitre ja töitakaka benye:

⁴⁶ Kukwe Biani Ngöbökwē Moiséye dirikätre, ye ngäniene munkwe ja ngibia kuin, ñobtä ñan angwane niaratre tä dän nga ütiäte kri kite jabtä, bti ni jökrä kākwe köbö ngwiandretari käne ietre kä jändrän rürümoinkrä ye kántita temen, ie töta nebe. Erere arato, ja täkrä ni ütiäte ütiäte kräke sinagogate, kánti töta nebe rabai täkänintbe amne ja täkrä ni ütiäte ütiäte kräke, kánti tätre nebe täkänintbe. Erere arato, niaratre nübaita bietabtä angwane, ja täkrä ni ütiäte ütiäte kräke, kánti tö täkäi temen.

⁴⁷ Erere arato, meri kän brare krütani abko kän tätre ju denkä abti tätre bike kuin, käta blite raire Ngöböbe, akwa yebtä Ngöbökwē mikadi ja tare nike krübäte, asete munkwe ja ngibia kuin Kukwe Biani Ngöbökwē Moiséye dirikätre ngäniene. Abko kore se, niebare Jesukwe ietre.

21

*Meri bobre kākwe sentabo ngörä kubu biani Ngöbökrä
(Marcos 12.41-44)*

¹ Ye ngwane abko, nitre ngwian bkäne krikri namani nūke ngwian kite kajate Ngöbökrä ju blitakrä Ngöböbe bäre Jesu okwäbti.

² Angwane meri bobre kän brare krütani abko jatani, kākwe ngwian sentabo kwrere kitani kubube arato kajate Jesu okwäbti.

³ Abtä Jesukwe niebare:

Ti bike kukwe era erere niere munye abko krörö: Meri bobre kän brare krütani se kākwe ngwian bini bäri kabre ni ngwian bkäne krikri se ngwä,

⁴ ñobtä ñan angwane niaratre käta ngwian namaninte ie aibe bien, akwa meri bobre ye abko kākwe ngwian ngörä nünankrä kwe erere bini jökrä, asete niarakwe ngwian bini bäri kabre, niebare Jesukwe.

*Dre rakadikä kä mrä känenkri
(Mateo 24.1-28; Marcos 13.1-23)*

⁵ Angwane ju blitakrä Ngöböbe mikakrä bä nuäre amne, ni ruäre kākwe jändrän tuäretuäre biani Ngöböye, bti ju mikani tuäre, yebtä abko ni ruäre nämāne blite mda. Abtä Jesukwe niebare ietre:

⁶ Köböitira jire ju tuata munkwe se juandi ngwarbe jire jökrä, asete jä ketani jabtı jabtı se juandi jökrä temen, niebare Jesukwe.

⁷ Abtä nitre nämāne yete kākwe niebare mda Jesuye:

Dirikä, ¿ju blitakrä Ngöböbe juandi ngwarbe nini makwe, ye abko rakadikä ñongwane nun tö gai? Arato kukwe ye kebera nakenkä abko bä mikadi ño nunye abko makwe niedre nunye, ie nun tö nibi, niebare kwetre ie.

⁸ Abtä Jesukwe niebare mda ietre:

Bäri käne abko, nitre ni ngökaka ye ngäniene munkwe ja ngibia kuin, ñobtä ñan angwane ni jatadı kwati ti käbti kākwe niedi krörö: Ti abko Ni Dianinkä Ngöbökwē ara tä nete amne, kä mrä nükera ja ken, niedi kwetre. Akwa niaratre ye abko ni ngökaka, asete mun ñan rika niaratre jiebtı.

⁹ Erere arato, munkwe kukwe krörö gadi: Nitre tädi rüre jabe kwärikwäri ga munkwe angwane, munkwe ñan kä jürä ngwian jabtä, ñobtä ñan angwane kukwe ye abko rakadikä käne kore abko erere rabadı nakenkä, akwa ye ngwane kä mrä ñan jatadı jötrö, niebare Jesukwe.

¹⁰ Yebti Jesu nikani blite janknu, kākwe niebare:

Kä mrä ngämi nūke juta kwatirekwatire rabadı rüre jabe kwärikwäri amne nitre nünanka kä ketareketare te rabadı rüre jabe kwärikwäri amne,

¹¹ dobo rabadi nakaenkä kri krübäte, mrö nika rabadi kri krübäte amne bren nika rabadi krübäte kä ngrabare temen amne Ngöbökwe jändrän krikri krübäte mikadi tuadre käinta, abtä kä jürä rabadi kri ni kwatibtä.

¹² Akwa kukwe ye ngämi nakenkä, känenkri ni kwati jatadi mun rüere. Sinagoga nitre israelitakwe käntikánti mun jänän kritobo ngwärekrei kwetretre, bti mun kitadi ngite kä teri kwetretre. Erere arato, jrei amne gobran, ie mun kitadi ngise tödekabtä tibti.

¹³ Akwa ye ngwane, tikwe dre dre nuenbare abko kräke kä rabadi kuin munye blitakäre tibtä nitre ye ngwärekrei.

¹⁴ Mun jä ngämi niken kritobo ngwärekrei, känenkri munkwe ja kwetadi ño ja dokwäre, yebtä munkwe ñan töbika dikaro,

¹⁵ ñobtä ñan angwane tikwe ja kukwei töbtä kri mikadi gare munye blitakäre ja dokwäre, ye käkwe mun rüe kukwe ötadi jökrä angwane, rabaditre kwekbe jökrä mun käne.

¹⁶ Akwa ye ngwane abko, mun rün, mun meye, mun etba, mun ngwai, mun mräkä mda mda amne mun kukwe muko abko rikwitadi mun rüere, ye käkwe mun kämikadi ruäre.

¹⁷ Angwane ni jökrä mätä rabadi kri munbtä tödekabtä tibti.

¹⁸ Akwa mun ñan riadrete, abkokäre Ngöbökwe mun ngibiadi kuin jökrä,

¹⁹ aisete munkwe nünanka dite jabtä angwane, mun rabadi dianintari, niebare Jesukwe.

²⁰ Yebti Jesukwe niebare krörö mda:

Nitre rükä raba tuen jökrä juta Jerusalén se bäre temen munye angwane abko, juta se juan kebera ngwarbe, ye rabara gare munye.

²¹ Ye ngwane mun tädre Judeate ye abko gitia mintokwäre amne nire nire tädre juta Jerusalénte abko gitia juta bäre mento amne, nire nire tädre Jerusalén bäre abko ñan rika ngitieta juta Jerusalénte,

²² ñobtä ñan angwane kukwe tä tikani Ngöbö Kukweibtä, ye rabadre bare jökrä, abkokäre Ngöbökwe nitre nünanka kä nebtä mikadi ja ngie nuen kri köbö ye näire.

²³ Akwa meri doboko doboko amne meri kwe ngäbäre kiakia kianbtä, ye abko bobre jakän, ñobtä ñan angwane niaratre ñan raba ngitie jötrö, iye abko ñan bobre jakän ya! Kä ye ngwane abko ja tare nika rabadi kri krübäte kä nebtä amne nitre israelita käkwe ja ngie nuadi kri krübäte.

²⁴ Ne aisete ni ruäre kämikadi ngitrabti amne ni ruäre abko jänän ngite juta mda mdate angwane, nitre ñakare israelitare, kräke Ngöbökwe köbö kitani nuäi, ye näre juta Jerusalén mikadi ja ngoto täni kwetretre.

Jesukristo jatadita

(Mateo 24.29-35,42-44; Marcos 13.24-37)

²⁵ Kä mrä angwane, Ngöbökwe sribi kri ñan tuabare nuendi abko bä mikadi kwe ñänänbtä, söbtä amne mukebtä. Angwane ni kä nebtä töi rabadi ngwarbe kwäräkwarä amne mren rabadi romon krübäte, aisete ngö rabadi nebe kri krübäte. Yebtä abko, ni jökrä rabadi töbike kri.

²⁶ Erere arato, ni kwati rabadi nekwetekä krübäte amne kä rabadi nötöte bti, ñobtä ñan angwane kukwe rakadikä ño kä nebtä abko rabaditre töbike, ñobtä ñan angwane jändrän jökrä käinta se rabadi grüekä ye abko jürä rabadi kri ni kwatibtä.

²⁷ Angwane ti Ni Kä Nebtä Ngobo abko jatadi tuen ja di kri bä nuärebtä mütabti kä käinbti sete abko ni jökrä käkwe tuadi.

²⁸ Ne aisete, kukwe nini tikwe ye erere rabara nakenkä mun okwäbti angwane, munkwe kä ngwian nuäre jabtä, ñobtä ñan angwane Ngöbö kebera nüke mun tiketeta, aisete munkwe kä ngwian nuäre jabtä, niebare Jesukwe.

²⁹ Ye btäräbe, kukwe yebtä Jesukwe kukwe bä mikani krörö mda, käkwe niebare:

Higokrie amne kri mda mda, ye mika ñäräre munkwe, btä munkwe töbika.

³⁰ Kri ye tä mutu ngitiekä angwane, kä töre tarä kite nüke ja ken munta gain,

³¹ ye kwrere arato kukwe nini tikwe ye jata nakenkä jökrä mun okwäbti angwane, Ngöbö kebera nüke gobrane ye rabara gare munye.

³² Ti bike kukwe era erere niere munye abko krörö: Nitre nünanka kä nebtä ngämi krüte jökrä, ye känenkri kukwe nini tikwe ye erere rakadikä jökrä.

³³ Mdakäre abko, kä käinta se btä kä temen ne abko Ngöbökwe gadikä jökrä, angwane rikadi ta, akwa ti kukwei abko rabadi kärekäre, niebare Jesukwe.

³⁴ Yebti Jesukwe niebare mda:

Munkwe ja ngibia au, munkwe ñan ja töi mika jändrän diän diän nuenbtä amne, munkwe ñan dröba nika amne munkwe ñan töbika jändrän kä nebtä ye aibehtä, ñobtä ñan angwane munkwe ñan ja ngibiadre au ne ngwane, mun kwandre jäme köbö ye näire aisete.

³⁵ Amne jändrän ngwarbe tä niken jäme, bti batibe tä neme kö okwäte, ye kwrere mun ñan tädre jäme, abkokäre munkwe mokre jabti, ñobtä ñan angwane nire nire kä nebtä tädi jäme, tädi ti ngbiare ngäbti ñakare angwane, ti jatadita.

³⁶ Akwa käre käre mun abko kärke ja mika biare ti ngbiare ngäbti amne munkwe blita Ngöböbe jakrä angwane, kukwe jatadi taretare yebtä munkwe kwäräbedi jökrä amne, mun rabadi biare rabakäre ti Ni Kä Nebtä Ngobo ne ngwäre kri. Abko kore se, niebare Jesukwe.

³⁷⁻³⁸ Kä ye ngwane abko, käre köbö kwatirekwatire Jesu namani dirire ju blitakrä Ngöböbe ye bäre amne, ni kwati namani nuke dekä niara kukwei nuen, akwa deo abko Jesu nämame niken kibien Ngitio Olibo kánti.

22

Jesu rüe tö namani kain ngite tiebe

(Mateo 26.1-5,14-16; Marcos 14.1-2,10-11; Juan 11.45-53)

¹ Kä ye ngwane, bieta Te Lebadura Ñakare Bante kweta nämame Ngöbö mikakäre ütiäte. Bieta ye arabe kädian nämame Pascua* abko erere köbö jatanina nüketa ja ken.

² Angwane nitre blitaka Ngöböbe ni mda mda diäre dänkientre amne Kukwe Biani Ngöbökwé Moiséye dirikätre abko kärke Jesu müre ketadre ño abko namanintre ngibiare-tari kisere, akwa ni nämame kwati nekete Jesukri abko jürä namani btäre.

³ Angwane nitre ja töitakaka Jesube ni jätäbti nibu, ye ngätäite ni iti kädian nämame Judas Iscariote abko btä Satana nikani.

⁴ Ne aisete nikani nitre blitaka Ngöböbe ni mda mda diäre dänkientre kánti amne nitre ju blitakrä Ngöböbe guardia dänkientre kánti angwane, Jesu kitadre ngise kwe ietre kämikadre abko nikani kädriere bentre.

⁵ Angwane kä namani nuäre kri btäre, kärke ngwian bian braibare Judaye,

⁶ ye abko nükäninbti Judaye angwane, Judakwe kitadre ngise ño rüeye ni mda mda okwä bäre abko Judas namani ngibiare kisere jae mda.

Jesukwe mröbare mrä nitre ja töitakaka benbe

(Mateo 26.17-29; Marcos 14.12-25; Juan 13.21-30; 1 Corintios 11.23-26)

⁷ Nebti bieta Te Lebadura Ñakare Bante Kweta nämame ye nükani mda. Köbö ye näire kordero kämika nämame kwetadre Pascua köböite abko köböi nükäninta.

⁸ Abtä Jesukwe Pedro amne Juan käräbare, bti niebare kwe ietre:

Mun nän mrö sribere kwetadre Pascuate, niebare kwe ietre.

⁹ Niaratre kärke niebare mda Jesuye:

¿Nunkwe mrö sribedre mdente, ie ma tö nibi? niebare kwetere ie.

¹⁰ Angwane Jesukwe niebare mda ietre:

Mun rika nebe jutate. Ye kánti ni brare tädi iti ño ngwena kantrate abko rükadi ngätäi munbe ji ngrabare. Ni ye rika mdente gwä, kánti mun rika.

¹¹ Mun rika nebe gwi angwane, munkwe nie krörö ju bkänkäye: Dirikärke mrö Pascua köböikrä kwetadi nitre ja töitakaka benbe abkokrä käta ükaninte mdente, ngwiantarimna kwe, munkwe nie kore ie.

¹² Angwane ju mikani bobu jabti käin, te kä kri tädira ükaninte biare mrökrä, kánti mun jänäin kwe. Ye kánti munkwe mrö sribe biare nunkrä amne jändrän jökrä ukate biare. Abko kore se, niebare kwe ietre.

¹³ Ye erere bkänä nikanintre angwane, Jesukwe kukwe niebare ño ño ietre, erere kwani ietre, kánti mrö sribebare kwetere kwetadre Pascuate.

¹⁴ Ye erere, mrö käi nükani angwane, Jesu nikani, namani tükänintbe mesabtä nitre niara kukwei ngwiankabe angwane,

¹⁵ niebare kwe ietre:

Ti ngämi krüte, känenkri bäri ti tö namani mrö Pascuakrä ne kwetai munbe gwaire abko erere käi nura mtare.

¹⁶ Ti tö namani mrö Pascuakrä ne kwetai kore munbe, ñobtä ñan angwane Ngöbö ngämi gobrane ni ngätäite, känenkri tikwe ñan mrö Pascuakrä ne kwetadreta jire mda, akwa batibe kukwe bä mikata mrö Pascuakrä nebi rabadi bare angwane, tikwe kwetadita, niebare Jesukwe nitre ja töitakaka benye.

¹⁷ Bti uba döi nämame basote diani kisete kwe, kuin niebare btä kwe Ngöböye, bti niebare kwe nitre ja töitakaka benye:

* **22:1 Pascua.** Nitre israelita kärke Pascua köböi mikani ütiäte, ñobtä ñan angwane kira nitre israelita nämame ngite kä Egiptote angwane, Ngöbökwé tikaninte Pascua köböibtä. Pascua abko käta "niken bäre ta" niere. Köbö yebtä angele ni kämikaka nikani nitre israelita bäre ta amne kämikani ñakare kwe, aisete Ngöbökwé köbö Pascua mikamna ütiäte nitre israelitaye.

Uba dōi ne ñaen ja tãritãri munkwe,

¹⁸ ñobtä ñan angwane Ngöbö ngãmi gobrane ni ngätãite, ye kãnenkri tikwe ñan uba dōi ñadreta jire mda abko ti tō nibi niei munye, niebare Jesukwe ietre.

¹⁹ Yebti Jesukwe ban diani kunti kisete, kuin niebare btã kwe Ngöböye, bti ötaninbtã kwe, bti biani kwe nitre ja tōitkaka benye, kãkwe niebare ietre:

Ban ne abko ti ngätã ara. Ne mden abko tita bien müre ketadre mun krãke. Kãre munkwe ban ne kweta kore ti ngwiankrã tōre jae, niebare Jesukwe.

²⁰ Ye kwrere arato, uba dōi nãmane basote abko Jesukwe diani kisete, kãkwe niebare nitre ja tōitkaka benye:

Uba dōi ne abko ti dãrie tikwe ara. Ti krütadi angwane, ti dãrie rimiadite munkrã, köböire Ngöbökwẽ kukwe ükaditeta btin munbe, ye mden abko uba dōi ne tã bã mike.

²¹ Akwa ni ti kitaka ngise ti rüeye abko tã mröre ketetibe tibe mesabtã nete.

²² Ne abko, ji ükaninte Ngöbökwẽ ti Ni Kã Nebtä Ngobo ne kãne ye erere tikwe mikadre tãte jökrã, jakwa ni ti kitaka ngise abko ñan bobre jakãn ya! niebare Jesukwe.

²³ Angwane nitre ja tōitkaka Jesube namani niere jae kwãrikwãri:

¿Nirekwe niara kitadi ngise rüeye ruen? namanintre niere.

¿Nire bãri ütiãte?

²⁴ Ye ngwane abko, nitre ja tōitkaka Jesube mden bãri ütiãte abko btã nikani ja kwete.

²⁵ Abtä Jesukwe niebare ietre:

Nitre Ngöbö mikaka ngwarbe jae ye mikata jreire abko tã nebe ja bã mike krübãte ni mda mda okwãte. Erere arato, nitre mikata ni mda mda dãnkiene abko krübãte arato, akwa ni se bãri moto kuin, nieta btã abko kãita nebe juto btãtre.

²⁶ Akwa mun ngätãite abko ñan rabadre bare kore, ñobtä ñan angwane ni bati mikata sribi ngwarbe nuene, ye kwrere nire nire rabadre bãri ütiãte mun ngätãite abko rabadi ni bati ye kwrere. Erere arato, mun mden rabadre ji dokwãte abko kãkwe ja mika ni klabore kwrere.

²⁷ Ye abko, ti bike kukwe niere munye: ¿Nita tãkãninbe mröre mesabtã angwane, ni mrö mikaka mesabtã, ni nibu ye abko mden bãri ütiãte? Ni mrökã mesabtã abko bãri ütiãte ni sribikã mrö sribekã ye krãke raba ruen tie, akwa ni sribikã ye kwrere tita mun ngätãite nete, erere munkwe nüna arato.

²⁸ Tikwe ja tare nikaba angwane, kãre mun nãma ketetibe tibe,

²⁹ aisetẽ ti Rünkwe kã biani gobrankrã tie, ye kwrere tita bien munye arato,

³⁰ tikwe gobrandi Ngöböbe, ye kãnti munkwe mrödre amne munkwe dö ñadre ketetibe tibe ti kukwe muko kwrere, abkokãre tita kã gobrankrã bien munye. Ye ngwane, mun ja tōitkaka tibe ye abko rabadi tãkãninbe kürã kwã jätãbti kubu yebti. Ye kãnti abko juta keta jätãbti ketebu nitre israelitakwe abko krãke munkwe kukwe ükadite siba tibe, niebare Jesukwe ietre.

Pedro kãkwe Jesu rükandite, niebare Jesukwe

(Mateo 26.31-35; Marcos 14.27-31; Juan 13.36-38)

³¹ Yebti ni Dãnkiene kãkwe niebare mda:

Simón, Satana tō mun jökrã nuaite krübãte ja kãne, kãkwe mun köböi kãrãba Ngöböye,

³² akwa makwe tōdekadre janknu Ngöböbti, abkokãre tikwe blitaba Ngöböbe makrã Simón. Ne aisetẽ ma tōi rikwitata ti kukwãre angwane, makwe ma mrãkã mda mda nete se die mika nünenkã dite jãbtã, niebare Jesukwe Simónyẽ.

³³ Abtä Simónkwe niebare mda ie:

Ti Dãnkiene, ma kitadre ngite ya o ma kãmikadre ya, ye kãnti tita juto biare niken gwaiere mabe, niebare kwe Jesuye.

³⁴ Abtä Jesukwe niebare mda ie:

Pedro, ti bike kukwe era erere niere mae abko krörö: Antlan ngãmi ngwãne dekã, ye kãnenkri ti gare ñakare mae, makwe niedi bãmä jire. Abko kore se, niebare Jesukwe ie.

Kã taretare kite jötrö

³⁵ Yebti nitre ja tōitkaka Jesube, ie Jesukwe niebare:

Tikwe mun juanba Ngöbö Kukwei kãdriere angwane, mun ñan rikadre ngwian ngwena jae amne, mrö, sabato ye ñan jãrikadre munkwe jae, tikwe nieba munye. ¿Ye ngwane munkwe ja tare nikani jãndrãn ye miare ya? niebare Jesukwe ietre.

Angwane, Ñakare, niebare kwetre.

³⁶ Abtä Jesukwe niebare ietre:

Kore tikwe mun juanba akwa, mtare abko ngwian tãrã munkwe angwane, mun jata ngwena jae amne mun jata mrö ngwena jae arato, akwa mun mdenkwe ngitra ñakare abko

käkwe dän jakwe rürümoin, bti munkwe ngitra köka jae, ñobtä ñan angwane kä taretare kite munkrä, ñobtä ñan angwane

³⁷ Ngöbö Kukweita tikani krörö tibtä:

Ni ngututu kwrere jire niara namani tuen ni mda mdaye, *Isaiás 53.12*
 abko tikani kira tibtä, ye abko rabadre bare täte jökrä tibtä. Abko kore se, niebare Jesukwe ietre.

³⁸ Abtä nitre ja töitikaka ben käkwe niebare ie:

Ni Dänkien, ngitra tära kumu nikwe nete, niebare kwetere.

Angwane Jesukwe niebare ietre:

Kada kete munkwe. Tikwe dre nini ñan nü gare munye, niebare kwe ietre.

Jesu nikani blite Ngöböbe Getsemani
 (Mateo 26.36-46; Marcos 14.32-42)

³⁹ Yebti Jesu nämane niken käre Ngitio Olibo kánti, ye erere nikaninta mda angwane, nitre ja töitikaka ben ni jätäbti iti nikanintre jökrä ben.

⁴⁰ Namaninta ngitiobti angwane, niebare kwe ietre:

Kukwe taretare kite mun nuente ja käne angwane, munkwe ñan ja mikadre ngite, abkokäre munkwe blita jakrä Ngöböbe, niebare Jesukwe ietre.

⁴¹ Yebti jä kitata tä niken mate nuäi temen, ye näre Jesu nikani mentokwäre se kwrere, kánti namani ngukudokwäbti temen blitakäre Ngöböbe,

⁴² käkwe niebare ie:

Ti Rün, kukwe kite tare ti rüere ti mikakrä ja tare nike, ye ma tö diain ti bäre ne ngwane, makwe dian ti bäre, akwa ma tö dreye tikrä, ye erere raba bare tibtä amne ñan ti töi abko erere rabadre bare, niebare kwe Rün Ngöböbe.

⁴³ [Ye btäräbe angele nämane kä käinbti, nükani Jesu die mike.

⁴⁴ Angwane Jesu namani ja tare nike bäri krübäte, akwa bäri namani blite ja dibti Ngöböbe, aisete krübärie namani ngitiekä abko namani näkäenkä kriki be däri kwrerekwrere abko namani niken mate temen.][†]

⁴⁵ Yebti Jesukwe blitabare ünän Ngöböbe angwane, nikaninta nitre ja töitikaka ben ye kánti amne niaratre namani ulire krübäte, aisete nämane kibien kuin jökrä, btä Jesu namaninta.

⁴⁶ Abtä niebare kwe ietre:

¿Ye ñobtä munta kibien? Diablu jatadi mun nuente ja käne angwane, munkwe ñan ja mikadre ngite, abkokäre näin krö, blite jakrä Ngöböbe, niebare Jesukwe ietre.

Jesu kani ngite
 (Mateo 26.47-56; Marcos 14.43-50; Juan 18.2-11)

⁴⁷ Jesu nämane ñäke kore nitre ja töitikaka benye, te batibe ni mda nükani kwati kánti. Nitre ye ngätäite abko, ni iti ja töitikaka Jesube kädian nämane Judas abko nämane näin ji ngwena käne, nikani nebe Jesu kánti angwane, krötabare Jesu ken kwe, Jesu demainkäre ngwärebtä.

⁴⁸ Akwa Jesukwe niebare ie:

Judas, ¿ti, Ni Kä Nebtä Ngobo ne ma tö nibi demaine kore kitakäre ngise ñan ñan? niebare kwe ie.

⁴⁹ Angwane nitre ja töitikaka Jesube mda mda okwäbti kukwe ye nikani nakenkä angwane, niebare kwetere Jesuye:

Ni Dänkien, nun bike nitre se tikekä ngitrabti, niebare kwetere.

⁵⁰ Yebti ni blitaka Ngöböbe ni mda mda diäre dänkien, kwe ni klaboré nämane abko olo küde ruenkri tikaninkära ta ie ni itikwe se kwrere.

⁵¹ Akwa Jesukwe niebare ietre:

Nitre ye tuemetre, niebare Jesukwe.

Bti ni klaboré ye olobtä Jesukwe kise mikani angwane, namaninta kuin batibe.

⁵² Yebti nitre blitaka Ngöböbe ni mda mda diäre dänkientre amne guardia ju blitakrä Ngöböbe ngibiabtikä amne nitre unbre ji dokwäte nikani Jesu kaen ngite, ye ie Jesukwe niebare:

¿Ñobtä abko bäsi ni gokä kri krübäte rüere ngitra jäta niken amne krito jäta niken, kwrere jire mun kite ngwena ti rüere ti kakäre ngite ye?

⁵³ Ju blitakrä Ngöböbe kánti käre ti nämane nebe ketetibe munbe angwane, mun ti kaen ñakare ngite amarebti mtare mun kite kore ye. Akwa mtare diablu tä dikekä kä ikote, diebti kä nüra munkrä, aisete mun nüke ti kaen ngite kore mtare, niebare Jesukwe ietre.

Pedro käkwe Jesu rükaninte
 (Mateo 26.57-58,69-75; Marcos 14.53-54,66-72; Juan 18.12-18,25-27)

[†] 22:44 Kukweta tikani corcheta ngätäite abko ñan tä tikani manuscrito bäri kuinquinbtä.

⁵⁴ Yebti Jesu kani ngite, jänikani nitre blitaka Ngöböbe ni mda mda diäre dänkien juete angwane, Pedro nikani bā mente jiebti se kwrere.

⁵⁵ Jesu jänikani ngite, ye kanti namanintre angwane, ni ruäre kākwe ñukwā bukaninte ju bāre, bti namanintre tākānintbe ñukwā bāre temen mda angwane, Pedro nükani, namani tākānintbe siba niaratre ngātaite ñukwā trāse.

⁵⁶ Angwane meri sribikā nāmane ñukwā trāse yete abko ie Pedro jatabare tākānintbe ñukwābtā amne okwā namani kwekbe btā, kākwe niebare:

Ni se nāmane dikekā Jesube arato, niebare kwe ie.

⁵⁷ Abtā Pedrokwe ja rükaninte, kākwe niebare:

Niara gare ñakare tie. ¿Ye ño abko mata ñāke kore ye?

⁵⁸ Yebti bā derare angwane, ni mdara jire okwā namani Pedrobta, kākwe niebare:

Mata nekete arato Jesube, niebare kwe ie.

Angwane Pedrokwe niebare ie:

Tita nekete ñakare niarabe. Makwe ñan ñākā ngwarbe, niebare kwe ie.

⁵⁹ Yebti kā nikani ñānā okwā krati nāre ta mda angwane, ni mdara jire jatani ñāke kisere Pedroye, kā namani niere:

Ni ne abko Galileabo, aisete niara ne nāmane nāin siba Jesube, namani niere.

⁶⁰ Angwane Pedrokwe niebare:

Drebtā mata blite ñan nebe nūke gare tie, niebare kwe.

Pedro nāmane ja rükente kore, ye btārābe antlankwe ngwānānbare se kwrere

⁶¹ angwane, ni Dänkien nikwitaninte, kākwe Pedro mikani ñārāre ja kāne angwane, ni Dänkien kākwe kukwe niebare krörö Pedroye abko nūkaninta töre ie: Antlan ngāmi ngwāne, kānenkri makwe ti rükandite bāmā jire, niebare ni Dänkienkwe ie, ye nūkaninta töre ie.

⁶² Angwane nikani mentokwāre, kākwe ja müaibare kri kā bāre mento.

Nitre guardia kākwe Jesu mikani yakrā jae

(Mateo 26.67-68; Marcos 14.65)

⁶³⁻⁶⁴ Jesu jänikani ngite, ye kanti nitre mikani Jesu ngibiabtikā abko kākwe dān kukwān mākāni Jesu okwābtā, bti namanintre mete amne namanintre mike yakrā jae, kā namani niere ie:

Nirekwe ma miti niere metre, namanintre niere Jesuye.

⁶⁵ Erere arato, namanintre ñāke kāmekāme amne taretare Jesuye, mikakāre ene jae.

Jesu jänikani Sanedrin ngwārekri

(Mateo 26.59-66; Marcos 14.55-64; Juan 18.19-24)

⁶⁶ Yebti kā jatani ngwen dekā angwane, nitre nāmane sribire Sanedrinbtā abko nitre blitaka Ngöböbe ni mda mda diäre dänkientre amne Kukwe Biani Ngöbökwē Moiséye dirikātre kākwe ja ūkaninkrö jökrā amne, ye ngwārekri Jesu jänikani. Namani kanti angwane niebare kwetre ie:

⁶⁷ Ma abko Ni Dianinkā Ngöbökwē ara ne ngwane, niere nunye, niebare mda kwetre Jesuye.

Angwane Jesukwe niebare:

Tikwe jän niedre munye angwane, munkwe ñan ti kukwei mikadre era.

⁶⁸ Erere arato, tikwe kukwe ngwiandretari munye angwane, munkwe ñan ti kukwei kadre ngābtā.

⁶⁹ Akwa mtare Ngöbö Di Kri Jändrān Jökrā Nuenkrā ye küde ruenkri kā ni ūtiāte krikrā, kanti Ni Kā Nebtā Ngobo rabadi tākāninte gobrane Ngöböbe gwaire, niebare Jesukwe.

⁷⁰ Angwane ni jökrā kākwe niebare mda Jesuye:

¿Mata niere kore, aisete ma Ngöbö Odei bkānā ñan ñan? niebare kwetre ie.

Angwane Jesukwe niebare mda ietre:

¿Mun ara jire kātā ti Ngöbö Odei niere, ye aisete ñan ye kwrere bkānā ya? niebare kwe ietre.

⁷¹ Angwane niebare kwetre:

Niarakwe ñāri kore, kākwe ja miri ngite au, nikwe kukwe nuri. ¿Se abko ni mdara jire kānāndre blite mda rüere ya? niebare kwetre jae kwārikwāri.

23

Jesu jänikani Pilato ngwārekri

(Mateo 27.1-2,11-14; Marcos 15.1-5; Juan 18.28-38)

¹ Yebti ni jökrā nāmane yete abko nikani Jesu ngwena mda Pilato ngwārekri.

² Angwane nikani Jesu kite ngise krörö Pilatoye:

Ni noko tā kukwe miketbe blo nun israelita rüere abko nunkwe gaba btä. Nunkwe ñan ja ütiä biandre emperador romanoboye tā niere. Mdakäre abko, niara Ni Dianinkä Ngöbökwé amne niara abko jrei tā niere emperador rüere, niebare kwetre Pilatoye.

³ Abtä Pilatokwe niebare Jesuye:

¿Ma abko jrei nitre israelitakwe bkänä ya? niebare kwe.

Jesukwe niebare Pilatoye:

Jän. Era metre ti ara, niebare kwe ie.

⁴ Angwane nitre blitaka Ngöböbe ni mda mda diäre dänkientre amne ni mda mda, ie Pilatokwe niebare:

Ni ne ja mike ngite ñakare abtä ñan kämikadre, nibi tuen tie, niebare kwe ietre.

⁵ Akwa ni jökrä namani ja nike kisere, kä namani niere ie:

Ni noko tā kukwe dirire abko käta nun kwite jökrä ja rüere kwärikwäri. Käne nikani dirire Galileate sere, abti mtare kite nüke dirire arato Judeate nere, namanintre niere Pilatoye.

Jesu jänikani jrei Herodes Antipas ngwäreki

⁶ Jesukwe sribi nuenbare kena Galileate niebare, ye jarabare Pilatoye angwane, Jesu abko Galileabo ya ngwianintari kwe.

⁷ Jesu abko Galileabo gani kwe amne, kä ye kánti Herodes nämane gobrane arato aiseté kukwe ükadrete nitre Galileabokrä, aiseté Herodes nämane Jerusalén, ye kánti Pilatokwe Jesu juani.

⁸ Jesu jatabare Herodeye angwane, käi namani nuäre Herodebtä, ñobtä ñan angwane kä raire nämane ni kukwei nuen blite Jesubtä, aiseté tö namani ja tuai ben amne tö namani Jesu tuai sribi kri ñan tuabare nuene keteti ja okwäbti,

⁹ kákwe kukwe ngwianintari kabre ie. Akwa Jesukwe ñan kukwe kani ngäbti jire chi.

¹⁰ Kä ye kánti abko, nitre blitaka Ngöböbe ni mda mda diäre dänkientre amne Kukwe Biani Ngöbökwé Moiséye dirikatre nämane siba yete abko namani Jesu kite ngise kisere Herodeye.

¹¹ Angwane Herodes btä rükä namani Jesu mike ngwarbe amne namani mike yakrä jae, kákwe dän bäri kuin kita nämane jabtä jreikwe, kwrere kitani kwetre Jesubtä. Bti Herodekwe juaninta Pilato kánti, ñobtä ñan angwane namani tuen ngite ñakare ie aiseté.

¹² Ne känenkri abko, Herodes nämane ja rüere Pilatobe akwa, ja mäkäninta kwetre köbö ye näire.

Jesu kitani ngite müre ketadre

(Mateo 27.15-26; Marcos 15.6-15; Juan 18.39-19.16)

¹³ Yebti Pilatokwe nitre blitaka Ngöböbe ni mda mda diäre dänkientre amne nitre ütiäte ütiäte ükaninkrö nitre israelita mda mdabe,

¹⁴ kákwe niebare ietre:

Ni ne nämane kukwe miketbe gobran romanobo rüere, abtä mun ki ngwena tie nete, munkwe nini. Akwa tikwe kukwe ngunintari ie mun okwäbti amne, kukwe btä munta kite ngise abko erere ja mike ngite ñakare tuen tie.

¹⁵ Erere arato, Herodeye kuni ngite ñakare, aiseté juninta jirekåbe kwe tie nete. Ni ne ja mike ngite ñakare. ¿Se ñobtä müre ketadre?

¹⁶ Aiseté ti bike kwata metamna köbti jirekåbe, bti tikwe tikaditeta. Abko kore se, niebare Pilatokwe ietre.

¹⁷ [Bieta Pascuate abko, kåre gobran romanobo kákwe ni ngite tikadrete.]*

¹⁸ Pilatokwe blitaba kore, abtä ni jökrä namani ngrente, kä namani niere:

¡Barrabás tikiteta nunkrä amne ni ye abko ngwena müre ketadre! namanintre niere.

¹⁹ Barrabás ye abko nämane kukwe miketbe gobran romanobo rüere amne niarakwe ni mda kämikani arato. Abtä nämane kitani ngite kä teri abko ni jökrä namani tikatemna.

²⁰ Akwa Pilato abko tö namani Jesu tikaiteta, kákwe ñäkåbareta bobuta ietre.

²¹ Akwa niaratre kákwe ngratebare bäri ja dibti mda, kä namanintre niere:

¡Müre kete krusobtä! ¡Müre kete krusobtä! namanintre niere.

²² Abtä Pilatokwe niebareta bämåkäre ietre:

¿Drebtä ni nekwe ja mikani ngite? Niara ja mike ngite ñakare nibi tuen tie. ¿Se abko drebtä müre ketadre? Aiseté ti bike kwata metamna köbti jirekåbe, bti tikwe tikaditeta, niebare kwe.

²³ Akwa ni jökrä namani Jesu kämikamna kisere krusobtä, kä namani ngrente bäri krikri. Te Pilato toi kwitani kwetre Jesu rüere, aiseté tö nämane dreye, erere namanin kwetre.

²⁴ Ne aiseté, niaratre tö namani dreye, ye erere Pilatokwe köböi biani ietre.

²⁵ Angwane niaratre namani Barrabás tikatemna, ye erere nuenbare kwetre. Barrabás ye abko nämane kukwe miketbe gobran romanobo rüere amne ni kämikani kwe, abtä

* 23:17 Versículo 23.17 ñan tā tikani manuscrito bäri kuinquinbtä.

námáne ngite ká teri abko Pilatokwe tikaninteta amne nitre israelita tó namani Jesu kámikái abko erere kámikamna Pilatokwe.

Jesu metani krusobtä

(Mateo 27.32-44; Marcos 15.21-32; Juan 19.17-27)

²⁶ Abti Jesu jánikani mda müre ketadre krusobtä angwane, ni Cirenebo kádian námáne Simón námáne Jerusalén báre, jataninta, nükani ngátái bentre ji ngrabare angwane, kruso mikani Simón kótärá nitre rükákwe abko nikani ngwena Jesu jiebtí.

²⁷ Ye ngwane ni nikani kwati jiebtí angwane, meri nikani kwati siba abko namani uliere krübáte. Abtä námáne nain müen krikri be Jesu jiebtí.

²⁸ Abtä Jesukwe mikani náräre ja káne, kákwe niebare ietre:

Mun merire Jerusalénbo, munkwe ñan ti müai, akwa munkwe ja müai au amne munkwe ngábákwe jakwe müai jakrá,

²⁹ ñobtä ñan angwane ká taretare jatadi angwane, niedi krörö nitre merirebtá: Meri kaibe ngábákwe ngibiare ñakare amne ngábákwe mike ñakare kianbtá abko btá káta nuäre kri niedi, ñobtä ñan angwane ngábákwe ñakare munkwe krütadre munkán kukwe taretare náire aisete.

³⁰ Ye ngwane abko ni jökrá rabadi niere ngitioye:

Ngitio ngidien järe nuntí amne nun doboi mike nun rüe ngániene,

Oseas 10.8

rabadi niere.

³¹ ¿Ye abko ti kri niki kwrere btá tátre kukwe nuene káme kore se abko mun israelita kri

nótare kwrere abko btá ñan nuendre kwetre arato ya? niebare Jesukwe meritre yeye.

³² Jesu jánikani müre ketadre krusobtä angwane, ni mda kákwe ja mikani ngite abko jánikani nibu kámikadre gwaire ben krusobtä.

³³ Ye erere káká Calavera kánti Jesu jánamani angwane, metani krusobtä amne ni ja

mikaka ngite metani kruso mda mdabtä arato abko nikani iti küde ruenkri amne iti küde negeberekri.

³⁴ Angwane Jesukwe niebare Ngöböye:

Ti Rün, nitre tá ja mke ngite ti rüere ne makwe dian bti ta amne makwe ñan mika ja ngie nuen ti dokwäre, ñobtä ñan angwane niaratre tá dre nuene gare ñakare metre ietre, niebare Jesukwe.

Angwane nitre rüká abko kákwe ja gani dän Jesukwe ñákátbekrá jabti.

³⁵ Ye ngwane ni námáne kwati okwá Jesubtä angwane, nitre útiáte útiáte nitre israelita ngátáite namani Jesu mike ngwarbe jae, ká namani niere jae kwárikwári: Niarakwe ni mda mda dianintari, aisete niara abko Ni Dianinká Ngöbökwé bkäná ne ngwane, ja diandretari au krusobtä mento kwe, namani niere Jesubtä.

³⁶ Erere arato, nitre rüká romanobo namani Jesu mike yakrá, ká namani krötó Jesu ken amne namani uba ñoi dime bien ñadre ie,

³⁷ ká namani niere:

Ma ñakare Jrei nitre israelitakwe bkäná, ñobtä ñan angwane kore ne ngwane, makwe ja diandretari au mento, namanintre niere Jesuye.

³⁸ Angwane Jesu dokwá kánti káin abko kukwe tikani krörö kri kukwánbtá abko námáne mikani “NI NE ABKO JREI NITRE ISRAELITAKWE” abko namani tikani.

³⁹ Angwane ni kukwe káme nuenká námáne mikaninká krusobtä káin, ye abko iti namani ñáke diánbe Jesuye arato, ká namani niere:

Ma abko ñakare Ni Dianinká Ngöbökwé bkäná, ñobtä ñan angwane kore ne ngwane, makwe ja diandretari au amne makwe nun diandretari arato, namani niere Jesuye.

⁴⁰ Abtä ni iti mda námáne krusobtä káin arato ye kákwe niebare kukwe muko yeye:

¿Mata ja tare nike ja kwrere ni nokobe, akwa Ngöbö jürá ñakare mabtä ñan ñan?

⁴¹ Ni nibu ne kákwe ja mikani ngite abtä nita ja ngie nuen ye tá dbe. ¿Akwa ni noko ja mke ngite ñakare, akwa tá ja tare nike, se tuen mae ya? niebare kwe ie.

⁴² Bti niebare mda kwe Jesuye:

Jesu, ma raba gobrane angwane, makwe ti ngwianta töre jae amne makwe ti die mika, niebare kwe ie.

⁴³ Jesukwe niebare mda ie:

Era metre mtare ma rabadi ká kuinte tibe, niebare kwe ie.

Jesu krütani

(Mateo 27.45-56; Marcos 15.33-41; Juan 19.28-30)

⁴⁴⁻⁴⁵ Yebti ñäná ruäre angwane, ká ngidiantinte mda amne ká namani iko jökrá temen nebebe ñäná okwá krämä dere, aisete ñäná trä namani ñakare. Erere arato, dänkwán ngetbo, bti ju blitakrá Ngöböbe námáne ñákánintbe, ye nianinkábe ötóbu ta se kwrere.

⁴⁶ Angwane Jesukwe ngratebare kri, kákwe niebare:

¡Ti Rün, ti bike ja úai mke gare mae! niebare kwe.

Ye btäräbe krütani.

⁴⁷ Jesu krütani kore nitre rükä romanobo dänkien okwäbti angwane, Ngöbö käikitaninkä kwe, käkwe niebare:

Ni ne abko ni metre amne ngite ñakare bkänä ñan ñan, niebare kwe.

⁴⁸ Ye ngwane ni nämane kwati yete okwäbti kukwe nakaninkä kore. Abtä moto namani ulire, kä nikani ja mete mäträte, nikaninta mentokwäre.

⁴⁹ Angwane nitre ja getaka getaka Jesube amne nitre merire merire Galileabo nikani siba Jesube abko namanintre bä mente temen se kwrere okwä Jesubtä.

Jesu doboi mikani

(Mateo 27.57-61; Marcos 15.42-47; Juan 19.38-42)

⁵⁰⁻⁵¹ Ye ngwane abko, ni iti sribikä Sanedrinbe kädian nämane José nünanka juta Ari-mateate kä Judeate nämane. José ne abko moto kuin amne nämane nüne metre Ngöbö ngwäreki. Erere arato, Ngöbö rükadre gobrane ni kwe ngätäite diribare Jesukwe abko José nämane ngbiare kisere amne, Sanedrin käkwe kukwe nuenbare Jesubtä, ye ñan namani dbe kräke.

⁵² Ye mden kisete, Jesu krütani angwane, niara nikani, käkwe Jesu ngwäkä käräbare Pilatoye. Erere Pilatokwe köböi biani ie angwane,

⁵³ José nikani, Jesu ngwäkä diani krusobtä timon kwe, mrianinte kwe dän bäri ütiäte kädianta lino ye te, bti kä nämane muani jäkwatate ni doboi mikakrä akwa, ni doboi mika ngämi te, ye kanti Jesu doboi mikani kwe.

⁵⁴ Köbö ye ngwane abko, nitre israelita nämane jändrän ükete biare köbö jadükakrä ngbiakäre ngäbti, erere köbö jadükakrä jatanina nuke.

⁵⁵ Angwane José nikani Jesu doboi mike angwane, nitre merire Galileabo nikani siba Jesu mukore nebe Jerusalén, ye abko Jesu doboi mikadi mdente Josékwe abko nikani tuen angwane, Jesu doboi mikani mdente metre, ye tuani kwetre.

⁵⁶ Bti nikaninta, namaninta gwi angwane, ñö rä bäne amne kri ngwäri mnü rä bäne sribebare kwetre mikakäre Jesu ngwäkä ngrabare. Yebti kukwe nämane ükaninte ñö Ngöböke köbö jadükakräbtä, ye erere nitre merire ye käkwe jadükani.

24

Jesu nukaninta nire

(Mateo 28.1-10; Marcos 16.1-8; Juan 20.1-10)

¹ Akwa ñänä jatani gökökä krirre käin bämante dekä angwane, nitre merire ye nikaninta dobohti mda, kä nikani ñö rä bäne amne kri ngwäri mnü rä bäne sribebare kwetre ye ngwena mikadre Jesu ngwäkä ngrabare.

² Namanintre dobohti angwane, jä mikani kä mkäte Jesu dobohti ye namanina dianinkä mento amne ñakare täte, btä namanintre.

³ Angwane nikanintre nikren kä mkäte nguse se kwrere angwane, jjo! ni Dänkien Jesu ngwäkä kwani ñakare nguse ietre.

⁴ Yebtä abko töi ñan namani krütare. Ye btäräbe ni btä dän ngwen bürere namanintre nünaninkä nibu niaratre ken, btä okwä namani.

⁵ Angwane kä jürä namani kri btätre, abtä nikaninbe mate ngukudokwäbti temen, käkwe ja okokrä mikani dobohtä temen. Akwa angele nibu ye käkwe niebare meritre yeye:

¿Ñobtä munta näin ni nire känentari mürükä ngätäite ye?

⁶ Ni känántarita näin munkwe, ye nürate nire, aisete ñakare nete! Niara nämane Galilea munbe angwane, dre niebare kwe, ye munkwe ngwianta töre jae abko krörö:

⁷ Ni Kä Nebtä Ngobo ne kitadi ngise nitre kukwe kämekäme nuenkäye, bti niaratre käkwe müre ketadi krusobtä, akwa mukirare angwane, rükadita nire, niebare kwe munye, niebare kwetre meritreye.

⁸ Angwane batibe Jesu kukwei nukaninta töre meritre yeye angwane,

⁹ nämane dobohti, nikaninta Jerusalén. Namaninta gwi angwane, kukwe nakaninkä ñö ñö, ye erere niebare jökrä kwetre nitre Jesu kukwei ngwianka ni jätäbti iti yeye amne ni mda mdaye.

¹⁰ Nitre merire nükani kukwe ngwena nitre Jesu kukwe ngwiankaye abko María Magdal-
abo, Juana, Santiago meye kädian nämane María, amne meri mda mda abko nükani kukwe ngwena.

¹¹ Akwa nitre Jesu kukwei ngwianka abko ie meritre ye namani tuen ñäke ngwarbe, aisete ñan tö namani kukwei mikai era.

¹² Akwa Pedro abko nikani betekä dobohti, namani yete käkwe nikrabare nguse amne, dän te Jesu mrianinte aibe nämane nguse, btä okwä namani angwane, nikaninta akwa kukwe nakaninkä, yebtä töi ñan namani krütare mda.

Ji juta Emaús kukwäre, kánti Jesukwe blitabare ni nibu ben

¹³ Jesu nukaninta nire, ye näire nitre nänkä ben nikani nibu juta Emaús kukwäre. Emaús ye abko nämane kilometro krä jätäbti krati Jerusalén bäre mento, kánti nikanintre.

¹⁴ Nikanintre angwane kukwe nakaninkä ño ño Jesubtä, yebtä nikani blite jökrä ji ngrabare.

¹⁵ Niaratre nämane näin blite jabe kwärikwäri angwane, Jesu ara jire käkwe krötabare ken amne nikani gwaire bentre mda.

¹⁶ Jesu namani tuen ietre, akwa Ngöbökwé ñan Jesu mikani gare ietre.

¹⁷ Angwane Jesukwe niebare ietre:

¿Mun ye tä näin dre kädriere ji ngrabare ye? niebare kwe ietre.

Abtä namanintre nūnaninkä moto ulire.

¹⁸ Angwane ni iti kädian nämane Cleofas käkwe niebare Jesuye:

¿Ni nämane kwati ngätäite ma nämane siba Jerusalén angwane kukwe rakakaba mukira, ye abko ma aibe ie gare ñakare ya? niebare kwe ie.

¹⁹ Jesukwe niebare mda ie:

Dre nakaninkä niere tie, niebare kwe ie.

Niara käkwe niebare mda ie:

Kukwe rakakaba Jesu Nazarebötä. Niara abko ni Ngöbö kukwei niekä amne di kribti nämane sribi kri nuene amne nämane blite kuin Ngöbö Kukweibtä abko Ngöbö amne ni jökrä namani nütüre btä.

²⁰ Akwa nitre blitaka Ngöböbe ni mda mda diäre dänkientre amne nitre ütiäte ni israelita ngätäite käkwe kitani ngise nitre romanoboye müre ketadre amne metadre krusobtä abko erere nuenbare kwetre btä.

²¹ Niarakwe ni israelita dianditari nitre romanobo ngoto täni amne ni rabadi tikaninte abko nun nämane nütüre, aisete nun nämane tödeke bti akwa, köbömära kukwe rakakaba kore btä nun okwäbti.

²² Akwa mtare nitre merire tä nun ngätäite niki dekä doboibti angwane, nūta, käkwe nun ngwini nikenkä,

²³ ñobtä ñan angwane janintre doboibti amne, Jesu ngwäkä kuni ñakare ietre, akwa Jesu nūrate nire, nini ietre angeletrekwe abko nü niereta gwi abtä nun nekwekä.

²⁴ Angwane nun kukwe muko ruäre niki doboibti kukwe ye mike ñäräre, akwa nitre merire käkwe dre nini, ye kwrere täni bkänä btä nibitre, akwa Jesu turi ñakare kwetre abko tä nakenkä. Abko kore se, niebare kwetre Jesuye.

²⁵ Angwane Jesukwe niebare mda ietre:

¿Mun ye ño amarebti mun töi braibe dikaro amne, nitre Ngöbö kukwei niekä kirakira abko mun ñan tä mike era!

²⁶ ¿Ni Dianinkä Ngöbökwé ne mika ngämi ütiäte Ngöbökwé, känenkri ja tare nikadre kri kwe, nieta kore Ngöbö Kukweibtä, ye gare ñakare munye ya? niebare kwe ietre.

²⁷ Yebti tarä tikani Moisékwe nebebe tarä tikani kira nitre Ngöbö kukwei niekäkwé abko nämane blite ño ño Jesubtä, yebtä Jesukwe blitabare.

²⁸ Yebti juta kánti nikanintre ye kánti namani angwane, Jesu jatani niken janknu ta bä mikani kwe,

²⁹ akwa niaratre abko namani Jesu ketete nebe jabe jirekäbe, kä namani niere ie:

Kä kitera dere amne kä kite iko, aisete ma raba jirekä nunbe nete, namani niere ie.

Ye erere Jesu nikani, namani gwi bentre.

³⁰ Yebti namanina tākänintbe mesabtä angwane, Jesukwe ban diani kunti kisete, käkwe kuin niebare btä Ngöböye, bti ñäkänintbe kwe, käkwe biani ietre.

³¹ Ye ngwane Jesu ara namani bentre gani kwetre, akwa Jesu abko käkwe ja ganinkäta okwäte.

³² Abtä niebare kwetre jae kwärikwäri:

¿Niara ki blite ji ngrabare nibe Ngöbö Kukweibtä angwane, kä nibi nuäre krübäte nibtä, aisete ni nibi grükekä jökrä ngrabare niara kukwei nuare ñan ñan? namani niere jae kwärikwäri.

³³ Yebti jötrö ngwarbe Cleofas amne kukwe muko kwe nikaninta ja jiebti Jerusalén. Nikanintre nebebe Jerusalén angwane, nitre Jesu kukwei ngwianka ni jätäbti iti nämane ja ükaninkrö ni mda mdabe,

³⁴ ye käkwe niebare Cleofas amne kukwe muko kwe ngäbti:

¿Jesu nukaninta nire bkänä! Niarakwe ja miri tuadre Simónye, niebare kwetre ietre.

³⁵ Angwane Cleofas amne kukwe muko kwe btä kukwe nakaninkä ño ji ngrabare abko niebare jökrä kwetre. Erere arato, Jesukwe ban ñäkänintbe bti angwane, Jesu nukaninta gare ietre, niebare kwetre.

Jesukwe ja mikani tuadre nitre ja kukwei ngwiankaye

(Mateo 28.16-20; Marcos 16.14-18; Juan 20.19-23)

³⁶ Kukwe nakaninkä ño ño btätre, yebtä nämane blite, btäräbe Jesu nükaninbe niaratre ngätäite se kwrere, käkwe köbö ngwianintari krörö ietre:

Kä jäme Ngöböke raba munbtä, niebare kwe ietre.

³⁷ Angwane ni üaibe namani tuen ietre namanintre nütüre, aisete namanintre nekwetekä krübäte.

³⁸ Abtä Jesukwe niebare ietre:

¿Ñobtä munta töbike ngwarbe kwäräkwarä amarebti mun nibi nekwetekä krübäte dikaro ye?

³⁹ Ti abko Jesu ara. Ti kise amne ti ngoto träin mike ñäräre munkwe amne, ti nuenbtä munkwe amne ti mike ñäräre munkwe, ñobtä ñan angwane ti ngätä amne ti kroko tärä, ye tuen angwane, ti ñakare ni üai gadi munkwe, ñobtä ñan angwane ni üai abko ngätä amne kroko ñakare, niebare kwe ietre.

⁴⁰ Niebare kore kwe ietre, ye btäräbe ja kise amne ja ngoto mikani tuadre kwe ietre.

⁴¹ Akwa niaratre btä kä namani nuäre krübäte amne töi ñan namani krütare, aisete namanina Jesu tuenta, akwa ñan namani nebe era kräke. Abtä Jesukwe niebare mda ietre:

¿Mrö tärä munkwe nete ya? niebare kwe ietre.

⁴² Angwane gwa kukwani nämane kwetre abko oto biani kwetre Jesuye.

⁴³ Jesukwe kani ngäbti, bti kwetani kwe niaratre okwäbti.

⁴⁴ Bti niebare kwe ietre:

Ti ngämi krüte, känenkri ti nämane mun ngätäite angwane, kukwe rakadrekä ño ño tibtä abko tikwe nieba munye, mden erere namani bare tibtä. Kukwe Biani Ngöböke Moiséye tä tikani tibtä amne nitre Ngöbö kukwei niekä käkwe tärä tikani tibtä amne Salmobtä tärä nämane tikani ño tibtä, ye erere rabadi bare jökrä, tikwe nieba, mden erere namanina bare, niebare Jesukwe ietre.

⁴⁵ Yebti Jesukwe niaratre töi tikani Ngöbö Kukweibtä mda,

⁴⁶ käkwe niebare krörö ietre:

Ngöbö Kukweita tikani krörö tibtä: Ti, Ni Dianinkä Ngöböke krütadi akwa köbömära angwane rükadita nire.

⁴⁷ Angwane ni kä jökräbti käkwe kukwe käme kitadre temen, bti Ngöbö kadre ngäbti kwetre, Ngöböke niaratre ngite kukwe käme nuenbtä diandrekä mento btä abkokäre, ye abko tä tikani kore tibtä Ngöbö Kukweibtä. Kukwe ye diri rikadre ti käbti käne Jerusalén, bti kä mda mdabti.

⁴⁸ Ne aisete kukwe nakaninkä ño tibtä, munkwe tuani ja okwä jenbti, ye munkwe kädrie ni mda mdabe.

⁴⁹ Angwane ti Rünkwe ni köböi mikani munye abko tikwe juandi täte munbtä, akwa niara di kä käinbti rükadre täte jökrä munbtä, ye abko munkwe ngibia Jerusalén nete, aisete mun raba jökrä nete. Abko kore se, niebare Jesukwe ietre.

Ngöbö nikani Jesu ngwenante kä käinbti

(Marcos 16.19-20)

⁵⁰ Abti Jesu nikani ngwena juta Jerusalén bäre mento angwane, nikani nebe juta Betaniate. Ye kanti Jesukwe kise kaninkä käin ja di biankäre ietre.

⁵¹ Jesu nämane ja di bien kore ietre, btäräbe Jesu jänikani kä käinbti se kwrere.

⁵² Yebti niaratre abko käkwe Jesu käikitaninkä yete, bti kä namani nuäre btätre amne nikaninta Jerusalén.

⁵³ Yebti ju blitakrä Ngöböbe, kanti namanintre Ngöbö käikitekä käre köbö kwatirekwatire abko nakaninkä kore se. Ne ngörä.

Kukwe Kuin Jesubtä Tikani Juankwe Juan

Tärä ne abko tikani Juankwe. Juan nikani Jesu mukore nitre ja töitikaka ni jätäbti iti mda mdabe. “Ni iti ja töitikaka Jesube abko Jesu nämane tarere kri,” abko tä tikani Juan 13.23; 19.26; 20.2; 21.7,20,24 ye kánti. Ni ja töitikaka Jesube btä tä blite, ye abko Juan ara nütüta. Juan abko ni israelita amne Jesukwe niara btä etba kwe Santiago káräbare ja töitikakäre jabe. Niara btä Santiago abko gwa gaka amne nämane nüne Nö Okwä Kri Galilea ken. Juankwe tärä ne tikani kä 80-90 angwane nütüta.

Ñobtä Juankwe tärä ne tikani abko Juan ara käkwe mikani gare nie Juan 20.30-31 kánti kukwe krörö tä tikani: “Ni Dianinkä Ngöböke abko Jesu ara amne niara abko Ngöbö Odei, ye abko rabadre era munkrä amne munkwe tödekadre bti, abkokäre tikwe kukwe ne tikani,” abko Juankwe tikani. Ngöbö abko Jesu Rün ara abko Juankwe mikani ütiäte tärä nebtä. Erere arato, Jesu amne Ngöbö, Jesu Rün, abko tä ketetibe gwaire abko Juankwe mikani ütiäte tärä nebtä.

Juan namanina unbre angwane, nitre romanobo käkwe niara kitani ngite kä butu kädianta Patmos yete. Juan nämane nüne yete ngwane, Jesukristo käkwe tärä kädianta Apocalipsis tikamna ie. Erere arato, tärä kädianta 1 Juan, 2 Juan amne 3 Juan abko tikani kwe arato.

Kristo jatani kä nebtä

¹ Kena dekä, kä ne date ngämi, känenkri ni kädekata Kukwe nämänena. Niara nämane nüne Ngöböbe amne niara abko Ngöbö ara arato.

² Kena dekä kä ne date ngämi, känenkri niara nämane ketetibe Ngöböbe.

³ Niara köböire Ngöböke jändrän jökrä dätebare amne jändrän ñakare jire chi abko niarakwe dätebare ñakare.

⁴ Niara di nämänena ni mikakäre nire Ngöbökrä amne niara abko ñotra ni jökrä kräke abko krörö: ñotra kätä ji metre mike gare nie kä ikote, ye kwrere niarakwe ji Ngöböke mikani gare nie.

⁵ Nita nüne mente Ngöböye amne nita nüne kä iko diablukwe te abko kräke ni kädekata Kukwe ye tä trä ngitiekä amne kä iko abko di ñakare kä trä ye ötatekrä.

⁶ Bati ni nämane iti abko kädian nämane Juan Bautista. Ni ye abko Ngöböke juani

⁷ blitakäre käne angwane, kukwe gare ño ie ni ñotra kwrere yebtä, ye erere niedre kwe, ni jökrä käkwe tödekadre ni yebti abkokäre.

⁸⁻⁹ Juan ye abko juani käne Ngöböke blitakäre ni ñotra kwrere yebtä, akwa Juan abko ñakare ni ñotra kwrere. Akwa ñotra era metre tä trä ngitiekä ni jökräbtä ji metre Ngöböke mikakäre gare ietre, ye abko jatanina nuke abko Juan jatani niere käne.

¹⁰ Ni kädekata Kukwe ye abko käkwe jändrän jökrä amne ni jökrä dätebare, akwa nükani kä nebtä nitre töi kämekäme ngätäite angwane, niara abko ni jökrä ye datekä ara abko ñan nükani gare ietre.

¹¹ Nükani nüne mräkä kwe israelita ngätäite, akwa mräkä kwe käkwe kani ngäbti ñakare.

¹² Akwa nire nire käkwe niara kani ngäbti käkwe tödekani bti, ye abko ie kä biani kwe rabakäre Ngöbö ngäbriänkäre.

¹³ Nitre tä Ngöbö ngäbriänkäre ye abko ñan ni därebare rün btä meyekwe, köböire tätre Ngöbö ngäbriänkäre. Erere arato, ñan rün btä meye töi köböire tätre Ngöbö ngäbriänkäre amne ñan ni brare tö namani meriye abko köböire tätre Ngöbö ngäbriänkäre, akwa ja töi jenbti Ngöböke mikani ja ngäbriänkäre.

¹⁴ Ni kädekata Kukwe ye nämane Ngöbö kánti. Ngöböke juani ni ngätäite, nükani därene ni kwrere amne, ngrabare namani ni kwrere amne nünabare kwe ni ngätäite nete. Niara ütiäte kri bä nuäre, ye abko nunkwe tuaba. Niara abko Ngöbö Odei itibe amne Ngöbö niara Rün käkwe mikani ütiäte kri abko nunkwe tuaba. Ngöböke niara mikani ütiäte kri abko kwe niara moto namani kuin ni jökrä kräke amne kukwe era erere mikani gare kwe nie.

¹⁵ Niara ye mdenbtä Juankwe blitabare angwane, nikani ngrente krikri be, käkwe niebare krörö:

Ni se mdenbtä tikwe blitaba angwane, tikwe nieba krörö: Ni mda jatadi ti jiebti abko bäri ütiäte ti ngwä, ñobtä ñan angwane niara abko nämänena nüne bäri käne tikrä, tikwe nieba, niebare Juankwe Jesubtä.

¹⁶ Niarata ni tarere kri krübäte ja moto kuinbti, ye mdenbtä abko jändrän kuin biani kwe nie ja täritäri abko krörö:

¹⁷ Kukwe Biani Ngöbökwe nuendre nie, ye abko biani mekera kwe Moisés köböire, ye abko jändrän kuin biani ngwarbe käne Ngöbökwe nikrä; akwa Ngöbö moto kuin ni kräke käta ni tarere amne tä kukwe era erere mike gare nie, ye abko namani bare era metre nikrä Jesukristo köböire, ye abko jändrän mdara jire bäri kuin biani ngwarbe kwe nikrä.

¹⁸ Ne abko, ni ñakare jire iti käkwe Ngöbö tuani ja okwä jenbti, akwa Ngöbö Odei itibe tare kri kwe tä nüne ketetibe Rün kwebe. Niara abko Ngöbö ara arato abko käkwe Ngöbö mikani gare nie.

*Ja ñakare Ni Dianinkä Ngöbökwe abko Juankwe niebare
(Mateo 3.11-12; Marcos 1.7-8; Lucas 3.15-17)*

¹⁹ Juankwe blitabare Jesubtä angwane, kukwe nakaninkä krörö btä: Bati nitre israelita ji dokwäte nämane Jerusalén käkwe nitre blitaka Ngöböbe ni mda mda diäre amne nitre levita ju blitakrä Ngöböbe ye ngibiabtikä juani ruäre, Juan abko Ni Dianinkä Ngöbökwe ya, ñakare ya ngwentari ie. Ye erere nikanintre nebe Juan kanti, käkwe ngwianintari kore ie angwane, Juan käkwe kukwe niebare metre krörö ietre:

²⁰ Ti abko ñakare Ni Dianinkä Ngöbökwe, niebare kwe ietre.

²¹ Abtä niebareta kwetre Juanye:

¿Ma abko nire amarebti? ¿Ni Ngöbö kukwei niekä kira juandre mda Ngöbökwe Ni Dianinkä Ngöböke känenkri kädian nämane Elías abko mare ya? niebare kwetre mda Juanye.

Angwane Juankwe niebare mda:

Ti abko ñakare Elías, niebare kwe ietre.

Angwane niaratre nikani kukwe ngwentari kisere mda Juanye, käkwe niebare ie:

¿Ngöbökwe ja kukwei niekä mdara jire Moisés kwrere juandre nieta Ngöbö Kukweibtä, ye abko ma ara ya? niebare kwetre.

Ñakare, niebare Juankwe ietre.

²² Abtä niebareta kwetre Juanye:

Ma abko nire, ye makwe niedre nunye, ñobtä ñan angwane nitre nun juanka, kräke nun rikadre kukwe ngwenante, aisete ma abko nire ye makwe niedre au jakrä abko erere nunkwe niedre, niebare kwetre Juanye.

²³ Abtä Juankwe niebare mda ietre:

Kira ni Ngöbö kukwei niekä kädian nämane Isaiás käkwe niebare krörö:

Ni iti tä niken ngrente krikri kä kaibete, käta niken niere:

Ji ukateta kuin metre jrei kri kräke, ye kwrere jire ja mika juto ni Dänkien käne munkwe.
Isaiás 40.3

Ni btä Isaiáke blitabare abko ti ara, niebare Juankwe ietre.

²⁴ Angwane nitre bariseo juani ruäre abko namani yete siba

²⁵ käkwe kukwe ngwianintari krörö mda Juanye:

Ma abko ñakare Ni Dianinkä Ngöbökwe, ma ñakare Elías amne ma ñakare ni Ngöbö kukwei niekä Moisés kwrere mata niere, ¿se ñobtä abko mata ni mda mda ngökö ñöte se? ¿Nirekwe kä biani mae ni ngökakäre ñöte se? niebare kwetre ie.

²⁶ Juankwe niebare mda ietre:

Tita mun ngökö ñö aibe te, akwa mun ngätäite nita iti abko gare ñakare munye.

²⁷ Ni ye abko jatadi ti jiebti amne, ni klabore aibe käta sandalia tikete ni mdakrä, * akwa ti abko bäri ene ruen tie, aisete ti abko ja ñan rükadre töre jire chi tie sandalia tikete ni ye ngotobtä, niebare kwe.

²⁸ Kukwe ye abko nakaninkä jökrä kore kākä Betäbara kanti Ñö Jordánbtä kä driri, Juan nämane ni ngökö ñöte ye kanti.

Jesu abko Kordero Ngöbökwe

²⁹ Yebti jändrinane angwane, Jesu jatani Juan kukwäre, ye jatabare Juanye angwane, niebare kwe ni jökräye:

Kordero Ngöbökwe[†] kite tuen sete se. Se mike ñäräre munkwe. Ni se mden ni ngite kukwe kämekäme nuenbtä Ngöbö rüere diankaka nibtä.

* **1:27 sandalia tikete.** Jesu näire ni klabore kökani ni mdakwe abko bäri ene. Niaratre aibe nämane sandalia ni mdakwe tikete, aisete Juan nämane ja bä mike bäri ene ni klabore ngwä. † **1:29 Kordero Ngöbökwe.** Jesu bä mikani kordero kwrere, ñobtä ñan angwane bäri käne, Ngöböke kordero kämikamma nitre israelitaye kukwadre Ngöböye ja ngite ütiäre Pascua näire. Jesu nükani ja biankäre müre ketadre ni ngite ütiäre. Erere arato, kordero abko kwekbe, rüre ñakare ja dokwäre, ye kwrere Jesu nämane arato. Kukwe nebtä ñäke Isaiás 53.7; Jeremías 11.19.

³⁰ Ni se mden, btä ti nämane blite, käkwe nieba krörö: Ni mda jatadi ti jiebti abko bäri ütiäte ti ngwä, ñobtä ñan angwane niara abko nämamena nüne bäri käne tikrä, tikwe nieba angwane,

³¹ niara abko Ngöbö Odei ara ñan nämane gare tie, akwa rükadre gare juta israelitaye, abkokäre Ngöbökwé ti juani ni ngökö ñöte, niebare Juankwe.

³² Erere arato, Juankwe kukwe niebare metre Jesubtä krörö:

Ngöbö Üai Deme nämane kä käinbti jataba ütü kwrere timonkwäre, rikaba mate niarabtä, tikwe tuaba.

³³ Akwa ye ngwane, niara abko Ngöbö Odei ngämi nuke gare tie, akwa Ngöbö ti juanka ni ngökö ñöte, ye käkwe niebare krörö tie: Ngöbö Üai rika timonkwäre angwane, raba mate niarebtä ma okwäbti, ni ye abko käkwe Ngöbö Üai Deme mikadi nüne nibtä, nieba kwe tie.

³⁴ Ye erere tikwe Ngöbö Üai tuaba nuke btä, aiseté niara abko Ngöbö Odei ara tita niere. Abko kore se, niebare Juankwe.

Jesukwe nitre ja töitikaka ben käräbare

³⁵ Yebti jändrinane angwane, Juan nämane ni ngökö ñöte, ye kánti namaninta angwane, nitre nänkä Juanbe namani nibu ben yete.

³⁶ Ye btäräbe Jesu jatani tuen dikekä Juanye se kwrere angwane, Juankwe niebare:

¡Kordero Ngöbökwé kite tuen sere se! niebare kwe nitre nibu ye okwäbti.

³⁷ Juankwe niebare kore, ye jarabare nitre nibu yeye angwane, nikani Jesu jiebti mda.

³⁸ Jesukwe mikaninta ñäräre ja jiebti, käkwe niebare ietre:

¿Mun ye tö nibi dreye? niebare kwe ietre.

Angwane nitre nibu ye käkwe niebare mda:

Dirikä, ¿mata nüne mdente? niebare kwetre ie.

³⁹ Abtä Jesukwe niebare mda ietre:

Tita nüne mdente brän tuen, niebare kwe ietre.

Ye erere nikanintre angwane, Jesu nämane mdente ye abko tuani kwetre. Angwane ye näire ñänä okwä namanina kräbkä dere amne niaratre namani Jesu kánti ye näire dere.

⁴⁰ Ni nibu käkwe Juan kukwei nuani, nikani Jesu jiebti, ni ye abko iti kädian nämane Andrés. Andrés ye abko Simón Pedro etba.

⁴¹ Andrés nikaninta angwane, nikaninbö etba Simón känentari. Simón kwanintari ie angwane, niebare kwe ie:

Ni Dianinkä Ngöbökwé kädianta Kristo griegore, ye abko kwanba nunye, niebare Andrékwe Simónye.

⁴² Yebti nikani Simón ngwena nebe Jesu kánti. Simón ye jatabare Jesuye angwane, Jesukwe niebare ie:

Ma abko Simón. Ma Jonás ngobo, akwa mtare mentokwäre ma kä rabadi Cefas arato. Abko kore se, niebare Jesukwe Simónye. (Cefas abko käta "já" niere kukwe arameore abko Pedro nieta griegore.)

Jesukwe Felipe amne Natanael käräbare ja töitike jabe

⁴³ Yebti jändrinane Jesu tö namani rikai kä Galileate, ye erere nikani mda. Namani yete angwane, namani ngätäi Felipebe angwane, niebare kwe ie:

Jakwe. Brän tibe, niebare kwe ie.

⁴⁴ Felipe ye abko Betsaidabo. Andrés amne Pedro abko Betsaidabo arato.

⁴⁵ Jesukwe Felipe ngwiani jabe, yebti Felipe nikani Natanael känene mda. Kwani ie angwane, niebare krörö kwe ie:

Ni Dianinkä Ngöbökwé, ye kwanba nunye. Kukwe Biani Ngöbökwé Moiséye, yebtä Moisékwe tarä tikani niarabtä. Erere arato, nitre Ngöbö kukwei niekä mda mda käkwe tarä tikani niarabtä arato. Ni ye abko José Nazarebo ngobo. Niara abko kä Jesu, ye mden abko kwanba nunye, niebare kwe Natanaeliye.

⁴⁶ Abtä Natanaelikwe niebare mda:

¡Jo! Juta Nazaret käme. ¿Yete abko jändrän kuin jatadre ya? niebare kwe Felipeye.

Angwane Felipekwe niebare mda ie:

Jakwe, brän. Makwe tua ja okwä jenbti, niebare kwe ie.

⁴⁷ Erere Natanael jatani nuke ja ken se kwrere, ye jatabare Jesuye angwane, Jesukwe niebare ie:

Ni israelita töi era metre kite nuke nete. Niara ne abko ni ngökö ñakare, niebare Jesukwe ie.

⁴⁸ Abtä Natanael käkwe niebare mda Jesuye:

¿Mdente ti nukani gare mae amarebti mata niere kore tie ye? niebare kwe ie.

Angwane Jesukwe niebare ie:

Felipe ngämi nüke ma kärere, ye känenkri tikwe ma turi tākänintbe higo krie täni sete, niebare Jesukwe mda ie.

⁴⁹ Abtä Natanael kākwe niebare Jesuye:

¡Dirikä, era bkänä ma abko Ngöbö Odei amne ma Jrei nitre israelitakwe! niebare mda kwe ie.

⁵⁰ Abtä Jesukwe niebare mda ie:

¿Higo krietäni tikwe ma turi tākänintbe, tikwe nini mae, ye aibebtä ti kukwei nibi era makrä ya? Makwe ti tuadi jändrän bäri krikri nuene mda abko tita niere mae, niebare Jesukwe ie.

⁵¹ Yebti Jesukwe niebareta mda:

Ti bike kukwe era erere niere krörö munye: Kä kämbti se munkwe tuadi tikani amne angele rabadi kite timonkwäre amne rabadi nikenta kukwäne abko rabadi nüke ti Ngöbö Odeibtä, Ngöböta tibe mikakäre gare abko Ngöbökwäe bā mikadi tuare munye. Abko kore se, niebare kwe ietre.

2

Jesukwe ñö kwitani uba döire

¹ Yebti mukirare angwane, ni iti kākwe ja mikani gure juta Canáte kä Galileate. Ye kánti Jesu meye nämane arato amne,

² Jesu käräbare arato nitre ja töitikaka benbe, ni iti nämane ja mike gure ye kánti.

³ Jesu nämane yete angwane, uba döi krütani. Abtä Jesu meye kākwe nieba ie:

Uba döi küre jire jökrä, nieba kwe Jesuye.

⁴ Abtä Jesukwe nieba meyeye:

Mama tikwe, kä kitani ti käne abko ngämi nüke tie. ¿Ye ñöbtä abko mata niere kore tie? nieba kwe ie.

⁵ Angwane nitre nämä uba döi dräre, ye ie Jesu meye kākwe nieba:

Niarakwe dre nuemna munye, ie erere munkwe nuen jökrä, nieba kwe ietre.

⁶ Kä ye kánti abko jä dätebare ñö ngwäre nämä kwä ti. Ye abko te nitre israelita nämane ñö köbötikakrä ja mikakäre dbe Ngöbö ngwärekre üke. Já dätebare ñö ngwäre ye kwatirekwatire te ñö nämane niken bäsi galon krä gre bti krä jätä jätä jire abko nämä yete.

⁷ Angwane nitre sribikä yete, ie Jesukwe nieba:

Jä dätebare ñö ngwäre tä yete, ye te ñö keka munkwe, nieba Jesukwe.

Ye erere sribikä kākwe ñö kekaba jändrän ye iti iti jökrä.

⁸ Angwane Jesukwe nieba mda ietre:

Mtare ñö den ruäre, mun rika ngwena. Nita mikani ji dokwäte bietabtä, ye ie munkwe bian, nieba kwe ietre.

Ye erere sribikätre kākwe nuenbare jökrä.

⁹ Angwane ñö nikwitani uba döire Jesu diebti ye ni ji dokwäte bietabtä kākwe bänän nuaba, akwa uba döi ye jatani mdenkri abko ñan rababa gare ie. Akwa nitre sribikä kākwe ñö diani ye aibe ie namani gare. Angwane ni ji dokwäte bietabtä, ye kākwe uba döi bänän nuaba, bti ni ja mikaka gure ye käräba kwe,

¹⁰ kākwe nieba ie:

Ni jökrä käta uba döi bäri kuinquin keke käne ñadre, bti ni nübaibare bietabtä ye tärä uba döi ñaen kabre, ye ngwane uba döi ñakare kuin bianta mrä ñadre nie. Akwa ma abko kākwe uba döi bäri kuin abko ürü ñadre mrä. Ye abko bäri kuin, nieba kwe ni ja mikaka gure yeye.

¹¹ Jesukwe ñö kwitani uba döire juta Canáte Galilea ye abko sribi kri ñan tuabare nuenba kena Jesukwe Ngöbö nämane ben mikakäre gare. Yebtä abko Jesu ütiäte kri bā mikaba tuadre angwane, nitre ja töitikaka ben kākwe tödekaba niarabti.

¹² Yebti Jesu rikaba juta Capernaümte mda angwane, niara meye rikaba siba ben. Erere arato, niara etbakantre amne nun ja töitikaka ben rikaba siba, akwa nünanteba bā jötrö kwe juta Capernaümte.

Nitre jändrän rürümoinkä abko Jesukwe juantari

(Mateo 21.12-13; Marcos 11.15-18; Lucas 19.45-46)

¹³ Abti bieta kädianta Pascua nitre israelitakwe abko jatabara nüke ja ken, aisete Jesu rikaba juta Jerusalénte mda.

¹⁴ Angwane Jesu rikaba ju blitakrä Ngöböbe kánti. Ju ye bäre temen nitre nämä nbi, obeja amne ütú rürümoinke kukwadre Ngöbö käikitakakäre. Erere arato, nitre ngwian kwitakakwitaka nämä tākänintbe mesabtä kä ye kánti arato,

¹⁵ btä Jesu okwä rababa. Angwane Jesukwe kö kánänba ruäre, bti kö ye makäteba kwe, bti rikaba nitre ye juentari jökrä obeja amne nbi kwekwe ben gwaire ju blitakrä Ngöböbe ye bäre mento se kwrere. Amne nitre ngwian kwitakakwitaka abko kán ngwian kitakaba

jökrä tementa kwe se kwrere. Erere arato, mesa bti ngwian nāma mikani ye kwitakaba jökrä temen kwe kån.

¹⁶ Angwane nitre ütü rürümoinkä abko ie nieba krörö kwe:

Jändrän noko denkä jökrä mento nete. ¡Ju ti Rünkwe ye munkwe ñan mika jändrän rürümoinkrä jae! nieba kwe ietre.

¹⁷ Angwane nun ja töitikaka Jesube, ie kukwe nāmane tikani krörö Jesubtä Ngöbö Kukweibtä abko rükabata töre: “Tita ju makwe tarere kri krübäte Ngöbö, aisete tita mokrere bti,” abko rükabata töre nunye.

¹⁸ Nitre jändrän rürümoinkä juantariba jökrä kore Jesukwe angwane, nitre israelita ji dokwäte dokwäte nāma yete, kākwe nieba ie:

Makwe jändrän nuni kore se abko nirekwe kä biani mae kukwe se nuenkrä, ye bā mike tuadre nunye nete, nieba kwetre Jesuye.

¹⁹ Abtä Jesukwe nieba mda ietre:

Ju blitakrä Ngöbökwē ne abko dikente jökrä munkwe, bti mukirare angwane, tikwe mikadita täte, nieba kwe ietre.

²⁰ Abtä nitre israelita ye kākwe nieba mda Jesuye:

¡Joo! Kä gre ketebu bti kwä ti jire sribibare amne ju noko namani bare. ¿Se abko mukirare amne makwe mikareta jökrä täte mata niere ya? nieba kwetre Jesuye.

²¹ Akwa Jesu abko kākwe ñākāba kore, ye abko ja ngrabare bā mikaba kore kwe ju blitakrä Ngöbökwēbtä.

²² Akwa Jesu kāmikaba bti rükabata nire angwane, niarakwe blitaba ye nitre ja töitikaka ben, ie niara kukwei rükabata töre angwane, Ngöbö Kukwei tikani ye rababa era krāke amne Jesu kukwei mikaba era kwetre arato.

²³ Angwane Jesu nāma Bieta Pascuabtä Jerusalén, ye ngwane sribi kri ñan tuabare Jesu rababa nuene kabre Ngöbö nāmane ben mikakāre gare, aisete ni kwati kākwe niara kukwei mikaba era, kākwe tödekaba bti.

²⁴ Akwa Jesu abko ie ni töi ño ño amne nita ja töi kwite jötrö gare jökrä, aisete nitre nāma yete, yebti Jesu nāma tödeke ñakare.

²⁵ Erere arato, ni moto ño ño gare jökrä Jesuye, aisete ni moto ño ño, ye ni ñakare jire iti kä rababa mike gare ie.

3

Jesukwe blitabare Nicodemobe

¹ Kä ye ngwane bati, ni bariseo ütiäte kri nāmane iti abko kädian nāmane Nicodemo. Niara nāma sribire Sanedrinbe nitre israelitakrä.

² Ni ye abko nikani deo Jesu kánti mda, kākwe nieba ie:

Dirikä, mata sribi kri ñan tuabare nuene, yebtä abko Ngöbökwē ma juani dirire nunye abko nūke gare nunye, ñobtä ñan angwane ni btä Ngöbö di ñakare ñan raba sribi nuene jire chi ja di jenbti au, mata nuene ye kwrere, nieba kwe Jesuye.

³ Abtä Jesukwe nieba mda ie:

Ti bike kukwe era erere niere mae abko krörö: Ni brare ya, merire ya ñan däredreta bobukāre Ngöbö köböire angwane, Ngöbökwē ñan gobrandre bti, aisete ñan nūnandi kākēkäre kwe Ngöböbe, nieba kwe ie.

⁴ Angwane Nicodemokwe nieba mda Jesuye:

¿Ni tārā nebe unbre ti ne kwrere abko däredreta ño amarebti mata niere kore tie ye? ¡Ni unbre ti ne kwrere ñan rabadre nikenta bobuta meyebtä, bti därereta bobu kore!

⁵ Angwane Jesukwe nieba mda ie:

Ti bike kukwe era erere niere mae abko krörö: Ni brare ya, merire ya ñan däredreta bobukāre ño köböire amne Ngöbö Üai köböire angwane, Ngöbökwē ñan gobrandre bti.

⁶ Nita dāre ni rün, ni meye kä nebtākwe, ye abko nita dāre niaratre kwrere; akwa nita dāre bobuta Ngöbö Üai köböire ye abko ni üai, ni töi amne ni moto tä neme btin.

⁷ Akwa ti bike kukwe niere mae abko krörö: Ni jökrä däredre bobuta Ngöbö köböire, tita niere, nebtä makwe ñan töbika kri dikaro.

⁸ Ne abko, Ngöbö Üai abko müreta mate ye kwrere, ñobtä ñan angwane müre töta neme matai mdente mdente, ye kánti tä mate. Ye abko, müre ngö tä ruen nie, akwa müre tä kite mdenkri amne tä niken mdente, ye tä nūke gare ñakare nie. Ye kwrere arato, nita dāre bobukāre Ngöbö köböire amne Ngöbö Üai tä sribire ño ño ni itire itire btä, ye tä nūke gare ñakare ni mda mdaye, akwa sribi kwe abko tuata btä, nieba kwe Nicodemoye.

⁹ Angwane Nicodemo kākwe nieba mda Jesuye:

¿Ño köböire kukwe ye rabadre bare amarebti mata niere ye? nieba kwe Jesuye.

¹⁰ Jesukwe nieba mda ie:

¿Ma diriká kri nitre israelita ngátáite abko ie kukwe ne núke gare ñakare ya?

¹¹ Ti bike kukwe era erere niere mae: Kukwe gare kuin tie Ngöböbtá, yebtä tita blite amne tikwe kukwe tuani ja okwá jenbti, ye tita niere munye, akwa ti kukwei mikata era ñakare munkwe.

¹² Akwa kukwe ká nebtá btá tita blite mabe, ye abko tare ñakare, aiseite rúkadre gare mae, akwa ti kukwei ñan tá nebe era makrá. ¿Ye abko, kukweta nakenká ká káinbti, yebtä tikwe blitadre abko makwe mikadre era ño ye?

¹³ Ni ngámi niken jire iti neme Ngöbö kánti ká káinbti abko raba blite kukwe yebtä, akwa ti Ni Ká Nebtä Ngobo ká káinbti jatani núke ká nebtá, aiseite ti raba blite kukwe nebtá mabe.

¹⁴ Mdakäre abko, kira bronse sribebare tbire* abko Moisékwe kaninká kribtä káin ká kaibete nitre israelita bren bren kákwe mikadre ñáräre angwane, Ngöbökwé diandretari angwane ñan krütadre, ye kwrere ti Ni Ká Nebtä Ngobo ne rabadi kaninká kribtä káin,

¹⁵ nire nire kákwe tödekadre tibti abko Ngöbökwé dianditari angwane, nünandi kárekäre kwe Ngöböbe, abkokäre ti ne rabadi kaninká kribtä káin.

¹⁶ Ye kwrere ni Ká Nebtä Ngobo rabadi kaninká káin, ñobtä ñan angwane Ngöbö ara kákwe ni jókrá tarebare kri krübáte, kákwe ja Odei itibe biani müre ketadre kráke, ni jókrá kákwe tödekadre Ngöbö Odei yebti angwane, ñan rabadre ganinte kárekäre Ngöbö okwá báre mento, akwa nünandre kárekäre kwe Ngöböbe, abkokäre Ngöbökwé juani,

¹⁷ ñobtä ñan angwane ñan Ngöbökwé ja Odei juani ni kukwe kámekáme nuenká Ngöbö rüere mikakäre ja tare nike, akwa niara köböire rabadre dianintari, abkokäre juani kwe.

¹⁸ Nire nire kákwe tödekadre Ngöbö Odeibti, ye abko ñan juandre ká ja tare nikakrá kánti Ngöbö okwá báre mento, akwa nire nire tá tödeke ñakare Ngöbö Odei itibe yebti abko Ngöbökwé kukwe úkaninante kráke amne juandi kwe ká ja tare nikakrá ye kánti, ñobtä ñan angwane ñan tá tödeke Ngöbö Odeibti aiseite.

¹⁹ Ngöbökwé kukwe úkaninte kore ni juankäre ká ja tare nikakrá kánti, ñobtä ñan angwane Ngöbö Odei nükani ñotra kwrere ká nebtá Ngöbö mikakäre gare nie, akwa ni ruäre namani ká iko tarere, tö namani nünai janknu ká ikote, kukwe kámekáme nuenkäre janknu Ngöbö rüere, aiseite ñotra ye ñan kani ngábti kwetre.

²⁰ Ye abko, ni jókrá töi kámekáme abko mátáta neme ñotrabtá amne ñan töta neme rikai ñotra tráte. Kukwe kámekáme nuenta kwetre Ngöbö rüere ye ñan gadre ni mda mdakwe, abkokäre töta neme ja rúkaite kore ká ikote.

²¹ Akwa nire nire tá Ngöbö Kukwei kuin metre ye nuene era metre abko tá niken jáme neme ñotra tráte, niarakwe sribi kuin nuenbare Ngöbö köböire, ye ni jókrá kákwe gadre nuäre, abkokäre tá niken jáme ñotra tráte.

Juan Bautista kákwe blitabare Jesubtä

²² Abti Jesu náma Jerusalén, rikabata nun ja töitikaka benbe ká Judea kántita, kánti rababa nünentbe bá jótrö nunbe angwane, nun náma ni mda mda ngökó ñöte ben.

²³ Angwane Juan Bautista abko námáne ni ngökó ñöte arato ká Enónte kánime ká Salim ken, ñobtä ñan angwane ká ye kánti abko ñö okwá námáne kabre. Ye ngwane, ni námáne kite köbö kwatirekwatire amne Juan namani ngökó ñöte.

²⁴ Ye ngwane abko, Juan kita ngámi ngite ká teri angwane, kukwe ye rakakaba kore.

²⁵ Akwa ja bá mikadre ño dbe ñöbti Ngöbö ngwärecri diribare nitre israelitakwe, yebtä ni ruäre nánká Juanbe abko kákwe ja kwetani nitre israelita ruäre ben.

²⁶ Bti nikani, kákwe niebare Juanye:

Diriká, ni náma iti mabe Ñö Jordánbtá sekri sete, btá makwe blitaba, ni ye abko tá ni mda mda ngökó ñöte arato amne ni jókrá nibi niken niara kánti, niebare kwetre ie.

²⁷ Abtä Juankwe niebare ietre:

Ngöbökwé ñan jándrän biandre angwane, ni ñan rabadre jándrän bkáne,

²⁸ aiseite munkwe ti kukwei nuaba, kukwe era erere tikwe nieba krörö: Ti abko ñakare Ni Dianinká Ngöbökwé, akwa Ni Dianinká Ngöbökwé ye rúkadre abko kánenkri ti juani kwe, tikwe nieba metre munye.

²⁹ Yebtä ti bike kukwe bá mike jabtä amne Jesubtä munye abko krörö: Ni iti tá niken ja mike gure angwane, ni ja mikaka gure ye abko ni merire rabadre ben, ye abko kwe. Akwa ni ja mikaka gure ye kukwe muko tá kánime kákwe ni ja mikaka gure ye kukwei nuadre blite angwane, ká rabadre nuäre kri krübáte btá. Ye kwrere ká nena nuäre kri tibtä mtare, ñobtä ñan angwane Jesu abko ni ja mikaka gure kwrere amne ti abko kukwe muko kwrere aiseite.

³⁰ Niara rika neme bári útiáte, ie Ngöbö tö amne ti abko jatadre nementa útiáte ñakare, ie Ngöbö tö arato. Abko kore se, niebare Juankwe ietre.

* **3:14 bronse sribebare tbire.** Dre nakaninká abko tá tikani Números 21.4-9 yebtä.

³¹ Jesu kā káinbti jatani abko bári útiáte ni jökrä bti ta; akwa ni därebare kā temenbtä Juan Bautista kwrere, ye ie kukwe kā temenbtä aibe gare, aiseté jändrän kā temenbtä aibebtä blitata kwe. Akwa ni kā káinbti jatani ye abko bári útiáte ni jökrä bti ta.

³² Ni kā káinbti jatani kákwe jändrän tuani amne kukwe nuani kwe kā káinbti, yebtä tā blite, akwa ni kwati ñan tā niara kukwei mike era.

³³ Akwa nirekwe niara kukwei mikadre era angwane, Ngöbö abko tā kukwe era metre niere abko mikata gare ni mda mdaye,

³⁴ ñobtä ñan angwane ni juani Ngöbökwé, ye abko tā Ngöbö kukwei era niere, ñobtä ñan angwane Ngöbökwé ja Úai mikani tāte jökrä btä, aiseté tā blite kore.

³⁵ Ni juani Ngöbökwé abko Ngöbö Odei amne, Ngöböta ja Odei tarere amne jändrän jökrä mikani gare kwe ie.

³⁶ Ye aiseté, nire nire kákwe tödekadre Ngöbö Odeibti ye kákwe nünandi kärekwé Ngöböbe, akwa nire nire kákwe trö kwitadre Ngöbö Odeiyé ye abko kákwe ñan nünandre kärekwé Ngöböbe, akwa Ngöbökwé mikadi ja ngie nuen tare krübäte kärekwé.

4

Jesukwe blitabare meri Samariabobe

¹ Yebti ni rababa niken bári kwati mda Jesu jiebtí amne Jesu rababa ni ngökö bári kwati ñöte Juan Bautista ngwä abko gani nitre bariseokwe.

² Akwa Jesu ara jire abko nämá ni ngökö ñakare ñöte, akwa nun ja töitíkaka Jesube abko nämá ni ngökö ñöte Jesu diäre.)

³ Nitre bariseo kákwe kukwe gani kore Jesubtä, ye gaba ni Dänkienkwe angwane, niara nämá kā Judeate, kánti kā mikakaba kwe, bti rikabata Galileate mda.

⁴ Akwa rikadre kā Samariate ta,

⁵ aiseté juta kā Sicar kā Samariate, kánti Jesu rikaba nebe. Kira abko Jacobokwe kā biani ngobo Joséye, ye abko nämá kánime juta Sicar ken

⁶ amne, ñö okwä Jacobokwe nämá yete, ye kánti Jesu rikaba. Akwa Jesu rababa dräre dikaka kiseté, abtä rababa tákänintbe ñö okwä ye kánti. Näná jataba nüke ruäre káin angwane, Jesu rababa tákänintbe yete.

⁷⁻⁸ Akwa nun ja töitíkaka ben abko rikaba mrö kökö jae jutate, aiseté Jesu nämá kaibe yete. Ye btäräbe meri Samariabo jataba nüke iti ñö okwäte yete ñö den jae angwane, Jesukwe niebare ie:

Ñö ngwen chi tomnane tie, niebare kwe meri yeye.

⁹ Akwa ni israelita abko ja gete ñakare jire chi nitre Samariabobe, aiseté meri ye namani töbice kri Jesu kukweibtä, kákwe niebare krörö mda ie:

Nitre israelita tā ja gete ñakare jire chi nun Samariabobe, ¿ye ñobtä abko ma israelita amarebti ti Samariabo abko ie ma kite ñö kärere ñadre jae ye? niebare kwe Jesuye.

¹⁰ Abtä Jesukwe niebare mda ie:

Jändrän kuin tā makrä Ngöbökwé amne nireta blite mabe, ye rabadre gare mae angwane, makwe ñö nire* kärekwé ye kädadre tie amne tikwe biandre mae, niebare Jesukwe ie.

¹¹ Angwane meri ye kákwe niebare Jesuye:

Jändrän ñakare ñö dankakrä mae amne ñö okwä noko mente nguse, ¿se abko ñö nire kärekwé makwe diandre mdente tikrä se?

¹² Mdakäre abko, nun mräkä kira Jacob kákwe ñö okwä noko mikaninte nunkrä amne niarakwe ñö noko ñani. Erere arato, niara ngäbriänkä amne jändrän kwekwe kákwe ñö noko arabe ñani. ¿Akwa mtare abko ja ruen bári Jacobokrä mae ya? niebare kore kwe mda ie.

¹³ Abtä Jesukwe niebare mda ie:

Ni jökrä kätä ñö noko ñaen abko ie tomna tā nementa.

¹⁴ Akwa ñö bianta tikwe ye abko nire nire kákwe ñadre abko ie tomna ñan rabadreta jire mda, ñobtä ñan angwane tikwe ñö biandre abko ñadre kwe, ñö ye abko rabadi neen kärekwé btä, kákwe mikadi nüne kärekwé Ngöböbe, niebare kwe meri yeye.

¹⁵ Angwane meri ye kákwe niebare mda Jesuye:

Tomna ñan rabadreta mda tie amne ti ñan jatadreta ñö mda denta jire chi nete, abkokäre ñö nire kärekwé bianta makwe, mata niere, ye ari bien tie, niebare kwe ie.

¹⁶ Angwane Jesukwe niebare mda ie:

Nän ma kwäräi kärere, ben ma jatata nete, niebare kwe ie.

¹⁷ Abtä meri ye kákwe niebare mda ie:

Ti kaibe. Ti kwäräi ñakare, niebare kwe Jesuye.

Jesukwe niebare ie:

* **4:10 Ñö nire** kätä nüne kärekwé Ngöböbe bá mike.

Ma kaibe, ma kwäräi ñakare makwe nini, ye abko kukwe era erere nini kuin makwe,
¹⁸ ñobtä ñan angwane makwe ja kwäräi mikanina nirike jire amne, mtare mata ni brare
 mdara jire ben, akwa munkwe ñan ja mikani gure metre, aisetse ma gure ñakare, makwe
 nini metre kore, niebare kwe meriye.

¹⁹ Jesukwe ñäkäbare kore meri yeye angwane, meri ye käkwe niebare mda ie:

Ti Dänkien, ma abko ni Ngöbö kukwei niekä era metre nibi tuen tie.

²⁰ Akwa nun mräkä Samariabo kirakira käkwe Ngöbö käikitaninkä ngitio nebti, akwa nun
 rikadre Ngöbö käikitekä juta Jerusalénte abko mun israelita tä niere, niebare kwe Jesuye.

²¹ Angwane Jesukwe niebare mda ie:

Meri, ti kukwe mike era makwe. Kä nükerä angwane, munkwe ni Rün Ngöbö käikitadikä
 mdente erere rabadi dbe Ngöbökrä, aisetse mun rikadre känime ngitio Gerizim nokobti ya o
 mun rikadre Jerusalén Ngöbö käikitakakäre, ye abko ñan rabadre ütiäte.

²² Mdakäre abko, Ngöbö gare ñakare metre mun Samariabo, aisetse munta nire käikitekä
 ye gare ñakare metre munye; akwa nun israelita abko käta nire käikitekä, ye gare metre
 nunye, ñobtä ñan angwane ni diantarikä abko jatadi nun israelitakri.

²³ Akwa mtare kä jatadi amne kitera nüke angwane, nire nire tö Ngöbö käikitaikä ye abko
 käkwe nuendi era metre Ngöbö Kukweita dirire ye kwrere amne Ngöbö Üai köböire. Ni
 Ngöbö käikitakaka kore abko Ngöböta känene jakrä,

²⁴ ñobtä ñan angwane Ngöbö abko üai, ye aisetse nire nire tö Ngöbö käikitaikä abko käkwe
 nuen era metre Ngöbö Kukweita dirire ye kwrere amne Ngöbö Üai köböire. Abko kore se,
 niebare kwe meri yeye.

²⁵ Abtä meri ye käkwe niebare mda Jesuye:

Ni Dianinkä Ngöbökwé (kädekata Kristo kukwe griegore) abko rükadre, ye garera tie amne,
 niara rükadre angwane, kukwe era erere niedi jökrä kwe nunye kukwe nebtä, niebare kwe
 ie.

²⁶ Angwane Jesukwe niebare ie:

Ni btä mata blite ye abko ti ara. Ti ne mden käta blite mabe ye, niebare mda kwe ie.

²⁷ Ye btäräbe nun ja töitikaka Jesube jataba nüketä angwane, Jesu nämäne blite meribe,
 yebtä nun ñan töi rababa krütare. Akwa meri ye abko tö namani dreye amne Jesu nämäne
 dre kädriere ben abko nin ja rükaba töre jire nunye ngwentari ie.

²⁸ Akwa meri ye käkwe kantra mikateba, bti rikabata jutate, käkwe niebare nitre jutate
 yeye:

²⁹ Tikwe kukwe nuenbare kaibe tiebe, ye abko ni iti käkwe nini jökrä tie, aisetse ye abko
 Ni Dianinkä Ngöbökwé ruen tie abko mun jakwe tuen, niebare kwe.

³⁰ Abtä nitre nünanka juta yete jataba jökrä Jesu kánti.

³¹ Akwa nitre jutate jataba, ye ngämi nüke Jesu kánti, känenkri nun ja töitikaka Jesube
 rababa niere ie:

Dirikä, mrö kwete chi, nun nämä niere ie.

³² Akwa Jesukwe nieba nunye:

Mrö tärä keteti kwetadre tie abko gare ñakare munye, nieba kwe nunye.

³³ Angwane nun ja töitikaka ben rababa niere krörö jae kwärükwäri:

¿Ni mda nura mrö ngwena kwetadre ie ya ño yere? nun rababa niere jae kwärükwäri.

³⁴ Akwa Jesu abko käkwe niebata mda nunye:

Ngöbö ti juanka tö dreye tikrä amne sribi ye abko tikwe mikadre bare täte jökrä, ye abko
 mrö kwrere tikrä.

³⁵ Mdakäre abko, mun abko tä niere: Kä tä sö kräbkä jire nura ngwä ötakrä, munta niere.
 Akwa ni jökrä kä nebtä abko tire Ngöbökwé amne nire nire tä juto biare tödeke tibti abko
 nura nena biare ötadre kwrere, aisetse nura tirete ye nena biare ötadre, ye munkwe mika
 ñäräre abko tita niere nunye.

³⁶ Mtare, nire nire tä biare tödeke tibti, ye nitre nura ngwä ötaka tä ngwena tödekakäre tibti
 abko ie sribi ütiä bianta. Erere arato, nitre nura ngwä ötaka käta ni jökrä ngwena tie tödeke
 tibti, rabadre nüne kärekäre abkokäre. Yebtä abko ni nura nöka käta Ngöbö Kukwei mike
 gare ni mda mdaye amne ni juto biare tödeke tibti, ye nitre nura ngwä ötaka käta ngwena
 tödeke tibti käkwe kä ngwiandre nuäre gwaire jabtä abkokäre.

³⁷ Ye abko, kukwe nieta krörö: Ni iti käta nura nökö, akwa ni mda abko käta ngwä ötö,
 abko nieta metre kore.

³⁸ Ye kwrere, munkwe nura nökanä ñakare tare, akwa tikwe mun juanba nura ngwä ötö.
 Ni mda mda käkwe sribibare kri sribi Ngöbökwébtä amne mun abko nikani jirekäbe sribi
 kwekwe ngwä ötö. Abko kore se, nieba Jesukwe nun ja töitikaka ben yeye.

³⁹ Jesu nämäne juta Sicar yete angwane, ni kwati Samariabo nünanka yete käkwe tödekani
 Jesubti, ñobtä ñan angwane meri ben Jesukwe blitabare ye abko namani niere: Ni menteni

gare ñakare tie, akwa kukwe nuenbare kaibe tiebe tikwe abko nini metre jökrä kwe tie, niebare kwe. Yebtä ni kwati käkwe tödekaba Jesubti.

⁴⁰ Yebti nitre Samariabo rükaba Jesu kánti angwane, Jesu rabadre basare ietre abko rababa ribere kisere ie, ye erere Jesu rababa köböbu juta Sicar yete.

⁴¹ Angwane ni kwati käkwe niara kukwei nuaba, abtä ni kwati käkwe tödekaba bti.

⁴² Angwane nieba krörö kwetre meri yeye:

Mtare ñan kukwe nieba makwe jabtä nunye aibe köböire niara mikata era nunkwe, akwa nun ara jire käkwe niara kukwei nuri blite, aisete niara abko ni jökrä töi kämekäme Ngöbö rüere Diantarikä abko nena gare era metre nunye, amne niarabti nunta tödeke, nieba kwetre meri yeye.

*Sribikä jreikrä abko ngäbäkre kwe Jesukwe mikaninta quinta
(Mateo 8.5-13; Lucas 7.1-10)*

⁴³ Yebti kä rikaba köböbu ta angwane Jesu näma juta Sicar, rikabata kä Galileate mda.

⁴⁴ (Akwa käre Jesu ara jire näma niere krörö jabtä: Ni Ngöbö kukwei niekä abko mikata ütiäte ñakare ja käite, näma niere.)

⁴⁵ Akwa Jesu rababa kä Galileate angwane, nitre nünanka yete käkwe kaba ngäbti kuin, ñobtä ñan angwane niaratre janbare arato Bieta Pascuabtä Jerusalén angwane, Jesukwe sribi kri ñan tuabare nuenbare ye abko tuani jökrä kwetre amne tö namani tuai mda, aisete kaba ngäbti kuin kwetre.

⁴⁶ Jesu rikaba nebe juta Canäte kä Galileate yete. Juta Canä kánti Jesukwe ñö kwitani uba döire, ye kánti rababata. Angwane abko ni näma iti sribikä ütiäte kri jreikrä abko kan ngäbäkre näma bren dikaro juta Capernaümte.

⁴⁷ Angwane Jesu nämane kä Judeate abko nukaninta kä Galileate abko sribikä ütiäte jreikrä ye käkwe gani angwane rikaba ja tuakäre Jesube. Rükaba Jesu kánti, ñobtä ñan angwane ngäbäkre kwe nämane bren jume dikaro amne jatanina krüte, aisete rababa Jesu ngwen kisere neme ja gwiriete ngäbäkre ye mikakäreta quinta.

⁴⁸ Abtä Jesukwe nieba ni jökrä näma yete ie:

Sribi ñan tuabare nuenta tikwe, Ngöböta tibe bä mikakrä, ye ñan rabadre bare Ngöbö diebti tie angwane, mun nünanka nete ye käkwe ñan tödekadre jire chi tibti, nieba kwe ietre.

⁴⁹ Akwa sribikä ütiäte jreikrä ye käkwe nieba mda Jesuye:

Nane ngäbäkre tikwe krüta tikän, ye känenkri brän jötrö ti kánti, nieba kwe ie.

⁵⁰ Angwane Jesukwe nieba mda ie:

Ma ngobo rabadita quinta, aisete nänta ja gwiriete, nieba kwe ie.

Angwane ni ye käkwe Jesu kukwei mikaba era, aisete rikabata ja jiebti.

⁵¹ Nämane dikekä ji ngrabare ja jue kukwäre angwane, nitre sribikä kwe jatani, nükani ngätäi ben, käkwe niebare ie:

¡Ngäbäkre makwe nibirate quinta! niebare kwetre ie.

⁵² Abtä niarakwe niebare mda:

Kä nuäi angwane ja ki ruenta mobe ie, niebare kwe.

Jändrin, ñänä okwä krati dere angwane, drangwan rikaba btä, niebare kwetre ie.

⁵³ Angwane ñänä okwä ye näre dere Jesukwe niebare krörö ngäbäkre rün yeye: Ma ngobo rabadita quinta, niebare kwe ie, ye abko nukaninta töre ie amne niara btä mräkä kwekwe erere käkwe tödekani jökrä Jesubti.

⁵⁴ Ne abko Jesu näma kä Judeate, rükabata Galileate angwane, sribi kri ñan tuabare nuenba bobukäre kwe Ngöbö nämane ben bä mikakäre.

5

Jesukwe ni bren mikaninta quinta ñö okwä Betesda kánti

¹ Yebti köbö mdara jire te, nitre israelita jatata bieta mda nuene Ngöbö käikitakakrä angwane, Jesu rikabata Jerusalén mda.

² Angwane Jerusalén yete abko jukweta kwati abko kädianta Jukwe Obejakwe. Känime jukwe ye ken ñö okwäta kwati abko kädianta Betesda hebreore amne jukäta kwärike ñö okwä ye bäre temen.

³ Jukä ye täni ni bren bren näma kwati abko krörö: Ni okwä kä drünente, ni nakwente amne ni ruen ñakare ngrabare aisete dikekä ñakare abko näma kitanintbe tementa yete. [Ñö ye abko nämane ngibiare kisere,

⁴ ñobtä ñan angwane nane nane angele nämane kite timonkwäre, kä nämane ñö mike ngrenkä angwane, ni bren rikadre käne ñöte abko rabadreta quinta, aisete nämane ñö ngibiare kisere.]*

* 5:4 Kukweta tikani corcheta ngätäite abko ñan tä tikani manuscrito bäri kuinkuin btä.

⁵ Ni bren bren ye ngätäite abko ni nämä iti abko nikani bren kä kwä gre bti kwä jätäbti kwä kwära abko nämä siba.

⁶ Ni ye nämä kitanintbe temen yete, btä Jesu okwä rababa angwane, kä raire niara nikani bren nike abko ben nämä nuke yete abko Jesukwe gaba btä angwane, nieba kwe ie:

¿Ma tö rabaita kuinta ya? nieba Jesukwe ie.

⁷ Angwane ni bren ye käkwe nieba mda Jesuye:

Ti Dänkien, ñö okwä se tä kite ngrenkä batire batire kukwäne angwane, ni mda ñakare ti mikaka te, aiseté käre ti töta neme rikai ñö okwä nokote angwane, ni mda tärä niken käne te, aiseté käre tita nemente ye, nieba kwe ie.

⁸ Angwane Jesukwe nieba mda ie:

Nän krö, jänkwata makwe ye den kisete, ben ma rika dikekä, nieba Jesukwe ie.

⁹ Ye btäräbe ni ye rababata kuinta batibe, käkwe jänkwata jakwe dianba kisete, bti rikaba dikekä kwäräkwärä se kwrere. Akwa ye näire abko köbö jadükakrä te ni ye rababata kuinta.

¹⁰ Ye aiseté ni bren rababata kuinta, ye ie nitre israelita ji dokwäte käkwe nieba:

Köbö jadükakrä mtare, ye te makwe jänkwata makwe ye ngwandre ñakare jire, ¿ye ñöbtä mata ngwena ye? nieba kwetre ie.

¹¹ Abtä ni ye käkwe nieba nitre israelitaye:

Ni ti mikakata kuinta käkwe nini krörö tie: Jänkwata makwe ye den kisete, ben nän dikekä, nini kwe tie, erere tita nuene, nieba kwe ietre.

¹² Angwane nitre israelita ji dokwäte ye käkwe nieba mda ni yeye:

¿Jänkwata makwe ye den kisete, bti nän dikekä, ye nirekwe nini mae? nieba kwetre ie.

¹³ Akwa nirekwe mikabata kuinta abko ñan rababa gare ie, ñöbtä ñan angwane Jesukwe niara mikaninta kuinta angwane, ni nämä kwati, ye kanti Jesukwe kä mikakaba kä bube ngware.

¹⁴ Yebti ni bren mikabata kuinta Jesukwe ye nämä ju blitakrä Ngöböbe kanti abko kwanba Jesuye angwane, Jesukwe mäträba btä, käkwe nieba ie:

Tuen, mtare ma nenante kuinta Ngöbö diebti, akwa nane kukwe mda rakaka bäri tare mabtä, ye ngäniene makwe ñan ja mika ngite Ngöbö rüere mda, nieba kwe ie.

¹⁵ Angwane batibe Jesukwe niara mikaninta kuinta, ye abko rikaba, käkwe niebare nitre israelita ji dokwäte yeye.

Ngöbö Odei köböire ni raba nüne kärekäre Ngöböbe

¹⁶ Ye kwrere Jesu nämä sribi nuene köbö jadükakrä näire, abtä nitre israelita ji dokwäte rababa nän kisere Jesu rüere.

¹⁷ Akwa blitaba kwetre Jesube angwane, Jesu abko käkwe nieba krörö ietre:

Ti Rün tikwe tä sribire käre abti kä nuke mtare abko erere tita sribire arato, nieba kwe ietre.

¹⁸ Nebtä abko bäri nitre israelita ji dokwäte tö rababa Jesu müre ketai mda, ñöbtä ñan angwane köbö jadükakrä ye abko Jesu ñan namani mike ütiäte jae, namanintre nütüre. Bärire mda abko, Ngöbö abko ja Rün jakwe Jesu rababa niere, yebtä abko Jesu nämä ja mike Ngöböre abko dokwäre tö rababa Jesu müre ketai.

¹⁹ Angwane Jesukwe nieba mda ietre:

Kukwe era erere ti bike niere munye: Ti, Ngöbö Odei ne ñan raba jändrän nuene jire chi ja töi jenbti, akwa ti Rün dre dre nuene, ye erere ti Ngöbö Odei tä nuene, ñöbtä ñan angwane jändrän jökrä nuenta ti Rünkwe ye erere tita nuene.

²⁰ Ye ñöbtä ñan angwane ti Rün kätä ti niara Odei tarere amne ti Rün kätä dre dre nuene, ye erere tä mike gare jökrä tie. Ye abko, ni bren mikaninta kuinta tikwe, yebti ta sribi bäri krikri ñan tuabare munkwe abko ti Rünkwe mikadi tuadre munye ti köböire, abtä mun ñan töi rabai krütare.

²¹ Ti Rün kätä ni krütani miketa nire amne tä nebe nüenta, ye kwrere arato ti, Ngöbö Odei ne tö rabadre nire nire mikaita nire, ye erere tikwe mikadita nire.

²² Ti Rün kätä kukwe ükete ñakare ni kä nebtä kräke, akwa ti Ngöbö Odei ne kisete sribi mikani kwe, kukwe ükatekäre kä mrä angwane ni kä nebtä kräke,

²³ Ni jökrä kätä ti Rün mike ütiäte kri, ye kwrere ti, Ngöbö Odei ne mikadre ütiäte kri kwetre amne käikitadrekä kri kwetre arato, abkokäre kä biani kwe tie kukwe ükatekäre. Ye abko, nire nire käkwe ñan ti Ngöbö Odei ne mikadre ütiäte jae, ye ngwane ti Rün käkwe ti juani ye mikata ütiäte ñakare kwetre arato.

²⁴ Kukwe era erere ti bike niere mda munye abko krörö: Tita blite ye nire nire tä kukwe nuen amne tä ketete ja olote amne ni ti juanka, yebti tä tödeke, ni ye abko tä neme nüenta kärekäre Ngöböbe amne Ngöbökwé ñan juandi kä ja tare mikakrä kanti, ñöbtä ñan angwane niara ngämi tödeke tibti, känenkri nämä ne ni ngwäkäre kwrere, akwa tödekabtä tibti nükan nire kena.

²⁵ Akwa kukwe mdara jire era erere ti bike niere munye abko kä kitera nuke mtare angwane, ni ngwäkäre ie ti Ngöbö Odei kukwei jaradi angwane, nire nire käkwe ti Ngöbö Odei kukwei nuadre, bti tödekadre kwe tibti, ye abko rabadi nüne kärekäre Ngöböbe,

²⁶ ñobtä ñan angwane Ngöbö di färä ni mikakrä nire, ye kwrere arato kä biani kwe tie ni mikakäreta nire.

²⁷ Erere arato, kä biani täte jökrä kwe tie kukwe ükatekäre ni mda mda kräke, ñobtä ñan angwane ti abko Ni Kä Nebtä Ngobo, aiseite kä biani kwe tie sribi ne nuenkäre.

²⁸ Tita kukwe niere, yebtä munkwe ñan töbika krübäte dikaro, ñobtä ñan angwane kä jatadi köböitira jire abko te ni krütani doboi mikani, ie ti Ngöbö Odei ne kukwei jaradi doboti angwane,

²⁹ rükadita nire jökrä. Akwa nire nire käkwe sribi nuenbare kuin Ngöbökrä abko rükadita nire nünakäre kärekäre Ngöböbe amne, nire nire käkwe kukwe nuenbare käme Ngöbö rüere abko rükadita nire ja tare nikakäre kärekäre Ngöbö okwä bäre mento.

³⁰ Mdakäre abko, ti ñan raba kukwe nuene jire chi ja töi jenbti, aiseite ti Rünta kukwe ükatemna ño tie ni mda mda kräke, ye erere tita ükete. Amne tita kukwe ükete kuin metre, ñobtä ñan angwane ti ñan tö kukwe nuein jire chi ja töi jenbti kä ngwiankrä nuäre jabtä, akwa ti tö ti Rün ti juanka moto mikai nuäre, aiseite niara töta neme dreye, ye erere tita nuene.

Kukwe niebare Jesu kräke

³¹ Mdakäre abko, ti aibe käkwe blitadre jakrä au, ye ngwane ti kukwei ñan rabadre tuen metre munye,

³² akwa ti Rün arato tä kukwe era erere niere tikrä arato. Niara abra tä kukwe niere metre tibtä abko gare kuin tie.

³³ Ye abko, bati munkwe ni juani kukwe ngwentari Juan Bautistaye angwane, Juankwe blitabare kuin era metre kukwe erabtä tikrä.

³⁴ Ye abko, ñan ni mda mda käkwe blitadre tikrä abko ütiäte tikrä, aiseite Juankwe blitabare abko tita niereta. Akwa Juankwe kukwe niebare tibtä, ye munkwe mikadre era, köböire mun rabadre dianintari, abkokäre tita Juan kukwei niereta munye.

³⁵ Juan abko nükani ñotra kwrere abko trä namani ngitiekä mun ngätäite, kä namani kukwe era erere niere tibtä angwane, bä jötrö mun tö namani käi ngwen nuäre jökrä jabtä Juan kukwei nuare abti mun ñan tö namani kukwei nuai mda.

³⁶ Akwa ni mda mda blitaka bäri kuin tikrä Juan ngwä abko nere: Ti Rünkwe sribi nuemna bätäkä ngwarbe tie, ye erere tita nuene. Ye abko, ti Rünkwe ti juani era metre abko sribi ye këta bä mike tibtä.

³⁷ Erere arato, ti Rün ti juanka ye abko tä blite metre tikrä. Akwa mun abko käkwe ñan ti Rün kukwei nuabare jire chi amne niara bä ño abko mun tuen ñakare amne

³⁸ ti Rün kukwei neketete ñakare munbtä, ñobtä ñan angwane ti juani ti Rünkwe abkobti mun ñan tä tödeke, aiseite ti Rün kukwei ñan tä neme munbtä.

³⁹ Ye abko, munta ja töitike krübäte Ngöbö Kukweibtä, ñobtä ñan angwane ye köböire mun rabadre nüne kärekäre abko munta nütüre, akwa Ngöbö Kukwei ara këta blite tibtä,

⁴⁰ akwa ti nebti mun ñan tö tödekai nünakäre kärekäre Ngöböbe.

⁴¹ Mdakäre abko, ni mda mda käkwe ti mikadre ütiäte, käkwe ti käikitadrekä, ye abko ñakare ütiäte tikrä,

⁴² akwa mun abko gare kuin jökrä tie abko krörö: Munta Ngöbö tarere ñakare, ye gare kuin tie munbtä,

⁴³⁻⁴⁴ ñobtä ñan angwane mun abko tä ja käikitekä kwärikwäri amne Ngöbö itibe käkwe mun käikitadrekä, yebtä munta töbike ñakare, aiseite ¿mun rabadre tödeke ño tibti? Ni mda mda jatadre kukwe ükaninte au niere mun moto mikakäre nuäre, ye abko munkwe kadre ngäbti jäme jötrö, akwa ti abko jatani ti Rün käbti, niara kukwei niere metre munye angwane, mun ñan tö ti kain ngäbti.

⁴⁵ Akwa kä mrä angwane, ti näin mun kite ngite ti Rün ngwärekre munkwe ñan nütü tibtä, ñobtä ñan angwane Moisés, btä munta ja töi mike, Moisés ye ara käkwe mun kitadi ngite ti Rün ngwärekre,

⁴⁶⁻⁴⁷ ñobtä ñan angwane mun ñan tö tödekai tibti. Akwa Moisés käkwe färä tikani tibtä abko munta mike ñakare era jae. Ye ti abko kukwei mikadre era ño jae munkwe amarebti Moisékwe färä tikani tibtä ye mikadre era munkwe, ye ngwane munkwe ti kukwei mikadre era jae arato amne munkwe tödekadre tibti, ñobtä ñan angwane Moisékwe färä tikani tibtä. Abko kore se, nieba Jesukwe nitre israelita ji dokwäteye.

6

Jesukwe ni mili krärike bukani

(Mateo 14.13-21; Marcos 6.30-44; Lucas 9.10-17)

¹ Abti bati Jesu rikabata Galilea mda. Abti Jesu rikabata Ñö Okwä Kri Galilea kwäräkri. (Ñö okwä ye arabe kädianta Tiberias arato).

² Angwane ni rikaba kwati Jesu jiebti, ñöbtä ñan angwane Jesu rababa sribi kri ñan tuabare nuene Ngöbö nämane ben bä mikakäre, kä rababa ni bren bren miketa quinta nitre ye okwäbti, yetari rikaba Jesu jiebti.

³ Angwane Jesu rikaba ngitiohtë mintokwäre, kánti rababa tákänintbe temen nun ja töitikaka benbe.

⁴ Kä ye ngwane abko bieta nitre israelitakwe kädianta Pascua, ye köböi jatabara nuke ja ken.

⁵ Akwa Jesu rababa tákänintbe dirire ietre. Yebti niara kákwe nikraba angwane, ni nämä näin kwati jiebti, yebtä okwä rababa angwane, nieba kwe Felipeye:

¿Ni kwati se kräke nikwe ban kökadre mdente, mata nütüre? nieba kwe ie.

⁶ Jesu abko kákwe dre nuendi abko rababara gare kuin ie, akwa Felipekwe dre niedre abko Jesu tö rababa gai, kákwe nieba kore ie.

⁷ Angwane Felipekwe nieba Jesuye:

Ngwian ganaindre sö krä kwä jire rabadre nikwe akwa, ngwian ye näre ñan rabadre täte jire chi mrö kökkrä biandre kiakia nitre kwati seye, nieba kwe ie.

⁸ Ye btäräbe Simón Pedro etba Andrés ja töitikaka Jesube arato kákwe nieba Jesuye:

⁹ Ngäbäkreta iti nete abko kwe sebada bainta kunrike amne gwa nötare tä krobu kwe, akwa ¿se abko rabadre täte ño nitre kwati bti se? nieba kwe ie.

¹⁰ Abtä Jesukwe nieba mda:

Nitre ye rabadre tákänintbe jökrä temen niere ietre munkwe, nieba kwe.

Angwane kä ye kánti abko kä mikäre temen, kánti nitre ye rababa tákänintbe jökrä. Nitre brare brare aibe nämä mili krärike jire yete.

¹¹ Angwane ban nämä kunrike ngäbäkrekwe, ye Jesukwe dianba kisete, kuin nieba btä kwe Ngöböye, bti nitre nämä tákänintbe temen, yebti dräiba kwe. Erere arato, gwa dräiba kwe amne ni itire itire tö rababa mröi nuäi nuäi, ye erere bianba kwe ietre.

¹² Yebti nitre ye rababa trine trine jökrä angwane, Jesukwe nieba nun ja töitikaka benye:

Ban oto nebeta se ñan rikadre ngwarbe jire chi, abkokäre üekrö jökrä munkwe, nieba kwe.

¹³ Ye erere bkänä, sebada bain oto rabateba, ye nunkwe ükkröba kutia krikri kwä jätäbti kubu jire.

¹⁴ Sribi kri ñan tuabare nuenba Jesukwe Ngöbö nämane ben mikakäre gare, ye abko nuenbare kwe nitre kwati ye okwäbti angwane, niaratre rababa niere jae kwärükwäri:

Ni Ngöbö kukwei niekä rükadre kä nehtë niebare Moisékwe abko ara tä nete ñan ñan, rababa niere jae kwärükwäri.

¹⁵ Akwa niaratre tö namani Jesu ngwian kisere mikakäre jreire, ye gaba btätre Jesukwe. Abtä Jesu rikabata jirekäre nementa ngitiohti minti rabakäre kaibe yete.

Jesukwe dikakabare ñöbti

(Mateo 14.22-27; Marcos 6.45-52)

¹⁶ Yebti kä jatata iko angwane, nun ja töitikaka Jesube abko jatabata motokwäre nuketa ñö okwä kánti.

¹⁷ Ye kánti ru nämä kratu, te nun rükaba. Jesukwe nun juanba juta Capernaümte abko erere ru yete nun rankwaba, bti nun rikaba ñö okwäbti. Nun rikaba angwane, kä rababara iko, akwa Jesu ngämi nuketa rute.

¹⁸ Nun rikaba, ye btäräbe müre jatata mate ribi ja dibti, kä rikaba ñö kitekä nekwäre sekwäre angwane,

¹⁹ nun abko rikabara möbe ñöbti, bäsi kilometro krärike, krä ti näre angwane, Jesu nämä dikekä ñöbti. Jesu nämä dikekä ñöbti, ye jatata nuke ru ken nun kánti, btä nun okwä rababa. Abtä kä jürä rababa kri nunbtä.

²⁰ Angwane Jesukwe nieba mda nunye:

Tita näin, aisetu mun ñan rekwetaka tibtä, nieba kwe.

²¹ Angwane kä rababa nuäre nunbtä Jesu kare ngäbti rute. Ye btäräbe nun rababa ñö köräbti juta Capernaümte.

²² Yebti jändrinane angwane, ru nämä kratibe abko te nun ja töitikaka Jesube rikaba, akwa Jesu abko rikaba ñakare rute nunbe, ye abko nitre kwati rababa ñö okwä kwäräkri ye kákwe gaba.

²³ Ye btäräbe ru mda mda nämane juta Tiberiate abko nükani neme känime, Jesukwe kuin nieba banbtä, bti dräiba kwe, ye ken ru namani.

²⁴ Angwane Jesu nämä ñakare yete amne nun ja tötikaka ben nämä ñakare yete, ye nitre kwati kākwe gaba angwane, rankwaba arato rute, rikaba arato juta Capernaüm kukwäre Jesu kënantari.

Jesu abko ban ni mikakäre nüne käreäre

²⁵ Ye erere bkänä, rikaba nebe ño okwä kwäräkri, kánti Jesu kwanba ietre angwane, nieba kwetre ie:

¿Dirikä, ma nükani ñongwane nete? nieba kwetre ie.

²⁶ Angwane Jesukwe nieba mda ietre:

Ti bike kukwe era erere niere munye. Sribi kri ñan tuabare tikwe nuenba mun okwäbti Ngöböta tibe bä mikakäre, abkotari munta ti kënantari ñakare. Akwa tikwe mun bukaba trine trine bante, aibetari munta näin ti jiebtu abko ti tö nibi niei munye.

²⁷ Akwa mrö tä niken ngwarbe jötrö te tikwe mun bukaba, ye kräke munkwe ñan sribi, akwa mrö kākwe ni mikadre nüne käreäre Ngöböbe, ye kräke munkwe sribi. Mrö ni mikakrä nüne käreäre, ye abko ti Ni Kä Nebtä Ngobo aibe kākwe biandre munye, ñobtä ñan angwane ti abko dbe Ngöbö ti Rün ngwäreki abko Ngöbö ti Rün kākwe bä mikanina tibtä, nieba Jesukwe ietre.

²⁸ Abtä nitre ye kākwe nieba mda Jesuye:

¿Nunkwe sribi mden nuendre, ie Ngöbö tö abko nun tö gai? nieba kwetre ie.

²⁹ Angwane Jesukwe nieba ietre:

Ti abko juani Ngöböke. Tibti munkwe tödekadre, ie Ngöbö tö, aiseite ye aibe nuendre munkwe, nieba kwe ietre.

³⁰ Abtä nieba mda kwetre Jesuye:

¿Sribi mden mden ñan tuabare makwe bä mikadre tuare nunye, Ngöböta mabe mikakäre gare nunye, abtä nunkwe tödekadre mabti? ¿Amne sribi mden nuenta makwe abtä nun rabadre tödeke mabti? ye niere nunye.

³¹ Makwe nuendre krörö ruen nunye: Nun mräkä kirakira nämane dikekä kä kaibete angwane, mrö kä mana kwetani kwetre abko sribi kri ñan tuabare Moisékwe nuenbare. Kukwe yebtä abko nieta krörö Ngöbö Kukweibtä:

Ban kä käinbti kä mana bini kwetadre nie,

Exodo 6.14

abko Ngöbö Kukwei käta niere. ¿Ye kwrere makwe nuendre arato ya? nieba kwetre Jesuye.

³² Angwane Jesukwe nieba ietre:

Ti bike kukwe era erere niere munye. Moisékwe ban kä käinbti biani ñakare kwetadre munye, akwa Ngöbö ara kākwe biani Moisés köböire. Akwa mtare ti Rün käta ban era metre kä käinbti bien mun kräke,

³³ ñobtä ñan angwane ban era metre bianta Ngöböke ni jökrä kräke, ye abko ni kä käinbti jatani kä nebtä abko tä mun mike nüne käreäre, ye abra ban era metre, nieba kwe mda ietre.

³⁴ Abtä nieba kwetre mda Jesuye:

Dänkien, makwe ban ye bian käre köbö kwatirekwatire nunye, nieba kwetre ie.

³⁵ Angwane Jesukwe nieba ietre:

Ti abko ban käta ni mike nüne käreäre Ngöböbe. Nire nire tä kite tie amne tä tödeke tibti, ni ye ñan rabadreta mröj jire chi mda. Erere arato, nire nire käta tödeke tibti abko ie tomna ñan rabadre jire chi mda.

³⁶ Akwa ye abko tikwe kukwe niebarera munye, erere ti bike niereta munye abko krörö: ti tuata munkwe, akwa mun ñan tö tödekai tibti.

³⁷ Akwa nire nire bianta tie ti Rünkwe, ye abko tä kite tie tödekakäre tibti amne, nire nire tä kite tie, ye abko tita ngibiare kuin jakrä amne tita juentarita ñakare jire chi mento.

³⁸ Ye abko ñan ti kä käinbti jatani kä nebtä kukwe nuenkäre ja töi jakwebti, akwa ti Rün kākwe ti juani, ye abko tö dreye abko erere ti jatani mike täte.

³⁹ Amne ti Rün kākwe ti juani abko kākwe nire nire biandre tie, ye abko ñan riadrete jire iti tikän amne kä mrä angwane tikwe mikadreta nire nünakäre käreäre Ngöböbe abko ie ti Rün tö,

⁴⁰ ñobtä ñan angwane nire nire kākwe ti Ngöbö Odei mikadre ñäräre kuin amne tödekadre tibti kwe abko kākwe nünandi käreäre amne, köbö mrä angwane tikwe mikadita nire abko ie ti Rün tö abko erere tita nuene, nieba Jesukwe.

⁴¹ Ti abko ban kä käinbti jatani kä nebtä, nieba Jesukwe, yebtä abko nitre israelita ji dokwäte rikaba ñäke jökrä Jesu rüere mda,

⁴² kākwe nieba krörö:

¿Jesu noko abko ñan José ngobo ya? Niara rün amne meye gare kuin nie. ¡Se ñobtä námame ká káinbti abko jatani ká nebtä nibi niere mtare se! rababa niere Jesu rüere.

⁴³ Abtä Jesukwe nieba mda ietere:

Kwekbe munkwe. Munkwe ñan ñäkä kore ti rüere.

⁴⁴ Ti Rün kákwe ti juani, ye ñan jatadre ni ngwena tie angwane, ni ñan jatadre jire iti ja tõi jenbti tie, akwa ni ye tä kite tie abko tikwe mikadita nire nünakäre käreäre Ngöböbe köbö mrä angwane.

⁴⁵ Ye mden kisete, nitre Ngöbö kukwei niekä kira kákwe tarä tikani btä nieta krörö:

Ngöbökwé ni jökrä tõi tikadi,

Isaías 54.13

nieta Ngöbö Kukweibtä. Ne aisete nire nire tä ti Rün kukwei nuen amne ti Rün kákwe tõi tikadre, ye abko tä kite tie.

⁴⁶ Ye abko, ni ñakare jire iti ká nebtä kákwe ti Rün tuani, akwa ti jatani Ngöbökwé ne aibe kákwe ti Rün tuani.

⁴⁷ Ne aisete, ti bike kukwe era erere niere munye: Nire nire kákwe tödekadre tibti ye abko kákwe nünandi käreäre Ngöböbe.

⁴⁸ Ti abko ban káta ni mike nüne käreäre.

⁴⁹ Mun mräkä kirakira kákwe mana kwetani ká kaibete, akwa ye námame ni mike nüne ñakare käreäre, aisete niaratre krütani jökrä.

⁵⁰⁻⁵¹ Akwa ti abko ban ká káinbti jatani ká nebtä ara tä nete amne nire nire kákwe ban ne kwetadre abko ñan krütadre käreäre, akwa nünandi käreäre kwe. Akwa ban biandi tikwe kwetadre, ye abko ti ngätä tikwe ne biandi tikwe. Angwane ni jökrä rabadre nünenta käreäre, abkokäre tikwe ja ngätä ne ara jire biandi müre ketadre.

⁵² Yebtä abko, nitre israelita ji dokwäte rikaba ñäke jae kwärikwäri Jesu rüere, kákwe nieba:

¿Ni se kákwe ja ngätä biandre kwetadre ño nie amarebti nibi ñäke kore se? rababa niere.

⁵³ Abtä Jesukwe nieba mda ietere:

Ti bike kukwe era erere niere munye, btä ti bike kukwe bä mike krörö munye: Nire nire tä kite tie, ye abko tä ti ngätä kwete kwrere amne nire nire tä tödeke tibti, ye abko tä ti däríe ñaen kwrere. Angwane ti Ni Ká Nebtä Ngobo ye munkwe ñan ngätä kwetadre amne munkwe ñan däríe ñadre angwane, munkwe ñan nünandre käreäre Ngöböbe.

⁵⁴ Ne aisete, nire nire kákwe ti ngätä kwetadre amne ti däríe ñadre kwe kore, ye abko kákwe nünandi käreäre Ngöböbe angwane, tikwe mikadita nire köbö mrä näire,

⁵⁵ ñobtä ñan angwane ti ngätä abko mrö era metre amne ti däríe abko tomna era metre.

⁵⁶ Ne aisete, nire nire jatadre tie, kákwe ti ngätä kwetadre amne nire nire kákwe tödekadre tibti, kákwe ti däríe ñadre, ni ye abko kákwe nünandi ketetiibe tibe amne tikwe nünandi ketetiibe ben arato.

⁵⁷ Ti Rün kákwe ti juani, ye tä nüne amne niara köböire tita nüne, ye kwrere arato nire nire kákwe ti ngätä kwetadre mrö kwrere, ni ye abko kákwe nünandi käreäre ti köböire.

⁵⁸ Ti ngätä ne abko ban ká káinbti jatani ká nebtä. Yebtä tita blite amne kukwe bä mike. Ban ne abko ñakare mana kwetani mun mräkä kirakirakwe ye kwrere, ñobtä ñan angwane niaratre kákwe mana kwetani, akwa krütani jökrä. Akwa ban btä tita blite, ye abko nire nire kákwe kwetadre ye abko tödeka tibti abko tita niere angwane, nünandi käreäre kwe Ngöböbe. Abko kore se, nieba Jesukwe.

⁵⁹ Kukwe ye abko Jesukwe diriba jökrä sinagoga jata Capernaúmete.

Ni kwati nänkä Jesube rikaba Jesubtä mento

⁶⁰ Jesukwe diriba kore, ye ni kwati nänkä ben kákwe kukwe nuaba angwane, nieba kwetere:

¿Ni se kákwe blitaniri se abko tare krübäte ni kräke, se nirekwe niara kukwei mikadre täte se? rikaba niere jae kwärikwäri.

⁶¹ Niaratre rababa blite kore Jesu rüere, ye gaba Jesukwe angwane, nieba mda kwe ietere:

¿Tikwe blitaniri ye nibi mate tare munbtä ya?

⁶² ¿Ti Ni Ká Nebtä Ngobo námame nüne káne, kánti rikadreta ká káinbti mun okwäbti, ye ngwane munkwe töbikadre ño btä?

⁶³ Ngöbö Üai káta ni mike nüne käreäre Ngöböbe amne, jändrän jökrä ká nebtä ni ngätä kwrere, ye abko ütiäte ñakare, ñobtä ñan angwane ñan raba ni mike nüne käreäre Ngöböbe. Ye abko, kukwe btä tita blite Ngöbö Üai köböire amne kukwe nini tikwe, ye munkwe mikadre era jae, kákwe tödekadre tibti angwane, munkwe nünandi käreäre Ngöböbe.

⁶⁴ Akwa mun ruäre tä nete abko ñan tö dekakai tibti, aisete mun ñan tö ti kukwei mikai era. Abko kore se, nieba Jesukwe ietere.

Jesu abko kākwe ñākāba kore, ñobtä ñan angwane nire nire kākwe ñan tödekadre bti, ye nāmanena gare kāne ie. Erere arato, ni iti kākwe niara kitadi ngise rüeye, ye nāmanena gare kāne ie, aiseite ñākāba kore kwe.

⁶⁵ Yebti Jesukwe nieba mda ietre:

Mun töi kore, ye mden kisete tikwe nini krörö: Ti Rün kākwe ñan ni biandre tie, ye ngwane ni ñan jatadre jire iti tie ja töi jakwebti, tikwe nini nunye, nieba Jesukwe.

⁶⁶ Ye ngwane mentokwäre ni kwati nāma näin Jesu jiebti kākwe kā mikakaba btā amne ñan rababa dikekā mda ben.

⁶⁷ Angwane nun ja töitkaka ni jätäbti nibu, ie Jesukwe nieba:

¿Mun tö nibi näinta mento tibtä arato ya? nieba kwe nunye.

⁶⁸⁻⁶⁹ Angwane Simón Pedro kākwe nieba:

Ti Dänkien, ma kukwei abko kukwe ni mikakrä nire kärekäre amne, ma abko Ni Deme Ngöbökwē ye nena gare nunye amne nunkwe mikanina era jae. ¿Se abko nun rikadre nireye mda se? nieba kwe Jesuye.

⁷⁰ Abtä Jesukwe nieba mda ie:

Mun ni jätäbti nibu kākwe ja töitkadre tibe, abkokäre tikwe mun dianinkä, akwa mun iti abko diablu kwrere jire, nieba kwe nunye.

⁷¹ Jesukwe ñākābare kore ye abko Simón Iscariote ngobo kā Judas nāma ja töitike siba Jesube abko kākwe Jesu kitadi ngise rüeye, abkobtä nieba kore kwe. Akwa Judas abko ni ja töitkaka Jesube arato nun ni jätäbti nibu ngätäite.

7

Jesu nikani bieta Ju Bätä

¹ Yebti Jesu nāma dikekā kwäräkwärä dirire kā Galileate. Niara ñan tö rababa rikaita nebe kā Judeate, ñobtä ñan angwane nitre israelita ji dokwäte nāma ngibiare yete müre ketare.

² Ye ngwane abko, bieta nitre israelita kādianta Ju Bäkärä jatabare nüke ja ken.

³ Abtä Jesu etbakantre kākwe nieba ie:

Mata sribi kri ñan tuabare nuene nete, ye nitre nänkä ma jiebti tä nüne kā Judeate ye kākwe tuadre, abkokäre nän nebe bietabtä Judeate. Akwa ma ñan raba Galileate nete,

⁴ ñobtä ñan angwane ni rabadre ütiäte ni mda mda ngätäite, ie ni töta nebe, ye abko ñan nita nebe jändrän nuene kaibe tiebe, aiseite mata sribi kri ñan tuabare nuene Galilea nete, ye ma rika nuene ni jökrä ngwäreki Jerusalén arato, nieba kwetre Jesuye.

⁵ (Jesu etbakantre abko ñan nāman tödeke bti, aiseite ñākābare kore kwetre ie.)

⁶ Akwa Jesukwe nieba mda ietre:

Kā kitani ti kāne erere ngāmi nüke tie, akwa mun abko kräke köbö jökrä kuin nänkärä bietabtä Jerusalén.

⁷ Ni mda mda kākwe ñan bätä ngwiandre munbtä, ñobtä ñan angwane mun töi ja kwrere niaratrebe. Akwa ti abko btä bätä ngwianta kwetre, ñobtä ñan angwane niaratre tä kukwe nuene kāmekāme Ngöbö rüere, ye abko kāmē tita niere metre ietre, abtä mätä tibtä, aiseite ti ñan rikadre.

⁸ Akwa mun abko rüē ñakare, aiseite mun rika bietabtä amne ti abko kā kitani ti kāne Ngöbökwē abko ngāmi nüke, aiseite ti ñan rikadre bieta yebtä. Abko kore se, nieba kwe etbakantreye.

⁹ Jesukwe nieba kore etbakantreye, bti niara rababa kā Galileate yete

¹⁰ angwane, etbakantre rikaba jökrä bietabtä. Yebti Jesu rikaba köre bietabtä arato, akwa rikaba kā bube tiebe, ñan rikaba ni jökrä ngwäreki.

¹¹ Angwane Jesu ngāmi nüke Jerusalén bietabtä, känenkri nitre israelita ji dokwäte abko rababa Jesu känentari kisere nekwäre, sekwäre bieta yete, kā rababa niere:

¿Ni ngututu ngwarbe ye tä mdente ruen? rababa niere.

¹² Akwa ni nāma kwati bietabtä, ye rababa blite tiebetiebe jökrä Jesubtä. Ni ruäre rababa niere:

Ni ye abra moto kuin, rababa niere.

Akwa ni ruäre abko rababa niere:

Ñakare. Ni ye ñakare kuin amne tä näin ni ngökö jirekābe, rababa niere tiebe Jesubtä.

¹³ Akwa ni jökrä, btä nitre israelita ji dokwäte ye jürä rababa, aiseite rababa blite tiebetiebe jabe kwäräkwärä amne ñan rababa blite ja ngwäreki jökrä Jesubtä.

Jesukwe diribare bieta näire

¹⁴ Yebti bieta ötöbu ta angwane, ju blitakrä Ngöböbe ye bäre Jesu rikaba amne rikaba dirire.

¹⁵ Angwane nitre israelita ji dokwäte töi ñan rababa krütare kukweibtä, kā rababa niere:

¿Ni noko jananbare ja tóitike ñakare diriká krikri be, se ño kánti abko Ngöbö Kukwei gare krübáte dikaro ie se? rababa niere Jesubtä.

¹⁶ Abtä Jesukwe nieba ietre:

Tita kukwe dirire, ye abko ñakare tikwe, akwa ni ti juanka abko kukwei dirita tikwe.

¹⁷ Ne aisete Ngöbö ti juanka tö dreye, ye erere nire nire tá biare mikakäre táte, ni ye abko ie ti kukwei rükadi gare metre angwane, tita kukwe dirire, ye Ngöbökre ya o tita kukwe dirire ja tói jenbti au abko rükadi gare ie.

¹⁸ Ye abko, nire nire tö ja mikai ütiáte abko káta blite ja töibti au aibe, akwa nire nire tá sribire ni niara juanka mikakäre ütiáte, ni ye abko tá kukwe era erere niere amne ñan tá kukwe ngwarbe niere jire. Ye erere tita dirire.

¹⁹ Moisés abko kákwe Ngöbö kukwei biani nuendre munye ye abko era ñan ñan. Akwa ni ñakare jire iti mun ngátáite káta kukwe ye mike táte metre. ¿Ye ñobtä mun tö ti müre ketai? nieba Jesukwe ietre.

²⁰ Abtä nitre náma kwati yete ye kákwe nieba mda:

¿Nire tö nibi ma müre ketai amarebti mata ñáke kore ye? ¡Ye ñan úai káme tá mabtá, kisete mata ñáke kore ya! nieba kwetre Jesuye.

²¹ Angwane Jesukwe nieba mda ietre:

Tikwe sribi kri ñan tuabare nuenba kákwe ni mikabata kuinta batibe köbö jadükakrá náire, abtä mun ñan tói rababa krütare amne mun rababa romon tikrá.

²² Akwa ja ñarákrá mikadre ja kwatabtä abko Moisékwe nuemna munye, aisete Moisés kukwei mikakäre táte, munta ni ñarákrá mike kwatabtä köbö jadükakrá náire. Ye abko ñan Moisékwe nuemna kena, akwa Ngöbökre nuemna kena nitre israelita mráká kánekáneye, yebti Moisékwe nuemnanta munye.

²³ Mun ñan töta nebe Moisés kukwei kitai temen, aisete ngábákre tá dárere abti ñarákrá mikadre kwatabtä niebare Moisékwe amne, köbö kwáirare ye tá nüke köbö jadükakrá náire akwa, munta ngábákre ñarákrá mike kwatabtä, ye abko sribi, akwa munta nuene. ¿Ye ñobtä abko tikwe ni bren mikaninta kuin táte jökrá köbö jadükakráte abko btá mun romon tikrá?

²⁴ Mun tö raba kukwe úkaite tikrá angwane, kukwe ño ño nuenta tikwe erere tuen ño munye, abtä munta ti kite ngise ngwarbe. Ye abko munkwe ñan nuendre jire chi mda, akwa kukwe era metrebti munkwe kukwe úkadrete. Abko kore se, nieba Jesukwe nitre israelita ji dokwáteye.

¿Jesu abko Ni Dianinká Ngöbökre ya?

²⁵ Angwane nitre israelita ruäre núnanka Jerusalén rababa niere jae kwárikwári:

¡Ñan ni se kánántarita nitre ji dokwátekwe müre ketadre yera,

²⁶ amarebti tuen dirire ni jökrá ngwárekri sete se, akwa nitre ji dokwáte ñan nebe ñáke jire chi ie! ¿Ni se abko Ni Dianinká Ngöbökre ara juani Ngöbökre abko nibira era nitre ji dokwátekra ya ño amarebti ñan nebe ñáke ie se?

²⁷ Ni se jatani mdenkri garera nie, akwa Ni Dianinká Ngöbökre jatadi angwane, jatadi mdenkri ñan rabadi gare nie, aisete ni se abko ñakare Ni Dianinká Ngöbökre ruen nunye, rababa niere Jesubtä.

²⁸ Jesu náma dirire ju blitakrá Ngöböbe kántita angwane, nitre kukwei jaraba kore ie angwane, Jesukwe ñákába ja dibti, kákwe nieba:

Ti gare kuin munye bkáná amne, ti jatani mdenkri, ye gare kuin jökrá munye, munta nútüre ñan ñan. Akwa ñan ti jatani ja tói jenbti amne Ngöbökre ti juani era metre. Niara gare ñakare munye,

²⁹ akwa ti abko jatani niarakri amne ti juani kwe, aisete niara gare tie. Abko kore se, nieba Jesukwe.

³⁰ Yebtä ni ruäre tö rababa Jesu kain ngite, akwa niara müre ketadre abko kái ngámi nüke, aisete nitre ye kákwe ñan kise mikaba jire chi btá.

³¹ Akwa ye ngwane abko, ni kwati kákwe tödekaba Jesubti abko rababa niere:

Ni Dianinká Ngöbökre rükadre angwane, sribi kri ñan tuabare abko ñan nuendi bári kuin kwe ni se ngwá, raba ruen nunye, rababa niere Jesubtä.

³² Nitre tödekaka Jesubti rababa blite tiebe kore, ye kukwei jarabare nitre bariseoye. Abtä nitre bariseo btá nitre blitakrá Ngöböbe ni mda mda diäre dánkientre kákwe guardia ju blitakrá Ngöböbe ngibiabtiká juanba Jesu kaen ngite.

³³ Angwane Jesukwe nieba mda:

Tikwe núnandi bá jötró mda mun ngátáite nete. Yebti ni ti juanka, kánti ti náinta.

³⁴ Angwane mun rabadi ti kánentari kisere, akwa ti ñan kwandretari munye, ñobtä ñan angwane ti tádi, ye kánti mun ñan rabadre, nieba Jesukwe ietre.

³⁵ Yebtä abko, nitre israelita ji dokwáte rababa niere jae kwárikwári:

¿Ni se abko näin mdenete amarebti ñan kwandretari nie, tä niere se? ¿Nitre israelita tä nüne juta jenenante kwäräkwarä nitre ñakare israelitare ngätäite, kánti näin ya ño ruen? o ¿Nitre ñakare israelitare, ie näin dirire ya? Dre nuendi metre kwe ruen

³⁶ amarebti nini krörö kwe nie: Mun rabadi ti känentari kisere, akwa ti ñan kwandretari munye, ñobtä ñan angwane ti tädi, ye kánti mun ñan rabadre niken, nini kwe nie, ¿se abko dre nini kore kwe se? rababa niere Jesubtä.

Jesukwe Ngöbö Üai bä mikani ñö nire kwrere

³⁷ Yebti bieta ju Bä köböi mrä abko köbö bäri ütiäte, ye näire Jesu rababa nünaninkä krö ju blitakrä Ngöböbe kántita angwane, ñäkäba jume ja dibti kwe, kákwe nieba mda:

Mun mden ie tomna nibi angwane, mun jakwe tomna ñaen tie amne,

³⁸ nire nire kákwe tödekadre tibti abko btä ñö nire rabadi neen käre, nieta Ngöbö Kukweibtä ye kwrere, nieba Jesukwe.

³⁹ Jesukwe blitaba kore angwane abko Ngöbö Üai bä mikaba ñö nire kwrere kwe. Akwa blitaba kwe angwane, Ngöbö Üai ngämi nuke nitre tödekaka Jesubti yebtä, ñobtä ñan angwane Jesu ngämi nikenta kä käinbti, kánti Ngöbökwé Jesu mikani ütiäte kri. (Akwa Ngöbökwé Jesu mikani ütiäte kri, yebti abko Jesukwe Ngöbö Üai juani nüne nitre ja töitikaka Jesubti yebtä.)

⁴⁰ Jesukwe blitaba ye abko nitre näma yete, ye ngätäite ni ruäre kákwe Jesu kukwei nuaba angwane, rababa niere:

Ni Ngöbö kukwei niekä rükadre niebare Moisékwe ara tä nete ñan ñan, rababa niere.

⁴¹ Akwa ni mda mda abko rababa niere:

Era metre Ni Dianinkä Ngöbökwé ara noko, rababa niere.

Akwa ni mda abko rababa niere:

Ni noko abko Galileabo, aisete niara abko ñan Ni Dianinkä Ngöbökwé, ñobtä ñan angwane Ni Dianinkä Ngöbökwé abko ñan jatadre nitre Galileabokri.

⁴² Ye abko, Ni Dianinkä Ngöbökwé jatadi jrei David tukwe mräkäkri amne David abko därebare juta Belénte, ye arabe kánti Ni Dianinkä Ngöbökwé jatadi arato abko nieta kore Ngöbö Kukweibtä, nieba ni ruärekwé.

⁴³ Yebtä abko ni jökrä töi rababa bä jene jene Jesubtä.

⁴⁴ Ni ruäre abko tö rababa rikai Jesu ngwena ngite, akwa nuenba ñakare kwetre.

⁴⁵ Ye mden kisete, guardiatre juani Jesu kaen ngite, ye rikabata kise tökare nebete bariseote ye kánti amne nitre blitaka Ngöböbe ni mda mda diäre dänkientre ye kánti angwane, niaratre kákwe niebare guardiatre yeye:

Nunkwe ni kamna ngite, ¿ye ñobtä mun ñan ki ngwena? nieba kore kwetre guardiaye.

⁴⁶ Abtä guardiatre kákwe niebare mda ietre:

¿Ni blite nuäre nuäre ni ye kwrere nunkwe ñan tuabare jire abko erere ni ye tä blite! Abtä nun ñan ki ngwena, niebare kwetre.

⁴⁷ Angwane nitre bariseo ye kákwe niebare mda guardiatre ye:

¿Munkwe ja ngökamna kwäräbe ie arato ñan ñan? niebare kwetre ietre.

⁴⁸ ¿Nitre blitaka Ngöböbe ni mda mda diäre dänkientre amne nitre bariseo tärä iti këta tödeke ni yebti mun okwäbti ya? ¡Ñakare jire!

⁴⁹ Nitre se këta niara mike ütiäte, ie Kukwe Biani Ngöbökwé Moiséye gare ñakare jire chi ye abko btä Ngöböta ngürün mike, ye namanintre niere guardiatre ye.

⁵⁰ Abtä bati ni bariseo këdian nämane Nicodemo jananbare blite deo Jesube ye kákwe nieba:

⁵¹ Kukweta ükaninte ni ngätäite këta niere krörö: Ni iti kákwe dre nuenbare abtä kitadre ngite, ye niara ngämi blite au jakrä, ni ñan raba kite ngite abko tä ükaninte kore, nieba Nicodemokwe.

⁵² Abtä niaratre kákwe nieba romone Nicodemoye mda:

¿Ma abko ni ngututu këme Galileabo arato ya? Ngöbö Kukwei këta dre niere, yebtä makwe ja töitika angwane, ni Galileabo ñakare jire iti Ngöbö kukwei niekä abko rükadi gare mae, nieba kwetre Nicodemoye.

Meri iti kákwe ja mikani ngite tiebe

⁵³ [Yebti ni jökrä rikabata ja gwiriete.

8

¹ Akwa Jesu abko rikaba Ngitio Olibothi.

² Yebti jändrinane dekä angwane, ju blitakrä Ngöböbe ye kántita Jesu rikabata angwane, ni kwati jataba nuke niara ken kukwei nuakäre angwane, niara rababa tákänintbe temen, kä rikaba dirire ietre.

³ Ye btäräbe Kukwe Biani Ngöbökwe Moiséye dirikätre amne nitre bariseo rükaba meri ngwena iti Jesu kánti. Meri ye abko nämane ja mike gure kaibe gore abko kwani ietre abko rükaba ngwena. Meri ye abko mikaba nünaninkä kwetre ni jökrä ngwärekrei Jesu kánti.

⁴ Angwane nieba kwetre ie:

Dirikä, meri ne tä ja mike gure kaibe gore akwa, kuni jabtä nunye abko nun ki ngwena mae nete.

⁵ Kukwe Biani Ngöbökwe Moiséye, yebtä Moisékwe meri ne kwrere kämikamna jäbti. ¿Akwa ma abko käta dre niere meri kore btä? nieba kwetre Jesuye.

⁶ Niaratre abko rababa kukwe ngwentari kore ie ja gäkäre ben, ñobtä ñan angwane Jesukwe ñäkädre blo, yebtä abko kukwe käme kwandre ietre kitakrä ngise abkokäre. Akwa Jesu abko rababa nünaninkä krö, bti rababa tākänintbe ngürebti, kä rikaba tärä tike kisebti dobrobtä temen.

⁷ Akwa nitre ye rababa kukwe ngwentari janknu Jesuye meri yebtä. Abtä Jesukwe niaratre mikaba ñäräre ja käne, käkwe nieba ietre:

Mun mden mden ja mike ngite ñakare jire chi Ngöbö rüere abko käkwe meri ye tākä käne jäbti, nieba Jesukwe ietre.

⁸ Yebti Jesu rababata tākänintbe ngürebti, rikaba tärä tiketa dobrobtä temen nitre ye okwäbti.

⁹ Akwa Jesukwe ñäkäba kore ietre, yebtä abko niaratre rikaba kä mikekä itire itire ja täritäri, akwa nitre bäri unbre unbre ara jire käkwe kä mikakaba käne, bti ni bäri bati bati rikabata mento mrä. Jesu abko rababa kaibe meri yebe.

¹⁰ Niara naninkrö krö, bti meri ye mikaba ñäräre ja käne kwe, käkwe nieba ie:

¿Nitre ma kitaka ngise abko ame jökrä nete? ¿Ni ñakare jire iti käkwe ma kiti ngite ñan ñan? nieba Jesukwe ie.

¹¹ Angwane meri ye käkwe nieba mda ie:

Ni ñakare jire iti käkwe ti kiti ngite se abko, nieba kwe Jesuye.

Angwane Jesukwe nieba mda ie:

Tikwe ñan ma kitadre ngite arato, aisete nänta. Akwa mtare mentokwäre makwe ñan ja mika ngite janknu mda. Abko kore se, nieba kwe meri yeye.]*

Jesu abko ñotra ni jökrä kräke

¹² Yebti Jesukwe nieba mda ni kwati nämä yete yeye:

Ti abko ñotra ni jökrä kräke. Nire nire jatadre ti jiebti abko kwe ñotra trä rabadi die mikakäre amne ñan nünandi jire chi mda kä ikote kwe, nieba kwe.

¹³ Yebtä abko, nitre bariseo käkwe nieba mda Jesuye:

Mata nete käta blite au jakrä, aisete ma kukwei ye abko tuen ñakare metre, nieba kwetre ie.

¹⁴ Abtä Jesukwe nieba mda ietre:

Tita blite au jakrä akwa, ti abko kukwei ütiäte amne metre, ñobtä ñan angwane ti mdente jatani, ye gare kuin tie. Erere arato, ti näinta mdente gare kuin tie, akwa mun abko ie gare ñakare jire chi.

¹⁵ Nitre kä nebtä tä kukwe ükete ño ni kitakäre ngite, ye kwrere munta kukwe ükete tikrä, akwa ti abko tä kukwe ükete ñakare ni kitakäre ngite.

¹⁶ Akwa nane tikwe kukwe ükarete ni kitakäre ngite, ye ngwane tikwe kukwe ükadrete era metre, ñobtä ñan angwane ñan tita kukwe ükete kaibe ja töi jenbti, akwa ti Rün käkwe ti juani abko käta kukwe ükete ti ben gwaire, aisete tita kukwe ükete kuin metre.

¹⁷ Angwane Kukwe Biani Ngöbökwe Moiséye mun kräke, btä nieta krörö: Ni nibu käkwe blitadre ja kwrere ni kitani ngise rüere, ye ngwane niaratre nibu kukwei rabadre ütiäte abko nieta.

¹⁸ Ye abko tä dbe, aisete ti ara jire tä blite au jakrä amne ti Rün käkwe ti juani abko tä blite tikrä arato, nieba Jesukwe.

¹⁹ Abtä nitre bariseo käkwe nieba mda Jesuye:

¿Ma rün abko tä mdente? nieba kwetre ie.

Angwane Jesukwe nieba mda ietre:

Ti abko nire gare ñakare metre munye amne ti Rün gare ñakare munye arato. Ti abko nire rükadre gare munye angwane, ti Rün rükadre gare munye arato. Abko kore se, nieba kwe ietre.

²⁰ Jesukwe ñäkäba kore angwane abko nämä dirire ju blitakrä Ngöböbe ye bäre. Jesu nämä dirire, ye kántita abko kaja nämä abko te ngwian kita nämane Ngöbökrä, kánti Jesu nämä,

* 8:11 Kukweta tikani corcheta ngätäite abko ñan tä tikani manuscrito bäri kuinkuin btä.

käkwe kukwe diriba kore. Akwa Ngöbökwé kä kitani angwane Jesu müre ketadre, ye ngämi nüke ie, aiseté ñan kaba ngite kwetwe müre ketakäre.

²¹ Bti Jesukwe niebata mda ietre:

Ti bike nikenta amne mun abko rabadi ti känentari kisere, akwa mun ngite ye ben gwaire mun krütadre jökrä. Ti näin mdente, ye kanti mun ñan raba neme jire ti kanti, nieba kwe nitre bariseoye.

²² Angwane nitre israelita ji dokwäte rababa niere jae kwärikwäri:

¿Niara tö kite ja müre ketai au ya ño amarebti, ti bike niken ye kanti mun ñan raba, nini kwe ye? rababa niere jae kwärikwäri.

²³ Angwane Jesukwe nieba mda ietre:

Mun abko tä nüne kä temen nebtä, akwa ti abko kä käinbti sete jatani; mun abko tä nüne Ngöbö rüere, akwa ti abko rüre ñakare Ngöbö rüere.

²⁴ Ye mden kisete, kukwe kämekäme munta nuene Ngöbö rüere, yebtä mun krütadi. Ti abko ni ño tita niere munye, ye munkwe ñan mikadre era jae angwane, mun krütadi angwane, mun rabadi ngite Ngöböye kärekäre, tikwe nini munye ye kwrere, nieba Jesukwe ietre.

²⁵ Angwane niaratre käkwe nieba mda ie:

¿Ma abko nire? nieba kwetwe Jesuye.

Jesukwe nieba mda ietre:

Ti jataba nüke angwane, ti abko nire tikwe nieba käne munye abti kä nüke mtare.

²⁶ Ye abko, kukwe tarä kabre abko tikwe kädriedre munbe. Erere arato, kukwe tarä kabre abko tikwe ükarete munkrä, akwa ni ti juanka käta kukwe era erere niere abko tita kukwe nuen, ye erere tita niere nitre nünanka Ngöbö rüere ie, nieba Jesukwe.

²⁷ Akwa Jesukwe blitaba ni niara juanka yebtä angwane abko näma blite Rün kwebtä abko ñan rükaba gare ietre.

²⁸ Abtä Jesukwe nieba mda ietre:

Munkwe Ni Kä Nebtä Ngobo ne kadikä krusobtä käin angwane, ti abko ni ño tita niere munye, ye abko rükadi gare tibtä munye. Erere arato, tita jändrän nuene ñakare ja töi jenbti, akwa ti Rün käkwe dre diribare tie, ye erere tita nuene abko rükadi gare tibtä munye.

²⁹ Ni ti juanka ye abko tä tibe amne ti Rün tä ti mikete ñakare kaibe, ñobtä ñan angwane dre tuen kuin ie abko erere tita nuene, kä mikakäre nuäre btä, aiseté ñan tä ti mikete kaibe. Abko kore se, nieba Jesukwe ietre.

³⁰ Jesukwe blitaba kore angwane, ni kwati käkwe tödekaba bti.

Nitre israelita abko Abraham mräkä tä nütüre jabtä

³¹ Yebti nitre israelita käkwe tödekaba Jesubti, ye ie Jesukwe nieba mda:

Munkwe nünandikä kärekäre ti kukweibtä ne ngwane, mun rabadi ja töitikaka era metre tibe.

³² Ye ngwane, kukwe era metre Ngöböbtä rükadi gare munye amne kukwe era yebti mun rabadi tikaninte, nieba Jesukwe ietre.

³³ Abtä nieba mda kwetwe Jesuye:

Nun därebare Abraham mräkäkri amne ni mda mda nebe ñakare nun dänkiene. ¿Se ñobtä abko mun rabadreta tikaninte, mata niere se? nieba kwetwe Jesuye.

³⁴ Jesukwe nieba mda ietre:

Ti bike kukwe era erere niere munye: Nire nire käta kukwe kämekäme nuene Ngöbö rüere, ni ye abko kukwe kämekäme tä bkäne amne dänkiene, aiseté niara abko ni klabore kwrere kukwe kämekäme kräke.

³⁵ Ye abko, ni klabore ye ñan raba nüne kärekäre gwi bkänkä mräkäbe, ñobtä ñan angwane bkänkä raba rürümoine ni mdaye. Akwa ni klabore bkänkä, ye ngäbriänkä albe käkwe nünandre kärekäre gwi rünbe.

³⁶ Ne aiseté Ngöbö Odei käkwe mun tikadrete ne ngwane, mun rabadi tikaninte era metre.

³⁷ Mun därebare Abraham mräkäkri, ye garera tie, akwa mun tö ti müre ketai, ñobtä ñan angwane tita kukwe niere, ye mun ñan tö kain ngäbti.

³⁸ Tikwe dre dre tuaba ja okwä jenbti ti Rün kanti, ye erere btä tita blite. Ye kwrere arato, munkwe mun rün kukwei nuani blite ño, ye erere munta nuene arato, nieba Jesukwe ietre.

³⁹ Abtä nieba mda kwetwe Jesuye:

¡Nun rün kira abko Abraham abko mräkäkri nun därebare! nieba kwetwe Jesuye.

Akwa Jesu abko käkwe nieba mda ietre:

Mun däredre Abraham mräkäkri bkänä akräke niarakwe nünabare ño, ye erere munkwe nünandre arato.

⁴⁰ Akwa ye kwrere ñakare, aisetse kukwe diribare tie Ngöbökwe abko erere tita niere era metre munye. Abtä mun tö ti müre ketai. Akwa Abraham abko rabadre nüne mtare angwane, niarakwe ñan kukwe kore nuendre jire chi abko erere mun tö nuein tibtä.

⁴¹ Ye abko, mun rün tä dre nuene, ye erere munta nuene arato, nieba Jesukwe ietre.

Abtä nieba kwetre Jesuye:

Ni ja mikaka gure bati bati abko kwe nun därebare ñakare amne nun rün abko era metre. Nun rün abko itibe abko Ngöbö, nieba kwetre Jesuye.

Diablu mräkä

⁴² Angwane Jesukwe nieba mda ietre:

Ngöbö mun Rün era metre bkänä akräke ti rabadre tare munkwe, ñöbtä ñan angwane ti jatani Ngöbökre amne tita mun ngätäite nete. Ye ñan ti jatani ja töi jenbti akwa, Ngöbökre ti juani abkokänti tita nete.

⁴³ Akwa mun abko ñan tö ti kukwei kain ngäbti, aisetse tita blite abko ñan tä nuke gare munye.

⁴⁴ Ye abko, mun rün era metre munkwe abko diablu amne niara tä mun bkäne, aisetse mun abko niara kwrere amne niara töta nebe dreye, ye erere mun tö nuein. Kena abti kä nuke mtare, diablu abko ni kämikaka amne niara ñan tä kukwe era metre niere jire chi bati. Tä blite angwane, kukwe era nieta ñakare jire kwe, angwane tä blite nierare, ñöbtä ñan angwane niara abko ni ngökaka amne käne kira niarakwe kukwe niebare ngwarbe.

⁴⁵ Mun abko mun rün diablu kwrere käta kukwe ngwarbe tarere, aisetse ti abko käta kukwe era erere niere munye angwane, mun ñan tö ti kukwei mikai era.

⁴⁶ Ti kukwe käme nuene ñakare Ngöbö rüere, aisetse ni ñakare jire mun ngätäite nete kä raba ti kite ngise kukwe kämenbtä, aisetse tita kukwe era erere niere munye, ⁴⁶se ñöbtä abko mun ñan tö ti kukwei mikai era?

⁴⁷ Akwa nire nire era metre Ngöbökre abko tä Ngöbö kukwei kaen ngäbti, akwa mun abko ñakare era metre Ngöbökre, aisetse mun ñan tö ti kukwei kain ngäbti. Abko kore se, nieba Jesukwe nitre israelitaye.

Ja bäri kri Abrahamkrä niebare Jesukwe

⁴⁸ Yebtä abko nitre israelita kärke nieba mda Jesuye:

Ma abko ni ngututu Samariabo amne üai käme tä mabtä, nunta niere ye abko era bkänä ñan ñan, nieba kwetre.

⁴⁹ Abtä Jesukwe nieba mda ietre:

Üai käme ñakare jire tibtä, akwa tita ti Rün mike ütiäte jae amne mun abko käta ti mike ngwarbe jae.

⁵⁰ Ñan munkwe ti mikadre ütiäte abko kända au tikwe jakrä, akwa ni tarä iti abko tä ti mike ütiäte amne niara abko kukwe ükatekä ni jökrä kräke.

⁵¹ Ti bike kukwe era erere niere munye: Nire nire kärke ti kukwei mikadre täte abko ñan krütadi, nieba Jesukwe.

⁵² Angwane nitre israelita ji dokwäte kärke nieba mda ie:

Mtare üai käme tä mabtä nunta niere, ye abko era nura gare metre nunye mabtä, ñöbtä ñan angwane Abraham amne nitre Ngöbö kukwei niekä kirakira krütani jökrä amarebti nire nire kärke ti kukwe mikadre täte abko ñan krütadi, mata niere ye.

⁵³ ⁵³Ma abko bäri ütiäte nun mräkä Abrahamkrä ya? Ñakare jire raba ruen nunye, ñöbtä ñan angwane Abraham krütani amne nitre Ngöbö kukwei niekä kirakira krütani jökrä. ⁵³Ma abko nire amarebti ja nibi ruen bäri mae niaratrekrä ye? nieba romone kwetre Jesuye.

⁵⁴ Jesu kärke nieba mda ietre:

Tikwe bikadre kri ja mikakäre ütiäte au, ye ngwane tikwe ja mikadre ütiäte ngwarbe, akwa ti Rün ara käta ti mike ütiäte. Ti Rün ye mden abko Ngöbö munkwe munta niere, akwa mikata ñakare ütiäte munkwe.

⁵⁵ Ngöbö ye abko gare ñakare munye, akwa ti abko ie niara gare kuin. Ne aisetse niara gare ñakare tie, tikwe niedre, ye ngwane ti rabadre ni ngökaka mun kwrere arato, akwa niara gare kuin tie bkänä amne tita niara kukwei mike täte.

⁵⁶ Ti köböi mikani ye abko mun mräkä käne Abraham tö namani tuai, aisetse namani töbike ti köböibtä angwane, kä namani juto btä. Yebti ti rükadre köbö ño te abko Abrahamkwe tuani angwane, kä namani nuäre krübäte btä, nieba Jesukwe.

⁵⁷ Yebtä abko, nitre israelita kärke nieba mda Jesuye:

¡Jo! Nin kä ngämi gre ketebu bti kwä jätä mae. ⁵⁷Ma ye abko kärke Abraham tuani mata niere ya? nieba kwetre Jesuye.

⁵⁸ Angwane Jesukwe nieba mda ietre:

Kukwe era erere ti bike niere munye: Abraham ngämi däreere, ye känenkri ti nämanena nüne. Abko kore se, nieba kwe nitre israelita ji dokwäteye.

⁵⁹ Abtä nitre israelita ye käkwe jä dianba kisete Jesu kämikakäre, akwa nitre nämane yete, ye ngätäite Jesukwe ja rükanteba, bti ju blitakrä Ngöböbe bäre Jesu näma, ye kanti Jesukwe kä mikakaba tiebe amne rikabata mentokwäre.

9

Ni okwä kä drüente abko Jesukwe mikaninta kuinta

¹ Abti bati Jesu rikaba ji ngrabare angwane, ni näma iti jite btä Jesu okwä rababa. Ni ye abko okwä kä drüente. Niara abko därebare kore, aiseite kä tuen ñakare ie abko näma jite.

² Abtä nun ja töitikaka Jesube käkwe nieba ie:

¿Dirikä, ñobtä ni se därebare okwä kä drüente kore? ¿Niara meye amne rün käkwe ja mikani ngite Ngöbö rüere ya? o ¿Niara ara jire käkwe ja mikani ngite au Ngöbö rüere abtä därebare kore ya? nieba nunkwe Jesuye.

³ Angwane Jesukwe nieba mda nunye:

Ñan niara meye amne rün käkwe ja mikani ngite Ngöbö rüere, abtä därebare kore. Erere arato, ñan niarakwe ja mikani ngite abtä därebare kore. Akwa Ngöbö diebti sribi kri ñan tuabare rabadre bare, abkokäre niara därebare kore.

⁴⁻⁵ Tita kä nebtä mun ngätäite nete angwane, ti abko ñotra ni jökrä kräke, aiseite tita mun ngätäite nete angwane, ni ti juanka ye kräke nikwe sribidre kä trä ngwenbti, ñobtä ñan angwane ti jirikadi munkän angwane, kä jatadi kä iko kwrere, ye näire ni ñan rabadre sribire jire chi mda, nieba Jesukwe.

⁶ Jesukwe blitaba kore, yehti tö rababa kukwe ye bä mikai, käkwe ni ye mikaba kuinta krörö: käli kitaba temen kwe, mritaba dobrobe kwe, bti dobro ye jüanteba ni ye okwäbtä kwe,

⁷ bti nieba kwe ie:

Ñö okwä Siloé, ye te nän ja okwä bätete, nieba kwe ie.

(Siloé ye abko “juani” nieta kukwe hebreore.) Ye erere ni ie kä tuen ñakare ye rikaba, käkwe ja okwä bätäninte, bti nikaninta ja gwiriete angwane, kä namaninta tuenta ie.

⁸ Abtä nitre nünanka känimekänime niara kenta temen amne nitre kä nämane niara tuen ngwian kärere käre, ye namani niere jae kwärikwäri:

¿Ni noko nämane nebe tākänintbe jite ngwian kärere yera? rababa niere.

⁹ Angwane ni ruäre namanintre niere:

Niara ara se, namanintre niere.

Akwa ni mda mda abko namani niere:

Ñakare, akwa ni mda bäsi niara bä kwrere se, namanintre niere.

Akwa ni ye ara jire käkwe niebare:

Ti ne ara nämane ngwian kärere jite ye, niebare kwe.

¹⁰ Angwane ni mda mda käkwe niebare ie:

¿Ñö köböire kä nena tuen mae mtare? niebare kwetre ie.

¹¹ Niara käkwe niebare mda:

Ni kädekata Jesu ye käkwe dobro mriti, bti jünunte ti okwäbtä kwe amne nini krörö kwe tie: Ñö okwä Siloé, ye kanti nän amne makwe ja okwä bätäte, nini kwe tie. Ye erere ti niki, käkwe ja okwä bätrite angwane, kä nibibe tuen tie, niebare kwe ietre.

¹² Angwane ni bariseo mda mda ye käkwe niebare mda ie:

¿Ni kädekata makwe ye abko tä mdente? niebare kwetre ie.

Niara käkwe niebare mda:

Niara tä mdente gare ñakare tie, niebare kwe ietre.

Nitre bariseokwe ñäkäbare Jesu rüere

¹³⁻¹⁴ Jesukwe dobro mritaba kälibe, bti ni okwä kä drüente ye okwäbtä jüanteba kwe angwane, kä rababa tuenta ie, ye abko Jesukwe nuenba köbö jadükakrä näire. Yehti abko ni okwä kä drüente Jesukwe mikabata kuinta ye jirikaba mda nitre bariseo ngwärecri.

¹⁵ Angwane ñö köböire namaninta kuinta niebare kwetre ie. Niara käkwe niebare ietre:

Dobro mriti kwe, jünunte ti okwäbtä kwe, bti tikwe ja okwä bätrite amne mtare kä nibi tuen tie, niebare kwe ietre.

¹⁶ Abtä nitre bariseo ruäre namani niere:

Ni sribi ye nuenkä abko ñan jatani Ngöböcri, ñobtä ñan angwane tä köbö jadükakrä mike ütiäte ñakare jae, namani niere.

Akwa bariseo ruäre abko namani niere:

¿Ni ngite Ngöbö rüere ñan rabadre sribi kri ñan tuabare nuene ni noko kwrere! namanintre niere.

Yebtä abko namanintre ja kwete kwärikwäri Jesubtä.

¹⁷ Bti ni okwä kä ikote ie kä namani tuen, ye ie niebareta mda kwetre:

¿Ni kākwe kä mikani tuenta mae, ni ye abko ni ño nieta makwe? niebare kwetre ie.

Niara kākwe niebare mda:

Niara abko ni Ngöbö kukwei niekä tita niere, niebare kwe ietre.

¹⁸ Akwa ni ye abko därebare amne okwä kä drümente, aisete kä tuen ñakare ie, akwa okwä namaninta kuinta, aisete kä namani tuen ie, ye abko nitre israelita ji dokwäte ñan tö namani mikai era, abtä ni okwä kä drümente ye meye btä rün käräbare kwetre.

¹⁹ Ni ye meye btä rün nükani angwane, niebare kwetre ietre:

¿Ni ne abko, mun ngobo munkwe bkänä ya? ¿Erere arato, därebare angwane, kä tuen ñakare ie bkänä, munta niere ya? Ño köböire kä tuen ie mtare, ye niere nunye, niebare kwetre ietre.

²⁰ Angwane ni ye meye amne rün kākwe niebare mda:

Niara abko nun ngobo munkwe bkänä. Erere arato, därebare angwane, kä tuen ñakare ie bkänä,

²¹ akwa ño köböire kä tuen ie mtare, ye abko gare ñakare nunye. Erere arato, nirekwe kä mikani tuenta ie, ye gare ñakare nunye, aisete munkwe ngwiantari niaraye. Niara abko nena ünän, aisete dre dre nakaninkä btä, ye niarakwe niedre au jakrä munye, niebare kwetre nitre israelita ji dokwätete.

²² Ni ie kä tuen ñakare ye meye amne rün, btä nitre israelita ji dokwäte jürä namani, aisete nieba kore kwetre, ñobtä ñan angwane Jesu abko Ni Dianinkä Ngöbökwé, ye nirekwe niedre, ni ye abko kitadrekä sinagoga bäre mento abko nitre israelita ji dokwäte kākwe ünantente kore, ye abko jürä namani ni ye meyebtä amne rünbtä.

²³ Ne aisete niara meye amne rün kākwe niebare: Niara nena ünän, aisete kukwe nakaninkä ño ño btä, ye munkwe ngwiantari ie amne niarakwe niedi au munye, niebare kwetre.

²⁴ Angwane ni okwä nämane kä ikote käne, ye nitre israelita ji dokwäte kākwe käräbareta bobuta, bti niebare kwetre ie:

Ngöbö okwäbti kukwe era erere niere nunye, ñobtä ñan angwane Jesu ye abko ni ngututu kukwe kämekäme nuenkä Ngöbö rüere, ye gare kuin nunye, niebare kwetre ie.

²⁵ Ni ye kākwe niebare mda:

Niara abko ni kukwe kämekäme nuenkä ya abko gare ñakare tie, akwa ti okwä nämane kä ikote amne niara köböire kä tuen kuin tie mtare. Ye aibe gare tie, niebare kwe ietre.

²⁶ Abtä nitre israelita ji dokwäte kākwe niebare mda ie:

¿Dre nuenbare kwe mabtä? ¿Ño köböire kä mikani tuen kwe mae? niebare kwetre ie.

²⁷ Abtä niarakwe niebare:

Kukwe gare tie, erere tikwe ninina jökrä munye, akwa munkwe ñan ti kukwei miri era. ¿Se drekäre tikwe kukwe arabe niedreta bobuta munye, ie mun tö nibi ye? ¿Mun tö nibi ja getai arato Jesube ya amarebti mun nibi kukwe ngwentari janknu kore tie ye? niebare kwe ietre.

²⁸ Angwane nitre israelita ji dokwäte rikaba ngren ngren ni yebti, kākwe niebare ie:

Ma abra ja getaka Jesu yebe, akwa nun abko tä nekete Moisékri.

²⁹ Ngöbökwé blitabare Moisébe, ye gare kuin nunye, aisete nunta nekete niarakri. Akwa Jesu ye abko jatani mdenkri abko gare ñakare jire chi nunye, niebare kwetre ni yeye.

³⁰ Abtä ni ye kākwe niebare mda ietre:

¡Rä jire niara jatani mdenkri gare ñakare munye, yebtä ti töi ñan nebe krütare mda! Akwa ti abko okwä mirita kuinta kwe amne kä nibi tuen tie,

³¹ aisete ni kukwe kämekäme nuenkä Ngöbö rüere käta ja di kärere Ngöböye sribi kri ñan tuabare nuenkäre abko ie Ngöböta ja di bien ñakare, ye gare kuin nie. Akwa nire nire tä Ngöbö mike ütiäte amne tä Ngöbö Kukwei mike täte aibe die mikata Ngöbökwé sribi kri ñan tuabare nuenkäre, ye abko garera nie arato.

³² Erere arato, ni därebare okwä kä drümente ti kwrere abko ni mdara jire käta kä mike tuen ie, ye abko ni ngämi kukwe nuen jire chi.

³³ Ne aisete, Jesu ñan jatadre Ngöbökwé, akräke sribi ütiäte kri ñan tuabare ye kwrere ñan rabadre bare jire chi ie Ngöbö diebti, niebare kwe.

³⁴ Abtä nitre israelita ji dokwäte kākwe niebare mda ie:

Kukwe kämekäme kri krübäte Ngöbö rüere mabtä, aisete ma därebare abti kä nüke mtare ma ngite kri Ngöbö rüere. ¿Ma ye abko tö kite dirire nunye mtare ñan ñan? niebare kwetre ie.

Bti ni ye juantariba künken kwetre.

Nitre israelita ji dokwäte abko ie kukwe metre Ngöböbtä gare ñakare

³⁵ Yehti ni ie kä mikani tuenta Jesukwe, ye kitani künken sinagoga bäre mento gaba Jesukwe. Yehti Jesu rababa ngätäi ben angwane, Jesukwe nieba ie:

¿Ni Kä Nebtä Ngobo bti mata tödeke ya? nieba kwe ie.

³⁶ Angwane niarakwe nieba mda:

Ti Dänkien, nire abko Ni Kä Nebtä Ngobo makwe niedre tie angwane, tikwe tödekadi bti, nieba kwe Jesuye.

³⁷ Jesukwe nieba mda ie:

Ti ara tuata makwe, ti ne mden ben mata blite, nieba kwe ie.

³⁸ Ye btäräbe ni ye rababa ngukudokwäbti Jesu ngwäreki, Jesu mikakäre ütiäte, käkwe nieba:

Tita tödeke mabti ti Dänkien, nieba kwe Jesuye.

³⁹ Yehti Jesukwe nieba mda:

Ti jatani kä nebtä kukwe rabadre ükaninte ni jökrä kräke amne, ni ie kukwe metre Ngöbökwé gare ñakare amne ni ie kä tuen ñakare ye kwrere abko ie kä rabadre tuen angwane, kukwe metre Ngöbökwé rabadre gare ie, abkokäre ti jatani. Erere arato, nire nire ie kä tuen kuin tä nütüre, aiseite kukwe metre Ngöbökwé garera ie tä nütüre, ni ye abko tä ja ngökö au abko ie kä ñan rabadre tuen, abkokäre ti jatani, nieba Jesukwe ie.

⁴⁰ Yebtä abko nitre bariseo näma ruäre Jesube yete käkwe nieba ie:

¿Kukwe metre Ngöböbtä gare ñakare nunye arato, aiseite nun okwä kä drünente amne kä tuen ñakare nunye abko mata niere nunye ya? nieba kwetre mda Jesuye.

⁴¹ Angwane Jesukwe nieba mda ietre:

Mun okwä tädre kä drünente angwane, kä ñan rabadre tuen munye, akräke kukwe käme Ngöbö rüere, ye munkwe nuendre ñakare amne mun ñan rabadre ngite Ngöböye; akwa kukwe metre Ngöbökwé garera kuin munye, aiseite kä tuen kuin munye munta niere au jabtä, aiseite mun ngite janknu Ngöbö rüere. Abko kore se, nieba Jesukwe nitre bariseoye.

10

Obeja ngibiaka era metre gare kuin obejaye

¹⁻³ Yehti Jesukwe nieba mda:

Ti bike kukwe era erere niere munye. Ni obeja ngibiaka era metre abko käre tä ni mda mikete jukwebtä obeja ngibiare deo jakrä. Ye mden kisete, obeja ngibiaka ye tä nüke angwane, ni jukwe ngibiaka tä jukwe tike ie angwane, obeja ngibiaka ye tä niken obeja kä deke kratirekratire ja täritäri. Niara kukwei gare obejaye, aiseite obeja kwe tä niken jiehti amne tä niken ngwena ki bäre mento mikä känene. Akwa ni obeja ngibiaka ñakare era metre abko tä nakwen kibti ta, ñobtä ñan angwane niara abko gokä, aiseite tä kite tiebe kibti ta. Akwa ni obeja ngibiaka era metre bkänä abko tä nüke jukwebtä obeja kwe kärere.

⁴ Yehti obeja kwe tärä niken jökrä ki bäre mento angwane, niara tä niken käne amne obeja tä niken jiehti, ñobtä ñan angwane niara abko kukwei gare kuin obeja kweye.

⁵ Akwa ni gare ñakare obejaye abko ngäniene obeja tä ngitie jirekabe amne ñan tä niken jiehti, ñobtä ñan angwane niara abko kukwei gare ñakare obejaye, aiseite obeja tä ngitie, nieba Jesukwe nitre bariseoye.

⁶ Jesukwe blitaba kore jabtä, käkwe nitre bariseo bä mikaba ni gokä kwrere, ye abko dre bä mikaba kore kwe ñan rükaba gare nitre bariseoye.

⁷ Angwane Jesukwe niebata mda:

Ti bike kukwe era erere niereta mda munye abko krörö: Ti abko jukwe kwrere abko kanti obeja jatadre.

⁸ Ni jökrä nükani ti känenkri ja Ni Dianinkä Ngöbökwé niere abko nitre ni ngökaka amne gokä, akwa obeja era metre tikwe abko käkwe kukwei nuani ñakare.

⁹ Ti abko jukwe kwrere, aiseite nire nire rükadre ti köböire ki teri Ngöbö kanti, ye abko rabadi dianintari. Ne aiseite, obeja tä niken ki teri, bti tä nikenta ki bäre mento amne mikä kuin tä kwen kwetadre ietre, ye kwrere nire nire rikadre ti köböire Ngöbö kanti abko ie jändrän kuin kwandre.

¹⁰ Akwa ni gokä tä kite gore, ni kämike amne jändrän jökrä juankäre ngwarbe nikän; akwa ti abko jatani ni mikakäreta nire Ngöböbe amne ni rabadre nüne bäri kuin kärekäre, abkokäre ti jatani.

¹¹ Mdakäre abko, ti abko ni obeja ngibiaka kuin kwrere. Ni obeja ngibiaka kuin abko tä biare ngataen obeja kräke, obeja diantarikäre.

¹² Akwa ni ngwian ganainkä jae obeja ngibiabtä abko lobo tä kite tuen ie obeja kukwäre angwane, tä ngitie lobo ngäniene amne tä obeja mikete kaibe, ñobtä ñan angwane niara abko ñakare obeja ngibiaka amne obeja ye ñakare kwe, aiseite tä mikete lobo ye amne lobo tä niken obeja kwete amne tä obeja juentari kratikrati kwäräkwärä.

¹³ Ni ngwian ganainkä obeja ngibiabtä ye abko tä ngitie lobo ngäniene amne tä obeja mikete kaibe, ñobtä ñan angwane niara töita ja kwata ngibiabtä, akwa obeja ngibiadre ye abko ütiäte ñakare kräke, aiseite tä ngitie kore.

¹⁴⁻¹⁵ Mdakäre abko, ti ni obeja ngibiaka kuin kwrere, ñobtä ñan angwane ti gare kuin ti Rün ye amne ti Rün gare kuin tie, ye kwrere obeja tikwetikwe erere gare kuin tie amne ti gare kuin ietre arato. Ti abko obeja ngibiaka kuin kwrere, aiseite ti gatadi obeja tikwe kräke.

¹⁶ Mdakäre abko, nitre ñakare israelitare ngätäite obeja mda mda tarä tikwe, akwa tä ñakare ki kwatibe teri obeja tikwe tikwe nitre israelita ngätäite ben gwaire. Akwa ti jatadre obeja ye ngwena arato mikakäre ki teri obeja nitre israelita ben gwaire, amne obeja ye käkwe ti kukwei nuadre amne ti kukwei mikadre täte kwetre angwane, rabadre nüne ki kwatibe teri jökrä amne niaratre ngibiaka rabadi itibe arato abko ti ara.

¹⁷ Ti abko bike ja kwata bien müre ketadre, ti rabadita nire bobukäre abkokäre, aiseite ti Rün tikwe käta ti tarere.

¹⁸ Tikwe ñan ja biandre müre ketadre, ye ngwane ni ñakare jire iti käkwe ti müre ketadre ja töi jenbti. Ti ara jire käta ja bien müre ketadre au, aiseite ti müre ketai, akwa ti abko di tarä ja bien müre ketadre amne ti di tarä ja mikakäre nünenta, ye abko ti Rün käkwe nuemna tie, erere tita nuene. Abko kore se, nieba Jesukwe nitre israelitaye.

¹⁹ Jesukwe blitaba kore, ye kukwei nuaba nitre israelitakwe angwane, niaratre töi rababa bä jene jene jökrä.

²⁰ Ne aiseite ni kwati rababa niere:

Üai käme tä btä, aibe käta kä kwitekä dokwäbti, aiseite tä ñäke kore. ¿Se drekäre munta kukwe mike ütiäte se? nieba kwetre.

²¹ Akwa ni ruäre abko rababa niere:

Nire nire btä üai käme tä ye abko ñan raba blite jire chi ni se kwrere. Mdakäre abko, ni ie kä tuen ñakare abko ie üai käme tä kä mike tuenta ñakare jire chi, rababa niere jae kwärikwäri.

Nitre israelita ji dokwäte käkwe tödekani ñakare Jesubti

²² Kä ye ngwane abko kä tibo, kä ñüre angwane, ju blitakrä Ngöböbe Jerusalén abko mikaninta dbe Ngöbö ngwäreki mekera abko nitre israelita nämane ngwenta töre jae, aiseite nämane jökrä bietabtä Jerusalén.*

²³ Angwane Jesu nämane dikekä ju blitakrä Ngöböbe ye bäre jukä kädianta Jukä S-lomónkwe kántita mda angwane,

²⁴ nitre israelita ji dokwäte jataba ruäre, käkwe ja üakröba Jesu bäre, käkwe nieba ie:

Ma abko nire metre abko ñan tä nuke gare nunye, aiseite nun moto iko töbikabtä kore, aiseite ma abko Ni Dianinkä Ngöbökwé ara ya abko niere gwängwarbe nunye, nieba kwetre Jesuye.

²⁵ Abtä Jesukwe nieba mda ietre:

Ti abko nire, ye tikwe niebarera munye, akwa munkwe ñan ti kukwei mikani era amne mun ñan tä tödeke tibti. Ye abko, sribi ñan tuabare tita nuene ti Rün diebti niarata tibe bä mikakäre, ye abko tä ti mike gare metre,

²⁶ akwa mun ñan tö tödekai tibti, ñobtä ñan angwane mun abko ñakare obeja tikwe, aiseite munta nuene kore.

²⁷ Akwa obeja tikwetikwe abko ie ti kukwei gare kuin, käta ti mike täte amne, niaratre gare kuin tie arato, aiseite obeja tikwe erere tä niken ti jiebti obejata niken ngibiaka jiebti ye kwrere.

²⁸ Amne tikwe obeja tikwetikwe mikadi nüne kärekwäre Ngöböbe amne Ngöbökwé ñan juandi ja okwä bäre mento kä ja tare nikakrä ye kánti. Erere arato, ni mda di ñakare jire diankakrä ti kiseté.

²⁹ Ye abko, ti Rün di kri käkwe obeja biani tie, aiseite ni mda di ñakare jire obeja ye diankakrä ti Rünkän.

³⁰ Ye kwrere ti Rün btä ti, nun abko töi ja kwrere amne nunta ketetibe, nieba Jesukwe nitre israelita ji dokwäteye.

³¹ Yebtä abko nitre israelita ji dokwäte käkwe jä dianba kiseté Jesu kämikakäre jäbti.

³² Abtä niarakwe nieba mda ietre:

Ti Rün diebti tikwe jändrän kuinquin nuenbare kabre ni mda mda die mikakäre, ¿akwa kukwe kuin nuenbare tikwe, ye mden namani blo mun kräke abko dokwäre mun tö nibi ti kämikaj jäbti ye? nieba Jesukwe ietre.

³³ Abtä nitre israelita ji dokwäte käkwe nieba mda Jesuye:

* 10:22 Bieta ye abko kädianta Hanuca mtare.

Ñan makwe jändrän kuin nuenbare abko dokwäre nun tö ma kämikai jäbti, akwa mata ñäke ngwarbe Ngöbö rüere amne ma ngwarbe nun kwrere käta ja mike Ngöböre au. Yebtä nun tö ma kämikai jäbti, nieba kwetwe ie.

³⁴ Abtä Jesukwe nieba mda ietwe:

Ye abko, Ngöbö Kukwei yebtä Ngöbökwē kukwe niebare krörö:

Mun abko ngöbötre, tikwe nieba munbtä,
abko Ngöbökwē niebare, tä tikani niara Kukweibtä.

Salmos 82.6

³⁵ Ngöbö Kukweita tikani kore, ye abko ni ñan raba rükente jire chi abko garera nie amne, ni jökrä ie Ngöbökwē ja Kukwei biani abko ngöbötre niebare kwe ie,

³⁶ aisetē ¿se ñöbtä abko tita ja Ngöbö Odei niere abko nibi blo munkrä se? Ngöbökwē ti dianinkä ja Odeire, käkwe ti juani nitre kukwe nuenkä kämekäme Ngöbö rüere ye ngätäite, tita niere aisetē ¿se ñöbtä abko tita ja Ngöbö Odei niere angwane tita ñäke ngwarbe Ngöbö rüere abko munta niere tie?

³⁷ Ti abko Ngöbö Odei tita niere, akwa tikwe ñan sribi ti Rünkwe nuendre angwane, munkwe ñan ti kukwei mikadere era;

³⁸ akwa tikwe sribi ti Rünkwe nuendre, ye ngwane nane mun ñan tö ti kukwei aibe mikai era abko tä dbe. Akwa tita sribi ti Rünkwe nuene era metre, aisetē yebti munkwe tödeka, ti Rünta ketetibe tibe amne tita ketetibe ben ye rükadre gare metre munye, abkokäre munkwe tödeka sribi ti Rünkwe nuenta tikwe yebti.

³⁹ Abtä nitre israelita ji dokwäte tö rababa Jesu kain ngite bobukäre, akwa Jesu gitiaba kän.

⁴⁰ Angwane Jesu rikabata Ñö Jordánbtä, Juan Bautista nämane ni ngökö ñöte, ye kánti Jesu rababa nünentbe.

⁴¹ Angwane ni kwati rikaba kánti ja tuakäre ben, kä rababa niere:

Sribi kri ñan tuabare abko Juankwe nuenbare ñakare, akwa kukwe nieba kwe Jesubtä abko kukwe era erere nieba kwe ñan ñan abko ni kwati rababa niere.

⁴² Angwane ni kwati nämä yete käkwe tödekaba Jesubti.

11

Jesu kukwe muko Lázaro krütani

¹⁻² Kä ye ngwane ni iti kädian nämane Lázaro nämä nüne juta Betaniate abko namani bren jume. Juta Betania yete abko Marta amne María nämä nüne ngwai Lázarobe. María ye mden abko käkwe ñö rä bäne kekaba ni Dänkien ngotobti, bti ni Dänkien ngoto rötaba ja dokwä drüenbti kwe.

³ Lázaro namani bren jume, aisetē ngwai nibu ye mden käkwe ni mda juanba niere krörö Jesuye: Ni Dänkien, ma kukwe muko kuin makwe, mata tarere ye bren abko juanba niere kwetwe Jesuye.

⁴ Erere bkänä ni ye nikani, rükaba mate Jesu kánti angwane, Jesukwe kukwei nuaba kore, bti nieba kwe:

Bren ye kisete niara ñan krütadre janknukäre akwa, bren ye köböire Ngöbö di kri amne ti Ngöbö Odei di kri rabadi mikani tuadre, nieba Jesukwe.

⁵ Jesu abko kwe Marta, María amne Lázaro nämane tare kri,

⁶ akwa Lázaro bren nie rükaba ie angwane niara nämä, ye kánti rababa köböbu mda.

⁷ Bti nitre ja töitikaka ben ie nieba kwe:

Bränta kä Judeate, nieba kwe.

⁸ Abtä nun ja töitikaka Jesube käkwe nieba mda ie:

Dirikä, nitre israelita ji dokwäte tö rababa ma kämikai jäbti kä Judeate, ye abko käi ngämi niken raire ta. ¿Kä ye kánti abko ma tö nibira rikaita bobuta ya? nunkwe nieba ie.

⁹ Abtä Jesukwe nieba mda nunye:

¿Kä ngwen abko tä neme ñänä okwä krä jätäbti krobu ñan ñan? Ne aisetē nita dikekä kä ngwenbti angwane, kä tuen kuin nie, aisetē ni ngotota ritete ñakare, ñöbtä ñan angwane kä trä ngwen kä nebtä yebti abko käta nebe tuen kuin ja käne nie.

¹⁰⁻¹¹ Akwa nire erere rikadre dikekä deo, ye ngwane kä ñan rabadre tuen ie, aisetē ngoto rabadre ritete. Tita niere kore, ñöbtä ñan angwane ti abko kä trä ngwen kwrere amne tita nete angwane, kä tarä sribikrä. Ni kukwe muko Lázaro nikani kibien, akwa ti bike niken gaenkröta, nieba Jesukwe nunye.

¹² Angwane nun ja töitikaka ben käkwe nieba mda ie:

Kiterate quinta, aisetē tä kibien, nunkwe nieba ie.

¹³ Akwa Lázaro abko krütanina abko Jesu nämä niere nunye, akwa Lázaro nikani kibien bkänä abko Jesu nämä niere, nun rababa nütüre.

¹⁴ Abtä kukwe era erere nieba metre kwe nunye krörö:

Lázaro kùrera,

¹⁵ akwa tita ñakare kánti angwane kùre, ye abko kái nibi nuäre tibtä, ñobtä ñan angwane Lázaro kùre, ye köböire kukwe mda rakadiká abko rabadi bári kuin munkrä abko kákwe mun die mikadi tödeke bári tibti, aiseite brän Lázaro tuen, nieba Jesukwe nunye.

¹⁶ Angwane ni iti ja töitikaka Jesube kädian nämane Tomás arabe kädian nämane “Munkin” abko kákwe nieba nun ja töitikaka Jesube mda mdaye:

Ni kámikadre gwaire niarabe kä Judeate, abkokäre brän siba ben, nieba kwe.

Jesukwe Lázaro ngwai moto mikani nuäre

¹⁷ Ye erere Jesu rikaba, rikaba nebe juta Betaniate mda angwane, Lázaro doboi mikani abko kái nikanina köböbkä jire ta angwane, Jesu rikaba neme.

¹⁸ Juta Betania abko nämä kánime Jerusalén ken, bäsi kilometro krämä näre.

¹⁹ Ne aiseite nitre israelita ji dokwäte rikaba kwati yete basare Martaye amne Mariaye moto ketabtäkäre kä mikakäreta nuäre btätre, ñobtä ñan angwane ngwai Lázaro krütani kán aiseite.

²⁰ Angwane Jesu rikaba neme juta ken, ye gaba Martakwe angwane, jataba ngäbti, akwa María abko rababa gwi.

²¹ Marta rikaba Jesu kánti angwane, nieba kwe Jesuye:

Ti Dänkien, ma tädre nete akräke ti ngwai ñan krütadre tikän,

²² akwa mtare makwe dre dre kärädre Ngöböye, erere biandi jökrä kwe mae, ye abko gare kuin tie, nieba kwe ie.

²³ Abtä Jesukwe nieba mda ie:

Ma ngwai rükadita nire, nieba kwe Martaye.

²⁴ Angwane Martakwe nieba mda:

Kä mrä angwane, ni krütani krütani rükadita nire, ye näire Lázaro rükadita nire arato, ye abko gare kuin tie, nieba kwe Jesuye.

²⁵ Abtä Jesukwe nieba ie:

Ti abko ni krütanina mikakata nire amne ti abko ni mikaka nüne ketetibe Ngöböbe. Nire nire kákwe tödekadre tibti abko krütadi era metre, akwa rükadita nire amne,

²⁶ nire nire tä nüne kákwe tödekadre tibti abko ñan krütadre kärekäre Ngöbö okwä bäre mento. ¿Ne abko era makrä ya Marta? nieba Jesukwe ie.

²⁷ Angwane niarakwe nieba mda ie:

Jän, ti Dänkien. Ma abko Ni Dianinkä Ngöbökwé amne ma Ngöbö Odei abko rükadre kä nebtä, ye abko tita mike era jae, aiseite tita tödeke mabti, nieba kwe Jesuye.

²⁸ Martakwe blitaba kore Jesube, yehti Marta rikaba etba María kärere, kákwe nieba tiebe krörö ie:

Dirikä tä nete, kákwe ma käräniri, nieba kwe ie.

²⁹ Martakwe nieba kore Mariaye, ye btäräbe María rükaba dikekä krö, jataba niken ja tuakäre Jesube.

³⁰ Akwa Jesu ngämi neme jutate, aiseite Marta rükaba ngäbti, ye kánti nämä juta bäre.

³¹ Angwane nitre israelita nämä gwi Marta amne María kánti kä mikakäreta nuäre btätre abko okwäbti María rükaba dikekä krö, bti rikaba jötrö, angwane nitre israelita ye rikaba jökrä jiehti, ñobtä ñan angwane María rikaba müen dobohti rababa nütüre, aiseite rikaba kore María jiehti.

³² Akwa Jesu nämä, ye kánti María jataba nüke angwane, María rikaba ngitiekä nguku-dokwäbti temen Jesu ngotobtä Jesu mikakäre ütiäte, kákwe nieba ie:

Ti Dänkien, ma tädre nete akräke ti ngwai ñan krütadre tikän, nieba kwe Jesuye.

³³ Angwane María btä nitre israelita rükaba Mariäbe, ye rababa müen jökrä Jesu okwäbti. Abtä Jesu rababa ulire amne moto rababa däre krübäte,

³⁴ kákwe nieba mda ietre:

¿Munkwe Lázaro doboi mikani mdente? nieba kwe.

Angwane niaratre kákwe nieba:

Jakwe tuen nete ti Dänkien, nieba kwetre mda.

³⁵ Angwane Jesukwe müaba arato.

³⁶ Abtä nitre israelita kákwe nieba:

Lázaro nämane tare kri kwe tuen, rababa niere.

³⁷ Akwa ni ruäre abko rababa niere:

Ni ie kä tuen ñakare niara se kákwe kä mikani tuenta ie. ¿Se abko Lázaro ñan krütäre, abkokäre jändrän mdara jire nuendre kwe kräke abko ñan rabadre bare ie ya? rababa niere Jesu rüere.

Jesukwe Lázaro mikaninta nire

³⁸ Angwane Jesu moto rababata дәre, kәkwe krõtaba Lázaro doboi kukwәre angwane, kә mkә te Lázaro doboi mikani, yebtә jә oto kwata kri nәma mikani.

³⁹ Angwane Jesukwe nieba:

Jә oto ye denkä mento dobobti yete, nieba kwe.

Abtä Lázaro ngwai Marta kәkwe nieba Jesuye:

Ti Dәnkien, kә nena kōbōbkә jire niara krütani amne doboi mikani, aisete rä nena kure, nieba kwe ie.

⁴⁰ Abtä Jesukwe nieba mda ie:

¿Makwe tödekadre tibti angwane, Ngōbö di kri bә nuәre ye makwe tuadi, tikwe ñan nini mae ya? nieba Jesukwe ie.

⁴¹ Angwane jә oto ye diankaba mento. Ye btärәbe Jesukwe nikraba kә kәinbti, kәkwe nieba:

Ti Rün tikwe, tikwe blitaniri mabe amne mata biare ti die mike, yebtә ti tö kuin niei mae.

⁴² Kәre tita blite mabe ja di kәrere mae angwane, mata nuene ye gare kuin tie, akwa makwe ti juani ye abko nitre tä nete noko, krәke rabadre era, abkokәre tita blite kore mabe, nieba Jesukwe Rūnye.

⁴³ Jesukwe blitaba ünәn jōkrә kore, ye btärәbe ngrateba kri kwe, kәkwe nieba:

¡Lázaro, jakweta künken kә mkә ye bәre mento! nieba kwe.

⁴⁴ Ye btärәbe Lázaro nәma nguse, ye kise amne ngoto nәma mrianinte jōkrә dәnte abko erere jataba kә mkә yete mentokwәre angwane, ngwәre abko nәma mrianinte jōkrә jatabata kә mkәte mento. Angwane nitre nәma yete, ye ie Jesukwe nieba:

Tikete, bti tuemetre dikekә, nieba kwe.

Erere nuenba kwetre.

Jesu rüe tö namani kain ngite tiebe

(Mateo 26.1-5; Marcos 14.1-2; Lucas 22.1-2)

⁴⁵ Jesukwe Lázaro mikabata nire, ye abko nitre israelita nәma Marta amne María mukore ye kәkwe tuaba angwane, niaratre kwati kәkwe tödekaba Jesubti.

⁴⁶ Akwa ni mda mda kәkwe tödekani ñakare Jesubti abko rikaba nitre bariseo kәnti angwane, Jesukwe Lázaro mikabata nire ño, ye abko niebare jōkrә kwetre nitre bariseoye.

⁴⁷ Abtä nitre bariseo amne nitre blitaka Ngōböbe ni mda mda diәre dәnkientre kәkwe nitre sribikә Sanedrinbtә kәrәbare gätәkәre, bti niebare jae kwәrikwәri kwetre:

Ni kәdekata Jesu kәta sribi kri ñan tuabare nuene kabre ni ngätәite. ¿Sebtә abko nikwe dre nuendre?

⁴⁸ Nikwe tuadremetre sribi nuene janknu kore angwane, ni jōkrә rabadi tödeke bti. Yebtә abko nitre romanobo tä nun dәnkiene jatadi, kәkwe ju blitakrä Ngōböbe nikwe se juandi ngwarbe jōkrә amne, juta israelita nikwe noko juandi ngwarbe jōkrә kwetre arato, niebare kwetre.

⁴⁹ Abtä ni iti kәdian nәmane Caifäs abko nәmane sribire nitre blitaka Ngōböbe ni mda mda diәre dәnkiene kә ye nәire abko kәkwe niebare ietre:

¡Mun tōi ñakare!

⁵⁰ Ni gadrekә jōkrә juta israelita nete, ye abko rabadre bәri tare, akwa ni itibe krütadre ni jōkrә täte amne ni jōkrә krәke, ye abko rabadre bәri kuin munkrä abko btә munta töbike ñakare, niebare Caifәkwe.

⁵¹ Caifäs abko kәkwe ñäkәbare kore, ye abko ñan niebare ja tōi jenbti kwe, akwa kә ye ngwane niara nәmane nitre blitaka Ngōböbe ni mda mda diәre dәnkiene, aisete Jesu krütadre nitre israelita täte abko niebare Ngōbö Üai kōböire kwe.

⁵² Ye abko ñan Jesu krütadre nitre israelita aibe täte amne krәke, akwa Ngōbö ngәbriәnkәtre nәmane kә ketareketare te kwärәkwärә abko rabadreta ükaninkrō jōkrә ketetibe nitre Ngōbö ngәbriәnkәtre juta israelita ben gwaire, abkokәre Jesu krütadre, aisete Caifәkwe niebare kore.

⁵³ Ne aisete kōbö ye nәire mentokwәre nitre sribikә Sanedrinbtә kәkwe ja tōi mikani gwaire jōkrә Jesu müre ketakәre.

⁵⁴ Abtä Jesu ñan rabadre dikekә ja ngwәrekri jōkrә nitre israelita ji dokwәte ngätәite angwane, juta kә Efraín nәma kәnime kә kaibe ken, ye kәnti Jesu rikaba amne rababa nüentbe yete nitre ja tōitikaka benbe.

⁵⁵ Kә ye ngwane abko, bieta Pascua nitre israelitakwe abko kōböi jatabara nuketa ja ken, aisete nitre israelita kwati nünanaka Jerusalén bәre rikaba neme Jerusalén ja mikakәre dbe Ngōbö ngwәrekri bieta Pascua kәnenkri, rabadre neme ju blitakrä Ngōböbe kәnti Pascua mikakәre ütiәte jae, abkokәre rikaba.

⁵⁶ Angwane nitre ye rababa nәin jōkrә Jesu kәnentari, kә rababa niere krörō jae kwәrikwәri ju blitakrä Ngōböbe ye kәnti:

¿Munta töbike ño? ¿Jesu rukai bietabtä nete ruen ya? rababa niere jae kwärükwäri.

⁵⁷ Angwane nitre bariseo amne nitre blitaka Ngöböbe ni mda mda diäre dänkientre käkwe nieba krörö ni jökräye:

Jesu tä mmente raba gare munye angwane, munkwe mika gare jötrö nunye amne nunkwe kadi ngite, nieba kwetre.

12

Meri iti käkwe ñö rä bäne kekani Jesubti

(Mateo 26.6-13; Marcos 14.3-9)

¹ Yehti köbö ti Pascua känenkri, Jesu rikaba Lázaro kánti juta Betaniate mda. Lázaro ne mden abko krütani, akwa Jesukwe mikaninta nire abko kánti Jesu rikaba.

² Jesu rababa yete angwane, mrö sribeba kwetadre Jesu mikakäre ütiäte angwane, Marta nämä mrö dräire amne Lázaro abko nämä tákäninthe siba mesabtä mröre Jesube.

³ Angwane María jataba kri ngwäri rä bäne kä nardo ngwena bäsi botea ötare jire. Nardo ye abko ütiäte kri amne ñan nämäne mritani jire ñöbe abko María jataba ngwena, bti Jesu mikakäre ütiäte Mariakwe nardo ye kekaba Jesu ngotobti, bti Jesu ngoto rötabata ja dokwä drüenbti kwe. Angwane kä rä rababa bäne jökrä gwita temen nardo ye kisete.

⁴ Angwane ni iti ja töitikaka Jesube kä Judas Iscariote käkwe Jesu kitadre ngise ye käkwe nieba:

⁵ ¡Jo! ¡Ngwian ganaindre bäsi kä kwati jire btä kri ngwäri rä bäne se rürümoinde abko bti ni bobre bobre die mikadre bä amarebti ñan rürümoiniri se! nieba kwe.

⁶ Judas käkwe ñäkäba kore, akwa ñan ni bobre bobre ruentari tare ie, aisete ñäkäba kore kwe. Akwa niara abko gore, aisete ñäkäba kore kwe. Niara abko ngwian ngibiaka nunkrä, akwa nämä ngwian ye goire ruäre nunkän, aisete ñäkäba kore kwe.

⁷ Abtä Jesukwe nieba mda Judaye:

Niarakwe ti mikadre biare doboi mikadre, abkokäre nämäne kri ngwäri ye üke tikrä, aisete tuemetre kaibe. Makwe ñan nika.

⁸ Mdakäre abko, nitre bobre bobre abko tädi käre mun ngätäite nete, aisete mun tö raba die mikai ñongwane, erere munkwe die mika, akwa ti abko ñan tädi kärekäre munbe nete. Abko kore se, nieba Jesukwe.

⁹ Yehti Jesu nämä juta Betaniate abko gaba nitre israelitakwe angwane, ni kwati jataba Jesu kánti. Niaratre ye abko ñan jataba Jesu aibe tuakäre, akwa Lázaro krütani, mikaninta nire Jesukwe ye abko jataba tuakäre arato.

¹⁰ Abtä nitre blitaka Ngöböbe ni mda mda diäre dänkientre käkwe kukwe ükateba Lázaro kämikakäre arato,

¹¹ ñobtä ñan angwane Lázaro krütani akwa Jesukwe mikabata nire, aisete Lázaro köböire ni israelita kwati käkwe tödekaba Jesubti amne ñan rababa nekete mda nitre blitaka Ngöböbe ni mda mda diäre dänkientre yekri. Abtä kukwe ükateba kore kwetre Lázaro rüere.

Jesu nikani nebe Jerusalén

(Mateo 21.1-11; Marcos 11.1-11; Lucas 19.28-40)

¹² Ye näire, ni rababara kwati krübäte juta Jerusalén te bieta Pascua mikakäre ütiäte amne, jändrinane Jesu jatabara ji ngrabare Jerusalén kukwäre abko nitre kwati ye käkwe gaba.

¹³ Angwane datile kriekä tikakaba kwetre, ben jataba Jesu kakäre ngäbti jrei kwrere, kä rababa ngrente krikri be krörö ie:

¡Hosana! ¡Ma abko Jrei nitre israelitakwe!

Ni Dänkien Ngöbö käkwe ma juani.

Ma kite ni Dänkien Ngöbö kábti, aisete nunta ma käikitekä,

Salmos 118.25

abko nitre israelita rababa niere Jesu ngäbti.

¹⁴ Angwane Jesu nämä näin buro ngäbälibti, rikaba neme Jerusalén mda Ngöbö Kukweita niere ye kwrere:

¹⁵ Mun nünanka juta Siónte* nete, mun ñan rekwetaka, ñobtä ñan angwane Jrei munkwe kite buro ngäbälibti, ye mike ñäräre munkwe,

Zacarías 9.9

abko tä tikani Ngöbö Kukweibtä abko erere Jesukwe nuenbare.

¹⁶ Akwa ye näire nun ja töitikaka Jesube abko ie kukwe ye ñan rükaba gare, akwa Ngöbökwé Jesu mikaba ütiäte, rikaba ngwenante kä káinbti angwane, batibe kukwe rakakaba ye abko nämä tikani jökrä Ngöbö Kukweibtä abko erere nakaninkä btä abko rükabata töre nunye.

¹⁷ Jesu jataba burobti, ye ngwane abko Lázaro krütani nämäne doboi mikani nguse abko Jesukwe käräbata künken amne Jesukwe mikaninta nire, ye abko nitre tuakatuaka rababa niere ni mda mdaye.

* **12:15 Sión.** Juta Jerusalén ara abko kädianta Sión arato.

¹⁸ Ne aisete ni kwati jataba Jesu ngäbti, ñobtä ñan angwane Jesukwe sribi kri ñan tuabare nuenba, Ngöbö nämane ben bä mikakrä abko gaba kwetre, aisete rababa kite jökrä Jesu ngäbti.

¹⁹ Akwa nitre bariseo abko rababa niere jae kwärikwäri:

¡Ni jökrä nibi niken niara jiebtí, ne aisete kitera ni ganaine kwäräbe, tuen sete se! ¿Sebti nükwe dre nuendi mda? rababa niere.

Jesu müre ketadi rüekwe, niebare kwe

²⁰ Angwane nitre rababa kwati Jerusalén Ngöbö mikakäre ütiäte jae bietabtä, ye ngätäite nitre griegore nämä ruäre abko

²¹ jataba nüke Felipe kánti. Felipe ye abko nünanka juta Betsaidate kä Galileate. Nitre ye jataba Felipe kánti, kákwe nieba ie:

Ja mräkä, nun tö nibi ja tuai Jesube, nieba kwetre ie.

²² Angwane Felipe rikaba kákwe nieba mda Andréye, bti niaratre nibu rikaba kákwe kukwe ye nieba jökrä Jesuye.

²³ Angwane Jesukwe nieba mda ietre:

Kä kitani Ngöbökwé ti Ni Kä Nebtä Ngobo mikakäre ütiäte abko käi nüra.

²⁴ Ye abko ti bike kukwe era erere niere munye. Trigo nurai nökata dobote, ye abko nita krüte bä mikata trigo nuraibtä. Ye abko trigo nurai ñan gütdrete kore angwane, trigo nurai ye aibe rabadre kärekäre, akwa trigo nurai ye nökadre, bti gütdrete amne mu rabadre niren angwane, ngwä rabadre kabre. Ti abko trigo nurai ye kwrere. Ti ñan krütadre angwane, ti aibe rabai nüne kärekäre Ngöböbe, akwa ti krütadre angwane, ni kwati jatadi nüne kärekäre Ngöböbe.

²⁵ Mdakäre abko, nire nire israelita ya, ñakare ya ie ja kwata ruentari tare, abtä ñan tö ja tare nikai ti kräke, ni ye abko kákwe ñan nünandi kärekäre Ngöböbe; akwa nire nire ie ja kwata ñan rabadre ruentari tare ja tare nikakrä kä nebtä tikrä, ni ye abko kákwe nünandi kärekäre Ngöböbe.

²⁶ Ne aisete nire nire tö sribire tikrä abko jata ti jiebtí amne ti tädi mdente erere, ye kánti sribikä tikwe tädi tibe. Erere arato, nire nire kákwe sribidre tikrä, ni ye abko Ngöbö ti Rün tikwe kákwe mikadi ütiäte. Abko kore se, nieba Jesukwe ietre.

²⁷ Yebti Jesu krütadre abko btä nämä töbike kri, kákwe nieba:

¡Aingwaree, ti nibi nekwetekä krübäte dikaro ja jiebtí bäre! ¿Nebtä tikwe dre niedre se? ¿Tikwe niedre, Tata tikwe, kukwe kite tare krübäte ti rüere, ngänieni ti nibi nekwetekä, aisete den tibti ta, tikwe niedre ya? Ñakare, raba ruen tie, ñobtä ñan angwane ti jatani kukwe ne mikakäre täte aisete.

²⁸ Ti Rün tikwe, ja bä mike ütiäte ni jökrä okwäte, ie ti tö. Abko kore se, nieba Jesukwe.

Ye btäräbe ni kukwei rababa kä káinbti, kákwe nieba krörö:

Tikwe ja mikanina ütiäte, akwa tikwe ja mikadita ütiäte bobuta abko nieba kä káinbti sete.

²⁹ Angwane, nitre nämä yete, ie ni kukwei kä káinbti jaraba angwane, rababa niere:

Unsuni ngö káinta ye, rababa niere.

Akwa ni ruäre abko rababa niere:

Angele kä káinbti kákwe ñäri Jesuye ye, rababa niere.

³⁰ Angwane Jesukwe nieba ietre:

Ni kukwei jaraniri kä káinbti munye, ye abko mun die mikakrä tödeke tibti, akwa ñakare tikrä.

³¹ Ye abko, gwängwarbe kukwe rabadre ükaninte Ngöbökwé ni jökrä kä nebtä kräke abko käi kitera nüke. Erere arato, diablu tä ni jökrä dänkiene kä nebtä abko juantari mento abko käi kitera nüke arato.

³² Akwa ti ne ara rabadre kaninkä krusobtä käin angwane, ti ne ara jire kákwe ni jökrä kärädi jae, nieba Jesukwe.

³³ Jesu abko krütadi ño, ye mden tö rababa niei, kákwe blitaba kore.

³⁴ Abtä nitre nämä kwati yete, ye kákwe nieba Jesuye:

Ni Dianinkä Ngöbökwé abko kákwe nünandi kärekäre, ye abko Ngöbö Kukwei tä niere amne Ni Dianinkä Ngöbökwé amne ni Kä Nebtä Ngobo abko ni itibe, akwa Ni Dianinkä Ngöbökwé ñan krütadre, aisete, ¿ye ñobtä abko Ni Kä Nebtä Ngobo kadikä krusobtä käin, mata niere ye? ¿Nire abko Ni Kä Nebtä Ngobo amarebti btä mata ñäke kore ye? nieba kwetre Jesuye.

³⁵ Abtä nitre nämä kwati yete, ie Jesukwe nieba mda:

Ti abko ñotra kwrere amne jändrän jökrä Ngöbö rüere amne ti rüere, ye abko kä iko kwrere. Ti abko ñotra tä mun ngätäite nete, akwa ñotra ye abko rabadi bä jötörö mda mun ngätäite nete, aisete ñotra tä munbe nete angwane, munkwe dikaka ñotra trä ye, kä iko kákwe ñan

mun ganaindre abkokäre, ñobtä ñan angwane nire nire tä dikekä kä ikote ye abko tä niken mden kukwäre ñan tä neme gare ie.

³⁶ Ti abko ñotra tä mun ngätäite nete. Mun rabare nüne ti kwrere, abkokäre tita nete mun ngätäite angwane munkwe tödeka tibti. Abko kore se, nieba Jesukwe.

Jesukwe blitaba ünän jökrä kore, yebti Jesu rikabata, käkwe ja rükantebata bobuta nitre israelita ji dokwäteye.

Ni kwati käkwe tödekani ñakare Jesubti

³⁷ Jesukwe sribi kri ñan tuabare nuenba kabre nitre israelita okwäbti Ngöbö nämane niarabe mikakäre gare ietre, akwa ñan tö namani tödekai jire chi Jesubti,

³⁸ ye abko ni Ngöbö kukwei niekä kädian nämane Isaías käkwe tikani krörö abko erere namani bare niaratrebtä:

Ti Dänkien, ¿kukwe dirita nunkwe, ye nirekwe mikadi era?

¿Amne ma di kri ye abko makwe mikani tuadre nireye?

Isaías 53.1

abko tikani kore Isaíakwe nitre israelitabtä.

³⁹ Ye mden kisete, nitre israelita kwati ñan namani tödeke Jesubti. Mdakäre abko, Isaías arabe käkwe kukwe mda tikani krörö btäre arato abko nere:

⁴⁰ Ngöbökwä kä trä ötaninte niaratre okwäte, niarata dre nuene niaratre okwäbti ñan jatadre metre ietre abkokäre.

Erere arato, Ngöbökwä niaratre töi ganinte, kukwe ño ño ñan rabadre nüke gare ietre abkokäre.

Ye kwrere ñan jatadreta ti kukwäre angwane, tikwe ñan mikadreta kuinta diantarikäre, *Isaías 6.10*

abko Isaíakwe tikani täräbtä nitre israelitabtä.

⁴¹ Isaías abko käkwe Jesu di kri bä nuäre tuani, aiseite nämane blite btä, käkwe niebare kore nitre israelitaye kira.

⁴² Nitre israelita kwati käkwe tödekaba ñakare Jesubti, akwa nitre israelita kwati mda abko käkwe tödekaba bti. Erere arato, ni ruäre ji dokwäte abko käkwe tödekaba Jesubti siba, akwa ñan tö rababa niei ja ngwärekri jökrä, ñobtä ñan angwane nane nitre bariseo käkwe gadre amne kitadrekä sinagoga bäre mento abko jürä rababa btäre, aiseite nämane tödeke Jesubti abko ñan rababa niere,

⁴³ ñobtä ñan angwane nitre kä nebtä käkwe mikadre ütiäte jae abko ie tö rababa bäri amne, Ngöbökwä mikadre ütiäte jae, ye abko rababa ütiäte ñakare kräke.

Jesukwe diribare ünän ja ngwärekri jökrä

⁴⁴ Yebti Jesukwe ngrateba kri, käkwe nieba:

Nire nire käkwe tödekadre tibti, ye abko ñan tödekadre ti ne aibehti kwe, akwa ti Rün tikwe käkwe ti juani, yebti tödekadre kwe arato.

⁴⁵ Erere arato, nire nire käta ti tuen, ye tä ti Rün ti juanka tuen arato, ñobtä ñan angwane niarata dre dre nuemna tie aibe tita nuene.

⁴⁶ Nire nire tä nüne kä ikote amne Ngöbö gare ñakare ie, käkwe tödekadre tibti abko ñan nünandi mda kä ikote kwe, ñobtä ñan angwane rükadre ño Ngöbö kánti rükadre gare ie, abkokäre ti jatani ñotrare mun ngätäite kä nebtä.

⁴⁷ Akwa nire nire käta ti kukwei nuen, akwa ñan tä mike täte amne ñan tä mike era jae, ye kräke tikwe ñan kukwe ükadrete au, ñobtä ñan angwane ñan ti jatani kukwe ükete ni rüere juantarikäre Ngöbö okwä bäre mento, akwa ti jatani ni diantarikäre niaratre ngite ngäniene.

⁴⁸ Akwa nire nire tä bätä ngwen tibtä amne kukwe dirita tikwe ñan tä mike ütiäte jae, ye abko ñan tikwe kukwe ükadite kräke amne ñan tikwe kitadi ngite Ngöböye. Akwa munkwe ñan ti kukwei mikadre era, ye ngwane ti Rün käkwe kukwe ükadite munkrä kä mrä angwane,

⁴⁹ ñobtä ñan angwane tita blite, ye abko ñan tita niere ja töi jenbti, akwa ti Rün tikwe käkwe ti juani ye abko tä dre niemna tie abko erere tita dirire munye.

⁵⁰ Ti Rün kukwei, ye abko nire nire käkwe mikadre era jae abko rabadi nüne kärekäre ti Rün Ngöböbe abko gare kuin tie, aiseite tita kukwe niere ye abko ti Rün tikwe tä niemna tie, erere tita niere. Abko kore se, nieba Jesukwe.

13

Jesukwe nitre ja töitikaka ben ngoto bätäninte

¹ Yebti bieta Pascua jatabara nüke angwane, Jesukwe kä mikarekä kä nebtä amne, rikareta kä käinbti niara Rün kánti, ye abko kä nükanina abko nämänena gare Jesuye angwane, nitre jen Jesukwe nämane kä nebtä abko Jesu nämä tarere, ye abko tareba täte jökrä kwe.

² Nun jataba mröre dere, akwa nun ngämi mröre, känenkri Simón ngobo Judas Iscariote abko diablukwe töi mikabara Jesu rüere, Jesu kitakäre ngite.

³ Akwa Jesu abko, ie Rünkwe jändrän jökrä mikanina gare nämanena gare ie amne, niara jatani Ngöböki amne rikadita Rün kánti, ye abko nämanena gare ie arato.

⁴ Ne aisete, batibe rababara tákänintbe mröre mesabtä, akwa rükaba dikekäta krö, käkwe dän tikateba jabtä, bti dän kukwän chi makäteba kwe ja mrökarabtä,

⁵ bti ñö kekaba unkwente kwe, bti rikaba nun ja töitikaka ben ye ngoto bätete, ni klaboré käkwe nuendre ye kwrere amne, dän kukwän nämene niara mrökarabtä, yehti rikaba nun ngoto bä rötöta se kwrere.

⁶ Jesu rikaba nebe Simón Pedro kánti ngoto bätätekre angwane, Pedrokwe nieba ie:

Ti Dänkien, çni klaboré käta ni ngoto bätete, kwrere jire ma bike ti ngoto bätete tie ya? nieba kwe ie.

⁷ Abtä Jesukwe nieba mda ie:

Tita dre nuene ñan nebe nuke gare mae mtare, akwa abti rükadi gare mae, nieba kwe Simón Pedroye.

⁸ Angwane Pedrokwe nieba mda Jesuye:

çTikwe ñan ma tuametre ja ngoto bätete jire chi! nieba kwe ie.

Abtä Jesukwe nieba mda ie:

Tikwe ñan ma ngoto bätärete ne ngwane, ma ñan rabadre jen tikwe, nieba kwe ie.

⁹ Angwane Simón Pedro käkwe nieba mda ie:

Ti Dänkien, kore ne ngwane, ñan makwe ti ngoto aibe bätäte, akwa makwe ti kise amne ti dokwä bätäte arato, ie ti tö nibi, nieba kwe ie.

¹⁰ Akwa Jesukwe nieba mda ie:

Nita jüben krire, bti nita niken känime, ye ngwane ni ngoto aibe tä nebe dobrore, aisete ni ngoto aibe bätärete, ñöbtä ñan angwane ni ngrabare abko tarä nebe merebe jökrä amne mun abko nena merebe, akwa era metre mun jökrä ñakare merebe, nieba Jesukwe.

¹¹ Jesukwe nieba kore, ñöbtä ñan angwane nirekwe kitadi ngise ye abko nämä gare kuin ie, aisete nieba kore kwe Judas Iscariotebtä.

¹² Jesukwe nun ja töitikaka ben ngoto bätäteba ünän jökrä, bti Jesukwe dän kitabata jabtä, bti rababata tákänintbe mesabtä, käkwe nieba:

çÑöbtä tikwe mun ngoto bätärite ye nü gare munye ya? nieba Jesukwe nunye.

¹³ Yehti Jesukwe nieba mda nunye:

Ti abko Dirikä amne ti mun Dänkien munta niere tie, ye abko kukwe era erere munta niere, ñöbtä ñan angwane ti abko Dirikä amne ti mun Dänkien bkänä.

¹⁴ Ti Dirikä amne ti mun Dänkien käkwe mun ngoto bätärite jökrä ni klaboré kwrere ne ngwane, ye kwrere munkwe ja mika bobre ni klaboré kwrere, käkwe ja ngoto bätädrete jae kwärikwäri, tikwe nuni ye kwrere.

¹⁵ Tikwe ja miri bobre ni klaboré kwrere mun jökrä kräke, ye kwrere munkwe nuendre jakrä kwärikwäri, abkokäre tikwe kukwe hä miri kore mun okwäbti.

¹⁶ Ye abko, ti bike kukwe era erere niere munye abko krörö: Ni klaboré ye ñakare bäri ütiäte niara bkänkä kräke. Erere arato, ni ni mda kukwei ngwianka ye abko ñakare bäri ütiäte ni niara juanka ye kräke.

¹⁷ Ne aisete tikwe kukwe nuni mun kräke, ye nü gare munye angwane, munkwe nuendre kwrere jakrä kwärikwäri arato ne ngwane, kä rabadi nuäre munbtä amne Ngöbökwe ja di biandi munye.

¹⁸ Akwa tita kukwe niere, ye abko ñakare mun jökrä kräke, ñöbtä ñan angwane tikwe mun mden mden dianinkä jen jakrä ye abko gare kuin tie, akwa Ngöbö Kukwei tä tikani ye abko rabadre bare, abkokäre ni iti käkwe kukwe nuendi krörö btä kukweta tikani:

Ni iti tä mröre siä kwatibe te tibe abko nikwitani ti rüere,

Salmos 41.9

abko tä tikani Ngöbö Kukweibtä, ye erere rakadikä.

¹⁹ Kukwe ye abko ngämi nakenkä, känenkri tita niere munye, kukwe ye kwrere rabara nakenkä mun okwäbti angwane, TITA abko munkwe mikadre era, abkokäre tita niere munye.

²⁰ Mdakäre abko, ti bike kukwe era erere niere mda munye abko krörö:

Tita ni juen, ye nire nire käkwe kadre ngäbti, ni ye abko käta ti ne ara jire kaen ngäbti amne, nire nire käta ti kaen ngäbti, ni ye abko käta Ngöbö ti juanka ara jire kaen ngäbti. Abko kore se, nieba Jesukwe nun ja töitikaka benye.

Judas Iscariote käkwe Jesu kitadi ngise, niebare Jesukwe

(Mateo 26.20-25; Marcos 14.17-21; Lucas 22.21-23)

²¹ Jesukwe blitaba kore, ye btäräbe Jesu ñan moto rababa neme nuäre, rababa ruen ie angwane, Judakwe niara kitadi ngise abko nieba metre krörö kwe:

Mun iti tä nete käkwe ti kitadi ngise ti rüeye ti müre ketakäre, ye abko ti bike niere metre munye, nieba Jesukwe.

²² Abtä nun ja töitikaka ben rababa ja mike ñäräre kwärikwäri, akwa Jesu nämä ñäke nirebtä, ye ñan rababa nüke gare nunye.

²³ Abtä ni iti ja töitikaka ben abko Jesu nämane tarere kri abko nämä täkänintbe känime mesabtä mröre Jesu ken angwane,

²⁴ nirebtä nämä blite ni ye käkwe ngwiandretari Jesuye abko Simón Pedro käkwe nieba kisebti ie.

²⁵ Ye erere bkänä, ni ye käkwe gitakaba Jesu kukwäre, käkwe nieba ie:

Ti Dänkien, ¿nirekwe ma kitadi ngise? nieba kwe ie.

²⁶ Angwane Jesukwe nieba mda ie:

Ti bike ban oto mike tibo mrö ñöite abko tikwe biandi nireye amne ni ye ara, nieba kwe. Ye btäräbe Jesukwe ban oto mikaba tibo, bti Simón ngobo Judas Iscariote, ie bianba kwe.

²⁷ Judas käkwe ban oto kaba ngäbti Jesuye, ye btäräbe Satana rükaba btä angwane, Jesukwe nieba ie:

Makwe dre nuendi, ye nuene jötrö, nieba kwe ie.

²⁸ Jesukwe ñäkäba kore Judaye, akwa ñöbtä ñäkäba kore kwe ie, nun mda mda ja töitikaka ben nämä mröre mesabtä, ie ñan rükaba gare.

²⁹ Akwa Judas abko nämä ngwian nunkwe ngibiare, aisete Jesukwe juani jändrän kökö bietakrä ya o ngwian biamna kwe ie ni bobre bobreye abko nun ruäre rababa nütüre.

³⁰ Akwa Jesukwe ban bianba Judaye angwane, Judakwe kaba ngäbti, ye btäräbe Judas rikaba Jesu kite ngise rüeye. Ye ngwane kä rababara iko jökrä.

³¹ Judas rikaba mentokwäre, yehti Jesukwe nieba:

Mtare ti, Ni Kä Nebtä Ngobo, mun tarekä kri abko di kri bä nuäre rabadi mikani tuare amne Ngöbö mun tarekä di kri bä nuäre rabadi mikani tuare Ni Kä Nebtä Ngobo köböire.

³² Ye abko, ti Ngöbö Odei käkwe Ngöbö di kri bä nuäre mikadi tuare, ye kwrere arato Ngöbö käkwe ti Ngöbö Odei di kri bä nuäre mikadi tuare arato, ye abko Ngöbö kwe nuendi jötrö.

³³ Mdakäre abko, mun ngäbäre kiakia tare kri tikwe, mun ye ben tikwe ñan nünandre raire mda. Ti näin angwane, mun rabadi ti känentari kisere, akwa tikwe kukwe nieba nitre israelita ji dokwäteye, erere ti bike niere munye: Ti näin mdente, ye kanti mun ñan raba niken gwaire tibe.

³⁴ Akwa ti bike kukwe bien nuendre btin munye, ne erere munkwe nuen abko krörö: Mun ja töitikaka tibe käkwe ja tare kwärikwäri. Tita mun tarere ño, ye kwrere munkwe ja tare kwärikwäri.

³⁵ Munkwe ja taredre kwärikwäri tita niere munye, ne kwrere munkwe ja taredre ne ngwane, mun abko ja töitikaka tibe ye rabadi gare ni jökräye, nieba Jesukwe nunye.

*Pedro käkwe Jesu rükandite, niebare Jesukwe
(Mateo 26.30-35; Marcos 14.26-31; Lucas 22.31-34)*

³⁶ Angwane Simón Pedro käkwe nieba mda ie:

Ti Dänkien, ¿ma näin mdente? nieba kwe ie.

Jesu käkwe nieba mda ie:

Ti näin mdente, ye kanti ma ñan raba niken jire chi tibe mtare, akwa abti ma näinta ti jiehti arato, nieba kwe ie.

³⁷ Abtä Pedrokwe nieba mda Jesuye:

Ti Dänkien, ¿tita juto biare krütäkäre makrä! ¿Se ñöbtä abko ti ñan rabadre mabe gwaire mtare, mata niere se? nieba kwe ie.

³⁸ Ye ngwane Jesukwe nieba mda ie:

¿Mata biare krüte tikrä bkänä ya? Ti bike kukwe era erere niere mae abko krörö: Antlan ngämi ngwäne, ye känenkri ti gare ñakare mae, makwe niedi bämä jire, nieba kwe Pedroye.

14

Jesukwe nitre ja töitikaka ben moto mikani jäme

¹ Yebti Jesukwe nieba mda:

Kukwe yebtä mun ñan rekwetaka ja jiehti, akwa munkwe tödeka Ngöböhti amne munkwe tödeka tibti arato,

² ñöbtä ñan angwane ti Rün tikwe, kanti kä tarä kabre nünankrä. Kä ñakare kore, ne ngwane tikwe niedre munye, akwa kä tarä amne ti bike niken kä ükete biare munkrä.

³ Ye erere ti näinta kä ükete munkrä, yehti ti jatadita mun tuenta, kä näin mun ngwena jabe angwane, ti tädi ti Rün kanti, ye kanti mun tädi ketetibe tibe, abkokäre ti näin mun ngwena.

⁴ Mdakäre abko, ti näin mdente, ye kánti ji garera kuin munye, nieba Jesukwe nun ja tóitíkaka benye.

⁵ Abtä Tomákwe nieba Jesuye:

Ti Dánkien, ma näin mdente gare ñakare nunye, ¿se abko ji rabadre gare ño nunye amarebti mata niere kore ye? nieba kwe ie.

⁶ Angwane Jesukwe nieba mda:

Ti abko ji ngöräbe, köböire ni jökrä raba nüke ti Rün kánti amne, ti aibe abko kukwe era erere mikaka gare Ngöböbtä amne ti aibe abko ni mikaka nire kärekäre, aisete ti ne aibe köböire ni rabadre ti Rün kánti.

⁷ Ti abko nire metre gare munye ne ngwane, ti Rün garera munye arato. Mun jatani ja tóitike tibe abti ká nüke mtare munta ti Rün tuen tibtä amne ti Rün nena gare munye mtare, nieba kwe nunye.

⁸ Angwane Felipe abko kákwe nieba mda ie:

Ti Dánkien, ma Rün mike tuadre nunye aibe kwe nun rabadi dbe, nieba kwe Jesuye.

⁹ Abtä Jesukwe nieba mda Felipeye:

Felipe, ¿tikwe nünabarera raire munbe nete, akwa ti abko ni ño, ye ngämi nüke gare mae ya? Nire nire káta ti tuen, ye abko tá ti Rün tuen arato. ¿Ye ñobtä abko tikwe ti Rün mikadre tuadre munye, mata niere tie ye?

¹⁰ ¿Ti tá ketetibe ti Rünbe amne ti Rün tá ketetibe tibe, ye abko ñakare era makrá ñan ñan? Akwa tita kukwe niere munye, ye abko ñan tita niere ja tói jenbti, akwa ti Rün tá nüne ketetibe tibe káta sribi jakwe nuene ti köböire.

¹¹ Ye abko, tita ketetibe ti Rünbe amne ti Rün tá ketetibe tibe, ye mika era munkwe; akwa ne ñan raba neme era munkrä ne ngwane, sribi kri ñan tuabare nuenta tikwe, yebtä ti kukwei mika era munkwe.

¹² Mdakäre abko, ti bike kukwe era erere niere munye: Nire nire káta tódeke tibtí, ye abko sribi kri nuenta tikwe, ye kwrere nuendi kwe arato. Akwa mtare ti bike níkenta ti Rün kánti, aisete ni ye kákwe sribi bári kri nuendi Ngöbö diebti.

¹³ Ye abko, mun tö raba dre dre káräi ti Rünye ti kábtí, ye abko tikwe nuendi mun kräke, ye köböire ti Rün di kri bá nuäre rabadre mikani útiäte kri ti Ngöbö Odei köböire, abkokäre tikwe nuendi mun kräke.

¹⁴ Ye abko, mun tö raba kukwe ño ño káräi tie ti kábtí angwane, tikwe nuendi mun kräke.

Jesukwe Ngöbö Úai juandi, niebare kwe

¹⁵ Yebti Jesukwe nieba mda nunye:

Munta ti tarere era metre bkánä ne ngwane, tita kukwe nuemna ye erere munkwe mikadre táte

¹⁶⁻¹⁷ angwane, mun Die Mikaka mdara jire juandre ti Rünkwe ti táte munkrä abko tikwe kárädi ie. Mun Die Mikaka mdara jire ye abko Ngöbö Úai. Niara abko kukwe era erere nieká, ye abko ti Rün tikwe kákwe juandi angwane, rabadre kärekäre munbe abkokäre. Akwa nitre nünanka Ngöbö rüere abko ñan raba mun Die Mikaka ye kaen ngäbti jire chí, ñobtä ñan angwane niaratre ie Ngöbö Úai tuen ñakare amne gare ñakare ietre arato, aisete ñan raba kaen ngäbti; akwa mun abko ben Ngöbö Úai mun Die Mikaka tá nüne amne niara garera munye, ñobtä ñan angwane tá nüne tibtä aisete. Nebti niara rabadi nüne munbtä.

¹⁸ Mdakäre abko, ti bike níkenta, akwa mun ñan rabadre uli kwrere nete, ñobtä ñan angwane ti jatadita rabakäre munbe.

¹⁹ Akwa nitre nünanka Ngöbö rüere kákwe ñan ti tuadreta jire mda abko köböi nukera kánime, akwa mun abko kákwe ti tuadita amne tita nüne kärekäre, abtä munkwe nünandi kärekäre arato.

²⁰ Akwa munkwe ti tuadita, köbö ye náire tita ketetibe ti Rünbe amne munta ketetibe tibe amne tita ketetibe munbe abko munkwe gadi.

²¹ Ye abko, tita kukwe bien nuendre, ye nire nire tá kaen ngäbti abko erere tá mike táte, ni ye tá ti tarere era metre bkánä abko bá mikata kwe. Nire nire káta ti tarere kore, ni ye abko ti Rün tikwe kákwe taredi amne ti ara jire kákwe taredi arato, kákwe ja mikadi gare metre ie, nieba Jesukwe nun ja tóitíkaka benye.

²² Abtä Judas (akwa ñakare Judas Iscariote, akwa Judas mdara jire) ye kákwe nieba mda Jesuye:

Ti Dánkien, ¿ñobtä makwe ja mikadita tuadre nun aibeye amne ñakare ni jökräye mata niere ye? nieba kwe ie:

²³ Angwane Jesukwe nieba mda:

Nire nire káta ti tarere ye abko tá ti kukwei mike táte amne ti Rün kákwe taredi. Erere arato, ti Rün amne ti, nun jatadi ja gwirie mike ni yebtä.

²⁴ Akwa nire nire tä ti tarere ñakare, ni ye abko tä ti kukwei mike täte ñakare. Ti kukwei nuata munkwe, ye abko ñan ti kukwei jen tikwe abko tita niere, akwa ti Rün ti juanka abko kukwei nieta tikwe munye.

²⁵ Ye abko, ti tä munbe nete angwane, tita kukwe ne niere jökrä munye kore,

²⁶ akwa mun Die Mikaka Ngöbö Üai Deme juandre ti Rünkwe ti käbti, ye rükadi nüne munbtä angwane, kukwe era Ngöböbtä ütiäte munkrä, erere diridi jökrä kwe munye. Erere arato, tita kukwe niere munye, ye mikadita töre jökrä kwe munye.

²⁷ Mdakäre abko, kä jame jen tikwe ti bike mikete munbtä, ye abko ñan nitre nünanka kä nebtä käta kä jame bien, kwrere jire ti bike bien munye, aiseti mun ñan rekwetaka ja jiebtä amne munkwe ñan kä jürä ngwian jabtä.

²⁸ Ti abko bike nikenta, akwa ti rükadita munbe nete, tikwe nini, ye munkwe kukwei nurira. Ye abko, munta ti tarere era metre bkänä ne ngwane, ti bike nikenta kä käinbti ti Rün känti, tikwe nini munye, ye käi rabadre nuäre munbtä, ñöbtä ñan angwane ti Rün abko bäri kri tikrä aiseti.

²⁹ Ye abko, tita kukwe niere ne ngämi nakenkä, känenkri tita kukwe jökrä niere munye, akwa rakadrekä angwane, ti kukwei rabadre era munkrä, kärke tödekadre metre tibti, abkokäre tita niere käne kore.

³⁰ Akwa gwängwarbe kä ñan nebera blitakrä kabre dikaro munbe tie, aiseti tikwe ñan blitadre kabre mda munbe, ñöbtä ñan angwane Satana tä nitre nünanka Ngöbö rüere dänkiene abko kitera ti rüere. Satana abko tä ñakare jire chi ti dänkiene.

³¹ Akwa tita ti Rün tarere abko nitre nünanka Ngöbö rüere ie rabadre gare metre amne ti Rün tä dre nuemma tie, erere tita nuene täte jökrä, ye rabadre gare ietre arato, abkokäre kukwe ye rakadikä kore.

Ne aiseti, näin krö. Brän. Ari kä mikekä nete, nieba Jesukwe nunye.

15

Nikwe nünandre ketetibe Ngöböbe niebare Jesukwe

¹ Yebti Jesukwe ja bä mikaba uba kökräi kwrere amne nitre tödekaka bti abko bä mikaba uba küdei kwrere kwe, kärke nieba mda nunye:

Ti abra uba kökräi era metre kwrere amne ti Rün abko sribikä uba kökräi yebtä kwrere.

² Ye abko, uba küdei mden mden ngwä neme ñakare btä, ye abko ti Rün tä tikekä ta; akwa uba küdei ngwä neme kabre kabre btä, ye abko niarata mutu kiakia aibe tikekä, bti tä bäsekä kuin merebe abko ngwä rabadre bäri kabre btä abkokäre.

³ Mun abko ie tikwe kukwe niebare, ye munkwe mikani era, kärke tödekani tibti, aiseti kukwe ye köböire mun nena merebe, ngite ñakare Ngöbö ngwäreki.

⁴ Mun abko raba nekete janknu ketetibe tibtä amne ti rabadi nekete janknu ketetibe munbtä arato, ñöbtä ñan angwane uba küdei tä neketaninte uba kökräibtä aibe angwane ngwäta neme btä; akwa uba küdei kaibe mento uba kökräi bäre, ye ñan ngwä raba neme jire chi btä. Ye kwrere arato, munta ñakare ketetibe tibe, akwa tä ti bäre mento ne ngwane, mun ñan rabadre sribi kuin nuene tikrä amne ni ñakare jire mda kärke tödekadre tibti mun köböire.

⁵ Ti abko uba kökräi era metre kwrere amne mun abko uba küdei kwrere. Nire nire tä nüne ketetibe tibe amne tita nüne ketetibe ben, ni ye abko kärke sribi kuin nuendi tikrä, köböire ni mda mda kärke tödekadi Ngöböbti, ye abko uba ngwäta nebe kabre uba küdei kuinbtä ye kwrere. Akwa mun tädre kaibe ti bäre mento angwane, sribi kuin ütiäte Ngöbökrä ñan rabadre bare jire chi munye.

⁶ Ye abko, nire nire kärke ñan nünandre ketetibe tibe, ye abko kitadrekä Ngöbö okwä bäre mento amne, uba küdekrä tikakata tä neme nötare amne ükäröta ketetibe jökrä, bti kukwata, ye kwrere jire Ngöböke ni ye kitadi ja okwä bäre mento ja tare nikakäre kärekäre.

⁷ Akwa mun abko kärke nünandre käre ketetibe tibe amne tita kukwe dirire munye, yebtä munkwe nünandrekä era metre ne ngwane, mun tö raba dre dre käräi Ngöböye, erere munkwe kärä amne biandi kwe munye.

⁸ Mdakäre abko, uba ngwäta neme kabre, ye kwrere munkwe sribi kuinkuin nuendi, köböire ni kwati kärke tödekadre Ngöböbti abko rabadi uba ngwä kabre kwrere, yebtä abko mun ja töitakaka tibe abko rabadi gare metre amne ti Rün rabadi käikitaninkä kri.

⁹⁻¹⁰ Ti Rünä ti tarere, ye kwrere tita mun tarere arato. Angwane ti Rün kukwei mikata täte metre tikwe, abtä ti Rünä ti tarere kärekäre tä nuke gare kärekäre tie, ye kwrere jire munkwe ti kukwei mikadre täte ne ngwane, tita mun tarere kärekäre rabadre nuke gare kärekäre munye arato.

¹¹ Ye abko, munkwe kä ngwianäre bäri nuäre gwaire jabtä tibe amne kä nuäre rabadre täte jökrä munbtä, abkokäre tita blite kore munbe.

¹² Angwane ti kukwei mikadre täte munkwe abko krörö: Tikwe mun tarebare, ye kwrere munkwe ja tare kwärikwäri.

¹³ Nire tä ja mike müre ketadre kukwe muko diäre, ye ngwane tä kukwe muko tarere era metre abko bä mikata.

¹⁴ Tita dre dre nuemna abko erere munta nuene ne ngwane, mun abko ti kukwe muko tikwe abko bä mikata munkwe.

¹⁵ Ye abko, mun ni klaboré tikwe abko tikwe ñan niedre mda, ñobtä ñan angwane ni klaboré abko bkänkä tä dre dre nuene, ye gare ñakare ie, akwa ti Rün tä dre dre niere tie, erere tita mike gare jökrä munye, aiseté mun abko ti kukwe muko tikwe, tita niere.

¹⁶ Mdakäre abko, ñan munkwe ti dianinkä ja töi jenbti au dirikäre jae, akwa tikwe mun dianinkä ja töitakäre jabe amne, tikwe mun mikani juandre kwäräkwärä sribire jakrä abko köböire ni mda mda jatadre kabre tödeke tibti abkokäre. Ye aiseté, uba ngwätä neme kabre btä, ye kwrere sribi munkwe rabadre abko köböire ni kwati rabadre tödeke kärekäre tibti, abkokäre tikwe mun dianinkä jakrä. Erere arato, tita dre dre nuemna munye, ye kwrere munkwe nuendre ne ngwane, munkwe jändrän ño erere kärädre ti Rünye ti käbti angwane, biandi kwe munye.

¹⁷ Akwa tita kukwe nuemna munye abko krörö: Munkwe ja tare kwärikwäri abko tita niereta munye, nieba Jesukwe.

Ni jökrä töi Ngöbö rüere abko mätä kri nitre ja töitakä Jesube yebtä

¹⁸⁻¹⁹ Yebti Jesukwe nieba mda:

Nitre nünanka Ngöbö rüere ye ben ketetibe mun tädre, akräke mun rabadre tare kri kwetre. Mun nämane niaratre ngätäite, akwa tikwe mun dianinkä jen jakrä, aiseté mtare mun ñan nena nitre nünanka Ngöbö rüere kwrere, aiseté tä bätä ngwen munbtä. Nitre nünanka Ngöbö rüere abko käkwe bätä ngwiani käne tibtä, aiseté bätä ngwiandi kwetre munbtä arato, ye abko rabadre gare munye.

²⁰ Akwa tikwe kukwe nini krörö munbtä, ye munkwe ngwianta töre jae: Ni klaboré ye abko ñakare bäri ütiäte niara bkänkäbti ta, tikwe nini munye. Ne aiseté ni ruäre tä näin kisere ti jiebti ti mikakäre ja tare nike, ye kwrere arato nändi mun jiebti kwetre mun mikakäre ja tare nike tödekabtä tibti; akwa ni ruäre käkwe ti kukwei mikani ütiäte, ye abko käkwe mun kukwei mikadi ütiäte arato.

²¹ Tödekabtä tibti nitre nünanka Ngöbö rüere käkwe kukwe nuendi bätäkä ngwarbe mun rüere, ñobtä ñan angwane Ngöbö ti juanka abko gare ñakare ietre, aiseté nuendi kore kwetre munbtä.

²² Ye abko, ti ñan rükadre blite bentre Ngöböbtä akräke kukwe nuenta kwetre, yebtä rabadre ngite ñakare. Akwa ti nukanina blite Ngöböbtä bentre, aiseté niaratre ja mike ngite ñakare abko ñan raba niere jire chi jabtä.

²³ Nire nire tä bätä ngwen tibtä, ye abko tä bätä ngwen ti Rünbtä arato.

²⁴ Erere arato, sribi kri ñan tuabare, ni mda mdakwe ñan nuenbare jire abko erere ti nükani nuene niaratre ngätäite Ngöböta tibe mikakäre gare, sribi ye abko ti ñan rükadre nuene akräke niaratre tä ja mike ngite, yebtä rabadre ngite ñakare. Akwa sribi kri ñan tuabare tikwe nuenbare abko tuani ja okwä jenbti kwetre, akwa tätre bätä ngwen janknu tibtä amne ti Rünbtä arato.

²⁵ Akwa Ngöbö Kukwei krörö rabadre bare, abkokäre niaratre tä bätä ngwen kore tibtä amne ti Rünbtä:

Ti ja mike ngite ñakare rüere,
akwa tä bätä ngwen tibtä,
abko tä tikani niaratrebtä.

Salmos 35.19; 64.4

²⁶ Akwa Ngöbö Üai tä ti Rün kanti. Niara abko mun Die Mikaka amne tikwe niara juandi munbtä. Ngöbö Üai ye abko kukwe era metre niekä Ngöböbtä amne jändrän jökräbtä abko jatadi ti Rünkri, aiseté kukwe era erere niedi tibtä kwe munye, ti mikakäre gare munye.

²⁷ Erere arato, tikwe sribi kömikanintbe kena angwane, mun nämane siba tibe abti kä nüke mtare, aiseté munkwe kukwe era erere niedi tibtä ni mda mdaye arato, ti mikakäre gare ietre.

16

¹ Munkwe tödekadre janknu tibti amne munkwe ñan ti gibiarekäta, abkokäre tita kukwe ne niere munye.

² Nitre nünanka Ngöbö rüere käkwe mun kitadikä sinagoga bäre mento, mun ñan rikadre gätäre ketetibe bentre mda abkokäre. Bärire mda abko, kä jatai angwane, nitre ye käkwe mun müre ketadi, akwa niaratre tädi sribi kuin nuene Ngöbökrä rabadi nütüre.

³ Nitre nūnanka Ngōbō rūere abko ie ti Rūn gare ñakare amne ti gare ñakare ietre arato, aisete nuendi kore kwetre munbtā.

⁴ Tita kukwe niere munye, ye kwrere rabadre nakenkā munbtā angwane, tikwe kukwe niebarera kāne munye, ye abko munkwe ngwiandreta tōre jae, abkokāre tita niere mtare munye.

Sribi Ngōbō Ūaikwe

Kāne ti jatani sribi kōmiketbe angwane, ti nāmāne ketetibe munbe abti kā nūke mtare, aisete tikwe kukwe ye nieba ñakare kāne munye.

⁵ Akwa mtare Ngōbō ti juanka, kānti ti bike nikenta rabakāre ketetibe ben, akwa ti bike nikenta mdente mun ngāmi ngwentari metre tie.

⁶ Angwane ti bikera nikenta, tikwe nini, abtā mun moto nibi nōtōte jirekābe ja jiebtī au, aisete mun nibi ulire ulire jōkrā.

⁷ Akwa ti bike kukwe era erere niere munye abko krōrō: Ti rikareta ti Rūn kānti ye abko bāri kuin munkrā, ñobtā ñan angwane ti ñan rikadreta ne ngwane, Ngōbō Ūai mun Die Mikaka ñan rūkadre nūne munbtā, akwa ti nāinta ne ngwane, tikwe niara juandi nūne munbtā.

⁸ Ngōbō Ūai mun Die Mikaka rūkadi angwane, nitre nūnanka Ngōbō rūere abko ngite Ngōbō ngwārekri, ye abko mikadi gare kwe ietre amne niaratre ñakare metre Ngōbō ngwārekri mikadi gare kwe ietre arato. Erere arato, nitre nūnanka Ngōbō rūere abko krāke Ngōbōkwe kukwe ūkadite juankāre ngwarbe kā ja tare nikakrā kānti abko Ngōbō Ūai kākwe mikadi gare ietre, ye ngāniene niaratre kākwe tōdekadre tibti, abkokāre kukwe mikadi gare kore ietre.

⁹ Ye abko, nitre nūnanka Ngōbō rūere abko ngite Ngōbōye abko Ngōbō Ūaikwe mikadi gare ietre, ñobtā ñan angwane niaratre tā tōdeke ñakare tibti.

¹⁰ Angwane niaratre tā bike metre amne ti abko metre ye ñakare era krāke abko Ngōbō Ūaikwe mikadi gare ietre ti diāre, ñobtā ñan angwane ti bike nikenta ti Rūn kānti kā kāinbti, kānti munkwe ñan ti tuadita mda.

¹¹ Erere arato, nitre nūnanka Ngōbō rūere abko krāke Ngōbōkwe kukwe ūkadite juankāre ngwarbe kā ja tare nikakrā kānti abko Ngōbō Ūai kākwe mikadi gare ietre, ñobtā ñan angwane Satana tā niaratre dānkieni abko krāke Ngōbōkwe kukwe ūkaninante mikakāre ja tare nike kārekāre kā ja tare nika kānti.

¹² Mdakāre abko, kukwe mda mda tā kabre tikwe niedre munye, akwa tikwe niedre jōkrā angwane, rabadre bāri tare munkrā mtare, aisete tikwe ñan niedre.

¹³ Akwa Ngōbō Ūai kukwe era metre Ngōbōkwe mikaka gare, ye rūkadi nūne munbtā angwane, kukwe era metre jire jōkrā tibtā tā dre niere abko niarakwe mikadi gare munye, ñobtā ñan angwane Ngōbō Ūai ye kākwe ñan blitadi au jabtā, akwa Ngōbōkwe kukwe ño ño niemna tibtā ie, ye aibe mikadi gare kwe munye. Erere arato, kukwe rakadikā ño ja tāritāri abko mikadi gare kwe munye arato.

¹⁴ Mdakāre abko, ti abko ūtiāte kri amne ti di kri bā nuāre, ye abko mikadi gare kwe munye, ñobtā ñan angwane jāndrān tikwe abko niarakwe mikadi gare munye aisete.

¹⁵ Niara rūkadi jāndrān tikwe mike gare munye tita niere munye, ñobtā ñan angwane jāndrān jōkrā tā ti Rūnkwe, ye abko jen tikwe arato, aisete Ngōbō Ūai rūkadi jāndrān tikwe mike gare munye tita niere.

Nitre ja tōitikaka Jesube, btā kā rabadi nuāre Jesu tuareta

¹⁶ Akwa mtare bā jōtrō munkwe ñan ti tuadreta mda, akwa yehti bā jōtrō munkwe ti tuadita mda, nieba Jesukwe nun ja tōitikaka benye.

¹⁷ Angwane nun ruāre ja tōitikaka Jesube kā rababa niere jae kwārikwāri:

¿Niara tō nibi dre niei nie amarehti nibi ñāke kore nie se? Bā jōtrō nikwe ñan tuadreta, nini kwe, yehti bā jōtrō angwane nikwe tuadita bobuta, nini kwe. Erere bike nikenta Rūn kānti, nini kwe.

¹⁸ ¿Se abko tō nibi dre niei nie amarehti, bā jōtrō, nibi niere se? ¿Se abko dre nieta kwe amarehti ñan nebe nūke gare jire chi nie? rababa niere jae kwārikwāri.

¹⁹ Yebtā abko nun tō rababa kukwe ngwiaintari Jesuye abko Jesukwe gaba nunbtā, kākwe nieba nunye:

Bā jōtrō munkwe ñan ti tuadreta, tikwe nini, bti bā jōtrō munkwe ti tuadita, tikwe nini munye, ¿ye abko dre nini tikwe abko munta ngwentari jae kwārikwāri ñan ñan?

²⁰ Ti bike kukwe era erere niere munye abko krōrō: Kā kebera nūke angwane, bā jōtrō munkwe ja müaidi amne mun moto rabadi nōtōte, akwa nitre nūnanka Ngōbō rūere abko btā kā rabadi nuāre krūbāte. Mun moto rabadi nōtōte ja jiebtī, akwa yehti kā rabadita nuāre munbtā, aisete kā ulire ye kāi rikwitadikāta jōtrō munbti.

²¹ Yebtä abko ti bike kukwe bä mike krörö: Meri tä kite ja ngibiare angwane, ja tare nikadi kri kwe ngäbäkre ngibiabtä, ye tarä neme gare ie, aisetä tä neme ulire. Akwa ngäbäkre tarä därere kwe angwane, tä ja tare nike krübäte ye käita nikwitekäta jökrä bti, ñobtä ñan angwane ngäbäkre tä därere kwe ye abko käita neme nuäre krübäte btä, aisetä ja tare nikata kwe, ye abko käita nikwitekä bti.

²² Ye kwrere arato, munta ulire mtare ñobtä ñan angwane ti näinta, akwa ti jatadita mun tuenta angwane, kä rabadita bäri nuäre munbtä, akwa kä nuäre ye abko ni mda mda käkwe ñan diandrekäta jire chi munkän. Ti rükadita mun ngätäite abko käi rabadi bäri nuäre munbtä.

²³ Ye ngwane mentokwäre munkwe ñan kukwe ngwiandretari mda tie, akwa ti bike kukwe era erere niere munye abko krörö: mun tö dreye, ye erere munkwe kärä ti Rünye ti käbti angwane, biandi jökrä kwe munye.

²⁴ Mun jataba ja töitike tibe kena abti kä nüke mtare mun ngämi jändrän kärere jire chi ti Rünye ti käbti, akwa mtare mentokwäre munkwe jändrän kärä ie ti käbti angwane, biandi kwe munye. Yebtä kä nuäre rabadi täte jökrä munbtä.

²⁵ Tita kukwe bä mike mtare munye, btä tikwe blitaniri, akwa kä jatadi köböiti angwane, tikwe ñan kukwe bä mikadre mda munye, akwa tikwe blitadi metre ta ti Rünbtä munbe.

²⁶ Ne aisetä ti näinta ti Rün kanti, ye ngwane mentokwäre tikwe ñan jändrän kärä ie ti käbti angwane, biandi munkrä ti Rünye, akwa mun ara jire käkwe jändrän kärädi au jakrä ti Rünye ti käbti,

²⁷ ñobtä ñan angwane munta ti tarere amne ti jatani Ngöbökre abko munkwe mikani era jae. Yebtä abko ti Rün ara jire käta mun tarere, aisetä jändrän käräta munkwe ti käbti abko ti Rün käkwe biandi munye.

²⁸ Ti näma ti Rün kanti. Ti jataba nüne mun ngätäite kä nebtä, akwa mtare abko ti bike kä mitekäta kä nebtä, aisetä ti bike nikenta ti Rün kanti, nieba Jesukwe.

²⁹ Angwane nun ja töitikaka Jesube käkwe nieba mda ie:

Mtare mata blite era metre amne mata kukwe bä mike ñakare mda,

³⁰ aisetä mtare nun ngämi kukwe ngwentari mae, känenkri nun bike dre dre ngwentari, ye garera mae, nibi tuen nunye amne, nunkwe ñan kukwe ngwiandretari jire mda mae abko nibi tuen nunye, aisetä ma jatani Ngöbökre abko nibira era nunkrä, nunkwe nieba Jesuye.

³¹ Abtä Jesukwe nieba mda nunye:

¡Mtare ti kukwei nibi era munkrä ñan ñan, akwa ne känenkri ñakare ya!

³² Mtare kä nükerä gwängwarbe angwane, mun näin iti iti jene jene kwäräkwarä amne munkwe ti mikadite kaibe. Akwa ti Rün tikwe käkwe ñan ti mikadite kaibe akwa tädi tibe, aisetä ti ñan rabadre kaibe.

³³ Tita kukwe ne niere jökrä kore munye, mun rabadre nüne ketetibe tibe angwane, kä jäme Ngöbökre rabadre munbtä abkokäre. Akwa mun tädi nüne kä nebtä nitre nünanka Ngöbö rüere ngätäite angwane, munkwe ja tare nikadi kri tödekäbtä tibtä, akwa kukwe jökrä Ngöbö rüere kä nebtä abko tikwe ganaibarera kwäräbe, aisetä munkwe nünanka dite jabtä amne munkwe ñan kä jürä ngwian jabtä. Abko kore se, nieba Jesukwe nun ja töitikaka benye.

17

Jesukwe ja di käräbare Ngöböye jakrä

¹ Jesukwe blitaba ünän jökrä kore, bti nikraba kä käinbti kwe, käkwe nieba Ngöböye:

Tata, ti krütadre, bti ti rükadreta nire abko makwe kä kitani ti käne, ye erere nüra, aisetä ti ma Odei ne käkwe ma mikadre ütiäte kri jae, abkokäre makwe ti ma Odei ne mika ütiäte kri jae,

² ñobtä ñan angwane nitre nünanka ma rüere kä nebtä, ngätäite makwe ni dianinkä ruäre abko makwe biani tie ni ye rabadre nüne kärekäre kä käinbti, abkokäre ni jökrä nünanka kä nebtä ye makwe mikani gare jökrä täte ti ma Odei neye.

³ Akwa nitre biani tie makwe, ye rabadre nüne kärekäre, abkokäre ma abko Ngöbö itibe era metre rabadre gare kuin ietre amne ti Jesukristo juani makwe kä nebtä, ye abko rabadre gare kuin ietre, ye aibe köböire rabadre nüne kärekäre mabe.

⁴ Mdakäre abko, tikwe ma mikani ütiäte kri kä nebtä amne makwe sribi biani nuendre tie, ye erere namani bare täte jökrä tie.

⁵ Ne aisetä, kä ne däte ngämi, känenkri ti näma ma kanti angwane, ti nämäne mikani ütiäte kri ma ben gwaire, ye kwrere makwe ti mikata ütiäte kri bobuta ma ben gwaire Tata.

Jesukwe ja di käräbare Ngöböye nitre ja töitikaka ben kräke

⁶ Mdakäre abko, nitre nünanka ma rüere, ngätäite makwe ni dianinkä ruäre abko makwe biani tie. Niaratre ye abko ie tikwe ma mikanina gare kuin amne niaratre ye

abko makwe jökrä, akwa makwe biani tie amne ma kukwei kani ngäbti kwetre, käkwe mikani era jae.

⁷ Mtare jändrän jökrä bianta tie makwe, ye abko tä kite makri nena gare kuin ietre,

⁸ ñöbtä ñan angwane makwe ja kukwei biani tie, ye abko tikwe diribarera ietre amne kani ngäbti kwetre. Ne aiseti ti jatani makri, ye nükani gare metre ietre amne makwe ti juani abko mikani era kwetre, käta tödeke tibti.

⁹ Makwe niaratre biani tie amne niaratre abko makwe, aiseti tita ja di kärere kräke mae, akwa nitre nünanka ma rüere ye kräke ti ja di kärere ñakare mae mtare, ñöbtä ñan angwane niaratre abko ñakare makwe aiseti.

¹⁰ Mdakäre abko, jändrän jökrä tikwe ye abko makwe arato amne jändrän jökrä makwe abko tikwe arato. Ye abko, ni biani tie makwe ye köböire ti abko ütiäte kri nena gare.

¹¹ Erere arato, tikwe ñan nünandi mda kä nebtä, akwa nitre biani tie makwe, ye rabadi nüne kä nebtä amne ti abko näin nünenta mabe.

Tata, ma abko deme. Ma kä ütiäte kri, ye mden makwe biani tie arato, yehti makwe niaratre ngibia kuin, ma btä ti tä ketetibe, ye kwrere niaratre rabadre nüne ketetibe gwaire arato, abkokäre makwe niaratre ngibia kuin.

¹² Ye abko, ma kä ye mden makwe biani tie arato amne, ti tä nüne niaratrebe kä nebtä angwane, ni biani tie makwe ye tita ngibiare ma käbti, amne ni biani tie makwe ye abko ñan nikaninta jire iti mento tikän. Akwa ma kukwei tä tikani Judas Iscariotebtä ye rabadre bare, abkokäre niara tä nianinte tikän amne rabadi mento mabtä käreäre kä ja tare nikakrä ye kanti.

¹³ Mtare ti bike nikenta ma kanti Tata, akwa ti tä kä nebtä angwane, nitre ja töitikaka tibe biani tie makwe abko kräke tita ja di kärere mae. Yehti abko kä nuäre kri tibtä, ye kwrere kä rabadre bäri nuäre btäre abko tita kärere mae kräke.

¹⁴ Mdakäre abko, tikwe ma kukwei diribare ietre, akwa nitre nünanka ma rüere, kwrere tita nüne ñakare jire ma rüere amne, ye kwrere nitre ja töitikaka tibe ñan nena nüne ma rüere, aiseti nitre nünanka ma rüere tä bätä ngwen btäre.

¹⁵ Akwa ye ngäniene, ñan makwe nitre ja töitikaka tibe ye diandrekä kä nebtä abko tita ribere mae, akwa makwe ngibiadre rüe Satana ngäniene abko tita ribere mae.

¹⁶ Ti abko ñakare nitre nünanka ma rüere kwrere, ye kwrere nitre ja töitikaka tibe abko ñan nena nüne ma rüere, aiseti bätä ngwianta btäre.

¹⁷ Akwa nitre ja töitikaka tibe käkwe nünandre bäri deme amne sribidre bäri metre kwetre makrä, abkokäre makwe niaratre kwita käre köbö kwatirekwatire ma kukwei era metre yehti.

¹⁸ Angwane nitre nünanka ma rüere, ngätäite makwe ti juani kä nebtä, ye kwrere arato tita nitre ja töitikaka tibe juen niaratre ngätäite.

¹⁹ Tita ja mike jenena nünakäre makrä amne sribikäre makrä, ye kwrere niaratre rabadre mikani jenena makrä nünakäre deme amne sribikäre makrä.

Ni jökrä tödekaka Jesubti, kräke Jesukwe ja di käräbare Ngöböye

²⁰ Mdakäre abko, ñan nitre biani tie makwe noko aibe kräke tita ja di kärere mae, akwa niaratre näin kukwe kuin tibtä niere ni mda mdaye, ye abko nire nire käkwe tödekadi tibti niaratre kukwei köböire, nitre ye kräke tita ja di kärere mae arato.

²¹ Ma ti Rün tikwe töita ketetibe tibe amne tita ketetibe mabe, ye kwrere nitre tödekaka tibti tibti, ye makwe die miä ja töi mike gwaire jökrä nünakäre kuin jabe kwärikwäri, abkokäre tita ja di kärere mae kräke. Nitre tödekaka tibti tibti ye rabadre ketetibe nibe arato abko köböire makwe ti juani kä nebtä, ye rabadre era nitre nünanka ma rüere ye kräke, abkokäre tita ja di kärere mae kräke.

²² Mdakäre abko, makwe ti mikani ütiäte kri, ye kwrere tikwe niaratre mikani ütiäte arato, ye köböire abko niaratre töi rabadre ketetibe jökrä ño ti amne mata ketetibe gwaire ye kwrere abko kröro:

²³ Tita nüne niaratrebtä amne mata ketetibe tibe, ye kwrere jire niaratre rabadre ni itibe kwrere nünakäre makrä. Ye abko, makwe ti juani kä nebtä amne mata ti tarere, ye kwrere mata nitre tödekaka tibti tarere, ye rükadre gare nitre nünanka ma rüere yeye, abkokäre nitre tödekaka tibti ye töi rabadre ketetibe jökrä ni itibe kwrere abko tita ribere mae.

²⁴ Tata tikwe, nitre ja töitikaka tibe amne ni mda mda käkwe tödekadi tibti, ye makwe biani tie, aiseti ti tädre mdente, ye kanti tädre siba tibe, ie ti tö. Amne makwe ti mikani ütiäte kri, käkwe ja di kri bä nuäre biani tie, ye niaratre käkwe tuadre arato, ie ti tö, ñöbtä ñan angwane kä ne däte ngämi, känenkri ma nämane ti tarere aiseti.

²⁵ Tata, käre mata kukwe era metre erere nuene amne, nitre nünanka ma rüere abko ie ma gare ñakare, akwa tie ma gare kuin, amne makwe ti juani ye abko nena gare nitre ja töitikaka tibe nokoye.

²⁶ Amne tikwe ma mikanina gare ietre, akwa tikwe ma mikadi gare janknu ietre ma Üai köböire, ye köböire abko nita ja tarere kwärükwäri, ye kwrere jire niaratre käkwe ja taredre kwärükwäri arato amne, ti ara jire rabadre nüne niaratretbä, abkokäre tikwe ma mikadi gare janknu ietre. Abko kore se, nieba Jesukwe niara Rün Ngöböye.

18

Jesu kani ngite

(Mateo 26.47-56; Marcos 14.43-50; Lucas 22.47-53)

¹ Jesukwe kukwe nieba ünän jökrä kore, bti ngurun kä Cedrón, ye kwärä nakriri Jesu rikaba nun ja töitikaka benbe. Jesu rikaba ye kánti abko olibo krie nämane nökan, kánti Jesu rikaba nun ja töitikaka benbe.

² Jesu nämänena gätäre bäre kä ye kánti nun ja töitikaka benbe, aisete Judas, Jesu kitaka ngise kämikadre, ye ie kä ye nämänena gare arato.

³ Ne aisete, batibe Judas jataba nitre krörökrörö jie ngwena: nitre rükä romanobo kwati amne guardia ju blitakrä Ngöböbe ngibiabtikä abko nitre blitaka Ngöböbe ni mda mda diäre dänkiere amne nitre bariseo käkwe juani. Nitre jataba nuke Judabe ye abko nämä näin jändrän rükä ngwena kisetekisete. Erere arato, nämä näin ñukwä amne ñotra ngwena kisetekisete.

⁴ Akwa Jesu abko, btä kukwe rakadikä ño ño, ye garera ie, aisete nieba kwe ietre:

¿Munta näin nire känene ye? nieba kwe ietre.

⁵ Niaratre käkwe nieba mda Jesuye:

Jesu Nazarebo kánänta nunkwe, nieba kwetre ie.

Angwane Jesukwe nieba mda ietre:

Ti ara tä nete, nieba Jesukwe ietre.

Angwane Judas, Jesu kitaka ngise kämikadre ye nämä nünäninkä siba nitre ye ngätäite.

⁶ Angwane, Ti ara tä nete nieba Jesukwe, ye btäräbe nitre rükaba kwati Jesu rüere ye käkwe näntebata ja jiebtä angwane, rikaba jökrä temen se kwrere.

⁷ Angwane Jesukwe niebata mda ietre:

¿Munta näin nire känene ye? niebata kwe ietre.

Angwane niaratre käkwe niebata Jesuye:

Jesu Nazarebo kánänta nunkwe, niebata kwetre ie.

⁸ Abtä Jesukwe niebata mda ietre:

Ti ara tä nete, tikwe nini munye. Akwa munta näin ti känene ne ngwane, nitre ja töitikaka tibe noko aibe munkwe tuametre nikenta jirekäbe, nieba Jesukwe ietre.

⁹ Kukwe ye rakakaba kore, ñobtä ñan angwane Jesukwe blitaba krörö Ngöböbe abko rabadre bare abkokäre: “Nire nire biani tie makwe, ye abko ñan riateba jire iti tikän,” nieba kwe, erere rababa bare.

¹⁰ Angwane Simón Pedro nämä yete käkwe ngitra jabtä diankaba kwatate, bti ni iti kä Malco olo küde ruenkri tikakaba ta kwe ie. Malco ye abko nämä klabore ni blitaka Ngöböbe ni mda mda diäre dänkienkwe abko olo tikakaba Simón Pedrokwe.

¹¹ Abtä Jesukwe nieba Pedroye:

Ngitra ye miketa kwatate yete. Ti Rün ara jire kite ti mike jändrän tare krübäte nuene, ¿se abko tikwe ñan nuendre ya? nieba kwe ie.

Jesu jänikani Anás kánti

(Mateo 26.57-58; Marcos 14.53-54; Lucas 22.54)

¹² Bti nitre rükä romanobo amne dänkien kwetre btä guardia ju blitakrä Ngöböbe ngibiabtikä rükaba ye abko käkwe Jesu kaba ngite, bti makäteba kwetre,

¹³ bti järäkaba käne kwetre nebe Anás kánti. Anás ye abko Caifás köbrän. Anás abko käkwe sribarera nitre blitaka Ngöböbe ni mda mda diäre dänkien kwrere, akwa kä ye ngwane abko Caifás nämä nitre blitaka Ngöböbe ni mda mda diäre dänkiene.

¹⁴ Bati Caifás ne mden käkwe niebare krörö Jesubtä nitre israelitaye: Ni israelita ñan krütadre jökrä, abkokäre ni itibe krütadre ni israelita jökrä kräke amne täte, niebare kwe.

Pedrokwe Jesu rükaninte käne

(Mateo 26.69-70; Marcos 14.66-68; Lucas 22.55-57)

¹⁵ Jesu järäkaba ngite angwane abko Simón Pedro btä ni ja töitikaka Jesube rikaba iti mda siba Jesu jiebtä. * Angwane ni ja töitikaka Jesube rikaba iti Jesu jiebtä, ye abko nämänena gare

* 18:15 Ni ja töitikaka Jesube nikani Simón Pedrobe ye abko Juan käkwe tärä ne tikani nütüta.

nitre blitaka Ngöböbe ni mda mda diäre dänkien yeye, aiseite rikaba ju bäre ki teri Jesube.

¹⁶ Akwa Pedro abko rababa nūnaninkä ki jukweibtä. Abtä ni gare kuin nitre blitaka Ngöböbe ni mda mda diäre dänkienye, ye rikaba, kākwe blitaba meri jukwe ngibiabtikä yete ben angwane, rikaba Pedro ngwena ju bäre ki teri arato.

¹⁷ Angwane meri ye kākwe nieba Pedroye:

¿Ma abko ja tōitikaka ni se ben arato ñan ñan? nieba kwe ie.

Abtä Pedrokwe nieba ie:

Ñakare. Tita ja tōitike ñakare ben, nieba kwe.

¹⁸ Ye ngwane abko, kã rababa tibo krübäte, aiseite nitre klabore amne guardia ju blitakrä Ngöböbe ngibiabtikä kākwe ñukwã bukateba, bti nãma trãse angwane, Pedro nãma ñukwã trãse siba niaratrebe yete.

Kukwe ngwianintari Jesuye

(Mateo 26.59-66; Marcos 14.55-64; Lucas 22.66-71)

¹⁹ Angwane Anás kākwe sribibarera nitre blitaka Ngöböbe ni mda mda diäre dänkien kwrere, ye mden rikaba kukwe ngwentari Jesuye nitre ja tōitikaka benbtä amne kukwe ño diri nãmane Jesukwe, ye abko rikaba ngwentari.

²⁰ Angwane Jesukwe nieba ie:

Nitre israelita tä ja üekrö sinagogate amne ju blitakrä Ngöböbe kãnti abko ie kãre tita dirire amne tita blite ni jökrã ngwãreki, aiseite tita blite ñakare gore nitre ja tōitikaka tibe aibe ben.

²¹ ¿Se ñöbtä abko tita kukwe ño dirire abko ma kite ngwentari ti ara jire ie ye? Nitre ti kukwei nuaka nuaka ye ben tikwe blitabare kukwe mden mdenbtä ye gare kuin jökrã ietre, aiseite makwe kukwe ye ngwiantari ietre, nieba Jesukwe Anáyë.

²² Jesukwe ñäkãba kore, yebtä abko guardia ju blitakrä Ngöböbe ngibiabtikä kākwe Jesu metaba tokobee ja kãne, kākwe nieba ie:

¿Nitre blitaka Ngöböbe ni mda mda diäre dänkien abko ie mata ñãke kore ya? nieba kwe ie.

²³ Jesu kākwe nieba mda ie:

Tikwe kukwe nini, ye mden blo abko niere tie. ¿Akwa tikwe kukwe nini ye tä dbe ne ngwane, ñöbtä mata ti mete niere tie? nieba Jesukwe ie.

²⁴ Angwane Jesu nãma mäkãninte abko Anákwe juanba mda nebe dãnã Caifás kãnti. Caifás abko nãma nitre blitaka Ngöböbe ni mda mda diäre dänkiene kã ye ngwane abko kãnti Jesu juanba kwe.

Pedrokwe Jesu rükaninte bobu, bãmä

(Mateo 26.71-75; Marcos 14.69-72; Lucas 22.58-62)

²⁵ Akwa Anás nãmane kukwe ngwentari Jesuye angwane abko, Pedro abko nãma ñukwã trãse yete angwane, ni iti kākwe nieba ie:

¿Ma abko ñakare ja tōitikaka ni se ben arato ya? nieba kwe ie.

Angwane Pedrokwe ja rükanteba, kākwe nieba:

Tita ja tōitike ñakare ben yeri, nieba kwe.

²⁶ Yebti ni klabore nitre blitaka Ngöböbe ni mda mda diäre dänkien krãke, akwa ni olo tikakaba kwãrä ie Pedrokwe abko mrãkã kākwe nieba Pedroye:

¿Ma ye täni siba ben olibo nurai kãnti sete tikwe turi, nibi ruen tie ya? nieba kwe ie.

²⁷ Akwa Pedro abko kākwe ja rükantebata, ye btãrãbe antlankwe ngwãnãba, Jesukwe nieba ie, ye kwrere rakakaba.

Jesu jãnikani Pilato ngwãreki

(Mateo 27.1-2,11-14; Marcos 15.1-5; Lucas 23.1-5)

²⁸ Jesu nãma Caifás kãnti, bti jãrikaba mda gobran romanobo ngwãreki angwane kã jatagara ngwen. Akwa nitre israelita ji dokwãte ñan rikaba Jesu ngwena nebe gwi gobran kãnti, ñöbtä ñan angwane nitre ñakare israelita, kãnti niaratre rikadre nebe gwi angwane, kukwe nãmane ükaninte nitre israelitakwe nūnankrä dbe Ngöbö ngwãreki, ye rüere ja mikadre ngite kwetre amne ñan rabadre dbe Ngöbö ngwãreki abtä ñan rabadre mrö bieta Pascuakrä kwete siba, abtä ñan rikaba gwã.

²⁹ Abtä Pilato jataba blite bentre ju bäre, kākwe nieba ietre:

¿Drebtä munta ni ne kite ngite? nieba kwe.

³⁰ Angwane nitre israelita ji dokwãte kākwe nieba:

Ni ne ja mike ngite ñakare, akrãke nun ñan jatadre ngwena jire chi müre ketadre mae nete, nieba kwetre.

³¹ Abtä Pilatokwe nieba mda ietre:

Ni noko ngwenante, bti kukweta úkaninte ño mun ngätäite ni kitakäre ngite, ye kwrere munkwe kukwe úkate kräke au, nieba kwe mikakäre yakrä jae.

Akwa nitre israelita ji dokwäte kákwe nieba mda Pilatoye:

Ni ngite abko nunkwe müre ketadre ye abko mun romanobokwe köböi biani ñakare nunye, aiseite nun ñan raba ni mda müre kete, nieba kwetre.

³² Ja krütadi ño nieba Jesukwe, ye erere rababa bare köbö ye näire.

³³ Yebtä Pilato rikaba gwä, kákwe Jesu käräba, bti niebare kwe ie:

¿Ma abko jrei nitre israelitakwe bkänä ya? niebare kwe ie.

³⁴ Abtä Jesukwe niebare mda ie:

¿Mata kukwe ngwentari tie ja töibti ya o ni mdakwe blitabare tibtä mabe, aiseite mata kukwe ngwentari kore tie? niebare kwe Pilatoye.

³⁵ Angwane Pilatokwe niebare Jesuye:

Ti abko ñakare israelita, aiseite ma jrei nitre israelitakwe ya, ñakare ya, ye abko ñakare ütiäte tikrä, akwa nitre nünanka ma käite amne nitre blitaka Ngöböbe ni mda mda diäre dänkientre käta ma kite ngite müre ketadre tie, aiseite drehtä makwe ja mikani ngite niere tie, niebare kwe ie.

³⁶ Abtä Jesukwe niebare mda Pilatoye:

Ni kä nebtä tä jreire, ye kwrere ti ñan rabadre jreire. Ti rabadre jreire niaratre kwrere, akräke rükä tädrera sribikä tikrä abko kákwe rüdre ti dokwäre amne ti ñan kadre ngite nitre israelitakwe. Ye mden kisete, ti abko ñakare jrei kä nebtä kwrere, niebare kwe.

³⁷ Abtä Pilatokwe niebare mda Jesuye:

¿Ma abko jrei bkänä ñan ñan? niebare kwe ie.

Angwane Jesukwe niebare ie:

Ti abko jrei makwe nini, ye kwrere bkänä, aiseite ti därebare kä nebtä amne nitre nünanka kä nebtä abko ie ti jatani kukwe era erere niere, aiseite nire nire tä nekete kukwe erabtä abko käta ti kukwei kaen ngäbti amne tä mike täte, niebare mda Jesukwe.

³⁸ Angwane Pilatokwe niebare mda Jesuye:

¿Kukwe mden abko era? niebare kwe.

Pilatokwe kukwe ngwianintari kore Jesuye, bti Pilato rikabata ju bäre bliteta nitre israelita ji dokwätebe, kákwe nieba ietre:

Ni ne ja mike ngite ñakare nibi tuen tie.

³⁹ ¿Akwa bieta Pascua näire tikwe ni ngite tikadrete iti abko nuenta käre, aiseite jrei nitre israelitakwe ne tikadrete tikwe, ie mun tö nibi ya? nieba Pilatokwe.

⁴⁰ Angwane nitre israelita jökrä rababa ngrente, kä rababa niere krörö:

¿Ni ye ñan tikate makwe! ¡Barrabás ye tikete! rababa niere.

Barrabás ye abko nämane rü miketbe gobran romanobo rüere abko tikadrete, rababa niere Pilatoye.

19

Jesu kitani ngite müre ketadre krusobtä

(Mateo 27.15-31; Marcos 15.6-20; Lucas 23.13-25)

¹ Abtä Pilato nikani kákwe Jesu kwata metamna köbti nitre rükäye. Erere nuenbare kwetre.

² Angwane Jesu bä rabadre jrei kwrere, abkokäre nitre rükä kákwe kri tukwä sribebare koronare abko mikani kwetre Jesu dokwäbti, bti dän bä tain drüne kitani kwetre Jesubtä mikakäre yakrä jae.

³ Bti namani niken känime Jesu ken, kä namani niere:

Jrei israelitakwe, ma raba nüne raire näre, namanintre niere Jesu mikakäre yakrä jae.

Bti namanintre Jesu mete tokobee ngwärebtä.

⁴ Yebti Pilato jataba ju bäre, kákwe nieba nitre israelita ji dokwäteye:

Jesu ja mike ngite ñakare nibi tuen tie, aiseite ti ki ngwenante munye nete tuen, nieba Pilatokwe ietre.

⁵ Erere bkänä, Jesu jäjataba ju bäre angwane, kri tukwä sribebare koronare nämä dokwäbti amne dän bä tain drüne kitani btä abko te jarikaba ju bäre angwane, Pilatokwe nieba:

Ni ne ti bike miketa mun kisete abko tä nete ne, nieba kwe ietre.

⁶ Angwane nitre blitaka Ngöböbe ni mda mda diäre dänkientre amne guardia ju blitakrä Ngöböbe ngibiabtikä okwä rababa Jesubtä angwane, rikaba ngrente krikri be, kä rababa niere:

¡Müre kete krusobtä! ¡Müre kete krusobtä! rababa niere.

Abtä Pilatokwe nieba mda ietre:

Niara ngite ñakare nibi tuen tie, akwa mun tö müre ketai ne ngwane, ngwenante munkwe müre keta krusobtä, nieba kwe mikakäre yakrä jae.

⁷ Angwane nitre israelita ji dokwäte käkwe nieba mda Pilatoye:

Kukweta ükaninte keteti Ngöbökwé nun israelita ngätäite, ye rüere niarata ja mike ngite, ñobtä ñan angwane niarata ja Ngöbö Odei niere, ye abko kukweta ükaninte nun ngätäite abko rüere tä ja mike ngite, aiseté müre ketadre, rababa niere kore.

⁸ Jesu abko ja Ngöbö Odei nämáne niere, ye jarababe Pilatoye angwane, bäri kä jürä namani btä.

⁹ Abtä nikaninta gwä, käkwe niebare Jesuye:

¿Ma abko kä mdenbo era metre? niebare kwe ie.

Akwa Jesu abko namani kwekbe, ñäkäbare ñakare kwe Pilato käre.

¹⁰ Abtä Pilatokwe niebare ie:

¿Ti di tärä ma bien müre ketadre krusobtä amne ti di tärä arato ma tikatekäreta, ye gare ñakare mae ya amarebti ma ñan tö nibi ti kukwei kain ngäbti ye? niebare kwe ie.

¹¹ Angwane Jesukwe niebare mda Pilatoye:

Ngöbökwé ñan kä biandre mae ti müre ketadre, akräke ma di ñan rabadre jire chi ti bien müre ketadre, aiseté nitre ti kitaka ngise mae müre ketadre, niaratre ye abko bäri ngite krübäte Ngöböye makrä, niebare Jesukwe ie.

¹² Ye ngwane mentokwäre abko Pilato namani kä känene jae Jesu tikatekäreta, akwa nitre israelita ji dokwäte rababa ngrente, kä rababa niere:

¡Makwe ni ye tikaditeta ne ngwane, ma ñakare ja kukwe mukore emperadorebe! Mdakäre abko, nire tö ja mikai jreire Jesu kwrere, ni ye abko emperador rüere, rababa niere Pilatoye.

¹³ Nitre ji dokwäte rababa ñäke kore, ye jaraba Pilatoye angwane, rikaba Jesu ngwena ju bäre, bti kürä nämá gwí ja täkräre kukwe úkatékrä, yebti Pilato rababa täkänintbe. Kä te Pilato rababa täkänintbe ye abko kädian nämáne Gabata. Gabata abko Kä Jäkwatäre nieta hebreore abko kánti Pilato nämáne täkänintbe.

¹⁴ Kä ye ngwane abko, köbö ja mikakrä biare köbö jadükakrä ngäbti bieta Pascua angwane, ye näire bäsi ñänä ruäre angwane Pilatokwe nieba krörö nitre israelita ji dokwäte yeye:

Jrei munkwe tä nete noko, nieba kwe.

¹⁵ Abtä nitre israelita ji dokwäte käkwe ngrateba bäri kri mda, kä rababa niere:

¡Ngwena mento, ngwena mento müre ketadre krusobtä! rababa niere.

Abtä Pilatokwe nieba mda ietre:

¿Tikwe jrei munkwe biandre müre ketadre krusobtä, ie mun tö nibi ñan ñan? nieba kwe.

Angwane nitre blitaka Ngöböbe ni mda mda diäre dänkientre käkwe nieba Pilatoye:

Emperador romanobo aibe tä jreire nunkwe. Nebti jrei mda ñakare jire nunkwe, nieba kwetre mda ie.

¹⁶ Angwane nitre israelita ji dokwäte ye moto mikakäre jäme, Pilatokwe Jesu bianba müre ketadre krusobtä rükätäre romanoboye.

Jesu metani krusobtä

(Mateo 27.32-44; Marcos 15.21-32; Lucas 23.26-43)

Erere bkänä, nitre rükä rikaba Jesu ngwena müre ketadre krusobtä.

¹⁷ Jesu järeikaba angwane, rikaba kruso ngwena jakrä au käkä “Ni Dokwä Kroko Käi” nie nämáne abko kánti. Kä ye arabe abko kädianta Gólgota hebreore.

¹⁸ Kä ye kánti Jesu metaba krusobtä angwane, ni nibu metaba Jesubtä kwärikwäri müre ketadre, aiseté Jesu rababa ni nibu ye ngätäite.

¹⁹ Angwane drebtä Jesu kitaba ngite, ye Pilatokwe tikamna krörö kri kukwäntä: “JESU NAZAREBO NERE ABKO JREI NITRE ISRAELITAKWE” abko tikamna Pilatokwe, bti mikamna krusobtä käin kwe.

²⁰ Ye erere mikaba krusobtä käin angwane, nitre israelita kwati rababa ñäke tärä okwä yebtä, ñobtä ñan angwane känime juta Jerusalén köräbtä Jesu müre ketaba krusobtä. Erere arato, tärä okwä mikaba krusobtä käin, ye abko nämá tikani hebreore, latinore amne griegore, ni kwati rabadre ñäke btä abkokäre.

²¹ Pilatokwe tärä tikamna kore, yebtä abko nitre blitaka Ngöböbe ni mda mda diäre dänkientre käkwe niebare Pilatoye:

Jrei nitre israelitakwe, ye makwe ñan tika kore, akwa niarata bike jrei nitre israelitakwe, ye abko makwe tika kore, niebare kwetre Pilatoye.

²² Akwa Pilato abko käkwe niebare mda ietre:

Tikwe kukwe tikamna, ye erere rabadi tikani. Tikwe ñan kwitadre jire, niebare kwe ietre.

²³ Akwa nitre rükä romanobo abko käkwe Jesu metaba krusobtä, yehti dän Jesukwe ñäkäbtiba ketabkä kwetre, bti dianba ôtati jene jene kwe jakrä. Akwa dän nga dikani ôtati nûkebe temen Jesu nämane kite jabtä, abkobtä

²⁴ nitre rükä romanobo käkwe nieba jae kwärikwäri:

Dän ne abko nikwe ñan ngiandreikä kiakia, aisete ari ja gaen btä. Nirekwe ganandi abko kwe rabadi, nieba kwetre.

Ye kwrere bkänä nuenbare kwetre. Ye kwrere abko, Ngöbö Kukwei nämane tikani kira krörö Jesubtä abko rababa bare:

Dän tikwe dräibare jökrä jabti kwetre amne, dän nga tikwe abko btä ja gani kwetre, *Salmos*

22.18

nieta Ngöbö Kukweibtä abko erere nuenbare nitre rükä romanobokwe.

²⁵ Angwane kruso btä Jesu nämä metani käin, kruso yehtä Jesu meye María nämä yete etbabe. Erere arato, Cleofas nän muko kädian nämane María nämä siba amne María Magdalalo nämä arato kruso ken yete Jesu mukore.

²⁶ Angwane Jesu okwä rababa meyehtä angwane, ti ja töitikaka Jesube abko Jesu nämane tarere kri abko nämä meye ken, abkobtä Jesu okwä rababa angwane, Jesukwe nieba meye:

Mama tikwe, ma ngobo makwe abko tä yete mabe ye, nieba kwe ie.

²⁷ Bti ti ja töitikaka Jesube, ie Jesukwe nieba:

Ma meye makwe abko tä yete mabe, ye makwe ngibia, nieba kwe tie.

Jesukwe ñäkäba kore tie, ye näire mentokwäre tikwe Jesu meye kaba ngäbti ja gwirieta ngibiakäre.

Jesu krütani

(Mateo 27.45-56; Marcos 15.33-41; Lucas 23.44-49)

²⁸ Jesukwe ñäkäba ünän kore, yehti sribi jatani neme bare jökrä ie, ye abko nämane gare ie, aisete sribi mikani nuendre ie nämane tikani Ngöbö Kukweibtä abko rabadre bare täte, abkokäre nieba kwe:

Tomna nibi tie, nieba kwe.

²⁹ Angwane kä ye kánti uba ñoi dime nämä kantra chi kwati abko nitre rükä romanobo rikaba, käkwe jändrän dän kukwän kwrere ye mritakaba jökrä uba ñoi dime yete, bti mäkäteba kwetre hisopo krie küdebtä, bti mikaba Jesu kadate kwetre.

³⁰ Jesukwe uba ñoi dime ye ñaba ünän angwane, nieba kwe:

Sribita ti kisete, erere nibira bare täte jökrä tie, nieba kwe.

Ye btäräbe, Jesukwe ja dokwä gibiakaba timonkwäre, käkwe ja üai mikabata Ngöbö kisete angwane krütaba.

³¹ Köbö ye abko, köbö ja mikakrä biare köbö jadükakrä kräke amne, köbö jadükakrä ye nämane Pascua näire, aisete bäri ütiäte. Ye mden kisete, nitre israelita ji dokwäte rikaba niere krörö Pilatoye:

Nitre tä krusobtä se krütadre jötrö, abkokäre ngüre ötarebtä, bti diandreta timon doboi mikadre, nieba kwetre.

³² Ye erere bkänä, nitre rükä romanobo rikaba käkwe ni iti ngüre ötabtäba käne, bti ni mda nämä krusobtä käin Jesu ken abko ngüre ötabtäba kwetre arato.

³³ Yehti rikaba Jesu ngüre ötöbtä mda angwane, Jesu krütanina, btä okwä rababa, abtä Jesu ngüre ötabtäba ñakare kwetre.

³⁴ Akwa ni rükä iti käkwe Jesu däkäteba bukobti kronante ta. Ye btäräbe däri amne ñö betakaba Jesu kronante ta.

³⁵⁻³⁷ Kukwe ye abko rakakaba kore tikwe tuaba ja okwä jenbti abko erere tita niere, aisete kukwe era erere tita niere. Tita niere munye, ñobtä ñan angwane Ni Dianinkä Ngöbökwä abko btä kukwe rakadrekä kore abko nämane tikani kira Ngöbö Kukweibtä abko erere rikaba neme bare krörö Jesubtä:

Niara kroko ötandinbtä ñakare krati ie,

Salmos 34.20

nieta Ngöbö Kukweibtä. Mdakäre abko, nieta krörö:

Buko betadikä niara kronante ta nitre nünanka Jerusalén okwäbti,

Zacarías 12.10

nieta arato Ngöbö Kukweibtä. Ye erere rababa bare Jesubtä ti okwäbti, aisete mun jökrä käkwe kukwe ne mikadre era amne tödekadre Jesubti, abkokäre tita niere munye.

Jesu doboi mikani

(Mateo 27.57-61; Marcos 15.42-47; Lucas 23.50-56)

³⁸ Jesu krütaba, yehti José Arimateabo käkwe ja köböi käräba Pilatoye Jesu ngwäkä ngwiankäre doboi mikadre. José ye abko nämane dikekä siba Jesube, akwa nitre israelita ji dokwäte jürä rababa btä, aisete nämä nekete tiebe Jesukri. José ye mden käkwe ja köböi

käräba Pilatoye, ye erere rükabtiba Pilatoye angwane, José rikaba Jesu ngwäkä ngwena doboi mikadre.

³⁹ Erere arato, Nicodemo rükaba blite bati deo Jesube, Nicodemo ara rükaba José Arimateabobe, kä jataba mirra krie ngwäri sribebare mnüne amne kri kädianta aloe sribebare mnüne, ye abko mritani ketetibe kwe abko näma rä bäne rükaba ngwena kabre, bäsi siä kwä kükü bti kwärä mikadre Jesu ngwäkäbtä, ñan rä rabadre kure abkokäre.

⁴⁰ Angwane José btä Nicodemo käkwe kri ngwäri mnü ye mikaba dän ütiäte kri kädianta lino btä abko te Jesu ngwäkä mriateba kwetre, nitre israelita tä ni doboi mike ño, ye kwrere nuenba kwetre.

⁴¹ Yebti Jesu müre ketaba krusobtä, ye ken abko nura nämane nökan kabre angwane, kä ye kánti abko kä muani btin jäkwatate ni doboi mikakrä näma kwati abko te ni doboi mika ngämi abko näma yete,

⁴² abko te Jesu doboi mikaba, ñobtä ñan angwane kä mkä ye abko näma känime juta Jerusalén yete amne köbö jadükakrä nitre israelitakwe abko jataba nüke angwane, ñan rabadre sribi ye nuene, aisete Jesu doboi mikaba jötrö kä ye kánti.

20

Jesu nükaninta nire

(Mateo 28.1-10; Marcos 16.1-6; Lucas 24.1-12)

¹ Yebti köbö kena bämänte dekä, María Magdalabo rikaba dobohti. Kä näma iko dekä angwane rikaba. Yebti nikani nebe dobohti angwane, jä kri mikani kä mkäbti, ye abko nämänena dianinkä mento, btä okwä namani.

² Angwane nikani betekäta gwäkäre nebeta Simón Pedro kánti amne ti ja töitikaka Jesube abko Jesu näma tarere kri ye kánti, käkwe nieba nunye:

¡Ni Dänkien ngwäkä jänikani doboihti mentokwäre amne mikani mdente mda ñan nebe gare jire chi nunye! nieba kwe nunye.

³ Abtä Pedro amne ti rikaba mda Jesu doboi tuen.

⁴ Nun nibu rikaba betekä gwaire, akwa ti rikaba betekä bäri jötrö Pedrokrä, aisete ti rababa käne dobohti.

⁵ Ti rababa dobohti, käkwe ja mikateba timonkwäre, bti tikwe nikraba nguse amne dän te Jesu mrianinte aibe näma nguse, btä ti okwä rababa, akwa ti ñan rikaba nebe kä mkäte nguse.

⁶ Yebti Simón Pedro rikaba nebe köre ti jiehti angwane, rikaba nebe kä mkäte nguse angwane, dän kukwän te Jesu mrianinte ye aibe kwanba ie.

⁷ Mdakäre abko, dän kukwän mdara jire, te Jesu dokwä mrianinte, ye abko näma mrianinkä kuin, näma mikani jenena dän kukwän bäri kri ye bäre mento abko kwanba ie arato.

⁸ Yebti ti rababa käne dobohti abko rikaba nikren kä mkäte nguse arato angwane, kukwe nakaninkä ño ño Jesubtä tikwe tuaba jökrä angwane, tikwe tödekaba bti.

⁹ Akwa ye känenkri, Jesu rükadreta nire tä tikani Ngöbö Kukweibtä, ye abko ñan nükan gare metre nun ja töitikaka Jesube ie, aisete nun ñan näma mike era. Akwa tikwe tuaba angwane, batibe rababa era tikrä, käkwe tödekaba bti.

¹⁰ Yebti nun nibu ja töitikaka Jesube ye rikabata gwä nebeta ja gwiriete.

Jesukwe ja mikani tuadre María Magdalaboye

(Marcos 16.9-11)

¹¹ Angwane María rikabata nebeta dobohti Pedro amne ti jiehti. Abti Pedro amne ti rikabata gwä angwane, María aibe namani müen dobohti. Niara namani müen kore, käkwe ja mikaninte timonkwäre nikrakäre kä mkäte nguse.

¹² Angwane angele nämane nibu nguse, btä okwä namani. Angeletre ye abko btä dän ngwen bürere jökrä abko nämane tākänintbe nguse. Jesu dokwä nämane, yekri angele nämane iti amne Jesu ngoto, yekri abko angele nämane iti mda abko btä María okwä namani.

¹³ Angwane angeletre ye käkwe niebare Mariäye:

¿Mata dre müaire ti mräkä? niebare kwetre ie.

Angwane María käkwe niebare mda:

Ti Dänkien ngwäkä jänikani tikän amne mikani mdente ñan nebe nüke gare tie, aisete tita müaire ye, niebare kwe angeleye.

¹⁴ Mariäkwe niebare kore, ye btäräbe nikrabareta ja trökri kwe angwane, Jesu nämane känime ken, btä okwä namani. Akwa Jesu ara nämane yete abko ñan nükan gare Mariäye.

¹⁵ Akwa Jesukwe niebare ie:

¿Mata dre müaire ti mräkä? ¿Nire känantarita näin makwe? niebare kwe ie.

Akwa ni ye abko nämane nura ngibiare, María namani nütüre, aisete niebare kwe ie:

Ma nikani ti Dänkien ngwäkä ngwena ne ngwane, makwe mikani mdenete mda, ye makwe nie tie, ti mräkä, amne ti näin tuenta, niebare kwe ie.

¹⁶ Abtä Jesukwe niebare mda ie:

¡María! niebare kwe ie.

Ye btäräbe María nikwitaninte, käkwe niebare hebreore Jesuye:

¡Rabuní! niebare kwe. (Ye abko “Dirikä tikwe” niebare kwe.)

¹⁷ Angwane Jesukwe niebare mda ie:

Ti ngämi nikenta ti Rün kánti kä käinbti, aiseite makwe ñan ti ketate, akwa nänta ti mräkätre ja töitikaka tibe ye kánti amne makwe nie krörö ietre: Ti bike nikenta ti Rün amne mun Rün kánti kä käinbti. Erere arato, Ngöbö tikwe amne Ngöbö munkwe, kánti ti bike nikenta, tikwe nini, ye abko makwe nie kore ietre. Abko kore se, niebare Jesukwe Maríayé.

¹⁸ Ye erere bkänä, María nikaninta, namaninta gwi angwane, Dänkien tuani kwe ye tanba kwe nun ja töitikaka Jesube yeye. Erere arato, Jesukwe blitabare ño ño ben, ye erere nieba jökrä kwe nunye.

Jesukwe ja mikani tuadre nitre ja töitikaka benye

(Mateo 28.16-20; Marcos 16.14-18; Lucas 24.36-49)

¹⁹ Yebti köbö kena bämänte ye arabe näire nun ja töitikaka Jesube nämä ja ükaninkrö gwi, akwa nane nitre israelita ji dokwäte käkwe nun kadre ngite arato abko jürä rababa nunbtä, aiseite nun nämä ja ükaninkrö, ye kánti nunkwe jukwe dikaba jabtí, akwa batibe Jesu rababa gwi amne rababa nünaninkä nun ja töitikaka ben ye ngätäite, käkwe nieba nunye:

Kä jáme Ngöbökwé raba munbtä, nieba kwe nunye.

²⁰ Jesukwe ñäkäba kore, ye btäräbe klabo träin kisebtä amne buko träin kronante mikaba tuadre kwe nunye angwane, kä rababata nuäre krübäte nunbtä nun Dänkien tuareta.

²¹ Angwane Jesukwe niebata mda nunye:

Kä jáme Ngöbökwé raba munbtä. Ti Rün käkwe ti juani ño, ye kwrere ti bike mun juen arato, nieba kwe nunye.

²² Ye btäräbe müre tákäba kwe nunbti, käkwe nieba nunye:

Ngöbö Üai Deme kaen ngäbti munkwe.

²³ Nire nire ngite abko diandrekä btä munkwe niedi ie, ye erere Ngöbökwé dianinkära btä; akwa nire nire rabadi ngite kärekwé munkwe niedi ie, ye abko Ngöbökwé ñan ngite diandrekä btä, nieba Jesukwe nun ja töitikaka benye.

Bti Jesukwe kä mikakaba.

²⁴ Jesu rükabata kena nun ja töitikaka ben ngätäite, ye näire abko ni iti ja töitikaka ben kädian nämä Tomás abko nämä ñakare nunbe yete. Tomás ye mden abko kädian nämä “Munkin” abko nämä ñakare angwane Jesu rükabata.

²⁵ Yebti Tomás rükabata angwane, nun ja töitikaka Jesube käkwe nieba ie:

Nunkwe ni Dänkien turi mtare, nunkwe nieba ie.

Akwa Tomás abko käkwe nieba mda nunye:

Tikwe ñan klabo träin tuadre kiseté amne tikwe ñan kise kräkia mikadre klabo träinte, erere arato buko träin kronante, te tikwe ñan kise mikadre, ne ngwane tikwe ñan mun kukwei mikadre era jire chí, nieba kwe nunye.

²⁶ Abti bämän kratí mda nun ja töitikaka Jesube nämä ja ükaninkröta jökrä bämänte angwane, Tomás nämä siba yete angwane, nunkwe jukwe dikaba arato, akwa batibe Jesu rababa gwi amne rababa nünaninkä nun ngätäite, käkwe niebata nunye:

Kä jáme Ngöbökwé raba munbtä, nieba kwe nunye.

²⁷ Yebti nieba kwe mda Tomásye:

Tomás, kise mike tie nete amne ti kise träin ne mike ñäräre, bti ti krona träin ne te kise krien tie, bti kukwe ñan tä nebe era makrá, ye kwrere makwe ñan nuen mda, käkwe kukwe tibtä ye mika era jae, nieba Jesukwe ie.

²⁸ Angwane Tomásye ngrateba kri, käkwe nieba Jesuye:

¡Ma abko ti Dänkien tikwe amne Ngöbö tikwe! nieba kwe ie.

²⁹ Angwane Jesukwe nieba mda ie:

Mata ti tuenta ja okwä jenbti, aiseite ti ara abko makwe miri era, käkwe tödiri tibti ñan ñan; akwa nire nire tä ti tuen ñakare akwa tä ti kukwei mike era jae amne tä tödeke tibti, ni yebtä abko kä rabadi bäri nuäre krübäte amne Ngöbökwé ja di biandi ietre, nieba Jesukwe Tomásye.

³⁰ Jesu abko nämäne sribire nun ja töitikaka benbe kä nebtä angwane, Ngöbö di nämä ben ye bä mikakrá abko sribi ñan tuabare nuenba kabre mda kwe nun ja töitikaka ben okwäbti, akwa ye abko tikwe tikaba ñakare jökrä tärä nebtä.

³¹ Akwa munkwe kukwe kuin Jesubtä mikadre era jae amne Ni Dianinkä Ngöbökwé abko Jesu ara amne niara abko Ngöbö Odei, ye abko rabadre era munkrä amne munkwe

tödekadre bti, abkokäre tikwe kukwe ne tikani. Mdakäre abko, munkwe tödekadre Jesubti, ye köböire munkwe nünandre kärekäre Ngöböbe, abkokäre tita kukwe ne tike.

21

Nitre ja töitikaka Jesube käkwe gwa gani kabre

¹ Jesukwe ñäkäba kore Tomäye. Abti Jesukwe ja mikabata tuadre mda nun ja töitikaka benye ñö okwä kri kädianta Tiberias ye köräbtä. Ñö okwä kri ne arabe kädianta Galilea arato, kánti kukwe rakakaba krörö:

² Simón Pedro nämä Tomábe yete. Tomás ye arabe kädian nämä “Munkin” abko nämä yete. Erere arato, Natanael nünanka juta Canáte kä Galileate amne Zebedeo ngobo nibu, btä nun ja töitikaka Jesube nämä nibu mda yete.

³ Angwane Simón Pedro käkwe nieba nunye:

Ti bike niken gwa gaen, nieba kwe.

Angwane nunkwe nieba Pedroye:

Nun bike niken siba mabe, nieba nunkwe.

Ye erere bkänä, rikaba, rankwaba rute amne rikaba gwa gaen. Akwa ye näire deo käbä rababa ñakare jire gwabtä.

⁴ Abti kä jataba ngwen dekä angwane, batibe Jesu rababa ñö okwä köräbti yete, akwa Jesu ara nämä yete, ye abko ñan rükaba gare nunye.

⁵ Angwane Jesu käkwe nieba nunye:

¿Gwä tärä munkwe ya ti mräkätre? nieba kwe.

Nunkwe nieba ie:

Gwa ñakare nunkwe, nunkwe nieba Jesuye.

⁶ Abtä Jesukwe nieba mda nunye:

Krade kiteta ñöte küde ruenkri rubtä timon yete munkwe angwane, mun käbä rabadi, nieba kwe nunye.

Ye erere nunkwe nuenba angwane, gwa rababa kratibe dikaro kradete, aisete krade ñan rababa näkäita kukwäne nebeta rute nunye.

⁷ Angwane ti ja töitikaka Jesube abko Jesu nämä tarere kri abko käkwe nieba Pedroye:

¡Ni Dänkien ara tä ñö köräbti se! tikwe nieba.

Tikwe nieba kore, ye jaraba Simón Pedroye angwane, jötrö ngwarbe dän kitaba jabtä kwe, bti rankwaba ñöte, rikaba jübenkä nebe Jesu kánti.

⁸ Angwane nun mda mda ja töitikaka Jesube abko rikaba ru ngwena janknu nebe ñö köräbtä. Akwa gwa rababa kabre kradete, ye abko nun rikaba jake bätärekä bätärekä nebe ñö köräbtä. Nun nämä bä känime bäsi metro siento krati näre ñökrä ken, aisete rababa gwa ngwena nebe ñö köräbtä.

⁹ Abti rababa ñö köräbtä jate, rankwaba timon angwane, ñukwä oto nämä bukaninte kwati kwanba nunye. Ñukwä yebti abko gwa nämä mikani krati amne ban nämä mikani arato.

¹⁰ Angwane Jesukwe nieba nunye:

Gwa naka munye, ye ngwen ruäre kukwadre nete, nieba kwe nunye.

¹¹ Angwane jötrö Simón Pedro rikaba rute käin, kä rikaba krade ngwena nebe jate. Gwa krikri be nämä kradete, ye tanba angwane, gwa nämä siento krati bti gre ketebu bti krä jätäbti krämä (153) kradete. Gwa nämä kabre kore, akwa krade rötateba ñakare.

¹² Yebti Jesukwe nieba mda nun ja töitikaka benye:

Mun jakwe mröre, nieba kwe.

Ye erere nun rikaba, akwa Jesu abko ni Dänkien ara abko rababa gare nunye, aisete Jesu abko nire ye abko ja ñan rükaba töre nunye ngwentari ie.

¹³ Yebti Jesukwe krötäba nun ken, käkwe ban amne gwa dianba kisete, bti bianba kwe nunye kwetadre.

¹⁴ Ne ngwane abko Ngöbökwé Jesu mikaninta nire, yebti Jesukwe ja mikaba tuare bämäkäre nun ja töitikaka benye.

Jesukwe blitabare Simón Pedrobe

¹⁵ Nunkwe mröba ünän jökrä angwane, Jesukwe nieba Simón Pedroye:

Simón, Jonás ngobo, ¿mata ti tarere bäri ni mda mda noko ngwä ya? nieba kwe ie.

Angwane Pedrokwe nieba mda ie:

Jän, ti Dänkien. Ma tare kri tikwe ye garera mae, nieba kwe Jesuye.

Angwane Jesukwe nieba mda ie:

Nitre tödekaka tibti tä obeja ngäbäli kwrere, ye makwe buka, nieba kwe Pedroye.

¹⁶ Yebti Jesukwe niebata bobuta ie:

Simón, Jonás ngobo, ¿mata ti tarere era metre ya? nieba kwe ie.

Angwane Pedrokwe niebata Jesuye:

Jän, ti Dänkien. Ma tare kri tikwe, ye garera kuin mae, nieba kwe ie.

Angwane Jesukwe nieba mda ie:

Nitre tödekaka tibti tä obeja kwrere, ye makwe ngibia, nieba kwe ie.

¹⁷Yebti bämäkäre Jesukwe niebata mda Pedroye:

Simón, Jonás ngobo, ¿mata ti tarere era metre ya? nieba kwe ie.

Jesukwe kukwe arabe ngwiantariba bämä jire ie, abtä moto rababa ulire, käkwe nieba Jesuye:

Ti Dänkien, kukwe gare jökrä mae, aisete ma tare kri tikwe, ye gare kuin mae, nieba kwe ie.

Abtä Jesukwe nieba mda ie:

Nitre tödekaka tibti tä obeja kwrere, ye makwe buka, nieba kwe ie.

¹⁸Yebti Jesukwe nieba mda ie:

Ti bike kukwe era erere niere krörö mae: Ma nämane bati angwane, ma nämane ja dätere, bti ma tö nämane nebe rikai mdente erere, kánti ma nämane niken. Akwa ma rabara unbre angwane, makwe ja küde aibe ngökadite amne ni mdakwe dän kitadi mabtä amne, ma ñan tö näin abko kánti ma jänäin, nieba Jesukwe Pedroye.

¹⁹Jesukwe nieba kore Pedroye, ye abko Pedro krütadi ño krusobtä abko Jesu tö rababa niei biare ie, abkokäre nieba kore kwe ie. Erere arato, Pedro krütadre, yebti abko Ngöbö rabadre káikitaninkä kri abko Jesukwe mikaba gare ie, käkwe nieba kore ie. Yebti Jesukwe nieba mda Pedroye:

¡Makwe dikaka janknu ti jiebtí, ie ti tö! nieba kwe ie.

²⁰Jesu amne Pedro nämä dikekä ñö köräbäre, ye btäräbe Pedrokwe nikrabata ja jiebtí angwane, ti ne mden Jesu nämä tarere, ye rükaba niaratre jiebtí abko btä Pedro okwä rababa. Ti nämä tákänintbe kánime Jesu ken mröre mrä Jesube Pascua näire angwane, tikwe nieba Jesuye: ¿Ti Dänkien, nirekwe ma kitadi ngise ma rüeye müre ketadre? tikwe nieba Jesuye abko rükaba Jesu amne Pedro jiebtí.

²¹Ti ne mden abko rikaba tuen Pedroye angwane, Pedrokwe nieba Jesuye:

¿Ti Dänkien, niara sebtä abko dre rakadikä? nieba kwe Jesuye.

²²Abtä Jesukwe nieba Pedroye:

Ti tö rabadre ni se mikai nüne janknu angwane, tädre nire angwane ti jatadreta kä nebtä, aisete ye ñan rabadre ütiäte makrä. Akwa ma abko käkwe dikaka janknu ti jiebtí, nieba kwe ie.

²³Jesukwe nieba kore Pedroye, yebtä abko ti ñan krütadre jire abko ja mräkätre ruäre tödekaka Jesubti kä rababa niere jae kwärikwäri. Akwa Jesukwe ñan nieba kore, akwa nieba krörö kwe: “Ti tö rabadre ni se mikai nüne janknu angwane, tädre nire angwane ti jatadreta kä nebtä, ye ñan rabadre ütiäte makrä,” nieba Jesukwe.

²⁴Ti abko btä Jesukwe blitaba Pedrobe abko kätä tärä ne tike amne, tikwe kukwe tuaba Jesubtä ja okwä jenbti erere tita niere metre, aisete kukwe ne abko era metre erere abko gare nie.

²⁵Jesu nämane sribire kä nebtä angwane, sribi kri namani bare kabre mda ie, aisete kukwe ye tikadre jökrä ja täritäri täräbtä angwane, tärä ye käi rabadre ñakare kä nebtä, raba ruen tie. Abko kukwe nakaninkä kore Jesubtä. Abko kore se. Ne ngörä.

Sribi Nitre Jesu Kukwei Ngwianka Kōböire Los Hechos de los Apóstoles

Tärä ne abko Lucakwe tikani ni kädian nämane Teófilo ye ara kräke. Tärä tikani käne kräke abko Kukwe Kuin Jesubtä Tikani Lucakwe. Ye mden kisete, ni tärä ne tikaka abko Lucas ara tä gare nie. Niarakwe tärä Lucas tikani käne, abti tärä Hechos ne tikani kwe. Jesu abko nikaninta kä käinbti, yehti Jesukwe sribi nuenbare ño ño Ngöbö Üai kōböire kä nebtä nitre Jesu kukwei ngwiankabi abko Lucas tä mike gare tärä nebtä. Kukwe ne tä tikani krörö Hechos 1.8 yehti: “Mun rabadi dite, kä näin kukwe kuin tibtä ye niere juta Jerusalénte amne kä Judeate amne kä Samariate. Erere arato, mun näin kukwe kuin ye niere kä jökräbti temen” abko tä tikani. Bári käne Ngöbökwé sribibare ño ño Pedro kōböire Jerusalénte, Judeate amne Samariate abko Hechos tä niere. Yehti Pablo abko kākwe kukwe kuin Jesubtä mikani gare kä jökräbti temen abko Lucas kākwe mikani gare. Tärä nebtä abko, Jesukristo abko ni Diantarikä ni jökrä kräke abko Lucas tä mike gare.

Lucas abko ni kräkä bianka. Pablo nikani kukwe kuin Jesubtä mike gare abko ben Lucas nikani bäre bäre arato. Ye mden kisete, Ngöbökwé sribibare ño ño Pablo kōböire abko Lucakwe tuani ja okwä jenbti abko erere tikani täräbtä kwe.

KUKWE NAKANINKÄ KÄNEKÄNE JESU KUKWEI NGWIANKABTÄ (1.1-26)

Jesu nikaninta kä käinbti

¹⁻² Ti mräkä Teófilo, tikwe tärä tikani käne mae, yehti tikwe tikaba krörö: Ngöbö ngämi niken Jesu ngwenante kä käinbti känenkri Jesu nikani sribire kena angwane, dre dre nuenbare kwe amne dre dre diribare kwe abko tikwe tikani käne täräbtä makrä. Erere arato, ni dianinkä kwe ja kukwei ngwianka, ye abko kākwe dre dre nuendre abko niebare kwe ietre Ngöbö Üai Deme kōböire abko tikwe tikani käne täräbtä makrä.

³ Jesu krütani, yehti nükaninta nire. Ne abko niara nükaninta nire bkänä rabadre gare metre, abkokäre ja mikani tuadre bäre bäre kōbö gre ketebu kwe niara kukwei ngwianka ye. Angwane Ngöböta gobrane ño ni kwe ngätäite, abkobtä blitabare kwe bentre.

⁴ Angwane bati Jesu nämane bentre angwane, niebare krörö kwe ietre:

Ngöbö ti Rün kākwe ja Üai Deme kōböi mikani munye, btä tikwe blitaba munbe, ye munkwe ngibia Jerusalénte. Munkwe ñan kä mikaka jire Jerusalénte abko tita niere munye,

⁵ ñobtä ñan angwane Juankwe ni ngökani ño aibe te ni mikakäre jenena Ngöbökrä, akwa Ngöbökwé ja Üai Deme juandi nünakäre munbtä, aiseté munkwe ngibia Jerusalén yete. Abko kore se, niebare Jesukwe ietre.

Ngöbö nikani Jesu ngwenante kä käinbti

⁶ Yehti nitre Jesu kukwei ngwianka kākwe niebare mda Jesuye:

Dänkien, ¿jrei nämane kira nun ngätäite nete, ye kwrere ma bike gobrane nun israelita ngätäite nete ya? niebare kwetere Jesuye.

⁷ Jesukwe niebare mda ietre:

Ti rabadre gobrane ñongwane amne kōbö mdente, ye abko ti Rün kätä ükete au tikrä amne, ye ñan rabadre gare munye.

⁸ Akwa kukwe krörökrörö abko rabadre gare munye: Ngöbö Üai Deme rükadi nüne munbtä, kākwe ja di biandi munye angwane, mun rabadi dite, kä näin kukwe kuin tibtä ye niere juta Jerusalénte amne kä Judeate amne kä Samariate. Erere arato, mun näin kukwe kuin ye niere kä jökräbti temen, ye abko rabadre gare käne munye. Abko kore se, niebare Jesukwe ietre.

⁹ Jesukwe blitabare ünän kore bentre angwane, niaratre okwä nämane Jesubtä. Ye btäräbe Ngöbökwé Jesu kaninkä käin, nikani ngwena müdate ta käin amne nianinkäbe niaratre okwäte, nin jatabareta mda ietre.

¹⁰ Jesu namani niken kä käinbti, ye abko nikani nenkä ño niaratre okwäbti abko jiehti okwä nämane kwekbe. Ye btäräbe ni btä dän ngwen bürere namanina nünaninkä nibu niaratre ken,

¹¹ kākwe niebare ietre:

Mun Galileabo, okwäbti Ngöbö niki Jesu ngwenante kä käinbti abko jiehti mun okwäta. ¿Se ñobtä mun okwäta jiehti? Jesu ye mden Ngöbö niki ngwenante kä käinbti mtare, ye kwrere jatadita bobuta, niebare kwe ietre.

Matías dianinkä sribikäre Jesu kukwei ngwianka

¹² Kä ye ngwane abko, nitre Jesu kukwei ngwianka nämane Ngitio Olibobti, nikaninta Jerusalén. Ji Ngitio Olibo nebebe Jerusalén ye abko bäsi kilometro krati, kánti nikaninta.

¹³ Nikani nementa jutate angwane, ju käin ninkri, kánti nämamentre nüne, ye kánti nikani nebeta. Ye kánti Pedro, Juan, Santiago btä Andrés; Felipe btä Tomás; Bartolomé btä Mateo; Alfeo ngobo Santiago btä Simón (ne arabe kä Zelote) amne Santiago mda ngobo Judas abko nämane arato.

¹⁴ Ye kánti, meri ruäre, ben nämane ja ükekrö käre blitakäre Ngöböbe amne, Jesu meye María amne Jesu etbakantre, ben nämane blite Ngöböbe arato.

¹⁵ Kä ye ngwane abko batira jire ni tödekaka Jesubti nämane ja ükaninkrö bäsi gre keta ti jire, ye ngätäite Pedro namani nünaninkä, käkwe niebare:

¹⁶ Ja mräkä, Judas nikani Jesu rüe jie ngwena Jesu kaen ngite, ye abko Ngöbö Üai Deme köböire nämane tikani kira Ngöbö Kukweibtä jrei Davikwe. Ye rabadre bare, mden erere namanina bare mtare.

¹⁷ Judas abko nämane nibe ketetibe amne nämane sribire nibe gwaire, niebare Pedrokwe.

¹⁸ (Akwa Judas ye mden abko käkwe kukwe nuenbare käme Jesu rüere, ye abko ütiä biani ie. Mdenbti kä kökani kwe jakrä. Abti kä ye kánti, niara nikani ngitiekä dokwäre temen amne büle ngetrani angwane, ngänkrä nakwani jökrä künken.

¹⁹ Ye abko, nitre nünanka Jerusalén käkwe gani angwane, kä ye kädiani Acéldama kwetre. Ye abko “Kä Därire” nieta niaratre kukwe arameore.)

²⁰ Pedrokwe niebare:

Kukwe rakadrekä kore, ye mden abko nämane tikani krörö Davikwe tarä Salmobtä: Ju niarakwe, kánti kä raba kaibe ngwarbe jökrä amne, ni mda ñan raba nüne jire niara täte.

Salmos 69.25

Erere arato, kukwe nebtä Davikwe kukwe tikani mda abko krörö:

Sribi kwe abko raba ni mda kiseté,
tikani kore kira Davikwe.

Salmos 109.8

²¹ Ne aiseté, ni Dänkien Jesu nämane nüne ni ngätäite nete angwane, ni ruäre tä näin siba nibe, ne käre nämane näin ketetibe nibe

²² kena angwane Juankwe Jesu ngökani ñöte abti kä nükebe Ngöbö nikani Jesu ngwenante kä kämbti. Nitre tä näin kore nibe, ye ngätäite nikwe ni diandrekä iti sribikäre jabe Judas täte, Jesu nükantä nire kädriekäre gwaire nibe abko rabadre kuin. Abko kore se, niebare Pedrokwe ietre.

²³ Ye erere bkänä, ni mikani nibu jite kwetre diandrekä mikakäre sribire abko nere: Ni iti abko kädian nämane José, arabe kädian nämane Barsabás amne arabe kädian nämane Justo arato. Amne ni mda abko kädian nämane Matías mikani kwetre jite arato.

²⁴⁻²⁵ Nebti blitabare krörö kwetre Ngöböbe: Ni Dänkien Jesu, Judas Iscariote käkwe ja mikani ngite, kánti sribi kwe namani ie amne, Ngöbökwé üai juani mdente, ye kánti nikani. Mtare nire rabadre ma kukwei ngwianka Judas täte, ye abko makwe mika gare nunye, ñobtä ñan angwane ni moto ño gare kuin jökrä mae, aiseté nitre nibu ngätäite, nire rabadre abko makwe mika gare nunye, niebare kwetre Ngöböye.

²⁶ Yebti nire rabadre sribire abko Ngöbökwé mikadre gare ietre, abkokäre jä kitani kwetre* gakäre angwane, jä yebti abko Ngöbökwé Matías mikani jite. Ye ngwane mentokwäre, Matías namani Jesu kukwei ngwianka siba ni ni jätäbti iti yebe.

KUKWE KUIN JESUBTÄ NIEBARE JUTA JERUSALÉNTE (2.1-8.3)

2

Ngöbö Üai Deme nükani

¹ Bieta kädian nämane Pentecostés* ye abko köböi nükantä angwane, nitre tödekaka Jesubti nämane ja ükaninkrö jökrä ja kánti.

² Te batibe müreta kite mate bäri ribi krübäte ngöta neme, ye kwrere jire kä ngö jatani kä kämbti timonkwäre abko ngö nükani mate gwita temen niaratre nämane tákänintbe jökrä ye kánti.

³ Angwane jändrän bä namani ñukwä jutra kwrere niatebare abko nikani mate jene jene ni itire itire btä gwita temen.

⁴ Ye btäräbe Ngöbö Üai Deme namani täte jökrä btätre. Angwane ni kukwei jenena batakä ngwarbe btä ja töitikani ñakare kwetre abko erere bti namanintre blite, Ngöbö Üai namani kukwe tike ño, ye kwrere namani blite jökrä.

* **1:26 jä kitani kwetre.** Proverbios 16.33 yebtä ñäke. * **2:1 Pentecostés.** Bieta Pentecostés, ye näire nitre israelita nämane kuin niere Ngöböye nura ngwä kenabtä. Levítico 23.15-21, yebtä ñäke.

⁵ Kä ye ngwane abko nitre israelita nünanka kä jökräbti temen kä nämane Ngöbö mike ütiäte abko nämane nünentbe Jerusalénte Ngöbö käikitakakäre Pentecostés näire.

⁶ Angwane nitre tödekaka Jesubti namani blite bätäkä ngwarbe, kukwe ye jarabare nitre israelitaye angwane, dre namani nakenkä ñan namani nüke gare ietre, käkwe ja ükaninkrö kwati ni kukwei nuakäre, ñöbtä ñan angwane nitre nämane yete, ye kukwe ño ño abko erere nitre tödekaka Jesubti namani blite.

⁷ Yebtä abko, ni jökrä käkwe ja ngwiani nikenkä amne töi ñan namani krütare jökrä, kä namani niere krörö jae kwärikwäri:

¡Nitre noko abko ñan Galileabo jökrä ya,

⁸ amarebti nibitre blite ni kwrere amne kukwe nibi nüke gare nie se!

⁹ Nita nete ne abko, Partobo, Medobo, ni Elambo, ni Mesopotamiabo, ni Judeabo, ni Capadociabo, ni Pontobo tä nete. Erere arato, ni nünanka käkä Asiate tä nete.

¹⁰ Mdakäre abko, ni Frigiabo, Panfliabo amne ni Egiptobo tä nete amne, ni nünanka kä Libiate juta Cirene ken tä nete. Erere arato, ni nünanka juta Romate tä siba nete abko

¹¹ ruäre därebare ni israelitakri, akwa ruäre abko käkwe Ngöbö nitre israelitakwe kani ngäbti Ngöbö jen kwe kwrere, köböire namani nekete jakri nitre israelitabe abko tä nete. Erere arato, ni nünanka kä butubti Cretate amne, ni kä Arabiabo tä nete. ¿Se ño abko sribi kri nuenbare Ngöbökwé, btä nibitre blite ni jökrä kukwere se? ni jökrä namani niere kore jae kwärikwäri.

¹² Yebtä abko, ni jökrä ñan töi namani krütare amne töbikadre ño mda kwetre ñan namani nüke gare ietre, kä namani niere jae kwärikwäri:

¿Dreta nakenkä nete amarebti ni jökrä nibi blite bätäkä ngwarbe kore se? namanintre niere mda.

¹³ Akwa ni ruäre abko nämane nitre tödekaka Jesubti mike yakrä, kä namani niere:

¡A, ngwarbe nibitre dröbare jökrä, aisete tätre kore se! namanintre niere.

Pedro käkwe blitabare Jesubtä

¹⁴ Ye btäräbe nitre ni jätäbti iti Jesu kukwei ngwianka mda mda, ben Pedro namani nünaninkä krö, käkwe ñäkäbare jume ja díbti krörö:

Ti mräkä israelita amne ni mda mda tä nüne Jerusalén nete abko ie dre dre tä nakenkä rabadre gare, aisete ti bike kukwe niere, neye olo ketete kuin munkwe:

¹⁵ Nitre ne tä dröbare mun nibi nütüre btä, akwa ye kwrere ñakare, ñöbtä ñan angwane ñänä okwä krä ökanbe krire dekä. Se ño abko rabadre dröbare jökrä, aisete niaratre ñan tä dröbare.

¹⁶ Akwa kukwe ne tä nakenkä nete mtare, abkobtä Ngöbö kukwei niekä Joel käkwe tikani krörö:

¹⁷ Ngöböta niere krörö munye:

Kä mra angwane, ni nünanka kä ketareketare te kwäräkwärä, btä tikwe ja Üai Deme mikadi täte.

Ne aisete mun ngäbriänkä merire, brare käkwe ti kukwei niedi amne, ni brare bati bati abko ie jändrän tikwe rabadi tuen köböire kwrere.

Amne ni unbren unbren abko tikwe mikadi köböire jändrän tikwebtä arato.

¹⁸ Erere arato, ni merire, brare sribikä tikrä, yebtä tikwe ja Üai mikadi täte angwane, niaratre käkwe ti kukwei niedi arato.

¹⁹ Mdakäre abko, kä käinbti, kä temenbtä abko tikwe sribi kri ñan tuabare mikadi tuadre amne, jändrän btä ni töi ñan krütai abko tikwe nuendi okwäbti abko krörö:

Däri rabadi tuen, ñukwä jutra rabadi tuen kri amne ngübü rabadi tuen krikri krübäte.

²⁰ Erere arato, ñänä gididate iko jökrä. Sö abko bä rabadi därere jökrä.

Ne abko, ni Dänkien köböi bä nuäre ütiäte kri abko känenkri kukwe rakadikä kore.

²¹ Akwa nire nire käkwe ja di kärädre ni Dänkienye rabakäre dianintari, ni ye abko Ngöbökwé dianditari, nieta kore Ngöbökwé

Joel 2.28-32

abko tikani Joelikwe, niebare Pedrokwe.

²² Yebti Pedrokwe niebareta mda:

Mun israelita, ie ti bike kukwe niere, aisete olo ketate kuin ti kukweieye munkwe: Jesu Nazarebo abko ni brare juani Ngöbökwé rabadre era munkrä, abkokäre Ngöbökwé ja di biani ie sribi kri ñan tuabare nuenkäre bätäkä ngwarbe mun ngätäite. Niarakwe sribibare kore abko garera kuin munye.

²³ Ni ye abko, kräke kukwe nämane ükaninte Ngöbökwé, aisete erere nikani nakenkä krörö btä: Ni iti käkwe kitani ngite mun kisete, bti ni moto kämekäme käkwe mun die mikani kämike krusobtä.

²⁴ Akwa Ngöbö ara jire käkwe mikaninta nire, ñöbtä ñan angwane gata ñan rabadre niara ganaine janknu jire chi.

²⁵ Ngöbökwe niara mikadita nire, yehtë abko jrei Davikwe tërë tikani krörö kira:

Ti nämane ti Dänkien tuen këre ja ken tibe.

Niara të ti ken ti küde ruenkri ti die mikakäre, aisete tikwe ñan kä jürä ngwiandre jire jabtä.

²⁶ Ne aisete kä juto tibtä amne kä nuäre tibtä Ngöbö käikitakakäre.

Mdakäre abko, ti krüte angwane, Ngöbökwe ti ngätä ngibiadi kuin, yehti tita tödeke,

²⁷ ñobtä ñan angwane ti krüte angwane, makwe ñan ti ngätä tuadimetre ni krütani ngätäite dobote Ngöbö.

Erere arato, ni Deme makwe, ye makwe ñan ngwäkä tuadimetre ngütekä.

²⁸ Amne ji mdenbti ti rikadre nünakäre kërekäre mabe, ye abko makwe mikani gare tie, aisete ti rabadita ma ngwärekre amne makwe kä mikadita nuäre tibtä ma tuareta.

Salmos 16.8-11

Ne abko Davikwe tikani kore Jesubtä.

²⁹ Ja mräkäre, ti bike kukwe era metre niere krörö munye, ye ie olo ketete munkwe: Ni mräkä kira David käkwe kukwe tikani, David ye abko krütani, doboi mikani, amne ngwäkä ngütaninkä amne doboi të kä ne kënti Jerusalén nete.

³⁰ Akwa David abko ni Ngöbö kukwei niekä, aisete ni iti niara mräkäkri abko Ngöbökwe mikadi gobrane niara täte, ye nämane gare ie, ñobtä ñan angwane Ngöbökwe köböi mikani ie.

³¹ Ne mden kisete, Ni Dianinkä Ngöbökwe ye abko rükadreta nire amne ñan gütdrekä abko Ngöbökwe mikanina gare ie këne.

³² Mden erere, mtare Ngöbökwe Jesu mikaninta nire. Jesu mikaninta nire, ye mden abko nunkwe tuaba ja okwä jenbti amne nunta niekäre metre mtare.

³³ Ngöbökwe mikaninta nire, abti Ngöbökwe mikani ütiäte kri, käkwe mikani tëkänintbe ja küde ruenkri angwane, ja di kri mikani niara kisete kä käinbti kwe. Bti Ngöbö Üai Deme köböi mikani kwe nunye, ye abko Ngöbökwe biani ie arato amne, niara abko käkwe mikaba nüne täte nunbtä. Ye mden munkwe turi mtare amne munkwe kukwe nuri arato ye.

³⁴ Ye abko, David tukwe ñan nämane blite jabtä gare nie, ñobtä ñan angwane niara doboi të Jerusalén nete, amne Ngöbö ñan nikani niara ngwena kä käinbti, akwa David arabe käkwe kukwe tikani krörö:

Ti Dänkien Ngöbökwe niebare ti Dänkiyenye:

Kä bäri ütiäte kri ti küde ruenkri, ne kënti jakwe tëke nete.

³⁵ Ye kënti ma raba abti tikwe ma rüe mikadi jökrä ma ngoto täni.

Salmos 110.1

Ye abko namani tikani kore Davikwe, akwa tikani ñakare kwe jabtä amne, Jesu Ni Dianinkä Ngöbökwe abko btä tërë tikani kwe.

³⁶ Ne aisete, mun israelita, ie kukwe era metre rabadre gare abko erere ti bike niere: Jesu juani müre ketadre krusobtä munkwe, Jesu ye mden abko Ngöbökwe mikani Dänkiene amne mikani ni Dianinkä kwrere kwe arato. Ne abko raba gare munye kore. Abko kore se, niebare Pedrokwe ietre.

³⁷ Pedrokwe blitabare nitre kwati olote kore, ye abko matani tare motobtä amne, ja namani ruen ngite krübäte Ngöbö ngwärekre ietre, käkwe kukwe ngwianintari krörö Pedroye amne Jesu kukwei ngwianka mda mdaye:

Ja mräkä, mtare nunkwe dre nuendre niere nunye, niebare kwetre.

³⁸ Abtä Pedrokwe niebare mda ietre:

Munkwe kukwe nuenbare käme Ngöbö rüere, ye kite temen jökrä, bti munkwe tödeka Jesubti. Yehti mun jata ja mike ngökare ñöte Jesukristo käbti. Angwane munkwe ja mikani ngite, ye Ngöbökwe diandikä jökrä munbtä, käkwe ja Üai Deme mikadi nüne munbtä arato, ³⁹ ñobtä ñan angwane Ngöbökwe ja Üai Deme köböi mikani, ye abko munkrä amne mun ngäbriänkärä, erere arato ni kä jökräbti kärädre ni Dänkienkwe ye kräke, niebare Pedrokwe ietre.

⁴⁰ Pedrokwe blitabare kore angwane, kukwe mda mda ribebare bäri mda kwe ietre, niaratre töi diankrä amne mikakrä mokre abko krörö:

Ngöbökwe ñan mun mikadre ja tare nike nitre kukwe kämekäme nuenkä ben gwaire, abkokäre mun rabadre dianintari Ngöbö diehti abko tita ribere munye, niebare kwe ietre.

⁴¹ Ye kwrere bkänä, kukwe diribare Pedrokwe, ye ni kwati käkwe kani ngäbti amne ngökani ñöte Jesu käbti. Köbö ye näire abko, ni mda mda namani tödeke Jesubti abko namani mili krämä jire (3,000) abko namani ja gete nitre tödekaka Jesubti yebe.

Nitre tödekaka Jesubti nämane nüne krörö jabe kwärükwäri

⁴² Angwane kukwe diribare nitre Jesu kukwei ngwiankakwe, yehtë niaratre namani ja kite köbö kwatirekwatire amne namanintre jändrän jakwe dräre jabtä kwärükwäri. Erere arato, namanintre ja ükekrö ju kwatirekwatire te mröre gwaire Jesu ngatani ngwiankäreta töre jae amne blitakäre Ngöböbe.

⁴³ Nitre Jesu kukwei ngwianka namani sribi kri nuene amne, sribi ñan tuabare namani nuene ni kwati okwäbti Jesu di namani bentre bä mikakäre. Yebtä abko, ni jökrä ñan töi namani krütare jökrä.

⁴⁴ Angwane nitre tödekaka Jesubti abko töi namani ketetibe jökrä, kä namani jändrän jakwe jakwe dräire jabti kwärikwäri ni tödekaka Jesubti bobre bobre die mikakäre.

⁴⁵ Erere arato, namanintre kä jakwe amne jändrän jakwe rürümoine, bti ni bobre bobre, ie ngwian biandre nuäi nuäi, ye näre nikanintre bien ni itire itire ie.

⁴⁶ Mdakäre abko, ju blitakrä Ngöböbe te namanintre ja ükekrö köbö kwatirekwatire amne, ju kwatirekwatire te mrö dräi namani angwane, kä namani neme nuäre btätre mröre ketetibe ja moto jämenbti.

⁴⁷ Angwane namanintre Ngöbö käikitekä amne, ni jökrä namanintre mike ütiäte. Mdakäre abko, köbö kwatirekwatire, nire nire namani neme dianintari abko ni Dänkien Jesu namani mike ketetibe nitre tödekaka niarabti.

3

Pedrokwe ni ngüre bren mikaninta quinta

¹ Abti bati, kä mikani blitakrä Ngöböbe ñänä okwä krämä näre dere, ye ngwane Pedro amne Juan nikani mda ju blitakrä Ngöböbe ye kanti blitakäre Ngöböbe.

² Angwane ju blitakrä Ngöböbe, ye kanti jukwe nämane kwati abko kädian nämane Jukwe Bä Nuäre. Jukwe ye kanti abko, ni därebare ngüre bren nämane iti. Ni ye abko käre jänämane niken köbö kwatirekwatire nebe yete ngwian käräkäre nitre nämane niken yete yeye abko erere ni ngüre bren nämane yete.

³ Angwane Pedro jatanina nemente jukwete ta Juanbe, rikakäre ju blitakrä Ngöböbe ye kanti angwane, ni ngüre bren ye okwä namani btätre, käkwe ngwian käräbare ietre jakrä.

⁴ Abtä Pedro amne Juan okwä namani kwekbe ni yebtä, bti Pedrokwe niebare ie:

Nun mike ñäräre, niebare kwe ie.

⁵ Angwane niaratrekwe ngwian biandi ie namani nütüre, käkwe okwä ketaninte kwekbe btä bkänä.

⁶ Akwa Pedro abko käkwe niebare krörö mda ie:

Ngwian amne oro ñakare jire chi tikwe biandre mae, akwa jändränä tikwe, erere ti bike bien mae: Jesukristo Nazarebo ye käbti näin krö, nän dikekä, niebare kwe ie.

⁷ Pedrokwe ñäkäbare kore ie, ye btäräbe kani küde ruenkribti kwe, käkwe ganinkrö krö. Ye btäräbe ni ye ngüre namaninta dite jökrä ie se kwrere.

⁸ Angwane ni ngüre bren ye käkwe ja takäninte kainta, nukaninbe dikekä krö amne nikani dikekä kwäräkwärä. Bti nikani siba Pedrobe amne Juanbe ju blitakrä Ngöböbe ye kanti, akwa nikani angwane, nikani ja takete kaintabe nekwäre sekwäre Ngöbö käikitarekä kwärä.

⁹ Namani ja takete kwäräkwärä Ngöbö käikitekä, ye ni jökrä käkwe tuani angwane,

¹⁰ töi ñan namani krütare btä, ñobtä ñan angwane ni nämane takänintbe ngwian kärere Jukwe Bä Nuärebtä nämane tuen amarebti niara ara nämane näin dikekä aisete.

Pedrokwe blitabare Jesubtä

¹¹ Ni ngüre bren namaninta quinta, ye namani Pedro amne Juan gibiekä ñakare angwane, ni kwati ñan töi namani krütare. Angwane ni namaninta quinta nämane Pedro amne Juanbe ju blitakrä Ngöböbe bäre jukä kädian nämane Jukä Salomónkwe, ye kanti ni jökrä nikani betekä ni ye tuakäre.

¹² Ni nämane ja ükekrö kwati dikaro, ye jatabare Pedroye, abtä nitre ye ie Pedrokwe niebare:

Mun israelita, ¿ye ñobtä abko mun ñan töi nibi krütare kore yere? ¿Ñobtä mun okwä nibi jökrä kore nunbtä? ¿Nunkwe ni ne mirita quinta ja di jenbti o nun köböire nibi dikekäta, munta nütüre nunbtä ya? Mdakäre abko, ¿nunta nüne bäri deme amne bäri metre Ngöbö ngwärekrei, aisete nun di nibi niara mikakrä quinta, munta nütüre ya, amarebti mun okwä nibi kore nunbtä yere?

¹³ Ngöbö mikani ütiäte Abrahamkwe, Isaakwe, Jacobokwe amne ni mräkä kira kirakwe, Ngöbö ye mden abko käkwe sribikä jakwe Jesu mikani bäri ütiäte ja ngwärekrei. Jesu ye mden munkwe biani müre ketadre Pilatoye. Pilato tö rababa tikaiteta, akwa munkwe trö kwitani ie.

¹⁴ Akwa ni Deme amne Metre ne ñan tikadrete, mun rababa niere Pilatoye amne, ni ni kämikaka abko tikadrete mun rababa niere kore ie.

¹⁵ Ni ni mikaka nüne ne abko munkwe müre ketani kore, akwa Ngöböke mikaba nüketa nire. Niara nukaninta nire abko munkwe tuaba ja okwä jenbti, aisete nunta niere.

¹⁶ Ni ngüre bren ne abko gare munye. Ye abko käkwe tödekani kwatibe Jesubti, mden köböire ngüre nibita dite jökrä ie. Niarakwe ja töi miri kwatibe Jesubtä angwane, Jesukwe

niara die miri tödeke jabti, mden köböire nibita kuinta täte jökrä, nibi tuen munye ye kwrere.

¹⁷ Ja mräkä, mun amne nitre ji dokwäte mun ngätäite käkwe Jesu müre ketani angwane, mun nämane dre nuene metre ñan nämane gare munye.

¹⁸ Akwa Ni Dianinkä jen jakrä Ngöbökwé abko käkwe ja tare nikadre amne kämikadre, niebare Ngöbökwé ja kukwei niekä kirakira köböire, mden erere Ngöbökwé mikani neme bare.

¹⁹ Munkwe kukwe nuenba kore, yebtä mun moto raba ulire amne munkwe tödeka Ngöbökti, Ngöbökwé mun ngite ye diandrekä jire jökrä mento munbtä amne, kä rabadi nuäre munbtä amne mun moto rabadi jäme Ngöbö ngwäreki abkokäre.

²⁰ Angwane Jesu Ni Dianinkä kira Ngöbökwé munkrä, Ngöbökwé juandre munkrä, abkokäre munkwe kadre ngäbti.

²¹ Akwa gwängware abko, Jesukristo rabadre nüne kä käinbti, ñobtä ñan angwane Ngöbö ngämi jändrän jökrä üketeta kuin amne miketa kuin, ye känenkri Jesu ñan rükadreta, ni Ngöbö kukwei niekä deme kirakira käkwe niebare ye kwrere.

²² Yebtä abko, Moisékwé niebare krörö Jesubtä:

Ni Ngöbö kukwei niekä ti kwrere abko Ngöbökwé diandikä iti mun ngätäite blitakäre jakrä munbe.

Ni ye käkwe dre niedi, ye erere munkwe kukwei mika täte jökrä,

²³ ñobtä ñan angwane ni Ngöbö kukwei niekä, ye nire nire käkwe ñan kukwei mikadre täte, ye erere abko munkwe kämikadre diandikäre ja ngätäite, *Deuteronomio 18.15,18,19* niebare kore Moisékwé.

²⁴ Ye abko, kukwe nakaninkä ño Jesubtä kä ne näire, ye rakadrekä abko nitre Ngöbö kukwei niekä kirakira Samuel näire mentokwäre käkwe niebare jökrä.

²⁵ Amne Ngöbökwé kukwe ükaninte ni Dianinkä kwe juandre abko niebare kwe nitre niara kukwei niekä köböire. Erere arato, Ngöbökwé kukwe ükaninte mun mräkä kirakirabe, ye abko rababa bare kä ne näire munkrä, ñobtä ñan angwane kukwe niebare Ngöbökwé Abrahamye, ye abko rababa bare kä ne näire abko krörö:

Ma mräkä köböire ni kä jökräbti temen kä nebtä, ie tikwe ja di biandi, *Génesis 12.3; 22.18* niebare Ngöbökwé Abrahamye.

²⁶ Ngöbökwé sribikä kwe juani kä nebtä angwane, juani käne mun israelita ngätäite kwe ja di biandikäre munye, munkwe kukwe kämekäme kitadre jire jökrä temen, abkokäre juani käne kwe munye. Abko kore se, niebare Pedrokwe ni kwati yeye.

4

Pedro btä Juan käkwe blitabare Sanedrin ngwäreki

¹ Pedro amne Juan nämane blite kore ni kwatibe angwane, batibe nitre blitaka Ngöböbe ni mda mda diäre nükani mda guardia ju blitakrä Ngöböbete dänkien amne nitre saduseo ruäre nükani arato.

² Niaratre abko namani romon, ñobtä ñan angwane Ngöbökwé Jesu mikaninta nire ne abko käkwe ni krütanikrütani mikadreta nüne arato bä mikani abko Pedro amne Juan namani dirire.

³ Abtä Pedro amne Juan kani ngite kwetre. Angwane kä namanina dere dikaro, abtä kitani ngite kä teri kwetre nebe jändrinane.

⁴ Akwa ye ngwane abko, kukwe diribare Pedrokwe amne Juankwe, ye ni kwati käkwe kukwe nuani angwane, mikani era kwetre, käkwe tödekani Jesubti, aiseite nitre tödekaka Jesubti namani bäri kwati mda. Tanbare angwane, ni brarebe namani mili krärike (5,000) jire.

⁵ Yebti jändrinane, nitre israelita ji dokwäte, nitre unbren ji dokwäte amne Kukwe Biani Ngöbökwé Moiséye dirikätre käkwe ja ükaninkrö kwati mda Jerusalén.

⁶ Ye ngwane ni blitaka Ngöböbe ni mda mda diäre dänkien kädian nämane Anás nämane amne, mräkä brare brare kwe kädian nämane Caifás, Juan amne Alejandro nämane siba.

⁷ Namani ja ükaninkrö jökrä angwane, Pedro amne Juan ngwiamna kwetre neme ja kanti. Ye erere jänamanina kanti angwane, mikaninta nünaninkä ja ngwäreki kwetre, käkwe niebare krörö ietre:

¿Nirekwe ja di biani mun yeye amne, nire käfti munkwe ni ngüre bren ye mikaninta kuinta? niebare kwetre Pedroye amne Juanye.

⁸ Batibe Ngöbö Üai Deme namani täte Pedrobtä abko diebti Pedro käkwe niebare mda:

Mun ji dokwäte amne mun unbren töbtä töbtä, ye ie ti bike niere krörö:

⁹ Ni ngüre bren, kisete nämane bren abko kräke nunkwe jändrän kuin nuenbare amne namaninta kuinta, ye abko nunkwe mikaninta kuinta ño abko mun tö gai, ne ngwane ti bike niere metre munye abko krörö:

¹⁰ Jesukristo Nazarebo müre ketamna krusobtä munkwe abko Ngöbökwe mikaninta nire. Jesu ye mden käbti amne diebti nunkwe ni ngüre bren ne mikaninta kuinta, ye abko nun tö nei metre mun ütiäte kriki yeye amne nitre israelita jökräye arato.

¹¹ Jesu ye abko,
Jä ütiäte kri ju mikakrä metre abko mun ju mikaka käkwe kitaninkä, akwa jä ye abko ni
Dänkien käkwe mikani bäri ütiäte ju mikakrä metre, *Salmos 118.22*
abko tikani kore Jesubtä tärä Salmobtä.

¹² Ne mden aisete, Jesu aibe ni diantarikä. Nebti Ngöbökwe ni mda mikani ñakare jire kä nebtä ni diantarikäre. Abko kore se, niebare Pedrokwe.

¹³ Pedro amne Juan, btä kä jürä namani ñakare blitare, ye namani tuen nitre ji dokwäteye angwane, niaratre käkwe ja töitikani ñakare amne bobre amarebti namani blite kore, ye abko ñan namani nuke gare nitre yeye aisete, töi ñan namani krütare btäre, akwa nitre ne käkwe dikakabare Jesube abko gani btä kwetre.

¹⁴ Akwa ni ngüre bren namaninta kuinta, ye nämane nünaninkä siba yete niaratrebe, aisete dre niedre kwetre rüere ñan namani nuke gare ietre.

¹⁵ Abtä Pedro amne Juan käkwe kä mikadrekä, rikadre ju bäre, niebare kwetre ietre, bti niaratre namani blite jabe kwärikwäri gwi,

¹⁶ kä namani niere jae kwärikwäri:
¿Nitre nibu sebtä, nikwe dre nuendre? Sribi ütiäte kri ñan tuabare nuenbare kwetre, ye abko ni kwati nünanka Jerusalén nete, ie nena gare, aisete ni ñan raba rükente jire.

¹⁷ Akwa kukwe ne ñan kädrie rikadre janknu ja täritäri, abkokäre ari niaratre rätekä. Nikwe rätädikä ne ngwane, mtare mentokwäre ñan blitadre mda kwetre Jesu käbti, niebare kwetre jae kwärikwäri.

¹⁸ Bti Pedro amne Juan käräbaretä gwä kwetre, käkwe niebare ietre:
Munkwe ñan blita amne, munkwe ñan diri jire chi mda Jesu käbti, niebare kwe ietre.

¹⁹ Abtä Pedro amne Juan käkwe niebare mda ietre:
Ngöbö okwäbti dre nuendre nunkwe abko bäri kuin, yebtä töbike kuin munkwe, bti munkwe nieta nunye. ¿Nunkwe mun kukwei mikadre täte amne Ngöbö abko nunkwe ñan kukwei mikadre täte ya? ye abko bäri kuin ya abko munkwe nie nunye.

²⁰ Akwa nun bike Ngöbö mike täte aisete, kukwe nakaninkä ño ño Jesubtä nunkwe tuaba ja okwä jenbti amne dre dre niebare kwe abko nunkwe kukwe nuaba, ye abko nunkwe kädriedi janknu. Abko kore se, niebare Pedrokwe amne Juankwe.

²¹ Angwane nitre ji dokwäte sribikä Sanedrinbe ye käkwe Pedro amne Juan rätäninkäta jirekäbe, bti tikaninte kwetre, ñobtä ñan angwane kukwe nakaninkä, yebtä abko ni jökrä namani Ngöbö käikitekä, aisete Pedro amne Juan mikadre ja ngie nuen ño kwetre ñan namani nuke gare ietre, ñobtä ñan angwane ni jökrä jürä namani btäre aisete.

²² Ni jökrä nämane Ngöbö käikitekä, ñobtä ñan angwane ni ngüre bren namaninta kuinta Jesu di krihti, ye abko ie kä nikanina gre ketebu jire ta angwane namaninta kuinta aisete.

Nitre tödekaka Jesubti käkwe ja di käräbare Ngöböye

²³ Pedro amne Juan tikaninteta angwane, nikaninta nebeta mräkä tödekaka Jesubti kanti angwane, nitre blitaka Ngöböbe ni mda mda diäre dänkien btä nitre unbren ji dokwäte käkwe dre dre niebare ietre, ye erere niebare jökrä kwetre mräkäye.

²⁴ Niaratre käkwe Pedro amne Juan kukwei nuani ünän jökrä, bti ja töi mikani gwaire kwetre, kä nikani blite krörö Ngöböbe:

Ni Dänkien Ngöbö, makwe kä käinta amne kä tementa dätebare. Erere arato, makwe mren dätebare amne jändrän jökrä tä nüne käinta, tementa, mrente makwe dätebare.

²⁵ Ma Üai Deme köböire nun mräkä kira sribikä makwe David käkwe ma kukwei niebare krörö:

¿Ñobtä nitre ñakare israelitare tätre neme romon jökrä Ngöbö rüere?

¿Ñobtä nitre israelita abko tä kukwe miketbe ngwarbe kore Ngöbö rüere?

²⁶ Nitre jreire btä nitre gobranka käta ja ükekrö rükäre jökrä ni Dänkien Ngöbö rüere amne
Ni Dianinkä jen kwe rüere arato, *Salmos 2.1-2*
niebare Davikwe.

²⁷ Angwane makwe dre niebare David köböire abko metre garera nunye, ñobtä ñan angwane ye kwrere nena nakenkä bkänä Ngöbö, ñobtä ñan angwane Jesu sribikä deme makwe, ye makwe dianinkä jenena sribikäre jakrä, ye rüere abko jrei Herodes amne gobran Poncio Pilato käkwe ja ükaninkrö ni menteninbe amne nitre israelitabe.

²⁸Ye abko, ma diebti makwe kukwe ūkaninte kira amne rakadrekā kore makwe niebare kira David kōbōire, mden erere namani bare jōkrā ietre ma rūere Ngōbō.

²⁹Ye kwrere arato, mtare tātre nun rātekā amne tātre kada ketamna nunye, ye tuen mae ni Dānkien Ngōbō amne, makwe ja di bian nun sribikā makwe neye, kā jūrā űan rabadre jire chi nunbtā blitakāre ma kukweibtā.

³⁰Erere arato, Jesu sribikā deme makwe, ye kābti makwe ni bren bren mikata kuinta amne, sribi űan tuabare mda mda raba bare ma diebti nun kōbōire abko nunta ribere mae Ngōbō. Abko kore se, niebare kwetere Ngōbōye.

³¹Blitabare űnān kore kwetere Ngōbōbe, ye btārābe kā kānti namanintre gātāre ye kākwe grūkakabare. Angwane Ngōbō Ūai Deme di kri namani jōkrā btātre amne, kā jūrā namani űakare btātre Ngōbō Kukwei kādriere gwārere.

Nitre tōdekaka Jesubti kākwe jāndrān biani jae kwārikwāri

³²Nitre tōdekaka Jesubti nāmane kwati, ye abko tōi namani ja kwrere jōkrā. Angwane jāndrān kwekwe abko űakare namanintre ja mike bkāne kaiibe, akwa namanintre ni mda mda mike bkāne siba.

³³Erere arato, ni Dānkien Jesu nūkaninta nire ye abko nitre Jesu kukwei ngwianka namani kādriere bāri ja di ngōi jōkrā mda amne, Ngōbō namani ja di bien kri ja moto kuinbti ietre.

³⁴Kā ye ngwane, nitre tōdekaka Jesubti, ye ngātāite ni namani űakare jire iti jāndrān mdei nike, űobtā űan angwane ni kā bkānkā amne ju bkānkā abko namani rūrūmoine, bti namanintre nūke ngwian ye ngwena,

³⁵bti namanintre bien nitre Jesu kukwei ngwianka yeye, bti nire nire nāmane mrō nike amne nāmane jāndrān mda mda mdei nike, yebti nāmane ngwian drāire. Ye erere ngwian biandre ni itire itire ye erere namanintre bien ietre.

³⁶Ye kwrere abko, ni levita kā José, Chīprebo kākwe nuenbare. (José ne arabe abko nitre Jesu kukwei ngwianka kādiani Bernabé. Ne niaratre kukwere abko “Ni kā mikakata nuāre nibtā” nieta.)

³⁷Niara ne mden kākwe kā jakwe rūrūmoinbare, bti ngwian biani kwe nitre Jesu kukwei ngwiankaye drādre nitre tōdekaka Jesubti mda mda nāmane jāndrān mdei nike yebti.

5

Kukwe nakaninkā Ananiābtā amne Safirābtā

¹Ni mda nāmane yete abko kādian nāmane Ananías. Niara amne merire kwe Safira kākwe kā jakwe rūrūmoinbare arato.

²Akwa ni ye abko kākwe ja tōi mikani ruāre meri kwebe, kākwe ngwian ye diani ruāre ta jae, bti biani jōkrā kwe namani bā mike jabtā nitre Jesu kukwei ngwianka yeye.

³Abtā Pedrokwe űākābare krōrō ie:

¿Ananías, űobtā makwe Satana turimetre nūke ja tōibtā amarebti, ngwian biani kā űtiāre mae abko makwe dianinkā ruāre ta jae, abti ma tō nibi Ngōbō Ūai Deme ngōkai yere?

⁴¿Kā ye űan makwe ya? ¿Amne makwe rūrūmoiniri angwane, ngwian ye űan makwe arato ya? ¿Ye űobtā makwe kukwe nuni kore ni ngōkākā amarebti mata Ngōbō ara jire ngōkō yere? niebare kore Pedrokwe Ananiāye.

⁵⁻⁶Angwane batibe Ananías nikani ngitiekā ngwākāre temen se kwrere, Pedro kukwei nuare. Ye btārābe ni bati bati jatani, kākwe mrianinte, bti nikanintre ngwena doboi mikadre. Kukwe nakaninkā Ananiābtā, ye nire nire kākwe gani angwane, Ngōbō jūrā namani kri btātre.

⁷Yebti kā nikani űnān okwā krāmā nāre ta angwane, Ananías nān muko Safira nikani gwākāre mda. Akwa kukwe nakaninkā Ananiābtā, ye abko gare űakare ie, aisete nikani neme jāme gwi.

⁸Angwane Pedrokwe niebare ie:

¿Munkwe kā rūrūmoiniri nuāi metre, erere munta niere tie yera? niebare kwe ie.

Angwane, ¡jānri! Nunkwe rūrūmoinbare kore, ¿abko űo? niebare kwe Pedro kāre.

⁹Abtā Pedrokwe niebare mda ie:

¿Ye űobtā abko, mun raba ni Dānkien Ūai Deme ngōkō ya, űakare ya abko mun tō nibi gai, kākwe ja tōi miri ruāre ni ngōkākā yere? Ni bati bati jani ma kwārāi mrō doboi mike abko kitera tuenta sete se. Se arabe nānta ma ngwena doboi mikadre arato mtare, niebare Pedrokwe ie.

¹⁰Ye btārābe Safira nikani ngitiekā ngwākāre Pedro ngotobtā temen se kwrere. Angwane nitre bati bati jataninta gwākāre, ye ie Safira kwani ngwākāre temen, nikaninta ngwena doboi mikadre ja ken brare mrōbe.

¹¹Kukwe nakaninkā kore, ye abko nitre tōdekaka Jesubti amne ni mda mda kākwe gani angwane, Ngōbō jūrā namani kri btātre kukwe nuene Blo Ngōbō rūere.

Nitre Jesu kukwei ngwianka kākwe ni kwati mikaninta kuinta

¹² Abti kukwe Jesubti abko era metre, ye mikakāre era nitre Jesu kukwei ngwianka namani sribi kri ñan tuabare nuene Jesu diebti abko namanintre bā mike tuadre ni kwati okwābti. Erere arato, nitre tōdekaka Jesubti nāmāne ja ūkekrō jukā kā Salomōn kānti ju blitakrā Ngōbōbe ye bāre.

¹³ Angwane nitre Jesu kukwei ngwianka ye mika namani ūtiāte jae ni kwatikwe, akwa kukwe nakaninkā Ananias amne Safirabta, yebta ni ruāre btā jūrā namani, aisete ñan tō namani reketai niaratrebe.

¹⁴ Akwa ye ngwane ni kwati merire, brare nikani tōdeke Jesubti, aisete ni tōdekaka Jesubti namani bāri kwati mda.

¹⁵ Sribi kri ñan tuabare nuen nāmāne kabre, abta ni kwati namani mrākā bren bren mike jān kwatabti amne jamankate namani kite ngwena mikadre jibtā jibtā, ñobta ñan angwane Pedro jatadre ji yebti angwane, mikadreta kuinta kwe, akwa ñakare ne ngwane, Pedro trā aibe matadre ni bren bren yebta abkokāre.

¹⁶ Erere arato, nitre nūnanka kānimekānime juta Jerusalén bāre temen abko namani nūke kwati mrākā bren bren ngwena amne, ni ruāre bren ūai kāme kisete, ye namani nementa kuinta jōkrā Jesu diebti nitre Jesu kukwei ngwianka ye kōbōire.

Nitre israelita krikri kākwe nitre Jesu kukwei ngwianka kitani ngite

¹⁷ Yebta abko, ni blitaka Ngōbōbe ni mda mda diāre dānkien amne ni mda mda nāmāne nekete nitre saduseokri, ye namani mokrere krūbāte mda,

¹⁸ kākwe nitre Jesu kukwei ngwianka ye kamna ngite jōkrā, bti ni ngite ngite kita nāmāne ngite jōkrā ye kāi kānti kitani ngite kwetre.

¹⁹ Akwa batibe deo, angele nūkani iti, kākwe jukwe tikani nitre Jesu kukwei ngwianka yebti se kwrere angwane, dianinta kwe ju bāre mento, kākwe niebare ietre:

²⁰ Ju blitakrā Ngōbōbe, ye kānti mun nān. Mun rabata yete angwane, nūandre ño Ngōbōbe Jesu kōbōire, ye abko munkwe diri tāte jōkrā ni jōkrāye. Abko kore se, niebare angelekwe ietre.

²¹ Ye kwrere bkānā, jāndrinane dekā angwane, angelekwe ño ño niebare ietre ye erere nikaninta ju blitakrā Ngōbōbe ye kāntita angwane, namaninta dirire.

Angwane ni blitaka Ngōbōbe ni mda mda diāre dānkien amne ni mda mda nāmāne ben yete, ye kākwe nitre unbre ji dokwāte nitre israelita ngātāite ye kārābare jōkrā gātābtā jae, bti nitre Jesu kukwei ngwianka nāmāne ngite, ye tuamna kwetre.

²² Erere bkānā, guardia ju blitakrā Ngōbōbete ye nikanintre neme nitre Jesu kukwei ngwianka nāmāne ngite kā teri ye kānti angwane, nitre ye kwani ñakare ietre. Abta jōtrō ngwarbe nikani kukwe ngwenante,

²³ kākwe niebare ietre:

Ju ni ngitekrā abko, bti jukwe tāni dikani kuin amne, guardia ni ngite ngibiabtikā tāni nūnaninkā jōkrā jukwebta, jukwe ye ngibiarebti, btā nun nibi. Akwa nunkwe jukwe tiri angwane, ni ñakare gwi amne, kā kuni tōkare nunye, niebare kwetre.

²⁴ Angwane guardia ju blitakrā Ngōbōbete dānkien amne nitre blitaka Ngōbōbe ni mda mda diāre dānkientre kākwe guardia kukwe nuani angwane, ja ngwiani nikenkā kwetre, kā namanintre tōbike krōrō: ¡Kukwe ne abko nakaka, nebti dre rakadikā mda! namanintre nūtūre.

²⁵ Ye btārābe ni jatani betekā iti, kākwe niebare ietre:

Nitre kitani ngite jāndrin munkwe, ye tā dirire jōkrā ni kwatiye ju blitakrā Ngōbōbe kānti sete, niebare kwe ietre.

²⁶ Angwane guardia dānkien nikani guardiabe nitre Jesu kukwei ngwianka ye tuen. Nikani ngwena akwa, ye ngwane mikanintre ja tare nike ñakare kwetre, ñobta ñan angwane nane ni nāmāne kwati yete kukwe nuen abko kākwe tākadre jābti kāmikakāre abko jūrā namani btātre, aisete nikanintre ngwena ngwebti.

²⁷ Namanintre ju blitakrā Ngōbōbe kānti angwane, nitre Jesu kukwei ngwianka jānikani Sanedrin ngwāreki angwane ni blitaka Ngōbōbe ni mda mda diāre dānkien kākwe ñākābare ietre:

²⁸ Ni btā munta dirire, yebta abko munkwe ñan diridre jire chi mda, nunkwe nieba munye. ¡Se ñobta abko mun tā dirire kore amarebti mtare mun nena dirire ni jōkrāye Jerusalén nete! Abti ni ye krūtani abkobta nun mikata ngite munkwe arato se, niebare kwe ietre.

²⁹ Abta Pedro amne nitre Jesu kukwei ngwianka mda mda kākwe niebare mda:

Nunkwe Ngōbō mikadre tāte, akwa mun abko ñan kukwei mikadre tāte nunkwe,

³⁰ ñobtä ñan angwane Jesu metamna krusobtä munkwe amne munkwe müre ketamna akwa, Ngöbökwé mikaninta nire. Ngöbö ye mden abko ni mräkä kirakira nämáne mike ütiäte.

³¹ Ngöbö ye ara kákwe Jesu mikaninta nire amne nikani ngwenante ká káinbti, kákwe mikani tákáinbti ja küde ruenkri mikakäre ütiäte amne, mikani Ni Jökrä Jie Ngwianka amne Ni Diantarikä. Jesu ne köböire abko nitre israelita kákwe kukwe kámekáme kitadre jökrä temen amne Jesukwe ni ngite ye diandrekä mento nibtä, abkokäre mikani ütiäte jae kwe ká káinbti.

³² Ne mden abko nunkwe tuaba ja okwä jenbti abko erere nunta niere. Erere arato, nitre Ngöbö mikaka täte nun kwrere abko ie Ngöböta ja Üai bien amne kukwe ne abko metre abko Ngöbö Üai Deme káta bá mike metre nunbe gwaire arato. Abko kore se, niebare kwetre.

³³ Yebtä abko Sanedrin mäta namani kri mda Pedrobtä amne Jesu kukwei ngwianka mda mdabtä, aisete tö namanintre kámikai.

³⁴ Akwa Sanedrin ngätäite yete abko ni bariseo nämáne iti abko kädian nämáne Gamaliel. Ni ye abko Kukwe Biani Ngöbökwé Moiséye dirikä kuin amne, ni jökrä nämáne mike ütiäte jae. Gamaliel ye namani nünaninkä, kákwe nitre Jesu kukwei ngwianka juamna ken ju bäre.

³⁵ Bti niebare krörö kwe:

Ja mräkä israelita, nitre ne, btä mun tö dre nuein, yebtä munkwe töbika kuin ja káne,

³⁶ ñobtä ñan angwane bati ká nera ni iti kädian nämáne Teudas jatani ja mike jite ni ütiäte kwrere ni ngätäite. Angwane ni sientö kräbkä jire namani nekete niarabe nitre romanobo rüere. Akwa niara kámikani nitre rükä romanobokwe angwane, ni kwati rikaba ben nikaninta iti iti jökrä kwäräkwärä. Ye kánti sribi kwe krütani, ye munkwe ngwian töre jae.

³⁷ Abti ká nikani bá raire ta angwane nitre romanobo kákwe ni ká tikamna taräbtä mda. Ye ngwane abko ni Galileabo kädian nämáne Judas kákwe ja mikani jite ni ütiäte kwrere mda. Angwane ni kwati namani nekete niarabe nitre romanobo rüere arato. Akwa niara kámikani nitre rükä romanobokwe arato. Angwane nitre reketaka niarabe nikaninta iti iti jökrä kwäräkwärä. Ye abko namani bare kore ni nibu yebtä.

³⁸ Akwa mtare ti tö niei krörö munye: Nitre se munkwe tuametre kaibe amne, munkwe ñan niaratre nika jire chi abko ti tö nibi niei munye, ñobtä ñan angwane kukwe ni ká nebtákwe ne ngwane, näin ta arato.

³⁹ Akwa sribi Ngöbökwé era metre ne ngwane, munkwe ñan ganaindre jire chi, ñobtä ñan angwane batibe mun tädre rüre Ngöböbe. Abko kore se, niebare Gamalielikwe mräkäye.

Ye erere Gamalielikwe nitre Sanedrin töi mikani jakri, aisete kukwei mikani täte mräkä Sanedrinkwe.

⁴⁰ Akwa nitre Jesu kukwei ngwianka nämáne ju bäre, ye káräbaretä gwä kwetre, bti kwata metani tröbtä köbti kwetre töi diankrä amne, ñan blitamna jire chi mda Jesubtä ietre, bti tikaninteta kwetre.

⁴¹ Nitre Jesu kukwei ngwianka abko nikaninta angwane, ká namani nuäre krübäte btätre, ñobtä ñan angwane niaratre namani ütiäte Ngöbö ngwäreki ja tare nikabtä Jesu kräke, aisete ká namani nuäre btätre.

⁴² Abti Sanedrin kukwei mikani täte ñakare kwetre amne, Jesu Ni Dianinkä Ngöbökwé abko kukwe kuin ye abko nitre Jesu kukwei ngwianka namani dirire bäri mda köbö kwatirekwatire ju blitakrä Ngöböbe kánti amne ju mda mdate Jerusalén yete.

6

Ni ni die mikaka dianinkä ni kükü

¹ Kä ye ngwane, nitre tödekaka Jesubti nikani niren bäri kwati mda. Angwane köbö kwatirekwatire nire nire nämáne mrö nike abko bti namani mrö dräire. Akwa nitre israelita kukwe griegore tödekaka Jesubti nikani ñäke nitre kukwe hebreore rüere, ñobtä ñan angwane meri kukwe griegore, kán brare krütani abko ñan die mika namani kuin era metre mröbtä köbö kwatirekwatire.

² Abtä nitre Jesu kukwei ngwianka ni jätäbti nibu kákwe nitre tödekaka Jesubti úkaninkrö kwati, bti niebare kwetre ietre:

Nun rabadre mrö dräire jirekäre nete, abtä kukwe kuin Jesubtä abko nunkwe ñan diridre mda, ye abko ñan rabadre kuin.

³ Ne aisete ja mräkä, ni töbtä töbtä btä Ngöbö Üai Deme tä täte, bti munta tödeke abko kánä ni kükü ja ngätäite munkwe. Ni ye abko nikwe mikadi sribi ye nuene.

⁴ Angwane nun abko kákwe blitadi janknu Ngöböbe amne nunkwe Ngöbö kukwei kuin Jesubtä diridi janknu arato. Abko kore se, niebare kwetre.

⁵Ye abko nūkaninbti ni jōkrāye aisete, ni dianinkā ni kükū kwetre abko nere: Ni iti kādian nāmane Esteban dianinkā kwetre. Esteban abko nāmane tōdeke kwatibe Ngōböbti amne Ngōbö Ūai Deme nāmane tāte btā. Erere arato, Felipe, Prócoro, Nicanor, Timón, Parmenas dianinkā amne ni iti juta Antioquíabo kādian nāmane Nicolás dianinkā arato. Nicolás ne abko ñakare israelita akwa ja tōi mikani kwatibe Ngōbö mikakāre tāte reketakāre nitre israelitabe.

⁶Nebti ni dianinkā ni kükū ye abko jānikani mda nebe nitre Jesu kukwei ngwianka ye ngwārekre, angwane niaratre kākwe ja di kārābare krāke Ngōböye, kise mikare kwārā btitre sribi rabadre kisete bā mikakāre.

⁷Kukwe ūkaninte kore kwetre, abtā kukwe kuin Jesubtā nikani gare bāri ni kwatiye amne, nitre tōdekaka Jesubti namani niren bāri mda juta Jerusalēnte. Angwane ni blitaka Ngōböbe ni mda mda diāre namanintre tōdeke kwati krūbāte Jesubti arato.

Esteban kitani ngite Jesu rüekwe

⁸Yehti Ngōbö namani ja moto mike bāri kuin Estebankrā, kākwe ja di biani kri ie abko kōböire namani sribi kri ñan tuabare nuene bātākā ngwarbe ni kwati okwābti Jerusalén.

⁹Angwane abko sinagoga nāmane kwati abko te nitre juta Cirenebo amne juta Alejandrīabo tikaninte bkānkākwe amne nitre kā Ciliciate amne kā Asiate erere nāmane ja ūekrō. Jesu abko Ni Dianinkā Ngōbökwē abkobtā nitre ye nikani ja kwete Estebanbe.

¹⁰Akwa Esteban abko ie Ngōbö Ūai namani ja di bien, aisete Jesu abko Ni Dianinkā Ngōbökwē bā mikani metre, aisete namani ni kwati kada kete kwārābe jōkrā.

¹¹Abtā Esteban nāmane ñāke blo Moisés rüere amne Ngōbö rüere ni mdakwe niedre Esteban rüere, abkokāre nitre ye kākwe ni kārābare ruāre, bti ngwian biani tiebe kwetre ietre blita ūtiāre ngwarbe Esteban rüere.

¹²Erere bkānā, nikani blite ngwarbe Esteban rüere. Yehtā abko, ni kwati nūnanka juta Jerusalēnte namani romon jōkrā Estebankrā. Erere arato, nitre unbre ji dokwāte amne Kukwe Biani Ngōbökwē Moiséye dirikātre namani romon jōkrā, kākwe Esteban kamna ngite, bti jānikani Sanedrin ngwārekre kwetre.

¹³Angwane ni mdara jire kārābare blitakāre ngwarbe kwetre Esteban rüere, kākwe niebare krōrō:

Kāre ni ne tā ñāke blo ju deme blitakrā Ngōböbe noko rüere amne tā ñāke blo Kukwe Biani Ngōbökwē Moiséye rüere arato.

¹⁴Mdakāre abko ju blitakrā Ngōböbe, se Jesu Nazarebo jatadi, kākwe juandi ngwarbe jōkrā amne, Kukwe Biani Ngōbökwē Moiséye nikrā abko kwitadi jōkrā kwe arato tā niere kore abko kāre nunta kukwe nuen ñāke kore, niebare kore kwetre Esteban rüere.

¹⁵Angwane abko, nitre ūtiāte krikri amne ni mda mda nāmane tākānintbe yete, ye kākwe Esteban mikani ñārāre angwane, Esteban ngwāre namani tuen angele ngwāre kwrere jire ietre.

7

Estebankwe blitabare ja dokwāre

¹Angwane ni blitaka Ngōböbe ni mda mda diāre dānkien kākwe niebare mda Estebanye: Mata ñāke blo ju blitakrā Ngōböbe rüere amne Kukwe Biani Ngōbökwē Moiséye rüere nieta, ¿se abko era bkānā ya? niebare kwe Estebanye.

²Angwane Esteban kākwe niebare krōrō mda:

Mun ti mrākā amne mun ti ruaitre tikwe, olo ketete ti kukweiye munkwe: Abraham ni mrākā kira ngāmi niken nūne juta Harān, ye kānenkri Ngōbö di kri kākwe ja mikani gare ie kā Mesopotamia kānti,

³kākwe niebare ie:

Kā makwe amne ma mrākā, yehtā kā mikekā amne ti bike kā mike tuadre mae, ne kānti nān nūne, niebare Ngōbökwē ie.

⁴Ye erere bkānā, Abrahamkwe kā mikaninkā kā Caldeate, Mesopotamia yete amne nikani nūne juta Harānte mda. Abti Abraham rün krūtani angwane, kā te munta nūne mtare, nete Ngōbö jatani Abraham ngwenante nūne.

⁵Akwa Ngōbökwē ñan kā biani jire chi jen jakrā Abrahamye nūnankrā. Akwa Abraham krūtadre angwane, Abraham bkūntre ja tāritāri abko ietre Ngōbökwē kā ne biandi jen jakrā, Ngōbökwē niebare Abrahamye. Kā ye ngwane abko, ngābākre ñākare Abrahamkwe, akwa Ngōbökwē niebare kore ie.

⁶Mdakāre abko, Abraham bkūntre kākwe nūnandi ni menteni kwrere kā jenenante amne ni kā ye kānti kākwe mikadi klabore jae amne ngwianditre ja tare nike kwetre kā siento krābkā (400) jire, niebare kore Ngōbökwē Abrahamye.

7 Akwa Ngöbökwé niebare krörö arato Abrahamye: Juta kánti ma bküntre mikadi klaboré jae, juta ye abko tikwe mikadi ja ngie nuen ma bküntre dokwäre. Yebti ma bküntre nänta mentokwäre angwane, rükadita ti káikitekáta Canaán nete, niebare kwe Abrahamye.

8 Ngöbökwé kukwe úkaninte kore Abrahambe angwane, Ngöbökwé ja ñäräkrä mikamna ja kwatabtä ie. Ye mden kisete, Abraham ngobo Isaac därebare, bti kwäirare angwane, ñäräkrä mikani kwatabtä kwe. Erere arato, Isaakwe nuenbare ngobo Jacobobtä amne, Jacob kákwe nuenbare kwrere arato ngäbriänkä ni jätäbti nibu btä. Ni ni jätäbti nibu, yekri juta Israel keta jätäbti ketebu jatani.

9 Ni ruai mrö känekäne Jacobokri abko namanintre mokrere etba Josébe, kákwe José rürümoinbare angwane, bkänkä nikani ngwana Egipto. Akwa Ngöbö nämáne Josébe,

10 ye kákwe José die mikani ja tare nikabtä. Angwane José mikani töbtä kwe, ye köböire abko namani tuen kuin sribikäre jrei Faraónye, aisete jrei Faraón Egiptobo kákwe mikani gobrane Egipto amne ja gwirie mikani gare ie arato.

11 Abti mrö nika namani krübäte Egipto amne Canaán arato. Angwane bäsi mrö krütani jökrä ni ruai mrö känekäne kán.

12 Akwa mrö nämánena Egipto abko gani Jacobokwe angwane, Jacobokwe ngäbriänkä juani káne mrö kökö. Jacob ngäbriänkä ye abko ni ruai mrö känekäne.

13 Abti Jacobokwe ngäbriänkä juani mrö kököta bobukäre angwane, Josékwe ja mikaninta gare etbakantreye amne, José mräkä mdenkri nükani gare Faraónye arato.

14 Abti José rün Jacob amne mräkä mda mda jirikadre jökrä etbakantrekwe Egipto, niebare Josékwe ietre. Ye erere, José mräkä ni gre ketamá bti ni jätäbti nirike (75) nikani jökrä neme Egipto.

15 Jacob jänikani neme nüne kore Egipto, kánti nünabare kwe mräkäbe. Abti Jacob krütani ká ye kánti. Erere arato, Jacob ngäbriänkä krütani jökrä Egipto arato.

16 Abti jänikaninta jökrä doboi mikadre juta Siquem. Abrahamkwe ká kökani ja doboi mikakrä Hamor ngoboye juta Siquemte, ye kánti namani doboi mikani.

17 Abti Ngöbökwé ká Canaán biandre Abraham bküntreye, niebare Ngöbökwé Abrahamye, ye abko köböi jatani nüke ja ken angwane, nitre israelita namanina niren bäri kwati krübäte Egipto.

18 Angwane jrei mdara jire namani gobrane Egipto. Jrei ye abko, ie José gare ñakare.

19 Mden kisete jrei ye kákwe ni mräkä ngökani amne ni mräkä kirakira mikani ja tare nike kri kwe, kákwe ngäbäkre brare därebe därebe kitakamna ju bäre meyeye amne rünye kámikakäre.

20 Ká ye ngwane abko Moisés därebare. Moisés ye abko därebare bá nuäre krübäte, aisete meye amne rün kákwe ngibiabare tiebebee sö krämä jire gwi.

21 Yebti ngibiadre ño tiebe mda kwetre ñan namani nüke gare ietre angwane, kitaninkä jirekäre kwetre. Akwa jrei ngänkän, ie Moisés kwani amne diani kwe jakrä, bti ngibiabare ja ngobo jen kwrere kwe.

22 Nitre töbtä krikri Egiptobo, ben Moisékwe ja töitikani, aisete Moisés namani blite kuin amne namani jändrän jökrä nuene kuin arato.

23 Abti ká gre ketebu Moiséye angwane, tö namani rikaita basare mräkä israelitaye, erere nikani mda.

24 Akwa nikani nebe mräkä kánti angwane, ni Egiptobo nämáne iti ni israelita ngötikekä, btä Moisés okwä namani. Abtä Moisés nikani, kákwe ni Egiptobo ye kámikani ni israelita dokwäre.

25 Nebtä abko, Moisés köböire Ngöbökwé nitre israelita dianditari abko rükadi gare mräkäye, namani nütüre. Akwa nitre israelita kákwe ñan töbikabare kore.

26 Yebti jändrinane, Moisés nikani basareta mräkä israelitaye bobuta angwane, ni israelita jakwebe nämáne ja mete kwärikwäri, btä Moisés namani. Akwa niaratrekwe ja makädreta, abkokäre Moisékwe niebare krörö ietre: Mun ja mräkäre. ¿Se ñöbtä abko munta ja mete kore kwärikwäri yere? niebare kwe ietre.

27 Angwane ni iti mräkä ja metaka kákwe Moisés kitaninkä ja káne se kwrere, bti niebare kwe ie: ¿Nirekwe ma mikani nun dänkiene nun ngätäite amne, nirekwe ma mikani kritobore nunkrä amarebti ma kite ñäke kore tie yere?

28 Mdakäre abko, ¿makwe ni Egiptobo kámikaba iti jändrin, kwrere ma tö nibi ti kámikai arato mtare ya? niebare kwe Moiséye.

29 Ni ye kákwe ñäkäbare kore Moiséye, yebtä abko Moisékwe ni Egiptobo kámikani namani gare ni jökräye gani Moisékwe, aisete ngítiani amne nikani ká Madián kánti. Ká ye kánti Moisés namani gure amne, niara ngäbriänkä ngibiabare nibu merirekwe. Akwa niara abko kákwe nünabare ni menteni kwrere ká ye kánti.

³⁰ Abti Moisékwe nünabarera kä gre ketebu Madián. Angwane bati Moisés nämane kä kaibete ngitio Sinaí kánti angwane, batibe kri chi namani jutra ngitiekä abko te angele namani ja mike tuare Moiséye.

³¹ Kri chi namani jutra ngitiekä Moisés okwäbti, yebtä Moisés ñan tõi namani krütare, kákwe krötabare bäri kánime tuakäre bäri kuin. Angwane Ngöbö kukwei jarabare krörö ie:

³² Ti abko Ngöbö ma mräkä kánékánekwe –Abrahamkwe, Isaakwe amne Jacobokwe, niebare Ngöbökwé Moiséye. Abtä jürä namani krübäte Moisébtä amne, namani grükekä jökrä ngrabare, aisete ñan tö namani nikren kri chi yebtä.

³³ Angwane Ngöbökwé niebare Moiséye: Kä deme kánti mata nete, aisete sabato tikete ja ngotobtä, niebare kwe ie.

³⁴ Bti Ngöbökwé niebare mda Moiséye: Nitre israelita tä ja tare nike krübäte dikaro nitre Egiptobo kisete tuen tie amne, tätre ja müaire, ye abko kukweta ruen tie arato. Ye mdenbtä abko, ti ki nete niaratre tikatekäreta, aisete jakwe, ti bike ma juenta Egipto ma mräkä die mike, niebare Ngöbökwé ie.

³⁵ Ye kánenkri abko, nitre israelita kákwe Moisés kani ngäbti ñakare ja ngätäite, kákwe niebare ie: ¿Nirekwe ma mikani nun dänkiene amne kritobore nun ngätäite yere? niebare kwetre Moiséye. Akwa Ngöbö abko kákwe Moisés juaninta nitre israelita dänkiene amne niaratre kökatarikä ye abko angelekwe mikani gare Moiséye kri chite ñukwä jutrate.

³⁶ Moisés ye mden kákwe ni mräkä kirakira dianinkäta Egipto angwane, sribi kri ñan tuabare nuenbare kwe Egipto. Erere arato, sribi kri ñan tuabare namani bare ie Mren Tainte amne, kä gre ketebu sribi kri ñan tuabare nuenbare kwe kä kaibete ni mräkä kirakira okwäbti.

³⁷ Moisés ne arabe kákwe niebare krörö nitre israelitaye: Ni Ngöbö kukwei niekä ti kwrere abko Ngöbökwé diandikä iti mun ngätäite blitakäre jakrä munbe, niebare kwe.

³⁸ Erere arato, nitre israelita nämane jökrä kä kaibete Sinaí angwane, angele nämane Ngöbö kukwei niere Moiséye ni mräkä kirakira kräke, aisete nikwe nünandre ño abko Ngöbökwé niebare, ye mden abko niebare kwe Moiséye. Ye mden namani ni mräkä arato.

³⁹ Ngöbökwé jändrän jökrä ne nuenbare nitre mräkä kirakira kräke, akwa niaratre kákwe Moisés kukwei mikani täte ñakare jire amne Moisés kani ngäbti ñakare kwetre arato. Angwane tö namanintre näinta nebeta Egipto amne namani töbike bäri Egiptobtä.

⁴⁰ Ye mden kisete, Moisés nikani ngitio Sinaíbtí angwane abko ni mräkä kirakira kákwe niebare Aarónye: Moisés noko mden kákwe nun dianinkäta Egipto, jatani nun ngwenante, akwa dre nakaninkä btä abko gare ñakare nunye mtare, aisete makwe ngöbötre mda mda sribedre nun jie ngwianka, ie nun tö, niebare kwetre Aarónye.

⁴¹ Erere bkänä, jändrän ngwarbe sriebare krati kwetre ngöbö ngwarbere abko bä namani nbi ngäbäli brai bä kwrere, bti jändrän kámikani kwetre ngöbö ngwarbe ye mikakäre ütiäte jae. Erere arato, ngöbö ngwarbe sriebare ja kise jenbti kwetre, ye abko käi ngwiani nuäre kwetre jabtä jändrän se mikakäre ütiäte ngöbö kwrere.

⁴² Yebtä abko Ngöbökwé kä mikaninkä btätre amne tuanimetre muke kä káimbti mike ngöböre jae kwe. Ye mden abko nitre Ngöbö kukwei niekä Amós kákwe tikani krörö taräbtä: Ngöböta niere krörö:

Mun israelita kákwe dikakabare kä gre ketebu kä kaibete angwane, jändrän ngwarbe kámikani ñakare ti káikitakakäre metre, akwa kámikani kwetre ngöbö ngwarbe ye káikitakakäre.

Erere arato, munkwe jändrän mda mda biani ñakare tie ti mikakäre ütiäte metre, akwa biani kwetre ngöbö ngwarbe ye mikakäre ütiäte jae.

⁴³ Akwa ju mikani chi abko te ngöbö ngwarbe kä Moloc nämane, aibe mun nämane niken ngwena jabe kwäräkwarä.

Erere arato, jändrän dätebare muke bä kwrere munkwe ngöbö ngwarbe Renfán bä mikakrä, aibe mun nämane niken ngwena arato.

Ngöbö ngwarbe sriebare kore munkwe ja kise jenbti abko mun namani mike ütiäte jae. Ye mdenbtä abko tikwe mun juandi ja ngie nuen mobe kä kaibete kä Babilonia bäre mento, nieta Ngöbökwé.

Amós 5.25-27

Ye abko tä tikani kore Ngöbö Kukweibtä.

⁴⁴ Mdakäre abko, ju nuäre ngwiandre blitakrä Ngöböbe nämane ni mräkä kirakirakwe amne, Ngöbökwé ja kukwei biani Moiséye, ye abko nämane ükani kajate ju yete arato. Ju ye abko mikadre nuäi abko Ngöbökwé mikani tuadre Moiséye, erere mikani kwetre.

⁴⁵ Ju nuäre ngwiandre blitakrä Ngöböbe, ye abko Ngöbökwé biani jakrä ni mräkä kirakiraye. Niaratre nämane näin Josuébe kä Canaánté angwane, kä dianinkä nitre nünanka Canaán kán kwetre amne, Ngöbökwé niaratre rüe ye juantari káne. Ye ngwane nikani ju ye ngwena jabe arato. Ju ye abko nämane kwetre nebe jrei David näire.

⁴⁶ Ngöbö abko kwe jrei David namani tare kri, aisete Ngöbö mikani ütiäte Jacobokwe, ye kräke jrei David tö namani ju mikai kwati nünankrä,

⁴⁷ akwa jrei David ngobo Salomón abko kākwe ju mikani nünankrä Ngöböye.

⁴⁸ Akwa ju mikata ni kā nebtākwe abko te Ngöbö Kri Kā Käinbti ñan rabadre nüne jire chi. Ne aisete ni Ngöbö kukwei niekā Isaías köböire Ngöbökwie niebare krörö:

⁴⁹⁻⁵⁰ Ti abra tā gobrane kā käinbti amne kā temenbtā.

Tikwe jändrän jökrā dātebare au.

¡Se abko nirekwe ju mikadre kuin nünankrä tie!

¡Nirekwe kā ükadrete kuin jadükakrä tie! niebare kore Ngöbökwie,

Isaías 66.1-2

nieta Ngöbö Kukweibtä, niebare Estebankwe.

⁵¹ Yebti Estebankwe niebare krörö mda:

¡Mun kāre dokwā ribi jökrā! Mun olo tarā Ngöbö kukwei nuare amne mun moto tarā Ngöbö tarekāre, akwa ni ñakare israelita tā nüne Ngöbö rüere, kwrere jire munta nüne, aisete kāre munta rüre Ngöbö Üai Deme rüere. Mun mrākā kirakira nāmane dre dre nuene Ngöbö rüere, kwrere jire munta nuene arato mtare.

⁵² Mun mrākā kirakira kākwe ni Ngöbö kukwei niekā niekā ngwiani ja tare nike kri jökrā. Erere arato, Ni Era Metre rükadre abko ni Ngöbö kukwei niekā niekā kākwe niebare, yebtä abko mun mrākā kirakira kākwe kāmikani. Abti Jesu abko Ni Era Metre ye nūkanina bkānā akwa, munkwe kitani ngise, bti munkwe kāmikani arato.

⁵³ Ngöbökwie ja kukwei biani Moiséye munkrä angeletre köböire, akwa mun ñan tā mike tāte jire chi, niebare Estebankwe Sanedrinye.

Esteban kāmikani jābti

⁵⁴ Estebankwe ñākābare kore, yebtä abko bāri Sanedrin moto namani romon Estebankrä, kā namani tu ukwebee jabtā Esteban rüere mda.

⁵⁵ Akwa Esteban abko, btā Ngöbö Üai Deme namani tāte, kākwe nikrabare kā käinbti angwane, Ngöbö hä nuāre krübāte jatabare ie amne, Jesu abko mikanina bāri ütiäte Ngöbökwie amne mikanina bāri dite Ngöbökwie jändrän jökrā bti ta kā käinbti, btā Esteban okwā namani,

⁵⁶ kākwe niebare krörö:

Jukwe kā käinbti tā tikani nibi tuen tie amne, Ni Kā Nebtä Ngobo abko mikanina bāri ütiäte Ngöbökwie abko tā nūnaninkā krö Ngöbö kise ruenkri nibi tuen tie. Se mike ñārāre munkwe, Estebankwe niebare ietre.

⁵⁷ Angwane Sanedrin kākwe kise mikani jökrā ja olobti amne ngrarete kwārā, nikani betekā jökrā Esteban rüere,

⁵⁸ kākwe Esteban dianinkā juta Jerusalén bare mento, bti nitre blitaka ngwarbe Esteban rüere abko kākwe dān kwekwe mikaninte ngibiadre ni bati kādian nāmane Saulo yeye, bti nikanintre Esteban tāke jābti kāmikakāre.

⁵⁹ Esteban tākā namani jābti angwane, blitabare krörö kwe jakrä Ngöböbe:

Ti Dänkien Jesu, ti üai kaen ngābti ja kānti yete, niebare kwe.

⁶⁰ Ye btārābe namani ngukudokwābti temen, kākwe ñākābare ja dibti krörö:

Ti Dänkien, nitre kukwe nuenkā kāme tibtä, ne makwe ñan mika ja ngie nuen ti dokwāre abko tita ribere mae krāke, niebare kwe se kwrere.

Estebankwe ñākābare kore, ye btārābe krütani.

8

¹ Esteban tākā namani kore jābti kāmikakāre ye abko namani tuen dbe Sauloye.

Nitre gätäkā Jesu kābti namani ja tare nike bätäkā ngwarbe

Köbö yebtä abko, nitre gätäkā Jesu kābti nāmane Jerusalén abko rüe nikani mike ja tare nike bätäkā ngwarbe tödekabtā Jesubti, ye ngāniene ni kwati nikani kwārākwārā kā Judeate amne kā Samariate. Akwa nitre Jesu kukwei ngwianka aibe abko namani Jerusalén.

² Esteban kāmikani, yebti ni ruāre nāmane tödeke era metre Ngöböbti, ye kākwe Esteban doboi mikani amne müaibare krübāte kwetere.

³ Ye ngwane abko Saulo tö namani nitre gätäkā Jesu kābti juain ngwarbe jökrā, aisete nitre ye jiebtā Saulo namani nāin kīsere ju kwatirekwatire te. Namani ni merire, ni brare jāke tementa ju bāre, bti namani kite ngite jökrā kā teri tödekabtā Jesubti.

KUKWE KUIN JESUBTÄ KÄDRIEBARE JUDEATE AMNE SAMARIATE (8.4–9.43)

Felipe nikani kukwe kuin Jesubtä niere Samaria kānti

⁴ Nitre tödekaka Jesubti nāmane Jerusalén ngitiani, ye abko namani niken mdente erere, kāntikānti namanintre kukwe kuin Jesubtä ye kādriere mda.

⁵ Nitre ye ngätäite abko ni tödekaka iti Jesubti kädian nämane Felipe abko nikani nebe juta bäri ütiäte Samariate, kánti nikani blite ni mda mdabe Kristo Jesubtä.

⁶ Felipe namani blite angwane, ni jökrä namani olo ketete kwekbe, ñobtä ñan angwane namani blite Jesubtä amne namani sribi kri ñan tuabare nuene okwäbti Jesu die bä mikakäre abko krörö:

⁷ Ni kwati btä üai käme nämane abko namani niken mento btä. Üai käme ye namani niken mento nibtä angwane, namani ngrente kri krübäte, bti namani niken mento angwane, ni ye namani nebeta kuinta. Erere arato, ni ruäre ruen ñakare ngrabare amne ni ruäre abko ngüre ya, küde ya ngrötani abko namani nebeta kuinta jökrä Jesu diebti Felipeye.

⁸ Yebtä abko kä namani nuäre kri ni jökräbtä juta yete.

Kukwe nakaninkä Simón Mago yebtä

⁹ Akwa kä Samariate yete abko ni nämane iti. Ni ye abko kädian nämane Simón. Simón ye abko käre nämane sukiare amne nitre Samariabo ngökani krübäte kwe, ñobtä ñan angwane niara nämane ja mike ni ütiäte kri kwrere.

¹⁰ Ne aisete nitre ütiäte rikri amne ni bobre kwati namanintre olo ketete kwekbe jökrä niara kukwei nuakäre, kä namanintre niere:

Ngöbö di kri tä ni nebtä, namanintre niere.

¹¹ Kä raire Simón nämane sukiare kri amne, sribi yebtä ni kwati ñan töi namani krütare, aisete ni kwati namani nekete ben.

¹² Akwa Ngöbö amne Jesukristo nämane gobrane ño ni ngätäite, ye diri nikani Felipekwe angwane, nitre ye käkwe kukwe kuin Jesubtä kani ngäbti jökrä, bti Felipekwe ni merire, brare ngökani ñöte Jesu käbti.

¹³ Erere arato, sukia Simón ara jire käkwe kukwe kuin Jesubtä ye mikani era amne ngökani ñöte Jesu käbti arato. Yebti Simón nikani dikekä Felipe mukore kwäräkwärä angwane, sribi kri ñan tuabare Felipe nämane nuene Jesu diebti, yebtä abko Simón ñan töi namani krütare mda.

¹⁴ Ngöbö kukwei kuin Jesubtä mikani era nitre Samariabokwe, ye abko nitre Jesu kukwei ngwianka nämane Jerusalén käkwe gani angwane, Pedro juani Juanbe kwetre nebe Samaria kukwe tuenbti.

¹⁵ Erere bkänä, Pedro amne Juan nikani nebe Samaria mda angwane, nitre Samariabo btä Ngöbö Üai Deme rükadre, abkokäre blitabare kwetre Ngöböbe kräke,

¹⁶ ñobtä ñan angwane nitre Samariabo käkwe tödekani Jesubti, ye abko ngökani jirekäbe ñöte Jesu käbti akwa, Ngöbö Üai Deme ngämi nüke btätre.

¹⁷ Yebti Pedro amne Juan käkwe kise mikani btitre angwane, batibe Ngöbö Üai Deme nükani btätre.

¹⁸ Pedro amne Juan namani kise mike nibti angwane, Ngöbö Üai Deme namani nüke btätre Simón okwäbti, yebtä abko Simón tö namani ngwian biain Pedro amne Juanye di ye ütiäre,

¹⁹ käkwe niebare krörö ietre:

Tikwe kise mikadre nibtä angwane, Ngöbö Üai Deme rükadre btä arato, abkokäre ja di kri ye bien tie arato, niebare Simónkwe.

²⁰ Abtä Pedrokwe ñäkäbare krörö mda Simónye:

Ngwian makwe ye ben ngöi ma rika kä ja tare nikakrä kánti, ñobtä ñan angwane jändrän kuin bianta ngwarbe Ngöbökwé nie abko ma tö nibi kökai ngwianbti.

²¹ Ye aisete ma moto ñakare kuin Ngöbö ngwäreki, tuen tie. Yebtä abko, ma ñan rabadre sribi Ngöbökwé nuene jire chi nunbe.

²² Akwa ma töi käme, ye makwe kita temen amne makwe ja di käre Ngöböye angwane, mata ja mike ngite, ye abko nane Ngöbökwé diandrekäta mabtä.

²³ Tita niere kore mae, ñobtä ñan angwane ma moto romon krübäte amne ma töita kukwe kämekäme aibehtä nibi tuen mabtä tie. Abko kore se, niebare Pedrokwe Simónye.

²⁴ Abtä Simónkwe niebare mda ie:

Kukwe rakadrekä blo tibtä, munkwe nini tie, ye kwrere ñan rabadre bare tibtä, abkokäre blite tikrä ni Dänkienbe, niebare kwe Pedroye amne Juanye.

²⁵ Yebti Pedro amne Juan käkwe kukwe kuin ni Dänkien Jesubtä kädriehare ünän kä yete, bti nikaninta juta Jerusalén kukwäre angwane, nikani kukwe kuin Jesubtä ye kädriere kä kiakiate niken ji ngrabare Samariate abti nikani nebata Jerusalén.

Felipekwe blitabare sribikä ütiäte Etiopiabobe

²⁶ Abti angelekwe niebare Felipeye:

Felipe, ji niken Jerusalén btä kä kaibete tä neme juta Gaza, yebti nänta, niebare angelekwe ie.

²⁷ Erere bkänä, Felipe nikani mda angwane, ni Etiopiabo ütiäte kri mikani kaibe, monsoi neme ñakare jatabare Felipeye. Jreina Etiopiabo kädian nämane Candace abko kräke ni Etiopiabo ye nämane ngwian ngibiare abko ben Felipe namani ngätäi. Ni ye abko jananbare Ngöbö käikitekä Jerusalén,

²⁸ bti jataninta ja jiebtä ja käite angwane, Felipe namani ngätäi ben ji ngrabare. Ni ye abko kareta jäkä nämane mdäkwe abko te niara nämane tākänintbe amne, ni Ngöbö kukwei niekä kädian nämane Isaías kākwe tärä tikani, yehtë niara nämane ñäke angwane, namani ngätäi Felipebe.

²⁹ Angwane Ngöbö Üai Deme kākwe niebare Felipeye:

Kareta jäkäta mdäkwe ye ken krötö jötrö, niebare Ngöbö Üaikwe ie.

³⁰ Ye erere bkänä, Felipekwe krötöbare jötrö kareta ken angwane, tärä Isaías btä ni Etiopiabo nämane ñäke, ye kukwei jarabare Felipeye. Abtä Felipekwe niebare mda ie:

¿Tärä btä mata ñäke, ye tä nūke gare mae ya? niebare kwe ie.

³¹ Angwane ni ye kākwe niebare mda Felipeye:

¿Kukwe ne dirikä ñakare tie, se rükadre gare ño tie? mata nütüre, niebare kwe Felipeye.

Bti Felipe käräbare täketbe karete kwe jabe.

³² Tärä btä nämane ñäke abko nere:

Kordero jäta niken kämikadre, kwrere jire niara jänikani.

Erere arato, kordero jäta niken tikadrekä tä neme kwekbe, ye kwrere niara nämane kwekbe amne ñäkäbare ñakare ja dokwäre kwe.

³³ Niara mikani ngwarbe ni mda mdakwe akwa, ja mike ngite ñakare, akwa ngite niebare. Niara ngämi ngäbäre bkäne, känenkri kämikani kwe, aisetë bküntre ñakare jire. *Isaías 53.7-8* Kukwe ne mdenbtä nämane ñäke abko jarabare Felipeye.

³⁴ Angwane ni Etiopiabo ye kākwe niebare Felipeye:

Ni Ngöbö kukwei niekä ye abko nämane blite jabtä ya, o nämane blite ni mdara jire btä, ye abko makwe niedre tie abko ti tö nibi ribei mae, niebare kwe Felipeye.

³⁵ Angwane tärä btä ni Etiopiabo nämane ñäke, ye ara jire btä Felipekwe blitabare käne ben. Erere arato kukwe mda mdabti, Felipekwe kukwe kuin Jesubtä mikani gare ie.

³⁶ Yehti nämane näin ji ngrabare, te nikani mate ñöbtä mda. Angwane ni Etiopiabo ütiäte kri ye kākwe niebare Felipeye:

Nete ñö tärä, aisetë ¿makwe ti ngökadre ñöte nete abko rabadre ño? niebare kwe ie.

³⁷ [Angwane Felipekwe niebare mda ie:

Kukwe kuin Jesubtä, ye mata mike era bkänä ne ngwane, rabadre kuin, niebare ie Felipekwe.

Abtä niarakwe niebare Felipeye:

Jesukristo abko Ngöbö Odei ye abko era tikrä, niebare kwe.]*

³⁸ Ye btäräbe kareta mikamna nünenkä kwe, bti nikanintre nebe ñöbtä angwane, Felipekwe ngökani ñöte.

³⁹ Yehti jatanintre nüketa jate angwane, Ngöbö Üai nikaninbe Felipe ngwena ni Etiopiabo ye okwä bäre mento, aisetë Felipe tuaninta ñakare mda kwe. Akwa niara abko btä kä namani bäri nuäre amne, nikaninta ja gwiriete.

⁴⁰ Akwa Felipe abko, batibe namanime mobe juta Azotote. Ye kanti nikani kukwe kuin Jesubtä dirire juta kwatirekwatire te. Abti nikani nebe juta Cesareate.

9

Saulokwe tödekani Jesubti

(Hechos 22.6-16; 26.12-18)

¹ Kä ye ngwane abko, Saulo namani jadūke ñakare, gata käbä mike nitre ja töitkaka ni Dänkien Jesukwe rüere, aisetë Saulo nikani ni blitaka Ngöböbe ni mda mda diäre dänkien ye kanti,

² kākwe tärä käräbare ie ngwiandre sinagoga kwatirekwatire ye dänkientreye juta Damascote. Ni merire amne ni brare kwandre näin Ji Jesukwebti Sauloye juta Damasco ne ngwane, niara di rabadre ngwiankrä ngite Jerusalente, abkokäre tärä käräbare kwe.

³ Ye erere bkänä, tärä bianina ie, abti nikani juta Damasco. Nikani, nikani, nikani mate ja ken juta Damasco. Te batibe ñotra trä dirare kä käinbti jatani. Ye abko trä niabare dirare jökrä Saulo bäre temen.

⁴ Angwane Saulo nikaninbe ngitiekä temen amne, btäräbe ni kukwei jarabare krörö ie:

¿Saulo, ñöbtä mata näin kisere kore ti jiebtä ti mikäkäre ja tare nike yere? niebare kwe.

⁵ Angwane Saulo kākwe niebare mda:

* **8:37** Kukweta tikani corcheta ngätäite ñan tä tikani manuscrito bäri kuinkuinbtä.

¿Ma abko nire ti Dänkien? niebare kwe.

Ye btäräbe ni ye käkwe niebare mda Sauloye:

Ti abko Jesu ara, aisete nitre tödekaka tibti jiebti mata näin kisere mikakäre ja tare nike, ye ñan niaratre jiebti mata näin, akwa ti ne ara jire jiebti mata näin. [¿Ye ñobtä mata kukwe nuene käme ja rüere au! niebare mda kwe ie.

⁶ Angwane Saulo abko namani grükekä jökrä ngrabare amne kä jürä namani krübäte btä, käkwe niebare:

¿Tikwe dre nuendre, ie ma tö nibi ti Dänkien? niebare kwe.]*

Angwane ni Dänkien käkwe niebare mda ie:

Näin krö, bti ma rika nebe juta Damascote. Ye kánti makwe dre nuendre, erere niedi mae, niebare kwe Sauloye.

⁷ Angwane nitre nämane näin Saulobe, ye ie ni kukwei jarabare akwa, ni jatabare ñakare ietre. Yebtä abko kä jürä namani krübäte btätre amne namanintre nünaninkä kwekbe jökrä.

⁸ Yebti Saulo nämane temen, nukani dikekäta krö, käkwe okwä ngianinte ngwane, kä namani iko okwäte amne kä namani tuen ñakare ie, aisete nitre nänkä ben ye käkwe kani küdebtu, nikanintre ngwena nebe juta Damascote.

⁹ Ye kánti Saulo namani köbömä jire angwane, kä namani tuen ñakare ie. Angwane köbö ye näire ja bäinbare kwe ñöye amne mröye arato.

¹⁰ Juta Damasco yete abko, ni tödekaka Jesubti nämane nüne iti. Ni ye abko kädian nämane Ananías. Ananías ye abko, ie ni Dänkienkwe ja mikani tuare köböre kwrere mda, käkwe niebare krörö ie:

¡Ananías! niebare kwe ie.

Jötrö Ananíakwe niebare:

¿Ye dre, ti Dänkien? niebare kwe mda.

¹¹ Angwane ni Dänkien käkwe niebare ie:

Ji kädianta Ji Metre, yebti nän amne, ma rika nebe ni kädianta Judas ye gwiriete. Ma raba ju yete angwane, ni juta Tarsobo kädianta Saulo abko tä yete, ye ngwiantari makwe. Niara tä blite Ngöböbe amne

¹² ni iti kä Ananías niki nebe niara kánti, käkwe kise miri bti, kä mikakäre tuenta ie abko nibi tuen köböre kwrere ie, aisete nän kánti, niebare ni Dänkienkwe Ananíaye.

¹³ Ni Dänkien kukwei jarabare kore Ananíaye angwane, niebare krörö kwe:

Ti Dänkien, nitre deme makwe nünanka Jerusalén abko ni ye tä mike ja tare nike krübäte, ye abko ni kwati käta niere tie.

¹⁴ Mdakäre abko, nitre tödekaka mabti tä nüne nete abko jirikadre ngite kwe Jerusalén, abkokäre tärä käräbare kwe nitre blitaka Ngöböbe ni mda mda diäre dänkienye, ye erere tärä biandi ie mikakäre ütiäte. Yebti jatani nuke nete. ¿Se abko ti rikadre ño kánti se? niebare Ananíakwe.

¹⁵ Akwa ni Dänkien käkwe niebareta mda Ananíaye:

Nitre kä mdabti ñakare israelitare abko ie ni nekke ti mikadi gare, abkokäre tikwe dianinkä. Erere arato, nitre ñakare israelitare ngätäite jrei tärä, ye ie ti mikadre gare kwe arato, abkokäre tikwe dianinkä. Mdakäre abko, niara arabe rikadre ti miketa gare nitre israelitaye arato, abkokäre tikwe dianinkä jenena jakrä, aisete nän kánti, tita niere mae Ananías.

¹⁶ Ni ne käkwe ja tare nikadi kri tikrä, ye abko tikwe mikadi gare ie arato, niebare ni Dänkienkwe Ananíaye.

¹⁷ Ye erere bkänä, Ananías nikani Saulo kánti. Namanina yete angwane, nikani gwä, käkwe kise mikani Saulobti, bti niebare krörö kwe ie:

Ti mräkä Saulo, Jesu käkwe ja mikani tuare mae ji ngrabare, ye mden käkwe ti juni nete. Kä rabadre tuenta mae amne Ngöbö Üai Deme rabadre täte mabtä, abkokäre ni Dänkien Jesu ara käkwe ti juni ma kánti nete, niebare Ananíakwe Sauloye.

¹⁸ Ye btäräbe jändrän gwa drukwata kwrere nämane Saulo okwäte abko betaninkä mento, namani ruen ie angwane, kä namani tuenta kuin ie. Yebti nikani amne Ananías käkwe ngökani ñöte.

¹⁹ Yebti Saulokwe mröbare mda amne namaninta dite ngrabare.

Saulo käkwe blitabare Jesubtä Damascote

Nebti Saulokwe nünabare bä jötrö mda juta Damascote nitre tödekaka Jesubtibe.

²⁰ Ye btäräbe sinagoga kántikánti Saulo nikani niere krörö:

Jesu abra Ngöbö Odei era metre, nikani niere.

* 9:6 Kukweta tikani corcheta ngätäite ñan tä tikani manuscrito bäri kuinkuinbtä.

²¹ Yebtä abko nitre Saulo kukwei nuaka nuaka ñan tõi namani krütare btä, kä namani niere:

Nitre tödekaka Jesubti, jiebtì ni noko nämáne näin kisere Jerusalén yete. Erere arato, niara jatani nete nitre tödekaka Jesubti kaen ngite ngwiankäre nebebe Jerusalén biandre nitre blitaka Ngöböbe ni mda mda diäre ye dänkientreye kitakäre ngite. ¿Se ño abko tä blite kore mtare se? ni jökrä namani niere kore.

²² Akwa Saulo abko namani blite bäri ja dibti amne, Jesu abko Ni Dianinkä Ngöbökwé bkänä abko Saulo namani bä mike metre jökrä. Yebtä abko, nitre israelita nämáne nüne Damasco käkwe dre niedre Jesubtä Sauloye abko ñan namani nuke gare ietre.

²³ Abti kä nikanina raire ta angwane, batibe nitre israelita käkwe ja tõi diani kwärikwäri Saulo kämikakäre.

²⁴ Akwa Saulo rätäkä namani nitre israelitakwe, ye abko Saulokwe gani, akwa juta kwewebtä, ye kanti nitre israelita namani niara kraire jite dibire rare kämikakäre.

²⁵ Akwa nitre ja töitikaka Saulobe käkwe Saulo mikani kutia krite, bti gibianinkä kibti ta timon kwetre deo, bti Saulo ngitianinta.

Saulo mikani gare nitre Jesu kukwei ngwiankaye Jerusalén

²⁶ Abti Saulo nikani nebata Jerusalén angwane, nitre tödekaka Jesubti, ben Saulo tõi namani ja getai. Akwa ni jökrä btä niara jürä namani, ñobtä ñan angwane Saulokwe Jesu kani ngäbti arato, ye abko ñan namani nebe era kräke, aisetè kä jürä namani btäre.

²⁷ Akwa ni tödekaka Jesubti kädian nämáne Bernabé abko nikani Saulo ngwena, bti mikani gare kwe nitre Jesu kukwei ngwiankaye. Angwane Saulo nikani Damasco angwane, Dänkien Jesukwe ja mikani tuadre ji ngrabare ie. Erere arato ni Dänkien käkwe blitabare ben amne, kä jürä namani ñakare Saulobtä blitakäre Jesubtä juta Damascote, niebare Bernabékwé nitre Jesu kukwei ngwiankaye.

²⁸ Yebti nitre Jesu kukwei ngwianka käkwe Saulo kani ngäbti amne, nitre ye ben Saulo namani nüne Jerusalén. Angwane namanintre niken gwaire kwäräkwarä amne kä jürä namani ñakare btä blitare Jesubtä.

²⁹ Nitre israelita kukwe griegore, ben Saulo namani blite Jesubtä amne namani ja kwete bentre, akwa niaratre ye abko tõi namani Saulo kämikai arato.

³⁰ Ye abko Saulo mräkätre tödekaka Jesubti käkwe gani angwane, nikanintre Saulo ngwena ngitie nebe juta Cesareate. Ye kanti abko, Saulo juaninta kwetre nebata ja käite juta Tarsote.

³¹ Yebti abko, nitre gätäkä Jesu käfti nämáne nüne kä Judeate, Galileate amne Samariate ye abko namanintre nüne jáme jökrä amne Ngöbökwé die mikani nüne dite kukwe kuin Jesukwe nebtä. Erere arato, namanintre Dänkien Jesu mike ütiäte jae amne Ngöbö Üai Deme namani die mike angwane, ni kwati jatani mda tödeke Jesubti siba.

Pedro abko käkwe Eneas mikaninta quinta Jesu diebti

³² Pedro abko nämáne näin basare kwäräkwarä mräkä Jesu käftiye angwane, nikani arato juta Lidate mda ja tuakäre nitre deme Ngöbökwé nämáne nüne juta yete yebe.

³³ Pedro namani juta Lidate angwane, ni iti kädian nämáne Eneas, kanti Pedro nikani. Ni ye abko, kä kwä kwära namani ruen ñakare ngrabare abko kisete nämáne bren. Abtä nämáne jänbtibe, btä Pedro namani.

³⁴ Angwane Pedrokwe niebare Eneaye:

Eneas, Jesukristo tä ma miketa quinta, aisetè näin krö. Jän makwe ye ükete au jakrä, niebare kwe ie.

Ye btäräbe Eneas nukaninbe dikekä krö.

³⁵ Eneas namaninta quinta kore, ye abko ni kwati nünanka juta Lidate amne nitre nünanka kä Sarónte käkwe tuani angwane, kukwe kuin ni Dänkien Jesubtä kani ngäbti kwetre arato.

Jesu diebti Pedrokwe Dorcas mikaninta nire

³⁶ Kä ye ngwane abko, meri tödekaka Jesubti nämáne nüne iti juta Jopete. Meri ye abko kädian nämáne Tabita. (Kukwe Tabita ne abko Dorcas nieta griegore.) Meri ne abko käre nämáne jändrän kuin nuene ni mda mdakrä amne käre nämáne ni bobre bobre die mike arato.

³⁷ Akwa kä ye ngwane Dorcas näkäni bren jume amne krütani. Dorcas krütani angwane, jukaninte, bti ngwäkä jänikani nebe ju käin ninkri yete, kanti mikani gwi kwetre uliekäre.

³⁸ Juta Jope ye abko nämáne känime juta Lida ken. Pedro nämáne juta Lida ye kanti gani nitre tödekaka Jesubtikwe juta Jopete angwane, ni juani nibu kwetre Pedro kärere. Ye erere ni nibu ye nikani, namani Pedro kanti, käkwe niebare ie:

Brän jötrö nunbe juta Jopete abko nunta ribere mae, niebare kwetre Pedroye.

³⁹ Ye erere bkänä, Pedro nikani bentre. Namanintre juta Jopete angwane, Dorcas ngwäkä nämáne mikani gwi, ye kanti nikani Pedro ngwena amne, meri kän brare krütanikrütani

nāmane yete abko müare kwärä ja ūkaninkrö jökrä Pedro bäre kwetre, bti Dorcas nāmane nūne angwane, Dorcakwe dān ño ño dikani ni bobre bobre kräke, erere namani mike tuare jökrä Pedroye.

⁴⁰ Akwa Pedro abko kākwe juani jökrä ju bäre, bti namani ngukudokwābti temen blite Ngöböbe. Pedrokwe blitabare ünän Ngöböbe, bti Dorcas ngwākä mikani ñäräre kwe, kākwe niebare krörö ie:

¡Tabita, nāin krö! niebare kwe ie.

Btäräbe Tabitakwe okwä ngianinte amne okwä namani Pedrobtä se kwrere, bti namani tākānintbe.

⁴¹ Angwane Pedrokwe kani küdebt, ganinkrö krö kwe. Tabita namani nūnaninkä krö angwane, nitre tödekaka Jesubti nāmane yete amne meri kän brare krütanikrütani nāmane yete ju bäre, ye Pedrokwe kārābareta gwä, bti meri nūkaninta nire, ye mikani tuadre kwe ietre.

⁴² Meri mikaninta nire Pedrokwe ye abko nitre kwati nūnanka juta Jopete kākwe gani angwane, ni kwati kākwe tödekani Jesubti arato.

⁴³ Yebti ni sribikā iti nbi kwatabtä kädian nāmane Simón nāmane nūne arato juta Jopete, ye kānti Pedro namani nūne bā raire mda.

KUKWE KUIN JESUBTÄ NIEBARE NITRE ÑAKARE ISRAELITARE NGÄTÄITE (10.1-28.31)

10

Corneliokwe Pedro kārābare

¹ Kä ye ngwane abko, juta Cesareate ni nāmane iti kädian nāmane Cornelio. Ni ye abko rükä romano amne, nāmane mikani nitre rükä kädian nāmane Batallon Italiano ye dänkien.

² Cornelio amne mrākä kwekwe nāmane Ngöbö tarere amne nāmane Ngöbö mike ütiäte arato. Erere arato, Cornelio käre nāmane ngwian bien kabre nitre israelita bobreye die mikakrä amne käre nāmane blite Ngöböbe arato.

³ Bati ñänä okwä krāmā näre dere angwane, batibe kukwe namani tuen köböre kwrere krörö ie: Angele Ngöbökwē jatani, nūkani gwi niara kānti, namani tuen metre kwrere ie, kā namani niere ie:

¡Cornelio! niebare ie angelekwe.

⁴ Angwane Cornelio okwä namani kwekbe angelebtä amne kā jürä namani krübäte btä, kākwe niebare mda:

¿Ma tö nibi dreye, ti dänkien? niebare kwe.

Angwane angelekwe niebare ie:

Mata blite Ngöböbe amne mata jändrän bien nitre bobre bobre die mikakrä, ye abko gare kuin Ngöböye. Abtä Ngöbö tö ma die mikai mtare.

⁵ Ne aisetē makwe ni mda mda juandre jötrö nebe juta Jopete. Ni kädianta Simón, arabe ie Pedro nieta, ye kärere nūke ja kānti nete.

⁶ Niara tä nūnentbe Simón mdara jire kānti mren köräbti. Simón ye abko sribikā nbi kwatabtä. Abko kore se, niebare angelekwe Corneliöye.

⁷ Yebti angele blitaka Corneliöbe, ye nikaninta angwane, Corneliokwe sribikā kwekwe kārābare nibu amne ni rükä kā namani Ngöbö tarere arato amne namani Cornelio die mike sribibtä kārābare iti kwe.

⁸ Bti angelekwe dre niebare ie, ye erere niebare jökrä kwe ietre, bti juani kwe juta Jopete Pedro tuen.

Ngöbökwē kukwe mikani tuen köböre kwrere Pedroye

⁹ Yebti jändrinane ñänä jatanina nūke ruäre angwane, nitre juani Corneliokwe ye abko namani mate ja ken juta Jopete angwane, Pedro abko nikani jubti kām blitakäre Ngöböbe.

¹⁰ Angwane mrö namani krübäte Pedroye, tö namanina mröi akwa, mrö sribe nāmane krire kräke angwane, Ngöbökwē jändrän mikani tuare köböre kwrere krörö ie:

¹¹ Kä kāinbti ngitiani, namani tuen ie amne, yete ta dän kwata kri nāmane mākāninte körä kräbkä btä kwärükwäri abko gibianinkä timon, nūkani mate dobobtä temen okwābti.

¹² Dän kwata kri yete abko jändrän ngwarbe ngoto kräbkä kräbkä bätäkā ngwarbe nāmane. Erere arato, jändrän yorekā tementa tementa bätäkā ngwarbe nāmane amne nukwä bätäkā ngwarbe nāmane arato abko namani tuen Pedroye.

¹³ Ye btäräbe Ngöbö kukwei jarabare krörö ie:

Pedro, jändrän nibi tuen mae yete, ye nän kāmike kwetadre jae, niebare kwe ie.

¹⁴ Pedro kākwe niebare mda:

Ti Dänkien, jändrän mden mden ñan dbe kwetadre makwe niebare, ye erere tita kwete ñakare, akwa jändrän ñan dbe kwetadre aibe tä dän kwata kri te, aise te tikwe ñan kwetadre, niebare Pedrokwe.

¹⁵Ye btäräbe, Ngöbö kukwei jarabareta Pedroye, käkwe niebare ie:

Jändrän mikani dbe Ngöbökwewe, ye dbe ñakare makwe ñan tö ngwian niere jire chi, niebare kwe ie.

¹⁶Jändrän tuani Pedrokwe, ye abko kwetadre kwe niebare bämä jire ie, bti dän kwata kri ye jänikaninta kä käinbti niara okwäbti tuani kore kwe köböre kwrere.

¹⁷Yebtä abko, Pedro namani töbikwe kri mda, ñöbtä ñan angwane drekäre tuani köböre kwrere kwe abko ñan namani nuke gare ie, aise te namani töbikwe kri. Ye btäräbe ni juani Corneliokwe abko nukani jukwebtä käkwe Simón ngwianintari.

¹⁸Yebti namanina jukwebtä Simón kanti angwane, ñäkäbare jume ja dibti krörö kwetre:

¿Ni kädianta Simón akwa, Pedro nieta ie arato, ye tä nüne nete ya? niebare kwete.

¹⁹Angwane Pedro abko nämane töbikwe kukwe tuani kwe yebtä jubti käin angwane, Ngöbö Üai Deme käkwe niebare ie:

Pedro, ni nü nimä, käta näin ma känentari abko tä nokote.

²⁰Ne aise te nänta jötrö timon amne ma rika bentre. Akwa makwe ñan töbika dikaro rikakäre bentre, ñöbtä ñan angwane tikwe niaratre juni ma tuen, niebare Ngöbö Üaikwe ie.

²¹Ye erere bkänä, Pedro nämane jubti käin, jataninta timon, käkwe niebare nitre weye:

Ti ne mden känänta munkwe ye. ¿Drekäre munta näin ti känene? niebare Pedrokwe ietre.

²²Angwane nitre ye käkwe niebare mda ie:

Nitre rükä dänkien kädianta Cornelio käkwe nun juanba ma tuen nete. Niara abko tä nüne metre Ngöbö ngwäre kri amne tä Ngöbö mike ütiäte jae arato amne, nitre israelita kwati käta mike ütiäte jae amne tätre tarere arato. Cornelio ye mden kanti angele deme Ngöbökwewe nukani, käkwe ma kärämna amne ma rikadre niara gwiriete amne, makwe dre niedre abko niarakwe kukwe nuadre abkokäre, niebare kwete Pedroye.

²³Angwane Pedrokwe käräbare gwä. Ye kanti kibiabare kwete.

Pedro nikani Cornelio kanti

Yebti jändrinane, Pedro nikani bentre angwane, ja mräkäre tödekaka Jesubti nünanka juta Jopete nikani ruäre Pedro mukore siba.

²⁴Yebti jändrinane angwane, Pedro nikani mate juta Cesareate. Cornelio abko nämane ngibiare amne, Corneliokwe mräkä kwekwe amne kukwe muko kwekwe ükaninkrö kwati, ben nämane Pedro ngibiare ngäbti angwane, Pedro nikani nebe.

²⁵Pedro nikani mate gwäkäre se kwrere angwane, Corneliokwe kani ngäbti, käkwe ja mikani ngukudokwäbti temen Pedro mikakäre ütiäte jae.

²⁶Akwa Pedro käkwe niebare Cornelioye:

Ti abko ja kwrere mabe, aise te makwe ñan ti mika ütiäte Ngöbö kwrere jae. Nänta krö, niebare kwe ie.

²⁷Yebti blitare kwärä, nikanintre gwä angwane, ni nämane ja ükaninkrö kwati gwi Pedro ngibiare ngäbti, btä Pedro namani.

²⁸Angwane Pedrokwe niebare krörö ietre:

Ni menteni, ñakare israelita mun kwrere, ben nun israelita ti ne kwrere käkwe ñan ja getadre jire chi amne ñan rikadre jire juete abko tä ükaninte kore nunkwe, ye gare kuin munye ruen tie. Akwa ni menteni ñakare israelitare abko ñakare dbe Ngöbökrä abko tikwe ñan niedre jire abko Ngöbökwewe mikaba gare tie.

²⁹Ye mden kisetete, ti käräbare nuke nete nieba tie angwane, ti jataba jirekäre. Tikwe ñäkäba ñakare mda, bti ti jataba, aise te ¿drekäre munkwe ti käräbare nuke nete abko ti tö nibi gai mda? niebare Pedrokwe ietre.

³⁰Abtä Cornelio käkwe niebare mda ie:

Mäkaira ñänä okwä ne näre angwane, ti nämä blite Ngöböbe ñänä okwä krämä näre dere ja juete nete angwane, batibe ni rükaba iti ti kanti. Ni ye abko btä dän trä ngitiekä rükaba ti kanti,

³¹käkwe nieba krörö tie: Cornelio, mata blite Ngöböbe, ye abko jarabare Ngöböye amne, mata ni bobre bobre die mike ño, ye abko garera ie arato,

³²aise te makwe ni mda juandre nebe juta Jopete. Ni kädianta Simón, arabe ie Pedro nieta, ye kärere nuke ja kanti nete. Niara tä nünenbe Simón mdara jire kanti mren köräbti. Simón ye abko sribikä nbi kwatabtä, nieba kwe tie.

³³Ye kwrere bkänä, jötrö tikwe nitre nimä se juanba ma kärere amne, ma jatani ja moto kuinbti, ye abko käi nibi nuäre tibtä. Mtare nita jökrä ketetibe Ngöbö ngwäre kri nete amne, makwe dre niedre nunye niebare ni Dänkienkwe mae, ye erere nunta biare ma kukwei nuakäre, niebare Corneliokwe Pedroye.

³⁴⁻³⁵ Angwane Pedro nikani blite, kākwe niebare mda:

Ni jōkrā ūtiāte ja kwrere Ngōbōkrā, aisete tā ni kitete űakare ni mda mda ngātāite, akwa ni nūnanka juta mdente mdente kāta Ngōbō mike ūtiāte jae amne tā nūne metre abko Ngōbōta juto biare kaen ngābti jōkrā, ye abko nena gare tie mtare.

³⁶ Kukwe ye abko Ngōbōkwe mikani gare nun israelitaye abko krōrō: Jesukristo ni jōkrā Dānkien ye kōbōire ni jōkrā rabadre ja māketa amne nūnenta jāme jōkrā.

³⁷ Ye rabadre gare, abkokāre Juan Bautista jatani ja ngōkamna űōte nie angwane, dre nakaninkā kā Galileate niken nebe kā Judeate jōkrā, ye gare kuin munye abko krōrō:

³⁸ Jesu Nazarebo, ie Ngōbōkwe ja di biani kri amne Ngōbōkwe ja Ūai Deme mikani tāte btā abko diebti nāmane nāin jāndrān kuin nuene amne ni bren bren nāmane ja tare nike diablu ngoto tāni abko mikaninta kuinta kwe. Ngōbō nāmane Jesube abko diebti jāndrān ye namani bare ie, ye abko gare kuin munye arato.

³⁹ Jesukwe sribi űo űo nuenbare nun israelita kāite amne juta Jerusalēnte, ye abko nun Jesu kukwei ngwianka kākwe tuani ja okwā jenbti. Jesu mūre ketani krusobtā nitre israelitakwe,

⁴⁰ akwa kōbōmākāre angwane, Ngōbōkwe mikaninta nire, bti Ngōbōkwe mikani tuadre nun ngātāite.

⁴¹ Akwa Ngōbōkwe űan mikani tuadre nitre israelita jōkrāye, akwa nun dianinkāra kena Ngōbōkwe, nunye Ngōbōkwe Jesu mikani tuadre. Jesu nūkaninta nire, abti nun ne aibe kākwe mrōba amne tomna űaba ketetibe ben amne, nun aibe Ngōbōkwe tuanimetre tuen.

⁴² Ngōbōkwe niara mikani Kritobore ni nire krāke amne ni krūtani krāke, ye abko nun juanba niere kwe ni jōkrāye.

⁴³ Jesu ne mdenbtā abko nitre Ngōbō kukwei niekā kirakira kākwe blitabarera angwane, niebare krōrō kwetre: Nire nire ngite kukwe kāme nuenbtā abko kākwe tōdekadre Jesubti angwane, Ngōbōkwe niara ngite diandikā btā Jesu kōbōire, niebare kwetre, Pedro namani niere.

Ngōbō Ūai Deme nūkani kena nitre űakare israelitarebtā

⁴⁴ Pedro nāmane blite kore angwane, batibe nitre Pedro kukwe nuaka nuaka, yebtā Ngōbō Ūai Deme nūkani se kwrere.

⁴⁵ Nitre űakare israelitare, ie Ngōbōkwe ja Ūai Deme biani arato, yebtā abko nitre israelita tōdekaka Jesubti nūkani siba Pedro mukore, ye űan tōi namani krūtare btātre,

⁴⁶ űobtā űan angwane ni jōkrā namani blite kukwe jenenanbti btā ja tōitikani űakare kwetre amne namanintre Ngōbō kākitekā jōkrā okwābti. Yebtā abko, Ngōbō Ūai Deme nūkani btātre gani kwetre.

⁴⁷ Angwane Pedrokwe niebare mda:

Nun israelita, ie Ngōbōkwe ja Ūai Deme biani, ye kwrere Ngōbōkwe bini arato nitre neye, aisete nikwe niaratre ngōkadre űōte Jesu kābti ruen tie, niebare Pedrokwe.

⁴⁸ Bti Cornelio amne mrākā kwekwe amne kukwe muko kwekwe btā Ngōbō Ūai Deme nūkani, ye Pedrokwe ngōkamna jōkrā űōte Jesukristo kābti ni mda mdaye. Erere ngōkanintre űōte kwetre, bti Pedro rabadre nūne kōbōbu, kōbōmā mda bentre abko ribebare kwetre Pedroye.

11

Dre nakaninkā Cornelio kānti abko Pedrokwe niebare

¹ Pedro ngāmi nūketa Jerusalēn, ye kānenkri nitre űakare israelita kākwe Ngōbō kukwei kuin Jesubtā kani ngābti arato, ye abko gani nitre Jesu kukwei ngwianka mda mdakwe amne nitre tōdekaka Jesubti nāmane nūne kā Judeate ye kākwe gani arato.

² Abtā Pedro nikani nebeta Jerusalēn angwane, nitre israelita ruāre tōdekaka Jesubti nūnanka kā Judeate namani űāke Pedro rūere,

³ kākwe niebare krōrō Pedroye:

Nitre űakare israelitare abko gwirierte ni israelita űan janandre basare jire chi nita niere. jSe űobtā abko ma jananbare mrōre ketetibe nitre se ben gwaire! niebare kwetre ie.

⁴ Abtā kukwe nakaninkā űo ja tāritāri, ye erere Pedro nikani niere jōkrā abko krōrō:

⁵ Ti nāma juta Jopete blite Ngōbōbe angwane, jāndrān dān kwata kri mākāninte kwārikwāri kōrā ketabkā btā, kwrere jire nāmane kā kāinbti, rababa kite nūke ti nāma ye kānti abko tikwe tuaba kōbōre kwrere.

⁶ Akwa jāndrān yete abko dre nāmane ti tō rababa tuai, kākwe mikaba űārāre kuin angwane, jāndrān űakare dbe kwetadre nikwe aibe nāma te abko krōrō: Jāndrān ngwarbe ngoto krābkā krābkā bātākā ngwarbe nāma te. Erere arato, jāndrān ngwarbe kānsenta

bätäkä ngwarbe nämä te. Mdakäre abko, jändrän yorekä tementa amne nukwä bätäkä ngwarbe nämä te arato, btä ti okwä rababa.

⁷ Ye btäräbe Ngöbö kukwei jaraba krörö tie: Pedro, jändrän nibi tuen mae yete, ye nän kämike kwetadre jae, nieba kwe tie.

⁸ Abtä tikwe nieba krörö ie: Ti Dänkien, jändrän mden mden ñan dbe kwetadre makwe niebare kira, ye erere tikwe ñan kwetabare jire chi, aisete tikwe ñan kwetadre, tikwe nieba ie.

⁹ Angwane Ngöbö kä käinbti käkwe niebata krörö mda tie: Jändrän mikani dbe Ngöbökwé, ye dbe ñakare makwe ñan tö ngwian niere jire chi, nieba kwe tie.

¹⁰ Ngöbökwé ñäkäba bämä jire kore tie. Yebti dän kwata kri ye jirikabata kä käinbti ti okwäbti.

¹¹ Ye btäräbe, ni Cesareabo juani nimä ti tuen, ye rababara mate jukwebtä ti kanti.

¹² Angwane tikwe ñan kä jürä ngwiandre niken bentre, Ngöbö Üai Deme käkwe nieba tie. Ye erere ti rikaba bentre amne, ti mräkä ni ti tä tibe nete noko rikaba siba tibe. Nun rikaba nebe juta Cesareate angwane, ni nämä iti yete kanti nun rikaba jökrä nebe gwi.

¹³ Angwane ni ye käkwe angele tuani ño köböre kwrere abko rikaba niere nunye, käkwe nieba krörö: Angele rükaba nünankä nete, käkwe nieba krörö tie: Ni kädianta Simón akwa, Pedro nieta ie arato abko tä juta Jopete, ye ni mda juen käre jötrö nuke ja kanti nete,

¹⁴ ñöbtä ñan angwane Ngöbökwé ma dianditari ño ma mräkäbe gwaire abko niarakwe niedi mae, abkokäre makwe kärä, niebare angelekwe ie, nieba kwe nunye.

¹⁵ Angwane kukwe kuin Jesukristöbtä ye ti rikaba niere kriré ietre angwane, btäräbe Ngöbö Üai Deme rükaba ño kena nibtä, ye kwrere rükaba btätre arato ti okwäbti se kwrere.

¹⁶ Ye ngwane ni Dänkien Jesu käkwe blitaba nibe abko rükaba töreta tie krörö: Juankwe ni ngökani ño aibe te akwa, mun abko ie Ngöbökwé ja Üai Deme biandi nünakäre munbtä, niebare kore ni Dänkienkwe nie.

¹⁷ Ye mdenbtä abko, ni israelita käkwe tödekani ni Dänkien Jesukristöbti abko ie Ngöbökwé ja Üai Deme biani, ye kwrere biani kwe nitre ñakare israelitareye arato, ¿se tikwe ja mikadre ño Ngöbö rüere? ti rababa nütüre, niebare Pedrokwe.

¹⁸ Yebtä abko, ja mräkätre Jerusalénbo namani ñäke Pedro rüere ye käkwe Pedro kukwei nuani ünän angwane, namanintre kwekbe kada ketani jökrä amne, nikanintre Ngöbö käikitekä mda, käkwe niebare:

¡Nitre ñakare israelitare rabadre nüne kärekwé Ngöböbe, abkokäre Ngöbö tä kä bien ietre kukwe käme kitakäre temen amne tödekakäre Jesubti ñan ñan! namanintre niere.

Nitre ñakare israelitare kwati käkwe tödekani Jesubti juta Antioquíate

¹⁹ Esteban kämikani, yehti nitre israelita tödekaka Jesubti nünanka Jerusalén abko ni israelita mda mda namani mike ja tare nike krübäte tödekabtä Jesubti. Abtä ngitiani jökrä kwäräkwärä. Ruäre nikani Fenicia, ruäre abko nikani Chipre amne ruäre nikani juta Antioquía. Nikanintre ye kantikanti nikani kukwe kuin Jesubtä ye niere mräkätre israelitaye akwa, ni ñakare israelitare abko ie niebare ñakare kwetwe.

²⁰ Akwa nitre nünanka Chipre amne juta Cirenete tödekaka Jesubti arato abko nikani ruäre juta Antioquíate, ye abko käkwe kukwe kuin ni Dänkien Jesubtä niebare nitre ñakare israelitareye arato.

²¹ Angwane ni Dänkien Jesu namani die mike kri, ye mdenbtä abko ni kwati käkwe ja töi kwitaninta amne namanintre tödeke ni Dänkienbti.

²² Ye abko nitre gätäkä Jesu käfti nämäne Jerusalén käkwe gani angwane, Bernabé juani tuakäre kwetwe Antioquía mda.

²³ Ye erere bkänä, Bernabé nikani, namani juta Antioquíate angwane, nitre tödekaka Jesubti nünanka Antioquíate abko kräke Ngöbökwé ja moto mikani kuin namani tuen Bernabéye. Ye abko käi namani nuäre kri btä, käkwe ja töi mikamna kwatibe janknu Jesubtä nitre tödekaka btin Jesubti yeye niaratre die mikakäre.

²⁴ Bernabé ne abko ni moto kuin amne, Ngöbö Üai Deme nämäne täte btä amne nämäne tödeke kwatibe Jesubti arato. Ne aisete niara nämäne kukwe kuin Jesubtä niere angwane, ni kwati namani tödeke ni Dänkienbti mda.

²⁵ Abti Bernabé nikani juta Tarsote mda Saulo känene.

²⁶ Saulo kwani ie angwane, nikani ngwena sribire jabe juta Antioquíate. Ye kanti gätäbare kä kwati täte kwetwe nitre tödekaka Jesubti ben, niaratre die mikakäre amne Ngöbö Kukwei diribare kwetwe ni kwatiye arato. Juta Antioquía ne mden kanti abko nitre tödekaka Jesubti kädiani Kristiano kena.

²⁷ Kä ye ngwane abko, nitre Ngöbö kukwei niekä nämäne Jerusalén abko nikani ruäre nebe juta Antioquíate.

²⁸ Nitre ye abko, iti kädian nämane Agabo. Bati nämane gätäbtä angwane, namani nünaninkä krö amne, Ngöbö Üai Deme köböire niebare krörö kwe:

Nitre romanobo tä gobrane, ye kantikánti mrö nikadi kri krübäte kä ngrabare temen, niebare kwe.

Ye erere bkänä, emperador Claudio nämane gobrane angwane abko mrö nika namani krübäte kä ngrabare temen.

²⁹ Abtä nitre tödekaka Jesubti nämane juta Antioquíate ye kákwe ja tói mikani ngwian juen ja mräkätre tödekaka Jesubti nünanka kä Judeate ye die mikakäre. Ye erere ni itire itire, ie ja namani nüke töre ngwian bien nuái, ye erere namanintre bien.

³⁰ Ngwian úkaninkrö kore ja mräkätre die mikakäre, ye abko Bernabé amne Saulo nikani ngwena biandre nitre tödekaka Jesubti jie ngwianka yeye dräidre ni jökräbti.

12

Santiago kámikani amne Pedro abko kitani ngite

¹ Kä ye ngwane abko, nitre gätäkä Jesu kábti Jerusalén abko ruäre jrei Herodes Agripa namani kite ngite kä teri mikakäre ja tare nike tödekabtä Jesubti.

² Angwane Juan etba Santiago abko jrei Herodekwe kámikamna ngitrabti, ye erere Santiago kámikani.

³ Santiago kámikani kore, ye abko namani dbe nitre israelitakrä, namani tuen jrei Herodeye, aisete Pedro kamna ngite kwe arato. Pedro kani ngite ye ngwane abko bieta kädianta Pascua näire ban te lebadura ñakare kweta nämane, ye näire Pedro kani ngite.

⁴ Pedro kani ngite angwane, jrei Herodekwe kitamna ngite kä teri mda. Ye kánti guardia mikani nibkä nibkä, bäbkä ja taritári Pedro ngibiarebti. Yebti bieta Pascua rikadre ta angwane, Pedro mikadre ni jökrä ngwärekre kukwe úkatekäre btä amne kámikakäre, Herodes namani nütüre.

⁵ Ne aisete Pedro nämane ngite kä teri angwane, guardia namani ngibiare kuin ñan gitiadre abkokäre. Akwa nitre gätäkä Jesu kábti abko namani jadúke ñakare, ja di kärerere Ngöböye Pedrokrä.

Angele kákwe Pedro tikaninteta

⁶ Herodekwe Pedro mikadre ni jökrä ngwärekre kukwe úkadre kámikakäre, ye känenkri deo angwane, kadena nämane kitani krobu niara küdebtä amne kadena arabe nämane mäkáninte guardia nibubtä. Guardia nibu ye ngätáite niara nämane kibien kuin temen angwane, jukwebtä abko guardia nämane nibu arato jukwe ngibiarebti.

⁷ Angwane batibe angele ni Dánkienkwe nükani gwí, Pedro nämane ye kánti angwane, kä trá ngítianinkä ngwen jökrä gwita temen, Pedro nämane ngite ye kánti. Angwane angele ye kákwe Pedro nuaninbtä kronabtä, kákwe ganinkrö, bti niebare kwe ie:

Näin jötrö krö, niebare kwe ie.

Ye btäräbe, kadena nämane kitani Pedro küdebtä ye ngítianintbe jökrä Pedro küdebtä se kwrere.

⁸ Angwane angele ye kákwe niebare mda Pedroye:

Ja ngwä kite jötrö amne sabato kite jötrö ja ngotobtä, niebare kwe ie.

Ye erere Pedrokwe nuenbare. Angwane angelekwe niebareta mda ie:

Dän ngetbo tä mda makwe, ye kita jabtä arato, bti ma jata ti jiebtí, niebare kwe ie.

⁹ Ye erere bkänä, Pedro nikani angele jiebtí. Akwa Pedro nämane näin era metre angelebe ya abko ñan namani nüke gare ie, ñobtä ñan angwane nämane angele tuen köböre namani ruen ie.

¹⁰ Akwa guardia nämane káne jukwebtä bäre nikani ta, bti guardia mda nämane jukwe mdara jire kánti, ye bäre nikani ta, bti jukwe jierore nämane mikani jite ji ken, ye kánti Pedro namani angelebe angwane, jukwe ye ngítianinbe au angwane, jukwe namani tikani, yete ta Pedro nikani angelebe. Yebti nikani bä mente se kwrere angwane, angelekwe Pedro mikaninteta kaibe.

¹¹ Angwane batibe angele nükani era metre bkänä gani Pedrokwe angwane, niebare krörö kwe:

Herodes amne nitre israelita ji dokwäte tö kukwe nuein káme tibtä abko ngániene ti Dánkienkwe angele juni ti tikete, ne abko era metre bkänä ñan ñan, Pedro namani niere jae au.

¹² Pedro tikaninteta, ye gani kwe angwane, nikani nebe María juete. María ye abko ni kädian nämane Juan amne arabe kädian nämane Marcos abko meye. Ye kánti Pedro nikani. Kä ye kánti abko, ni nämane ja úkekrö kwati blite Ngöböbe Pedrokrä.

¹³ Pedro nikani nebe ki jukwebtä, kákwe ñäkäbare gwäkäre amne, nire nämane ñäke jukwebtä abko meri sribikä bati kädian nämane Rode nikani tuen.

¹⁴ Angwane Pedro kukwe nükani gare ie, ye abko käi namani nuäre krübäte btä, aisete jukwe tikadre kwe Pedroye näre abko nikaninta betekäta jirekåbe nementa gwi, kåkwe niebare:

¡Pedro tä jukwebtä! niebare kwe.

¹⁵ Abtä nitre nämane gwi ye kåkwe niebare mda ie:

¡Ma ngwarbe kä kwitekå jabti nete! niebare kwe ie.

Akwa ja nämane kukwe era niere, meri ye namani niere ietre. Abtä niebare krörö mda kwetre:

Angele Pedro ngibiaka aibe tä näin. Ye ñan niara ara jire tä näin, namanintre niere.

¹⁶ Akwa Pedro abko namani ñåke janknu jukwebtå amne, ni mda mda nikani, kåkwe jukwe tikani, bti Pedro nämane yete bkånå, btå okwå namani angwane, tõi ñan namanintre krütare btå.

¹⁷ Akwa niaratre kåkwe kada ketadre niebare Pedrokwe kisebti ietre, ye erere namanintre kwekbe jökrå angwane, ni Dånkienkwe tikaninteta ño abko niebare kwe. Yebti niebare krörö kwe:

Kukwe nakaka ño tibtä, tikwe nini munye, ye erere munkwe nie jökrå Santiagoye amne ja mråkä tödekaka Jesubti mda mdaye arato, niebare kwe.

Yebti kä mikaninkå kwe yete amne nikani kä mdabti ngitie Herodes ngåniene.

¹⁸ Yebti kä jatani ngwen dekå angwane, kä namani nokre jabtä nitre rükåkwe, ñobtä ñan angwane Pedro jrainbare ñan namani nuke gare ietre, aisete namanintre ja mike ngite jirekåbe kwårikwåri.

¹⁹ Angwane Herodekwe Pedro kånåntarimna ietre, akwa ñan kwanintarita ietre, abtä niaratre mikani ngite mda Herodekwe, bti kåmikamna kwe.

Herodes krütani

Yebti Herodes nämane kä Judeate, abti nikani neme juta Cesareate mda.

²⁰ Herodes ngåmi niken juta Cesareate, kånenkri niara namani romon nitre nünanka juta Tirote kråke amne nitre nünanka juta Sidónte kråke, aisete namani ja kwete bentre. Abtä nitre ütiåte ütiåte nünanka juta kubute ye kåkwe ja tõi diani rikakåre gwaire Herodes kånti juta Cesareate kukwe ükete ben, ñobtä ñan angwane nitre Tirobo amne nitre Sidónbo nämane mrö kökö jae kä Herodekwe kånti, aisete tö namanintre kukwe ükete. Ye erere bkånå, ni sribikå ütiåte nämane sribire iti Herodekrå abko kådian nämane Blasto abko ben nitre Tirobo amne Sidónbo kåkwe blitabare, ye köböire abko Herodes rabadre ja maketa jåme bentre, abkokåre blitabare kwetre Blastobe.

²¹ Yebtä abko, Herodekwe gåtå köböi kitani mda kråke. Ye erere gåtå köböi nükani angwane, Herodekwe dån båri nuäre, ütiåte kri kitani jabtä ja jreire bå mikakrå, bti namani tåkånintbe ja tåkrå gobrankråbti angwane, kukwe niebare kwe ietre.

²² Angwane Herodes kukwe nuaka nuaka ye nikani ñåke jume ja dibti niara moto mikakåre jåme jakrå, kä namani niere krörö:

Ni tä blite se ñan ni ngwarbe akwa, ngöbö ara nü iti, kåta blite se, namanintre niere kore ie.

²³ Ye btåråbe angele ni Dånkienkwe kåkwe Herodes mikani bren, ñobtä ñan angwane Herodes mikani ütiåte ngöbö kwrere jae ni mda mdakwe, ye namani dbe Herodekrå amne Ngöbö era metre abko mikani ütiåte ñakare kwe. Yebtä angelekwe mikani bren angwane, ngin aibe kåkwe Herodes kitaninkå ja tubtä.

²⁴ Niara krütani kore, ye täbti Ngöbö Kukwei nikani niren båri mda kä ye kåntita temen amne, Ngöbö Kukwei diri namani kä jökråbti arato kä ye kåntita.

²⁵ Abti Bernabé amne Saulo kåkwe sribibare ünån jökrå Jerusalén, bti nikaninta juta Antioquíate. Nikaninta angwane, nikani Juan ngwena jabe. Juan ye mden abko kådian nämane Marcos arato abko jånikani kwetre jabe.

13

Bernabé btå Saulo juani blite Jesubtä

¹ Nitre gåtåkä Jesu kåbti nämane juta Antioquíate, ye ngåtåite nitre Ngöbö kukwei niekå nämānena amne nitre Ngöbö Kukwei dirikå nämānena abko kådian nämāne krörökrörö: Bernabé, Simón (Simón ne mden abko kådian nämāne Chen arato), Lucio juta Cirenebo amne Manaen. Manaen ne abko rirabare gwaire jrei Herodes Antipabe. (Jrei Herodes Antipas ne abko kåkwe gobranbare Galilea). Angwane Saulo nämāne arato.

² Batira jire niaratre nämāne ja ükaninkrö Ngöbö kåikitakakåre amne ja dånkåre Ngöbökrå angwane, batibe Ngöbö Üai Deme kåkwe niebare krörö ietre:

Bernabé amne Saulo tikwe kåråbarera sribi nuene jakrå, ye kråke niaratre denkå jenena munkwe juankåre sribi ye nuene, niebare Ngöbö Üai Demekwe.

³ Angwane blitabare ünän kwetwe Ngöböbe amne ja bاینbare ünän kwetwe Ngöbökrä, bti kise mikani kwetwe Bernabénti amne Saulobti ja di biankäre ietre, bti juani kwetwe mda.

Bernabé btä Saulo kākwe blitabare Jesubtä Chiprete

⁴ Abti Ngöbö Üai Deme kākwe Bernabé amne Saulo juani kore angwane, nikanintre nebe mren köräbti juta Seleucia. Ye kánti nakwani rute, bti nikani ká butubti Chipre.

⁵ Ye ngwane abko Juan nikani siba Bernabébe amne Saulobe niaratre die mikakäre. Juan ne mden abko kädian nämane Marcos arato. Nikanintre nebe mren köräbti juta Salaminante, Chipre kánti angwane, sinagoga nämane Salamina, ye kántikánti nikanintre blite Ngöbö kukwei kuin Jesubtä.

⁶ Niaratre kākwe dikakabare jökrä ká butubti Chiprete Ngöbö kukwei kuin Jesubtä niekäre. Abti nikani nebe juta Pafote mda. Ká ye kánti abko ni israelita sukiare nämane iti. Ni ye abko ni ni ngökaka, akwa nämane ja mike ni Ngöbö kukwei niekã kwrere. Ni ye abko kädian nämane Bar-Jesu abko ben Bernabé amne Saulo namani ngätäi.

⁷ Chipre yete ni iti kädian nämane Sergio Paulo nämane gobrane emperador romano kräke. Amne Sergio Paulo abko ben ni kwrare ye nämane ja gete. Gobran ne abko töbtã krübäte abko tö namani Ngöbö kukwei nuai, kākwe Bernabé amne Saulo käräbare blite jabe Ngöbö kukweibtä. Erere nükantre kánti.

⁸ Akwa ni kwrare ne arabe kädian nämane Elimas arato abko ñan tö namani gobran Sergio tuai tödeke Ngöböbti, ká namani Ngöbö Kukwei mikamna ütiäte ñakare kisere gobran Sergioye.

⁹ Angwane Saulo abko arabe kädian nämane Pablo arato btä Ngöbö Üai Deme namani täte, kākwe okwã ketaninte kwekbe ni kwrare yebtä,

¹⁰ kākwe niebare krörö ie:

Ma ni ngökö. Ma töi káme. Ma diablu kwrere amne käre mata ja mike jändrän kuinkuin rüere. Mata rüere ni Dänkien kukwei kuin era metre rüere, ye abko ñan rabadre bare jire chi mae, mata nütüre aiseté,

¹¹ mtare ni Dänkien Jesu kākwe ma mikadi ja ngie nuen krörö: Ni Dänkien bike ma okwã mike ká ikote, aiseté ká ñan rabadi tuen mae, ne ben makwe nünandi bá raire kore. Abko kore se, niebare Pablokwe Elimaye.

Ye btäräbe, ká ngidianinte iko Elimas okwäte amne ká namani iko jökrä okwäte se kwrere. Angwane ni mdakwe kadre küdebtí rikadre ngwena, ie niara tö namani, ñöbtã ñan angwane ká namani tuen ñakare ie aiseté.

¹² Elimas namani ká ikote kore gobran okwäbti, yebtä abko kukwe kuin ni Dänkien Jesubtä diri namani, yebtä gobran ñan töi namani krütare, kākwe Ngöbö kukwei Jesubtä mikani era abko kukwe nakaninkã kore Bernabé amne Pablobtä ká butubti Chiprete.

Saulo btä Bernabé kākwe kukwe kuin Jesubtä niebare juta Antioquia ká Pisidiate

¹³ Nebti Pablo amne kukwe muko mda mda nämane näin ben abko nakwani rute mren köräbti juta Pafote mda, bti nikani juta Pergete ká Panfiliate. Ye kánti Juan Marcos kākwe ká mikaninkã btätre, ká nikaninta ja jiebtí nebeta Jerusalén.

¹⁴ Pablo nämane kukwe muko mda mdabe juta Pergete, bti nikani ta angwane, nikani nebe juta Antioquia ká Pisidiate mda. Ye kánti köbö jadükärã nitre israelitakwe nükani angwane, nikanintre sinagogate, kánti nämane tákänintbe.

¹⁵ Abti Kukwe Biani Ngöbökwé Moiséye amne tarã tikani nitre Ngöbö kukwei niekākwe, yebtä ñākäbare ünän jökrã angwane, nitre ji dokwäte sinagogate kākwe niebare krörö ietre:

Ja mräkätre, kukwe tarã munkwe niedre ja mräkätre die mikakrä ne ngwane, ká tarã blitakrä munye mtare, niebare kwetwe.

¹⁶ Angwane Pablo namani nünaninkã krö amne, ni jökrã kākwe niara kukwei nuadre abko niebare kisebtí kwe ietre, bti niebare krörö kwe ietre:

Mun israelita amne mun ñakare israelitare tä nete arato kãta Ngöbö mike ütiäte jae, olo ketete ti kukweye munkwe.

¹⁷ Ngöbö ni israelitakwe kākwe ni mräkã kirakira dianinkã jen jakrä, bti ni mräkã kirakira nämane nüne ni menteni kwrere ká jenenante Egipto abko mikani niren kwati kwe. Abti ja di kribti Ngöbö ara jire kākwe ni mräkã dianinkãta ká Egiptote mento.

¹⁸ Abti ni mräkã kirakira kākwe nünabare blo ká gre ketebu jire ká kaibete, akwa Ngöbö moto namani romon ñakare jötrö kräke.

¹⁹ Angwane ni mräkã kirakira, ye köböire Ngöbökwé juta keta kükü jire juani ngwarbe Canaán, bti ká ye biani kwe ni mräkã kirakiraye jakrä.

²⁰ Niaratre nikani nüne Egipto abti nükantinã nüne Canaán ye abko bäsi ká sientö kräbkã bti ká gre ketebubti kwã jätã (450) nikani ta, niebare Pablokwe.

Pablokwe niebareta mda:

Yebti Ngöbökwe nitre rüka jie ngwianka mikani gobrane mda ni mräkä kirakira ngätäite. Ne abko namani kore nebebe Ngöbö kukwei niekä Samuel näire.

²¹ Yebti ni mräkä kirakira kärke jrei käräbare Samueliye mda abko rabadre gobrane niaratre ngätäite abkokäre. Ye erere bkänä, Ngöbökwe Saül tukwe mikani jreire kä gre ketebu jire niaratre ngätäite. Saül ne abko Cis ngobo. Cis ne abko jatani Benjamin mräkäkri.

²² Abti Ngöbökwe Saül dianinkä mento angwane, David tukwe mikani jreire mda Saül täte kwe amne, Ngöbökwe niebare krörö Davibtä: Isaí ngobo David ne abko kärke nünandre ño, ie ti tö, erere tä nüne amne, dre nuendre kwe, ie ti tö, erere tä biare nuene arato, niebare Ngöbökwe btä.

²³ David ne mden mräkäkri ni Diantarikä iti kädianta Jesu jatani ni israelita kräke. Jesu ne mden abko Ngöbökwe köböi mikani nitre israelita diantarikäre,

²⁴ aisete Jesu ngämi sribi kömiketbe, känenkri ni kä Juan jatani. Angwane nitre israelita kärke kukwe kämekäme kitadre jire jökrä temen, bti tödekadre Ngöböbtä, bti ja ngökadre ñöte kwetre abko Juan namani niere ietre.

²⁵ Yebti kä jatani neme braibe nünankrä Juanye angwane, Juankwe niebare krörö: Ti Ni Dianinkä Ngöbökwe, munta nütüre tibtä akwa, ye ñakare kore. Akwa ni jatadi iti ti jiebti abko bäri ütiäte tikrä, aisete ja nuke töre ñakare tie sandalia tikete niara ngotobtä ye abko Ni Dianinkä Ngöbökwe ara, niebare Juankwe.

²⁶ Ja mräkätre därebare ja täritäri Abrahamkri amne mun ñakare israelitare käta Ngöbö mike ütiäte jae, Ngöbö kukwei kuin Jesubtä ne abko Ngöbökwe juani nikrä.

²⁷ Jesu abko ni Dianinkä juani Ngöbökwe nükani gare ñakare nitre nünanka Jerusalénye amne nitre ji dokwäte Jerusalénbo yeye. Erere arato, nitre Ngöbö kukwei niekä kärke kukwe niebare Ni Dianinkä Ngöbökwebtä btä ñäkäta niken köbö jadükakrä näire bämän kratirekratire, aisete rükadre gare ietre. Akwa ye abko nükani gare ñakare ietre arato, aisete Jesu kitani ngite müre ketadre kwetre angwane, kukwe rakadrekä ño Ni Dianinkä Ngöbökwebtä nämäne tikani, btä ñäkäta niken bämän kratirekratire ye abko niaratre ara jire kärke mikani neme bare jökrä.

²⁸ Kukwe kwani ñakare ietre Jesu kitakrä ngite müre ketadre akwa, Pilatokwe Jesu müre ketamna abko namani ribere Pilatoye.

²⁹ Erere bkänä, Pilatokwe Jesu müre ketamna angwane, Jesu krütani ye btäräbe Ngöbö Kukwei nämäne tikani ño Ni Dianinkä Ngöbökwebtä, ye erere namani bare. Jesu krütani angwane, dianinta krusobtä timon, bti doboi mikani.

³⁰ Akwa Ngöbökwe niara mikaninta nire.

³¹ Yebti nitre kärke dikakabare Jesube kä Galileate nebebe juta Jerusalén, ye ie Jesukwe ja mikaninta tuadre bäre bäre, aisete niaratre Jesu tuakatuaka ye mden abko tätre kukwe era erere niekä ni mräkä israelitaye mtare.

³² Ne mden kisete, kukwe kuin Jesubtä nunta näin niere munye abko krörö: Ngöbökwe kukwe ükaninte jabe kwärükwäri ni mräkä kirakirabe,

³³ nita nüne mtare ne abko ni mräkä kirakira bkün ja täritäri amne, Ngöbökwe ja kukwei mikani täte nibe. Ngöbökwe Jesu mikaninta nire angwane, kukwe ükaninte kwe, ye namani bare jökrä, ye mden tä tikani Salmos krobubtä krörö:

Ma abko ti Odei jen tikwe. Ti ma rün makwe mtare, abko tä tikani kore Salmos krobubtä.

Salmos 2.7

³⁴ Ngöbökwe Jesu mikadita nire ne abko niebarera kwe, aisete Jesu ñan ngwäkä gütdrekä, ye mden abko tikamna tärbtä kwe:

Tikwe ja kukwei kuin dema biani ja die biankäre Daviye, ye abko tikwe mikadi täte jökrä munkrä,

Isaías 55.3

abko tä tikani Ngöbö kukweibtä.

³⁵ Ne mden kisete tärä mdara jire btä tä tikani krörö:

Ni Deme makwe, ye makwe ñan ngwäkä tuadimetre ngütekä, abko tikamna kore tärbtä Daviye Ngöbökwe.

Salmos 16.10

³⁶ Akwa Davikwe kukwe ye tikani angwane, ñan tikani jabtä kwe gare kuin nie, ñobtä ñan angwane Davikwe sribidre ño niebare Ngöbökwe ie, ye erere sribibare kwe. Yebti niara krütani angwane, doboi mikani mräkä känekäne ngätäite amne niara ngwäkä ngütaninkä jökrä, aisete kukwe ye ñan nämäne tikani Davibtä gare kuin nie.

³⁷ Akwa Jesu mikaninta nire Ngöbökwe ye abko ngwäkä ngütaninkä ñakare,

³⁸ aisete Jesu aibe köböire Ngöböta ni ngite kukwe käme nuenbtä denkä mento nibtä abko nun tö mikai gare mtare munye ja mräkätre.

³⁹ Kukwe Biani Ngöbökwe Moiséye, ye mikabtä täte Ngöbö ñan namani mun ngite denkä munbtä amne, mun ñan namani tuen kuin metre Ngöböye. Akwa ni jökrä kärke tödekadre Jesubti abko ñakare ngite mda ja ngwärekre abko Ngöbökwe niedre btä abko rabadre gare munye, abkokäre nunta blite Jesubtä munbe,

⁴⁰ ñobtä ñan angwane nitre Ngöbö kukwei niekä käkwe tära tikani kira abko erere ñan rakadrekä munbtä, abkokäre munkwe mokredre jabti, kukwe tikani krörö ne ngäniene:

⁴¹ Mun Ngöbö Kukwei mikaka ngwarbe jae ye käkwe sribi tikwe mika ñäräre kuin, bti munkwe töbika kuin btä arato, abti mun krüta mrä,

ñobtä ñan angwane mun näire tikwe jändrän nuendi, ye abko ni mda mdakwe niedi munye akwa, ñan mikadi era munkwe, *Habacuc 1.5*

abko tä tikani kore. Abko kore se, niebare Pablokwe.

⁴² Bti Pablo amne Bernabé jatani nikenta ju bäre angwane, jatadre bliteta kukwe nebtä bämän mdabtä köbö jadükakräte abko ni jökrä namani ribere ietre.

⁴³ Yebti gätä ngidianinkä angwane, nitre israelita kwati amne nitre ñakare israelitare kwati käkwe ja mikani ketetibe nitre israelitabe Ngöbö mikakäre täte, käkwe tödekani Jesubti abko namani nekete jökrä Pablobtä amne Bernabébtä. Angwane niaratre abko käkwe ja mräkätre tödekaka krire Jesubti, ye kitani bäre bäre nünenkä dite Jesubtä, ñobtä ñan angwane Ngöbökwé ja moto mikani kuin niaratrekrä, yebtä nünandrekä dite kwetre, niebare Pablokwe amne Bernabékwé ietre.

⁴⁴ Yebti köbö jadükakrä bämän mdabtä nükani angwane, bäsi ni jökrä nünanka kä ye kánti käkwe ja ükaninkrö Ngöbö kukwei kuin ni Dänkienbtä kukwe nuakäre.

⁴⁵ Akwa ni kwati ñakare israelitare nükani ja ükekrö namani tuen nitre israelitaye angwane, niaratre namani mokrere krübäte, aisete Pablo nämane kukwe dirire, ye rüere nikanintre ñäke bäri diänbe Pablo rüere.

⁴⁶ Angwane Pablo amne Bernabé, btä kä jürä namani ñakare blitakäre, käkwe niebare krörö ietre:

Mun israelita, ie nunkwe Ngöbö kukwei kuin Jesubtä mikadre gare käne, ye abko Ngöbökwé mikani nun kisete kore. Akwa munta trö kwite Ngöbö kukweye, abtä munkwe nünandre kärekäre Ngöböbe, akwa ja ruen ütiäte ñakare munye nüne kärekäre Ngöböbe, aisete nitre ñakare israelitare abko ie nun näin Ngöbö kukwei niere jirekäbe mda,

⁴⁷ ñobtä ñan angwane Ngöbökwé nun juani sribi ne nuene angwane, nunkwe sribidre krörö nieba kwe nunye:

Nitre ñakare israelitare tä nüne kä jökräbti temen abko rabadre dianintari jökrä, abkokäre tikwe ma mikani ñotra kwrere niaratrekrä, *Isaías 49.6*

niebare kore Ngöbökwé nunye, niebare Pablokwe amne Bernabékwé nitre israelitaye.

⁴⁸ Pablo amne Bernabé käkwe blitabare kore, yebtä abko nitre ñakare israelitare btä kä namani nuäre amne Ngöbö kukwei mikani ütiäte kwetre. Angwane nire nire mikani nünakäre kärekäre jabe Ngöbökwé, ye erere käkwe tödekani Jesubti.

⁴⁹ Yebti Ngöbö kukwei kuin Jesubtä ye kädriebare jökrä kä ngrabare temen juta Antioquia Pisidia bäre temen.

⁵⁰ Akwa kä ye kánti abko, meri ruäre nämane Ngöbö mike ütiäte jae nitre israelitabe abko ben nitre israelita ütiäte ütiäte käkwe blitabare Pablo amne Bernabé rüere. Erere arato, nitre ji dokwäte nünanka kä ye kánti abko ben blitabare kwetre arato. Angwane nitre ye abko käkwe ja töi mikani rüre Pablo rüere amne Bernabé rüere, niaratre juantarikäre kä ye bäre mento.

⁵¹ Abtä Pablo amne Bernabé käkwe dobro mnü ja ngotobtä ngrükaninte nitre israelita ye ngwäreki, ñobtä ñan angwane niaratre nämane kukwe nuene blo abko ñan namani dbe Pablokrä amne Bernabékrä abko bä mikani kwetre ie, bti nikanintre juta Iconio mda.

⁵² Angwane nitre käkwe kukwe kuin Jesubtä kani ngäbti abko btätre Ngöbö Üai Deme namani täte amne kä namani bäri nuäre btätre arato.

14

Pablo btä Bernabé käkwe blitabare Jesubtä juta Iconiote

¹ Abti Pablo amne Bernabé nikani nebe juta Iconiote angwane, köbö jadükakrä näire nikanintre sinagoga yete, kánti blitabare nuäre kwetre kukwe kuin Jesukwe yebtä. Abtä ni israelita kwati käkwe tödekani Jesubti. Erere arato, ni ñakare israelitare kwati käkwe tödekani bti.

² Akwa nitre israelita ñan tö namani tödekai bti abko käkwe nitre ñakare israelitare moto mikani romon ja mräkätre tödekaka Jesubti rüere.

³ Akwa Pablo amne Bernabé namani nüne raire Iconiote angwane, ñan namani rüe jürä ngwen jabtä akwa, namanintre kukwe kuin Jesubtä niere janknu. Angwane ni Dänkien namani ni tarere ja moto kuinbti namanintre niere ni jökräye angwane, kukwe niebare kwetre ye rabadre era ni mda mdakrä, abkokäre ni Dänkien namani niaratre die mike, kä namani sribi kri ñan tuabare nuene niaratre köböire.

⁴ Akwa ye ngwane abko nitre nünanka juta Iconiote abko kākwe ja ñākānintbe mda, aisete ni ruäre namani nekete nitre israelita tōdekaka ñakare Jesubti yekri amne ni ruäre abko namani nekete Jesu kukwei ngwiankakri.

⁵ Abtä nitre israelita tōdekaka ñakare Jesubti amne nitre ñakare israelitare kākwe ja tōi mikani kwatibe nitre gobrankabe Pablo amne Bernabé mikakäre ja tare nike amne kāmikakäre jābti.

⁶ Akwa Pablo amne Bernabé kāmika brai nāmane, ye gani kwetre angwane ngitiani juta Listrate amne Derbete. Juta ye abko nāmane kākä Licaoniate, ye kántita temen Pablo amne Bernabé ngitiani.

⁷ Angwane Ngöbö kukwei kuin Jesubtä ye kädriebare kwetre kä ye kántita arato.

Pablo amne Bernabé kākwe blitabare Jesubtä juta Listrate amne juta Derbete

⁸ Abti bati Pablo amne Bernabé nāmane juta Listrate angwane, ni nakwente nāmane iti juta yete. Ni ye abko dārebare ngüre bren, aisete nāmane dikekä ñakare krōta abko nāmane tākānintbe siba yete.

⁹ Pablo nāmane blite angwane, niara nāmane kwekbe Pablo kukwei nuen. Te batibe, Pablo okwä namani kwekbe btä angwane, Jesukwe mikadreta kuinta, bti namani tōdeke kwatibe namani tuen Pabloye.

¹⁰ Angwane Pablokwe ñākābare jume ja dibti krörö ie:

¡Nāin krö amne nūnenkā metre krö! niebare kwe ie.

Ye btārābe, ni ye kākwe ja tākāninte kāinta, nūkaninbe dikekä krö, bti nikani dikekä kwäräkwarä ni mda mda okwābti se kwrere.

¹¹ Pablokwe ni ngüre bren mikaninta kuinta kore, ye jatani ni jökrāye angwane, namani ngrente krikri ja kukwe Licaoniare, kä namani niere krörö:

¡Ngöbötre nikwe nikwitani ni hä kwrere abko nūkani ni ngätāite mtare! namanintre niere.

¹² Bernabé abko ngöbötre jire jökrä dānkien kädian nāmane Júpiter niebare kwetre amne Pablo abko nāmane blite, aisete niara abko ngöbö kädian nāmane Mercurio* niebare kwetre ie.

¹³ Abtä ni blitaka ngöbö Júpiterebe ni mda mdakrä abko kwe ju nāmane känime jite juta bäre abko jatani nbi kwane ngwena kāmikadre ietre niaratre mikakäre ütiāte jae. Erere arato, jatani kri blü dātebare koronare ngwena krāke mikakäre ütiāte jae. Ne kwrere niara amne ni jökrä tō namani jāndrän kukwai Bernabé amne Pablo mikakäre ütiāte ngöbö kwrere jae.

¹⁴ Nitre Jesu kukwei ngwianka Bernabé amne Pablo mika tō namani ütiāte ngöbö kwrere ni jökräkwe, ye gani kwetre angwane, ñakare namani tuen dbe ietre, ye hä mikakäre dān ngianinkä jabtä kwetre se kwrere, bti nikanintre betekä ni mda mda ngätāite tata, ngrarete kwärä kä nikanintre niere krörö:

¹⁵ Ja mräkä, nun abko ñakare ngöbö, akwa nun ja kwrere munbe. ¡Se ñöbtä mun tō nibi nun mikai ütiāte kore jae se! Munta ngöbötre ngwarbe mike ütiāte jae, ye mikadre jökrä temen munkwe, abkokäre nun jatani Ngöbö kukwei kuin Jesubtä mike gare munye. Ngöbö nire kä kāinta amne kä tementa dātekä, arabe kākwe mren dātebare amne jāndrän jökrä tä nūne kä kāinta, kä tementa amne mrente dātebare kwe arato. Ngöbö ye aibe munkwe kadre ngābti, abkokäre nun jatani Ngöbö kukwei kuin mike gare munye.

¹⁶ Kira abti kä nūke mtare, ni jökrä tō namani dre nuein, erere Ngöbökwe tuanimetre nuene jökrä.

¹⁷ Akwa Ngöbö abko moto kuin, aisete käre jāndrän kuin nuenbare kwe ja mikakrä gare munye abko krörö: Ngöbö ara kätä ñü mike nākāen temen munkrä amne, nura jökrä abko Ngöböta ngwä mike neme kuin munkrä. Ye kwrere Ngöbö ara kätä mrö bien kabre kwetadre munye, kä tādre nuäre munbtä abkokäre, niebare kore Pablokwe.

¹⁸ Akwa Pablokwe ñākābare kore, ye abko bäsi namani ütiāte ñakare nitre ye krāke. Ye aisete tō namanintre jāndrän kāmikai Bernabé amne Pablo mikakäre ütiāte, akwa ye abko namani tare krübāte dokwä tāke kän, akwa mrä abko dokwä tākāni kwetre abko nakaninkä kore.

¹⁹ Abti nitre israelita nünanka juta Antioquía Pisidiāte amne Iconiote nūkani juta Listrate ye kākwe ni mda mda tōi kwitani Pablo amne Bernabé ruere angwane, nikani Pablo tāke jābti kwäräkwarä se kwrere, bti Pablo krütanina namani tuen ietre angwane, jākāni mento juta bäre kwetre.

* **14:12 Júpiter amne Mercurio.** Júpiter abko ngöbötre dānkien abko nitre romano nāmane nütüre. Amne Mercurio abko ngöbö mda abko Júpiter nāmane juen kukwe mikakäre gare ni mda mdaye abko nitre romano nāmane nütüre.

²⁰ Akwa nitre tödekaka Jesubti kákwe ja úkaninkrö Pablo bäre temen angwane, Pablo nùkaninta krö, bti nikaninta nebete jutate. Abti jándrinane angwane, Pablo nikani juta Derbete mda Bernabébe abko kukwe nakaninkä kore btätre juta Listrate.

Pablo amne Bernabé nikanintre ja jiebtí juta Antioquia, Siriате

²¹ Pablo amne Bernabé kákwe kukwe kuin Jesubtä diribare juta Derbete, ye kánti ni kwati kákwe kukwe kuin Jesubtä ye mikani era. Abti Pablo amne Bernabé nikaninta ja jiebtí nebete juta Listrate, Iconiote amne juta Antioquíate.

²² Niaratre nikani juta kwatirekwatire te, ye kántikánti nitre tödekaka Jesubti kitani nünenkä dite kwetre Jesubtä amne, Ngöbö ngämi gobrane nibti kä káinbti, ye kánenkri nikwe ja tare nikadi kri kä nebtä, niebare kwetre.

²³ Erere arato, Pablo amne Bernabé kákwe ni mikani nitre tödekaka Jesubti jie ngwianka juta kwatirekwatire kánti, bti nitre tödekaka Jesubti amne nitre ni jie ngwianka abko kräke blitabare kwetre Ngöböbe amne ja bänbare kwetre Ngöbökrä angwane, ni Dänkien, bti námáne tödeke ye ie Pablo amne Bernabé kákwe ja mräkätre mikani gare, bti nikanintre.

²⁴ Pablo amne Bernabé nikani kä Písidia kánti ta, bti nikani nebe kä Panfiliate.

²⁵ Ye kánti, kukwe kuin Jesubtä diribare kwetre juta Pergete. Abti nikaninta nebe juta Ataliate mren köräbti.

²⁶ Ye kánti nikani rute angwane, nikaninta juta Antioquia, Siriате. Juta Antioquia ne mden kánti nitre gätäkä Jesu kábtí kákwe niaratre juani sribire Ngöbö moto kuin ye köböire. Sribi ye mden abko namanina bare ietre angwane jataninta.

²⁷ Pablo amne Bernabé nùkaninta juta Antioquia, Siriате angwane, ja mräkätre tödekaka Jesubti kä ye kánti úkaninkrö jökrä kwetre, bti ni Dänkienkwe kukwe nuenbare kuin kräke, ye erere niebare jökrä kwetre ietre amne, nitre ñakare israelitare, kräke ni Dänkienkwe kä biani arato tödekakrä Jesubti abko niebare kwetre ietre.

²⁸ Yebti Pablo amne Bernabé namani nüne raire mda nitre tödekaka Jesubtibe juta Antioquia, Siriате. Ne abko nakaninkä kore Pablobtä amne Bernabébtä.

15

Gätäbare kri Jerusalén

¹ Kä ye ngwane abko, ni námáne nüne Judeate abko nikani ruäre nebe juta Antioquíate abko nikani dirire krörö ja mräkätre tödekaka Jesubtiye:

Ja ñäräkrä mikadre ja kwatabtä niebare Moisékwe, se kwrere mun jökrä ñakare israelitare kákwe ñan nuendre ne ngwane, Ngöbökwé ñan mun diandretari jire chi, namanintre dirire kore.

² Yebtä abko, Pablo amne Bernabé namani ja kwete krübäte nitre yebe. Abtä mrä angwane, nitre tödekaka Jesubti kákwe Pablo, Bernabé amne ni mda mda dianinkä ja ngätäite, bti juani kwetre Jerusalén blite nitre Jesu kukwei ngwianka mda mdabe amne nitre ni jie ngwianka námáne Jerusalén yebe.

³ Nitre tödekaka Jesubti juta Antioquíate kákwe Pablo amne Bernabé juani ni mda mdabe, ye erere bkänä nikanintre. Angwane nikani kä Fenicia kánti ta amne kä Samaria kánti ta angwane, Ngöbö era metre mikani era kwetre, ye abko niebare jökrä kwetre. Yebtä nitre tödekaka Jesubti nünanka kä Fenicia kánti amne Samaria kánti, btä kä namani nuäre krübäte Pablo amne Bernabé kukwe nuare.

⁴ Bti Pablo amne Bernabé nikani mate Jerusalén. Angwane nitre gätäkä Jesu kábtí, nitre Jesu kukwei ngwianka mda mda amne nitre ni jie ngwianka ye kákwe ja úkaninkrö jökrä angwane, Ngöbökwé dre dre nuenbare niaratre köböire abko niebare jökrä kwetre ja mräkätreye.

⁵ Angwane batibe ni bariseo tödekaka Jesubti námáne ruäre yete abko namanintre nünaninkä krö, kákwe niebare krörö:

Ja mräkätre ñakare israelitare káta tödeke Jesubti abko ñäräkrä mikadre jökrä kwatabtä amne, kukwe mikani nuendre Moisékwe abko niaratrekwe mikadre tâte ni kwrere niedre ietre abko nunta nütüre. Abko kore se, niebare kwetre.

⁶ Abti nitre Jesu kukwei ngwianka amne nitre ni tödekaka Jesubti jie ngwianka kákwe ja úkaninkrö jenena blitakäre kukwe yebtä.

⁷ Blitabare raire kwetre angwane, Pedro namani nünaninkä krö, kákwe niebare krörö kukwe yebtä:

Ja mräkätre, Cornelio amne mräkä kwekwe ñakare israelitare, ie ti rikadre kukwe kuin Jesubtä niere amne, niaratre kákwe tödekadre Jesubti, abkokäre Ngöbökwé ti dianinkä mun ngätäite, ye gare kuin munye.

⁸ Amne ni jökrä tói ño gare jökrä Ngöböye. Ngöbö ye ara kákwe niaratre kani ngäbti, ye bä mikakrä ja Úai Deme biani kwe nie, ye kwrere biani kwe ietre arato.

⁹ Ye abko, Ngöbö ñan tä nitre ñakare israelitare mike ñäräre bäri bä käme ni israelitakrä, akwa ni ja kwrere jökrä Ngöbö ngwärekre, ñobtä ñan angwane nitre ñakare israelitare tödekani Jesubti angwane, Ngöbökwé niaratre ngite dianinkä btätre arato.

¹⁰ Ye garera munye, aisete zse ñobtä abko mun tö Ngöbö moto mikai romon, amarebti Kukwe Biani Ngöbökwé Moiséye abko ni mräkä kirakira die namani ñakare mikakrä täte amne, mtare ni die ñakare mikakrä täte arato, abko nitre ñakare israelitare käkwe mikadre täte jökrä, ie mun tö se?

¹¹ Ye abko ñakare kuin, ñobtä ñan angwane ni Dänkien Jesu moto kuin, ye köböire niarata ni israelita dentari, ye gare kuin nie mtare. Ye kwrere nitre ñakare israelitare käta tödeke bti abko Ngöböta dentari ni kwrere arato. Ne mden kisete, nikwe ñan nitre ñakare israelitare mikadre ja ñäräkrä mike ja kwatabtä amne nikwe ñan mikadre Kukwe Biani Ngöbökwé Moiséye mike täte. Abko kore se, niebare Pedrokwe.

¹² Pedrokwe blitabare ünän kore, bti ni jökrä namani kwekbe amne, Ngöbökwé sribi kri ñan tuabare nuenbare ño Bernabé amne Pablo köböire ja kukwei mikakäre ütiäte nitre ñakare israelitare ngätäite abko ni jökrä namani kukwe nuen.

¹³ Bernabé amne Pablo käkwe blitabare ünän jökrä kore angwane, Santiago abko käkwe niebare krörö mda:

Ja mräkätre, ti kukwei nuen munkwe.

¹⁴ Nitre ñakare israelitare tarebare ño kena Ngöbökwé angwane, niaratre ngätäite ni dianinkä jen jakrä kwe mikakäre juta jakwere, nini Simón Pedrokwe nie.

¹⁵ Ne mden abko nämene tikani kore nitre Ngöbö kukwei niekä kirakirakwe, mden erere tä tikani krörö Ngöbö Kukweibtä:

¹⁶ Ni Dänkien Ngöbö käkwe niebare kore:

David btä mräkä kwekwe ja täritäri nämene gobrane akwa, juani ngwarbe rüekwe.

Akwa ti jatadita angwane, tikwe ükadita amne ju ngwarbe ükateta kuin täte, ye kwrere tikwe ükaditeta, käkwe David mräkä mikadi gobrane mda David täbtä.

¹⁷ Ye abko tikwe nuendre nitre ñakare israelitare nünanka kä mda mda kánti mden tikwe diandikä jen jakrä rabadi ti känentari abkokäre,

¹⁸ niebare ni Dänkien Ngöbökwé.

Ni Dänkien Ngöbökwé ja kukwei niebare kira, ye mden abko kitera mike bare mtare, *Amós 9.11-12*

ne mden abko mikanina gare kwe nie ja kukwei köböire.

¹⁹ Ne aisete tita töbike krörö, erere ti bike niere. Nitre ñakare israelitare käta Ngöbö kaen ngäbti, niaratre ye kötära nikwe ñan kukwe taretare mikadre nuendre ietre ruen tie, aisete Kukwe Biani Ngöbökwé Moiséye, ye abko nikwe ñan mikamna täte ietre.

²⁰ Akwa kukwe krörö tikadre taräbtä juandre kräke abko rabadre dbe ruen tie: Käne, jändrän jökrä bianta ngöbö ngwarbeye mikakäre ütiäte jae, ye abko ñan kwetadre kwetre amne ñan ja mikadre gure bati bati kwetre, niedre ietre. Erere arato, jändrän müre nótaninkä köte däräie ngöi, ye ñan kwetadre jire kwetre, niedre ietre. Mräkäre abko jändrän däräie ñan kwetadre kwetre arato abko aibe niedre ietre,

²¹ ñobtä ñan angwane Kukwe Biani Ngöbökwé Moiséye, ye abko nitre ñakare israelitare raba kukwe nuen bämän kratirekratire, ñobtä ñan angwane kira abti kä nüke mtare juta kwatirekwatire te nitre ñakare israelitare ngätäite Kukwe Biani Ngöbökwé Moiséye, yebtä ni kwati tä ñäke sinagogate bämän kratirekratire köbö jadükakrä näire. Ne aisete kukwe ye garera ietre. Ye mdenbtä abko, tarä tikadre jirekäbe juandre ja mräkätreye ruen tie. Abko kore se, niebare Santiagokwe.

Tärä juani kwetre nitre ñakare israelitare tödekaka Jesubtiye

²² Ye kwrere bkänä, nitre Jesu kukwei ngwianka amne nitre ni tödekaka Jesubti jie ngwianka käkwe ja töi mikani gwaire nitre tödekaka Jesubtiye, käkwe ni mda mda dianinkä juandre Pablobe amne Bernabébe nebe juta Antioquiate. Ni dianinkä juandre bentre abko nere: Judas, ni ne arabe kädian nämene Barsabás arato amne ni mda abko kädian nämene Silas. Nitre nibu ne abko ütiäte nitre tödekaka Jesubti ngätäite Jerusalén

²³ abko ietre tarä biani ngwiandre. Tarä ye abko btä kukwe tikani krörö:

Mun ñakare israelitare tä nüne juta Antioquiate, kä Siriate amne kä Ciliciate, mun ye abko ja mräkäre nunbe, aisete nun Jesu kukwei ngwianka amne nun nitre tödekaka Jesubti jie ngwianka käta köbö kuin juen munye.

²⁴ Ja mräkä, ni ruäre ja ükakrökä ketetibe nunbe nete abko nunkwe juani ñakare, akwa nikanä ja töi jenbti, käta dirire munye amne tä mun nike krübäte amne tä mun töi kwite ngwarbe kwäräkwärä abko nunkwe gani nete.

²⁵ Ye mdenbtä abko, Bernabé amne Pablo, nun mräkä tare kri nunkwe, abko ben nunkwe ja mräkätre nete juandre ruäre nebe mun kánti yete blitakäre munbe abko rabadre bäri kuin rababa tuen nunye. Ye erere rababa dbe nun jökrä kräke. Bernabé amne Pablo,

²⁶⁻²⁷ ne abko nämane biare krütakäre tödekabtä ni Dänkien Jesukristobti. Ye abko, nunkwe Judas amne Silas dianinkä ja ngätäite nete juandre nebe mun kánti yete, aisete nunta niaratre juen blite gwärere munbe tarä juanta nunkwe nebe,

²⁸ ñobtä ñan angwane kukwe mdara jire ñan mikadre mun kótärä abko namani tuen kuin Ngöbö Úai Demeye amne nunye, akwa kukwe mda kuinkuin nuendre munkwe, ie nun tö amne Ngöbö Úai Deme tö abko krörö:

²⁹ Jändrän kämikani kukwadre ngöbö ngwarbeye, ye munkwe ñan kweta. Erere arato, jändrän däräe amne jändrän müre nótaninkä kóte däräe ngói abko munkwe ñan kweta. Erere arato, munkwe ñan ja mika gure bati bati abko ie nun amne Ngöbö Úai Deme tö.

Munkwe kukwe ne mikadre täte ne ngwane, munkwe nünandi era metre. Ne ngörä. Ne abko tikani ja mräkätrekwe taräbtä.

³⁰ Nebti ni nibu ye juani kwetre Bernabé amne Pablo mukore tarä mike Antioquíate, ye erere nikanintre. Namani juta Antioquíate angwane, nitre tödekaka Jesubti ye úkaninkró jökrä kwetre, bti tarä biani kwetre ietre ñäkäkäre btä.

³¹ Nitre ye kákwe ñäkäbare tarä yebtä angwane, kukwe namani tuen kuin ietre niaratre die mikakäre abko käi namani nuäre kri btätre.

³² Erere arato, Judas amne Silas abko Ngöbö kukwei niekä arato, aisete blitabare kwetre Ngöbö kukweibtä, ye abko kákwe ja mräkätre tödekaka Jesubti die mikani kri arato.

³³ Yebti kä nikani bä raire ta angwane, nitre Judas amne Silas juanka, ye kánti rikadreta Jerusalén, abkokäre ja mräkätre Antioquíabo kákwe niebare ietre:

Mun rikata kuin jáme Ngöbö diebti, niebare kwetre ietre.

³⁴ [Akwa Silas abko tö namani rabai, aisete nikaninta ñakare.]*

³⁵ Angwane abko, Pablo btä Bernabé namani juta Antioquíate, kä nikani kukwe kuin ni Dänkienkwé dirire gwaire ja mräkätre mda mdabe amne, nikani kukwe kuin Jesubtä kädriere ni mda mdabe.

Pablo btä Bernabé kákwe ja kwetani Juan Marcobtä

³⁶ Yebti kä nikani bä raire ta angwane, Pablokwe niebare krörö Bernabéye:

Juta kwatirekwatire te nikwe kukwe kuin ni Dänkienbtä kädriebare ja mräkätrebe, yebti niaratre tä ño mtare abko gare ñakare nie, aisete bránta basare ietre, niebare kwe ie.

³⁷ Angwane ni iti kädian nämane Juan, arabe kädian nämane Marcos abko Bernabé tö namani ngwíainta siba jabe káne kwrere.

³⁸ Akwa Marcos rikadreta siba abko ñan namani tuen dbe Pabloye, ñobtä ñan angwane nämänentre Ngöbö kukwei niere káne angwane, Marcokwe kä mikaninkä btätre juta Panfiliate. Yebti Marcos nikani sribire ñakare mda bentre, aisete ñan rikadreta siba, ie Pablo tö namani.

³⁹ Marcos rikadreta siba ñan nükäninbti Pabloye, ye abko namani blo Bernabékrä. Abtä nikanintre jene jene kwäräkwärä krörö: Bernabé nikani rute Marcobe, bti nikani rute nebebe kä butubti Chiprete.

⁴⁰ Akwa Pablo abko kákwe Silas ngwiani jabe. Angwane ja mräkätre tödekaka Jesubti kákwe mikani gare Ngöbö moto kuin yeye, bti juani kwetre.

⁴¹ Pablo nikani Silabe angwane, nikanintre güreere kä Siriäte ta, bti nikani kä Ciliciate ta, kántikánti nikani nitre gätäkä Jesu kábti die mike nüne käre Jesukrä.

16

Pablokwe Timoteo ngwiani sribire jabe

¹ Pablo namani juta Derbete, bti nikani nebe juta Listrate. Ye kánti ni tödekaka Jesubti kwani iti ie. Ni ye abko kädian nämane Timoteo. Timoteo meye abko meri israelita tödekaka Jesubti, akwa Timoteo rün abko griego.

² Akwa ja mräkätre Listrabo amne Iconiobo abko namani blite kuin Timoteobtä.

³ Angwane Pablo tö namani Timoteo ngwíain siba ja mukore, akwa Timoteo rün griego nämane gare ni jökräye, aisete nitre israelita kákwe ñan ñäkädre blo Timoteo rüere, abkokäre Pablokwe ñäräkrä mikani káne kwatabtä.

⁴ Yebti juta kántikánti namanintre niken, ye kánti nitre Jesu kukwei ngwianka amne nitre ni jie ngwianka Jerusalénbo kákwe kukwe úkaninte nuendre nitre ñakare israelitare kräke, bti juani kwetre, ye kwrere namanintre dirire.

* 15:34 Versículo 34 ye abko ñan tä tikani manuscrito bäri kuinkuinbtä.

⁵ Ye abko namanintre ja mräkä tödekaka Jesubti die mike tödeke bäri Jesubti amne, köbö kwatirekwatire ni kwati mda namani Jesu kukwei kaen ngäbti.

Pablokwe ni Macedoniabo tuani köböre

⁶ Abti sribi namani bare yete angwane, Pablo amne ni mda mda nämane niken mukore ye rikadre kukwe kuin Jesubtä niere kä Asiate, ye abko Ngöbö Üai Deme käkwe dokwä tākāni ben. Abtä niaratre nikani menteninta temen angwane, nikani kä Frigia kanti ta amne kä Galacia kanti ta nikani.

⁷ Bti nikanintre, namani känime brontera kä kädian nämane Misia ken, ye kanti tö namani rikai mda kä Bitiniate, akwa Jesu Üai käkwe ñan tuanimetre niken arato.

⁸ Abtä nikanintre jirekabe jibe bti ta Misia bare temen, bti nikaninta angwane, nikani mate mren köräbti juta Troate. Kä ye kanti ru nämane nebe.

⁹ Niaratre nämane juta Troate angwane, batibe deo Pablockwe köböbare krörö: Ni nünanka kä Macedoniate nämane iti abko namani nünaninkä krö, kä namani ribere krörö ie: Jakwe Macedonia kanti nun die mike, ni ye namani niere kore Pabloye.

¹⁰ Kä jataba ngwen dekä angwane, Pablockwe köböbare kore niebare kwe angwane, Pablo, Silas, Timoteo amne ti Lucas tärä ne tikaka, nunkwe ja mikaba juto rikakäre Macedonia, ñobtä ñan angwane Ngöbö nämane nun kärere kukwe kuin Jesubtä mikakäre gare kä Macedoniate abko gaba nunkwe.

Meri iti kä Lidia käkwe tödekani Jesubti juta Filipote

¹¹ Nun nämä juta Troate, ye kanti nun rankwaba rute angwane, nun rikaba metre ta nebe kä butubti Samotraciate. Ye kanti nunkwe kibiaba, bti jändrinane angwane, nun rikaba nebe juta Neapolite mda, kanti nun rikaba jate.

¹² Ye kanti nun rikaba güre jute Filipote mda. Juta Filipos ne abko juta ütiäte kä Macedoniate abko kanti nitre romanobo nämane nüne kwati arato. Ye kanti nun rababa nünentbe bä raire.

¹³ Abti köbö jadükakrä näire, nun rikaba juta bare mento angwane, nun rikaba nebe ñö köräbti. Ye kanti abko, kä nämane nitre israelitakwe blitakrä Ngöböbe, nun rababa nütüre, aisete nun rikaba yete. Ye kanti nun rababa tākānintbe angwane, nitre merire merire aibe käkwe ja ükaninkrö kwati yete abko ben nunkwe blitaba kukwe kuin Jesukwebtä.

¹⁴ Meri nämane ja ükaninkrö, ye ngätäite abko meri nämä iti abko kädian nämane Lidia. Lidia ye abko juta Tiatirabo, akwa nämane dän bäri kuin amne ütiäte bä tain rürümoine juta Filipote. Meri ye abko nämane Ngöbö mike ütiäte, aisete nämä Ngöbö kukwei nuen, aisete Pablo nämä blite Jesubtä angwane, Ngöbökwé niara töi mikaba tödeke Jesubti.

¹⁵ Yebti Lidia amne mräkä kwekwe btä sribikä kwekwe ngökaba jökrä ñöte Jesu käbti nunkwe angwane, Lidiakwe ribeba krörö nunye:

Tita tödeke bkänä Jesubti munta nütüre tibtä ne ngwane, brän jadüke ti juete, nieba kwe nunye.

Ye käkwe nun ketateba nebe yete.

Pablo amne Silas kitani ngite kä teri

¹⁶ Yebti kä blitakrä Ngöböbe kanti nun rikabata angwane, meri bati btä üai käme nämane, kä nämane mike sukiare abko ben nun ngätäba ji ngrabare yete. Meri ye abko klabore. Dre dre rakadrekä abko nämane niere amne bkänkä nämane ngwian den kabre niara köböire.

¹⁷ Meri bati ye abko rikaba Pablo jiebtu amne nun jiebtu, kä rikaba ngrente krikri krörö nun jiebtu:

¡Ngöbö Kri Kä Käinbti kräke nitre ne tä sribire amne, ni rabadre dianintari ñö tätre näin niere munye! meri ye rababa näin ngrente kore.

¹⁸ Ye abko nuenba raire kwe köbö kwatirekwatire, abtä bati Pablo moto ñan rababara neme nuäre meri ye kukwe nuare kore angwane, batibe Pablo rikwitateba, käkwe nieba üai käme nämane meribtä yeye krörö:

Jesukristo käbti nän mento meri nebtä, tita niere mae, nieba Pablockwe ie.

Ye btäräbe üai käme ye käkwe kä mikakaba meri yebtä.

¹⁹ Akwa meri ye bkänkätre käkwe ñan ngwian diandre mda niara köböire gaba kwetre angwane, Pablo btä Silas reketateba ietre, kä rikaba ngwena nebe kritobo ngwäreki juta te ruäre, ni mda mda nämane jändrän rürümoine, ye kanti jirikaba kwetre.

²⁰ Pablo amne Silas jirikaba kritobo nibu ye ngwäreki kwetre angwane, mikaba tuadre kwetre ietre, bti nieba kwetre mda:

Nitre israelita nibu ne nükani kukwe dirire nete abko käta kä ngwen nokre krübäte gobran rüere ni ngätäite nete,

²¹ ñobtä ñan angwane kukwe bä jene dirita kwetre abko ni ñan rabadre kaen ngäbti amne ni ñan rabadre nuene jire chi, ñobtä ñan angwane ni abko romanobo, nieba kwetre ie.

²² Angwane ni jökrä rababa romon Pablokrä amne Silakrä. Nitre kritobore abko käkwe dän tikatemma Pablobtä amne Silabtä, bti kwata metamna kritobti kwetre.

²³ Ye kwrere bkänä, Pablo amne Silas kwata metaba bäre bäre, bti kitaba ngite kä teri angwane, ni nitre ngite ngibiabtikä ye käkwe niaratre ngibiadre kuin, ñan gitiadre abkokäre, nieba kwetre ie.

²⁴ Ni nitre ngite ngibiabtikä, ie Pablo amne Silas ngibiamna kuin. Ye kwrere bkänä, Pablo amne Silas kitaba bäri gwirikri kwe, bti ngüre mikani krite kwe kä teri.

²⁵ Akwa kä jatanina ruäre deo angwane, Pablo btä Silas nämane blite Ngöböbe amne nämane kantare Ngöböye se kwrere angwane, ni mda mda nämane ngite arato abko nämane kukwe nuen.

²⁶ Ye btäräbe abko dobo nakaninkä kri krübäte, kä namani ju ni ngitekrä ye ngrükete krübäte, käkwe jukwe tikaninbe batibe jökrä amne kadena nämane kitani nitre ngite ngitebtä, ye ngitianintbe jökrä btätre se kwrere.

²⁷ Yebti ni nitre ngite ngibiabtikä nukaninta ngwäte, käkwe nikrabare amne, jukwe nämane tikani jökrä, btä okwä namani. Angwane nitre nämane ngite kä teri yete, ye abko ngitianina jökrä namani nütüre, käkwe ngitra kwatate diani ja kämikakäre au,

²⁸ akwa Pablokwe ñäkäbare ja dibti krörö ie:

Nun tä jökrä nete. Makwe ñan ja kämika, niebare kwe ie.

²⁹ Angwane ni nitre ngite ngibiabtikä ye käkwe ñotra käräbare, erere ñotra biani ie amne, nikani betekä neme gwi amne kä jürä namani krübäte btä, aibe kisete namani grükekä jökrä ngrabare, nikani namani kitanintbe Pablo amne Silas ngotobtä temen.

³⁰ Bti Pablo amne Silas ngwiani kwe ju bäre, bti niebare kwe ietre:

¿Ja mräkä, tikwe ja nuendre amne ti rabadre dianintari? niebare kwe ietre.

³¹ Abtä niaratre käkwe niebare mda ie:

Tödeke ni Dänkien Jesubti angwane, ma rabadi dianintari, ma mräkäbe gwaire jökrä, niebare kwetre ie.

³² Angwane Ngöbö kukwei kuin ni Dänkienbtä ye kädriebare ben kwetre amne niara mräkä nämane nüne ben gwi yebe arato.

³³ Köbö ye näire deo, ni nitre ngite ngibiabtikä ye käkwe Pablo amne Silas ngwiani ja kanti, käkwe träin bätäninte ietre. Yebti ni nitre ngite ngibiabtikä ye ngökani ñöte Pablokwe amne Silakwe mräkä kwekwe ben gwaire jökrä.

³⁴ Bti Pablo amne Silas ngwianinta ja gwiriete kwe, kanti bukani kwe angwane, ni nitre ngite ngibiabtikä amne mräkä kwekwe käkwe tödekani Ngöböbti ye abko käi namani bäri nuäre btätre.

³⁵ Abti jändrinane dekä, Pablo amne Silas tikadreteta abko nitre kritobore käkwe guardia juani niere ni nitre ngite ngibiabtikä yeye.

³⁶ Ye kwrere bkänä, ni nitre ngite ngibiabtikä käkwe niebare mda Pabloye:

Nitre kritobore käkwe mun tikatemnata tie, aisete mun raba nikenta. Mun rika kuin amne jäme, ie ti tö, niebare kwe ietre.

³⁷ Akwa Pablo käkwe niebare krörö mda guardiatreye:

Nun nibu ne abko romanobo, akwa nunkwe ja mikani ngite ya, ñakare ya abko ngwianintari ñakare, akwa nun kwata metaba ja ngwärecri jökrä, bti nun kitaba ngite kä teri nete. ¿Abti mtare nitre kritobore tö nun tikaiteta tiebe ya? Akwa ñakare kore. Nitre kritobore ye ara jire jata nun tiketeta au abko ie nun tö, niebare Pablokwe ietre.

³⁸ Pablokwe dre niebare, ye erere guardiatre käkwe niebare kritobotreye angwane, niaratre nekwetaninkä, ñobtä ñan angwane Pablo amne Silas abko ni romanobo niebare ietre, aisete niaratre ngite ya, ñakare ya, ye abko ngämi ngwentari metre, känenkri ñan kwata metadre abko erere nuenbare kwetre. Yebtä abko kä jürä namani btätre.

³⁹ Ye mden kisete nikanintre, käkwe ja ngite niebare gwäere Pabloye amne Silaye. Bti Pablo amne Silas nämane ngite kä teri ye dianinta ta kwetre amne rikadreta jötrö juta ye bäre mento, niebare kwetre ietre.

⁴⁰ Pablo amne Silas nämane ngite kä teri, bti tikaninteta angwane, nikaninta nebeta Lidia juete. Ye kanti ja mräkäre tödekaka Jesubti nämane abko ben blitabare kwetre niaratre die mikakäre nüne Jesukrä, yebti nikani kä mdabti abko nakaninkä kore se.

17

Pablo nükani juta Tesalónicate Silabe

¹ Abti Pablo amne Silas nikaninta angwane, nikani juta Anfípolis kanti ta amne nikani juta Apolonia kanti ta arato. Yebti nikani nebe juta Tesalónicate mda. Ne kanti sinagoga nämane kwati nitre israelitakwe.

² Gätä yebtä Pablo nämane niken käre kä ketareketare temen, ye kwrere nikaninta juta Tesalónicate angwane, köbö jadükakrä bämän krämä jire Pablokwe blitabare Jesubtä nitre israelitabe niaratre töi diankäre tödeke Jesubti abko krörö:

³ Ni Dianinkä Ngöbökwé abko krütadi, akwa rükadita nire abko nämane tikani kira Ngöbö Kukweibtä, ye abko Pablo namani bä mike ietre. Erere arato, namani niere krörö:

Tita blite Jesubtä munde, niara abko Ni Dianinkä Ngöbökwé ara, Pablo namani niere.

⁴ Angwane nitre israelita kwati kákwe ja töi kwitani Jesubtä, kákwe tödekani bti, amne nitre griego kwati kä nämane Ngöbö mike ütiäte jae amne meri kwati ütiäte ütiäte kákwe tödekani bti arato. Yebtä niaratre nämane nekete Pablo amne Silakri.

⁵ Yebtä abko, nitre israelita kwati, kräke kukwe kuin Jesubtä ye ñan namani era, ye abko namani mokrere Pablobe amne Silabe, ñobtä ñan angwane ni kwati nämane nekete ben, aiseite niaratre kákwe ni diän diän amne krene krene nämane dikekä ngwarbe krö ji ngrabare ye kánábare kwetere, bti ben gwaire kä mikani nokre kwetere juta ngrabare. Nikani betekä nebe Jasón juete Pablo amne Silas kánene. Niaratre kwandre ietre ne ngwane, rikadre ngwena ni jökrä ngwärekre abkokäre.

⁶ Akwa Pablo amne Silas kwani ñakare ietre yete. Abtä Jasón amne ja mräkä mda mda tödekaka Jesubti nämane Jasónbe gwi, ye neketaninte ietre, nikani jáke amne kitekä ja káne, nikani nebe ngwena juta gobranka ngwärekre, kä namani ngrente krörö:

Ni nükani nete ne këta kukwe mikethe blo gobran romanobo rüere kä jökräbti temen, erere nukanina ni ngätäite nete mtare.

⁷ Nitre ye abko Jasónkwe kani ngäbti ja juete. Niaratre jökrä tä emperador kukwei kite temen amne jrei mda tärä këdianta Jesu tätre niere kore, namanintre niere.

⁸ Yebtä abko nitre juta gobranka amne ni mda mda, kräke ñan namani dbe, aiseite ni jökrä namani ja ngwen ruen tare kukwe yebtä.

⁹ Akwa Jasón amne nitre tödekaka Jesubti mda kákwe ja ütiä biamna, bti tikaninteta gobrankwe.

Pablo amne Silas nikani juta Bereate

¹⁰ Yebti kä jatanina iko angwane, nane nitre israelita jatadreta Pablo amne Silas kämike, ye ngäniene ja mräkätre tödekaka Jesubti kákwe Pablo amne Silas juani jötrö ngwarbe ngitie nebe juta Bereate mda. Namani yete abti sinagoga nitre israelitakwe nämane yete abko kënti nikani blitakäre Jesubtä bentre.

¹¹ Angwane nitre israelita nämane juta Bereate abko bäri moto jáme nitre israelita Tesalónicabokrä, aiseite kukwe kuin Jesubtä diri nämane Pablokwe amne Silakwe, ye käi namani nuäre btätre kare ngäbti. Akwa Pablo amne Silas namani kukwe dirire, ye abko era ya abko tö namanintre gai, aiseite köbö kwatirekwatire namani ja töitike Ngöbö Kukweibtä.

¹² Angwane nitre israelita kwati kákwe tödekani Jesubti. Erere arato, nitre merire merire griegore ütiäte ütiäte amne ni brare brare griegore kwati kákwe tödekani bti arato.

¹³ Akwa Pablo nämane Ngöbö kukwei kuin Jesubtä dirire juta Bereate, ye gani nitre israelita Tesalónicabokwe angwane, nikani nebe juta Bereate, kä nikani ni kwati moto mike romon Pablo rüere. Yebtä abko kä namani nokre batibe.

¹⁴ Akwa ja mräkätre tödekaka Jesubti juta yete kákwe Pablo juaninta jötrö mda juta ye bäre mento amne Pablo nikani motokwäre mren kukwäre, akwa Silas amne Timoteo abko namani juta Bereate.

¹⁵ Angwane nitre tödekaka Jesubti nikani Pablo mukore, ye abko jananbare Pablo mikete juta Atenate. Yebti jataninta ja jiebti amne Pablokwe ja kukwei juani krörö ietre:

Silas amne Timoteo jata jötrö nuke ti jiebti nete, munkwe nie ietre, niebare Pablokwe ietre.

Pablokwe blitabare Jesubtä juta Atenate

¹⁶ Pablokwe Silas amne Timoteo käräbare jötrö ja jiebti, bti namani ngibiare juta Atenate. Juta ye kënti abko, ja sribebare ngöbö ngwarbere nämane kabre. Abtä Pablo moto namani ulire krübäte ngöbötre ngwarbe ye tuare.

¹⁷ Yebtä abko, nitre israelita amne ni griegore nämane Ngöbö mike ütiäte, ye ben Pablo namani blite jabe kwärükwäri kukwe kuin Jesukwebtä sinagoga nitre israelitakwe yete. Erere arato, jändrän rürümoim nämane ye kënti Pablo namani blite arato Jesubtä köbö kwatirekwatire nitre nämane ja ükaninkrö yete yebe.

¹⁸ Erere arato, nitre töbtä krikri ye nämane ni iti këdian nämane Epicúreo tukwe ye kukwei mike ütiäte abko nükani blite Pablobe. Erere arato, ni mda mda abko këdian nämane estoicos, ye abko nükani blite ben. Drekäre nita nüne kä nebtä amne dre abko era metre, yebtä abko niaratre nämane ja töitike. Niaratre ye ngätäite abko ni ruäre namani ñäke krörö Pablobtä mikakäre yakrä jae:

¡Ni ngwarbe kä jáme dokwábtí tá nain blíte ngwarbe kwärákwärá se drebtä tá blíte dikaro kore se! namanintre niere.

Angwane ni ruäre abko namani niere:

Ngöbö chui menteninikwe mikaka gare kwrere se, namanintre niere Pablobtá.

Namanintre ñáke kore, ñobtä ñan angwane Pablo namani blíte kukwe kuin Jesubtä yebtä amne, ni krütadre akwa, ni rükadreta nire nie namani Pablokwe. Yebtä Pablo namani tuen töi ñákare ietre, aisete namanintre ñáke kore.

¹⁹ Abtä Pablo jánükani kwetre junta kädian námáne Areópago ye ngwärekre. Angwane niebare krörö kwetre Pabloye:

Kukwe ño btin dirita nain makwe nunye, ye makwe mika gare bäri mda nunye abko ie nun tö.

²⁰ Kukwe bá jene btá mata blíte, ye abko dre nieta makwe abko nun tö nibi gai bäri mda, niebare kwetre Pabloye.

²¹ (Ye abko, nitre Atenabo amne ni menteni menteni námáne nüne Atenas abko, käre tö námáne nebe kukwe btin btin kukwe nuai amne dre námáne nakenká btin btin aibehtë námáne ja nákwite, aisete namani kukwe ngwentari kore Pabloye.)

²² Kukwe ngwianintari kore kwetre angwane, Pablo namani nünaninká krö niaratre ngätäite, kákwé niebare krörö ietre:

Mun Atenabo, munta ngöbötre munkwe mike bäri ütiáte, ye abko tuen kuin munbtá tie,

²³ ñobtä ñan angwane kä jökrá kántikánti munta gätäre ngöbötre munkwe kráke, kánti tita niken angwane, bati kukwe námáne tikani krörö jábtá tikwe tuaba: NGÖBÖ GARE ÑÁKARE NIE ABKO KRÁKE KÁ NETA NETE, námáne tikani kore tikwe tuaba. Akwa ye abko tá dbe, ñobtä ñan angwane Ngöbö gare ñákare munye, akwa munta káikiteká, Ngöbö ye mden abko ti bike mike gare munye.

²⁴ Ngöbö kä temen ne dáteká amne jándrän jökrá tá nüne kä temen nebtá dátebare kwe arato. Niara abko kä káinta Dänkien amne kä temen ne Dänkien, aisete ju mikata ni kä nebtákwe, te niarata nüne ñákare, ñobtä ñan angwane bäri chi kráke.

²⁵ Mdakäre abko, ni kä nebtákwe jándrän nuendre kráke abko tá ribere ñákare nie, ñobtä ñan angwane ñan tá jándrän mdei nike jire chi, akwa niara káta kä bien nünankrá nie amne tá müre bien nie amne jándrän jökrá mda mda bianta kwe nie.

²⁶ Erere arato, ni dátebare itibe kwe, ye mdenkri abko ni nena keta kabre kä nebtá, ye rabadre nüne kä jökrábtí temen kä nebtá abkokäre. Erere arato, níkwé nünandre kä kobe amne níkwé nünandre mdenete mdenete metre, ye abko úkaninte kwe ni jökrá kráke.

²⁷ Ngöbökwé kukwe úkaninte kore ni jökrá rabadre Ngöbö aibe kánenentari amne Ngöbö kánändretari angwane, nane kwandretari nie abkokäre. Niara tá kánime ni jökrá ken. Niara ñan tá mente nie.

²⁸ Ne aisete “Ngöbö köböire nita nüne amne niara arabe köböire nita dikeká kwärákwärá,” niebare ni griego itikwe. Ye mden kiséte, ni tárá tikaka mun ngätäite nete kákwé tárá tikani, btá niebare krörö kwe: “Ni abko Ngöbö ngábriánká kwe,” abko tikani kwe tárábtá.

²⁹ Ni Ngöbö ngábriánkáre, aisete Ngöbö níkwé abko oro, plata amne já sribebare ngöböre ye níkwé ñan nútüdre, ñobtä ñan angwane Ngöbö ye abko ñan já ngwarbe sribebare ja töi jenbti ni kä nebtákwe abko níkwé nútüdre Ngöböbtá.

³⁰ Kira abti kä núke mtare, ni jökrá töi námáne mráme kore Ngöböbtá. Akwa niaratre töi mráme Ngöböbtá, abtä kä námáne ja mike ngite, aisete Ngöbökwé mikani ja ngie nuen ñákare kukwe yebtä. Akwa mtare ni nünanka kä jökrábtí temen abko kákwé kukwe káme kitadre jökrá temen amne tödekadre Ngöböbtí kwetre abko Ngöböta niere kore nie,

³¹ ñobtä ñan angwane mtare Ngöbökwé köbö kitanina kukwe úkatekäre kuin era metre ni jökrábe, aisete Ngöbökwé ni dianinká iti, köböire niarakwe kukwe úkadite ni jökrábe. Ni ye abko ni ngite Ngöbö rüere ya, ñákare ya abko níedi metre kwe ni jökrá kráke. Ni ye mden abko krütani akwa, Ngöbökwé mikaninta nire, niarakwe ni ye dianinká sribi ye nuenká bá mikakäre, niebare Pablokwe.

³² Ni krütani akwa rükadreta nire niebare Pablokwe, yebtä abko ni ruäre namani Pablo kukwei mike yakrá jae amne, ni ruäre abko namani niere:

Nebti nun rükadita ma kukwei nuenta bobuta mda, namani niere mda Pabloye.

³³ Angwane Pablokwe kä mikaninká niaratre ngätäite.

³⁴ Akwa ni ruäre níkaní siba ben abko kákwé tödekani Jesubti. Nitre ye ngätäite abko ni iti kädian námáne Dionisio kákwé tödekani Jesubti. Niara abko sribiká ütiáte kri Junta Areópagobe arato. Erere arato, ni merire iti kákwé tödekani Jesubti abko kädian námáne Dámaris. Angwane ni mda mda kákwé tödekani Jesubti arato abko nakaninká kore Pablobtá juta Atenate.

18

Pablokwe sribibare juta Corintote

¹ Pablo nāmane juta Atenate. Yebti nīkani mda nebe juta Corintote.

² Juta yete abko, ni israelita kādian nāmane Aquila nāmane nūne. Aquila ne abko ni Pontobo, akwa nāmane nūne juta Romate kā Italia kānti merire kwe Priscilabe. Niaratre nibu ye abko nūkani krīre juta Corintote, űobtā űan angwane nitre israelita nāmane nūne Roma abko kākwe kā mikadrekā jōkrā juta yete, niebare emperador romanobo Claudiokwe. Ye mdenbtā abko, Aquila amne Priscila nāmane juta Corintote angwane kwani Pabloye.

³ Pablo abko jāndrān kwata sribekā jure, ye kwrere niaratre nāmane sribere arato, aiseite Pablo namani nūne niaratrebe sribikāre ketetibe bentre.

⁴ Angwane kōbō jadūkakrā bāmān kratirekratire Pablo namani niken sinagoga nitre israelitakwe yete amne, nitre israelita btā nitre griegore abko ben Pablo namani blite kisere Jesubtā. Niaratrekwe kukwe kuin Jesubtā ye mikadre era, abkokāre Pablo namani blite kore bentre.

⁵ Abti Silas amne Timoteo nāmane kā Macedonia kānti abko namani Pablo jiebtī mda. Ye ngwane mentokwāre Pablokwe ja tōi mikani kwatibe kukwe kuin Jesubtā ye niere amne, Ni Dianinkā Ngōbōkwe abko Jesu ara abko Pablo namani bā mīke metre jōkrā nitre israelita ye okwāte.

⁶ Akwa nitre israelita kwati abko jatani nebe romon Pablokrā kukwe diribtā, kā namani űāke dīanbe ie. Ye abko űan namani dbe Pablokrā, abtā dān jabtā bā ngrūkaninte kwe niaratre rūere, niebare kwe:

Munkwe ja ngie nuadi, yebtā abko mun ara jire rabadi ngite au, aiseite ti űan rabadre ngite mun dokwāre, űobtā űan angwane sribi nuendre tikwe, erere tita nuene, akwa mun űan tō kain ngābti. Ye mden kisete, mtare mentokwāre nitre űakare israelitare, ie ti bike niken kukwe kuin Jesubtā ne dirire mda. Abko kore se, niebare Pablokwe.

⁷ Bti sinagoga nitre israelitakwe, te Pablo nāmane dirire, akwa nikaninta amne ni iti kādian nāmane Tisio Justo nāmane nūne kānime sinagoga ye kwārākri abko kānti Pablo nīkani dirire mda. Tisio Justo ye abko Ngōbō kāikitakaka, kānti Pablo nīkani.

⁸ Ye ngwane abko, ni iti kādian nāmane Crispo nāmane mikani sinagoga ye dānkiene abko kākwe kukwe kuin ni Dānkienkwe mikani era, kākwe tōdekani Jesubti mrākā kwekwe ben gwaire jōkrā. Erere arato, nitre Corintobo kwati kākwe kukwe kuin Jesubtā kukwe nuani amne tōdekani kwetre Jesubti amne ngōkani űōte.

⁹ Bati kā ye ngwane deo, ni Dānkien nūkani blite kōbōre kwrere Pablobe, kākwe niebare krōrō ie:

Pablo, makwe űan kā jūrā ngwian jabtā amne, kukwe kuin tibtā ye ma rika niere janknu. Makwe űan kada keta jire chi,

¹⁰ űobtā űan angwane tita mabe amne ni jen tikwe abko tā nūne kwati Corinto nete arato, aiseite ni mda űan rabadre kukwe nuene jire blo mabtā. Abko kore se, niebare ni Dānkienkwe Pabloye.

¹¹ Ye mden kisete, Pablokwe nūnabare jāme kā kwati bti űtare nitre Corintobo ngātāite, kākwe Ngōbō kukwei diribare ietre.

¹² Abti bati Jesukwe kukwe niebare Pabloye, ye namani bare krōrō: Ni iti kādian nāmane Galiōn namani gobrane kā Acayabti gobran romanobo krāke angwane, nitre israelita kākwe ja űkaninkrō Pablo rūere, kā nikanintre ngwena nebe gobran ngwārekri.

¹³ Angwane niebare krōrō kwetre Galiōnye:

Ngōbō mikadre űiātīe bā jene abko ni ne tā nāin niere ni jōkrā tōi kwitakāre, aiseite kukweta űkaninte űō gobran romanobokwe nuendre nie, ye rūere tā dirire, niebare kwetre Galiōnye.

¹⁴ Yebtā abko Pablo jababare blite au jakrā, akwa Galiōn ara jire kākwe űākābare kāne mda nitre israelitaye:

Ni ne kākwe ja mikani ngite krūbāte angwane, kukwe nuenbare kwe ni mda rūere ne ngwane, tikwe mun israelita kukwei nuadre.

¹⁵ Akwa niara tā kukwe dirire amne ni kā űō űō amne, kukwe űkaninte űō nuendre mun israelitaye, aibehtā tā blite. Ye abko munkwe űkate ja ngātāite, űobtā űan angwane ti űan tō ja mikai kukwe munkwete ta, niebare kore Galiōnkwe.

¹⁶ Bti nitre israelita ye kitamnanta jōkrā kūnken gobrankwe.

¹⁷ Angwane ni nāmane mikani sinagoga dānkiene kādian nāmane Sōstenes, ye neketaninte nitre griegoye amne nikanintre mete ja kāne kwārākwarā se kwrere gobran Galiōn ngwārekri. Akwa Galiōn abko namani tōbikaire űakare amne namani kwekbe jirekābe.

Pablo nikaninta juta Antioquia, Siriate

¹⁸ Yebti Pablo namani nüne bā raire mda juta Corintote. Abti köbö ngwianintari mrā kwe ja mrākātre tōdekaka Jesubtiye, bti nikani juta Cencreate Corinto ken, kānti nakwani rute rikakāre kā Siriate mda. Ye ngwane abko, Priscila amne Aquila nikani siba ben. Akwa Pablo ngāmi niken rute, ye kānenkri abko ja kukwei biani kwe Ngōböye, ye bā mikakāre abko ñan namani ja dokwā drūen tikekā, akwa kukwe mikani bare tāte kwe, aisete ja dokwā drūen tikaninkā jōkrā kwe jae Cencreate, bti nikaninta rute.

¹⁹ Ru nikani, nikani, bti nikani mate juta Efesote angwane, Pablokwe Priscila amne Aquila mikaninte, bti niara abko nikani sinagoga nitre israelitakwete. Ye kānti nitre israelita nāmāne ja ūkaninkrō abko ben Pablokwe blitabare Jesubtā.

²⁰ Angwane Pablo rabadre bāri raire yete, ie nitre israelita tō namani, kā namani ketete, akwa ñan nūkaninbti ie.

²¹ Ye aisete, köbö ngwianintari mrā kwe ietre, kākwe niebare krōrō:

Ti rükadreta basare munye nete, ie Ngōbö tō ne ngwane, nikwe ja tuaita, niebare kwe ietre.

Bti Pablo nakwaninta rute, nikaninta juta Efeso bāre mento.

²² Angwane ru nikani, nikani, bti nikani nebe juta Cesareate mda. Ye kānti nikani jate, kā nikani Jerusalén köbö ngwentari ja mrākātre tōdekaka Jesubti Jerusalénbo yeye. Yebti nikani ta nebe juta Antioquia, Siriate mda.

Apolos kākwe sribibare juta Efesote

²³ Yebti kā nikanina bā raire ta angwane, Pablo nikaninta basareta kwārākwarā amne, nikani juta kwatirekwatire te kā Galacia kānti amne kā Frigia kānti ja mrākātre tōdekaka Jesubti die mike nüne kāre Jesukrā.

²⁴ Kā ye ngwane abko, ni israelita nūkanī iti juta Efesote. Niara abko kādian nāmāne Apolos. Akwa Apolos ye abko ni juta Alejandrīabo abko nāmāne blite kuin amne ja tōitikani kuin Ngōbö Kukweibitā kwe arato.

²⁵ Erere arato, Ji ni Dānkienkwe diribarera kuin ie amne, kā namani nuāre btā kukwe kuin Jesubtā dirire kuin era metre. Akwa kukwe diribare Juan Bautistakwe aibe nāmāne gare ie.

²⁶ Ye aisete, bati sinagoga nitre israelitakwe kānti Apolos nāmāne dirire angwane, kukwei nuani Priscilakwe amne Aquilakwe. Yebti Priscila amne Aquila nikani Apolos ngwena jenena temen, bti Ji Ngōbökwē mikani gare bāri metre mda kwetre ie.

²⁷ Abti Apolos tō namani rikai kā Acayate mda angwane, ja mrākātre tōdekaka Jesubti kākwe niara die mikani niken Ngōbö diebti amne ja mrākātre tōdekaka Jesubti Acayate kākwe Apolos kadre ngābti kuin, abkokāre tārā tikani ja mrākākwe ngwiandre ie. Ye erere Apolos nikani, namani Acaya angwane, ja mrākātre tōdekaka Jesubti ye die mikani kri kwe. Ngōbö moto kuin köböire ja mrākākwe tōdekani Jesubti abko die mikani Apolokwe abko krōrō:

²⁸ Jesu abko Ni Dianinkā ñakare Ngōbökwē abko nitre israelita nāmāne dirire, akwa ni jōkrā ngwārekri, Jesu abko Ni Dianinkā Ngōbökwē ara abko Apolos namani bā mike metre tārā Ngōbökwēbti, aisete nitre israelita ñan rabadre kukwe ye rükente abko nakaninkā kore kā Acaya kānti.

19

Pablokwe sribibare juta Efesote

¹ Abti Apolos nāmāne juta Corintote angwane, Pablo nāmāne kā Galacia kānti amne kā Frigia kānti, nikani mintrinta temen ngudre ngrabare amne nikani nebe juta Efesote mda. Ye kānti bati nitre ja tōitikaka Jesu kukweibitā nāmāne ruāre abko ben namani ngātāi.

² Angwane niebare kwe ietre:

¿Munkwe tōdekani Jesubti, ye ngwane Ngōbö Ūai Deme nūkanī munbtā ya? niebare kwe ietre.

Angwane niaratre kākwe niebare mda Pabloye:

Nunkwe ñan ni kukwei nuabare blite Ngōbö Ūai Deme btā, niebare kwetre.

³ Angwane Pablokwe niebareta krōrō mda ietre:

¿Se abko, nirekwe mun ngōkani ñōte? niebare Pablokwe ietre.

Angwane niaratre kākwe niebare mda:

Ja ngōkadre ñōte diribare Juan Bautistakwe, ye kwrere nunkwe nuenbare, niebare kwetre ie.

⁴ Abtā Pablokwe niebare mda ietre:

Ni jōkrā kā nāmāne kukwe kāmekāme kite jōkrā temen amne nāmāne Ngōbö mike tāte, ye bā mikakāre Juan nāmāne ni ngōkō ñōte. Akwa ni mdara jire jatani niara jiebti abko bti tōdekadre, niebare kwe. Ni ye abko Jesu ara, btā blitabare kore Juankwe, niebare Pablokwe ietre.

⁵ Pablokwe blitabare, ye jarabare ja mräkätre yeye angwane, ngökanintre jökrä ñöte kwe ni Dänkien Jesu käbti.

⁶ Angwane Pablokwe kise mikani btitre, ye btäräbe Ngöbö Üai Deme nukaninbe btätre angwane, namani blite kukwe jenenanbti btä ja töitike ñakare ñakare amne namanintre Ngöbö kukwei niere arato.

⁷ Nitre namani yete ye abko bäsi ni brare be ni jätäbti nibu näre nämane ja ükaninkrö abko btä kukwe nakaninkä kore.

⁸ Abti sö krämä jire Pablo namani niken sinagoga nitre israelitakwe te köbö jadükakrä näire. Angwane kä jürä namani ñakare btä blitare Ngöböbtä amne, ni Dänkienta gobrane ño ni kwekwe ngätäite abko ni mda mda käkwe mikadre era, abkobtä Pablo namani blite kisere bentre niaratre töi kwitakrä Jesukri.

⁹ Akwa sö krämä nikani ta angwane, ni ruäre käkwe ja dokwä mikani ribi abko kräke Pablo kukwei ñan namani era, aiseite ni jökrä okwäbti namanintre ñäke blo Ji Btin ye rüere. Abtä Pablokwe kä mikaninkä btätre sinagogabtä amne, nitre ja töitikaka kukwe kuin Jesukwebtä aibe Pablokwe ngwiani jabe amne nikanintre nebe kwela Tiranokwete. Ye kanti Pablo namani dirire köbö kwatirekwatire ietre.

¹⁰ Pablokwe diribare kore kä kubu jire kä ye kanti, aiseite nitre israelita amne nitre ñakare israelitare nämane nüne kwati kä Asiate, ye käkwe kukwe kuin ni Dänkien Jesubtä kukwei nuani kuin jökrä.

¹¹ Kä ye ngwane abko, Ngöbökwes sribi kri ñan tuabare nuenbare kri krübäte Pablo köböire,

¹² aiseite dän kukwän ja dokwä amne ja ngüre jue mriatekrä namani neketekä jirekäbe Pablobtä, ye abko jänamani niken amne mika namani ni bren brenbti angwane, ni bren ye namani nebeta quinta batibe Ngöbö diebti amne, üai käme namani ni brenbtä, ye namani niken jötrö ngwarbe mento btä arato, aiseite namani nebata kuin jökrä.

¹³ Akwa bati kukwe nakaninkä krörö: Ni israelita ruäre nämane näin kwäräkwärä üai kämekäme juentari ni mda mdabtä abko tö namanintre sribi nuein ni Dänkien Jesu käbti, kä namanintre niere krörö üai kämeye: Jesu ye, btä Pablota kukwe dirire, Jesu ye käbti nän mento ni nebtä, namanintre niere üai kämeye.

¹⁴ Ni israelita iti blitaka ni mda mda diäre Ngöböbe dänkien kädian nämane Esceva abko ngäbriänkä ni kükü kä nämane üai käme juentari kore.

¹⁵ Akwa bati ni ni kükü ye nämane ni bren gwiriete üai käme juantarikäre kore angwane, batibe üai käme käkwe niebare krörö ietre:

Jesu garera kuin tie amne Pablo abko nire garera tie arato, akwa ðmun abko nire amarebti kite ti juentari kore ye? niebare kwe ietre.

¹⁶ Ye btäräbe, ni btä üai käme nämane ye nakwani nitre yebtä, kä nikani mete ja dibti kwäräkwärä se kwrere, käkwe niaratre mikani bren jökrä ngrabare amne, ngitiani bütiere jökrä ju ye kanti mentokwäre amne namani träinträin jökrä ngrabare.

¹⁷ Abtä nitre israelita amne nitre ñakare israelitare nünanka juta Efesote käkwe kukwe ye gani angwane, kä jürä namani kri btätre. Ne kwrere ni Dänkien Jesu kä nikani nebe bäri ütiäte kä ngrabare temen.

¹⁸ Kä ye ngwane abko, ni kwati käkwe tödekani Jesubti, käkwe kukwe nuenbare kämekäme aune ngürün mikani ni mdabtä ja kukweibti, ye namani nüke niere metre ja ngwärekre jökrä.

¹⁹ Erere arato, ni kwati kwrarekwrare amne ni kwati nämane ja mike sukiare abko käkwe täräkwata ja töitikakrä kwetre rabakäre kwrare amne sukiare, ye ükaninkrö jökrä, bti jatani ngwena, bti kukwani jökrä kwetre ni jökrä okwäbti. Tärä kukwani kwetre ye abko ngwian kitaninkä, nuäi btä kwetre abko tanbare angwane, ngwian ganinte 50 mili kwetre tärä yebtä.

²⁰ Ye kwrere kukwe kuin ni Dänkienkwe nikani niren bäri mda amne Ngöbö di kri nikani neme gare ni jökräye arato.

²¹ Kukwe nakaninkä kore, yebti Pablo jatani yäketa basare ja mräkätreye Macedoniate amne Acayate mda. Ye kanti rikadre neme mda Jerusalén. Jerusalén kanti abko rikadre ta neme juta Roma niebare kwe.

²² Akwa niara ngämi niken, ye känenkri sribi muko kwe juani nibu käne kwe nebe kä Macedonia kanti. Nitre juani nibu Pablokwe ye abko Timoteo amne Erasto juani käne kwe, akwa Pablo abko namani bä raire mda kä Asiate.

Ngöbö ngwarbe mikaka era käkwe rübare Pablobe

²³ Kä ye ngwane abko, Ji Btin diribare Pablokwe, yebtä abko ni ruäre Efesobo namani ngüdrekä krübäte ja ngätäite,

²⁴ ñöbtä ñan angwane ni iti kädian nämane Demetrio nämane plata sribere ju ngöbö Dianakwe bä kwrere abko käkwe kukwe mikanintbe Pablo rüere, aiseite ni jökrä namani

ngüdreka kore. Demetrio ye abko nämane plata sribere kia nuärebe abko btä nämane ju ngöbö Dianakwe bä mike nuäre. Yebti abko nämane ngwian ganaine kabre amne nitre sribikä niara kwrere nämane ngwian ganaine kabre arato.

²⁵ Ne aiseté ni mda mda nämane sribire ja kwrere Demetriobe abko Demetriokwe ükaninkrö jökrä ja kánti, bti niebare kwe ietre:

Ja mräkä, sribi nikwe, nebti nita nüne kuin, ye garera munye.

²⁶ Akwa ni nükani iti nete kädianta Pablo. Ye nena gare munye amne munta tuen. Niara ye abko tä näin niere krörö: Jändrän sribeta ngöböre ni kä nebtäkwe abko ñakare ngöbö era metre, tä niere. Yebti tä ni kwati töi kwite jakri, ne ñan ni juta Efesote nete aibe töi kwitata kwe amne, ni kä Asiate abko töi kwitata kwati krübäte kwe arato.

²⁷ Ye abko, kukwe tare krübäte nikrä, ñobtä ñan angwane jändrän rürümointa nikwe, ye juandi ngwarbe jökrä kwe nikän. Erere arato, ju ngöbö Dianakwe mikata ütiäte kri jae, ye kwrere ñan mika rabadre ütiäte mda. Ne aiseté, ngöbö Diana ñan mikadre ütiäte mda, akwa mikadre ngwarbe jae nitre Asiabokwe amne, ni kä jökräbti kräke rabadre ütiäte ñakare mda arato ruen tie, niebare Demetriokwe.

²⁸ Abtä nitre Demetrio kukwe nuaka moto namani romon krübäte, käkwe ngratebare krikri krörö:

¡Diana ngöbö nitre Efesobokwe aibe ütiäte kri! namanintre niere.

²⁹ Yebtä abko, ni jökrä kwe kä namani nokre juta Efesote angwane, ni Macedoniabo nämane näin nibu Pablo mukore kädian nämane Gayo amne Aristarco, ye abko neketanintre nitre yeye, bti nikani jáke, nikani kitekä ja käne nebe kä gätäkrä ye kánti.

³⁰ Abtä Pablo tö namani rikai kä ye kánti ñäkäkäre nitre yeye akwa, ja mräkäre tödekaka Jesubti käkwe ñan Pablo gibianinkä niken yete.

³¹ Erere arato, Pablo kukwe muko ruäre nämane sribire gobrane kä Asiate käkwe kukwe juani krörö Pablokrä: Kä gätäkrä ye kánti ma ñan rikadre abko niemna kwetre Pabloye.

³² Akwa gätä nämane, ye kánti abko ni jökrä namani ñäke ngwarbe ja te tata kwäräkwärä, ñobtä ñan angwane ni jökrä nämane kä mike nokre, akwa drekäre ja ükaninkrö kwetre abko ñan nämane gare ni kwatiye akwa, nämane siba yete.

³³ Abtä nitre israelita käkwe ja mräkä iti kädian nämane Alejandro kitaninkä nebe blite ni jökrä ngwäreki nitre israelitakrä. Angwane dre niedre abko ni ruäre käkwe niebare Alejandroye. Angwane ni jökrä rabadre kwekbe amne, Alejandrokwe blitadre nitre israelitakrä abko niebare kisebti kwe ni jökräye.

³⁴ Akwa Alejandro abko ni israelita gani nitre ñakare israelitare Efesobokwe btä angwane, ñan tö namani niara kukwei nuai, aiseté namani ngrente krikri bäsi ñänä okwä kroub näre krörö: ¡Diana nitre Efesobokwe aibe ütiäte kri! namanintre niere.

³⁵ Abtä ni mikani sribire alcalde kwrere nitre romanobokwe juta Efesokrä käkwe nitre ye kukwe ötani jökrä, bti niebare krörö kwe ietre:

Mun nünanka juta Efesote nete, ngöbö merire ütiäte kri Diana abko kwe juta nete amne niara bä ara jire mikani jäbtä nämane kä käimbti abko nükani temen kä nebtä, ye abko ni nünanka juta nete tä mikani ngibiabtikä, ye garera ni kä jökräbti yeye.

³⁶ Ye aiseté ni mda ñan rabadre kukwe ye rükente jire chi, aiseté mun rabadre kwekbe jirekäbe amne munkwe ñan jändrän nuen ngwarbe okwä kware.

³⁷ Ni nibu jänü munkwe nete noko käkwe kukwe blo nuenbare ñakare ju ngöbö Dianakwe rüere amne ñäke ñakare arato ngöbö Diana rüere.

³⁸ Akwa Demetrio amne sribikä mda mda niara kwrere, kwe kukwe tarä ni mda mda rüere ne ngwane, ju tarä kukwe ükatekrä kritobo krikri ngwäreki, aiseté niaratre rikadre kukwe kwe ngwane nebe kritobo krikri ngwäreki amne ja kweta kwärikwäri kwetre kukwe jen kwe yebtä.

³⁹ Akwa mun tö blitai kukwe mda mda abtä ne ngwane, kukwe ye järekiadre nebe gätäte amne blitadre ja ngwäreki jökrä btä abko tita niere munye,

⁴⁰ ñobtä ñan angwane kukwe nakaka mtare, sebtä nita ngüdreka ngwarbe amne nita kä mike nokre niedre nibtä, abtä ni rabadre ngite nitre romanobo okwäbti amne kukwe ñan kwandre niedre nie jabtä. Erere arato, ¿ñobtä nita ngüdreka amne ñobtä nita kä mike nokre ngwiandretari nie, yebtä nikwe dre niedre? Abko kore se, niebare kwe ietre.

⁴¹ Yebti ni jökrä juaninta kwe ja gwiriete gwiriete kwäräkwärä.

20

Nitre tödekaka Jesubti kä Macedoniate amne kä Acayate, ie Pablo nikaninta basare

¹ Kä namani nokre juta Efesote, ye täbti Pablokwe nitre tödekaka Jesubti käräbare jökrä ja kánti, käkwe blitabare amne niaratre kitani nüne janknu Jesukrä. Yebti Pablokwe köbö ngwianintari mrä ietre, bti nikani Macedonia mda.

² Pablo namani Macedonia angwane, nikani basare kä jökräbti temen ja mräkätäre tödekaka Jesubti Macedoniate yeye, käkwe blitabare kabre ja mräkätäre yebe kä mikakäre nuäre btätäre. Abti Pablo nikani nebe kä Acaya, Grecia kánti mda.

³ Namani Grecia, ye kánti nünabare sö krämä kwe. Abti jatanina niken rute rikakäre kä Sirate angwane, nitre israelita nämane kämika braire abko gani kwe. Abtä nikaninta jirekäre güre ja jiebti Macedonia kánti ta.

⁴ Ye ngwane abko ja mräkätäre rikaba ruäre Pablo mukore abko nere: Sópater nikani. Sópater ye abko ni juta Bereabo. Niara abko Pirro ngobo kwe. Erere arato, Aristarco btä Segundo Tesalónicabo rikaba. Mdakäre abko, Gayo juta Derbebo amne Timoteo, Tíquico btä Trófimo kä Asiabo rikaba siba Pablo mukore nebebe Macedonia kánti ta.

⁵ Ye kánti ja mräkätäre ye abko rikaba käne rute, rababa nun ngibiare juta Troate.

⁶ Akwa nun abko käkwe Pascua mikaba niken ta juta Filipote. Pascua rikaba ta, täbti nun rankwaba rute juta Filipote angwane, nunkwe nuaba köbörike jire amne, nun rikaba ngätäi ja mräkätäre rikaba käne rute yebe juta Troate. Kä ye kánti nun rababa bämän krati.

Ni iti kädian nämane Eutico mikaninta nire juta Troate

⁷ Yebti köbö kena bämante, nunkwe ja ükkröba jökrä mrökäre jabe Jesu ngatani ngwiankäreta töre jae amne, nitre tödekaka Jesubti, ie Pablo nämä dirire. Pablo rababarata yäketa jetbe se kwrere, aiseite rikaba blite janknu abko kä jataba nüke ruäre deo.

⁸ Angwane kukwe rakakaba krörö: Ju mikani komä jabti kukwäne abko kánti nun nämä amne, ju mrä käin ninkri, kánti nun nämä ja ükaninkrö amne, ñotra nämä mikani kabre gwita temen, kánti nun nämä.

⁹ Angwane ni bati kädian nämane Eutico abko nämä siba yete, akwa nämä tākänintbe bentanante ni kukwe nuen. Pablokwe blitaba raire, aiseite köbö namani krübäte Eutico okwäte. Rikaba kibien nguseta bentanante yete, kánti betakaba timon ju komä jabti kukwäne kánti nun nämane mrä käin ninkri, ye kánti Eutico betakaba timon, aiseite rikaba ngitiekä ngwäkäre temen. Yebti gokröbata amne rababa kwekbe.

¹⁰ Angwane Pablo rikabata timon, käkwe ni bati ye ngwäkä ketaba jabtä ja kisete, bti nieba krörö kwe ja mräkätreye:

Ni ne tä nire, aiseite mun ñan rekwetaka jiebti, nieba kwe ietre.

¹¹ Yebti Pablo rikabata kukwäne rababata gwi angwane, nunkwe mröba gwaire Jesu ngatani ngwiankäreta töre jae. Angwane Pablo rikaba blite janknu, aiseite kä rükaba ngwen ie blitabtä. Yebti dekä angwane rikabata.

¹² Akwa ni betakaba timon ye abko nämä nire amne jirikabata mräkäkwe, aiseite kä rababa nuäre krübäte ja mräkätrebtä yete. Ne abko rakakaba kore juta Troate.

Pablokwe köbö ngwianintari mrä ja mräkä juta Efesoboye

¹³ Yebti nun rankwaba rute amne nun rikaba nebe käne juta Asónte Pablo ngäbti. Nun janama Pablo tuen ngäbti kore, ñöbtä ñan angwane niara tö rababa näin güre jateta temen abko erere rikaba.

¹⁴ Ne aiseite nun rababa ngätäi ben juta Asónte angwane, rankwaba rute nunbe, bti nun rikaba nebe juta Mitilenete mda.

¹⁵ Yebti jändrinane angwane, nun rikaba ta angwane, nun rikaba känime kä butu kädian nämane Quío ngware ta. Abti jändrinane angwane, nun rikaba mate mren köräbti juta Samote. Yebti nun rikaba mate kä Trogilio kánti. Abti jändrinane angwane, nun rikaba mate juta Miletote.

¹⁶ Nun rikaba jötrö kore, ñöbtä ñan angwane Pablo ñan tö namani rabai neketebtä raire dikaro kä Asiate, aiseite nun ñan rikaba juta Efesote. Pablo tö rababa rikai jötrö nebe Jerusalén, ñöbtä ñan angwane Pentecostés köböi, btä niara tö rababa kwain arato juta Jerusalén, aiseite nun rikaba metre ta kore.

¹⁷ Pablo nämä juta Miletote angwane, nitre ni tödekaka Jesubti jie ngwianka Efesote abko Pablokwe ni juanba iti niaratre kärere nüke ja kánti.

¹⁸ Erere bkänä, nitre tödekaka Jesubti jie ngwianka ye rükaba nun kánti angwane, nieba krörö kwe ietre:

Ti rükaba kena mun ngätäite kä Asiate nete abti kä nüke mtare tikwe nünanba ño mun okwäbti ye töre kuin munye abko krörö:

¹⁹ Nitre israelita käre nämä kukwe miketbe taretare ti rüere, kä nämä ti nike krübäte akwa, käre ti nämä sribire ja moto jämenbti ni Dänkienkrä mun ngätäite. Ti nämä bike tidrä ni mda mdabtä amne ti nämä ja müaire arato.

²⁰ Akwa tikwe kada ketaba ñakare, käkwe kukwe kuin mun die mikakrä, ye abko tikwe diriba täte janknu munye, amne ti nämä dirire ja ngwäreki jökrä amne ju kwatirekwatire te munye.

²¹ Ne mden aisete, nitre israelita amne ni ñakare israelitare kákwe kukwe káme kitadre temen amne jatadreta Ngöböye, kákwe tödekadre ni Dänkien Jesubti abko ti náma dirire ietre abko erere ti náma sribire mun ngätäite.

²² Mtare Ngöbö Úai káta ti juenta Jerusalén, aisete ti bike nikenta akwa, dre rakadiká tibtä yete abko gare ñakare tie.

²³ Akwa juta kwatirekwatire te ti náin abko ti kitadi ngite ká teri amne tikwe ja tare nikadi krübáte abko Ngöbö Úai Deme káta niere, ne aibe gare kore tie.

²⁴ Akwa kukwe kuin Jesubtä, mden káta Ngöbö ni tareká ja moto kuinbti niere, ye tikwe kádriedre ni jókrábe abko sribi mikani ti kisete ti Dänkien Jesukwe, ye aibe abko ti tö mikai neme bare táte jókrá ká ngwiane nuäre jabtá, aisete tita núne ya, ñakare ya abko útiáte ñakare tikrá.

²⁵ Mtare Ngöböta gobrane ño ni kwekwe ngätäite, ye tikwe diribare munye. Mun ye abko kákwe ñan ti tuadreta mda abko gare kuin tie.

²⁶ Ye aisete nire nire ká Asiate kákwe ñan Ngöbö kukwei mikani era jae, abtä ja ruen ngite ñakare tie,

²⁷ ñobtä ñan angwane Ngöböta kukwe miketbe ño ni diantarikäre Jesu köböire abko tikwe niebare jókrá munye amne tikwe kukwe era erere rúkaninte ñakare munye arato.

²⁸ Ne aisete munkwe ja ngibia au amne, nitre tödekaka Jesubti kókani Ngöböke Jesu dáriebti jakrá abko Ngöbö Úai Deme kákwe mun mikani ngibiaka, ye munkwe ngibia kuin arato,

²⁹ ñobtä ñan angwane ti náinta, abti lobo romon tá kite obeja kámike kwetadre jae, ye kwrere jire ni jatadi bátáká ngwarbe nitre tödekaka Jesubti rüere juankäre ngwarbe.

³⁰ Ne abko ni ruäre mun ngätäite akwa, jatadi ni ngökó arato, nitre tödekaka Jesubti diankäre jakrí, ye abko gare kuin tie.

³¹ ¡Ye aisete munkwe mokre jabtí! Ká komá jire, dibire rare müare kwärá, tikwe mun mikaba mokre kukwe ne kwrere kánenkri, ye abko mun itire itire kákwe ngwianta töre jae.

³² Ja mrákátre, mtare ti bike mun mike gare Ngöböye. Erere arato, ti bike mun mike gare kukwe kuin Ngöböke yeye. Ngöböta ni tarere ja moto kuinbti, ye abko niara kukwei kuin tá mike gare nie. Kukwe kuin Ngöböke ye raba mun die mike núne bári dite Ngöbökrá amne, nitre mikani deme Ngöböke, kráke Ngöböke kukwe úkaninte die mikakäre ká mrá angwane, ye ben gwaire mun die mikadi siba kwe abko kukwe kuin Ngöböke tá mike gare nie.

³³ Ti náma Ngöbö Kukwei dirire mun ngätäite angwane, tikwe ñan ngwian amne dán ni mda mdakwe ribeba jae.

³⁴ Akwa tikwe sribiba ja kise jenbti jakrá amne, ni mda mda náma sribire tibe, ye kráke tikwe sribiba, ye gare kuin munye.

³⁵ Ne aisete sribidre ño jen jakrá amne ni mda mdakwe jándrán ñakare abko die mikadre bti, ye abko tikwe diriba munye. Kukwe ne kwrere, btá ni Dänkien Jesu kákwe blitabare bati, ye abko tádre töre käre nie, abkokäre niebare kröró kwe: Nita jándrán bien ni mdaye, btá káta neme bári nuäre nibtä ni jándrán kaka ngábtí ye ngwá, niebare ni Dänkienkwe. Abko kore se, nieba Pablokwe ietre.

³⁶ Pablokwe blitaba únán jókrá kore, bti rababa ngukudokwábtí temen, kákwe blitaba Ngöböbe ja mrákátre náma ben yete yebe.

³⁷ Angwane müare kwärá, ni jókrá kákwe küde kitaba mrá Pablo ngärá, ká rababa Pablo demaine ngwärebtá kwárikwári.

³⁸ Akwa Pablo ñan tuadreta mda nieba kwe, yebtá abko ni jókrá moto rababa ulire ulire. Nebti rikaba Pablo mukore nebe ru kánti.

21

Pablo nikani Jerusalén

¹ Ja mrákátre Efesobo rababa nunye angwane, nun rankwabata rute, bti nun rikaba metre nebe ká butu ká dian námane Cos kánti. Bti jándrinane nun rikaba ta nebe juta Rodate. Ye kánti nun rikaba mda nebe mren korábtí juta Pátarate.

² Pátarate yete abko, ru náma krati mda abko jataba niken ká Fenicia kánti abko te nun rankwaba mda.

³ Angwane nun rikaba amne ká butu Chipre yebtá nun okwá rababa amne, nun rikaba janknu ta ká butu Chiprete, ye rabakaba nun küde ngeberekri amne, nun rikaba mate juta Tiro ká Siriate angwane, tribe mikateba kwetre yete.

⁴ Juta yete ja mrákátre tödekaka Jesubti kwanba nunye amne, nun rababa bämán krati niaratrebe yete. Angwane Ngöbö Úai Deme köböire Pablo ñan rikadre nebe Jerusalén abko ja mráká ye rababa niere kisere Pabloye.

⁵ Akwa kā rikaba bāmān krati ta angwane, nun jataba yāketa angwane, ja mrākātre yete merire, brare amne ngābākre kwekwe rikaba jōkrā nun mukore neme mren kōrābti juta bāre mento. Ye kānti nun rababa ngukudokwābti temen, kākwe blitaba Ngōbōbe.

⁶ Bti nunkwe kōbō ngwiantariba mrā jae kwārikwāri angwane, nun rankwabata rute amne ja mrākātre abko rikabata jōkrā ja gwiriete.

⁷ Nun nāma juta Tirote, bti nun rikaba ta amne nun rikabata mrā rute mrenbti amne nun rababa juta Tolemaida. Ye kānti nun rikaba jate nebe jutate amne, ja mrākātre tōdekaka Jesubti nāma yete abko, ie nunkwe kōbō ngwiantariba, bti nun rababa kibien yete.

⁸ Jāndrinane dekā, nun rikaba gūre-re ta nebe juta Cesareate mda. Angwane ni kukwei kuin Jesubtā kādriekā ni mda mdabe nāma iti yete abko kādian nāmāne Felipe, kānti nun rababa. Felipe ye abko ni dianinkā ni kükū ni mda mda die mikaka juta Jerusalénite ye mden abko nāmāne yete, kānti nun rababa.

⁹ Felipe abko ngānkān bati kaibekai-be nāma nibkā gwi. Niaratre abko Ngōbō kukwei niekā.

¹⁰ Nun rababara raire yete angwane, ni Ngōbō kukwei niekā kā Judeabo kādian nāmāne Agabo rūkaba nun kānti.

¹¹ Rūkaba nun ngwārekri noko kwrere, kākwe dān kukwān ja mākātekrā ōtōbu ta nāmāne Pablotā, ye diankaba kwe, bti ja kise amne ja ngoto mākāteba jōkrā kwe, bti nieba krōrō kwe:

Dān kukwān ja mākātekrā ne bkānkā abko nitre israelita kākwe mākādite krōrō Jerusalén, bti biandi nitre űakare israelitareye kitadre ngite abko nieta kore Ngōbō Ūai Demekwe. Abko kore se, nieba Agabokwe.

¹² Agabokwe blitaba kore, ye kukwei jaraba nunye amne ja mrākātre Cesareaboye angwane, Pablo űan rikadre Jerusalén abko nun rababa ribere kisere ie.

¹³ Akwa Pablo kākwe nieba krōrō mda nun kāre:

Ti mākādrete krāke tita biare. Erere arato, ti mūre ketadre Jerusalén ti Dānkien Jesu dokwāre, krāke tita juto biare arato. űYe űobtā mun nibi mūen amarebti mun nibi ti moto mike bāri ulire mda yere? nieba kwe nunye.

¹⁴ Pablo tōi rikwitaba űakare nunye, abtā rababa jirekābe nunye amne nunkwe nieba krōrō mda:

Ni Dānkien tō dreye, ye erere raba bare, nunkwe nieba.

¹⁵ Abti nunkwe ja mikaba juto jōkrā, bti nun rikaba Jerusalén.

¹⁶ Angwane ja mrākātre Cesareabo tōdekaka Jesubti rikaba ruāre nun mukore. Niaratre ye abko rikaba nun ngwena nebe ni iti kādian nāmāne Mnason juete, kānti nun rababa. Mnason ne abko ni Chiprebo amne, nitre tōdekaka Jesubti ngātāite niarakwe tōdekani bāri kāne Jesubti ni mda mda ben gwaire arato.

Pablo nūkani Jerusalén, kānti gātāba Santiagobe

¹⁷ Yebti nun rikaba nebe Jerusalén. Angwane ja mrākātre tōdekaka Jesubti, btā kā rababa nuāre nun kare ngābti.

¹⁸ Abti jāndrinane angwane, Pablo rikaba nunbe basare Santiagoye. Nun rikaba Santiago kānti amne, ja mrākātre tōdekaka Jesubti jie ngwianka nāma ja űkaninkrō jōkrā yete, kānti nun rababa.

¹⁹ Angwane Pablokwe kōbō ngwiantariba jōkrā ietre, bti sribi Pablokwe ye kōbōire Ngōbōkwe dre nuenbare nitre űakare israelitare ngātāite, ye Pablokwe nieba jōkrā ja tāritāri ietre.

²⁰ Pablokwe blitaba kore, yebtā abko ja mrākātrekwe Ngōbō kāikitakaba, bti nieba krōrō kwetwe Pabloye:

Ja mrākā, nitre israelita mili kabre kāta tōdeka Jesubti nete tā tuen mae. Ye abko Kukwe Biani Ngōbōkwe Moiséye abko erere mikadre tāte jōkrā, tātre niere.

²¹ Akwa Kukwe Biani Ngōbōkwe Moiséye abko nitre israelita nūnanka kā mdabti nitre űakare israelitare ngātāite kākwe űan mikadre tāte abko mata dirire ietre abko ni mda mda kāta niere ngwarbe ma rūere ietre. Erere arato, ngābākre brare kiakia abko űārākrā mikadre űakare kwatabtā mata niere amne, nitre israelita tā nūne űo, ye kwere űan nuendre mda, mata niere abko ni mda mda kāta niere ngwarbe ma rūere ietre arato.

²² űAisete nikwe dre nuendre kukwe ye bā mikakrā ngwarbe? Ma nūkaninta nete gadi ja mrākātrekwe.

²³ Aisete makwe jāndrān krōrō nuendre abko rabadre bāri kuin ruen nunye: Ni brare nibkā tā nun ngātāite nete kākwe ja kukwe biani Ngōbōye abko erere mikadre tāte kwetwe.

²⁴ Ni ye abko ma rika ngwena jabe, ben makwe ja mika dbe Ngōbō ngwārekri, Moisékwe nuemna űo ye kwrere amne, jāndrān kukwadre Ngōbō kāikitakāre, ye makwe űitiā bian jōkrā krāke. Niaratre kākwe kukwe nuendre tāte jōkrā, ye bā mikakāre niarakre kwe ja

dokwä drüen mikadi tikadrekä jökrä. Makwe nuendre kore kräke, ne köböire blitata ngwarbe ma rüere gadi ni jökräkwé mahtä. Erere arato, Kukwe Biani Ngöbökwé Moiséye abko mata mike täte, ye abko gadi kwetre arato.

²⁵ Akwa nitre ñakare israelitare käkwe tödekani Jesubti abko kräke nunkwe kukwe ükaninte ño, ye erere nunkwe juanina kräke abko krörö: Ngri biani ngöbö ngwarbe mikakrä ütiäte ñan kwetadre kwetre. Ngri däre amne jändrän kämikani köbti ñan kwetadre kwetre arato. Mdakäre abko, ñan ja mikadre gure bati bati kwetre. Ne abko nunkwe tikani kore kräke, aiseté kukwe ne aibe mikadre täte kwetre. Abko kore se, niebare Santiagokwe Pabloye.

²⁶ Ye erere bkänä, Pablo nikani ni nibkä ye ngwena jabe. Abti jändrinane, ja mikani dbe gwaire bentre kwe, bti ja kukwei biani kwetre Ngöböye, ye rabadre bare ñongwane amne, jändrän biandre kwetre kämikadre Ngöböye ja kukwei mikani täte bä mikakäre, ye abko biandre ñongwane kwetre abko nikani niere ju blitakrä Ngöböbe ye kanti.

Pablo kitani ngite kä teri

²⁷ Yebti kä jatanina niken bämän krati ta ietre ja mikakrä dbe angwane, batibe nitre israelita nünanka kä Asiate nämáne ruäre, ye ie Pablo jatabare ju blitakrä Ngöböbe kanti angwane, jötrö ngwarbe ni jökrä moto mikani romon kwetre Pablo rüere. Ye btäräbe nakwani jökrä Pablobtä,

²⁸ kä namani ngrente krörö:

¡Mun israelita ye erere jakwe jökrä nun die mike nete! Ni ne mden tä dirikä kä jökräbti temen, kukwe dirire blo juta nikwe rüere amne, Kukwe Biani Ngöbökwé Moiséye, ye rüere tä ñäke blo arato. Mdakäre abko, nitre ñakare israelitare jänükani kwe ju deme blitakrä Ngöböbe kanti nete arato, kä mikakäre deme ñakare. Ye mden kisete, mun israelita tä nete, ye erere jakwe jökrä nun die mike kite künken ju bäre mento nete, namanintre ngrente.

²⁹ Namanintre ngrente kore, ñobtä ñan angwane ni ñakare israelitare Efesobo kädian nämáne Trófimo abko ben Pablo tuani dikekä kwetre dekä juta ngrabare, aiseté Pablo nükani ngwena nebe ju blitakrä Ngöböbe kanti, namanintre nütüre, aiseté namani ñäke kore.

³⁰ Abtä ni jökrä kwe kä namani nokre. Angwane ni mda mda jatani betekä, nükani mate, ye ie Pablo neketaninte, nikani Pablo kitekä ja käne kwäräkwärä ju blitakrä Ngöböbe bäre mento se kwrere, bti jukwe dikaninta jötrö jite kwetre.

³¹ Bti jatanina Pablo kämike angwane, nitre israelita namani krübäte jökrä, kä namani kä mike nokre Jerusalén abko kukwe jänükani rükätre romanobo dänkien kriye.

³² Angwane rükätre dänkien kri ye käkwe rükä kwekwe ükaninkrö jötrö ngwarbe rükätre dänkien mda mdabe, bti nikanintre betekä nebe nitre nämáne kä mike nokre ye kanti. Rükätre dänkien kri nükani mate rükätrebe, ye jatabare ietre angwane, Pablo metani ñakare mda kwetre.

³³ Angwane rükätre dänkien kri ye käkwe krötabare Pablo ken, käkwe Pablo kani ngite, bti mäkätéma kadena krobubti kwe nitre rükäye, bti niebare krörö kwe:

¿Ni ne abko nire amne tä dre nuene? niebare kwe ietre.

³⁴ Angwane ni jökrä namani ñäke ngwarbe ja te tata nekware sekwäre, aiseté ni kukwei namani nokre. Yebtä Pablo abko ni ño amne dre namani nakenkä metre ñan nükani gare rükätre dänkien kri yeye. Abtä Pablo ngwiamna jirekäbe kwe kitadre ju nitre rükäkwé kanti.

³⁵ Ye kwrere bkänä, Pablo jänikani, jänikani nebe kalerabtä ju nitre rükäkwé kanti angwane, ni namani nakwen Pablo jiebtü kämikakäre, abtä nitre rükä käkwe Pablo kaninkä käinta niaratre ngäniene,

³⁶ ñobtä ñan angwane ni jökrä nikani Pablo jiebtü, ye abko namani ngrente kri, kä namanintre niere:

¡Ni ye kämike, ni ye kämike! namanintre ngrente.

Pablokwé blitabare jakrä

³⁷ Yebti Pablo jatanina niken gwä angwane, niebare krörö kwe rükä dänkien kri yeye:

¿Ti rabadre blite chi mabe ya? niebare kwe ie.

Angwane rükä dänkien kri ye käkwe niebare mda ie:

¿Blita gare griegore mae ñan ñan? niebare kwe Pabloye.

³⁸ ¿Ni Egiptobo nükani iti Jerusalén nete, ne käkwe ni mili kräbkä töi kwitani gobran romanobo rüere, bti nikani ngwena kä kaibete rükäre gobran romanobo rüere abko ma ñakare ya? niebare rükä dänkien kriwe Pabloye.

³⁹ Angwane Pablokwe niebare ie:

Ti abko israelita nünanka juta Tarsote, juta ütiäte kri kä Ciliciate ye kanti, akwa makwe kä bian chi tie blitakrä ja mräkätre nokobe, ie ti tö nibi, niebare Pablokwe ie.

⁴⁰ Angwane nitre rükä dänkien kri ye käkwe kä biani Pabloye blitakrä amne, Pablo namani nünaninkä krö kalerate angwane, ni jökrä rabadre kwekbe niara kukwe nuen

niebare kisebti kwe ietre. Ye erere ni jökrä namani kwekbe angwane, Pablo nikani blite hebreore, käkwe niebare krörö:

22

¹ Ti mräkätre amne ti ruaitre tikwe, ti bike blite au jakrä, aisete ti kukwei nuen kuin munkwe.

² Pablo abko namani blite niaratre kukwere hebreo bentre, yebtä namani bäri kwekbe jökrä Pablo kukwei nuen angwane, niara nikani blite janknu krörö:

³ Ti abko israelita. Ti därebare juta Tarsote kä Ciliciate, akwa ti rirabare Jerusalén nete amne Kukwe Biani Ngöbökwé Moiséye, yebtä abko tikwe ja töitikani metre täte jökrä Gamalielibe. Erere arato, käre ti töita sribibtä Ngöbökrä, munta sribire ño mtare, ye kwrere ti töita.

⁴ Ne aisete, kena ni merire amne ni brare nämane niken Ji nebti, ye ti nämane gain angwane, ti nämane niken kisere jiebti. Ti nämane kaen ngite, bti ti nämane kite ngite kä teri kämikakäre. Ne abko ti nämane nuene kore kena.

⁵ Tita kukwe niere munye ne abko ni blitaka Ngöböbe ni mda mda diäre dänkien amne nitre unbre ji dokwäte ie gare kuin jökrä, aisete niaratre raba blite metre kukwe nebtä, ñöbtä ñan angwane ni mräkätre israelita Damascobo nämane tödeke Jesubti, ye rüere tikwe tära käräba ietre, bti ti rikaba ja mräkätre tödekaka Jesubti ye kaen ngite, bti ti jatadre ngwena nüke Jerusalén nete mikakäre ja tare nike, abkokäre ti rikaba.

⁶ Akwa ti rikaba ji ngrabare, ti rababara mate ja ken juta Damascobe amne ñänä rükabara ruäre käin. Ti nämä näin jame angwane, batibe kä trä gitiaba ngwen büreere ti bäre temen.

⁷ Angwane ti rikaba mate temen amne ni kukwei jaraba krörö tie: ¿Saulo, ñöbtä mata näin kisere kore ti jiebti ti mikakäre ja tare nike yere? nieba tie.

⁸ Angwane tikwe nieba: ¿Ma abko nire ti Dänkien? tikwe nieba. Angwane ni kukwei jaraba tie, ye käkwe nieba krörö tie: Ti abra Jesu Nazarebo. Ti ne mden jiebti mata näin kisere ti mikakäre ja tare nike ye, nieba kwe tie.

⁹ Ye ngwane abko ja mräkätre nämane näin ti mukore, ye ie kä trä jataba, akwa ni kukwei ye rükaba gare ñakare ietre.

¹⁰ Angwane ti abko käkwe nieba krörö mda: ¿Tikwe dre nuendre, ie ma tö nibi ti Dänkien? tikwe nieba. Angwane ti Dänkien käkwe nieba tie: Näinta krö, bti ma rika janknu nebe Damasco. Ye kanti kukweta ükaninte ño nuendre mae abko ni tädi iti yete käkwe niedi jökrä mae, nieba kwe tie.

¹¹ Akwa kä trä gitiaba ngwen dikaro, ye käkwe kä ötateba ti okwäte, aisete kä rababa tuen ñakare tie. Abtä ja mräkätre nämä näin tibe, ye käkwe ti kaba küdebtü, bti rikaba ti ngwena nebe Damasco.

¹² Juta Damascote yete abko ni iti kädian nämane Ananías nämane nüne. Niara abko nämane nüne metre Ngöbö okwäbti amne Kukwe Biani Ngöbökwé Moiséye, ye abko niara nämane mike täte kuin. Ye mdenbtä abko, nitre israelita nünanka juta Damascote nämane blite kuin jökrä niarabtä.

¹³ Ananías ye abko jataba ti kanti, rükaba angwane nieba kwe tie: Ti mräkä Saulo, kä raba tuenta mae, nieba kwe tie. Ye btäräbe kä trä gitiakaba ti okwäte, käkwe niara mikaba ñäräre.

¹⁴ Angwane nieba mda kwe tie: Ngöbö mika nämane ütiäte ni mräkä kirakirakwe, Ngöbö ye arabe tö dre nuein abko rabadre gare mae, abkokäre ma dianinkä kwe. Amne Jesu abko Ni Era Metre abko makwe tuadre, abkokäre ma dianinkä kwe. Erere arato, Ngöböta blite ja kada jenbti, ye abko kukwei jaradre mae, abkokäre ma dianinkä kwe jakrä.

¹⁵ Makwe dre dre tuani amne makwe niara kukwei nuani ño ño, ye erere makwe niedi ni jökrä ngwärekre arato.

¹⁶ Ne aisete gwängware näin krö, bti ma rika ja mike ngökadre ñöte amne tödeka makwe ni Dänkienbti angwane, Ngöbökwé ma ngite kukwe kämekame nuenbtä bätädrete jökrä mabtä, nieba niarakwe tie. Ye erere tikwe nuenba.

¹⁷ Yebti ti rükabata Jerusalén nete angwane, ju blitakrä Ngöböbe, kanti ti rikaba blite Ngöböbe amne ye kanti, köböre kwrere tikwe kukwe tuaba krörö:

¹⁸ Ni Dänkien tuaba tikwe, käkwe nieba krörö tie: Mata blite tibtä ye abko ñan mikadre era nitre Jerusalénbokwe, aisete gwängwarbe makwe kä mikaka Jerusalén nete, nieba kwe tie.

¹⁹ Abtä tikwe niebare: Ti Dänkien, sinagoga kantikanti ti nämane niken, kä nämane nitre tödekaka mabti kaen ngite, bti ti nämane kite ngite kä teri amne ti nämane mete arato.

²⁰ Erere arato, sribikä makwe Esteban nämane blitaka makrä, ye kämikani amne ti nämä yete arato amne, niara kämikadre abko rababa dbe tikrä, aisete nitre niara kämikaka, kräke ti nämane dän ngibiare. Ye mdenbtä nitre Jerusalénbo käkwe ti kukwei mabtä mikadre bäri ütiäte jae ruen tie, tikwe nieba ti Dänkienye.

²¹ Akwa ti Dänkien käkwe nieba krörö tie: Nitre ñakare israelitare tä nüne mente temen, ye kánti ti bike ma juen, aiseté nán jötrö, nieba kwe tie, niebare Pablokwe.

²² Pablo juani ni Dänkienkwe nitre ñakare israelitare ngätäite niebare kwe, yebtä abko ni jökrä ñan tö namani Pablo kukwei nuai mda, kä namani ngrente krikri be amne, namani niere:

¡Ni ye käkwe ñan nünandre mda! ¡Niara denkä kä nebtä! namanintre niere romone.

²³ Ni jökrä namani ngrente janknu kore amne, namani dän jabtä ngrükete amne namani dobro mnü kite käintabe romone.

²⁴ Abtä nitre rükä dänkien kri käkwe Pablo kitamna ju nitre rükäkwe kánti angwane, Pablokwe kukwe era erere niedre, abkokäre Pablo kwata metadre niebare kwe, ñöbtä ñan angwane ni jökrä namani ñäke Pablo rüere, yebtä abko niebare kore kwe.

²⁵ Akwa Pablo mäkäninante biare kwata metadre angwane, ni rükä dänkien nämane yete, ye ie Pablokwe niebare krörö:

¿Ni romano jä ngämi nebe kritobo ngwärekre, ye känenkri kwata metadre, ye abko köböi bianina munye ya? Ñakare ruen tie, niebare Pablokwe.

²⁶ Pablokwe ñäkäbare kore, ye jarabare rükä dänkienye angwane, nikani jötrö, käkwe niebare rükä dänkien bäri kriye:

Ni ne abko romano aiseté, ¿makwe dre nuendi mda btä? niebare kwe ie.

²⁷ Angwane nitre rükä dänkien kri käkwe krötabare Pablo ken, käkwe niebare ie:

¿Ma abko ni romano bkänä ya? niebare kwe ie.

Angwane Pablokwe niebare mda ie:

Jän, ti abko romano, niebare kwe ie.

²⁸ Nitre rükä dänkien kri käkwe niebare mda Pabloye:

Ti tö namani rabai romanore angwane, tikwe ja ütiä biani kri, köböire ti namani ni romanore, niebare kwe.

Abtä Pablokwe niebare mda ie:

Akwa ti abko därebare romanore, niebare kwe.

²⁹ Yebtä abko, nitre rükä namani biare Pablo kwata metakäre, yebtä kä jürä namani, käkwe kä mikaninkä jökrä Pablobtä. Erere arato, Pablo abko romano gani rükä dänkienkwe angwane, Pablo mäkäninte kwetre kadenanbti, yebtä abko kä jürä namani kri btätre, ñöbtä ñan angwane ni romano ngämi kwen ngite, känenkri ñan mäkädrete jire chi aiseté.

Pablo jänikani Sanedrin ngwärekre

³⁰ Jändrinane angwane, drebtä nitre israelita nämane Pablo kite ngise abko nitre rükä dänkien kri tö namani gai metre, käkwe kadena tikaninte Pablobtä, bti nitre blitaka Ngöböbe ni mda mda diäre dänkien ye ie ja ükakrömna jökrä kwe amne, ni mda mda nämane sribire Sanedrinbe, ie ja ükakrömna jökrä kwe. Bti Pablo nämane kä teri diamna ju bäre kwe, bti mikani ni jökrä ngwärekre mda kwe.

23

¹ Angwane Pablokwe Sanedrin mikani ñäräre kwekbe ja käne, käkwe niebare krörö ietre: Ja mräkätre, ti nämane nüne kena, erere tita nüne abti kä nuke mtare amne ja ruen ngite ñakare Ngöbö ngwärekre tie, niebare kwe.

² Angwane nitre nämane känime Pablo bäre temen, ye ie Ananiäkwe Pablo metamna kada mkäte ta. Ananiás ne abko, ni blitaka Ngöböbe ni mda mda diäre dänkien abko käkwe Pablo metamna,

³ akwa Pablo käkwe ñäkäbare tare mda ie:

¡Mata ja bä mike kuin! Ngöbökre ti ngie mikadi ma rüere. Mata täkänintbe yete, ye tö kukwe ükaite tibe Kukwe Biani Ngöbökre Moiséye yebti bä amarebti, ¡ye ñöbtä Kukwe Biani Ngöbökre Moiséye abko rüere ma tö nibi ti mete yere! niebare kwe Ananiaye.

⁴ Abtä nitre nämane yete ye käkwe niebare Pabloye:

¿Ñöbtä ni blitaka Ngöböbe ni mda mda diäre dänkien, ie mata ñäke kore yere? niebare kwetre Pabloye.

⁵ Angwane Pablokwe niebare mda:

Ja mräkä, ni noko abko ni blitaka Ngöböbe ni mda mda diäre dänkien abko gare ñakare tie, aiseté tikwe ñäri kore ie, ñöbtä ñan angwane tarä Ngöbökre käta niere krörö: Ni gobranka juta makwebti, rüere makwe ñan ñäkädre blo, nieta Ngöbö Kukweibtä, niebare Pablokwe.

⁶ Yebti nitre nämane sribire Sanedrinbe abko ruäre saduseo amne ruäre abko bariseo, ye gani Pablokwe. Angwane Pablokwe ñäkäbare jume ja dibti, käkwe niebare:

Ja mräkä, ti abra bariseo. Ti mräkä abko bariseo jökrä akwa, ni krütani rükadreta nire abko tita mike era jae, ye mdenbtä abko ti mikata ngite mtare, niebare Pablokwe.

⁷ Pablokwe ñākābare kore, yebtä abko nitre bariseo amne nitre saduseo nikani ja kwete kwārikwāri. Abtä nitre nāmane gātābtā, ye kākwe ja ñākānintbe jene jene mda,

⁸ ñobtä ñan angwane ni krütani ñan rükadreta nire abko nitre saduseo kätä niere. Erere arato, angele amne üai ñakare, tätre niere. Akwa nitre bariseo abko kätä kukwe ye mike era jökrā, aisete namani ja kwete jökrā kore.

⁹ Angwane ni jökrā namani ngrente amne Kukwe Biani Ngöböke Moiséye dirikātre nāmane ruäre abko nāmane nekete nitre bariseokri abko namani nūnaninkā krö kākwe niebare:

Ni neta ja mike ngite ñakare, ñobtä ñan angwane nane ni üai nükani blite ben o angele nükani blite ben kukwe nebtā, niebare nitre bariseokwe.

¹⁰ Akwa ni jökrā namani kā mike nokre krübāte. Yebtä nitre rükā dānkien kri, btā kā jürā namani krübāte, ñobtä ñan angwane nane Pablo dikandrete oto kiakia jökrā ja ñāte ni jökrākwe, ye abko jürā namani btā. Abtä nitre rükā juani ruäre kwe nebe Pablo tuen, bti Pablo jänikaninta kitadreta ju nitre rükākwe kanti bobuta.

¹¹ Yebti deo, ni Dānkien Jesu nükani ja mike tuadre Pabloye, kākwe niebare ie:

Pablo, makwe ñan kā jürā ngwian jabtā, ñobtä ñan angwane makwe blitabare tibtä Jerusalén nete, ye kwrere makwe blitadi tibtä juta Romate sete arato, niebare ni Dānkienkwe ie.

Nitre israelita kākwe kukwe mikanintbe Pablo kāmikakäre

¹²⁻¹³ Abti jāndrinane, nitre israelita ni gre ketebu jire kākwe ja töi mikani gwaire Pablo kāmikakäre, kākwe ja kukwei biani krörö ja rüere Ngöböye: Ni ngāmi Pablo kāmike, kānenkri nikwe ñan mrödre amne nikwe ñan tomna ñadre, niebare kwetre jae kwārikwāri amne Ngöböye.

¹⁴ Bti nikaninta mda nitre blitaka Ngöböbe ni mda mda diäre dānkien kanti amne nitre unbre ji dokwāte kanti, kākwe niebare ietre:

Nun ngāmi Pablo kāmike, kānenkri nunkwe ñan mrödre jire abko nunkwe ja kukwei biani kore ja rüere Ngöböye.

¹⁵ Ne aisete mun sribikā ütiāte krikri Sanedrinte ye kākwe Pablo kārāta jetbe rükātre dānkien kriye amne, kukwe ño metre abko Pablokwe niedre nete, abkokäre munta kārere nūke ja ngwārekri, munkwe nie. Akwa Pablo ngāmi nūke mun kanti nete, ye kānenkri nunkwe kāmikadi, niebare kwetre.

¹⁶ Akwa Pablo kāmika brai namani, ye Pablo nüräkwe gani angwane, Pablo nāmane ngite, ye kanti nikani niere Pabloye.

¹⁷ Blitabare ünān kwe Pablobe, angwane nitre rükā dānkien nāmane yete Pablokwe kārābare, bti niebare kwe ie:

Ni bati ne tö kukwe ütiāte kri niei dānkien kriye, aisete ngwena nebe niara kanti, niebare Pablokwe ie.

¹⁸ Ye erere bkānā, rükātre dānkien nikani Pablo nürā ye ngwena nebe rükātre dānkien kri kanti, kākwe niebare ie:

Ni kādianta Pablo tä ngite ye kākwe ti kārāniri, bti ti juni ma kanti kwe ni bati nebe, ñobtä ñan angwane ni ne abko tö kukwe ütiāte kri niei mae, aisete ti juni kwe nūke ma kanti nete, niebare kwe.

¹⁹ Angwane nitre rükā dānkien kri ye kākwe Pablo nürā kani küdebtī, nikani ngwena jenena temen, kākwe niebare krörö ie:

¿Ma tö nibi dre niei tie? niebare kwe ie.

²⁰ Angwane Pablo nürā kākwe niebare:

Nitre israelita kākwe ja töi mikani gwaire Pablo kārākäre mae jetbe nebe nitre sribikā Sanedrinte ye ngwārekri, kukwe era erere ngwiantarikäre ja tārītāri Pabloye, nieta kwetre.

²¹ Akwa makwe ñan niaratre kukwei mika era, ñobtä ñan angwane ni gre ketebu bti bārīre mda tädi ja rükāninte jibtā Pablo kraire jite. Niaratre kākwe ñan Pablo kāmikadre angwane, ñan mrödre kwetre amne ñan tomna ñadre kwetre, niebare ja rüere kwetre Ngöböye, aisete makwe dre niedi ye abko niaratre tä biare ngibiare ngābtī, niebare Pablo nüräkwe.

²² Angwane rükātre dānkien kri kākwe ni bati ye juaninta, akwa kukwe ye abko ñan niedre jire ni mda mdaye kwe, niebare kwe ie.

Pablo jänikani nebe gobernador Félix kanti

²³ Yebti rükātre dānkien kri kākwe rükā dānkien kārābare nibu, bti niebare kwe ietre:

Nitre rükā kānene sientō krobu abko rika güreere amne, rükā ni gre ketamā bti ni jätä abko rika mdābtī amne ni sientō krobu abko rika buko nga ngwena kisete rikakäre juta Cesareate ñānā okwā krā ökān deo, niebare kwe ietre.

²⁴ Erere arato, rükā dānkien kri kākwe mdā mikamna biare kratī nānkrā Pabloye amne Pablo jārīkadre kuin nebe gobernador Félix ngwārekri abko niebare dānkien krikwe kore.

- ²⁵ Angwane tarä tikani krörö kwe gobernador Félixkrä:
- ²⁶ Ñantöre Félix. Ma gobernador ütiäte kri, kräke ti Claudio Lisias käta tarä ne tike.
- ²⁷ Nitre israelita käkwe ni ne kani ngite angwane, tö namani kämikai, akwa ni ne abko romano tikwe gaba angwane ti janama denkäta nitre israelita kisetete rükätre tikwebe.
- ²⁸ Erere arato, drebtä niara kita nämane ngise abko ti tö rababa gai, kä rikaba ngwana nebe Sanedrin ngwärecri.
- ²⁹ Angwane kukwe ükaninte nuendre kwetre abko ni ne ñan tä mike täte, abtä tätre kite ngise akwa, ni ne käkwe ja mikani ngite ñakare, aisetete kukwe ye dokwäre ni ñan raba niara kämike jire chi. Erere arato, ñan rabadre ngite jire chi kukwe ye dokwäre ruen tie.
- ³⁰ Akwa mtare nitre israelita tö niara kämikai abko tikwe gani, aisetete tita juen jirekäbe nebe ma kánti. Erere arato, nitre niara kitaka ngise abko rikadre nebe ma kánti blitakäre niara rüere mabe, abkokäre tita juen, tikani rükätre dänkien krikwe taräbtä.
- ³¹ Nitre rükä dänkien kri ye käkwe dre niebare rükätreye, ye erere nuenbare kwetre, kä nikanintre Pablo ngwana deo nebe juta Antüpatrite.
- ³² Yebti jändrinane angwane, kukwe nakaninkä ñakare btätre, aisetete rükätre nämane näin güre, ye nikaninta ja jiebti nebeta ja kánti amne rükätre nämane näin mdäbti mdäbti aibe nikani janknu Pablobe.
- ³³ Nikanintre nebe juta Cesareate angwane, tarä biani kwetre gobernadoreye, käkwe Pablo mikani gare ie arato.
- ³⁴ Abti gobernador käkwe ñäkäbare ünän jökrä taräbtä, bti niebare kwe Pabloye:
¿Ma kä mdenbo? niebare kwe ie.
Angwane, Ja Ciliciabo, niebare Pablokwe ie.
- ³⁵ Abtä niarakwe niebare mda Pabloye:
Nitre ma kitaka ngise rükadi nete angwane, batibe tikwe ma kukwei nuadi, niebare kwe ie.
Yebti Pablo mikani ngibiadre kwe ju kri jrei Herodekwete abko nakaninkä kore.

24

Pablokwe blitabare ja dokwäre gobernador Félix ngwärecri

- ¹ Abti kä nikanina köbörike ta angwane, ni blitaka Ngöböbe ni mda mda diäre dänkien kädian nämane Ananías nikani nebe Félix kánti amne nitre unbre ji dokwäte nikani ruäre ben. Erere arato, ni iti blitaka ni mdakrä kädian nämane Tértulo nikani siba nebe gobran Félix kánti Pablo kitakäre ngite gobrane.
- ² Pablo jänükani niaratre ngwärecri angwane, Tértulo nikani niere krörö gobernador Félixye Pablo rüere:
Ti dänkien bäri ütiäte kri, mata gobrane kuin nete, yebtä ti tö kuin niei mae, ñöbtä ñan angwane mtare ni israelita tä nüne jäme ma köböire. Erere arato, ma töbtä, aisetete mata sribire kuin, abko köböire makwe jändrän keta kabre ükaninte jita nikwete nete.
- ³ Ne aisetete, jändrän ne abko nunta kaen ngäbti käre amne kä jökräbti arato, aisetete nun tö kuin niei mae sribi jökräbtä.
- ⁴ Akwa ti ñan tö kä diainkä dikaro makän, aisetete ti bike blite chi mabe amne makwe ti kukwei nua ja moto jämenbti abko ti ribere mae.
- ⁵ Ni ne abko tä ni jökrä nike krübäte gobran romanobo rüere amne, kä jökräbti temen niarata näin nitre israelita ñäketbe jene jene amne, nitre reketaka ni Nazarebokri abko bti niarata mikani ji dokwäte abko kwanba nunye.
- ⁶ Mdakäre abko niara tö rababa ju Ngöböke dain jändrän kämenbti. Abtä nunkwe kaba ngite, [kukwe ükaninte nuendre nunkwe tä niere, ye kwrere.
- ⁷ Akwa nitre rükä dänkien kri Lisias käkwe diankabata jötrö amne romone nun kisetete, bti Pablo kitaka ngise juamna blite mabe nete.]*
- ⁸ Akwa mtare nunta kite ngite ma ngwärecri nete, aisetete kukwe ne abko era ya, ñakare ya abko makwe ngwiantari au ie. Abko kore se, niebare Tértulokwe.
- ⁹ Kukwe niebare Tértulokwe, ye abko nitre israelita nämane yete käkwe era niebare arato.
- ¹⁰ Angwane Pablokwe blitadre niebare kisetete ie gobernadorekwe amne Pablokwe niebare krörö:
Kä raire mata mikani kukwe ükatekä jita nebe, aisetete kä nibi nuäre tibtä blite jakrä ma ngwärecri nete.
- ¹¹ Köbö jätäbti kubube ti rikaba Jerusalén yete Ngöbö käikitakäre. Ye abko era ya abko makwe ngwiantari au gadre jae.

* 24:7 Kukwe ne ñan tä tikani manuscrito kira bäri kuinkuinbtä.

¹² Ti nāma nete angwane, nitre ti kitaka ngise, ie ti kwanba ja kwete ñakare ni mda mdabe. Erere arato, ti köböite ni kwati ñan kätä kä ngwen nokre ju blitakrä Ngöböbete amne, sinagoga kwatirekwatire te amne kä mdabti juta Jerusalénte.

¹³ Ne asete nitre ne ñan tä ti kite ngise kukwe erabtä amne tätre ni ngökö ngwarbe ti rüere.

¹⁴ Akwa kukwe era erere ti bike niere metre abko krörö: Ngöbö mikani ütiäte ti mräkä kirakirakwe, Ngöbö ye arabe kräke tita sribire Ji Btinbti mtare. Ye mden abko kukwe ngwarbe nieta kwetre. Erere arato, Kukwe Biani Ngöbökwé Moiséye, ye abko tita mike era jökrä amne nitre Ngöbö kukwei niekä kirakira käkwe Ngöbö Kukwei tikani kira, ye tita mike era jökrä arato.

¹⁵ Mdakäre abko, ni kuin amne ni käme krütanikrütani abko Ngöbökwé mikadita nire abko, bti nitre noko tä tödeke, ye kwrere bti tita tödeke arato.

¹⁶ Asete ja rabadre ruen ngite ñakare tie Ngöbö ngwärekwri amne ni mda mda ngwärekwri, abkokäre käre tita nüne kuin metre.

¹⁷ Akwa kukwe rakahaba krörö tibtä juta Jerusalénte: Kä raire ti nämane dikekä kä mdabti. Abti ti jatabata Jerusalén ngwian ngwena biankäre nitre israelita bobre bobre kräke amne jändrän biankäre Ngöböye.

¹⁸⁻¹⁹ Kä ye ngwane, kukwe ükaninte nuendre, erere ti nāma nuene, asete ti rababa dbe Ngöbö ngwärekwri. Amne ti nāma ju blitakrä Ngöböbe ye kanti angwane, ni israelita nūnanka kä Asiate rükaba ruäre ti kanti, asete ye näire ni nāma ñakare kwati tibe amne ni nāma kä mike ñakare nokre arato angwane, nitre Asiabo rükaba. Niaratre ye abko käkwe ti kitaba ngite käne, asete rabadre nūke nete ti kite ngite amne rabadre ti ngite niere ruen tie.

²⁰ Ñakare ne ngwane ti rababa Sanedrin ngwärekwri angwane, drebtä tikwe ja mikani ngite, ye nitre nete noko käkwe niedre metre arato mae. Akwa nuenba ñakare kwetre.

²¹ Akwa ti nāma niaratre ngätäite angwane, tikwe ñäkäba jume ja dibti, käkwe nieba krörö: Ni krütani abko Ngöbökwé mikadita nire abko tita mike era, yebtä munta kukwe ükete tikrä mtare, tikwe nieba kore. Nebtä aibe nitre noko tö ti kitai ngise ruen tie. Abko kore se, niebare Pablokwe Féliye.

²² Gobernador Félix abko, ie Ji Btin gare kuin, asete Pablokwe ñäkäbare kore, yebtä abko kukwe Pablokwe tuanimetre ükadrete köbö mdabti kwe, käkwe niebare krörö nitre israelitaye:

Nitre rükä dänkien kri Lisias rükadi ti kanti nete, käkwe kukwe ño niedi metre tie angwane, tikwe kukwe munkwe tuadi kanti. Abko kore se, niebare Félixkwe ietre.

²³ Abti Félixkwe nitre rükä dänkien juani Pablo kiteta ngite kä teri akwa, kä biandre ruäre dikakakrä Pabloye amne Pablo kukwe muko, ie kä biandre nūke basare Pabloye niara die mikakäre, niebare Félixkwe.

²⁴ Yebti köbö mdara jire te, Félix jatani merire kwe Drusilabe. Drusila abko meri israelita abko ben Félix jatani, käkwe Pablo kärämna angwane, tödekadre ño Kristo Jesubti abko Pablokwe niebare ie, niara käkwe Pablo kukwei nuani.

²⁵ Akwa nūnandre ño metre Ngöbö ngwärekwri amne, ni ñan rankwadre jötrö jändrän käme jiebti amne mrä Ngöbö rükadi kritobore ño nibtä abko niebare Pablokwe Féliye. Yebtä abko, Félix nekwetaninkä, käkwe niebare Pabloye:

Nänta jötrö. Kä rabadita ngwarbe tie angwane, tikwe ma kärädita mda, niebare kwe Pabloye.

²⁶ Akwa Pablokwe ngwian biandre ja ütiäre Féliye abko ie Félix tö namani, asete käre namani nūke Pablo kärere blite jabe.

²⁷ Pablo namani ngite kä kubu angwane, käre kukwe namani nakenkä kore. Yebti Félix ñan namani gobernador mda, asete ni iti mda kädian nämane Porcio Festo namani gobernador Félix täte, akwa Félix abko tö namani rabai kuin jabtä nitre israelita kriki be, asete Pablo tuanimetre ngite kwe.

25

Pablokwe blitabare jakrä Festo ngwärekwri

¹ Festo nikani nebe kä Judeate sribikäre gobernador kwrere. Juta Cesareate, ye kanti namani köbömä, bti nikani juta Jerusalénte köbö ngwiantarikäre nitre israelita ji dokwäteye.

² Namani Jerusalén angwane, ni blitaka Ngöböbe ni mda mda diäre dänkientre amne nitre israelita ji dokwäte nikani, käkwe Pablo kitani ngise ie.

³ Ja moto kuinbti Festokwe Pablo juandreta Jerusalén kukwe ükatekäre yete abko ribebare kisere kwetre ie, ñöbtä ñan angwane niaratre nämane Pablo kämika braire ji ngrabare, abkokäre namani kärereta ie.

⁴ Akwa Festo abko käkwe niebare ietre:

Pablo rabadi ngite janknu juta Cesareate amne ti ara jire kebera yäketa arato nebata juta yete.

⁵ Niara käkwe ja mikani ngite krübäte bkänä ne ngwane, mun ji dokwäte dokwäte nete, ye ara jire rikadre tibe nebe sete, niara kitakäre ngise tie sete abko rabadre bäri kuin. Abko kore se, niebare kwe ietre.

⁶ Yebti Festo namani köbö kwä amne köbö jätä näre mda juta Jerusalénte, bti nikaninta juta Cesareate. Jändrinane angwane ja täkrä gobrankrä, bti nämane tākänintbe, käkwe Pablo ngwiamna nebe ja kánti.

⁷ Erere bkänä, Pablo nikani gwäkäre angwane, nitre israelita nämane Jerusalén, nūkanina Festobe, ye käkwe krötabare Pablo ken, käkwe Pablo kitani ngise kukwe kāmekāme bātākā ngwarbe btā. Akwa kukwe era erere kwani ñakare Pablo rüere ietre.

⁸ Angwane Pablo abko käkwe ñākābare au jakrä:

Kukwe Biani Ngöbökwe Moiséye nuendre nitre israelitaye, ye rüere ti ja mike ngite ñakare. Erere arato, ju blitakrä Ngöböbe amne emperador romanobo rüere, ti ja mike ngite ñakare arato, niebare Pablokwe Festoye.

⁹ Akwa nitre israelita ñan moto rabadre romon Festokrä, abkokäre tö namani niaratre näkwitai, abkokäre niebare krörö kwe Pabloye:

¿Ma tö rikai nebe Jerusalén, kánti tikwe kukwe ükadite makrä ya? niebare kwe ie.

¹⁰ Pablokwe niebare mda ie:

Ma kukwe ükatekä emperador kábti abko ngwärekre tita nete. Ne kánti makwe kukwe ükadrete tikrä, ñobtä ñan angwane ti ja mike ngite ñakare nitre israelita rüere, ye gare kuin mae.

¹¹ Akwa nane tikwe ja mikani ngite era bkänä, dokwäre ti kāmika tö rabadre angwane, tita juto biare krüte. Akwa tikwe ja mikani ngite ñakare nitre israelita rüere ne ngwane, ni mda ñan raba ti bien jire chi kāmikadre nitre israelita seye, aiseite emperador ara jire käkwe kukwe ükate tikrä, ie ti tö, erere tita ribere mae. Abko kore se, niebare kwe Festoye.

¹² Abtä nitre töbtä töbtä nämane yete niara die mikakäre, ye ie Festokwe kukwe ngwiantintari, bti niebare kwe mda Pabloye:

Ma abko romanobo, aiseite emperador ara jire käkwe kukwe ükadrete makrä abko mata ribere tie aiseite, ma näin niara kánti juta Romate jirekābe, kukwe makwe ye ükatekäre. Abko kore se, niebare Festokwe.

Festokwe ja di kärābare Pablobtä jrei Agripaye

¹³ Yebti köbö nikanina bä raire ta angwane, jrei Agripa nikani ngwai Berenicebe nebe Cesareate köbö ngwiantarikäre Festoye.

¹⁴ Ye kánti namaninta nūne bä raire Festo kánti angwane, Festokwe blitabare kukwe Pablokwebtä jrei Agripabe, käkwe niebare ie:

Ni iti mikaninte ngite Félikwe abko tä ngite nete.

¹⁵ Ti nämā Jerusalén angwane, ni blitaka Ngöböbe ni mda mda diäre dānkientre amne nitre israelita unbre ji dokwäte käkwe ni ye kitaba ngite ti ngwärekre amne müre ketamna kwetere tie.

¹⁶ Abtä tikwe nieba krörö ietre: Ni kitata ngite abko ngāmi ja kwete gwärerere ni niara kitaka ngitebe, ye kānenkri ni ngite ye kāmikadre ñakare jire abko tä ükaninte kore nun romanobo ngätāite, tikwe nieba ietre.

¹⁷ Niaratre jatabata tibe nete, ye mdenbtä abko jändrinane tikwe nitre kukwe ükatekä mda mda tibe kärāba jötrö, bti tikwe ni ngite ye ngwiamna nūke ja kánti nete.

¹⁸ Akwa kukwe nuenbare blo kwe, btā miika nämāne ngite, ti nämāne nütüre, ye kwrere btā nitre niara kitaka ngite käkwe niara mikaba ngite ñakare ti ngwärekre.

¹⁹ Akwa Ngöbö mikadre täte ño, yebtä nämāne ja kwete amne ni kädian nämāne Jesu abko krütani akwa tä nire abko Pablo namani niere, ye aibehtë miika rababa ngite.

²⁰ Tikwe kukwe ye ükadrete ño ñan rababa nūke gare tie. Abtä Pablo rikadreta jirekābe Jerusalén, kánti tikwe kukwe ükadrete krāke ya abko tikwe ngwiantariba ie mda.

²¹ Akwa emperador abko käkwe kukwe ükadrete krāke nieba kwe, aiseite tä ngite nete. Abti tikwe juandi nebe emperador kánti, niebare Festokwe Agripaye.

²² Angwane Agripakwe niebare mda Festoye:

Ti tö ni ye kukwe nuai arato, niebare kwe.

Amne Festokwe niebare ie:

Jetbe makwe niara kukwei nuadi, niebare mda kwe ie.

Pablokwe blitabare jrei Agripa ngwärekre

²³ Ye erere bkänä, jändrinane Agripa amne Berenice käkwe ja ükaninte kuin ja bä mikakäre ütiāte, bti nitre rükā dānkien krikri amne nitre gobranka gobranka juta Cesareate, ye

ben nikanintre gwaire nebe gwi kä kukwe ükatekrä ye kánti. Angwane Festokwe Pablo ngwianna nebe ye kánti.

²⁴ Bti niebare kwe ni jökräye:

Jrei Agripa amne mun ütiäte ütiäte tä ja ükaninkrö ketetibe nunbe nete, ni iti tä ngite abko jänüra mun ngwärekre nete tuen munkwe. Nitre israelita Jerusalénbo amne Cesareabo kwati tä nüke ni ne mike ngite ti ngwärekre nete, käta nebe ngwänenkä krikri be, käta nebe niara müre ketamna tie.

²⁵ Akwa ni ne ja mike ngite ñakare, aiseite müre ketadre ñakare tä nebe tuen tie. Akwa emperador käkwe kukwe ükadrete kräke abko ribebare kwe tie, aiseite tikwe juandi jirekäbe nebe emperador kánti.

²⁶ Akwa kukwe era erere ñakare tikadre tie juandre ti dänkien emperadoreye ni nebtä, aiseite ti ki ngwena mun ngwärekre nete amne jrei Agripa ngwärekre, ne kánti abko jreikwe kukwe ngwentari ie amne dre niedi kwe abtä kukwe kwandi tie tikakäre emperadoreye,

²⁷ ñobtä ñan angwane ni juandre ngite akwa, drebtä rikadre ngite abko niedre ñakare, ye abko ñan tuen dbe tie, niebare Festokwe ni jökräye.

26

¹ Angwane Agripakwe niebare Pabloye:

Mtare ma raba blite jakrä, niebare kwe ie.

Ye btäräbe Pablokwe kise kaninkä käin, käkwe niebare krörö:

² Jrei Agripa, ma ütiäte kri. Ma ye ngwärekre kä nibi nuäre tibtä blitare jakrä, aiseite kukwe ño ño btä nitre israelita tätre ti mike ngite, ye abko käi nibi nuäre tibtä niere mae,

³ ñobtä ñan angwane ma ti dänkien ütiäte kri, akwa nitre israelita tätre nüne ño, ye garera kuin mae amne, drebtä tätre ja kwete jabe kwärükwäri, ye garera kuin mae arato, aiseite makwe ti kukwei nua jäme abko ti bike ribere mae.

⁴ Ti nämane bati abti kä nüke mtare, tikwe nü nabare ño ja käite amne Jerusalénte, ye abko gare kuin jökrä ietre.

⁵ Erere arato, kä raire ti gare ietre, aiseite ti ne abko bariseo kena, ye gare kuin nitre israelitaye. Ye erere niaratre raba niere metre tibtä, ñobtä ñan angwane nitre bariseo abko bäri ño Ngöbö Kukwei mike täte era metre jökrä abko erere ti nämane mike täte arato.

⁶ Kukwe mikata ütiäte nitre bariseokwe, ye tita mike ütiäte jae, abtä nitre israelita tä ti mike ngite mtare abko krörö: Ngöbökre ni krütani mikadita nire abko kukwe niebare metre kwe ni mräkä kirakiraye, yebti tita tödeke arato nitre bariseo jökrä kwrere, abtä ti mikata ngite.

⁷ Mdakäre abko, Ngöbökre jändrän köböi mikani kira ni mräkä israelita juta keta jätäbti ketebuye, ye mden ngibiata ngäbti kisere kwetre, käta sribi nuene Ngöbökrä amne Ngöbö käikitekä kore köbö kwatirekwatire dibire rare, ye arabehti tita tödeke arato, abtä nitre israelita käta ti mike ngite mtare ma ngwärekre jrei Agripa.

⁸ ¿Se ñobtä abko ni krütani mikadreta nire Ngöbökre abko mun ñan tä mike era se?

⁹ Käne ti ne ara jire käkwe kukwe nuendre bätäkä ngwarbe Jesu Nazarebo rüere, ti nämane nütüre.

¹⁰ Ye erere tikwe nuenbare Jerusalén. Nitre blitaka Ngöböbe ni mda mda diäre dänkientre nämane ja di bien tie abko käbti tikwe nitre tödekaka Jesubti kitani ngite kwati kä teri. Erere arato, nitre tödekaka Jesubti kämika nämane ti okwäbti angwane, nämane nükehti tie arato.

¹¹ Mdakäre abko, nitre tödekaka Jesubti käkwe ñäkäre blo Jesu rüere, abkokäre ti nämane mike ja tare nike krübäte. Ne abko sinagoga kwatirekwatire te ti nämane nuene kwe angwane, ti moto nämane nebe romon krübäte kräke, aiseite ti nämane niken mobe juta mda mdate ni menteni ngätäite nitre tödekaka Jesubti ye jiebti.

¹² Ye erere, bati ti rikaba juta Damascote angwane, nitre blitaka Ngöböbe ni mda mda diäre dänkientre käkwe ja di bianba tie abko käbti ti rikaba.

¹³ Akwa ti rikaba ji ngrabare angwane, kukwe rakakaba tibtä abko ti bike niere mae jrei abko krörö: Ti nämä dikekä ji ngrabare juta Damasco kukwäre angwane, ñänä ruäre käin angwane, batibe kä trä gitiaba dirare kä käinbti se kwrere. Kä trä ye abko rababa bäri dirare ñänä träkrä abko rikaba mate jökrä nun bäre temen ti kukwe muko tikwebe.

¹⁴ Angwane nun rikaba ngitiekä jökrä temen. Ye btäräbe ni kukwei jaraba krörö hebreore tie: ¿Saulo, ñobtä mata näin kisere ti jiebti ti mikakäre ja tare nike kore yere? ¿Ye ñobtä mata kukwe nuene käme ja rüere au? abko ni kukwei jaraba kore tie.

¹⁵ Angwane tikwe nieba: ¿Ma abko nire ti Dänkien? tikwe nieba. Angwane ti Dänkien käkwe nieba krörö mda tie: Ti abko Jesu ara. Ti ne mden jiebti mata näin kisere mikakäre ja tare nike ye.

¹⁶ Akwa näinta krö, tita ja mike tuare mae, ma mikakäre sribire jakrä amne blitakäre jakrä. Ne aiset makwe dre turi mtare tibtä amne makwe dre tuadi mda tibtä, yebtä makwe blitadi tikrä.

¹⁷ Angwane nitre israelita btä nitre ñakare israelitare, ngätäite ti bike ma juen akwa, tikwe ma ngibiadi niaratre ngäniene.

¹⁸ Nitre israelitare amne nitre ñakare israelitare, kánti ti bike ma juen abko makwe kä trä tikadrekä okwäte kukwe kuin Ngöbökwetä. Niaratre rabadre dikekä ñakare mda kä iko diablukwete akwa, rabadre dikekä Ngöbö trä ngwente, ñan nünandre mda kwetre Satana ngoto täni akwa, rabadre nüne Ngöböbe amne tödekadre tibti kwetre abko köböire Ngöbökwete niaratre ngite diandrekä jökrä btä amne, ni deme Ngöbökwete abko ben rabadre nüne ketetibe, abkokäre tita ma juen kánti, nieba ti Dänkien Jesukwe tie.

¹⁹ Ne aiset jrei Agripa, kukwe kä káinbti jataba köböire kwrere tie, ye tikwe ñan kitaba temen akwa, tikwe mikaba täte.

²⁰ Ye mden kisete, nitre israelita amne ni ñakare israelitare kákwe kukwe káme kitadre temen, bti Ngöbö kadre ngäbti kwetre abko ti rikaba niere ietre. Erere arato, Ngöbö kani ngäbti kwetre abko hä mikadre sribi kuin nuenbti kwetre, ti rikaba niere ietre. Kukwe ne abko ti rikaba niere káne juta Damascote abti Jerusalente. Yebti ti rikaba niere kä ketareketare te kä ngrabare Judeate.

²¹ Ye mdenbtä abko, nitre israelita kákwe ti kaba ngite ju blitakrä Ngöböbe ye kánti, bti tö rababa ti kámikai.

²² Akwa käre Ngöböta ti die mike abti kä nuke mtare, aiset ti tä nünaninkä dite mtare. Ne aiset niobre niobre amne ni ütiäte krikri, ie tita Ngöbö kukwei mike gare jökrä. Akwa kukwe rakadrekä ño niebare nitre Ngöbö kukwei niekä kirakirakwe amne Moisékwe, ye aibe tita niere, aiset tita kukwe hä jene dirire ñakare.

²³ Ni Dianinkä Ngöbökwete abko krütadre akwa, rükadreta nire káne ni jökrä kä nebtä ngätäite amne, niara arabe kákwe blitadi ni dantaribtä ni mräkä israelitaye amne nitre ñakare israelitareye, kukwe ne mden abko ti nämane dirire. Abko kore se, niebare Pablokwe.

²⁴ Pablokwe ñäkäbare kore ni krütani nukanina nire btä angwane, ye namani tuen jene jene Festoye. Abtä niarakwe ngratebare kri, kákwe niebare:

Pablo, makwe ja töitikani kabre krübäte abko kisete kä jáme ma dokwäbti ñan ñan, niebare kwe ie.

²⁵ Abtä Pablokwe niebare mda Festoye:

Festo, ma abra ni ütiäte kri, káta kä jáme ti dokwäbti niere tie, akwa ye kwrere ñakare, ñöbtä ñan angwane kä ruen kuin tibti. Kukwe era erere tita niere metre amne

²⁶ kukwe nieta tikwe ne gare kuin jökrä jrei Agripa seye. Ye mdenbtä abko tita blite niara ngwärekre, ñöbtä ñan angwane kukwe ne abko ñan nakaninkä kaibe kä kaibete, akwa nakaninkä ni jökrä ngwärekre, aiset gare jökrä ie, ye abko gare kuin tie.

²⁷ Ne aiset ni Ngöbö kukwei niekä niekä kákwe kukwe niebare, ye era makrä ti dänkien Agripa ruen tie. Mata mike era ruen tie, niebare Pablokwe Agripaye.

²⁸ Abtä Agripakwe niebare mda Pabloye:

Jötrö ngwarbe ma tö nibira ti töi kwitai tödeke Jesubti ñan ñan, niebare kwe ie.

²⁹ Angwane Pablokwe niebareta Agripaye:

Jötrö ngwarbe ya, raire ya, Ngöbö diebti ñan ma ti dänkien aibe rabadre tödeke Jesubti, akwa ni jökrä tä ti kukwei nuen nete noko rabadre tödeke siba Jesubti ti kwrere näre. Akwa ñan rabadre mäkäninte kadenanbti ti kwrere abko rabadre bäri kuin, niebare kwe.

³⁰ Angwane jrei Agripa btä gobernador Festo nukani krö Berenicebe amne ni mda mda nämane bentre yete yebe,

³¹ nikani mento kä bäre, kä nikani blite krörö jabe kwärikwäri:

Ni ne ja mike ngite ñakare, se drebtä kámikadre. Erere arato, kukwe nuenbare ñakare blo, abtä tädre ngite kä teri nete, namani niere jae kwärikwäri.

³² Angwane Agripakwe niebare Festoye:

Ni ne kákwe ñan kukwe ükatemna au jakrä emperadoreye akräke niara tikadrete. Akwa niara ara jire kákwe kukwe ükatemna kore, aiset ni ñan raba tikete, niebare kwe ie.

27

Festokwe Pablo juani rute juta Roma

¹ Yebti köbö kitani nun juankrä Italia, ye rükaba angwane, Pablo btä ni mda mda nämane ngite arato abko mikaba gare ni ngite ngibiabtikä dänkien kädian nämane Julio yeye. Julio abko nämane sribire batallon kädian nämane Batallon Augusta yebe.

² Nun juanba Italia kukwäre angwane, ru juta Adramitiobo nämä krati mren köräbti abko jataba niken provincia Asiate mren köräbti abko te nun rankwaba. Angwane abko, Aristarco nünanka juta Tesalónicate, kä Macedoniate ye nämä näin siba nunbe abko ben nun rikaba.

³ Yehti jändrinane angwane, nun rikaba nebe juta Sidónte. Ye kánti Juliokwe jändrän kuin nuenba Pablokrä, kákwe Pablo tuametreba basare kukwe muko tödekaka Jesubtiye amne niaratre kákwe Pablo kadre ngäbti ja juete abkokäre.

⁴ Abti nun nämä Sidón, kánti nun rikaba ta angwane, nun rikaba rute akwa, müre rababa mate ribi nun ngäbti, abtä kä butu Chiprete btä kwäräkrita nun rikaba müre ngäniene.

⁵ Angwane nun rikaba mren köräbti niken Cilicia bäre temen amne Panfilia bäre temen, bti nun rikaba nebe juta Mirate, kä Liciate.

⁶ Ye kánti nitre rükä dänkien, ie ru Alejandriabo kwanba krati. Ru ye abko jataba niken Italia abko te nun juanba mda kwe, nun rikadre janknu mentokwäre abkokäre.

⁷ Ye erere nun rikaba angwane, nun rikaba bätärekä, aise te nun rababa raire mrenbti amne nämä tare krübäte nänkrä müre ngäbti. Abti nun rikaba mate juta Gnido ngware ta. Kä ye ngwane abko müre nämä mate nun ngäbti, aise te nun rikaba niken kä Salmón, Cretate ngware ta angwane nun rikaba bä känime menteninta temen niken kä butu Cretate bäre temen.

⁸ Amne nun rikaba janknu, akwa nunkwe dikakaba tare krübäte mren köräbäre mötarita temen. Abti kä mren köräbti kädian nämäne Nö Körä Kuin Rukrä, kánti nun rikaba nebe, känime juta Lasea ken.

⁹ Ye ngwane nun jataba bäri bätäre amne, kä ja bäinkrä Ngöbökrä nitre israelitakwe sö septiembrebtä rikabara ta amne kä füre jatabara nuketa känime, aise te kä namani krübäte rikakäre rute mrenbti. Abtä Pablokwe nieba krörö nitre ru bkänkäye amne nitre ru ngwiankaye:

¹⁰ Ja mräkä, kä nena krübäte nänkrä mrenbti, aise te nane ru amne tribe rika ngwarbe munkän amne nane ni müre reketadre mrente arato nibi tuen tie, aise te ni ñan rikadre janknu mentokwäre näre, niebare Pablokwe.

¹¹ Akwa nitre rükä dänkien kákwe ru bkänkä kukwei mikani bäri era amne ru ngwianka kukwei mikani bäri era kwe arato, aise te Pablo kukwei mikaba ütiäte ñakare kwe.

¹² Akwa kä füre näre ñö köräte kä ye kánti abko ñakare kuin rabakäre, aise te ni jökrä tö namani rikai ta nebe mren köräbti juta Fenicete. Fenice ne abko ni nämäne nebe mren köräbti Cretate amne, nämäne nebe tuen ngwitäräkri amne mötarikri arato, kánti kä füre angwane, müre mate ribi ñakare, aise te nun rikaba nebe yete.

Kä nämäne krübäte mrenbti

¹³ Yehti müre mötarikri rababa mate bä räre angwane, nun rikadre janknu mentokwäre nitre ru ngwianka rababa nütüre, aise te rikaba ru ngwena bä känime mren köräbäre niken kä butu Cretate kántita temen.

¹⁴ Nun rikaba, yehti bä jötrö angwane, batibe müre kä driri kädian nämäne Euroclidón jataba mate ribi krübäte rubtä,

¹⁵ Ye kä rikaba ru mniente ngwarbe kwäräkwärä nunbe se kwrere angwane, ru rababa neketebtä ñakare mentokwäre müre ngäbti nunye, aise te nunkwe ja tuametreba ngwiandre rube ngöi müre yeye.

¹⁶ Müre rikaba nun ngwena kore rube angwane, kä butu chi kädian nämäne Claua, ye ngüre bäre temen nun rikaba angwane, müre rababa mate bä räre yete, akwa ja tare nikare kwärä nunkwe ru chi nämäne mäkäninte krati ru kribtä, ye nitre ru ngwianka dianbata kwe ru krite.

¹⁷ Ru kiakia dianbarata käin kwe, bti ru kri abko ñan juandre ngwarbe ñökwe amne mürekwe, abkokäre mäkäteba jökrä bäre ta köbti. Nebti, üman kabre jabti kädian nämäne Sirte abko te nane ru rabadrekä abko käi rababa tare okwätetre, aise te nitre ru ngwianka kákwe dänkwän kwata kri ru mikakrä niken bätärekä amne metre ta ye kitaba timon mrente bti ru tuametreba ngwiandre müre aibeye kwetre.

¹⁸ Yehti jändrinane angwane, müre nämä mate ribi krübäte, aise te tribe nämä rute, ye kita rikaba ruäre timon mrente kwetre.

¹⁹ Yehti mukirare angwane, jändrän mda mda ru ngwiankrä nämä rute, ye nitre ru ngwianka kákwe kitaba jökrä mrente ja kise jenbti au, ru ñan rikadre nguse abkokäre.

²⁰ Yehti köbö raire te nunkwe ñänä tuaba ñakare amne muke jataba ñakare nunye arato amne müre rababa mate ribi nunbtä janknu se kwrere, aise te nun krütadre jökrä rababa ruen nunye, aise te nunkwe ñan nünandre mda, nun rababa nütüre.

²¹ Nun nämä ja tare nike kore, ye ngwane abko kä raire nunkwe mröba ñakare. Abtä batibe Pablo rababa nünaninkä ni jökrä ngwäreki, kákwe nieba krörö:

Ja mräkä, ti tö kukwe niei munye abko krörö: Munkwe ti kukwei mikadre täte angwane, mun rabadre janknu Cretate, akräke jändrän nikwe se rikadre ngwarbe ñakare nikän amne, ni riadrete ñakare arato.

²² Akwa mtare ja die mike munkwe, ñobtä ñan angwane ru ne rikadi ngwarbe jökrä akwa, ni ñan krütai jire iti abko ti tö nibi niei munye.

²³ Ye gare tie, ñobtä ñan angwane Ngöbö ti bkänkä, kräke tita sribire, Ngöbö ye ara käkwe angele kwe juni iti nuke ti kánti deo,

²⁴ käkwe nini krörö tie: Pablo, makwe ñan kä jürä ngwian jabtä, ñobtä ñan angwane ma rabadi emperador ngwäreki juta Romate kukwe makwe ukatekäre, aiseite ma köböire ni jökrä tä rute mabe, ye Ngöbö kwe ngibiadibti, aiseite ñan krütadre jire iti, nini angelekwe tie.

²⁵ Ne mden kisete ja mräkä, angelekwe kukwe nini tie, ye erere Ngöbö kwe ngwiandi bare ja täritäri, abkobti tita tödeke.

²⁶ Akwa ru ne abko näin ngwarbe kä butubti. Ye kánti ni näin jökrä timon, kánti ni rabai, nieba Pablokwe nunye.

Ru nikani ngwarbe kä butubti

²⁷ Bati deo kä rikabara bämän krobu ta angwane, ru ngwian näma mürekwe nekwäre, sekwäre janknu mren Adriático kánti angwane, batibe kä ruäre deo nun rababa bä ja ken kä jateye, rababa ruen nintre ru ngwiankaye.

²⁸ Angwane mren namani nuäi nguse abko ñäkäba kwetre amne, mren ye abko näma mente nguse, aiseite rababa ngwra gre jire. Abtä rikaba bä mente mda se kwrere angwane mren ñäkäbata bobuta angwane, mren rababa ngwra jätäbti ngwrarike nguse.

²⁹ Angwane nane ru matadre jäkwatate abko jürä rababa nitre ru ngwiankabtä, käkwe jä kitaba kobkä jire mrente ru köreki ru ketabtäkäre. Yebti kä rabadre tuen ietere amne kä rabadre ngwen jötrö abko rababa ribere Ngöböye.

³⁰ Akwa ye ngwane abko nitre ru ngwianka tö rababa gitiai ru chi yete, akwa jatanintre jä ukete ru känenkri abko rababa bä mike, akwa tö rababa gitiai kore rute mentokwäre.

³¹ Akwa Pablo käkwe gaba angwane, nieba krörö kwe nitre rükä dänkienye amne nitre rükäye:

Nitre ru ngwianka noko ñan rabadre rute nete, ne ngwane mun ñan rabadita jate akwa mun krütadi jökrä, niebare Pablokwe.

³² Abtä ru chi nämane mäkaninte krati gitiakrä jae nitre ru ngwiankakwe, yebtä nitre rükä käkwe kö tikaninkä angwane, ru kiakia ye nikani mrenbti.

³³ Yebti kä jatanina ngwen ja ken dekä angwane, ni jökrä käkwe mrödre niebare Pablokwe ietere, käkwe niebare krörö mda:

Bämän krobura jire, dre rakadikä nibtä abko munta ngibiare jirekäbe abtä bäsi munta mröre ñakare,

³⁴ aiseite mtare munkwe mrödre abko ti tö nibi ribei munye, ñobtä ñan angwane nita nete ne ñan rabadre bren jire chi iti, aiseite mun tö tä nünanbtä ne ngwane, munkwe mrö kweta ja dikrä ye abko rabadre bäri kuin, niebare kwe.

³⁵ Niarakwe ñäkäbare kore, ye btäräbe ban diani kwati kisete kwe, bti kuin nieba kwe btä Ngöböye ni jökrä okwäbti, bti rikaba kwete mda.

³⁶ Yebti ni jökrä, moto rababa jäme amne mröba jökrä kwetre arato.

³⁷ Ru te nun näma näin, ye abko te ni näma sientto krobu bti gre ketamä bti ni jätäbti ni ti (276) jökrä käkwe mröba.

³⁸ Nunkwe mröba ünän jökrä kore, bti ru rabadre bäri juto, abkokäre trigo näma rute, ye kitaba jökrä timon mrente.

³⁹ Yebti kä rababara ngwen dekä angwane, kä jate jatapa nunye akwa, nun näma mdente ñan rababa nuke gare nitre ru ngwiankaye. Akwa mren niken ñö köräbti rababa tuen kuin mren köräbti jate, ye kukwäre rikaba ru ye ngwena mda,

⁴⁰ käkwe kö jäbtä ye tikakaba, bti jä kobkä mikateba kwetre mrente amne, ru kökwitakrä abko jue tikaba kwetre, bti vela abko kakabata käin mürete kwetre ru känenkri, angwane ru rikaba mate ja ken mren köräbti.

⁴¹ Ru rikabara mate ja ken mren köräbti se kwrere angwane, üman näma kabre jabtä ye te ru ison rikaba ne nguse, kánti rabakaba ümante. Ru ison känenkri rabakaba dime ümante, aiseite rababa juen ngitiekä ñakare mda. Angwane ru köreki abko btä mren rababa nuke mate dite krübäte, ye abko rikaba ru dikente kiakia jökrä.

⁴² Angwane nane nitre ngite rikadre jübenkä mrenbti amne gitiaadre abko jürä rababa nitre rükäbtä, aiseite tö rababa nitre ngite kämikai jökrä yete.

⁴³ Akwa nitre rükä dänkien tö rababa Pablo ngibiai, aiseite nitre rükä ñan tuametereba kwe nitre ngite kämike, käkwe nieba:

Nireye jübaka gare abko rankwa jökrä mrente, bti rika jübenkä nebe käne jate.

⁴⁴ Amne ni mda mda abko rikadre kri otobti amne ru oto kiakiabti köre, nieba kwe. Ye erere nun rikaba angwane, nun rababa kuin jökrä jate.

28

Dre nakaninkä Pablobtä kä butu kädianta Maltate

¹ Nun rababara kuin jökrä jate kore angwane, kä butu kánti nun rababa ye abko kädian nämáne Malta, nieba nitre núnanka yete kwe nunye.

² Angwane nitre núnanka kä butubti yete abko kákwe nun kaba ngäbti bäri kuin jökrä. Nü rababa näkäen temen, aiseté kä rababa tibo krübäte nunbtä, yebtä nitre núnanka yete ye kákwe ñukwä bukateba kri, bti nun käräba kwetre ñukwä träse siba.

³ Ye ngwane abko Pablokwe ngi nöta nöta ükäröba ruäre, nämá kite ñukwäte angwane, batibe tbi nämá krite yete abko gitiaba ñukwä käi ngániene, rikaba kákwe Pablo kwetaba kisebtä amne ribraba jökrä Pablo kisebtä se kwrere.

⁴ Tbikwe Pablo kwetaba kore nitre núnanka yete ye okwäbti angwane, rababa niere jae kwärükwäri:

Ni ne ni kämikaka bkänä, aiseté nane müre neke ñakare mrente, akwa ngöbötire ara jire btä ñan kwäräbedre kwe mda, rababa niere Pablobtä.

⁵ Akwa Pablo abko kákwe tbi ngrükateba ja kisebtä, bti kitaba ñukwäte kwe amne niara namani bren ñakare köbti.

⁶ Akwa Pablo kise rikadi nüen ñongwane amne ñongwane näin ngitiekä ngwäkäre temen abko ni jökrä rababa ngibiare. Akwa kä rikaba raire ta angwane Pablo nämá jäme, rababa bren ñakare. Yebtä abko, ni jökrä töi rikwitabata bä jene amne, Pablo abko ni ngöböre rababatre niere.

⁷ Kä ye kánti abko, ni ütiäte kri kä butubti yete kädian nämáne Publio abko nämáne kä bkäne kánime yete, kánti nun nämá. Publio ne abko kä butu Malta ye gobranka nitre romanobokrä. Niara abko kákwe nun kaba ngäbti kuin amne nun bukaba köbömä jire kwe.

⁸ Ye ngwane abko Publio rün bren drangwan kisete amne grie kisete, abtä nämá jänbti temen abko Pablo rikaba basare kánti, kákwe blitaba Ngöböbe kräke, kise mikare kwärä bti amne rababata kuinta Ngöbö diebti.

⁹ Publio rün rababata kuinta kore angwane, ni mda mda bren bren núnanka kä butubti yete, ye rükaba kwati amne Pablokwe mikabata kuinta jökrä Ngöbö diebti.

¹⁰ Yebtä niaratrekwe nun mikani ütiäte kri jae bätäkä ngwarbe, abti nun jataba niken ta kä rikaba rute angwane, jändrän mda mda bianba kabre nunye ngwiandre jabtä.

Pablo nükani juta Romate

¹¹ Nun rababa kä butubti, ye kánti nun rababa sö krämä angwane, ru Alejandriäbo nämá yete kä ñüre mike niken ta abko jataba niken ta Italia kukwäre abko te nun rikaba. Ru ye abko btä ngöbötire kädian nämáne Cástor amne Pólux bä nämáne mikani känenkri abko te nun rikaba.

¹² Ru te nun rikaba, ye rikaba nun ngwena nebe mren köräbti juta Siracusate kä butu Siciliate. Ye kánti nun rababa köbömä.

¹³ Yebti nun rikaba ta angwane, nun rikaba nebe mren köräbti juta Regiote, Italia. Abti jändrinane angwane, müre rababa mate mötarikri. Yebti mukirare angwane, nun rikaba nebe mren köräbti mda juta Puteolite.

¹⁴⁻¹⁵ Ye kánti ja mräkätire tödekaka Jesubti nämá ruäre, kákwe nun ketateba nünentbe bämän krati jabe. Ye erere nun rababa bämän krati kánti. Abti nun rikaba güre ta juta Roma kukwäre. Angwane abko, juta Romate yete nun rabadre, niebare ja mräkätireye, aiseté nun ngämi nebe juta Romate, känenkri nikani nun ngäbti nebe kä kädian nämáne Foro Apiote amne kä kädian nämáne Ju Komä jadükakrä ni basakaye. Ye kánti nikani nun ngäbti, aiseté ja mräkätire ye nämá nun ngibiare ngäbti, btä Pablo okwä rababa angwane, kuin niebare kwe btätire Ngöböye amne ja rababa ruenta dite ie niaratre tuare. Abti nun rikaba güre ta angwane, nun rababa juta Romate.

¹⁶ Nun rababa juta Romate angwane, Pablo kitani ngite ñakare kä teri, akwa tuanimetre nüne kaibe ju mdate, akwa ni rükä mikaba iti niara ngibiabtikä.

¹⁷ Pablo rababa juta Romate, bti kä rikaba köbömä ta angwane, Pablokwe nitre israelita ütiäte ütiäte núnanka Roma yete kärämna gätäbtä jae. Ye erere rükaba jökrä amne Pablokwe nieba krörö ietre:

Ja mräkä, ti tö kukwei niei munye abko krörö: Ti kukwe nuene ñakare blo ja mräkätire israelita rüere. Erere arato, kukwe ükaninte ño ni mräkä kirakirakwe, ye rüere ti ja mike ngite ñakare. Akwa nitre israelita kákwe ti kitaba ngite nitre romanobo kisete Jerusalén sete.

¹⁸ Ti kitaba ngite angwane, nitre romanobo kākwe kukwe ngwiantariba ünän jökrä tie, abti tö rababa ti tikaiteta, ñobtä ñan angwane ti ja mike ngite ñakare abtä ti kāmikadre kwetre, ye abko gaba kwetre, abtä tö rababa ti tikaiteta.

¹⁹ Akwa nitre israelita ji dokwäte, ie kukwe ye ñan rükabtiba. Abtä emperador kākwe kukwe ükadrete jirekåbe tikrä abko tikwe ribeba mda. Kukwe ñakare tikwe ni mräkåtre ti kåite üere akwa, tikwe kukwe ribeba kore jakrä.

²⁰ Ne mdenbtä abko, tikwe mun kåråmna gätåbtä jae blitakåre kukwe nebtä munbe, ñobtä ñan angwane kukwe bti nitre israelita tä tödeke, arabebti tita tödeke arato, ye mdenbtä tita ngite måkåninte kadenanbti nete. Abko kore se, niebare Pablokwe ietre.

²¹ Abtä nitre israelita ütiåte ütiåte ye kåkwe niebare mda ie:

Nitre israelita nünanka Judeate abko tårå juen ñakare ma rüere nunye. Erere arato, ja mräkåtre Judeabo tä nüke ruåre nete kåta blite ñakare blo ma rüere nunbe.

²² Akwa ma abko tä töbike ño abko nun tö nibi kukwe nuai, ñobtä ñan angwane kukwe btin dirita mda, ye rüere abko ni kå jökråbti tä ñåke blo, aisete makwe blitadre btå, ie nun tö, niebare kwetre Pabloye.

²³ Abtä gåtå köböi kitani kwetre mda. Ye erere gåtå köböi nükani angwane Pablo nåmane nüne, ye kånti ni nükani ja ükaninkrö kwati. Angwane Ngöböta gobrane ño ni ngåtåite abkobtä Pablokwe blitabare bentre köböiti kå de. Moisés kåkwe dre niebare Jesubtä amne nitre Ngöbö kukwei niekå kirakira kåkwe dre tikani Jesubtä, ye abko rabadre era nitre israelitakrä, abkokåre Pablo namani kådriere bentre.

²⁴ Pablo namani blite kore ye abko ni ruåre kråke namani era amne ni ruåre abko kåkwe ñan mikani era.

²⁵ Angwane niaratre ñan töi namani nebe ja nåre angwane, namani nikenta angwane, Pablokwe niebare mda ietre:

Mun kore, ye mden kisete Ngöbö Üai Deme köböire ni Ngöbö kukwei niekå Isaiås kåkwe niebare krörö mun mräkå kirakiraye munbtå:

²⁶ Nån niere krörö nitre israelita neye:

Munkwe ti kukwei nuadi blite båri, akwa tita dre niere ñan rükadi gare munye.

Erere arato, tita sribi nuene mun okwåbti, ye abko munkwe tuadi båri, akwa drekåre tita sribi ye nuene abko ñan jatadre munye,

²⁷ ñobtä ñan angwane juta ne kåkwe ja dokwå mikani ribi ti kukwei kråke, aisete ñan tö namani ti kukwei nuai, kåkwe ja olo gu dikani ti kukwei ngåniene amne, sribi tikwe ñan jatadre ietre, abkokåre ja okwå jue mikani kwetre.

Mdakåre abko, ti kukwei ñan rükadre gare ietre amne tikwe ñan diandretari, abkokåre nuenbare kore kwetre, *Isaiås 6.9-10*
abko tikani kore Isaiåkwe munbtå.

²⁸ Ne aisete mtare mentokwåre Ngöböta juto biare nitre ñakare israelitare dentari amne, niaratre abko kåkwe Ngöbö kukwei nuadi, kåkwe kadi ngåbti, ye abko rabara gare munye, niebare Pablokwe ietre.

²⁹ [Pablokwe ñåkåbare kore, yebtå abko nitre israelita namani nikenta akwa, namanintre ja kwete krübåte kwårikwåri kukwe yebtå.]*

³⁰ Abti ju ütiå bian nåmane Pablokwe nünankrä jae juta Romate, ye kånti Pablokwe nünabare ngite ju yete kå kubu tåte amne, nire nire nåmane nüke basare ie, ye niara nåmane kaen ngåbti ja kånti ju yete.

³¹ Angwane Ngöbö nåmane gobrane ño ni kwekwe ngåtåite, yebtå Pablo namani dirire jåme. Erere arato, Pablo namani blite ni Dånkien Jesukristobtä amne niara kada keta namani ñakare blitåbtå Jesukristobtä. Ne abko nakaninkå kore. Ne ngörå.

* 28:29 Kukwe corcheta ngåtåite ñan tä tikani manuscrito båri kuinkuinbtå.

Tärä Tikani Pablokwe Nitre Romanobokrä Romanos

Tärä ne tikana abko Pablo. Niara nämane nüne juta Corinto kä 57 angwane, tärä ne tikani kwe nütüta. Bäreni niara tö namani rikai basare nitre tödekaka Jesubti nünanka Romate yeye, akwa kä ñan namani kwen ie nänkrä. Ye mden kisete, tärä ne tikani kwe nitre tödekaka Jesubti nünanka juta Romate kräke, Jesukristo käkwe dre dre nuenbare kräke mikakäre gare ietre. Bäsi niaratre jökrä abko ñakare israelitare, akwa niaratre yekri ni israelita tödekaka Jesubti nämane gätäre ben arato. Nitre israelita tödekaka Jesubti ye abko nämane bike kri nitre tödekaka Jesubti ñakare israelitare yebtä, ñöbtä ñan angwane Ngöbökwé nitre israelita dianinkä käne aisete. Ye mden kisete kukwe namani nokre nitre tödekaka Jesubti ngätäite Roma yete.

Ne aisete, ni jökrä israelita ya, ñakare ya abko ja kwrere jökrä Ngöbö ngwärekwé, ye abko Pablo tö namani mikai gare tärä nebti. Bäreni käne abko, ni jökrä käkwe Ngöbö mikani ngwarbe jae, aisete ngite Ngöbö ngwärekwé abko Pablokwe mikani gare ietre. Yebti, Ngöbö kukwei kuin Jesubtä, ye aibehti Ngöböta ni israelita amne ni ñakare israelitare dentari ja kwrere jökrä abko Pablo tö namani mikai gare ietre. Erere arato, nita tödeke Jesubti, ye aibe köböire ni ñakare ngite mda Ngöböta niere nihtä amne tä ni kaen ngäbti abko Pablo tö namani mikai gare metre. Kukwe Biani Ngöbökwé Moiséye, ye mikabtä täte abko Ngöbökwé ni kadre ngäbti abko nitre israelita nämane nütüre, akwa ñakare kore Pablokwe niebare ietre. Ni ñan raba jändrän nuene jire chi Ngöbö moto mikakäre nuäre jakrä, abtä Ngöbökwé ni diandretari, akwa tödeka Jesubti, aibe köböire Ngöböta ni dentari abko Pablota niere tärä nebtä.

Pablota köbö kuin juen

¹ Ti Pablo abko ni klaboré Kristo Jesukwe. Ti ne mden käta köbö kuin juen munye. Ti käräbare Ngöbökwé Jesu kukwei ngwianka amne ti dianinkä jenena Ngöbökwé ja kukwei kuin Jesubtä mikakäre gare.

² Ngöbökwé ja kukwei kuin Jesubtä ne mikadi gare abko niebare kira kwe ja kukwei niekä niekä köböire, ye mden abko tä tikani Ngöbö Kukwei Demenbtä.

³⁻⁴ Ngöbö kukwei kuin abko tä blite Ngöbö Odei Jesukristo ni Dänkienbtä. Niara därebare ni bobre, di ñakare kä nebtä kwrere jrei David tukwe mräkäkri. Amne Ngöbökwé mikaninta niere angwane, mikani ütiäte kri kwe amne niara abko Ngöbö Odei Di Kri abko Ngöbökwé mikani gare ja Üai Deme köböire.

⁵ Jesukristo ne köböire Ngöbökwé ja moto mikani kuin tikrä, käkwe ti mikani ja kukwei ngwianka. Angwane ti mikani sribikä jakrä kwe nitre ñakare israelitare kä jökräbti temen käräkäre tödeke Jesukristobti amne Jesukristo mikakäre täte.

⁶ Nitre käräbare Ngöbökwé rabakäre Jesukristokwe, ye ngätäite mun nünanka juta Romate tä siba rabakäre Jesukristokwe.

⁷ Ngöböta mun tarere amne mun käräbare kwe nünakäre deme jakrä. Mun ye abko kräke Ngöbö ni Rün nikwe amne Jesukristo ni Dänkien raba ja moto mike kuin amne raba kä jäme mike mun jökräbtä, ie ti tö.

Pablo tö näin basare juta Romate

⁸ Bäreni käne ti mräkäre, Jesukristo köböire tita kuin niere Ngöbö tikweye mun itire itire btä, ñöbtä ñan angwane munta tödeke Jesukristobti abko kädrieta kä jökräbti temen.

⁹⁻¹⁰ Tita sribire Ngöbökrä ja di ngöi jökrä. Tita kukwe kuin niara Odeibtä mike gare angwane, käre tita blite ben angwane, munta nüke töre käre tie abko gare kuin ie. Tita blite Ngöböbe angwane, Ngöbö tö ne ngwane, kä biandre kwe tie nebe basare mun kanti yete abko käre tita kärere Ngöböye.

¹¹ Tita blite kore ben, ñöbtä ñan angwane bäreni ti tö mun tuai angwane, ti köböire Ngöbö Üai rabadre ja di bien munye, mun moto mikakäre nuäre amne mun mikakäre nüne bäreni dite Ngöbökrä, abkokäre ti tö näin mun kanti yete.

¹² Ye abko, ñan mun aibe rabadre dite Ngöböbtä, ie ti tö, akwa nikwe ja die mikadre kwärikwäri abko ie ti tö. Munta tödeke Jesukristobti amne tita tödeke bti arato, yebti nikwe ja die mikadre abko ie ti tö.

¹³ Ti mräkäre, ti namanina yäke bäre bäre nebe basare munye yete, akwa käre kukwe mda mda tä nebe ti jiete, abtä ti ngämi nebe mun kanti. Ti mräkäre tikwe, nitre ñakare israelitare nünanka kä mda kanti, tikwe ngwiani tödeke Jesubti, ye kwrere ti tö rikai nitre mun kanti yete ngwian tödeke Jesubti arato, abkokäre ti tö rikai nebe Roma yete.

¹⁴ Jata nebe ruen kore tie, ñobtä ñan angwane rürümon ütiä kri tibti Ngöbökwé ruen tie, aiseite nitre griegore amne nitre ñakare griegore, nitre töbtä amne nitre ñakare töbtä abko

¹⁵ ie ti tö Ngöbö kukwei kuin Jesubtä mikai gare kisere abko erere ti tö näin niere mun nünanka juta Romate yeye.

¹⁶ Ngöbö kukwei kuin Jesubtä ye tita gaire ñakare, ñobtä ñan angwane kukwe kuin Jesubtä ye abko Ngöbö di kri ni diantarikrä. Ye abko nire nire töbtä amne nitre ñakare töbtä ye mike era jae, käta tödeke kwatibe Jesubti abko Ngöböta dentari, aiseite Ngöbö kukwei kuin Jesubtä abko Ngöbö di kri ni diantarikrä—nitre israelita ara jire kâne, yehti ni mda mda ñakare israelitare abko Ngöböta dentari kore arato.

¹⁷ Kukwe kuin Jesubtä abko Ngöbö di kri ni diantarikrä, ñobtä ñan angwane ni ngite ñakare mda Ngöböta niere abko mikata gare kukwe yehti. Nire nire käta tödeke kwatibe Jesubti, ni ye aibe ngite ñakare mda Ngöböta niere. Ne aiseite tödeka kwatibe Jesubti aibe ütiäte, mden erere tä tikani krörö Ngöbö Kukweibtä:

Tödeka kwatibe Ngöböti, ye köböire ni ngite ñakare mda nieta Ngöbökwé. Ni ye aibe käkwe nünandi Ngöböbe. *Habacuc 2.4*
abko tä tikani Ngöbö Kukweibtä.

Ngöbö moto romon tä mike gare

¹⁸ Mdakäre abko, ni jökrä käta kukwe nuene kämekäme amne tä kukwe diän diän nuene bätäkä ngwarbe, erere tä ja mike ngite Ngöbö rüere. Erere arato, ni ye käta kukwe käme nuene angwane, tä kukwe era metre Ngöböbtä ketebti jökrä. Ni ye rüere Ngöbö kä känbti käta ja moto romon mike gare.

¹⁹ Ngöböta ja moto romon mike gare kore, ñobtä ñan angwane kukwe rabadre gare nuäre Ngöböbtä erere gare kuin ni jökräye, ñobtä ñan angwane Ngöbö ara jire käkwe mikani gare krörö:

²⁰ Kena dekä abti kä nüke mtare jändrän dätebare Ngöbökwé, ye mdenbti kukwe tiebe tua ñakare Ngöböbtä abko tä nüke gare nie amne Ngöbö abko Ngöbö ño tä nüke gare nie arato. Ye mden kisete jändrän jökrä dätebare Ngöbökwé kena, yehtä nita töi ngitiekä kuin metre angwane, Ngöbö di kri rabadi kärekäre amne niara abko Ngöbö era metre rükadre gare nie. Ne aiseite ni kukwe kämekäme nuenkä ñan raba ja ngite ñakare niere jire chi Ngöböye,

²¹ ñobtä ñan angwane Ngöbö nāmanena gare ietre, akwa ñan mikani ütiäte Ngöbö kwrere kwetre. Erere arato, jändrän nuenbare Ngöbökwé kräke, yehtä kuin niebare ñakare kwetre ie, akwa jändrän ngwarbe ütiäte ñakare abko jiehti nikanintre töbike ngwarbe mda amne, niaratre nikani töbike kukwe diän diän aibehtä.

²² Ja töbtä kri nāmanentre niere, akwa ni töi ñakare kwrere jire namani,

²³ ñobtä ñan angwane Ngöbö nünanka kärekäre, ne krüte ñakare amne di kri bä nuäre abko mikani ütiäte ñakare kwetre, akwa ni ngwarbe kä nehtä tä krüte abko bä sribebare ngöböre kwetre jae. Erere arato, nukwä, jändrän ngwarbe ngwarbe känsenta, gwita amne jändrän yorekä tementa abko bä sribebare ngöböre kwetre jae.

²⁴ Niaratre töi käme kore, ye mdenbti abko Ngöbökwé gibianinkä kaibe jae, amne kukwe kämekäme mdei nāmane krübäte niaratre töibtä, ye jiehti Ngöbökwé tuanimetre niken abko erere nikani ja mike gure bati bati amne kukwe diän diän mda mda nuen nāmane.

²⁵ Niaratre nikani kukwe ñakare era metre ye jiehti abko krörö: Jändrän dätebare Ngöbökwé abko mikani ütiäte ngöböre jae kwetre amne käikitaninkä Ngöbö täte kwetre, akwa Ngöbö Jändrän Dätekä era metre ara jire abko mikani ütiäte ñakare kwetre amne käikitaninkä ñakare kwetre. Akwa Ngöbö ye aibe abko rabadre käikitaninkä kärekäre. Abko kore se. Amen.

²⁶ Ye mdenbti Ngöbökwé gibianinkä kaibe jae, kukwe gaidre kri ye aibe mdeita nebe krübäte ietre. Ne aiseite meri käkwe ja mikadre gure ni brare ben abko mikanintbe Ngöbökwé nitre merire kräke, ye abko nitre merire käkwe mikani ngwarbe, kä nikani bike brare jae kwärikwäri.

²⁷ Ne kwrere arato, ni brare käkwe ja mikadre gure ni merire ben abko mikanintbe Ngöbökwé akwa, ye abko kitani temen nitre brarekwe. Abti nitre brare ruäre abko ja mdeita neme krübäte kwärikwäri ietre, käta kukwe käme gaidre kri nuene jabtä kwärikwäri. Ye dokwäre abko, Ngöbö ara jire käta mike ja ngite nuen metre.

²⁸ Ngöbö nāmanena, ye nāmane gare ni jökräye, akwa ñan tö namani mikai ütiäte janknu, abtä Ngöbökwé gibianinkä kaibe jae töbike kukwe kämekäme aibehtä amne, kukwe käme ñan nuendre abko erere nuendre kwetre abkokäre.

²⁹ Ye erere tätre kukwe diän diän nuene bätäkä ngwarbe, amne kukwe bätäkä ngwarbe blo blo tätre nuene. Erere arato, tätre töbike kaibe jändrän kuinbtä jakrä amne töita jändrän ngututire aibehtä. Erere arato, jändrän ni mdakwe abko ie töta nebe bäri kabre jakrä amne,

ni ni mda kāmikaka, ni ngüdreka ngwarbe, ni ni ngökö ngwarbe, ni diän diän amne ni blitaka ngwarbe ni mda rüere.

³⁰ Amne tätre ñäke diän diän ni mda mda rüere amne mätä kri Ngöböbtä tätre ja mike ütiäte ni mda mdabtä, jata nebe ruen kri ietre au, käta bike kri ni mda mdabtä, tätre kukwe kämekäme miketbe btin mda Ngöbö rüere amne ñan tätre meye amne rün kukwei mike täte.

³¹ Erere arato, Ngöbö tö dreye abko ñan tö mikai gare jae amne ñan tätre ja kukwei mike täte amne, tätre ni mda mda tarere ñakare amne ni mda mda ruentari tare ñakare ietre.

³² Ni jökrä kukwe nuenkä korekore abko dokwäre krütadre kärekäre amne rabadre Ngöbö okwä bäre mento kärekäre abko Ngöbökwē mikaninthe metre kore, ye abko gare kuin ni jökräye. Akwa tätre kukwe nuene kämekäme janknu. Erere arato, ni mda mda tä nebe kukwe nuene kämekäme kore okwäbti abko käita neme nuäre btätre tuare.

2

Ngöböta kukwe ükete metre ni jökrä kräke

¹ Akwa ma abko ni israelita, mata bike deme, käta nitre ñakare israelitare kite ngise kukwe käme nuenbtä. Akwa ma abko ngite ñakare Ngöbö ngwäreki, ye makwe ñan nütü jabtä, ñöbtä ñan angwane mata ni mda mda kite ngise, akwa mata ja miketa ngite au arato, ñöbtä ñan angwane ni mda mda tä ja mike ngite, ye kwrere jire mata ja mike ngite siba.

² Akwa ni ja mikaka ngite, ye rüere Ngöböta kukwe ükete amne, kukwe era metre btä tä kukwe ükete, ye gare kuin nie.

³ Akwa ma abko tä ni mda mda kite ngise kukwe käme nuenbtä angwane, mata ja mike ngite ja kwrere niaratrebe, yebtä abko Ngöbökwē kukwe ükadite munkrä, ye näire ni mikadi ja ngie nuen kwe angwane, makwe kwäräbedi abko makwe ñan nütü jabtä.

⁴ Ngöbö bäri moto kuin abko mata mike ngwarbe jae angwane, mata dre dre nuene btä Ngöböta neme romon ñakare jötrö makrä. Akwa makwe kukwe kämekäme kitadre temen amne makwe tödekadre bti, abkokäre Ngöböta ja moto mike kuin makrä, käta ma ngibiare raire, ÿye abko mata gain ñakare?

⁵ Akwa ma tä töbike kore angwane, ma tä ja dokwä mike ribi Ngöbökrä amne, ma ñan tö ja töi kwitaita Ngöbö kukwäre, aisete Ngöbökwē ni mikadi ja ngie nuen, ye ngäbti mata Ngöbö mätä ükekrö bäri jakrä. Ye näire Ngöbökwē kukwe ükadite era metre ni jökrä kräke angwane,

⁶ ni itire itire tä dre dre nuene, ye erere Ngöbökwē ütiä biandi kröro nie:

⁷ Ni ruäre rabadre käikitandinä Ngöbökwē amne rabadre mikani ütiäte jae Ngöbökwē amne tö rabai nüne kärekäre Ngöböbe, abtä ja töi mikani kwatibe jändrän kuin nuene kärekäre Ngöbökrä, ni ye abko Ngöbökwē mikadi nüne kärekäre.

⁸ Akwa ni ruäre abko käta töbike jändränbtä kaipe jakrä, käta trö kwite kukwe era metre Ngöbökwē yeye amne tä nekete kukwe kämenkri, ni ye abko btä Ngöbö mätä rabadi kri, käkwe mikadi ja ngie nuen.

⁹ Ne aisete ni kukwe nuenkä kämekäme erere käkwe ja tare nikadi kri amne moto rabadi nötoe krübäte ja jiebti arato ja tare nikabtä, ye abko nitre israelita ara jire käkwe ja tare nikadre käne kore. Erere arato, nitre ñakare israelitare käkwe ja tare nikadre.

¹⁰ Akwa nire nire käkwe jändrän nuenbare kuin kärekäre Ngöbökrä abko Ngöbökwē käkitadikä, käkwe mikadi ütiäte amne mikadi nüne jäme kwe, ye abko nitre israelita kräke käne amne nitre ñakare israelitare kräke arato.

¹¹ Ye kwrere Ngöbökwē kukwe ükadite ni jökrä kräke, ñöbtä ñan angwane ni ja kwrere jökrä Ngöbökrä amne ñan Ngöböta nitre israelita tarere bäri nitre ñakare israelitare kräke.

¹² Nitre ñakare israelitare abko ie Kukwe Biani Ngöbökwē Moiséye gare ñakare, käta ja mike ngite, ye abko Ngöbökwē mikadi ja ngie nuen, akwa ñakare Kukwe Biani Ngöbökwē Moiséye yehti; akwa nitre israelita abko ie Kukwe Biani Ngöbökwē Moiséye gare bäri kuin, käta mike ñakare ütiäte jae amne, tä ja mike ngite, nitre ye abko Ngöbökwē mikadi ja ngie nuen Kukwe Biani Ngöbökwē Moiséye yehti.

¹³ Ngöbökwē kukwe ükadite kore, ñöbtä ñan angwane ñan nita Kukwe Biani Ngöbökwē Moiséye ye kukwei nuen jirekäbe abko köböire ni ñakare ngite mda Ngöböta niere nihtä; akwa Kukwe Biani Ngöbökwē Moiséye ye nita mike täte metre ta abko köböire ni ñakare ngite mda Ngöböta niere nihtä.

¹⁴ Nitre ñakare israelitare abko kwe Kukwe Biani Ngöbökwē Moiséye ñakare, akwa kukwe ye tä dre nuemna, erere nitre ñakare israelitare tä nuene nierare ja töi jenbti angwane, kukwe nuenta kwetre ye abko kukwe biani nuendre Ngöbökwē nie ara jire kwrere.

¹⁵⁻¹⁶ Ye ñöbtä ñan angwane Kukwe Biani Ngöbökwē Moiséye käta dre nuemna, ye erere nitre ñakare israelitare tätre nuene nierare ja töi jenbti angwane, kukwe ye tä niaratre töibtä tätre bä mike, aisete ñongwane tätre ja mike ngite amne ñongwane tätre ja mike ngite ñakare tä nüke gare au jabtä ietre. Ne aisete Jesukristo köböire Ngöbökwē kukwe ükadite ni jökrä kräke, ye näire kukweta kaipe tiebe nitre ñakare israelitarekwe, yehti abko Ngöbökwē ükadite kräke.

Angwane niaratre kākwe ja mikani ngite angwane, tōi kāme ara jire kākwe niaratre kitadi ngite o niaratre tōi metre kākwe bā mikadi metre Ngōbō ngwārekri. Ne abko Ngōbō kukwei kuin Jesubtā dirita tikwe kāta niere.

Nitre israelita amne Kukwe Biani Ngōbōkwe Moiséye

¹⁷ Mata ja israelita niere amne Kukwe Biani Ngōbōkwe Moiséye, bti mata tōdeke amne, mata ja gete Ngōbōbe, bti ja ruen ūtiāte kri mae.

¹⁸ Erere arato, makwe dre dre nuendre nūnakāre metre, ie Ngōbō tō, ye garera mae, űbōtā űnan angwane Kukwe Biani Ngōbōkwe Moiséye kāta mīke gare mae.

¹⁹ Abtā nitre űnakare israelitare, ie Ngōbō gare űnakare abko ma raba niken jie ngwana Ngōbōye, ruen mae. Erere arato, nitre ie Ngōbō gare űnakare abko okwāte ma raba kā trā tikekā ngwiankāre Ngōbōye, ruen mae.

²⁰ Mdakāre abko, nitre űnakare israelitare tōbtā űnakare Ngōbōbtā abko, ie Ngōbō gare űnakare abko ie ma raba dirire, ruen mae. Erere arato, nitre űnakare israelitare tōi mrāme Ngōbōbtā ngābākre kwrere abko ma raba tōi tike Ngōbōbtā ruen mae, űbōtā űnan angwane Kukwe Biani Ngōbōkwe Moiséye kāta ma tōi tike amne tā kukwe era metre Ngōbōbtā mīke gare mae, aisete mata tōbīke kore jabtā.

²¹ Akwa ma abko israelita, aisete ma rabadre Kukwe Biani Ngōbōkwe Moiséye dirire nitre űnakare israelitare yeye mata nūtūre, erere mata nuene. ζYe űbōtā abko ma ara jire űnan tā kukwe ye dirire kāne au jae? ¡Niaratrekwe űnan godre dirita makwe ietre amarebti mata gore!

²² Erere arato, meri ni mdakwe űnan mikadre ja ken, mata dirire nitre űnakare israelitareye, amarebti ma ara jire kāta meri ni mda mdakwe mīke ja ken kān. Mdakāre abko, ngōbō ngwarbe tā neme tuen kāme krūbāte mae amarebti jāndrān ūtiāte ūtiāte tā ngōbō ngwarbe juete abko mata goire.

²³ Erere arato, Kukwe Biani Ngōbōkwe Moiséye tā makwe, bti mata bīke kri, akwa Kukwe Biani Ngōbōkwe Moiséye, ye űnan mikata tāte metre makwe, aisete kukwe ye arabe bti mata Ngōbō mīke ngwarbe jae.

²⁴ Ye mden kisete, Ngōbō Kukwei tā tikani krōrō mabtā: Mun israelita ye mden kōbōite nitre űnakare israelitare tā űnāke blo Ngōbō rūere. *Isaías 52.5; Ezequiel 36.22*

abko tā tikani Ngōbō Kukweibtā mun israelitabtā.

²⁵ Mdakāre abko, mata űnārākrā mīke ma kwatabtā, Ngōbōta ma bkāne bā mikakāre, akwa ti tō kukwe niei krōrō mae: Kukwe Biani Ngōbōkwe Moiséye, ye mata mīke tāte era metre jōkrā, ye aibe angwane űnārākrā mikani kwatabtā abko ūtiāte Ngōbō ngwārekri; akwa Kukwe Biani Ngōbōkwe Moiséye ye ma űnan tā mīke tāte jōkrā, ye ngwane űnārākrā mikani ma kwatabtā abko űnakare ūtiāte Ngōbōkrā. Amne ni űnakare israelitare űnārākrā űnakare kwatabtā, ye kwrere jire ma tā nebe Ngōbō ngwārekri.

²⁶ Akwa ni űnakare israelitare abko kākwe Kukwe Biani Ngōbōkwe Moiséye ye mikare tāte jōkrā angwane, űnārākrā mikani űnakare kwatabtā, akwa nitre israelita űnārākrā mikani kwatabtā, kwrere jire bā rabadre Ngōbō ngwārekri.

²⁷ Ye abko, era metre ma abko israelita, aisete űnārākrā mikani ma kwatabtā amne mata Kukwe Biani Ngōbōkwe Moiséye ye bkāne, akwa mata mīke űnakare tāte, aisete ni űnakare israelitare űnārākrā mikani űnakare kwatabtā, akwa Kukwe Biani Ngōbōkwe Moiséye mikata tāte kwe, ni ye abko kākwe ma kitadi ngite,

²⁸ űbōtā űnan angwane nita dārere ni mrākā israelitakri, ye aibe kōbōire űnan nita nebe israelitare era metre Ngōbō ngwārekri. Erere arato, ni űnārākrā mikani kwatabtā, ye űnan aibe kōbōire abko nita nebe űnārākrā mikani era metre Ngōbō ngwārekri,

²⁹ űbōtā űnan angwane ni tōi kuin amne ni moto kuin Ngōbō ngwārekri, ni ye abko ni israelita era metre Ngōbō ngwārekri amne, ni tōi kuin era metre ye abko kāta ni űnārākrā mikani ni kwatabtā kwrere. Ne aisete ni űnārākrā era metre ni kwatabtā abko Ngōbō Ūai tā nuene ni tōibtā, kāta ni tōi mīke kwatībe Ngōbōbtā, ye abko űnan Kukwe Biani Ngōbōkwe Moiséye tā tikani tārābtā, ye kāta ni tōi mīke kore. Ne aisete ni tōita mikani kwatībe Ngōbōbtā kore Ngōbō Ūai kōbōire, ye abko űnan ni mda mdakwe kāikitadikā, akwa Ngōbō ara jire kākwe ni ye kāikitadikā, kākwe mikadi ūtiāte jae.

3

Ngōbōta ja kukwei mīke tāte era metre

¹ Ye abko, ma dārebare ma mrākā israelitakri amne űnārākrā mikanina ma kwatabtā ye ūtiāre Ngōbōkwe űnan ma mikadre metre ja ngwārekri, aisete ma abko israelita amne, makwe űnārākrā mikani ma kwatabtā, ζye abko ūtiāte makrā ya?

² ¡jānri, ye abko ūtiāte kri! Kukwe keta kabre btā ye ūtiāte, űbōtā űnan angwane kāne Ngōbōkwe tōdekani nitre israelitabti, kākwe ja Kukwei biani ietre.

³ Yebti ¿dre rakadrekä mda? Nitre israelita ruäre käkwe Ngöbö kukwei mikadi täte, niebare kwetre Ngöböye. Abti ja kukwei kitaninta temen kwetre. ¿Yebtä abko Ngöbökwé ja Kukwei mikadi täte niebare ni mräkä israelita kirakiraye, ye Ngöbökwé kitadita temen niaratre kwrere arato ya?

⁴ ¡Ñakare jire! ¡Ngöbökwé ñan ja kukwei kitadre jire chi temen! Ni jökrä rabadre ni ngökö, käkwe ja kukwei kitadre temen, akwa Ngöbö abko käre tä kukwe niere, erere tä mike täte jökrä. Ne aisete Ngöbö Kukwei kätä niere krörö:

Ma kukwei abko raba mikani era Ngöbö amne mata kukwe ükete nigrä angwane, ma kukwei era metre rükadi gare mabtä, *Salmos 51.4*
abko tä tikani Ngöbö Kukweibtä.*

⁵ Akwa ni ruäre tä ñäke ngwarbe krörö Ngöbö rüere: Nita ja mike ngite Ngöbö rüere angwane, Ngöbö abko bäri metre ta mikata gare btä amne Ngöbö käikitakata bäri. Kore ne ngwane, Ngöbökwé ni mikadre ja ngie nuen angwane, Ngöböta kukwe nuene blo abko ni ruäre tä niere ngwarbe.

⁶ Akwa ni ñan raba ñäke jire chi kore Ngöböbtä, ñöbtä ñan angwane Ngöbö ñakare kukwe ükete era metre ni israelitakrä, käkwe ni mikadre ja ngie nuen kukwe kämekäme dokwäre, ¿se abko kukwe ükadrete ño kwe ni ñakare israelitare kä jökräbti kräke, mikakäre ja ngie nuen se? Akwa niara abko era metre, aisete tä kukwe ükete kore ni israelitakrä arato.

⁷ Erere arato, ni ruäre kätä niere ngwarbe krörö: Tikwe blitadre ngwarbe ni ngökakäre, ye ngwane Ngöbö moto bäri kuin amne Ngöbö di kri bä nuäre mikata gare tibtä angwane, ¿se ñöbtä abko ti ngite, aisete Ngöbökwé ti mikadre ja ngie nuen? abko ni ruäre tä niere.

⁸ Ye abko ngwarbe era metre, akwa nane rabadre metre, ye ngwane jari kukwe kämekäme nuene ye köböire Ngöbö di kri bä nuäre mikadre gare bäri abkögare! abko rabadre kuin. Ye abko dirita kore tikwe abko ni ruäre tä niere tibtä ti bä mikakäre käme, akwa ye dokwäre Ngöbökwé nitre ye mikadi ja ngie nuen era metre.

Ni ñakare jire iti metre amne ngite ñakare Ngöbö ngwäreki

⁹ ¿Nikwe dre niedre mrä? ¿Ni israelita ne abko bäri kuin era metre nitre ñakare israelitare ngwä abko Ngöböta nütüre ya? ¡Ñakare jire! ñöbtä ñan angwane ni israelita ya, ñakare ya akwa ni jökrä ngite ja kwrere Ngöbö ngwäreki, ye mden abko nunkwe bä mikanina.

¹⁰ Ye mden erere Ngöbö Kukweita niere arato abko krörö:

Ni ñakare jire iti era metre Ngöbö ngwäreki.

¹¹ Ni ñakare jire iti abko ie kukwe gare era metre Ngöböbtä.

Ni ñakare jire iti kätä Ngöbö kënëntari.

¹² Ni jökrä käkwe trö kwitani Ngöböye, bti nikani ji blobti amne nikaninta kukwe kämekäme nuene ja kwrere jökrä Ngöbö rüere.

Ni ñakare jire iti kukwe kuin nuenkä.

Ni ñakare jire iti.

Salmos 14.1-3; 53.1-3

¹³ Mdakäre abko, ni krütani doboi mikani, bti jue diandrekäta amne rä kure, ye kwrere jire ni töi käme abko erere blitata käme kwe.

Erere arato, ni tüdrä abko tä blite ngwarbe ni mda mda ngökakäre.

Salmos 5.9

Tbi tu krübäte kätä ni mike bren, ye kwrere jire ni ñäke taretare krübäte kätä ni mda mda juen ngwarbe.

Salmos 140.3

¹⁴ Erere arato, ni kada abko tä biare ñäkäkäre blo ni mda mda rüere amne käre nita blite romone.

Salmos 10.7

¹⁵ Ni jökrä tä juto biare ni mda mike bren amne ni mda kämike.

¹⁶ Nitre ye abko tä jändrän jökrä juen ngwarbe amne tä ni mda mike ja tare nike.

¹⁷ Nünandre jäme Ngöböbe amne ni mda mdabe, ye abko gare ñakare ietre. *Isaías 59.7-8*

¹⁸ Ne aisete, ni ñakare jire iti kä nebtä kätä Ngöbö jürä ngwen jabtä, kätä Ngöbö mike ütiäre jae.

Salmos 36.1

¹⁹ Ye kwrere abko Ngöbö Kukweita ni ngite mike gare nie kore. Mdakäre abko, kukwe ye tä nitre ñakare israelitare aibe kite ngite, makwe ñan nütü, ñöbtä ñan angwane mun israelita abko kräke Ngöbökwé ja Kukwei biani mun ngite mikakäre gare munye abko gare kuin nie. Ye mden kisete, kä mrä angwane, Ngöbökwé kukwe ükadite nigrä angwane, ni jökrä israelita amne ñakare israelitare ye rabadi kada ketani amne rabadi kwekbe jökrä, ñöbtä ñan angwane ngite ñakare, ye ñan rabadre niere Ngöböye,

²⁰ ñöbtä ñan angwane ni ñakare jire iti käkwe Kukwe Biani Ngöbökwé Moiséye mikadre täte jökrä abko ütiäre ngite ñakare mda Ngöbökwé niedre btä. Akwa Kukwe Biani Ngöbökwé Moiséye ye köböire ni jökrä abko kukwe kämekäme nuenkä abtä ngite Ngöbö ngwäreki tä nuke gare nie.

* **3:4** Meri kädian námame Betsabé, ben jrei David käkwe ja mikani ngite, abti Salmos 51 tikani kwe ja ngite niekäre Ngöböye.

Tödeka kwatibe Jesubti aibe köböire ni ngite ñakare mda Ngöböta niere

²¹ Akwa mtare, ñokwe ni ngite ñakare mda Ngöböta niere abko niarakwe mikanina gare ni jökräye. Akwa ñan Kukwe Biani Ngöbökwé Moiséye ye köböire Ngöböta ni ngite ñakare mda niere nibtä abko Kukwe Biani Ngöbökwé Moiséye këta niere metre amne, Ngöbö kukwei mda mda tikani nitre Ngöbö kukwei niekákwe këta niere arato.

²² Ni jökrä israelita ya, ñakare ya, akwa tä tödeke era metre Jesukristobti abko erere ngite ñakare mda Ngöböta niere btäre. Ne abko Ngöböta nuene ja erebe ni jökrä kräke,

²³ ñobtä ñan angwane ni jökrä këta ja mike ngite Ngöbö rüere, abtä Ngöböta kukwe nuemna nie, ye abko ni jökrä ñan tä mike täte metre jire chi. Ye aiseté ni ñakare jire iti abko metre Ngöbö kwrere.

²⁴ Akwa Kristo Jesu krütani krusobtä angwane, niarakwe ni kökanintarita ni tikatekäre, ye köböire ni jökrä tödekaka Jesukristobti abko ngite ñakare mda Ngöböta niere ja moto kuinbti amne ñan tä ni ngite ütiä kärere jire chi nie.

²⁵ Ngöbö ara jire kákwe Kristo Jesu biani müre ketadre ni kwati ngwäreki angwane, Kristo Jesu däreie kákwe Ngöbö töi kwitani, aiseté Ngöbö mäta kri ni ngite ngite rüere ñakare mda, amne Kristo Jesu däreie kákwe Ngöbö moto mikaninta jáme nikä. Ye ngwane abko, Kristo däriebti Ngöbökwé ni ngite dianinkä mento nibtä, yebti nikwe tödekadre kwatibe. Mdakäre abko, Ngöbö abko metre ta, këta kukwe ükete metre nikä, ye mikakäre gare, Ngöbökwé Kristo Jesu biani müre ketadre kore, ñobtä ñan angwane Jesukristo müre keta ngämi, kënenkri Ngöbökwé ni mikadre ja ngie nuen täte jökrä kukwe këmekäme dokwäre, akwa nuenbare ñakare kwe.

²⁶ Erere arato, niarata kukwe ükete metre ni jökrä kräke mtare, ye rabadre gare nie, abkokäre Kristo Jesu biani kwe müre ketadre ni jökrä kräke. Ngöbö rabadre kukwe ükete metre ni jökrä kräke amne rabadre nitre tödekaka Jesubti ngite denkä mento btä arato, abkokäre nuenbare kore kwe.

²⁷⁻²⁸ Ngöbökwé sribi kuin nuenbare kore nikä, ¿yebti ni abko bäri metre au, bti nikwe bikadre kri sribi jen nikwebti ya? ¡Ñakare jire! Jändrän ñakare bikakrä kri nie, ñobtä ñan angwane ñan Kukwe Biani Ngöbökwé Moiséye abko mikani täte jökrä metre nikwe abko ütiäre ni ngite ñakare mda Ngöböta niere amne ni kaen ngäbti, akwa tödeka kwatibe Jesukristobti, ye köböire ni ngite ñakare mda Ngöböta niere amne tä ni kaen ngäbti.

²⁹ Ti bike kukwe mda ngwentari abko krörö: ¿Ngöbö ye abko, Ngöbö kaibe nitre israelita aibe kräke ya? amne ¿ni mda mda ñakare israelitare abko ñakare Ngöbö ye bkäne siba ya? ¡Ñakare jire! Ngöbö abko Ngöbö ni kä jökräbtikwe, aiseté ni israelita amne ni ñakare israelitare arato abko Ngöböta kaen ngäbti,

³⁰ ñobtä ñan angwane Ngöbö abko itibe. Nebti Ngöbö mda ñakare jire. Nire nire tödekaka Ngöböbti abko ñakare ngite mda abko Ngöböta niere btä. Mden kisete, ni israelita ñäräkrä tarä kwatabtä ya, ni ñakare israelitare ñäräkrä ñakare kwatabtä ya, ye ñan mikata ñäräre Ngöbökwé nibtä.

³¹ ¿Ne aiseté nita tödeke Jesubti, abtä Kukwe Biani Ngöbökwé Moiséye abko ütiäre ñakare nikä ya? ¡Ñakare jire! ñobtä ñan angwane nita tödeke Jesubti, ye ngwane Kukwe Biani Ngöbökwé Moiséye ye tä nebe bare täte jökrä nibtä.

4

Abrahamkwe tödekani Ngöböbti

¹ ¿Mdakäre abko, nikwe dre niedre ni mräkä këne Abrahambtä? ¿Ño köböire ni ngite ñakare mda Ngöböta niere, abkobtä dre nükani gare Abrahamye?

² Abraham kákwe jändrän kuin nuendre au ja di jenbti abko ütiäre niara ngite ñakare Ngöbö ngwäreki, ye ngwane rabadre bike kri, akwa namani bare ñakare kore ie, aiseté ñan namani bike kri Ngöbö ngwäreki.

³ Ne aiseté, Ngöbö Kukwei këta niere krörö btä:

Abrahamkwe tödekani Ngöböbti,

aiseté Ngöbökwé niara ngite kukwe këme nuenbtä dianinkä mento btä angwane, ngite ñakare mda Ngöbökwé niebare. *Génesis 15.6*

abko tä tikani Ngöbö Kukweibtä.

⁴ Ye abko nita sribire angwane, sribi bkänkä këta sribi ütiä bien nie, ye abko ñan tä bien ngwarbe ja moto kuinbti nie, akwa nita sribire abko ütiä bianta kwe nie.

⁵ Akwa ni ñan raba sribi nuene jire chi abko ütiäre Ngöbökwé niedre nie: Ma ngite ñakare mda ti ngwäreki. Akwa ni ngututu ngite ngite Ngöbö rüere këta Ngöbö mike era amne tä tödeke Ngöböbti, ni ye abko ngite ñakare mda Ngöböta niere.

⁶ Ñan jändrän kuin nuenbare nikwe Ngöbö moto mikakäre jáme jakrä abko ütiäre ni ngite ñakare mda Ngöböta niere akwa, tödekabtä Ngöböbti abko köböire ni ngite ñakare mda

Ngöböta niere. Ni ye abko btä käta neme nuäre krübete abko jrei David tukwe käkwe tikani arato abko krörö:

⁷ Nireta Ngöbö kukwei kite temen, bti tä ja mike ngite ja töibti Ngöbö rüere amne käta kukwe käme nuene Ngöbö rüere,

akwa Ngöböta ngite denkä jökrä btä, ni ye abko btä kä rabadre bäri nuäre.

⁸ Erere arato, ni ngite Ngöbö ngwäreki akwa, ye dokwäre ni Dänkien Ngöböta mike ñakare ja ngie nuen, ni ye abko btä kä rabadre bäri nuäre, *Salmos 32.1-2*

abko tikani Davikwe.

Ñan ñäräkrä mikani kwatabtä abkobtä Abraham ngite ñakare Ngöbö ngwäreki

⁹ Mdakäre abko, ni ngite ñakare mda Ngöböta niere, niebare Davikwe, *ÿ* ye abko ni ñäräkrä mikani kwatabtä aibe kräke ya o ni ñäräkrä ñakare kwatabtä abko kräke arato ya? Abrahamkwe tödekani Ngöböbti, aibebtä ngite ñakare mda niebare Ngöbötkwe btä, ye nita niere aisete tita kukwe ngwentari kore.

¹⁰ *ÿ* Akwa Abraham ñäräkrä mikanina kwatabtä angwane, niara ngite ñakare mda niebare Ngöbötkwe btä ya o ngämi ñäräkrä mike ja kwatabtä, ye känenkri niebare kwe btä ya? *ÿ* Nongwane Abraham ngite ñakare mda Ngöbötkwe niebare btä? *ÿ* Abraham ngämi ñäräkrä mike ja kwatabtä, känenkri ngite ñakare mda Ngöbötkwe niebare btä!

¹¹ Abti Abrahamkwe ñäräkrä mikani ja kwatabtä. Abrahamkwe tödekani Ngöböbti, abtä ngite ñakare mda Ngöbötkwe niebare btä, ye mden bä mikakäre Ngöbötkwe ñäräkrä mikamna ja kwatabtä Abrahamye. Ne aisete ni ñäräkrä ñakare kwatabtä, akwa tä tödeke Jesukristobti abko tä tödeke Ngöböbti Abraham kwrere, aisete Abrahamta nebe rün kwrere arato. Ye aisete ni ñäräkrä ñakare kwatabtä akwa tä tödeke Ngöböbti, yebtä abko ngite ñakare mda Ngöböta niere.

¹² Erere arato, ni mräkä israelita ñäräkrä kwatabtä, ye käta tödeke Ngöböbti arato, ye abko tä tödeke Ngöböbti Abraham kwrere, aisete Abraham tä niaratre rün kwrere arato.

Ñan Kukwe Biani Ngöbötkwe Moiséye mikabtä täte abko ütiäre Abraham ngite ñakare

¹³ Mdakäre abko, Abraham amne Abraham mräkätre ja täritäri rabadi kä jökrä bkäne Ngöbötkwe niebare ietre, ye abko ñan Kukwe Biani Ngöbötkwe Moiséye mikabtä täte abko Ngöbötkwe niebare ietre, akwa Abrahamkwe tödekani kwatibe Ngöböti angwane, ngite ñakare mda Ngöbötkwe niebare btä. Abtä niara amne mräkätre ja täritäri rabadi kä jökrä bkäne niebare Ngöbötkwe ie.

¹⁴ Ne ñan ñöbtä ñan angwane Kukwe Biani Ngöbötkwe Moiséye ye nita mike täte jökrä abko ütiäre ni rabadre kä ne bkäne jökrä, ye ngwane ni rabadre kä ganaine au ja di jenbti, aisete tödeka Ngöböbti abko ütiäre ñakare jire chi. Erere arato, Ngöbötkwe jändrän bian braibare nie ne rabadre ütiäre ñakare arato,

¹⁵ ñöbtä ñan angwane Kukwe Biani Ngöbötkwe Moiséye ye kitabtä temen nita neme ngite Ngöbö ngwäreki, dokwäre Ngöbötkwe ni mikadre ja ngie nuen kri; akwa kukwe biani nuendre ye ñakare angwane, ni ñan raba kukwe ye kite temen ja töi jenbti, erere ja mike ngite ñakare.

¹⁶ Ne aisete, Ngöbötkwe kä köböi mikani Abrahamye amne Abraham mräkätre ja täritäriye ye abko rabadre ütiäre, abkokäre Ngöbötkwe biani ngwarbe ie. Ye abko tödekabtä Ngöböbti, aibe köböire Ngöbötkwe Abraham mikadi kä bkäne abko köböi mikani kore kwe ie. Ye abko, ñan nitre israelita Kukwe Biani Ngöbötkwe Moiséye mikaka täte aibe kräke Ngöbötkwe kä ye köböi mikani, akwa ni jökrä israelita ya, ñakare ya käta tödeke Ngöböbti Abraham kwrere, ye kräke Ngöbötkwe kä köböi mikani kore arato. Ne aisete Abraham abko ni jökrä israelita ya, ñakare ya rün kwrere.

¹⁷ Mden erere, Ngöbö Kukwei tä niere krörö:

Tikwe ma mikani juta kwati batakä ngwarbe rünre kä nebtä,

Génesis 17.5

niebare Ngöbötkwe Abrahamye. Ngöbö ni krütanikrütani mikaka nire amne, jändrän ñäre ñakare abko Ngöböta mike nire, Ngöbö ye mden abko bti Abrahamkwe tödekani.

¹⁸⁻¹⁹ Ngöbö ye mden käkwe niebare krörö Abrahamye:

Muke kabre ñan tanre, ye kwrere jire ma bkün rabadi kä nebtä.

Génesis 15.5

niebare Ngöbötkwe ie. Ye ngwane abko, Abraham ñan di namanina ngäbäkre ngibiare namani nütüre, ñöbtä ñan angwane kä namanina bäsi siento krati ie aisete. Erere arato, merire kwe Sara namanina unbre, kise mriani jabtä, aisete ñan rabadre ngäbäkre ngibiare, namani nütüre, akwa Ngöbötkwe kukwe niebare ie, yebti tödekani kwe amne mikani era kwe.

²⁰ Ngöbötkwe kukwe niebare Abrahamye, ye namani era kräke angwane, tödekani bäri Ngöböbti kwe amne, ñan Ngöbö kukwei mikani ngwarbe jae kwe, käkwe Ngöbö käikitaninkä,

²¹ ñöbtä ñan angwane Ngöbö abko di nämene täte ja kukwei mikakäre täte, ye abko namani era Abrahamkrä.

²² Abrahamkwe tōdekani kore Ngöböbti, ye mdenbtä abko ngite ñakare mda abko Ngöbökwie niebare btä amne kani ngäbti kwe.

²³ Abrahamkwe tōdekani Ngöböbti, yebtä ngite ñakare mda niebare Ngöbökwie btä abko tikani täräbtä, ye ñan tikani niara aibe kräke,

²⁴ akwa Ngöbö Jesu mikakata nire nitre ngwäkäre ngätäite, Ngöbö yebti nirekwe tōdekadre, ni ye abko ngite ñakare mda Ngöbökwie niedi amne kadi ngäbti kwe. Ni ye kräke kukwe ye nämane tikani.

²⁵ Jesu ye abko biani Ngöbökwie müre ketadre ni ngite diankakäre mento nibtä, ñobtä ñan angwane ni nämane ngite Ngöböye kukwe käme nuenbtä amne, ni ngite ñakare mda, ye Ngöbö rabadre niere nibtä, abkokäre Ngöbökwie mikaninta nire.

5

Nita nüne jame Ngöböbe abko käita neme nuäre nibtä

¹ Nikwe tōdekani Jesukristobti ye köböire ni ngite ñakare mda niebarera Ngöbökwie, aiseite nita ja mäketä jame Ngöböbe ni Dänkien Jesukristo köböire.

² Nikwe tōdekani bti angwane, niarakwe ni mikani krötö Ngöbö moto kuin ye ken amne mtare Ngöbö moto kuin täte jökrä nikä amne Ngöbökwie ni mikadita bäsi ja kwrere, ye nita ngibiare kisere abko käita neme nuäre nibtä.

³ Ye abko ñan jändrän aibe käita nuäre nibtä, akwa nita ja tare nike bätäkä ngwarbe abko käita bäri nuäre nibtä arato, ñobtä ñan angwane ja tare nika ye abko käta ni mike nünenkä bäri dite janknu mda, nikwe ñan Jesu gibiadrekä jire abkokäre.

⁴ Erere arato, nita nebe nünenkä bäri dite tōdekabtä Jesubti, ye käta ni töi mike bäri metre Ngöbö okwäte amne ye käta ni die mike Jesu ngibiare ngäbti kisere bätärekä, käi ngwiane nuäre jabtä bäri mda.

⁵ Ñan nita Jesu ngibiare ngäbti ngwarbe abko gare kuin nie, ñobtä ñan angwane Ngöbökwie ja Ūai Deme biani nie amne, Ngöböta ni tarere kri ja moto kuinbti abko Ngöbö Ūai Deme tä mike gare nie.

⁶⁻⁷ Ye abko, bäsi ni ñakare jire iti abko tä biare ja mike müre ketadre ni metre diäre. Nane ni mda käkwe jändrän bäri kuin nuenbare nikä angwane, nikwe ja mikadre müre ketadre ni ye diäre. Akwa ni nämane nüne Ngöbö rüere amne ni di ñakare ja diantarikrä au angwane, kä bäri kuin, ye näire Kristo Jesu nükani amne krütani ni diäre amne ni kräke.

⁸ Ye mdenbtä abko, Ngöböta ni tarere kri tä mike gare krörö nie: Ni nämane kukwe nuene kämekäme Ngöbö rüere abtä ni nämane ngite Ngöbö ngwärekre, ye ngwane Kristo krütani ni diäre amne ni kräke.

⁹ Mtare Kristo krütanina ni kräke, ye köböire ni ngite ñakare mda Ngöbökwie niebarera. Yebtä mtare bäri Kristo köböire ni rabadi dianintari amne, Ngöbökwie ñan ni mikadre ja ngie nuen kä mrä angwane,

¹⁰ ñobtä ñan angwane ni nämane ja rüere Ngöböbe angwane, Ngöbö Odei krütani ye köböire niara ara jire käkwe ja mäkäninta nibe, aiseite mtare bäri Ngöbökwie ni mikanina ja mäketä jabe, aiseite Kristota nire, käta ni mike nüne kärekäre jabe, ye mdenbtä ni rabadi dianintari.

¹¹ Ne abko, ni rabadi dianintari mrä, ñan ye aibehtë nita kuin niere Ngöböye amne käita neme nuäre nibtä, akwa nita Ngöbö ara käi ngwen nuäre jabtä ni Dänkien Jesukristo köböire. Niara köböire nita ja mäkäninta Ngöböbe mtare.

Adán amne Kristo

¹² Mdakäre abko, kena ni itibe kädian nämane Adán abko käkwe ja mikani ngite Ngöbö rüere angwane, kukwe käme Ngöbö rüere nükani kä nebtä amne kukwe käme köböite ni jökrä nikani krüte, ñobtä ñan angwane ni jökrä käkwe ja mikani ngite Ngöbö rüere arato.

¹³⁻¹⁴ Akwa ñan ja mikani ngite kwetre ja kwrere Adánbe. Adán näire abti kä nuke Moisés näire, Ngöbö ngämi ja kukwei ngite Moiséye nuendre nie, ye känenkri kukwe käme Ngöbö rüere namanina kä nebtä, aiseite ni jökrä nämane gata ngoto täni, aiseite nämane krüte. Akwa Adánkwe Ngöbö kukwei ara jire kitani temen, ye kwrere nuenbare ñakare kwetre, ñobtä ñan angwane niaratre abko ie Ngöbö ngämi ja kukwei bien nuendre, aiseite ñan ja mikani ngite kwetre Adán kwrere, ñobtä ñan angwane kukwe bian ngämi nuendre nie, känenkri nita nebe tuen ngite ñakare kukwe yebtä. Adánkwe ja mikani ngite, ye köböite ni jökrä namani ngite Ngöbö ngwärekre, akwa ye kwrere ni mdara jire abko Jesukristo rüadre kukwe kuin nuene ni jökrä kräke abko bä mikani Adánbtä.

¹⁵ Akwa Adánkwe ja mikani ngite, yebti ta abko Ngöbökwie jändrän bäri ütiäte kri nuenbare nikä, ñobtä ñan angwane ni itibe Adán käkwe ja mikani ngite, ye köböite ni kwati nikani krüte amne namani mente Ngöböye. Akwa ja moto kuinbti Ngöbökwie jändrän kuin nuenbare ngwarbe nikä ni itibe Jesukristo moto kuin köböire, ye abko bäri ütiäte kri amne kuin ni kwati kräke.

¹⁶ Ye abko ti bike niereta bobukäre: Ni itibe Adán kákwe ja mikani ngite amne Ngöbökwé jändrän kuin nuenbare ngwarbe nigrä, jändrän ketebu ye abko ñakare ja kwrere, ñobtä ñan angwane ni itibe Adán, köböite Ngöbökwé ni jökrä mikani ja ngie nuen. Akwa ni kwati kukwe nuenkä kämekäme kákwe ja mikani ngite kabre krübäte Ngöbö rüere abko kräke Ngöbökwé jändrän kuin nuenbare ngwarbe Jesukristo köböire. Yebtä abko ni ngite ñakare mda Ngöböta niere.

¹⁷ Ye abko, ni itibe Adán kákwe ja mikani ngite abko köböite ni jökrä namani gata ngoto täni, aisete nämane krüte amne namani mente Ngöböye. Ye kwrere arato, Ngöbökwé jändrän kuin nuenbare ngwarbe nigrä ja moto kuinbti, ye abko bäri ütiäte kri, aisete ni mikadita metre ja ngwäreki kwe nikwe nünandre kärekäre ni itibe Jesukristo köböire abkokäre.

¹⁸ Ni itibe Adán kákwe ja mikani ngite batibe Ngöbö ngwäreki, dokwäre Ngöbökwé ni jökrä mikani ja ngie nuen. Ye kwrere arato, ni itibe Jesukristo kákwe jändrän nuenbare kuin metre krusobtä, ye köböire ni jökrä tödekaka Jesubti abko ngite ñakare mda abko Ngöböta niere.

¹⁹ Ni itibe Adán kákwe Ngöbö kukwei kitani temen, ye köböite ni kwati nikani kukwe nuene kämekäme. Abtä namani ngite Ngöbö ngwäreki, akwa ye kwrere arato, ni itibe Jesukristo kákwe Ngöbö kukwei mikani täte jökrä, kákwe ja biani müre ketadre abko köböire ni kwati ngite ñakare mda Ngöbökwé niedi.

²⁰ Nita kukwe käme nuene bäri Ngöbö rüere rabadre gare bäri metre nie, abkokäre Ngöbökwé ja kukwei biani Moiséye. Akwa kukwe kämekäme nuen namani bäri, yebti ta Ngöbökwé ja moto mikani bäri kuin nigrä.

²¹ Ye aisete ni jökrä nämane gata ngoto täni angwane, kukwe käme ye mdei nämane niaratre dänkiene, erere nämane ja mike ngite kärekäre, ye kwrere arato mtare Ngöböta ja moto mike bäri kuin nigrä amne ni ngite ñakare mda Ngöböta niere, käta kä bien nünankrä kärekäre nie ni Dänkien Jesukristo köböire.

6

Kukwe kämekäme ñan tä ni dänkiene mda

¹ Ngöbökwé kukwe kuin nuenbare kore ni jökrä kräke Jesukristo köböire ni ngite diankakäre nibtä, ¿nebti Ngöbökwé ja moto mikadre bäri kuin ni kräke, abkokäre nikwe kukwe nuendre bäri kämekäme janknu ja mikakäre ngite ya?

² ¡Ñakare jire! Nikwe ñan ja mikadre ngite jire chi mda, ñobtä ñan angwane nikwe tödekani Jesubti angwane, ni namani ni krütani kwrere Ngöbö ngwäreki amne, kukwe kämekäme ñan tä ni krütanikrütani dänkiene mda gare nie, ñobtä ñan angwane ni ngwäkä ñan raba ja mike ngite mda Ngöbö rüere. Ye mden kisete, ¿kukwe kämekäme ñan tä ni tödekaka Jesubti dänkiene mda, se abko nikwe kukwe kämekäme nuendre janknu Ngöbö rüere ya? ¡Ñakare jire!

³⁻⁴ Ni jökrä tödekaka Kristo Jesubti namani ngökani ñöte, ye abko tä ni krütani gwaire Jesube amne tä ni doboi mikani gwaire Jesube bä mike. Yebti nikwe ja töi kämekäme amne kukwe kämekäme mikaninte ja jiebt abko nikwe bä mikani, ye garera munye. Erere arato, Kristo Rün kákwe niara mikaninta nire ja di kri bä nuärebt, ye kwrere ni rabadre nüne btin Kristo ben gwaire, abkokäre ni krütani Kristo ben gwaire, bti ni doboi mikani ben gwaire arato.

⁵ Ni krütani ketetibe gwaire Kristobe, aisete Ngöbö diebti Kristo nukaninta nire, ye kwrere Ngöbökwé ni mikadi nüne btin. Abti kä mrä angwane, Ngöbökwé ni mikadita nire nünakäre kärekäre jabe.

⁶ Ne aisete, ni ngämi tödeke Jesubti, känenkri ni nämane töi ngitiekä kukwe kämekäme aiebtä, ye abko Kristo metani krusobtä angwane, Ngöbökwé ni töi kämekäme ye metani gwaire krusobtä ben kwrere, ni töi kämekäme juankäre ngwarbe, kukwe käme ñan rabadre ni dänkiene mda ni ngrabare yebti, nikwe ñan ja töi kämekäme mikadre täte mda abkokäre.

⁷ Ye abko, ni krütani ñan raba kukwe käme nuene mda Ngöbö rüere amne kukwe käme ñan tä niara dänkiene mda. Ye kwrere, ni tödekaka Jesubti abko krütani gwaire Jesube, ne aisete kukwe käme ni töibtä, btä ni nämane töi ngitiekä, ye ñan tä neme ni dänkiene mda amne Ngöbökwé ni tikaninte kukwe käme ye kisete.

⁸ Nikwe tödekani Kristobti angwane, ni krütani gwaire ben amne, Ngöbökwé Kristo mikaninta nire, ye kwrere ni mikadita nüne gwaire ben arato abko gare kuin nie.

⁹⁻¹⁰ Kukwe gare metre nie abko krörö: Kristo krütani ye abko krütani batibe ni ngite diankakäre mento nibtä, bti Ngöbökwé mikaninta nire, aisete kukwe kämekäme ñan raba niara nuente mda. Yebti ñan krütadita jire mda, ñobtä ñan angwane gata ñan raba niara dänkiene mda, ñobtä ñan angwane Ngöbökwé mikaninta nire amne mtare tä nüne Ngöbö mikakäre ütiäte.

¹¹ Kristo Jesu krütani batibe, yehti ñan krütadita jire mda, ye kwrere mun krütanina ben gwaire, aiseite munkwe töbikadi ñakare mda kukwe kämekämenbtä abko munkwe nütü jabtä, akwa munta nünenta ketetibe Kristo Jesube Ngöbökrä abko munkwe nütü jabtä.

¹² Ye mdenbtä, mun ngrabare mden krütai, ye ie munkwe ñan kä bian kukwe kämekäme nuenkäre mda Ngöbö rüere.

¹³ Munkwe ñan kä bian mda ja ngrabareye kukwe kämekäme nuenkäre, akwa ni krütani mikaninta nire Ngöbö diebti kätä töi ngitiekä jändrän kuin nuenbtä, ye kwrere munkwe ja mika Ngöbö kisete angwane, mun ngrabare ye munkwe mika jökrä Ngöbö kisete jändrän kuin nuenkäre niaräkrä,

¹⁴ ñobtä ñan angwane mtare abko kukwe käme mdei tä mun töibtä ñan tädi mun dänkiene mda, ñobtä ñan angwane mun ñan tä Kukwe Biani Ngöbökre Moiséye ye ngoto täni mda, akwa Ngöbökre ja moto mikani kuin mun kräke Jesukristo köböire, kätä mun die mike kukwe kämekäme mikete ja jiehti.

Nikwe nünandre ni klaborer kwrere Ngöbökrä

¹⁵ Mtare ni ñan tä nüne Kukwe Biani Ngöbökre Moiséye mikakäre täte mda, tikwe nini angwane, Ngöbökre ja moto mikani kuin nkrä abko köböire nita nüne tikwe nini, ye aiseite ñnikwe kukwe käme nuendre bäri ja mikakäre ngite ya? ;Ñakare jire!

¹⁶ Ne ñobtä ñan angwane nita ja mike klaborer ni bkänkä kräke, ye ngwane ni tarä nebe biare ni ye kukwei mikakäre täte, aiseite nita sribire ni bkänkä ye kräke angwane, nita niara kukwei mike täte. Ye kwrere arato kukwe kämekäme tä ni dänkiene ye abko kätä ni mike mente kärekäre Ngöböye. Akwa nita ja mike klaborer Ngöbö kukwei kuin mikakäre täte, ye ngwane nita ngite ñakare mda Ngöböta niere, ye abko gare munye ruen tie.

¹⁷ Akwa mtare tita kuin niere Ngöböye munbtä, ñobtä ñan angwane käne mun ngämi tödeke Jesubti, känenkri mun nämane klaborer kukwe kämekäme kräke, akwa mtare kukwe kuin diribare munkwe, erere munkwe kani ngäbti amne munta mike täte ja töi ngöi jökrä, yehtë tita kuin niere Ngöböye.

¹⁸ Käne kukwe kämekäme nämane mun dänkiene, akwa Ngöbökre mun tikaninte amne mun mikanina sribikäre jakrä kwe kukwe era metre nuenkäre.

¹⁹ Mun abko töi braibe Ngöbö Kukweibtä, aiseite kukwe rükadre gare metre munye, abkokäre ni klaborer btä tita kukwe bä mike kore munye. Ni klaborer ja ngrabare bien sribikäre ja töi ngöi jökrä bkänkä mikakäre täte, ye kwrere mun nämane ja ngrabare bien ja töi kämekämeye, mden nämane mun kite kukwe kämekäme nuene, erere mun nämane kukwe kämekäme nuene bäri diän diän mda ja täritäri. Akwa mtare abko, munkwe ja ngrabare mika sribi kuin nuenkäre Ngöbökrä angwane, mun rabadi nüne bäri deme Ngöbökrä.

²⁰ Kukwe kämekäme nämane mun dänkiene, kräke mun nämane sribire ni klaborer kwrere kukwe kämekäme nuenkäre, angwane mun nämane sribire ñakare kukwe kuinbtä Ngöbökrä.

²¹ ;Akwa kukwe kämekäme nuen nämane munkwe, ye ütiäre dre nükani munye amarebti kukwe nuenbare munkwe, abkobtä munta nebe ja gaire ye? Kukwe kämekäme nuen nämane munkwe, ye ütiäre mun nämane krüte abti mrä angwane mun rabadre mento kärekäre Ngöböye.

²² Akwa mtare mun namanina tikaninte Ngöbö diebti, aiseite kukwe kämekäme ñan tä mun dänkiene mda angwane, Ngöbökre mun mikanina klaborer jakrä sribi kuin nuenkäre jakrä, ye abko bäri ütiä rükadi kuin krörö munye: Munkwe nünandi kuin deme Ngöbökrä abti mrä angwane, munkwe nünandi kärekäre ben.

²³ Akwa kukwe kämekäme nuenta nikwe abko ütiäre nita krüte amne nita mente kärekäre Ngöböye, akwa ja moto kuinbti Ngöböta ni mike nüne kärekäre jabe ni Dänkien Kristo Jesu köböire, ye abko tä nuene ngwarbe ni kräke amne ñan tä ütiä kärere nie.

7

Kukwe Biani Ngöbökre Moiséye ñan tä ni dänkiene mda

¹ Ti mräkäre, Kukwe Biani Ngöbökre Moiséye ye gare kuin munye ruen tie, aiseite nita nüne angwane, kukwe biani nuendre ye abko ütiäre nkrä, akwa ni krütadre angwane, rabadre ngwarbe nkrä abko garera munye.

² Kukwe biani nuendre ye abko ti bike bä mike krörö munye: Meri tä ja mike gure angwane, brare kwe tädre nire angwane, kukwe biani nuendre nie, yehti tä ja mäkäninte kwärükwäri, akwa kwäräi kwe krütadre kän, ye ngwane rabadre tikaninte amne ñan rabadre mäkäninte mda kwäräi kwebe, kukwe biani nuendre yehti.

³ Ne aiseite meri gure amne kwäräi kwe tädre nire, akwa niara rabadre ni brare mdabe, ye ngwane ja mikadre ngite kwe Ngöbö rüere. Akwa meri ye kwäräi kwe krütadre kän, ye ngwane rabadreta tikaninte kukwe biani nuendre yeye, aiseite ja mikadreta gure kwe angwane, ñan ja mikadre ngite kwe.

⁴ Ti mräkätre, mun ngämi tödeke Jesubti, känenkri mun nämáne mäkäninte Kukwe Biani Ngöbökwe Moiséye yebe amne mun nämáne mike täte käreäre, merita gure këta näin këre brarebe ye kwrere. Akwa Jesukristo krütani angwane, mun nämáne ketetibe ben abko erere mun krütani kwrere arato, aiseté munta tikaninte Kukwe Biani Ngöbökwe Moiséye yebtä. Mtare Kristo nükäninta nire abko tä mun bkäne, mun rabadre kukwe kuin nuene Ngöbö moto mikakäre nuäre.

⁵ Kukwe kämekäme mdei nämáne ni dänkiene angwane, ni kukwe kämekäme nuenkä kwrere ni nämáne nüne angwane, Kukwe Biani Ngöbökwe Moiséye ye käkwe ni töi tikani bäri mda kukwe käme nuene ni ngrabarebti. Akwa kukwe käme nuen nämáne nikwe, ye ütiäre abko gata aibe nämáne nüke nie amne nämáne ni mike mente käreäre Ngöböye.

⁶ Akwa mtare Ngöbökwe ni tikaninte Kukwe Biani Kwe Moiséye ye kisete amne ni ñan tä kukwe ye mike täte mda, aiseté Ngöbökwe kukwe ükaninte btin nünankrä nie ja Üai köböire, ye erere ni raba sribire Ngöbökra. Ni nämáne sribire Kukwe Biani Ngöbökwe Moiséye ye mikakäre täte, erere ni ñan tä mike täte mda mtare ja mikakäre metre au.

Kukwe käme mdei nie abko rüere nita rüere

⁷ ¿Kukwe Biani Ngöbökwe Moiséye ye abko këta ni töi tike bäri mda kukwe kämekämenbtä tikwe nini, yebtä Kukwe Biani Ngöbökwe Moiséye abko kukwe käme kwrere ya? ¡Ñakare jire! akwa Kukwe Biani Ngöbökwe Moiséye ye ñakare, akräke kukwe mden mden nuenta tikwe abko käme Ngöbö ngwäreki ñan rabadre gare jire chi tie abko krörö: Kukwe Biani Ngöbökwe Moiséye ye käkwe ñan niedre, “Jändrän ni mdakwe, ye ma ñan tö raba ie jakrä,” ñan niedre kore, ye ngwane ti tö rabadre jändrän ni mdakwe ie jakrä abko käme Ngöbö ngwäreki ñan rabadre gare tie. Akwa Kukwe Biani Ngöbökwe Moiséye ye aibeiti tä nüke gare tie.

⁸ Akwa Kukwe Biani Ngöbökwe Moiséye këta niere kore, ye käkwe kä biani ti töi kämeye, aiseté jändrän bätäkä ngwarbe ni mdakwe, ie ti tö rababa jakrä. Käne Kukwe Biani Ngöbökwe Moiséye ye arabe käkwe kä biani kukwe kämeye ti kite kukwe kämekäme bätäkä ngwarbe jiebtä. Akwa Kukwe Biani Ngöbökwe Moiséye ye gare ñakare nie angwane, kukwe kämekäme abko käme Ngöbö ngwäreki gare ñakare metre tie.

⁹ Bati Kukwe Biani Ngöbökwe Moiséye ye gare ñakare tie angwane, ti nämáne nüne kuin ti nämáne nütüre. Ja nämáne nebe ruen ngite ñakare tie Ngöbö ngwäreki, akwa Kukwe Biani Ngöbökwe Moiséye ye nükani gare tie, ye käkwe ti ngite Ngöbö ngwäreki kukwe kämekäme nuenbtä mikani gare batibe tie. Kukwe namani gare kore tie angwane, ti nämáne nianinte, mente Ngöböye nükani gare tie.

¹⁰ Ne aiseté Kukwe Biani Ngöbökwe Moiséye ye käkwe ti mikadre nüne käreäre Ngöböbe, ti nämáne nütüre, akwa era metre ti nämáne mente Ngöböye mikani gare kwe tie,

¹¹ ñöbtä ñan angwane Kukwe Biani Ngöbökwe Moiséye ye mikabtä täte ti rabadre ja mike metre au Ngöbö ngwäreki ti nämáne nütüre. Yebtä abko kukwe kämekäme tibtä käkwe ti ngökani, abti ti ngite Ngöbö ngwäreki nükani gare tie, aiseté ti nämáne mente Ngöböye abko kukwe ye arabe käkwe mikani gare metre tie.

¹² Akwa Kukwe Biani Ngöbökwe Moiséye ye abra deme amne jändrän ni mdakwe ie ni ñan tö rabadre jakrä, tikwe nini, kukwe ye biani nuendre ye abko deme era metre amne kuin abko ti tö niei mrä kore.

¹³ Kukwe Biani Ngöbökwe Moiséye ye abko kuin deme, çakwa ye köböite abko ti rabadre mente käreäre Ngöböye tita niere ya? ¡Ñakare jire! Kukwe kämekäme ti töibtä abko mdeita nebe tie, ye käkwe ti mikani kukwe käme nuene bäri mda abko köböite ti rabadre mente käreäre Ngöböye. Akwa kukwe kämekäme nuenbare tikwe abko era metre käme krübäte Ngöbö ngwäreki, ye abko nükani gare metre tie Kukwe Biani Ngöbökwe Moiséye köböire. Ne aiseté, Kukwe Biani Ngöbökwe Moiséye abko kuin deme, akwa kukwe ye köböire kukwe kämekäme abko bäri käme krübäte era metre nükani gare tie.

¹⁴ Kukweta kore ñöbtä ñan angwane Kukwe Biani Ngöbökwe Moiséye ye abra jatani Ngöböki garera nie, akwa ti abko moto käme abko ti tö bä mikai krörö: Ni klabore ñan raba jändrän nuene jire chi keteti ja töi jenbti, akwa tä bkänkä aibe kukwei mike täte, ye kwrere ti abko ni klabore kwrere, aiseté kukwe kämekäme tä ti töibtä abko mdeita nebe tie aibe mikata täte tikwe.

¹⁵ Nöbtä tita kukwe kämekäme nuene ñan tä nebe nüke gare tie, ñöbtä ñan angwane ti töta nebe jändrän kuin nuein, erere tita nuene ñakare; akwa kukwe kämekäme btä ti mäta kri, ara jire tita nuene.

¹⁶ Akwa kukwe kämekäme nuenta tikwe, ye abko ti ñan tö nuein era metre angwane, Kukwe Biani Ngöbökwe Moiséye ye abko kuin deme abko era tikrä abko tita bä mike jabtä.

¹⁷ Ne aiseté, tita kukwe nuene kämekäme, ye ñan tita nuene ja töi jenbti au, akwa kukwe kämekäme tä ti töibtä abko mdeita nebe tie, ye tä ti kite nuene abkokänti tä nebe bare tie.

¹⁸ Ti moto amne kukwe kamekame mdeita ti toibta, ne kame jokra, aiseite jandran kuin nakare tibta, ye gare kuin tie. Mden kisete ti tota nebe jandran kuin nuein, akwa erere nan ta nebe bare jire chi tie.

¹⁹ Ti tota nebe jandran kuin nuein abko erere nan ta nebe bare tie, akwa kukwe kamekame Ngöbö rüere ti nan to nuein, ara jire ta nebe bare tie.

²⁰ Mtare ti tota nebe jandran kuin nuein abko erere nan ta nebe bare tie, akwa ye nan tita nuene ja toi jenbti au akwa, kukwe kamekame ta ti toibta abko mdeita nebe tie abko kata ti kite kukwe kamekame nuene, erere tita nuene.

²¹ Ye mdenbta abko, kukweta nakenka kröro tibta: Ti tota nebe jandran kuin nuein akwa, kukwe kamekame ara jire ta nebe kane ti jiete.

²² Akwa ti toite nete abko Kukwe Biani Ngöböke Moiséye ye ta nebe tuen kuin nuäre nuendre tie,

²³ akwa tibta nete abko kukweta nakenka mda mda kata ti toi miketa ba jene, ye abko kukwe kame ta ti toibta, ye mdeita nebe tie abko kata rüre jandran kuin ti to nuein yebe, aiseite ni ngite ka teri nan raba kwarabere au, ye kwrere jire tita kukwe kamekame kisete.

²⁴ ¡Aingwaree, ti bobre jakan! Kare tita ja mike ngite ti ngrabare nebti abta tita mente Ngöböye. ¿Ne kisete nirekwe ti tikadrete se?

²⁵ ¡Ngöbö aibe abko ie tita kuin niere ni Dankien Jesukristo köböire, ñobta nan angwane niarakwe ti tikadite!

Nebti kukwe mra abko nuke gare kröro tie: Ti to Kukwe Biani Ngöböke Moiséye aibe mikai tate, akwa kukwe kamekame ta ti toibta abko mdeita nebe tie abko kata ti mike kukwe kamekame nuene.

8

Mtare nita nüne Ngöbö Üai diebti

¹ Akwa mtare, ni jokra ta todeke Kristo Jesubti abko Ngöböke nan kitadre ngite jire chi mda amne nan mikadre ja ngie nuen jire chi,

² ñobta nan angwane kukwe kamekame namane mun toibta ka namane mun mike ja mike ngite Ngöbö rüere abta Ngöböke mun mikadre ja ngie nuen, ye nganiene abko Ngöbö Üai kakwe mun tikaninte, kakwe mun mikani nüne btin, sribi nuenbare Kristo Jesukwe krusobta ye köböire.

³ Kukwe kamekame ni toibta abko mdeita nebe nie, ye kisete Kukwe Biani Ngöböke Moiséye ye nan di namani tate ni tikatekäre, ñobta nan angwane ni di nan namani kukwe ye mikakäre tate. Akwa Ngöbö aibe di namani tikatekäre, kakwe ja Odei Jesu juani ka nebtä. Ni jokra abko kukwe kame nuenka, akwa niara därebare ja kwrere nibe. Ye kwrere Ngöböke juani nuke krütakäre nikra amne ni ngite Ngöbö ngwäreki ye ütiä biankäre krusobta ni diäre amne ni tate.

⁴ Ngöböke Jesu juani krüte kore ni krake, ye köböire abko kukwe kuin era metre biani nuendre nie Ngöböke abko ta nebe bare nikra mtare, abkokäre Ngöböke ja Odei juani. Ne aiseite kukwe kamekame ta ni toibta abko mdeita nebe nie, yebta abko ni todekaka Jesubti nan ta ja kite mda, akwa Ngöbö Üai to dreye, erere nita nuene.

⁵ Mdakäre abko, nire nire todekaka ñakare Jesubti kata töbike kukwe kamekame aibehta amne aibe mdeita nebe ie abko erere ta nuene. Akwa Ngöbö Üai to dreye, yebta nire nire ta ja toi mike kwatibe, ni ye abko ta Ngöbö Üai kukwei mike tate.

⁶ Kukwe kamekame ta ni toibta amne mdeita nebe nie, ye erere nita niken jiebti abko ta niken ni ngwena mente Ngöböye abta Ngöböta ni mike ja ngie nuen. Akwa nita töbike jandran kuin Ngöbö Üaikwebta abko kata niken ni jie ngwena, ye ngwane nita nüne käreäre Ngöböe amne nita nüne jäme Ngöböe arato.

⁷ Akwa nire nire todekaka ñakare Jesubti toi kamekame abko mdeita nebe ie, aiseite ta nakwen janknu jiebti. Ni ye abko ta ja rüere Ngöböe, ñobta nan angwane kukwe biani Ngöböke nuendre nie, ye niara nan to mikai tate amne, niara di ñakare kukwe ye mikakäre tate arato.

⁸ Ye mden kisete, kukwe kamekame ta ni todekaka ñakare Jesubti ye toibta amne kukwe kamekame ye mdeita nebe ie, aiseite ta nakwen janknu jiebti, ni ye abko nan raba jandran kuin nuene jire chi abta Ngöbö raba käikitekä.

⁹ Akwa mun abko, kukwe kamekame namane mun toibta, ka namane mun mike kukwe kamekame nuene, akwa ye kwrere munta nüne ñakare mda, ñobta nan angwane Ngöbö Üai ta nüne munbta mtare ne ngwane, Ngöbö Üai ta mun kite nüne Ngöbökrä. Nire nire bta Kristo Üai ta nüne ñakare, ni ye abko ñakare ni jen Kristokwe.

¹⁰ Era metre mun ngrabare yebti munkwe kukwe nuenbare kamekame Ngöbö rüere, ye dokwäre mun krütadi, akwa Kristo ta nüne munbta mtare ne ngwane, mun üai kakwe

nūnandi kārekāre Ngōbōbe, űobta űan angwane munkwe tōdekani Jesubti angwane, mun ngite űakare mda niebare Ngōbōkwe munbtā.

¹¹ Angwane Ngōbōkwe Jesu mikaninta nire abko űai arabe tā nūne munbtā, ye ngwane Ngōbō Kristo mikakata nire arabe kākwe mun ngrabare ye mikadita nire arato niara űai kōbōire kā mrā angwane.

¹² Ne aiseti tī mrākātre, kukwe kāmekāme nāmane nī tōibtā abko mdei nāmane nebe nie, ye kwrere nikwe űan nūnandre jire chi mda,

¹³ űobta űan angwane kukwe kāmekāme tā mun tōibtā, ye munkwe nuendi janknu amne űan kitadre temen munkwe, ye ngwane mun rabadi mente Ngōbōye amne Ngōbōkwe mun mikadi ja ngie nuen kā mrā angwane; akwa kukwe kāmekāme nuenta munkwe ja ngrabarebti, ye munkwe kitadre temen Ngōbō űai diebti, ye ngwane munkwe nūnandi kārekāre Ngōbōbe.

¹⁴ Ye abko, nire nire jie ngwianta Ngōbō űaikwe, nī ye abko Ngōbō ngābriānkā kwe abko raba gare munye,

¹⁵ űobta űan angwane Ngōbō űai tā mun itire itire btā, ye abko kākwe űan Ngōbō kāi mikadita tare mun okwāte, nī klaborē űitiāte űakare kāta bkānkā jūrā ngwen jabtā ye kwrere; akwa Ngōbō űai kāta mun mike Ngōbō ngābriānkāre amne Ngōbō űai ye mden kōbōire Ngōbō abko nī Rūn nikwe kāita nebe nuāre nibtā, kāta ¡Abba! ¡Tata tikwe! niere Ngōbōye.

¹⁶ Ye abko, nī tōdekaka Jesubti abko Ngōbō ngābriānkā era metre abko Ngōbō űai ye arabe tā mike gare nie amne,

¹⁷ nī Ngōbō ngābriānkā bkānā ne ngwane, jāndrān kuinkuin biandre Ngōbōkwe Kristoye, ye nī rabadi bkāne siba Kristobe gwaire. Akwa Ngōbōkwe jāndrān kuinkuin nuendre nī krāke siba, abkokāre Kristokwe ja tare nikani, ye kwrere nikwe ja tare nikadi arato tōdekabtā Kristobti.

Ngōbōkwe jāndrān kuinkuin nuendi nī krāke abko nita ngibiare ngābti kisere

¹⁸ Tōdekabtā Kristobti nita ja tare nike mtare ye abko tare krūbāte bkānā, akwa jāndrān kuinkuin nuendi Ngōbōkwe nī krāke ye abko bāri űitiāte nīkrā ruen tie.

¹⁹ Nī ne abko Ngōbō ngābriānkātre. Amne nī rabadre bā mikani era metre kā mrā angwane, ye abko jāndrān jōkrā dātebare Ngōbōkwe kāta ngibiare kisere,

²⁰ űobta űan angwane Ngōbōkwe jāndrān jōkrā dātebare, abti drekāre Ngōbōkwe jāndrān jōkrā dātebare abko erere namani bare űakare btā. Ye űan jāndrān ketareketare tō namani dreye ja tōi jenbti, erere namani bare akwa, Adān amne Eva kākwe Ngōbō kukwei kitani temen krīre kena, bti Ngōbō ara jire kākwe űkaninte kore, aiseti kukwe namani bare kore jāndrān jōkrābtā.

²¹ Jāndrān jōkrā dātebare Ngōbōkwe tā ngadaen amne tā niken ngwarbe, abtā tātre ja tare nīke, ye kwrere űan rabadre nakenkā mda btā abko tā ngibiare kisere. Ye kwrere arato, nī Ngōbō ngābriānkā abko krāke Ngōbōkwe kukwe kuin nuāre nuendi, kākwe nī ngrabare kwitadi, űan krūtadre mda abkokāre, ye abko jāndrān dātebare Ngōbōkwe tā ngibiare kisere arato.

²² Ngōbōkwe jāndrān jōkrā kwitadi ye ngibiabtā kisere abko jāndrān dātebare Ngōbōkwe abko tā ja tare nīke, kāta tākekā jabe bāsi merita niken ja ngibiare kāta ja tare nīke ngābākre ngibiabtā, ye kwrere jire kira abti kā nūke mtare jāndrān jōkrā tā ja tare nīke, ye gare kuin nie.

²³ Ye abko űan jāndrān mda mda dātebare Ngōbōkwe aibe kāta tākekā jabe akwa, nitre tōdekaka Jesubti kāta ja tare nīke kore, kāta tākekā jabe arato, űobta űan angwane nī ngrabare btin krūte űakare mda biandi Ngōbōkwe nie, ye nita ngibiare ngābti kisere, abtā nita tākekā jabe mtare. Akwa Ngōbōkwe nī kanina ngābti ja ngābriānkā kwrere, akwa ye rabadre bare tāte angwane, Ngōbōkwe nī ngrabare btin biandi nie, ye mikakāre era, abkokāre ja űai biani kwe nie.

²⁴ Ngōbōkwe nī dianintari nāire mentokwāre nī ngrabare btin biandre mda kwe nie abko nita ngibiare kisere. Ye abko, jāndrān tarā nebe nī kisete, ye abko ngibiata űakare mda,

²⁵ akwa jāndrān ngāmi nebe nī kisete abko nita ngibiare kisere, ye abko rūkadre nie, abkokāre nikwe ngibiadre jāme bātārekā abti rūkadre nī kisete.

²⁶ Ngōbōkwe kukwe nuendi kuin nīkrā abko nita ngibiare kisere, ye abko kāta nī die mike. Ye kwrere arato, jata nebe ruen bobre di űakare nie blitakāre Ngōbōbe amne nikwe dre niedre Ngōbōye űan tā nebe nūke gare nie, yebtā abko Ngōbō űai kāta nī die mike blite Ngōbōbe, kāta tākekā jabe blitare kwārā ja kukwei jenbti Ngōbōbe amne, kukwe Ngōbō űaikwe abko nī űan raba niere jire ja kukwe jenbti.

²⁷ Akwa Ngöbö abko ie ni toi ño ño gare kuin metre jökrä, amne Ngöbö Üai töta nebe dre dre kräre nikä Ngöböye, ye garera jökrä Ngöböye, ñobtä ñan angwane Ngöbö tö dreye, ye kwrere Ngöbö Üai tä blite juta deme Ngöbökwé ye kräke.

Jändrän jökrä ni rüere, ye nita ganaine kwäräbe

²⁸ Ni jökrä käräbare Ngöbökwé jakrä mikakäre ja odeire käta Ngöbö tarere, kräke Ngöbökwé kukwe ükaninte Kristo köböire abko erere ngwiandi bare kwe, abkokäre kukwe kuin rakadrekä btätre ya o kukwe tare rakadrekä btätre ya, akwa Ngöböta ükete kuin kräke abko krörö:

²⁹ Kena dekä Ngöbö ngämi ni dätere, känenkri nire nire rabadre nüne kärekäre ben ye namanina gare ie, erere mikanintbe kwe kwitakäre bäsi ja Odei jen kwe Jesukristo kwrere. Ye abko Ngöbö Odei jen kwe rabadre bäri ütiäte etbakanre kwati ngätäite abkokäre.

³⁰ Erere arato, nire nire kräke Ngöbökwé kukwe mikanintbe kore abko erere käräbare kwe dantarikäre jakrä, ye abko ngite ñakare mda niebare kwe amne kani ngäbti kwe amne, ni ye abko mikadi nüne jabe kwe kä nuärete arato.

³¹ Ngöbökwé kukwe kuin nuenbare keta kabre kore ni kräke Jesukristo köböire, tikwe nini zyebtä nikwe dre niedre mda? Ngöböta ni tarere kore amne tä kukwe nuene kuin kore ni kräke, ye ngwane ni amne jändrän mda mda ñakare jire rabadre ni ganaine,

³² ñobtä ñan angwane Jesu abko Ngöbö Odei jen kwe, aiseté tare kri Ngöbökwé, akwa namani ruentari tare ñakare ie, käkwe biani müre ketadre ni jökrä kräke, zye abko jändrän mda mda kwe abko niarake ñan biandre ngwarbe nie ja moto kuinbti ja Odei ben gwaire ya? jñäri, Ngöbökwé jändrän jökrä kwe biani nie!

³³ Ngöbö ara jire käkwe ni dianinkä jakrä amne ni ngite ñakare mda niebare kwe, aiseté ni ñakare jire iti raba ni kite ngise Ngöböye abko Ngöbökwé kukwei mikadre era.

³⁴ Mdakäre abko, Kristo Jesu krütani ni kräke, btí nukaninta nire amne tä kä bäri ütiäte te Ngöbö kise ruenkri, käta blite käre Ngöböbe ni kräke, zye abko ni mda tädrera käkwe ni kitadi ngise Ngöbö ngwärekrei ya? jñakare jire!

³⁵ jKristo käta ni tarere kri, ye abko nirekwe toi kwitadre amne niara ñan rabadre ni tarere mda? Ni ñakare jire iti amne jändrän ñakare jire kä raba Kristo toi kwite ni rüere. Ye aiseté, nikwe ja tare nikadre tödekabtä Jesubti ya o ni mda käkwe rüdre krübäte ni rüere ya amne kukwe jatadre krübäte ni rüere ya o ni rabadre mrö nike ya o dän ñan rabadre nie ya amne ni rüe jatadre krübäte ya o ni kämika tö rabadre tödekabtä Jesubti ya, akwa zyebtä Kristokwe ñan ni taredre mda ya? jñakare jire! Niarakwe ni taredi janknu.

³⁶ Ye abko nikwe ja tare nikadre tödekabtä Jesubti rabadre gare merre nie, ñobtä ñan angwane Ngöbö Kukwei käta ni bä mike obeja kwrere, käta niere krörö nißtä:

Obeja jäta niken biare kämikadre,

ye kwrere jire nunta mikani biare kämikadre käre.

Ne aiseté, tödekabtä mabtí,

käre nun rätäkäta gatabti köbö kwatirekwatire,

Salmos 44.22

abko nieta Ngöbö Kukweibtä.

³⁷ Akwa Ngöbö ni tarekä kri, ye köböire nita kukwe bätäkä ngwarbe ye ganaine kwäräbe jökrä.

³⁸⁻³⁹ Tita nütüre kore, ñobtä ñan angwane jändrän ñakare jire kä raba Ngöbö toi kwite abtä niara ñan raba ni tarere mda, ye abko gare kuin tie, ñobtä ñan angwane ni krütadre ya o ni tädre nüne ya, akwa Ngöbökwé ni taredre janknu. Erere arato, angele köböire amne üai kämekäme köböire Ngöbökwé ñan ni kitadrekä ja okwä bäre mento, akwa ni taredre janknu kwe. Mdakäre abko, kukwe mtare amne kukwe jatadi ni rüere, ye abko ñan raba Ngöbö toi kwite abtä niara ñan raba ni tarere mda, akwa Ngöbökwé ni taredre janknu arato. Erere arato, jändrän kä käinbti ya o jändrän bäri mente nguse sete kä raba Ngöbö toi kwite abtä niara ñan raba ni tarere mda. Ne aiseté Kristo Jesu köböire Ngöbökwé ni taredi kärekäre amne jändrän ñan raba Ngöbö toi kwite jire chi abtä ñan rabadre ni tarere mda.

9

Ja toi jenbti Ngöböta ni denkä jakrä

¹⁻³ Mdakäre abko ti mräkätre, ti moto ulire krübäte amne ti motota nötöte käre, ñobtä ñan angwane ti mräkätre israelita tikwe ye abko käkwe tödekadre Kristobti abko köböire rabadre dianintari, ie ti tö bäri. Ngöbökwé ngürün mikadre tibtä, abtä ti ne ara jire rabadre mikaninkä Ngöbö okwä bäre mento ja ngie nuakäre kärekäre amne ti mräkätre tikwe rabadre dianintari, ie ti töta nebe, ne abko Kristo Jesu ngwärekrei tita kukwe era erere niere. Ñan tita ni ngökö gare tie, ñobtä ñan angwane tita mun ngökö ñakare abko Ngöbö Üai Deme käta mike gare tie, aiseté tita kukwe era erere niere kore.

⁴ Tita niere kore, ñobtä ñan angwane nitre israelita jatani jökrä Israelikri amne Ngöbökwé kani ngäbti ja ngäbriänkä kwrere. Erere arato, Ngöbö nämane ja di kri bä nuäre ye mike tuare ietre amne kukwe úkaninte bätäkä ngwarbe kwe bentre. Erere arato, ja kukwei biani kwe Moiséye kräke. Mdakäre abko, nitre israelita kákwe jändrän kukwadre Ngöbö káikitakakäre ju blitakrä Ngöböbe kánti abko Ngöbökwé úkaninte bentre. Ngöbökwé kukwe mda mda nuendre nitre israelitakrä abko niebare metre kwe ietre arato.

⁵ Erere arato, ni mräkä kirakira útiäte krikri, yekri niaratre jatani arato amne niaratreki Ni Dianinkä Ngöbökwé abko Jesukristo ara därebare arato. Jesukristo abko Ngöbö ara jire amne tä jändrän jökrä gobraine. Niara abko raba káikitaninkä kärekére. Abko kore se. Amen.

⁶ Ngöbökwé jändrän kuin nuenbare kore nitre israelitakrä, akwa niaratre kwati kákwe trö kwitani Kristoye, kákwe ñan mikani útiäte jae, ¿yebtä abko Ngöbökwé ñan ja kukwei mikani táte ya? Ñakare jire, ñobtä ñan angwane ñan nitre israelita jökrä därebare ni israelitakri abko Ngöböta tuen israelitare era metre ja ngwäreki.

⁷ Erere arato, ñan ni jökrä därebare Abrahamkri abkobtä Abraham ngäbriänkä era metre Ngöbö ngwäreki abko gare nie, ñobtä ñan angwane Abraham ngäbriänkä nämane kwati, akwa Ngöbökwé niebare krörö Abrahamye:

Ma ngäbriänkä era metre abko jatadi ma ngobo Isaac aibekri,

Génesis 21.12

niebare Ngöbökwé ie.

⁸ Ye mdenbtä abko, ñan nita därebare ni mräkä mdenkri abko káta ni mike Ngöbö ngäbriänkäre abko niebare Ngöbökwé Abrahamye Isaabtä káta mike gare nie, akwa Ngöbökwé ngäbäre köböi mikani Abrahamye abkokri ni därebare ja táritäri, ni ye abko Abraham bkün era metre.

⁹ Ye erere, bati Ngöbökwé ngäbäre biandre Abrahamye abko niebare krörö kwe ie:

Kä krörö ká mdate ti rúkadita angwane, ngäbäre rabadira Sarakwe, *Génesis 18.10,14*
abko Ngöbökwé nuendre Abrahamkrä, niebare kwe ie Isaabtä. Ye aisete Ngöbökwé Isaac dianinkä jakrä amne ñan Ismael dianinkä jakrä nämane gare Abrahamye.

¹⁰ Akwa kukwe ye abko ñan aibe nakaninkä kore akwa, kukwe mdara jire nakaninkä abko köböire nita därebare ni mräkä mdenkri abko ñan tá ni mike Ngöbö ngäbriänkäre abko tá nuke gare nie abko krörö: Rebeca ngobo munkine kädian nämane Esaú amne Jacob, ye abko därebare rün itibe Isaakri.

¹¹⁻¹³ Akwa niaratre nibu ngämi därebare amne ngämi kukwe kuin nuene amne ngämi jändrän káme nuene Ngöbö rüere, ye kánenkri Ngöbökwé niebare Rebecaye:

Ngäbäre mubai abko rabadi sribikä etba mrä kräke,

Génesis 25.23

niebare Ngöbökwé Rebecaye.

Ye mden erere Ngöbökwé niebare abko tá tikani krörö Ngöbö Kukweibtä:

Tikwe Jacob tarebare,

akwa Esaú abko tikwe tarebare ñakare,

Malaquías 1.2-3

abko niebare Ngöbökwé. Ye mden abko namanina kwatibe kore, ñobtä ñan angwane Ngöböta kukwe miketbe ño ño, tóta nebe nire nire diainkä jakrä ja tói jenbti ye erere tá denkä, ye abko ñan nita jändrän kuin nuene ya o nita jändrän káme nuene Ngöbö rüere abko Ngöböta mike ñäre, káta ni denkä jakrä, akwa Ngöbö tóta nebe nire diainkä jakrä, erere tá denkä.

¹⁴ ¿Ne aisete, Ngöbö abko kukwe úkateká blo nikwe niedre ya? ¡Ñakare jire!

¹⁵ ñobtä ñan angwane bati kira Ngöbökwé niebare krörö Moiséye:

Ti tö rabadi nire nire ngwiain ruentari tare jae, ye erere rabadi ruentari tare tie amne, ti tö rabadi ja moto mikai kuin nire nire kräke, ye erere kräke tikwe ja moto mikadi kuin,

Exodo 33.19

niebare Ngöbökwé Moiséye.

¹⁶ Kukwe ye abko káta kukwe krörö mike gare nie: Ye abko ñan ni tóta nebe dre ye amne ñan nita jändrän nuene ja di ngöibti abko köböire nita nebe ruentari tare Ngöböye, akwa ja tói jenbti nita nebe ruentari tare Ngöböye.

¹⁷ Erere arato, Ngöbökwé ñákábare Faraónye abko tá tikani Ngöbö Kukweibtä, káta niere krörö:

Ma köböire ti di kri rabadre gare ká jökräbti temen, abkokäre tikwe ma mikani jreire Egipto nete,

Exodo 9.16

niebare Ngöbökwé Faraónye.

¹⁸ Kukwe ye abko káta kukwe krörö mike gare nie: Ngöbö tóta nebe nire nire ngwiain ruentari tare jae, erere tá nebe ruentari tare ie amne, Ngöbö tóta nebe nire nire dokwä mikai ribi ja kukweikrä, erere tá dokwä mike ribi. Ye mden abko bá mikani kwe.

¹⁹ Akwa kukwe nebtä ni ruäre kákwe niedre tie: ¡Ngöbö tóta nebe dre dre nuein nibtä, erere tá neme bare nibtä, se ñobtä abko nita nebe ngite Ngöböye se! ni ruäre kákwe niedre kore.

²⁰ Akwa tita niere kore ni yeye: ¿Mun abko dātebare Ngōbōkwe, ye ñobtä abko mun tö ñākāi kore Ngōbō rüere ye? Ni kantra dātekā abko, ie kantra raba niere: ¿Drekāre makwe ti dātebare kore se? ¿niedre kantrakwe ie ya? ¡Ñakare jire!

²¹ ñobtä ñan angwane ni kantra dātekā ye tö rabadre dobro ye dātei ño ño ja töi jenbti, erere raba nuene. Ye mden kisete, dobrobti ni kantra dātekā ye raba kantra dātere jāndrān ūtiāte krāke, akwa dobro ye arabēbti raba kantra dātere arato jāndrān ūtiāte ñakare krāke. Ye kwrere arato, Ngōbōkwe ni dātebare, aisete tö rabadre dre dre nuein nißtā erere raba nuene.

²² Ne aisete, nitre kukwe kāmekāme nuenkā Ngōbō rüere, krāke Ngōbōkwe kukwe ūkaninte mikakāre ja ngie nuen, aisete ñan tö namani mikai ja ngie nuen jōtrō, akwa ngibiabare raire kwe, ye abko Ngōbō raba nuene ja töi jenbti.

²³ Erere arato, Ngōbōkwe ni ngibiabare raire kore, kākwe ñan ni ye mikani ja ngie nuen jōtrō, ñobtä ñan angwane niara töta nebe ja di kri bā nuāre mikai tuadre nitre tödekaka Jesubti yeye. Ngōbōkwe nitre tödekaka Jesubti dianinkā kira jakrā, kākwe ngwiani ruen bohre jae, mikakāre nüne kārēkare jabe kā bāri nuāre te.

²⁴ Ngōbōkwe ni kārābare jakrā abko ruāre nitre israelita ngātāite, ruāre abko nitre ñakare israelitare ngātāite.

²⁵ Ngōbōkwe ni kārādre kore abko tā tikani krōrō Ngōbō Kukweibtä tārā Oseabtā: Nitre ñakare juta jen tikwe abko batira jire rabadi juta jen tikwe abko tikwe niedi nitre yebtä.

Erere arato, nitre tita tarere ñakare metre mtare abko batire jire tita tarere arato abko tikwe niedi btā, *Oseas 2.23*
niebare Ngōbōkwe.

²⁶ Erere arato, Ngōbōkwe niebare mda tārā Oseabtā: Mun ñakare juta jen tikwe, tikwe niebare munye.

Kā ye kānti tikwe nieba kore munye, akwa kā ye arabe kānti tikwe niedi krōrō:

Mun abko Ngōbō nire ngābriānkātre, tikwe niedi munbtā, *Oseas 1.10*
abko tā tikani tārā Oseabtā.

²⁷ Akwa nitre israelita ngātāite abko ni ruāre aibe rabadre dianintari abko Ngōbōkwe niebare ietre kira abko tā tikani krōrō tārā Isaiabtā:

Nitre israelita rabadre bāri kwati abtä ñan rabadre tanre ūman mren kōrābāre kwrere, akwa niaratre braibe rabadi dianintari,

²⁸ ñobtä ñan angwane ni Dānkien Ngōbō kākwe kukwe ūkaninte ño nißtā, erere kebera mike tāte metre, bti ja töi kwitadi ñakare jire chi kwe, *Isaías 10.22-23*
abko nieta tārā Isaiabtā.

²⁹ Ye mden abko Ngōbōkwe niebare kāne Isaías ara kōböire arato abko krōrō:

Ni Dānkien Di Kri Jāndrān Jōkrā Nuenkā kākwe ñan ni mrākā israelita mikadrete nüne ruāre, akrāke Ngōbōkwe nitre Sodomabo amne Gomorrabo ganinkā jōkrā, ye kwrere ni israelita rabadre arato, *Isaías 1.9*
niebare Ngōbōkwe Isaías kōböire.

Nitre israelita kākwe tödekani ñakare Jesubti

³⁰ Ye kwrere Ngōbōkwe nitre ñakare israelita diandretari kwati abko niebare kwe akwa, nitre israelita braibe rabadre dianintari abko Ngōbōkwe niebare kira, ¿sebtā abko nikwe dre niedre? Niaratre abko ngite ñakare mda niebare kwe, ye abko nitre ñakare israelitare nāmane kānentari ñakare jakrā, akwa tödekabtā Jesubti niaratre ngite ñakare mda niebare kwe btātre amne kadre ngābti kwe abko Ngōbōkwe mikani gare ietre.

³¹ Akwa nitre israelita abko rabadre ja mike metre au ja di jenbti Ngōbō ngwārekri Kukwe Biani Ngōbōkwe Moiséye ye mikabtā tāte, ye abko nitre israelita nāmane kānentari kisere, akwa yebtä niaratre abko metre ja ngwārekri abko Ngōbōkwe niebare ñakare amne ñan kani ngābti kwe.

³² ¿Se ñobtä Ngōbōkwe nuenbare kore? Ye ñobtä ñan angwane Kukwe Biani Ngōbōkwe Moiséye ye mikabtā tāte ja di jenbti au abko kōböire niaratre ñakare ngite mda abko Ngōbōkwe niedre abko aibe nitre israelita nāmane mike era jae, akwa tödekani ñakare kwetre Ngōböbti. Ye mden kisete, ngite ñakare mda abko Ngōbōkwe niebare ñakare ietre. Nitre israelita kākwe tödekani bāri ja di jenbti ja mikakāre metre au Ngōbō ngwārekri amne ñan tö namani tödekai Jesubti. Jesu ye abko jā kwrere btā ni kwati tā ngoto ritete.

³³ Ye rakadrekā abko nāmane tikani kira Ngōbō Kukweibtä, kānti Ngōbōkwe Jesukristo bā mikani jā kwrere abko krōrō:

¡Munkwe mika ñārāre!

Tita jā mike jite mun Siōnbo ngātāite.

Jä ye abko rabadi ñakare ütiäte mun kräke, aiseite jä yebtä ni kwati ngoto ritadite amne ñan tödekadi kwetre bti.

Akwa nire nire käkwe tödekadre ni yebti abko Ngöbökwe ñan mikadi ja ngie nuen, aiseite ñan rabadre ja gaire, *Isaiás 8.14; 28.16*

abko tä tikani Ngöbö Kukweibtä ni Dänkien Jesukristobtä.

10

¹ Ti mräkätre, kukweta nakenkä kore nitre israelitabtä, akwa nitre israelita ye rabadre dianintari, ie ti tö krübäte, aiseite tita blite kräke Ngöböbe,

² ñobtä ñan angwane niaratre tä Ngöbö mike ütiäte kri jae, aiseite tätre mokrere Ngöböbti, akwa Ngöbö mikadre ütiäte ño metre kwetre abko erere nüke gare ñakare ietre.

³ Nita tödeke Jesubti aibe angwane ni ngite ñakare mda abko Ngöböta niere nibtä, ye abko ñan nükani gare ietre amne, niaratre töta nebe ja mikai metre au Ngöbö ngwärekre, aiseite Ngöbökwé kukwe mikanintbe ni mikakrä metre ja ngwärekre Jesukristo köböire, ye mikata ütiäte ñakare kwetre.

⁴ Akwa Kukwe Biani Ngöbökwé Moiséye, ye Kristo käkwe mikani täte jökrä, aiseite mikani nebe bare täte jökrä kwe ni kräke amne, tödeka Kristobti aibe köböire ni rabadre era metre Ngöbö ngwärekre, abkokäre mikani nebe bare täte jökrä kwe ni kräke.

⁵ Kukwe Biani Ngöbökwé Moiséye ye mikabtä täte nire nire tö rabai metre Ngöbö ngwärekre abko kräke Moisékwé kukwe tikani krörö:

Kukwe Biani Ngöbökwé Moiséye, ye nirekwe mikadre täte jire jökrä abko köböire nünandi kwe, *Levítico 18.5*

abko tä tikani Moisékwé Ngöbö Kukweibtä. Akwa ni ñan raba kukwe ye mike täte kore, ⁶ aiseite nita tödeke Jesubti, köböire ni ngite ñakare mda abko Ngöböta niere nibtä, ni ye kräke Ngöbö Kukwei käta niere krörö: Makwe ñan töbika krörö: “¿Nire näin kä käinbti” Kristo kanti, niara kärereta kä nebtä ni die mikakäre? Ye kwrere makwe ñan töbika, ñobtä ñan angwane Kristo nukanina kä nebtä aiseite.

⁷ Erere arato, makwe ñan töbika krörö: “¿Nire näin nguse kä nakebtä ni krütanikrütani ngätäite,” Kristo rükadreta nire ni die mikakäre? Ye kwrere munkwe ñan töbika, ñobtä ñan angwane Kristo krütanina bti Ngöbökwé mikanina nire ni kräke.

⁸ Akwa kukwe bti ni rabadre dianintari abko tä känime mun ken. Kukwe ye abko krörö: Tödekadre Kristobti aibe köböire ni ngite ñakare mda Ngöböta niere abko dirita nunkwe. Yebtä Ngöbö Kukwei tä niere krörö:

Kukwe ye abko tä känime mun ken abko mun raba niere ja kada jenbti amne, mun töibti mun raba mike era jae, *Deuteronomio 30.14*

abko Ngöbö Kukwei tä niere.

⁹ Kukwe mun diantarikrä abko tä ja ken munbe, ñobtä ñan angwane Jesu abko ma Dänkien makwe niedre ja kada jenbti amne Ngöbökwé Jesu mikaninta nire, yebti makwe tödekadre amne makwe mikadre era ja töibti angwane, ma rabadi dianintari.

¹⁰ Ye abko, Jesu mikata era ja töibti amne tödekata bti, yebtä ni ngite ñakare mda abko Ngöböta niere nibtä amne, Jesukristo abko ni Dänkien nita niere ja kada jenbti, ye ngwane nita nebe dianintari.

¹¹ Yebtä abko Ngöbö Kukwei tä niere krörö arato:

Nire nire käkwe tödekadre niarabti abko ñan rabadre mikani ja ngie nuen, aiseite ñan rabadre ja gaire, *Isaiás 28.16*

abko nieta Ngöbö Kukweibtä.

¹² Nieta kore, ñobtä ñan angwane ni israelita ya o ni ñakare israelitare akwa ni ja kwrere jökrä Ngöbö ngwärekre. Ye aiseite ni ñakare bä jene jene amne ni Dänkien Kristo abko ni jökrä Dänkien amne, nire nire käta ja di kärere ie rabakäre dianintari ye erere die mikata kri kwe

¹³ abko gare metre nie, ñobtä ñan angwane nieta krörö Ngöbö Kukweibtä:

Nire nire käkwe ja di kärädre ni Dänkienye rabakäre dianintari, ni ye abko Ngöbökwé dianditari, *Joel 2.32*

abko nieta Ngöbö Kukweibtä.

¹⁴ ¿Akwa ni tödekaka ñakare Kristobti käkwe ja di kärädre ño Ngöböye jakrä? Erere arato, ¿ni ni kukwei nuen ñakare blite Kristobtä abko tödekadre ño kwe bti? ¿Amne ni ñakare kukwe kuin Kristobtä niere, ye abko nikwe kukwe Kristobtä kukwei nuadre ño?

¹⁵ Mdakäre abko, ¿ni juanta ñakare kukwe kuin Jesubtä niere ni mdaye, ye abko rikadre blite ño kukwe kuin yebtä? Ye mdenbtä abko, Ngöbö Kukweita niere krörö:

Ni kukwe kuin ngwianka tä kite nüke, ye abko käita nebe nuäre krübäte nibtä niara tuare, *Isaiás 52.7*

abko nieta Ngöbö Kukweibtä.

¹⁶ Kukwe kuin Kristobtä ye niebare nitre israelitaye, akwa ni kwati käkwe ñan mikani era, käkwe tödekani ñakare Jesubti. Kukwe rakadrekä kore abko Ngöbökwe niebare kira krörö Isaiás köböire:

Ni Dänkien, nunkwe kukwe kuin niebare, ye bäsi ni ñakare jire käkwe mikani era, *Isaiás 53.1* abko nieta Ngöbö Kukweibtä sribi nunkwebtä.

¹⁷ Ye abko, kukwe kuin Kristobtä, ye nita kukwe nuen angwane, nita kite tödeke Kristobti. Kukwe kuin ye abko Kristobtä.

¹⁸ Akwa ti raba ngwentari munye: ¿Nitre israelita ye käkwe kukwe kuin Kristobtä kukwei nuani metre ya, ñakare ya? Jänri, niaratrekwe kukwe kuin ye kukwei nuani. Ye mdenbtä abko, Ngöbö Kukwei këta niere krörö:

Nitre kukwe kuin ngwianka, ye nikani kukwe kuin ye ngwena kä jökräbti temen amne, kukwe kuin ye abko niaratre nikani ngwena kä ketareketare te jökrä kwäräkwärä, *Salmos 19.4*

abko nieta Ngöbö Kukweibtä.

¹⁹ Akwa ti tö kukwe ngwaintarita mda munye abko krörö: ¿Kukwe kuin niebare nitre israelitaye, ye abko ñan nükani gare metre ietre ya? Käne Moisékwe niebare krörö nitre israelitabtä:

Juta ñakare jen tikwe, ye ben tikwe mun israelita mikadi mokrere.

Erere arato, juta ie ti nuke gare ñakare mtare, juta ye kräke tikwe mun israelita mikadi romon, *Deuteronomio 32.21*

²⁰ ñobtä ñan angwane kukwe niebare Ngöbö Kukweibtä Isaiäkwe abko tä nakenkä mtare abko krörö:

Juta mda mda ñakare israelitare nämane ti känentari ñakare abko ie ti kwani.

Amne juta nämane ti kärere ñakare abko ie tikwe ja mikani gare, *Isaiás 65.1* abko nieta Ngöbö Kukweibtä nitre ñakare israelitarebtä, ñobtä ñan angwane niaratre kwati tä tödeke Jesubti aisete.

²¹ Akwa nitre israelitabtä abko Isaiäkwe niebare krörö:

Juta ne ñan tä ti kukwei mike täte amne, dokwä ribi ti kukwei ngäbti, akwa ti nämane biare kise ngianinte köbö kwatirekwatire niaratre ngäbti, *Isaiás 65.2* niebare Ngöbökwe Isaiás köböire.

11

Ngöbökwe nitre israelita dianinkä braibe jakrä

¹ Kukwe yebtä, ti rabadre kukwe ngwentari krörö: ¿Nitre ñakare israelitare, kräke Ngöbökwe ja moto mikani kuin, yebtä abko juta israelita abko ie Ngöbökwe trö kwitani ya? Ñakare jire, ñobtä ñan angwane ti abko israelita. Ti därebare Abrahamkri amne ti därebare juta Benjamin mräkäkri arato.

² Käne abko, Ngöbö ngämi kä ne dätere, ye känenkri Ngöbökwe juta israelita diandikä juta jen jakwe kwrere abko mikanintbe kwe, aisete mtare Ngöbökwe ñan trö kwitani juta jen kweye. ¿Ye abko era metre abko kukwe nakaninkä ni Ngöbö kukwei niekä kädian nämane Eliäbtä abko këta bä mike abko gare ñakare munye ya? Bati Eliás nämane blite Ngöböbe angwane, niebare krörö kwe nitre israelita kitakäre ngite Ngöböye:

³ Ti Dänkien, nitre ma kukwei niekä abko kämikanina jökrä jreikwe. Erere arato, ñukwä grä jändrän kukwakrä mae ye dikaninte jökrä kwetre.

Mtare ti aibe tä nire kaiibe, akwa niaratre tö ti kämikai arato, *1 Reyes 19.10,14* niebare Eliäkwe Ngöböye.

⁴ Abtä Ngöbökwe niebare mda ie:

Nitre israelita kwati ngämi nebe ngukudokwäbti temen ngöbö ngwarbe Baal ngwärekre, akwa tä ti mike era janknu abko tikwe dianinkä mili krä kükü jenena jakrä, aisete ma ñakare tä kaiibe, *1 Reyes 19.18*

niebare Ngöbökwe Eliäye.

⁵ Ye kwrere arato mtare, Ngöbö nitre israelita dianinkä ruäre jen jakrä ja moto kuinbti, këta tödeke Jesubti.

⁶ Ja moto kuinbti Ngöbö nitre israelita dianinkä ruäre jen jakrä, ye abko ñan jändrän kuin nuenbare kwetre abko ütiäre Ngöböke dianinkä jakrä, akwa Ngöbö ara jire käkwe ja moto mikani kuin, köböire ni dianinkä kwe jakrä. Akwa nikwe jändrän kuin nuendre abko ütiäre Ngöböke ni diandrekä jakrä, ye ngwane ñakare Ngöböta ni denkä jakrä ja moto kuinbti.

⁷ ¿Yebtä abko, nikwe dre niedre mda? Nitre israelita rabadre metre Ngöbö ngwärekre ja di jenbti abko niaratre namani känene kisere, akwa erere ñan namani bare. Akwa nitre israelita dianinkä jakrä Ngöböke abko këta tödeke Jesubti angwane, niaratre abko ngite

ñakare mda Ngöböta niere, akwa nitre israelita mda mda abko Ngöbö ara jire kákwe dokwá mikani ribi.

⁸ Ye kwrere kukwe rakadreká abko Ngöbökwé niebare kira abko tá tikani krörö Ngöbö Kukweibtá:

Ni kwata ruen ñakare, kwrere jire Ngöbökwé mun tói mikani abko erere mun tá abti ká núke mtare.

Ngöbökwé mun okwá mikani, akwa kukwe era metre Kristobtä tuen ñakare munye.

Erere arato, mun olo mikani Ngöbökwé, akwa ni kukwei kuin Kristobtä ruen ñakare mtare munye,

Deuteronomio 29.4; Isaias 29.10

abko nieta Ngöbö Kukweibtá nitre israelita kwati btá.

⁹ Erere arato, Davikwe niebare krörö niara rüebtä Ngöböye, erere tá nakenká mtare nitre israelita kwati btá:

Jändrän jökrá kuin mrö kwrere, ye abko rikwitadreta niaratre rüere näre.

Yebtä abko rabadre ritete abtä mikadre ja ngie nuen näre.

¹⁰ Erere arato, ká ñan rabadre tuen ietre, abkokáre okwá raba ká ikote näre amne, ñan rabadre jändrän nuen ká, abkokáre trö raba tánene kárekáre näre, *Salmos 69.22-23* abko niebare Davikwe. Ye kwrere tá nakenká mtare nitre israelita kwati btá.

Ngöbökwé nitre ñakare israelitare dianintari arato

¹¹ Mtare ti bike kukwe mda ngwentari krörö: ¿Nitre israelita nikani janknu temen rabakáre kárekáre Ngöbö okwá báre mento ya? Ñakare jire, ñobtä ñan angwane nitre israelita kákwe ñan Ngöbö kukwei mikani táte, kákwe trö kwitani ie, ye köböire abko ni mda mda ñakare israelitare abko namani dianintari Ngöbökwé arato, nitre israelita rabadre mokrere Ngöböbti abkokáre.

¹² Akwa nitre israelita tá kukwe kuin Jesubtä kite temen, köböire tá ja mike ngíte au Ngöbö rüere mtare, ye köböire abko ni mda mda ñakare israelitare tá jändrän kuin kuin Ngöbökwé bkáne kabre Jesukristo köböire. Akwa mrá nitre israelita kákwe tódekadre táte jökrá Jesubti angwane, jera metre Ngöbökwé ni jökrá die mikadre bári kri mda ñan ñan!

¹³ Akwa mun ñakare israelitare abko ie ti bike niere krörö: Mun ye ie Ngöbö ara jire kákwe ti juani ja kukwei ngwena, aiseté tita sribi ne mike bári útiáte jae,

¹⁴ ñobtä ñan angwane tita sribire munbe angwane, ti mrákátre israelita tikwe jatadre mokrere munbe, ye köböire abko ti rúkadre ngwenante Ngöböye amne rabadre dianintari arato abkokáre.

¹⁵ Ye abko, Ngöbökwé nitre israelita tuanimetre angwane, Ngöbökwé jändrän kuin krúbáte nuenbare ni mda mda ñakare israelitare ká jökrábti kráke, kákwe ká biani ietre ja mákákáreta jabe Jesu köböire. ¿Ye abko nitre israelita jen Ngöbökwé kákwe tódekadre Jesubti angwane, Ngöbökwé kadreta ngábti abko Ngöbökwé ñan jändrän bári kuin krúbáte nuendre kráke ya? ¡Jánri! Ngöbökwé mikadre núne kárekáre jabe,

¹⁶ ñobtä ñan angwane arina mritata, bti diankata chi jenena Ngöbökrá, ye abko tuen deme amne útiáte Ngöböye, ye ngwane arina mda tá nebe deme amne útiáte jökrá arato. Ye kwrere abko nitre israelita mráká kánekáne abko arina chi dianinká jenena kwrere amne nitre israelita jökrá abko arina mda kwrere abko krörö: Ngöbökwé nitre israelita mráká kánekáne Abraham, Isaac amne Jacob mikani jenena deme jakrá, ye köböire nitre israelita jökrá tá mikani jenena, Ngöbökwé kukwe kuin nuendre kráke abkokáre. Ye kwrere arato, kri ngátri tá mikani kuin deme jenena, ye ngwane kri kúde tá neme kuin deme jökrá arato. Ye abko Ngöbökwé nitre israelita kánekáne mikani deme jenena jakrá kri ngátri kwrere, ye köböire nitre israelita mda mda ja táritári tá mikani jenena Ngöbökwé, kukwe kuin nuenkáre kráke arato.

¹⁷ Yebtä abko, ti bike kukwe mda bá mike krörö: Nitre israelita abko olibo krie kwrere, akwa olibo krie ye abko kúde tikaninká ruäre. Olibo krie kúde tikaninká ye táte abko olibo krie ngwarbe kánsenta kúde mikani. Olibo krie ngwarbe kánsenta ye abko ma ñakare israelitare ara. Olibo kúde era metre tikaninká abko táte ma mikani, ye mden köböire abko namani neketaninká olibo ngátri era metre btá amne olibo nire abko ara jire btá ma namani siba, káta ma die mike. Olibo ngátri era metre abko nitre israelita mráká kánekáne Abraham, Isaac amne Jacob ara.

¹⁸ Akwa yebtä makwe ñan bika kri olibo kúde era metre btá, ñobtä ñan angwane makwe bikadre kri angwane, ñan olibo ngátri tá nire ma köböire akwa, ma abko tá nire olibo ngátri köböire, ye makwe ngwianta tóre jae.

¹⁹ Akwa mun ruäre ñakare israelitare kákwe niedre mda: Olibo kúde era metre tikaninká abko táte ti mikani, munkwe niedre kore bikakáre kri,

²⁰ ye abko tá dbe. Akwa nitre israelita abko olibo kúde era metre, kákwe ñan tódekani Jesubti abtä Ngöbökwé tikaninká amne ma abko kákwe tódekani Jesubti, aibe köböire

Ngöbökwe ma mikani olibo küde era metre ye täte. Ne aisete, makwe Ngöbö jürä ngwian jirekäbe jabtä angwane, makwe ñan bika kri,

²¹ ñobtä ñan angwane nitre israelita abko olibo küde era metre, akwa tödekani ñakare kwetre Jesubti, ye abko Ngöbökwe diani ñakare niaratrebti ta, aisete jma härira jire käkwe ñan tödekadre janknu Jesubti angwane, Ngöbökwe ñan diandre jire mabti ta!

²² Yebtä abko, makwe nikra kuin ja käne, ñobtä ñan angwane Ngöbö abko moto kuin, akwa motota nebe romon arato. Ye mden kisete, nitre israelita namani ritete nikani temen, ñobtä ñan angwane kukwe kuin Jesubtä mikani ñakare era jae kwetre, ye kräke Ngöbö moto namani romon angwane, ja moto mikani kuin kwe makrä. Akwa makwe nünandre ño, ie Ngöbö tö ye kwrere makwe nuna käre angwane, Ngöbö moto rabadi kuin käre makrä, akwa makwe ñan nünandre Ngöbö töi erere, ye ngwane ma tikadikäta olibo kriebtä arato.

²³ Mdakäre abko, nitre israelita ñan tä Ngöbö kukwei Jesubtä mike era jae, ye mikadre temen kwetre angwane, tödekadre Jesubti kwetre angwane, Ngöbökwe ketarekäta olibo krie metrebtä, ñobtä ñan angwane Ngöbö ti tarä olibo küde ye ketarekäta olibo kriebtä.

²⁴ Mun abko olibo krie ngwarbe känsenta abko küde tikaninkä, bti ketaninkä olibo küde era metre ye täte ¿ye abko nitre israelita olibo küde era metre tikaninkä abko Ngöbökwe ñan mikadreta täte olibo kriebtä ya? ¡jänri! Niaratre abko olibo küde era metre, aisete bäri Ngöbökwe ketarekäta täte.

Nitre israelita rabadi dianintari

²⁵ Ja mräkäre, Ngöbökwe kukwe ükaninte kore mun ñakare israelitarebtä amne nitre israelitabtä, ye abko kukwe ükaninte kira tiebe Ngöbökwe ni kräke, akwa mtare Ngöböta mike gare nie, ye abko btä mun ñakare israelitare ñan tädre töi ngitiekä ngwarbe kwäräkwärä abtä bikadre kri nitre israelitabtä, abkokäre tita mike gare munye abko krörö: Mun ñakare israelitare rabadre tödeke täte jökrä Kristobti, abkokäre nitre israelita ruäre dokwä ribi, käkwe trö kwitani Jesukristoye.

²⁶ Akwa kukwe ye rabadi bare kore angwane, nitre israelita rabadi dianintari, erere rabadi dianintari jökrä abko rakadikä kore tä gare nie, ñobtä ñan angwane Ngöbö Kukweita blite krörö btä:

Ni Diantarikä tä Siönte abko jatadi nitre israelita dentari, ye käkwe Jacob mräkä ngite Ngöbö rüere diandikä jökrä btä.

²⁷ Nitre israelita ngite ye diandikä jökrä kore btäre angwane, Ngöbökwe kukwe ükaninte kira nitre israelitabtä ye rabadi bare,

Isaiás 59.20-21; 27.9

abko nieta Ngöbö Kukweitbä.

²⁸ Akwa mtare ti mräkäre, nitre israelita kwati tä Ngöbö kukwei kuin Jesubtä ye rüere, abtä tätre ja rüere Ngöböbe. Ye mden köböire abko nitre israelita tä kä bien mun ñakare israelitareye tödekakäre Kristobti mtare. Akwa Ngöbökwe nitre israelita mräkä känekäne Abraham, Isaac amne Jacob ye dianinkä jakrä amne kukwe ükaninte kwe bentre, yebtä abko Ngöbö tä nitre israelita tarere janknu arato,

²⁹ ñobtä ñan angwane Ngöböta jändrän bien nie, ye abko ñan tä denkäta nikän. Erere arato, tä ni kärere diantarikäre, yebti ñan tä ja kukwei kiteta temen, aisete tä ja kukwei mike täte jökrä, aisete Ngöböta nitre israelita tarere janknu.

³⁰ Angwane mun ñakare israelitare abko mekera mun nämane Ngöbö kukwei mike ñakare täte, akwa mtare nitre israelita käta Ngöbö kukwei kuin Jesubtä mike ñakare täte, ye köböire abko tätre kä bien munye, mun rabadre ruentari tare Ngöböye, käkwe mun diandretari Jesu köböire abkokäre.

³¹ Ye kwrere arato, nitre israelita ñan tä Ngöbö kukwei kuin Jesubtä mike täte mtare, ye köböire abko mun rabadre ruentari tare Ngöböye abkokäre. Ye mdenbtä, mrä nitre israelita rabadi ruentari tare Ngöböye, ñobtä ñan angwane Ngöböta mun ñakare israelitare ngwen ruentari tare jae mtare.

³² Ne aisete, ni jökrä rabadre tödeke Jesubti amne rabadre ruentari tare Ngöböye, käkwe dianditari, abkokäre Ngöbökwe ni jökrä israelita ya, ñakare ya tuanimetre ja dokwä mike ribi amne ñan Ngöbö kukwei Jesubtä mikadre täte kwetre abko Ngöbökwe nuenbare kore, akwa ye köböire abko ni israelita ya, ñakare ya akwa Ngöbö rabadre ngwen ruentari tare jae amne rabadre dianintari, abkokäre Ngöbökwe nuenbare kore.

Pablota Ngöbö käikitekä

³³ Yebtä abko, ti tö kukwe niei krörö Ngöböbtä: ¡jo! Ngöbö abra kwe jändrän kuinquin tarä kabre krübäte nikrä, amne Ngöbö abra töbtä kri krübäte, käkwe jändrän kuinquin mikanintbe ja töi jenbti ni kräke. Ye aisete Ngöböta töbike ño ño, ye ni ñan raba niere jire chi amne Ngöbö töi ji mdenbtä ye ni ñakare jire iti ie rabadre gare.

³⁴ Ne aisete, ¿ni Dänkien töi ño, ye tä gare ni mda mdaye ya? ¡Ñakare! ¿Angwane ni mda mda raba Ngöbö töi tike ya? ¡Ñakare!

³⁵ Mdakäre abko, ¿ni tärä iti kákwe jändrän biani káne ni Dänkienye abko ütiä biandreta kwe ie ya? ¡Ñakarel!

³⁶ Nobtá ñan angwane jändrän jökrä tä kite Ngöbökre amne jändrän jökrä tä niara köböire amne jändrän jökrä abko jen Ngöbökre, aiseite ¡Ngöbö aibe raba káikitaninkä käreka! Abko kore se. Amen.

12

Ni kwitanina btin Ngöbökre, erere nikwe nünandre

¹ Ngöbökre ni ngwiani ruentari tare kore jae, kákwe jändrän kuin nuenbare batakä ngwarbe ni kräke, ye mden kisete ti mräkätre tikwe, jändrän kämikata Ngöbö káikitakäre abko bianta ngöi ie, ye kwrere munkwe ja ngrabare mika ngöi jökrä Ngöbökrä amne munkwe nuna kuin deme Ngöbö aibe kräke amne, dre tuen dbe Ngöböye, ye erere munkwe nuen abko ti tö nibi niei kisere munye. Munkwe nuendre kore angwane, munkwe Ngöbö mikadi ütiäte amne munkwe káikitadikä era metre.

² Erere arato, nitre moto kämekäme tä nüne ño kä ne ngwane, ye kwrere munkwe ñan nuna mda. Akwa mun rabadre kwitani Kristo kwrere, abkokäre munkwe Ngöbö tuametre ja töi kwite btin. Ye ngwane Ngöbö tö dreye, ye rüka gare munye amne jändrän kuin Ngöbökrä amne jändrän nuäre Ngöbökrä amne jändrän era metre Ngöbö okwäbti, Ngöbö tö dreye, ye rüka gare munye.

³ Ni kwitanina Ngöbökre kákwe nünandre krörö abko ti bike niere munye. Ngöbökre ja moto mikani kuin tikrä, kákwe ti mikani Jesu kukwei ngwianka, aiseite ti bike kukwe niere krörö mun itire itireye: Munkwe ñan bika kri ni mda mdabtä, akwa munkwe töbika era metre au jabtä, ñobtá ñan angwane Ngöbökre mun itire itire mikani tödeke ja kwrere jabtä, aiseite ye kwrere munkwe nuna.

⁴ Ni abko itibe akwa ni kiakia ngrabare abko kabre, akwa ni kiakia ngrabare ye ñan tä sribi ketetibe nuene, akwa tä sribi batakä ngwarbe nuene ni ngrabare die mikakäre.

⁵ Ye kwrere arato, ni itire itire tödekaka Kristobti tä nekete niarakri abko ni kwati, akwa ni abko Kristo ngrabare itibe, aiseite nita nekete gwaire jakri ja die mikakäre kwärikwäri.

⁶ Akwa ni itire itire, ie Ngöbö tö namani ja di bian sribi ño ño nuenkäre, ye erere biani kwe nie. Ye aiseite, Ngöbökre ja di biani ni itiyä ja kukwei niekäre ni mda mdaye angwane, ni ye kätä tödeke ño Ngöböbti, ye kwrere Ngöbö kukwei niedre.

⁷ Erere arato, Ngöbökre ja di biani ni mdaye sribikäre ni mda mda die mikakrä angwane, sribidre kuin kräke kwe. Amne Ngöbökre ja di biani ni mdaye ja kukwei dirikäre, ye kwrere diri janknu kwe ni mda mdaye.

⁸ Erere arato, Ngöbökre ja di biani ni mdaye ni mda mda kitakäre nüne bäri Ngöbökrä, ye kwrere kita nüne bäri Ngöbökrä kwe. Erere arato, Ngöbökre ja di biani ni mdaye jändrän biänkäre ngwarbe ni mda mdaye angwane, jändrän bian ja moto kuinbti kwe. Erere arato, Ngöbökre ja di biani ni mdaye rabakäre ji dokwäte nitre gätäkä Jesu kabti ngätäite angwane, sribi ye nuen kuin täte jökrä kwe. Erere arato, Ngöbökre ja di biani ni mdaye ni nobre bobre amne ni ja tare nikaka nikaka die mike angwane, kä rabadre nuäre btä sribi ye nuenkäre.

Nikwe ni mda mda taredre

⁹ Kukwe mda ti bike niere munye abko krörö: Munkwe ja tare era metre kwärikwäri. Erere arato, munkwe bätä ngwiandre kri krübäte kukwe kämekäme yebtä amne munkwe kukwe kuinquin ye ketadrete dime ja kisete.

¹⁰ Ni ja etbare kätä ja tarere, ye kwrere munkwe ja taredre kwärikwäri amne, munkwe ñan ja mikadre ngwarbe jae kwärikwäri, akwa munkwe ja mikadre bäri ütiäte jae kwärikwäri. Yebtä munkwe ja kitadre bäri.

¹¹ Mdakäre abko, sribi jökrä jiebtä mun rankwadre kisere, akwa munkwe ñan kä ngwian-dre krene jabtä amne munkwe sribidre ja di ngöi jökrä ni Dänkienkrä.

¹² Erere arato, Ngöbökre jändrän kuin nuendi munkrä, ye abko munkwe käi ngwiandre nuäre jabtä, akwa mun raba ja tare nike angwane, munkwe nünandrekä dite jabtä amne ja tare nika yebtä munkwe ñan ngra ngradre akwa, munkwe blitadre janknu Ngöböe.

¹³ Nitre tödekaka Jesubti kätä jändrän mdei nike, ye abko munkwe die mikadre. Erere arato, nitre basaka kabre ngäbti kuin, ye jiebtä mun rankwadre kisere.

¹⁴ Mdakäre abko, nire nire tä näin kisere mun jiebtä mun mikakäre ja tare nike tödekabtä Jesubti, ye kräke munkwe ja di kärä Ngöböye amne munkwe ñan ngürün mika btä ja dokwäre.

¹⁵ Erere arato, nire nire btä kätä nuäre, ye ben munkwe kä ngwiandre nuäre gwaire jabtä amne, nire nire tä ulire amne tä ja müaire abko ben munkwe ja müaire gwaire siba.

¹⁶ Erere arato, munkwe nūnandre jāme jabe kwārikwāri amne munkwe űan bikadre krikri, akwa munkwe ja getadre jāme ni bobre bobre ben amne ja űan rabadre ruen bāri tōbtā ni mda mdabtā munye.

¹⁷ Mdakāre abko, ni mda mdakwe kukwe nuen kāme mun rūere, akwa munkwe űan kukwe nuenta kāme btā ja dokwāre, akwa dre dre tuen kuin ni jōkrāye, ye jiebtī mun rankwa.

¹⁸ Erere arato, munkwe ja die mikadre kāre nūnakāre jāme ni jōkrābe.

¹⁹ Tī mrākātre tare tikwe, ni mdakwe kukwe nuen kāme mun rūere angwane, munkwe űan ja ngie mika au, akwa munkwe mun rūere ye tuametre Ngōbō kisete, űobtā űan angwane Ngōbō Kukwei kāta niere krōrō:

Ni mikadre ja ngie nuen, ye abko tā tī kisete.

Ne aisete ni kukwe nuenkā kāmekāme mun rūere, ye dokwāre tikwe mikadi ja ngie nuen, *Deuteronomio 32.35*

niebare ni Dānkienkwe.

²⁰ Ne aisete, nikwe Ngōbō Kukwei mikadre tāte krōrō:

Ma rūere, ie mrō raba angwane, makwe buka.

Erere arato, tomna raba ie angwane, makwe tomna bian ie.

Ye btā abko rabadre ja gaire amne ngwāre kwata rabadre tain būrere jōkrā ie ja gaibtā, abkokāre makwe nuen kore. *Proverbios 25.21-22*

abko tā tikani Ngōbō Kukwei btā.

²¹ Ye abko, makwe űan ja ganaimna kukwe kāmeye, akwa makwe kukwe kuin nuen ma rūekrā, kōbōire makwe kukwe kāme ganaindi.

13

Nitre gobranka kukwei mikadre tāte

¹ Mdakāre abko, ni jōkrā tā nebe gobrane ye abko Ngōbō ara jire tā mike. Ni űakare jire iti abko tā ja mike gobrane ja tōi jenbtī, aisete nikwe nitre gobranka mikadre tāte.

² Ye aisete nire nire tā nebe nitre gobranka rūere, ye abko Ngōbō kukwei ara jire rūere nita rūere, aisete nire nire tā rūere nitre gobranka rūere ye abko kākwe ja ngie nuadi.

³ Ye abko, ni tōi kuin era metre abko krāke űan nitre gobranka tā mikani jūrā ngwiandre, akwa nitre kukwe kāmekāme nuenkā abko krāke gobranta mikani jūrā ngwiandre ie. ¿Ye aisete gobran űan jūrā rabadre mabtā, ie ma tō ya? Gobran jūrā űan rabadre mabtā, ie ma tō ne ngwane nūna kuin era metre amne makwe űan ja mika ngite angwane, nitre gobranka kākwe ma mikadi űitiāte,

⁴ űobtā űan angwane nitre gobranka tātre sribire Ngōbōkrā jāndrān kuin nuenkāre makrā. Akwa makwe nūnandre kāme abtā makwe ja mikadre ngite gobran rūere, ye ngwane abko gobran jūrā rabadre mabtā, űobtā űan angwane űan ngwarbe nitre gobranka ye tā ni mike ja ngie nuen. Nitre gobranka ye abko tā sribire Ngōbōkrā, kukwe kāmekāme nuenkā mikakāre ja ngie nuen Ngōbō tāte.

⁵ Ye mden kisete, ni jōkrā kākwe nitre gobranka mikadre tāte. Ye abko űan ni mikadre ja ngie nuen kwe abtā mikadre tāte, akwa ja űan rabadre ruen ngite nie Ngōbō ngwārekri, abkokāre nikwe mikadre tāte.

⁶ Nitre gobranka ye tā sribire Ngōbōkrā amne tā sribi ye nuene kōbō kwatirekwatire, aisete mun jōkrā tā ja űitiā bien ietre.

⁷ Ye mdenbtā abko, gobran itire itire, ie dre biandre ja űitiāre, ye erere bian ie munkwe, aisete nireye rūrūmon űitiā biandre űo űo, ye ie ja űitiā biandre metre. Erere arato, nire nire jūrā ngwiandre, ye erere munkwe jūrā ngwian amne, nire nire mikadre űitiāte jae, erere munkwe mika űitiāte jae.

Ja taredre kwārikwāri

⁸ Munkwe űan ja űitiā ya o rūrūmon űitiā mika jire chi jabtī, akwa kāre rūrūmon űitiā tādre ketetibe mun itire itire btī abko munkwe ja taredre kwārikwāri, űobtā űan angwane nire nire kāta ni mda mda tarere ye abko kāta Kukwe Biani Ngōbōkwe Moiséye mike tāte jōkrā.

⁹ Ye abko Kukwe Biani Ngōbōkwe Moiséye kāta niere krōrō: Ma gure ne ngwane, makwe űan ja mika gure bati bati ni mdabe, makwe űan ni kāmika, makwe űan go, makwe űan jāndrān ni jenenankwe ribe jae. Ye abko, kukwe ketetibe mda munkwe mikadre tāte ne ngwane, kukwe jōkrā biani nuendre nie Ngōbōkwe ye rabadre bare munye. Kukwe keteti mda ye abko krōrō:

Mata ja tarere au,

ye kwrere makwe ni mda mda tare arato,

Levítico 19.18

¹⁰ ñobtä ñan angwane nire nire këta ni mda tarere ye abko ñan tä kukwe nuene këme rüere. Ne aisete nita ja tarere kwärikwäri, ye ngwane Kukwe Biani Ngöbökwé Moiséye tä nebe bare täte jökrä nie.

¹¹ Munkwe ni mda mda taredre kore, ñobtä ñan angwane ni Dänkien Jesukristo jatadita ni diantarikäre abko köböi nükerä. Munkwe ñan nüna ni kibiaka kwrere, ñobtä ñan angwane Jesukristo jatadita abko köböi nükerate bäri ja ken, munkwe tödekani Jesubti krire ye kräke.

¹² Kä ne ngwane abko kä iko kwrere amne ni jökrä këta kukwe nuene kämekäme, akwa kä iko ye kitera niken ta amne Jesu kebera nuketa, ye abko kä ngwen kwrere kitera nuke. Ye mdenbtä abko, ari kukwe kämekäme kite temen amne ari ja töi mike kwatibe kukwe kuin nuene. Ye kwrere ni rabadi juto biare ni Dänkien kaen ngäbti, ni rükä tä ja mike juto niara rüe kraire jabti ye kwrere.

¹³ Ne aisete, jändrän nuenta era metre kä ngwenbti, ye kwrere nikwe nünandre era metre. Akwa ni ñan rikadre kä ngwen nuäre ngwarbe jabtä kwärikwäri amne, ni ñan rika dröbare. Erere arato, nikwe ñan ja mikadre gure bati bati amne nikwe ñan ja näkwitadre ngwarbe kukwe kämekäme btä; nikwe ñan rüdre ngwarbe jabe kwärikwäri amne ni mda rabadre jändrän bkäne, yebtä nikwe ñan mokredre jire ben.

¹⁴ Munkwe ñan nüna kore amne ñan kukwe kämekäme mdei ngwian jae munkwe amne, munkwe töbika ñakare btä, akwa ni Dänkien Jesukristo käkwe nünabare ño kä nebtä amne blitabare ño kä nebtä kwe, ye kwrere munkwe nüna amne munkwe blita ni mda mdabe.

14

Ja kadre ngäbti kwärikwäri

¹ Mdakäre abko, kukwe diribare Jesukwe mröbtä, yebtä töbikata jene jene. Akwa kukwe ye mikakäre era abko ni mräkä di braibe këta ngri kwete ñakare, ni ye abko munkwe ka ngäbti kuin amne tä töbike ño, yebtä munkwe ñan kita ngite,

² ñobtä ñan angwane jändrän jökrä abko dbe kwetadre niebare ni Dänkien Jesukwe abko ni ruäre tä nütüre, akwa ni ruäre abko di ñakare kukwe ye mikakäre era abko këta ka bätäkä ngwarbe aibe kwete.

³ Ye abko ni ruäre këta jändrän jökrä kwete ye ñan käkwe ni mda mda ngri kwete ñakare ye mika ngwarbe jae. Erere arato, ni ruäre ñan tä jändrän jökrä kwete ye käkwe ñan ñäkä jire ni jändrän jökrä kwetaka yebtä, ñobtä ñan angwane Ngöbökwé ni nibu ye kani ngäbti, aisete ni ye käkwe ja kadre ngäbti kuin arato.

⁴ Ni ruäre këta jändrän jökrä kwete abko sribikä ni Dänkien Jesukwe, çakwa ñobtä mata blite bkänkä kwrere amarebti ni sribikä bkänkä kräke abko rüere mata ñäke ye? Sribikä bkänkä kräke ye abko tä nüne kuin ya, ñakare ya akwa ye tä gare bkänkäye, aisete ni ye käkwe nünandi kuin bkänkä okwäbti, ñobtä ñan angwane ni Dänkien Jesu di kri abko käkwe mikadi kuin.

⁵ Mdakäre abko, nitre israelita këta köbö jadükakrä mike bäri ütiäte köbö mda mdakrä, ye kwrere jire ni ruäre mun ngätäite tä köbö ruäre mike bäri ütiäte köbö mda mda kräke, akwa ni mda abko ie köbö kwatirekwatire tä nebe tuen ja kwrere jökrä. Ne aisete ni itire itire këta töbike ño ye abko dbe raba ruen ie, ne ngwane mika era kwe.

⁶ Ni ruäre abko tö köbö ruäre mikai jenena ütiäte jae, ye abko tä mike ütiäte jae ni Dänkien mikakäre ütiäte jae. Erere arato, ni ruäre këta kuin niere Ngöböye, bti tä jändrän jökrä kwete, ye abko tä kwete Ngöbö mikakäre ütiäte jae. Mdakäre abko, ni ruäre ñan tä ngri kwete, ye abko tä ja üke bän ngri yeye, akwa tä nuene Ngöbökrä, këta kuin niere Ngöböye amne tä mike ütiäte jae arato.

⁷ Ne aisete ni tödekaka Jesubti ñakare jire iti këta nüne au jakrä. Erere arato ni tödekaka Jesubti ñakare jire iti abko tä krüte au jakrä,

⁸ ñobtä ñan angwane nita nüne ye abko nita nüne ni Dänkien kräke. Erere arato, ni krütadre angwane, ni krütadre ni Dänkien kräke, niara mikakäre ütiäte jae, aisete nita nire ya, ni krütadre ya, akwa ni Dänkienta ni bkäne.

⁹ Ni Dänkien rabadre ni bkäne, abkokäre niara krütani, bti nükäninta nire rabakäre ni krütani amne ni nire Dänkiene.

¹⁰ Çkore ne ngwane, se ñobtä ma mden kräke ngri ñakare dbe kwetadre këta ñäke ma mräkä jändrän jökrä kwetaka rüere? Erere arato, çse ñobtä ma jändrän jökrä kwetaka këta ñäke ma mräkäbtä mikakäre ngwarbe töbikäbtä bä jene kore? Mrä ni rabadi jökrä Ngöbö ngwäreki angwane, kukwe ükadite kwe nibe, aisete çse ñobtä mata ñäke ma mräkä rüere kitakäre ngise ye!

¹¹ Kukwe kore ye mdenbtä Ngöbö Kukwei këta niere krörö:

Tita nüne, aisete ti ne ngwäreki ni jökrä rabadi ngukudokwäbti temen ti mikakäre ütiäte jae amne, ti Ngöbö aibe käikitadikä kwetre, niebare ni Dänkienkwe, *Isaiás 45.23*
abko nieta Ngöbö Kukweibtä.

¹² Ye mden kisete, ni itire itire kākwe dre dre nuendi, ye abko nikwe niedi au jōkrä jakrä ni Dänkienye.

¹³ Ye mden kisete, munkwe ñan ñākädre jire jabtä kwärikwäri, akwa nikwe töbikadre kuin ja käne, kākwe ñan kukwe mikadre ni mräkä tödekaka Jesubti ye jiete abtä ja mikadre ngite kwe Ngöbö rüere.

¹⁴ Akwa ni Dänkien Jesu nämane nüne kä nebtä angwane, kukwe diribare kwe abko kukwe era metre gare kuin tie abko krörö: Jändrän jōkrä kwetadre abko ñakare jire käme Ngöbö ngwäreki, aisete munta jändrän jōkrä kwete abko tä töbike era metre tuen tie, akwa ni ruäre abko ie jändrän ruäre ñan tuen dbe kwetadre, ye abko ñakare dbe niarakrä.

¹⁵ Akwa mtare mun abko tä mrö ño ño kwete, ye ñan tuen dbe mun mräkäye, akwa munta kwete janknu okwäbti, abtä jata nebe ruen ngite ie, ye ngwane munta mun mräkä tarere ñakare. Ne aisete munta mrö ño ño kwete, ye köböite munkwe ñan mun mräkätre, kräke Kristo krütani, ye mikata ja mike ngite Ngöbö rüere.

¹⁶ Ne aisete, munkwe ñan kä bian jire chi ñākäkäre blo mrö kuin kwetadre ye rüere,

¹⁷ ñöbtä ñan angwane Ngöböta gobrane nihti amne Ngöbökrä abko jändrän kwetadre amne ñadre abko ñakare ütiäte. Akwa ni jōkrä bti Ngöböta gobrane abko tä nüne era metre jabe kwärikwäri amne tä nüne jame jabe kwärikwäri amne kä tädre bäri nuäre nihti Ngöbö Üai Deme köböire, ye abko ütiäte Ngöbökrä,

¹⁸ ñöbtä ñan angwane nire nire tä nüne kore sribikäre Kristokrä ye käta kä mike nuäre Ngöböbtä amne tä nebe tuen dbe ni mda mda okwäte arato.

¹⁹ Ye aisete, jändrän jōkrä käta ni die mike nüne jame jabe kwärikwäri amne tä ni die mike gwaire jōkrä, ye abko ari käentari bäri ja käne.

²⁰ Angwane makwe ñan sribi Ngöbökke tä mun jōkrä ngätäite jua ngwarbe mrö aibehtä. Akwa kukwe era metre abko nere: mrö jōkrä abko kuin deme amne dbe kwetadre Ngöbökke nebare. Akwa mrö ñan tuen dbe kwetadre ni mräkäye abko nikwe kwetadre okwäbti abtä ja mikadre ngite kwe Ngöbö rüere, ye abra käme.

²¹ Ne aisete nikwe ngri kwetadre amne nikwe uba döi ñadre, köböite ni mräkä kākwe ja mikadre ngite Ngöbö rüere ne ngwane, nikwe ñan ngri kwetadre amne nikwe ñan uba döi kwaka ñadre, ye abko rabadre bäri kuin. Erere arato, jändrän mden mden nikwe nuendre kākwe ni mräkä mikadre ja mike ngite Ngöbö rüere, ye abko nikwe ñan nuendre jire chi mda.

²² Ne aisete dre tuen kuin mae, yehtä abko makwe töbika kaibe jakrä Ngöbö ngwäreki amne ñan kwetamna amne ñan ñamna ni mda mdaye. Ye mdenbtä abko nieta krörö: “Nire nire tä tikaninte, käta kukwe mden mike era, erere tä nuene amne jata nebe ruen ngite ñakare Ngöbö ngwäreki, ni ye abko btä käta nebe nuäre.”

²³ Akwa jändrän ño ño kwetadre amne ñadre ye ñan tä nebe tuen dbe ie, akwa bti ta tä kwete, ye ngwane tä ja mike ngite Ngöbö ngwäreki, ñöbtä ñan angwane jändrän kwetadre abko ñan tä nebe nuke gare metre ie akwa tä nuene, ye ngwane tä ja mike ngite, aisete jändrän jōkrä nuendre, ye abko era metre ya, ñakare ya, akwa nita nuene, ye ngwane nita ja mike ngite.

15

¹ Akwa ni jändrän jōkrä kwetaka abko di tarä kukwe diribare Jesukwe mröbtä mikakäre era täte jōkrä, angwane ni mräkä di braibe käta ngri kwete ñakare, ye abko nikwe kadre ngäbti amne nikwe ñan töbikadre jändrän kuin känkäre kaibe au jakrä ja mikakäre nuäre.

² Ni jōkrä kākwe jändrän kuin nuendre ni mräkä tödekaka Jesubti mda mda kräke, niara moto mikakäre nuäre amne ja die mikakäre kwärikwäri,

³ ñöbtä ñan angwane Kristo ara jire kākwe ñan jändrän kuin känkäre kaibe au jakrä ja mikakäre nuäre, akwa Ngöbö Kukwei namani tikani niarakrä, ye erere namani bare krörö ie:

Ñäkä nämane bätäkä ngwarbe ma rüere Ngöbö, ye abko nikani jōkrä ti kötärä, *Salmos 69.9* abko tä tikani Kristöbtä.

⁴ Kukwe jōkrä tikani kore Ngöbö Kukweibtä, ye abko tikani ni töi tikakrä amne kukwe tikani kira, ye abko btä nikwe nünandrekä dite käre amne tä kä mike nuäre nihti, ye köböire ni rabadre tödeke käreäre Ngöböhti, abkokäre namani tikani kira kore.

⁵ Angwane Ngöbö ni mikaka nünenkä dite käre amne kä mikaka jame ni motöbtä kākwe mun die mika ja töi mike ja näre jōkrä, Kristo Jesu tö ie ye kwrere,

⁶ mun töi rabadre kwatibe jōkrä, kākwe Ngöbö ni Dänkien Jesukristo Rün kwe ye käikitadrekä gwaire jōkrä abkokäre.

⁷ Kristokwe mun itire itire kani ngäbti kuin, ye kwrere munkwe ja ka ngäbti kuin kwärikwäri Ngöbö rabadre käikitankä abkokäre.

⁸ Mdakäre abko, ti tö kukwe krörö nieita munye: Ngöbökwe kukwe ükaninte nitre israelita mräkä känekäne ben, ye mikakäre bare täte Kristo nukani ni klaborer kwre nitre israelitakrä, ye köböire abko Ngöbö tä ja kukwei mike täte abko bä mikani kore kwe.

⁹ Erere arato, nitre ñakare israelitare namani ruentari tare Ngöböye, aiseté Ngöbö käikitadrekä kwetre, abkokäre Kristo nukani Ngöbö Kukwei mike bare. Kukwe yebtä Ngöbö Kukweita tikani krörö:

Tikwe ma käikitadikä nitre ñakare israelitare ngätäite amne tikwe ka niedi ma mikakäre ütiäte. *2 Samuel 22.50; Salmos 18.49*

¹⁰ Angwane tarä mda kanti abko nieta krörö:

Mun ñakare israelitare ye kärke kä ngwian bäri nuäre jabtä juta Ngöbökwé ye ben gwaire. *Deuteronomio 32.43*

¹¹ Amne tarä mdara jire Ngöbö Kukweibtä abko nieta krörö:

Mun ñakare israelitare juta kwatirekwatire te ye kärke ni Dänkien Ngöbö käikitaka gwaire jökrä. *Salmos 117.1*

¹² Erere arato, Isaías kärke kukwe tikani krörö Jesukristobtä:

Isai bkün jatadi iti, ye abko rabadi gobrane nitre ñakare israelitarebti angwane tödekadi kwetre bti, *Isaías 11.10*

abko tikani kore Isaiakwe.

¹³ Angwane Ngöbö tödekakrä nikwe ye kärke kä mika bäri nuäre munbtä amne mun mika nüne jame kwe, munta tödeke bti ye ngwane. Erere arato, Ngöbökwé jändrän kuin nuendre mda munkrä, yebtä munkwe ja töi mika ngibiare bätäre Ngöbö Üai Deme di kri ye köböire.

Sribi Pablokwe nitre ñakare israelitare ngätäite

¹⁴ Ti mräkäre tikwe, mun moto nena kuin krübäte ni mda mdakrä amne, kukwe batakä ngwarbe nena gare kabre munye amne mäträre metre jabtä kwärikwäri ye garera kuin munye abko nena gare tie.

¹⁵ Akwa tita tarä tike, nebtä abko kukwe ruäre ñan käi rikwitadrekä munbti, abkokäre tita tarä ne tike era metre gwäreere munye. Tita tarä tike kore, ñobtä ñan angwane Ngöbökwé ja moto mikani kuin tikrä, kärke ti mikani sribire kore.

¹⁶ Ye aiseté, mtare tita sribire Kristo Jesukrä nitre ñakare israelitare ngätäite. Erere arato, nitre blitaka Ngöböbe ni mda mda diäre käta jändrän kämike, bti tä mike gare Ngöböye, ye kwreere tita sribire nitre ñakare israelitarebe, käta niken Ngöbö kukwei kuin Jesubtä ngwena ietre, abti niaratre tä Ngöbö kukwei kuin ye kaen ngäbti angwane, tita niaratre mike gare Ngöböye amne tä nebe dbe Ngöbö ngwäreki amne Ngöbö Üai Deme käta mike deme jenena Ngöbökrä.

¹⁷ Tita sribi nuene kore Ngöbökrä, yebtä abko ja rabadre ruen ütiäte kri tie Kristo Jesu köböire ruen tie.

¹⁸ Akwa ti abko ie ja nuke töre ñakare blite kukwe mda mda bä jene btä angwane, Kristo ara jire kärke dre dre nuenbare ti köböire amne ñokwe ti mikani nitre ñakare israelitare ngwena tödeke Jesubtä, ye aiebtä ti tö blitai, aiseté namani bare ja kukweibti tie amne nämane bä mikani arato.

¹⁹ Ne aiseté tikwe Ngöbö kukwei kuin Kristobtä diribare, ye abko sribi kri ñan tuabare, bti nämane mikani era metre Ngöbö Üai Deme diebti. Ngöbö kukwei kuin Kristobtä, ye abko tikwe mikani gare kuin täte jökrä niken juta Jerusalente amne juta mda mdate nebe kä Iliriate.

²⁰ Ngöbö kukwei kuin Jesubtä kädrie ngämi, käi kanti käre ti töta nebe rikai Ngöbö kukwei ngwena, ñobtä ñan angwane ni mdakwe sribi kömikaninbte, ye kanti ti ñan tö sribire ni mda jiebti.

²¹ Ne aiseté Ngöbö Kukwei tikani kira rabadre bare, abkokäre tita sribire jirekäre kore. Ngöbö Kukwei ye abko tä niere krörö:

Ni mda mda ñakare israelitare abko ie kukwe nie ñakare niarabtä abko ie rükadi gare.

Angwane ni mda mda ñakare israelitare abko olote blita ñakare niarabtä abko ie niara rükadi gare, *Isaías 52.15*

abko tä tikani Ngöbö Kukweibtä.

²² Ye mden kiseté, nitre ñakare israelitare, ben ti nämane sribire kore kä mda mda kanti, abtä ti ngämi nebeta basare munye. Tikwe ja köböi kitani bare bare niken mun kanti yete, akwa kukwe namani ti jiete.

Pablo tö näin basare juta Romate

²³ Akwa mtare tita sribire, ye kanti tikwe sribibarera ünän jökrä angwane, ti tö namani rikai basare munye yete, ye abko käi nikanina kabre ta,

²⁴ aisete ti näin España, ye ngwane ti tö rikai nebe basare jire mun kanti yete. Ti rabadi hä jötrö mun kanti Roma yete akwa, kä rabadi nuäre tibtä mun tuare. Yebti munkwe ti die mikadre abko bti ti näin, ruen tie.

²⁵ Akwa gwängwarbe abko ja mräkätre nete käkwe jändrän biani ja mräkätre tödekaka Jesubti Jerusalénbo kräke abko ti bike niken bien ietre, aisete ti bike nikenta käne Jerusalén, ²⁶ ñobtä ñan angwane ja töi jenbti ja mräkätre Macedoniabo, Acayabo käkwe ngwian ükaninkrö juandre ni bobre bobre ja mräkätre tödekaka Jesubti Jerusalénbo ngätäite kräke.

²⁷ Niaratrekwe ngwian ükaninkrö ja töi jenbti ja mräkätre Jerusalénbo kräke, akwa era metre niaratre rabadre jändrän ye nuene nierare, ñobtä ñan angwane nitre ñakare israelitare, ben nitre israelita käkwe jändrän jökrä kuin Ngöbökwé nigrä dräibare jabti niaratre die mikakäre, ye kwrere arato nitre ñakare israelitare käkwe nitre israelita tödekaka Jesubti die mikadre arato jändrän jakwebti ruen tie.

²⁸ Ne aisete ti näin Jerusalén, käkwe ngwian biandi ünän jökrä ja mräkätreye, yebti ti näin España mda angwane, ti näin basare jire mun kanti yete.

²⁹ Akwa ti rabadi yete angwane, jändrän kuin Kristokwe, yebti nikwe ja die mikadi kwärükwäri ye abko gare kuin tie.

³⁰ Ti mräkätre, ni Dänkien Jesukristo köböire amne Ngöbö Üai ni mikaka ja tarere kwärükwäri, ye köböire munkwe ja geta gwaire tibe sribi tare krübäte tikrä nebtä amne munkwe blita tikrä Ngöböbe.

³¹ Angwane nitre israelitare käta tödeke ñakare Jesubti tä nüne Judea, ne ngäniene Ngöbökwé ti ngibiadre abko munkwe ribe ie tikrä. Erere arato, ti näin ngwian ngwena ja mräkätre Jerusalénbo kräke, ye abko niaratrekwe kadre ngäbti kuin abko munkwe ribe Ngöböye arato.

³² Yebti Ngöbö tö ne ngwane, kä rabadi nuäre kri tibtä rikare ja tuen munbe amne tikwe jadükadre basare kwärä munye yete.

³³ Ngöbö kä jäme bianka nie, ye raba mun jökrä ben. Abko kore se. Amen.

16

Pablota köbö kuin juen mrä

¹ Mrä abko, ti mräkä merire Febe bike niken mun kanti. Niara abko nitre tödekaka Jesubti die mikaka abko tä nüne juta Cencreate. Ye mden bike niken mun kanti.

² Ne aisete ni Dänkien köböire ni tödekaka Jesubti tä ja kaen ngäbti, ye kwrere munkwe niara ka ngäbti angwane, kukwe mda mda kwe, btä munkwe die mika, ñobtä ñan angwane niarata ni kwati die mike amne ti ara jire die mikata krübäte kwe abti kä nüke mtare arato, aisete munkwe die mika.

³ Amne Priscila btä brare kwe Aquila abko sribi muko tikwe Kristo Jesukrä, ye kräke tita köbö kuin juen abko munkwe nie ietre.

⁴ Niaratre nibu ye abko bäsi krütani ti dantarikäre. Yebtä abko ñan ti aibe tä kuin niere ietre, akwa ni mräkä jökrä ñakare israelitare käta tödeke Kristo Jesubti kä ketareketare temen käta kuin niere Ngöböye btäre siba.

⁵ Mdakäre abko, nitre tödekaka Jesubti tä ja ükekrö Priscila amne Aquila gwiriete, ye kräke tita köbö kuin juen abko munkwe nie ietre.

Erere arato, ti kukwe muko tare kri tikwe Epeneto, kräke tita köbö kuin juen, munkwe nie ie. Niara ye abko käkwe tödekani bäri käne Kristobti provincia Asiate.

⁶ Amne María käkwe sribibare kri munkrä, ye kräke tita köbö kuin juen arato, munkwe nie ie.

⁷ Erere arato, ti mräkätre israelita Andrónico amne Junias nämane ngite gwaire tibe kä teri amne, niaratre ütiäte kri nitre Jesu kukwei ngwianka ngätäite amne niaratre käkwe tödekani bäri käne Kristobti ti ngwä. Niaratre ye kräke tita köbö kuin juen arato, munkwe nie ietre.

⁸ Amne Amplias ti kukwe muko tare tikwe ni Dänkien köböire, ye kräke tita köbö kuin juen arato, munkwe nie ie.

⁹ Erere arato, Urbano sribi muko munkwe Kristokrä ye kräke tita köbö kuin juen, amne Estaquis tare tikwe, ye kräke tita köbö kuin juen, munkwe nie ietre.

¹⁰ Mdakäre abko, Apeles käta tödeke kwatibe Kristobti, ye abko hä mikani kwe ja tare nikabtä, niara ye kräke tita köbö kuin juen arato, munkwe nie ie. Erere arato tita köbö kuin juen Aristóbulo mräkäkrä, munkwe nie ietre.

¹¹ Amne ti mräkä israelita nünanka ti käite Herodiön, kräke tita köbö kuin juen, munkwe nie ie. Erere arato, Narciso mräkä käta ni Dänkien mike era, kräke tita köbö kuin juen, munkwe nie ietre.

¹² Mdakäre abko, Trifena amne Trifosa këta sribire ni Dänkien kräke, niaratre ye kräke tita köbö kuin juen, munkwe nie ietre. Erere arato, Pérsida tare nikwe ye këta sribire kri ni Dänkien kräke, niara ye kräke tita köbö kuin juen arato, munkwe nie ie.

¹³ Amne Rufo tä Ngöbö kukwei mike era abtä ütiäte kri Ngöbö ngwäre kri abko kräke tita köbö kuin juen, munkwe nie ie. Erere arato, Rufo meye namani ti meye kwrere tikrä abko kräke tita köbö kuin juen arato, munkwe nie ie.

¹⁴ Mdakäre abko, tita köbö kuin juen Asíncrito kräke amne Flegonte kräke, erere arato tita köbö kuin juen Hermas kräke, Patrobas kräke amne Hermes kräke amne ja mräkätre mda mda tödekaka Jesubti tä ja gete bentre, kräke tita köbö kuin juen, munkwe nie ietre.

¹⁵ Erere arato, tita köbö kuin juen Filólogo kräke, Julia kräke amne Nereo kräke, erere arato Nereo ngwai merire, kräke tita köbö kuin juen, munkwe nie ietre. Amne Olimpás kräke tita köbö kuin juen amne ja mräkätre tödekaka Jesubti tä bentre yete, ye kräke tita köbö kuin juen jökrä, ye abko munkwe nie kore ietre.

¹⁶ Akwa mun abko kákwe ja demain era metre kwärikwäri Ngöbö kábti abko tita niere munye. Ja mräkätre jökrä tä gätäre Kristo kábti nere temen tä köbö kuin juen mun jökrä kräke.

¹⁷ Ti mräkätre, mräkäre abko kukwe mda ti tö niei munye abko krörö: Ngöbö kukwei kuin Jesubtä diribare munye abko munkwe kani ngäbti, kukwe ye rüere ni mda mda jatai dirire bä jene mun mikakäre rüre jabe kwärikwäri amne mun mikakäre Kristo gibiekäta. Ni ye kwrere ngäniene munkwe nikra kuin ja käne amne munkwe ñan ja geta jire chi bentre,

¹⁸ ñobtä ñan angwane niaratre ñan tä sribire ni Dänkien Kristokrä akwa, tä sribire au jakrä, këta ñäke nuäre dirikäre, ye këta nitre mokrere ñakare jabti ngökö, aisete munkwe mokre jabti.

¹⁹ Amne mun jökrä këta dirikätre munye mike täte, ye abko bäri käi nuäre tibtä, akwa yebtä munkwe ñan dirikätre blo mikadre täte arato, akwa mun rabadre töbtä jändrän kuinquin nuenkäre, ie ti tö, akwa kukwe kämekäme ñan rükadre gare munye, abkokäre munkwe ñan ja kitadre btä, ie ti tö.

²⁰ Ye abko munkwe nuendre kuin kore, ye ngwane Ngöbö kä jäme bianka nie, ye kákwe Satana mikadi tükarekä jötrö ngwarbe ja ngoto täni munye. Erere arato, ni Dänkien Jesu kákwe ja moto mika kuin mun jökrä kräke.

²¹ Mdakäre abko, sribi muko tikwe Timoteo këta köbö kuin juen mun kräke. Erere arato, Lucio, Jasón amne Sosípater ti mräkätre israelita këta köbö kuin juen mun jökrä kräke.

²² Amne ti kä Tercio, ti ne abko Pablokwe mikani tarä ne tikaka jakrä juandre munye, ti ne këta köbö kuin juen mun kräke ni Dänkien kábti arato.

²³ Amne Gayo këta kä bien nitre tödekaka Jesubtiye ja gwiriete, ye erere tita mtare Gayo gwiriete nete, Gayo ye këta köbö kuin juen mun kräke. Erere arato, Erasto ngwian ngibiabtikä juta Corinto nete këta köbö kuin juen mun jökrä kräke amne, ni mräkä Cuarto këta köbö kuin juen mun jökrä kräke arato.

²⁴ [Amne ni Dänkien Jesukristo kákwe ja moto mika kuin mun jökrä kräke. Amen.]*

²⁵ Ngöbö kukwei kuin Jesukristobtä tita näin mike gare, ye köböire Ngöbökwé mun mika nünenkä dite abko ie ti tö, aisete ari Ngöbö käikitekä, ñobtä ñan angwane kukwe ye nämane kaibe tiebe Ngöbökwé, akwa niara tö namani mikai gare nie. Ngöbö ngämi kä ne dätere, känenkri kukwe ye mikanintbe kwe, btü ükani kaibe tiebe kwe,

²⁶ akwa nitre Ngöbö kukwei niekä kákwe tarä tikani abko köböire Ngöbö nena mike gare nie, ye abko Ngöbö nünanka kärekäre kákwe mikanintbe kore, erere namani bare. Ne aisete mtare nitre ñakare israelitare kä jökräbti temen, ie Ngöbökwé kukwe tiebe ye mikani gare kuin amne niaratre kákwe Ngöbö kukwei mikadre era, kákwe tödekadre Jesubti amne mikadre täte kwetre, abkokäre mikani gare ietre.

²⁷ Ne aisete, Ngöbö itibe töbtä ye aibe raba mikani ütiäte kri kärekäre Jesukristo köböire. Abko kore se. Amen. Ne ngörä.

* 16:24 Kukweta tikani corcheta ngätäite ñan tä tikani manuscrito bäri kuinquinbtä.

Tärä Tikani Käne Pablokwe Nitre Corintobokrä 1 Corintios

Pablo nämane sribire juta Efesote angwane, niarakwe tärä ne tikani nitre tödekaka Jesubti nünanka juta Corintote ye kräke. Pablo näire juta Corinto ye abko juta bäri ütiäte kākā Grecia ye kānti. Ni mili 650 nämane nüne yete amne nitre ye ngätäite abko ni mili 400 abko ni klabore ni mdakwe. Pablo ara kākwe kukwe kuin Jesubtä diribare käne juto Corinto yete abko tä tikani Hechos 18.1-21 yebtä.

Pablokwe tärä ne tikani, ñobtä ñan angwane ni iti kädian nämane Cloé abko mräkä nükani basare Pabloye juta Efesote angwane, nitre tödekaka Jesubti nämane ja kwete krübäte Corinto yete amne ni kwati nämane kukwe nuene diän diän abko niebare kwe Pabloye. Erere arato, nitre tödekaka Jesubti Corinto yete kākwe tärä juani Pabloye angwane, kukwe ngwianintari kwetre ie, ye abko Pablo tö namani kukwe ye kain ngäbti, aisetä tärä ne tikani kwe nitre tödekaka Jesubti nünanka Corinto töi diänkäre amne die mikakäre.

Kukwe kwati abko, juta Corinto yete ni kwati nämane ngöbö ngwarbe mike ütiäte jae. Nitre tödekaka Jesubti ngämi tödeke Jesubti, känenkri niaratre nämane ngöbö ngwarbe keta kabre mike ütiäte jae, kã nämane jändrän kãmikani ngöbö ngwarbeye abko ngrie kwete ni mda mdabe, ngöbö ngwarbe ye mikakäre ütiäte jae. Kukwe yebtä Pablota blite tärä nebtä.

Erere arato, ju blitakrä ngöbö ngwarbebe, ye kānti meri bti kã ngwarbe nämane abko ben nitre brare nämane neme. Ni brare brare kākwe tödekani Jesubti angwane, dre dre nuendre kwetre ñan nämane gare ie, aisetä ni gure gure kākwe nünandre ño amne ni gure ñakare kākwe nünandre ño, yebtä Pablota blite tärä nebtä arato.

Mdakäre abko, ni ruäre nükani gätäre nitre tödekaka Jesubtibe juta Corintote, kã nämane kukwe dirire blo Ngöböbtä abkobtä Pablokwe kukwe tikani arato.

Pablota köbö kuin juen

¹⁻² Ti Pablo kätä köbö kuin juen munye ti mräkä Sóstenebe. Ngöbö tö namani ti mikai sribire Kristo Jesu kukwei ngwianka, erere ti kārābare kwe. Ngöböta mun gätäkä Jesukristo kãbti juta Corintote ye bkāne amne mun ye ie tita tärä ne tike. Kristo Jesu köböire Ngöbökwete mun kārābare jakrä nünakäre deme. Ni kã jökrãbti kätä tödeke ni Dänkien Jesukristobti, kätä ja di kärere ie, ye ben gwaire Ngöbökwete mun kārābare jakrä. Jesukristo abko ni Dänkien nikwe amne niaratre Dänkien arato.

³ Ngöbö ni Rün nikwe amne ni Dänkien Jesukristo kākwe ja moto mika kuin munkrä amne mun mika nüne jame kwetre, ie ti tö.

Pablota kuin niere Ngöböye kräke

⁴ Ja mräkätäre, käre tita kuin niere Ngöböye munkrä, ñobtä ñan angwane Ngöbökwete ja moto mikani kuin munkrä Kristo Jesu köböire.

⁵ Ngöbökwete mun mikani ja di bkāne bätäkä ngwarbe krörö ja moto kuinbti: ja di biani kwe munye angwane, ütiä kārābare ñakare kwe munye, kākwe mun mikani dite blitakäre bätäkä ngwarbe niara kukweibtä amne mun mikani töbtä kukwe bätäkä ngwarbebtä kwe.

⁶ Ngöbökwete ja di biani kri kore munye, ñobtä ñan angwane kukwe kuin Kristobtä diribare tikwe, ye rabadre era mun kräke, ie Ngöbö tö namani, aisetä ja di biani kri kore kwe munye.

⁷ Ngöbökwete ja di biani kore munye, aisetä munta ni Dänkien Jesukristo köböi ngibiare ngäbti angwane, munta Ngöbö die mdei nike ñakare mda.

⁸ Jesukristo jatadita, ye näire mun ñan rabadre ngite niara ngwäreki, abkokäre Ngöbökwete mun mikadi nünenkä dite jabtä niara ngibiare ngäbti.

⁹ Ngöböta kukwe niere, erere tä mike täte metre jökrä. Ngöbö ye mden kākwe mun kārābare nüne kuin ketetibe ja Odei Jesukristo ni Dänkienbe.

Ñan rüdre jabe kwärikwäri

¹⁰ Ti mräkätäre, ni Dänkien Jesukristo kãbti ti tö kukwe ne ribei kisere munye abko nere: Kukwe jökrä rükabti ruäre mun jökräye, munkwe ñan ja diandrekä jenena amne munkwe nünandre jame jabe kwärikwäri abkokäre. Erere arato, munkwe töbikadre ja kwrere jökrä amne ja rabadre ruen ja kwrere jökrä munye, kākwe ja töi mikadre ja näre jökrä, abkokäre kukwe jökrä rükabti ruäre mun jökräye.

¹¹ Ti mräkätäre tikwe, munta ja rüere kwärikwäri abko Cloé mräkä rükaba kukwe ngwena tie, ye mdenbtä tita kukwe ne niere munye.

¹² Munta ja rüere krörö tita niere: mun ruäre kätä niere: ¡A! Tita nekete Pablokri. Mun ruäre abko kätä niere: Tita nekete Apolokri, amne mun ruäre abko tä niere: Tita nekete Pedrokri, amne mun ruäre abko kätä niere: Tita neke Kristokri. Abtä munta ja rüere, nieba kwetre tie.

¹³ Yebtä abko ti tö kukwe ngwiaintari munye. Munta ja denkä jene jene ni mdakri, ¿ye kwrere Kristota ya? ¡Ñakare! ¿Ti Pablo ne metani krusobtä mun kräke ya? ¡Ñakare! ¿Mun ngökani ñöte ti Pablo ne käbti ya? ¡Ñakare jire! Ne aisetse ti ñakare ütiäte abkokri munta ja denkä jene jene.

¹⁴ Tikwe Crispo amne Gayo aibe ngökaba ñöte, nebti mun mda mda tikwe ngökaba ñakare ñöte. Yebtä tita kuin niere Ngöböye,

¹⁵ ñöbtä ñan angwane ye kwrere mun ngökani ñöte ti käbti mun ñan rabadre niere jire chi bikakäre kri.

¹⁶ ¡An! Tikwe Estéfanos mräkä aibe ngökaba ñöte arato, yebti tikwe ni mda mda ngökaba ñakare ñöte ruen tie.

¹⁷ Tikwe ni mda mda ngökaba ñakare ñöte, ñöbtä ñan angwane Kristokwe ñan ti juani ni mda mda ngökakäre ñöte, akwa bäri ti juani kukwe kuin jabtä niere kwe. Erere arato, ñan ti juani kwe kukwe kuin Jesubtä niere nuäre nuäre bikakäre töbtä, ñöbtä ñan angwane tikwe blitadre kore angwane, Kristo krütani krusobtä nikrä dirita tikwe abko kukwe di kri ni diantarikrä abko tikwe bä mikadre ütiäte ñakare mun okwäte aisetse, ye ngäniene tikwe ñan blitaba kore.

Kukwe töbtä Ngöbökwé ñakare ja kwrere kukwe töbtä ni kä nebtäkwe

¹⁸ Nire nire tä nüne Ngöbö rüere, abtä tä nianinte abko kräke Jesu krütani krusobtä diantarikäre, ye abko tä nebe tuen kukwe ngwarbe kwrere ietre; akwa nire nire rabai dianintari abko kräke Jesu krütani krusobtä ni diantarikäre, ye abko kräke kukwe kuin, ñöbtä ñan angwane kukwe ye abko Ngöbö di kri ni diantarikrä abko garera nie.

¹⁹ Ngöbö Kukwei arato käta niere ja kwrere abko krörö:

Nitre töbtä abko tikwe töi juandi ngwarbe jökrä, amne nitre töi ngitiekä krikri ñan rabadi töi ngitiekä mda, aisetse ni töbtä kri riadikä jökrä, *Isaiás 29.14*
abko Ngöbö Kukwei tä niere nitre bikaka töbtä yebtä.

²⁰ Kore ye ngwane, ¿ni töbtä era metre tärä ya? amne, ¿Kukwe Biani Ngöbökwé Moiséye dirikätre era metre tärä ya? amne, ¿ni töbtä era metre ja kwetaka kukwe kä nebtä bti abko tärä ya? ¡Ñakare jire! Kukwe dirita ni yekwe bä töbtä, akwa era metre kukwe ye abko kukwe ngwarbe abko Ngöbökwé mikani gare,

²¹ ñöbtä ñan angwane ni bikaka töbtä töbtä, ie Ngöbö ñan nükani gare rabakäre dianintari ja töi jenbti. Ye abko, Ngöbö bäri töbtä era metre tö namani dre dre nuein abko erere kukwe mikanintbe kwe. Akwa kukwe kuin Jesubtä diribare nunkwe abko tä nebe tuen kukwe töbtä ñakare kwrere ni bikaka töbtä töbtäye, akwa kukwe yebti nire nire tä tödeke Jesubti abko tä nebe dianintari.

²² Nitre israelita töta nebe sribi kri ñan tuabare tuai Ngöbö diebti amne nitre ñakare israelitare abko tä näin kukwe töbtä töbtä jiebti.

²³ Akwa Kristo müre ketani krusobtä ni diantarikäre, ye abko nunta näin mike gare ni jökräye. Akwa ye tä nebe mate tare nitre israelitabtä amne nitre ñakare israelitare abko ie tä nebe tuen kukwe ngwarbe kwrere.

²⁴ Akwa Kristo müre ketani krusobtä ye köböire Ngöböta ja di kri amne ja töi töbtä kri ye mike tuare, ye abko tä gare metre nitre israelita amne nitre ñakare israelitare käräbare Ngöbökwé rabakäre dianintari yeye.

²⁵ Kukwe kuin Ngöbökwé Jesubtä tä nebe tuen kukwe töbtä ñakare kwrere ni bikaka töbtäye, akwa kukwe kuin Jesubtä ye abko bäri töbtä kukwe jökrä ükaninte kä nebtä bti ta. Erere arato, kukwe kuin Ngöbökwé Jesubtä tä nebe tuen ngwarbe, di ñakare nitre bikaka töbtäye, akwa kukwe ye abko bäri dite ni jökrä dite dite kä nebtä bti ta.

²⁶ Ti mräkätre, Ngöbökwé mun käräbare jakrä angwane, mun nämane ño, yebtä töbikadre munkwe, ñöbtä ñan angwane ni töbtä kä nebtä, ye kwrere mun kwati ñakare töbtä kri. Erere arato, mun kwati ñakare di krikri gobran kwrere. Erere arato, mun kwati ñan därebare ni ütiäte krikri mräkäkri.

²⁷ Akwa Ngöbökwé ni töi ñakare mun kwrere dianinkä jakrä ni töbtä bä mikakäre ngwarbe. Erere arato, ni di ñakare kä nebtä mun kwrere abko Ngöbökwé dianinkä jakrä, ni dite krikri bä mikakäre ngwarbe.

²⁸ Erere arato, ni tuen ngwarbe, ütiäte ñakare jire mun kwrere abko Ngöbökwé dianinkä jakrä, ni ütiäte ütiäte kä nebtä mikakäre ngwarbe.

²⁹ Ne kwrere ni ñakare jire iti, abko ie ja rabadre ruen ütiäte abtä Ngöbökwé mikadre metre ja ngwärecri, abkokäre Ngöbökwé ni mun kwrere dianinkä jakrä.

³⁰ Akwa Ngöbö ara jire käkwe mun mikani ketetibe Kristo Jesube amne Ngöbö ara käkwe Kristo mikani kukwe töbtäre nikrä abko krörö: Kristo köböire ni ñakare ngite mda ja ngwärecri Ngöböta niere nibtä amne Ngöböta ni kaen ngäbti amne nita tuen deme niara ngwärecri amne tä ni tikete kukwe kämenbtä arato.

³¹ Ne aisetse, Ngöbö Kukwei käta niere, kwrere nikwe töbikadre abko krörö:

Nire nire tö ja käikitakä au käkwe ni Dänkien Ngöbö käikitaka jirekabe,
ye abko tä tikani kore Ngöbö Kukweibtä.

Jeremias 9.24

2

¹ Ti mräkatre, Ngöbö kukwei kuin Jesukristobtä, yebtä ti janama blite munbe angwane, ñan tikwe blitaba kukwe töbtä töbtäbti amne ñan tikwe blitaba kukwe nuäre nuärebti ni töbtä kwrere ja mikakäre ütiäte mun okwäte,

² ñobtä ñan angwane ti nämä mun ngätäite yete angwane, Jesukristo müre ketani krusobtä ni diantarikäre, ye aibebtä tikwe ja töi mikani blitakäre munbe.

³ Akwa ti nämä mun ngwärecri yete angwane, ti di rababa ñakare amne, kä jürä rababa kri tibtä amne ti rababa grükekä jökrä ngrabare.

⁴⁻⁵ Akwa munkwe tödekadre Jesubti Ngöbö Üai di kri köböire amne ñan munkwe tödekadre kukwe töbtä töbtä nuäre nuäre ni töbtäkwe yebti, abkokäre kukwe kuin Jesubtä, yebtä tikwe blitaba munbe. Angwane ñan kukwe töbtä töbtä nuäre nuäre, bti tikwe blitaba munbe mun töi kwitakäre Ngöbö kukwäre, akwa Ngöbö Üai di kri ara jire bti tikwe kukwe kuin Jesubtä mikaba gare metre mun okwäte.

Kukwe töbtä Ngöbökwä tä nuke gare Ngöbö Üai köböire

⁶ Akwa ni tödekaka Jesubti ünän ünän Ngöbö Kukweibtä ne ben nita kukwe töbtä era metre mike gare, akwa kukwe ye abko ñan kukwe töbtä kä nebtä kwrere. Erere arato, ñan kukwe mikani ütiäte ni ütiäte ütiäte kä nebtäkwe, btä tita blite. Ni ye abko kitera niken ta.

⁷ Akwa kukwe kuin töbtä Jesukristobtä mikani gare nunkwe abko nämä ükani kaibe tiebe Ngöbökwä, akwa mtare mikanina gare kwe nie. Ngöbö ngämi kä ne dätere, känenkri niarakwe kukwe ye mikanintbe ni tödekaka Jesubti mikakäre ütiäte kri jabe gwaire.

⁸ Kukwe ne mden abko nitre gobranka kä ne ngwane, ie ñan nükani gare, ñobtä ñan angwane rükadre gare ietre, ye ngwane ni Dänkien bä nuäre kri ñan müre ketadre kwetere krusobtä.

⁹ Yebtä Ngöbö Kukwei käta niere krörö:

Jändrän ñan tuabare ni mdakwe amne, ñan kukwe nuabare ni mdakwe amne, ñan töbikabare btä ni mdakwe,

ye abko Ngöböta ükete ni niara tarekä tarekä kräke,
abko nieta Ngöbö Kukweibtä.

Isaias 64.4

¹⁰ Ni Ngöbö tarekä tarekä, ie Ngöbökwä jändrän ye mikani gare ja Üai köböire, ñobtä ñan angwane kukwe kaibe tiebe Ngöbökwä abko tä gare jökrä Ngöbö Üaiye, aisetse Ngöbö Üai käkwe jändrän Ngöbökwä mikani gare nie.

¹¹ Ye abko, nita töbike ño kaibe, ye gare kaibe nie, akwa ni mdaye gare ñakare. Ye kwrere arato, Ngöbö töi ño, ye gare kaibe Ngöbö Üai aibe ie, aisetse Ngöbö Üaikwe kukwe tiebe Ngöbökwä mikani gare nie.

¹² Akwa Ngöbökwä ja Üai biani nie angwane, ñan biani kwe kukwe kä nebtä mikakäre gare nie, akwa ja moto kuinbti Ngöbökwä jändrän kuin biani nie, ye abko rükadre gare nie, abkokäre Ngöbökwä ja Üai biani nie.

¹³ Amne jändrän kuin biani nie Ngöbökwä, yebtä nunta blite. Ne ñan kukwe ükaninte ni töbtäkwe, btä nunkwe ja töitikani au, bti nunta blite jändrän Ngöbökwäbtä, akwa Ngöbö Üai tä dre niere, ye erere nunta mike gare Ngöbö Üai köböire.

¹⁴ Ye abko, nire nire btä Ngöbö Üai ñan tä nüne abko ñan tä kukwe diribare Ngöbö Üaikwe kaen ngäbti, ñobtä ñan angwane kukwe töbtä ñakare kwrere tuen ietre. Erere arato, kukwe diribare Ngöbö Üaikwe ñan tä nuke gare ietre, ñobtä ñan angwane kukwe ye abko tä nuke gare Ngöbö Üai aibe köböire nie.

¹⁵ Akwa ni btä Ngöbö Üaita abko ie jändrän kabrebtä tä nuke gare, aisetse ni ye abko di tarä töi ngitiekä jändrän kabrebtä akwa, nire nire abko btä Ngöbö Üaita ñakare abko di ñakare kukwe niere jire ni jen Ngöbökwä rüere,

¹⁶ ñobtä ñan angwane

Ni Dänkien Ngöbö töi ño gare ñakare nie, aisetse ni di ñakare niara töitikakrä,
abko Ngöbö Kukwei käta niere.

Isaias 40.13

Akwa Ngöbö Üaita nüne ni nitre tödekaka Jesubti btä, aisetse Kristo töi ño abko tä nuke gare nie.

3

Pablota mäträre nitre Corintobtä

¹ Ti mräkätre, tikwe blitaba munbe angwane, ni ünän ünän Ngöbö Kukweibtä tä kä bien Ngöbö Üaiye ja jie ngwianka, ben blitadre ño, ye kwrere tikwe blitaba ñakare munbe. Akwa ni tä kä bien ñakare Ngöbö Üaiye ja jie ngwianka metre, ben blita ño, kwrere jire tikwe blitaba Kristobtä munbe. Erere arato, ngäbäkcre kiakia ben blita ño, kwrere jire tikwe blitaba Kristobtä munbe.

² Ngäbäkcre kiakia tä kian aibe duen amne ñan raba mrö ribi ribi kwete, ye kwrere jire kukwe taretare Kristobtä, yebtä ñan tikwe blitaba munbe amne kukwe nuäre nuäre, btä tikwe blitaba munbe, ñobtä ñan angwane kukwe taretare ni ünän ünän Ngöbö Kukweibtä kräke, btä tikwe blitadre munbe abko ñan rükadre gare munye rababa tuen tie. Ye kwrere mtare kukwe taretare, btä ti ñan raba blite munbe,

³ ñobtä ñan angwane munta kä bien ñakare Ngöbö Üaiye ja jie ngwiankrä abko erere mun tä nüne mtare. Ye mden kisete, mun tä mokrere amne mun tä ja rüere jabe kwärikwäri, ye abko çmunta kä bien ñakare Ngöbö Üaiye ja jie ngwiankrä ya ño yere? Ni mda mda, ie Ngöbö gare ñakare tä töbice, kwrere jire mun tä töbice.

⁴ Ne aisete mun tä nwere krörö: Tita nekete Pablokri, nieta ni ruärekwete. Ni mda abko käta niere: Tita nekete Apolokri, abko kore mun tä ja kwete kore kwärikwäri ne ngwane, ni mda mda, ie Ngöbö gare ñakare tä töbice, kwrere jire mun tä töbice.

⁵ ¿Akwa yehti abko Apolos abko ütiäte ya? ¿Amne ti Pablo abko ütiäte ya? ¡Ñakare! ñobtä ñan angwane nun abko sribikä jirekäbe Ngöbökwete. Nun ne mden käkwe kukwe diribare munye, köböire munkwe tödekani Jesubti amne, nun Dänkienkwe sribi ño ño mikani Nun itire itire kisete, ye aibe nunta nuene krörö:

⁶ Mun abko tire Ngöbökwete kwrere. Tikwe Ngöbö Kukwei nieba munye, ye abko nura nökata kwrere namani munbtä amne, Apolos abko ño metakaka nurabti kwrere nukani kukwe dirire munye. Akwa Ngöbö ara jire abko käkwe ja kukwe mikani niren munbtä.

⁷ Ne aisete ni nura nökata amne ni ño metakaka nurabti abko sribikä ja kwrere. Akwa Ngöbö abko käta nura mike niren, aisete Ngöbö aibe ütiäte.

⁸ Ni nura nökata amne ni ño metakaka nurabti abko sribi ketetibe kwetre, akwa ni itire itire käta sribire ño, ye erere Ngöbökwete ütiä biandi jene jene nie.

⁹ Ne aisete, nun abko sribikä jen Ngöbökwete amne nunta sribire munbe, akwa mun abko tire Ngöbökwete, aisete munkwe ñan nun mika ütiäte amne mun ñan reketa nunkri.

Erere arato, mun abko ju Ngöbökwete amne,

¹⁰ ti abko ni töbtä ju mikabtä kwrere. Ja moto kuinbti Ngöbökwete ja di biani tie. Di yehti ürä kä te ruäre, ye tikwe mikani käne ju mikakrä, erere tikwe ju kömikani kore. Ju kömikani tikwe, ürä yehti ni mda mda tä ju mike janknu mda. Akwa ni itire itire käta ju mike ño, ye käkwe sribidre era metre,

¹¹ ñobtä ñan angwane ürä kratu nökanina tikwe kä te ruäre ju mikakrä ye abko Jesukristo ara. Yehti ni ñan raba ürä mda nökö jire.

¹² Ürä mikanina jukrä, yehti ni rabadre oro, plata, amne jä ütiäte ütiäte mike jure, ye abko nita kukwe dirire metre Jesukristobtä kwrere. Erere arato, kri kukwän, mikä amne trärä ni raba mike jure arato, ürä nökanina yehti, ye abko kukwe bä töbtä aibe dirita ni mda mdakwe mun ngätäite ye kwrere.

¹³ Akwa Ngöbökwete kukwe ükadite ni jökrä kräke kä mrä, ye näire abko nikwe sribibare ño abko gadi era metre jökrä, ñobtä ñan angwane Ngöbö jatadi ñukwä kwrere angwane, ni itire itire käkwe sribibare kuin ya, ñakare ya abko rabadi gare Ngöbö diebti,

¹⁴ aisete ni itire itire käkwe jändrän mikani jure ñan rukwadre ne ngwane, Ngöbökwete ütiä biandi ie.

¹⁵ Akwa kukwe diribare blo, käkwe jändrän blo blo mikani jure ye rukwadre ne ngwane, sribi kwe rikadi ngwarbe kän. Angwane ni iti käta ngitie ñukwä ngäniene, käta kwäräbere, ye kwrere kwäräbedi kwe amne rabadi dianintari, akwa sribi kwe abko rukwadi kän.

¹⁶ ¡Akwa mun abko ju Ngöbökwete amne Ngöbö Üaita nüne munbtä, ye gare ñakare munye ya ño amarehti ye!

¹⁷ Ne aisete nirekwe mun mikadre ja denkä jene jene abko erere ju Ngöbökwete ye juandre ngwarbe kwe Ngöbököän, ni ye abko Ngöbökwete juandi ngwarbe arato, ñobtä ñan angwane ju Ngöbökwete abko deme amne ütiäte kräke amne mun abko ju Ngöbökwete ye ara.

¹⁸ Munkwe ñan ja ngöka krörö au: Mun mden mden, ie ja ruen töbtä kukwe kä nebtäbti käkwe ja töi kwita amne munkwe ja mikata ni töbtä ñakare kwrere angwane, mun rabadi töbtä era metre Ngöbö ngwärekwete.

¹⁹ Munkwe nuendre kore, ñobtä ñan angwane kukwe tuen töbtä nitre kä nebtäye, ye tuen töbtä kri munye, akwa kukwe ye abko töbtä ñakare Ngöbökrä. Ye aisete Ngöbö Kukwei btä nieta krörö: Nitre tä bike töbtä käta kukwe ükete bätäkä ngwarbe, kukwe ye arabe Ngöböta kiteta niaratre dokwäbtä mikakäre ngite.

²⁰ Erere arato nieta: Kukwe tuen bäri töbtä ni kä nebtäye, abkobtä ni töbtä töbtä tä töbike, ye abko kukwe ngwarbe, ütiäte ñakare gare kuin ni Dänkienye, nieta Ngöbö Kukweibtä.

²¹ Ye mden kisete, munta nire nire mike ütiäte jae, yebtä munkwe ñan bikadre kri, ñobtä ñan angwane mun tarä jändrän jökrä bkäne amne jändrän jökrä abko munkrä abko krörö:

²² Ti Pablo amne Apolos amne Pedro, nun abko Ngöböke biani munye sribikäre mun die mikakrä, aisete nun abko munkwe. Erere arato, kä temen, te munta nüne abko mun die mikakrä amne, munta nüne angwane jändrän jökrä ye abko munkwe amne, mun krütadre angwane, mun tädi jändrän jökrä bkäne janknu. Mdakäre abko, dre dre tä nakenkä mtare amne dre dre rakadrekä köbö mdabti ye abko mun die mikakrä arato.

²³ Ye kwrere jändrän jökrä abko munkwe amne mun abko Kristokwe amne Kristo abko Ngöböke.

4

Nitre Jesu kukwei ngwianka

¹ Ye abko, nun Jesu kukwei ngwianka abko sribikä jirekäbe Kristokrä amne, kukwe nämane kaibe tiebe Ngöböke Kristobtä, ye abko Ngöböke mikani nun kisete dirikäre ni mda mdaye, aisete nun abko sribi ye nuenkä munkwe nütü kore nunbtä.

² Akwa jändrän mikata ni kisete sribikäre kore angwane, ni yebti bkänkäta tödeke abko bä mikadre kwe jabtä.

³ Akwa munkwe töbikadre ño tibtä amne sribi tikwebtä amne, ni mdakwe töbikadre ño tibtä, ye abko ñakare bäri ütiäte tikrä. Erere arato, ti ara käta töbike ño jabtä au, ye ütiäte ñakare tikrä arato.

⁴ Ti ne abko, ie ja ruen ngite ñakare, akwa ñan ti töi metre jökrä tita niere, akwa ti Dänkien aibe käkwe ti ngite ya ño niedre tibtä abko tita niere.

⁵ Ne aisete munkwe ñan töbika jire ni mda rüere kitakäre ngise kä ne ngwane, akwa kukwe rükantie tiebe nikwe amne ni töi ño ño, ye ni Dänkien jatadita angwane mikadi gare jökrä kwe, aisete ye ngibia munkwe angwane, kä mrä ni itire itire käkwe dre dre nuenbare abkobtä Ngöböke kukwe ükadite kräke, ye abko ngibia munkwe.

⁶ Ti mräkätre, tita kukwe ne tike kore Apolobtä amne jabtä mun die mikakäre, munkwe ja töitkadre nunbtä angwane, kukwe krörö nieta ni kwatikwe rükadre gare metre munye: Kukwe tä tikani Ngöbö Kukweibtä, ye aibe mikadre täte munkwe. Munkwe kukwe ye mikadre täte ne ngwane, ja ñan rabadre ruen bäri kri ni mdabtä, käkwe ni iti mikadre ütiäte amne ni mda abko mikadre ngwarbe.

⁷ Munkwe ñan bikadre kri ni mda mdabtä, ñobtä ñan angwane znirekwe mun mikani bäri ütiäte ni mda mdakrä? Mun abko ja kwrere ni mda mdabe. zAmne jändränä munkwe, ye mden abko Ngöböke biani ñakare munye? Jändrän jökrä munkwe abko Ngöböke biani munye, iye ño abko nükani ja di jenbti munye, munta nütüre!

⁸ Jändrän ie mun töta nebe, erere nena jökrä munkwe amne mun nena jändrän Ngöböke bkäne kabre amne mun nena jreire kaibe Ngöböbe munta nütüre jabtä, aisete nun Jesu kukwei ngwiankatre abko ngwarbe, ütiäte ñakare ruen munye. zMun rabadre jreire bkänä näre, ye rabadre bäri kuin nunkrä, ñobtä ñan angwane nun rabadre jreire munbe siba! Akwa ñakare kore.

⁹ Akwa bäsi ni ngite ütiäte ñakare mikani kämikadre, ye jäta niken ngite mikata mrä köre, kwrere jire Ngöböke nun Jesu kukwei ngwianka mikani abko ruen tie. Amne bäsi ni mikani kämikakäre, kwrere jire nunta angeletre okwäbti amne ni jökrä okwäbti, tuen kore tie.

¹⁰ Mdakäre abko, sribibtä Kristokrä nunta nebe tuen töi ñakare ni mda mdaye, akwa munta ketetibe Kristobe, aisete jata nebe tuen töbtä munye. zNun abko di ñakare, akwa mun abko dite dite tä nebe ruen munye! zMun mikata ütiäte akwa, nun abko mikata ütiäte ñakare!

¹¹ Mekera abti kä nüke mtare, nunta mrö nuke. Nun Jesu kukwei ngwianka tä tomna nike amne dän ngututire chekacheka nunkwe. Nun mikata ene ja kisete ni mdakwe amne ju ñakare jen nunkwe.

¹² Erere arato, nunta neme dräre sribire ja kise jenbti mrörä jae. Ni mda mda tä ñäke taretare nunye, akwa nunta ja di kärere kräke Ngöböye. Sribibtä Jesukrä nun rüe tä näin kisere nun jiebtä, akwa nunta neme kwekbe jirekäbe.

¹³ Ni mda mda käta kukwe känene ngwarbe nun rüere akwa, nunta kukwe kaen ngäbti ja moto kuinbti. Erere arato, jändrän käme kitakata, kwrere jire nunta nebe tuen ni mda mdaye abti kä nüke mtare.

¹⁴ Tita tarä tike kore munye, ye abko ñan mun rabadre ja gaire abkokäre tita tike, akwa mun tare kri tikwe, aisete ngäbäre nikwe btä mäträta, ye kwrere tita mäträre munbtä,

¹⁵ ñobtä ñan angwane nane mun tödekaka Jesubti, kräke ni rabadre mili krä jätä dirikäre Kristobtä munye, akwa ni mun rün kwrere abko ñakare mda. Ti ara käkwe kukwe kuin Jesubtä mikani gare käne munye, ye köböire mun nikani nüne ketetibe Kristo Jesube angwane, ti ne aibe mun rün kwrere.

¹⁶ Ye aisete tita nüne ño, ye kwrere munkwe nuna abko tita ribere kisere munye.

¹⁷ Ne aisete, ti ngobo tare tikwe ni Dänkien käfti Timoteo tä näin metre ni Dänkienbe abko tikwe juanba nebe mun kanti yete. Tita nüne ño Kristo Jesu ngwäreki, ye kwrere tita nünamna ni mda mdaye kä ketareketare temen nitre gätäkä Jesu käftiye, ye abko Timoteokwe mikadita töre munye, abkokäre tikwe juanba.

¹⁸ Akwa mun ngätäite yete abko, ti ñan rikadreta jire ni ruäre tätre nütüre, aisete tä jäme amne tä bike krikri.

¹⁹ Akwa ti rikadreta basare munye yete, ie ti Dänkien tö ne ngwane, bä jötröra ti näin nebe mun kanti yete. Ye ngwane, nire nire ie ja ruen bäri ütiäte krikri abko käta ñäke, akwa Ngöbö di tä rä kri ni yebtä ya tikwe tuadi,

²⁰ ñobtä ñan angwane ni bti Ngöböta gobrane ye ngätäite kukwe nuäre nuäre jirekäbe abko ñakare ütiäte akwa, Ngöbö di krita nibtä ye abko ütiäte.

²¹ Ye abko, ¿ti rikadre ño nebe mun kanti, ie mun tö? ¿Ti rikadre romone mäträkäre munbtä, ie mun tö ya? o ¿ti moto jäme, bti ti rikadre nebe, ie mun tö ya?

5

Ni iti nämane meyekrä mike jabe abko juandretari

¹ Ti mräkätäre, mun ngätäite yete nita iti abko meyekrä rünbe tä mike jabe abko tikwe gaba. Nitre tödekaka ñakare Jesubti käta kukwe käme diän diän ye kwrere nuene ñakare jire abko erere nuenta mun ngätäite yete.

² Yebtä mun moto rabadrera ulire amne ni kukwe käme nuenkä meyekräbe kore tä mun ngätäite, ye juandretarira ja ngätäite munkwe, akwa mun abko tä bike krikri jirekäbe, ñobtä ñan angwane munta nekete bäri ja ken Ngöböki, aisete kukwe käme kore abko ñan tä mun mike ngite Ngöböye abko munta nütüre jabtä.

³ Tita ñakare ketetibe munbe yete akwa, ti töi abko tä ketetibe munbe, aisete tita ketetibe munbe kwrere käkwe kukwe ukatebara ni kukwe nuenkä käme kore btä.

⁴ Ne aisete munkwe gätädi Jesu käfti angwane, ti töi tä ketetibe munbe, erere arato ni Dänkien Jesu die tädi munbe angwane,

⁵ ni kukwe nuenkä käme meyekräbe ye munkwe mika gare Satanaye, niarakwe ja tare nikadre kri, akwa mrä Jesu jatadita angwane, niara üai rabadre dianintari abkokäre munkwe mika gare kore Satanaye.

⁶ Tita niere kore, ñobtä ñan angwane munta bike krikri btä, akwa ye abko käme. Lebadura abko käta kukwe käme bä mike, aisete lebadura mikata chi arinante abko tä niken jökrä arinante ta.

⁷ Ni kukwe nuenkä käme ye abko lebadura kwrere, käkwe mun töi mikadre käme jökrä. Ye ngäniene munkwe ni ye juantari mento angwane, arina btin mikata sribedre banre, te lebadura ñakare, ye kwrere mun rabadi deme. Akwa era metre mun nena arina btin kwrere, ñobtä ñan angwane kordero Pascuakrä kämikata ni ngite diankakäre, ye kwrere Kristo krütanina ni ngite diankakäre nibtä, aisete niara abko Kordero nikwe.

⁸ Pascua näire abko ju kwatirekwatire, kanti arina te lebadura tä gwi, ye abko kitakata jire jökrä ju bäre, ye kwrere kukwe käme diän diän ye nikwe ñan tuadremetre ja ngätäite, ñobtä ñan angwane Kristo krütanina nikrä, akwa nikwe nünandre era metre amne ñan nikwe ni mda ngökadre angwane, ni rabadi arina btin kwrere.

⁹ Mdakäre abko, tikwe tä rä mdara jire tikaba munye, btä tikwe nieba krörö munye: Ni merire brare bti kä ngwarbe, ye tä ja mike gure bati bati abko ben munkwe ñan ja getadre jire, tikwe nieba.

¹⁰ Akwa ye abko, ñan ni tödekaka ñakare Jesubti abkobtä tikwe tä rä tikaba kore munye amne, ñan ni jändrän jenena ribekä jae amne ñan nitre ni ngökö amne ñan nitre jändrän ngwarbe mikaka ngöböre jae abkobtä tikwe tä rä tikaba kore munye. Ñan tikwe tä rä tikaba ni korekorebtä, ñobtä ñan angwane ni korekore tödekaka ñakare Jesubti, ben munkwe ñan ja getadre ne ngwane, munkwe ñan nünandre kä nebtä mda niaratre ngätäite.

¹¹ Akwa nitre tödekaka Jesubti tä niere, akwa tä kukwe nuene kämekäme, käta ja mike gure bati bati, tä jändrän jenena ribere jirekäbe jakrä, tä jändrän ngwarbe mike ngöböre jae, tätre kukwe känene ngwarbe ni mda mda rüere amne, tä dröbare amne tä gore, ni ye kwrere abko ben munkwe ñan ja getadre amne nin munkwe mrödre jire ketetibe ben abko tikwe nieba munye.

12-13 Ni ñakare tödekaka Jesubti abko kräke ñan tita kukwe ükatekä. Ngöbökwé kukwe ükadite bentre. Akwa nitre tödekaka Jesubti tä mun ngätäite, kräke mun nena kukwe ükete, aiseite ni kukwe käme nuenkä meyekräbe, ye munkwe dianka mento ja ngätäite yete.

6

Nitre tödekaka Jesubti ñan rikadre ja ngwena kritoboye

¹ Kukwe mda btä ti tö nibi blitai munbe arato. Kukweta neme ja rüere kwärikwäri munkwe angwane, kritobo tödekaka ñakare Jesubti, kánti munta niken ja ngwena, iye ñöbtä mun ñan tä niken kukwe ngwena jirekäbe nitre tödekaka Jesubtiye ükatekäre jakrä ja ngätäite amarebti se!

² Kä mrä angwane, nitre tödekaka Jesubti käkwe kukwe ükadite nitre ñakare tödekaka Jesubti yekrä, iye gare ñakare munye ya! ¿Munkwe kukwe ükadite kore ni mda mdakrä amarebti kukwe kiakia tä nakenkä kä ne ngwane abko ja ñan nüke töre munye ükete jakrä ye?

³ Mdakäre abko, nikwe kukwe ükadite angeletrekrä arato. ¡Ye aiseite ni di tarä täte kukwe kiakia kä nebtä ükatekäre jakrä!

⁴ Ye aiseite, jändrän munkwe btä munta rüre jabe kwärikwäri angwane, nitre tödekaka ñakare Jesubti abko ie munta niken kukwe mike ükadrete jakrä, ye kwrere munkwe ñan nuendre jire chi.

⁵ Mun rabadre ja gaire kri, abkokäre tita kukwe ne niere munye. ¿Ni töbtä tödekaka Jesubti ñakare jire iti mun ngätäite käkwe kukwe ükadrete ja mräkätrekrä ya? Ni töbtä tarä mun ngätäite käkwe kukwe ükadrete ruen tie.

⁶ Akwa mtare ja mräkä iti tödekaka Jesubti käta niara mräkä Jesu käbti kite ngise kritoboye akwa, ¡kritobo tödekaka ñakare Jesubti ngwäreki munta niken ja ngwena kwärikwäri!

⁷ Munta rüre jirekäbe jabe kwärikwäri, aiseite nane kritobo käkwe kukwe ükadrete kuin makrä, akwa era metre ma ganandre ñakare Ngöbö ngwäreki, ñöbtä ñan angwane munta Jesu mike ngwarbe ni jökrä ngwäreki. Ye abko kukweta neme mun rüere angwane, mun rabadre neme kwekbe jirekäbe abko rabadre bäri kuin. Erere arato, jändrän goita munkän angwane, mun rabadre neme kwekbe jirekäbe abko rabadre bäri kuin,

⁸ amarebti mun ara jire käta kukwe nuene käme mun mräkäbtä käta jändrän goire mun mräkä kän.

⁹⁻¹⁰ Abtä ti tö mun mikai mokre abko krörö: Jesu jatadita abti Ngöbö rabadi gobrane, ben ni kukwe käme nuenkä ñan rabadi, ye garera munye. Munkwe ñan ja ngökamna, ñöbtä ñan angwane Ngöbö rabadi gobrane, ben ni ja mikaka gure bati bati ñan rabadre jire. Erere arato, ni jändrän ngwarbe mikaka ngöböre jae, ni gure akwa tä ja mike gure tiebetiebe ni mdabe amne, ni brare bikaka merire jae kwärikwäri amne ni gokä, ni käbäre amne ni dröbaka, ni blitaka ngwarbe ni mda mda rüere amne, ni jändrän diankaka ni mda mdakän, ye käkwe ñan nünandre kärekäre Ngöböbe.

¹¹ Käne, mun ngämi tödeke Jesubti, känenkri mun ruäre nämane nüne kore, akwa mtare Ngöbökwé mun ngite dianinkära munbtä, käkwe mun mikani jenena nünakäre deme amne metre jakrä amne mun ñakare ngite mda ja ngwäreki niebare kwe munbtä amne mun kani ngäbti kwe ni Dänkien Jesukristo käbti amne Ngöbö Üai Deme köböire.

Nikwe ñan ja mikadre gure bati bati

¹² Mun ngätäite munta niere: Ti tö rabadre dre dre nuein, ye erere Ngöböta kä bien tie nuene jökrä, munta niere. Akwa jändrän jökrä nuendre abko ñakare kuin ni die mikakrä. Ne aiseite, nane ti rabadre jändrän jökrä nuene, akwa jändrän nuendre, ye abko ñan tikwe mikadre ja dänkiene.

¹³ Mdakäre abko, munta niere: mrö abko ni bülekrä amne ni büle abko mrökrä, munta niere. Ye abko era, akwa kä mrä angwane, Ngöbökwé mrö amne ni büle juandi ngwarbe jökrä. Akwa ni ngrabare abko ñakare ni büle kwrere. Ni ngrabare abko ñakare ja mikakäre gure bati bati, akwa ni ngrabare abko nünakäre metre ni Dänkienkrä amne ni Dänkien abko käta ni ngrabare mike ütiäte jae.

¹⁴ Ye abko tä gare nie, ñöbtä ñan angwane ja di jenbti Ngöbökwé ni Dänkien mikaninta nire, ye kwrere ni mikadita nire ni ngrabare ben gwaire, aiseite ni ngrabare ütiäte ni Dänkienkrä gare nie.

¹⁵ Mun ngrabare ye abko Kristo kiakia ngrabare ye garera kuin munye, aiseite ¿Jesu kiakia ngrabare ye abko meri bti kä ngwarbe abko ben mikadre ketetiebe ya? ¡Ñakare jire!

¹⁶ Meri bti kä ngwarbe abko ni brare tä mike jabe angwane, niaratre nibu tä neme ni itibe kwrere abko gare kuin nie, ñöbtä ñan angwane Ngöbö Kukweita blite ni merire, brare käta ja mike gure yebtä angwane tä niere krörö: Niaratre ni nibu,

ye abko rabadi ni itibe kwrere, *Génesis 2.24*
nieta Ngöbö Kukweibtä, aisete meri bti kä ngwarbe abko ni brare tä mike jabe angwane,
niaratre nibu tä neme ni itibe kwrere, ye garera kuin munye.

¹⁷ Akwa nita tödeke ni Dänkienbti abko ben ni üaita neme ketetibe niara Üaibe.

¹⁸ Ye mdenbtä, meri mden mden ben mun tö ja mikai gure bati bati, ye ngäniene mun gitia, ñobtä ñan angwane kukwe bätäkä ngwarbe btä nita ja mike ngite, ye abko tä ni ngrabare bäre mento, akwa nita ja mike gure bati bati, ye abko ja mikata ngite ja ngrabare rüere au.

¹⁹ Ye abko mun brare käkwe ñan nuendre jire chi, ñobtä ñan angwane Ngöbökwé ja Üai biani mun itire itireye, aisete Ngöbö Üaita nüne mun itire itire btä, aisete mun itire itire abko ju nünankrä Ngöbö Üai Demekwe, ¿ye gare ñakare munye ya? Ne aisete mun tö dre dre nuein ja ngrabarebti, ye abko mun ñan raba nuene, ñobtä ñan angwane mun ñakare ja bkänkä au,

²⁰ ñobtä ñan angwane Ngöbökwé mun kökani jakrä, aisete mun ngrabare amne mun üai, yebti munkwe Ngöbö mika ütiäte.

7

Ja mikadre gure ya, ñakare ya abkobtä Pablokwe diribare

¹ Mtare abko, munkwe kukwe ngwianintari täräbti tie, yeبتä ti bike mun kukwei kaen ngäbti krörö: Munta kukwe ngwentari krörö: ¿Ni brare brare käkwe ñan ja mikadre gure ni mdabe töi kwe rüere abko rabadre bäri kuin ya, ñakare ya? abko munta ngwentari tie.

² Ti abko tä niere krörö: Ni kwati merire brare tä ja mike ngite jabe kwärikwäri mun ngätäite, aisete ye ngäniene ni brare gure gure käkwe kibia meri jen kwebe. Erere arato, ni merire gure gure käkwe kibia brare jen kwebe.

³ Ye abko, ni brare käkwe ñan ja kábäi merire kwe kän akwa kibiadre kwe ben amne, ni merire käkwe ñan ja kábäi kwäräi kwe kän, akwa kibiadre kwe ben,

⁴ ñobtä ñan angwane ni merire ñan tä nebe ja ngrabare bkäne au akwa, kwäräi kwe tä nebe niara ngrabare bkäne arato. Erere arato, ni brare ñan tärä nebe ja ngrabare bkäne au akwa, merire kwe tä nebe niara ngrabare bkäne arato.

⁵ Ne aisete ni brare amne ni merire tä jabe, ye käkwe ñan ja kábäi jakän kwärikwäri. Akwa nane mun tö raba kä diainkä jenena blitakäre Ngöböbe, käkwe ja töi mikadre ruäre blitakäre Ngöböbe, ye ngwane mun ñan tö raba kibiai jabe ne ngwane, munkwe ñan kibia jabe. Akwa yebti mun rika kibienta jabe, ñobtä ñan angwane nane ja bämbtä jae kwärikwäri Satanakwe mun töi mikadre ja mike ngite.

⁶ Tita kukwe niere, ne kwrere mun tö nuein ne ngwane, tä dbe akwa ñan tita nuemna munye,

⁷ ñobtä ñan angwane ni jökrä rabadre kaiibe ti kwrere abko rabadre bäri kuin, tita nütüre, akwa ni itire itire, ie Ngöböta ja di bien jene jene, aisete ni jökrä ñan raba neme kaiibe ti kwrere.

⁸ Mdakäre abko, ni brare bati gure ñakare ya o ni brare kän meri krütani ya amne meri kän brare krütani, käkwe ñan ja mikadreta gure amne, rabadre kaiibe ti kwrere, ye rabadre bäri kuin ruen tie abko ti tö niei munye.

⁹ Akwa mun ñan raba neme nuäre nüne kaiibe ne ngwane, munkwe ja mikata gure jirekäbe, ñobtä ñan angwane mun ñan tädre neme ngware jirekäbe jabe, ye abko rabadre bäri kuin ruen tie.

¹⁰ Mdakäre abko, ni gure gure, ie tita kukwe nuemna krörö, ne abko ñan ti kukwei akwa, ni Dänkien ara jire nämene nüne kä nebtä angwane, niarakwe kukwe nuemna abko krörö: Ni merire käkwe brare kwe tuametre ñakare jire,

¹¹ akwa nane ni merire käkwe brare kwe tuametre ne ngwane, raba kaiibe jirekäbe. Akwa tö raba ja mikaita gure ne ngwane, ja mäkäta kwe brare kwebe. Ye kwrere arato, ni brare käkwe merire kwe tuametre ñakare jire abko ti tö niei munye.

¹² Ni mda mda abko, ie ti bike kukwe mda niere. Kukwe ne abko ni Dänkienkwe diribare ñakare btä akwa, tita niere krörö munye: Ni mräkä brare tödekaka Jesubti tä gure ni merire ñakare tödekaka Jesubti ben, akwa meri kwe tö nünai janknu ben ne ngwane, meri kwe ye ñan tuametre kwe.

¹³ Erere arato, ni mräkä merire tödekaka Jesubti tä gure ni brare ñakare tödekaka Jesubti ben, akwa brare kwe tö nünai janknu ben ne ngwane, brare kwe ye ñan tuametre kwe,

¹⁴ ñobtä ñan angwane meri tödekaka Jesubti, ye köböire nane brare kwe ñan tä tödeke Jesubti, ye käkwe tödekadre Jesubti, abkokäre Ngöbökwé mikani jenena jakrä. Erere arato, brare tödekaka Jesubti, ye köböire nane meri kwe ñan tä tödeke Jesubti, ye käkwe tödekadre Jesubti, abkokäre Ngöbökwé mikani jenena jakrä. Ye kwrere ngäbäkre munkwe ñan tä tuen

ngite Ngöböye, akwa nane tödekadre kwe Jesubti arato, abkokäre Ngöbökwé mikani jenena jakrä arato.

¹⁵ Akwa nane ni ja kwäräre iti ñan tä tödeke Jesubti abko tö raba ja tuaimetre ni tödekaka Jesubti ben, ne ngwane ja tuametre kwetre. Munkwe nuendre kore angwane, ni mräkä brare amne ni ngwai Jesu käbti rabadreta kaibe jirekåbe, ñobtä ñan angwane Ngöbökwé ni käråbare nünakäre jåme jabe kwäråkwari.

¹⁶ Ne aisete, mun merire tödekaka Jesubti, ye köböire mun kwäråi ñakare tödekaka Jesubti ye rabadre dianintari ya ño gare ñakare munye. Erere arato, mun brare tödekaka Jesubti, ye köböire meri munkwe tä tödeke ñakare Jesubti, ye rabadre dianintari ya ño gare ñakare munye, aisete munkwe nünandre janknu jabe abko rabadre bäri kuin.

¹⁷ Akwa mun nämåne nüne nirebe angwane Ngöbökwé mun käråbare jakrä, ye ben munkwe nuna janknu, ñobtä ñan angwane ni Dånkien Kristo kåkwé kukwe mikanintbe kore munkrä, ye abko nitre gätåkå Jesu käbti kå ketareketare temen, kråke tita kukwe ükete nuendre kore.

¹⁸ Ye abko, ni Dånkienkwé kukwe mikanintbe kore ni kråke, ne aisete mun ruåre abko ñåråkrå mikanina mun kwatabtä angwane, Ngöbökwé mun käråbare jakrä ne ngwane, munkwe ñan töbika ja kwata miketa täte. Erere arato, mun ñåråkrå mikani ñakare mun kwatabtä abko angwane, Ngöbökwé mun käråbare jakrä ne ngwane, mun ñan ja ñåråkrå miika ja kwatabtä,

¹⁹ ñobtä ñan angwane ni ñåråkrå tära ni kwatabtä ya, ñakare ya, yehti abko ni ñan tä neme dianintari, aisete ñakare bäri ütiåte. Akwa nita Ngöbö Kukwei miike täte ya, ñakare ya, ye abko bäri ütiåte kri.

²⁰ Ne aisete mun nämåne nüne ño angwane, Ngöbökwé mun käråbare jakrä, ye kwrere munkwe nuna.

²¹ Ye abko, ma nämåne ni klåbore ni mdakwé angwane, ma käråbare Ngöbökwé jakrä, yehtå makwé ñan töbika dikaro, akwa ma rabadreta tikaninte raba tuen mae ne ngwane, makwé ñan tuametre niiken ja båre.

²² Akwa ma nämåne klåbore ni mdakwé angwane, Ngöbökwé ma käråbare nüne ketetibe ni Dånkien Kristobe, yehtå makwé ñan töbikadre dikaro, ñobtä ñan angwane mtare mata tikaninte ma ngitehtå amne ni Dånkien kåta ma bkåne. Ye kwrere arato, ma ñan nämåne klåbore ni mdakwé angwane, Ngöbökwé ma käråbare jakrä ye ngwane, ma abko klåbore Kristokwé mtare.

²³ Ngöbökwé mun kökani jakrä, aisete munkwe ñan ja mikata klåbore ni mda mdakwé.

²⁴ Ne aisete ti mråkåtre, mun nämåne nüne ño angwane, Ngöbökwé mun käråbare jakrä, ye kwrere munkwe nuna janknu.

¿Ni kaibekåibe kåkwé ja mikadre gure ya, ñakare ya?

²⁵ Mtare, meri kaibekåibe abkobtä ti tö blitai, yehtå abko ni Dånkien kåkwé kukwe diribare ñakare, akwa ni Dånkienkwé ti ngwiani ruentari tare jae, aisete tita töbike ño ye abko ütiåte, abtä munkwe tödekadre ti kukweibti ruen tie.

²⁶ Nita nüne ne nåire kukwe taretare tä nakenkå krübåte ni rüere, aisete mun brare kaibekåibe tä nüne ño mtare, ye kwrere munkwe nünandre janknu abko rabadre bäri kuin tuen tie.

²⁷ Akwa mata gure ne ngwane, makwé ñan meri makwé tuametre; akwa ma gure ñakare ne ngwane, makwé ñan meri kånå jakrä.

²⁸ Akwa mun brare brare kåkwé ja mikadre gure ne ngwane, munkwe ñan ja mikadre ngite Ngöbö rüere. Erere arato, meri kaibekåibe kåkwé ja mikadre gure angwane, ja mikadre ngite ñakare kwetre Ngöbö rüere. Akwa nita ja miike gure abko kisete kukweta kite kri mda, ye abko ñan rakadrekå munbtå, abkokäre tita niere kore.

²⁹ Ti mråkåtre, ñobtä tita niere krörö: Ni Dånkien kebera kiteta amne kå kitera neme braibe ni kåne, aisete ni gure gure kåkwé nuna ni kaibekåibe kwrere sribikåre Ngöbökrå.

³⁰ Erere arato, ni bti kå drangwane drangwane abtä tä neme ulire ulire, yehtå ñan töbika kri kwe, akwa nünandre janknu kwe Ngöbökrå; nire kåta kå ngwen nuåre jabtä, yehtå ñan töbika kri kwe, akwa nünandre janknu kwe Ngöbökrå; ni jånðrån kökaka kökaka abko ñan töbikadre kri jånðrån yehtå kwe, akwa nünandre janknu kwe Ngöbökrå;

³¹ nire nire tä jånðrån kå nebtå bkåne, yehtå ñan töbikadre kri kwe, akwa nünandre janknu kwe Ngöbökrå, ñobtä ñan angwane nünandre Ngöbökrå abko bäri ütiåte jånðrån jökrå ngwå, ñobtä ñan angwane kå tuata nikwé ne abko nåin jökrå ta aisete.

³² Akwa munkwe ñan töbikadre dikaro kukwé båtåkå ngwarbehtå, aisete tita blite kore munbe. Ye abko, ni brare kaibe kåta töbike bäri jånðrån ni Dånkienkwé yehtå amne, ni Dånkien moto mikadre ño nuåre kwe, yehtå tä töbike.

³³ Amne ni brare gure abko tä töbike bäri jändrän kä nebtä btä, aiseite merire kwe moto mikadre ño nuäre kwe, yebtä tä töbike.

³⁴ Ye kwrere töita jändrän ketebu btä. Ye kwrere arato, meri kwärai ñakare kwe amne meri kaibekaibe tä töbike bäri jändrän ni Dänkienkwe yebtä, käta ja ngrabare amne ja üai mike deme ni Dänkienkrä. Amne meri gure gure abko jändrän kä nebtä, btä tä töbike bäri, aiseite kwärai moto mikadre ño nuäre kwe, btä tä töbike bäri arato.

³⁵ Ne ñan ti tö kukwe tare mikai mun kötärä, käta ja mikamna gure ñakare munye, akwa munkwe sribidre jäme ni Dänkienkrä amne kukwe mda mda ñan rabadre mun jiete abko ie ti tö, käta niere kore munye.

³⁶ Mdakäre abko, ni ruäre kwe meri bati, ben tä mikani jakrä kwärikwäri, ye ben tö ja mikai gure ne ngwane, ja mika gure kwe, ñobtä ñan angwane meri ye nena ünän amne ja mikadre gure kwe abko käi nena ie. Ne aiseite ja mikadre gure kwe raba ruen ie angwane, dre nuendre abko rabadre bäri kuin raba ruen ie, erere nuen kwe, aiseite ni tö raba ja mikai gure, käkwe ja mika gure. Yebtä abko ñan ja mikadre ngite kwe Ngöbö rüere.

³⁷ Akwa ni mda abko kwe meri bati ben tä mikani jakrä kwärikwäri, ye ben ñan tö raba ja mikai gure amne ni mdakwe ñan töi diandre rabakäre kaibe, akwa tä töbike kwatibe kore ja töi jenbti, ne ngwane ja ñan mika gure kwe jirekäbe abko rabadre dbe.

³⁸ Ne aiseite, meri ben ni brare tä mikani jakrä kwärikwäri ye ben ja mikadre gure kwe abko rabadre kuin, akwa ñan ja mikadre gure ben kwe abko rabadre bäri kuin.

³⁹ Mdakäre abko, ni merire gure gure abko brare kwe tä nüne, ye ngwane brare ñan tuametre kwe, akwa brare kwe krütadre kän ne ngwane, rabadreta kaibe ja mikakäreta gure, akwa ni tödekaka Jesubti aibe ben ja mikadreta gure kwe.

⁴⁰ Akwa ja ñan mikadreta gure kwe angwane, kä tädre bäri nuäre btä ruen tie. Ne abko Ngöbö Üai tä tibtä, aiseite tita töbike kore, ye abko kuin ruen tie.

8

Ju blitakrä ngöbö ngwarbebe, ye kanti mrödre ñakare

¹ Jändrän kämikata ngöbö ngwarbe mikakäre ütiäte abko ngrie kwetadre ya, ñakare ya, abkobtä munkwe kukwe ngwianintari tie, yebtä ti bike blite mda. Mun jökrä käta niere krörö kukwe nebtä: Kukweta ükaninte ño era metre Ngöbö kwe abko garera kuin jökrä nunye, munta niere jäbtä. Akwa tita niere krörö: Kukweta ükaninte ño tä nuke gare kuin nie, nita nütüre angwane, nita nebe bike kri. Akwa nita ni mda mda tarere abko bäri ütiäte Ngöbökrä, ñobtä ñan angwane nita ni mda mda tarere angwane, nita die mike abko tita nütüre.

² Ni ruäre, ie kukweta ükaninte ño nena gare kuin tä nütüre, ye ngwane kukwe era metre ngämi nebe gare täte ietre.

³ Akwa nire nire käta Ngöbö tarere, ni ye abko gare kuin Ngöböye.

⁴ Jändrän kämikata ngöbö ngwarbe mikakäre ütiäte, jändrän ye abko ngrie kwetadre ya, ñakare ya, btä ti bike blite mda. Era metre ngöbö ngwarbe ñakare jire amne era metre Ngöbö tarä itibe, ye gare kuin nie.

⁵ Akwa kä käinbti ya, kä temenbtä ya, yete ngöbötre tarä abko ni ruäre käta niere. Ye kwrere bkänä, ni ñakare tödekaka Jesubti, kräke ngöbö tarä kwati amne dänkien tarä kwati arato.

⁶ Akwa ni tödekaka Jesubti abko kräke Ngöbö tarä itibe. Niara abko ni Rün amne niarakwe jändrän jökrä dätebare amne nita nüne niarakrä. Erere arato, ni Dänkienta itibe ni kräke abko Jesukristo. Jesukristo ye mden köböire jändrän jökrä dätebare Ngöbö kwe amne niara mikani ni dätekä kwe arato.

⁷ Akwa mun ngätäite ni tödekaka Jesubti ruäre abko ie kukwe ye gare ñakare, ñobtä ñan angwane niaratre ngämi tödeke Jesubti, känenkri nämane ngöbötre ngwarbe ye mike ütiäte jae, amne jändrän kämika nämane kukwadre ngöbö ngwarbe mikakäre ütiäte, bti jändrän ye ngrie kweta nämane ju blitakrä ngöbö ngwarbebe yete. Ne aiseite mtare ngöbötre ngwarbe tarä era metre nütüta janknu kwetre, abkokänti niaratre tä niken ngri kukwani ngöbö ngwarbeye ye kwete, tätre ngöbö ngwarbe mike ütiäte nütüta kwetre amne, töi braibe Jesubtä ñobtä ñan angwane kukwe metre ngöbö ngwarbebtä ngämi gare metre ietre, aiseite jötrö ngwarbe jata nebe ruen ngite ietre ngri ye kwetabtä.

⁸ Akwa nita mröre, yebtä ñan Ngöböta ni kaen ngäbti bäri, aiseite nikwe mrödre ye käkwe ñan ni mikadre kuin Ngöbö ngwäre kwi. Erere arato, nikwe ñan mrödre, ye käkwe ñan ni mikadre käme Ngöbö ngwäre kwi.

⁹ Ye mdenbtä, mun abko kräke ngöbö ngwarbe tarä ñakare era metre, aiseite jändrän jökrä tuen dbe kwetadre, ye käkwe ñan ni mda mda töi braibe Jesubtä ye mikadre ja mike ngite.

Ne aisete, mun ngämi niken mröre ju blitakrä ngöbö ngwarbebe yete, känenkri munkwe töbika kuin ja käne.

¹⁰ Ye ñobtä ñan angwane mun ie kukwe gare kuin abko käbti ju blitakrä ngöbö ngwarbebe, kánti nane mun rikadre mröre angwane, ni ruäre tödekaka Jesubti kräke ngöbö ngwarbe tarä amne töi braibe Jesubtä käkwe mun tuadre angwane, mröre ngöbö ngwarbe mikakäre ütiäte abko dbe nütüdre, aisete tö rabadre näin ngri ngöbö ngwarbe mikakäre ütiäte ye kwetai.

¹¹ Ye angwane kukwe gare mae, ye käkwe ma mräkä Jesu käbti töi braibe amne di ñakare bökän Jesubtä ye mikadi ja mike ngite, yebtä abko riadrete. Kristo krütani niarakrä arato, aisete ma köböite niara ñan rikadre ji blobti.

¹² Mun mräkä Jesu käbti töi braibe Jesubtä, rüere munkwe ja mikadre ngite kore, ye ngwane Kristo ara jire rüere munta ja mike ngite arato.

¹³ Ne aisete jändrän kämikani kukwadre ngöbö ngwarbe mikakäre ütiäte abko ngrie, ye tikwe kwetadre käkwe ti mräkä Jesu käbti mikadre ja mike ngite, ye ngwane ngri ye tikwe ñan kwetadre jire chi mda, ti mräkä käkwe ñan Jesu tuadremetre abkokäre.

9

Pablo abko Jesu kukwei ngwianka era metre niebare kwe

¹ ¿Ti mräkätre, ti abko di ñakare kukwe nuene ja töi jenbti ya? ¡jänri, ti di tarä! ¿Ti ñakare Jesu kukwei ngwianka era metre abko mun ruäreta nütüre ñan ñan? ¡jänri, ti abko Jesu kukwei ngwianka era metre! ¿Tikwe ni Dänkien Jesu tuaba ñakare ya? ¡jänri, tikwe tuaba! ¿Sribi tikwe köböire mun ara jire käkwe tödekani Jesubti ya? ¡jänri, munkwe tödekani Jesubti sribi tikwe köböire!

² Nane ni mda mdakrä ti ñakare Jesu kukwei ngwianka era metre, akwa munkrä abko ti Jesu kukwei ngwianka era metre rükadre gare munye, ñobtä ñan angwane munta nekete ni Dänkien Jesubtä, ye abko käta ti Jesu kukwei ngwianka era metre bä mike.

³ Nitre ñäkäkä blo ti rüere abko ie ti tö niei krörö:

⁴ ¿Nitre Jesu kukwei ngwianka mda mda, ye ngätäite nun ne aibe abko käkwe ñan mrö amne tomna ribedre munbtä sribi ütiäre ya? ¡jänri, nun raba jändrän ye ribere munbtä!

⁵ Erere arato, ¿ni Jesu kukwei ngwianka mda mda, ni Dänkien etbakantre amne Pedro arato tä niken meri kwekwe ngwena jabe, ye kwrere nun ñan raba niken meri tödekaka Jesubti ngwena ja nän mukore ya? ¡jänri, nun tö rabadre, ne ngwane nun raba meri jakwe ngwena jabe!

⁶ Mdakäre abko, ¿Bernabé amne ti, nun ne aibe käkwe sribi mda mda nuendre mrökrä jae ya? ¡Ñakare jire!

⁷ Yebtä ti bike kukwe bä mike krörö munye: ¿Nitre rükä käta sribire gobrankrä, ye käta sribi ütiä bianta au jae ya? ¡Ñakare jire! ¿Amne ni uba nökö ñan tä uba ngwä kwete ya? ¡jänri, tä nökö kwetadre jae! Erere arato, ¿ni obeja ngibiaka käta kian kwainte, ye ñan tä ñaen ya? ¡jänri, tä obeja ngibiare ñan ñadre jae!

⁸ Ne abko ñakare ni kä nebtä aibe tä töbike kore abko erere tita niere, akwa Ngöbö Kukwei tikani Moisékwe käta niere arato,

⁹ aisete Kukwe Biani Ngöbökwé Moiséye btä tä tikani krörö: Buey trigo münantekä, ye munkwe ñan kö kita ngwärebtä abko tä tikani kore. ¿Ye abko, Ngöbö töi nämane buey aibe die mike, käkwe kukwe niebare kore ya? Ñakare.

¹⁰ Ngöbö töi nämane ni ne die mike arato, käkwe niebare kore. Ni ne kräke Ngöbökwé ja kukwei tikamna, ñobtä ñan angwane ni nura nökö amne ni nura ngwä otaka abko rabadre mrö bkäne tätre nütüre, aisete tä sribi nuene.

¹¹ Ye kwrere arato, Ngöbö kukwei kuin Jesubtä nunkwe nököni nura kwrere mun ngätäite, ye ütiäre abko nunkwe jändrän munkwe mätäidre munbtä abko ñakare blo,

¹² ñobtä ñan angwane ni mda mda akwa käta jändrän mätäire munbtä angwane, nun bärira jire käkwe jändrän mätäidre munbtä.

Akwa nun jändrän mätäire ñakare munbtä abti kä nüke mtare, ñobtä ñan angwane nun ñan tö jändrän nuein jire chi ja mikakäre ngite ni mda mda okwäbti abtä trö kwitadre kwe Ngöbö Kukwei kuin Kristobtä yeye, akwa ni jökräkwé kadre ngäbti jäme, abkokäre nunta ja tare nike bätäkä ngwarbe Ngöbö kukwei mikabtä gare munye.

¹³ Angwane abko mrö bianta Ngöböye, ye ruäre ni sribikä ju blitakrä Ngöböbete käta mrö den jae sribi ütiäre ju yete, ye garera munye. Erere arato, ni jändrän kukwaka Ngöböye käta ngri den ruäre nünankrä jae.

¹⁴ Ye kwrere arato, ni Dänkien käkwe kukwe ükaninte krörö ni niara kukwei mikaka gare kräke: Nire nire tä näin Ngöbö kukwei kuin Jesubtä mike gare, ye köböire nünandre kwe, niebare ni Dänkienkwe.

¹⁵ Ye kwrere ti di tärä jändrän mätäikä munbtä, akwa tikwe ñan jändrän mätäiba munbtä, niebare ni Dänkienkwe ye kwrere. Erere arato, ñan munkwe jändrän biandre tie, abkokäre tita tärä ne tike munye. Tikwe jändrän mätäidre munbtä jakrä, ye känenkri ti krütadre abko rabadre bäri kuin tikrä, aisetse tita sribi nuene kore, ye abko bäri käi nuäre tibtä, aisetse ni mda ñan raba ti töi kwite jene mda.

¹⁶ Ne aisetse, tita kukwe kuin Jesubtä dirire, yehti ñan tita bike kri, ñobtä ñan angwane sribi ye abko Ngöbökwe mikani ti kisetse, aisetse tikwe ñan nuendre angwane jaingwaree, ti bobre jakän!

¹⁷ Tikwe kukwe kuin Jesubtä ye diridre ja töi jenbti akräke tikwe ütiä mätäidre munbtä, akwa sribi mikani ti kisetse Ngöbökwe, erere tita nuene, aisetse tita ütiä kärere ñakare, ñobtä ñan angwane ti sribikä Kristokwe jirekäbe aibe aisetse.

¹⁸ Akwa tita kukwe kuin Jesubtä dirire ngwarbe, ye abko sribi ütiä kwrere tikrä. Amne tita ütiä mätäire ñakare munbtä, ye abko sribi ütiä kwrere tikrä arato. Ye abko bäri käi nuäre tibtä, ñobtä ñan angwane kukwe kuin Jesubtä dirita tikwe, ye käbti ti ñan tö nünai.

¹⁹ Ne mden kisetse, ni ñakare jire iti kä nebtä käta sribi tikwe ne ütiä bien tie, aisetse tita ñakare klabore, akwa ni kwati jatadre Kristoye, abkokäre tita ja mike klabore ni jökrä kräke abko krörö:

²⁰ Nitre israelita ngätäite ti nämane angwane, tikwe ja mikani niaratre kwrere ganainkäre Kristokrä. Amne nitre israelita käta Kukwe Biani Ngöbökwe Moiséye ye mike täte abko ngätäite ti nämane angwane, tikwe ja mikani Kukwe Biani Ngöbökwe Moiséye mike ütiäte ganainkäre Kristokrä. Akwa era metre Kukwe Biani Ngöbökwe Moiséye, ye ñan mikata ütiäte tikwe ja mikakäre metre Ngöbö ngwäreki, akwa nitre kukwe mikaka ütiäte ütiäte jatadre tödeke Kristobti, abkokäre tikwe ja mikani niaratre kwrere.

²¹ Akwa ni mda mda käta Kukwe Biani Ngöbökwe Moiséye mike ñakare ütiäte abko ngätäite ti nämane nebe angwane, tikwe ja mikani niaratre kwrere. Akwa ti abko tä Ngöbö Kukwei mike ütiäte, ñobtä ñan angwane kukwe biani nuendre nie Kristokwe abko erere tita mike täte.

²² Angwane ni ie Kristo gare ñakare kuin abko ngätäite tikwe ja mikaba ni ie Kristo gare ñakare kuin kwrere, niaratre ganainkäre Kristokrä. Tita ja mike ni mda mda kwrere, ye köböire abko ni ruäre rabadre dianintari, abkokäre tita nuene.

²³ Ye abko, Ngöbö kukwei kuin Jesubtä, kräke tita sribi nuene ne köböire Ngöbökwe kuin nuendre tikrä abkokäre.

²⁴ Ti bike kukwe mda bä mike krörö munye: Nitre tä ja gaen angwane, ni kwati tä neen akwa, ni itibe tä ganane abko ütiäre jändrän bianta ie. Ye kwrere arato, Ngöbökwe jändrän biandre munye, ne ngwane ni niaka tä nüne ño ganakäre, ye kwrere munkwe nuna.

²⁵ Nitre ja gaka tä niken ja mike biare ja gakäre angwane, jändrän ño ño käme kräke, ye ie tä ja üke bäin ganakäre, akwa jändrän tä niken ngwarbe jötrö abko ganainkäre tädre ja mike juto kore. Akwa Ngöbökwe jändrän kuin ütiäte biandre nie abko ganainkäre nita ja die mike jändrän ño ño käme ni kräke, ye ie nita ja üke bäin ganakäre.

²⁶ Ne aisetse ti abko ñan tä näin betekä okwä kware amne ñan tita kuso braire ngwarbe kä tökarete kwäräkwärä.

²⁷ Akwa tita ja ngrabare ara jire mike ja tare nike amne tita ja ngrabare ne mike ja kukwei mike täte, ñobtä ñan angwane tikwe diribare ni mda mdaye abti mrä ti ütiäte ñakare ñan niedre tie Kristokwe, abkokäre tita ja ngrabare mike ja tare nike.

10

Pablokwe nitre Corintobo mikani mokre

¹ Ti mräkätre, ti tö kukwe nakaninkä nitre israelitabtä mikaita töre munye abko krörö: Ni mräkä israelita kirakira nämane Egipto, nikaninta angwane, namani dikekä jökrä müta Ngöbökwe täni amne nikani jökrä Mren Tainte ta arato.

² Niaratre namani dikekä müta Ngöbökwe täni amne nikani Mren Tainte ta, ye abko namani ngökani ñöte amne namani mikani ketetibe Moisébe kwrere, Ngöbö nämane ben niaratre ngibiakäre bä mikakäre, nita ngökani ñöte amne mikani ketetibe Jesube, niarata ni dänkiene bä mikakäre ye kwrere.

³ Angwane mrö biani Ngöbökwe, arabe kwetani jökrä kwetre kä kaibete amne,

⁴ ñö biani tomnane Ngöbökwe, arabe ñani jökrä kwetre, ñobtä ñan angwane ñö mikani neen jäkwatate käin Ngöbökwe, ye ñani kwetre, ñan krütadre tomna miare abkokäre. Kristo ara jire jäkwata ye kwrere abko nämane näin bentre, ñobtä ñan angwane mrö amne ñö biani Ngöbökwe niaratre ngrabare die mikakäre, ye abko Kristo nämane die mike nüne Ngöbö ngwäreki bä mike, aisetse Kristo abko jäkwata kwrere, kä nämane juto biare nitre israelita mike nüne Ngöbö ngwäreki.

⁵ Akwa bási niaratre jökrä kákwe ñan Ngöbö mikani ütiäte, aiseite Ngöbö namani romon kräke, abtä bási jökrä krütani bätärekä ja täritäri kä kaibete ji ngrabare temen.

⁶ Kukwe nakaninkä kore nitre israelita kirakirabtä, ye abko ja töikrä nie. Yebtä abko, nikwe ñan ja töi mikadre kukwe käme diän diän nuenbtä ño niaratre kákwe nuenbare ye kwrere abko krörö:

⁷ Bäri käne nitre israelita kirakira ruäre kákwe ngöbö ngwarbe mikani ütiäte jae, ye abko tä tikani krörö Ngöbö Kukweibtä:

Niaratre namani tákänintbe temen, mröre, tomna ñaen ngöbö ngwarbe mikakäre ütiäte jae, bti nikanintre ja mike gure bati bati, *Exodo 32.6*

abko tä tikani Ngöbö Kukweibtä, ye kwrere munkwe ñan ngöbötre ngwarbe mika ütiäte jae. ⁸ Bobukäre abko, niaratre ruäre nikani ja mike gure bati bati ngöbö ngwarbe mikakäre ütiäte jae, abtä Ngöbö mäta namani btätre abko dokwäre ni krütani mili gre bti krämä (23,000) köböitibe, aiseite munkwe ñan ja mikadre gure bati bati niaratrekwe nuenbare ye kwrere.

⁹ Bämäkäre abko, nitre israelita kákwe kukwe nuendre käme Ngöbö rüere angwane, ni Dänkien kákwe mikadre ja ngie nuen ya, ñakare ya abko nitre ruäre tö namani gai. Abtä Ngöbökwé tbi juani, kákwe kwetani, abtä namanintre bren tbihti amne krütani. Ne aiseite munkwe ñan töbika amne nikwe ñan ja gadre Kristobe, nitre israelitakwe nuenbare ye kwrere.

¹⁰ Mräkäre abko, ni ruäre kákwe ñäkäbare Ngöbö rüere, dokwäre Ngöbökwé angele ni kämikaka juani, kákwe niaratre kämikani, aiseite nikwe ñan ñäkädre Ngöbö rüere, niaratre kákwe nuenbare ye kwrere.

¹¹ Ye abko, ni tödekaka Jesubti, kräke kukwe kuin ne nämane tikani kira Ngöbö Kukweibtä abko tä neme bare kä mrä ne näire, aiseite kukwe nakaninkä jökrä kore nitre israelita kirakirabtä ja töikrä nie, yebtä nikwe töbikadre ja käne, abkokäre tä tikani Ngöbö Kukweibtä.

¹² Ne aiseite nire nire käta bike kri, ie ja nena ruen dite Jesu kukweibtä, ne abko kákwe ja ngibia kuin amne ja ñan tuametre nöadre temen kwe.

¹³ Akwa kukwe krörökrörö ngwiandre töre jae munkwe: Kukwe kämekäme tä kite ni jökrä nuente ja käne, kwrere arato kite mun rüere. Akwa kukwe bäri tare jatadre mun rüere angwane munkwe nünandrekä dite jabtä, ñobtä ñan angwane Ngöböta ja kukwei mike täte amne, tä juto biare mun die mike, aiseite kukwe bäri tare kákwe mun nöadre temen, ye ngäniene munkwe kwäräbedre ño abko Ngöbökwé mikadi gare munye, mun rabadre nünenkä dite abkokäre.

Mrö ngöbö ngwarbe juete abko Pablokwe dokwä tákäni

¹⁴ Ne aiseite, ti mräkätre tare tikwe, munkwe ñan ngöbö ngwarbe mika jire chi ngöböre jae amne ye ngäniene mun gitia.

¹⁵ Mun abko ni töbtä töbtä munta nütüre jabtä ruen tie, aiseite tita kukwe era erere niere rükadre gare munye abtä munkwe töbika.

¹⁶ Nita mröre Kristo ngatani ngwiandre töre jae angwane, uba döi, btä nita kuin niere Ngöböye, bti nita ñaen angwane, jändrän jökrä nuenbare Ngöbökwé Kristo däriebti ni kräke abko nita den jakrä ben gwaire. Erere arato, ban kuntibe dikanteta oto kiakia, bti nita kwete, ye abko nita ja gete ketetibe gwaire Kristo ngrabarebe abko nita bä mike,

¹⁷ ñobtä ñan angwane ban kuntibe mun jökrä tä kwete, aiseite ban oto kiakia kabre jatani ban kuntibete, ye kwrere mun abko ni kabre akwa ni ngrabare itibe kwrere.

¹⁸ Ye abko, nire nire käta mröre ngöbö ngwarbe käikitakäre abko ñan tä mröre ketetibe ngöbö ngwarbebe abko munta nütüre akwa, nitre israelita tä dre nuene mika ñäräre munkwe: Niaratre käta jändrän kämike kukwadre Ngöbö käikitakäre, bti ben gwaire tä kwete yete Ngöbö ngwärekri.

¹⁹ Ne abko, ñan ngöbö ngwarbe ütiäte Ngöbö kwrere tita niere abko mun raba nütüre. Erere arato, ñan ngri kukwani ngöbö ngwarbe mikakäre ütiäte abko bäri ütiäte ngri mda mdakrä tita niere abko mun raba nütüre.

²⁰ Akwa nitre ñakare tödekaka Jesubti käta jändrän kämike kukwadre jändrän kädianta jirekäbe ngöbö ngwarbe yeye, ye abko ñan tä bien Ngöbö era metre yeye, akwa era metre tä bien üai käme bikaka ngöböre yeye abko tita niere, aiseite munkwe ñan ja getadre jire chi üai kämenbe, ie ti tö,

²¹ ñobtä ñan angwane mun ñan raba dö ñaen siä kwatibe te ni Dänkien Jesube amne üai kämenbe. Erere arato, mun ñan raba mröre mun mräkä Jesu käbti ben gwaire Jesu ngatani ngwiandre töre jae niara mikakäre ütiäte jae amne mröre nitre tödekaka ñakare Jesubti ben gwaire üai käme mikakäre ütiäte jae.

²² Nikwe nuendre kore, yebtä ni Dänkien mätä rabadre kri nibtä, ñobtä ñan angwane ni rabadre Jesu bä mike ngwarbe nitre tödekaka ñakare Jesubtiye. Erere arato, ni Dänkien bäri dite nikrä abko jürä rabadre nibtä, aisete nikwe ñan ja getadre jire chi üai kämenbe.

Ni tödekaka Jesubti raba ngri mda kwete, niebare Pablokwe

²³ Mdakäre abko munta niere krörö tie kukwe nebtä: Ni tö rabadre dre dre nuein mröbtä, erere tä dbe Ngöbökrä abko munta niere. Ye abko era, akwa jändrän jökrä abko ñakare kuin nuendre abko tita niere. Erere arato, munta niere krörö: Ni tö rabadre dre dre nuein, erere ni raba nuene, akwa ti abko käta niere krörö: Jändrän jökrä nita nuene ye abko ñakare kuin ni mda mda die mikakrä abko tita niere.

²⁴ Ne aisete, nikwe ñan töbikadre jändrän kuin nuenbtä kaibe jakrä, akwa nikwe töbikadre jändrän kuin nuenbtä ni mda mdakrä.

²⁵ Ne aisete, kä ngri rürümoinkrä, kanti munkwe ngri ño ño köka, ye erere munkwe kweta jame. Akwa ngri ye biani ngöbö ngwarbe mikakäre ütiäte ya, ñakare ya, ye munkwe ñan ngwiantari, ñobtä ñan angwane nirekwe biani rürümoindre abko ñakare ütiäte,

²⁶ ñobtä ñan angwane Ngöbö Kukwei tä niere krörö:

Kä temen ne amne jändrän jökrä tä kä nebtä abko ni Dänkien Ngöböta bkäne, *Salmos 24.1* aisete munkwe ñan töbika dikaro btä.

²⁷ Nane ni ñakare tödekaka Jesubti käkwe mun nübai mröre jabe, ye kanti mun tö raba näin amne, mrö ño ño mika kwetadre kwe, ye munkwe kweta kä bube jirekäbe amne, mrö ye jatani mdenkri, munkwe ñan ngwiantari.

²⁸ Akwa nane ni tädre yete käkwe niedre krörö munye: Ngri ne biani ngöbö ngwarbe mikakäre ütiäte, nie kwe munye angwane, munkwe ñan kweta jirekäbe ni kukwe niekä ye okwäbti, niara töi mikakäre nuäre.

²⁹ Ne abko, munkwe ñan ni mda töi mikadre bä jene Kristo rüere, abkokäre munkwe ñan ngri ye kwetadre tita niere, akwa ne ñan mun töi ño ngri kwetabtä, abkobtä tita blite. Ne aisete tikwe dre nuendre, ye abko tä dbe tikrä, akwa ni mda mdakwe ñan ti mikadre ngite kukwe nuenta tikwe yebtä,

³⁰ ñobtä ñan angwane jändrän jökrä kwetata tikwe, btä tita kuin niere Ngöböye, ne aisete tita jändrän kwete, yebtä ni mda mda käkwe ñan ñäkädre blo ti rüere.

³¹ Ne aisete, munkwe mrö ya, munkwe tomna ña ya, munkwe dre dre nuen, erere munkwe nuen jökrä Ngöbö rabadre käikitaninkä abkokäre.

³² Akwa ni israelita amne ni ñakare israelitare, okwäbti munkwe ñan kukwe nuen abtä ja mikadre ngite krübäte kwetre Kristo rüere, abtä ñan tö rabadre tödekai Jesubti. Erere arato, nitre tödekaka Jesubti, okwäbti munkwe ñan kukwe nuen, abtä ja mikadre ngite krübäte kwetre Kristo rüere.

³³ Amne ti abko käre tö ni mda mda moto mikai nuäre, aisete käre tita jändrän kuin känene ñakare au jakrä, akwa ni mda mda rabadre dianintari arato, abko ie ti tö, aisete tita jändrän kuin känene bäri ni mda mdakrä.

11

¹ Ye abko, Kristo käkwe nünabare ño, ye kwrere tita nüne, aisete tita nüne ño, ye kwrere munkwe nuna.

Nitre merire käkwe dre nuendre gätäte

² Ti mräkä, käre tita töre munye amne kukwe diribare tikwe munye, erere munta mike täte jökrä, yebtä tita mun käikitekä.

³ Akwa kukwe rükadre gare metre munye, ie ti tö abko krörö: Ni dokwäta ni ngrabare mike nüne, ye kwrere Kristo tä ji dokwäte ni brare jökrä kräke amne ni brare abko tä ji dokwäte ni merire kräke amne Ngöbö abko tä ji dokwäte Kristo kräke.

⁴ Ye aisete, ni brare rikadre blite Ngöböbe amne rikadre Ngöbö kukwei niere gätäte käkwe dän kitadre ja dokwäbti angwane, Kristo tä ji dokwäte niarakrä abko mikata ütiäte ñakare kwe.

⁵ Akwa meri abko rikadre blite Ngöböbe amne rikadre Ngöbö kukwei niere gätäte ni jökrä ngwäreki angwane, dän ñan kitadre ja dokwäbti kwe ye ngwane, ja dokwä mikata ütiäte ñakare kwe angwane, meri dokwä mikata mutiolire ye kwrere jire bäta neme,

⁶ ñobtä ñan angwane meri ñan tö dän kitai ja dokwäbti blitakäre Ngöböbe amne Ngöbö kukwei niekäre gätäte angwane, tö ja gaire ruen tie. Kore ne ngwane, ja dokwä mikadre mutiolire jirekäbe rabadre ja gaire bäri abkokäre. Akwa dokwä mikadre mutiolire, ye gaire kräke ne ngwane, dän kita ja dokwäbti kwe.

⁷ Akwa ni brare abko käkwe ñan ja dokwä jue mika, ñobtä ñan angwane ni brare abko dätebare bäsi ja kwrere Ngöböke amne ni brare käkwe nünandre Ngöbö mikakäre ütiäte.

Akwa ni merire abko kākwe ja dokwā jue mikadre, ñobtä ñan angwane ni merire dātebare Ngöbökwe ni brare bā mikakāre ütiāte,

⁸ ñobtä ñan angwane ni brare ñan jatani merikri, akwa meri abko jatani ni brarekri.

⁹ Erere arato, ñan Ngöbökwe ni brare dātebare ni merire krāke, akwa ni merire dātebare ni brare krāke Ngöbökwe.

¹⁰ Ne aisetē ni merire kākwe ja dokwā jue mikadre brare kwe bā mikakāre ütiāte amne angeletre kisete ni merire kākwe ja dokwā jue mikadre arato.

¹¹ Ye abko era metre, akwa ni tödekaka Jesubti ngätāite abko, ni brare tā nüne ni merire köböire, aisetē tare nüne kaibe ni brare krāke amne, ni merire tā nüne ni brare köböire, aisetē tare nüne kaibe.

¹² Ye abko, kira kena ni merire dātebare ni brarekri ye abko era bkānā akwa, ni brare abko tā dārere ni merirekri amne, ni jökrā amne jāndrān jökrā abko jatani Ngöbökri.

¹³ Ne abko ni merire rikadre blite Ngöböbe gätāte angwane, ja dokwā jue mikadre ñakare kwe ye abko tā dbe ya, abkobtä munkwe töbika.

¹⁴ Akwa ni brare kākwe ja dokwā drüen ngibiadre nga, ye abko tuen gaidre kri abko erere kukweta ükaninte ni ngätāite.

¹⁵ Akwa ni merire abko kākwe ja dokwā drüen ngibiadre nga, ye abko tā nebe tuen kuin nuäre, ñobtä ñan angwane ni merire abko ie dokwā drüen biani nga Ngöbökwe ja dokwā jue mikakrä.

¹⁶ Akwa nane mun ruäre tö raba ja kwetai tibe kukwe nebtā ye abko raba gare munye, akwa nun amne ni mda mda gätäkā Jesu käfti kā mda mdate, ie kukwe mda mda bā jene tārā ya abko gare ñakare nunye, aisetē nitre merire tā gätāte angwane, tā blite Ngöböbe amne Ngöbö kukwei niere angwane, dān kitadre dokwäbti kwetre. Abko kore se.

Mrö Jesu ngatani ngwiankrä töre jae, btä Pablokwe blitabare

¹⁷ Ti mräkätre, kukwe mda btä tita tārā tike munye, nebtā abko ti ñan bike mun käikitekä, ñobtä ñan angwane munta gätāre Jesu käfti, ye nin tā mun die mike tödeke bäri Jesubti, akwa tā mun die gaenkā bäri. Yebtä abko, tita tārā tike krörö mda munye:

¹⁸ Munta ja ükekrö gätäkāre Jesu käfti angwane, munta ja ñäketbe jene jene, ye niebare käne tie amne ruäre tā nebe era tikrä.

¹⁹ Munta ja ñäketbe jene jene, ye abko rakadrekä kore ruen tie, ñobtä ñan angwane ye kwrere mun mden mden tā tödeke era metre Jesubti rükadre gare abkokāre.

²⁰ Akwa munta gätāre Jesu käfti angwane, munta mröre, ye abko ñan munta mröre ni Dänkien ngatani ngwiankrä töre jae era metre,

²¹ ñobtä ñan angwane mröta niken Jesu ngatani ngwiankrä töre jae angwane, mun ngwian bkänkā krikri ara jire tā niken mrö jakwe kweteta käne amne ni ruäre abko tā neme mröi. Erere arato, ni ruäre tā dö ñaen kabre amne tā neme dröbare.

²² ¿Ju munkwe ñakare mrökrä amne dö ñakrä käne ya? ¿Se ñobtä munta nitre Ngöbökwe mike ngwarbe kore jae amne nitre bobre bobre tödekaka Jesubti abko munta mike ja gaire kore se! ¿Munta kukwe nuene kore, sebtä tikwe dre niedre munye? ¿Tikwe mun käikitadrekä ya? ¿Ñakare jire! Kukwe kore btä tikwe ñan mun käikitadrekä jire chi.

²³ Ye abko, ti Dänkien kākwe diribare tie abko erere tikwe diribareta munye abko krörö: Ni Dänkien Jesu kitani ngise, ye näire deo, ban diani kunti kisete kwe,

²⁴ kākwe kuin niebare btä Ngöböye, bti ötaninbtä kwe, kākwe niebare krörö: Ban ne abko ti ngätā tikwe. Ne mden abko tita bien müre ketadre mun krāke. Käre munkwe ban kweta kore ti ngwiankrä töre jae, niebare kwe.

²⁵ Ye kwrere arato, mröbare ünän jökrā kwetre angwane, uba döi basote diani kisete kwe, bti niebare krörö kwe: Uba döi ne abko kukwe ükaninte btin Ngöbökwe abko rabadre bare täte jökrā ti dāriebti ye bā mikakrä. Ne aisetē munkwe uba döi ña batire batire ti ngwiankrä töre jae, niebare ni Dänkienkwe.

²⁶ Ne aisetē, ni Dänkien jatadreta, ye ngibiare kwärā munkwe ban kweta amne munkwe uba döi ña angwane, ni Dänkien krütani ni täte amne ni krāke abko mun tädi bā mike batire batire abti ni Dänkien jatadi nüketā.

²⁷ Ne aisetē, ban kwetata amne uba döi ñata ni Dänkien ngatani ngwiankrä töre jae, akwa tā ni mräkā Jesu käfti mda mda mike ngwarbe jae, ye nirekwe kwetadre kore angwane, ja mikadre ngite kwe ni Dänkien ngrabare rüere amne ni Dänkien dārie rüere arato.

²⁸ Ye mden kisete, mun rika ban kwete amne uba döi ñaen ni Dänkien ngatani ye ngwiankrä töre jae, känenkri munta ja mike ngite kore mun mräkā Jesu käfti rüere ya, abkobtä munkwe töbika kuin käne,

²⁹ ñobtä ñan angwane ban kwetadre amne uba döi ñadre ni Dänkien ngatani ngwiankrä töre jae, akwa nita ni Dänkien ngrabare ara jire mike ngwarbe, ye ngwane, ja rüere nita ja mike ngite au Ngöböye, dokwäre Ngöbökwe ni mikadi ja ngie nuen.

³⁰ Ye mden kisetse mun kwati bren amne mun di ñakare amne ni ruäre abko krütanina.

³¹ Ne aisetse, nikwe dre nuendre, yebtã níkwẽ tóbíkadre kuin ja kãne au angwane, ni Dãnkien kãkwe ñan ni mikadre ja ngie nuen.

³² Akwa ni Dãnkien kãta ni mike ja ngie nuen, ye abko tã ni tõi den kore mtare, niarakwe ñan ni mikadre ja tare nike ni ñakare tódekaka Jesubti ben gwaire kã mrã angwane, abkokãre tã ni tõi den kore mtare.

³³ Ne aisetse ti mrãkãtre tikwe, mun rika gãtãre mrókãre ni Dãnkien ngatani ngwiankrã tóre jae angwane, munkwe ja ngibia ngãbti kwãrikwãri, abti munkwe mrõ kweta ketetibe gwaire jòkrã.

³⁴ Akwa ni ruäre, ie mrõ raba krúbãte angwane, mrõ kweta kwe ja gwiriete, bti jata gãtãbtã. Ye kwrere gãtãdre kwe abtã Ngóbókwe ñan mikadre ja ngie nuen. Kukwe mda mda tã úkarete abko ti nãinta nebe mun kãnti yete angwane, tikwe úkadite jòkrã.

12

Ngóbõ Úaita ja di bien bãtãkã ngwarbe

¹ Ti mrãkãtre, Ngóbõ Úaita ja di bien bãtãkã ngwarbe ja moto kuinbti nitre tódekaka Jesubti itire itireye, btã munkwe kukwe ngwianintari tie tãrãbtã. Kukwe yebtã mun ñan tõi rabadre mrãme, akwa ye abko rabadre gare metre munye, ie ti tõi abko krõrõ:

² Bãri kãne abko, mun ngãmi tódeke Jesubti, kãnenkri ngóbõ ngwarbe, ye jiebti mun nãmane ja ngwiamna ni mda mdaye, ye gare kuin munye. Ngóbõ ngwarbe ye abko blite ñakare.

³ Ye aisetse, mtare kukwe rabadre gare krõrõ munye, ie ti tõi: Nire nire kãta blite Ngóbõ Úai kóbõire ñan raba niere: ¡Ngürün raba Jesubtã nãre! abko ñan raba niere jire. Erere arato, Ngóbõ Úai Deme kóbõire aibe ni raba niere: ¡Jesu abko Dãnkien Ngóbõ! abko ni raba niere kore, ye abko rabadre gare munye.

⁴ Mdakãre abko, nitre tódekaka Jesubti abko bti Ngóbõ Úaita ja di drãire bãtãkã ngwarbe jene jene, akwa Ngóbõ Úai itibe kãta ja di bien kore.

⁵ Erere arato, sribi tãrã bãtãkã ngwarbe Ngóbõkrã, akwa sribi ye abko nuenta ni Dãnkien itibe kóbõire amne niara krãke.

⁶ Ye kwrere arato, sribitã neme bare bãtãkã ngwarbe ni mda mdakrã, akwa Ngóbõ itibe kãta sribi ngwena bare ni kóbõire amne niara tã ja di mike ni jòkrãbtã abko krõrõ:

⁷ Ni itire itire, ie Ngóbõ Úai kãta ja di bien ja moto kuinbti ni jòkrã die mikakãre abko krõrõ:

⁸ Ni iti, ie Ngóbõ Úai kãta kukwe tóbãtã mike gare blitakãre btã amne, ni mdaye abko Ngóbõ Úai arabe kãta ja di bien kukwe keta kabreta úkaninte ño ño rabadre gare.

⁹ Erere arato, Ngóbõ Úai arabe kãta ja di bien ni mdaye tódekakrã kwatibe Ngóbõbti amne, Ngóbõ Úai arabe kãta ja di bien bãtãkã ngwarbe ni mdaye ni bren bren mikakãre kuinta.

¹⁰ Ni mdaye abko Ngóbõ Úaita ja di bien sribi kri ñan tuabare bãtãkã ngwarbe nuenkãre amne, ni mdaye abko ja di biantã Ngóbõ kukwei niekãre nitre Ngóbõ kukwei niekã kwrere amne, ni mdaye abko ja di biantã úai kãme mikata nũke gare amne Ngóbõ Úai era metre mikata nũke gare ie arato. Erere arato, Ngóbõ Úai kãta ja di bien ni mdaye blitakãre kukwe jenenanbti btã ja tóitikani ñakare kwe amne, ni mda abko ie ja di biantã kukwe jenena ye rúkadre gare, abkokãre Ngóbõ Úai kãta ja di bien ie.

¹¹ Di jòkrã bãtãkã ngwarbe ne abko Ngóbõ Úai itibe ye ara kãta bien nie, akwa tã útiã kãre ñakare nie. Ngóbõ Úai tóta neme ja di biain ño ño nie, ye erere tã drãire ni tódekaka Jesubti itire itire bti.

Jesu ngrabare itibe akwa kiakia ngrabare kabre

¹² Ñobtã Ngóbõ Úai kãta ja di bien bãtãkã ngwarbe jene jene abko ti bike bã mike ni ngrabarebtã. Mun tódekaka Jesubti abko ti bike bã mike ni kiakia ngrabare kwrere abko nere: Ni ngrabare abko itibe, akwa ni kiakia abko kabre amne, ni kiakia ngrabare kabre, ye tã ni itibe ngrabare. Ye kwrere, Kristo ngrabare itibe, akwa nitre tódekaka Jesubti itire itire tãrã kabre abko niara kiakia ngrabare.

¹³ Ne aisetse, era metre ni abko bãtãkã ngwarbe jene jene. Ruäre abko ni israelitare amne ruäre abko ñakare israelitare; ruäre klabore amne ruäre abko klabore ñakare, akwa ni jòkrãbtã Ngóbõ Úai itibe nũkani tãte ni mikakãre Jesukristo ngrabare itibe kwrere amne, Ngóbõ Úai itibe abko ni jòkrã kãkwe kani ngãbti.

¹⁴ Era metre ni ngrabare itibe akwa, ni kiakia ngrabare abko tãrã kabre ni ngrabare mikakrã tãte.

¹⁵ Ye abko ti bike bã mike krõrõ: Ni ngoto kãkwe niedre, ¡A! Ti ñakare ni kise, aisetse tita ni ngrabare bãre mento, niedre kwe, ¿ye ngwane rabadre ni ngrabare bãre mento ya? ¡Ñakare!

¹⁶ Erere arato, ni olo kākwe niedre, ¡A! Ti ñakare ni okwä, aiseté tita ni ngrabare bäre mento, niedre kwe, ¿ye ngwane rabadre ni ngrabare bäre mento ya? ¡Ñakare!

¹⁷ Ye abko, ¿ni ngrabare rabadre ni okwärebe jökrä angwane, ni kukwei jaradre ño nie? Erere arato, ¿ni ngrabare rabadre ni olorebe jökrä angwane, jändrän rä rabadre ruen ño nie?

¹⁸ Akwa ni kiakia ngrabare, ye Ngöbö tö namani mikai mdente mdente, erere mikani kwe au ja töi jentü.

¹⁹ Akwa ni kiakia ngrabare rabadre ketetibe ja bä kwrere jökrä angwane, ni ngrabare ñan rabadre kuin täte.

²⁰ Ye mden aiseté, ni kiakia ngrabare tärä kabre bätäkä ngwarbe, akwa ni ngrabare abko itibe, btä ni kiakia ngrabare tä ketetibe jökrä. Ye kwrere Ngöbökwé kukwe mikanintbe munbtä arato.

²¹ Ye aiseté, ni okwä ñan raba niere ni kiseye: ¡A! Ma ütiäte ñakare nünankrä tie, ñan raba niere kore. Erere arato, ni dokwä ñan raba niere ni ngotoye: ¡A! Ma ütiäte ñakare nänkrä tie, ñan raba niere kore,

²² ñobtä ñan angwane ni kiakia ngrabare tä nebe tuen di ñakare nie, akwa ye abko bäri ütiäte nikrä.

²³ Amne ni kiakia ngrabare ñan tä nebe tuen nuäre nie, ye nita ükete bäri nuäre. Erere arato, ni kiakia ngrabare, btä nita ja gaire, ye ni ñan tö mikai tuare ni jökräye, abkokäre nita ngwä kite bäri kuin amne nita ja jue mike kuin bäre bäre,

²⁴ akwa ni ngrabare tuen kuinquin abko ngibiata ñakare kore nikwe amne nita ja jue mike ñakare arato. Ye abko, Ngöbökwé ni ngrabare ükaninte, ni kiakia ngrabare tuen ütiäte ñakare nie rabadre mikani bäri ütiäte nikwe.

²⁵ Erere arato, ni kiakia ngrabare ñan rabadre ja ñäketbe jene jene, akwa ni kiakia ngrabare mden mden tuen ütiäte amne mden mden tuen ütiäte ñakare, ye töi rabadre ja di mikabtä kwärikwäri, abkokäre Ngöbökwé ükaninte kore.

²⁶ Ne aiseté, ni kia ngrabare keteti tä ja tare nike angwane, ni ngrabare tä ja tare nike jökrä gwaire. Ye kwrere arato, ni kia ngrabare keteti mikata ütiäte angwane, ni ngrabare jökrä btä kätä nebe nuäre gwaire jökrä.

²⁷ Ye kwrere mun jökrä gwaire abko Kristo ngrabare ara amne, ni kiakia ngrabare tärä, ye kwrere mun itire itire tä Jesu ngrabare kiakiare.

²⁸ Ye aiseté, nitre gätäkä Jesu käbti ngätäite Ngöbö tö namani ni krörökrörö tuai abko erere mikani kwe abko krörö: Mtare Jesu kukwei ngwianka mikani käne kwe. Bobukäre abko, nitre Ngöbö kukwei niekä. Bämäkäre abko, nitre Ngöbö Kukwei dirikä mikani kwe. Yebti nitre sribi kri ñan tuabare nuenkä, nitre ni bren bren mikaka kuinta amne, nitre ni mda mda die mikaka amne, nitre ni mda mda jie ngwianka, amne nitre blitaka kukwe jenenanbti, ye abko mikani jökrä kore nitre gätäkä Jesu käbti ngätäite.

²⁹ Ye abko, ñan ni jökrä tä Jesu kukwei ngwianka amne ñan ni jökrä Ngöbö kukwei niekä amne ñan ni jökrä tä Ngöbö Kukwei dirikä amne, ñan ni jökrä tä sribi kri ñan tuabare nuene.

³⁰ Erere arato, ñan ni jökrä ni bren bren mikakata kuinta amne, ñan ni jökrä tä blite kukwe jenenanbti amne, ñan ni jökrä abko ie kukwe jenena tä nüke gare niekäre ni mda mdaye.

³¹ Akwa Ngöbö Üai di bäri ütiäte ütiäte mun die mikakäre, ye munkwe kánantari kisere jakrä.

Ja taredre kwärikwäri abko bäri ütiäte

Akwa jändrän bäri kuin ütiäte Ngöbö Üai di bätäkä ngwarbe ye kräke, jiebti ti bike ji tike käne abko krörö:

13

¹ Ni kukwe bätäkä ngwarbe kä nebtä, erere ti rabadre blite amne angeletre kukwe ño ño, erere ti rabadre blite, akwa tita ni mda mda tarere ñakare ne ngwane, balinkwata ngö kri ngwarbe, kwrere jire ti rabadre amne bandereta ngö mikata ngöbö ngwarbe mikakrä ütiäte, kwrere jire ti rabadre ngwarbe.

² Erere arato, Ngöbö Üai köböire ti di rabadre Ngöbö kukwei niekäre amne Ngöbö Üai köböire kukwe tiebetiebe Ngöbökwé rabadre gare jökrä tie amne, Ngöbö Üai köböire kukwe kabre bätäkä ngwarbe tä ükaninte ño rabadre gare jökrä tie amne Ngöbö Üai köböire tita tödeke kwatibe Ngöböbti, köböire ti rabadre ngitio kri juen nebe kä mdabti, akwa tita ni mda mda tarere ñakare ne ngwane, ti ütiäte ñakare jire.

³ Mdakäre abko, jändrän tädre tikwe, erere tikwe dräidre jire jökrä ni bobre bobrebtü amne, tikwe ja ne ara jire biandre kukwadre sribi Ngöbökwékrä, akwa tita ni mda mda tarere ñakare ne ngwane, ¿tikwe dre ganaindre jakrä?

⁴Nita ni mda mda tarere metre abko nere: Nita ni mda mda tarere angwane, nita jändrän jökrä ngbiare bätärekä ni mdabtä amne nita ja moto mike kuin ni mdakrä. Nita ni mda mda tarere angwane, ñan nita nüne ni ja ribare kwrere jändrän jökräbtä jändrän diankakäre jakrä amne, ñan nita ja bä mike ütiäte amne ñan nita bike kri.

⁵Nita ni mda mda tarere angwane, ñan nita ñäke diän diän mdaye mikakäre ja gaire amne ñan nita jändrän kuin kënene kaibe jakrä. Erere arato, nita ni mda mda tarere angwane, ñan nita nebe romon jötrö ngwarbe ni mdakrä amne ñan ni mätäta neme kärekäre ja dokwäre ni mdabtä.

⁶Mdakäre abko, nita ni mda mda tarere angwane, kukwe diän diän Ngöbö rüere amne ni mda mda rüere, ye käita neme nuäre ñakare nibtä, akwa kukwe kuin era metre abko käita nebe nuäre nibtä.

⁷Nita ni mda mda tarere angwane, nita juto biare jändrän jökrä ni rüere kaen ngäbti ni mda mda ngibiakrä amne, nita tödeke janknu Ngöböbti amne ni mda mdabtä. Erere arato, nita ni mda ngibiare bätärekä jändrän jökräbtä amne nita di krüte ñakare jändrän jökräbtä.

⁸Nita ja tarere kwärikwäri ye abko rabadi kärekäre, akwa kukwe niebare nitre Ngöbö kukwei niekäkwe abko köböitira jire näin ta amne, ñan blita rabadre kärekäre kukwe jenenanbti Ngöbö Üai köböire. Erere arato, ni ye ie kukwe kabre tä ükaninte tä gare Ngöbö Üai köböire, ye näin ta,

⁹ñöbtä ñan angwane ni ye ie kukweta neme gare braibe amne, ni Ngöbö kukwei niekä ye abko gare ñakare täte.

¹⁰Ne aiseté, ni Dänkien Jesu rükadita angwane, kukwe era erere mikadi gare täte kwe nie, aiseté kukwe ñakare täte era metre Ngöböbtä, ye ñan rabadi ütiäte mda.

¹¹Ye abko, ti bike bä mike krörö: Ti nämane chi angwane, ti nämane blite, ti nämane töbike amne ti nämane töi ngitiekä ngäbäkre chi kwrere. Akwa ti namanina ünän angwane, jändrän ngäbäkre chikwe namani jökrä ja jiebti tie. Ye kwrere, kukweta gare mtare tie abko kukwe braibe amne, Jesu rükadita angwane, rabadi jökrä ja jiebti tie.

¹²Mdakäre abko, ti bike bä mike jene mda abko krörö: Mtare jändrän jökrä tuen ñakare kuin nie, aiseté ñai ngututüre te jändrän bä tuen diore kwrere, aibe tuen diore nie, ye kwrere kukwe keta kabre gare ñakare metre nie mtare, akwa köböitira jire nikwe ja tuadi gwärere Ngöböbe angwane, kukwe rabadi gare metre nie. Mtare abko ti töi braibe Ngöböbtä, akwa köböitira jire Jesu rükadita angwane, ti gare kuin metre Ngöböye mtare, ye kwrere Ngöbö rükadi gare tie.

¹³Ye abko, jändrän ketamä rabadre ütiäte kärekäre abko krörö: tödekadre kwatibe Ngöböbti, Kristo jatadreta ye ngibiadre ngäbti amne ja taredre kwärikwäri. Akwa jändrän ketamä, ye ngätäite abko ja taredre kwärikwäri abko bäri ütiäte.

14

Kukwe jökrä nieta gätäte rükadre gare ni jökräye

¹Ja taredre kwärikwäri, ye jiebti mun rankwa kisere janknu. Erere arato, Ngöbö Üai di bätäkä ngwarbe, ye kändantari munkwe jakrä, akwa Ngöbö Üai di Ngöbö kukwei niekäre, ye abko bäri kändantari munkwe,

²ñöbtä ñan angwane ni blitaka kukwe jenenanbti ye abko tä blite Ngöbö aibe ben amne ñakare tä blite nitre gätäkä yebe. Niarata kukwe ütiäte ükani tiebe jenena niere Ngöbö Üai diebti, akwa kukwe ñan tä nebe nuke gare ni mda mdaye gätäte.

³Akwa ni Ngöbö kukwei niekä abko tä blite nitre gätäkä Jesu käbti kukwere angwane, kukwe dirita kwe ye tä nitre gätäkä Jesu käbti die mike nüne bäri Jesukrä, amne tä töi den näin janknu Jesube amne tä kä mike nuäre btätäre.

⁴Akwa ni blitaka kukwe jenenanbti Ngöbö Üai diebti abko tä blite angwane, tä ja die mike au, akwa ni Ngöbö kukwei niekä tä blite nitre gätäkä Jesu käbti die mike jökrä.

⁵Mun jökrä rabadre blite kukwe jenenanbti näre, akwa munkwe Ngöbö kukwei niedre abko ie ti tö bäri, ñöbtä ñan angwane Ngöbö kukwei niedre ye abko bäri ütiäte blitadre kukwe jenenanbti ye kräke. Akwa ni blitaka kukwe jenenanbti tä dre niere, ye kwitadre nitre gätäkä Jesu käbti kukwere niaratre die mikakäre, ne ngwane rabadre kuin.

⁶Ti mräkätäre, ti bike kukwe bä mike mda munye abko krörö: Ti rikadre basare munye angwane, Ngöbö Üai diebti kukwe jenena nuke gare ñakare munye, bti tikwe blitadre munbe, ye käkwe ñan mun die mikadre jire chi nüne bäri Jesukrä, ñöbtä ñan angwane kukwe jenena ye gare ñakare munye. Akwa Ngöböke kukwe tiebe mikani gare tie, ye tikwe niedre munye mun kukwere amne, kukwe töbtä Ngöbö Kukweibtä, yebtä tikwe blitadre munbe mun kukwere amne tikwe Ngöbö kukwei niedre munye, ye käkwe diridre munye mun kukwere, ye abko rabadre mun die mike nüne bäri Jesukrä.

⁷ Erere arato, drü bätäkä ngwarbe abko käta kukwe ye bä mike arato abko krörö: Tolero jükadre ngwarbe amne arpa tákadre ngwarbe, ye ngwane dre jükata metre amne dre tákata metre ñan rükadre gare nie.

⁸ Erere arato, ¿nitre rükä, kräke trombeta jükata mikakäre juto rikakäre rüre, akwa ñan jükadre metre angwane, ja mikadre ño juto kwetre?

⁹ Ye kwrere tä nakenkä munbtä. ¿Kukwe nuke gare kuin, bti munkwe ñan blitadre, ye abko munta dre niere abko rükadre gare ño ni mda mdaye gätäte? Mun kukwei ñan rükadre gare, ye ngwane munta blite kaiibe ngwarbe kwäräkwarä.

¹⁰ Mdakäre abko, ni kukwei tärä keta kabre kä nebtä, akwa ni kukwei kwatirekwatire, bti dre nieta abko tä mike gare.

¹¹ Akwa ni mdakwe ñäkädre ja kukwere akwa, dre niedre kwe tie ñan rükadre gare tie, ye ngwane ti rabadre chui menteni kwrere kräke amne, niara rabadre chui mentenine tikrä arato.

¹² Ne aisete, mun tö Ngöbö Üai di tuai bätäkä ngwarbe jakrä, ye abko kuin, akwa mun di rabadre nitre gätäkä Jesu käbti die mikakäre bäri abko munkwe kärä kisere jakrä Ngöböye.

¹³ Ne aisete, Ngöbö Üai diebti nire nire käkwe blitadre kukwe jenenanbti angwane, Ngöbö Üai käkwe ja di biandre mae kukwe ye kwitakäre mun kukwere, munta dre niere rükadre gare munye abko munkwe kärä Ngöböye.

¹⁴ Ti mräkätre, Ngöbö Üai diebti tikwe blitadre kukwe jenenanbti Ngöböye, ye ngwane tita blite ja üai aibehti Ngöböye, akwa ñakare tita blite ja töibti.

¹⁵ ¿Yebtä abko, tikwe ja nuendre? Tikwe blitadre Ngöböye angwane, tikwe blitadre ben ja üai aibehti kukwe jenenanbti. Erere arato ja üaibti amne ja töibti ben gwaire ja kukwere tikwe blitadre ben arato. Erere arato, tikwe kantadre Ngöböye kukwe jenenanbti ja üai aibehti, erere arato ja üaibti amne ja töibti ben gwaire ja kukwere arato.

¹⁶ Makwe ñan nuendre kore ne ngwane, ma tädre Ngöbö käikitekä ja üaibehti kukwe jenenanbti angwane, ni tödekaka Jesubti mda mda, ie kukwe makwe ñan tä nuke gare tädre gätäbtä ma kukwei nuen, käkwe ma kukwei nuadre, ye ngwane niara ñan raba ja töi mike gwaire mabe kuin niekäre Ngöböye, ñobtä ñan angwane mata dre niere ñan rükadre gare ie aisete.

¹⁷ Ye aisete, nane mata blite bä nuäre Ngöböye amne mata kuin niere ie kukwe jenenanbti, akwa rabadre tuen ngwarbe ni mda mdaye amne mata die mike ñakare.

¹⁸ Ye abko, Ngöbö Üai käkwe ja di biani tie, aisete kukwe jenenanbti tita blite bäri kabre mun ngwä, yebtä tita kuin niere Ngöböye.

¹⁹ Akwa gätäte abko, bäri ti töta neme kukwe niei kwärikebe ja kukwere, kukwe ye rükadre gare kuin ni jökräye abko rabadre bäri kuin, ñobtä ñan angwane kore kukwe dirita tikwe rükadre gare metre ni mda mdaye aisete. Akwa tikwe kukwe niedre mili kwä gätä kukwe jenenanbti, ye abko ñan rükadre gare, aisete ni mda mda ñan die mikadre kore kwe.

²⁰ Ti mräkätre, blitadre ni kukwe jenenanbti amne Ngöbö kukwei niedre ño, yebtä munkwe ñan töbika ngäbäre kiakia kwrere, akwa jändrän kämekäme Ngöbö rüre, yebtä ngäbäre kiakia tä töbike ñakare, erere mun töi raba ngäbäre kiakia kwrere. Amne ni ünän ünän käkwe töbika kuin ja käne, ye kwrere munkwe töbika blite ni kukwe jenenanbti yebtä amne Ngöbö kukwei niebtä arato,

²¹ ñobtä ñan angwane Ngöbö Kukweita tikani krörö kukwe jenenanbti:

Ni menteni kukwe bä jene, bti tikwe blitadi nitre israelitabe niaratre mikakäre mokre,

ñobtä ñan angwane ni menteni, ye köböire ti bike nitre israelita mike ja tare nike.

Amne ni nünanka kä mdate, yebti tikwe blitadi nitre israelitabe, akwa ti kukwei ñan mikadre ütiäte kwetre, niebare ni Dänkien Ngöbökwé, *Isaias 28.11-12*

abko nieta Ngöbö Kukweibtä.

²² Ne aisete, nita blite kukwe jenenanbti, ye abko ni ñakare tödekaka Jesubti, kräke blitata kore abko Ngöböta yete niaratre ngätäte bä mikata, aisete ye abko ñakare ni tödekaka Jesubti kräke. Akwa Ngöbö kukwei nieta ye abra ni tödekaka Jesubti kräke amne Ngöböta ja moto mike kuin kräke bä mikata, aisete ye abko ñan blitata ni ñakare tödekaka Jesubti kräke.

²³ Tita niere kore, ñobtä ñan angwane nitre tödekaka Jesubti tä ja üekrö jökrä gätäbtä Jesu käbti angwane, ni jire jökrä tädre blite kukwe jenenanbti, ye btäräbe ni ie Ngöbö Kukwei gare ñakare rikadre nebe yete amne ni ñakare tödekaka Jesubti rikadre nebe arato angwane, mun jökrä dokwäbti kä jäme nitre ñäkäkä bä jene kore ngöbötre ngwarbe käikitakakäre kwrere jire rabadre nütüre munbtä.

²⁴ Akwa mun jökrä tädre Ngöbö kukwei niere angwane, ni ñakare tödekaka Jesubti amne ni ie Ngöbö Kukwei gare ñakare rükadre gätäte, käkwe mun kukwei nuadre ja kukwere angwane, mun kukwei rabadi era kräke amne, mun jökrä tädi dre niere, ye rükadi gare ie amne rabadi töbike jabtä au, ja rabadre ruen ngite ie Ngöbö ngwäreki amne,

²⁵ kukwe kämekäme tä kaibe töibtä ye abko rabadre kä merete jökrä Ngöbö ngwäreki, rabadre ruen ie amne, rabadi ngukudokwäbti temen Ngöbö mike ütiäte jae. Ye ngwane, Ngöböta era metre bkänä mun ngätäite niedi kwe, käkwe tödekadi Ngöböbti, aisete munkwe Ngöbö kukwei niedre abko bäri ütiäte blita kukwe jenenanbti ye kräke.

Ni jökrä käkwe blitadre itire itire ja täritäri

²⁶ Ne aisete, ti mräkätre, munta gätäre Jesu käbti angwane, munkwe dre nuendre abko ti bike niere munye abko krörö: Ni ruäre käkwe kanta, ni ruäre abko käkwe Ngöbö kukwei diri amne, ni mda abko ie Ngöbökwie kukwe tiebe mikani gare abko mika gare kwe amne, ni mda abko käkwe blita kukwe jenenanbti amne ni mda abko käkwe kukwe jenena ye kwita mun kukwere ni mda mda kräke. Akwa jändrän jökrä, ye munkwe nuen ja die mikakäre kwärükwäri.

²⁷ Akwa mun rika blite kukwe jenenanbti, ye ngwane ni nibu, ni nimä aibe käkwe blita itire itire ja täritäri, akwa ñakare gwaire jökrä batibe. Angwane kukwe jenena ye kwitadre mun kukwere.

²⁸ Akwa ne kwrere ni ñakare kukwe jenena ye kwitaka mun kukwere, ye ngwane ni blitaka kukwe jenenanbti ye käkwe ñan blita ni jökrä okwäbti gätäte, akwa blita kaibe kwe Ngöböbe.

²⁹ Ne kwrere arato, nitre Ngöbö kukwei niekä abko tärä, ye ngwane ni nibu, ni nimä käkwe Ngöbö kukwei nie itire itire ja täritäri amne, nitre Ngöbö kukwei niekä ye tä Ngöbö kukwei niere metre ya abko ni mda mda käkwe mika ñäräre.

³⁰ Akwa nane nita täkänintbe temen yete, ye ie Ngöbökwie ja kukwei tiebe mika gare ni jökrä kräke mda angwane, ni Ngöbö kukwei niekä käne ye käkwe kada keta jirekäbe, käkwe kä biandre ni mda yeye.

³¹ Ne kwrere ni jökrä käkwe nuendre angwane, ni itire itire ie kä rabadre Ngöbö kukwei niere ye abko käkwe nitre gätäkä Jesu käbti ye töi tikadi amne die mikadi nüne bäri Ngöbökrä.

³² Akwa nire nire ie ja di bian Ngöbö Üaikwe Ngöbö kukwei niekäre, nitre ye abko di tärä ja töi ngibiare blitakäre jäme ja täritäri amne ñakare batibe jökrä gwaire,

³³ ñöbtä ñan angwane Ngöbö abko Ngöbö jäme, akwa ñakare Ngöbö kä ngwiankrä nokre ni töi kwitakäre kwärükwäri aisete. Ye kwrere nitre gätäkä Jesu käbti kä ketareketare temen këta nuene kore, aisete munkwe nuendre kore arato.

Kukwe nitre merire kräke

³⁴ Kukwe mdara jire ti bike niere abko krörö: Nitre tödekaka Jesubti tä gätäre Jesu käbti, ye kënti nitre merire käkwe ni kukwei nua kä bube jirekäbe, ñöbtä ñan angwane nitre merire käkwe ñan blitadre gätäte abko Kukwe Biani Ngöbökwie Moiséye këta niere, ye kwrere nitre merire raba kwekbe ni kukwei nuen.

³⁵ Akwa nitre merire tö raba kukwe ño ño gai angwane, ngwiantari kwe kwäräiye ja gwiriete, ñöbtä ñan angwane nitre tödekaka Jesubti tä gätäre Jesu käbti, ye kënti merikwe blitadre abko gaidre kri.

Kukwe nämane nakenkä gätäte, yebtä Pablokwe bliitabare mrä

³⁶ Angwane Ngöbö Kukwei ye abko jatani kena mun köböire munkwe ñan nütü. Erere arato, ñan mun aibe käkwe Ngöbö Kukwei kani ngäbti, mun raba nütüre.

³⁷ Mun mden ie ja ruen Ngöbö kukwei niekä amne Ngöbö Üai tä täte munbtä raba ruen munye, ye ngwane tita kukwe tike tärä nebtä ne abko ñan tita nuemna akwa, ni Dänkien këta nuemna era metre, ye rükadi gare munye.

³⁸ Akwa ñan rükadre gare munye angwane, munkwe trö kwitadre ni Dänkienye, ye ngwane ni Dänkienye trö kwitadi munye arato.

³⁹ Ne aisete ti mräkätre tikwe, Ngöbö Üai di rabadre munkrä Ngöbö kukwei niekäre, ye abko munkwe känantari kisere amne, nire nire rika blite kukwe jenenanbti, ye munkwe ñan dokwä täkä kän.

⁴⁰ Akwa munkwe jändrän jökrä nuen kuin era metre jökrä ja täritäri.

15

Jesu nükaninta nire era metre

¹ Ti mräkätre, mtare kukwe kuin Jesubtä tikwe mikani gare munye, ye ti tö mikaita töre munye. Ngöbö kukwei kuin Jesubtä, ye mden munkwe kani ngäbti amne mun tä näin janknu btä mtare.

² Ye kwrere munkwe nändre janknu kore ne ngwane, Ngöbö kukwei kuin Jesubtä tikwe diribare munye, ye köböire mun rabadi dianintari. Akwa munkwe ñan nändre janknu ne ngwane, munkwe kukwe kuin Jesubtä mikani era jae akwa ngwarbe.

³ Kukwe mikata ütiäte Jesubtä ni jökrä kwe diribare tie abko erere tikwe diribare munye abko krörö: Kristo krütani ni ngite Ngöbö rüere ye diankäre nibtä abko nämane tikani kore Ngöbö Kukweibtä, ye kwrere nakaninkä.

⁴ Erere arato, Kristo doboi mikani, abti köbömäkäre Ngöbö kwe mikaninta nire abko nämane tikani kore Ngöbö Kukweibtä, ye kwrere nakaninkä.

⁵ Yebti Kristokwe ja mikani tuadre Pedroye, bti ja mikaninta tuadre kwe nitre ja töitakaka ben ni jätäbti nibu yeye.

⁶ Abti ja mräkäre Jesu käbti sientö krärike jire, ie ja mikani tuadre batibe jökrä kwe. Ja mräkäre Kristo tuakatuaka ye tä nüne kwati akwa, ruäre abko krütanina.

⁷ Yebti ja mikani tuadre kwe Santiagoye amne nitre niara kukwei ngwianka mda mdaye.

⁸ Mrä, Kristokwe ja mikani tuadre tie arato, aiseite ngäbäre däredre käi ngämi nuke angwane, tä däre kame, ye kwrere nakaninkä tibtä.

⁹ Ye mden kisete, nitre Jesu kukwei ngwianka jökrä, ye ngätäite ti abko bäri ütiäte ñakare. Ti abko Jesu kukwei ngwianka ñan niedre tibtä, ñobtä ñan angwane nitre gätäkä Jesu käbti, jiebtä ti nämane näin kisere mikäkäre ja tare nike.

¹⁰ Akwa tita ño mtare ne abko Ngöbö kwe ja moto mikani kuin tikrä abko köböire tita kore. Ngöbö kwe ja moto mikani kuin tikrä, ye abko ñakare nuenbare ngwarbe kwe, ñobtä ñan angwane tita sribire bäri nitre Jesu kukwei ngwianka mda mda ngwä, ye abko ñan tikwe nuenbare kaibe ja di jenbti, akwa Ngöbö kwe ja moto mikani kuin tikrä käkwe ti die mikani.

¹¹ Akwa tikwe sribibare bäri ya o niaratre ya abko ñakare ütiäte, akwa kukwe bäri ütiäte abko ti amne nitre Jesu kukwei ngwianka mda mda käkwe kukwe diribare ja kwrere jökrä, ye mden abko munkwe mikani era.

Nitre tödekaka Jesubti abko Ngöbö kwe mikadita nire era metre

¹² Akwa Kristo mikaninta nire Ngöbö kwe abko nunta dirire, ÷ye ñobtä abko ni krütanikrütani ñan rükadreta nire abko mun ruäreta niere?

¹³ Ni krütanikrütani ñan rükadreta nire, ye ngwane Ngöbö kwe Kristo mikaninta nire ñakare arato.

¹⁴ Amne Ngöbö kwe Kristo mikaninta nire ñakare, ye ngwane kukwe dirita nunkwe abko ngwarbe, ütiäte ñakare. Erere arato, munta tödeke ngwarbe Kristobti.

¹⁵ Ngöbö kwe Kristo mikadreta nire ñakare bkänä, akräke nun rabadre kukwe ngwarbe niekä Ngöböbtä, ñobtä ñan angwane Ngöbö kwe Kristo mikaninta nire ñakare, akwa mikaninta nire kwe nun tädre niere, ye ngwane nun tädre ñäke ngwarbe Ngöbö rüere. Mdakäre abko, ni krütanikrütani ñan rükadreta nire bkänä, ye ngwane Ngöbö kwe Kristo mikaninta nire ñakare arato,

¹⁶ ñobtä ñan angwane ni krütanikrütani ñan rükadreta nire bkänä, ye ngwane Ngöbö kwe Kristo mikaninta nire ñakare arato.

¹⁷ Erere arato, Ngöbö kwe Kristo mikaninta nire ñakare, ye ngwane munta tödeke ngwarbe bti amne mun tä ngite janknu Ngöböye abti kä nuke mtare.

¹⁸ Mdakäre abko, Ngöbö kwe Kristo mikaninta nire ñakare, ye ngwane nitre tödekaka Kristobti krütanikrütani ye abko ñakare dianintari, akwa tä nianinte janknuäkäre arato.

¹⁹ Kore ne ngwane, nükwe nünandre kä nebtä aibe kräke nita tödeke Kristobti ne ngwane, ni jökrä ngätäite, ni abko bäri bobre jakän.

²⁰ Akwa Ngöbö kwe Kristo mikaninta nire, ye abko era bkänä amne, Ngöbö kwe nitre tödekaka Jesubti krütanikrütani mikadita nire bkänä, abkökäre Jesu mikaninta nire ni jökrä tödekaka niarabti ye känenkri.

²¹ Ngöbö kwe nitre tödekaka Jesubti krütanikrütani mikadita nire arato abko gare krörö nie: Kena ni iti kä Adän käkwe ja mikani ngite Ngöbö rüere, ye köböite ni jökrä tä krüte, ye kwrere arato ni itibe köböire Ngöbö kwe ni tödekaka Jesubti krütanikrütani erere mikadita nire.

²² Ye abko, Adän köböite ni jökrä kä nebtä tä krüte, ye kwrere arato Kristo köböire Ngöbö kwe ni jökrä tödekaka Kristobti mikadita nire.

²³ Akwa Ngöbö kwe kukwe ükaninte, erere rabadi bare ja täritäri abko krörö: Ngöbö kwe Kristo mikaninta nire käne, yebti Kristo jatadita angwane, ni kwekwe tödekaka niarabti abko rükadita nire mda abko rabadi bare ja täritäri.

²⁴ Kristo jatadita angwane, üai käme tä dänkiene nibtä kä nebtä amne jändrän mda mda üai käme kwrerekrere abko gadikä jire jökrä kwe. Abti kä mrä angwane, gobran mikanina gare Ngöbö kwe ie, ye mikadita Rün Ngöbö kisete kwe.

²⁵⁻²⁷ Ngöbö kwe jändrän jökrä mikani gare Kristoye, aiseite Kristo rabadi gobrane abti rüe jökrä ye mikadi ja ngoto täni kwe. Yebti Kristokwe gata mikadi mrä ja ngoto täni ne abko Kristo rüe mrä ganaindi kwe. Akwa jändrän jökrä rabadi Kristo ngoto täni tita niere ne abko, ñakare tita blite Ngöbö ara jire btä, ñobtä ñan angwane Ngöbö kwe jändrän jökrä mikani gare Kristoye.

²⁸ Ne aisetse jändrän jökrä rabadi Kristo ngoto täni angwane, Kristo Ngöbö Odei ara jire käkwe ja mikadita gare Ngöböye, ñobtä ñan angwane Ngöbökwé jändrän jökrä mikani Kristo ngoto täni. Ye ngwane, Ngöbö aibe rabadre gobrane jändrän jökräbti.

²⁹ Mdakäre abko, ¿ni krütanikrütani ñan rükadreta nire ni ruäre tä niere, se drekäre abko ni ruäre tä ja ngökö ñöte ni krütani diäre? ¿Se ñan tä ja ngökö ngwarbe ñöte ya!

³⁰ Erere arato, ¿Ngöbökwé ñan ni krütanikrütani mikadreta nire angwane, drekäre köbö kwatirekwatire nunta ja kite kukwe krübätete?

³¹ Ye abko, munta näin Kristo Jesu ni Dänkienbe, ye käita nebe nuäre tibtä era metre. Ye kwrere jire, era metre käre köbö kwatirekwatire tita kä krübätete rätäninkä gatabti.

³² Ye abko, jändrän ngwarbe romon romon, ben rüdre, kwrere jire tikwe rübare nitre krübäte krübäte ben juta Efeso nete, ¿ye tikwe nuendre ngwarbe ja mikakäre kri, ye ngwane dre rükadre tie rübtä kore? ¿Ngöbökwé ñan ni krütanikrütani mikadreta nire angwane, ye ñan tikwe rüdre ngwarbe ya? Ngöbökwé ñan ni krütanikrütani mikadreta nire angwane, ¿Ñane ni krütadre jetbe, aisetse ari mröre kri, ari dö ñaen kabre! abko ni ruäre tä niere.

³³ Akwa munkwe ñan ja ngökamna kukwe yebtä, ñobtä ñan angwane “ni kukwe muko diän diän ben ni töi kuin metre tä ja gete angwane, ni töi kuin metre abko tä neme diän arato,” nieta era metre, aisetse munkwe ñan ja ngökamna kore.

³⁴ Akwa munkwe töbikata kuin ja käne, käkwe ñan ja mika ngite mda, ñobtä ñan angwane mun ruäre, ie Ngöbö gare ñakare. Yebtä mun rabadre ja gaire, abkokäre tita ñäke kore munye.

Ni rükadita nire angwane, ni ngrabare rabadi ño

³⁵ Mdakäre abko, mun ruäre käta kukwe ne ngwentari krörö jae kwärikwäri: ¿Ni krütanina se abko rükadreta nire ño sere? ¿Ni krütani rükadreta nire angwane, rabadi ño ngrabare ruen? abko munta ngwentari jae.

³⁶ ¿Ye ño abko mun töi ñakare dikaro käta kukwe ngwentari kore jae ye! Ye abko ti bike nura bä mike ni ngrabarebtä. Nura nökata ye gütadrete ñakare angwane, mu ñan rükadre.

³⁷ Ye abko, trigo nurai amne nura mda mda nökata, ye abko ñan nura mu ara jire nökata, akwa nura ara jire nökata.

³⁸ Yebti nura ketareketare Ngöbö töta nebe mu mike niren ño ño, erere tä mike niren jene jene, aisetse ñakare ja kwrere jökrä ngrabare.

³⁹ Jändrän jökrä abko ñakare ja kwrere jökrä ngrabare garera nie abko krörö: Ni, jändrän ngwarbe, nukwä amne gwa ye abko bä jene jene jökrä ngrabare.

⁴⁰ Ye kwrere arato, jändrän kä käinbti amne jändrän kä temenbtä abko bä ñakare ja kwrere jökrä, akwa bä jene jene. Akwa jändrän kä käinbti abko bä nuäre nuäre, ye abko bä jen kwetre. Erere arato, jändrän kä temenbtä abko bä nuäre nuäre, akwa bä ye abko bä jen kwe.

⁴¹ Erere arato, ñänä trä ñakare ja kwrere sö träbe amne muke abko trä bä jene jene arato. Erere arato, muke kwatirekwatire abko trä tärä bä jene jene.

⁴² Ye kwrere, ni krütanikrütani mikadita nire Ngöbökwé angwane, rakadikä kore arato nißtä: Ni ngätä tä niken ngwarbe abko doboi mikata, akwa Ngöbökwé ni mikadita nire angwane, ni ngätä niken ngwarbe ñakare jire chi mda abko biandi kwe nie.

⁴³ Ni ngrabare käme bobre doboi mikata, akwa Ngöbökwé ni mikadita nire angwane, ni rabadi bä nuäre ngrabare. Erere arato, ni ngrabare di ñakare ye doboi mikata akwa, Ngöbökwé mikadita nire angwane, ni rabadi bäri dite ngrabare.

⁴⁴ Erere arato, ni ngrabare kä nebtä ne abko jatani dobokri abko doboi mikata, akwa Ngöbökwé ni ngrabare mikadita nire angwane, ni ngrabare kä käinbtikri biandi kwe nie. Erere arato, ni ngrabare jatani dobokri tärä ne ngwane, ni ngrabare kä käinbtikri ye tärä arato.

⁴⁵ Ye mden kisete Ngöbö Kukwei tä niere krörö:

Ni käne kädian nämane Adán abko Ngöbökwé mikani nire,

Génesis 2.7

akwa Adán mrä kädianta Kristo ne abko Üai kwe köböire tä ni miketa nire.

⁴⁶ Akwa ni ngrabare nünakäre kärekäre kä käinbti, ye abko ñakare käne nikwe akwa, ni ngrabare nünakäre kä nebtä abko rabadre käne nikwe, yebti ni ngrabare nünakäre kä käinbti rabadre nikwe mda.

⁴⁷ Ni dätebare käne kä Adán abko dobro temen ne dätebare, akwa ni mda abko Kristo ye abko kä käinbti jatani.

⁴⁸ Ne aisetse, ni kä nebtä abko dobro dätebare nire abko bä namani ño ngrabare, ye kwrere ni jökrä bä ja täritäri; akwa ni kä käinbti bä ño ngrabare, ye kwrere Ngöbökwé ni krütanikrütani mikadita nire angwane, ni ngrabare bä rabadi arato.

⁴⁹ Ne aisete, dobro dātebare nire abko kwrere ni bāta ja tāritāri mtare kā nebtā, ye kwrere Ngōbōkwe ni mikadita nire angwane, ni kā kāinbti kā Kristo bā ño ngrabare, ye kwrere ni ngrabare bā rabadi arato.

⁵⁰ Yebtā abko, ti tō niei krōrō munye ti mrākātre tikwe: Ngōbōta gobrane, ye kānti ni ngrabare tā niken ngwarbe ye ñan raba nebe nūne jire chi, ñobtā ñan angwane kā kāinbti ye kānti jāndrān ñakare jire tā niken ngwarbe raba neme.

⁵¹ Akwa kukwe nāmāne tiebe kaibe Ngōbōkwe kira, ye mikanina gare kwe nie mtare abko ti bike niere, aisete ti kukwei nuen munkwe: Nitre tōdekaka Jesubti ñan krūtadre jōkrā angwane niara jatadita, akwa Ngōbōkwe ni jōkrā kwitadi.

⁵² Trombeta jūkadi ngō rabadi kā mrā mikakāre gare angwane, nitre tōdekaka Jesubti jōkrā rikwitadi jōtrō ngwarbe Ngōbō diebti, nita okwā kwata metete jōtrō ngwarbe, ye kwrere jire ni rikwitadi batibe jōkrā se kwrere. Trombeta ngō rabadi, ye ngwane nitre tōdekaka Jesubti krūtānikrūtāni abko rükadita nire jōkrā amne ñan krūtadreta mda amne, ni tōdekaka Jesubti tādī nire nire abko Ngōbōkwe kwitadi jōkrā arato.

⁵³ Ni ngrabare tā niken ngwarbe, ne tāte abko ni ngrabare niken ngwarbe ñakare abko rabadi nikwe. Erere arato, ni ngātā tā ngataen, ne tāte abko ni ngātā ngataen ñakare rabadi nikwe.

⁵⁴ Ni rikwitadi jōkrā kore angwane, Ngōbō Kukwei tā tikani krōrō rabadi bare:

Gata, Ngōbōkwe ma ganaibarera,

aisete ma ñan rabadre jire chi mda, aisete ni ñakare jire iti krūtadre mda. *Isaías 25.8*

⁵⁵ Aisete Gata, ¿ma di kri abko tā mdente?

¿Tbi tu krübāte kwrere jire, ma krübāte, ye abko tā mdente, Gata?

Oseas 13.14

abko nieta Ngōbō Kukweibtä.

⁵⁶ Ne aisete kukwe kāmekāme nuenta nikwe Ngōbō rüere abtä nita krüte, ne abko tbi tu krübāte kwrere amne, Kukwe Biani Ngōbōkwe Moiséye ye kōböire kukwe kāmekāme tā sribire abko kāta ni kukwe kāmekāme nuenkā mike gare nie.

⁵⁷ Akwa ni Dānkien Jesukristo, kōböire Ngōbōta ni die mike kukwe kāmekāme ganaine amne gata ganaine. Yebtā abko nikwe kuin niedre Ngōböye.

⁵⁸ Ne aisete ti mrākātre tare tikwe, munkwe tōdeka ni Dānkienbti, yebtā munkwe nūnanka dite jabtā kāre kōbö kwatirekwatire. Mdakāre abko, sribi ni Dānkienkwe, yebtā munkwe ja kita ja di ngōibti, ñobtā ñan angwane ñan munta sribire ngwarbe krāke.

16

Ja mrākā tōdekaka Jesubti krāke ngwian ükaninkrō

¹ Kukwe mdara jire abkobtä ti tō nibi blitai munbe abko krōrō: Nitre Ngōbōkwe, krāke ngwian ükākrota munkwe, ye abko ja mrākātre tā gātāre Jesu kābti kā Galaciate kākwe ngwian ükākroto ño tikwe niebare ietre, ye kwrere munkwe nuen abko krōrō:

² Kāre bāmān kratirekratire bāmānte, munkwe ngwian mika biare jenena biandre ngwarbe ja mrākātēkrā. Ngwian amne jāndrān nükani nuāi mun kisete, ye erere munkwe dianka biare jenena, bti munkwe üka. Yebti ti rikadre nebe yete angwane, munkwe ñan ngwian ükākroto ye näire.

³ Mdakāre abko, ti näin nebe yete angwane, nire nire tādī mikani biare munkwe juandre Jerusalén, nitre ye abko krāke tikwe tarā tikadi, bti tikwe juandi ngwian ükākrota, ye munkwe bian ja mrākātre bobre bobreye Jerusalén.

⁴ Akwa nane ti rikadre Jerusalén ye abko rabadre dbe ne ngwane, ja mrākātre juandre munkwe ngwian mike Jerusalén ye näin tibe.

⁵ Tita juta Efesote nete, akwa ti näin angwane, ti näin kāne kā Macedoniate. Yebti ti näin nebe mun kānti Corintote yete.

⁶ Ye kānti ti rabadi nūnentbe bā raire munbe ruen tie, akwa nane kā ñüre näire ti rabadi yete ruen tie. Yebti ti jatadi niken mdente angwane, munkwe ti die mikadi rikakāre ta, abkokāre ti rabadi yete.

⁷ Ti ñan tō näin gwängwarbe, ñobtā ñan angwane ti ñan tō ja tuai jōtrō munbe dikarekā kwärā, aisete ni Dānkien tō ne ngwane, ti rabadi nūnentbe bā raire munbe yete ja tuakāreta munbe.

⁸ Akwa gwängware abko, ti rabadre Efeso nete nemebe kōbö Pentecostés näire,

⁹ ñobtā ñan angwane ni kwati tā ja rüere tibe, akwa gwängware kā tarā kri amne kuin sribikrā tie ni Dānkienkrā nete, aisete ti rabadi bā raire mda nete.

¹⁰ Akwa nane Timoteo rüka mun kānti yete angwane, rabadre jāme mun ngātāite, abkokāre munkwe ka ngābti kuin, ñobtā ñan angwane tita sribire, ne kwrere niarata sribire arato ni Dānkienkrā.

¹¹ Ne aisete, mun ñakare jire iti kákwe niara mika ngwarbe jae, akwa jatadre jáme ta, abkokáre munkwe die mika, ñóbtá ñan angwane tita niara amne ja mrákátre mda mda ngibiare ngábtí.

¹² Angwane ti mráká Apolos abko rikadre ja mrákátre mda mdabe basare munye abko tikwe ribeba kisere ie, akwa ye ngwane niara ñan tó rababa rikai, aisete ñan rikaba, akwa nebtí ká tádira ie angwane, nain nebe basare munye yete.

¹³ Angwane mun abko kákwe ñan dikaka okwá kware amne munkwe núnanka dite tódekabtá ni Dánkienbtí. Erere arato, munkwe ja die mika kri núnenká dite Satana rüere.

¹⁴ Angwane munkwe jándrán jókrá nuen, ye abko munkwe nuen ja moto kuinbtí ni mda mda tarere kwará.

¹⁵ Ja mrákátre, káne Estéfanas amne mráká kwe aibe kákwe kukwe kuin Jesubtá kani ngábtí káne ká Acaya yete angwane, niaratre nikaninbe sribire nitre tódekaka Jesubtí kráke, ye tá tóre munye ruen tie.

¹⁶ Ne aisete, niara amne ni mda mda sribiká niaratre kwrerekwrere abko munkwe kukwei mika útiáte jae, ie ti tó. Erere arato, ni mda mda tó sribire ni Dánkienkrá, ye munkwe mika útiáte jae.

¹⁷ Estéfanas rúkaba Fortunatobe amne Acaicobe ti kánti nete, ye abko kái nuáre kri tibtä, ñóbtá ñan angwane niaratre kákwe ti moto mikaninta jáme mun diáre.

¹⁸ Ne kwrere arato, ti moto amne mun moto tá jáme niaratre kóböire ruen tie, aisete ni niaratre ne kwrere abko munkwe mikadre útiáte jae.

Kukwe mrá Pablokwe

¹⁹ Ti mrákátre, ja mrákátre gätáká Jesu kábtí ká Asiate nete káta kóbö kuin juen mun kráke. Erere arato, Aquila amne Priscila btá ja mrákátre mda mda tá ja úkekró niaratre gwiriете ye káta kóbö kuin juen kri mun jókrá kráke ni Dánkien kábtí.

²⁰ Ja mrákátre jókrá nete tá kóbö kuin juen mun jókrá kráke. Munkwe ja demain kwárikwári ja moto kuinbtí.

²¹ Ti Pablo ne mden káta kukwe mrá ne tike ja kise jenbtí munkrá, ti ara káta tärá ne tike rúkadre gare munye abkokáre.

²² Nire nire ñan tá ni Dánkien tarere, yebtá Ngóbökwe ngürün mikadre náre, kákwe kitadreká kárekáre ja okwá báre mento. ¡Ni Dánkien, ma jata jötrö, ie ti tó!

²³ Ni Dánkien Jesu kákwe ja moto mika kuin mun jókrá kráke.

²⁴ Ti Pablo káta mun jókrá tarere kárekáre Kristo Jesu kábtí. Abko kore se. Ne ngörá.

Tärä Tikani Bobukäre Pablokwe Nitre Corintobokrä 2 Corintios

Pablo nämane sribire kä Macedonia kánti angwane tärä 2 Corintios ne tikani kwe nitre tödekaka Jesubti nünanka juta Corinto yete amne Corinto bäre temen kräke. Tito sribi muko Pablokwe nämane Corinto, nükaniinta Pablo kánti angwane, kukwe kri nitre tödekaka Jesubti ngätäite Corinto yete abko Titokwe niebare Pabloye. Ye mden kisete Pablokwe tärä ne tikani. Kukwe nämane nakenkä abko krörö: Nitre bikaka Jesu kukwei ngwianka ütiäte kri nükani Corinto yete, ye abko nitre tödekaka Jesubti nämane kaen ngäbti. Nitre ye abko dirikä blo arato. Niaratre nämane bike kri Pablobtä amne nämane Pablo hä mike bobre, ütiäte ñakare abko erere nämane nitre Corintobo tödekaka Jesubti ngökö. Pablo nämane nitre tödekaka Jesubti tarere kri amne ñan tö namani nitre Corintobo tuai niken ji blobti nitre ni ngökaka jiebti. Ye mden kisete, Pablokwe tärä ne tikani nitre tödekaka Jesubti mikakäre mokre nitre ni ngökaka ngäniene amne mäträkäre btä ja moto kuinbti. Erere arato, niara abko Jesu kukwei ngwianka era metre rabadre gare metre ietre abko niebare kwe ietre.

Mdakäre abko, Pablo ngämi tärä ne tike, känenkri niarakwe ngwian käräbare biankäre nitre bobre bobre tödekaka Jesubti Jerusalén yete yeye. Ngwian ye abko Pablo nämane den jakrä abko nitre ni ngökaka nämane niere, akwa ñakare kore, Pablokwe niebare. Ja rikadre basare jötrö ietre, Pablokwe niebare, aiseti nitre tödekaka Jesubti nünanka Corinto yete käkwe ngwian biandre janknu niara ngäbti ngwiankäre Jerusalén.

Pablota köbö kuin juen

¹ Ti Pablo käta tärä ne tike. Ngöbö tö namani ti mikai Jesukristo kukwei ngwianka abko erere tita sribire kräke. Ti ne mden käta köbö kuin juen ti mräkä Timoteo ben gwaire mun nünanka juta Corintote käta gätäre Ngöbö käbti, ye kräke nunta köbö kuin juen. Erere arato, mun nünanka kä jökräbti temen kä Acayate, kräke nunta köbö kuin juen.

² Ngöbö ni Rün nikwe amne ni Dänkien Jesukristo käkwe ja moto mika kuin munkrä amne mun mika nüne jäme kwetere, ie ti tö.

Pablota Ngöbö käikitekä

³ Ngöbö ni Dänkien Jesukristo Rün aibe raba käikitaninkä ni jökräkwe. Nita nebe ruentari tare kärekäre ie amne kukwe jire jökrä nikwe, btä niara tä ni die mike amne tä kä miketa nuäre nibtä.

⁴ Nita ja tare nike bätäkä ngwarbe angwane, Ngöböta ni die mike amne tä kä miketa nuäre nibtä, ni mda mda tädre ja tare nike ño ño angwane, ni rabadre ni ye die mike amne kä miketa nuäre btä abkokäre.

⁵ Ngöböta nuene kore, ñobtä ñan angwane Kristo käkwe ja tare nikani kri krübäte, ye kwrere ja tare nika tä krübäte ni kisete. Erere arato, Kristo köböire Ngöbökwé ni die mikadi kri krübäte amne kä mikadita nuäre kwe nibtä.

⁶ Ye abko, mun rabadre die mikani Ngöbökwé amne kä rabadreta nuäre munbtä amne mun rabadre dianintari, abkokäre nunta ja tare nike sribi Jesukristokwe ye dokwäre. Ngöböta nun die mike amne tä kä miketa nuäre nunbtä, nunkwe mun die mikadre amne nunkwe kä mikadreta nuäre munbtä siba angwane, nunta ja tare nike, ye kwrere mun tädre ja tare nike tödekabtä Jesubti angwane, munkwe nünandrekä dite jabtä, abkokäre Ngöböta nun die mike amne tä kä miketa nuäre nunbtä.

⁷ Ye abko, munta ja tare nike gwaire nunbe, ye kwrere arato Ngöbökwé mun die mikadre amne kä mikadreta nuäre kwe munbtä gwaire nunbe gare nunye, aiseti mun rabadi dianintari metre gare kuin nunye.

⁸ Ti mräkäre, tita tärä tike kore munye, ñobtä ñan angwane provincia Asiate kukwe rakakaba taretare krübäte nun rüere, ye abko rabadre gare munye, ie ti tö. Já oto doboko rika ngitiekä nibti, käkwe ni ketate temen, ye kwrere jire kukwe jataba doboko krübäte nun rüere, käkwe nun di gakaba jökrä amne, nunkwe ñan nünandre mda rababa ruen nunye.

⁹ Angwane nun krütadre era metre rababa ruen nunye, akwa kukwe rakakaba kore nunbtä, ye köböire abko nunkwe ñan tödekadre ja di jenbti au akwa, Ngöbö ni krütanikrütani mikakata nire, ye aibebti nunkwe tödekadre abko rükaba gare nunye.

¹⁰ Amne Ngöbökwé nun diantariba gata ye ngäniene, ye kwrere kukwe jatadita nun rüere angwane, Ngöbökwé nun dianditarita gata ngäniene. Ngöbökwé nun ngibiadi kärekäre abkobti nunta tödeke,

¹¹ amne munta blite Ngöböbe, yebti mun rabadre nun die mike kri. Ye abko, mun kwati tä blite Ngöböbe nunkrä ne ngwane, nun die mikata Ngöbökwé, ye rükadi gare munye angwane, ni kwati käkwe kuin niedi Ngöböbe nunbtä.

Ñobtä Pablo ñan nikani basare nitre Corintoboye

¹² Mdakäre abko, kukwe krörökrörö abko nun tö mikai gare bäri munye: Ngöbö diebti nunkwe nūnanba deme ni mda mda ngätäite kä nebtä amne mun bäri, ben nunkwe nūnanba kore abti kä nüke mtare. Erere arato, Ngöbö diebti nunkwe ni mda mda ngökani ñakare jire, ye abko gare kuin munye amne ja tita nebe ruen ngite ñakare jire chi munye Ngöbö ngwärekre, ñobtä ñan angwane ñan ni kä nebtä töi abko erere nunta näin, akwa Ngöböta ja moto mike kuin nunkrä abko diebti nunta näin kore. Ye mdenbtä nun tö ja dikaire.

¹³ Amne nunkwe tära tikani munye, ye abko munkwe ñäkäre btä amne rükadre gare kuin munye abko erere nunkwe tikani, aiseite tära yebtä munkwe ñäkä amne, rükadi gare kuin jökrä munye abko tita nütüre.

¹⁴ Angwane nun abko tä nüne ño, ye nūkanina gare ruäre munye, akwa mtare rükadre gare täte munye, ie ti tö, ni Dänkien Jesu jatadi nüketa angwane, ja rabadre ruen ütiäte nunbti munye, ye kwrere arato ja rabadre ruen ütiäte nunbti munye ni Dänkien Jesu ngwärekre abkokäre.

¹⁵⁻¹⁶ Ti nämä tödeke kore munbti, aiseite ti näin Macedonia angwane, ti näin käne nebe basare munye yete, ti nämä nütüre abko erere tikwe nieba munye. Erere arato, ti jatadreta ja jiebti angwane, ti rükadre basareta jire munye yete, ti nämä nütüre. Tikwe basadi bobu kore munye, abti munkwe ti die mikadre nikenta nebe Judeate ti nämä nütüre, akwa ti ñan rababa basare munye yete.

¹⁷ Tikwe köbö kitaba basakrä munye, yebti tikwe töbikabare ñakare kuin ja käne munta nütüre ya? Mdakäre abko, tita kukwe kubu niere kukwe kwatibe kräke amne ti töi abko tä jändrän mdabtä, aiseite tita jän niere, akwa tita ni ngökö abko munta nütüre tibtä ya?

¹⁸ Ngöböta ja kukwei bien kwatibe, bti tä mike täte, ye kwrere nunta kukwe kuin Jesubtä niere munye angwane, nunta blite kwatibe, aiseite ñan nunta “jän” niere, yebti nunta “ñakare” niereta batibe munye,

¹⁹ ñobtä ñan angwane kukwe kuin Jesukristo Ngöbö Odeibtä abko Silvano, Timoteo amne ti kärke mikani gare munye angwane, nunkwe ñan niebare krörö munye: Nane Ngöbö kukwei Jesubtä abko era, nane era ñakare abko nunkwe niebare ñakare kore munye. Akwa Ngöbö kukwei Jesukristobtä abko kukwe era erere niebare kwatibe nunkwe munye, aiseite nunkwe blitabare ñakare ketebu batibe. Ngöbökwé ja kukwei mikadre täte, yebtä “jänri” niebare kwatibe kwe Jesukristobtä abko erere rabadi kärekäre,

²⁰ ñobtä ñan angwane Ngöbökwé ja kukwei biani kabre kukwe nuenkäre ni kräke abko mikani bare täte jökrä Kristo köböire kwe. Ye mden kisete, nita Ngöbö käikitekä angwane, Ngöbökwé ja kukwei mikani täte Kristo köböire, yebtä nita “Amen,” niere abko erere raba bare kore nita niere Ngöböye Kristo Jesu köböire.

²¹ Ti mräkäre, Ngöbö ara jire kärke nun amne mun mikani nūnenkä dite ketetibe gwaire Kristobtä. Ye abko, Ngöbö ara jire kärke ni mikani deme jenena jakrä.

²² Erere arato, Ngöböta ni bkäne abko bä mikani krörö kwe: Niarakwe ja Üai Deme mikani nüne niibtä, angwane jändrän tära bäri mda kwe nikrä abko mikani gare nie arato, ye köböire abko Ngöböta jändrän mda mda ngibiare ni kräke abko tä mike gare nie.

²³ Tita kukwe era erere niere munye, ye abko gare kuin Ngöböye, aiseite ti rikadre Corinto mun kanti yete ti nämä nütüre, akwa ti ngämi niken, ñobtä ñan angwane mun tare kri tikwe, aiseite ti ñan tö ñäkäita taretare munye, aiseite ti ngämi niken. Tita kukwe niere munye, nebtä tita mun ngökö ne ngwane, Ngöbö ara jire raba niere ti rüere mun ngökabtä kore.

²⁴ Mun abko tä tödeke Kristobti, yebtä abko ñan nunta ja mike mun dänkiene, akwa nunta sribi nuene jirekäbe gwaire munbe abko kärke kä mikadre bäri nuäre munbtä, abkokäre nunta sribire kore, ñobtä ñan angwane mun nena nūnenkä dite jabtä tödekabtä Kristobti aiseite.

2

¹ Ti tö rababa kä mikai bäri nuäre munbtä, aiseite ti ñan tö rababa näin ñäkäkäre taretare munye bobukäre mun moto mikakäre ulire, aiseite ti ngämi nebeta basare munye.

² Tikwe mun moto mikadre ulire, ye ngwane ñan mun moto mikani ulire tikwe, ye ara kärke kä mikadre nuäre tibtä ya? jänri! Mun ye aibe raba kä mike nuäre tibtä.

³ Tikwe tära tikaba tare kore munye, ñobtä ñan angwane munkwe kä mikadre nuäre tibtä näre abko munkwe ti moto mikadre ulire rababa ruen tie, ñobtä ñan angwane mun ñan tö namani ti kukwei mikai täte, aiseite ti ñan tö rababa rikai yete. Ti rikadre yete angwane, munkwe kä ngwiandre nuäre gwaire jabtä tibe rababa ruen tie, akwa tikwe tära tikaba jirekäbe kore munye.

⁴ Ti nämä tära ye tike munkrä angwane, ti töi ñan rababa krütare munbtä amne, ti moto rababa nötöte krübäte mun jiebti amne ti rababa mun müaire krübäte jakän tära ye tikare kwärä, akwa tikwe tära tikaba taretare kore munkrä, ye abko ñan tikwe tikaba mun moto

mikakäre ulire, akwa mun tare kri tikwe, ye rükadre gare munye, ie ti tö rababa, aisete tikwe tärä tikaba kore.

Ni kukwe käme nuenkä kadreta ngäbti

⁵ Mdakäre abko, ni iti käkwe ti moto mikani ulire, ye abko ñan ti ne aibe moto mikani ulire kwe, akwa bäri mun moto mikani ulire kwe arato ruen tie.

⁶ Akwa ni ja mikaka ngite, btä mun kwati käkwe mäträbare krübäte, ye abko namanina dbe,

⁷ aisete mtare kukwe btä ja mikani ngite kwe, ye munkwe dianka bti ta amne, munkwe die mikata amne kä mikata nuäre btä munkwe, niara ñan moto rabadre ulire dikaro abkokäre.

⁸ Amne munta ni ja mikaka ngite ye tarere kri abko munkwe bä mikata tuadre ie abko ti tö ribei kore munye.

⁹ Kukwe nämane nakenkä mun ngätäite yete, abtä tikwe tärä tikaba munye, ye abko tita kukwe niere abko erere munkwe mikadre täte jire jökrä ya ño abko ti tö rababa gai, käkwe tärä tikaba kore.

¹⁰ Ye abko, nire nire tä ja mike ngite, akwa munta denta bti ta, ni ye abko tita ngite den bti ta arato, aisete ni ye käkwe ja mikani ngite ño erere ne ngwane, tikwe diandi bti ta arato mun die mikakäre nüne metre Kristo ngwärekre,

¹¹ ñöbtä ñan angwane Satana käre tä juto biare kukwe miketbe ni rüere, ye abko garera nie, aisete Satanakwe ñan ni ngökadre ni ja mikani ngite yebtä, abkokäre nikwe ja ngite diandre jabti ta kwärikwäri.

Kukwe ükaninte btin Ngöbökre, kräke Pablota sribire

¹² Tikwe tärä tikaba kore munye, bti ti rikaba nebe juta Troate kukwe kuin Kristobtä mikakäre gare angwane, Ngöbökre kä bianba kuin tie sribikäre ni Dänkien Kristokrä.

¹³ Akwa ti ñan rababa nebe nuäre, ñöbtä ñan angwane ti mräkä Tito ñan kwanba tie juta Troate, aisete ja mräkäre tödekaka Jesubti Troate, ie tikwe köb ngwiantariba, bti ti rikaba Macedonia mda.

¹⁴ Tita kuin niere Ngöbökre, ñöbtä ñan angwane Kristo krütani krusobtä angwane, ni ganainbare kwe Ngöbökre amne Ngöbökre ni dianinkä sribikäre jakrä Kristo köböire. Ni ganainbare rübtä abko tä näin ni ganainkä jiebtä, ye kwrere mtare nunta näin Kristo jiebtä. Nun köböire abko Ngöbökre kukwe kuin Kristobtä mike gare ni mda mdaye, aisete jändrän rä bäne, ye kwrere kukwe kuin ye rä kite niken kä jökräbti temen.

¹⁵ Ne aisete Kristokwe nünabare ño, käkwe ja tare nikani, ye kwrere tita nüne. Ye abko, Kristo namani kuin dbe Ngöbö ngwärekre, ye kwrere tita Ngöbö ngwärekre, jändrän rä bäne ye kwrere. Amne ni mda mda rabadre dianintari ya, ñakare ya, akwa jändrän rä bäne ye tä näin jökrä ni ngätäite kä ngrabare temen, ye kwrere jire tita niaratre okwäte.

¹⁶ Akwa nire nire rabadi dianintari Ngöbökre, ni ye ie ti rabai tuen jändrän ngwäkäre rä käme kwrere, akwa nire nire rabadi dianintari Ngöbökre, ni ye ie ti rabai tuen jändrän rä bäne kwrere, ñöbtä ñan angwane tita kukwe kuin Jesubtä mike gare ietre aisete. ¡Sribi ye abko ni ñakare jire chi rabadre nuene ja di jenbti au ñan ñan!

¹⁷ Ye abko ni kwati tä näin Ngöbö kukwei kuin dirire ngwian diankrä jae, ye kwrere tita näin ñakare, akwa ti abko tä näin Ngöbö kukwei mike gare era metre. Ni juani Ngöbökre tä blite era metre töi kuinbti, ye kwrere tita blite Kristobtä Ngöbö okwäbti Kristo köböire.

3

¹ Tita sribire kuin Ngöbökrä rükadre gare metre munye, abkokäre tita blite kore, ¿yebtä abko ti kiterate ja käikitekä au tuen munye ya? ¿O ni ruäre kukwei mikadre ütiäte, abkokäre tä tärä kärere ngwandre jabtä, ye kwrere ti rikadre ngwana munye, munta nütüre ya? ¿O ni ruäre kukwei mikadre ütiäte kä mdabti, abkokäre tä tärä kärere munye, ye kwrere tikwe tärä kärädre munye ja kukwei mikakäre ütiäte ni mda mdaye ya? Ñakare jire chi munkwe biandre, ñöbtä ñan angwane ni mda tä biamna munye,

² akwa tärä ye kwrere abko ütiäte ñakare tikrä, ñöbtä ñan angwane mun ara jire tä tärä ti kukwei mikakrä ütiäte ye kwrere tikrä. Käre munta töre tie amne tita mun tarere bäri. Ye abko, ni mda mda käta mun mike ñäräre angwane, munta tödeke Kristobti sribi tikwe köböire abko tä nüke gare ietre. Mdakäre abko, tita mun tarere ño, ye abko tä tuen ni jökräye, aisete tärä ni kukwei mikakrä ütiäte btä ñäkätä, ye kwrere jire munta ni jökrä ngwärekre.

³ Amne sribi tikwe köböire munkwe tödekani Kristobti, aisete mun abko tärä ni kukwei mikakrä ütiäte kwrere tikrä, ye abko ni jökrä raba tuen, aisete Kristo ara jire käkwe mun mikani tärä ye kwrere abko tita mike tuadre ni mda mdaye. Mdakäre abko, mun abko ñakare tärä tikata plumabti kwrere, ñöbtä ñan angwane tärä ye kwrere abko nire ñakare, akwa Ngöbö nire abko Üai ara jire käkwe mun mikani tärä ye kwrere. Erere arato, mun

abko ñakare tärä okwä tikani jä otohtë Ngöbökwe biani Moiséye kira ye kwrere. Akwa mun nire ye ara jire töi abko Ngöbökwe mikani tärä kwrere sribi nunkwe köböire.

⁴ Amne Kristo köböire nunta tödeke kri Ngöböhti, aisete kukwe nieta nunkwe jabtä ne abko era metre abko erere nunta niere.

⁵ Ye abko ñan nun di tärä täte jökrä bikakäre kri sribi nunkwebti, akwa Ngöbö diebti sribi Kristokrä tä nebe bare nie.

⁶ Ne aisete, kukwe úkaninte btin Ngöbökwe Kristo köböire, ye mikakäre gare ni mda mdaye, Ngöbö ara kákwe ja di biani nunye. Akwa kukwe úkaninte btin ye abko ñakare tä úkaninte Kukwe Biani Ngöbökwe Moiséye ye kwrere, akwa Ngöbö Úai ara jire tä sribire kukwe btin yehti, káta ni mike nüne kärekáre Ngöböbe. Akwa Kukwe Biani Ngöbökwe Moiséye ye abko nikwe ñan mikadre täte jökrä angwane, tä ni kite ngise amne tä ni mike kärekáre Ngöbö okwä bäre mento.

Kukwe úkaninte btin Ngöbökwe abko bäri útiäte kri

⁷ Kukwe Biani Ngöbökwe Moiséye, ye nikwe ñan mikadre täte jökrä angwane, ni kitadre ngise kwe amne ni rabadre kärekáre Ngöbö okwä bäre mento. Kukwe ye abko námáne tikani jähtë abko Ngöbökwe biani Moiséye kira angwane, Ngöbö trä namani bá nuäre ye abko trä namani jökrä Moisés ngwärehtë. Yehti Moisés jataninta gwákäre angwane, Ngöbö trä ye jataní nebeta bá diore Moisés ngwärehtë, akwa nitre israelita ñan namani Moisés tua ká ngwärehtë Ngöbö trä kisete.

⁸ Se abko kukwe úkaninte btin Ngöbökwe angwane, Ngöbö Úai ara káta sribire nibtä, ¿se abko ñan bá rabadi bäri nuäre ya? ¡jánri, bäri rabadi nuäre!

⁹ Kukwe Biani Ngöbökwe Moiséye, ye abko ñan mikata täte ne ngwane, tä ni kite ngise jirekábe, akwa Ngöbökwe biani angwane, Ngöbö trä namani bá nuäre, se abko Ngöbökwe kukwe úkaninte btin, yehti ni ngite ñakare mda Ngöböta niere amne tä ni kaen ngähti nieta nie ¿se abko ñan bá rabadi bäri nuäre krübäte ya? ¡jánri!

¹⁰ ñöhtë ñan angwane Ngöbökwe kukwe úkaninte káne nitre israelitabe angwane, kukwe biani Moiséye angwane, ká trä namani bá nuäre; akwa mtare kukwe úkaninte btin Ngöbökwe ye nikwe mikadre ñäräre angwane, ká trä rabadi tuen bäri nuäre nie, ká trä namani nuäre káne yehti ta.

¹¹ Ngöbökwe kukwe úkaninte káne nitre israelitabe abko biani kwe Moiséye, kukwe ye abko jataní niken bätäreká ta abko Ngöbökwe biani Moiséye angwane, ká trä namani bá nuäre, aisete Ngöbökwe úkaninte btin nibe Kristo köböire abko rabadi kärekáre, ¿se abko ñan bäri útiäte, aisete trä rabadi dirare kärekáre ya? ¡jánri, bári trä rabadi dirare kärekáre!

¹² Kukwe úkaninte btin Ngöbökwe ye rabadi kärekáre amne trä rabadi dirare käre, ye gare metre nunye, aisete tita blite ja di ngöi jökrä kukwe yehtë ni jökrä ngwärecri.

¹³ Akwa ñan tita blite ni jökräbe Moisés kwrere. Ngöbö trä bá nuäre namani Moisés ngwärehtë, ye abko jataní trä nenkáta amne trä jataní nebe diore Moisés ngwärehtë abko nitre israelita kákwe ñan tuadre, abkokäre Moisékwe dán kukwän kitani ja ngwärehti.

¹⁴ Akwa Ngöbö ara jire kákwe nitre israelita dokwä mikani ribi, aisete kira abti ká nüke mtare Kukwe Biani Ngöbökwe Moiséye, yehtë nitre israelita tä ñáke angwane, dán kukwän ni okwähti kisete káta nebe tuen ñakare nie, ye kwrere jire káta nebe nitre israelita töibti. Niaratre töi mráme tä dán kukwän kwrere niaratre okwähti, ye abko dianka ngämi, ñöhtë ñan angwane niaratre kákwe tödekadre Kristobti angwane, Kristo aibe kákwe jändrän ye diandreká btäre, niaratre rabadre töi ngítiekä metre abkokäre.

¹⁵ Ye mden kisete, kira abti ká nüke mtare, Kukwe Biani Ngöbökwe Moiséye, yehtë nitre israelita tä ñáke angwane, dán kukwän ni okwähti kisete káta nebe tuen iko nie, ye kwrere káta nebe nitre israelita töibtä, aisete Ngöbö kukwei ñan tä nüke gare ietre.

¹⁶ Akwa nita ja töi kwite ni Dänkien kukwäre, káta tödeke Jesubti angwane, ni töi mráme abko tä dán kukwän kwrere ni töibtä ye abko ni Dänkien trä denká mento nibtä,

¹⁷ ñöhtë ñan angwane ni Dänkien tä, ye kánti Ngöbö Úai tä ben amne nire nire, btä ni Dänkien tä Ngöbö Úaibe, ye kánti nita tikaninte.

¹⁸ Ne aisete ni jökrä töi mráme mráme abko námáne dán kukwän ni ngwärehtë, ká námáne ni okwä jue mike, ye abko ni Dänkien kákwe dianinkära mento nibtä. Ne aisete ká trä tä nebe tuen ñáite, ye kwrere jire ni Dänkien Kristo trä bá nuäre tä kite tuen nibtä mtare ni mda mdaye. Ye ñöhtë ñan angwane ni Dänkien Úai tä niken ni kwite bäri köbö kwatirekwatire ni mikakäre bäsi ja kwrere ni Dänkienbe, aisete köbö kwatirekwatire ni Dänkien trä bá nuäre ye tä kite tuen bäri mda nibtä.

4

Jändrän útiäte kri

¹ Ye abko, Ngöbökwe ja moto mikani kuin ti kräke, käkwe sribi bäri ütiäte biani tie, ye tita naente ñakare nuene.

² Akwa kukwe käme gaidre kri nuenta kaiibe tiebe, ye abko tikwe kitani jökrä temen amne ñan tita näin kukwe miketbe ni mda mda ngökakrä. Erere arato, ñan tita näin Ngöbö Kukwei mrite kukwe mda mdabe dirikäre; akwa kukwe era erere tita niere kwatibe, aisete Ngöbö ngwäreki ti töi ño ño amne tita nüne ño ño, ye erere tä nüke gare ni jökräye.

³ Akwa nane Ngöbö kukwei kuin Kristobtä mikata gare tikwe, yebtä ni ruäre töi mräme, aisete nüke gare ñakare ietre, ne ngwane ni riadite kärekäre Ngöbö okwä bäre mento, ye aibe ie ñan rükadre gare,

⁴ ñobtä ñan angwane niaratre ñan tä tödeke Kristobti, aisete ni rüe Satana tä ngöböre kä nebtä käkwe niaratre töi mikani ngwarbe kä drümente ta amne, Ngöbö kukwei kuin Kristobtä trä ngitiekä dirare abko ñan jatadre ietre amne Kristo abko ja kwrere Ngöböbe abko ñan jatadre ietre, abkokäre töi mikani kä drümente kore.

⁵ Amne ti abko tä Ngöbö kukwei kuin Kristobtä mike gare angwane, ñan tita blite kuin jabtä au, akwa Jesukristo ni Dänkien, ye aibe mikata gare tikwe. Mdakäre abko, tita Jesu tarere, aisete ti abko sribikä munkrä, aibe tita niere jabtä,

⁶ ñobtä ñan angwane kena dekä Ngöbökwe kä ne dätebare angwane, kä nämane iko jökrä angwane, Ngöbö kwe niebare: Kä trä raba ngwen, niebare kwe, ye erere kä trä namani, aisete Ngöbö ye ara käkwe kä trä kwe mikani trä ngitiekä ti töibtä angwane, kukwe kuin Kristobtä mikani gare tie. Ngöbö trä dirare bä nuäre tä trä ngitiekä Jesukristobtä, ye abko tikwe mikadre gare ni mda mdaye, abkokäre Ngöbö kwe kä trä tikaninkä ti töibtä.

⁷ Ye abko, jändrän ütiäte kri mikata ñakare dobro unkwente, akwa kore tä nakenkä nunbtä abko krörö: Ngöbö di kri bä nuäre, ütiäte kri, bti nunta sribire, ye abko tä nunbtä. Akwa tä kite Ngöböki amne ñan nunkri, ye rabadre gare ni jökräye, abkokäre nun abko di ñakare amne nun ngrabare abko därebe amne mutro dobro sribebare unkwente kwrere, akwa nunbti Ngöböta sribire.

⁸ Ye abko, kukwe tarä kri nun kisete, akwa ñan kukwe ye käta ji dike nun jiete; erere arato töbika kukwe kri nun kisete, akwa ñan yebtä nunta naente.

⁹ Mdakäre abko, nun rüe tätre näin kisere nun jiehti, akwa Ngöböta nun mikete ñakare kaiibe amne, nun nitata temen nun rüekwe, akwa niaratre ñan tä nun gaenkä.

¹⁰ Ye abko, nunta niken mdente erere ye kanti, Jesu kämikani, ye kwrere bäsi nun kämikata kore, Jesuta nire kärekäre abko käta nun ngibiare amne nun mikadita nire kwe, ye bä mikakäre nunbtä.

¹¹ Ne aisete, nun tä nüne, ye ngwane nun rüe tö nun kämikai Ngöbö kukwei kuin Jesubtä diri dokwäre, akwa nun ngrabare gatadre, nebtä Jesu tä nire kärekäre, ye bä rabadi arato, abkokäre nunta ja tare nike kore.

¹² Ne abko, nun rüe tö nun kämikai kore Ngöbö kukwei kuin Jesubtä diri dokwäre, ye köböire abko munkwe tödekani Jesubti abko rabadi nüne kärekäre Ngöböbe.

¹³ Ngöbö Kukwei käta niere krörö:

Tikwe tödekani kwatibe Ngöböti abko erere tikwe blitabare btä, *Salmos 116.10*
abko tä tikani kore Ngöbö Kukweibtä. Ye mden kwrere, nun abko käta tödeke kwatibe Ngöböti, abtä nunta blite Jesubtä, käta sribire,

¹⁴ ñobtä ñan angwane Ngöbö käkwe ni Dänkien Jesu mikaninta nire, ye ara käkwe nun mikadita nire munbe gwaire Jesu köböire, abti näin ni ngwena nebe ja ngwäreki kä känbti, ye abko gare kuin nunye, aisete nunta biare ja tare nike Jesukrä.

¹⁵ Kukwe tä nakenkä jökrä kore nunbtä, akwa ye abko kuin munkrä, ñobtä ñan angwane Ngöbö moto kuin rükai gare ni kwatibe mun kanti angwane, ni kwati rabadi kuin niere Ngöböye angwane, Ngöbö rabadi käikitaninkä bäri mda.

¹⁶ Ne mden kisete, nun naente ñakare sribi nuene Ngöbökrä. Nun ngrabare ye abko kite niken ngwarbe janknu mentokwäre, akwa nun üai abko Ngöböta kwite bäri btin köbö kwatirekwatire.

¹⁷ Ne aisete, nunta nüne kä nebtä angwane, nunta ja tare nike, akwa ye jötrö amne ñakare tare, aisete gwä näin ta. Ja tare nika kore, ye ütiäre abko jändrän bäri ütiäte kri Ngöbö kwe rabadi kärekäre nunkwe.

¹⁸ Ne mden kisete, jändrän tuen kä nebtä, yebtä nunta okwä ketete ñakare, akwa jändrän kuin Ngöbö kwe tuen ñakare, yebtä nun töita, ñobtä ñan angwane jändrän tuen nie kä nebtä, ye abko tä jötrö, gwä näin ta, akwa jändrän kuin Ngöbö kwe tuen ñakare, ye abko rabadi kärekäre, aisete bäri ütiäte.

5

Ngöbö kwe ni ngrabare biandi btin nie

¹ Mdakäre abko, ju nuäre ngwiandre tä niken ngwarbe jötrö, ye kwrere ni ngrabare tä jötrö kä nebtä. Akwa ju nuäre ngwiandre tä niken ngwarbe, ye kwrere ni ngrabare ne näin ngwarbe angwane ni krütadi, ye ngwane ni ngrabare btin abko ju bäri kuin niken ngwarbe ñakare ye kwrere abko Ngöböke biandi nie kä käinbti abko te ni näin nüne. Ju ye abko mikani ñakare ni kä nebtäke abko te ni näin nüne kärekäre.

² Ni ngrabare tä ju nuäre ngwiandre kwrere ni kräke, te nita nüne angwane, nita täkekäbe jabe ja tare nika kisete, ñobtä ñan angwane Ngöböke ni kwitadre jötrö ju mdate kä käinbti angwane, ni ngrabare biandre btin kwe nie, ie ni tö bäri,

³ ñobtä ñan angwane ni ngrabare tä dän kwrere nibtä ni üaikrä, ne rikadre ngwarbe angwane, Ngöböke ni ngrabare biandi btin nie kä käinbti, ni ñan rabadre ni bütiere kwrere abkokäre.

⁴ Ni ngrabare tä niken ngwarbe jötrö, ye abko ju nuäre ngwiandre kwrere amne nita nüne te kä nebtä angwane, nita täkekäbe jabe kukwe taretare kisete. Akwa ni ñan tö ja tuai ni bütiere kwrere, aisete Ngöböke ni ngrabare mdara jire biandre btin nie abko ie ni tö. Ni ngrabare btin biandre nie Ngöböke, ye abko rabadre kärekäre, käkwe ni ngrabare tä krüte ye gadrekä jökrä.

⁵ Amne Ngöbö ara jire käkwe ni dätebare nünakäre kärekäre jabe, aisete Ngöböke ni ngrabare btin köböi mikani nie, yebtä ja kukwei mikadi täte jökrä kwe bä mikakäre abko ja Üai Deme biani kwe nie.

⁶ Ye mden kisete, nita nebe ulire ñakare nüne ni ngrabare nebti, akwa nita tödeke käre Ngöböti. Akwa ni ngrabare nebti ni tä nüne kä nebtä angwane, ni tä nüne mente Ngöböye, aisete nita nüne ñakare ni Dänkien Jesu kanti.

⁷ Akwa mtare jändrän tuen ñakare nie Ngöbö kanti, bti nita tödeke nünane kwärä kä nebtä, akwa jändrän tuen nie, yebti nita tödeke ñakare.

⁸ Ye abko, Ngöböke ni ngrabare btin biandi nie, bti nita tödeke, yebtä abko ti töta nebe ja ngrabare ne mikaitä jötrö rikakäre nüne kärekäre ni Dänkien Jesube kä käinbti.

⁹ Ye mden kisete, ni tädre nüne janknu ja ngrabare nebti kä nebtä ya o ni rikadrera nüne kä käinbti ya, akwa käre nita dre dre nuene, yebtä ni tö ni Dänkien moto mikai nuäre,

¹⁰ ñobtä ñan angwane batira jire ni jökrä rabadi Kristo ngwäreki, kanti kukwe ükadite kwe nikrä angwane, ni nämane nüne kä nebtä käkwe jändrän kuin nuenbare ya o jändrän käme nuenbare, ye erere Kristo käkwe ütiä biandi nie, aisete ni itire itire käkwe dre nuenbare, ye erere ütiä rabadi kisete.

Ngöböta ja mäketä nibe abko Pablokwe mikadre gare

¹¹ Ye mden kisete, nita ni Dänkien mike ütiäte jae, aisete nita sribire ni jökrä töi kwitakäre Ngöböki, niaratre käkwe tödekadre Jesubti abkokäre. Tita sribire era metre, ye abko gare kuin Ngöböye, ye kwrere arato rabadre gare kuin munye abko ie ti tö.

¹² Ye abko, ñan ti tö ja käikitaikäta au, käta blite kore, akwa ja rabadre ruen ütiäte mda bati munye sribi tikwe köböire, abkokäre tita blite kore. Akwa nitre dirikä blo tä yete mun ngätäite abko tä näin sribi kwekwe aibe käikitekä au, akwa töi ño amne moto ño Ngöbö ngwäreki abko tätre mike ütiäte ñakare, ye okwäbti abko munkwe sribi tikwe mikadre ütiäte, abkokäre tita blite kore.

¹³ Akwa sribibtä Ngöbökrä käta nebe tuen jäme ti dokwäbti, ye abko Ngöbökrä; akwa kä ruen kuin ti dokwäbti, ye abko mun die mikakrä nüne Kristokrä.

¹⁴ Tita kore ñobtä ñan angwane Kristota nun tarere, ye käta ti kite nüne Kristo kräke ja di ngöi jökrä, ñobtä ñan angwane Kristo krütani ni jökrä täte, aisete ni ngwäkäre käta töbike ñakare mda kukwe kämekämenbtä, ye kwrere jire ni jökrä tödekaka Jesubti käkwe trö kwitadre kukwe käme ye amne, ñan nünandre jakrä kwetere, ye abko tä gare metre tie, aisete tita nüne kore Kristo kräke.

¹⁵ Kristo abko krütani ni jökrä kräke, aisete nikwe ñan nünandre jire chi mda jakrä, akwa Kristo krütani nikrä, abti Ngöböke mikaninta nire, ye aibe kräke nikwe nünandre, abkokäre krütani ni jökrä kräke.

¹⁶ Kristo krütani ni jökrä kräke, ye mden kisete ni tödekaka ñakare Jesubti käta töbike ño ño ni mda mdatä, ye kwrere nita töbike ñakare mda mtare. Käne ni ngämi tödeke Kristobti angwane, Kristo abko ni ngwarbe ni mda mda kwrere ni nämane nütüre btä, akwa mtare nita töbike ñakare kore mda.

¹⁷ Ne aisete nire nire tä ketetibe Kristobe abko töita nebe ni btin kwrere amne, jändrän jökrä kira kämekäme nämane btä, ye abko nikanina ta. Ye täte Ngöböke ni kwitanina btin ketetibe Kristobe, aisete ni töita nebe btin mda.

¹⁸ Sribi jökrä, ye abko sribi Ngöböke amne Ngöbö ara jire käkwe ni mikani ja mäketä jabe Kristo köböire. Erere arato, ni jökrä käkwe ja mäkdreta Ngöböbe, ye abko tikwe mikadre gare ni mda mdaye abko sribi ye mikani ti kisete kwe abko krörö:

¹⁹ Kristo krütani ni kräke, ye köböire Ngöbö ara jire namani ja mäketi ni jökräbe amne, nita tödeke Kristobti, ye ngwane Ngöböta ni ngite niara rüere denkä mento nißtä. Amne Ngöbö tö ni tuai ja mäketi jabe, ye abko ti mikani niekä kwe ni mda mdaye.

²⁰ Ne aisete, Kristo ara jire käkwe ti juani blite niara käbti amne niara diäre amne, Ngöbö ara jire käkwe blitadre, ye kwrere jire Ngöböta kukwe ribere ti köböire munye. Kristo diäre tita kukwe krörö ribere kisere munye: Munkwe ja mäkädreta Ngöböbe, ye abko tita mätäire munbtä Kristo käbti.

²¹ Kristo käkwe ja mikani ngite ñakare jire chi Ngöbö rüere, akwa Ngöböke niara mikani ngite ni kwrere, niara köböire ni rabadre tuen metre Ngöbö ngwäreki abkokäre.

6

¹ Mtare ti abko sribikä Ngöböke, aisete tita ribere krörö munye: Ngöböke ja moto mikani kuin munkrä abko munkwe kanina ngäbti, akwa mtare munkwe ñan trö kwita ie, ² ñobtä ñan angwane Ngöbö Kukwei käta niere krörö:

Kä kuin näire munkwe ja di käräbare tie angwane, tikwe mun kukwei kani ngäbti.

Erere arato, köbö ye näire mun rabadre dianintari, ye angwane tikwe mun die mikani käkwe mun dianintari, *Isaias 49.8*

abko nieta kore Ngöbö Kukweibtä. Ne aisete mtare abko kä kuin nura munkrä amne mun rabadre dianintari abko köböi nura mtare.

Pablokwe ja tare nikani kri

³ Nunta sribire ye rüere ni mda mdakwe ñan ñäkädre blo, abkokäre nunta nüne ñakare blo ni mda mda okwäbti.

⁴ Akwa nun abko sribikä era metre Ngöböke abko nunta bä mike krörö jabtä: Nunta ja tare nike kri krübäte angwane, nunta ja tare nika ye mike niken bätärekä ta. Erere arato, nunta jändrän jökrä mdei nike kri amne kukwe bätäkä ngwarbe tä kite nun rüere kwärikwäri sribibtä Jesukristokrä abko kisete nunta ja tare nike.

⁵ Erere arato, kukwe kuin Jesukwe dokwäre nun kwata metata, nun kitata ngite kä teri amne, juta kwatirekwatire te ni kwati käta kä mike nokre nun rüere. Mdakäre abko, nunta sribire tare krübäte au jakrä amne nunta kibien ñakare sribibtä amne nunta mrö nike kri arato.

⁶ Mdakäre abko, nun sribikä era metre Ngöböke abko nunta bä mike krörö arato: nunta nüne deme Ngöbökrä amne kukwe kuin era metre Ngöböke Jesubtä abko gare kuin nunye. Erere arato, nun motota nebe romon ñakare jötrö jötrö nun rüe kräke, akwa nunta tarere bätärekä ja täritäri. Erere arato, Ngöbö Üai Deme tä nüne nunbtä, köböire nunta ni mda mda tarere era metre jökrä.

⁷ Amne nunta kukwe era metre Ngöböke niere amne, Ngöbö di kri tä nunbtä, ye köböire abko nun sribikä era metre Ngöböke abko nunta bä mike. Mdakäre abko, nunta nüne era metre Ngöbökrä ni mda mda okwäbti, ye abko jändrän rükä kwrere amne jändrän ja ngibiakrä ni rüe ngäniene, kwrere tä nun kisete kwärikwäri abko bti nunta rüere nun rüebe.

⁸ Erere arato, batira jire nun mikata ütiäte jae ni mda mdakwe amne batira jire abko ñäkätä taretare nunye arato. Erere arato, batira jire ni mda mda tä blite kuin nunbtä, akwa batira jire abko blitata blo nun rüere ni mda mdakwe. Erere arato, nunta kukwe era erere niere, akwa nun bä mikata ni ni ngökaka kwrere.

⁹ Erere arato, nun abko gare kuin ni mda mdaye, akwa nun gare ñakare ietre tä niere; bäsi nun kämikata batire batire, akwa nun tä nüne; nun kwata metata krübäte, akwa nun kämikata ñakare.

¹⁰ Mdakäre abko, nun motota nebe ulire, akwa käre käta nebe bäri nuäre nunbtä. Erere arato, nun bobre, jändrän ñakare nunkwe, akwa nunta ni kwati mike jändrän Ngöböke bkäne kabre; nun jändrän kä nebtä bkäne ñakare, akwa nunta jändrän jökrä Ngöböke bkäne, ye kwrere nun abko sribikä era metre Ngöböke abko nunta bä mike jabtä.

¹¹⁻¹² Ti mräkätre Corintobo, nun näma töbike ño, erere nunkwe niebare kwatibe munye amne, nunta mun jökrä tarere kri krübäte, akwa nunta nun tarere ñakare metre.

¹³ Ye abko, ngäbäkre rün käta kukwe ribere ngobo kwe ie, ye kwrere ti bike ribere munye: Tita nun tarere kri abko ütiäre munkwe ti tare ja di ngöi jökrä abko ti tö ribei munye.

Nitre tödekaka ñakare Jesubti, ben ja mäkädre ñakare

¹⁴ Mdakäre abko, jändrän ngwarbe bä jene jene, ye ni ñan raba mäketi krito kratibeßtä mikakäre sribire gwaire abko tä tikani Ngöbö Kukweibtä, ye kwrere arato nitre tödekaka ñakare Jesubti, ye ben munkwe ñan ja geta dikaro, ñobtä ñan angwane kukwe era metre Ngöböke abko ñakare ja kwrere jire chi kukwe käme yebe. Erere arato, kä iko abko ñakare jire chi kä ngwen kwrere, aisete ñan rabadre ketitibe jire chi.

¹⁵ Erere arato, Kristo abko tõi ñakare ja näre Belialibe (abko Satana ara), ye kwrere arato nitre tödekaka ñakare Jesubti abko ñakare tõi ja näre nitre tödekaka Jesubti ben.

¹⁶ Erere arato, mun tödekaka Jesubti abko ju Ngöbö nire kwe ye kwrere amne, mun ñan rabadre jire chi ketetibe ngöböre ngwarbe ben mikakäre ütiäte jae, ne abko gare metre munye. Ni tödekaka Jesubti abko ju Ngöböbe kwrere gare nie, ñobtä ñan angwane Ngöbö ara jire käkwe niebare krörö ja Kukweibtä:

Tikwe nünandi amne tikwe dikadikä niaratre ngätäite amne, ti rabadi Ngöböre kräke amne niaratre rabadi juta jen tikwe, *Levitico 26.12; Jeremias 32.38*
abko nieta Ngöbö Kukweibtä.

¹⁷ Ne aisete ni Dänkien Ngöbö këta niere krörö nitre tödekaka Jesubtiye arato: Nitre tödeke ñakare tibti, ye ngätäite nän mento amne kä mikedä munkwe.

Amne jändrän dbe ñakare ti ngwärekre, yebtä munkwe ñan kise mika jire chi. Munkwe nuendre kore ne ngwane, tikwe mun kadi ngäbti.

¹⁸ Amne ti rabadi mun Rün munkwe amne mun merire brare abko rabadi ti ngäbriänkäre tikwe, ye abko ni Dänkien Ngöbö Di Kri Jändrän Jökrä Nuenkrä këta niere kore, *2 Samuel 7.14; Isaiás 52.11; Ezequiel 20.34,41*

abko nieta Ngöbö Kukweibtä.

7

¹ Ti mräkätre tare tikwe, ni Dänkien käkwe jändrän kuin köböi mikani kore nie, ye mden kisete jändrän jökrä këta ni mike käme Ngöbö ngwärekre, ye ngäniene nikwe ngibiadre kuin deme Ngöbökrä. Ye abko, ni ngrabare amne ni üai abko nikwe ngibiadre deme jökrä amne, nita Ngöbö jürä ngwen jabtä, ye köböire abko ari ja tõi mike kwatibe nünakäre bäri deme Ngöbökrä.

Nitre Corintobo käi namani nuäre Pablobtä

² Ti mräkätre, munkwe ti taretä, ñobtä ñan angwane ni ñakare jire iti mun ngätäite abko rüere tikwe kukwe nuenbare blo amne, ni ñakare jire iti nikani ji blobti nünakäre Ngöbö rüere ti köböite. Erere arato, ni ñakare jire iti mun ngätäite abko tikwe ngökani ngwianbtä.

³ Tita blite kore ye abko ñan tita blite blo mun rüere mun bä mikakäre käme, akwa tikwe kukwe niebare käne munye, ye erere ti tö nieita munye: Mun tare kri tikwe, aisete tita juto biare nüne amne krüte munbe gwaire.

⁴ Mun rikai janknu mentokwäre Jesukristo jiebtü ruen tie bäri, aisete tita blite kore munbe. Mun käi juto krübäte tibtä. Tita ja tare nike bätäkä ngwarbe, akwa ti töita nebe munbtä angwane, jata nebe ruen dite tie amne këta nebe nuäre krübäte tibtä.

⁵ Kukwe rakakaba mda tibtä abko ti bike niere munye: Ti rükaba Macedonia nete, ye näire mentokwäre tita jadüke ñakare jire amne, kukwe taretare tä kite ti rüere kwärikwäri. Yebtä abko, kä jüräta nebe kri tibtä, aisete tita nüne ñakare jäme abti kä nuke mtare.

⁶ Akwa Tito rükabata angwane, Ngöbö kä mikakata nuäre ni moto ulire btä, Ngöbö ye abko käkwe kä mikabata nuäre tibtä Tito köböire.

⁷ Ye abko, ñan Tito rükabata aibe käkwe kä mikabata nuäre tibtä, akwa munkwe kä mikani nuäre Titobtä arato, ye abko käi rababa nuäre tibtä. Ye abko, mun tö ti tuaita krübäte amne munkwe ja mikani ngite, yebtä mun motota ulire ti jiebtü amne munta töbike kri tibtä, ye nieba jökrä Titokwe tie abko bäri käi rababa nuäre tibtä mda.

⁸ Ti mräkätre, tikwe tarä tikaba tare munye ye käkwe mun moto mikani ulire, akwa yebtä abko ja ruen ngite ñakare tie mtare. Tikwe tarä tikaba tare munye, ye käkwe mun moto mikani ulire bä jötrö, yebtä bäsi ja rababa ruen ulire tie kena,

⁹ akwa mtare käi nuäre tibtä. Ye abko ñan tikwe tarä tikaba munye, käkwe mun moto mikani ulire abko käi nuäre tibtä abko mun raba nütüre, akwa tikwe tarä tikani munye, ye käkwe mun moto mikani ulire Ngöbö ngwärekre, ye köböire abko munkwe ja tõi kwitaninta Ngöbö kukwäre käkwe kukwe käme nuen nämene munkwe, ye munkwe kitani temen, ye abko käi nuäre tibtä. Ne aisete, mun moto rabadre ulire kore, ie Ngöbö tö namani abko erere namani bare, aisete mun ñan nikani jire Ngöbö bäre mento nun köböite.

¹⁰ Ye abko, nikwe kukwe käme kitadre temen, abkokäre ere angwane Ngöböta ni moto mike bäri ulire, ye abko këta ni tõi kwiteta Ngöbö kukwäre amne nita kukwe käme ye kite temen ni rabadre dianintari abkokäre. Ye mden kisete, ni motota nebe ulire kore, ye ngwane ja ñan rabadre ruen ngite nie. Akwa nitre tödekaka ñakare Jesubti motota nebe ulire, akwa ñan tä kukwe käme kite temen, ye abko rabadi kärekäre Ngöbö okwä bäre mento.

¹¹ Ngöbö tö namani mun tuai moto ulire, ye erere mun moto namani, ye köböire abko jändrän bäri kuin namani bare munye abko krörö: kukwe nämene nakenkä ti rüere, yebtä munkwe töbikabare kuin ja käne amne munkwe ti ngie mikani. Ni nämene rüre ti rüere, kräke mun moto namani romon amne nane Ngöböke mun mikadre ja ngie nuen ti dokwäre,

yebtä kä jürä namani munbtä arato. Akwa yebti abko mun tö namani ti tuaita amne mun namani mokrere tibti, käkwe ni ja mikaka ngite ti rüere ye mikani ja ngie nuen ti dokwäre. Munkwe jändrän jökrä nuenbare kore, ye köböire abko mun ja mike ngite ñakare siba ti rüere abko munkwe bä mikani jabtä.

¹² Tikwe tärä tikaba tare munye, ye ngwane nirekwe ja mikani ngite amne nire rüere ja mikani ngite kwe, yebtä ñan ti töi nämä, käkwe tärä tikaba munye, akwa Ngöbö ngwäreki munta ti tarere ño, ye abko rabadre gare metre, abkokäre tikwe tärä tikaba kore munye.

¹³ Ye angwane, munta ti tarere abko munkwe bä mikani jabtä, ye abko käi nuäre kri tibtä mtare.

Mdakäre abko, munkwe kä mikaba nuäre tibtä, yebti ta abko kä nuäre kri Titobtä rükabata, ye abko bäri käi rababa juto tibtä amne, mun jökrä käkwe Tito die mikani, aisetä kä namaninta nuäre krübäte btä, ye abko bäri käi juto tibtä.

¹⁴ Tito ngämi niken mun kánti yete, känenkri ti nämä mun mike ütiäte jae, tikwe nieba ie. Ye kwrere bkänä munkwe ñan ti mikani ja gaire Tito okwäbti. Ye abko, ti nämä munbe Corinto yete angwane, tikwe kukwe era erere aibe niebare munye, ye kwrere ti nämä mun bä mike ütiäte Titoye, ye erere mun kwani ie.

¹⁵ Tito janama mun kánti yete angwane, mun jökrä käkwe kani ngäbti kuin amne munkwe mikani bäri ütiäte jae, käkwe niara kukwei mikani täte, ye abko tä nuke töreta ie, aisetä mtare Titota mun tarere bäri mda.

¹⁶ ¡Ti raba tödeke kwatibe munbti, ye abko käi nuäre kri tibtä!

8

Ngwian biandre ja moto kuinbti

¹ Ti mräkätäre, mtare ti bike blite kukwe mdabtä abko krörö: Nitre tödekaka Jesubti tä Macedonia nete abko kräke Ngöbökwä ja moto mikani kuin, käkwe die mikani kri abko ti tö nibi niei munye.

² Tödekabtä Jesubti ja mräkätäre nete käkwe ja tare nikani kri krübäte, akwa kä bäri nuäre krübäte btätäre. Erere arato, niaratre bäri bobre bobre amne tä jändrän kabre mdei nike, akwa bäsi ni ngwian bkänkä krikri käta ngwian bien kabre, ye kwrere jire ngwian bianba ja moto kuinbti kwetäre Ngöbökrä.

³ Ye abko, niaratre di nuäi nuäi, ye erere btä ngwian bianba kwetäre, akwa ja moto mikani bäri kuin kwetäre, käkwe ngwian biani bäri mda arato. Ja mräkätäre käkwe ngwian bianba kore ti okwäbti, aisetä tita niere kore munye. Erere arato, ja töi jenbti

⁴ Ja mräkätäre Macedonia nete tö rababa juta deme Ngöbökwä die mikani ni tödekaka Jesubti nünanka kä mda mda kánti ben gwaire, aisetä tikwe kä biandre ietäre arato ngwian biankäre abko rababa ribere kisere tie.

⁵ Ye erere bkänä, niaratre di nuäi nuäi, yebti ta ngwian bianba bäri kabre kwetäre, ye abko ngwian ñan biandre kore kwetäre ti nämä nütüre. Abti ngwian ye bärire mda abko niaratre ara jire käkwe ja mikaba au ni Dänkien Jesukristo kisete, bti nun kisete arato, Ngöbö tö namani ño, ye erere nuenba kwetäre.

⁶ Ye mden kisete, Tito nämänena ngwian ükekrö käne, ye kwrere rikadreta ngwian ükekröta mun kánti yete abko tikwe ribeba ie.

⁷ Mun abko tä ji ngwena käne jändrän keta kabrebtä abko krörö: Ngöbö diebti mun nena tödeke kwatibe Ngöböbti amne mun nena blite nuäre nuäre Ngöbökrä. Erere arato, Ngöbökwä mun mikanina töbtä amne mun tä juto biare ni mda mda die mikakäre. Amne ni mda mda taredre ño abko nunkwe bä mikani mun okwäbti amne mukanina gare munye. Erere arato munta ni mda mda tarere. Ye kwrere arato, munkwe ji ngwian käne ja moto mikabtä kuin ngwian biankäre.

⁸ Ne abko ñan tita ngwian biamna kisere munye, käta niere kore, akwa nitre tödekaka Jesubti mda mda tä juto biare ngwian bien abko ti tö mikai gare munye, käta niere kore. Munta ti tarere era bkänä ya abko ti tö gai, käta kä bien kore arato munye,

⁹ ñobtä ñan angwane ni Dänkien Jesukristo ngämi nuke kä nebtä, känenkri niara nämäne jändrän jökrä bkäne kä käinbti, akwa mun rabadre jändrän Ngöbökwä bkäne kri, abkokäre niarakwe ja mikani bobre mun kräke, ye abko garera munye, aisetä tita niere kore munye.

¹⁰ Mdakäre abko, munkwe ngwian biandre ño metre, yebtä tita töbike ño abko ti bike niere krörö munye mun die mikakäre: Kä känente mun nikani ngwian ükekrö, ye ngwane nitre gätäkä Jesu käbti nere temen, ngätäite munkwe ja töi mikani sribi kuin ne nuene käne amne, ñan mun nikani ngwian ükekrö jirekäbe, akwa kä namani juto munbtä sribi ye nuenkäre, akwa ñan namani bare täte munye.

¹¹ Ne aisetse, ká namani juto munbtá ngwian bien kena, ye kwrere munkwe ká mika juto jabtä sribi ye mikakäre bare täte mtare. Ngwianta nuái nuái munkwe biandre, ye erere munkwe bian ja moto kuinbti,

¹² ñobtä ñan angwane ni töta nebe jändrän biain era metre ja moto kuinbti amne jändrän tä nuái nuái nikwe abko erere nita bien, ye abko dbe Ngöbökrä amne Ngöböta kaen ngäbti ja moto kuinbti nie arato. Jändrän ñakare nikwe, ye abko Ngöböta kärere ñakare nie.

¹³ Mdakäre abko, ñan munkwe jändrän munkwe biandre jire jökrä ni mda mda die mikakäre abti mun rabadre jändrän mdei nike abko tita niere, akwa mun amne ni mda mda rabadre jändrän bkäne ja kwrere jökrä, ie ti tö, aisetse tita niere kore munye.

¹⁴ Mtare mun jändrän bkäne kabre krübäte abko ñan tä nebe krüte munye. Jändrän ye abko nitre tödekaka Jesubti nünanka juta Jerusalénte tä mdei nike, aisetse ká tará munye niaratre die mikakäre. Erere arato, köbö mdabti mun rabadre jändrän ño ño mdei nike amne niaratre rabadre jändrän ye bkäne kabre arato angwane, mun die mikadreta kwetre arato. Ye kwrere mun rabadre jändrän bkäne ja kwrere jökrä.

¹⁵ Kukwe yebtä Moisékwe kukwe tikani abko erere Ngöbö Kukwei káta niere krörö: Ni ruäre kákwe mana úkaninkró kabre, akwa kwetani jökrä kwetre angwane, namaninte ñakare ietre.

Amne ni ruäre abko kákwe mana úkaninkró braibe, akwa namani täte ietre arato amne mrö nikani ñakare kwetre, *Exodo 16.18*
abko nieta kore Ngöbö Kukweibtä.

Pablokwe Tito juaninta nebe Corinto

¹⁶ Ti mräkäre, tita mun tarere, aisetse käre ti töita munbtá, ye kwrere Ngöbökwé Tito töi mikani mun tarere, aisetse niara töita käre munbtá, yebtä abko tita kuin niere Ngöböye.

¹⁷ Tito abko töi náma rikabtä basareta munye yete, aisetse tikwe juanbata mun kánti yete angwane, ja näin nieba kwe tie, aisetse ja töi jenbti Tito bike nikenta basare munye.

¹⁸ Angwane tita ja mräkä tödekaka Jesubti juen iti Tito mukore nebe mun kánti yete. Ja mräkä ye abko tä sribire kuin Ngöbö kukwei kuin yebtä, aisetse ja mräkäre tödekaka Jesubti tä gätäre ká ngrabare temen Macedonia nete abko káta blite kuin jökrä niarabtä.

¹⁹ Mdakäre abko, ngwian bianta munkwe ja moto kuinbti, ye nun rikadre ngwena Jerusalén angwane, ja mräkä ye rikadre siba nunbe nun die mike, abkokäre nitre tödekaka Jesubti kákwe dianinkä sribi nuenkäre nunbe. Sribi nuenta munkwe, ye abko ni Dänkien Jesu mikakäre ütiäte jae amne nun tö ni mda mda die mikai abko nunta bá mike, aisetse ja mräkä dianinkä sribi nuenkäre kore nunbe abko tita juen Titobe yete.

²⁰ Nunta ngwian úkekrö ño ño, ye dokwäre ni mda mdakwe ñan ñäkädre blo nun rüere, ie ti tö, aisetse tita ja mräkä mda juen kore Titobe.

²¹ Erere arato, ngwian biani, nebtá ñan nun tö jändrän jökrä nuein kuin metre ni Dänkien aibe okwäbti, akwa ni mda mda okwäbti arato, aisetse tita ja mräkä ye juen kore Titobe.

²² Mdakäre abko, tita ja mräkä mdara jire juen Tito mukore amne ja mräkä mda yebe. Ni ye abko ká juto krübäte btá sribire abko tä bá mike tuadre bätäká ngwarbe jabtä ti okwäbti amne, mtare bäri munkwe ja kukwei mikadi täte kákwe ngwian biandi abko ruen ie, aisetse tita juen siba nebe yete.

²³ Angwane Tito abko btá ni mdakwe kukwe ngwiantari munye angwane, Tito abko sribi muko tikwe amne tä sribire gwaire tibe mun die mikakäre, munkwe nie kore. Ja mräkä nibu yebtä kukwe ngwiantari munye angwane, niaratre abko nitre gätäká Jesu kábti Macedonia nete kákwe dianinkä juandre nunbe amne, niaratre tä Kristo mike ütiäte jae abko munkwe nie.

²⁴ Erere arato, nunta mun káikitekä, ye abko kukwe era erere nunta niere, ye kwrere rabadre gare ja mräkäre tödekaka Jesubti ie Macedonia nete, abkokäre munkwe ja moto mika kuin ja mräkä ye kräke amne, munkwe ñan ti mika ja gaire abko ti tö ribei munye.

9

¹ Munta ngwian úkekrö, yebtä tikwe ñan kukwe tikadre mda munye ruen tie,

² ñobtä ñan angwane bäri mun tö ngwian biain abko gare kuin tie. Ká kánente jire abti ká núke mtare mun nünanka ká Acayate tö ngwian biain bäri ja mräkäre die mikakrä abko tita niere ja mräkäre Macedonia nete. Munta juto biare ngwian bien, abtä tita mun káikitekä, ye abko tä ja mräkäre Macedonia abo die mike, aisetse niaratre tö ja mräkäre die mikai bäri munbe gwaire.

³ Mun abko tä juto biare ngwian bien, yebtä tita mun káikitekä ja mräkäre nete okwäbti, akwa ti kukwei rabadre bäri ütiäte, abkokäre tita ja mräkä juen nibu Titobe yete ngwian úkekrö. Mun rabadre ja mike juto bkäná ngwian bien niaratre okwäbti, abkokäre tita juen,

⁴ ñobtä ñan angwane nunta tödeke krübäte munbti, käta mun käikitekä käre abti nane ja mräkätre Macedoniabo nete rikadre ruäre tibe nebe mun kánti angwane, munkwe ñan ngwian biandre täte jökrä, ye ngwane munkwe nun mikadre ja gaire angwane, nun tätre blite ngwarbe kuin munbtä, kwrere nun bä rabadre. Yebtä abko rabadre gaidre kri munkrä au abko känenkri tita mun mike mokre.

⁵ Ti ngämi niken, ye känenkri munkwe ngwian biandi munkwe niebare, ye erere munkwe mikadre biare abko ja mräkätre nimä ye rikadre niere munye abko rabadre bäri kuin munkrä ruen tie, aiseté tikwe niaratre juanba käne basare munye yete. Munkwe ngwian biandre ja moto kuinbti, ie ti tö rababa amne ñan munkwe biandre kábäbti ta abko ie ti tö rababa, aiseté tikwe niaratre juanba kore mun mike mokre.

Pablokwe ngwian bä mikani nurabtä

⁶ Ti bike ngwian bä mike nura kwrere mda, ne munkwe ngwian töre käre jae abko krörö: Nire nire käta nura nökö chi abko käta nura ngwä ötö chi amne, nire nire tä nura nökö kabre abko käta nura ngwä ötö kabre arato. Ye kwrere arato, munkwe jändrän biandre kabre Ngöbökrä, ye ngwane Ngöbökrä jändrän kuinquin biandi kabre munye.

⁷ Ye abko, munkwe ngwian biandre nuäi nuäi btä munta töbike, ye erere munkwe bian, akwa munkwe ñan biandre ja moto ulire bti amne ñan ni mdata biamna, ñobtä ñan angwane kä nuäre nibtä ngwian bien, ni ye abko Ngöböta tarere.

⁸ Munkwe jändrän biandre kore Ngöbökrä angwane, Ngöbökrä mun die mikadre kri, käkwe jändrän bätäkä ngwarbe biandre kabre munye amne, mun rabadre jändrän jökrä bkäne täte nünankrä. Ye angwane, jändrän yebti mun rabadre ni mda mda die mike, abkokäre Ngöbökrä biandre munye.

⁹ Kukwe yebtä abko Ngöbö Kukweita niere krörö:

Ni bobre bobre, ie Ngöbökrä jändrän biani kabre ngwarbe amne, käre Ngöböta ja moto mike
 kuin ni mda mdakrä, Salmos 112.9
 abko nieta Ngöbö Kukweibtä.

¹⁰ Ngöböta jändrän bien kore nie, yebtä ti bike ngwian bä mike nura kwrere abko krörö: Ngöbö abko tä nura bien nökadre amne, mrö kwetata nikwe abko Ngöbö ara käta bien. Ye mden kisete, Ngöbö ara jire käkwe nura biandi kabre munye nökadre amne Ngöbö ara jire käkwe mikadi niren, aiseté mun di rabadi ja moto mikakrä kuin jändrän bien bäri Ngöbökrä, ye abko käkwe ni kwati die mikadi.

¹¹ Munkwe jändrän biandre kabre ni mda mda die mikakrä, abkokäre Ngöbö diebti mun rabadre jändrän bätäkä ngwarbe bkäne kabre amne, munkwe biandre ja moto kuinbti amne, ngwian ukakröta munkwe abko munta bien ngwiandre nunye, ye rabadi ja mräkätre kisete angwane, käi rabadi nuäre btätre, käkwe kuin niedi Ngöböye.

¹² Ñobtä ñan angwane munta ngwian juen, ye rabadi ja mräkätre Jerusalénbo kisete angwane, jändrän ñakare kwetre, ye rabadi kisete angwane, bäri jändrän ye köböire abko rabadi kuin niere kabre Ngöböye,

¹³ ñobtä ñan angwane Ngöbö kukwei kuin Kristobtä abko mikata täte munkwe munta niere, ye mden erere munta mike täte, käta jändrän juen ja mräkätre Jerusalénbo kräke amne ni mda mda kräke. Munta ja moto mike kuin, käta jändrän bien kore, yebtä niaratre käkwe Ngöbö käikitadrekä.

¹⁴ Mdakäre abko, Ngöböta ja moto mike kuin mun jökrä kräke, aiseté munta ja mräkätre die mike, yebtä abko niaratre tä mun tarere kri, käkwe blitadi Ngöböbe munkrä.

¹⁵ Ngöbökrä jändrän kuin ütiäte kri biani ngwarbe nie abko Jesukristo ara, yebtä abko kukwe ñan kwandre jire kwati bti ni raba kuin niere Ngöböye. Tita kuin niere Ngöböye Jesukristobtä.

10

Pablota blite jakrä

¹ Kristo abko moto jáme ja mikaka bobre nibtä, ye käbti abko ti Pablo bike kukwe ribere krörö munye: Tita nebe mun kánti yete angwane, mun jüräta nebe tibtä, abti tita nebeta mente temen, käta tärä tike munye angwane, tita ja bä mike krübäte, munta niere tibtä.

² Ye abko ti näinta basareta munye yete angwane, tita nüne ni tödekaka ñakare Jesubti kwrere, käta jändrän ukete jakrä au abko ni ruäre mun ngätäite tä niere tibtä. Ni ye kräke, ti rükadre ja bä mike krübäte ruen tie, akwa ye abko ti ñan tö nuein, aiseté munkwe ñan ti ngwian ja bä mike krübäte yete, käkwe ti kukwei mikadre täte mtare abko ti tö ribe munye.

³ Ti abko tä nüne kä nebtä mun kwrere bkänä, akwa ñan ni kä nebtä tä rüre, ye kwrere tita rüre Ngöbö rüre rüre.

⁴ Ye abko, jändrän bti ni kä nebtä tä rüre, ye kwrere bti tita rüre ñakare, akwa Ngöbö di kri käta jändrän jökrä ribi ribi niara rüere ye juen ngwarbe, ye aibebti tita rüre kukwe taretare

ngwarbe ngwarbe rüere, asete ni mda mda tä ti kite ngise ngwarbe abko kukwei tita bä mike ngwarbe.

⁵ Erere arato, Ngöbö kukwei ñan rabadre gare ni mda mdaye, abkokäre nire nire käta bike kri amne tä kukwe mike Ngöbö Kukwei rüere, ye ben tita blite kukwe kwetre bä mikakäre ngwarbe. Mdakäre abko, ni jökrä käkwe tödekadre metre Kristobti, abkokäre tita ni jökrä töi kwite tödeke bti.

⁶ Erere arato, mun jökrä käkwe Kristo mikadre täte era metre angwane, nire nire ñan tä Kristo kukwei mike täte abko erere ti tädi juto biare mike ja ngie nuen.

⁷ Kukweta ño era metre, yebtä munkwe töbika kuin ja käne amne nire nire abko jen Kristokwe ruen era metre jabtä ie, ni ye abko ie ti jen Kristokwe arato abko rabadre gare metre.

⁸ Kristo käkwe ja di biani tie, ye tita niere bäre bäre ja bä mikakäre ütiäte, akwa yebtä tita nebe ja gaire ñakare, ñobtä ñan angwane Kristo käkwe ja di biani tie mun die mikakäre nüne bäri metre Kristokrä amne, ñan ja di biani kwe tie mun di käntbekrä.

⁹ Tita tarä tike munye, ye abko mun rekwetadrekä ti käne, abkokäre tita tike, mun ñan raba nütüre kore,

¹⁰ ñobtä ñan angwane ni ruäre yete käta niere krörö tibtä: Ti mobe temen käta tarä tike munye angwane, tita ñäke taretare munye amne tita kukwe taretare mike mun kötärä, akwa tita nebe mun ngwäreki angwane, ti ngwarbe, di ñakare amne, ti blite ñakare kuin ni töbtä kwrere, akwa taräbti abko tita ja bä mike krübäte abko tä niere tibtä.

¹¹ Akwa nire tä ñäke kore tibtä, ye abko ie kukwe krörö rabadre gare arato: Tita mobe mun okwä bäre angwane, tita kukwe taretare tike taräbti munye abko nieta kore tibtä, akwa tita kukwe tike munkrä, ye nire nire käkwe ñan mikadre täte angwane, ti rabadi yete mun ngwäreki angwane, tita tarä tike ño, ye kwrere arato tikwe ja mikadi mun ngwäreki, asete munkwe ñan ja ngöka.

¹² Nitre ja dikaire au, ye abko ben ti ñan raba ja gaen jire chi amne, ti ñan raba ja bä mike jire chi niaratre kwrere, akwa niaratre abko käta kukwe niere ngwarbe, käta niken ja töi ñäke jakrä au amne tätre ja bä mike ja kwrere kwärikwäri, akwa tätre dre nuene metre ñan tä nebe gare ietre.

¹³ Akwa Ngöböke kä tarä mikani nebe mdente sribikäre tie, yebti ta ti ñan rikadre jire ja bä mikakäre ütiäte, nitre dirikä blo tä nuene ye kwrere, ñobtä ñan angwane Ngöbö ara jire käta kä tarä mike sribikrä tie, asete Ngöbö ara jire käkwe kä biani tie abko köböire ti namani mun kanti Corinto yete.

¹⁴ Ye mden kisete, Ngöböke kä tarä mikani nebe mdente sribikrä tie, yebti ta tita niken ñakare, asete Ngöböke kä biandre ñakare tie sribikäre mun kanti yete angwane, ti ñan rabadre nebe käne mun kanti yete. Akwa Ngöböke kä tarä mikani nebe yete sribikäre tie, asete ti namani Ngöbö kukwei kuin Kristobtä ngwena käne munye yete.

¹⁵ Ngöböke kä tarä mikani sribikrä tie, yebti ta tita niken ñakare ja käikitakakäre sribi ni mda mdakwe yebti. Akwa mun jatadre tödeke bäri mda Ngöböti, abkokäre ti tö sribire bäri mda mun ngätäite yete, akwa Ngöböke kä tarä mikani mdente sribikrä tie, ye erere kanti ti tö sribire. Erere arato, mun rabadre tödeke bäri Kristobti angwane, ti tö rikai bäri mentokwäre mda,

¹⁶ kukwe kuin Ngöböke Kristobtä mike gare ni mda mdaye arato. Akwa ni mda mda nebe dirire ñakare, ye kanti ti tö rikai angwane, ti ñan tö bikai kri sribi ni mda mdakwe yebti, asete ni mda mda tä sribire, ye kanti ti ñan tö rikai. Ni mda mda nükani mun ngätäite käta mun ngökö, ye kwrere ti ñan tö nuein,

¹⁷ ñobtä ñan angwane Ngöbö Kukwei käta niere krörö:

Nire nire tö ja käikitaikä au käkwe ni Dänkien Ngöbö käikitaka jirekäbe,

Jeremias 9.24

abko nieta Ngöbö Kukweibtä,
¹⁸ ñobtä ñan angwane nita ja käikitekä au, ye abko ñan tä ni mike ütiäte, akwa ni Dänkien ara jire tä ni käikitekä, ye abko bäri ütiäte kri.

11

Pablota blite nitre bikaka Jesu kukwei ngwianka yebtä

¹ Ni töi ñakare käta blite ngwarbe kwäräkwärä, ye kwrere ti bike blite munbe, akwa munkwe ti kukwei nua bätärekä abko ti tö ribei munye.

² Tita mokrere krübäte munbti, akwa tita mokrere munbti, ye abko tä kite Ngöböki, ñobtä ñan angwane meri bati kaiibe deme abko rün tö ngibiai deme brarekrä, ye kwrere ti tö mun ngibiai deme nitre dirikä blo ye ngäniene, mun mikakäre ni brare itibe kisete. Ni brare kisete tikwe mun mikadre, ni ye abko Kristo ara.

³ Mtare, ja tõi metrebti munta Kristo tarere metre, akwa kä jürä krübäte tibtä, ñobtä ñan angwane kira Satana käkwe ja bä mikani tbi kwrere abko nämane bäri töbtä ni ngökabti, käkwe Eva ngökani, nane ye kwrere munkwe ja ngökamna nitre dirikä bloye amne mun tõi kwitadre kwetre amne mun tõi ñan rabadre kwatibe Kristobtä abko jüräta nebe tibtä.

⁴ Tita niere kore munye, ñobtä ñan angwane Ngöbö kukwei kuin Jesubtä diribarera tikwe munye, yehti ni mda mda tä dirire bä jene munye Jesubtä, ye abko munta kaen ngäbti kuin amne munta kukwei mike ütiäte. Erere arato, Ngöbö Üai era metre kani ngäbti munkwe, yehti munta üai mda kaen ngäbti. Erere arato, Ngöbö kukwei kuin Jesubtä munkwe kanina ngäbti, yehti mtare munkwe Ngöbö kukwei mda kadre ngäbti nieta munye, erere munta kaen ngäbti. Ye mdenbtä tita niere kore munye.

⁵ Akwa nitre bikaka Jesu kukwei ngwianka krikri jatani ti jiehti, yehtä ja ruen ñakare bobre tie.

⁶ Ti abko ie blita gare ñakare kuin ni mda mda ngwärekre nitre bikaka Jesu kukwei ngwianka krikri ye kwrere, akwa Ngöbö kukwei kuin Jesubtä ye abko gare kuin metre tie. Ye mden kisete, ti nämane mun kanti yete angwane, ti nämane dre dre nuene angwane, Ngöbö kukwei gare metre tie abko ti nämane bä mike jabtä mun okwäbti.

⁷ Mdakäre abko, tikwe Ngöbö kukwei kuin Jesubtä mikani gare munye angwane, mun rabadre ütiäte, abkokäre tikwe bikaba tidrä, käkwe sribi ütiä käräba ñakare munye. ¿Yehtä tikwe ja mikani ngite ya? Ñakare jire chi.

⁸ Ja mräkäre tödekaka Jesubti kä mda mda kanti, ye käkwe sribi ütiä biani kiakia tie, amne tikwe kani ngäbti ietre, ye köböire abko tikwe sribiba ngwarbe munbe.

⁹ Erere arato, ti nämane mun ngätäite yete angwane, ti nämane nebe jändrän mdei nike ruäre angwane, tikwe sribi mikani ñakare mun iti kisete, ñobtä ñan angwane jändrän mdei nika nämane tikwe abko ja mräkäre Macedoniabo nämane nuke angwane, nämane bien tie. Tikwe sribi mikani ñakare jire mun kisete, ye kwrere tikwe nuendi janknu.

¹⁰ Ti abko, ie kukwe era Kristobtä gare kuin, ye kwrere Ngöbö kukwei kuin Kristobtä tikwe mikani gare munye angwane, tikwe ütiä käräbare ñakare munye, yehtä abko ja ruen ütiäte kri tie, aiseti ni ñakare jire iti Acaya yete kä raba ti kada kete kukwe era ye niebtä.

¹¹ ¿Tita ñäke kore, yehtä abko tita mun tarere ñakare munta nütüre ya? Ñakare. Mun tare kri tikwe, ye abko gare kuin Ngöböye, aiseti mun tare ñakare tikwe, munkwe ñan nütü.

¹² Ni mda mda tä nuke dirire mun ngätäite, ye abko ie ja ñan rabadre ruen ütiäte ti kwrere, abkokäre tikwe ñan kä biandre jire chi ietre sribikäre ti kwrere amne tita sribire, ye kwrere tikwe sribidi janknu munbe.

¹³ Tita niere kore, ñobtä ñan angwane nitre ye abko ñakare Kristo kukwei ngwianka era metre amne niaratre abko ni ngökaka, akwa tätre ja bä mike Jesu kukwei ngwianka kwrere.

¹⁴ Akwa niaratre tä näin kore, ye abko ñakare kukwe bä jene, ñobtä ñan angwane Satana ara jire käta ja bä mike angele kä trä ngwente Ngöbökwere kwrere.

¹⁵ Ye mden kisete, sribikätre Satanakwe abko tätre ja bä mike ni sribikä metre Ngöbökwere ye kwrere, yehtä munkwe ñan töbikadre kri. Akwa niaratre tä näin ni ngökö kore, ye dokwäre Ngöbökwere mikadi ja ngie nuen mrä.

Pablota ja tare nike, btä tä ja käikitekä

¹⁶ Ti bike niereta bobuta krörö munye: Ti abko tõi ñakare, ye munkwe ñan nütü jire chi tibtä, akwa ti tõi ñakare munta nütüre janknu tibtä ne ngwane, ni tõi ñakare, ye kwrere jire ti bike blite angwane, munkwe ti kukwei nua. Ti tö blitai ni tõi ñakare kwrere ja käikitakakäre chi.

¹⁷ Tikwe ja käikitarekä kore, ye kwrere ti Dänkien Jesu käkwe ñan ja käikitadrekä, akwa ti bike blite kore ni tõi ñakare kwrere ja tõi jenbti au,

¹⁸ ñobtä ñan angwane ni tarä mun ngätäite käta ja käikitekä au, ni tödekaka ñakare Jesubti tä ja käikitekä au ye kwrere, aiseti ti bike ja käikitekä siba niaratre kwrere.

¹⁹ Mun abko töbtä kri amarebti nitre ni ngökaka tõi ñakare tä mun kanti yete abko ie munta olo ketete jäme.

²⁰ Erere arato, tätre mun mike ja kukwei mike täte angwane, munta kaen ngäbti jäme. Mdakäre abko, tätre jändrän denkä ngwarbe munkän, tä mun ngökö amne tä bätä ngwen munbtä, tä mun mete ngwärebtä, akwa munta kaen ngäbti jäme.

²¹ Akwa ti abko käkwe ja mikani ñakare krübäte jire chi dirikä mda mda ye kwrere, akwa tikwe ja mikani bobre, di ñakare mun okwäbti yete, yehtä abko tita nebe ja gaireta.

Akwa nitre mun ngökaka tä ja käikitekä au, aiseti ni tõi ñakare käta ja käikitekä, ye kwrere ti bike ja käikitekä krörö arato:

²² Niaratre abko hebreore amne ti hebreo arato. Niaratre abko israelita amne ti israelita arato. Niaratre därebare Abrahamkri amne ti därebare Abrahamkri arato.

²³ Mdakäre abko, ni tõi ñakare kākwe blita, ye kwrere jire ti bike niere krörö mda: Niaratre abko sribikā Kristokwe tätre niere, akwa ti abko bāri sribikā Kristokwe niaratre ngwā abko ti bike bā mike krörö: Tikwe sribibare bāri tare nitre ni ngōkaka tā mun ngātāite yete ye ngwā. Erere arato, sribibtā Kristokrā ti kitani ngite bāre bāre niaratre ngwā amne, ti kwata metani bāri niaratre ngwā arato amne bāre bāre bāsi ti krūtani arato sribikāre Kristo krāke niaratre ngwā.

²⁴ Erere arato, bārike jire nitre israelita kākwe ti kwata metani bā grebti bā jātābti bā ökān batire batire amne

²⁵ bāmā jire nitre romanobo kākwe ti kwata metabā kri otobti amne bati ti tākāba jābti ti kāmikāre. Erere arato, ti nāmāne nāin rute mrenbti angwane, bāmā ru rikāba ñōte nguse ti ngōi jōkrā, ye ngwane kōböiti dibire rare tikwe jūbakāba mrenbti amne bāsi ti müre reketāba ñōte.

²⁶ Mdakäre abko, kukwe kuin Kristobtā tita ngwena ni mda mdaye, yebtā tikwe dikak-abarera kabre kwārākwarā amne dikakabtā kore ñō krikri jite kākwe ti rātākāba bāre bāre amne nitre gokā kākwe ti rātākāba bāre bāre ji ngrabare. Erere arato, nitre israelita mda mda tōdekaka ñakare Jesubti ja rüere tibe ye kākwe ti rātākāba amne nitre nūnanka juta mda mdabti ye abko nāma ti rātekā kri arato kukwe kuin Jesubtā diri dokwāre kore. Mdakäre abko, juta krikri te ni kwati kāta ti rātekā. Erere arato, tita niken kā mdabti juta bāre mento amne tita niken mrenbti angwane, kāre ti rātākāta amne nitre dirikā ngwarbe mda mda, ye kāre tätre ti rātekā arato kukwe kuin Kristobtā ngwian dokwāre ti rātākāta kore.

²⁷ Erere arato, tikwe sribiba tare krübāte amne tikwe ja tare nikāba kri amne bāre bāre tikwe kibāba ñakare sribibtā. Mdakäre abko, tikwe mrō nikāba krübāte amne tikwe tomna mdei nikāba kri arato. Bāre bāre tikwe mrōba ñakare amne tikwe kā tibo nikāba bāre bāre amne bāre bāre dān ñan rabāba tie amne tikwe ja бүtie nikāba arato. Kukwe kuin Kristobtā tita niken ngwena kwārākwarā, yebtā abko tita ja tare nike kore.

²⁸ Kukweta nākenkā kore tibtä, ye bārire mda abko kukwe mda mda tā kite ti rüere, ye abko tribe doboko kwrere jire tā kite mate ti kōtārā angwane, nitre gātākā Kristo kābti, yebtā abko tita nebe tōbike kri mda krörö:

²⁹ Mun ruāre dita krüte nāin janknu Kristobe, ye ngwane ti dita krüte munbe gwaire siba. Amne ni tōdekaka Jesubti ye tā niken ji blobti ni mda kōböite, ye ngwane ti motota nebe romon ni tōdekaka Jesubti ye dokwāre.

³⁰ Amne tikwe ja kākkitadrekā kore ne ngwane, ti bobre di ñakare, yebtā abko tikwe ja kākkitadikā.

³¹ Amne Ngōbö, ni Dānkien Jesu Rūn kwe aibe ni rabadre kākikitekā kākēkäre, ye okwābti tita kukwe era erere niere abko gare kuin ie.

³² Mdakäre abko, ti nāma juta Damascote angwane, gobran sribikā jrei Aretas krāke ye kākwe nitre rükā mikani jukwebtā jutate yete ti kakāre ngite,

³³ akwa nitre tōdekaka Jesubti nāma ruāre yete abko kākwe ti mikāba kutiate, kākwe ti gibiakāba bentanante ta timon kite ta juta yete angwane, tikwe kwārābeba kore nitre rükā yebtā.

12

Ngōbökwē jāndrān mikani tuare kōböre Pabloye

¹ Kukwe rakakāba kore tibtä, akwa tikwe ja kākkitadrekā au kukwe yebtā abko ñan rabadre ti mike bāri ütiāte ruen tie, akwa ni Dānkien Jesu kākwe kukwe mikani tuare bāre bāre kōböre kwrere tie abko btā ti bike blite janknu abko krörö:

² Kā kwā jātābti kobkāra, ti nāma tōdeke Kristobti angwane, ni Dānkien nikani ti ngwena moibe kāin nebe Ngōbö ara jire kānti kā kāinbti. Ye kānti ti jānikani abko gare kuin tie, akwa ti nikani metre kore ya o ti ūai aibe jānikani ya abko gare ñakare tie, akwa Ngōbö aibe ie gare.

³⁻⁴ Akwa ni Dānkien nikani ti ngwena nebe kā kuin deme Ngōbökwē kānti, ye abko nikani ti ngwena ño metre abko gare ñakare tie, akwa kā ye kānti tikwe kukwe kaibe tiebe kukwei nuaba amne kukwe ye abko ti ñan rāba niereta jire chi.

⁵ Kukwe nakaninkā kore tibtä, yebtā tikwe bikadre kri, akwa yebtā ñan tikwe bikadi kri au, akwa ti bobre, di ñakare, yebtā abko tikwe bikadi kri.

⁶ Ye abko, tikwe kukwe tuaba, ye tikwe niedre ni mda mdaye bikakäre kri, ye ngwane tikwe ñan kukwe niedre jire ni tõi ñakare kwrere ruen tie, ñobtä ñan angwane tikwe kukwe era erere niedre. Akwa ti ñan tō bikai kri au kukwe kore btā, ñobtä ñan angwane kukwe kore, yebtā ni mda mdakwe ti mikadre ütiāte Jesu kukwei ngwianka kwrere, ie ti ñan tō, akwa tita nūne metre amne tita Ngōbö Kukwei mike gare metre, yebtā ni mda mda kākwe ti mikadre ütiāte, ie ti tō.

⁷ Tikwe jändrän tuani, yebtä tikwe ñan bikadre kri, abkokäre tita ja tare nike krörö: Kri tukwä, ye kwrere jire tä nebe ruen ngritekä ti ngrabare tie, ye abko Ngöbö ara jire käkwe Satana tuanimetre jändrän juen ti mikakäre bren kore abko kisete tita ja tare nike.

⁸ Tita ja tare nike kore, ye abko ti Dänkien käkwe diandreikä tibtä abko tikwe ribebarera bämä jire ie,

⁹ Akwa niarata niere krörö tie: Tita ma tarere ja moto kuinbti, ye aibe rabadre ütiäte makrä, ñobtä ñan angwane ni bobre di ñakare, yebtä abko ti di kri tuata, nieba ti Dänkienkwe tie. Ye mden kisete, ti bobre di ñakare, yebtä bäri ti tö rabadre ja kääkitekä, Kristo di kri rabadre täte jökrä tibtä abkokäre.

¹⁰ Ye abko, tita nebe ruen bobre, di ñakare tie angwane, ni mda mda tä ñäke taretare tie amne tita jändrän bätäkä ngwarbe mdei nike, erere arato tita ja tare nike ni mda mda kisete amne, tödekabtä Jesubti tita ja tare nike bätäkä ngwarbe, ye abko käi nuäre kri tibtä, ñobtä ñan angwane tita nebe ruen bobre di ñakare tie, ye ngwane abko Kristo di tä nebe bäri kri tibtä, aisete käta nebe nuäre tibtä.

Pablota nitre Corintobo tarere kri

¹¹ Ni töi ñakare, kwrere jire tita ja bä mike mun okwäbti, akwa mun ara jire köböite tita nuene kore, ñobtä ñan angwane munkwe ti mikadre ütiäte, käkwe blitadre kuin tibtä, ye ngwane tikwe ñan ja bä mikadre jire chi ni töi ñakare kwrere. Ti abra ütiäte ñakare bkänä, ñobtä ñan angwane Kristo aibe ütiäte, akwa nitre tä ja bä mike Jesu kukwei ngwianka krikri, ye abko ñakare bäri ütiäte kri tikrä, aisete ja ruen ñakare bobre niaratrehä tie.

¹² Ni Jesu kukwei ngwianka era metre abko tä bä mike sribi kwebti, ye erere tikwe bä mikani krörö mun okwäbti: Ngöbö tä tibe, ye bä mikakrä tikwe sribi kri ñan tuabare nuenba Ngöbö diebti amne, sribi kri nuenba tikwe, yebtä mun töi ñan rababa krütare. Tikwe nuenba kore angwane, tikwe nünankaba dite jabtä, käkwe ja tare nikaba bätärekä, yebtä abko ti abko Jesu kukwei ngwianka era metre abko tikwe bä mikaba.

¹³ Akwa tikwe sribiba mun ngätäite yete angwane, tikwe ja mräkätre gätäkä Jesu käbti kä mda mda kanti abko kötärä ti nämä sribi mike, kä nämä ti die mike, ye kwrere tikwe sribi mikaba ñakare mun kötärä. Ne aisete sribi kore, aibehtë mun ñakare ja kwrere ja mräkätre mda mdabe tita niere. Tita kukwe nuene kore ne raba mate tare munbtä amne, tita ja mike ngite mun rüere raba ruen munye ne ngwane, munkwe ti ngite ye dian jökrä jabti ta.

¹⁴ Ti mräkätre, mtare ti nenante juto biare rikakäreta basare bämäkäre munye. Akwa ti näinta ne ngwane, tikwe ñan jändrän kärädita jire chi munye arato, ñobtä ñan angwane ngwian amne jändrän mda mda tä munkwe, ñan jändrän yetari tita niken mun kanti yete, akwa mun ye ara rabadre tödeke metre Kristobti, abkotari tita niken yete, ñobtä ñan angwane ti abko mun rün kwrere, amne ngäbäre rün käta ngwian ükekrö ngäbäre kwekwe kräke amne, ñan ngäbäre käta ngwian ükekrö rün btä meye kräke.

¹⁵ Ye mden kisete, ja moto kuinbti ti tö jändrän tikwe gainte jökrä munkrä amne, ti ne ara jire bike ja gaente au mun kräke, mun die mikakäre nüne bäri Kristokrä. Ti mräkätre, tikwe mun taredre bäri mda ne ngwane, ti taredre bäri chi munkwe ya ño ruen?

¹⁶ Mdakäre abko, tita mun tarere kore, yebtä munta töbike ño abko erere munta töbike gare tie, akwa tikwe ngwian käräba ñakare munye, aisete tikwe sribi mikaba ñakare mun kötärä, ye abko dbe munkrä ruen tie. Akwa tikwe bikaba bäri töbtä, abkokanti munkwe ja dokwä mikani kö okwäte ti köböite abko ni ruäre tä niere tibtä.

¹⁷ Ne aisete ti bike kukwe ngwentari krörö munye: ¿Tikwe ni juani ruäre basare munye yete, ye köböire tikwe ngwian dianinkä munkän ya? Ñakare jire chi.

¹⁸ Erere arato, Tito rikadre basare munye yete abko tikwe ribeba ie, ye erere rikaba angwane, tikwe ja mräkä mda juamba ben nebe yete, ¿ye angwane Titokwe ngwian dianinkä munkän sribi ütiäre ya? Ñakare jire, ñobtä ñan angwane Tito amne ti, nun abko tä nüne ja kwrere amne nun töi ja kwrere arato, aisete nun jändrän denkä ñakare munkän sribi ütiäre.

¹⁹ Tita kukwe niere kore munye, yebtä abko munkwe ja mikani ngite, aisete nunta ja bä mike ngite ñakare mun ngwärekre, munta nütüre nunbtä, akwa ñakare kore, ñobtä ñan angwane nunta blite era metre Ngöbö ngwärekre amne ni jwen Kristokwe käta blite, ye kwrere nunta blite. Jändrän jökrä nuenta munkwe, ye köböire abko mun jökrä rabadre niren kuin nünakäre bäri metre Kristokrä abko ie ti tö, ti mräkätre tare tikwe.

²⁰ Ti mräkätre, tita blite kore munbe, ñobtä ñan angwane ti rikadre nebe basare munye yete angwane, nane ti tö mun tuai nüne kuin Kristokrä, erere ñan kwandre tie abko jürä kri tibtä. Erere arato, mun tö rabadre ti tuai blite ño jabe, ye kwrere tikwe ñan blitadre munbe abko jürä tibtä arato. Mdakäre abko, nane munta rüre jabe kwärikwäri amne munta mokrere ni mdabe jändrän kwe dokwäre amne mun moto nebe romon jötrö abko jürä tibtä. Erere arato nane mun ruäre kääbärekäbäre amne ni ruäre tä blite ngwarbe ni mda mda rüere,

nane ni ruäre abko tä ni mda mda kädriere amne ni ruäre abko tä bike krikri amne ni ruäre tä nüne käme abko tä kä mike nokre, ye abko jürä kri tibtä arato.

²¹ Mdakäre abko, mun kwati käkwe ja mikani ngite, ye abko käi nikani raire ta, akwa nane mun ngämi kukwe käme ye kite temen amne, nane munta ja mike ngite janknu Ngöbö rüere krörö abko jürä nibi tibtä: Ni brare tä bike merire jae kwärikwäri amne meri tä bike brare jae kwärikwäri, erere arato munta ja mike gure tietebie gore ni mda mdabe amne, kukwe kämekäme kore Ngöbö rüere aibe mdei munye, aisete ti näinta basare munye yete angwane, nane mun tädre ja mike ngite janknu kore, yebtä tikwe mun kwati müaidre jakän amne ti rabadre tuen bobre Ngöböye mun ngwäreki abko jüräta nebe tibtä arato.

13

Pablota nitre Corintobo mike mokre mrä

¹ Ti mräkätre, ti bike ninkenta basare bämäkäre munye, akwa mun mda mda tä ja mike ngite Ngöbö rüere, ye kräke tikwe kukwe ükaite, ñobtä ñan angwane ni nibu ya, ni nimä ya käkwe blitadre ja kwrere niara rüere, ye ngwane niara ngite rabadi gare metre abko Ngöbö Kukwei käta niere. Ne aisete Ngöbö Kukwei käta kukwe niere, ye kwrere tikwe kukwe ükadite.

² Ti janama basare bobukäre munye yete angwane, tikwe mun mikani mokre ja ngwäreki yete abko erere tita mobe munye angwane, ti bike mun miketa mokre bobuta abko krörö: Ti näinta basare munye yete angwane, munkwe ja mikani ngite, ye abko tikwe ñan diandreta jire munbti ta, akwa tikwe mun mikadi ja ngie nuen,

³ ñobtä ñan angwane Kristo tä blite era metre ti köböire ya abko mun tö gai metre. Kristo abko tä ja mike di ñakare mun ngätäite abko mun ruäre tä niere, akwa Kristo abko tä ja di kri bä mike mun ngätäite.

⁴ Ye abko, era metre ni bobre di ñakare, kwrere jire Kristo kämikani krusobtä, akwa mtare tä nüne kärekäre Ngöbö di kri köböire. Kristo di namani ñakare, ye kwrere ti di ñakare, akwa tita ketetibe Kristobe kore ne ngwane, Ngöbö di kri köböire tikwe nünandi sribikäre mun kräke.

⁵ Akwa munta tödeke kwatibe Kristobti ya, ñakare ya, yebtä munkwe ja trä tua kuin au amne, munta tödeke kuin metre ya, ñakare ya, ye munkwe mika ñäräre kuin jabtä au. Kristo Jesu tä nüne munbtä, akwa munta tödeke ñakare bti ruen munye ne ngwane, Kristo tä nüne ñakare bkänä munbtä.

⁶ Akwa tikwe ñan sribibare ngwarbe mun ngätäite yete, aisete era metre munta tödeke Kristobti, ruen tie.

⁷ Amne munkwe ñan kukwe kämekäme nuendre jire Ngöbö rüere abko tita ribere Ngöböye. Tita blite kore Ngöböbe munkrä, ye abko ñan tikwe sribibare kuin metre abko munkwe bä mikadre, ie ti tö akwa, munkwe jändrän kuin nuendre metre Ngöbökrä aibe ie ti tö, käta blite Ngöböbe munkrä. Tikwe sribibare ngwarbe tä nebe tuen ni ruäre, akwa munkwe jändrän kuin nuendre abko tita ribere Ngöböye,

⁸ ñobtä ñan angwane kukwe era metre Kristobtä, ye rüere ti ñan raba kukwe mda nuene jire chi, akwa tikwe sribidre jirekäbe kukwe era metre ye kräke.

⁹ Ne aisete, ti dita nebe ruen ñakare tie, ye ngwane käta nebe nuäre tibtä, ñobtä ñan angwane mun abko rabadre dite dite nüne Kristokrä abko ie ti tö, ne aisete käta nebe nuäre tibtä. Mdakäre abko, Ngöböke mun mikadre nünenta kuin metre ja ngwäreki, ie ti tö, aisete tikwe blitadi janknu Ngöböbe mun jökrä kräke.

¹⁰ Ti mräkätre, ti ngämi niken basareta munye yete, känenkri tita tärä ne tike tare munye, mun mikakäre mokre, ñobtä ñan angwane ni Dänkien Jesu käkwe ja di biani tie, ye ñan biani kwe tie ni mda mda mikakäre ja ngie nuen, akwa ja di biani kwe tie ni mda mda die mikakäre nüne metre jakrä, aisete ti ngämi niken yete, känenkri tita mun mike mokre kore.

Kukwe mrä

¹¹ Ti mräkätre, ti bike kukwe niere mrä krörö munye: Munkwe kä ngwian nuäre kri jabtä, ie ti tö amne, munkwe ja töi mika nüne kuin metre Ngöbö ngwäreki. Erere arato, tita kukwe niere munye, ye erere munkwe mika täte amne, munkwe ja töi mika ja näre jökrä amne munkwe nüna jäme jabe kwärikwäri angwane, Ngöbö ni tarekä kri amne kä jäme bianka nie, ye tädi kärekäre munbe.

¹² Mdakäre abko, munta köbö ngwentari jae angwane, munkwe ja demain era metre kwärikwäri.

¹³ Ja mräkätre jökrä tödekaka Jesubti tä Macedonia nete käta köbö kuin juen munkrä.

¹⁴ Erere arato, ni Dänkien Jesukristo käkwe ja moto mika kuin munkrä amne Ngöbö käkwe mun taredre amne Ngöbö Üai Deme rabadre nekete ketetibe munbe, ie ti tö ti mräkätre. Abko kore se. Ne ngöra.

Tärä Tikani Pablokwe Nitre Galaciabokrä Galatas

Pablo käkwe tärä ne tikani nitre tödekaka Jesubti nünanka kä ketareketare temen kä Galaciate ye die mikakäre. Bäsi nitre tödekaka Jesubti Galaciabo jökrä abko ñakare israelitare, aisetse niaratre ngämi tödeke Jesubti, känenkri ñan nämane Kukwe Biani Ngöbökwé Moiséye mike täte. Pablo nikani kukwe kuin Jesubtä mike gare kä ye kánti angwane, Kukwe Biani Ngöbökwé Moiséye mikabtä täte abko ni ñan rabadre dianintari abko Pablokwe diribare ietre.

Akwa niara nikanina, abti nitre israelita nükani ruäre Galacia yete nitre tödekaka Jesubti ngätäite abko namani dirire blo nitre tödekaka Jesubti ngökakäre. Nitre Galaciabo käkwe tödekadre Jesubti aibe köböire ñan rabadre dianintari metre, aisetse Kukwe Biani Ngöbökwé Moiséye, ye abko mikadre täte arato kwetre abko namani dirire ietre. Ye ngäniene Pablokwe tärä ne tikani nitre tödekaka Jesubti mikakäre mokre, ñobtä ñan angwane ni tödekaka Jesubti ruäre käkwe dirikätre blo kukwei mikani ütiäte jae. Pablo abko ñakare Jesu kukwei ngwianka era metre, ñobtä ñan angwane ñan nämane Kukwe Biani Ngöbökwé Moiséye mike ütiäte abko nitre dirikätre blo nämane niere Pablo rüere.

Jesukristo ara jire käkwe Pablo kārābare sribikäre ja kukwei ngwianka kwrere abko Pablokwe mikani gare ietre. Erere arato, tödeka Jesubti aibe köböire ni ngite ñakare mda Ngöböta niere amne tä ni kaen ngäbti abko Pablokwe niebare amne, ñan Kukwe Biani Ngöbökwé Moiséye mikabtä täte abko Ngöböta ni dentari, akwa ja moto kuin aibehti Ngöböta ni dentari nünakäre Ngöbö Üai köböire abko Pablota mike gare tärä nebtä.

Pablota köbö ngwentari

¹ Ti Pablo, ti ne abko Jesukristo kukwei ngwianka, akwa ñan ni mdakwe ti juani sribi ne nuene amne ñan ni mdakwe ti mikamna sribi ne nuene, akwa Jesukristo ara jire käkwe ti mikani ja kukwei ngwianka amne, Ngöbö Jesu Rün kwe käkwe Jesu mikaninta nire abko käkwe ti mikani Jesu kukwei ngwianka arato.

² Mun gätäkä Jesu käfti tä kä Galaciate, ye kräke tita köbö kuin juen, ti mräkä tödekaka Jesubti tä nete tibe ben gwaire.

³ Ngöbö ni Rün nikwe amne Jesukristo ni Dänkien käkwe ja moto mika kuin munkrä amne mun mika nüne jäme kwetre, ie ti tö.

⁴ Jesukristo käkwe ja mikani müre ketare ni ngite kukwe kämekäme nuenbtä ye di-ankakäre nißtä. Erere arato, kä käme ne ngwane, ye ngäniene ni rabadre dianintari, abkokäre Jesukristo käkwe ja mikani müre ketadre, Ngöbö ni Rün nikwe tö namani ye kwrere.

⁵ Ne aisetse Ngöbö raba käikitaninkä kärekäre! Abko kore se. Amen.

Kukwe kuin Jesubtä ñakare jire mda

⁶ Kristo krütani ni kräke, ye köböire Ngöbökwé ja moto mikani kuin munkrä, käkwe mun kārābare jakrä, ye abko kukwe kuin Ngöbökwé era metre. Akwa nitre ni ngökaka nükani mun kánti amne, kukwe mdara jire bäri kuin tätre dirire abko mun kite kaen ngäbti mtare. Abtä Ngöbö mun kārākä abko mun kite gibiekäta jötrö ngwarbe, yebtä abko ti töi ñan tä nebe krütare mda.

⁷ Akwa kukwe kuin era metre abko ñakare jire mda. Akwa ni mdara jire tä mun töi kwite ngwarbe kwäräkwarä kukwe kuin Ngöbökwé Kristobtä rüere amne, tö kukwe kuin Kristobtä kwitai bä jene mun okwäte.

⁸ Akwa kukwe kuin Jesukristobtä diribare nunkwe munye, yebti ta ni mda ya, angele Ngöbökwé kä kämbti ya o ti ne ara jire ya abko jata kukwe mdara jire kuin niere, yebtä abko Ngöbökwé ngürün mika kärekäre näre.

⁹ Tikwe kukwe niebare käne abko erere ti bike niereta abko krörö: Kukwe kuin Jesubtä kanina ngäbti munkwe, yebti ni mdara jire jata blite kukwe kuin mdara jire btä angwane, Ngöbökwé ngürün mika kärekäre btä, rabadre Ngöbö bäre mento kä ja tare nikakrä kánti kärekäre abko tita niere kore.

¹⁰ ¿Tita blite tare kore munbe ni mda mda moto mikakäre nuäre jakrä, munta nütüre ya o ni mda mdakwe ti mikadre ütiäte, munta nütüre ya? ¿O Ngöbökwé ti mikadre ütiäte sribi tikwe nebtä abko jiebti tita nakwen, munta nütüre ya? Ñakare. Ti tö rabadre ni mda mda moto mikai nuäre jakrä, ye ngwane ti ñan rabadre sribire Kristokrä.

Ngöbö aibe käkwe Pablo mikani sribire

¹¹ Ti mräkätäre tikwe, kukwe rabadre gare munye, ie ti tö abko krörö: Kukwe kuin Jesubtä mikani gare tikwe munye, ye abko ñan kukwe mikanintbe ni kä nebtäkwe.

¹² Erere arato, kukwe kuin Jesubtä ye ñan ni mdakwe niebare tie amne ñan tikwe ja töitikani btä ni mda mdabe, akwa Jesukristo ara jire käkwe mikani gare au tie abko rabadre gare bäri munye, ie ti tö.

¹³ Ti mräkätäre, nitre israelita ye ngätäite ti ne töi nämane ño kena ye abko kädrie nämane krörö mun okwäbti ruen tie: Nitre Ngöbökwé tá gätäre Jesu käbti, ye rüere ti nämä niken kisere mikakäre ja tare nike kri. Bäri ti tö rababa gainkä jökrä.

¹⁴ Mdakäre abko, ti mräkätäre israelita ti näire, ye kräke ti nämä Ngöbö mike täte bäri metre, aiseti ti mika nämä bäri ütiäte nitre israelita krikrikwe, ñobtä ñan angwane ti mräkätäre kirakira käkwe kukwe ükaninte nuendre nie Ngöbö mikakäre täte, ye abko ti nämä mike täte bäri metre jökrä.

¹⁵⁻¹⁶ Akwa ti ngämi däre, känenkri Ngöbökwé ti dianinkä jenena jakrä. Erere arato, kä nämänuäre Ngöböbtä ja Odei mike gare tie angwane, Ngöbökwé ja Odei mikani gare tie, käkwe ti käräbare tödeke bti. Mdakäre abko, nitre ñakare israelitare, ngätäite ti rikadre kukwe kuin Jesubtä niere, abkokäre Ngöbökwé ja Odei mikani gare tie. Ngöbökwé ti käräbare kore, ye ngwane tikwe ja di käräba ñakare ni mda mdaye.

¹⁷ Erere arato, nitre Jesu kukwei ngwianka bäri känekäne tikrä abko ben ti janama ja tuen ñakare Jerusalén, akwa tikwe tödekaba Jesubti, bti jötrö ngwarbe ti rikaba jirekabe kä Arabiate. Yebti ti jatabata juta Damascote.

¹⁸ Abti kä rikabara komä ta angwane, ti rikaba Jerusalén ja tuakäre Pedrobe. Ye kanti ti rababa köbö jätäbti köbörikebe.

¹⁹ Akwa Jerusalén yete abko, ni Dänkien etba Santiago aibe ben tikwe ja tuaba mda, akwa ni mda mda Jesu kukwei ngwianka abko tikwe tuaba ñakare jire mda.

²⁰ Ti mräkätäre, Ngöbö okwäbti tita tarä tike munye ne abko kukwe era erere tita tike.

²¹ Yebti ti rikaba mda kä Siritate amne Ciliciate.

²² Ye ngwane, ja mräkätäre gätäkä Kristo käbti kä Judeate abko ie ti gare ñakare era metre.

²³ Angwane blita nämäne tibtä aibe nämäne gare ietre abko krörö: Ni ye nämäne näin kisere ni jiebti ni mikakäre ja tare nike, ni ye abko tä näin kukwe kuin Jesubtä mike gare mtare abko kukwei nuani kwetre tibtä.

²⁴ Abtä Ngöbö käikitaninkä kwetre tibtä.

2

Jesu kukwei ngwianka mda mda käkwe Pablo kani ngäbti kuin

¹ Yebti kä rikabata kwä jätäbti kobkä ta angwane, ti rikabata Bernabébe Jerusalén. Angwane ti rikaba Tito ngwena jabe arato.

² Ti rikadre abko Ngöbökwé mikaba gare tie, aiseti ti rikaba. Ti rababa yete angwane, nitre ñakare israelitare, ngätäite ti nämäne sribire ño kukwe kuin Jesubtä mikakäre gare, ye abko tikwe nieba kaibe nitre nämäne tuen ütiäte krikri nitre tödekaka Jesubti yeye. Sribi nuenbare tikwe amne sribi nuenta tikwe, ye abko nane ti nämäne sribire ngwarbe abko jürä nämäne tibtä, aiseti nitre ütiäte krikri ye nämäne töbike ño sribi tikwebtä abko ti tö rababa gai era metre, abkokäre tikwe gätäba kaibe bentre.

³ Akwa ye ngwane abko, Tito nämäne näin tibe. Tito abko ni ñakare israelitare. Niara ni griegore, aiseti ñäräkrä ñakare kwatabtä. Akwa nitre ütiäte krikri ye käkwe ñan ja ñäräkrä mikamna jire ja kwatabtä ie.

⁴ Ye abko, nun abko nenante tikaninte Kristo Jesu köböire, aiseti ñäräkrä nun kwatabtä abko ñakare ütiäte rabakäre ketetibe juta Ngöbökwébe. Akwa nun ne ngätäite abko ja mräkätäre ruäre nämäne bike tödekaka Kristo Jesubti kwrere abko nükani tiebe nun ngätäite, nunta töbike ño ñäräkrä kwatabtä yebtä gain jakrä. Niaratre ye abko tö namani nun mikaita Kukwe Biani Ngöbökwé Moiséye ye miketa täte, abkokäre nükani tiebe nun ngätäite.

⁵ Akwa kukwe kuin era metre Jesukristobtä rabadre kärekäre munbtä, abkokäre nunkwe ñan ja tuametreba töi kwitadre jire chi ja mräkätäre yeye.

⁶ Akwa nitre tuen ütiäte krikri nitre tödekaka Jesubti mda mdaye, ben tikwe blitaba sribi tikwebtä angwane, rababa tuen dbe ietre, aiseti kukwe mdara jire nuemna ñakare kwetre tie. Akwa nitre tuen ütiäte krikri, ye nämäne sribire nirebe, yebtä tita töbike ñakare krübäte dikaro, ñobtä ñan angwane Ngöbö ngwäreki ni ja kwrere jökrä.

⁷ Angwane Ngöbökwé Pedro mikani kukwe kuin Jesubtä mikaka gare nitre israelitaye, ye kwrere Ngöbö ara jire käkwe ti mikani kukwe kuin Jesubtä mikaka gare nitre ñakare israelitare yeye, ye abko rükaba gare nitre tuen ütiäte krikriye,

⁸ ñobtä ñan angwane Ngöbö kākwe Pedro mikani Jesu kukwei ngwianka nitre israelitaye, kā namani sribire Pedro köböire amne, Ngöbö ye arabe kākwe ti mikani kukwe kuin Jesubtä ngwianka nitre ñakare israelitare yeye kāta sribire ti köböire arato.

⁹ Ngöbö ara jire kākwe ti mikani kukwe kuin Jesubtä ngwianka amne, ti rabadre sribi nuene kuin, abkokäre Ngöbökwē ja moto mikani kuin tikrä abko rükaba gare Santiagoye, Pedroye amne Juanye. Ye mden kisete, nun kaba ngäbti kwetre sribi muko jakwe kwrere, kākwe kise ngökaba Bernabéye amne tie, kukwe dirita tikwe abko kukwe metre mikakäre gare. Niaratre nimä ye abko ürä dite dite kāta nūnenkā dite ju ketatekrä krö ye kwrere nāmane nitre tödekaka Jesubti ngätäite amne, nun rikadre kukwe kuin Jesubtä ngwena nitre ñakare israelitare yeye amne niaratre nimä abko rikadre nitre israelita ngätäite abko rababa dbe kräke.

¹⁰ Akwa nitre bobre bobre abko nunkwe ngwiandre töre jae, kākwe die mikadre, aibe nieba kwetre nunye. Ye erere ti tö rababara nuein arato.

Pablokwe Pedro töi diani

¹¹ Akwa bati gätä yebti Pedro janama juta Antioquiäte, ti nāma sribire ye kanti angwane, kukwe ñan nuendre abko erere rababa nuene. Abtä tikwe ñākāba metre gwärere kukwe krörö btä ie:

¹² Nitre ñakare israelitare tödekaka Jesubti ñäräkrä ñakare kwatabtä abko ben Pedro rababa mröre jāme ketetibe. Yebti ni ruäre juani Santiagokwe rükaba nun ngätäite yete. Nitre ye rükaba angwane, Pedro rababa ja denkā jenena amne ñan rababa mröre mda nitre ñakare israelitare yebe, ñobtä ñan angwane ni ruäre nāmane niere krörö: Ni brare brare ñakare israelitare tödekaka Jesubti ye ngāmi ñäräkrä mike ja kwatabtä, kānenkri Ngöbökwē ñan kadre ngäbti era metre. Ye mden kisete, ni ye kwrere abko ben nitre israelita kākwe ñan ja getadre abko ni ruäre nāmane niere. Akwa nane nitre nūkani ye kākwe ñākādre rüere mröbtä ketetibe nitre ñakare israelitare ñäräkrä ñakare kwatabtä ben abko jürä rababa Pedrobtä.

¹³ Pedro rababa kukwe nuene blo kore abko köböite nitre israelita mda mda tödekaka Jesubti Antioquiabo ye ie kukwe nuen nāma Pedrokwe, ye rükabtiaba arato. Pedro rababa biketa kore, ye abko Bernabé kākwe ja ngwianbata nain ie siba arato.

¹⁴ Angwane kukwe kuin era metre Jesubtä kāta nūnamna ño, ye kwrere Pedro rababa nūne ñakare ti okwäbti. Angwane nitre tödekaka Jesubti ngwärekre jökrä tikwe ñākāba krörö ie: Ma abko israelita akwa, nitre reketaka Santiagokri ngāmi nūke nete, kānenkri makwe ñan nūnabare ni israelita kwrere, kā nāmane mröre nitre ñakare israelitare tödekaka Jesubti ben gwaire. ¡Ye ñobtä abko nitre ñakare israelitare abko ma tö mikai nūne nitre israelita kwrere mtare se, kāta ja denkā jenena niaratrebtä mento!

¹⁵ Ma btä ti, ni abko israelita, ye erere ni dārebare amne ni abko ñakare kukwe kāmekāme nuenkā ni ñakare israelitare kwrere abko ni israelita tā niere jabtä.

¹⁶ Akwa Kukwe Biani Ngöbökwē Moiséye, ye mikabtä täte Ngöbökwē ñan ni israelita mikadre metre ja ngwärekre, ye garera nie, akwa tödekabtä Jesukristobti aibe köböire ni ngite ñakare mda abko Ngöböta niere nibtä amne tā ni kaen ngäbti abko garera nie. Ye mdenbtä abko, ni ngite ñakare mda abko Ngöbökwē niedre nibtä amne ni kadre ngäbti kwe, abkokäre ni israelita ne ara jire kāta tödeke Jesukristobti. Nita tödeke kwatibe Jesukristobti ye abko bäri kuin, amne ñan Kukwe Biani Ngöbökwē Moiséye mikabtä täte ni ngite ñakare mda Ngöböta niere nibtä amne tā ni kaen ngäbti, ñobtä ñan angwane Kukwe Biani Ngöbökwē Moiséye ye mikabtä täte ni ñakare jire iti abko ie Ngöbökwē niedi: Ma ngite ñakare mda, niedi kwe, bti kadi ngäbti kwe.

¹⁷ Ne aisete tödeka Kristobti, ye aibe köböire ni ngite ñakare mda Ngöböta niere nibtä, abkobti nita tödeke, ye ngwane ti amne nitre israelita jire jökrä ngite arato Ngöbö ngwärekre nitre ñakare israelitare kwrere abko tā nūke gare tie. ¿Nebtä abko Kristo kāta nitre israelita mike kukwe kāmekāme nuene niedre ya? ¡Ñakare jire!

¹⁸ Ye ñobtä ñan angwane tikwe nūnabare kāme Ngöbö rüere amne ti töi nāmane Ngöbö rüere ye tikwe mikadre temen, bti ti arabe rikadre kaen ngäbti, ye ngwane ti ne ara jire kāta ja miketa ngite. Ye kwrere Kukwe Biani Ngöbökwē Moiséye, ye tikwe mikadre temen tödekakäre Jesubti, akwa ja töi jenbti ti rikadreta Kukwe Biani Ngöbökwē Moiséye ye kaen ngäbti ja mikakäre metre Ngöbö ngwärekre, ye ngwane ti ne ara jire kāta ja miketa ngite. Ñan Kristo kāta ti mike ngite,

¹⁹ ñobtä ñan angwane tita ngite Ngöbö ngwärekre abko Kukwe Biani Ngöbökwē Moiséye ye kākwe mikani gare tie. Abtä Kukwe Biani Ngöbökwē Moiséye, ye tikwe mikani temen tödekakäre Kristobti, ti rabadre nūne Ngöbökrä abkokäre.

²⁰ Kristo müre ketani krusobtä, ben gwaire ti krütani, aisete mtare tita nūne ñakare au jakrä ja töi jenbti akwa, Kristo tā nūne tibtä amne tā ti jie ngwena. Tita nūne ja ngrabare

nebti mtare, akwa tita nüne tödekare kwärä Ngöbö Odeibti. Niara käkwe ti ara jire tarebare amne ja biani müre ketadre kwe tikrä.

²¹ Ngöbökwé ja moto mikani kuin kore tikrä, ye abko ti ñan tö mikai ngwarbe, ñobtä ñan angwane Kukwe Biani Ngöbökwé Moiséye ye mikabtä täte ni ngite ñakare mda Ngöbökwé niedre nibtä amne ni kadre ngäbti kwe, ye ngwane Kristo krütani nikrä rabadre ngwarbe, ütiäte ñakare.

3

Tödekabtä Jesubti Ngöböta ni dentari

¹ *1* Mun Galaciabo, mun abko töi ñakare dikaro! Nunkwe kukwe diribare munye angwane, Jesukristo müre ketani krusobtä abko nunkwe mikaba gare metre ta mun okwäbti. ¿Ye ñobtä abko munkwe ja ngökamna ni mdaye?

² Munta töbiketa bä jene, yebtä ti tö kukwe ngwaintari krörö munye: ¿Kukwe Biani Ngöbökwé Moiséye ye mikabtä täte Ngöbö Üai nükani nüne munbtä ya? o ¿Kukwe nuani munkwe Kristobtä angwane, munkwe tödekani kwatibe bti abko köböire Ngöbö Üai nükani nüne munbtä ya? Ye niere tie munkwe.

³ Mun töi ñakare dikaro ya ño amarebti munkwe tödekani krire Jesubti angwane, mun namanina nüne Ngöbö Üai köböire abti mtare mun tö nünainta ja di jenbti, kä tö Kukwe Biani Ngöbökwé Moiséye mikaita täte ja mikakäre metre Ngöbö ngwärekrei ye.

⁴ Ye mden kisete, nitre israelita käta ja Abraham mräkä niere, ñobtä ñan angwane Abrahamkwé Ngöbö mikani täte metre nieta kwetre. Akwa era metre, Ngöbö ngwärekrei, nire nire tä tödeke Ngöböbti Abraham kwrere, ye abko Abraham mräkä era metre raba gare munye.

⁵ Mdakäre abko, Ngöböta ja Üai bien munye amne tä sribi kri ñan tuabare nuene mun ngätäite angwane, ¿ñobtä tä nuene? Ñan Kukwe Biani Ngöbökwé Moiséye mikabtä täte abko köböire Ngöböta sribi ye nuene, akwa kukwe kun Jesubtä niebare munye angwane, munkwe tödekani Jesubti, ye aibebtä Ngöböta sribi nuene kore mun ngätäite.

⁶ Munkwe tödekani Jesubti, ye kwrere Abraham käkwe tödekani Ngöböbti abko köböire niara ngite ñakare mda Ngöbökwé niebare btä amne kani ngäbti kwe.

⁷ Ye mden kisete, nitre israelita käta ja Abraham mräkä niere, ñobtä ñan angwane Abrahamkwé Ngöbö mikani täte metre nieta kwetre. Akwa era metre, Ngöbö ngwärekrei, nire nire tä tödeke Ngöböbti Abraham kwrere, ye abko Abraham mräkä era metre raba gare munye,

⁸ ñobtä ñan angwane kä ne ngwane nitre ñakare israelitare mun kwrere käkwe tödekadi Jesubti angwane, niaratre ngite ñakare mda Ngöbökwé niedi btä amne kadi ngäbti kwe, ye namanena gare kira Ngöböye, aisete kukwe kuin ni jökrä kräke, ye abko Ngöbökwé niebare käne Abrahamye kira abko tä tikani krörö Ngöbö Kukweibtä:

Ni kä jökräbti, ie tikwe ja di biandi ma köböire,

Génesis 12.3

⁹ Ne aisete Abrahamkwé tödekani Ngöböbti, ye kwrere abko nire nire tä tödeke Jesubti, ie Ngöböta ja di bien Abraham ben gwaire.

¹⁰ Akwa Kukwe Biani Ngöbökwé Moiséye, ye nire nire tä mike täte ja mikakäre metre Ngöbö ngwärekrei, yebtä abko ngürunta nebe, ñobtä ñan angwane Ngöbö Kukwei käta niere krörö:

Kukwe Biani Ngöbökwé Moiséye, ye nire nire käkwe ñan mikadre täte kuin jökrä ja täritäri kärekäre abkobtä ngürün raba mikani,

Deuteronomio 27.26

abko tä tikani Ngöbö Kukweibtä.

¹¹ Ye mden kisete, Kukwe Biani Ngöbökwé Moiséye ye mikabtä täte ni ñakare jire iti abko tä nebe metre Ngöbö ngwärekrei ye abko gare kuin nie, ñobtä ñan angwane Ngöbö Kukwei käta niere krörö:

Tödeka kwatibe Ngöböbti, ye köböire ni ngite ñakare mda nieta Ngöbökwé. Ni ye aibe käkwe nünandi Ngöböbe

Habacuc 2.4

abko tä tikani kore.

¹² Akwa Kukwe Biani Ngöbökwé Moiséye ye abko ñan tä ni mike tödeke Ngöböbti, aisete Ngöbö Kukwei käta niere krörö:

Kukwe Biani Ngöbökwé Moiséye, ye nire nire mikadre täte jire jökrä abko köböire nünandi kwe,

Levítico 18.5

abko tä tikani kore.

¹³ Ye abko, Kukwe Biani Ngöbökwé Moiséye, ye ni ñan raba mike täte jire jökrä, abtä Ngöbökwé ngürün mikadre nibtä, akwa ngürün ñan rabadre kärekäre nibtä, abkokäre Kristo krütani krusobtä, ye köböire ni kökanintarita kwe Ngöbökrä ngürün ye ngäniene abko gare nie, ñobtä ñan angwane Ngöbö Kukweita niere krörö:

Ni jökrä jākata kribtä käin btä Ngöböta ngürün mike,
nieta Ngöbö Kukweihtä.

Deuteronomio 21.23

¹⁴ Nitre ñakare israelitare abko ie Ngöbökwé ja di biandi abko Ngöbökwé köböi mikani Abrahamye, ye rükadre niaratre kisete Kristo Jesu köböire, abkokäre ni kökanintarita kwe Ngöbökrä. Erere arato, nikwe tödekadre Jesubti angwane, Ngöbökwé ja Üai juandre nüne nibtä, niarakwe köböi mikani Abrahamye ye rabadre bare, abkokäre Kristokwe ni kökanintarita Ngöbökrä.

Pablota kukwe bä mike

¹⁵ Ye abko ti mräkätre, ni ngätäite nita kukwe ükete ño jabe kwärikwäri, yebtä ti bike kukwe bä mike krörö mda munye: Ni iti tä kukwe ükete jabe kwärikwäri ni mdabe angwane, kukwe ükateta kwe, yebtä tä ja käi tike ja kukwei mikakäre täte. Yebti kukwe ükateta kwe ye abko ni ñan raba kukwe ye denkä mikakäre ngwarbe amne ñan ni raba kukwe mdara jire tike kukwe ye kwitakäre arato.

¹⁶ Ye kwrere Ngöbökwé kukwe ükaninte Abrahambe amne Abraham bkünbe. Tärä ye kanti, Ngöbö Kukwei ñan tä blite ni kwatibtä, akwa tä blite ni itibe btä, kätä niere krörö: “ma bkünye”. Abraham bkün niebare Ngöbökwé Abrahamye, ye abko Kristo ara btä blitabare kore kwe.

¹⁷ Tita kukwe niere ye abko krörö: Ngöbökwé kukwe ükaninte Abrahambe, ye abko ükaninte era metre kwe mikakäre täte. Yebti kä nikanina sientö kräbkä bti kwä grebti kwä jätä (430) ta angwane, Ngöbökwé ja Kukwei Biani Moiséye, akwa Ngöbökwé kukwe ükaninte käne Abrahambe, ye abko Kukwe Biani Ngöbökwé Moiséye ye ñan raba denkä jire mento mikakäre ngwarbe, ñöbtä ñan angwane kukweta ükaninte täte, ye abko ni ñan raba kukwe ye kwite, tikwe nini ye kwrere.

¹⁸ Ne aisete, Kukwe Biani Ngöbökwé Moiséye, ye nikwe mikadre täte abko ütiäre Ngöbökwé ja di biandre nie, ye ngwane kukwe ükaninte Ngöbökwé Abrahambe ye rabadre ngwarbe, ütiäre ñakare mda. Akwa Ngöbökwé ja di biandre nie abko ükaninte kwe Abrahambe, ye abko biandre ngwarbe nie ja moto kuinbti niebare kwe Abrahamye.

¹⁹ ¿Angwane Kukwe Biani Ngöbökwé Moiséye abko drekäre biani kwe? Ni jökrä ngite Ngöbö ngwäreki, ye rabadre gare metre nie, abkokäre Ngöbökwé ja kukwei biani Moiséye. Ne aisete Abraham bkün köböi mikani ie Ngöbökwé, ye ngämi nüke, känenkri Kukwe Biani Ngöbökwé Moiséye ye nämane ütiäre. Kukwe Biani Ngöbökwé Moiséye, ye abko angeletre Ngöbökwé nükani niere amne Moisés ye abko käkwe kukwe ye kani ngäbti nitre israelita mda mda kräke.

²⁰ Akwa ni itibe tä kukwe ükete ni mdabe, ye ngwane ni ñakare blitaka ni nibu kräke kwärikwäri, aisete Ngöbö itibe ara jire käkwe kukwe ükaninte au Abrahambe.

²¹ Ne aisete, ¿Kukwe Biani Ngöbökwé Moiséye ye abko tä rüre kukwe ükaninte kwe Abrahambe ye rüere ya? ¡Ñakare jire chi! ñöbtä ñan angwane nane Ngöbökwé kukwe biani nuendre nie, ye mikabtä täte abko ütiäre nikwe nünandre kärekäre, ye ngwane kukwe ye mikabtä täte abko ütiäre ni ngite ñakare mda Ngöbökwé niere nibtä arato.

²² Akwa ñakare kore, ñöbtä ñan angwane ni ngite kä teri abko di ñakare ja tiketeta au, ye kwrere ni jökrä kä nebtä tä ngite kukwe käme ngoto täni, aisete di ñakare ja tikekrä au. Akwa nikwe tödekadre Jesukristobti rabakäre dianintari amne rabakäre tikaninte, ye ngwane Ngöbökwé ja di biandre ni jökräye abko köböi mikani kwe Abrahamye, ye biandre kwe ni jökrä tödekaka Jesubtiye, abkokäre ni jökrä tä ngite kukwe käme ngoto täni.

²³ Käne Kristo ngämi nüke tödekakrä nie, känenkri bäsi Kukwe Biani Ngöbökwé Moiséye nämane ni ni ngite ngibiabtikä kwrere ni kräke. Akwa Kristo nükani angwane, ñan nämane ni ngibiarebti ni ngite kwrere mda.

²⁴ Erere arato, ni klaboré mikata ngäbäkre ngibiare amne töi den, ye kwrere jire Kukwe Biani Ngöbökwé Moiséye nämane ni kräke, ni jie ngwiankäre Kristoye, nikwe tödekadre Kristobti angwane, Ngöbö rabadre ni ngite denkä mento nibtä abkokäre.

²⁵ Akwa mtare Kristo tödekakrä nikwe nukanina, aisete mtare Kukwe Biani Ngöbökwé Moiséye tä ñakare ni ngibiabtikä mda,

²⁶ ñöbtä ñan angwane tödekabtä Kristo Jesubti mun jökrä nena Ngöbö ngäbriänkäre,

²⁷ ñöbtä ñan angwane mun namani ngökani ñöte angwane, Ngöbökwé mun mikanina ketetibe Kristobe.

²⁸ Ne aisete ma abko ni israelita ya, ñakare ya; ni klaboré ya, ñakare ya; ni brare ya o ni merire ya—ye abko ñakare ütiäre Ngöbö ngwäreki, ñöbtä ñan angwane Ngöbökwé mun jökrä mikani ni itibe kwrere amne munta ketetibe jökrä Kristo Jesu ben gwaire.

²⁹ Mun abko Kristokwe, aisete mun Abraham bküntre amne Ngöbökwé ja di biandi Abrahamye amne bkünye niebare kwe ie, ye abko mun nena bkäne siba arato.

4

¹ Yebtä abko, ti tö kukwe mda bä mikai munye abko krörö: Ngäbäkre kiakia abko kräke jändrän rünkwe tä neme jökrä. Akwa ngäbäkre ngämi ünän, känenkri niara tö rabadre dre dre nuein jändrän yebtä abko ñan raba nuene, aisete tä neme ni klaboré kwrere.

² Rün tä käi kite käne, ye kwrere kä ngämi nuke ie, ye känenkri rüta ni ruäre mikete niara ngibiare amne jändrän kwekwe ngibiarebti kräke. Ni ye abko ngäbäkre käkwe kukwe mikadre täte.

³ Ye kwrere arato, kukwe nämane nakenkä nibtä abko krörö: Ngöbö ngämi Jesu juen kä nebtä nikrä, känenkri Kukwe Biani Ngöbökwé Moiséye ye Ngöbökwé mikani ni ngibiare ngäbäkre ngibiaka kwrere amne ni nämane nüne ni klaboré kwrere.

⁴ Akwa kä kuin era metre niara Odei juankrä abko käi kitani Ngöbökwé, ye erere nükani angwane, Ngöbökwé juani. Niara nükani däre merikwe amne Kukwe Biani Ngöbökwé Moiséye ye nükani mike täte jökrä ni mda mda kwrere,

⁵ nitre israelita Kukwe Biani Ngöbökwé Moiséye ye mikaka täte ye kökatarikäreta Ngöbökrä, Ngöbö rabadre ni mike ja ngobore jen kwe abkokäre.

⁶ Mtare mun tödekaka Jesubti nena Ngöbö ngäbriänkäre, aisete Ngöbökwé ja Odei Üai juani nüne nibtä amne niara Üai tä nibtä, ye mden käta ngrente krörö Ngöböye: ¡Abba, Tata!

⁷ Ne aisete mtare mun ñakare ni klaboré kwrere mda, akwa mun abko nena Ngöbö ngäbriänkäre, aisete jändrän tä Ngöbökwé niara ngäbriänkäre kräke, ye abko mun rabadi bkäne arato.

Pablota töbike kri nitre Galaciaböbtä

⁸ Mdakäre abko, käne mun ngämi tödeke Jesubti, känenkri Ngöbö gare ñakare munye angwane, mun nämane jändrän ngwarbe mike ngöböre jae amne mun nämane ni klaboré kwrere kräke.

⁹ Akwa mtare Ngöbö era metre nena gare munye—o ti bike niere krörö jirekäbe, Ngöbökwé mun käräbare jakrä, aisete mun nena gare Ngöböye mtare—aisete çye ñöbtä abko üai käme ngwarbe di ñakare ye ngoto täni mun tö ja mikaita klaboré,

¹⁰ amarebti munta köbö ütiäte köbö jadükakrä kwrere mike ütiäte jae ja mikakäre metre Ngöbö ngwärekre? Erere arato, ise ñöbtä amarebti munta sö ngidien, kä ruäre ütiäte amne kä kwatire kwatire mike ütiäte ja mikakäre metre Ngöbö ngwärekre!

¹¹ Yebtä abko nane tikwe ngoto nikani ngwarbe sribire mun ngätäite tä nebe ruen tie, aisete kä jürä kri tibtä mtare.

¹² Ti mräkäre, ti tö kukwe krörö ribei kisere munye: Kukwe Biani Ngöbökwé Moiséye, ye ti nämane mike täte jökrä ja mikakäre metre Ngöbö ngwärekre, akwa ye kwrere tita mike ütiäte ñakare mtare, käkwe ja mikani mun ñakare israelitare kwrere. Ye kwrere arato, munkwe ja mikadre ti kwrere abko ti tö ribei munye. Ñan munkwe kukwe nuenbare käme jire tibtä, äbtä tita niere kore munye ti mräkäre.

¹³ Akwa tikwe kukwe kuin Jesubtä mikaba gare kena munye, ye ngwane ti nämane bren abko käkwe ti mikaba neme yete, ye abko gare kuin munye.

¹⁴ Ti bren ye abko namani tare munkrä, akwa munkwe ñan bätä ngwiani tibtä angwane, munkwe ti kaba ngäbti kuin bäsi angele Ngöbökwé kwrere jire. Mdakäre abko, Kristo Jesu ara jire mun rababa ruen kaen ngäbti munye, aisete kä rababa nuäre munbtä.

¹⁵ çKä rababa nuäre kri krübäte munbtä, ye abko munkwe nuenbare mda? Ti ne ara jire raba kukwe niere krörö mun kräke. Mun rabadre ja okwä denkä ti die mikakäre angwane, munkwe diandrekä, akwa era metre ye käkwe ti die mikadre ñakare, aisete munkwe nuenbare ñakare.

¹⁶ Akwa mtare, çtita kukwe era erere niere munye, nebtä abko ti kite nikwite mun rüere ya? Ñakare raba ruen tie.

¹⁷ Angwane ni mda mda tä nuke dirire munye, ye abko töita krübäte munbtä, akwa niaratre töi ñakare kuin munkrä, ñöbtä ñan angwane munkwe ja töi mikadre niaratrebtä abko ie tö, aisete töta mun diainkä nunkän.

¹⁸ Ni mdakwe töbikadre munkrä ye abra kuin, akwa töbikadre jändrän kuinbtä mun kräke, ye abko ñan nuendre batibe, akwa nuendre kärekäre, akwa ñan ti tädre nete, aibe angwane ni mdakwe töbikadre munbtä.

¹⁹ Ti ngäbriänkäre kiakia tikwe, bäsi meri tä ja ngibiare tare, ye kwrere jire ti nämane ja tare nike käne munbtä. Mtare kukweta nakenkä mun ngätäite, köböite tita ja tare niketa mda munbtä amne mun ngämi näin metre Kristobe abko erere tikwe ja tare nikadi btä.

²⁰ Gwängwarbe ti tädre mun kanti yete, blitakäre bä jene munbe näre, akwa ti ñan raba neme, aisete tikwe dre nuendre, abkobtä ti töi ñan tä nebe krütäre jirekäbe.

Kukwe bä mikata Agarebtä amne Sarabtä

²¹ Kukwe Biani Ngöbökwe Moiséye, ye mun Galaciabo tö mikaita täte ja mikakäre metre Ngöbö ngwärekre, mun ye ie ti tö kukwe ngwaintari kwati krörö: ¿Kukweta nakenkä mun ngätäite, yebtä Ngöbö Kukweita dre niere, ye gare ñakare munye? abko munkwe nie tie. Kukwe ye gare ñakare metre munye ruen tie, aiseite tita kukwe ngwentari kore munye.

²² Angwane kukwe yebtä abko nieta krörö: Abraham nämane meri nibu ben. Meri iti abko klaboré meri era metre Abrahamkwe kräke. Meri klaboré ye abko kädian nämane Agar abko kwe Abraham ngobo därebare iti. Meri mda abko meri era metre Abrahamkwe abko kädian nämane Sara abko kwe niara ngobo därebare arato. Sara abko ñakare klaboré ni mdakwe.

²³ Akwa meri klaboré abko kwe Abraham ngobo Ismael därebare, ye abko Abraham töi erere niara därebare. Akwa Sara, meri era metre Abrahamkwe klaboré ñakare abko di ñakare ngäbäkre ngibiare meri mda mda kwrere. Ne aiseite Ngöbökwe ngäbäkre köböi mikani Abrahamye erere därebare Sarakwe abko kädiani Isaac kwe.

²⁴⁻²⁵ Kukwe ye nakaninkä kira ye abko tä kukwe krörö bä mike nikrä: Meri nibu abko tä kukwe ükaninte ketebu Ngöbökwe nikrä bä mike: Agar abko tä Kukwe Biani Ngöbökwe Moiséye Ngitio Sinaí kánti bä mike. Agar abko klaboré ni mdakwe, aiseite bkänkä kukwei aibe mikata täte kwe. Ye kwrere jire, nitre israelita käta Kukwe Biani Ngöbökwe Moiséye ye mike täte abko klaboré ni mdakwe kwrere, aiseite nitre israelita abko Agar ngäbriänkätre kwrere. Ngitio Sinaí kä Arabia kánti, ye mden abko juta Jerusalén ara mtare kwrere, ñobtä ñan angwane nitre israelita nünanka Jerusalén tä klaboré jökrä Kukwe Biani Ngöbökwe Moiséye ye kräke.

²⁶ Akwa nitre Ngöbökwe era metre tödekaka Jesubti abko tä tikaninte amne, juta Jerusalén tarä mda kä káinbti kräke. Niaratre abko klaboré ñakare Sara kwrere, aiseite nitre tödekaka Jesubti, ye abko Sara ngäbriänkätre kwrere,

²⁷ ñobtä ñan angwane Ngöbö Kukwei käta juta Jerusalén bä mike meri ngäbäkre ngibiare ñakare Sara kwrere abko krörö:

Meri, ma ngäbäkre ngibiare ñakare, akwa makwe kä ngwian nuäre jabtä.

Angwane meri ie ja tare nika ño ngäbäkre ngibiabtä gare ñakare, ye abko käkwe ngrate kriki kä ngwiane nuäre jabtä,

ñobtä ñan angwane meri kwe ngäbäkre ñakare, abtä tuanimetre brarekwe, ye abko ngäbriänkä rabadi bäri kwati meri nünanka brarebe ye ngwä.

Ne aiseite, meri kwe ngäbäkre neme ñakare, ye käkwe kä ngwian nuäre jabtä, *Isaías 54.1* nieta Ngöbö Kukweibtä.

²⁸ Ti mräkätre, munkwe tödekani Jesubti, aiseite mun abko Abraham ngäbriänkätre köböi mikani Ngöbökwe arato, aiseite mun abko Isaac kwrere.

²⁹ Sara abko kise mriani jabtä, aiseite ngäbäkre ñakare kwe, akwa Ngöbökwe ngäbäkre köböi mikani ie, erere ngäbäkre Isaac därebare Ngöbö Üai diebti. Akwa käne, meri klaboré abko kwe ngobo Ismael därebare, akwa ye abko Ngöbökwe köböi mikani ñakare, amne Ismael nämane Isaac mike ja tare nike. Ye kwrere kukweta nakenkä mtare. Ngöbö Üai diebti nita tödeke Jesubti amne nitre Kukwe Biani Ngöbökwe Moiséye mikaka täte tä Ismael kwrere, käta ni mike ja tare nike tödekabtä Jesubti.

³⁰ Akwa Ngöbö Kukwei käta niere krörö kukwe yebtä abko ütiäte mtare mun kräke: Ngöbökwe niebare Abrahamye:

Meri klaboré ye juentari ngobo kwe yebe, ñobtä ñan angwane meri klaboré ngobo ye käkwe ñan jändrän rünkwe dräidre jire chi jabtä, meri klaboré ñakare tä nüne brare kwebe abko ngobobe, *Génesis 21.10*

abko Ngöbökwe niebare Abrahamye.

³¹ Ne aiseite ti mräkätre, ni abko ñakare meri klaboré ngobo Ismael kwrere, akwa ni abko meri Sara klaboré ñakare ngobo kwrere, aiseite nita klaboré ñakare.

5

Nita tikaninte Kristo köböire

¹ Nikwe nünandre ni tikaninte kwrere, abkokäre Kristo käkwe ni tikaninte. Ne aiseite Kristokwe mun tikaninante, yebtä munkwe nünanka dite kärekäre amne munkwe ñan ja mikata ni klaboré kwrere Kukwe Biani Ngöbökwe Moiséye ngoto täni, kukwe ye mikakäre täte, ja mikakäre metre Ngöbö ngwärekre abko tita niere munye.

² Ti mräkätre, olo ketete ti kukweye munkwe. Ti Pablo kä bike niere krörö munye: Ni brare brare tödekaka Jesubti käkwe ja ñäräkrä mikadre ja kwatabtä, ye abko mun mden mden töta nebe nuein ja mikakäre metre Ngöbö ngwärekre, ye ngwane Kristo krütani munkrä, ye ñan rabadre ütiäte mun kräke.

³ Ye abko ti bike niereta krörö mda munye: Ja ñäräkrä mikadre ja kwatabtä tä ükaninte, ye mun brare mden mden käkwe mika täte angwane, Kukwe Biani Ngöböke Moiséye, ye erere munkwe mikadre täte jire jökrä angwane, ñan kukwe ketetibe mika täte munkwe.

⁴ Mdakäre abko, Kukwe Biani Ngöböke Moiséye ye mikabtä täte mun tö rabai metre Ngöbö ngwäreki, ye ngwane mun nikani Kristo bäre mento angwane, Ngöböke ja moto mikani kuin munkrä abko ie munkwe trö kwitani.

⁵ Akwa ni abko tä tödeke Kristobti, yebtä ni ngite ñakare mda Ngöböke niedi abko nita ngibiare kisere Ngöbö Üai köböire,

⁶ ñobtä ñan angwane nita tödeke Kristo Jesubti, ye köböire abko ni ñäräkrä mikani kwatabtä ya, ñakare ya, akwa ye abko ñakare ütiäte Ngöbökrä rabakäre metre niara ngwäreki, akwa nita tödeke Jesubti aibe ütiäte kräke amne, nita tödeke era metre Jesubti abko käta ni kite ni mda mda tarere.

⁷ Mun nämane näin kuin ji Jesukwe bti, *¿*ye nirekwe kukwe mdara jire mikani mun jiete amarebti kukwe era metre Jesubtä abko mun ñan tö mikai täte ye?

⁸ Ngöbö kökwe mun käräbare jakrä ye ñan käkwe kukwe ye mikani mun jiete.

⁹ Kukweta nakenkä mun ngätäite ye abko lebadura bante kwrere abko krörö: Lebadura mikata chi arinante abko tä ngitie jökrä arina kabre te, ye kwrere jire kukwe dirita blo abko ni braibe tä mike ütiäte mtare, ye käita ngitie mun ngätäite, käta ni jökrä töi kwite.

¹⁰ Akwa mun abko töi tädi ja kwrere tibe ti Dänkien diebti, abkobti tita tödeke angwane, nire nire käta kukwe blo mike mun jiete ye abko Ngöböke mikadi ja ngie nuen mun nika dokwäre.

¹¹ Angwane ti mräkätre, ni brare brare käkwe ja ñäräkrä mikadre ja kwatabtä, ye ti tädre mike ütiäte janknu ja mikakäre metre Ngöbö ngwäreki amne, ti tädre nuemna ni mdaye, ye ngwane Kristo kämikani krusobtä ni kräke tita niere, yebtä nitre ñan rabadre romon tikrä amne ñan rabadre näin kisere ti jiebti.

¹² Akwa nire nire tä näin kukwe mike mun jiete käta ja ñäräkrä mikamna ja kwatabtä munye, *¿*ye ara jire käkwe ja diandrete gwängwarbe näre! Abko kore se.

Ja taredre kwärikwäri

¹³ Ti mräkätre, Ngöböke mun käräbare rabakäre tikaninte, akwa munta tikaninte, yebtä abko mun töi rabadre ngitiekä kämekäme, ye jiebti mun rikadre betekä, abkokäre munta tikaninte abko munkwe ñan nütü jire chi. Akwa munkwe ja taredre kwärikwäri, käkwe ja die mikadre kwärikwäri jändrän jökräbtä,

¹⁴ ñobtä ñan angwane Kukwe Biani Ngöböke Moiséye ye abko tä ükaninte ketetibe jökrä abko krörö:

Mata ja tarere au,

ye kwrere makwe ni mda mda tare arato,

Levítico 19.18

abko nieta Ngöbö Kukweibtä.

¹⁵ Munkwe ja ngibia, ñobtä ñan angwane mun tädre rüre jabe kwärikwäri janknu amne mun tädre ja kwete kwärikwäri janknu, ye ngwane munkwe ja juandre ngwarbe, aisete batibe mun ñan rabadre ja gete mda jabe kwärikwäri Jesu käbti, ye abko rabadre blo, aisete ja taredre munkwe tita niere.

Ngöbö Üai amne kukwe kämekäme mdeita ni töibtä

¹⁶ Tikwe kukwe nini, yebtä abko ti bike kukwe mdara jire niere krörö munye: Munkwe kä bian Ngöbö Üaiye ja jie ngwiankrä nüne metre Ngöbökrä kärekäre angwane, kukwe kämekäme tä mun töibtä abko mdeita nebe munye, ye munkwe ñan nuendre,

¹⁷ ñobtä ñan angwane kukwe kämekäme tä mun töibtä abko mdeita neme munye, ye abko tä rüre Ngöbö Üai rüere, munkwe ñan kä biandre Ngöbö Üaiye ja jie ngwena abkokäre. Erere arato, kukwe kämekäme mdeita neme munye, ye rüere Ngöbö Üai tä rüre, kukwe kämekäme tä mun töibtä, ye munkwe ñan mikadre täte abkokäre. Ye erere kukwe kämekäme mdeita neme munye amne Ngöbö Üai tä nüne munbtä, ye tätre rüre jabe kwärikwäri.

¹⁸ Akwa Ngöbö Üai tä mun jie ngwane era metre bkänä ne ngwane, Kukwe Biani Ngöböke Moiséye ye ngoto täni mun ñan rabadre klabore mda.

¹⁹ Ni mda mda töi kämekäme abko erere mdeita neme ie käta nuene, ye abko tä nüke gare kuin btäre, aisete kukwe krörökrörö nuenta kwetre: tä ja mike gure bati bati, tätre kukwe kämekäme nuene jabtä kwärikwäri ja mikakäre nuäre amne, kukwe gaidre kri abko tätre gaire ñakare jire chi nukro kwrere.

²⁰ Erere arato, jändrän ngwarbe mikata ngöböre jae, ni kwrare, ni sukiare, ni ngürüne käta kukwe nuene blo ni mdabtä, ni mätäta neme käre ni mdabtä amne ni rüre käre ni mdabe, ni mokrere ni mdabe jändrän kwe dokwäre. Erere arato, ni moto nebe romon jötrö ngwarbe

amne ni ni mda mda mike ja rüere kwärikwäri, ni dirire ni ñäkäbtikäre jene jene amne ni ni mda diankaka jakri.

²¹ Erere arato, ni mda jändrän bkäne abko dokwäre ni mätä btä, ni dröba nike käre amne ni mröre kabre krübäte amne, kukwe mda diän diän ne kwrere nuenta kwetre, ye abko gare kuin, aiseite kukwe kämekäme nuenkä kore, ni yebtä abko Ngöböta gobrane ñakare, aiseite ñan rabadre jire Ngöbö kánti kä káinbti abko tikwe nieba munye, mden erere tita niereta munye mtare.

²² Akwa Ngöbö Üai tä nüne nibtä angwane abko tä ni die mike kukwe krörökrörö nuene: nita ni mda mda tarere, káta neme bäri juto nibtä, nita nüne jáme Ngöböbe amne ni mda mdabe, nita jändrän jökrä ngibiare bätäreka, nita ni mda mda kaen ngäbti ja moto jámenbti, nita ja moto mike kuin ni mda mdakrá, nita ja kukwei amne Ngöbö Kukwei mike táte abtä tödekata nibti,

²³ amne nita bike tidrá ni mda mdabtä amne, ni töi kämekäme ye nita ketebtä au. Ye rüere abko kukwe ñakare jire kä nebtä.

²⁴ Nire nire nena Kristo Jesukwe abko kákwe kukwe kämekäme ni töibtä ye mikanina jökrä krusobtä Kristobe gwaire amne, kukwe kämekäme mikanina jökrä temen nikwe.

²⁵ Mtare ni nena nüne Ngöbö Üai köböire, aiseite ari kä bien Ngöbö Üaiye ja jie ngwiankrä arato.

²⁶ Akwa nikwe ñan bikadre krikri jabtä kwärikwäri. Erere arato, nikwe ñan ja kwitadre ja rüere kwärikwäri amne jändrän ni mdakwe, dokwäre nikwe ñan bätä ngwiandre btä.

6

Nikwe ni mda mda die mikadre

¹ Mdakäre abko ti mräkätre, mun mräkä tödekaka Jesubti kákwe ja mika ngite, ye ga munkwe angwane, mun mden mden káta kä bien Ngöbö Üaiye mun jie ngwena metre ye kákwe mun mräkä die mika, niara rikadreta ji metrebti abkokäre. Akwa munkwe die mika ja moto jámenbti angwane, makwe ja ngibia kuin, ñobtä ñan angwane nane kukwe jatadre ma rüere amne makwe ja mikadre ngite arato, aiseite makwe ja ngibia.

² Ye abko, kukwe mun itire itire kwe, ye ie munkwe kötä mika gwaire jökrä ja die mikakäre kwärikwäri käreäre köbö kwatirekwatire. Munkwe ja die mikadre kore ne ngwane, nikwe nünandre ño úkaninte Kristokwe ye mikadi táte munkwe.

³ Akwa nire nire abko útiäte ñakare, akwa ja rabadre ruen kri ie mräkä mda mdabtä mun ngátáite, aiseite ñan tö kötä mikai gwaire, ye ngwane ni ye tá ja ngököta au. Ni ye kákwe ni mda mda die mikadre.

⁴ Ne aiseite, ni itire itire tä sribi nuene ño, ye mika ñäräre kuin kwe, yebtä blita au kwe jakrá angwane, jändrän nuenta kuin kwe raba tuen ie, yebtä tö raba ja káikitekä ne ngwane ja káikitaka kwe, akwa ni mda mda tä sribi nuene ño, yebtä ñan ñäkä kwe,

⁵ ñobtä ñan angwane ni itire itire kákwe töbikadre tribe jen kwe ngwianbtä kuin metre.

⁶ Mdakäre abko, kukwe kuin Jesubtä ye nireta dirire munye, ni ye abko munkwe die mika jändrän jökrä kuinkuinbtä arato.

⁷ ¡Angwane munkwe ñan ja ngöka au! Ni ñakare jire iti kákwe Ngöbö mikadre yakrá jae, ñobtä ñan angwane nita nura ño ño nökö, ye erere nita ngwä ötó,

⁸ ye kwrere nire nire töibtä kukwe kämekäme tä amne mdeita neme ie, erere tä nuene, ye abko nura nökata kwrere amne ye útiäre abko rabadi käreäre Ngöbö bäre mento, ye abko nura ngwä ötata kwrere. Akwa nire nire káta kä bien Ngöbö Üaiye ja jie ngwiankrä, erere tä ñän Ngöbö Üai köböire, ye útiäre abko rabadi nüne käreäre Ngöböbe.

⁹ Aiseite ni ñan rabadre dräre jire jändrän kuin nuene ni mda mdakrá, ñobtä ñan angwane ni ñan di krütadre jändrän kuin nuene ne ngwane, köböitira jire Ngöbökwé sribi nikwe ye útiä biandi nie.

¹⁰ Ne aiseite ni di tarä ne ngwane, käre ni tádre biare ni mda mda die mike, akwa ni mräkä tödekaka Jesubti ye abko bäri die mikadre käne.

Pablota kukwe niere mrä

¹¹ Ti mräkätre, mtare ti ara jire káta kukwe ne tike krikri ja kise jenbti mun kräke, ti ara jire káta tarä ne tike rabadre gare metre munye abkokäre.

¹² Tarä yebtä abko ti tö nieita krörö munye: Ni ruäre tä ja ñäräkrä mikamna kisere ja kwatabtä munye ja bá mikakäre kuin nitre israelita mda mda okwäte angwane, Kristo ngatani krusobtä níkrä aibe útiäte ni diantarikäre, ye aibe niedre kwetre, abtä nane nitre israelitakwe mikadre ja tare nike abko júrá btätre, aiseite tä ja ñäräkrä mikamna munye.

¹³ Akwa nitre israelita ñäräkrä mikani kwatabtä, ye abko ñan tä Kukwe Biani Ngöbökwé Moiséye ye mike táte jökrä, akwa mun abko kákwe ja ñäräkrä mikadre ja kwatabtä Kukwe

Biani Ngöbökwé Moiséye ye mikakäre täte jökrä, ie niaratre tö. Yebti munkwe ja ñäräkrä mikadre ja kwatabtä angwane, rikadreta ja käikitekä munbti ni israelita mda mdaye, abkokäre tädre mun nike kisere kore.

¹⁴ Akwa ti abko, jändrän ñakare jire tikwe bti ti raba bike kri ja mikakäre ütiäte. Angwane ni Dänkien Jesukristo ngatani krusobtä nikä, ye aibe ütiäte tikrä mtare, ñobtä ñan angwane Kristo ngatani krusobtä tikrä, ye köböire abko jändrän kä nebtä ütiäte ñakare tikrä amne ti abko ütiäte ñakare ni kä nebtä okwäte.

¹⁵ Ye abko, ni ñäräkrä mikani ni kwatabtä ya, ñakare ya, ye abko ñakare ütiäte Ngöbö ngwärekre, akwa ni dätebareta btin Jesukristo köböire, ye abko bäri ütiäte Ngöbökrä.

¹⁶ Angwane nünandre ño Jesukristo köböire tita niere, ne kwrere mun mden mden tä nüne, mun yebtä abko kä jäme Ngöbökwé raba amne mun jökrä raba ruentari tare Ngöböye. Erere arato, nitre tödekaka Jesubti, yebtä kä jäme Ngöbökwé raba amne raba ruentari tare Ngöböye.

¹⁷ Mtare mentokwäre abko, ni mdakwe ñan ti nikadre jire chi mda diribtä, ie ti tö, ñobtä ñan angwane tita tödeke Jesubti, yebtä tikwe ja tare nikani kri abko träin tä jökrä ti ngrabare, ti sribikä Jesukwe bä mikakrä tibtä, aisete ti ñan nikadre, ie ti tö.

¹⁸ Ti mräkätre, ni Dänkien Jesukristo käkwe ja moto mika kuin mun jökrä kräke. Amen. Abko kore se. Ne ngöra.

Tärä Tikani Pablokwe Nitre Efesobokrä Efesios

Pablo käkwe tärä ne tikani angwane, niara nämäne ngite kä teri juta Romate kukwe kuin Jesubtä diri dokwäre. Ne nakaninkä ño abko tä tikani Hechos 28.14-31 yebtä. Pablokwe tärä ne tikani nitre tödekaka Jesubti nünanka juta Efeso amne Efeso bäre temen kräke. Juta Efeso abko juta ütiäte amne ju ngöbö ngwarbe mikakrä ütiäte jae nämäne kabre yete. Ju bäri ütiäte abko ngöbö ngwarbe kädianta Diana kräke (Hechos 19.23-31).

Pablo nämäne niken Jesu kukwei ngwena angwane, niara nükani juta Efesote, käkwe kukwe kuin Jesubtä mikani gare btin ietre abko tä tikani Hechos 18.18-21 yebtä. Akwa namani jötrö yete, bti nikani ta. Abti nükäninta bobukäre angwane, nünabare kä komä kwe Efesote, Ngöbö Kukwei dirikäre yete abko tä tikani Hechos 19 yebtä.

Nitre tödekaka Jesubti nünanka Efeso kanti abko kukwe ñakare bökan, btä Pablokwe kukwe tikani. Bäri, Ngöbökwē kukwe nuenbare keta kabre bätäkä ngwarbe ni kräke ja moto kuinbti, yebtä Pablokwe kukwe tikani kabre tärä nebtä. Nikwe nünandre ño ni Dänkien Jesukristo mikakäre ütiäte jae, btä Pablokwe blitabare tärä nebtä.

Jesukristo köböire Ngöbökwē ni jökrä, israelita amne ñakare israelita dianintari, käkwe tikani ja gete jabe. Kukwe mden mden btä nämäne rüre jabe kwärikwäri, yebtä ñan rüdre mda kwetre, ñobtä ñan angwane Ngöbökwē niaratre mikani ni itibe kwrere Jesukristo ben gwaire. Ngöbökwē ye nuendre abko niarakwe ngibiabare tiebe, akwa mtare mikata gare kwe Jesukristo köböire. Ngöbökwē nitre tödekaka Jesubti mikani ketetibe Jesukristobe, aisetē nünandre deme kwetre amne ja die mikadre kwärikwäri kwetre nünenkä dite Jesubtä, ñobtä ñan angwane üai kämekäme tärä kabre abko tä rüre nitre tödekaka Jesubti rüere, aisetē Pablokwe tärä ne tikani kukwe yebtä.

Pablota köbö ngwentari

¹ Ti Pablo käta tärä ne tike. Ngöbö tö namani ti mikai Jesukristo kukwei ngwianka abko erere tita sribire kräke. Mun deme deme tödekaka Kristo Jesubti käta nüne juta Efesote abko kräke tita köbö kuin juen.

² Ngöbö ni Rün nikwe amne ni Dänkien Jesukristo käkwe ja moto mika kuin munkrä amne, mun mika nüne jäme kwetre, ie ti tö.

Ja moto kuinbti Ngöbökwē ja di biani kri nie

³ Ngöbö, ni Dänkien Jesukristo Rün raba käikitaninkä, ñobtä ñan angwane jändrän jökrä kuinquin kä käinbti biani kwe nie, ñobtä ñan angwane nita ketetibe Kristobe aisetē.

⁴ Erere arato, kä date ngämi känenkri Ngöbökwē ni dianinkä jakrä rabakäre ketetibe gwaire Kristobe. Ngöbökwē ni dianinkä kore jakrä nünakäre kuin deme amne ngite ñakare ja ngwäreki. Ngöbökwē ni tarebare,

⁵ aisetē köbö kitani kwe ni kakrä ngäbti ja ngobo jen kwrere Jesukristo köböire, ye abko niara tö namani nuein ja moto kuinbti amne käi namani nuäre btä ngwena bare.

⁶ Ngöbökwē ni tarebare kuin bä nuäre ja moto kuinbti, yebtä abko nikwe käikitadrekä käre. Niarakwe ni tarebare kuin bä nuäre ja moto kuinbti, ye mikani gare nie niara Odei tarebare kri kwe ye köböire.

⁷⁻⁸ Erere arato, Kristo krütani krusobtä, däräe nimianinte nikrä, ye köböire abko nita neme ketetibe Kristobe angwane, Ngöbökwē ni kökanintarita jakrä, käkwe ni tikaninte. Amne ni ngite niara rüere, ye dianinkä jökrä mento niibtä kwe. Ye abko Ngöbökwē nuenbare ja moto kuin nuäre yebti. Niara abko bäri töbtä amne kukwe jökrä tä nuke gare ie.

⁹ Kira Ngöbö tö namani kukwe mikaitbe ño tiebe, ye erere mikanintbe kwe, abti mikanina gare kuin kwe nie. Ye abko, Ngöbökwē ja moto mikani kuin amne, kukwe mikanintbe kore kaibe kwe angwane, tö namani kukwe ye ngwena bare abko erere namani bare ie Kristo köböire.

¹⁰ Kä kitani nuäi kwe abko erere käi nükani angwane, kukwe mikanintbe kwe, ye erere namani bare täte jökrä Kristo köböire. Kukwe mikanintbe Ngöbökwē ye abko krörö: Jändrän jökrä kä käinbti amne kä temenbtä abko rabadre mikani gare jökrä täte Kristoye angwane, Kristo rabadre ji dokwäte jändrän jökräbti ta.

¹¹⁻¹² Kira Ngöbökwē köbö kitani ni kakrä ngäbti abko erere ni dianinkä jen jakrä kwe, ye köböire ni rabadre jen Ngöbökwē, abkokäre nitre israelita ara jire käta tödeke bäri käne Kristobti nitre ñakare israelitare känenkri, käkwe Ngöbö di kri bä nuäre ye käikitadrekä kärekäre, abkokäre Ngöbökwē kukwe mikanintbe ni diantarikäre jakrä. Ye abko Ngöbö tö namani nuein ño, erere nuenbare kwe.

¹³ Erere arato, Ngöbö kukwei kuin Kristobtä ni diantarikrä ye abko Ngöbö kukwei era metre, ye mun ñakare israelitare kärke kukwei nuani angwane, munkwe kani ngäbti, kärke tödekani Kristobti angwane, Ngöbökwé mun mikani ketetibe gwaire Kristobe. Yebti, Ngöbökwé ja Üai deme mikani nüne munbtä, ye abko tä ñäräkrä kwrere munbtä, mun jen Ngöbökwé mikakäre gare. Ngöbö Üai Deme ye mden abko Ngöbökwé köböi mikani kira.

¹⁴ Akwa Ngöbökwé ni diandretari täte jökrä amne ni rabadre juta jen Ngöbökwé täte jökrä amne ni rabadre Ngöbö di kri bā nuäre ye kääikitekä käreäre abko bā mikakrä Ngöbökwé ja Üai Deme biani nie. Yebtä abko ni rabadre kuin niere Ngöböye.

Pablota blite Ngöböbe

¹⁵ Mun abko tä tödeke kwatibe ni Dänkien Jesubti amne munta juta deme Ngöbökwé tarere, ye tikwe kukwei nuaba angwane,

¹⁶ ye näire mentokwäre tita blite Ngöböbe angwane, käre tita kuin niere ie munbtä.

¹⁷ Ngöbö ni Dänkien Jesukristokwe amne ni Rün bā nuäre ye ie käre tita kukwe ribere krörö munkrä: Ngöbökwé mun mikadre töbtä ja Üai köböire amne ja mikadre gare metre kwe munye ja Üai köböire, niara rükadre gare bāri kuin munye abkokäre.

¹⁸ Erere arato, tita kukwe mdara jire ribere krörö Ngöböye munkrä: Ngöbökwé mun käräbare jakrä, aisetare mtare jändrän kuin ngibiata Ngöbökwé munkrä kääinbti mden munta ngibiare kisere, ye rükadre gare metre munye, abkokäre Ngöbökwé kää trä tikadre mun töite. Erere arato, juta deme Ngöbökwé abko rabadi bā nuäre amne ütiäte kri Ngöbökrä abko rabadre gare munye, abkokäre niarakwe kää trä tikadre mun töite abko tita käreere munkrä Ngöböye.

¹⁹ Erere arato, Ngöbö di kri ñan krütare, ye mden abko tä ni tödekaka Jesubti die mikakrä, ye rabadre gare munye, abkokäre Ngöbökwé kää trä tikadre mun töite abko tita ribere ie. Ngöbö di kri tä mun kräke abko Ngöbökwé mikani tuadre,

²⁰ kärke Kristo mikaninta nire ja di kribti amne kää bāri ütiäte, käänti Kristo mikani tääinbti kää küde ruenkri kää kääinbti kwe ja di kri yebti.

²¹ Ye abko, üai käre jökrä amne angele jökrä Ngöbökwé tä dänkiene, kääta gobrane, kääta ja di kri mike gare, yebti ta Ngöbökwé Kristo mikani bāri ütiäte. Erere arato, jändrän jire jökrä tä kää ne ngwane amne jändrän jire jökrä jatadi kää mrä angwane, yebti ta Ngöbökwé Kristo mikani bāri ütiäte.

²² Mdakäre abko, Ngöbökwé jändrän jökrä mikani Kristo ngoto täni amne, nitre gätäkä Kristo käänti, ye kräke Ngöbökwé Kristo ara jire mikani dänkiene ji dokwäre niaratre dokwä kwrere,

²³ ñöbtä ñan angwane nitre gätäkä Kristo käänti ye abko Kristo ngrabare kwrere amne Kristo ara btä Ngöbö tä nüne täte jökrä amne Ngöbö tä täte jändrän jökrä bti ta.

2

Ngöbökwé ni mikani nire Kristo ben gwaire

¹ Mdakäre abko, käre mun ñakare israelitare ngämi tödeke Jesubti, käänenkri mun nämane kukwe nuene käämekäme Ngöbö rüere amne mun nämane ja mike ngite Ngöbö rüere. Ye mden kisete, mun nämane ni ngwäkäre kwrere Ngöbö ngwäreki.

² Mun nämane nüne kore angwane, ni töi käämekäme tä nüne ño kää nebtä Ngöbö rüere, ye kwrere jire mun nämane nüne. Amne Satana tä gobrane kää drünente, ye abko töi namani nebe mun tuai dre dre nueini abko erere mun nämane nebe munye abko jiebti nun Ngöbö Kukwei kitaka temen, ye ngätäite Satana ara tä sribire Ngöbö rüere abti kää nüke mtare. Satana ye mden nämane mun töi mike nüne ño abko erere mun nämane nüne kena.

³ Ye kwrere arato, nun israelita ngämi tödeke Jesubti, käänenkri nun jökrä nämane nüne mun kwrere siba angwane, kukwe käämekäme mdei nämane nebe angwane, nun nämane nakwen. Amne nun ngrabare, ie kukwe käämekäme mdei nämane nebe angwane, nun nämane nuene. Erere arato, nun töi nämane ngitiekä käämekäme abko jiebti nun nämane nakwen. Nun nämane nüne kore, ye dokwäre abko Ngöbökwé nun mikadre ja tare nike kri krübäte ni mda mda kwrere, ye abko rabadre dbe, ñöbtä ñan angwane nun nämane ja mike ngite, dokwäre Ngöbökwé nun mikadre ja ngie nuen kore.

⁴⁻⁵ Akwa Ngöbö abko bāri moto kuin kärke ni tarebare kri krübäte abko krörö: Ni nämane ja mike ngite Ngöbö rüere, abtä ni nämane ni ngwäkäre kwrere, kää nämane mente Ngöböye, ye ngwane Ngöbökwé ni mikani nire Kristo ben gwaire. Ngöbö moto kuin, ye mden köböire abko mun ñakare israelitare namani dianintari.

⁶ Amne Kristo ben gwaire Ngöbökwé ni mikanina nire amne, kää bāri ütiäte kri kää kääinbti käänti Ngöbökwé Kristo mikani dänkiene, ye käänti ni mikanina tääinbti Kristo Jesu ben gwaire.

⁷ Ngöbökwe kukwe nuenbare jökrä kore, ye abko kä mrä näire Kristo jatadita angwane, Kristo Jesu köböire Ngöbökwe ja moto mikani bäri kuin nikrä, ye niara rabadre bä mike kärekäre,

⁸ ñobtä ñan angwane Ngöbökwe ja moto mikani kuin munkrä käkwe mun dianintari, munkwe tödekani Jesubti angwane. Ye abko ñan jändrän kuin nuenbare munkwe abko ütiä nükani kore munye, akwa Ngöbö ara jire käkwe mun dianintari ngwarbe ja moto kuinbti.

⁹ Mdakäre abko, ñan munkwe sribi kuin nuenbare au jakrä abko ütiäre mun namani dianintari, ye abko ni ñakare jire iti rabadre bike kri, abkokäre Ngöbökwe kukwe mikanintbe kore,

¹⁰ ñobtä ñan angwane Kristo Jesu köböire Ngöbö ara jire käkwe ni datebare kuin bä nuäre. Amne nikwe sribi kuin nuendre kärekäre ni mda mda die mikakäre abko Ngöbökwe ükaninte kira, ye kwrere nikwe nuendre, abkokäre Ngöbökwe ni datebare kore Kristo köböire.

Ni jökrä tödekaka Kristobti abko Ngöbökwe mikani ketetibe gwaire Kristobe

¹¹ Ne aisete, Kristo ngämi krüte krusobtä, känenkri mun ñakare israelitare abko nämane nüne ño, ye munkwe ngwianta töre jae. Käne nitre israelita ñäräkrä mikani kwatabtä ni kä nebtäkwe abko nämane mun kä den "nitre ñäräkrä ñakare kwatabtä," nämane niere munbtä, mun mikakäre ngwarbe jae.

¹² Kä ye ngwane abko Kristo gare ñakare munye amne mun nämane nüne jenena juta israelita bäre mento. Erere arato, Ngöbökwe kukwe ükaninte nitre israelitabe angwane, jändrän köböi mikani kwe ietre, ye abko nämane ñakare munkrä amne, ni mda ni diantarikä abko nämane ñakare jire tödekakrä munkwe. Erere arato, Ngöbö era metre ye abko gare ñakare munye.

¹³ Mun nämane nüne mente Ngöböye, akwa Kristo Jesu krütani krusobtä, däräie nimianinte, ye köböire abko mun nena krötö Ngöbö ken ketetibe gwaire Kristobe.

¹⁴ Kristo abko ni mikaka ja mäketä jabe kwärikwäri. Ni israelita amne ni ñakare israelitare mikani juta kwatibe kwe. Erere arato, nitre israelita amne nitre ñakare israelita mätä nämane kri jabtä kwärikwäri, ye abko ki nämane ni jiete kwärikwäri kwrere. Kristo krütani angwane, mätä kri ye abko kitani jökrä temen kwe.

¹⁵ Erere arato, Kristo krütani krusobtä angwane, ja ngrabare ye te niarakwe Kukwe Biani Ngöbökwe Moiséye ye mikani ütiäte ñakare mda ja mikakrä metre Ngöbö ngwärecri. Nitre israelita amne nitre ñakare israelitare nämane ja rüere kwärikwäri, akwa Kristo krütani krusobtä niaratre mikakäre ketetibe gwaire ni itibe btin kwrere. Ye köböire abko juta ketebu ja rüere kwärikwäri abko mikani nüne jäme jabe kwärikwäri kwe.

¹⁶ Erere arato, Kristo krütani krusobtä, köböire juta ketebu mikani ketetibe gwaire ni itibe btin kwrere ye mikakäreta gwaire Ngöböbe amne, nitre israelita amne nitre ñakare israelitare nämane rüre Ngöbö rüere, akwa Kristo käkwe mikani ja mäketä Ngöböbe.

¹⁷ Kukwe kuin ni mikakrä nüne jäme jabe kwärikwäri abko Kristo jatani ngwena ni jökrä kräke, aisete mun ñakare israelitare nämane nüne mente Ngöböye amne nitre israelita nämane nüne ja ken Ngöböbe, ye kräke Kristo jatani kukwe kuin ngwena kore.

¹⁸ Ne aisete Kristo köböire ni ñakare israelitare amne ni israelita abko raba niken jäme nebe ni Rün ngwärecri Ngöbö Üai itibe köböire.

¹⁹ Ye mden kisete, mun ñakare israelitare abko ñakare chui menteni kwrere Ngöbö ngwärecri mtare. Akwa nitre israelita abko juta deme Ngöbökwe, ye ben gwaire mun nena ütiäte amne nitre israelita abko Ngöbö ngäbriänkätre kwrere, ben mun nena ja mräkäre.

²⁰ Mdakäre abko, mtare mun abko ju kwrere amne, kukwe diribare nitre Jesu kukwei ngwiankakwe amne nitre Ngöbö kukwei niekäkwe, ye abko jä mikata ju ketabtäkrä dite krö. Kukwe diribare kwetre yebtä abko munta ja ketebtä dite amne, Jesukristo abko jä bäri ütiäte kri ju mikakrä jä mda mda ye ngwä, yebtä munta ja ketebtä dite arato.

²¹ Ye abko, ju mikata niken abko ketakata niken kiakia ja tätitäre abti tä niken nebe bare, ye kwrere munta niren gwaire jökrä Kristo köböire abti ju deme Ngöbökwe tä mikani ketetibe gwaire ni Dänkienbe, ye kwrere mun rabadi.

²² Erere arato, Kristo köböire munta nekete jökrä jakri, ye köböire abko mun näin nebe ju Ngöbökwe kwrere abko te Ngöböta nüne ja Üai köböire.

3

Pablo juani sribire nitre ñakare israelitare ngätäite

¹ Ti Pablo tä sribire mun ñakare israelitare kräke. Kristo Jesu mikabtä gare mun ngätäite, dokwäre tita ngite kä teri nete.

² Ye abko, Ngöbökwe ja moto mikani kuin munkrä abko ti mikani niekä kwe munye, ye nena gare kuin munye ruen tie.

³ Ye abko tikwe tära tikaba chi käne munye, yebtä abko kukwe nämane kaibe tiebe Ngöbökwe abko Ngöbökwe mikani gare tie abko tikwe tikaba munye.

⁴ Munkwe ñäkädre tära yebtä angwane, kukwe nämane kaibe tiebe Ngöbökwe Kristobtä ye abko nena gare metre jökrä tie abko rükadi gare munye.

⁵ Kukwe ngbiabare kaibe tiebe Ngöbökwe ye abko mikani gare ñakare kwe nitre kirakiraye mekera, akwa mtare nitre deme deme Jesu kukwei ngwianka amne nitre Ngöbö kukwei niekä abko ie Ngöböta mike gare ja Üai köböire.

⁶ Angwane kukwe nämane kaibe tiebe Ngöbökwe abko krörö: Ngöbö kukwei kuin Kristobtä, köböire Ngöböta nitre ñakare israelitare kärere jakrä, amne jändrän Ngöbökwe nämane nitre israelitakrä abko nitre ñakare israelitare rabadre bkäne siba nitre israelitabe Kristo Jesu köböire. Erere arato, nitre ñakare israelitare abko rabadre ni itibe kwrere nitre israelitabe, amne jändrän köböi mikani Ngöbökwe nitre israelitaye, ye abko nitre ñakare israelitare rabadre bkäne siba arato, ne abko nämane kaibe tiebe Ngöbökwe, akwa mtare nena gare nie.

⁷ Ngöbökwe ja moto mikani kuin tikrä amne ti ngwiani ruen bobre kwe jae, käkwe ti mikani sribire kukwe kuin nebtä. Erere arato, Ngöbö ara käkwe ja di kri biani ngwarbe tie sribi nuenkäre.

⁸ Ni bäri ütiäte ñakare nitre jen Ngöbökwe ngätäite, ye ngwä ti abko bäri chi amne bäri ütiäte ñakare, akwa kukwe kuin ütiäte kri ñan tanre Kristobtä, ye abko ti rikadre ngwena nitre ñakare israelitareye, abkokäre Ngöbökwe sribi biani tie.

⁹ Mdakäre abko, Ngöbö jändrän jökrä dätekä abko kwe kukwe nämane kaibe tiebe kira, ye abko tikwe mikadre gare ni jökräye, abkokäre sribi ye biani kwe tie.

¹⁰ Amne nitre gätäkä Kristo käbti, ye köböire Ngöbö abko töbtä kri jändrän bätäkä ngwarbebtä abko rabadi gare üai kämeye amne angeletre Ngöbökwe tä gobrane yeye, ye mdenkäre Ngöbökwe sribi ne biani tie.

¹¹ Ye abko, Ngöbökwe kukwe mikanintbe kira, ye erere mikani nebe bare kwe ni Dänkien Kristo Jesu köböire amne,

¹² mtare nita ketetibe gwaire Kristo Jesube amne nita tödeke kwatibe Kristo Jesubti, ye mden kisete mtare kä jürä ñakare jire chi nibtä krötö Ngöbö ken Kristo köböire.

¹³ Ye mden kisete abko tita ja tare nike munkrä, akwa kukwe yebtä mun ñan raba ulire amne mun ñan di krüta abko ti tö ribei munye, ñobtä ñan angwane ja rabadre ruen bäri ütiäte munye, abkokäre tita ja tare nike kore munkrä.

Pablota ja di ribere Ngöböye

¹⁴ Ne mden kisete abko tita nebe ngukudokwäbti temen ni Rün Ngöbö ngwärekrei.

¹⁵ Ngöbö ni Rün nikwe käkwe mräkä kwekwe tä kä käinbti amne kä temenbtä dätebare.

¹⁶ Tita kukwe ribere krörö ni Rünye munkrä: Ni Rün jändrän kuinkuin bä nuäre bkäne kabre krübäte, jändrän yebti abko mun moto amne mun töi mikadre nünenkä dite kwe ja Üai köböire,

¹⁷ munkwe tödekadre kwatibe Kristobti, köböire niara rabadre nüne munbtä. Erere arato, Ngöböta mun tarere ño, ye kwrere mun rabadre ni mda mda tarere, yebti mun rabadre nüne abko tita ribere ni Rün Ngöböye munkrä.

¹⁸ Ye köböire abko Kristota ni tarere kri krübäte abko ni ñan raba ñäketbe jire chi ye abko rabadre gare täte jökrä munye, nitre deme deme tödekaka Kristobti ye ben gwaire abko tita ribere kore ni Rün Ngöböye munkrä.

¹⁹ Erere arato, ni töi mräme, aisete Kristota ni tarere kri abko ñan raba nuke gare täte nie, akwa Kristo käta ni tarere bäri kri krübäte abko rükadre gare munye, ye köböire abko Ngöbö rabadre nüne täte munbtä abko tita ribere ni Rünye munkrä.

²⁰ Amne mtare, Ngöbö aibe raba käikitaninkä, ñobtä ñan angwane nita jändrän kärere Ngöböye amne, jändrän btä ni töita ñakare, yebti ta abko Ngöböta jändrän bien bäri kri krübäte nie, aisete Ngöbö di kri tä nibtä, yebtä ari kuin niere Ngöböye.

²¹ Nitre gätäkä Jesu käbti abko ngätäite Ngöbö raba mikani ütiäte amne Kristo Jesu köböire Ngöbö raba käikitaninkä kärekäre. Abko kore se. Amen.

4

Nikwe nünandre btin ni itibe kwrere

¹ Tita ngite kä teri nete ti Dänkien dokwäre, ye mdenbtä abko ti tö ribei krörö munye: Ngöbökwe mun käräbare jakrä ye abko bäri ütiäte, aisete ni käräta Ngöbökwe käkwe nünandre ño Ngöbö mikakäre bäri ütiäte, ye kwrere munkwe nuna abko krörö:

² Munkwe ñan bika kri, akwa munkwe bika tidrä era metre ni mda mdabtä amne munkwe nuna jame jabe kwärikwäri. Erere arato, kukwe ño ño amne ni ño ño erere btä

munkwe ja ngibia bätäreka kwärikwäri amne, mun itire itire abko tõi ñakare ja kwrere, akwa munkwe ja ka ngäbti kwärikwäri amne munkwe ja tare kwärikwäri.

³ Mdakäre abko, Ngöbö Üai Deme köböire munta ja mäke ni itibe kwrere, ye kwrere munkwe nünandre janknu, abkokäre munkwe nuna jame jabe kwärikwäri.

⁴ Nitre gätäkä Kristo käbti abko Kristo ngrabare, ye abko itibe amne Ngöbö Üai abko itibe amne Ngöböke ni käräbare jändrän jökrä kuin niarakwe tä mikani nikrä ye ngibiakäre kisere.

⁵ Amne ni Dänkien abko itibe abko Jesukristo ara amne, kukwe kuin niarabtä aibe era metre tödekakrä amne, ni ngökadre ñöte diribare Jesukwe aibe metre amne,

⁶ Ngöbö abko itibe amne niara abko ni jökrä tödekaka Jesubti Rün. Ngöbö abko bäri kri ni jökrä bti ta amne, ni jökrä tödekaka Jesubti, ye köböire tä sribire amne tä nüne btäre arato.

⁷ Akwa ni itire itire, ie Kristo tö namani ja di biain ño ño, ye erere ja di biani kwe ja moto kuinbti, akwa nin ütiä käräbare kwe nie.

⁸ Ye mden kisete Ngöbö Kukwei käta niere krörö:

Niara nikaninta kä käinbti angwane, ni kani ngite ngite kwe abko erere nikani ngwena jökrä kä käinbti jabe, kärke ja di biani ni kä nebtäye. *Salmos 68.18*

abko nieta Ngöbö Kukweibtä.

⁹ Ye ñöbtä abko nikaninta kä käinbti nieta? Niara abko nükani nüne käne kä temen nebtä, äbti nikaninta kä käinbti, aisete nieta kore.

¹⁰ Erere arato, niara nükani kä nebtä, arabe nikaninta kä bäri ütiäte kä käinbti yete, kä ketareketare kä käinbti amne kä temen nebtä rabadre gare ie gobrankäre bti, abkokäre nikaninta kä käinbti.

¹¹ Niara arabe kärke sribi biani ni ruäre sribikäre nitre gätäkä Jesu käbti ngätäite abko krörö: ni ruäre mikani Jesu kukwei ngwianka kwe amne, ni mda abko mikani Ngöbö kukwei niekä kwe amne ni ruäre abko mikani Ngöbö kukwei kuin Jesubtä mikaka gare kwe amne, ni ruäre abko mikani ni tödekaka Jesubti ngibiaka amne dirikä kwe arato.

¹² Ni biani kore kwe juta deme Ngöböke mikakäre juto biare sribi bätäkä ngwarbe nuene Ngöbökrä, Kristo ngrabare rabadre niren nebe täte jökrä abkokäre.

¹³ Ye köböire abko ni rabadre tödeke gwaire jökrä Kristobti amne Ngöbö Odei kwe abko rabadre gare kuin nie angwane, Kristo nena ünän täte jökrä, ye kwrere ni rabadre nebe ünän täte jökrä, abkokäre sribi biani kore Kristokwe ni ruäre yeye.

¹⁴ Ni jökrä tödekaka Kristobti rabadre nebe ünän täte kore, ye ngwane abko ni ñan töi rabadre ngäbäre kiakia kwrere mda. Ni ngäbäre kiakia kwrere abko ie kukwe mda mda dirita niken angwane, töita nikwite jötrö kukwe mda mda ye jiebti, äbti mrä nitre ni ngökaka käta kukwe dirire blo abko ie tätre ja ngökamna. Amne bäsi ru mrenbti juankata nebe mürekwe nekwäre sekwäre, ye kwrere jire tä nänenkä nitre ngäbäre kiakia kwrere yebtä. Ye kwrere nikwe ñan nünandre mda.

¹⁵ Akwa kukwe era metre ye abko nikwe niedre ni mda mdaye, niaratre tarere kwära angwane, Kristo ni dokwä, kwrere jire ni rikadre niren gwaire jökrä äbti mrä ni rabadi ünän täte jökrä.

¹⁶ Ye abko, ni ngrabare tä niren kuin amne ni kiakia ngrabare tä neketaninkä kuin jökrä jabtä, ye kwrere jire nita niren kuin gwaire jökrä Kristo köböire. Ye mden kisete, nita kuin jökrä ngrabare gwaire Kristobtä, ye ngwane ni itire itire kärke sribi jen kwe nuendre niara mräkä mda die mikakäre angwane, ni rikai niren kuin gwaire jökrä jabtä, käta niken ja tarere kwärikwäri.

Nikwe nünandre metre Ngöbö ngwäreki

¹⁷ Ye mden kisete, ti bike kukwe niere munye abko munkwe mika täte abko ti tö nibi niei munye ni Dänkien käbti abko krörö: Nitre ñakare israelitare tödekaka ñakare Jesubti töita ngwarbe kwärikwäri abko erere tätre nüne, ye kwrere munkwe ñan nuna jire chi mda.

¹⁸ Erere arato, nitre ñakare israelitare töita kä ikote kukwe käme kisete amne Ngöbö ni mikaka nüne kärekäre, ie niaratre tä nüne mente, ñöbtä ñan angwane Ngöbö gare ñakare jire chi ietre, ñöbtä ñan angwane niaratre kärke ja töi mikani ribi Ngöbökrä.

¹⁹ Ye abko, kukwe mden mden käme amne kukwe mden kuin gare ñakare ietre, aisete kukwe kämekäme bätäkä ngwarbe meribe amne brarebe, jiebti tätre nakwen amne, tätre ja gaire ñakare, käta kukwe kämekäme nuene jökrä, akwa kukwe käme ye mdei tä neme bäri janknu ietre.

²⁰ Akwa Kristo nükani gare munye angwane, munkwe ja töitikani ñakare nünakäre kore.

²¹ Kukwe kuin Jesubtä abko kukwe era metre amne kukwe kuin ye munkwe kukwei nuani angwane, niara tö mun tuai nüne ño, yebtä munkwe ja töitikani ruen tie.

²² Ye mden kisete, mun nämane nüne ño ño käne, ye abko munkwe kitadre jökrä temen amne dän käme tikateta jabtä, bti kitakata, ye kwrere kukwe nuen nämane käne munkwe,

ye munkwe kitaka jökrä, ñobtä ñan angwane kukwe kämekäme nämane mun ngökö abko käkwe mun mikani nüne käme abko diribare munye.

²³ Amne mun töi nämane ño ño käne, ye abko Ngöbö Üai köböire mun töi rabadre kwitani ni btin kwrere abko diribare munye.

²⁴ Amne nita dän btin kite jabtä, ye kwrere mun rabadre ni btin kwrere. Ngöbö abko kukwe nuenkä metre amne niara abko deme, ye kwrere Ngöböta mun kwite btin abko diribare munye.

²⁵ Ne aisete mun nämane ni ngökö ye käkwe ñan ni ngöka mda, amne munkwe kukwe era erere nie jae kwärikwäri mun mräkäbe, ñobtä ñan angwane mun abko tä ni itibe kwrere Jesubtä aisete.

²⁶ Erere arato, mun moto raba romon, akwa munkwe ñan ja mika ngite amne mun moto romon, ye ben ngöi mun ñan rika kibien

²⁷ amne, munkwe ñan kä bian diabluye kore.

²⁸ Mdakäre abko, mun mden mden nämane gore ye käkwe ñan go mda amne ni mda mda käta jändrän mdei nike ye abko mun rabadre die mike, abkokäre munkwe sribi era metre ja kise jenbti jakrä.

²⁹ Erere arato, munkwe ñan blita kämekäme, akwa ni mda mda käkwe mun kukwei nuadre blite angwane, rabadre mate nuäre olote, käkwe die mikadre nüne bäri metre Jesukristo kräke, abkokäre kukwe kuinkuin aibehti blita munkwe.

³⁰ Amne munkwe ñan Ngöbö Üai Deme moto mika ulire. Ngöböke ja Üai Deme mikani nüne munbtä ñäräkrä munbtä kwrere, mun abko jen Ngöböke mikakäre gare munye. Kä mrä angwane, Ngöböke mun dianditari jökrä täte, ye mikakäre gare metre munye, ja Üai biani kwe munye.

³¹ Mdakäre abko, jändrän krörökrörö munkwe kitaka jökrä mento jabtä: Mun mätä ni mdabtä amne mun moto romon jakrä kwärikwäri, erere arato mun moto ngadaen jötö amne munta ngrente krikri romone amne munta ñäke ngwarbe taretare ni mda mdaye amne munta ñäke kämekäme bätäkä ngwarbe ni mda mda rüere, ye munkwe kitaka jökrä mento jabtä.

³² Amne munkwe ja moto mika kuin jakrä kwärikwäri amne ja raba ruentari tare kwärikwäri munye amne, Ngöböke ni ngite dianinkä ño nibtä Kristo köböire, ye kwrere munkwe ja ngite dian jabtä ta kwärikwäri arato.

5

¹ Mun abko Ngöbö ngäbriänkä amne mun tare kri kwe, aisete munkwe ja töi mika nüne Ngöbö kwrere.

² Erere arato, Kristo käkwe ni tarebare kri, käkwe ja mikani müre ketadre krusobtä nikä. Angwane jändrän kukwata Ngöböye abko räta nebe kuin bäne bti, ye kwrere Kristo käkwe ja mikani müre ketadre nikä abko namani kuin Ngöbökrä, aisete Kristo käkwe ni tarebare kore, ye kwrere munkwe ni mda mda tare arato.

³ Akwa ni deme Ngöböke käkwe nünandre ño, ye kwrere munkwe nüna abko krörö: ja mika gure bati bati bätäkä ngwarbe amne kukwe mda kämekäme meri amne brare ngätäite amne, jändrän jenena ie ni töta nebe jakrä, ye ñan kwandre jire chi mun ngätäite.

⁴ Erere arato, kukwe kämekäme diän diän, ye munkwe ñan dian kadate amne, ni töi ñakare tä blite kukwe ngwarbebtä, ye kwrere munkwe ñan blita jire chi. Amne kukwe ngwarbe kämekäme ni mikakrä kötö, yebtä munkwe ñan blita jire chi arato, ñobtä ñan angwane ni tödekaka Kristobti abko käkwe ñan blitadre jire chi kore, akwa munkwe kuin nie jirekäbe Ngöböye jändrän jökräbtä.

⁵ Ye ñobtä ñan angwane nire nire käta ja mike gure bati bati bätäkä ngwarbe amne tä kukwe mda mda nuene kämekäme bätäkä ngwarbe amne jändrän jenena ie töta nebe jakrä, ye abko jändrän ngwarbe mikata ngöböre kwe jae kwrere. Nitre ye btä Kristo amne Ngöbö tä gobrane abko ngätäite nitre jändrän kore nuenkä ñan rabadi nüne abko ti tö nibi niei metre munye.

⁶ Ne aisete ni mda mda jata kukwe ngwarbe dirire kore, ye ie munkwe ñan ja ngökamma, ñobtä ñan angwane nitre ñan tä Ngöbö Kukwei mike täte kore, käta kukwe nuene kämekäme, ye dokwäre Ngöböke mikadi ja ngie nuen kri krübäte.

⁷ Ye mden kisete, munkwe ñan kukwe käme nuen jire chi bentre,

⁸ ñobtä ñan angwane mun ngämi tödeke Jesubti, känenkri mun nämane nüne ngwarbe kä ikote, akwa mtare munta nekete ketetibe ni Dänkien Jesukristobe, aisete munta nüne Ngöbö trä ngwente. Ye mden kanti ni nünanka Ngöbö trä ngwente käkwe nünandre, ye kwrere munkwe nüna kuin metre.

⁹ Ye ñobtä ñan angwane ni nünanka Ngöbö trä ngwente, ye köböire abko nita kite nebe moto kuin ni mda mdakrä amne nita kite nüne metre amne, nita kukwe era erere niere arato.

¹⁰ Mdakäre abko jändrän mden mden tuen dbe ni Dänkienye, ye munkwe mika ñäräre kuin ja käne abko erere munkwe nuna.

¹¹ Amne nitre nünanka kä ikote abko tä kukwe mikete ngwarbe, yebtä munkwe ñan ja kita siba bentre, akwa kukwe nuenta kämekäme kwetre, ye munkwe mika gare ja ngwäreki jökrä Ngöbö trä ngwente,

¹² ñobtä ñan angwane nitre Ngöbö Kukwei kitaka temen käta kukwe kämekäme nuene kaibe tiebe kä ikote, ye abko gaidre kri, aiseite ñan blitadre jire chi kukwe yebtä.

¹³ Akwa kukwe jökrä mikata gare Ngöbö trä ngwente, ye ngwane kukwe ño era metre abko tä nebe gare metre jökrä nie,

¹⁴ ñobtä ñan angwane jändrän jökrä mikata Ngöbö trä ngwente, ye abko Ngöbö trä tä mate btä abko käta trä mike arato. Ye mden kisete nieta krörö:

Ma tödekaka ñakare Kristobti abko tä ni kibien kwrere, aiseite nüketa ngwäte.

Erere arato, ni ngwäkäre kwrere mata, aiseite näinta krö amne, Kristo käkwe Ngöbö trä tikadikä ma okwäte abko nieta kore.

¹⁵ Ye mdenbtä abko, mun tödekaka Kristobti tä nüne ño, yebtä munkwe töbika kuin ja käne, käkwe ja ngibia. Erere arato, munkwe ñan nuna ni diän diän tõi ñakare kwrere, akwa munkwe nuna ni töbtä kwrere

¹⁶ amne, kä ne näire kukwe käme nuenta bäri, aiseite munkwe nuna kärekäre Ngöbökrä amne munkwe ñan kä gate jire chi ngwarbe.

¹⁷ Erere arato, Ngöbö tö mun tuai nüne ño, ye rükadre gare munye, ie ti tö, aiseite nitre tõi ñakare, ye kwrere munkwe ñan nuna.

¹⁸ Mdakäre abko, munkwe ñan dö kwaka ña dröbakäre, ñobtä ñan angwane ni döre abko käta nebe jäme dokwäbti amne, tä nebe diän krübäte, aiseite munkwe ñan dröba. Akwa köbö kwatirekwatire munkwe Ngöbö Üai tuametre nüne täte jökrä jabtä.

¹⁹ Erere arato, munkwe blita jabe kwärükwäri salmobtä, amne ka ükaninte niedre Ngöböye, ye munkwe nie amne ka mda mda kuin niedre Ngöböye, ye munkwe nie, aiseite munkwe ka nie amne Ngöbö käikitaka ja töibti munkwe.

²⁰ Käre munkwe kuin nie ni Rün Ngöböye jändrän jökräbtä ni Dänkien Jesukristo käbti.

Kukwe ni gure gure kräke

²¹ Mdakäre abko, munta Kristo mike ütiäte jae, aiseite munkwe ja mika ütiäte jae kwärükwäri.

²² Mdakäre abko, meri gure gure abko käta ni Dänkien mike ütiäte ño jae käta kukwei mike täte, ye kwrere arato ni brare kwe ye abko mika ütiäte kwe jae, kukwe mikakäre täte,

²³ ñobtä ñan angwane nitre tödekaka Kristobti abko tä Kristo ngrabare kwrere amne Kristo abko tä ji dokwäte kräke, ye kwrere ni brare tä ji dokwäte meri kwe kräke. Kristo abko nitre tödekaka niarabti Diantarikä arato.

²⁴ Nitre tödekaka Kristobti abko tä Kristo kukwei mike ütiäte jae amne tä mike täte, ye kwrere arato meri gure käkwe brare kwe kukwei mikadre ütiäte jae mikakäre täte arato.

²⁵ Amne Kristo käkwe nitre tödekaka bti tarebare, käkwe ja biani müre ketadre kräke, ye kwrere jire mun brare gure gure käkwe meri munkwe tare.

²⁶ Kristo käkwe ja biani müre ketadre kore ni mikakäre merebe amne deme, ye abko mun namani ngökani ñöte Kristo käbti munkwe bä mikani jabtä amne munkwe tödekani niarabti munkwe niebare abko munkwe bä mikani jabtä arato.

²⁷ Erere arato, Kristo käkwe ja biani müre ketadre kore, ye köböire abko nitre tödekaka bti abko bä rabadre bäri nuäre amne jändrän kämekäme tiebe ñan rabadre jire btä. Erere arato, ñan rabadre ni kwata näkwain näkwain kwrere kukwe kämekäme kisete amne, jändrän mda mda kämekäme ñan rabadre jire nitre ye ngätäite, akwa Kristo tö namani tuai deme amne era metre ja ngwäreki, abkokäre ja biani müre ketadre kwe kräke.

²⁸ Kristo käkwe ni tarebare kore, ye kwrere arato ni brare brare käkwe meri kwe taredre. Amne niara tä ja ngrabare tarere au, ye kwrere meri kwe taredre kwe, ñobtä ñan angwane nire nire käta meri kwe tarere, ni ye abko tä ja tarere au.

²⁹ Ye abko ni ñakare jire iti käta bätä ngwen ja ngrabare btä au, akwa nita ngibiare kuin amne nita mröre ja ngrabare kräke. Ye kwrere arato, Kristo tä nuene nitre tödekaka niarabti kräke,

³⁰ ñobtä ñan angwane nitre jökrä tödekaka Kristobti abko Kristo ngrabare kwe amne ni itire itire abko Kristo kiakia ngrabare.

³¹ Ne aiseite, Ngöbö Kukwei käta niere krörö:

Ni brare kākwe ja mikadre gure angwane, rikadre nūne jenena rūnbtā amne meyebtā mento merire kwebe.

Angwane ni nibu ye abko rabadi ni itibe kwrere, abko nieta kore.

Génesis 2.24

³² Yebtā abko kukwe nebti jāndrān ūtiāte kri gare űakare nie abko tā ūkani tiebe Ngōbōkwe abko tā nūke gare nie, akwa Kristo amne nitre tōdekaka niarabti abko btā kukweta tiebe kore Ngōbōkwe abko tita niere.

³³ Amne mun brare brare abko ie ti bike niereta bobukāre krōrō: Mun itire itire kāta ja tarere au, ye kwrere jire munkwe meri munkwe tare amne, mun merire merire abko kākwe ni brare munkwe mika ūtiāte jae abko tita niereta kore munye.

6

Kukwe ngābākre krāke amne rūn btā meye kwe krāke

¹ Mdakāre abko, mun ngābākrere, mun ye abko ni Dānkienkwe, aisete munkwe mun rūn btā mun meye kukwei mika tāte, űobtā űan angwane ye abko kuin ni Dānkien okwābti.

²⁻³ Ngōbōkwe ja kukwei ne biani Moiséye nuendre ngābākre, ben gwaire jāndrān bāri ūtiāte kōbōi mikani kāne kwe abko krōrō:

Munkwe nūnandre jāme amne munkwe nūnandre raire kā temen nebtā, abkokāre munkwe mun rūn btā mun meye mika ūtiāte jae, *Deuteronomio 5.16*

abko nieta kore Ngōbō Kukweibtā.

⁴ Amne mun ngābākre rūnre rūnre abko kākwe űan ngābākre munkwe moto mika romon kukwe bātākā ngwarbe btā, akwa munkwe ngābākre munkwe tōi tikadre amne munkwe ji kuin Ngōbōkwe mikadre gare űo ietre abko ie ni Dānkien tō, ye kwrere munkwe nuen.

Kukwe ni klaborē krāke amne bkānkā kwe krāke

⁵ Mdakāre abko, mun klaborē kākwe mun bkānkā kukwei mika tāte ja tōi kuinbti. Erere arato, munta sribire Kristo ara jire krāke raba ruen munye, kākwe mun bkānkā mika ūtiāte jae amne munkwe jūrā ngwian era metre, munkwe Kristo mikadre tāte ye kwrere.

⁶ Ye abko, űan mun bkānkā okwābti aibe munkwe sribi nuen kuin ja bā mikakāre kuin, akwa sribikā Kristokrā ye kwrere munkwe sribi amne Ngōbō tō dreye, ye erere munkwe nuen jōkrā ja tōi metrebti.

⁷ Ye abko, munkwe sribi ja di ngōi jōkrā mun bkānkā krāke, ye abko űan munta sribire ni kā nebtā krāke, akwa munta sribire ni Dānkien ara jire krāke munkwe nūtū, kākwe sribi kore,

⁸ űobtā űan angwane ni klaborē ya o klaborē űakare ya, akwa ni itire itire kākwe dre dre nuenbare kuin, ye abko ni Dānkien kākwe ūtiā biandi nie, ye abko raba gare metre munye.

⁹ Mdakāre abko, ni klaborē kāta sribire ja tōi kuinbti bkānkā krāke, ye kwrere jire mun mden mden kāta ni klaborē bkāne ye kākwe sribi ūkadrete ja tōi kuinbti krāke. Amne munkwe űan rātākā mikakāre ene, űobtā űan angwane mun amne niaratre abko tā sribire ni Dānkien itibe krāke. Ni Dānkien ye abko tā kā kāinbti amne niara abko krāke ni ūtiāte ja kwrere jōkrā.

Jāndrān jōkrā Satana rūere

¹⁰ Mtare mentokwāre abko ni Dānkien di kri, yehti munkwe nūna dite kōbō kwatirekwatire abko krōrō:

¹¹ Jāndrān jōkrā bianta Ngōbōkwe ja ngibiakrā ni rūe ngāniene, ye kite jabtā munkwe. Diablu ni ngōkaka kākwe kukwe mikaditbe mun rūere, ye ngwane mun rabadre nūnenkā dite jabtā diablu rūere, abkokāre kite jabtā munkwe,

¹² űobtā űan angwane űan nita rūre ni kā nebtā rūere, akwa ūai kāmekāme tā dikekā kabre kāinta sete abko di kri amne tā kā kāme iko kā jōkrābti kā nebtā dānkieni amne gobrane ni ngātāite nete abko rūere nita rūre.

¹³ Ne aisete jāndrān jōkrā bianta Ngōbōkwe ja ngibiakrā ni rūe ngāniene, ye den kisete munkwe amne kōbō te kukwe taretare jatadi mun nuente ja kāne, ye nāire mun rabadre nūnenkā dite jabtā mun rūebe, abkokāre munkwe ja mika juto biare rūkāre kore. Yehti munkwe nūnanka dite jabtā.

¹⁴ Ye aisete, nitre rūkā kāta koria mākete dime ja mrōkarabtā ja mikakāre biare rūkāre, ye kwrere munkwe kukwe era metre Ngōbōkwe mākāte jabtā rūkāre Satana rūere. Erere arato, nitre rūkā tā jāndrān ribi mike ja mātrābtā ja ngibiakrā, ye kwrere munkwe nūnandre era metre Ngōbōkrā ye abko kākwe mun ngibiadre mun rūe Satana ngāniene.

¹⁵ Mdakāre abko, nitre rūkā tā sandalia neketete kuin temen kite ja ngotobtā rūkāre, ye kwrere munkwe ja ngoto mika juto biare niken Ngōbō kukwei kuin Kristobtā ye niere ni mda mdaye. Ngōbō kukwei kuin Kristobtā, ye tā ni mike ja māketa jāme Ngōbōbe.

¹⁶ Akwa jändrän jökrä ja ngibiakrä yehti ta abko tödeka kwatibe Ngöböhti, ye abko munkwe dian kisete nitre rükä tä jändrän ribi ngwen kisete ja ngibiakrä, ye kwrere munkwe nuendre kore. Ye köböire abko üai kämekäme käkwe kukwe kämekäme kitadi buko jutra ngitiekä kwrere mun rüere angwane, munkwe kukwe käme ganaindi kwäräbe.

¹⁷ Amne munta dianintari, ye abko jändrän ribi mikata ja dokwähti ja dokwä ngibiakrä rüe ngäniene ye kwrere. Amne Ngöbö Kukwei abko tä ngitra kwrere Ngöbö Üaikwe. Ngöbö Kukwei yehti munkwe rü, nitre rükä tä rüre ngitrabti ye kwrere. Jändrän jökrä rükä ye munkwe dian kisete rükä jae diablu amne üai käme kwe ye rüere.

¹⁸ Erere arato, munkwe blita kärekäre Ngöböbe amne, Ngöbö Üai köböire munkwe ja di ribe Ngöböye amne munkwe jändrän kärä kärekäre ie arato. Erere arato, munkwe mokre käre jabti, akwa mun ñan rante blitare Ngöböbe, käkwe blita käre ben nitre deme deme kwe ye kräke.

¹⁹ Mdakäre abko, Ngöbö kukwei kuin Jesubtä nämänie tiebe ye abko tikwe niedre ño ño abko Ngöbökwä mikadre gare tie amne, kä jürä rabadre ñakare tibtä blitare, abkokäre munkwe blita Ngöböbe tikrä.

²⁰ Ngöbö kukwei kuin abko tikwe mikadre gare, abkokäre Ngöbökwä ti juani blitaka jakrä. Ngöbö kukwei ye mden dokwäre tita ngite kä teri nete mtare, akwa kä jürä ñan rabadre jire chi tibtä blite Ngöbö kukweibtä, abkokäre munkwe blita tikrä Ngöböbe.

Kukwe mrä

²¹ Mräkäre abko, Tiquico ni mräkä tare kri nikwe amne sribikä era metre ni Dänkienkwe abko tita juen nebe mun kanti yete. Tita ño nete amne tita dre dre nuene ye abko niarakwe niedi jökrä munye.

²² Erere arato, nunta ño nete ye niedre kwe munye abko käkwe kä mikadre juto munbtä, abkokäre tita juen nebe yete.

²³ Ngöbö ni Rün nikwe amne Jesukristo ni Dänkien käkwe ja mräkätre yete mika nüne jäme amne, munkwe ja taredre kwärikwäri tödekare kwärä kwatibe Ngöböhti abko ie ti tö.

²⁴ Amne nire nire kätä ni Dänkien Jesukristo tarere era metre kärekäre, ye abko kräke Ngöbö raba ja moto mike kuin arato. Abko kore se. Ne ngörä.

Tärä Tikani Pablokwe Nitre Filipobokrä Filipenses

Pablo käkwe tärä ne tikani angwane, niara nämane ngite kä teri juta Romate, kukwe kuin Jesubtä diri dokwäre. Ne nakaninkä ño abko tä tikani Hechos 28.14-31 yebtä. Akwa Pablo nikani Silas amne Timoteobe nebe juta Filipo kanti kukwe kuin Jesubtä mikakäre gare ietre angwane, ni kwati käkwe tödekani Jesubti. Ye abko tä tikani Hechos 16.12-40 yebtä. Abti niara nämane ngite nükani gare nitre tödekaka Jesubti nünanka juta Filipote yeye angwane, niaratre käkwe ngwian amne jändrän mda mda juani Pablo kräke ni iti kädian nämane Epafrodito köböire Pablo die mikakäre. Abtä Pablokwe tärä Filipenses ne tikani kuin niebare ietre.

Mdakäre abko, Pablo namani ja tare nike, akwa kä namani nuäre btä abko mikani gare kwe nitre nünanka Filipo yeye, ñobtä ñan angwane nitre tödekaka Jesubti nünanka yete nämane ja tare nike arato tödekabtä Jesubti. Jesukristo käkwe nünabare ño, käkwe bikabare tidrä ni mda mdabtä, ye kwrere nitre tödekaka Jesubti käkwe nünandre ja die mikadre kwärikwäri nünenkä dite Jesubtä abko Pablokwe niebare ietre.

Mdakäre abko, Pablokwe nitre tödekaka Jesubti mikani mokre nitre israelita ruärebtä. Nitre israelita ruäre nämane niken kukwe dirire blo Jesukristobtä abko ngäniene ja ngibiadre Pablokwe niebare ietre. Tödeka kwatibe Jesubti, aibe köböire ni ñan rabadre dianintari nitre israelita ne nämane dirire, akwa ñakare kore Pablokwe niebare, aisete ja ngibiadre kuin niebare kwe.

Pablota köbö kuin juen

¹ Ti Pablo käta tärä ne tike amne Timoteo tä tibe nete. Nun ne abko sribikä Kristo Jesukwe. Mun deme Ngöbökwä tä ketetibe Kristo Jesube juta Filipote amne mun ni Ngöbökwä jie ngwianka amne nitre ni mda mda die mikaka, ye kräke nunta köbö kuin juen.

² Ngöbö ni Rün nikwe amne ni Dänkien Jesukristo raba ja moto mike kuin munkrä amne mun mika nüne jäme kwetre, ie ti tö.

Pablota kuin niere Ngöböye ja di käräre kwärä

³ Ja mräkätre, munta nüke töre batire batire tie angwane, tita kuin niere Ngöböye munbtä.

⁴ Erere arato, tita blite Ngöböbe angwane, käta neme bäri nuäre tibtä blitare Ngöböbe mun jökrä kräke,

⁵ ñobtä ñan angwane munkwe tödekani kena Jesubti angwane, mun nikani ti die mike kukwe kuin Jesubtä kädriere abti kä nükebe mtare. Yebtä käta neme bäri nuäre tibtä blitare Ngöböbe mun kräke.

⁶ Ye abko, Ngöbökwä sribi kuin kömikanintbe munbtä, sribi ye abko niara ara käkwe ngwiandi bare jökrä nebe Kristo Jesu jatadita kä mrä köbö ye näire, ye abko gare kuin tie.

⁷ Tikwe töbikadre kore mun jökräbtä abko kuin ruen tie, ñobtä ñan angwane mun tare kri tikwe. Ngöböta ja moto mike kuin tikrä ti die mikakäre, ben gwaire munta ti die mike arato, aisete tita ngite mäkäninte kadenanbti kä teri ya o tita kukwe kuin Jesubtä ngie mike amne bä mike ütiäte gobran ngwärekre, akwa ye kanti munta ti die mike.

⁸ Ne aisete nikwe ni mda mda taredre ño abko Kristo Jesu tä mike gare tie, yebti tita mun jökrä tarere kri, ye abko gare kuin jökrä Ngöböye.

⁹ Ne abko, tita ja di ribere krörö Ngöböye munkrä: Mun tödekaka Jesubti käkwe ja taredre kwärikwäri amne ni mda mda taredre bäri mda munkwe arato köbö kwatirekwatire. Erere arato, Ngöbö rükadre gare bäri munye amne mun jatadre neme bäri töbtä Ngöböbtä, dre abko kuin Ngöbö ngwärekre rükadre gare bäri metre munye abko tita ribere Ngöböye munkrä.

¹⁰ Tita ribere kore Ngöböye, ñobtä ñan angwane kukwe rükadre gare kore munye, ye köböire dre dre ütiäte nünankrä bäri metre Ngöbökrä rükadre gare munye amne mun rabadre nüne kuin deme amne, ni mda mda ñan rabadre mun kite ngise nebebe Kristo jatadita ye näire.

¹¹ Ne abko munkwe nuendre angwane, mun rabadre nüne metre Ngöbö ngwärekre Jesukristo diebti, ye köböire Ngöbö rabadi käikitaninkä amne rabadi mikani ütiäte kri.

Kukwe kuin Jesubtä tä nüke gare ni kwatiye

¹² Ja mräkätre, mtare ti tö kukwe mda niei munye abko krörö: Kukweta nakenkä taretare tibtä, yebtä kukwe kuin Jesubtä kädrieta niken bäri janknu mentokwäre, ye abko rabadre gare munye abko krörö:

¹³ Tita ngite mäkäninte kadenanbti kä teri tödekabtä Kristobti, ye abko nükanina gare era metre nitre guardiare emperador gwiriete ie, amne ni kwati mda mda, ie nükanina gare arato.

¹⁴ Ti kitani ngite tä gare ti mräkätre tödekaka ni Dänkienbtiye nete, ye abko käta bäsi niaratre jökrä kite blite bäri mda kukwe kuin Ngöbökwé yebtä amne kä jürä ñakare btätre blitare.

¹⁵ Nitre ye ngätäite, ni ruäre tä kukwe kuin Kristobtä mike gare, akwa era metre tä mokrere tibe amne töita bikabtä kri tibtä, käta kukwe kuin Jesubtä mike gare ni mda mdaye. Akwa ni ruäre abko tä mike gare ja töi kuinbti.

¹⁶ Nitre ye tä ti tarere, aisete tätre kukwe kuin Kristobtä mike gare kore ja töi kuinbti, ñobtä ñan angwane Ngöbö ara jire käkwe ti mikani kukwe kuin ye ngie mikaka abko garera ietre.

¹⁷ Akwa ni tä mokrere tibe, ye abko tä kukwe kuin Kristobtä mike gare arato, akwa tätre bike kri au amne, ñan tä sribire ja töi metrebti. Tita ngite ne ngwane, niaratre töta kukwe mikaitbe bäri ti rüere, aisete käta näin kukwe kuin Jesubtä mike gare kore.

¹⁸ Akwa ye abko ñan mikata bäri ütiäte tikwe, ñobtä ñan angwane niaratre tä kukwe kuin Kristobtä mike gare töi kuinbti ya, ñakare ya abko tä dbe tikrä, ñobtä ñan angwane tätre kukwe kuin ye mike gare jirekåbe. Ye abko bäri ütiäte, aisete käita neme bäri nuäre tibtä.

Akwa kä rabadi bäri nuäre tibtä janknu,

¹⁹ ñobtä ñan angwane era metre tita ngite kä teri nete, akwa munta blite tikrä Ngöböbe amne Ngöböta Jesukristo Üai juen ti die mikakåre, aisete Ngöbökwé ti dianditari mrå abko gare kuin tie.

²⁰ Ti tädi kukwe ükatekä romanobo ngwårekre angwane, Ngöbökwé ñan ti tuadremetre Kristo Jesu rükente abko tita ribere ie. Erere arato, ti rabadre baliente, kåkwe Kristo mikadre tuare ütiäte kri ni kwati ngwårekre Ngöbö diebti abko tita ribere Ngöböye. Akwa kukwe ükatekä romanobo kåkwe ti tikadrete nünakåre janknu ya o ti juandre müre ketadre kwe ya, mden erere tä dbe tikrä,

²¹ ñobtä ñan angwane tita nire nünakåre Kristo aibe kråke, akwa ti müre ketadre ye abko rabadre bäri kuin tikrä.

²² Akwa ti tikadrete nünakåre janknu kä nebtä angwane, tikwe sribi kuinkuin nuendre bäri Ngöbökrå, aisete dre abko rabadre bäri kuin tikrä abko ñan nüke gare tie.

²³ Ye aisete, jändrän ketebu ne mden abko tikwe diandrekå jakrä abko tä neme tare tikrä töbke btå. Ti müre ketadre nitre romanobokwe tödekabtä Kristobti angwane, ti rikadre nüne Kristobe, ie ti tö bäri krübåte amne, ye abko rabadre bäri kuin tikrä.

²⁴ Akwa nitre romanobo kåkwe ti tikadrete nünakåre janknu kä nebtä abko bäri kuin munkrä ruen tie.

²⁵ Ti tikadite nünakåre janknu mun jökrå die mikakåre näin bäri metre Jesube amne, kä mikakåre nuäre munbtå tödekabtä Jesubti, ye kråke ti rabadi mun jökråbe abko gare kuin tie.

²⁶ Angwane ti rabadita bobuta munbe ketetibe angwane, ti käi rabadita bäri nuäre munbtå amne, munkwe Kristo Jesu käikitadikå, aisete ti rabadre tikaninte rabakåre bobuta munbe abko tuen bäri kuin tie.

Kukwe kuin Kristobtä bä mikadre ütiäte

²⁷ Akwa kukwe ketetibe bäri ütiäte nuendre munkwe abko ti bike niere krörö munye: Kukwe kuin Jesubtä rabadre ütiäte ni mda mda okwåte, abkokåre munkwe nüna kuin metre. Munkwe nüandre kore ne ngwane, ti rabadita ja tuenta munbe ya, ñakare ya, o tikwe ni kukwei nuadita munbtå jirekåbe, akwa kukwe krörökrörö rabadi gare tie: Mun tä nünenkä dite jabtå töi ketetibe jökrå, ye köböire munta ja die mike kwårikwåri kukwe kuin Kristobtä mikakåre gare bäri.

²⁸ Erere arato, munkwe ñan ja ngwian nikenkä mun rüe kåne, ñobtä ñan angwane niaratre tä rüere mun rüere, ye abko käta kukwe krörö mike gare: Niaratre juandi ngwarbe jökrå Ngöbökwé, ye abko tuen kuin btätre, akwa mun abko Ngöbökwé dianditari, ye abko tuen gare kuin munbtå arato.

²⁹ Ye abko, Ngöbö moto kuin, ye köböire munkwe tödekani Jesukristobti. Akwa ñan munkwe tödekadre jirekåbe bti, akwa Ngöbö moto kuinbti munkwe ja tare nikadre kråke abko kuin munkrä arato abko rabadre gare munye.

³⁰ Ye mden kisete mun amne ti, nita ja tare nike ja kwrere Jesukristo dokwåre mtare. Nita ja tare nike, ye mden kwrere tikwe ja tare nikani mun okwåbti ti nåma kena juta Filipote, ye kwrere tita ja tare nike nete abko kukwe nuata mda bati munkwe kore.

2

Nitre tōdekaka Jesubti kākwe nūnandre Jesu kwrere

¹ Ti mrākātre, munta ketetibe Kristobe, aisete ja motota neme ruen nuāre nuāre munye amne, Ngōbōta mun tarere, ye tā mun moto mike jāme. Erere arato, Ngōbō Ūai tā munbtā abko tā mun mike ketetibe jōkrā amne, mun ruentari tare Ngōbōye amne Ngōbōta ja moto mike jāme mun krāke abko gare tie.

² Ye mden kisete, munkwe kā mikadre bāri nuāre tibā, abkokāre munkwe nūna krōrō: Munkwe ja tōi mika ja nāre jōkrā. Munkwe ja tare ruāre kwārikwāri. Munkwe nūna jāme jōkrā jabe kwārikwāri. Erere arato, jāndrān ketetibe btā munkwe tōbika gwaire jōkrā.

³ Munkwe űan jāndrān nuen jire kaibe jakrā amne ja dikaikāre, akwa bika tidrā ni mda mdabtā amne ni mda mda mika bāri űitiāte jakrā.

⁴ Mdakāre abko, munkwe űan tōbika jāndrān kuinbtā kaibe jakrā akwa, munkwe tōbika jāndrān kuinbtā ni mda mdakrā arato.

⁵ Ye kwrere Kristo Jesu kākwe tōbikabare jabtā amne ni mda mdabtā amne nūnabare kore kwe, aisete ye kwrere munkwe tōbika amne nūna munkwe arato abko krōrō:

⁶ Kristo abko Ngōbō arabe arato, akwa rabadre űitiāte janknu Ngōbō kwrere, yebā abko űan namani tōbika kaibe jakrā amne namani ruentari tare űakare ie.

⁷ Ye mden kisete, Kristo abko Ngōbō arabe, akwa niara kāi űitiāte űitiāte kri abko mikaninte kwe ja tōi jenbtā, kākwe ja dikaibare űakare amne, ja mikani űitiāte űakare kwe abko krōrō:

Ni klabore kwrere jire nāmane kā nebtā. Erere arato, niara dārebare angwane, nāmane ni kā nebtā kwrere.

⁸ Mdakāre abko, niara namani tuen ni kā nebtā kwrere ni jōkrāye amne namani bike tidrā ni jōkrābtā, kākwe Ngōbō kukwei mikani tāte jōkrā amne ja biani mūre ketadre kwe Ngōbō kukwei mikakāre tāte metre.

Akwa űan mūre ketani nuāre,
akwa mūre ketani krūbāte krusobā.

⁹ Ye kwrere Jesukwe ja mikani űitiāte űakare.

Ye mdenbtā Ngōbōkwe mikani bāri űitiāte ni jōkrā amne jāndrān jōkrā bti ta amne, ni kāi bāri űitiāte abko Ngōbōkwe biani ie arato.

¹⁰ Ye mden kisete, Jesu ye ngwāre kri ni jōkrā amne jāndrān jōkrā kā kāinbti, kā temenbtā amne dobo tāni abko rabadi ngukudokwābti niara mikakāre űitiāte jae,

¹¹ Jesukristo abko Dānkien Ngōbō niedre ie angwane, Ngōbō ni Rūn rabadi mikani űitiāte kri arato.

Ngōbō kukwei mikadre tāte

¹² Ne aisete ti mrākātre tare tikwe, ti nāmane mun kānti juta Filipos yete angwane, kāre mun nāmane Ngōbō kukwei mike tāte, ye kwrere arato mtare tita mobe munye akwa, munta Ngōbō kukwei mike tāte bāri era metre. Akwa ni dianinantari Ngōbōkwe kākwe Ngōbō kukwei mikadre tāte űo, ye kwrere munkwe sribi Ngōbō kukwei mikakāre tāte jōkrā, Ngōbō mikare űitiāte kri kwārā, Ngōbōkwe mun dianinantari bā mikakrā metre.

¹³ Munkwe nuendre, űobā űan angwane Ngōbōta sribire munbtā mun tōi mikakāre biare sribi kuin nuenkāre amne, Ngōbōta sribire mun mikakāre dite sribi kwe ye ngwiankāre bare.

¹⁴ Jāndrān jōkrā nuenta munkwe, yebā munkwe űan űākā jabtā kwārikwāri amne, munkwe űan ja kweta kwārikwāri.

¹⁵ Munkwe nūnandre kore angwane, kukwe űan kwandre jire ni mda mdaye mun kitakrā ngise amne mun tōi amne mun moto rabadre metre abkokāre. Ye kwrere, munkwe nūnandre Ngōbō ngābriānkātre tōi kuin metre kwrere nitre moto kāmekāme amne diān ngātāite. Sō amne muke tā trā ngitiekā kā kāinbti deo, ye kwrere jire munta kā trā Ngōbōkwe mike tuare nitre kāmekāme amne diān diān ngātāite kā nebtā.

¹⁶ Ne aisete Ngōbō kukwei kuin kāta ni mike nūne kārekāre, ye munkwe ketate dime kisete niekāre ni jōkrāye. Munkwe nūnandre kore ne gwane, Kristo jatadita ye nāre mun kāi rabadi nuāre tibā, űobā űan angwane tikwe űan ngoto nikani ngwarbe sribire mun ngātāite abko tikwe gadi aisete.

¹⁷ Munta tōdeke Ngōbōbti abā munta sribi kuin nuene Ngōbōkrā. Ye abko, jāndrān kāmikata kukwadre Ngōbōye niara kāikitakakrā ye kwrere. Amne tita sribire mun ngātāite, ye dokwāre nane ti kāmikadre, ye gwane jāndrān biani kukwadre Ngōbōye, bti dō kekata, ye kwrere ti rabai Ngōbō ngwāre kri. Akwa ye abko Ngōbō moto mikakrā nuāre amne, ye kwrere jire tikwe mun kāi ngwianandre nuāre gwaire jabtā.

¹⁸ Ne aisete, munkwe kā ngwian nuāre gwaire jōkrā jabtā tibe ja tare nikabtā kore.

Timoteo amne Epafrodito juandi jötrö Pablokwe

¹⁹ Ja mräkätre, ni Dänkien Jesu tö, ne ngwane bä jötrö ti tö Timoteo juain nebe mun kánti yete, ñobtä ñan angwane niara rabadreta mun kánti angwane, kä rabadi nuäre munbtä niara tuare. Abti niara rükadreta kukwe ngwenante kuin munbtä tie, ye abko kákwe kä mikadre nuäre tibtä arato, abkokäre tikwe juandi.

²⁰ Tikwe Timoteo juandi, ñobtä ñan angwane tita mun tarere metre, ye kwrere Timoteo aibe käta mun tarere, aisete tikwe niara juandi mun kánti mun die mikakäre.

²¹ Ni kwati mda abko käta töbike jändrän jakwebtä au, akwa Kristo Jesu tö dreye, yebtä töbikata ñakare kwetre.

²² Akwa Timoteo abko käta nüne metre, ye garera mun jökräye, ñobtä ñan angwane ni ngobo nikwe käta ni die mike ño sribibtä, ye kwrere jire Timoteokwe ti die mikani kukwe kuin Jesubtä mike gare ni mda mdaye, ye garera munye arato.

²³ Ne aisete kukwe rabai ño tikrä nete gadi tikwe angwane, tikwe Timoteo juandi nebe mun kánti yete.

²⁴ Amne ti abko tä ngite kä teri nete, akwa ti Dänkien Jesu diebti, bä jötrö ti tikadrete angwane, ti näin nebe mun kánti arato abko tita nütüre.

²⁵ Akwa gwängwarbe abko, ti mräkä Jesu käbti Epafrodito, sribi muko tikwe amne ti die mikaka tikwe, ye abko munkwe juani ti die mikakrä nete abko ti bike juenta nebeta mun kánti.

²⁶ Niara abko tä ulire mun miare amne, niara namani bren abko gani munkwe, yebtä abko bäri tä töbike kri mda.

²⁷ Epafrodito abko namani bren jume bkänä amne bäsi krütani akwa, namani ruentari tare Ngöböye, aisete Ngöbökwé mikaninta quinta amne krütani ñakare. Tita ulire nete, ne bärire ti ñan rabadre ulire mda, abkokäre ti namani ruentari tare arato Ngöböye niarabe gwaire, aisete niara krütani ñakare.

²⁸ Ye mdenbtä abko, tita niara juenta jötrö ngwarbe nebeta mun kánti, kä rabadreta nuäre munbtä niara tuareta abkokäre amne, ti ñan tädre töbike kri janknu arato, abkokäre tita juenta.

²⁹ Ne aisete kä raba nuäre munbtä niara kare ngäbti ni mräkä nikwe kwrere ni Dänkien käbti. Ye kwrere arato, ni Epafrodito ne kwrerekwrere, ye abko munkwe mika ütiäte jökrä arato,

³⁰ ñobtä ñan angwane Epafrodito bäsi krütani sribibtä Kristokrä amne, ja kwata namani ruentari tare ñakare ie angwane, bäsi krütani sribibtä tikrä, sribi ñan rabadre bare jire munye tikrä, mden abko niara nämane nuene, abtä ja bren nikani kore kwe.

3*Dre nuenta ja di jenbti abkobtä bikadre kri ñakare*

¹ Ti mräkätre tikwe, munkwe ni Dänkien käi ngwian bäri nuäre jabtä. Ti bike kukwe niere munye, ne kwrere tikwe tikanina munye akwa, tare ñakare tikrä tiketa mda munye, ñobtä ñan angwane kukwe ne kuin mun die mikakrä mun rüe ngäniene ruen tie, aisete tita tiketa munye.

² Ja mräkätre, nitre israelita käta Kukwe Biani Ngöbökwé Moiséye nuendre nie mikamna täte munye amne, käta ja ñäräkrä mikamna ja kwatabtä munye, ye ngäniene munkwe ja ngibia kuin, ñobtä ñan angwane niaratre abko ni ngututu kämekäme krübäte amne niaratre abko sribi diän diän nuenkä amne niaratre abko ni kwata tikakaka ngwarbe, aisete nitre ye ngäniene munkwe ja ngibia kuin.

³ Näräkrä mikata ja kwatabtä, ye abko käta ni jen Ngöbökwé era metre bä mike nieta kwetre. Akwa ye abko ñakare metre, ñobtä ñan angwane ni abko ni jen Ngöbökwé era metre gare krörö nie: Nita sribire Ngöbökrä amne nita niara käikitekä Ngöbö Üai köböire amne, nita Kristo Jesu aibe bä mike ütiäte kri. Erere arato, jändrän tuen ni ngrabarebtä, yebti nita tödeke ñakare amne jändrän nuenta au jakrä abko ni ñan tö bä mikai ütiäte kri, aibehti ni ne mden abko ni jen Ngöbökwé era metre gata nibtä.

⁴ Akwa ti tö rabadre ja bä mikai ütiäte kri ne ngwane, jändrän nuenta au jakrä, yebti ti rabadre ja bä mike ütiäte kri ruen tie.

Nitre ye abko tä jändrän nuene au jakrä ja mikakäre metre Ngöbö okwäte, ja bä mikakäre ütiäte kri. Akwa ti bäri kákwe kukwe nuenbare kuin täte abti ja rabadre ruen ütiäte kri tie abko krörö:

⁵ Ti därebare angwane, kwäirare ti ñäräkrä mikani ti kwatabtä amne, ti abko israelita, amne ti därebare juta Benjamínkri amne ti abko hebreo era metre. Erere arato, ti nämane nekete nitre bariseokri, aisete kukwe biani Ngöbökwé nuendre nie, ye abko ti nämane mike täte bäri metre nitre bariseo kwrere.

⁶ Ne aisete Kukwe Biani Ngöbökwé Moiséye nuendre nie, yehti ti nämáne mokrere krübáte, aisete nitre tödekaka Jesubti abko rüere ti nämáne näin kisere mikakäre ja tare nike. Erere arato, Kukwe Biani Ngöbökwé Moiséye nuendre nie, ye erere ti nämáne mike täte bäri, aisete ti nämáne nüne bäri metre, ni mda mda nämáne nütüre tibtä, aisete ti bäri käkwe ja bä mikadre ütiäte kri.

⁷ Akwa Kristo rabadre mikani kri ti köböire, abkobtä jändrän jökrä nämáne ütiäte kri kena tikrä, ye abko tuen ütiäte ñakare tie mtare.

⁸ Ne bärire mda abko, ti Dänkien Kristo Jesu rükadre gare bäri kuin tie ne abko bäri ütiäte tikrä. Ye mden kisete, jändrän jire jökrä mda mda, ye tuen ütiäte ñakare tie ti Dänkien kwrere, aisete niara kräke tikwe jändrän jökrä tuanimetre ja jiebti. Jändrän jökrä ye mden abko tuen jändrän ngwarbe rä kure kwrere tie, aisete tita mikete, ti Dänkien Kristo Jesu rükadre gare bäri kuin tie amne,

⁹ ti rabadre nüne bäri ketetibe Kristobe abkokäre. Tikwe ja töi mikani Kukwe Biani Ngöbökwé Moiséye ye mike täte, akwa ñan ye köböire ti ngite ñakare mda Ngöbökwé niebare tibtä amne ti kani ngäbti kwe, akwa tödeka kwatibe Jesubti, ye aibe köböire ti ngite ñakare mda Ngöbökwé niebare tibtä amne ti kani ngäbti kwe.

¹⁰ Erere arato, Kristo rükadre gare metre ta tie, ie ti tö abko krörö: Ja di krihti Ngöbökwé Kristo mikaninta nire, niara di ye abko ie ti tö jakrä arato nünankrä Kristokrä. Erere arato, niarakwe ja tare nikani ño, ye kwrere ti tö ja tare nikai arato ni mda mda ngwiankäre Ngöböye. Ne kwrere arato, niarakwe ja biani müre ketadre ni mda mda kräke, ye kwrere ti tö ja biain müre ketadre ni mda mdakrä arato amne,

¹¹ Ngöbökwé ti mikadita nire niara kwrere, ie ti tö, abkokäre ti tö nünai bäri ketetibe Kristobe.

¹² Nebtä abko ñan ti nena jändrän jökrä ye bkäne, tita niere. Erere arato, Ngöbökwé ni mikadi era metre kä kämbti, ye erere ti nena era metre ñan tita niere, akwa drekäre Kristo Jesukwe ti käräbare käne, ye aiebtä ti töita, aisete ye jiebti tita nakwen ja di ngöi jökrä.

¹³ Ti mräkätre, ne ñan ti nena jändrän jökrä bkäne täte jökrä ja di jenbti abko tita niere, akwa jändrän ketetibe btä tita ja töi mike kwatibe abko nere: Jändrän känekäne namani tie abko tita käikwitekä jabti, amne jändrän kuin tä ti käne Ngöbökwé abko jiebti tita nakwen janknu ja di ngöi jökrä.

¹⁴ Ne abko jändrän kuin kä kämbti biandre tie Ngöbökwé Kristo Jesu köböire abko erere ti rabadre bkäne, abkokäre Ngöbökwé ti käräbare nüne kä kämbti ben, aisete tita nakwen kisere jiebti.

¹⁵ Ye abko, nire nire nena ünän tödekabtä Jesubti abko käkwe töbikadre ja kwrere jökrä tibe. Akwa kukwe mda tärä, btä mun ruäre ñan tä töbike ti kwrere ne ngwane, töbikadre ño abko Ngöbökwé mikadi gare munye arato.

¹⁶ Akwa nikwe nünandre ño Ngöbö ngwäreki nena gare nie, ye kwrere nikwe nünandre.

¹⁷ Ti mräkätre, nikwe nünandre ño abko erere tikwe nünanba mun okwäbti, ye kwrere mun jökrä käkwe nüna. Erere arato, nunkwe nünabare ño mun okwäbti, ye kwrere ni mda mda tä nüne ya abko munkwe mika ñäräre kuin abko erere munkwe nüna arato.

¹⁸ Tita niere kore, ñobtä ñan angwane ni ruäre abko ñan tä nüne kore. Ye mdenbtä tikwe blitabarera bäre bäre munbe akwa, müare kwärä ti tö nieita bobuta munye abko krörö: Kristo krütani krusobtä ni kräke abko nire nire këta mike ngwarbe jae ni jökrä okwäbti,

¹⁹ yehtä abko Ngöbökwé gadikä jökrä amne, jändrän nuenta käi ngwandre nuäre jabtä kwetre, aibe jiebti tä nakwen. Erere arato, kukwe kämekäme nuenta kwetre abtä rabadre ja gaire kwrere akwa, abkobti jata nebe ruen bäri ütiäte kriki ietre. Jändrän kä nebtä aiebtä tätre töbike.

²⁰ Akwa ni abko kä kämbti bkänkä, aisete ni kä kämbti bkänkä käkwe nünandre ño, ye kwrere nikwe nünandre amne, ni Dänkien Jesukristo ni Diantarikä tä kä kämbti jatadita abko ngibiata ngäbti nikwe.

²¹ Angwane ni ngrabare ngwarbe ne abko niarakwe kwitadi kuin bä nuäre niara ngrabare kwrere. Ye abko nita ngibiare amne, Jesukristo di kri jändrän jökrä mikakäre ja ngoto täni ye käkwe ni ngrabare kwitadi jökrä kore ja di krihti.

4

¹ Ne aisete ti mräkätre, munkwe nünanka dite ni Dänkienbtä abko tita niere munye. Mun tare kri tikwe. Ti tö ja tuaita kri munbe amne, mun abko tä sribi ütiä kwrere tikwe, ye abko këta kä mike nuäre kri tibtä ti mräkätre.

Pablota kukwe ükete Evodia amne Síntique kräke

² Angwane Evodia amne Síntique abko käkwe ja mëkäta ni ja mräkäre kwrere ni Dänkien këbti abko ti tö ribei kisere ietre.

³ Amne ma sribi muko tikwe abko kākwe ni ngwai nibu ye die mika ja māketa abko tita ribere mae, ñobtä ñan angwane nun nämane sribire Clementebe amne sribikä mda mda nämane sribire tibe arato angwane, ti ngwai nibu ye kākwe sribibare kri gwaire nunbe kukwe kuin Jesubtä ye mikakäre gare, aisete makwe die mika, ie ti tö. Mun abko kākwe nünandi kärekäre kä käinbti, ye erere mun käi nena tikani jökrä täräbtä Ngöbökwé.

Pablota ni jökrä kite nüne bäri Ngöbö kräke

⁴ Ti mräkätre, käre munkwe ni Dänkien käi ngwian bäri nuäre jabtä. Käre munkwe käi ngwian bäri nuäre jabtä tita niereta mda munye.

⁵ Mun abko moto jämé ni mda mdakrä, ye rüka gare ni jökräye munbtä. Ni Dänkien nükerate ja ken,

⁶ aisete munkwe ñan töbika ngwarbe dikaro, akwa munkwe blita Ngöböbe jakrä amne, kukwe jökrä mike gare ie munkwe amne, ja di käräre kwärä munkwe kuin nie Ngöböye arato.

⁷ Munkwe nuendre kore angwane, Ngöbökwé kä jämé jakwe mikadi mun motobtä. Kä jämé Ngöbökwé abko ñan rükadre gare jire ni kä nebtäye. Kä jämé biandi Ngöbökwé munye, ye kākwe mun moto amne mun töi ngibiadibiti kuin Kristo Jesu köböire, munkwe ñan töbikadre dikaro ngwarbe abkokäre.

⁸ Ti tö kukwe niei mrä munye ti mräkätre abko krörö: Kukwe era amne kukwe ütiäte, yebtä munkwe töbika. Erere arato, kukwe kuin amne dre abko deme Ngöbö ngwärecri, yebtä munkwe töbika. Amne kukwe mden bä nuäre nuäre amne kukwe mden tuen kuinkuin, yebtä munkwe töbika. Erere arato, jändrän jökrä kuinkuin amne jändrän kuin kä ngwiankrä nuäre jabtä Ngöbö ngwärecri, yebtä munkwe töbika.

⁹ Angwane tikwe kukwe diriba ño munye, tikwe mun töi dianba ño ño amne munkwe ti kukwei nuaba blite ño ño amne munkwe ti tuaba dre dre nuene, ye kwrere munkwe nuen janknu. Tita jändrän nuemna munye, ne kwrere munkwe nuendre ne ngwane, Ngöbö moto jämé ye tädi käre munbe.

Jändrän juani Pablo die mikakrä, btä Pablota kuin niere

¹⁰ Tita ti Dänkien käi ngwen bäri nuäre jabtä, ñobtä ñan angwane ti nukani töreta munye, kākwe ti die mikaninta. Ne abko ñan ti käikwitaninkä jabtä munkwe abko tita niere akwa, kä raire munkwe ngwian juandre nireye tikrä ñan namani nuke gare munye, aisete mun nämane ti die mike ñakare, akwa mtare munkwe ti die mikaninta.

¹¹ Tita kukwe niere kore munye, ye abko ngwian amne jändrän ñakare tikwe, abtä tita niere kore akwa, ti abko kwe jändrän ño ño tädrera abko rabadre dbé tikrä abko garera tie.

¹² Nüna gare bobre tie amne nüna gare jändrän kabrebe tie. Arato, nünandre ño erere, kräke tita biare, ne abko garera tie, aisete ti tädre trine ya, ti tädre mröi ya abko btä tita töbike ñakare dikaro akwa, käta neme nuäre tibtä. Erere arato, jändrän tärä kabre tie ya, ñakare ya, yebtä tita töbike ñakare dikaro, akwa käta neme nuäre tibtä.

¹³ Kristo ti die mikaka, köböire ti raba jändrän jökrä nuene.

¹⁴ Akwa munkwe ti die mikani ja tare nika kanti nete, kākwe ngwian juani ti die mikakäre, ye abko bäri kuin ruen tie.

¹⁵ Ti nämä Macedonia munbe, bti tikwe kä mikateba, kä rikaba kukwe kuin Jesubtä mike gare kä mdate angwane, mun Filipobo kākwe tödekani krire Jesubti, akwa nitre gätäkä Jesu käbti kä Macedoniate, ye ngätäite mun aibe kākwe ti die mikaba.

¹⁶ Mdakäre abko, ti nämä juta Tesalönicate angwane, mun aibe kākwe ngwian juanba bäre bäre ti die mikakäre.

¹⁷ Ne abko ñan munkwe jändrän juandre bäri ngwarbe mda tikrä abko tita niere akwa, mun rabadre jändrän bkäne bäri mda Ngöbö ngwärecri abko ie ti tö, käta niere kore munye.

¹⁸ Ngwian amne jändrän jökrä bianta tie munkwe abko tikwe kani ngäbti, aisete jändrän tärä täte tikwe mtare. Mdakäre abko, munkwe ngwian biani Epafroditoye ngwianre tikrä abko niara nukani ngwena tie amne, jändränä bäri kabre tikwe mda. Ne aisete munkwe ngwian juani tikrä, ye abko namani kuin Ngöbökrä amne, jändrän rä bäne bianta Ngöbökrä nitre israelitakwe abko käi namani nuäre Ngöböbtä, abko erere käi namani nuäre Ngöböbtä käre ngäbti arato.

¹⁹ Ye abko, Kristo Jesu di kri jändrän jökrä bkäne, ye köböire jändrän ñakare munkwe abko Ngöbö tikwe kākwe biandi munye.

²⁰ Amne Ngöbö ni Rün nikwe aibe raba käikitaninkä kärekäre. Ne abko raba bare kore. Amen.

²¹ Mräkäre ti mräkätre, nitre nünanka deme deme Ngöbökwé tä juta Filipote, ie munkwe köbö ngwiantari tikrä amne, ti mräkätre tödekaka Jesubti tä tibe nete käta köbö kuin juen ja mräkätre yete kräke arato.

²² Erere arato, nitre deme deme Ngöbökwe tä nete käta köbö kuin juen mun jökrä kräke akwa, jä mräkätre sribikä emperador romanobokwe abko häri tä köbö kuin juen munkrä.

²³ Ni Dänkien Jesukristo käkwe ja moto mika kuin mun jökrä kräke. Abko kore se. Amen. Ne ngöra.

Tärä Tikani Pablokwe Nitre Colosabokrä Colosenses

Pablo käkwe tärä ne tikani angwane, niara nämane ngite kä teri juta Romate kukwe kuin Jesubtä diri dokwäre. Ne nakaninkä ño abko tä tikani Hechos 28.14-31 yebtä. Pablo ara käkwe kukwe kuin Jesubtä diribare ñakare juta Colosa yete. Ni iti kädian nämane Epafras käkwe mikani gare ietre. Abti Pablo nämane ngite kä teri juta Romate angwane, Epafras nikani basare ie, ye angwane kukwe kri Colosa kánti, niebare kwe ie.

Pablokwe tärä ne tikani rükäre Ngöbö kukwei kuin Jesubtä ye dokwäre, ñobtä ñan angwane ni ruäre juta Colosa yete kä namani kukwe dirire blo Jesukristobtä abko Epafras käkwe niebare ie. Ngöbökwe jändrän jökrä dätebare ñakare Jesukristo köböire abko nitre dirikä blo nämane niere. Erere arato, Ngöbö ñan nämane nüne täte jökrä Jesukristobtä abko nitre dirikä blo nämane niere. Ye kwrere abko nitre dirikä blo nämane Jesukristo bä mike ütiäte ñakare. Jesukristo täte abko nitre tödekaka Jesubti käkwe kukwe ütiäte nitre israelitakrä ye mikadre ütiäte jae abko dirikätre blo nämane niere.

Kukwe ye dokwäre Pablokwe tärä ne tikani. Ngöbökwe Jesukristo mikani ni jökrä amne jändrän jökrä bti ta, aisete niara aibe di tärä ni diantarikrä täte jökrä abko Pablokwe niebare. Erere arato, kukwe diribare ni kä nebtäkwe, ye abko ngwarbe amne di ñakare jire chi ni diantarikrä, niebare kwe ietre. Mdakäre abko, nikwe nünandre ño Ngöbö ngwärekri, yebtä Pablokwe diribare arato.

Pablota köbö ngwentari

¹⁻² Ti Pablo käta tärä ne tike. Ngöbö tö namani ti mikai Jesukristo kukwei ngwianka abko erere tita sribire kräke. Ti ne mden käta köbö kuin juen ti mräkä Timoteo ben gwaire mun nünanka juta Colosate ye kräke. Mun abko juta deme Ngöbököwe amne mun ti mräkätre tä nüne era metre Kristokrä. Ngöbö ni Rün nikwe raba ja moto mike kuin munkrä amne mun raba nüne jame niara diebti, ie ti tö.

³ Nunta blite Ngöbö ni Dänkien Jesukristo Rün yebe angwane, käre nunta kuin niere munbtä Ngöböye,

⁴ ñobtä ñan angwane munta tödeke Kristo Jesubti amne, juta deme Ngöbököwe abko munta tarere jökrä arato, ye abko nunkwe kukwe nuaba, abtä nunta kuin niere Ngöböye.

⁵ Munta nüne kore, ñobtä ñan angwane kukwe kuin era metre Jesukristobtä diribare munye abko munkwe kukwei nuani angwane, jändrän kuinkuin nämane ükani kä käinbti mun kräke, ye abko nükani gare munye abkobti munta tödeke, käta nüne kore.

⁶ Kukwe kuin Jesukristobtä, yebti bäri ni kwati tä tödeke kä jökräbti temen. Ye kwrere arato kukwe kuin Jesukristobtä, ye munkwe kukwei nuani mun kánti yete angwane, ni kwati käkwe tödekani Jesubti amne Ngöböta ja moto mike kuin era metre ni kräke, ye nükani gare munye.

⁷ Kukwe kuin Jesukristobtä ye abko nun mräkä Epafras tare nunkwe käkwe diribare munye. Epafras ye abko sribi muko nunkwe. Niara abra sribikä era metre Kristokwe abko tä sribire munbe yete.

⁸ Epafras ye mden abko rükaba kukwe ngwena nunye abko köböire munta ja tarere ño kwärikwäri Ngöbö Üai köböire abko nunkwe gaba.

⁹ Nunkwe kukwe gaba kore munbtä, ye näire mentokwäre käre nunta blite Ngöböbe munkrä, Ngöbö tö dreye munkrä, ye erere mikadre gare täte jökrä kwe munye abko tita ribere ie. Jändrän jökrä Ngöbököwe, yebtä mun mikadre töbtä kwe amne mun rabadre töi ngitiekä kuin Ngöbö Üai köböire abko tita ribere munkrä Ngöböye.

¹⁰ Amne munkwe nünandre kuin metre ni Dänkien mikakäre ütiäte ni jökrä ngwärekri amne, käre jändrän tuen kuinkuin ni Dänkienye abko erere mun rabadre nuene niara moto mikakäre nuäre abko krörö: Mun rabadre sribi kuinkuin nuene kabre amne Ngöbö rükadre gare ño metre, yebtä mun rabadre töi ngitiekä bäri, ie ti tö, käta kukwe ribere kore Ngöböye.

¹¹⁻¹² Erere arato, Ngöbö di kri bä nuäre, yebti Ngöbököwe mun mikadre dite kri, munkwe ja tare nikadre angwane, mun rabadre nünenkä dite jabtä bätäreka abkokäre. Erere arato, kä tädre bäri nuäre munbtä, käkwe kuin niedre ni Rün Ngöböye, abkokäre ja di kri bä nuäre, yebti Ngöbököwe mun mikadre bäri dite nünakäre kore niarakrä abko tita ribere ie munkrä. Juta deme Ngöbököwe, kräke Ngöböta jändrän kuinkuin ngibiare kä käinbti, ye abko biandi kwe munye arato, abkokäre mun mikanina juto biare kwe jändrän ye kaen ngäbti kä trä ngwente kä käinbti juta deme Ngöbököwe ben gwaire.

¹³ Ni nämane nüne kä ikote Satana ngoto täni, akwa ye ngäniene Ngöbökwe ni dianintari amne Kristo niara Odei tare kri kwe, ye ie ni mikani gare kwe. Mtare niara Odeita gobrane nibti.

¹⁴ Ngöbö Odei ye köböire abko Ngöbökwe ni kökanintarita, käkwe kukwe kämekäme btä ni nämane ngite ye dianinkä jökrä nibtä mento.

Kristo abko bäri ütiäte jändrän jökrä bti ta

¹⁵ Ngöbö abko tuen ñakare, akwa Kristo abko ja kwrere Ngöböbe amne nünabare kä nebtä kwe angwane nikwe tuani. Kristo abko Ngöbö Odei mubai amne jändrän jökrä date ngämi, känenkri Kristo nämanena. Niara abko Ngöbö Odei mubai amne jändrän jökrä Ngöbökwe abko niara kräke.

¹⁶ Niara köböire Ngöbökwe jändrän jökrä käinta amne tementa datebare. Amne jändrän tuen nie amne jändrän tuen ñakare nie abko datebare kwe niara köböire. Erere arato, üai jökrä tä dänkiene käta gobrane ja di kribti abko Ngöbökwe datebare niara köböire arato. Jändrän jökrä namani datebare kore niara köböire amne niara kräke arato.

¹⁷ Jändrän jökrä date ngämi, känenkri Kristo nämanena amne niara diebti jändrän jökrä tä neketaninte amne ñan tä niken ngwarbe.

¹⁸ Mdakäre abko, ni jökrä tödekaka Kristobti abko Kristo ngrabare kwrere amne Kristo abko tä niaratre dokwäre. Erere arato, Kristo abko nämanena kena amne, ni krütanikrütani ye ngätäite niara ara nukaninta nire käne, niara rabadre bäri käne jändrän jökrä amne ni jökrä bti ta abkokäre.

¹⁹ Kä namani nuäre Ngöböbtä nünakäre täte jökrä Kristobtä

²⁰ amne Kristo köböire abko Ngöbökwe jändrän jökrä kä temenbtä amne kä käinbti käräbare ja mäketä jabe. Ye abko Kristo krütani krusobtä angwane, däräie nimianinte, ye köböire Ngöbö moto namaninta jäme ni kräke, käkwe ja mäkaninta nibe.

²¹ Angwane mun abko nämane mente Ngöböye amne mun töi nämane ja rüere Ngöböbe, ñobtä ñan angwane mun nämane kukwe kämekäme nuene Ngöbö rüere.

²² Akwa Kristo käkwe ja tare nikani, krütani era metre krusobtä angwane namani ngwäkäre, ye köböire abko Ngöbökwe ja mäkaninta munbe, mun mikakäre deme, käme ñakare amne ngite ñakare ja ngwäreki.

²³ Akwa munkwe nünandre kore Ngöbökrä, abkokäre munta tödeke kwatibe, yebtä munkwe nünanka dite jabtä. Kukwe kuin Jesukristobtä, ye köböire Ngöbökwe jändrän kuin köböi mikani nie, yebtä mun ñan rika bätärekä bätärekä mento. Kukwe kuin Jesukristobtä ye mden abko munkwe kukwei nuani amne diribarera ni kwatiye kä jökräbti temen amne ti Pablo ne abko Ngöbökwe mikani kukwe kuin dirikä siba.

Pablota sribire ño

²⁴ Mdakäre abko, kukwe kuin Jesubtä tikwe mikaba gare munye abko dokwäre tita ja tare nike munkrä mtare, ye abko käi nuäre kri tibtä. Ye abko, nitre gätäkä Jesu käbti abko Kristo ngrabare kwrere, ye kräke ja tare nika Kristokwe rabadre bare täte ti ngrabare nebti, ie Kristo tö namani.

²⁵ Nitre tödekaka Kristobti, ye kräke Ngöböke ti mikani sribikä amne Ngöböke sribi mikani ti kisete, ye abko ti rikadre Ngöbö kukwei kuin Jesubtä ye mike gare täte jökrä munye, abkokäre sribi ye biani kwe tie.

²⁶ Ni kwati käkwe nünabare ja täritäri kira abti kä nüke mtare abko okwä bäre kukwe kuin ne nämane ükani kaibe tiebe Ngöböke, akwa mtare juta deme Ngöböke, ye ie Ngöböke kukwe tiebe ye mikanina gare.

²⁷ Amne juta deme Ngöböke nitre ñakare israelitare ngätäite, ie Ngöböke jändrän kuin bä nuäre ütiäte kri mikani gare. Kristo tä nüne munbtä mtare, ye mden abko nämane ükani tiebe Ngöböke kira, akwa mtare tä nüne munbtä, ye köböire abko mun näin nüne kä nuärete Ngöbö kanti, ye abko gare nie.

²⁸ Ne aisete nunta niken mdente erere, kanti nunta kukwe kuin Kristobtä mike gare ni jökräye. Erere arato, nun namani töbtä Ngöbö köböire, yebtä nunta maträre ni jökräbti amne nunta dirire ietre, ye köböire abko nun rikadre ni jökrä ngwena nebe Ngöbö ngwäreki ünän täte jökrä Kristo köböire.

²⁹ Ye rabadre bare, abkokäre Kristo diebti tita sribire krübäte. Kristo di kri ye abko tä ti die mike sribi ne nuene.

2

¹ Ye abko, mun kräke tita sribire tare krübäte abti tita naente amne ja mräkäre nünanka känime juta Laodiceate amne ja mräkä mda mda ie ti gare ñakare metre abko kräke tita sribire tare kri kore abko rabadre gare munye, abkokäre tita niere.

² Tita sribire kore, ye köböire abko ja rabadre ruen dite mun jökräye amne mun töi rabadre kwatibe ja tarere kwärikwäri, ye köböire abko kukwe Kristobtä nämane tiebe kaibe Ngöbökwé, ye abko rükadre gare metre täte jökrä munye, mun rabadre tödeke metre niarabti, abkokäre tita sribire kore munkrä.

³ Kukwe ütiäte kri amne kukwe töbtä amne kukwe ja töikrä, ye abko tä jökrä Kristokwe abko kwandi nie.

⁴ Amne ni mda mda jatadre mun kanti blite nuäre nuäre kukwe mdabtä, ye käkwe ñan mun ngökadre, abkokäre tita kukwe niere kore Kristobtä munye.

⁵ Ti abko tä ñakare ketetibe munbe yete bkänä, akwa ti töi tä ketetibe munbe amne, nünandre ño Kristo kräke abko erere munta nüne era metre amne, munta nünenkä dite jabtä, käta tödeke kwatibe Kristobti, ye abko käi nuäre kri tibtä.

Kukwe ükaninte ja mikakrä metre Ngöbö ngwäreki abko nikwe ñan mikadre täte

⁶ Ne aisete munkwe Jesukristo kani ngäbti ño ja Dänkiene, ye kwrere munkwe nuna janknu ketetibe ben.

⁷ Amne kri ngätri tä niken mente dobote nguse käta kri mike dite, ye kwrere munkwe ja töi mika kwatibe Kristobtä. Erere arato, ju mikata angwane, ürä nökata mente nguse abko kwe juta nebe dite, ye kwrere munkwe nuna ketetibe Kristobe tödekakäre kwatibe niarabti. Ngöbö Kukwei diribare ño ño munye abko erere munkwe mika täte. Angwane munkwe kuin nie kärekäre Ngöböye.

⁸ Mdakäre abko, munkwe mokre jabti, ñobtä ñan angwane ni ruäre tä näin kukwe ngwarbe dirire. Kukwe mikanintbe ngwarbe kira abko tätre dirire amne, kukwe ye tä kite üai käme di kri käta gobrane kä nebtä yekri abko tätre dirire mun ngökakäre, aisete munkwe ñan ja ngwian nain ietre,

⁹ ñobtä ñan angwane Kristo jatani nüne ni kwrere amne ngrabare tä abko btä Ngöbö ara jire tä nüne täte jökrä.

¹⁰ Munta ketetibe gwaire Kristobe, aisete jändrän jökrä Ngöbökwé tä munkwe amne munta jändrän jökrä Ngöbökwé mdei nike ñakare jire chi. Kristo abko tä üai käme di krikri dänkiene amne tä angeletere di krikri dänkiene arato.

¹¹ Mdakäre abko, ñäräkrä mikata ngäbäkäre kwatabtä angwane, ngäbäkäre kwata diankata btä, ye kwrere arato munkwe tödekani Kristobti angwane, mun namani mikani ketetibe ben. Ye ngwane Kristo köböire kukwe kämekäme mdei nämane munye, ye abko dianinkä mento kwe munbtä.

¹² Erere arato, mun ngökani ñöte Jesu käbti angwane, mun namani doboi mikani ketetibe gwaire Kristobe bä mikata, akwa Ngöbökwé Kristo mikaninta nire ja di kribti, yebti munkwe tödekani angwane, Ngöbökwé mun mikaninta nire Kristobe gwaire arato.

¹³ Ye abko, käne mun nämane kukwe nuene kämekäme Ngöbö rüere amne, kukwe kämekäme mdei munye, ye Ngöbö ngämi denkä mento munbtä angwane, mun nämane ni ngwäkäre kwrere Ngöbö ngwäreki. Akwa mtare Ngöbökwé mun mikaninante nire Kristo ben gwaire, käkwe mun ngite dianinkä jökrä mento munbtä.

¹⁴ Ye abko, ni nämane nüne Ngöbö rüere, abtä kukwe nämane ükaninte ni rüere, kä nämane ni ngite Ngöbö ngwäreki niere, ye abko Ngöbökwé metani krusobtä käin Kristo ben gwaire. Ye mden kisete Kristo krütani angwane, kukwe nämane ni ngite niere, ye Ngöbökwé juani ngwarbe Kristo ben gwaire, aisete namani ütiäte ñakare mda.

¹⁵ Erere arato, üai kämekäme dite krikri bti nämane gobrane, ye abko Ngöbökwé di dianinkä jökrä kän. Kristo köböire Ngöbökwé üai käme ye mikani ngwarbe ni jökrä ngwäreki. Abti ni rükä dänkien käta rüe ganaine rübtä, käta niken ni mda mda ngwena ngite ni jökrä ngwäreki, ye kwrere jire Kristo käkwe üai käme ganainbare kwäräbe, ye abko mikani gare ni jökräye, kä nikani ngwena ngite ni jökrä ngwäreki.

¹⁶ Ne mden kisete, munta mrö ño ño kwete amne munta tomna ño ño ñaen, yebtä ni mda mdakwe ñakädre mun rüere abko, ie munkwe ñan olo ketate. Erere arato, bieta Ngöbö mikakrä ütiäte abko köböi, sö mräre nindrini köböi amne köböi jadükakrä, ye munta mike ütiäte ñakare jae, yebtä ni mda mdakwe ñakädre mun rüere abko, ie munkwe ñan olo ketate,

¹⁷ ñobtä ñan angwane Ngöbökwé kukwe kuin nuendi Kristo köböire abko jändrän ye nämane bä mike jirekäbe, akwa kukwe era metre Ngöbökwé, ye abko Kristo jatani ngwena ni kräke, käta bien nie.

¹⁸ Ngöböta jändrän kuin ngibiare munkrä garera munye, akwa ni ja bä mikaka bobre jatadre niere munye: Mun ñakare ütiäte rabakäre jändrän ye bkäne, niedre kwe munye, ye ngwane munkwe ñan ja olo ketate jire chi ie. Ni ja mikaka bobre ye käta angeletere mike ütiäte jae Ngöbö täte arato. Erere arato, Ngöböta jändrän mike tuare köböire kwrere ietre tä niere, akwa niaratre ñan tä nüne Ngöbö Üai Deme köböire, aisete töita kukwe ngwarbebtä, abti jata nebe ruen ütiäte krikri ietre.

¹⁹ Munkwe ñan ja olo ketadrete ietre, ñobtä ñan angwane nitre tödekaka Kristobti abko tä Kristo ngrabare kiakia kwrere amne Kristo abko tä ni dokwä kwrere abko btä nitre ye tä nekete ñakare mda. Akwa ni kiakia ngrabare tä ketetibe jökrä, ye kwrere ni rabadre nemenkä Kristobtä amne, ni rabadre niren Kristo köböire, ie Ngöbö tö, ye kwrere ni ye tä nekete ñakare mda Kristobtä, aisete munkwe ñan kukwei mika ütiäte.

²⁰ Munkwe tödekani Kristobti angwane, ni krütani kwrere mun namani ketetibe ben, aisete üai käme tä gobrane kä nebtä, ye abko ñan nena mun dänkiene mda, se ñobtä abko nitre tödekaka ñakare Jesubti kwrere jire mun tä nüne amne kukwe ükaninte ngwarbe abko mun tä mike ja dänkiene abko krörö:

²¹ “Munkwe ñan kise mika jändrän sebtä” amne “Munkwe ñan jändrän se kweta” amne “Munkwe ñan jändrän se dian kisete” abko ni mdata nuemna munye angwane, munta kukwei mike ütiäte.

²² Akwa kukwe ükaninte nuendre kore amne jändrän kwetata kore, ye abko näin jökrä ta, ñobtä ñan angwane ni kä nebtä käkwe kukwe ye ükaninte nuendre abko erere dirita, aisete näin jökrä ta amne, ñan rabadre ütiäte mda.

²³ Akwa kukwe ükaninte nuendre ni kä nebtäkwe, ye abko tuen töbtä kri bkänä, ñobtä ñan angwane nikwe nünandre metre Ngöbökrä abko tä niere. Erere arato, nikwe bikadre bobre amne nikwe ja kwata mikadre ja tare nike abko dirita kwetre, akwa ye köböire ni ñan raba kukwe käme mdei juentari mento jabtä.

3

Kukweta ükaninte nünankrä deme

¹ Mdakäre abko, Ngöbökwé mun mikaninante nire Kristobe gwaire, aisete kä bäri ütiäte kä käinbti, kanti Kristo tä takänintbe Ngöbö küde ruenkri, ye kanti jändrän bäri ütiäte tä munkrä, yebtä munkwe ja toi mika kwatibe käre.

² Mdakäre abko, jändrän käme kä nebtä, ye jiebtü munkwe ñan ja toi mika mda, akwa jändrän kuin tä kä käinbti Kristo kanti, yebtä munkwe ja toi mika kwatibe,

³ ñobtä ñan angwane mun krütani ketetibe gwaire Kristobe amne munkwe nünandi kärekäre Kristobe, ye abko Ngöböta ngibiare munkrä.

⁴ Kristo abko mun mikaka nüne kärekäre Ngöböbe amne niara jatadita angwane, bä rabadi nuäre, ye kwrere mun bä rabadi nuäre arato niarabe gwaire.

⁵ Ne aisete kukwe kämekäme mdei tä munye, ye kite jökrä temen munkwe abko krörö: munkwe ñan ja mika gure bati bati ni mda mdabe amne, mun merire brare käkwe ñan kukwe nuen kämekäme jabtä kwärikwäri. Mun tö rabai bäri ni mda mike jabe, ye munkwe kita temen. Erere arato, kukwe kämekäme tä mun töibtä amne mdeita nebe krübäte munye, ye munkwe kita temen amne munkwe ñan jändrän jökrä ribe kabre krübäte jae, ñobtä ñan angwane ni tö jändränye kabre kore abko käta jändrän ye mike ngöböire jae Ngöbö täte aisete.

⁶ Angwane ni kwati tä ja mike ngite kore, ye dokwäre Ngöbökwé mikadi ja ngie nuen kri krübäte.

⁷ Mun ngämi tödeke Jesubti, känenkri mun nämane nüne kore angwane, mun nämane ja kite kukwe kämekäme ye nuene jökrä arato.

⁸ Akwa mtare kukwe krörökrörö kite jökrä temen munkwe: mun moto romon, mun mätä ni mdabtä amne kukwe mikatbe kämekäme ni mda mda rüere amne mun ñäke ngwarbe diän diän ni mda mdabtä amne, mun ñäke diän diän ye kite jökrä temen munkwe.

⁹ Erere arato, munkwe ñan ja ngöka kwärikwäri, ñobtä ñan angwane mun nämane nüne ño käne angwane, mun nämane dre dre nuene, ye abko munkwe kitanina jökrä temen

¹⁰ amne dän btin kita jabtä, ye kwrere jire mun nena ni btin kwrere. Köbö kwatirek-watire Ngöbö mun dätekä kitera mun kwite bäri ja kwrere, ye köböire abko Ngöbö rükadre gare bäri kuin munye.

¹¹ Ye mden kisete, Ngöbö ngwäreki ni ñakare israelitare ya o ni israelitare, ye abko ñakare ütiäte mda. Erere arato, ni ñäräkrä mikani kwatabtä nitre israelitata nuene ye kwrere ya o ñakare ya, ye ütiäte ñakare mda Ngöbö ngwäreki rabakäre dianintari. Erere arato, ni menteni ya, ni käme töi ñakare ya, ni klabore ya, ñakare ya, ye abko ñakare ütiäte mda Ngöbö ngwäreki, akwa Kristo abko aibe ütiäte jändrän jökrä bti ta amne niarata nüne nißtä aibe ütiäte.

¹² Ngöbö käkwe mun dianinkä jenena jakrä amne mun abko deme amne Ngöböta mun tarere, aisete munkwe nuna krörö: munkwe ni mda mda ngwian ruen bobre jae, munkwe ja moto mika kuin ni mda mdakrä amne, munkwe bika tidrä ni mda mdabtä. Erere arato, munkwe ja moto mika jäme amne munkwe jändrän jökrä ngibia bätärekä ja täritäri.

¹³ Erere arato, ni mda mda tä kukwe nuene mun rüere ne ngwane, munkwe ñan ja ngie mika amne, kukwe tärä ja rüere kwärikwäri munkwe ne ngwane, munkwe kukwe ye

dian jabti ta kwärikwäri. Ye abko, ni Dänkien käkwe mun ngite diani munbti ta, ye kwrere munkwe nuen jakrä kwärikwäri arato.

¹⁴ Akwa jädrän jökrä kuin, ne bti ta abko munkwe ja tare kwärikwäri, ye köböire abko munkwe ja mäkädi era metre jabe kwärikwäri.

¹⁵ Mdakäre abko, mun jökrä abko tä ketetibe Kristo ngrabare kiakia kwrere amne, Ngöböke mun käräbare jakrä nünakäre jäme jabe kwärikwäri, aisete kä jäme Kristokwe, ye ie munkwe kä bian gobrane jabtä. Erere arato, jädrän jökräbtä munkwe kuin nie Ngöböye.

¹⁶ Erere arato, Ngöböke mun mikani töbtä, yehti munta dirire jae kwärikwäri amne munta mäträre jabtä kwärikwäri arato angwane, Kristo kukwei kuin, yehtä munkwe töbika käreäre. Erere arato, munkwe Ngöbö käi ngwian nuäre jabtä, käkwe salmos, himno nie käre Ngöböye amne, ka mda mda Ngöbö käikitakakrä, ye munkwe nie Ngöböye arato angwane, Kristo kukwei kuin, yehtä munkwe töbika käreäre.

¹⁷ Angwane munkwe jädrän nuen ya o munkwe blita ya, akwa munkwe nuen jökrä ni Dänkien Jesu käbti, käkwe kuin nie Ngöbö ni Rün nikweye ni Dänkien Jesu köböire.

Nünandre ño ja gwiriete

¹⁸ Mdakäre abko, mun merire gure gure käkwe ni brare munkwe ye kukwei mika ütiäre jae, kukwe mikakäre täte, ni tödekaka ni Dänkien Jesubti käkwe nuendre ye kwrere.

¹⁹ Erere arato, mun brare gure gure abko käkwe meri munkwe ye tare amne, munkwe ñan mika ene ja kisete amne munkwe ñan bätä ngwian btä.

²⁰ Ngäbäkre, mun abko käkwe mun rün btä mun meye kukwei mika täte jädrän jökräbtä, ñöbtä ñan angwane ye abko käita nebe nuäre ni Dänkienbtä.

²¹ Amne mun ngäbäkre rünre abko käkwe ñan ngra ngra ngäbäkrebti, niaratre moto mikakäre ulire dikaro.

²² Mun klaboro abko käkwe mun bkänkä kä nebtä kukwei mika täte sribi jökräbtä, akwa ñan mun bkänkä okwäbti aibe munkwe sribi nuendre kuin niara moto mikakäre nuäre, akwa munkwe sribi jire jökrä nuen kuin ja moto kuinbti mun Dänkien Jesu mikakäre ütiäre jae.

²³ Mdakäre abko, munkwe dre dre nuen, erere munkwe nuen kuin ja di ngöi jökrä amne, ñan munta sribire ni kä nebtä kräke, akwa munta sribire ni Dänkien Jesu ara jire kräke abko munkwe nütü käkwe sribi kore,

²⁴ ñöbtä ñan angwane munkwe sribi nuendre kuin, ye ütiäre abko ni Dänkien käkwe jädrän kuin kä kämbti biandi munye abko gare munye. Ye abko, Kristo mun Dänkien era metre ara kräke munta sribire, aisete munkwe sribi nuen kuin.

²⁵ Akwa nire nire käta kukwe nuene ni mda rüere, ye dokwäre abko Ngöböke mikadi ja ngie nuen, ñöbtä ñan angwane Ngöbö abko tä kukwe ükete ja kwrere ni jökrä kräke.

4

¹ Amne mun ni klaboro bkänkä, mun ye abko Bkänkä tärä kä kämbti arato abko mun Dänkien Jesukristo, ye abko munkwe ngwian töre jae, käkwe ni klaboro munkwe mika sribire kuin era metre jakrä amne munkwe ñan mika ene jae.

Blitadre käreäre Ngöböbe

² Mdakäre abko, munkwe ja töi mika kwatibe blitakäre käreäre Ngöböbe amne drebtä munkwe blitadre Ngöböbe, yehtä munkwe mokre jabti, käkwe kuin nie Ngöböye.

³ Angwane kukwe nämene ükani kaibe tiebe Ngöböke Kristobtä, ye abko tita mike gare, abtä tita ngite kä teri mtare. Kukwe ye abko tikwe mikadre gare bäri ni mda mdaye, abkokäre ni Dänkien käkwe kä biandre nunye, yehtä munkwe blita Ngöböbe nunkrä.

⁴ Erere arato, kukwe kuin Kristobtä, ye tikwe mikadre gare ni mda mdaye angwane, rükadre gare kuin metre ietre abko erere tikwe mikadre gare, yehtä munkwe blita Ngöböbe tikrä.

⁵ Angwane nitre tödekaka ñakäre Kristobti, ye okwäbti munkwe nuna töbtä amne, kä tädre munye blitakrä bentre Kristobtä angwane, munkwe blita btä amne, munkwe ñan kä juan ngwarbe ta.

⁶ Erere arato, käre munkwe blita ja moto jämenbti ni mda mdabe amne mun kukwei rabadi mate nuäre ni mda mda olote, ni mda mdakwe kukwe ngwiandretari ño ño munye Ngöböbtä, ye munkwe kukwe kadre ngäbti ño rabadre gare munye abkokäre.

Pablota köbö kuin juen

⁷ Mdakäre abko, ni mräkä Tíquico tare kri nikwe. Niarakwe ti die mikani kri krübäte amne tä sribire gwaire tibe ni Dänkien Jesu kräke. Niara näin nebe mun kánti yete angwane, dre dre tä nakenkä tibtä nete abko niedi jökrä kwe munye.

⁸ Amne nunta ño nete abko niedre kwe munye amne, kä mikadre nuäre kwe munbtä, abkokäre tita juen.

⁹ Amne Onésimo näin siba Tíquicobe nebe mun kánti yete. Onésimo ne abko tare kri munkwe amne ni raba tödeke niarabti. Mdakäre abko, niara mun mräkä Colosabo yete arato abko näin siba. Dre dre tä nakenkä nete abko niedi jökrä kwetre munye.

¹⁰ Amne ti kukwe muko Aristarco tä ngite siba tibe kä teri nete abko käta köbö kuin juen munkrä. Erere arato, Bernabé etbakrä Marcos abko käta köbö kuin juen munkrä. Marcos ne rika nebe mun kánti angwane, dre dre nuendre kräke abkobtä blitabarera munbe, aisete nane Marcos rika nebe basare mun kánti yete angwane, munkwe ka ngäbti kuin.

¹¹ Erere arato, ni iti kädianta Jesu abko ara kädianta Justo arato abko käta köbö kuin juen munye. Nitre tä sribire tibe gwaire kä gobrankrä ni Dänkien ye kräke, ngätäite nitre ne aibe abko israelitare. Niaratre ne abko käta kä mike nuäre kri tibtä nete.

¹² Amne Epafras sribikä Kristo Jesukrä abko käta köbö kuin juen munye arato. Epafras ne abko mun mräkä Colosabo yete amne Ngöbö tö dreye munkrä, ye erere munkwe nünandre käre amne, mun rabadre nünenkä dite era metre ni Dänkienbtä, abkokäre käre niarata blite Ngöböbe munkrä.

¹³ Amne Epafras abko tä sribire krübäte munkrä, ye abko tita tuen ja okwä jenbti, aisete tita kukwe era erere niere niarabtä munye, akwa ñan mun Colosabo yete aibe kräke tä sribire kore, akwa ja mräkätre tödekaka Jesubti tä juta Laodiceate amne juta Hierápolite abko kräke tä sribire krübäte arato.

¹⁴ Amne Lucas ni kräkä bianka abko tare kri nikwe, niara ye abko käta köbö kuin juen munkrä. Erere arato, Demas käta köbö kuin juen munkrä.

¹⁵ Angwane ja mräkätre tödekaka Jesubti tä juta Laodicea, kräke tita köbö kuin juen abko munkwe nie ietre tikrä. Erere arato, tita köbö kuin juen Ninfakrä amne ja mräkätre tä ja ükekrö niara juete, kräke tita köbö kuin juen abko munkwe nie ietre arato.

¹⁶ Tita tärä juen munkrä, nebtä munkwe ñäkä ünän jökrä angwane, munkwe juan nebe juta Laodiceate abko ja mräkätre yete kärke ñäkäre btä arato abkokäre. Erere arato, tärä tikani tikwe tä ja mräkätre Laodiceabo kisete, ye jara mun kánti yete angwane, munkwe ñäkä btä arato.

¹⁷ Mdakäre abko, Arquipoye abko munkwe kukwe ne nie krörö tikrä: sribi mikani ma kisete ni Dänkienkwe, ye makwe nuen kuin täte abko munkwe nie kore ie tikrä.

¹⁸ Mräkäre abko, ti Pablo ti ne abko käta köbö kuin juen munye abko tita tike ja kise jenbti au munkrä, tita tärä ne tike rabadre gare munye abkokäre. Tita ngite mäkäninte kadenanbti nete, ye munkwe ngwian töre jae abko tita ribere munye. Ngöbökwä ja moto mika kuin mun jökrä kräke. Abko kore se. Ne ngörä.

Tärä Tikani Käne Pablokwe Nitre Tesalónicabokrä 1 Tesalonicenses

Tärä ne abko tikani Pablokwe kä 50-51 angwane, aiseite tärä ne abko tikani bäri käne kwe. Pablo nikani Ngöbö kukwei kuin kädriere juta Tesalónicate angwane, nikani Silvanobe amne Timoteobe. Pablo namani Ngöbö Kukwei kuin kädriere juta Tesalónicate angwane, ni kwati namani romon kräke, abtä ngitiani, nikani nebe juta Atenate mda. Yehti Pablo tö namani rikai sribireta Tesalónicate nitre tödekaka Jesubti Tesalónicabo die mikakäre nüne bäri Jesukrä, akwa ñan nikaninta yete. Akwa nitre Tesalónicabo tödekaka Jesubti nämane ja tare nike nitre tödekaka ñakare Jesubti ye kisete, aiseite Timoteo aibe juaninta Pablokwe tärä ne ngwena nitre Tesalónicabo die mike. Ye abko tä tikani Hechos 17.1-14 yebtä.

Pablokwe tärä juani abko tikani krörö kwe ja täritäri: nitre Tesalónicabo gätäkä Jesu käbti abko kräke Ngöbö kwe jändrän kuin nuenbare, abtä Pablokwe kuin niebare Ngöböye. Erere arato, Ngöbö nämane bentre abko Pablokwe mikaninta töre ietre.

Bobukäre abko, Pablokwe nünabare ño nitre Tesalónicabo ngätäite amne niaratre tarebare ño kwe abko mikaninta töre kwe ietre. Pablokwe tärä tikani kore nitre Tesalónicabo die mikakäre nüne käre Jesukristokrä.

Bämäkäre abko, Pablokwe nitre Tesalónicabo töi diani nüne bäri Jesukristokrä. Mdakäre abko, ni tödekaka Jesubti tä krüte, btä dreta nakenkä abko niebare kwe ietre. Mräkäre abko, nikwe Jesukristo ngibiadre ngäbti ño kisere abko niebare kwe arato.

Pablota köbö ngwentari

¹ Mun gätäkä Jesu käbti tä nekete ni Rün Ngöbö kwi amne ni Dänkien Jesukristokrä käta nüne juta Tesalónicate, ye ie ti Pablo, Silvano amne Timoteo käta köbö ngwentari. Ngöbö raba ja moto mike kuin munkrä amne, mun raba nüne jame Ngöbö diebti, ie nun tö.

Pablota kuin niere nitre Tesalónicaboye

² Ja mräkäre, käre nunta kuin niere Ngöböye mun jökräbtä amne, nunta blite Ngöböbe angwane, nunta blite ben munkrä.

³ Erere arato, nunta blite Ngöbö ni Rün nikwebe angwane, munta tödeke kwatibe Ngöböbti abtä munta sribi kuin nuene ni mda mdakrä abko käre tä nuke töre nunye. Erere arato, munta Ngöbö tarere abtä munta jändrän kuinquin nuene ni mda mdakrä abko käre tä nuke töre nunye. Erere arato, munta ni Dänkien Jesukristo ngibiadre ngäbti abtä munta nünenkä dite ja tare nikakäre tödekabtä Jesubti abko käre tä nuke töre nunye.

⁴ Ja mräkäre, Ngöböta mun tarere. Niarakwe mun dianinkä jen jakrä, ye abko gare kuin nunye,

⁵ ñobtä ñan angwane nun jataba kukwe kuin Jesukristobtä kädriere munbe angwane, ñan nunkwe blitabare jirekäre, akwa nun köböire Ngöbö kwe ja di kri mikani gare munye amne, Ngöbö Üai Deme käre sribi nuenbare kri mun ngätäite. Erere arato, kukwe ne abko era metre munkrä abko nämä gare munye. Ye mden kisete, Ngöbö kwe mun dianinkä jen jakrä gare kuin nunye. Erere arato, nun nämä munbe angwane, nun nämä jändrän kuinquin aibe nuene munkrä abko garera mun jökräye.

⁶ Ye abko, nun nämä nüne ño, erere arato ni Dänkien nünabare ño, ye kwrere mun jatani nüne abko krörö: Munkwe kukwe kuin Jesubtä kani ngäbti, ye dokwäre mun nämä ja tare nike, akwa Ngöbö Üai Deme köböire kä namani bäri nuäre munkrä.

⁷ Ye mdenbtä abko, nitre gätäkä Jesu käbti nünanka kä Macedoniade amne kä Acayate, kräke mun nämane ütiäte kri, aiseite munkwe nünabare ño, ye abko käre niaratre töititani nünanbtä.

⁸ Erere arato, kukwe kuin ni Dänkienbtä, ye abko ñan nitre Macedoniabo amne Acayabo aibe ie gare akwa, mun köböire kukwe ye nena gare mente temen. Ye aiseite ñan nunkwe kukwe ye mikadre gare amne batibe rabadi gare ni mda mdaye,

⁹⁻¹⁰ ñobtä ñan angwane nun nükani mun ngätäite angwane, munkwe nun kani ngäbti ño, ye abko garera ni mda mdaye. Erere arato, munkwe jändrän dätebare ngöbö ngwarbere tuanimetre ño, bti munkwe Ngöbö nire era metre kani ngäbti ño sribikäre kräke, amne Jesu Ngöbö Odei tä kä kämbti abko munta ngibiadre ngäbti abko nena gare ni mda mdaye abko erere tä niere nunye. Jesu ye abko müre ketani, bti Ngöbö kwe mikaninta nire. Ngöbö kwe ni mikadi ja ngie nuen, ye ngäniene Jesuta ni dentari.

2

¹ Ja mräkätre, nun janama mun kánti, ye abko ñan nun janama ngoto nike ngwarbe, ye gare kuin munye.

² Nun janama mun kánti, ye känenkri nun nämä juta Filipos angwane, nitre yete kákwe nun mikaba ja tare nike kri amne nun mikaba ngwarbe jae kwetre arato. Nun rüe rababa kwati mun kánti arato, akwa Ngöbökwe nun die mikaba ja kukwei kuin kädriere munbe, aisete nunkwe ja moto mikaba kwekbe blitakäre munbe,

³ ñobtä ñan angwane kukwe era erere nunkwe kädriebe amne, ñan nun nämä blite ja töi blobti. Erere arato, nun ñan tö rababa mun ngökai jire chi.

⁴ Akwa Ngöbökwe tödekani nunbti sribi ne nuenkäre, kákwe nun mikani ja kukwei kuin kädriere abko erere nunta dirire. Ye abko nun ñan tö ni mda mda moto mikai nuäre diribtä kore, akwa Ngöbö aibe nun tö moto mikai nuäre, ñobtä ñan angwane Ngöbö aibe kätä ni moto ño abko tuente aisete.

⁵ Ye mdenbtä, nunkwe ñan blitaba nuäre nuäre jire bati mun näkwitakäre. Erere arato, ñan nun janama bike kuin munbe ngwian diankäre jae munkän, ye gare kuin munye amne tuen kuin Ngöböye.

⁶ Erere arato, ñan nun käikitadrekä munkwe amne ni mda mdakwe, abkokäre nunkwe Ngöbö kukwei kädriebe.

Nun abko Jesukristo kukwei ngwianka, aisete nun rabadre sribi ütiä kärere munye, akwa nunkwe käräba ñakare munye.

⁷ Akwa ngäbäkre chi därebe meye kwe tä ngibiare kianbtä abko ben meyeta blite jäme, kwrere jire nunkwe blitaba jäme munbe.

⁸ Erere arato, mun tare bäri kri nunkwe, aisete ñan nunkwe kukwe kuin Ngöbökwe aibe mikaba gare munye, amne nun töi ño ño abko käi rababa nuäre nunbtä mike gare jökrä munye, ñobtä ñan angwane mun tare kri nunkwe aisete.

⁹ Ja mräkätre, nun nämäne Ngöbö kukwei kuin Jesubtä kädriere munbe angwane, käre nun nämäne ganane mrökrä jae. Nun nämäne sribire tare dibire rare, ñobtä ñan angwane nun ñan tö namani sribi mikai mun kötära, ye tä töre kuin munye, ruen nunye.

¹⁰ Mdakäre abko, mun ngätäite nunkwe nünanba deme amne metre Ngöbö ngwärekre amne, ni mda mda ñan rababa ñäke blo nunbtä, ye munkwe tuani amne Ngöbökwe tuani arato.

¹¹⁻¹² Ye abko, ngäbäkre rün kwe kákwe töi dian amne die mika kwe, ye kwrere nunkwe mun töi diani jändrän kuin nuene amne, mun moto ulire angwane, nunkwe kä mikaninta nuäre munbtä, ye tä gare munye, ruen nunye. Erere arato, ni jen Ngöbökwe kákwe nünandre ño abko erere nunkwe nünamna munye. Kä nuäre te Ngöböta gobrane, ye kánti niarata mun kärere rabakäre siba jabe.

¹³ Nun nämäne Ngöbö Kukwei kädriere munbe angwane, kukwe ye abko munkwe kani ngäbti Ngöbö Kukwei ara jire kwrere amne, ñan kukwe mikanintbe ni mdakwe, kwrere munkwe kani ngäbti. Yebtä abko, käre nunta kuin niere Ngöböye arato, ñobtä ñan angwane Ngöbö Kukwei ye abko tä sribire mun tödekaka Jesubti ye töibtä mtare.

¹⁴ Ye abko ja mräkätre, nitre jen Ngöbökwe gätäkä Kristo Jesu käfti kä Judeate abko mräkä israelita kákwe ngwiani ja tare nike kri tödekabtä Jesubti, ye kwrere munkwe ja tare nikani tödekabtä Jesubti mun mräkä Tesalónicabo kisete.

¹⁵ Kira abti kä nuke mtare nitre israelita tä ni juani Ngöböke blitakäre bentre kämike abko krörö: Nitre israelita abko kákwe ni Dänkien Jesu müre ketani. Ye kwrere Ngöbö kukwei niekä kira müre ketani kwati kwetre arato. Erere nun juanintari kä ye kánti kwetre arato. Yebtä Ngöbö moto ñakare nuäre kräke amne, niaratre tä ja rüere ni jökräbe abko krörö:

¹⁶ Nitre ñakare israelitare rabadre dianintari, abkokäre nun töta nebe kukwe kuin Jesubtä kädriei bentre angwane, nitre israelita tätre neme ja rüere nunbe. Ne kwrere nitre israelita tä ja mike ngite bäri kabre krübäte. Yebtä abko Ngöbö moto gadadi, kákwe ngwiandi ja ngie nuen kri krübäte.

Pablo tö namani ja tuaita nitre Tesalónicabobe

¹⁷ Ja mräkätre, ni ngidianinkä jötrö ken jene jene ja okwä bäre mento angwane, ni nämäne ja tuenta ñakare akwa, käre munta ja töibtä nunkwe amne, bäri nun tö namani rikai ja tuakäreta munbe arato.

¹⁸ Nun tö namani rikai mun kánti, akwa ti Pablo, ti ne bäri tö rababa rikai bäre bäre akwa, Satanakwe ji ötaba nun käne, aisete nun ñan namaninta mun kánti.

¹⁹ Nun tö rababa näin bäri, ñobtä ñan angwane Jesu rükadita angwane, mun tädi näin käre Jesube, bti nunta tödeke. Mun tädi näin käre Jesube angwane, Jesu rükadita näire, käi rabadi nuäre nunbtä amne ja rabadi ruen ütiäte sribi nunkwebtä nunye Jesu ngwärekre, aisete nunta tödeke bäri krübäte munbti.

²⁰ Ne aisete mun ütiäte kri nunkrä amne, mun käi nuäre kri nunbtä arato.

3

¹ Nun tō rababa mun tuai bāri, aiseite nun ñan rababa neme nuāre, abtā nun aibe rabadi kaibe juta Atenas nete abko nunkwe ukateba kore angwane,

² nun mrākā Timoteo abko juanba nunkwe. Timoteo abko tā sribire Ngōbōbe kukwe kuin Kristobtā kādriere. Nunkwe niara juanba mun tōi ketabtākāre Jesubtā amne, mun kitakāre nūne bāri Jesukrā.

³ Erere arato, kukweta nakenkā taretare mun rüere, yebtā munkwe ñan ja tōi mikadre ngwarbe kwärākwärā abkokāre nunkwe juanba, ñobtā ñan angwane nita ja tare nike tōdekabtā Jesubti, ye tā kāre ni jiete, ye garera mun jōkrāye.

⁴ Ye garera kore munye, ñobtā ñan angwane nun nāma munbe yete angwane, nikwe ja tare nikadi kri abko nunkwe nieba munye, mden erere tā nakenkā nibtā abko nena gare munye arato.

⁵ Ne mdenbtā abko, mun tōi nāmāne Jesubtā ya abko ti Pablo ne tō rababa gai amne, ti ñan rababa neme nuāre, kākwe Timoteo juanba kukwe gain jakrā, ñobtā ñan angwane nane Satanakwe kukwe kāme mikadre mun jiete mun nuatekāre ja kāne, ye abko jürā rababa krübāte tibtā, amne nane nunkwe ngoto nikani kri ngwarbe abko jürā rababa tibtā arato.

Timoteo nūkaninta Pablo kānti kukwe kuin ngwena

⁶ Akwa Timoteo janama Tesalōnica mun kānti yete, rükabata angwane, mun tā tōdeke kwatibe Jesubti amne, mun tā ja tarere kwärākwärā amne ni mda mda tarere, ye abko kukwe kuin jārūkaba kwe nunkrā. Erere arato, kāre nunta nūke tōre munye ja moto kuinbti amne, nun tō ja tuaita munbe, ye kwrere mun tō ja tuaita nunbe arato, nieba Timoteokwe nunye.

⁷ Ne mdenbtā abko kā rababa nuāre nunbtā amne, ja rababa ruen dite nunye ja mrākā, ñobtā ñan angwane nunta ja tare nike kri abtā jata nebe ruen diāne nunye akwa, mun abko tā tōdeke Jesubti, ye abko bāri kāi nuāre nunbtā.

⁸ Mdakāre abko, munta nūnenkā dite ni Dänkien Jesu diebti ye gaba nunkwe abko kātā nun die mike bāri mda.

⁹ Nebtā abko kukwe ñan tā nebe kwen jire mda nunye kuin niekāre Ngōbō nikweye munbtā. Erere arato, munkwe kā mikani nuāre kri nunbtā Ngōbō ngwāreki, yebtā abko nunkwe kuin niedre ño mda Ngōbōye ñan tā nebe nūke gare nunye arato.

¹⁰ Ngōbōkwe kā biandre nunye niken ja tuenta gwārere munbe ie nun tō, ñobtā ñan angwane dre dre ngāmi gare munye, rabadre mun die mike tōdeke bāri Jesubti, yebtā abko nun tō nāin mun die mike bāri abko nunta ribere dibire rare Ngōbōye.

Pablota blite Ngōbōbe

¹¹ Tita blite krōrō Ngōbōbe mun krāke: Ngōbō ni Rūn nikwe ara amne ni Dänkien Jesu kākwe nun jite tika nebata mun kānti abko ie nun tō.

¹² Mdakāre abko, nunta mun tarere ño, ye kwrere ni Dänkien kākwe mun mikadre ja tarere bāri kwärākwärā amne, ni mda mda tarere bāri mda arato.

¹³ Erere arato, ni Dänkien Jesu jatadita nitre deme kwe ben, ye ngābti Ngōbō ni Rūn nikwe kākwe mun tōi mika dite nūnakāre metre amne deme ja ngwāreki abko ie nun tō. Abko kore se.

4

Ñan ja mikadre gure jire chi bati bati, akwa nūnandre deme

¹ Mdakāre, ja mrākātre, munkwe nūnandre metre kā mikakāre nuāre Ngōbōbtā, ye nunkwe diribarera munye abko erere munta nūne. Mtare munkwe nūna janknu kore kōbō kwatirekwatire abko nun tō ribei munye ni Dänkien Jesu kābti,

² ñobtā ñan angwane ni Dänkien Jesu kākwe nun mikani kukwe dirire munye abko nunkwe diriba munye, ye nena gare mun jōkrāye abko krōrō:

³ Mun rikadre nūne bāri deme mda Ngōbōkrā kōbō kwatirekwatire, ie Ngōbō tō abko krōrō: munkwe ñan ja mika gure jire chi bati bati.

⁴ Erere arato, mun tōi raba ngitiekā ja mikabtā gure tiebe ni mda mdabe angwane, munkwe ja ngrabare ye nākwiata au amne, munkwe nūna kuin deme amne ja mika ütiate kwärākwärā munkwe.

⁵ Nitre ie Ngōbō gare ñakare abko tā ja gaire ñakare jāndrān ngwarbe kwrere, ye kwrere munkwe ñan nūna.

⁶ Mdakāre abko, mun ja mrākāre Jesu kābti kākwe ñan kukwe nuen blo ja rüere kwärākwärā amne, munkwe ñan ja ngōka kwärākwärā ja mrākā merire, brare mikabtā ja ken bati bati, ñobtā ñan angwane ni kukwe nuenkā kāme mrākā rüere kore abko ni Dänkienkwe mikadi ja ngie nuen abko nunkwe niebara munye amne, nunkwe mun mikabara mokre btā.

⁷ Ye abko, Ngōbōkwe ñan ni kārābare ja mikakāre ngite kore ni mda mdabe akwa, Ngōbōkwe ni kārābare nūnakāre kuin deme jakrā.

⁸ Ne mden aisete, nire nire mun ngätäite kākwe kukwe ne kitadre temen angwane, ñan ni kā nebtā kukwei kitadre temen kwe akwa, Ngöbö ja Üai Deme bianka nie, ye ara jire kitadre temen kwe.

⁹ Ja mräkätre, munta ja tarere kwärikwäri, yebtä abko nun ñan raba tärä tike munye, ñobtä ñan angwane Ngöbö ara kākwe mun töi tikani ja tarere kwärikwäri.

¹⁰ Munta ja mräkätre tödekaka Jesubti nünanka kā ngrabare temen Macedonia yete tarere jökrä bkänä. Ye abko kuin akwa, munkwe ja taredre bäri mda köbö kwatirekwatire abko nunta niere munye.

¹¹ Mdakäre abko, munkwe ja töi mika nünanbtä jäme amne, munkwe töbika bäri kukwe jakwebtä. Mdakäre abko, sribidre jen jakrä munkwe, niebare nunkwe munye, ye kwrere munkwe sribi ja kise jenbti jakrä.

¹² Munkwe ne nuendre mun rabadre ütiäte nitre tödekaka ñakare Jesubti ye okwäbti abkokäre. Erere arato, munkwe nünandre kore jändrän jen jakwebti. Ye kwrere munkwe ñan jändrän ni mdakwe ngibiadi nünankrä jae abko ie nun tö.

Jesu jatadita nirekrä abko Pablokwe niebare

¹³ Mdakäre abko ja mräkätre, ni mda mda kätä tödeke ñakare Jesubti abko ni mda ñakare tödekakrä kwetre, aisete mräkätä krüte kän angwane, motota nööte krübäte jiebtä. Ye kwrere ñan rakadrekä muntä, abkokäre ni tödekaka Jesubti tä krüte angwane, dreta nakenkä btä abko nun tö mikai gare krörö munye:

¹⁴ Jesu müre ketani, bti nukaninta nire, ye abko garera nie amne era nikrä. Ye kwrere arato, ni tödekaka Jesubti krütanikrütani, ye abko Ngöbökwä mikadita nire rikakäre Jesube abko era nikrä arato.

¹⁵ Ni Dänkien Jesu ara kākwe kukwe diribare, erere nunta niere munye abko krörö: Ni Dänkien Jesu jatadita angwane, nitre tödekaka bti tä nüne, ye ñan rikadi ben ni krütanikrütani känenkri,

¹⁶ ñobtä ñan angwane ni tödekaka Jesubti krütanikrütani rükadita nire käne. Ni Dänkien Jesu ara jire jatadita kā känbti timonkwäre angwane, ni kukwei jaradi kri kā känbti timonkwäre. Erere arato, angele ütiäte kri abko kukwei jaradi amne, trombeta ngö kā känbti abko kukwei jaradi ni Dänkien käne arato. Ye ngwane ni tödekaka Kristobti krütanikrütani, ye ara jire rükadita nire käne.

¹⁷ Yebti ni tä nüne nüne abko jänäin gwaire nitre yebe mütateta kän ni Dänkien Jesu ngäbti. Ye ngwane ni rabadi nüne käreäre ni Dänkienbe.

¹⁸ Ne aisete munkwe blita kukwe nebtä ja die mikakäre kwärikwäri.

5

¹⁻² Mdakäre abko ja mräkätre, ni Dänkien Jesu jatadita ne abko rakadikä ñongwane ti rabadre niereta munye, akwa ti bike niere ñakare munye, ñobtä ñan angwane garera metre krörö munye: Ni gokä rükadre gore ñongwane gare ñakare ju bkänkäye, akwa batibe rükadre gore deo, ye kwrere jire ni tädi ni Dänkien ngibiare ngäbti ñakare angwane, batibe jatadita.

³ Ne kwrere arato, meri ñan mobe bren kwe kisete, ye kākwe ja ngibiadre ñongwane metre gare ñakare ie, akwa batibe ja ngibia käi tä nüke ie, ye kwrere nitre tödekaka ñakare Jesubti tädi niere krörö: Mtare kukwe ñakare. Nita nüne kuin jäme, tädi niere. Ye ngwane ni Dänkien Jesu jatadita kākwe juandi ngwarbe jökrä amne ñan kwäräbedre jire kwetre.

⁴ Akwa mun abko ñan tä nüne kä ikote ja mräkätre, aisete ni Dänkien Jesu jatadita abko btä mun töita, aisete munta ngibiare ngäbti kisere mun ñan kwandre jäme ie.

⁵ Ye abko, mun jökrä tä nüne kä ngwente Ngöbö träte. Ñan nita nüne mente Ngöböye kä ikote amne ñan nita nekete kä ikokri.

⁶ Ne mden kisete ni tödekaka Jesubti kākwe ñan nünandre okwä kware, akwa ni tädre ngwäte niara ngibiare ngäbti amne nikwe ja ngibiadre kukwe kämekäme ngäniene.

⁷ Nita kibien abko tä kibien deo abko gare nie. Erere arato, ni dröbaka dröbaka tä dö ñaen kä ikote deo, ñobtä ñan angwane nitre tödekaka ñakare Jesubti abko, ietre Ngöbö gare ñakare, aisete ñan tä ni Dänkien Jesu ngibiare ngäbti.

⁸ Akwa nitre tödekaka Jesubti tä nekete kä ngwen yekri amne nikwe kukwe kämekäme bätäkä ngwarbe nuendre ñakare nitre dröbaka ye kwrere. Akwa ari töbike kuin ja käne kukwe kämekäme rüere. Erere arato, ari tödeke kwatibe Jesubti amne, ni rükä kätä jändrän ribi mike ja mäträbti ja ngibiakäre, ye kwrere ari ja tarere kwärikwäri ja ngibiakäre. Ne kwrere arato, ni Dänkien Jesu jatadita ni diantarikäre, ye ngäbti abko ari niara ngibiare kisere, ño ni rükä kätä sobro balinkwatäre ribi mike ja dokwäbti ja ngibiakäre ye kwrere.

⁹ Nikwe nünandre kore, ñobtä ñan angwane ñan Ngöbökwä ni dianinkä ja ngie nuakäre akwa, niarakwe ni dianinkä jen jakrä ni diantarikäre ni Dänkien Jesukristo köböire.

¹⁰ Nita nire ya o ni krutarera ya, akwa ni rabadre nüne kärekäre ni Dänkien Jesukristobe, ne mdenkäre ni Dänkien Jesukristo krütani ni kräke.

¹¹ Ne aisete munkwe ja moto mika nuäre kwärikwäri nünakäre dite ni Dänkien Jesukristo kräke amne, munkwe ja mika bäri dite nünakäre ni Dänkien Jesukristo kräke. Ye abko munta nuene, akwa nuen janknu munkwe.

Nünandre ño jabe kwärikwäri

¹² Ja mräkätre, kukwe mda nun tö nibi ribei munye abko krörö: Nitre mun jie ngwianka käta sribire mun ngätäite amne tä mun töi tike era metre ni Dänkien Jesubtä, ni ye abko munkwe mika ütiäte jae.

¹³ Erere arato, sribi nuenta kwe, yebtä raba tare kri munkwe amne munkwe mika bäri ütiäte jae.

Mdakäre abko, munkwe nuna jame jabe kwärikwäri, ie nun tö.

¹⁴ Mdakäre abko ja mräkätre, nire nire btä kä krene sribire, yebtä munkwe ñäkä ietre amne, nire nire moto ulire abko munkwe die mika kä mikakäreta nuäre btä. Erere arato, nire nire di krüte abko munkwe die mika. Erere arato, mun ñan moto raba romon jötrö jötrö ni mda mdakrä.

¹⁵ Mdakäre abko, munkwe ja mika juto kukwe ne nuene abko krörö: Ni mdakwe kukwe nuen blo mun rüere akwa, munkwe ñan ja ngie mika amne, munkwe jändrän kuin nuen jakrä kwärikwäri, ye kwrere munkwe nuen ni mda mda ñakare tödekaka Jesubti kräke.

¹⁶ Käre munkwe kä ngwian bäri nuäre jabtä.

¹⁷ Käre munkwe blita Ngöböbe.

¹⁸ Kukwe ño erere, btä munkwe kuin nie Ngöböye, ñobtä ñan angwane ni tödekaka Kristo Jesubti kärke kuin niedre Ngöböye abko ie Ngöbö tö.

¹⁹ Mdakäre abko, sribi Ngöbö Üaikwe ñan dokwä täkä munkwe.

²⁰ Erere arato, ni Ngöbö kukwei niekä, ye ñan kukwei mika ngwarbe munkwe,

²¹ akwa tä Ngöbö kukwei niere metre ya, ñakare ya, ye mika ñäräre kuin munkwe amne, kukwe kuin nie kwe ne ngwane, munkwe kukwei mika era.

²² Erere arato, kukwe kämekäme bätäkä ngwarbe, ye ngäniene kä mikaka munkwe.

Kukwe niebare mrä Pablokwe

²³ Mräkäre abko, Ngöbö ni mikaka nüne jame jabe kwärikwäri amne ni mda mdabe, Ngöbö ye ara kärke mun die mika nüne kuin deme. Amne ni Dänkien Jesukristo jatadita, ne ngwane ja ñan rabadre ruen ngite niara ngwäreki munye, abkokäre Ngöbökwé mun üai amne mun ngrabare üka kuin kukwe kämekäme ngäniene.

²⁴ Ngöbö mun käräkä abra tä ja kukwei mike täte era metre amne kukwe ne rabadi bare täte jökrä ie.

²⁵ Ja mräkätre, munkwe blita Ngöböbe nunkrä.

²⁶ Erere arato, munkwe köbö ngwiantari jae angwane, munkwe ja demain era metre ja moto kuinbti.

²⁷ Mräkäre abko, munkwe ñäkä tärä nebtä ja mräkä mda mdakrä abko tita niere munye ni Dänkien käbti.

²⁸ Ni Dänkien Jesukristo raba ja moto mike kuin mun kräke. Ne abko kore. Ne ngörä.

Tärä Tikani Bobukäre Pablokwe Nitre Tesalónicabokrä 2 Tesalonicenses

Pablo nämáne juta Corintote angwane, niarakwe tärä ne tikani juandre nitre gätäkä Jesu käbti nünanka juta Tesalónica kánti. Tärä 1 Tesalonicenses jänikani Silvanokwe amne Timoteokwe nebe Tesalónica yete, abti nukaninta Pablo kánti juta Corintote. Yebti tärä ne tikani Pablokwe nitre Tesalónicabokrä. Jesukristo jatadreta ño amne jatadreta ñongwane abko Pablo tó namani dirii nitre tödekaka Jesubti Tesalónicabo yeye abko erere tikani kwe tärä nebtä. Niara tó namani kukwe tikai kore, ñobtä ñan angwane Jesu kebera nüketa, aiseté ñan sribidre jire chi mda mró ganainkrä jae abko ni ruäre dirikätre blo nükani dirire Tesalónica yete. Nitre ruäre tödekaka Jesubti kákwe kukwe ye mikani era jae, aiseté ñan námáne sribire mda mró ganaine jae.

Akwa Jesu ngämi nuke abko Pablo tó namani niei metre ie, aiseté tärä ne tikani juandre ietre. Jesukristo jatadita angwane, ni jökrä kákwe tuadi. Akwa ngämi nuke, känenkri ni jatai iti, kä rikai ni ngökö kwati krübäte amne rabai sribire Satana diebti arato. Jesukristo jatadita angwane, ni jökrä tödekaka ñakare bti abko Ngöbökwé mikadi ja ngie nuen kri abko Pablokwe niebare ietre.

Akwa Jesu ngämi nüketa, känenkri nitre tödekaka Jesubti nünanka juta Tesalónicate kákwe nünandre metre amne sribidre mró ganainkrä jakrä kwetre abko Pablokwe niebare ietre.

Pablota köbö ngwentari

¹ Mun gätäkä Jesu käbti tä nekete ni Rün Ngöbökwé amne ni Dänkien Jesukristokri kätä nüne juta Tesalónicate, ye ie ti Pablo btä Silvano amne Timoteo kätä tärä ne tike.

² Ngöbö ni Rün nikwe amne ni Dänkien Jesukristo raba ja moto mike kuin mun kräke amne, mun raba nüne jáme niaratre diebti.

Pablota nitre tödekaka Jesubti mike ütiäte jae

³ Ja mräkätre, munta tödeke bäri mda Jesubti amne, mun itire itire kätä ja tarere bäri kwärükwäri, aiseté nunkwe kuin niedre kärekwé munbtä Ngöböyue ruen nunye.

⁴ Abtä nitre Ngöbökwé tä gätäre, ye kánti nunta mun käikitekä abko krörö: Kukwe taretare tä nakenkä munbtä tödekabtä Jesubti abko kisete munta ja tare nike, akwa munta nünenkä dite jabtä amne Jesu rükente ñakare amne munta tödeke janknu Jesubti abko nunta niere ietre.

⁵ Ye abko, Ngöbö abra kukwe ükatekwé era metre ni jökrä kräke abko bä mikata munkwe abko krörö: Munta ja tare nike tödekabtä Jesubti, aiseté niarata gobrane, ye kánti mun tädi biare nüne ben abko niarakwe niedi.

⁶ Akwa Ngöbö abra kukwe ükatekwé metre aiseté, nire nire tä mun mike ja tare nike, ni ye abko Ngöbökwé mikadi ja tare nike mun dokwäre.

⁷ Erere arato, mun ja tare nikaka, ye abko Ngöbökwé mikadi jadüke nunbe gwaire. Ye abko, ni Dänkien Jesu tä kä káinbti abko jatadita angele dite dite kwe ben ñukwä jutrate, ye angwane ni mikadi jadüke Ngöbökwé.

⁸ Ni Dänkien Jesu jatadita angwane, nire nire ie Ngöbö gare ñakare amne ñan tä ni Dänkien Jesu kukwei kuin mike täte, ni ye abko niarakwe mikadi ja ngie nuen.

⁹ Ye angwane juandi ngwarbe kärekwé kwe amne niaratre ñan rabadre jire chi ni Dänkien kánti amne ni Dänkien Jesu di kri bá nuäre ñan tuadre jire kwetre.

¹⁰ Akwa ni Dänkien Jesu jatadita angwane, ni deme kwekwé kákwe käikitadikä. Erere arato, nitre tödekaka niarabti töi ñan rabadi krüte niara tuare. Nitre ne ngätäite mun tädi siba, ñobtä ñan angwane kukwe kuin Jesubtä abko nunkwe niebare munye angwane, munkwe mikani era aiseté.

¹¹ Kukwe rakadikä kore gare kuin nie, aiseté käre nunta blite Ngöböbe munkrä amne, Ngöbökwé mun káräbare, yebtä mun die mikadre nüne niarakrä kwe abko nunta ribere ie. Erere arato, mun tö jändrän kuinkuin nuein, ye erere btä mun die mika kwe, jändrän ye mikakäre neme bare. Erere arato, munta tödeke Jesubti, ye köböire sribi jökrä btä Ngöbö raba mun die mike abko nunta ribere ie.

¹² Nunta ribere kore Ngöböyue ni Dänkien Jesu rabadre käikitaninkä mun köböire amne Ngöbö amne ni Dänkien Jesukristo kákwe mun käikitadrekä ja moto kuinbti, abkokäre nunta blite kore Ngöböbe mun kräke.

2

Jesu jatadita, ye näire dre rakadikä

¹ Ja mräkätre, ni Dänkien Jesukristo jatadita angwane, niarakwe ni ukadikrö jökrä ketetibe jabe. Köbö ye ngibiare kwärä abko nun tö ribei krörö munye:

² Ni Dänkien rükadreta abko erere köböi nūra, aiseite ni Dänkien nürate ye abko Ngöbö Üaikwe mikani gare tie, ye ni mda mda jata niere munye, yebtä munkwe ñan ja töi kwita amne munkwe ñan kä jürä ngwian jire chi jabtä. Mdakäre abko, ni Dänkien rükadreta abko erere köböi nūra, aiseite ni Dänkien nürate abko munkwe diribare amne munkwe juani täräre abko ni mda mda raba niere, akwa nun abko kukwe ye kwrere niere ñakare.

³ Munkwe ñan ja ngökamna jire chi, ñobtä ñan angwane ni Dänkien Jesu rükadreta, ye känenkri ni kwati rikadi rüre Ngöböbe amne, ni jatadi iti Ngöbö rüere abko ni Ngöbö Kukwei kitaka temen abko rükadi. Akwa Ngöböke ni ye juandi ngwarbe mrä.

⁴ Ni ye abko Ngöbö rüe, aiseite jändrän jökrä mikata Ngöböre amne mikata ütiäte ngöbö kwrere, ye ben niara rabadi ja rüere. Erere arato, rabadi ja mike bäri ütiäte jändrän jökrä ngöböre ye ngwä. Abtä ju blitakrä Ngöböbe, ye kanti ni ye näin käkwe ja mikadi bäri kri Ngöböbti ta, käkwe ja Ngöbö niedi.

⁵ Ye abko, tikwe nünabare mun ngätäite angwane, tikwe blitaba kukwe nebtä munbe, ¿ye töre ñakare munye ya?

⁶ Ni Ngöbö Kukwei kitaka temen ye abko rabadi mikani gare kä ngrabare temen, akwa köböta kitani Ngöböke, ye känenkri ni ye ñan rükadre ja mike gare, ñobtä ñan angwane jändrän keteti tä ketebtä. Jändrän ye abko jändrän ño garera munye.

⁷ Kä ne ngwane Satanata kukwe miketbe käme, ye abko nena näin kä ngrabare temen akwa, nita iti käta ni Ngöbö Kukwei kitaka temen ye ketebtä, akwa ni ye diandikä angwane,

⁸ ni Ngöbö Kukwei kitaka temen ye käkwe ja mikadi gare kä ngrabare temen. Akwa ni Dänkien Jesu jatadita angwane, niarakwe müre tākādi ye käkwe ni ye gadikä amne niara trä niadi bä nuäre ye käkwe müre ketadi arato.

⁹ Akwa ni Dänkien Jesu ngämi nüketa, känenkri ni Ngöbö Kukwei kitaka temen ye käkwe sribidi Satana diebti, aiseite rabadi sribi kri ñan tuabare nuene amne di rabadi krübäte jändrän bätäkä ngwarbe nuenkäre akwa, ye abko bä rabadi sribi Ngöböke kwrere ni ngökakäre. Sribi kri, yebtä ni kwati töi ñan rabadi krütäre.

¹⁰ Erere arato, kukwe käme nuendi bätäkä ngwarbe kwe, ni mden mden tä biare riatakäre ye ngökakäre. Nitre tä biare riatakäre tätre ja dokwä mike ribi, aiseite ñan tö kukwe era metre Ngöböke tarei, abtä ñan rabadre dianintari amne riadite jökrä.

¹¹ Ne aiseite Ngöböta niaratre töi kwite ngwarbe, ni ye rabadre kukwe ngwarbe mike era jae abkokäre.

¹² Ne abko ni jökrä btä käta neme nuäre kukwe diän diän nuene abko ñan tä kukwe era metre mike era jae, ni ye mden abko Ngöböke juandi ngwarbe jökrä.

Kukwe diribare Pablokwe abko ketadrete dime ja kisete

¹³ Mdakäre abko, ja mräkätre tare ni Dänkien Jesukwe, munkwe kuin niedre kärekäre munbtä Ngöböye, ñobtä ñan angwane mun rabadre dianintari, abkokäre kena dekä Ngöböke mun dianinkä jakrä. Sribi Ngöbö Üaikwe mun mikakrä nüne deme Ngöbökrä amne munta kukwe metre Jesubtä mike era jae, ye köböire Ngöböke mun dianintari.

¹⁴ Ye rabadre bare, abkokäre kukwe kuin diribare munkwe Jesubtä munye, köböire Ngöböke mun käräbare jakrä. Ni Dänkien Jesukristo bä nuäre, ye kwrere mun rabadi kwitani, abkokäre Ngöböke mun käräbare jakrä.

¹⁵ Ye mden kisete ja mräkätre, munkwe kukwe diribare gwärere munye amne, munkwe tikani täräre munye, ye munkwe ñan käikwitakata jire chi jabtä amne, munkwe ketate dime ja kisete, ie nun tö.

¹⁶ Ni Dänkien Jesukristo btä Ngöbö ni Rün nikwe käkwe ni tarebare amne jändrän kuin nuenbare ni kräke ja moto kuinbti kwetere, käkwe kä mikani nuäre nibtä kärekäre amne ni die mikani jändrän kuin kä käinbti ngibiakäre kisere.

¹⁷ Niaratre ara käkwe mun mika ruen dite munye amne mun die mika sribi kuin nuenkäre amne kukwe kuin niekäre abko ie nun tö.

3

Nitre tödekaka Jesubti käkwe blitadre Ngöböbe Pablokrä

¹ Ja mräkätre, mräkäre kukwe kuin ni Dänkien Jesubtä, ye nun rikadre ngwena jötrö kä jökräbti temen. Erere arato, kä namani nuäre munbtä kukwe kuin ye mikakäre ütiäte jae, ye kwrere ni mda mdakwe mikadre ütiäte jae, abkokäre munkwe blita Ngöböbe munkrä.

² Erere arato, ni diän diän töi kämekäme Ngöbö rüere, ye ngäniene Ngöböke nun ngibiadre, abkokäre munkwe blita Ngöböbe munkrä.

³ Ni Dänkien käta kukwe niere, erere tä mike täte. Niara ye ara käkwe mun die mikadi nüne jakrä amne, mun ngibiadi kwe ni rüe käme Satana ngäniene.

⁴Nunkwe kukwe diribare munye, erere munta nuene, amne munkwe nuendi käre ruen nunye.

⁵Ngöböta ni tarere ño, ye kwrere ni Dänkien Jesu raba mun die mike ja tarere kwärikwäri amne, Kristo käkwe ja tare nikani angwane, nünankabare dite kwe jabtä, ye kwrere niara raba mun töi tike nünenkä dite jabtä ja diebti, ie nun tö.

Ni jökrä käkwe sribidre

⁶Ja mräkätre, mun mräkä mden mden tä nekete Jesukri, akwa kä krene btä sribire amne, kukwe diribare nunkwe tä mike ñakare täte, ni yebe munkwe ñan ja geta jire chi abko nunta niere munye ni Dänkien Jesukristo käbti.

⁷Tita kukwe ne niere munye, ñobtä ñan angwane nunkwe nünabare ño mun ngätäite, ye kwrere munkwe nünandre garera munye abko krörö: Nun nämane mun kanti, ye ngwane nunkwe kä ngwiani krene ñakare jabtä.

⁸Erere arato, nunkwe ñan mröbare ngwarbe ni mda mdakän, ñobtä ñan angwane nun ñan tö namani sribi mikai kri dikaro mun kötärä, kä nämane sribire dibire rare mrökrä jae.

⁹Nunkwe mrö ribedre munye abko rabadre dbe akwa, sribidre ño jen jakrä abko nun tö namani bä mikai mun okwäbti, ne kwrere munkwe nuendre arato, abkokäre nunkwe sribibare kore mrökrä jae.

¹⁰Mdakäre abko, nun nämane mun kanti yete angwane, nunkwe kukwe ükateba krörö munkrä: Nire nire ñan tö sribire käkwe ñan mrödre, nunkwe nieba.

¹¹Akwa ni ruäre mun ngätäite abko tä dikekä ngwarbe krö kwäräkwarä, kä krene btä amne, ñan tö sribire. Käre tä ja mike kukwe ni mda mdakwe te ta abko nunkwe gaba.

¹²Ni ye kwrere kwrere abko käkwe sribi jame mrökrä jae abko nun tö niei ie amne, nunta mikamna sribire ni Dänkien Jesukristo käbti.

¹³Akwa mun mda mda abko ñan raba dräre sribi kuin nuene.

¹⁴Erere arato, tärä juanta nunkwe, ne nire nire ñan tö raba mikai täte, ye abko mika ñäräre kuin munkwe, bti rabadre ja gaire, abkokäre munkwe ñan ja geta ben.

¹⁵Akwa munkwe ñan mika ñäräre ja rüe kwrere amne, ni mräkä nikwe töi dian, ye kwrere munkwe töi dian jirekäbe.

Kukwe mrä ja mräkä Tesalónicabokrä

¹⁶Ja mräkätre, ni Dänkien kä jame bianka ye käkwe mun moto mika nüne jame köbö kwatirekwatire kukwe bätäkä ngwarbe te abko nunta ribere Ngöböye. Ni Dänkien raba munbe.

¹⁷Ti Pablo käta köbö ngwentari mrä munye amne tita kukwe mrä ne tike ja kise jenbti, tita kukwe tike ño rabadre gare munye abkokäre. Ne kwrere tita tärä juen metre rabadre gare munye, abkokäre tita kukwe tike kore mrä.

¹⁸Ni Dänkien Jesukristo raba ja moto mike kuin mun jökrä kräke. Ne abko kore. Ne ngörä.

Tärä Tikani Käne Pablokwe Timoteokrä 1 Timoteo

Ni nitre tödekaka Jesubti jie ngwianka, kräke Pablokwe tärä tikani ketamä. Ne mden ngätäite abko tärä ne tikani käne kwe Timoteoye. Tärä ne abko, ni nitre tödekaka Jesubti jie ngwianka töi diankrä sribibtä.

Timoteo abko sribi muko Pablokwe. Niara nämane bati angwane Pablokwe dianinkä sribikäre jabe. Niara nämane nüne juta Listrate, kä Asiate. Niara rün abko griego amne meye abko israelita. Pablokwe kukwe kuin Jesubtä mikani gare juta Listrate angwane, Timoteo käkwe tödekani Jesubti. Abti Pablo nükani bobukäre juta Listrate angwane, Timoteo dianinkä kwe sribikäre jabe abko tä tikani Hechos 16.1-4 yebtä. Yebti Timoteokwe sribibare raire Pablobe kukwe kuin Jesubtä mikakäre gare kä ketareketare temen. Abti Timoteo nämane nitre gätäkä Jesu käbti juta Efesote jie ngwena. Timoteo käkwe nünandre ño amne sribidre ño, btä Pablokwe tärä ne tikani Timoteo die mikakäre.

Mdakäre abko, ni ño mikadre ni nitre tödekaka Jesubti jie ngwianka amne die mikaka abko tikani kwe Timoteoye. Mdakäre abko, nitre tödekaka Jesubti nämane Efeso, ngätäite kukwe namani kri krübäte, ñöbtä ñan angwane ni ruäre namani kukwe ngwarbe dirire abko nikani niren bäri mda. Timoteo abko käkwe kukwe ne ükadrete ño abko Pablokwe niebare ie.

Kukwe ne abko raba ni die mike kri mtare. Nikwe ni ño diandrekä sribikäre ni jie ngwianka kwrere abko tärä ne tä mike gare nie. Erere arato, ni ño diandrekä sribikäre nitre jie ngwianka die mikaka abko tärä ne tä niere. Mdakäre abko, ni nitre tödekaka Jesubti jie ngwianka käkwe nünandre ño amne sribidre ño abko 1 Timoteo ne tä niere nie.

Pablota köbö ngwentari Timoteoye

¹⁻²Ti Pablo käta tärä ne tike mae Timoteo. Ti ne abko Kristo Jesu kukwei ngwianka. Ngöbö ni Diantarikä amne Kristo Jesu, bti nita tödeke ye käkwe ti mikani ja kukwei ngwianka. Sribi tikwe ye köböire makwe tödekani Jesubti, aisetä ma abko ti ngobo tikwe kwrere Timoteo. Ngöbö ni Rün nikwe btä Kristo Jesu ni Dänkien raba ja moto mike kuin makrä amne ma raba ruentari tare ietre. Erere arato, ma raba nüne jame niaratre diebti, ie ti tö.

Kukwe blo dirikätre, ietre Timoteokwe ñäkädre

³Timoteo, ni nämä juta Efesote, bti ti jatäba kite Macedonia nete angwane, ni ruäre nämä dirire blo abko ñan diridre kore mda kwetre makwe niedre ietre, abkokäre ma rabadre yete, tikwe nieba mae.

⁴Kukwe mikanintbe ngwarbe kirakira aibehtä niaratre tä ja däkweite amne nire därebare mräkä ütiäte kirakri, btä kukwe ñan krütare, aibehtä tä ja däkweite abko ñan nuendre kore makwe niedre ietre, abkokäre ma rabadre yete. Kukwe mikanintbe ngwarbe kirakira, yebtä ni kwati tä neme ja kwete angwane, ñan tä ja kite sribi Ngöbökwä yebtä angwane, tödekadre ño metre Ngöböbti abko dirita ñakare. Akwa tödeka Ngöböbti, ye köböire Ngöböta sribire ni kwekwe ngätäite. Ye mden kisete, kukwe ngwarbe, yebtä ja däkwitadre ñakare amne diridre ñakare abko makwe nie ietre.

⁵Akwa ja taredre kwärikwäri kwetre, abkokäre makwe nie kore ietre. Ni töi deme bti nikwe ja taredre metre. Arato kukwe käme nuendre ñakare kwetre, ja rabadre ruen ngite ñakare Ngöbö ngwäreki abkokäre. Erere arato, nikwe tödekadre era metre Jesubti amne, ñan bike ni tödekaka Jesubti kwrere. Kore nikwe ja taredre kwärikwäri.

⁶Ni ruäre ñan tä kukwe ye nuene mda, käta ja kwete jirekabe kukwe ngwarbehtä.

⁷Niaratre tö rabai Kukwe Biani Ngöbökwä Moiséye dirikätre, abtä jata kukwe ye dirire metre nieta kwetre, akwa kukwe ye tä dre niere metre abko ñan tä nuke gare ietre, aisetä tä dirire blo.

⁸Kukwe Biani Ngöbökwä Moiséye, ye dirita metre ne ngwane, kukwe ye kuin ni die mikakrä garera nie.

⁹Akwa Ngöbökwä ñan ja kukwei biani Moiséye ni nünanka metre ye kitakäre ngite. Akwa ni kukwe ye mikaka ngwarbe jae, kräke Ngöbökwä mikani, ni ngite ye mikakäre gare ie. Erere arato, ni dokwä ribi ribi, ni rüre Ngöbö rüere, ni diän diän kukwe kämekäme nuenkä, ni Ngöbö jürä ngwen ñakare amne, ni Ngöbö kukwei mike ütiäte ñakare jae abko kräke Ngöbökwä ja kukwei mikani nuendre, ni ngite ye mikakäre gare ie. Mdakäre abko, ni ni rün btä ni meye kämikaka amne, ni ni mda mda kämikaka abko kräke Ngöbökwä ja kukwei mikani nuendre, ni ngite ye mikakäre gare ie.

¹⁰Ne kwrere arato, ni merire, ni brare ja mike gure bati bati amne, ni brare bike merire, ni merire bike brare, ni ngäbäkre mikaka ja ken, arato ni ni mda mda rürümoinkä mikakäre

klabore amne, ni ni ngökaka amne ni blitaka ngwarbe ni mda mda rüere amne, ni kukwe nuenkä kämekäme Ngöbö kukwei metre rüere kore, mden kräke Ngöbökwé ja kukwei mikani nuendre, ni ngite ye mikakäre gare ie.

¹¹ Akwa Ngöbö Kukwei dirita metre, ye abko käta kukwe kuin nuäre Ngöböbtä niere metre. Angwane Ngöbö käikitadrekä ni jökräkwé. Kukwe kuin Ngöbökwé, ye mden Ngöbökwé ti mikani ngwianka ni jökräye.

Jesukristokwe kukwe nuenbare kuin Pablokrä

¹²⁻¹³ Ngöbökwé ti mikani sribire jakrä, ye mdenbtä tita ni Dänkien Kristo Jesu demaine. Niarakwe ja di biani tie sribi ne nuenkrä. Ti nämane tödeke ñakare Jesubti angwane, ti nämane ñäke blo niara rüere. Erere arato, nitre tödekaka niarabti, jiebti ti nämane näin kisere mikakäre ja tare nike amne, ti nämane rüere krübäte Jesukristo rüere. Akwa ti nämane tödeke ñakare bti, aiseté ti nämane kukwe ye nuene Ngöbö rüere nämane gare ñakare tie. Abtä Ngöbökwé ja ngie mikani ñakare, käkwe ti ngwiani ruen bobre jae amne tödekabare kwe tibti angwane, ti mikani ja kukwei ngwianka kwe.

¹⁴ Ni Dänkien käkwe ja moto mikani kuin krübäte tikrä amne kukwe kuin nuenbare kabre kwe tikrä amne ti die mikani kwe tödeke metre jabti. Erere arato, ti die mikani kwe ni mda mda tarere. Ne abko namani bare Kristo Jesu diebti.

¹⁵ Kukwe ne abra kukwe era metre abko rabadre era ni jökrä kräke abko nere: Kristo Jesu nükanä kä nebtä ni kukwe kämekäme nuenkä dentari. Ni kukwe kämekäme nuenkä, ye ngätäite ti abko bäri käme.

¹⁶ Ye mden kisete, Ngöbökwé ti ngwiani ruen bobre jae. Ti nämane kukwe nuene bäri käme Jesu rüere ni mda mda ngwä akwa, Jesukwe ñan ja ngie mikani ti rüere angwane, ti ngibiabare raire kwe tödekakäre jabti. Ne köböire abko, Jesukristo tä ni tarere kri rükadre gare ni jökräye angwane, tödekadre kwetre Jesubti, ye angwane nünandre kärekäre ben, abkokäre Ngöbökwé ti ngwiani ruen bobre jae kore.

¹⁷ Mtare ti tö Ngöbö käikitaikä. Ngöbö abra gobranka kärekäre. Niara krüte ñakare amne tuen ñakare. Ngöbö mda ñakare jire, aiseté Ngöbö itibe aibe raba mikani ütiäte kärekäre jae amne raba käikitaninkä. Abko kore se. Amen.

¹⁸⁻¹⁹ Timoteo, ti ngobo tikwe, ma rabadre sribire ja di ngöibti Ngöbökrä, abkokäre tita kukwe nuemna kore mae. Ni Ngöbö kukwei niekä käkwe blitabare mabtä sribi makwebtä, ye kwrere tita kukwe nuemna mae. Erere arato, makwe nüna deme amne, kukwe käme nuen ñakare makwe abtä ja rabadre ruen ngite ñakare mae Ngöbö ngwärecri. Ni ruäre abko ñan tö namani ye nuein mda, aiseté nikani ji blobti.

²⁰ Ye mden abko nakaninkä Himeneobtä amne Alejandrobtä, abkokänti tikwe mikani gare Satanaye mda. Nebtä abko ñan ñäkädre blo Ngöbö rüere kwetre abkokäre.

2

Ngöbö mikadre ütiäte ño gätäte

¹ Timoteo, kukwe mdara jire btä ti tö blitai bäri käne mabe abko krörö: Nitre tödekaka Jesubti ye käkwe jändrän ribe Ngöböye amne blita kwetre Ngöböbe ni jökrä kräke. Erere arato, ja di kärä kwetre Ngöböye ni jökrä kräke amne kuin nie kwetre Ngöböye.

² Ne kwrere arato, ni gobranka krikri btä ni sribikä ütiäte ütiäte gobrankä, ye kräke blita kwetre Ngöböbe, nikwe nünandre jäme amne deme Ngöbö ngwärecri, abkokäre blita kwetre Ngöböbe niaratrekrä.

³ Nita blite kore Ngöböbe, ye abko tä neme tuen kuin Ngöbö ni Diantarikäye amne käta neme nuäre btä.

⁴ Niara tö ni jökrä diaintari amne, kukwe era metre Jesubtä rabadre gare ni jökräye, ie niara tö,

⁵ ñobtä ñan angwane Ngöbö itibe ni jökrä kräke. Erere arato, ni itibe ni kwrere, aibe köböire ni jökrä raba ja mäketä Ngöböbe abko Kristo Jesu ara.

⁶ Kristo Jesu käkwe ja mikani müre ketadre ni jökrä kökatarikrä Ngöbökrä. Ye abko, köböi kitani Ngöbökwé, erere namani bare, niara tö namani ni jökrä diaintari bä mikakäre.

⁷ Ni jökräkwé kukwe ne kadre ngäbti, abkokäre Ngöbökwé ti mikani kukwe ye kädriekä amne ngwianka nitre ñakare israelitareye abko kukwe metre Jesubtä diridre tikwe ietre abkokäre. Ne abra kukwe era erere tita niere; ñan tita ni ngökö.

Ni brare btä ni merire rabadre ño gätäte

⁸ Mdakäre abko, munta gätäre angwane, ni brare brare kä jökräbti käkwe nüna deme amne blita Ngöböbe angwane, küde kaka käin kwe blitakäre Ngöböbe abko ie ti tö. Ni brare brare tä blite Ngöböbe angwane, ñan rabadre romon ni mda mdakrä amne kukwe ñakare nikwe ni mda mda rüere abko blitadre kwe Ngöböbe.

⁹ Mdakäre abko, ni merire merire abko käta Ngöbö mike ütiäte jae, ye rükadre gare ni jökräye, abkokäre ñan ja ngwä kita kwetre ni mda mda okwä mikakäre ja jiebti, akwa ja ükate kuin era metre kwetre, ie ti tö. Amne ñan ja dokwä söka bätäkä ngwarbe kwe, ni mda mda okwä mikakäre ja jiebti. Erere arato, ñan jändrän orore orore kitadre bäri ja ngrabare, ñan jändrän tuäre tuäre amne dän ütiäte ütiäte kita kwetre jabtä.

¹⁰ Akwa sribi kuin nuendre ni mda mdakrä, ñobtä ñan angwane meri mden mden käta Ngöbö mike ütiäte jae käkwe ja kitadre sribi kuin nuene aisete.

¹¹ Mdakäre abko, ni merire merire käkwe ni Ngöbö kukwei dirikä ye kukwei nuadre kä bube amne rabadre juto biare kukwe ye mike täte.

¹² Erere arato, nitre tödekaka Jesubti käta gätäre, ye kánti ni merire käkwe ñan diri jire ni brareye. Erere arato, ñan ja mikadre ni brare brare dänkiene, ie ti tö. Ni merire raba kwekbe,

¹³ ñobtä ñan angwane Ngöbökwé Adán dätebare käne. Abti Eva dätebare kwe aisete.

¹⁴ Erere arato, Adán ngökani ñakare angwane, merire kwe Eva abko namani ngökani tbikwe. Ye kánti Evakwe ja mikani ngite Ngöbö rüere.

¹⁵ Akwa ni merire tä ngäbäkre ngibiare, ye ngwane tödekadre kwatibe kwe Ngöböbti angwane, ni mda mda taredre kwe. Erere arato, nünandre era metre kwe Ngöbö ngwäreki, ye köböire rabadi dianintari Ngöbökwé.

3

Ni tödekaka Jesubti jie ngwianka

¹ Mdakäre abko, kukwe ne abra kukwe era metre abko ti bike niere mae: Nire tö ja mikai nitre tödekaka Jesubti jie ngwianka, ye abko tö sribi kuin nuein.

² Nire erere tö sribi ye nuein abko käkwe nünandre krörö: Tädrera nüne metre ni mda mda okwäbti. Nebtä ni mda mdakwe ñan kädrie blo. Arato meri itibe kwe. Erere arato, ni töbike kuin ja käne amne ni nüne kwekbe amne, ni mda mdata mike ütiäte jae, ni ye kwrere käkwe sribidre. Erere arato, ni juto biare ni menteni kaen ngäbti ja juete amne, ni ie diri gare kuin käkwe sribidre.

³ Erere arato, ni dröbare ñakare amne, ni ngüdrekä ñakare käkwe sribidre amne, ni moto jäme btä ni romone ñakare amne, ni ngwian tarekä ñakare abko käkwe sribidre.

⁴ Mdakäre abko, ni ni mräkä jie tike kuin btä ngibiare kuin amne, tä ngäbäkre kwekwe tö den kuin abko erere ngäbäkreta kukwe mike täte, ni ye abko käkwe sribidre,

⁵ ñobtä ñan angwane ni ie mräkä jie tika gare ñakare kuin käkwe ñan nitre jen Ngöbökwé gätäkä Jesu käbti ngibiadre kuin aisete.

⁶ Erere arato, ni tödekaka krire Jesubti ñan mikadre nitre tödekaka Jesubti jie ngwianka, ñobtä ñan angwane nane ni tödekaka krire Jesubti mikadre sribire angwane, rikadre bike kri ño diablu namani bike kri, kánti Ngöbökwé mikani ja ngie nuen, ye kwrere ñan rakadrekä, abkokäre ni tödekaka krire Jesubti käkwe ñan sribidre.

⁷ Erere arato, ni nitre tödekaka Jesubti jie ngwianka, ye abko nitre tödekaka ñakare Jesubti käta mike ütiäte jae, ni ye kwrere käkwe sribidre, ñobtä ñan angwane niara mikata ütiäte ñakare ne ngwane, niara mikadi yakrä jae angwane, diablukwe kukwe blo mikadre jiete angwane, nane ja mikadre ngite kwe.

Ni ni die mikaka

⁸ Ne kwrere arato, ni krörökrörö mikadre ni ni Ngöbökwé die mikaka: Ni mikata ütiäte jae ni mda mdakwe abko mikadre sribire. Arato ni ja kukwei kite ñakare temen amne, ni dröbare ñakare btä ni ni ngökö ñakare ngwian diankrä jae abko mikadre sribire.

⁹ Mdakäre abko, kukwe era Jesubti mikani gare nie Ngöbökwé kata ngäbti kwe amne, tödekata bti metre; ñan bikata ni tödekaka Jesubti kwrere kwe abko mikadre sribire.

¹⁰ Erere arato, ni mikadre sribi ye nuene, känenkri tä nüne kuin ya, ñakare ya abko mikadre ñäräre käne. Yebti kukwe ñakare kwe, ne ngwane mikadre sribire ni ni die mikaka kwrere.

¹¹ Nitre merire mikata ütiäte jae ni mda mdakwe. Erere arato, meri töbike kuin ja käne amne, jändrän jökräbtä tödekadre bti, meri ye kwrere käkwe sribidre amne, meri näin blite ngwarbe kwäräkwärä ni mda mdabtä abko ñan mikadre sribire.

¹² Mdakäre abko, ni ni Ngöbökwé die mikaka, ni ye abko meri itibe kwe amne, ngäbriänkä kwekwe btä mräkä kwekwe jie tikadre kuin kwe btä ngibiadre kuin kwe.

¹³ Nire nire käta sribi ye nuene kuin, ye abko rabadre bäri ütiäte ni mda mda ngwäreki. Ye kwrere ñan rabadre Kristo Jesu gaire amne, Kristo Jesu köböire rabadre blite jäme Jesubtä ni mda mdabe.

¹⁴ Timoteo, ti tö näin ja tuakäreta mabe yete, akwa ye känenkri tita tarä ne tike mae,

¹⁵ ñobtä ñan angwane nane ti ñan rabata jötrö angwane, ni ja mräkäre Jesu kábtí kákwe nünandre ño abko rabadre gare mae angwane, ma rabadre dirire ietre, abkokäre tita tärä tike mae. Ngöbö níkwe abko Ngöbö nire, amne ürä btä já ju ketatekrä dite krö, ye kwrere nitre gätäkä Jesu kábtí tá niara kukwei era metre mike ütiäte käre.

¹⁶ Kukwe era Jesubtä nämáne tiebe, akwa mtare Ngöbökwé mikanina gare nie. Kukwe námáne tiebe ye abko bäri ütiäte kri níkrä abko köböire ni raba nüne deme Ngöbökrä. Kukwe ye abko nere:

Jesukristo därebare angwane, ngrabare námáne ni kwrere.

Angwane Ngöbö Odei jen kwe bá mikani Ngöbö Üaikwe.

Angele Ngöbökwé kákwe tuani.

Abti kukwe kuin niarabtä diribare kä jökräbti temen.

Kukwe ye mikani era ni kwatikwe kä nebtä amne,

Ngöbö níkani ngwenante kä nuärete kä käinbti.

4

Pablota Timoteo tö den dirikätre blobtä

¹⁻² Mdakäre abko, Ngöbö Üai tá kukwe mike gare metre nie kä mräbtä abko krörö: Kä mrä angwane, ni ruäre kákwe Jesukristo gíbiadikáta amne, üai káme ni ngökaka, ye jiebtí rikadi. Üai káme ni ngökaka kákwe ni tödekaka Jesubti ngwiandi dirikätre blo mike ütiäte jae amne ngwiandi Jesu gibiekáta. Dirikätre blo abko ni bikaka kuin amne ni ngökaka, ie ja ruen ngíte ñakare kukwe kámekáme nuenbtä, kákwe kukwe diribare ietre üai kämenkwe ye diridi ni mda mdaye.

³ Ye abko, ja mikadre gure ñakare abko ni ye jatadi niere. Erere arato, ni ye abko kákwe mrö ruäre dokwä tákadi. Mrö ruäre káme Ngöbö ngwärekre, aisete ñan kwetadre niedi kwetre. Akwa Ngöbökwé mrö dätebare ni kräke, aisete ni tödekaka Jesubti, ie Ngöbö kukwei era metre gare, kákwe mrö jökrä kadre ngäbti kwetadre jae, kuin niere kwärä Ngöböye btä. Mden kisete ni ñan raba mrö ruäre dokwä táke.

⁴⁻⁵ Mrö btä jändrän jökrä dätebare Ngöbökwé abko kuin niebare kwe, aisete ñan käi ngwiandre káme jabtä akwa, níkwe kuin niedre btä Ngöböye, amne Ngöbökwé mrö mikadi kuin biare kwetadre.

⁶ Makwe kukwe ye diri ja mräkätre tödekaka Jesubtiye angwane, ma rabadi sribiká kuin Jesukristokwe. Kukwe metre diribare Jesubtä, ye mata mike táte amne ja töitike btä.

⁷ Akwa kukwe kirakira diän diän amne kukwe mda mda mikanintbe ngwarbe, ye ie makwe ñan olo mika. Akwa makwe dre dre nuendre nünankrä deme Ngöbö ngwärekre, ye jiebtí ma rankwa bäri,

⁸ ñobtä ñan angwane nita nakwenkä ja mikakäre biare amne dite ngrabare, ye abko kuin bkänä níkrä, akwa níkwe ja mikadre juto nünankrä kuin deme Ngöbö ngwärekre, ye abko bäri ütiäte kri níkrä mtare amne, nünakäre kärekäre Jesube arato.

⁹ Aisete kukwe ne abra kukwe era metre abko rabadre era ni jökrä kräke, ie ti tö.

¹⁰ Ne mden kisete nita sribire ja di ngöi jökrä Ngöbökrä, ñobtä ñan angwane Ngöbö nire, btí nita tödeke. Niara abko ni jökrä Diantarikä akwa, niarata nitre tödekaka Jesubti ara jire dentari.

¹¹ Kukwe ne makwe nuemna ja mräkätreye amne makwe diri ietre.

¹² Ma abko bati Timoteo, aisete mata dirire angwane, nane ni ruäre tö rabai ma mike ütiäte ñakare jae, akwa makwe blita jáme amne nuäre ni mda mdaye. Erere arato, makwe nuna kuin metre, amne makwe ni mda mda taredre. Ye kwrere arato, makwe ja mika ngíte ñakare ja mräkätre tödekaka Jesubti okwäbti, ne ngwane mata nüne ño rükadre gare nitre tödekaka Jesubtiye. Angwane ni jökrä tö rabadi nünai ma kwrere, kákwe nünandi kore, ne ngwane ma bati akwa, ma rabadi ütiäte ni mda mdakrä.

¹³ Timoteo ti ngämi nementa yete angwane, munta gätäre ye kánti makwe ñäkä käre Ngöbö Kukweibtä ja mräkätre kräke. Makwe Ngöbö Kukwei nie ietre amne makwe Ngöbö Kukwei diri ietre arato.

¹⁴ Ngöbö Üai kákwe ja di biani mae sribi ye nuenkäre, ye abko makwe ñan tuemetre ngwarbe jire chi, akwa yebti makwe sribi janknu. Ngöbö Üai köböire ni mda mda jie ngwianka kákwe kise mikani mabti angwane, kukwe niebare kwetre ma mikakäre biare sribi yekrä. Kä ye ngwane Ngöbö Üaikwe ja di biani mae, ma die mikakäre sribibtä. Ye mden kisete, makwe ñan tuemetre ngwarbe.

¹⁵ Kukwe yebtä ma rankwa bäri, ie ti tö. Yebtä makwe sribi bäri mda köbö kwatirekwatire, mata nüne bäri Ngöbökrä rabadre gare ni mda mdaye abkokäre.

¹⁶ Mata nüne ño, yebtä makwe töbika kuin ja käne amne, kukwe diri makwe, yebtä makwe töbika kuin ja käne arato. Ye erere makwe ja ngibia au ne ngwane, ni kwati ma kukwei nuaka abko Ngöbökwé dianditari siba mabe gwaire.

5

Timoteokwe ni töi diandre ño

¹ Mdakäre abko, ni unsunine unsunine abko käkwe ja mikadre ngite abtä töi diandre, ye ngwane makwe ñan ngra ngra bti, akwa ni rün nikwe mikata ütiäte jae, ye kwrere makwe ni unsunine unsunine kita nüne bäri Ngöbökrä. Ni bati bati abko ni etba nikwe btä mäträta, ye kwrere makwe mäträ btäre.

² Erere arato, ni meye mikata ütiäte ño jae, ye kwrere makwe meri unbre unbre mika ütiäte jae. Ni merire bati bati abko ni ngwai nikwe mikata ütiäte, ye kwrere makwe mika ütiäte. Angwane, makwe ñan ja mika ngite jire chi bentre.

Ni merire merire kån brare krütani die mikadre ño

³ Mdakäre abko, ni merire merire, kån brare krütani, aiseté tä kaibe amne, mräkä ñakare ngibiakä, ye abko nitre tödekaka Jesubti käkwe ngibiadre abko makwe diri kore ietre.

⁴ Akwa meri kån brare krütani, ye ngäbriänkä btä bränkä tärä, ne ngwane ngibiadre kwetre. Meri ye käkwe niaratre ngibiabare ño, ye ütiäre ngibiadreta kwetre, ñobtä ñan angwane tuen bäri kuin Ngöböye aiseté.

⁵ Meri kån brare krütani abko ngibiakä ñakare, akwa tä nüne kaibe era metre abko tä tödeke kwatibe Ngöböbti amne tä blite Ngöböbe dibire rare ja di kärere ie, meri ye kwrere abko die mikadre.

⁶ Akwa meri mda mda abko kån brare krütani, akwa tä kukwe nuene blo blo kä ngwiankrä nuäre jabtä jirekäbe, meri ye tä nire, akwa ni krütani, kwrere jire tä Ngöbö ngwäreki, ñobtä ñan angwane tä tödeke ñakare Ngöböbti. Meri ye abko ñan die mika.

⁷ Nitre tödekaka Jesubti btä ñan ñäkädre blo, abkokäre makwe diri kore ietre,

⁸ ñobtä ñan angwane ni tödekaka Jesubti akwa, ni mräkä jen nikwe, ye nita ngibiare ñakare, ne ngwane nita Ngöbö Kukwei kite temen. Erere arato, nita kukwe nuene bäri käme ni ñakare tödekaka Jesubti ye ngwä, ñobtä ñan angwane ni ñakare tödekaka Jesubti käta mräkä kwekwe ngibiare.

⁹ Meri kån brare krütani abko tä nüne kaibekaibe abko kä tikadre täräbtä die mikadre abko nere: Meri ie kä gre ketamä (60) mentokwäre, kån brare krütani amne, brare kwe ben nünabare käre kwe amne ñan ja mikani ngite kwe brare mdabe, meri ye abko kä tikadre täräbtä die mikakäre.

¹⁰ Meri kån brare krütanikrütani käkwe ngäbriänkä ngibiabare amne ni menteni kata ngäbti kuin kwe amne tä ni deme deme Ngöbökwé ye ngoto bätete kräke kakäre ngäbti kuin ja gwiriete, meri ye kwrere abko kä tikadre täräbtä die mikakäre. Erere arato, ni ja tare nikaka die mikata kwe amne tä sribi kuinkuin nuene bätäkä ngwarbe ni mda mdakrä, meri ye kwrere abko kä tikadre täräbtä die mikakäre.

¹¹⁻¹² Akwa meri bäri bati bati abko kä ngämi gre ketamä (60) ie, kån brare krütani amne tä kaibe, ye abko ñan kä tika täräbtä die mikakäre, ñobtä ñan angwane nane niara kä tikadre täräbtä die mikakäre angwane, ñan ja mikadre gure mda niedre kwe Jesuye, abti tö rabadreta ja mikaita gure bobuta, ye ngwane ja kukwei kitadreta temen kwe abtä rabadre ja mike ngite Jesu rüere, aiseté ñan kä tikadre täräbtä die mikakäre.

¹³ Erere arato, meri bati bati kån brare krütani die mikadre angwane, kä rabadre krene btä angwane, rikadre blite ni mda mdabtä ju kwatirekwatire te. Arato rikadre ja mike kukwe jökräte siba amne kukwe btä ñan blitadre jire abko rikadre kädriere.

¹⁴ Mden kisete ni merire merire bati bati, kån brare krütani abko käkwe ja mikata gure, ngäbäkre ngibia kwe amne ju ngibia kuin kwe jakrä. Ne kwrere meri ye ñan kädriedre blo rüekwe abko ie ti tö.

¹⁵ Ye abko, meri bati bati, kån brare krütani namani kaibe abko ruäre käkwe Jesu tuaninametre, käta näin Satana jiebtä.

¹⁶ Meri kån brare krütani, ye abko nane nitre tödekaka Jesubti ngätäite mräkä merire tärä kån brare krütani amne tä nüne kaibe, ne ngwane mräkä kwekwe käkwe die mika. Ne kwrere nitre tödekaka Jesubti mda mda rabadre meri mda mda kån brare krütani amne ngibiakä ñakare ye die mike, sribi ñan rabadre kabre dikaro nitre tödekaka Jesubti kräke abkokäre.

Kukwe mda mda nitre jie ngwiankabtä

¹⁷ Mdakäre abko, ni ji ngwianka ye tä nitre tödekaka Jesubti jie ngwena kuin ne ngwane, nitre tödekaka Jesubti kwetre raba tare kri amne mika ütiäte kwetre jae. Erere arato, die mika kwetre mröbti amne ngwianbti. Akwa nitre jie ngwianka käta Ngöbö kukwei dirire

bäri, ye abko mika bäri ütiäte amne die mikadre mröbti amne ngwianbti abko makwe diridre, ie ti tö.

¹⁸ Tita niere kore, ñobtä ñan angwane Ngöbö Kukweita niere krörö: “Buey trigo münantekä, ye munkwe ñan kö kita ngwärebtä,” nieta. Erere arato, “Ni sribikä, ie sribi ütiä biandre,” nieta kore Ngöbö Kukweibtä. Ne mden kisete makwe diri kore nitre jie ngwiankabtä.

¹⁹ Mdakäre abko, ni ni Ngöbökwie jie ngwianka käta ja mike ngite abko ni itibe jata niere angwane, makwe ñan kukwe mika era. Akwa ni nibu, ni nimä käkwe kukwe arabe nie mae angwane, kukwe ka ngäbti makwe.

²⁰ Angwane ni Ngöbökwie jie ngwianka mden mden tä ngite, ye ie makwe ñäkä gätäte nitre Ngöbökwie ye ngwäreki jökrä. Nebtä abko, ni mda mda btä kä jürä rabadre amne, ñan tö ngwiandre ja mikai ngite kwetre abkokäre.

²¹ Timoteo, Ngöbö btä Kristo Jesu amne angele dianinkä jakrä Ngöbökwie, ye ngwäreki ti bike kukwe ütiäte niere mae, ne erere makwe nuen abko krörö: Ni ma kukwe muko ya, ñakare ya tä sribire ji ngwianka kwrere, akwa nane kukwe raba kwetre makwe ga angwane, makwe tö dian amne makwe die mika ja kwrere jökrä, ie ti tö.

²² Erere arato, makwe ñan kise mika jötrö ngwarbe nibti mikakäre sribire ji ngwianka kwrere, akwa makwe töbika kuin käne niara mikakäre sribire, ñobtä ñan angwane nane makwe ni kukwe kämekäme nuenkä mikadre sribire, yebtä abko kukwe käme nükebti mae siba nütü rabadre mabtä. Makwe ja ngibia kuin deme kukwe kämekäme ngäniene.

²³ Timoteo, ma ngirie abko neme bren käre. Erere arato, bren mda mda tä neme mabtä. Ye kräke abko, makwe uba döi kwaka ña kiakia angwane, makwe ñan ñö aibe ña abko ti tö niei mae.

²⁴ Nitre tödekaka Jesubti abko ruäre käta kukwe nuene käme, mika ngämi ja ngwäreki, känenkri tarä neme gare ni jökräye; akwa ni ruäre abko tä kukwe nuene kämekäme mikata ja ngwäreki amne batibe neme gare.

²⁵ Ne kwrere arato, ni ruäre tä jändrän kuinquin nuene abko tä neme gare ni jökräye; akwa ni ruäre abko tä jändrän kuinquin nuene tiebe abko gare ñakare. Abti kira erere angwane, tä niken neme gare ni jökräye. Ne mdenbtä abko, makwe töbika kuin ja käne abko ti tö nie mae Timoteo.

6

Nitre klabore käkwe sribidre ño bkänkäkrä

¹ Mdakäre abko, nire nire abko tä klabore ni mdakwe, ruäre abko tä ja tare nike, akwa bkänkä kukwei mika ütiäte kwetre jae, niarakwe ñan ñäkädre blo Ngöbö rüere amne kukwe dirita nunkwe ye rüere abkokäre.

² Akwa nane ni klabore ye bkänkä käta tödeke Jesubti arato ne ngwane, ñan bkänkä mikadre ngwarbe kwe jae, ñobtä ñan angwane niara ja mräkäre Jesu käbti arato. Akwa bäri sribi kuin kwe bkänkäkrä, ñobtä ñan angwane tä niaratre mräkä Jesu käbti die mike amne tä tare kri kwe arato aisete. Kukwe ne abko makwe diri amne nuemna nitre klabore tödekaka Jesubti yeje.

Kukwe blo dirikätre tä nüne ño

³ Nire nire käta kukwe dirire blo amne kukwe diribare era metre ni Dänkien Jesukristokwe, ye tä kaen ngäbti ñakare, erere arato kukwe dirita era metre Ngöböbtä, ye tä kaen ngäbti ñakare,

⁴ ni ye abko töi ñakare, akwa tö bikabtä kri. Ye mden abko jatadi dirire bä jene abko krörö: Niara töta neme ja kwetai bäri kabre krübäte ni jökräbe kukwe ngwarbebtä. Ye mden kanti ni ruäre töta neme ja tuai ni mda kwrere, abtä tä bätä ngwen ni mdabtä jändrän dokwäre. Ne mdenbtä ni ruäre motota neme romon jakrä kwärikwäri amne ñäkäta niken diän diän jae kwärikwäri ja kukwe ñan mikata niken era jae kwärikwäri.

⁵ Erere arato, ni ye tä niken rüre käre jabe kwärikwäri. Ni ye abko töi käme, aisete kukwe era metre Jesubtä dianinkä niaratrekän. Ngöböta nitre tödekaka Jesubti die mike ngwian gananbtä nieta kwetre, aisete tä bike nüne metre ngwian diankrä jae.

⁶ Era metre Ngöböta nitre tödekaka Jesubti die mike, akwa nita nüne metre Ngöbö ngwäreki amne jändrän ño ño tä nikwe, ye käi tädre nuäre nibtä, ye abko bäri ütiäte

⁷ ñobtä ñan angwane ni därebare angwane, ni därebare bütiere, jändrän ñakare nikwe. Erere arato, ni krütadi angwane, ni ñan rikadre jändrän ngwena jire chi jabe.

⁸ Ne mden aisete, mrö tarä kwetadre nie amne dän amne ju tarä nikwe, ye abko käi rabadre nuäre nibtä.

⁹ Ye abko käi rabadre nuäre nibtä, ñobtä ñan angwane ni mda abko jändrän ye tarä kwetre akwa, töta nebe rabai ngwian btä jändrän bkäne bäri kabre abko tä niken ja mike ngite.

Erere arato, tätre niken ja dokwä mike kö okwä Satanakwete. Erere arato, jändrän bätäkä ngwarbe ye mdei tä neme ietre, ye käta kukwe taretare ngwena kräke amne mrä tä ni se juen ngwarbe.

¹⁰ Kukwe tä nakenkä kore ni yebtä, ñobtä ñan angwane nita ngwian tarere, ye abko tä niken ni mike kukwe nuene blo blo ngwian diankrä jae. Ni ruäre töi kore abko käkwe Jesu kukwei tuanimetre, abkokänti tä ja tare nike kri mtare.

Pablota Timoteo tö den mrä

¹¹ Akwa ma abko ni Ngöbökwé, aisete ma gitia kukwe käme jökrä ye ngäniene amne nuna era metre Ngöbö ngwärecri, yebtä makwe ja kita. Nuna Ngöbökrä amne tödeka Ngöböbti jändrän jökräbtä, ye jiehti ma rankwa. Erere arato, ni mda mda taredre, ye jiehti ma rankwa angwane, makwe nünanka dite tödekabtä Jesubti. Erere arato, makwe blita ja moto jämenbti ni mda mdabe.

¹² Makwe tödekadre käre Ngöböbti, yebtä makwe nünanka dite jabtä rükäre kukwe kämekäme rüere. Makwe ja töi mikaba kwatibe Ngöböbtä angwane, makwe nieba ni kwati ngwärecri, ye ngwane Ngöbökwé ma käräbare nüne kärekäre jabe, aisete makwe nünandre kärekäre Ngöböbe, ye makwe ketate dime kisete jakrä, ie ti tö Timoteo.

¹³ Mtare Ngöbö jändrän jökrä mikaka nire, ye ngwärecri amne, Kristo Jesu btä kä jürä namani ñakare, käkwe ja niebare metre Poncio Pilatoye, Kristo Jesu ye ngwärecri ti tö niei krörö mae Timoteo:

¹⁴ Jesukristo rükadita, ye känenkri niara kukwei mika täte jökrä makwe. Erere arato, makwe nünandre ño, ie niara tö, ye kwrere makwe nuna niara ngibiare ngäbti kwärä.

¹⁵ Ngöbö tö rabai Jesukristo juenta ñongwane, erere juandita kwe angwane, niara rükadita. Ngöbö aibe gobran kri. Niara aibehtä käita neme nuäre metre. Erere arato, Ngöbö abko Jrei kri, jrei jire jökrä kä nebtä bti ta amne niara abko tä Dänkiene dänkin jökrä kä nebtä yebti ta.

¹⁶ Ngöbö aibe därebare ñakare amne krüte ñakare. Niarata nüne kärekäre, ñotra trä ngwen bürere te tä nüne. Ye känti ni ñakare raba neme ja ken ben. Ni kä nebtä käkwe ñan Ngöbö tuabare gwärere amne Ngöbö ñan tuare nikrä arato. Ngöbö aibe raba ütiäte ni jökrä kräke kärekäre amne niara aibe di kri. Abko kore se.

¹⁷ Timoteo, ni ngwian bkänkä krikri, ye abko käkwe ñan bika kri amne, ñan ngwian kabre kwetre, yebti tödeka kwetre, makwe nie ietre, ñobtä ñan angwane ngwian tä niken ngwarbe jötrö amne, ni ñan raba ngibiare kärekäre. Akwa Ngöbö abko käta jändrän kuin bien kabre nie, kä mikakrä juto nibtä. Yebtä ni ngwian bkänkä krikri käkwe tödeka Ngöböbti, makwe nie ietre.

¹⁸ Mdakäre abko, ni ngwian bkänkä krikri ye käkwe ñan ja mika käbare, amne jändrän kuin nuen kabre kwe ni mda mdakrä ngwian kwetre yebti.

¹⁹ Nünandre kore kwetre angwane, rabadi jändrän kuin bkäne kabre kä käinbti amne rabadi nüne kärekäre Ngöböbe, makwe nie kore ietre Timoteo.

²⁰ Timoteo, kukwe kuin Jesukristobtä mikani gare mae, ye makwe ngibia kuin jakrä. Erere arato, kukwe ngwarbe diän dian ütiäte ñakare, ye makwe ñan ja olo mika ie. Mdakäre abko, nitre ruäre tätre dirire blo, akwa tä dirire kuin era metre tä nütüre au jabtä, akwa dirita blo kwetre. Ni dirikä blo ye kwrere abko, ben makwe ñan ja geta jire chi,

²¹ ñobtä ñan angwane ni ruäre käkwe kukwe blo ye mikani ütiäte jae, aisete tä Jesu mike ütiäte ñakare mtare amne nikani dikekä Ngöböbtä mento.

Ngöbö raba ja moto mike kuin makrä. Abko kore se. Ne ngörä.

Tärä Tikani Bobukäre Pablokwe Timoteokrä 2 Timoteo

Pablo nämane ngite kä teri juta Romate, bti kä 62-63 angwane tikaninteta. Yebti niara nikaninta bäbkäkäre kukwe kuin Jesubtä ngwenante kä ngrabare temen. Angwane tärä tikani kena kwe Timoteoye amne Titoye. Yebti kä 66-67 näre angwane, Nero namani gobrane emperador kwrere angwane, Pablo kitaninta ngite bobukäre kwe. Pablo namantina ngite angwane, tärä ne tikani kwe Timoteoye. Kä ye angwane, Pablo mikani ngite bä jene, ñobtä ñan angwane käne niara nämane ngite gwi ja juete. Akwa kitani ngite bobukäre angwane, kä käme amne kä tibo kánti kitani ngite. Erere arato, Pablo mäkäninte kadenanbti. Nete Pablokwe sribibare mrä amne müre ketadi abko namani gare ie, aisete kukwe tikani krörö kwe Timoteoye:

Bäri käne abko ja namani ruen kaibe Pabloye, abtä namani ulire, ñobtä ñan angwane niara kukwe muko Figelo amne Hermógenes kákwe kä mikaninkä btä. Erere arato, Demas amne ni mda mda kákwe kä mikaninkä btä, aisete Timoteo jatadre niara die mike, ie niara tó namani.

Bobukäre abko, nitre tödekaka Jesubti namani ja tare nike emperador Nero kisete. Yebtä abko, Pablo namani töbike kri, kákwe Timoteo töi diani nünenkä dite jabtä kukwe Jesukwe yebtä. Erere arato, Timoteo kákwe kukwe kuin ye diridre janknu, niebare kwe ie. Mdakäre abko, Timoteo tädre biare ja tare nikakäre kukwe kuin Jesubtä ye dokwäre, niebare Pablokwe.

Nikwe nünandre ño metre Jesu kräke abko tärä ne tä niere nie. Erere arato, ni rabadre juto biare ja tare nikakäre tödekabtä Jesubti abko tärä ne tä niere nie. Tärä ne abko tikani mrä Pablokwe nütüta.

Pablota köbö ngwentari Timoteoye

¹ Ti Pablo käta tärä ne tike mae Timoteo. Ja töi jenbti, Ngöböke ti mikani Kristo Jesu kukwei ngwianka. Ni rabadre nüne kärekäre Ngöböbe Kristo Jesu köböire, niebare kira Ngöböke, ye mden abko tita niekäre mtare ni jökräye.

² Timoteo, ma ti ngobo jen tikwe kwrere. Ma tare kri tikwe. Ngöbö ni Rün nikwe btä Kristo Jesu ni Dänkien kákwe ja moto mika kuin makrä. Erere arato, ma raba ruentari tare ietre amne, makwe nüna jäme niaratre diebti abko ie ti tö Timoteo.

Pablokwe ja di käräbare Ngöböye Timoteokrä

³ Timoteo, ti mräkätre kirakira kákwe sribibare era metre Ngöbökrä, ye kwrere tita sribire kräke amne, ja ruen ngite ñakare tie Ngöbö ngwäreki. Tita blite dibire rare Ngöböbe angwane, mata nüketa töre tie angwane, tita kuin niere ie makrä.

⁴ Ti jataba yäketa angwane, ma rababa ti müaire, ma okwä ñoi rababa nimiente ti okwäbti, ye tä nüketa töre tie amne, ti töta neme ma tuaita jötrö, kä ngwiankäreta nuäre jabtä.

⁵ Mata tödeke kwatibe Ngöböbti, ye tä nüketa töre tie arato Timoteo. Timoteo, ma mölöi Loida btä ma meye Eunice kákwe tödekani kwatibe Ngöböbti käne, ne kwrere arato mata tödeke kwatibe bti gare kuin tie.

Timoteokwe ñan Jesu gaidre

⁶ Mata tödeke kwatibe Jesubti, aisete ti tö kukwe ngwian töreta krörö mae: Tikwe kise mikaba mabti sribi mikakäre ma kisete angwane, Ngöböke ja di biani mae sribi jakwe nuenkrä. Ngöbö di ye abko makwe mika bäri ütiäte jae abko tita niere mae,

⁷ ñobtä ñan angwane Ngöböke ja Üai biani nie, ni die mikakäre nüne dite niarakrä amne, ni mda mda tarekäre, erere arato töbikakäre kuin ja käne. Ngöbö ñan tä ni mike kä jürä ngwen jabtä.

⁸ Ne aisete ma ñan raba ja gaire jire chi blitakäre ni Dänkienbtä. Erere arato, tita ngite ni Dänkien Jesukristo kukwei diribtä, nebtä ma ñan raba ja gaire, akwa kukwe kuin Jesukristobtä, ye kräke makwe ja tare nikadre tibe gwaire Ngöbö diebti.

⁹ Ngöbö kákwe ni dianintari amne ni käräbare nünakäre deme kwe. Ne ñan nikwe jändrän kuin nuenbare abko ütiäre Ngöböke ni dianintari, akwa kira Ngöbö ngämi kä ne dätere, känenkri niarakwe ni tarebare ja moto kuinbti angwane, ja töi jenbti kukwe mikaninthe au kwe, kukwe kuin nuene ni kräke Jesukristo köböire.

¹⁰ Ngöböke kukwe mikaninthe kore, mden abko bä mikanina kwe nie. Kristo Jesu ni Diantarikä nükani kä nebtä angwane, kukwe mikaninthe kira Ngöböke nükani gare nie. Kristo Jesu kákwe gata die juani ngwarbe. Erere arato, ni rabadre nüne kärekäre Ngöböbe, ye abko mikani gare kwe nie kukwe kuin jabtä ye köböire.

¹¹ Kukwe kuin Jesubtä, tita tike mae, ne mden abko Ngöbökwe ti mikani kädriere ni kwatibe. Erere arato, ti mikani kukwe kuin ye ngwianka kwe amne, ti mikani kukwe kuin ye dirikä kwe arato.

¹² Ne mdenbtä abko, tita ja tare nike mtare, akwa yebtä ti ja gaire ñakare, ñobtä ñan angwane ni gare kuin tie, bti tita tödeke. Jesukristo di kri bti tita tödeke, aisete niara jatadita, ye ngäbti abko ti ngbiadi kuin kwe ño tikwe ribebare ie ye kwrere.

¹³ Timoteo, ma rabadre dirire metre, abkokäre tikwe kukwe diribare ño ño, ye kwrere makwe diri. Angwane makwe tödekadre kwatibe Kristo Jesubti amne, makwe ni mda mda taredre.

¹⁴ Kukwe kuin era metre Jesubtä mata dirire, yebti abko makwe kukwe ngwarbe ngwarbe kra. Ngöbö Üai Deme tä nüne nißtä abko diebti makwe kukwe ngwarbe kra.

¹⁵ Mdakäre abko, ti kani ngite angwane, nitre Asiabo nünanka Roma nete käta tödeke Jesubti, ye käkwe kä mikaninkä jökrä tibtä. Erere arato, nuenbare Figelokwe amne Hermógenekwe tibtä abko garera mae.

¹⁶ Ti nämane ngite, akwa Onesiforo abko rababa ti gaire ñakare amne, batire batire rababa nuke ti moto mike nuäre nete. Niara ye abko ni Dänkien ie raba ruentari tare tikrä näre.

¹⁷ Onesiforo nämane Roma nete angwane, namani ti känenentari kisere, namani jadüke ñakare abti ti kwantariba ie.

¹⁸ Amne ni nämane ngite, akwa Onesiforo angwane, ni die mikaba kri kwe. Ye tä töre kuin mae ruen tie Timoteo. Ye abko, ni Dänkien Kristo Jesu rükadita, ye ngwane Onesiforo raba ruentari tare ie abko ie ti tö.

2

Timoteokwe nünandrekä dite jabtä ja tare nikakäre Jesu dokwäre

¹ Timoteo ma abko ti ngobo tikwe kwrere. Kristo Jesu tä ni tarere ja moto kuinbti, ye diebti makwe nünanka dite, ie ti tö.

² Erere arato, tikwe diribare ni kwati okwäbti angwane, makwe ti kukwei nuani, ye abko nire nire bti tödekadre amne rabadre Ngöbö kukwei dirire kuin, raba tuen mae, ye ie makwe kukwe ye dirita, niaratre käkwe diridreta ni mda mdaye ja täritäri abkokäre.

³ Timoteo, ma abko rükä Kristo Jesukwe, aisete ni rükä tä biare ja tare nike, ye kwrere ma raba ja tare nike tibe tödekabtä Jesubti angwane, makwe nünanka dite Jesukrä.

⁴ Nitre rükä kuinquin tä ja kite ñakare jändrän mda mdabtä kä mikakäre nuäre dänkienbtä, ye kwrere makwe ñan ja kita jändrän mda mdabtä amne, sribi Kristo Jesukwe aibeßtä makwe ja kita, kä mikakäre nuäre btä.

⁵ Erere arato, nitre jadakaka abko kräke kukweta ükaninte jadakakrä metre, akwa kukwe ye mikata ñakare täte ne ngwane, ñan tä ganane, aisete korona bianta ñakare ietre. Akwa nitre jadakaka tä kukwe mike täte, köböire tä ganane angwane, korona bianta ie mikakäre ütiäte. Ye kwrere Ngöbökwe kukwe ükaninte, erere mata nuene, köböire Ngöbökwe korona biandi mae.

⁶ Erere arato, ni sribikä tirete käta sribire tare krübäte, aisete nura öta näire, niara ara jire, ie biandre käne. Ye kwrere Ngöbökwe jändrän kuin biandre mae, abkokäre makwe sribi ja di ngöibti Kristo Jesukrä.

⁷ Timoteo, tita kukwe ketamä bä mike mae sribi Jesukristokwebtä, neßtä makwe töbika käre angwane, ni Dänkien käkwe mikadi gare jökrä mae abko gare tie.

⁸ Erere arato, kukwe krörö ne makwe ngwian töre käre jae: Jesukristo krütani, abti Ngöbökwe mikaninta nire. Niara abko jatani jrei David tukwe mräkäkri. Kukwe ye abko kukwe kuin Jesukristobtä mikata gare tikwe.

⁹ Ye mden dokwäre tita ja tare nike kri amne ni ja mikaka ngite kri mäkäteta kadenante, kwrere jire tita mäkäninte kadenante; akwa Ngöbö kukwei abko ñan tä mäkäninte kadenante, ñobtä ñan angwane ni kwati tä kädriere.

¹⁰ Ye mden kisete tita ja tare nike bätäkä ngwarbe. Ni dianinkä jakrä Ngöbökwe abko rabadre dianintari jökrä Kristo Jesukwe amne rabadre nüne kärekäre kä nuärete, abkokäre tita ja tare nike bätäkä ngwarbe.

¹¹ Kukwe ne abra kukwe era metre abko rabadre era ni jökrä kräke: Nikwe tödekani Jesubti angwane, ni krütani ben,
ye kwrere arato nikwe nünandi ben.

¹² Nikwe nünandrekä dite jabtä ja tare nikakäre niara dokwäre,
ne ngwane niarakwe gobrandi, kanti nikwe gobrandi siba ben.
Akwa nikwe niara rükandrete ne ngwane,
ni rükandite kwe arato.

¹³ Nikwe Jesukristo gibiarekäta akwa,

niara abko kākwe ja kukwei mikadi tāte kāre, ñobtä ñan angwane niara abko ñan raba ja kukwei kite temen.

Sribikā kuinkuin tā sribire ño abko Pablokwe niebare

¹⁴ Timoteo, nitre dirikā mda mda kākwe ñan ja kwetadre kukwe ngwarbe ngwarbebtā, tikwe nieba, erere makwe nieta ietre Ngöbö okwābti abko erere nuendre kwetre, makwe nie ietre janknu, ñobtä ñan angwane ja kwetata ngwarbe, ye abko tā ni die mike ñakare amne, tā ni kukwe nuaka nuaka ngwianta Jesu gibiekāta, aisete ñan ja kwetadre abko makwe nie metre ietre.

¹⁵ Erere arato, ni sribikā ütiāte Ngöbökwē kāta Ngöbö kukwei metre Jesubtä dirire metre ta, abtä sribi gaire ñakare, ye kwrere ja di ngöibti makwe Ngöbö kukwei diri metre angwane, ma ñan raba sribi gaire Ngöbö ngwārekri Timoteo.

¹⁶ Kukwe ngwarbe diān diān ütiāte ñakare, yebtä makwe ñan ja kita, ñobtä ñan angwane ni ñāke ngwarbe kore abko kāre tā niken kukwe nuene bäri kāmekāme mda.

¹⁷ Erere arato, kukwe dirita kwetre ye tā niken niren ni kwati ngätāite abti mrā ni kwatita nāin kukwe ngwarbe jiebti. Ye mden kwrere abko dirita Himeneokwe amne Filetokwe.

¹⁸ Kukwe era metre Jesubtä dirita ñakare kwetre. Ni krütani rükadreta nire abko erere namanina bare, tātre niere, ye kāta ni ruāre mike Jesukristo gibiekāta.

¹⁹ Akwa nitre tödekaka metre Jesubti abko kākwe ñan Jesu gibiaikāta, ñobtä ñan angwane nitre tödekaka Jesubti abko ürā kwrere. Ürä nökata kuin nguse angwane, ñan tā juen ngitiekā, aisete juta neme dite. Ye kwrere jire ni tödekaka metre Jesubti tā mikani Ngöbökwē abko btā kukweta tikani krörö: “Ni jen Ngöbökwē erere gare jökrā Ngöböye” amne, “Ni jökrā kāta ja di kārere ni Dänkien Ngöböye, ye kāta kukwe kāmekāme kite temen,” abko tā tikani kore btātre. Nebtä Ngöböta ni jen kwe metre ngibiare kuin ñan Jesu gibiadrekāta abko tā gare nie.

²⁰ Kukwe nebtā abko, ti bike kukwe mda bä mike mae Timoteo abko krörö: Ni jāndrān bkānkā kri gwiriete ñan oro btā plata dātebare blatore amne basore aibe tā kwe amne, kri kukwān btā dobro dātebare blatore amne basore tā kwe arato. Akwa jāndrān kuin orore btā platore abko tā ni ütiāte ütiāte kakrā ngābti amne, kri kukwān btā dobro sribebare blatore amne basore, ye abko tā sribi ngwarbe ngwarbekrā gwita.

²¹ Ye kwrere abko, nitre tödekaka Jesubti kākwe ja ngibiadre kuin deme nitre dirikā ngwarbe ngwarbe ngāniene ne ngwane, jāndrān kuin ütiāte ye kwrere jire ni rabadi Ngöbö ngwārekri amne, ni mikadi kuin deme ni Dänkienkwe, sribi kuinkuin bātākā ngwarbe nuenkāre jakrā.

²² Timoteo jāndrān kāmekāme mdei tā krübāte ni bati batiye abko ngāniene ma gitia. Akwa nūna metre Ngöbökrā, yebtä makwe ja kita amne tödeka kwatibe Ngöböbti amne ja taredre kwārikwāri, amne nūna jāme, ye jiebti ma rankwa bäri nitre tōi deme deme kāta blite Ngöböye yebe gwaire abko ie ti tō Timoteo.

²³ Erere arato, kukwe ngwarbe, btā ja kwetata niken kwārikwāri, yebtä ni kwati tā niken neme romon jakrā abko garera mae, aisete kukwe ye kwrere btā makwe ñan ja kweta siba.

²⁴ Ye abko, ni sribikā ni Dänkienkwe abko ñan tādre ja kwete ni mda mdabe, akwa ni dirikā ye abko tādre ja gete jāme ni jökrābe. Arato rabadre Ngöbö kukwei dirire kuin. Erere arato, ñan moto rabadre romon ja dokwāre.

²⁵ Ja moto kuinbti, niarakwe niara rüe tōi diandre, ñobtä ñan angwane nane Ngöbökwē nitre ye tōi kwitadre angwane, kukwe kāme kitadre temen kwetre amne kukwe metre Jesubtä rükadre gare ietre.

²⁶ Angwane diablukwe niaratre kani ngite ja mikakāre tāte ye gadre kwetre jabtā amne jatadre tödeke Jesubti, abkokāre tōi diandre kore Timoteo.

3

Kā mrā angwane ni kwati rabadi nūne Ngöbö rüere

¹ Timoteo, kukwe mda rabadre gare mae abko krörö: Kā mrā angwane, kukwe rabadi nakenkā taretare krübāte,

² ñobtä ñan angwane ni kwati rabadi ja tarere kaibe au, amne rabadi ngwian tarere bäri. Erere arato, ni kwati rabadi ja kākitekā au amne rabadi bike kri ni mda mdabtā. Ni kwati kākwe ñākādi diān diān gwārere ni mda mdaye amne, rün btā meye ñan kukwei mikadi tāte kwetre. Ni mdakwe jāndrān kuinkuin nuendi krāke akwa, ye rabadi tuen ütiāte ñakare ietre amne, Ngöbö rabadi ütiāte ñakare krāke arato.

³ Erere arato, ni kwati ñan rabadi ni mda mda tarere jire chi amne, kukwe nuenbare rüere, ye abko ñan diandi jabtā ta kwetre. Erere arato, rabadi blite ngwarbe ni mda mda rüere, tō rabadi kukwe kāmekāme nuene bātākā ngwarbe, erere rabadi nuene jökrā, ñobtä

ñan angwane ñan rabadi ja tõi ketebtä. Erere arato, rabadi kukwe nuene blo ni mda mdabtä abko käi rabadi juto btätre, akwa jändrän kuin rabadi tuen käme ietre.

⁴ Erere arato, rabadi kukwe muko kwekwe kite ngite ngwarbe, kä jürä rabadi ñakare btä kukwe kämekäme nuene. Rabaditre bike bäri krikri ni mda mdabtä, tõi rabadi kä ngwen nuäre jabtä, akwa Ngöbö taredi ñakare kwetre.

⁵ Nitre tödekaka era metre Jesubti, kwrere jire ja bä mikadi kwetre akwa, täditre kukwe nuene kämekäme, yebtä abko Ngöbö di kri mikadi ngwarbe kwetre. Ne mden kisete, kä mrä angwane kukwe jatadi nakenkä tare krübäte kore.

Timoteo, ni tõi kämekäme ye kwrere ben makwe ñan tõi ngwian ja gete jire,

⁶ ñobtä ñan angwane ni ye kwrere abko tä niken ni ngökakäre ju kwatirekwatire te kwäräkwärä, käta meri töbike ñakare ja käne ngökö jae. Ne abko raba nuene ñobtä ñan angwane meri ye abko ie jata neme ruen ngite krübäte Ngöbö ngwäreki amne, käre tä kä kwitekweite jabtä.

⁷ Meri ye kwrere käre tätre ja tötike Ngöbö kukweibtä akwa, kukwe diribare blo Ngöböbtä, yebtä tätre ja tötike, aisete tödekadre era metre Jesubti abko ñan tä nüke gare jire chi ietre.

⁸ Nitre kukwe dirikä blo ye käre tä ja mike kukwe metre Jesubtä rüere, sukia nibu kädian nämane Janes btä Jambres namani Moisés rüere ye kwrere. Nitre ye tötä ngwarbe kukwe kämekäme aibehtä amne tä tödeke ñakare mda Ngöböbti.

⁹ Akwa ni nibu namani Moisés rüere, btä kukwe nakaninkä ño, ye kwrere rakadikä nitre tõi kämekäme btä, ñobtä ñan angwane tõi ñakare, ye abko gadi ni jökräkke btätre amne, ni kwati ñan rabadi nekete mda niaratrebe, ye raba gare mae Timoteo.

Pablokwe Timoteo tõi diani

¹⁰ Akwa tikwe kukwe diribare mae amne, tikwe nünabare ño, ye garera mae. Erere arato drekäre ti nämane nüne kore amne, ti nämane tödeke ño Jesubti garera mae, amne ti nämane nebe romon ñakare jötrö garera mae. Erere arato, ti nämane ni mda tarere ño amne, ti nämane nünenkä dite ja tare nikakäre tödekabtä Jesubti ño garera mae.

¹¹ Erere arato, tikwe ja tare nikani jakän garera mae amne, juta Antioquíate amne juta Iconiote, erere arato juta Listrate tikwe ja tare nikani kri tödekabtä Jesubti abko garera mae. Tikwe ja tare nikani kri, akwa ti Dänkien Jesukristo käkwe ti dianinkä ti rüe kisete, ye abko garera mae arato.

¹² Ye abko, nire nire tõi nünai kuin deme Kristo Jesukrä abko käkwe ja tare nikadi rüe kisete. Ne abko kukwe era tita niere mae Timoteo.

¹³ Akwa ni moto kämekäme, ni ngökaka abko näin kukwe nuene bäri kämekäme mda. Niaratre näin ni ngökö bäri amne, niaratre ngökadi krübäte ni mda mdakwe. Ne abko rabadi nakenkä kore ja täritäri.

¹⁴⁻¹⁵ Ngöbö Kukwei brendebare makwe, ye abko makwe mika täte amne mika ütiäte janknu makwe, ñobtä ñan angwane ni Ngöbö Kukwei dirikä mae abko ni ütiäte garera metre mae. Erere arato, ma nämane chi ngäbäkrere angwane, Ngöbö Kukwei deme ye namanina gare mae, aisete makwe mika täte janknu. Nita tödeke Jesukristobti angwane, Ngöböta ni dentari, yebtä abko Ngöbö Kukwei tä ni mike töbtä.

¹⁶ Ngöbö Kukwei jökrä abko Ngöbökke mikani gare metre nitre tärä tikakaye, aisete kukwe ütiäte dirikä amne kuin mäträkrä amne, kuin ni mda tõi diankrä amne, kuin ni tötikakrä nüne metre Ngöbö ngwäreki.

¹⁷ Ne köböire abko nitre tödekaka Jesubti tä nüne Ngöbökrä ye tädre juto biare sribi kuinquin bätäkä ngwarbe nuenkrä.

4

¹ Timoteo, Kristo Jesu rükadita kritobore ni nire kräke amne ni krütanina kräke. Erere arato rükadita gobrane. Ngöbö ngwäreki amne Kristo Jesu ye mden ngwäreki tita niere krörö mae:

² Makwe Ngöbö Kukwei nie ni mda mdaye. Ni mda mda tõi raba ma kukwei nuai ja, ñakare ya, akwa ma raba juto biare Ngöbö kukwei niekäre. Amne ni mda tõi dian makwe, amne makwe mäträ ni mda mdabtä. Erere arato, makwe ni mda mda kita nüne bäri Jesukrä amne, makwe diri metre ta ja moto jämenbti ietre abko tita niere mae.

³ Makwe nuendre, ñobtä ñan angwane kä jatadi angwane, ni kwati ñan tõi rabadi kukwe era Ngöböbtä ye kukwei nuai aisete. Kukwe ño ño niaratre tõi rabadi kukwei nuai, ye erere kräke dirikätre ngwarbe ngwarbe kändäni kwati kwetre dirikäre jae ja mikakrä nuäre.

⁴ Erere arato, Ngöbö kukwei era metre abko btä rabaditre kä mikekä amne kukwe mikanintbe ngwarbe kirakira ñakare era, ye aibehtä rabaditre ja däkweite.

⁵ Akwa ma abko, käre makwe töbika kuin metre ja käne amne makwe nünanka dite jabtä ja tare nika näire. Erere arato, ni mda mda, ie kukwe kuin Jesubtä gare ñakare abko ietre makwe mika gare amne sribi ño ño nuendre, ye makwe nuen kuin jökrä.

⁶ Ye abko makwe nuendre, ñobtä ñan angwane ti abko müre keta kebera Jesu mikabtä täte, aisete ti kebera krüte jakän.

⁷ Ni rükä käta rüre kuin, ye kwreere jire tikwe ja di mikani sribikäre kuin Jesukrä. Sribi jökrä biani nuendre tie ti Dänkienkwe, ye abko tikwe nuenbarera jökrä amne tikwe ja toi mikani kwatibe Jesubtä, abti kä nüke mtare tie.

⁸ Ye mden kisete, ti krütadi angwane, ti Dänkien Jesu, Kritobo metre, käkwe sribi ütiä biandi kuin tie, käkwe ti mikadi kuin era metre. Ne ñan ti aibe ie, sribi ütiä biandi kwe amne, ni jökrä käta Jesu ngibiare kisere abko ie sribi ütiä biandi kwe amne mikadi kuin metre kwe arato.

Pablota jändrän kärere mrä Timoteoye

⁹ Timoteo, ma jata jötrö ti kanti nete ja tuakäreta tibe, ie ti tö,

¹⁰ ñobtä ñan angwane Demas nämane tibe nete akwa, jändrän kä nebtä nämane tare bäri kwe, aisete kä mikaninkä kwe tibtä, nikani juta Tesalónicate. Crescente abko nikani kä Galaciate amne Tito abko nikani kä Dalmaciate.

¹¹ Aisete Lucas aibe tä tibe nete. Timoteo, ma jata angwane, makwe Marcos ngwian siba jabe; ben ma jata, ñobtä ñan angwane Marcokwe ti die mikadre kri sribi Ngöbökwetä nete ruen tie, aisete ma jata ben.

¹² Tiquico abko tikwe juani juta Efesote.

¹³ Timoteo, ma jata angwane, dän ngetho kä tibo kriere mikateba tikwe juta Troate, Carpo kanti, ye ma jata ngwena tikrä. Erere arato, täräta mikaninte ruäre tikwe, ye ma jata ngwena tikrä amne, kabra btä obeja kwata sribebare täräre täräre tä mikaninte tikwe yete, ye ma jata ngwena jökrä tikrä, ie ti tö bäri.

¹⁴ Alejandro abko sribikä jändrän jierobtä, ye abko käkwe kukwe nuenbare käme krübäte ti rüere abko dokwäre ti Dänkien Jesukwe mikadi ja ngie nuen.

¹⁵ Mden kisete makwe mokre jabtä Alejandro yebe arato, ñobtä ñan angwane kukwe kuinquin Jesukristobtä dirita nikwe, ye rüere niarata rüre krübäte.

¹⁶ Timoteo, ti järeababa kena kritobo romanobo ngwäre kri angwane, ti mräkätre tödekaka Jesubti käkwe kä mikakaba jökrä tibtä, aisete ni rababa ñakare mda ja kwetaka ti dokwäre. Akwa Ngöbökwä ñan ti mräkätre mika ja ngie nuen näre.

¹⁷ Ti mräkätre tödekaka Jesubti käkwe ti mikateba kaibe, akwa ti Dänkien Jesukwe ja di bianba tie, nitre ñakare israelitare tödekaka ñakare Jesubti nämä yete, ye olote Jesu kukwei kuin ni diantarikrä abko ti rabadre kädriere abkokäre. Ye ngwane ti Dänkien Jesu käkwe ti ükaba gata ngäniene, aisete ye näire ti rüekwe ti müre ketaba ñakare.

¹⁸ Ne kwreere ti Dänkien Jesukwe ti ükadi käre jändrän kämekäme ngäniene. Abti tä gobrane kä kämbti, ye kanti näin ti ngwena nüne jabe. Ni Dänkien Jesu aibe käikitadrekä kärekäre ni jökräkwe. Abko kore se. Amen.

¹⁹ Timoteo, tita köbö kuin juen Priscilakrä, Aquilakrä amne Onesiforo mräkäkrä, ye makwe nie ietre tikrä.

²⁰ Erasto abko rababa juta Corintote amne Tróximo abko rababa bren, abtä tikwe mikateba juta Miletote.

²¹ Timoteo, kä ñüre amne kä tibo, känenkri ma jata jötrö ti kanti nete, ie ti tö. Arato ni mräkä tödekaka Jesubti Eubulo, Pudente, Lino, Claudia btä ni mräkä mda mda juta Roma nete käta köbö kuin juen makrä.

²² Ni Dänkien Jesukristo raba mabe amne Ngöbö raba ja moto mike kuin mun jökrä kräke. Abko kore se. Ne ngörä.

Tärä Tikani Pablokwe Titokrä Tito

Pablo nämane ngite kä teri juta Romate, tikaninteta angwane, tärä ne tikani kwe Titoye. Kä 63-65 angwane, Pablokwe tärä ne tikani. Titokwe kukwe kuin Jesubtä mikani era Pablo köböire gare nie. Abti Tito namani sribikä siba Pablobe Timoteo kwrere.

Pablo nämane ngite, yebti tikaninteta kena angwane, niara btä Tito käkwe sribibare Cretate. Yebti Pablo nikani kä mdabti angwane, Tito mikaninte sribire ja täte kwe.

Mren Mediterráneote, kä butu krikri nämane ketabkä. Ne mden ketati kädianta Creta. Tito amne Pablo näire ni Cretabo kwati namani nüne käme krübäte.

Ye angwane abko, ni ño diandrekä sribikäre ni nitre tödekaka Jesubti jie ngwianka amne ni nitre jie ngwianka die mikaka kwrere abkobtä Pablokwe tärä ne tikani Titoye, niara töi diankäre. Erere arato, nitre nämane ja mike kukwe kuin Jesubtä üere ye abko kukwe ötadre ño, abkobtä Pablokwe töi diani.

Mdakäre abko, dirikätre blo jatadi abko Pablokwe niebare arato. Kukwe ne mdenbtä abko tärä ne raba ni die mike mtare arato.

Pablota köbö ngwentari Titoye

¹ Ti Pablo käta tärä ne tike mae Tito. Ti abko ni klabore Ngöbökwé amne Jesukristo kukwei ngwianka. Ngöbökwé ti mikani sribire kore ni dianinkä kwe jakrä die mikakäre tödeke kwatibe jabti. Erere arato, kukwe era metre Ngöböbtä dirita nunkwe rükadre gare ni dianinkä Ngöbökwé yeye, abkokäre Ngöbökwé ti mikani sribire. Kukwe era metre Ngöböbtä ye tä ni die mike nüne Ngöbökrä.

² Erere arato, nita tödeke Ngöböbti, ñobtä ñan angwane niara ngämi kä ne dätere, känenkri ni dianinkä kwe jakrä, ye käkwe nümandi kärekäre ben niebare kwe. Ngöbö abko ja kukwei kite ñakare temen, aisete dre niebare kira kwe, ye erere rabadi bare.

³ Ngöbö kukwei kuin rabadre gare ni kwatiye abko köböi kitani Ngöbökwé, erere käi nukanina. Ye mden abko Ngöbö ni Diantarikä käkwe ti ara jire mikani dirire mtare.

⁴ Tito, nita tödeke ja kwrere Jesubti, aisete ni töita ketetibe. Ma ti ngobo tikwe kwrere. Ngöbö ni Rün nikwe amne Kristo Jesu ni Diantarikä raba ja moto mike kuin makrä, amne makwe nüna jäme niaratre diebti, ie ti tö Tito.

Titokwe dre nuendre Cretate

⁵ Tito, tikwe ma mikateba kä butubti Cretate angwane, kukwe ükate ngämi, ye makwe ükadrete jökrä, abkokäre tikwe ma mikateba. Erere arato, nitre tödekaka Jesubti juta kwatirekwatire te, ye kanti makwe ni mikadre niaratre jie ngwianka, tikwe nieba mae ye kwrere, abkokäre ma mikateba tikwe.

⁶ Nitre ni jie ngwianka abko ni nüne era metre, aisete kukwe ñakare kwe, btä ni mda mda raba kite ngise abko ni krörö mika sribire makwe: Ni gure itibe mika sribire makwe. Erere arato, ngäbriänkä kwekwé käta tödeke Jesubti amne tä nüne kuin, aisete ngäbäkre kwe diän amne dokwä ribi ribi ñan niedre btä.

⁷ Ngöböta sribi kwe mike nitre ji ngwianka kisete, aisete ni nüne era metre abko käkwe sribidre, ni mda mda ñan rabadre niara kite ngise abkokäre. Ne mden kisete, ni tö bikabtä kri amne ni btä kukwe ñan matare abko ñan mikadre sribire. Erere arato, ni dröbaka, ni ngüdrekä ngwarbe ngwarbe amne ni ni ngökö ngwian diankrä jae abko ñan mika sribi ne nuene makwe arato.

⁸ Akwa ni ni Ngöbökwé jie ngwianka abko tädrera juto biare ni menteni kaen ngäbti ja juete amne tädrera kukwe kuinkuin tarere. Erere arato, ni töbike kuin ja käne amne, nüne era metre amne, nüne deme Ngöbökrä amne, ñan tä nakwen jötrö jändrän jökrä jiebti, ni ye kwrere abko käkwe sribidre.

⁹ Mdakäre abko, Ngöbö kukwei metre diribare nunkwe, ye abko ketadrete dime ja kisete angwane, rabadre dirire metre ni mda mdaye, niaratre die mikakäre. Erere arato, ni ñäkäkä blo Ngöbö Kukweibtä, ye tö diandre metre kwe, abkokäre Ngöbö kukwei era metre ketadrete dime ja kisete.

¹⁰ Ni nüne kore makwe mika sribire, ñobtä ñan angwane nitre kwati dokwä ribi ribi kukwe metre Jesubtä kräke abko tä näin kukwe ütiäte ñakare dirire amne, tä näin ni ngökö ngwarbe. Nitre ne ngätäite abko nitre israelita kwati tä näin dirire blo siba abko käta ja ñäräkrä mikamna ja kwatabtä nitre israelita kwrere nitre tödekaka Jesubtiye rabakäre metre Ngöbö ngwärecri, nieta kwetre.

¹¹ Nitre ye abko kada ketadre dirikätre era metrekwe, ñobtä ñan angwane kukwe ñan diridre jire, ye abko tätre dirire ngwarbe. Ye mden kanti ni kwati käkwe ja töi kwitaninta

ngwarbe kwäräkwarä mräkä kwekwe ben ngöi. Erere arato, tätre dirire blo ngwian diankäre jae ni ngökabti.

¹² Ni ni ngökaka kore, mdenbtä abko ngöbö ngwarbe kukwei niekä kira nünanka Cretate käkwe niebare mräkä niara käite btä krörö: Ni nünanka Cretate käre tätre ni ngökö, jändrän ngwarbe töi ñakare, kwrere jire tätre nüne amne, tätre mröre ere, akwa neme trine ñakare amne krenekrene arato, niebare kwe.

¹³ Ne abko, nitre Cretabo nämane nüne ño abko erere niebare metre kwe btätre kore. Ne aisetse kukwe kuin diribare Jesubtä nunkwe, yebtä nitre Cretabo tödekaka Jesubti käkwe ja töi mikadre era metre, abkokäre ñäkä metre ngwärebtä makwe.

¹⁴ Erere arato, nitre Cretabo tödekaka Jesubti käkwe ñan olo mikadre kukwe mikanintbe ngwarbe kirakira nitre israelitakwe yebtä, abkokäre makwe ñäkä ietre. Arato nitre kukwe era Jesubtä mikaka ngwarbe jae käta dre dre nuemna, ye ie nitre Cretabo tödekaka Jesubti käkwe ñan olo mikadre, abkokäre makwe ñäkä ietre.

¹⁵ Ye abko ni deme tödekaka Jesubti, kräke jändrän jökrä kuin deme, ñobtä ñan angwane Ngöbö kwe dätebare; akwa ni ñakare tödekaka Jesubti abko kräke jändrän jökrä käme, jändrän ñakare jire kuin deme kräke, ñobtä ñan angwane niaratre abko töi diän amne, ja ruen ngite ñakare ietre kukwe diän diänbtä.

¹⁶ Nitre dirikä blo ye abko, ie Ngöbö gare tätre niere, akwa tätre kukwe nuene kämekäme. Yebtä abko, Ngöbö gare ñakare ietre bä mikata kwetre jabtä, ñobtä ñan angwane jändrän jökrä käita neme käme btätre. Niaratre dokwä ribi ribi amne, tä Ngöbö mike täte ñakare amne, jändrän kuin nuendre abko erere neme bare ñakare ietre.

2

Dre diridre

¹ Tito, Ngöbö Kukwei diridre ño era metre, ye kwrere makwe diri abko krörö:

² Ni brare unbre unbre ñan rankwa jötrö jändrän ngwarbe jiebti amne, töbika kuin ja käne kwe amne, niara rabadre ütiäte, abkokäre nuna kuin kwe ni mda mda okwäbti abko makwe diri ietre. Erere arato, Jesukristo kukwei mika era kwe amne, raba ni mda mda tarere ja moto kuinbti. Erere arato, nane kukwe jata tare niara rüere angwane, nünanka dite kwe jabtä, makwe diri ietre Tito.

³ Ne kwrere arato, makwe diri krörö meri unbre unbreye: Meri unbre unbre abko käkwe nünandre deme Ngöbö mikakäre ütiäte jae amne, ñan blita ngwarbe kwetre ni mda mdabtä. Erere arato, ñan dröba kwe amne, nünandre ño kuin abko diri kwetre meri bati batiye abko krörö:

⁴ Meri bati gure gure käkwe brare kwe btä ngäbriänkä kwe taredre ño, ye jiebti jie tika kwetre.

⁵ Mdakäre abko, meri bati gure gure käkwe töbika kuin ja käne ja ngibiakäre deme. Niaratrekwe ñan töbika ni brare mda mdabtä amne, ju ngibia kuin kwetre jakrä arato. Erere arato, ni mda mda die mika kwe amne, brare kwe kukwei mikadre täte kwe, ye jiebti meri unbre unbre käkwe jie tika. Meri bati gure gure käkwe nünandre kore, ni mda mdakwe ñan ñäkädre blo Ngöbö Kukwei rüere abkokäre.

⁶ Ne kwrere arato, ni bati bati abko käkwe töbikadre kuin ja käne abko jiebti makwe kita.

⁷ Akwa nünandre ño kuin, ye abko makwe nuna käne bä mikakäre nitre bati batiye. Ye erere, nünandre ño Ngöbö ngwäreki rükadre gare ietre. Erere arato, ma rika dirire angwane, kukwe kuin ütiäte dirita ye kwrere makwe diri era metre ietre.

⁸ Erere arato, ni mda mdakwe ñan kukwe kändandre ma rüere, abkokäre makwe kukwe era erere aibe diri. Ye ngwane, mun rüe rabadi ja gaire, ñobtä ñan angwane kukwe ñan kwandre ietre ñäkäkäre nitre tödekaka Jesubti ye rüere.

⁹ Mdakäre abko, nitre klaborere, yeye makwe diri krörö: Nitre klaborere abko käkwe bkänkä kukwei mika täte jändrän jökräbtä amne, ja moto mika jäme kwetre bkänkäkrä amne, ñan ja kweta kwetre bkänkäbe abko makwe diri ietre.

¹⁰ Erere arato, ni klaborere ye bkänkäkwe tödekadre bti, abkokäre sribi nuen kuin era metre kwetre amne ñan jändrän goidre kwetre kän abko makwe diri ietre. Ni klaborere käkwe bkänkä mikadre ütiäte kore ne ngwane, kukwe dirita nunkwe Ngöbö ni Diantarikäbtä rabadi tuen bä nuäre ietre.

¹¹ Nitre tödekaka Jesubti käkwe nünandre kore, ñobtä ñan angwane Ngöbö kwe jändrän kuin nuenbare ja moto kuinbti nikä, mden köböire tä biare ni jökrä dentari.

¹² Ngöbö kwe jändrän kuin nuenbare ja moto kuinbti nikä, ye käta kukwe krörö mike gare nie: Jändrän jökrä Ngöbö rüere, ye nikwe kitadre jökrä temen amne, kukwe kämekäme kä nebtä, ye nikwe ñan nuendre mda, akwa nikwe töbikadre kuin ja käne. Erere arato, nikwe ja töi mikadre kwatibe nünakäre deme Ngöbökrä kä ne ngwane.

¹³ Nikwe nūnandre kore Jesukristo ngibiare ngābti kwārā. Jesukristo abko Ngōbō nikwe amne ni Diantarikā nikwe. Niara ara rūkadita kā trā ngwente angwane, kā rabadi nuāre nibtā, abkobti nita tōdeke aune nita ngibiare kisere.

¹⁴ Jesukristokwe ja biani mūre ketadre ni krāke ni kōkatarikāre Ngōbōkrā, nikwe űan kukwe diān diān nuendre mda abkokāre. Erere arato, ni ngite kukwe kāmēnte diankakrā jōkrā nibtā amne, ni rabadre juta jen kwe amne ni rabadre tōbīke jāndrān kuin nuene, abkokāre ja biani mūre ketadre kwe nikrā.

¹⁵ Kukwe ye abko, makwe diridre. Makwe ni mda mda die mika kukwe ne mike tāte. Erere arato, Ngōbō diebti makwe űākā ni kukwe kāmēkāmē nuenkāye, űobtā űan angwane Ngōbōkwe ma mikani ji dokwāte, aisete makwe űan ni mda tuemetre ma mike ngwarbe jae.

3

Nitre tōdekaka Jesubti kākwe jāndrān kuin nuendre

¹ Mdakāre abko, nitre tōdekaka Jesubti, ye kākwe gobran amne kritobo mika űitiāte jae amne kukwei mika tāte kwetre. Erere arato, tādre biare jāndrān kuin nuene. Ne abko, makwe ngwianta tōre kāre ietre.

² Mdakāre abko, űan blitadre ngwarbe ni mda mdabtā kwetre. Erere arato, űan rūdre ni mda mdabe akwa, nūnandre jāme kwetre ni mda mdabe. Erere arato, ni mdakwe kukwe nuendre blo rūere angwane, ja ngie mikadre űākare kwetre amne, ja getadre jāme ni jōkrābe kwetre. Ne abko, makwe ngwianta tōre kāre ietre arato Tito.

³ Ngōbō gare űākare nie angwane, ni tōi űākare, kwrere jire ni nāmāne nūne amne, ni nāmāne ja dokwā mike ribi Ngōbōkrā. Arato kukwe ngwarbe diri nāmāne nie abko jiebtī ni nāmāne nāin ngwarbe siba amne jāndrān kāmēkāmē bātākā ngwarbe abko mdei nāmāne nie, erere ni nāmāne nuene. Mdakāre abko, ni nāmāne tōbīke blo ni mda mdabtā amne jāndrān ni mdakwe, ie ni tō nāmāne nebe jakrā. Erere arato, ni nāmāne bātā ngwen jōkrā jabtā kwārikwāri.

⁴ Akwa Ngōbō ni Diantarikā kākwe jāndrān kuin nuenbare nikrā amne ni jōkrā tarebare kwe abko mikani gare kwe nie, ye ngwane

⁵ ni dianintari kwe. Ye abko, űan nikwe jāndrān kuin nuenbare, abko űitiāre Ngōbōkwe ni dianintari, akwa ni nāmāne ruentari tare ie, aisete ni dianintari kwe. Ye ngwane ni nāmāne kāmē jāndrān dobrere kwrere kukwe kāmēkāmē kisete angwane, ni dārebareta bobukāre Ngōbō űai Deme kōbōire angwane, Ngōbōkwe ni jūkaninte kuin merebe ja űai Deme kōbōire.

⁶ Ni dianintari kwe angwane, Jesukristo ni Diantarikā, kōbōire Ngōbōkwe ja űai Deme biani tāte jōkrā nie ja moto kuinbti.

⁷ Ngōbōkwe ni dianintari angwane, niara nāmāne ni tarere. Yebtā ni ngite űākare mda ja ngwārekri niebare kwe ja moto kuinbti abko kōbōire ni rabadre neme ngobo jen kwe abkokāre. Ye mdenbtā Ngōbōkwe ni mikadi nūne kārekāre, yebti ni raba tōdeke kwatībe mtare.

⁸ Kukwe ne abra kukwe era metre, aisete nitre tōdekaka Jesubti, ye ben makwe blita kāre kukwe nebtā, ie ti tō, űobtā űan angwane kukwe ne abko kukwe kuin ni jōkrā krāke, aisete nitre tōdekaka Ngōbōbti tādre biare jāndrān kuin nuene, abkokāre makwe blita kāre ben kukwe nebtā.

⁹ Akwa kukwe mda abko ngwarbe amne tā ni die mike űākare, aisete kukwe ni mrākā kirakirabtā amne Kukwe Biani Ngōbōkwe Moiséye nuendre nie, yebtā makwe űan ja kweta, űobtā űan angwane kukwe ngwarbe űitiāte űākare btā nita ja kwete, abtā rūta niken jabe kwārikwāri.

¹⁰ Akwa nitre tōdekaka Jesubti ngātāite, nireta ja kwete kukwe ngwarbe yebtā amne tā nitre tōdekaka Jesubti tōi mike romon jakrā kwārikwāri, ye abko ie makwe űākā bati, bobu tōi diankāre. Akwa nebti ma űan kukwe mika tāte kwe ne ngwane, űan rikadre mda gātābtā nitre tōdekaka Jesubti yebe abko makwe nie ie,

¹¹ űobtā űan angwane ni ye abko tōi űākare metre amne, kukwe nuenta kāmēkāmē kwe arabe kāta niara mike ngite Ngōbō ngwārekri.

Pablota kukwe mrā niere Titoye

¹² Tito, tikwe Artemas ya o Tíquico juandi ma kānti Cretate yete, niaratre nibu ne mden raba ma kānti angwane, ma jata jōtrō juta Nicópolisite ti ngābti ja tuakāre tībe, űobtā űan angwane kā űūre nāire ti tō nūnai juta Nicópolisite aisete.

¹³ Arato Zenas, ni blitaka ni mdakrā kritobo ngwārekri, btā Apolos, ye jata nikenta angwane, ma btā nitre tōdekaka Jesubti kākwe die mika. Munkwe jāndrān bian tāte ietre, űan ja tare nikadre kwetre abkokāre,

¹⁴ ñobtã ñan angwane nirekwe jändrän ñakare, ye abko nitre tödekaka Jesubti käkwe ja töitikadre jändrän kuin nuene ni die mikakäre. Ne kwrere nitre tödekaka Jesubti käkwe ñan nünandre ngwarbe abkokäre.

¹⁵ Nitre tödekaka Jesubti jökrä tä tibe nete kätä köbö kuin juen mae Tito. Erere arato, nire nire kätä nun tarere ma kánti yete, ye kräke nunta köbö kuin juen arato.

Ngöbö raba ja moto mike kuin mun jökrä kräke. Ne abko kore. Ne ngörä.

Tärä Tikani Pablokwe Filemónkrä Filemón

Pablo nämane ngite juta Romate angwane, niarakwe tärä ne tikani. Kä ye angwane abko niarakwe tärä Efesios, Filipenses amne Colosenses tikani arato. Pablokwe tärä ne tikani niara kukwe muko iti kädian nämane Filemón kräke. Filemón abko nünanka juta Colosa kánti. Niara abko kákwe ni kökani iti kädian nämane Onésimo sribikäre jakrä. Yebti Onésimo kákwe jändrän goibare Filemón kán, bti ngitiani, ñobtä ñan angwane ni gokä abko kämikadre abko kukwe nämane úkaninte kä ye angwane. Onésimo nikani nebe juta Romate, kánti Pablo nämane ngite kä teri kukwe kuin Jesubtä diri dokwäre. Pablo abko kákwe kukwe kuin Jesubtä niebare Onésimoye angwane, Onésimo kákwe tödekani Jesubti. Abtä tö namani näinta bkänkä Filemón kánti ja ngite niekäre ie. Ye mden kisete, Pablo kákwe tärä ne tikani Filemón kräke, Filemón moto mikakäre jáme Onésimokrä. Jesukristo kákwe Filemón tarebare kri, kákwe ngite dianinkä mento btä, bti kani ngäbti kwe, ye kwrere Filemón kákwe Onésimo tarebare amne niara ngite jändrän goibtä ye diandre jabti ta kwe, bti kadre ngäbti ja mräkä kwrere Jesukristo kábtí kwe abko Pablokwe ribebare Filemónye tärä nebti.

Tärä nebtä abko Pablota jadenkä kukwe Onésimo yebtä, ñobtä ñan angwane kukwe Onésimo káta “kuin útiáte sribikrä” niere griegore. Onésimo ngämi tödeka Jesubti angwane, niara ñakare útiáte sribikrä, akwa tödekani Jesubti kwe, yebti tö namani sribire metre, aisete “kuin sribikrä”.

Pablota köbö kuin juen

¹ Ti Pablo, tita ngite kä teri tödekabtä Kristo Jesubti amne ti mräkä Timoteo tä tibe nete káta köbö kuin juen makrä Filemón. Filemón, ma abra nun kukwe muko amne sribi muko nunkwe, aisete ma tare kri nunkwe.

² Erere arato, nun mräkä merire Apia, kräke nunta köbö kuin juen amne rü muko nunkwe Arquipu abko kräke nunta köbö kuin juen arato. Mdakäre abko, ja mräkätre tödekaka Jesubti tä gätäre ma gwiriete, ye kräke tita köbö kuin juen.

³ Ngöbö ni Rün nikwe btä ni Dänkien Jesukristo kákwe ja moto mika kuin munkrä amne mun mika nüne jáme kwetre, ie ti tö.

Pablota kuin niere Ngöböye

⁴ Tita blite Ngöböbe angwane, mata nuke töre tie angwane, käre tita kuin niere Ngöbö tikweye mabtä,

⁵ ñobtä ñan angwane mata tödeke ni Dänkien Jesubti amne nitre deme deme Ngöbökwé abko mata tarere jökrä abko tita kukwe nuen, yebtä abko tita kuin niere Ngöböye mabtä käre käre.

⁶ Mdakäre abko, dre dre kuin nuendre Kristo kräke, ye rabadre gare kuin mae, abkokäre nitre tödekaka Jesubti, ye ben gwaire ma reketadre jakri tödekare kwärä Jesubti, ye abko tita ribere Ngöböye makrä Filemón.

⁷ Amne mata ni mda mda tarere ye abko käi nuäre krübäte tibtä amne tä ti die mike krübäte arato, ñobtä ñan angwane juta deme Ngöbökwé abko mata kä miketa nuäre motobtä.

Pablota ja di kärere Onésimokrä

⁸⁻¹⁰ Ne aisete ti tö kukwe ribei krörö mae Onésimo kräke. Kristo kábtí makwe dre nuendre abko ti rabadre úkete nuendre mae, akwa ti ñan tö kukwe nuein kore, aisete nita ja tarere kwäräkware, yebti ti tö kukwe ribei krörö mae: Ti nena unsunine jakän amne mtare tita ngite kä teri kukwe kuin Jesubtä diri dokwäre amne, tita ngite kä teri, ne kánti Onésimo kákwe tödekani Kristobti ti köböire. Ne aisete Onésimo abko ti ngobo tikwe Kristo köböire amne ti abko niara rün kwrere, aisete ti bike ja di kärere krörö kräke mae:

¹¹ Käne Onésimo ngämi tödeke Jesubti, känenkri nämane klabore ngwarbe amne útiáte ñakare makrä, akwa mtare niarata tödeke Jesubti, aisete niara rabadre klabore útiáte kri makrä amne tikrä.

¹² Mtare tita juenta nebeta ma kánti yete. Niara abko ti ngobo jen tikwe kwrere, aisete tare kri tikwe.

¹³ Kukwe kuin Jesubtä diri dokwäre tita ngite kä teri, ne kánti Onésimo rabadre ti die mikakäre ma täte, ie ti tö rababa bäri.

¹⁴ Akwa kukwe ngämi nukebti ja moto kuinbti mae, ye känenkri ti ñan tö jändrän nuein, aisete tita Onésimo juenta jirekabe mae yete. Ja moto kuinbti makwe niara tuadremetre neme nete ti die mikakäre abko ie ti tö amne, ñan tikwe kukwe niedre abko erere makwe nuendre abko ie ti tö, aisete tita juenta kore ma kánti yete.

¹⁵ Onésimo abko ngitiani bá jötrö makän mentokwäre, ye abko nane tödekadre kwe Jesubti abko köböire rikadre nebeta ma kánti angwane, nünandre kärekkäre kwe mabe, abkokäre nakaninkä kore.

¹⁶ Akwa mtare abko niara ñan rabadreta klabore jirekåbe makwe, akwa ma mråkä tare kri makwe ni Dånkien kåbti, ye kwrere rabadi makrå. Niara tareta kri tikwe, akwa makwe rabadi båri tare ruen tie. Ye abko ñan klabore makwe abtä makwe tare angwane, makwe tare ja mråkä kwrere ni Dånkien kåbti.

¹⁷ Ye abko, tödekabtå Jesubti mata ti kaen ngåbti ja mråkä kwrere ne ngwane, makwe ti kadre ngåbti ño ja gwiriete, ye kwrere makwe Onésimo kata ngåbti abko tita ribere mae.

¹⁸ Amne nane kukwe nuenbare blo mabtå kwe o rürümon ütiå bti makwe, ye abko makwe ütiå kårå tie

¹⁹ amne tikwe niara ütiå biandi jökrå mae ne abko ti Pablo kåta tårå tike ja kise jenbti kore mae. Ma abko bti rürümon ütiå kri tikwe, ñobtä ñan angwane makwe tödekani Jesubti ti köböire, aisete makwe rürümon ütiå niarakwe biandre abko ti ñan tö nibi niei mae, kåta niere kore mae.

²⁰ Rürümon ütiå kri kore mabti tikwe, ye mdenbtå abko ni Dånkien kåta ni tarere, ye kåbti ti tö ja di kåråi mae Onésimo kråke, ye kwrere makwe Onésimo kata ngåbti kå mikakåre nuåre tibtä, ni ja mråkäre Kristo kåbti ye kwrere.

²¹ Tita kukwe niere, ye erere makwe mikadi tåte jökrå gare kuin tie amne tita ja di ribere mae Onésimobtä, yehti ta makwe kukwe mda mda nuendi båri kuin kråke, ye gare kuin tie, aisete tita tårå ne tike mae.

²² Mdakåre abko, munta ja di kårere tikrå Ngöböye, yehtë Ngöbökwẽ mun kukwei nuadi angwane, Ngöbö diehti ti rabadreta tikaninte angwane, ti tö nåin basareta yete, aisete makwe kå ükate biare keteti ti kåne abko ti tö ribei mae.

²³ Amne ti kukwe muko Epafra tå ngite kå teri tibe gwaire nete tödekabtå Kristo Jesubti abko kåta köbö kuin juen munkrå.

²⁴ Erere arato, sribi muko tikwe Marcos, Aristarco, Demas amne Lucas kåta köbö kuin juen munye.

²⁵ Ni Dånkien Jesukristo kåkwẽ ja moto mika kuin mun jökrå kråke. Abko kore se. Ne ngörå.

Tärä Tikani Nitre Hebreokrä Hebreos

Tärä ne tikani nitre israelita tödekaka Jesubti die mikakäre. Nitre israelita abko kädianta hebreo amne arabe kädianta judio arato. Niaratre abko juta kwatibe, akwa kädianta ketamä. Nirekwe tärä Hebreos ne tikani gare ñakare metre. Pablo käkwe tikani abko ni ruäre tä nütüre. Ni mda abko tä Bernabé niere amne ni mda abko tä Apolos niere, akwa nirekwe tikani abko gare ñakare metre nie. Nitre romanobo ngämi juta Jerusalén juen ngwarbe kä 70, ye känenkri tärä ne namanina tikani nütüta.

Nitre israelita tödekaka Jesubti, kräke tärä ne tikani niaratre die mikakäre nünenkä dite Jesukristobtä, ñobtä ñan angwane niaratre nämane ja tare nike tödekabtä Jesubti amne ni ruäre tö namani trö kwitai Jesukristoye Kukwe Biani Ngöbökwé Moiséye mikakäreta täte. Jesukristo di ñakare era metre niaratre die mikakäre, aiseté trö kwitadre ie abko ni ni ngökaka nämane dirire ietre. Ye mden kisete, ni tärä ne tikaka käkwe Jesukristo bä mikani krörö ietre: Jesukristo köböire abko Ngöböta ja mike gare bäri metre ta. Kira Ngöbökwé blitabare ja kukwei niekä niekä köböire, angele köböire amne Moisés köböire, akwa mrä blitabare bäri metre kwe ja Odei itibe Jesukristo köböire.

Mdakäre abko, Ngöbökwé kukwe ükadite btin nitre israelitabe abko Ngöbökwé niebare kira, kukwe btin ye abko namani bare Jesukristo köböire abko tärä ne tä mike gare. Erere arato, juta Jerusalén yete nitre blitaka Ngöböbe ni mda mda diäre nämane jändrän kämike köbö kwatirekwatire nitre israelita ngite ye diankakäre mento btä, akwa nuenbare kwete köbö kwatirekwatire ñobtä ñan angwane jändrän ngwarbe di ñakare ni ngite diantarikrä mento nißtä. Akwa Jesukristo abko krütani batibe ni ngite diankakäre mento nißtä, ye abko namani ütiäte kärekäre Ngöbö ngwärekrei, aiseté Jesukristo abko bäri kuin amne bäri ütiäte, aiseté niara aibehti nikwe tödekadre amne niara aibe jiehti ni rikadre. Mtare niarata Ngöbö ngwärekrei kä käinbti blite Ngöböbe nikrä.

Jesukristo abko bäri ütiäte, aiseté nitre israelita tödekaka bti käkwe ñan trö kwitadre ie. Jesukristo köböire Ngöbökwé ji tikani btin ni kräke nebe Ngöbö kanti kä käinbti, aiseté ni rabadre juto biare ja tare nike tödekabtä Jesubti abko tärä ne tä mike gare nie. Nikwe Jesukristo rükandrete ne angwane, Ngöbökwé ni mikadre ja ngie nuen, Ngöbökwé nitre israelita nünanka kira mikani ja ngie nuen ye kwrere.

Ngöbökwé blitabare ja Odei Jesu köböire

¹ Ti mräkäre, nitre Ngöbö kukwei niekä,* köböire Ngöbökwé blitabare bäre bäre bätäkä ngwarbe ni mräkä kirakira ben.

² Akwa kä mrä ne ngwane abko Ngöbökwé blitabarera ünän täte nibe niara Odei jen kwe Jesukristo ye köböire. Ngöbökwé ja Odei mikani jändrän jökrä bkänkä amne niara köböire Ngöbökwé kä käinta amne kä temen dätebare.

³ Ngöbö Odei ye abko tä Ngöbö töi kuin bä nuäre mike gare nie. Erere arato, Ngöbö Odei abko ja kwrere Ngöböbe amne Ngöbö abko ño, ye abko tä bä mike metre ta nie. Mdakäre abko, Ngöbö Odei ye arabe tä jändrän jökrä ketete kuin ketetibe ja kukwei di kri köböire. Erere arato, kukwe kämekäme nißtä ye dianinkä jökrä mento nißtä kwe, käkwe ni bätäninte amne ni mikani merebe jökrä kwe, bti nikaninta kä käinbti, kanti Ngöbökwé mikani bäri ütiäte kri, ye bä mikakrä mikani tākänintbe kwe ja küde ruenkri.

Jesu abko bäri ütiäte angeletre ngwä

⁴ Amne Ngöbökwé mikani bäri ütiäte kri angeletre ngwä. Niara kädekani ño Ngöbökwé, ye abko namani bäri ütiäte angeletre jökrä bti ta abko namani bare kore.

⁵ Angele ñakare jire iti abko ie Ngöbökwé niebare krörö:

Ma abko ti Odei tikwe, ye abko tita mike gare ni jökräye mtare,

Salmos 2.7

niebare Ngöbökwé niara Odei Jesuye.

Erere arato, angele ñakare jire iti, ie Ngöbökwé niebare krörö:

Ti rabadre niara Rün jen kwe amne, niara rabadi ti Odei jen tikwe,

2 Samuel 7.14; 1

Crónicas 17.13

abko Ngöbökwé niebare ñakare jire chi kore angelebtä.

⁶ Akwa tärä mda Ngöbö Kukweibtä, Ngöbökwé ja Odei mubai mikani gare ni jökräye angwane, niebare kwe:

Angele Ngöbökwé jire jökrä käkwe niara mika ütiäte jae,

Deuteronomio 32.43

* **1:1 nitre Ngöbö kukwei niekä** btä blitata nete abko ni jökrä Ngöbö kukwei niekä, köböire Ngöbökwé blitabare Jesukristo känenkri. Ruäre abko Moisés, Jeremías, Isaías, Oseas, Malaquías amne Juan Bautista.

niebare Ngöbökwe.

⁷ Amne angelebtä abko Ngöböta niere krörö ja Kukweibtä:

Tita angele tikwe mike näin jötrö müre kwrere amne niaratre tä sribi nuene ñukwä jutra
kwrere tikrä, *Salmos 104.4*

nieta Ngöbökwe.

⁸ Akwa Ngöbö Odei Jesu abkobtä nieta krörö Ngöbö Kukweibtä:

Ngöbö, mata gobrane, ye rabadi kärekäre amne, mata gobrane kuin era metre ni jökräbtä.

⁹ Mata jändrän jökrä kuin tarere amne, jändrän jökrä kämekäme, yebtä ma mätä.

Ye mdenbtä abko Ngöbö makwe käkwe ma dianinkä jenena jakrä amne, kä nuäre mikani
täte jökrä mabtä abko köböire ma mikani bäri ütiäte kri ma kukwe muko mda mda
ngwä, *Salmos 45.6-7*

abko Ngöbökwe niebare niara Odei Jesubtä.

¹⁰ Erere arato, Ngöböta niere krörö btä:

Ti Dänkien, kena dekä makwe kä temen ne dätebare amne, ja kise jenbti makwe kä käinta
dätebare.

¹¹ Angwane kä ye abko näin jökrä ta, akwa ma abko tädi kärekäre.

Dän tä kite ngututüre tä niken ngwarbe jökrä, ye kwrere kä temen, kä käinta näin ngwarbe
jökrä.

¹² Amne dän mriakata, ye kwrere makwe kä temen amne kä käinta mriadikä jökrä.

Amne nita dän mdara jire kite jabtä, ye kwrere makwe kä kwitadi jökrä.

Akwa ma abko tädi ja kwrere kärekäre amne ma ñan krütadi jire chi, *Salmos 102.25-27*
abko Ngöböta niere ja Kukweibtä niara Odei Jesubtä.

¹³ Erere arato, Ngöbökwe niebare krörö niara Odeie:

Kä bäri ütiäte kri ti küde ruenkri, ne kanti jakwe täke nete.

Ye kanti ma raba abti tikwe ma rüe mikadi jökrä ma ngoto täni, *Salmos 110.1*
niebare Ngöbökwe ja Odei Jesuye. Ye kwrere abko angele ñakare jire iti, ie Ngöbökwe kukwe
niebare kore,

¹⁴ ñobtä ñan angwane angele jökrä abko üai sribikä Ngöbökrä amne, nire nire rabadre
dianintari abko Ngöböta angele juen die mike.

2

Ni mikani mokre

¹ Ngöbökwe kukwe niebare kore ja Odeibtä, ye mden kisete Ngöbö kukwei nuaba nikwe,
ye ie nikwe olo ketadrete kwatibe bäri mda, ni ñan rikadre ji Ngöbökwe bäre mento bätärekä
ja tätitäre abkokäre,

² ñobtä ñan angwane kira Ngöbökwe ja kukwei niebare Moiséye angele köböire, ye abko
Ngöbökwe mikamna täte metre amne nire nire käkwe ja mikani ngite kukwe ye rüere, käkwe
kukwe ye kitani temen abko ütiäre mikani ja ngie nuen era metre Ngöbökwe.

³⁻⁴ Yebti Ngöbökwe kukwe niebare mda ni Dänkien Jesu ara jire köböire ni diantarikrä
amne ni Dänkien kukwe nuaka nuaka käkwe niebareta jökrä nie angwane, kukwe ye abko
kukwe metre mikani gare kwetre nie. Akwa kukwe ye abko rabadre bäri ütiäte ni okwäte,
abkokäre Ngöbö ara jire käkwe sribi kri ñan tuabare nuenbare, niara nämane kukwe ye
niekä niekä ben bä mikakrä. Erere arato, sribi kri btä ni jökrä töi ñan namani krütäre
nuenbare kwe amne, Ngöbökwe ja di kri mikani tuadre arato. Mdakäre abko, ja Üai Deme
köböire Ngöbökwe ja di biani bätäkä ngwarbe nie, niara tö namani ja di biain ño ño ni itire
itire ie, ye kwrere biani kwe. Ngöbökwe ni diandretari ye abko bäri ütiäte kri kore, aisete
nikwe ñan trö kwitadre kukwe ye, abtä ni ñan rabadre dianintari angwane, nikwe ñan
kwäräbedre jire chi Ngöbö ngäniene.

Jesu namani ni kwrere

⁵ Mdakäre abko, kä mda btin dätedi Ngöbökwe btä nunta blite, ye abko ñan Ngöbökwe
mikadi gare angeleye.

⁶ Akwa tarä keteti Ngöbö Kukweibtä ni iti käkwe niebare krörö:

Ni kä nebtä abko bobre jakän.

¿Se ñobtä mata töbike btä?

¿Se ñobtä abko mata tarere?

⁷ Makwe ni kä nebtä mikani bä bobre angele se kräke, akwa yebti makwe niara mikani bäri
ütiäte kri angele ngwä, rabadre mikani ütiäte ni jökräkwe abkokäre.

⁸ Amne makwe jändrän jökrä mikani niara ngoto täni gobrankäre bti, *Salmos 8.4-6*
abko niebare Ngöbö Odei Jesubtä. Ye abko, Ngöbökwe jändrän jökrä mikani niara ngoto täni,
aisete jändrän ñakare jire keteti abko Ngöbökwe mikaninte niara ngoto bäre mento. Akwa
gwängwarbe jändrän ruäre abko tä ñakare niara ngoto täni tä nebe tuen nie.

⁹ Akwa Jesu nămane nŭne kă nebtă angwane, Ngöbökwe mikani bări bobre angele ngwă abko nita tuen. Akwa mtare Ngöbökwe mikanina bări ũtiâte kri kăikitadrekă ni jökrăkwe, űobtä űan angwane Ngöbö moto kuinbti niarakwe ja tare nikani amne krŭtani ni jökră krăke amne ni jökră tâte.

¹⁰ Ngöbö abko jăndrăn jökră dătekă amne jăndrăn ye abko jökră Ngöbökră. Ngöbö ye abko tő ja ngăbriănkătre tődekaka Jesubti tuai jökră nebe kă nuărete jabe, aisetes Jesukristokwe ja tare nikani ye kőböire Ngöbökwe niara mikani biare tâte Ji Ngwianka ni diantarikăre.

¹¹ Ye abko, Jesu ni mikaka kuin deme ye kăta nitre tődekaka niarabti mike kuin deme. Niaratre btă Jesu ye abko Rŭn itibe, aisetes Jesu tă nebe ja gaire űakare ni ja etbare niere abko

¹² gare nie, űobtä űan angwane Ngöbö Kukweibtă abko Jesukwe niebare krörő Rŭn Ngöböye:

Ti mrăkătre ben tikwe blitadi mabtă, amne nitre gătăkă ma kăbti, ye ngwăreki tikwe ka niedi ma kăikitakakăre,

abko tă tikani Ngöbö Kukweibtă.

Salmos 22.22

¹³ Erere arato nieta krörő:

Tikwe tődekadi metre Ngöböbti,

Isaías 8.17

niebare Jesukwe Rŭn Ngöböye. Erere arato, niebare krörő kwe:

Ngöbökwe ja ngăbriănkătre biani tie abko ben tita nete,

Isaías 8.18

nieta kore Ngöbö Kukweibtă.

¹⁴ Ngöbö ngăbriănkătre ye abko ngrabare ja kwrere jökră, aisetes Jesu dărebare angwane, ngrabare namani ni kwrere. Diablu abko di tără ni kămikakră. Akwa Jesu dărebare ni kwrere, niara krŭtani angwane, di rabadre diablu gakakăre amne ni tikatekăre.

¹⁵ Jesu krŭtani ni kwati tikatekăre, űobtä űan angwane ni klaborer kăta bkănkă jŭră ngwen, ye kwrere jire ni jökră nămane gata jŭră ngwen kăre abko kisete nămane ja tare nike abko tikaninte kwe.

¹⁶ Ne aisetes, űan niara jatani angele die mikakăre kore, akwa jatani Abraham mrăkă tődekaka Jesubti die mikakăre.

¹⁷ Ye mden kisete, niara rabadre sribire Ngöbökră ni blitaka Ngöböbe ni mda mda diäre dănkien kwrere amne, rabadre sribi ye ngwena bare tâte jökră, amne rabadre niara mrăkă ngwen ruentari tare jae, abkokăre nŭkani dăre niara mrăkătre kwrere. Mdakăre abko, jăndrăn kămika nămane ni ngite ũtiäre, ye kwrere niara jraindre ni ngite ngite diankakăre mento nibtă, abkokăre nŭkani dăre ni kwrere.

¹⁸ Niara ara jire kăkwe ja tare nikani kri amne namani nuaninte ja kăne kukwe kămenbti. Ye mden kisete, nire nire nuateta ja kăne rŭe Satanakwe abko niarata die mikaka arato.

3

Jesu abko bări ũtiâte Moisés ngwă

¹ Mdakăre abko ti mrăkătre deme deme, mun ye abko Ngöbökwe kărăbare jakră. Kukwe nini tikwe, yebtă munkwe tőbika kuin metre Jesubtä. Niara abko jatani Ngöbö Kukwei Ngwianka kwrere amne niara abko Ni Blitaka Ngöböbe Ni Mda Mda Diäre Dănkien abko bti nita tődeke kwatibe.

² Kira abko nitre israelita abko ju Ngöbökwe kwrere. Moisés abko nămane sribire niaratre ngătăite amne Ngöbökwe sribi biani ie abko erere mikani tâte jökră kwe, kăkwe sribi nuenbare kuin tâte ju Ngöbökwe jire jökră te. Ye kwrere arato, Ngöbökwe Jesu mikani sribire angwane, Jesu kăkwe Ngöbö mikani tâte metre, kăkwe sribi nuenbare kuin tâte arato.

³ Akwa Jesu abko Ngöbökwe mikani bări ũtiâte Moisés bti ta, űobtä űan angwane ni ju mikaka ye abko mikata bări ũtiâte ju ara yebti ta. Jesu abko kăkwe ju Ngöbökwe mikani, aisetes Ngöbökwe mikani bări ũtiâte Moisés ngwă.

⁴ Ju kwatirekwatire mikata ye abko ni tără iti kăta mike, akwa Ngöbö abko kăkwe jăndrăn jökră dătebare.

⁵ Moisés abko sribikă jirekăbe amne sribi nuenbare kuin tâte kwe ju Ngöbökwe te amne, Ngöbökwe dre dre niedi niara tăbti abko bă mika nămane niara kőböire.

⁶ Akwa Kristo abko Ngöbö Odei ara, aisetes niara abko tă ju Ngöbökwe dănkieni kuin metre. Ye abko, nitre tődekaka Kristobti abko Ju Ngöbökwe ara, bti Kristo tă dănkieni. Ye abko, nikwe nŭnandrekă dite Kristobtä amne Kristo jatadita abkobti nikwe tődekadre janknu ye ngwane, ni rabadre ju niarakwe janknu amne Kristo rabadre ni dănkieni janknu.

Nikwe űan Ngöbö Kukwei kitadre temen

⁷ Ne mdenbtă abko, Ngöbö ũai Deme kăta niere krörő Ngöbö Kukweibtă: Ngöböta dre niere, ye munkwe kukwe nua mtare,

⁸ ne ngwane munkwe ñan ja dokwä mika ribi, mun mräkä kirakira käkwe ja dokwä mikani ribi Ngöbö rüere Moisés näire ye kwrere.

Niaratrekwe Ngöbö nuaninte ja käne kä kaibete, ye kwrere munkwe ñan nuen.

⁹ Kä kaibe yete tikwe sribi kri ñan tuabare nuenbare mun mräkä kirakira kräke amne, kä gre ketebu jire sribi kri ye tuani kwetre.

Akwa ti di nämane ti kukwei mikakrä täte ya, ñakare ya, ye abko tö namani tuai janknu, amne ja dokwä mikani ribi kwetre jirekäbe.

¹⁰ Ye mdenbtä abko nitre nünanka kä ye ngwane, kräke ti moto rababa romon, käkwe nieba krörö:

Nitre noko käre tä niken ngwarbe ji mdabti, amne ji tikwe, bti rikadre, ye gare ñakare ietre abti kä nüke mtare, tikwe nieba niaratrebtä.

¹¹ Abtä ti moto rababa romon krübäte, käkwe nieba krörö niaratre rüere:

Kä jadükakrä tikwe, ye kánti nitre ye ñan rükadre jire, tikwe nieba kore rüere, *Salmos 95.7-11*

niebare Ngöbö Üai Demekwe Ngöbö Kukweibtä.

¹² Ne aisete ti mräkätre, mun itire itire käkwe ñan ja töi mika kämekäme amne, munkwe ñan ja dokwä mika ribi, käkwe ñan tödekadre mda Ngöböbti, käkwe trö kwitadre Ngöbö nire yeye.

¹³ Akwa “Mtare”^{*} kä ne tä ne ngwane, ja die mika kwärikwäri köbö kwatirekwatire munkwe, kukwe kämekäme käkwe ñan mun ngökadre jire iti amne mun ñan dokwä rabadre ribi Ngöbö rüere abkokäre.

¹⁴ Nikwe tödekani era metre Kristobti kena, ye kwrere nikwe nünandrekä dite jabtä nebebe kä mrä ye näire, ye ngwane ni rabadi ketetibe Kristobe kärekäre arato.

¹⁵ Ne aisete Ngöbö Kukwei këta niere krörö:

Ngöböta dre niere, ye munkwe kukwe nua mtare, ne ngwane munkwe ñan ja dokwä mika ribi, mun mräkä kirakira käkwe ja dokwä mikani ribi Ngöbö rüere Moisés näire, *Salmos 95.7-8*

abko nieta Ngöbö Kukweibtä.

¹⁶ Ye abko, ¿nirekwe Ngöbö kukwei nuani abti namani rüere kore Ngöbö rüere? Nitre israelita nämane Egipto Moisés nikani ngwenante, ye mden abko namani rüere Ngöbö rüere.

¹⁷ ¿Amne nire kräke Ngöbö moto namani romon kä gre ketebu? Ye abko nitre israelita käkwe ja mikani ngite Ngöbö rüere, ye mden abko ngwäkä namani kitanintbe tementa kwäräkwärä kä kaibete.

¹⁸ Mdakäre abko, ¿nire ñan rükadre kä jadükakrä Ngöbökke kánti niebare ie Ngöbökke? Ye abko, nitre israelita käkwe Ngöbö kukwei mikani ñakare täte. Nitre ye mden abko ie Ngöbökke ñäkäbare kore.

¹⁹ Nitre israelita ye abko käkwe tödekani ñakare Ngöböbti, aisete namani ñakare kä jadükakrä Ngöbökke kánti abko gare nie.

4

Köbö jadükakrä tära mtare juta Ngöbökke kräke

¹ Ne aisete, kä jadükakrä Ngöbökke köböi mikani nie, ye kánti kä tä rikakrä mtare, aisete nikwe ja ngbiadre kuin amne nikwe ñan ja mikadre ngite nitre israelita kirakira kwrere. Nane mun ruäre ñan rabadre kä jadükakrä ye kánti abko ngäniene tita niere kore,

² ñobtä ñan angwane kukwe kuin Ngöbökke ye niebare kira nitre israelitaye, ye kwrere jire kukwe kuin Ngöbökke Jesubtä niebare nie. Akwa kukwe nuani jirekäbe kwetre kira amne niaratre käkwe tödekani ñakare Ngöböbti, ye mdenbtä abko ñan namani kä jadükakrä Ngöbökke kánti. Kukwe ñan rakadrekä kore munbtä abko ngäniene tita niere kore munye.

³ Akwa ni abko käkwe tödekani Kristobti, ye abko näin kä jadükakrä Ngöbökke ye kánti, aisete kukwe niebare kira Ngöbökke nitre israelitabtä ñan rakadrekä nißtä. Kä ye mdenbtä abko Ngöbökke niebare krörö:

Ti moto rababa romon krübäte, käkwe nieba krörö niaratre rüere:

Kä jadükakrä tikwe, ye kánti nitre ye ñan rükadre jire, tikwe nieba kore rüere, *Salmos 95.11*

niebare Ngöbökke ni mräkä kirakirabtä. Akwa kena dekä Ngöbökke kä dätebare angwane, sribi nuenbare ünän jökrä kwe, bti jadükani kwe gare nie,

⁴ ñobtä ñan angwane köbö kükü abko btä Ngöbö Kukwei tä niere krörö tära keteti kánti: Ngöbökke sribibare ünän jökrä, yehti köbö kükürare angwane jadükani kwe, *Génesis 2.2* abko nieta Ngöbö Kukweibtä.

* **3:13 Mtare.** Nikwe Ngöbö kukwei mikadre täte abko bä mikata kukwe “Mtare” yehti.

⁵ Abti nitre israelita kākwe tödekani ñakare Ngöböbti, aiseite Ngöbökwie niebare ja Kukweibtä abko ti bike niere bobuta abko krörö;

Kä jadükakrä tikwe, ye kánti nitre ye ñan rükadre jire,

Salmos 95.11

niebare Ngöbökwie.

⁶ Akwa kä jadükakrä Ngöbökwie ye tä janknu mda abko kánti ni ruäre rabadi niken, akwa nitre israelita kirakira ie kukwe kuin Ngöbökwie niebare, akwa kukwe ye abko kitani temen kwetwe, abtä ñan nikani nebe kä jadükakrä Ngöbökwie ye kánti.

⁷ Ye mden kisete, kä nikanina kira ta Josué täbti angwane, Ngöbökwie köbö jadükakrä mdara jire köböi kitani. Köbö btin mda ye abko kä “Mtare” niebare Ngöbökwie jrei David tukwe köböire abko krörö;

Ngöböta dre niere, ye munkwe kukwe nua mtare, ne ngwane munkwe ñan ja dokwä mika ribi,

Salmos 95.7-8

niebare Ngöbökwie jrei David köböire.

⁸ Ngöbökwie niebare kore, ñobtä ñan angwane Josué rabadre nitre israelita ngwena kä jadükakrä Ngöbökwie kánti era metre, akräke köbö jadükakrä tärä mda Ngöbökwie ñan niedre jire chi.

⁹ Akwa Josué ñan nikani nitre israelita ngwena nebe kä jadükakrä era metre kánti, aiseite köbö jadükakrä tärä mda juta Ngöbökwie kräke,

¹⁰ ñobtä ñan angwane Ngöbökwie jändrän jökrä dätebare, yehti köbö kükü te jadükani kwe, ye kwrere jire nire nire rikadre kä jadükakrä Ngöbökwie ye kánti abko tä jadüke sribi kweye.

¹¹ Kira nitre israelita ruäre ñan nükanu kä jadükakrä Ngöbökwie kánti, ñobtä ñan angwane Ngöbö kukwei kitani temen kwetwe. Ye kwrere, mun ngätäte ni ñakare jire iti kākwe Ngöbö kukwei kitadre temen, köböite ñan rükadre kä jadükakrä Ngöbökwie ye kánti, abkokäre ari sribire ja di ngöi jökrä,

¹² ñobtä ñan angwane Ngöbö Kukwei abko nire amne dite amne, ngitra tu grine jütte jabtä kwärükwäri abko tä jändrän tikekä därebe, yehti ta Ngöbö Kukwei bäri grine krübäte. Ni töi amne ni moto bäri kaibe ñäre ñakare abko Ngöbö Kukwei ye käta tikekä därebe amne ni töi ño ño kaibe nikwe amne nita töbikwe ño ño ni mdabtä, ye abko Ngöbö Kukwei tä mike gare jökrä nie.

¹³ Jändrän jökrä dätebare Ngöbökwie, ye abko ñan raba ja rükente jire chi Ngöbö okwä bäre mento Ngöbö ngäniene. Jändrän jökrä tä bütiere Ngöbö ngwäreki, aiseite Ngöbö abko ie nikwe ja niedi metre jökrä. Ngöbö ye mden okwä bäre ni ñan raba ngitie.

Jesu abko Ni Blitaka Ngöböbe Ni Mda Mda Diäre Dänkien era metre

¹⁴ Mdakäre abko, Jesu Ngöbö Odei ye ara jire tä ni blitaka Ngöböbe ni mda mda diäre dänkien kri nikwe abko nikani nüenta kä känbti, aiseite ari tödeke kwatibe janknu bti.

¹⁵ Ari tödeke kore bti, ñobtä ñan angwane Jesu ni blitaka Ngöböbe ni mda mda diäre dänkien tä nikwe, ye abko ni di ñan rabadre nüandre mda Ngöbökrä angwane, ni rabadre ruentari tare ie, ñobtä ñan angwane kukwe kämekäme Ngöbö rüere käta ni nuente ja käne, ye kwrere nakaninkä bätäkä ngwarbe käne Jesubtä, akwa ja mikani ngite ñakare jire chi bati kwe.

¹⁶ Ne aiseite, nikwe ñan kä jürä ngwiandre jabtä amne, brän krötö bäri kürä gobrankrä Ngöbökwie, bti Ngöbö tä tākäninte ye kánti. Ngöbö moto kuin ni tarekä, ye ken ari krötö angwane, ni rabadi ruen bobre ie amne, kukwe bätäkä ngwarbe tä kite ni rüere, angwane ni die mikadi kwe.

5

¹ Nitre blitaka Ngöböbe ni mda mda diäre dänkien ye abko diankata ni mda mda ngätäte amne, mikata blite Ngöböbe ni mda mda diäre amne ni mda mda kräke. Erere arato, niara tä jändrän bianka Ngöböye amne jändrän kukwaka Ngöböye ni ngite ngite ütiäre.

² Akwa ni blitaka Ngöböbe ni mda mda diäre dänkien ye abko tä ja mike ngite ni mda mda kwrere arato. Ye mden kisete, ni mda mda töi ñakare käta ja mike ngite amne tä niken ji blobti, ni yebe rabadre blite jäme, ñobtä ñan angwane tä ja mike ngite niaratre kwrere.

³ Ye mden kisete, niarakwe jändrän kämikadre Ngöböye ja ngite ütiäre. Erere arato, jändrän kämikadre kwe juta Ngöbökwie israelita ye ütiäre.

⁴ Sribi ye abko ütiäre kri abko ni ñakare jire iti raba den kise aubti jae, akwa Ngöbö ara jire käta ni käre abko erere kisete sribi ütiäre ye mikata kwe. Kira Moisés näire, Ngöbökwie Aarón käräbare sribi ne nuene abko erere mikani kwe niara kisete.

⁵ Ye kwrere arato, Kristo kākwe ñan ja mikani ni blitaka Ngöböbe ni mda mda diäre dänkiene au, akwa Ngöbö ara jire kākwe sribi bäri ütiäre kri ye biani ie, kākwe niebare krörö ie:

Ma abko ti Odei jen tikwe, ye abko tita mike gare ni jökräye mtare,

Salmos 2.7

niebare Ngöbökwie Jesukristoye.

⁶ Erere arato, tärä mdara jire kanti Ngöbökwe niebare krörö ie:

Melquisedec nämane blitaka tibe ni mda mda diäre,

ye kwrere jire ma rabadi blitaka tibe ni mda mda diäre kärekäre, *Salmos 110.4*
niebare Ngöbökwe Jesukristoye, erere mikani ütiäte kri kwe, käkwe mikani blitaka jabe ni mda mda diäre dänkiene.

⁷ Jesu nämane nüne kä nebtä angwane, Ngöbö niara ngibiaka gata ngäniene, ye ben nikani blite angwane, namani ngrente krikri be, kä namani ja müaire amne, okwä ñöi namani näkäenkä kabre ie ja di käräbtä Ngöböye amne, Ngöbö kukwei mikani täte jökrä kwe, aisete Ngöbökwe kukwei nuani, käkwe mikaninta nire.

⁸ Jesu abko Ngöbö Odei bkänä, akwa ja tare nikani kwe, ye köböire Ngöbö kukwei mikadre täte ño abko nükani gare täte jökrä ie angwane,

⁹ Ngöbö jatani Jesu mike juto biare ne kwrere, aibe köböire ni jökrä Jesu mikaka täte abko kräke Jesuta ni diantarikä kärekäre.

¹⁰ Amne Ngöbökwe mikani ni blitaka jabe ni mda mda diäre dänkiene Melquisedec nämane sribire ño ye kwrere.

Trö kwitadre ñakare Jesukristoye

¹¹ Tikwe kukwe nini, yebtä kukwe mda mda tä kabre niedre munye, akwa tikwe niedre ño angwane, rükadre gare nuäre munye abko ñan tä nebe nuke gare tie, ñöbtä ñan angwane kukwe dirita munye abko tä niken jökrä mun olo bäre.

¹² Era bkänä kä nikanina raire ta angwane, munkwe Ngöbö Kukwei nuani amne, mun rabadrera dirire ni mda mdaye bä amarebti kukwe dirita käne ni jökräye Ngöbö Kukweibtä abko diridreta bobuta munye. Se abko mun rabadrera ünän käkwe mrö ribi kwetadre bä amarebti bäsi ngäbäkre di ñakare käta kian aibe ñaen, kwrere jire mun tä nüne se, aisete kukwe dirita käne diridreta bobuta munye.

¹³ Tita niere kore munye, ñöbtä ñan angwane ni kian aibe ñaen mun kwrere, ye abko ngäbäkre kianbtä kwrere amne ngäbäkre kianbtä, ie kukwe mden mden kuin metre Ngöbö ngwärekre gare ñakare, ye kwrere mun tä nüne.

¹⁴ Akwa ni ünän ünän abko käta mrö ribi ribi kwete. Nitre ye abko dre dre kuin amne dre dre käme Ngöbö ngwärekre, yebtä ja töitikanina kabre kwetre, aisete tärä nebe gare ietre. Kwrere jire mun rabadre bä amarebti.

6

¹ Ne aisete, brän janknu mentokwäre rabakäre ünän Ngöbö ngwärekre. Mun rabadi ünän täte jökrä angwane, kukwe diribare känekäne munye Kristöbtä, ye aibebtä mun ñan rabadre ja töitike kärekäre. Erere arato, ñan kukwe garera munye, ye aibe jiebti mun tädre näin janknu abko krörö: Kukwe kämekäme bätäkä ngwarbe mun nämane nuene, kä nämane mun mike mente Ngöbö okwä bäre mento, yebtä ñan mun tädre dirireta bobukäre. Erere arato tödekadre kwatibe Ngöböbti, ye abko ñan mun tädre dirire janknu.

² Erere arato, ja ngökadre ñöte Ngöbö käfti amne köbötikadre ño, ñan mun tädre kukwe ye dirire janknu. Mdakäre abko, kise mikadre ni mdabti Ngöbö die biandre ie, ñan yebtä mun tädre dirire käre. Mdakäre abko, Ngöbökwe ni krütanikrütani mikadita nire ño kä mrä näire amne Ngöbökwe kukwe ükadite ño ni kräke kä mrä näire, ñan yebtä mun tädre dirire janknu.

³ Akwa Ngöbö diebti ni rikai niren janknu mentokwäre rabakäre ünän abko tita niere munye,

⁴⁻⁶ ñöbtä ñan angwane ni ruäre, ietre Ngöbö mikanina gare amne jädrän kuin Ngöbökwe kä käinbti abko Ngöbökwe biandre ngwarbe ietre, ye namanina gare metre ietre, akwa nitre ye käkwe trö kwitadre Ngöböye angwane, ni mda ñan rabadre nitre ye töi kwiteta jire chi Ngöbö kukwäre. Erere arato, Ngöbö Üai Deme nükani nüne btäre amne Ngöbö kukwei nükani gare metre ietre amne, sribi kri ñan tuabare namani bare okwäbti arato, akwa niaratre käkwe trö kwitadre Ngöböye angwane, ni ye ñan rabadre töi kwiteta jire chi Ngöbö kukwäre kore. Kukweta nakenkä kore, ñöbtä ñan angwane kukwe kämekäme tätre niken niaratre mike trö kwite Ngöböye kore, yebti abko tä Ngöbö Odei müre keteta bobukäre kwrere jire tätre bä mike, amne tätre Ngöbö Odei Jesu mike yakrä ni jökräye. Ye abko tä tare krübäte kräke.

⁷ Nitre btä tikwe kukwe nini, ye abko ti bike bä mike krörö: Dobo bti ñüta näkäen käre amne nura kuinquin aibe tä kite niren te, ye abko ni sribikä käta nura ngwä ötö kuin, yebtä abko Ngöböta dobo ye die mike amne tä ngibiare kuin. Ye kwrere tä nakenkä nibtä arato.

⁸ Akwa dobo bti ñüta näkäen käre abti kri mu ngwarbe kämekäme aibe tä kite niren, ye ngwane dobo ye tä nebe ütiäte ñakare. Abtä nane ngürün kebera nebe dobo yebtä. Abti mrä sribikä käkwe dobo kukwädi. Ye kwrere rakadikä nitre trö kwitaka Ngöböye yebtä.

⁹ Tita kukwe niere kore, akwa mun ti mräkätre tare tikwe, mun ye abko btä kukwe tare ye ñan rakadrekä ruen tie, ñobtä ñan angwane munta näin ji metrebti rabakäre dianintari Ngöbökwé. Ye abko gare kuin tie,

¹⁰ ñobtä ñan angwane Ngöbö abko töi metre aiseite ñan tä ni kite ngise ngwarbe, amne munta Ngöbö tarere, käkwe ni jen Ngöbökwé die mikani abti kä nüke mtare munta die mike janknu, ye abko Ngöbökwé ñan käikwidadrekä jabti, käkwe mun die mikadi ruen tie.

¹¹ Munta ni jen Ngöbökwé die mike ja di ngöi jökrä, ye kwrere munkwe nuendre janknu abti Jesukristo jatadi nuketa, ie ti tö, jändrän kuin ngibiata munkwe Ngöböye, ye erere rabadi täte jökrä munkwe abkokäre.

¹² Ne aiseite, munkwe ñan kä ngwian krene jabtä sribi Ngöbökwébtä, ie ti tö, akwa ni mda mda käta tödeke kwatibe Ngöböbti, käta jändrän köböi mikani ie Ngöbökwé ye ngibiare bätarekä jae abti tä nüke kiseté, ye kwrere munkwe jändrän ngibia jae arato.

Ngöbökwé ja kukwei mikadi täte

¹³ Abraham abko käkwe tödekani kwatibe Ngöböbti, kwrere munkwe nünandre. Niarabtä kukwe nakaninkä krörö: Kira Ngöbökwé ngäbäkre köböi mikani ie angwane, ni mda ñakare bäri ütiäte Ngöbökrä, aiseite Ngöbökwé ja kukwei mikadre täte era metre abko niebare ja käbti kwe, niebare krörö kwe Abrahamye:

¹⁴ Tikwe ja di biandi mae, aiseite ma bkün däredi kwati ja täritäri, *Genesis 22.17*
niebare Ngöbökwé.

¹⁵ Ye abko Abrahamkwe ngibiabare bätarekä abti Ngöbökwé ngäbäkre köböi mikani ie ye därebare. Ngöbökwé ja kukwei biani ie, ye erere namani bare.

¹⁶ Ye abko, ñobtä Ngöbökwé ja kukwei biani ja käbti kore abko ti bike hä mike krörö munye: Ni kä nebtä tä ja kukwei bien kwatibe, ye mikadre täte kwe, abkokäre tä ja kukwei bien ni bäri ütiäte niarakrä ye käbti. Ne aiseite ni tarä ja kukwei bien kwatibe ni mda käbti, ye ngwane ni ye käkwe ja kukwei mikadi täte tä gare metre, aiseite ni ñan raba ja kweteta jire chi mda kukwe yebtä.

¹⁷ Ngöbökwé jändrän köböi mikani, ye abko nire nire rabadre bkäne abko mikani gare metre kwe, yebti ja kukwei mikadre täte era metre abko niebare ja käbti Ngöbökwé Abrahamye.

¹⁸ Ngöbökwé kukwe ketebu niebare krörö Abrahamye: keteti abko ja kukwei biani ja käbti kwe. Ketebukäre abko, ñan ja kukwei kitadre jire chi temen kwe, akwa ja kukwei mikadre täte era metre kwe, niebare kwe Abrahamye. Jändrän ketebu ye abko ni ñan raba kwite jire chi, ñobtä ñan angwane Ngöbö abko ñan raba ni ngökö jire chi. Ngöbökwé nuenbare kore, ni tödekaka Jesubti ngitiani Ngöböye jändrän kuin köböi mikani kwe rabadre nikwe, ye käi rabadre nuäre nuäre nibtä abkokäre.

¹⁹ Nitre ru ngwianka abko käta jä doboko kite ñöte nguse ru ketatekrä dime, ñan rikadre mento abkokäre. Ngöbökwé jändrän köböi mikani nie, bti nita tödeke, ye abko jä doboko ye kwrere, ñobtä ñan angwane nita tödeke Ngöböbti ye abko käta ni mike nünenkä dite jabtä, ni ñan rikadre mento Ngöböye abkokäre. Nita tödeke kwatibe Ngöböbti, ye mden köböire ni nena nebe kä bäri deme Ngöbö kanti kä kämbti, ye abko nita näin dân ngetbote ta nebebe Kä Bäri Demente ju blitakrä Ngöböbe kanti ye kwrere.

²⁰ Kä bäri deme, ye mden kanti abko Jesu ara jire nikanina ji tike ni käne nebe yete. Ye abko, Melquisedec nämane blitaka Ngöböbe ni mda mda diäre, ye kwrere jire Jesu abko ni blitaka Ngöböbe ni mda mda diäre dänkien kärekäre kä bäri demente Ngöbö ngwäreki.

7

Melquisedec amne Jesu abko blitaka Ngöböbe ni mda mda diäre

¹ Melquisedec ye abko nämane jreire juta Salemte. Niara abko ni blitaka ni mda mda diäre Ngöbö ütiäte kribe. Bati Abraham jananbare rüre, käkwe jrei ruäre ganainbare kwäräbe, bti jataninta nüke Salem angwane, Melquisedec nikani ngäbti, käkwe ja di biani ie.

² Angwane Abrahamkwe jändrän dianinkä rübtä, ye ñäkänintbe keta jätä kwe, bti biani keteti kwe Melquisedeye. (Kukwe Melquisedec käta “Jrei kukwe ükatekä metre” niere hebreore. Akwa “jrei juta Salem” ye abko käta “Jrei kä jämente” niere hebreore arato.)

³ Melquisedec ye abko rün amne meye gare ñakare nie. Erere arato, mräkä kirakira gare ñakare nie. Mdakäre abko, niara därebare ñongwane amne krütani ya abkobtä Ngöbö Kukwei tä blite ñakare arato. Ne aiseite, Melquisedec abko hä mikata bäsi Ngöbö Odei Jesu kwrere arato amne niara abko ni blitaka Ngöböbe ni mda mda diäre kärekäre.

⁴ Melquisedec abko bäri ütiäte tuen munkwe. Melquisedec abko bäri ütiäte, aiseite ni mräkä käne Abraham ara jire käkwe mikani ütiäte jae amne jändrän dianinkä kwe jrei mda mdakän rübtä abko biani keteti kwe Melquisedeye.

⁵ Akwa Kukwe Biani Ngöbökwe Moiséye abko káta niere krörö: Nire nire därebare Leví mrákákri káta sribire ni blitaka Ngöböbe ni mda mda diäre kwrere, ye aibe kákwe jändrän káradre keteti jakrá abko nieta kore. Nitre blitaka Ngöböbe ni mda mda diäre ye abko israelita mráká ara amne därebare Abrahamkri arato, akwa jändrän káradre kore kwetre mrákáye abko nieta Ngöbö Kukweibtä.

⁶ Melquisedec abko ñan jatani Leví mrákákri, akwa Abraham ara jire kákwe jändrän dianinká rübtá ye abko kani ngábtí keteti kwe Abrahamye. Bäríre mda abko, Abraham abko ie Ngöbökwe jändrän köböi mikani akwa Melquisedec kákwe ja di biani Abrahamye.

⁷ Ye abko ni ie ja di bianta abko ñakare bári ütiáte ni ja di bianka ie ye kráke abko garera ni jökráye, aiseite Melquisedec abko bári ütiáte Abrahamkrá gare nie.

⁸ Angwane nitre blitaka Ngöböbe ni mda mda diäre därebare Leví mrákákri káta jändrän kaen ngábtí keteti jakrá nitre israelitaye, ye abko ni ká nebtá, aiseite tátre krúte. Akwa Melquisedec abko tá nire amne tá nüne janknu, kwrere jire blitata btá abko kákwe jändrän kani ngábtí keteti Abrahamye.

⁹ Amne nitre blitaka Ngöböbe ni mda mda diäre därebare Levíkri káta jändrän kaen ngábtí keteti jakrá, ye ara jire kákwe jändrän biani keteti arato Melquisedeye Abraham köböire abko ni rabadre niere,

¹⁰ ñóbtá ñan angwane Melquisedec jatani Abraham ngábtí angwane, Abrahamkwe jändrän biani keteti ie, ye ngwane Leví ngámi dárere, akwa námáne ñäre ñakare Abrahambtá angwane, Abrahamkwe jändrän biani Melquisedeye, aiseite Melquisedec abko bári ütiáte Leví kráke amne Leví mráká ja tärítári kráke arato.

Jesu abko Melquisedec kwrere

¹¹ Mdakäre abko, nitre blitaka Ngöböbe ni mda mda diäre därebare Levíkri káta jändrän kukwe Ngöböye ni ngite ngite ütiäre. Angwane Kukwe Biani Ngöbökwe Moiséye, ye rüere nitre israelita námáne ja mike ngite angwane, námáne jändrän ngwena nitre blitaka Ngöböbe ni mda mda diäre yeye kukwadre Ngöböye ja ngite ütiäre. Akwa jändrän kukwata Ngöböye ni ngite ngite ütiäre ye kákwe niaratre mikadre metre Ngöbö ngwärekre akráke Ngöbökwe ñan ni mda blitaka jabe ni mda mda diäre juandre jire mda. Akwa ni blitaka Ngöböbe ni mda mda diäre därebare Levíkri námáne jändrän kukwe ni ngite ngite ütiäre ye ñan namani ni mike metre Ngöbö ngwärekre, aiseite ni blitaka Ngöböbe ni mda mda diäre Melquisedec kwrere juani Ngöbökwe amne ñan ni mda Aarón kwrere juani kwe,

¹² ñóbtá ñan angwane ni blitaka Ngöböbe ni mda mda diäre kwitadre jökrá, ye ngwane kukwe biani nuendre nie ja ngite ütiäre ye kwitadre arato.

¹³⁻¹⁴ Ni Dänkien Jesu, btá Ngöbö Kukwei tá blite ye abko ñan jatani Leví mrákákri, akwa jatani Judá mrákákri. Judá mrákákri abko ni blitaka Ngöböbe ni mda mda diäre jatadre abko Moisékwe niebare ñakare jire, akwa Jesu abko därebare Judá mrákákri abko gare metre nie amne niara abko blitaka Ngöböbe ni mda mda diäre nieta Ngöbö Kukweibtä.

¹⁵ Ye abko, ni blitaka Ngöböbe ni mda mda diäre Melquisedec kwrere rükadre btin mda bkäná, ne ngwane nunkwe kukwe nini abko rabadre tuen bári metre nunye.

¹⁶ Ye abko, ni blitaka Ngöböbe ni mda mda diäre nukanina mda era metre, akwa Ngöbökwe ñan mikani sribire ñóbtá ñan angwane därebare Levíkri, akwa mikani sribire Ngöbökwe ñóbtá ñan angwane niara abko ni di kri amne krúte ñakare aiseite.

¹⁷ Ye gare nie, ñóbtá ñan angwane ni blitaka Ngöböbe ni mda mda diäre Melquisedec, yebtä Ngöbökwe niebare krörö:

Melquisedec námáne blitaka tibe ni mda mda diäre,

ye kwrere jire ma rabadi blitaka tibe ni mda mda diäre kärekáre,

Salmos 110.4

niebare Ngöbökwe Jesukristoye abko tá tikani Ngöbö Kukweibtä.

¹⁸⁻¹⁹ Leví mráká blitaka Ngöböbe ni mda mda diäre, ie Ngöbökwe sribi biani nuendre káne Moisés náire, akwa sribi kwe namani ngwarbe, ñan namani ütiáte, ñóbtá ñan angwane nikwe jändrän biandere ni blitaka Ngöböbe ni mda mda diäre kukwakrá ni diäre ni ngite ye ütiäre niebare Ngöbökwe Moiséye, ye abko di namani ñakare ni mikakrá metre Ngöbö ngwärekre. Ye mden kiseté, kukwe ye namani ütiáte ñakare mda amne kukwe ye táte abko Ngöbökwe kukwe mdara jire btin mikani Jesu köböire abko bári ütiáte tódekakrá nie. Jesu ye mden köböire abko nita krötó ja ken Ngöböbe.

²⁰ Mdakäre abko, Jesu namani bári ütiáte ye abko Ngöbö ara jire kákwe ja kukwei mikadre táte era metre abko ja kukwei biani kwatibe kwe Jesubtä. Akwa nitre blitaka Ngöböbe ni mda mda diäre därebare Levíkri abko Ngöbökwe mikani sribire arato, akwa niaratre kráke Ngöbökwe ja kukwe biani ñakare kwatibe kore.

²¹ Akwa ni Dänkien Jesu kráke abko Ngöbökwe ja kukwei biani kwatibe, aiseite Ngöbö Kukweibtä niebare krörö kwe Jesuye:

Ma abko blitaka tibe ni mda mda diäre kärekäre, aiseite ni Dänkien Ngöbö kākwe ja kukwei biani kwatibe kore, niebare kwe, yehti ñan ja tōi kwitadita jire chi kwe, *Salmos 110.4*

nieta kore Ngöbö Kukweibtä.

²² Ngöbökwé ja kukwei mikadi täte niebare kwatibe kwe, ye mdenbtä kukwe mda úkaninte btin Ngöbökwé Jesu köböire ye abko bäri kuin kukwe úkaninte káne Moisébe ye ngwä.

²³ Nitre blitaka Ngöböbe ni mda mda diäre därebare Levíkri ye abko kwati, kākwe sribibare ja täritäri, ñobtä ñan angwane tä krüte abko täte mda nämane neme sribire abti ká nūke mtare.

²⁴ Akwa Jesu abko tä nūne kärekäre, niara krütadita ñakare mda, aiseite Jesu aibe rabadi blitaka kärekäre Ngöböbe ni diäre amne ni mda ñan rabadi sribire jire chi niara täte.

²⁵ Ne aiseite, nire nire tä kite Ngöböyö rabakäre dianintari Jesu köböire, ye abko Jesu di tärä diantarikrä täte jökrä kärekäre, ñobtä ñan angwane Jesu abko tä nūne kärekäre blitakäre kräke Ngöböbe aiseite.

²⁶ Ye abko ni blitaka Ngöböbe ni mda mda diäre dänkien Jesu ye kwrere abko dbe nikrä abko erere namani, ñobtä ñan angwane Jesu abko deme, kukwe kämekäme ñakare btä amne ja mike ngite ñakare. Erere arato, nitre kukwe kämekäme nuenkä, ye kwrere nūnabare ñakare kwe amne Ngöbökwé mikani bäri útiäte ni jökrä ngwä ká káinbti sete.

²⁷ Ye abko, nitre blitaka Ngöböbe ni mda mda diäre dänkientre därebare Levíkri ye abko ñakare ja kwrere Jesube, ñobtä ñan angwane káne niaratre nämane jändrän kámike kukwadre Ngöböyö ja ngite útiäre, abti nämane jändrän kámike kukwadre mda Ngöböyö nitre israelita mda mda ngite ye útiäre. Ye abko nämane nuene köbö kwatirekwatire, akwa Jesu abko kākwe ja ara jire biani müre ketadre au ni jökrä ngite útiäre. Ye abko niarakwe nuenbare batibe amne útiäte kärekäre Ngöbö okwäte.

²⁸ Kukwe Biani Ngöbökwé Moiséye ye abko tä ni kukwe kämekäme nuenkä mike blitaka Ngöböbe ni mda mda diäre dänkiene. Abti Ngöbökwé ja Odei Jesu mikadi sribire niebare kwe. Ngöbökwé ja Odei Jesu ara mikani blitaka jabe ni mda mda diäre dänkiene. Ngöbö Odei Jesu ye abko Ngöbökwé mikani biare täte sribi ye nuenkäre kärekäre.

8

Kukwe úkaninte btin Ngöbökwé nibe

¹ Ye abko, kukwe nieta tikwe abko krörö: Jesu abko ni blitaka Ngöböbe ni mda mda diäre dänkien nikwe, ye abko ká bäri útiäte kánti namani tákänintbe Ngöbö küde ruenkri ká káinbti sribi namani bare ie bá mikakäre.

² Ká bäri kuin deme era metre ká káinbti, ye kánti tä blitaka ni diäre, ye abko ju blitakrä Ngöböbe nuäre ngwiandre* nämane bá mike, akwa ju ká káinbti ye abko ñan ni ká nebtäkwe mikani, akwa ni Dänkien Ngöbö ara jire kākwe mikani au abko kánti Jesu tä blite Ngöböbe ni diäre.

³ Nitre blitaka Ngöböbe ni mda mda diäre dänkien abko mikata jökrä Ngöbökwé jändrän biankäre Ngöböyö amne jändrän kukwakäre Ngöböyö ni ngite útiäre, ye kwrere arato Jesu kākwe jändrän biandre Ngöböyö ni ngite útiäre arato abko erere ja biani kwe müre ketadre krusobtä.

⁴ Akwa Jesu tädre janknu ká nebtä, ye ngwane abko niara ñan rabadre blitaka Ngöböbe ni mda mda diäre, ñobtä ñan angwane ni blitaka Ngöböbe ni mda mda diäre därebare Levíkri tärä kwati, káta jändrän bien Ngöböyö, Kukwe Biani Ngöbökwé Moiséye káta nuemna ietre ye kwrere.

⁵ Ju blitakrä Ngöböbe, kánti nitre blitaka Ngöböbe ni mda mda diäre ká nebtä tä sribire. Ju ye abko káta jändrän kuin era metre kena ká káinbti abko bá mike jirekabe ye gare nie, ñobtä ñan angwane kira ju blitakrä Ngöböbe nuäre ngwiandre ye Moisés nikani mike angwane, Ngöbökwé mäträbare btä, kākwe niebare krörö ie: Ju mikadre ño, tikwe bá mikaba tuadre mae Ngitio Sinaibti, yehtë makwe töbika amne, ju bá tuaba makwe, ye kwrere makwe mika, niebare Ngöbökwé ie.

⁶ Akwa Jesu abko ni blitaka Ngöböbe ni mda mda diäre dänkien tä nikwe ye abko sribi bäri kuin biani ie Ngöbökwé amne, niara köböire Ngöbökwé kukwe mdara jire úkaninte btin nikrä abko bäri kuin kukwe úkaninte káne Ngöbökwé Moisés näire yekrä. Amne kukwe úkaninte btin, ye köböire abko jändrän bäri kuin köböi biani nie Ngöbökwé.

⁷ Ngöbökwé kukwe úkaninte káne nitre israelitabe Moisés näire ye rabadre kuin täte jökrä, ye ngwane Ngöbökwé ñan kukwe mdara jire úkarete btin ben.

* **8:2 ju blitakrä Ngöböbe nuäre ngwiandre.** Ju ne abko kádianta tabernáculo suliare abko btä ma raba ñäke tärä Exodo 26-30.

⁸ Akwa kukwe úkaninte káne Ngöbökwe nitre israelitabe abko btä kukwe namani kri, ñobtä ñan angwane ye köböire niaratre ñan namani kuin metre, namani tuen Ngöböye, aisete Ngöbökwe niebare krörö abko tä tikani niara Kukweibtä:

Ni Dänkien Ngöbö káta niere krörö:

Kä jatadi angwane, tikwe kukwe mdara jire úkadite btin nitre israelita Judá mrákä yebe amne nitre israelita mda mdabe.

⁹ Tikwe kukwe úkadite btin mda, ye abko ñan rabadre kukwe úkaninte káne tikwe nitre israelita mrákä kánekáne ben Moisés náire ye kwrere.

Nitre israelita námáne Egipto angwane, ngábakre rún káta ngábakre kaen küdebti niara ngibiakäre,

ye kwrere tikwe nitre israelita kaba küdebti, ti rikaba ngwenante juta Egipto báre mento.

Ye ngwane tikwe kukwe úkateba bentre, akwa niaratre kákwe ti kukwei kitani temen amne, ñan mikani táte kwetre amne tikwe trö kwitaba ietre.

Akwa kukwe úkadite btin, ye abko ñan rabadre kukwe káne kwrere, niebare ni Dänkienkwe.

¹⁰ Akwa yehti tikwe kukwe mdara jire úkadite btin nitre israelitabe abko krörö nieta ni Dänkienkwe:

Ti kukwei ñan kái rikwitadrekä jire btitre, ñobtä ñan angwane rabadi niaratre töite.

Ti rabadi Ngöbö jen niaratrekwe amne niaratre rabadi juta jen tikwe.

¹¹ Ye ngwane abko, ni ñan rabadi dirire jire chi mda ni kukwe mukoye amne ni mrákäye ni Dänkien mikakäre gare ietre, ñobtä ñan angwane ni útiáte krikri amne ni útiáte ñakare abko ie ti rabadi gare jökrä, aisete ñan rabadi dirire jae kwárikwári.

¹² Mdakäre abko, nitre ye kákwe ja mikani ngite kri ti rüere, ye abko tikwe diandikä jökrä mento btátre.

Amne ja mikani ngite kwetre, ye ñan rúkadita töre jire chi tie,

Jeremías 31.31-34

niebare kore ni Dänkienkwe.

¹³ Ye abko, Ngöböta kukwe mda btin úkete tä niere, ye ngwane kukwe úkaninte káne Moisés náire abko tä neme útiáte ñakare nieta kwe amne, kukwe útiáte ñakare tárä neme ngwarbe abko nain nenká jötrö.

9

Ju blitakrä Ngöböbe nuäre ngwandre

¹ Ye abko, kukwe úkaninte káne Ngöbökwe námáne angwane, Ngöbö mikadre útiáte ño ño abko Ngöbökwe úkaninte ja táritári. Kä ye ngwane abko kä námáne mikani jenena kä nebtä, kánti Ngöbö káikitadrekä abko námáne úkaninte krörö:

² Ju blitakrä Ngöböbe nuäre ngwandre ye mikani angwane, namani ñákänintbe ketebu ja táritári abko krörö: kánime jukwe ken abko Kä Deme námáne. Kä Deme ye kánti abko ñotra grä námáne mikani amne mesa námáne kwati arato abko bti ban deme mikani Ngöbö ngwárekri.

³ Angwane kä bári gwi námáne ñákänintbe dán kukwän ngetbo ötóbu bti abko kädian námáne Kä Bári Deme.

⁴ Kä ye kánti abko ñukwä grä orore kri ngwári mnü rá báne kukwakrä Ngöböye námáne amne kaja btä oro námáne ketaninkä báre ta námáne yete abko Ngöbökwe kukwe úkaninte nitre israelitabe námáne bá mike. Erere arato, kaja orore ye teri abko kantra orore námáne mikani kwati. Kantra ye abko te mana námáne mikani. Mdakäre abko, kaja ye teri mökän Aarónkwe mu ngitianinkä* btä abko námáne. Erere arato, já btä Ngöbökwe ja Kukwei biani nuendre Moiséye ye námáne mikani arato kaja ye teri.

⁵ Angwane kaja kári ye kánti Ngöbö námáne ni ngite denká nibtä. Kaja kári yehti abko angele kä kerubine bá námáne mikani nibu abko námáne ngike metaninte ja ngäbti kwárikwári kaja káribti ta, ye abko Ngöbö útiáte kri námáne yete abko námáne bá mike kore. Ye abko, kukwe tä kabre mda jándrän nebtä, akwa gwängwarbe ti ñan raba blite metre jökräbtä ja táritári.

⁶ Jándrän jökrä námáne úkaninte biare kore ju nuäre ngwandre blitakrä Ngöböbe te, ye kánti nitre blitaka Ngöböbe ni mda mda diäre tä niken käre köbö kwatirekwatire kä ñákänintbe kena gwi kädianta Kä Deme ye kánti, sribi kwe nuenkäre Ngöbökrä.

⁷ Akwa kä ñákänintbe ketebukäre kä teri gwi kädianta Kä Bári Deme, kä ye kánti abko nitre blitaka Ngöböbe ni mda mda diäre dänkien aibe tä niken batibe kä kwatirekwatire. Akwa tä niken kä ye kánti angwane, jándrän dárie játa niken kwe metadrekä kaja yehti ta ja ngite útiä

* **9:4 Mökän Aarónkwe mu ngitianinkä.** Ngöbökwe mökän Aarónkwe mikani mu ngitiekä, niarakwe Aarón dianinkä sribikä jakrä bá mikakäre. Náke Números 17.1-11 ye kánti.

biankrä Ngöböye amne ni mda mda tä ja mike ngite abko tä gain ñakare abko ütiä biankrä arato.

⁸ Kukwe kore ye mden köböire abko Ngöbö Üai Deme nämane kukwe krörö mike gare nie: Jesu ngämi nüke, känenkri ju blitakrä Ngöböbe kánti kä deme tä käne yete, ye ngwane ji niken Kä Bári Demente, kánti Ngöböta abko tä dikani jite ni mda mda kräke.

⁹⁻¹⁰ Akwa kukwe ye abko tä kukwe bä mike jirekäbe nie kä ne ngwane abko krörö: Nitre israelita nämane nüke ju blitakrä Ngöböbe kánti jändrän bien kämikakrä Ngöböye ja ngite ütiäre. Erere arato, kukwe nämane ükaninte kabre mröbtä amne jändrän ñadre yebtä ja mikakäre dbe Ngöbö ngwäreki. Erere arato, nitre israelita nämane köböitike bätäkä ngwarbe amne nämane jüben bätäkä ngwarbe ja mikakäre dbe Ngöbö ngwäreki. Ngöböke ükaninte nuendre, ye kwrere nuenbare nitre israelitakwe, akwa nitre Ngöbö mikaka ütiäte kore jae, ye tä ja ngrabare aibe mike dbe Ngöbö ngwäreki, ñobtä ñan angwane jändrän yebti Ngöbö ñan tä ni töi kwite, aisete jata nebe ruen ngite janknu ietre, aisete Ngöbö ngämi kukwe mda ükete btin, ye känenkri abko kukwe ye ütiäte.

Kristo däre bäri ütiäte Ngöbö ngwäreki

¹¹ Akwa mtare Kristo nukanina. Niara köböire Ngöböke kukwe mda ükaninante btin, aisete niara abko ni blitaka Ngöböbe ni mda mda diäre dänkien nikä amne jändrän kuinkuin tä nikä Ngöböke, ye niara jatani bien nie. Erere arato, ju blitakrä Ngöböbe kä käinbti, ye kánti niara nikani gwi sribire ni blitaka Ngöböbe ni mda mda diäre dänkien kwrere. Ju ye abra bäri kuin deme era metre ju blitakrä Ngöböbe kä nebtä ye ngwä. Ju kä käinbti ye ñan ni kä nebtäke mikani amne ñakare sribi ni kä nebtäke.

¹² Mdakäre abko, Kä Bári Deme te Kristo nikani, ye abko ñan nikani chibo amne nbi ngäbäli däre bien ni ngite ütiäre, nitre blitaka Ngöböbe ni mda mda diäre dänkien tä nuene kä nebtä ye kwrere, akwa niara krütani krusobtä batibe ni ngite ütiäre abko namani dbe amne ütiäte kri kärekäre Ngöbö ngwäreki. Ye köböire Kristo käkwe ni dianinantari kärekäre, yebti Kä Bári Deme te Kristo nikani batibe, ñobtä ñan angwane sribi namani bare täte ie aisete.

¹³ Ye abko, nitre israelita käta nbi kwane däre, chibo däre metekä ni ngite ngitebti. Erere arato, nbi möre kukwata abko ngübrün metakata ni ngite ngitebti, ni ye ngite diankakäre mento btä, akwa ye abko käta ni ngite denkä ñakare jire chi mento ni yebtä, akwa tä ni ngrabare aibe mike dbe Ngöbö ngwäreki. Niaratre töi amne moto tä nebe käme janknu.

¹⁴ Jändrän ngwarbe ütiäte ni ngrabare aibe mikakrä dbe Ngöbö ngwäreki, akwa Kristo däre bäri ütiäte kri käkwe ni mikadre deme era metre Ngöbö ngwäreki, ñobtä ñan angwane Ngöbö Üai tä nire kärekäre ye köböire Kristo ara jire käkwe ja biani möre ketadre nikä krusobtä. Kristo abko deme metre, ja mike ngite ñakare jire bati Ngöbö rüere, käkwe ja biani Ngöböye ni ngite ütiäre. Ye mden kisete, kukwe kämekäme nuen nämane nikwe kä nämane niken ni ngwena Ngöbö okwä bäre mento, ye abko Kristo däre käta denkä jökrä ni töibtä amne Ngöbö nire nünanka kärekäre, ye kräke ni rabadre sribire, abkokäre Kristo däre käta ni mike deme Ngöbö ngwäreki.

¹⁵ Ye mden kisete, kukwe ükaninte btin Ngöböke nibe, ye abko Jesukristo aibe käta mike ütiäte nikä, käta ni mike ja mäketä Ngöböbe. Ni käräbare Ngöböke rabadre nüne kärekäre ben, Ngöböke köböi mikani kore ietre ye kwrere, abkokäre Kristo abko ni mikaka ja mäketä Ngöböbe kukwe btin ye köböire. Ni jökrä käkwe ja mikani ngite kukwe ükaninte käne Ngöböke ye näire, akwa Kristo krütanina niaratre diäre, niaratre tikatekäre kukwe kämekäme nuenbare kwetre yebtä, aisete Ngöbö raba mike nüne kärekäre jabe.

¹⁶ Yebtä abko, ti bike kukwe bä mike krörö: Ngäbäkre rün käta tärä ükete jändrän jakwe dräikrä ngäbäkrebt. Ye abko ngäbäkre rün tä nire angwane, kukwe ükaninte täräbtä ye ñakare ütiäte. Akwa ngäbäkre rün ye krütadre tä gare metre, ye ngwane batibe tärä ye rabadre ütiäte.

¹⁷ Ne aisete ni tärä ükatekä ye tä nire angwane, tärä ye ñan rabadre ütiäte, akwa krütadre angwane, batibe tärä ye rabadre ütiäte.

¹⁸ Ye mden kisete, kira Ngöböke kukwe ükaninte käne nitre israelitabe angwane, kukwe ye rabadre ütiäte, abkokäre jändrän gatadre abko däre käkwe kukwe ye mikani ütiäte.

¹⁹ Ne aisete Ngöböke kukwe biani nuendre, ye Moisékwe niebare jökrä nitre israelitaye, bti obeja drüen dikani dänre bä tain Moisékwe diani kisete, käkwe hisopo krie küde ötaninkä krati, bti nbi amne chibo däre mritani ñöbe abko te Moisékwe hisopo küde amne dän bä tain ye mritaninkä, bti metaninkä kwe kukwe biani Ngöböke Moiséye yebti amne nitre israelitabti arato.

²⁰ Angwane Moisékwe niebare ietre: Ngöböke kukwe ükaninte munbe, ye mden abko jändrän däre ne köböire nibira ütiäte munkrä mtare, niebare kwe ietre.

²¹ Erere arato, ju blitakrä Ngöböbe nuäre ngwiandre, yebti Moisékwe jädrän däríe metaninká amne, jädrän jökrá sribikrá ju yete abko bti jädrän däríe metaninká kwe arato,

²² ñobtä ñan angwane bási jädrän jire jökrá ye mikadre dbe Ngöbö ngwärekre jädrän ngwarbe däríebti amne, jädrän ñan kámikadre däríe mikakäre nibtá ne ngwane, ni ngite diankaka ñakare nibtá abko Kukwe Biani Ngöbökwé Moiséye káta niere.

²³ Ne aiseté, ju blitakrá Ngöböbe nuäre ngwiandre amne jädrän mda tá ju yete abko jädrän däríe káta mike dbe Ngöbö ngwärekre. Akwa ju blitakrá Ngöböbe amne jädrän mda mda tá ju yete, ye abko tá Ngöbö kánti ká káinbti aibe bá mike, akwa Ngöbö kánti ká káinbti abko bári útiáte, aiseté jädrän däríe abko ñakare útiáte jädrän yekrá. Ye mden kiseté, ni bári útiáte jädrän yekrá abko däríe aibe rabadre mike dbe Ngöbö ngwärekre,

²⁴ ñobtä ñan angwane ñan ju blitakrá Ngöböbe nuäre ngwiandre sribebare ni ká nebtákwe te Kristo níkani. Ju blitakrá Ngöböbe nuäre ngwiandre ká nebtá ye abko jädrän ño tá ká káinbti Ngöbö kánti tá úkaninte ño abko bá mikata jirekábe nete, ñan ye kwrere te Kristo níkani, akwa Ngöbö ká káinbti ara jire, kánti Kristo níkani, aiseté mtare Kristo tá Ngöbö ngwärekre ká káinbti amne tá blite níkrá Ngöböbe.

²⁵ Angwane nitre blitaka Ngöböbe ni mda mda diäre dánkien tá níken káre ká kwatirekwatire Ká Bári Demente jädrän jenena däríe ngwena ni ngite útiäre Ngöböye. Niara ñan tá ja däríe ngwena ni ngite útiäre Ngöböye. Ye kwrere Kristo ñan níkani ká káinbti ja mike müre ketadre báre báre ni ngite útiäre.

²⁶ Ye abko, jädrän kámika námáne káre ni ngite útiäre, ye kwrere Kristokwe nuendre, ye ngwane ká dátebare kena Ngöbökwé abti ká múke mtare Kristo krütadre báre báre ni ngite diankakäre mento nibtá; akwa ye kwrere nakaninká ñakare. Ká mrá ne ngwane Kristo níkani, kákwe ja bíani müre ketadre batibe amne kárekäre rabai útiáte Ngöbö ngwärekre. Kristo ara jire kákwe ja bíani müre ketadre au ni ngite diankakäre mento nibtá.

²⁷ Ye abko, ni jökrá krütadre batibe abko úkaninte kore Ngöbökwé níkrá, abti kritofo tá kukwe úkete, ye kwrere Ngöbökwé kukwe úkadite níkrá.

²⁸ Ye kwrere arato, Kristo kákwe ja bíani müre ketadre batibe ni kwati ngite ye diankakäre mento btátre. Abti Kristo jatadíta bobukäre ká nebtá angwane, ñan jatadíta ni ngite diankakáreta nibtá akwa, nire nire tá ngibiare ngábti, ye abko jatadi dentari.

10

Kristo kákwe ja bíani müre ketadre batibe

¹ Ye abko, ju blitakrá Ngöböbe nuäre ngwiandre te jädrän biandre ja útiäre niebare Ngöbökwé Moiséye, ye abko jädrän bári kuin jatadre Kristo köböire abko bá míka námáne, akwa jädrän ye bá aibe amne ñakare era metre. Ye mden kiseté, nitre námáne núke Ngöbö káikitakakäre ye námáne níken jädrän arabe bien kámikadre janknu ká kwatirekwatire ja ngite útiäre Ngöböye. Jädrän kámikani ye ñan raba ni ye mike metre Ngöbö ngwärekre.

² Ye abko, jädrän nuenta ja ngite útiäre ju blitakrá Ngöböbe te, ye kákwe ni ngite diandreká mento nibtá era metre, ye ngwane nitre Ngöbö káikitakaka námáne jädrän bien kámikakrá kore, ye ñan biandre kwetre ja táritári ja ngite útiäre, ñobtä ñan angwane niaratre ñan rabadre ngite mda Ngöbö ngwärekre amne ja ñan rabadre ruen ngite jire chi mda ietre.

³ Akwa jädrän bíanta kámikadre ja ngite útiäre Ngöböye, ye abko niaratre tá ja mike ngite Ngöbö rüere abko tá miketa töre ietre ká kwatirekwatire.

⁴ Niaratre tá nuene kore, ñobtä ñan angwane nbi kwane däríe amne chíbo däríe ye abko ñan raba ni ngite denká jire chí mento nibtá, aiseté jata nebe ruen ngite janknu ietre.

⁵ Ye mden kiseté, Kristo jatani núke ká nebtá angwane, niebare kwe Ngöböye abko tá tikani Ngöbö Kukweibtä abko krörö:

Jädrän ngwarbe kámikata makrá amne nura ngwá bíanta makrá, ni ngite diankakäre mento btá, ie ma ñan tö, aiseté makwe ti mikani därere ni ká nebtá kwrere.

⁶ Erere arato, jädrän kukwani makrá amne jädrän kámikani makrá ni ngite diankakäre mento btá, ye abko kái namani nuäre ñakare mabtá.

⁷ Abtä tikwe nieba krörö mae:

Ma kukwei tá tikani ño tibtä, ye kwrere tita nete ma kukwei mikakäre táte Ngöbö, *Salmos 40.6-8*

niebare Kristokwe Ngöböye.

⁸ Kukwe Biani Ngöbökwé Moiséye ye káta jädrän ngwarbe kámikamna biandre Ngöböye, akwa kukwe yebtä Kristokwe niebare Ngöböye: Jädrän ngwarbe kámikata mae amne nura ngwá bíanta, ye abko ie ma ñan tö amne kái namani nuäre ñakare mabtá. Erere arato, jädrän ngwarbe kukwata mae ni ngite diankakäre btá, ye abko ie ma ñan tö, niebare Kristokwe.

⁹ Yehti niebare krörö mda kwe Ngöböye: Ma kukwei tä tikani ño tibtä, ye kwrere tita nete ma kukwei mikakäre täte Ngöbö, niebare Kristokwe. Ne aisete kukwe úkaninte káne, ye abko Ngöbökwé dianinkä mento abko täte kukwe mda btin úkaninte kwe.

¹⁰ Jesukristo kákwé Ngöbö kukwei mikani täte, ja biani müre ketadre au kwe ni ngite diankakäre mento nibtä, ye mden köböire abko Ngöbökwé ni mikani deme ja ngwärekri, ñobtä ñan angwane Jesukristo krütani batibe amne ye abko útiáte kárekäre.

¹¹ Akwa kukwe úkaninte káne Ngöbökwé, yehti abko nitre blitaka Ngöböbe ni mda mda diäre tä núnaninkä krö* sribi kwe nuene Ngöbökrä köbö kwatirekwatire. Köbö kwatirekwatire jändrän kámikata kwetwe ja táritári, akwa jändrän ye ja kwrere jökrä amne di ñakare jire chi ni ngite denkä mento nibtä.

¹² Akwa Jesukristo abko kákwé ja biani müre ketadre batibe ni ngite útiáte biankäre amne ye rabai útiáte kárekäre. Yehti nikaninta ká káinbti amne, ká bári útiáte kánti namani tákáninbe Ngöbö küde ruenkri sribi namani bare täte ie bá mikakäre.

¹³ Ye kánti abko Ngöbökwé Jesukristo rüé mikadi jökrä niara ngoto táni abko tá ngibiare,

¹⁴ ñobtä ñan angwane Jesukristo kákwé ja biani müre ketadre batibe, ye köböire abko nire nire mikata deme bátárekä ja táritári Ngöbökwé ye abko Kristo mikani metre Ngöbö ngwärekri amne rabai metre kárekäre.

¹⁵ Kukwe ye abko era abko Ngöbö Úai Deme káta niere nie arato Ngöbö Kukweibtä abko krörö:

¹⁶ Akwa yehti kukwe rabadi úkaninte btin krörö nieta ni Dánkienkwe:

Ti kukwei ñan kái rikwitadrekä jire btiitre, ñobtä ñan angwane rabadi niaratre tóite.

¹⁷ Amne niaratre kákwé ja mikani ngite ti rüere, kákwé kukwe káme nuenbare ti rüere, ye ñan rúkadita tóre jire chi mda tie, *Jeremías 31.33,34*

¹⁸ Ye mden kiseté, Ngöböta ni ngite denkä mento nibtä, aisete jändrän ñakare jire chi mda biandre kámikakrä Ngöböye ja ngite útiäre.

Núnandrekä dite jabtä

¹⁹ Ne aisete ti mrákátre, mtare Jesu krütani, dárie nimianinte níkrä, yehti Ká Bári Deme Ngöbö kánti, ye kánti ká jürä ñakare jire chi nibtä niken rabakäre Ngöböbe, ñobtä ñan angwane Ngöbökwé ká biani nie niken niara kánti.

²⁰ Ni raba niken nebe Ngöbö kánti Ká Bári Deme te, ñobtä ñan angwane Jesu kákwé ji tikantina btin ni káne nebe Ngöbö kánti amne ni rikadre ji yehti Jesube angwane, níkwé núnandi kárekäre Ngöböbe. Ye abko, dán kukwán ngetho námáne mikani jite Ká Deme amne Ká Bári Deme ye otóbu ta, ye kánti ta Kristokwe ji tikani ni káne nebe Ngöbö kánti. Dán kukwán te ta Jesu nikani abko niara ngrabare ara jire. Niara krütani, ye gwane ji tikani kwe níkrä.

²¹ Amne ni Blitaka Ngöböbe Ni Mda Mda Diäre kri tä níkwé káta ni jen Ngöbökwé ngibiarebti.

²² Ne aisete, ja tói metrebti amne tödekabtä kwatibe Ngöböbti, ari krötö ja ken Ngöböbe, ñobtä ñan angwane Jesukristo kákwé ja dárie metaninkä ni tói kámenbti, ye kákwé ni mikanina deme. Nitre blitaka Ngöböbe ni mda mda diäre námáne jüben nánkrä Ngöbö kánti, ye kwrere Jesukristo kákwé ni ngrabare júkaninante, aisete ari krötö Ngöbö ken.

²³ Mdakäre abko, Ngöbökwé jändrän köböi mikani nie abko ngibiare ngábti, yehtä ari núnenkä dite jabtä, ñobtä ñan angwane Ngöbökwé ja níkwé mikadi täte metre, aisete jändrän köböi mikani kwe, ye erere rabadi bare, aisete níkwé ñan ja tói mikadre ngwarbe kwärákwärä amne níkwé tödekadre kwatibe Ngöböbti.

²⁴ Erere arato, ari ja kite ja tarere kwárikwári amne sribi kuin nuene jakrä kwárikwári.

²⁵ Mdakäre abko, nitre tödekaka Jesubti káta gátäre abko kánti ni ruäre ñan tá kwen gátábtä, ye kwrere níkwé ñan nuendre, akwa Jesukristo ni Dánkien jatadita abko köböi núkerate ja ken, ye gadre níkwé angwane, ari ja úkekrö bári gátábtä amne, ari ja die mike kwárikwári nán gátábtä.

²⁶ Níkwé kukwe ye mikadre täte, ñobtä ñan angwane Ngöbö Kukwei era metre Jesubtä garera nie, yehti ta ni tádre ja mike ngite janknu ja tói jenbti Ngöbö rüere, ye ngwane jändrän mda ñakare jire kámikadre Ngöböye ni ngite diankakäre mento nibtä abko rabadre útiáte Ngöbökrä.

²⁷ Akwa Ngöbökwé kukwe úkadite tare krúbáte rüekrä abko köböi mikani kwe ietre, ye aibe ni rabadre ngibiare, ñobtä ñan angwane ñukwä jutra krikri káta jändrän jökrä gaenkä, ye kwrere jire Ngöbökwé niara rüé gadikä jökrä ja dokwäre.

* **10:11 núnaninkä krö.** Nitre blitaka Ngöböbe ni mda mda diäre námáne núnaninkä krö sribi nuenkäre, ye abko káta sribi ngámi nebe bare ietre bá mike.

²⁸ Ye abko, Kukwe Biani Ngöbökwe Moiséye abko nire nire kákwe kitani temen amne, niarakwe ja mikani ngite bkänä kukwe ye rüere abko ni nibu ya o ni nimä kákwe niara tuani nuene kore niedre kwetre rüere, ye ngwane ni ye ñan namani nebe ruentari tare, akwa kitani ngise kämikadre.

²⁹ Se abko ni Ngöbö Odei bäri ütiäte kri ye mikaka ngwarbe jae ni mda mda okwäbti, käta mike ütiäte ñakare amne Ngöbö Odei därie deme, mdenbti Ngöbökwe kukwe ükaninte btin nibe, därie ye mikata ütiäte ñakare kwe, çye dokwäre abko Ngöbökwe ñan ni mikadre ja ngie nuen bäri kri krübäte abko munta nütüre ya? Erere arato Ngöbö Üai ni tarekä abko ni ye tä mike ngwarbe, çye dokwäre abko Ngöbökwe ñan ni mikadre ja ngie nuen bäri kri krübäte abko munta nütüre ya?

³⁰ Ngöbökwe ni mikadre ja ngie nuen ye gare nie, ñobtä ñan angwane ni Dänkien Ngöbö kákwe niebare krörö abko tä tikani niara Kukweibtä:

Ti ara jire kákwe ni mda mda mikadi ja ngie nuen ja dokwäre, *Deuteronomio 32.35*
niebare Ngöbökwe. Bärire mda abko, niebare krörö mda kwe:

Ni Dänkien Ngöbö kákwe kukwe ükadite juta jen kwe kräke angwane, mikadi ja ngie nuen kwe, *Deuteronomio 32.36*
niebare kwe.

³¹ Ne aisete Ngöbö nire moto rabadre romon nikrä kákwe ni mikadre ja ngie nuen ja dokwäre, ye ngwane ñi bobre jakän!

³² Kukwe kore ñan rakadrekä munbtä, abkokäre mun jatani tödeke krire kena Kristobti angwane, kukwe nakaninkä krörö munbtä, ye munkwe ngwianta töre jae ja die mikakäre nünanbtä dite Kristokrä: Munkwe ja tare nikani kri kena tödekabtä Kristobti, akwa munkwe nünankabare dite jabtä.

³³ Angwane mun ruäre abko ie ñäkäbare kämekäme amne taretare ni kwati ngwärekri amne, mun ruäre abko metani ni jökrä ngwärekri arato. Erere arato, ni ruäre nämane ja tare nike kore abko ben mun ruäre abko namani nekete jakri die mikakäre.

³⁴ Mdakäre abko, nitre tödekaka Jesubti kitani ngite kä teri ye abko namani ruentari tare munye amne, munkwe die mikani, ye munkwe ngwianta töre jae. Erere arato, tödekabtä Jesubti jändrän jen munkwe abko dianinkä munkän, akwa munkwe rübare ñakare dokwäre amne kä namani bäri nuäre munbtä. Ye ñobtä ñan angwane jändrän bäri kuin, niken ngwarbe ñakare tä kä käinbti munkwe abko namani gare munye, aisete mun namani jäme, ye abko munkwe ngwianta töre jae arato.

³⁵ Ne aisete, Jesuta mun tarere amne, jatadita mun ngwiankäre kä käinbti tä gare metre munye, ye abko munkwe ñan kita temen, akwa munkwe tödeka kwatibe janknu bti, ñobtä ñan angwane ye ütiäre abko Ngöbökwe jändrän kuin biandi kri munye.

³⁶ Ye abko, Ngöbökwe jändrän kuin köböi mikani munye, ye rükadre mun kisete, abkokäre munkwe nünandrekä dite bätärekä janknu ja tare nikakäre tödekabtä Jesubti,

³⁷ ñobtä ñan angwane Ngöbö Kukwei käta niere krörö Jesubtä:

Ni juandre Ngöbökwe ye abko gwängwarbe kebera nuke.

Kä ñan kitadre raire ta kwe, aisete rükadi jötrö.

³⁸ Amne ni deme tikwe käta tödeke kwatibe tibti amne ñan ti rükandite kwe, akwa nire nire kákwe trö kwitadreta tie, ye abko käi rabadi nuäre ñakare tibtä, *Habacuc 2.3-4*

nieta kore Ngöbö Kukweibtä.

³⁹ Akwa ni abko ñan tä rikakäreta ja jiebti, aisete Ngöbökwe ñan ni gadrekä, akwa ni abko tödekaka Jesubti, aisete ni ne abko rabadi dianintari nünakäre kärekäre Ngöböbe.

11

Tödeka Ngöböbti abko bäri ütiäte kri

¹ Tödeka ye abko jändrän ngibiata nikwe abko erere rükadi ni kisete abko nita mike era jae amne, jändrän tuen ñakare nie, akwa jändrän ye abko tarä era metre tä nebe ruen nie.

² Ye abko, ni mräkä kirakira kákwe tödekani kore Ngöböbti, ye namani tuen kuin Ngöböye abko Ngöbökwe niebare.

³ Erere arato, nita tödeke kwatibe Ngöböbti aibe köböire Ngöbökwe kä käinta btä kä tementa dätebare ja kukweibti abko tä nuke gare nie. Akwa jändrän tuen ñakare nie abkobti Ngöbökwe kä käinta amne kä temen dätebare, ye abko tä nuke gare nie, nita tödeke Ngöböbti angwane.

⁴ Mdakäre abko, Abel kákwe tödekani kwatibe Ngöböbti, aisete jändrän bäri kuin biani kwe Ngöböye etba Caín ye ngwä. Jändrän biani Abelikwe Ngöböye, ye Ngöbökwe kani ngäbti amne kuin niebare kwe btä. Angwane Abel nämane tödeke Ngöböbti, ye namani tuen kuin Ngöböye abko Ngöbökwe niebare. Ye abko, Abel krütanina, akwa tödekani kwatibe Ngöböbti kwe, yebtä abko kädrie tä mtare.

⁵Enoc abko kákwe tódekani Ngöböbti, ye köböire abko Ngöbö nikani ngwena nire kä kainbti, aiseite batibe ñan kwani nitre nünanka yete yeye, ñobtä ñan angwane Ngöbö nikani ngwena nire kore. Ngöbö ngämi niken Enoc ngwena kä kainbti, känenkri Enokwe tódekani Ngöböbti, ye abko käi namani nuäre Ngöböbtä abko nieta Ngöbö Kukweibtä.

⁶Ye abko, nita tódeke ñakare Ngöböbti angwane, ni ñan raba Ngöbö moto mike nuäre jire chi, ñobtä ñan angwane ni ngämi krötö Ngöbö ken, känenkri abko Ngöbö tärä, ye abko nikwe mikadre era, abti nikwe krötadre Ngöbö ken, amne nita niara känene abko ütiä biandi kwe nie, kákwe ni kadre ngäbti abko rabadre era ninkrä arato.

⁷Ngöbökwé ni jökrä gadrekä ñöte abko Ngöbökwé niebare Noéye angwane, Ngöbö ngämi nuene, akwa Noé nämane Ngöbö deme ye jürä ngwen jabtä, kákwe ru sribebare mräkä kwekwe diantarikrä, ñobtä ñan angwane Noé abko kákwe tódekani kwatibe Ngöböbti. Noé kákwe tódekani Ngöbö kukweibti, ye köböire abko ni mda mda gadrekä Ngöbökwé abko niarakwe mikani gare ietre amne, tódekabtä Ngöböbti Noé namani tuen metre Ngöbö ngwäreki, niebare Ngöbökwé.

⁸Abraham abko Ngöbökwé käräbare nüne Canaán angwane, Ngöbö kukwei mikani täte kwe, aiseite kä biandre Ngöbökwé ie, ye kánti nikani ñobtä ñan angwane tódekani Ngöböbti kwe. Mden kisete nämane nüne, ye kánti kä mikaninkä kwe, bti rikadre mdente ñan nämane gare ie, akwa nikani.

⁹Erere arato, Abraham nämane tódeke Ngöböbti, aiseite Ngöbökwé kä köböi mikani ie, ye kánti nünabare ni menteni kwrere kwe ju nuäre ngwiandre te. Isaac amne Jacob, ie Ngöbökwé kä ye köböi mikani ja kwrere Abrahambe arato, kákwe nünabare ju nuäre ngwiandre te arato.

¹⁰Abraham kákwe nünabare kore, ñobtä ñan angwane juta mikani Ngöbökwé abko te tö namani näin nüne kärekäre Ngöböbe abko nämane ngibiare. Juta ye abko Ngöbö ara jire kákwe mikanintbe amne Ngöbö ara kákwe juta ye mikani abko Abraham nämane ngibiare.

¹¹Mdakäre abko, Sara namanina kise mriani jabtä amne Abraham abko namanina unsunine, akwa Ngöbökwé ngäbäkre köböi mikani ietre, yehti tódekani kwatibe kwetre abko köböire ngäbäkre Isaac därebare kwetre Ngöbö diehti, ñobtä ñan angwane Ngöbökwé ngäbäkre köböi mikani ietre, ye erere Ngöbökwé ja kukwei mikadre täte jökrä, yehti tódekani kwetre, aiseite ngäbäkre namani kwetre.

¹²Abraham namanina unsunine amne di ñan namanina ngäbäkre ngibiare, akwa Ngöbökwé ngäbäkre köböi mikani ie, ye köböire abko Abraham ngäbriänkä namani kwati krübäte ja täritäri muke kánta se kwrere amne üman mren köräbare kwrere, aiseite ñan raba tanre.

¹³Nitre ye abko krütani jökrä angwane, jändrän köböi mikani ietre Ngöbökwé, ye tuani ñakare ja kisete kwetre, akwa tódekani janknu Ngöböbti kwetre. Ye köböire abko jändrän köböi mikani ietre, ye namani era kräke amne kani ngäbti kwetre. Niaratre nämane nüne ni menteni kwrere amne, nämane nüne jötrö kä nebtä abko niebare jabtä kwetre ni mda mdaye.

¹⁴Nire nire kukwe niekä kore ye abko tä kä mda känene Ngöbö kánti nünankrä jae abko bä mikata jabtä kwetre.

¹⁵Nitre ye töi tätre kä jakwe aibehtä, akräke nämane nüne käne ye kánti rikareta, akwa ñan nikaninta,

¹⁶Ñobtä ñan angwane kä bäri kuin, ie niaratre tö namani amne, kä bäri kuin ye abko tä Ngöbö kánti kä kainbti. Ye mden kisete, nitre ye nämane Ngöbö tikwe niere Ngöböye, yehtä Ngöbö nämane ja gaire ñakare, ñobtä ñan angwane juta namanina ükaninte biare kräke Ngöbökwé.

¹⁷Abraham abko kákwe tódekadre janknu Ngöböbti ya, ñakare ya, ye abko Ngöbö tö namani gai, aiseite Abraham ngobo itibe Isaac abko Ngöbökwé müre ketamna ie. Abraham namani biare ngobo itibe müre kete, ñobtä ñan angwane niarakwe tódekani kwatibe Ngöböbti. Ngöbökwé Isaac köböi mikani Abrahamye amne,

¹⁸Isaakri Abraham ngäbriänkä rabadu kwati Ngöbökwé niebare ie, akwa nikani ngobo müre kete,

¹⁹Ñobtä ñan angwane Ngöbö di nämänena ni krütani mikakäreta nire, erere ngobo kwe mikadreta nire kwe nämane gare ie, aiseite nikani ngobo ngwena müre ketadre angwane, ni krütani rükata nire, kwrere jire Isaac namaninta nire Abraham kisete, Ngöbökwé Isaac kämikamna ñakare ie angwane.

²⁰Abti Isaac abko kákwe tódekani Ngöböbti, aiseite dre dre rakadrekä ngäbriänkä Jacobobtä amne Esaútbä niara täbti, yehtä ja di biani kwe ietre.

²¹Abti Jacob kebera krüte angwane, niara nämane tódeke Ngöböbti, köböire ja di biani kwe José ngobo nibu yeye. Angwane namani gitaninkä mökänbti, kákwe Ngöbö käikitaninkä.

²² Abti José abko jatanina krüte angwane, Ngöbö rikadre nitre israelita ngwenante Egipto bare mento nebebe Canaán, niebare kwe mrákäye. Angwane José kroko järikadreta doboi mikadre ja käite Canaán, yebtä abko kukwe ükaninte kwe arato, ñobtä ñan angwane nämane tödeke Ngöböbti.

²³ Abti Moisés abko därebare angwane, meye amne rün käkwe rükaninte sö krämä Faraón nganiene, ñobtä ñan angwane niaratre nämane tödeke Ngöböbti. Faraón käkwe ngäbäkre brare brare nitre israelitakwe kämikamna jökrä, ye ngwane Moisés därebare. Akwa Moisés abko namani tuen bä nuäre meyeye amne rünye, abtä Faraón jürä namani ñakare Moisés meyebtä amne rünbtä, käkwe Moisés rükaninte, ñobtä ñan angwane nämane tödeke Ngöböbti.

²⁴ Abti Moisés abko namanina ünän angwane, ñan tö namani rabai Faraón ngänkän ngobo kwrere mda, ñobtä ñan angwane nämane tödeke Ngöböbti.

²⁵ Erere arato, kä ngwian nuäre jabtä ja mikakäre ngite Ngöbö rüere Faraón kanti, ye mikani ütiäte ñakare kwe jae amne bäri tö namani ja tare nikai mräkä israelita ben gwaire.

²⁶ Mdakäre abko, Kristo rabadre mikani ütiäte, abkokäre Moisés rabadre tuen ngwarbe ni mda mdaye, ye Moisés tö namani bäri, aisete jändrän kuinquin ütiäte krikli Egipto yete, ye namani ütiäte ñakare kräke, ñobtä ñan angwane Ngöbökwere jändrän bäri kuin biandre ie tödekabtä Ngöböbti, yebtä Moisés töi nämane.

²⁷ Erere arato, Moisés nämane Egipto angwane nämane tödeke Ngöböbti, köböire nikani nitre israelita mda mda ngwenante Egipto bare mento angwane, Faraón mätä namani btä, ye jürä ngwiani ñakare kwe, aisete Ngöbö tuen ñakare, akwa yebtä ja töi mikani kwe amne ja ñan namani ruen naente ie amne nikani janknu mentokwäre Egipto bare mento.

²⁸ Erere arato, Moiséskwere Pascua nuenbare amne jändrän däräie metakamna jukwebtä kwe nitre israelitareye, ñobtä ñan angwane Moisés nämane tödeke Ngöböbti, aisete jändrän däräie metakamna jukwebtä kwe, angele ni kämikaka käkwe ñan nitre israelita ngobo mubai kämikadre jire iti abkokäre.

²⁹ Yebti nitre israelita abko nikani Mren Tainte ta angwane, kä namani nötare kanti ta nikani, ñobtä ñan angwane nämane tödeke Ngöböbti; akwa nitre Egiptobo nikani Mren Tainte ta nitre israelita jiebti angwane, ñö nikaninta jökrä täte käkwe müre ketani jökrä.

³⁰ Abti ki mikani juta Jericóbti abko bare nitre israelita käkwe dikakabare köbö kükü angwane, Ngöbökwere ki ye juani jökrä temen, ñobtä ñan angwane niaratre nämane tödeke Ngöböbti aisete.

³¹ Erere arato, juta Jericó yete abko nitre israelita jananbare kä tuenbti tiebe angwane, meri iti bti kä ngwarbe nämane nüne yete kädian nämane Rahab. Rahab abko käkwe tödekani Ngöböbti, aisete nitre kä tuabtikä ye kani ngäbti kuin kwe, aisete nitre nünanka juta Jericóte ye kämikani nitre israelitakwe angwane, meri Rahab ye abko kämikani ñakare kwetre ni mda mda ben gwaire.

³² Ne abko, nitre mda mda käkwe tödekani Ngöböbti, yebtä abko tikwe blitadre ja täritäri jökrä, ye ngwane kä ñan rabadre täte tie blitakrä btä. Tikwe blitadre Gedeóntä, Barabtä, Sansóntä, Jeftébtä, Davibtä, Samuelibtä amne ni mda mda Ngöbö kukwei niekä yebtä angwane, kä ñan rabadre täte tie blitakrä btä.

³³ Ni ruäre käkwe tödekani Ngöböbti, köböire kä dianinkä kwetre ni mda mdakän rübtä. Ruäre abko käkwe kukwe ükaninte kuin metre ni mda mdakrä amne jändrän köböi biani Ngöbökwere nükani ni ruäre kisete, ñobtä ñan angwane nämane tödeke Ngöböbti. Ni ruäre abko käkwe lion kada ketani, ñobtä ñan angwane nämane tödeke Ngöböbti.

³⁴ Erere arato, ni ruäre käkwe tödekani Ngöböbti abko köböire ñukwä jutra krübäte ötaninte kwetre amne, ni ruäre abko kämika tö namani ngitrabti angwane kwäräbebare kwetre, tödeka Ngöböbti ye köböire. Erere arato, ni ruäre di jatanini krüte rübtä, akwa tödeka Ngöböbti, ye köböire Ngöbökwere mikaninta dite, käkwe rüe ganainbare kwäräbe rübtä.

³⁵ Mdakäre abko, meri ruäre käkwe tödekani Ngöböbti abko köböire mräkä krütanikrütani abko Ngöbökwere mikaninta nire. Ni ruäre abko nämane tödeke Ngöböbti, aisete mika nämane ja tare nike angwane, ñan tikadreteta, ie tö namani, ñobtä ñan angwane Ngöbökwere niaratre mikadita nire bobuta abko rabadre bäri kuin nämane nütüre, aisete nämane biare krüte.

³⁶ Amne ni mda abko mikani yakrä jae tödekabtä Ngöböbti amne kwata metani amne mäkäninte kadenanbti, bti kitani ngite kä teri, ñobtä ñan angwane nämane tödeke Ngöböbti.

³⁷ Ni mda abko nämane tödeke Ngöböbti, aisete kämikani jäbti amne, ni mda abko tikaninkä ötöbu ta sierrabti amne ni mda abko kämikani ngitrabti tödeka dokwäre Ngöböbti. Amne ni mda abko nämane nüne bobre, kä nämane obeja amne chibo kwata aibe kite jabtä abko te nämane dikekä nekwäre sekwäre abko nämane ja tare nike amne nämane moto ulire, tödeka Ngöböbti dokwäre.

³⁸ Nitre ye abko bäri ütiäte nitre Ngöbö rüe ye ngwä. Niaratre käkwe nünabare kä ketareketare te kä kaibete amne nämane nüne ngifio bare temen. Erere arato, nämane nüne

jäkwaata mkäate amne kä mkä mda mdate kwäräkwärä, akwa niaratre jökrä nämane tödeke Ngöböbti.

³⁹ Akwa Ngöbökwé jändrän köböi mikani, ye nitre tödekaka Ngöböbti nünanka Jesu känenkri ye käkwe ñan tuani jire ja kisete, akwa nämane tödeke janknu Ngöböbti, yebtä abko nämane ütiäte kri Ngöbökrä.

⁴⁰ Ye abko, Ngöbökwé jändrän bäri kuin köböi mikani nikrä Kristo köböire, ñobtä ñan angwane ni aibe ben gwaire Ngöbö tö namani ni tödekaka bti nünanka kira ye mikai metre abko köböi mikani kwe.

12

Ngöböta ngäbriänkä kwekwe töi den

¹ Kore ni kwati käkwe tödekani era metre Ngöböbti ni känenkri. Ni ye abko käta ni die mike nüne Kristo kräke. Ye aisete ni yebtä ari töbike amne jändrän jökrä käta ni drätäkekä amne kukwe kämekäme Ngöbö rüere te nita nibrente, ye abko ari kite jökrä temen, bti kä kuin kukwäre nita neen, ye kukwäre ari ja die mike bäri niare janknu.

² Akwa nita tödeke Ngöböbti ye abko tä kite Jesu köböire amne Jesu ara jire käkwe ni mikadi tödeke bäri kuin metre Ngöböbti, aisete Jesu yebtä ari ja okwä mike kwatibe. Jesu abko müre ketani krusobtä angwane, namani ja gaire ñakare krütäbtä nikrä krusobtä, ñobtä ñan angwane Jesu käkwe ja tare nikadre, yebtä kä rabadreta bäri nuäre krübäte btä kä käinbti namanina gare ie, aisete namani biare ja tare nike. Ye erere bkänä, Ngöbö nikani Jesu ngwenante kä käinbti amne namani tākānintbe kürä gobrankrä Ngöbökwé ye küde ruenkri sete, ye abko Jesukwe sribi nuenbare täte jökrä abko tä bä mike.

³ Ne aisete nitre kukwe kämekäme nuenkä kisete Jesu käkwe ja tare nikani kri kore, yebtä munkwe töbika kuin ja käne, ñobtä ñan angwane ja tare nikadre ño abko Jesukwe bä mikanina nie. Mun ñan rabadre dräre amne mun ñan di krütadre ja tare nikabtä, abkokäre munkwe töbikadre Jesubtä.

⁴ Ye abko, munta rüere kukwe kämekäme rüere nünakäre deme Ngöbökrä gare tie, akwa mun ngämi krüte jire iti rübtä kukwe kämekäme rüere.

⁵ Munta ja tare nike, akwa Ngöbö Kukwei tä tikani munbtä abko raba mun moto miketa nuäre, ye käi nikwitankä munbti. Mun abko Ngöbö ngäbriänkä abko Ngöbö Kukwei tä niere krörö:

Ti ngobo tikwe, ni Dänkien käta mäträre munbtä, ngäbäre jakwe kwrere, ye munkwe ñan mika ngwarbe jae.

Amne ni Dänkien käkwe mun ka olobti, yebtä mun ñan di krüta nünanbtä niarakrä,

⁶ ñobtä ñan angwane nire nire tareta ni Dänkienkwe, yebtä abko tä mäträre,

amne nire nire kata ngäbti ja ngobo kwrere kwe abko tä kaen olobti, *Proverbios 3.11-12*

abko nieta Ngöbö Kukweibtä.

⁷ Ne aisete munta ja tare nike tödekabtä Jesubti, ye abko mäträra kore Ngöbökwé raba gare munye, ñobtä ñan angwane Ngöböta mun kaen ngäbti ja ngobo kwrere, aisete tä mäträre kore munbtä. ¿Mun ñan tä mäträre ngäbäre munkwebtä ya? Jänri.

⁸ Ne aisete ni jökrä Ngöbö ngäbriänkäre abko btä Ngöböta mäträre. Ngöböta mäträre ñakare munbtä, ye ngwane mun ñakare Ngöbö ngäbriänkä era metre.

⁹ Bärire mda abko, ni nämane kiakia ngäbärere angwane, ni rün kä nebtä nämane mäträre nibtä, kä nämane ni kaen olobti, abtä ni nämane mike ütiäte jae. ¿Se abko ni Rün käta mäträre nibtä amne tä ni kaen olobti ni mikakäre nüne kärekäre jabe abko nikwe ñan mikadre ütiäte jae ya? jänri, niara bäri mikadre ütiäte jae nikwe!

¹⁰ Ñobtä ñan angwane nita nüne jötrö kä nebtä, akwa ni rün nikwe nämane mäträre nibtä amne nämane ni kaen olobti jändrän mden mden nämane nebe tuen dbe ie, ye erere nämane mäträre nibtä. Akwa Ngöböta mäträre nibtä, käta ni kaen olobti, ye abko bäri kuin amne ütiäte nikrä, ñobtä ñan angwane ye köböire abko ni rabadre deme Ngöbö kwrere.

¹¹ Ni mda tä mäträre nibtä, käta ni kaen olobti, ye näire abko tä nebe tuen tare nie bkänä, akwa kukwe btä mäträra nibtä ye tä nuke gare era metre nie angwane, tä ni die mike nüne era metre amne kuin jame Ngöbö ngwäkri. Ne aisete mäträra nibtä amne ni kata olobti, ye abko kuin nikrä.

¹² Ne aisete nire nire küde tä nebe dräre ie amne ngüreta nebe di ñakare ie, ye kwrere mun di kitera krüte ja tare nikabtä ne ngwane, ja di miketa munkwe amne,

¹³ ji ükete kuin metre ja käne munkwe, ye köböire ni mda mda ngüre bren ie, kisete tä näin ni nakwente kwrere ye abko ngüre rabadreta kuin metre dikekä amne ñan di krütadre, abkokäre munkwe ja di mikata näin janknu Jesube.

Ñan trö kwitadre Ngöböye

¹⁴ Mdakäre abko, munkwe ja töi mika kwatibe nünakäre jäme ni jökrä ben amne munkwe ja töi mika kwatibe nünakäre deme Ngöbökrä, ñöbtä ñan angwane nikwe ñan nünandre deme, ye ngwane nikwe ñan ja tuadre ni Dänkienbe.

¹⁵ Erere arato, Ngöböta ja moto mike kuin munkrä, yehti mun ñan rabadrete jire iti, abkokäre munkwe ja ngibia. Erere arato, nane ni ruäre moto romon krübäte dikaro ni mdakrä, ye ngäniene munkwe ja ngibia kwärikwäri, ñöbtä ñan angwane ni romon kore käkwe ñan kukwe käme ye kitadre temen, ye ngwane kri ngätri tä niren kri, ye kwrere ni moto romon abko rabai bäri romon krübäte amne, niara käkwe ni mda ngwiandre ja mike ngite ja kwrere, aiseite munkwe ja ngibia kukwe ye ngäniene.

¹⁶ Mdakäre abko, munkwe ñan ja mika gure tiebe ni mda mdabe amne jändrän kuin deme, ye ie munkwe ñan trö kwita Esaúkwe nuenbare kira ye kwrere. Esaúkwe jändrän kuin rürümoinbare jakän etba Jacoboye. Esaú abko mubai, aiseite niara die mikadre rünkwe, akwa mrö batibe btä jändrän kuin ye rürümoinbare kwe jakän Jacoboye.

¹⁷ Yehti dre nakaninkä Esaútbä, ye garera munye abko krörö: Esaú abko mubai, aiseite rünkwe ja di biandere ie abko tö namani, akwa rün käkwe ja di bianina Jacoboye, aiseite trö kwitani jirekäbe kwe ie. Esaú käkwe jändrän ye müaibare kri krübäte, akwa ja ñan namani nuene kräke. Ne aiseite Esaú käkwe trö kwitani jändrän kuin demeye, ye kwrere munkwe ñan nuendre.

¹⁸ Mdakäre abko, mun jatani tödeke Jesubti angwane, ñan jändrän tuen abko kukwäre mun jatani nitre israelita kwrere, ñöbtä ñan angwane kira nitre israelita nükani Ngitio Sinai kánti, ye kánti Ngöböke ja bä mikani ütiäte kri abko krörö: Nükwä namani tuen jutra ngitiekä ietre amne kä namani tuen iko ietre amne kä namani tuen diore ietre amne kä namani tuen ñüre ietre.

¹⁹ Erere arato, drü kukwei jarabare ietre amne Ngöbö kukwei jarabare ietre. Nitre israelita käkwe Ngöbö kukwei nuani kore ye abko Ngöböke ñan ñäkadre mda ietre abko namani ribere,

²⁰ ñöbtä ñan angwane Ngöbö namani kukwe ükete tare krübäte ye abko namani mate tare btätre Ngitio Sinaibtä abko krörö: Nire nire käkwe ngoto mikadre Ngitio Sinaibti abko kämikadre jäbti, akwa ñan kämikadre jäbti ne ngwane, kämikadre bukobti, ye abko ni nire ya o jändrän ngwarbe, akwa kämikadre kore, Ngöbö namani niere, ye abko nitre israelita käkwe kukwe nuani. Akwa mun abko jatani tödeke Jesubti angwane, drü kukwei jarabare ñakare munye amne Ngöbö kukwei jarabare ñakare munye arato nitre israelita kwrere.

²¹ Jändrän krübäte nakaninkä Ngitio Sinaibti, ye abko nitre israelita käkwe tuani, aiseite Moisés ara jire käkwe niebare krörö: Ti nibi nekwetekä krübäte Ngöböbtä, aiseite ti nibi grükekä jökrä ngrabare, niebare kwe.

²² Akwa munkwe tödekani Jesubti angwane, mun jatani Ngitio Siónte. Ngitio ye kánti abko Ngöbö nire tä nüne amne ngitio ye abko juta Jerusalén kä káinbti ara abko kánti mun jatani. Kä ye kánti abko angele mili kabre tä ja úkaninkrö Ngöbö käikitekä.

²³ Amne Ngöbö ngäbriänkätre jire jökrä abko Ngöbö Odei mubai kwrere, ñöbtä ñan angwane jändrän jire jökrä Ngöböke abko niaratrekrä abko káita tikani kä káinbti, niaratre käkwe nünandi käreäre Ngöböbe bä mikakäre abko tä ketitibe jökrä, ye kánti mun jatani, munkwe tödekani Jesubti angwane. Erere arato, Ngöbö kukwe ükatekä metre ni jökrä kräke abko ken mun jatani amne, nitre nünanka kuin metre Ngöbö ngwäreki abko Ngöböke mikani metre ja ngwäreki abko úai ye ken mun jatani arato munkwe tödekani Jesubti angwane.

²⁴ Amne Jesu köböire Ngöböta kukwe ükete btin nibe abko ken mun jatani amne Jesu däre ni ngite diankakrä mento nibtä, ye ken mun jatani. Jesu däre ye abko ñakare Abel däre kwrere, ñöbtä ñan angwane Abel kämikani Caínkwe abko dokwäre Ngöböke mikani ja ngie nuen, akwa Jesu däre abko köböire Ngöböta ni ngite denkä mento nibtä.

²⁵ Ne aiseite ti mräkätre, mtare Ngöböta blite nibe, ye munkwe ñan kitadre okwä kware temen, ñöbtä ñan angwane kira Ngöböke ñäkäbare Moisés köböire nitre israelitaye, ye niaratre käkwe ñan Ngöbö kukwei mikani täte, abtä Ngöböke mikani ja ngie nuen amne kwärebare ñakare kwetre. Mtare abko Ngöbö kä káinbti ara jire káta ñäke nie, ye ie nikwe trö kwitadre angwane, nikwe ñan kwärebere jire chí.

²⁶ Kira Moisés näire, Ngöbö kukwei käkwe kä temen ne ngwiani ngrenkä Ngitio Sinai kánti, akwa mtare Ngöbö Kukwei káta niere krörö mda:

Tikwe kä temen ne ngwiandita ngrenkä bati mda, ye ngwane kä káinbti ngwiandi ngrenkä tikwe arato, *Hageo 2.6*
nieta Ngöböke.

²⁷ Ngöböke kä ngwiandi ngrenkä bati mda tä niere, ye abko jändrän jökrä dätebare abko Ngöböke diandikä jökrä mento juankäre ngwarbe kä mrä angwane abko Ngöböta mike

gare nie. Ne aisete jändrän jökrä dätebare abko Ngöbökwé diandikä amne jändrän ñan diandrekä kä käinbti abko erere rabadi kärekäre aibe rabadi mda.

²⁸ Amne kä ye kánti Ngöböta gobrane, ye ñan raba denkäta jire abko Ngöböta bien nie amne rabadi kärekäre nikä. Yebtä abko, ari kuin niere Ngöböye amne ari Ngöbö käikitekä. Erere arato, ari Ngöbö mike ütiäte jae niara jürä ngwiane kwärä, Ngöbö tö ie, ye kwrere ari nuene,

²⁹ ñobtä ñan angwane Ngöbö nikwe abko krübäte amne ñukwä jutra krübäte kwrere, käkwe jändrän jökrä amne ni jökrä niara rüere juandi ngwarbe.

13

Kukwe mrä

¹ Ne aisete, munta ja tarere, ye kwrere munkwe ja tare janknu ni ja mräkäre tä ja tarere ye kwrere.

² Erere arato, ni menteni rüka mun kánti angwane, munkwe ka ngäbti kuin, ñobtä ñan angwane ni kabtä ngäbti kuin kore ni ruäre käkwe angele Ngöbökwé kani ngäbti ja juete abko ñan nämane gare ietre.

³ Mdakäre abko, tödekabtä Jesubti ni ruäre tä ngite kä teri, ye munkwe ngwian ruentari tare jae amne munta ngite siba ben raba ruen munye, käkwe die mika. Erere arato, tödekabtä Jesubti ni ruäre mikani ja tare nike kri krübäte, ye munkwe ngwian töre jae amne munta ja tare nike siba ben raba ruen munye, käkwe die mika.

⁴ Mdakäre abko, mun merire brare gure gure käkwe ja mika ütiäte jae kwärikwäri amne munkwe nüna era metre jabe kwärikwäri, ñobtä ñan angwane ni gure, akwa tädre ja mike gure bati bati abko Ngöbökwé mikadi ja ngie nuen. Erere arato, ni merire brare ja mikaka ngite bätäkä ngwarbe jabe kwärikwäri abko Ngöbökwé mikadi ja ngie nuen arato.

⁵ Mdakäre abko, munkwe ñan ngwian tare dikaro amne jändrän ño ño tä munkwe, ye abko käi ngwian nuäre jabtä munkwe, ñobtä ñan angwane Ngöbökwé niebare krörö:

Tikwe ñan ma mikadrete jire chi kaibe amne, tikwe ñan kä mikadrekä jire chi mabtä,
Deuteronomio 31.6

niebare Ngöbökwé.

⁶ Ye mden kisete, nikwe tödekadre kwatibe Ngöböbti, käkwe niedre krörö:

Ti Dänkien Ngöbö abko ti die mikaka, aisete nire nire tö raba kukwe nuein blo ti rüere abko
jürä ñakare tibtä,
Salmos 118.6-7

ni rabadre niere.

⁷ Mdakäre abko, nire nire käkwe ji ngwiani mun käne, käkwe Ngöbö kukwei kuin Jesubtä mikani gare munye, ye abko munkwe ngwianta töre jae. Nitre mun jie ngwianka ye käkwe nünabare ño mun okwäbti, amne tödekani ño Ngöböbti kwe, yebtä munkwe töbika ja käne amne munkwe nüna niaratre kwrere.

⁸ Jesukristo abko nämänena jändrin, ara tä mtare amne ara tädi kärekäre.

⁹ Ne aisete ni mda jata kukwe mda bä jene dirire munye, ye jiebti mun ñan rankwa. Ye abko, kukwe ükaninte mröbtä, yebtä abko ni ruäre tä dirire, akwa kukwe ye mikabtä täte ni ñan rabadre ja mike metre Ngöbö ngwäreki, aisete Ngöbö moto kuin käta ni tarere, yebtä ni rabadre nünenkä dite abko bäri kuin, aisete mun ñan rankwa kukwe mda mda jiebti.

¹⁰ Ni tödekaka Jesubti abko kräke Jesu krütani krusobtä, akwa nitre blitaka Ngöböbe ni mda mda diäre tä sribire ju blitakrä Ngöböbe kánti, ye ñan raba sribi kuin nuenbare Jesukwe krusobtä ye bkäne jire chi, akwa nikä abko ütiäte.

¹¹ Mdakäre abko, ju blitakrä Ngöböbe kánti nitre blitaka Ngöböbe ni mda mda diäre dänkien tä niken jändrän ngwarbe däre ngwena Ngöböye Kä Bäri Demente ni ngite di-ankakäre mento btä, akwa jändrän kämika nämane kwetre ye abko ngwäkä nämane kukwe juta bäre mento.

¹² Ye kwrere arato, Jesu krütani ni ngite diankakäre mento nibtä ja däre köböire ni mikakäre deme Ngöbökrä angwane, krütani juta Jerusalén bäre mento.*

¹³ Ne aisete, Jesu jänikani juta Jerusalén bäre mento angwane, ni mdakwe mikani ngwarbe jae, ye kwrere ni rikadre Jesube gwaire angwane ni mikadi ngwarbe jae arato, ye ngäbti ari ja mike juto,

¹⁴ ñobtä ñan angwane juta nünankrä kärekäre nie ñakare kä nebtä amne, juta mda jatadi btin abko nita näin känene janknu.

* **13:12 krütani juta Jerusalén bäre mento.** Kira, nitre israelita käkwe niaratre ngite mikani jändrän ngwarbebtä, btin jändrän ye juani kwetre juta bäre mento ni ngite ngwiankäre mento bä mikakäre. Ye kwrere Jesu krütani juta bäre mento, niarakwe ni ngite dianinkä mento nibtä ye bä mikakäre. Näke Levítico 4.21; 16.20-28 yebtä.

¹⁵ Ye abko, jändrän bianta kämikakrä Ngöbö käikitakakäre, ye täte ari Ngöbö käikitekä kärekäre Jesukristo köböire. Ngöbö käikitadrekä nikwe ja kadabti, ye abko jändrän bianta Ngöbö käikitakakäre kwrere.

¹⁶ Amne jändrän kuin nuendre ni mda mdakrä, ye munkwe ñan käikwitaka jabti, akwa nire nire käta jändrän mdei nike, ye abko ie munkwe jändrän jakwe bian niaratre die mikakrä. Ye abko jändrän bianta Ngöböye kwrere arato, aiseté käita nebe nuäre Ngöböbtä.

¹⁷ Mdakäre abko, nitre mun jie ngwianka ye kukwei mika täte munkwe amne dre dre nuemna kwetre munye, yebtä abko munkwe ñan kukwei kita temen, ñobtä ñan angwane niaratre käre tä mun ngibiarebti. Erere arato, nitre mun jie ngwianka kākwe sribibare ño abko niedita jökrä kwetre Ngöböye. Erere arato, kä rabadre nuäre btätre sribire munkrä, abkokäre niaratre kukwei mikadre täte munkwe. Amne munkwe ñan sribi mika tare krübäte niaratre kisete, ñobtä ñan angwane ye ñan rabadre kuin munkrä.

¹⁸ Mdakäre abko, ja ruen ngite ñakare nunye Ngöbö ngwärekre amne nun tö jändrän jökrä nuene kuin metre, aiseté munkwe blita Ngöböbe munkrä.

¹⁹ Erere arato, Ngöbö diebti ti rabadre niken ja tuenta jötrö munbe yete, abkokäre munkwe blita bäri Ngöböbe tikrä abko ti tö ribei kisere munye.

²⁰⁻²¹ Ngöbö kä jäme bianka nie kākwe ni Dänkien Jesu mikaninta nire. Niara dārie köböire Ngöbökwé kukwe ūkaninte btin mda nibe abko rabadri kärekäre. Jesukristo abko obeja ngibiaka kri kwrere, käta ni ngibiare kuin. Ngöbö ye abko kākwe mun mika biare jändrän jökräbtä, niara tö dre dre abko mun rabadre nuene kuin täte abkokäre. Amne nun abko btä Ngöbö tö dre dre nuein Jesukristo köböire, ye erere nuendi kwe. Kristo aibe mikadre ūtiäte kärekäre nikwe. Abko kore se. Amen.

²² Mdakäre abko ti mräkätre tikwe, kukwe tikani chi braibe tikwe mun die mikakäre, ne munkwe ka ngäbti ja moto kuinbti abko ti tö ribei munye.

²³ Erere arato, ni mräkä Timoteo kitani ngite kä teri, akwa tikaninante abko ti tö nibi mikai gare munye. Niara rükadre jötrö ti kanti nete angwane, ti näin ngwena siba jabe nebe mun kanti yete basare munye.

²⁴ Mdakäre abko, nitre mun jie ngwianka tä yete, ye kräke tita köbö kuin juen, munkwe nie ietre tikrä. Erere arato, juta deme Ngöbökwé tä yete, kräke tita köbö kuin juen, munkwe nie ietre. Nitre nūnanka Italia nete käta köbö kuin juen mun jökrä kräke yete.

²⁵ Ngöbökwé ja moto mika kuin mun jökrä kräke amne ja di bian kwe munye. Abko kore se. Ne ngörä.

Tärä Tikani Santiagokwe Santiago

Santiago kākwe tärä ne tikani. Niara abko Jesu etba nütüta. Mdakäre abko, niara nämane nüne juta Jerusalénte, kánti nämane ji dokwäte nitre tödekaka Jesubti ye kräke. Erere arato, nitre Jesu kukwei ngwianka kākwe gätäbare juta Jerusalénte blitakäre sribi Pablokwebtä angwane, Santiago nämane ji dokwäte. Hechos 15 ye kánti ma raba ñäke kukwe nebtä. Jesu etba Santiago, btä kukweta tikani Mateo 13.55, Santiago ye ara kākwe tärä ne tikani.

Nitre israelita kwati tödekaka Jesubti nämane nüne ni menteni kwrere ká ketareketare temen ká Israel bäre. Niaratre ye kräke Santiago kākwe tärä ne tikani. Tärä nebtä Santiago kākwe blitabare kukwe keta kabrebtä, akwa bäri káne abko Santiago tá niere krörö: Nita nüne ká nebtä angwane, nikwe ja tare nikadi tödekabtä Jesukristobti. Yebtä nikwe ñan töbikadre kri, ñobtä ñan angwane ja tare nika yebti Ngöböta ni die mike nüne bäri metre ja okwäbti. Nita ja tare nike angwane, nikwe ká ngwianandre nuäre jabtä abko Santiago kākwe niebare.

Mdakäre abko, nitre tödekaka Jesubti tá nüne ño amne tá dre dre nuene, ye abko káta niaratre tödekaka metre Jesubti ya, ñakare ya bá mike tuare ni jökräye, niebare Santiagokwe. Erere arato, nita blite ño ño jabe kwärikwäri abko ütiäte amne nikwe ñan ni jändrän bkáne krikri mikadre bäri ütiäte ni bobre bobre kräke, ñobtä ñan angwane nitre bobre abko ütiäte Ngöbö ngwärekre amne Ngöbökrä ni ja kwrere jökrä abko Santiago tá niere.

Mdakäre abko, ni ngwian bkänkä krikri káta ni bobre bobre mike ngwarbe jae, káta sribi ütiä bien ñakare metre ietre abko kräke kukwe kri, ñobtä ñan angwane ye dokwäre Ngöbökre mikadi ja ngue nien abko niebare Santiagokwe.

Santiagota köbö kuin juen

¹ Ti Santiago káta tärä ne tike. Ti abko sribiká Ngöbökre amne ni Dänkien Jesukristokwe. Mun tödekaka Jesubti därebare juta nitre israelitakwe kwá jätäbti kubu yekri, káta nüne ká ketareketare temen ká Israel bäre temen, ye kräke tita köbö kuin juen.

Nünandrekä dite käreäre

² Ti mräkäre tikwe, ñongwane erere mun raba ja tare nike bätäkä ngwarbe tödekabtä Jesubti, ye ngwane munkwe ká ngwian bäri nuäre jabtä,

³ ñobtä ñan angwane munta tödeke metre Ngöböbti ya, ñakare ya, ye trä tuakäre munta ja tare nike. Ja tare nika, ye köböire mun rabadre nünenkä dite käre tödekabtä Jesubti abko garera metre munye.

⁴ Munkwe ja tare nikadre bätärekä ja täritäri abti mun nena nünenkä dite raire era metre, ye köböire abko mun rabadre nüne metre Ngöbö ngwärekre ni ünän kwrere amne mun ñan rabadre jändrän kuin Ngöbökre mdei nike.

⁵ Akwa munkwe dre dre nuendre, ye ñan raba nuke gare munye angwane, Ngöbökre mun mikadre töbtä abko munkwe käre ie angwane, mun mikadi töbtä kwe, ñobtä ñan angwane nire nire káta jändrän käre ire, ye erere Ngöböta jändrän bien täte jökrä ie amne tá jändrän kábäire ñakare ni jökrä kán. Amne munta ja mike ngite, yebtä ñan rabai romon jire chi.

⁶ Akwa Ngöbökre jändrän biandi nie, ye rabadre era ni kräke, kākwe ja töi mikadre kwatibe, kākwe jändrän käre ire amne nikwe ñan ja töi mikadre ngwarbe kwäräkwarä jändrän käreäre ie, ñobtä ñan angwane ni ja töi kwite ngwarbe kwäräkwarä, ni ye abko ere ngwane tá tödeke Ngöböbti, ere ngwane ñakare. Ni ye abko mren gilen kitata müre ribikwe kwäräkwarä nekwäre sekwäre ye kwrere.

⁷⁻⁸ Ni ye abko tá tödeke Ngöböbti mtare amne jetbe tärä nebe tödeke jändrän mdabti, aiseté töi ñakare kwatibe Ngöböbti, aiseté ni ja töi kwite ngwarbe kwäräkwarä kore jändrän jökräbtä, ye abko ie ni Dänkien Ngöbö kākwe ñan jändrän biandre jire chi nütüdre kwe.

⁹ Mdakäre abko, ja mräkä tödekaka Jesubti mden mden tá nüne bobre abko ie ja rabadre ruen ütiäte, ñobtä ñan angwane tá jändrän jökrä Ngöbökre bkáne.

¹⁰ Akwa ja mräkä ngwian amne jändrän bkáne krikri kākwe tödekani Ngöböbti amne ja mikani bobre kwe Ngöbö ngwärekre, ye abko btä ká raba nuäre, ñobtä ñan angwane ni ngwian amne jändrän bkáne krikri abko kri blü tá nebe jötrö ye kwrere abko krörö:

¹¹ Kri blü abko tá nebe tuäre, akwa ñänänta kite ngire, káta bá rötökä amne tá näkäenka temen amne ñan tá nebe tuäre mda. Ye kwrere jire, ni ngwian amne jändrän bkänkä krikri káta sribi nuene, btärebe ngwian amne jändrän kwekwe tá niken ngwarbe jötrö kán angwane, ñan rabadre ütiäte mda.

¹² Mdakäre abko, nire nire káta ja tare nike tödekabtä Jesubti amne tá nünenkä dite jabtä, ni yebtä abko ká rabadi bäri nuäre, ñobtä ñan angwane ja tare nika ye rikadre ta angwane,

niarakwe Jesu rükaninte ñakare, ye ngwane Ngöbökwé jändrän kuin biandi ie, kákwe mikadi nüne kärekäre jabe, ni gananka ie korona bianta ye kwrere, ñobtä ñan angwane nire nire këta Ngöbö tarere amne tä Jesu rükente ñakare abko ie Ngöbökwé jändrän ye köböi mikani.

¹³ Mdakäre abko, mun mden mden ie kukwe kämekäme mdei jata mun nuatekäre ja käne, ye abko ñan Ngöböta mun nuente kukwe kämenbtä munkwe nütü, ñobtä ñan angwane kukwe kämekäme mdeita nebe ñakare jire chi Ngöböye, aisete kukwe kämekäme ñan raba niara nuente jire chi ja käne. Erere arato, Ngöböta ni nuente ñakare jire chi kukwe käme nuenkäre,

¹⁴ akwa kukwe kämekäme këta ni nuente ja käne, ye abko kukwe käme mdei ni töibtä tä ni nuente ja käne, këta ni näkwite ja kukwäre.

¹⁵ Yehti kukwe kämekäme mdeita nebe nie, ye erere nita niken nuene angwane, nita ja mike ngite Ngöbö rüere angwane, kukwe kämekäme ye aibe jiehti nita niken nakwen janknu. Nita ja mike ngite täte jökrä Ngöbö rüere, ye dokwäre abko nita krüte amne nita nebe kärekäre Ngöbö okwä bäre mento.

¹⁶ Ti mräkätäre tare tikwe, munkwe ñan ja ngökamna,

¹⁷ ñobtä ñan angwane Ngöbö sö dätekä amne ñänä, muke dätekä jökrä, Ngöbö ye ara jire këta jändrän jökrä kuin amne metre ni die mikakrä ye bien nie. Ngöbö abko ja kwrere kärekäre. Sö amne ñänä nikwite bä jene jene, ye kwrere Ngöbö nikwite ñakare, aisete jändrän kuin metre bianta kwe nie, jändrän ye abko kä käinbti bianta kwe nie, aisete Ngöbö ñan raba ni nuente kukwe kämekäme nuenkäre.

¹⁸ Ye abko, ja moto kuinbti Ngöbö tö namani ni mikai ja ngäbriänkäre, erere nuenbarera kwe ja töi jenbti kukwe kuin era metre Jesubtä köböire. Amne nura ngwä kena öta nämame biandre Ngöböye, ye kwrere jire jändrän jökrä dätebare Ngöbökwé, ye ngätäite Ngöbökwé ni dianinkä käne jakrä ja ngäbriänkä kwrere.

Ni kukwei nuadre

¹⁹ Mdakäre abko, ti mräkätäre tare tikwe, kukwe krörö ne munkwe ngwianta töre jae: Mun jökrä kákwe ja olo mika juto biare Ngöbö Kukwei nuakäre, akwa mun ñan raba juto biare blite amne mun ñan raba romon jötrö ngwarbe,

²⁰ ñobtä ñan angwane ni moto romon abko këta nüne ñakare kuin metre Ngöbö ngwärecri, Ngöbö tö ie ye kwrere.

²¹ Ne aisete, kukwe kämekäme diän diän tä kabre mun ngätäite, ye kite temen munkwe amne kukwe kuin Ngöbökwé nökäni nura kwrere munbtä, ye kaen ngäbti mikakäre täte ja moto jämenbti munkwe, ñobtä ñan angwane kukwe kuin Ngöbökwé ye abko di tära mun diantarikrä.

²² Akwa Ngöbö Kukwei kuin ye abko ñan munkwe kukwei nuadre jirekäbe, akwa kukwe ye abko tä dre dre nuemna, erere munkwe mika täte, ñobtä ñan angwane munkwe ñan mikadre täte ne ngwane, mun tädi ja ngökö au.

²³ Ye abko nire nire këta Kukwe kuin Ngöbökwé ye kukwei nuen jirekäbe, akwa dre dre nieta kwe abko tä mike ñakare täte, ni ye abko ni ja tuaka ñäite kwrere abko krörö:

²⁴ Ni ja tuaka ñäite këta ja ngwäre tuen kuin au, akwa tä nikenka mentokwäre angwane, btäräbe niara bä ño, ye tä nebe töre ñakare mda ie.

²⁵ Akwa Ngöbö Kukwei kuin era metre abko kuin ni tikatekrä, ye nire nire këta nuene abko tä töbike kuin metre ja käne amne tä mike täte metre jökrä, ni ye këta jändrän kuin kuin nuene, ye abko käi rabadi nuäre btä.

²⁶ Amne nane mun ruäre tä nekete Ngöbö Kukweibtä ruen munye, akwa mun kada nekete ñakare blitare amne munta ñäke krübäte ni mda mdabtä ne ngwane, munta ja ngökö au amne kukwe btä munta nekete ye abko tä nebe ngwarbe, ütiäte ñakare,

²⁷ ñobtä ñan angwane nire nire këta tödeke metre Jesubti abko tä nüne kuin amne deme Ngöbö ngwärecri amne tä kukwe krörökrörö nuene: ngäbäkre uli uli die mikadre. Erere arato, meri kän brare krütanikrütani këta ja tare nike bätäkä ngwarbe, ye abko die mikadre amne kukwe kämekäme kä nebtä ye ngäniene ja ngibiadre kuin deme. Nikwe nuendre kore, ye ngwane nita nekete era metre Ngöbö Kukweibtä.

2

Ñan ni iti mikadre bäri ütiäte ni mdakrä

¹ Ti mräkätäre tare tikwe, munta tödeke ni Dänkien Jesukristo bä nuärehti. Mun ye abko kákwe ñan ni iti mika bäri ütiäte ni mdakrä.

²⁻³ Ye abko ti bike bä mike krörö: Nane mun tädre ja ükaninkrö gätäbtä angwane, ni ngwian bkänkä kri rükadre abko kisebtä anio orore tädre amne dän kuin ütiäte tädre btä abko munkwe kadre ngäbti kuin, kákwe niedre ie: Kä bäri kuin ne kënti jakwe täke nete, munkwe niedre ie. Ye btäräbe ni bobre rükadre arato amne dän köliköli te rükadre angwane, munkwe

niedre ie: Ma raba nūnaninkā yete o ma raba tākānintbe temen ti ngotobtä, munkwe niedre ie,

⁴ ye ngwane munta ni iti mike bāri ūtiāte jae ni mda yekrä amne munta kukwe nuene ja tōi kāmēnti kore ni mda rūere, aisetē munkwe űan ni mda mikadre bāri ūtiāte ni mdakrä.

⁵ Ti mrākātre tare tikwe, olo ketete ti kukweye munkwe: Nitre bobre bobre ni jōkrā okwābti, ni ye abko Ngōbōkwe dianinkā jakrä tōdekakāre Jesubti, ye kōbōire abko Ngōbō okwābti niaratre tā jāndrān bkāne bāri kabre nitre ngwian bkāne kabre kā nebtā ye krāke. Erere arato, kā kuin kānti Ngōbōta gobrane, ye abko biandi kwe nitre bobre bobre kāta Ngōbō tarere yeye, niarakwe jāndrān kwe kōbōi mikani ietre ye kwrere.

⁶ Akwa mun abko tā nitre bobre bobre mike ngwarbe jae amne nitre ngwian bkānkā krikri abko munta mike ūtiāte jae, űye űan nitre ngwian bkāne krikri ara tā mun mike ene ja kisete ya? ¡Jānrī! űErere arato, űan niaratre ara tā mun jāke jae kritobo ngwārekri ya? ¡jānrī!

⁷ Mdakāre abko, űJesukristo kā kuin bā nuāre abko tā mun bkāne, űan niara rūere nitre ngwian bkānkā krikri kāta űāke blo arato ya? ¡Se űobtä abko munta niaratre mike ūtiāte jae se!

⁸ Ni Dānkien Gobranka kri kākwe kukwe biani nuendre nie, ye munkwe mikadre tāte, ye ngwane munkwe kukwe nuendre kuin. Mden erere nieta krōrō Ngōbō Kukweibtä:

Mata ja tarere au,

ye kwrere makwe ni mda mda tare arato,

Levítico 19.18

abko nieta Ngōbō Kukweibtä.

⁹ Akwa munta ni iti mike bāri ūtiāte ni mdakrä, ye ngwane munta ja mike ngite angwane, kukwe biani Ngōbōkwe nuendre, ye rūere munta ja mike ngite,

¹⁰ űobtä űan angwane kukwe biani nuendre Ngōbōkwe nie, ye ni iti tādre mike tāte jōkrā, akwa nane kukwe ye kitadre kwatibe temen kwe, ye ngwane ja mikadre ngite kwe kukwe biani nuendre jire jōkrā ye rūere,

¹¹ űobtä űan angwane Ngōbō ara jire kākwe niebare krōrō: Mun gure gure kākwe űan ja mika gure tiebe ni mda mdabe. Erere arato niebare krōrō kwe: Munkwe űan ni mda kāmika, niebare kwe. Ye mden kisete, ni gure kāta ja mike gure űakare tiebe ni mda mdabe, akwa ni mda kāmikadre kwe, ye ngwane kukwe biani nuendre ye kitata jōkrā temen kwe.

¹² Ye abko, Kristokwe kukwe biani nuendre ni tikatekāre, yehti Ngōbōkwe kukwe űkadite nikrä, aisetē munta blite ni mda mdabe amne munta kukwe nuene ben angwane, munkwe mikadre ūtiāte jae ja kwrere jōkrā.

¹³ Ye űobtä űan angwane Ngōbōkwe kukwe űkadite kā mrā angwane, nire nire ie mrākā namani ruentari tare űakare, ye abko űan rabadre ruentari tare Ngōbōye arato; akwa nire nire ie mrākā namani ruentari tare, ni ye abko Ngōbōkwe kukwe űkadite krāke angwane, rabadi ruentari tare Ngōbōye arato.

Sribi kuin nuenta, yehti nita tōdeke Jesubti abko tuata nibtä

¹⁴ Mdakāre abko ti mrākātre tikwe, nita tōdeke Jesubti ni tādre niere jirekābe, akwa nita jāndrān kuinquin nuene űakare ni mda mdakrä, űse abko nita tōdeke Jesubti nita niere abko kōbōire ni rabadi dianintari ya? ¡űakare! Ye abko ti bike bā mike krōrō munye:

¹⁵ Nane ni mrākā merire ya amne brare ya tādre ja būtie nike amne tādre mrō nike.

¹⁶ Ja mrākā ye abko ie mun iti kākwe niedre: Ma rikata kuin, ie ti tō ti mrākā amne kā űan rabadre tibo mabtā, abkōkāre makwe dān kita jabtä amne makwe mrō kweta trinetrine, munkwe niedre ie. űAkwa dān amne mrō mdei nikata kwe, ye munkwe biandre űakare ie amne, juandreta ngwarbe jirekābe kise tōkare ja jiebti, ye abko kākwe die mikadre ya? űakare, aisetē munkwe űākādre kore ie, ye abko rabadre ūtiāte űakare krāke.

¹⁷ Ye kwrere arato, nita tōdeke Jesubti nita niere, akwa ni jāndrān kuinquin nuene űakare tōdeka Jesubti ye bā mikakrä, ye ngwane nita kukwe ūtiāte űakare niere ngwarbe kore.

¹⁸ Ye abko, ni rabadre niere krōrō: Mata tōdeke jirekābe Jesubti, akwa ti abko tā jāndrān kuin nuene jirekābe ni mda mdakrä abko ni rabadre niere. Ye abko mata jāndrān kuinquin nuene űakare ni mda mdakrä, ye ngwane mata tōdeke Jesubti űan jatai tie mabtā; akwa ti abko tā jāndrān kuinquin nuene ni mda mdakrä, yehti abko tita tōdeke Jesubti abko makwe tuadre tibtä.

¹⁹ Amne Ngōbō tārä itibe abko mata mike era jae, ye abko mata tōbike kuin kore, akwa mata tōdeke űakare metre Ngōbōbti, ye kwrere arato Ngōbō tārä itibe abko mikata era jae űai kāmekāmenkwe amne Ngōbō jūrā tā nebe btātre, abtä tātre nebe grūkekā Ngōbō ngāniene, akwa tātre tōdeke űakare Ngōbōbti.

²⁰ űűobtä ma tōi űakare dikaro? Nita tōdeke Ngōbōbti nikwe niedre, akwa nita jāndrān kuinquin nuene űakare ni mda mdakrä, ye ngwane nita tōdeke űakare Ngōbōbti abko raba gare mae,

²¹ ñobtä ñan angwane ni mräkä kira Abraham nikani ngobo Isaac ngwana müre ketadre Ngöbö mikakäre ütiäte jae, ye ngwane tödekani kwe Ngöböbti, käkwe jändrän kuin nuenbare kore. Yebtä abko, ñakare ngite mda Ngöbökwie niebare btä.

²² Ne aisete Abraham nämane tödeke era metre Ngöböbti abko bä mikani krörö kwe: nikani ngobo Isaac ngwana müre ketadre ñukwä gräbti Ngöbö mikakäre ütiäte jae. Niarakwe jändrän nuenbare kore, yebtä abko jatani tödeke täte metre Ngöböbti.

²³ Angwane Ngöbö Kukwei namani tikani krörö abko namani bare Abrahamtä:

Abrahamkwe Ngöbö kukwei mikani era,

yebtä abko Abraham ngite ñakare mda Ngöbökwie niebare btä,

Génesis 15.6

abko nieta kore abko erere namani bare. Bärire mda abko Abraham abko Ngöbö kukwe muko nieta Ngöbö Kukweibtä arato.

²⁴ Ye mden kisete, ñan nita tödeke jirekabe Ngöböbti aibe köböire ni ngite ñakare Ngöböta niere nißtä, akwa nita jändrän kuinquin nuene ni mda mdakrä nita tödeke metre Ngöböbti bä mikakäre abko köböire ni ngite ñakare mda Ngöböta niere nißtä arato. Mden erere nuenbare Abrahamkwe, yebtä munkwe töbika kuin ja käne.

²⁵ Ye kwrere arato, meri iti bti kä ngwarbe kädian nämane Rahab käkwe jändrän kuin nuenbare krörö abt ngite ñakare mda Ngöbökwie niebare: Nitre israelita nikani kä tuenbti tiebe juta Jericó kánti angwane, Rahab käkwe kä biani ietre ja gwirierte, abti die mikani kwe ngitieta tiebe ji mdabti. Yebtä abko Rahab namani tödeke metre Ngöböbti bä mikani kwe jabtä angwane, niara ngite ñakare mda Ngöbökwie niebare.

²⁶ Ne aisete, mrä ti bike kukwe bä mike krörö: Ni üai ñakare nißtä angwane, nita nebe ngwäkäre, ye kwrere arato Ngöböta itibe nita mike ütiäte jae, akwa nita jändrän kuinquin nuene ñakare ni mda mdakrä, ye ngwane nita tödeke ñakare metre bti.

3

Ni tüdrä abko krübäte

¹ Mdakäre abko, ti mräkäre tikwe, ñan ni kwati mun ngätäite tö rabadre ja mikai dirikä, ñobtä ñan angwane nun dirikä dirikä abko käta dre dre nuene amne nunta dre dre dirire, yebtä abko Ngöbökwie kukwe ükadite bäri tare nunkrä, ye abko garera munye, aisete tita niere kore munye.

² Ni jökrä käta ja mike ngite bätäkä ngwarbe Ngöbö rüere. Ye abko, nire nire käta blite angwane, kukwe nieta kwe, yebtä tä ja mike ngite ñakare jire, ye ngwane ni ye abko ni metre amne raba ja ngrabare ngibiare arato kukwe kämekäme ngäniene.

³ Ye abko ti bike bä mike krörö munye: Mdä krikri akwa ni mikadre täte kwe, abkokäre breno chi mikata kadate ta. Yebti abko ni töta nebe mdä kri ye ngwianin mdente mdente, erere kánti tä niken.

⁴ Erere arato, ru krikri mrenbti yebtä töbika munkwe. Ru mrenbti abko bäri krikri amne müreta nebe mate bäri ribi amne tä ru kite mentokwäre, akwa kri kukwän chi ru kwitatekrä, yebti nitre ru ngwianka ye töta nebe ru ngwianin mdente mdente, erere kánti ruta niken.

⁵ Ye kwrere arato tä nakenkä krörö ni kadabtä: Ni tüdrä abko chi ni ngrabare yebtä, akwa tä biare bike bäri kri krübäte, ye abko ñukwä okwä chi käkwe kä tokwä krikri kukwadre kabre temen, ye kwrere jire ni tüdrä.

⁶ Amne kukwe nieta ni tüdräbti abko ñukwä jutra krübäte kwrere. Ni ngrabare kiakia ne ngätäite ni tüdrä abko bäri krübäte, ñobtä ñan angwane ni tüdräbti nita kukwe niere diän diän ni mda mda rüere angwane, nita ja mike ngite Ngöbö rüere. Erere arato, ni tüdräbti kukwe taretare krübäte tä nakenkä nißtä amne, ni rüere Satana abko tä ni tüdrä mike blite käme kore. Ni tüdrä ye köböite jändrän kabre bätäkä ngwarbe tä nakenkä blo nißtä.

⁷ Ni raba jändrän jökrä näkwite amne ni raba nebe dänkiene: jändrän ngibiata gwi, nukwä, jändrän yorekä tementa amne jändrän krikri mrente, ye ni töta nebe näkwitai amne dänkiene, erere nita nuene.

⁸ Akwa ni ñakare jire iti abko käkwe ja tüdrä näkwitanina amne namanina dänkiene, ñobtä ñan angwane ni tüdrä abko ñan tä ja tuemetre näkwitadre jire chi nie, aisete kräkä krübäte käta ni kämike, ye kwrere ni tüdrä.

⁹ Ye abko, ni tüdräbti nita Ngöbö ni Dänkien amne ni Rün nikwe käikitekä. Abti ni tüdrä ye arabebti abko ni mda mda dätebare bäsi ja kwrere Ngöböbe abko nita ngürün mike btä arato.

¹⁰ Ne aisete ni kada kwatibe, yebti nita Ngöbö käikitekä amne ni kada ye arabebti nita ngürün mike ni mdabtä, ye abko nikwe ñan nuendre jire chi kore abko tita niere munye ti mräkäre tikwe.

¹¹ Ye abko ti bike bä mike krörö munye: Ñö hänän tibo tä neen, ye ben gwaire ñö hänän kwaka tä neen ñakare.

¹² Erere arato, aseituna ngwäta neme ñakare higo kriebtä amne higo ngwäta neme ñakare uba kriebtä. Ye kwrere arato, ñö hänän mreng abko hänänta nebe ñakare tibo, aiseti ni kada kwatibe, yebti nikwe ñan blitadre kuin bati amne blo bati, ti mräkätre tikwe.

Ngöbö aibe raba ni die mike nüne töbtä

¹³ Mdakäre abko, nire nire abko töbtä kukwe Ngöbökwäbtä amne nire nire abko ie jändrän Ngöbökwä tä neme gare, ni ye abko käkwe bä mika tuadre nünanbtä kuin ni jökrä ngwäreki amne, munkwe jändrän kuin kuin nuen ni mda mdakrä ja moto kuinbti amne ñan bikakäre kri, ñöbtä ñan angwane kore ni töbtä kätä jändrän kuin kuin nuene Ngöbö mikakäre ütiäte.

¹⁴ Akwa nireta mokrere krübäte Ngöbö Kukweibti bikakäre kri, kätä rüere ja mikakäre ji dokwäte nire tödekaka Jesubti ngätäite, ni ye abko kätä ja mike ngite Ngöbö rüere, ye abko ñan rükandrete kwe amne ñan bikadre kri kwe kore.

¹⁵ Ye abko, munta nüne töbtä kore tuen munye akwa, ye abko ñan tä kite Ngöböki. Akwa ni moto käme amne ni töi diän diän abkokri tä kite amne diablu ara jire kätä ni kite kukwe ye jiebtä,

¹⁶ ñöbtä ñan angwane ni mokrere krübäte jabe kwärikwäri amne ni jändrän nuene rükäre jirekäre jabe kwärikwäri, ye kanti käre kä nokre nikwe ja rüere kwärikwäri amne kukwe kämekäme hätäkä ngwarbe nuenta Ngöbö rüere, aiseti kukwe bä töbtä kore abko ñan tä kite Ngöböki.

¹⁷ Akwa kukwe töbtä era metre tä kite Ngöböki abko bäri kätä ni mike nüne kuin deme Ngöbö ngwäreki amne tä ni mike nüne jäme. Erere arato, ni motota nebe kuin ni mda mdakrä amne nita nebe nuäre töi diandre. Erere arato, ni mda mda tä nebe ruentari tare nie amne ni jökrä nita kaen ngäbti ja kwrere jökrä amne, kore nita kukwe era erere niere amne nita jändrän kuin kuin nuene ni mda mdakrä.

¹⁸ Amne ni nünanka jäme, kätä ni mda mda die mike nüne jäme, ni ye abko tä nüne metre Ngöbö ngwäreki.

4

Ja mikadre bobre Ngöböbtä

¹ ¿Munta rüere amne munta ngüdrekä jabe kwärikwäri, ye abko ñöbtä munta nüne kore gare munye ya? Munta nüne kore ñöbtä ñan angwane kukwe käme tä mun töibtä, ye mden abko mdeita nebe munye amne tä ja di nuen munbe, kätä mun mike nüne kore.

² Ne aiseti jändrän mden mden ie mun töta nebe, akwa tä nuke ñakare mun kisete, abtä munta ni mda kämike jändrän ye diänkäre jakrä. Erere arato, jändrän ie mun töta nebe jakrä, akwa ñan tä nebe nuke mun kisete, abtä munta nebe mokrere bti jabe kwärikwäri. Ye mdenbtä abko munta niken ngüdrekä amne munta niken rüere jabe kwärikwäri, akwa munta jändrän kärere ñakare Ngöböye jakrä, aiseti ñan tä nebe mun kisete.

³ Mdakäre abko, munta jändrän kärere Ngöböye angwane, ñan tä nebe mun kisete, ñöbtä ñan angwane munta jändrän kärere kukwe nuenkäre kämekäme amne kä ngwiankäre nuäre jabtä, aiseti munta jändrän kärere abko Ngöbö ñan tä bien munye.

⁴ Ye ñöbtä abko käre munta trö kwite Ngöböye amne munta jändrän mda mda tarere niara täte! ¿Jändrän jökrä kämekäme tä Ngöbö rüere abko ben nita ja gete angwane, nita nebe ja rüere Ngöböbe abko gare ñakare munye ya? Nire nire kätä ja gete kukwe kämenbtä, ye abko tä nebe ja rüere Ngöböbe.

⁵ Ye mdenbtä abko Ngöbö Kukwei tä niere krörö: Ngöbökwä ja Üai mikani nüne nibtä, ye abko bäri töta nebe ni tuai näin Ngöböbe, aiseti tä ni tarere, kätä mokrere nibti abko nieta Ngöbö Kukweibtä.

⁶ Akwa Ngöbö abko bäri tä ja moto mike kuin nikrä, kätä ni tarere, ye Ngöbö Kukwei kätä niere krörö:

Nire nire kätä bike kri Ngöböbtä abko rüere Ngöbö motota nebe romon.

Akwa nire nire kätä bike tidrä Ngöbö ngwäreki abko kräke Ngöböta ja moto mike kuin,

Proverbios 3.34

abko nieta Ngöbö Kukweibtä.

⁷ Ne aiseti, bika tidrä Ngöböbtä munkwe. Amne munkwe nünanka dite jabtä rükäre diablu Satana rüere angwane, gitiadi munbtä.

⁸ Krötö känime Ngöbö ken munkwe amne Ngöbökwä krötadi känime mun ken arato mun die mikakäre. Mdakäre abko, nita köböti amne ni kise tä nebe merebe, ye kwrere mun kukwe kämekäme nuenkä Ngöbö rüere ye käkwe nüna merebe Ngöbö ngwäreki. Erere arato, mun töi ñäkänintbe ketebu abko tö Ngöbö tarei kukwe kämekäme ben gwaire ye käkwe ja

mika deme Ngöbö ngwärekre amne kukwe kämekäme mdeita nebe mun töite, ye abko kita temen munkwe.

⁹ Yebti mun moto raba ulire ja jiebti amne, munkwe ja müai au kärke ngrate krikri ja müaire, ñobtä ñan angwane mun ngite Ngöböye aisete. Erere arato, këta nuäre kötare munbtä kukwe kämekäme nuenbtä, ye rikwita müaire munye amne, këta nuäre munbtä kukwe kämekäme nuene, yebtä abko mun moto raba ulire.

¹⁰ Abti bika tidrä ni Dänkien ngwärekre munkwe amne niarakwe mun mikadi ütiäte ja ngwärekre.

¹¹ Ti mräkätre tikwe, munkwe ñan ñäkä ja rüere kwärikwäri, ñobtä ñan angwane nita ñäke ngwarbe ni mräkä rüere bä mikakäre ngite, ye ngwane nita blite Ngöbö Kukwei rüere, ñobtä ñan angwane nikwe ja mräkä taredre abko Ngöbö Kukwei tä niere. Nita blite Ngöbö Kukwei rüere angwane, nita mike ñakare täte.

¹² Ye abko, Ngöbö itibe kärke kukwe biani nuendre nie amne niara aibe abko Kukwe Ükatekä ni jökrä kräke. Erere arato, niara aibe raba ni dentari amne raba ni kite ngite kärekäre, akwa ma ñakare kukwe ükatekä ni mda mdakrä. ¡Se ñobtä abko ma tö ma mräkä bä mikai ngite se!

Nikwe ñan bikadre kri

¹³ Mtare olo ketete ti kukweye munkwe. Mun jändrän kökaka amne jändrän rürümoinkä abko tä niere krörö: Mtare ya o jetbe ni näin kä mdabti amne juta mdate. Ye kënti ni rabadi kä kwati angwane, nikwe jändrän kökadi amne nikwe jändrän rürümoindi ngwian diankrä kabre jae abko munta niere.

¹⁴ Akwa dre rakadikä munbtä jetbe, ye abko gare ñakare jire chi jabtä munye. Mütata kite jüben temen, bti jötrö ngwarbe tarä niken jökrä ta, ye kwrere munta nüne jötrö kä nebtä.

¹⁵ Ne aisete munkwe niedre jirekäbe krörö: Ni Dänkien tö ne ngwane, ni tädi nüne amne nikwe sribi ne nuendi o nikwe sribi mda nuendi abko munkwe niedre jirekäbe kore.

¹⁶ Akwa mun abko tä bike krikri Ngöbö ngwärekre, kä tö sribi mikaitbe au ja töi jenbti, aisete tikwe sribi ne nuendi, bti tikwe sribi mda nuendi, munta niere janknu bikakäre kri, ye abko tuen käme Ngöböye.

¹⁷ Ye abko, nire nire ie jändrän kuin nuen gare, akwa ñan tä nuene abko tä ja mike ngite Ngöbö rüere.

5

Santiago tä nitre ngwian bkäne kri mike mokre

¹ Mun jändrän bkäne kabrekabre ye olo ketete ti kukweye munkwe. Mun jändrän bkäne kabrekabre, ye rüere Ngöbökwë kukwe juandi tare krübäte, aisete ngrente krikri ja müaire munkwe.

² Jändrän kabrekabre munkwe, ye kebera niken ngwarbe jökrä munkän amne, dän ütiäte krikri munkwe, ye abko kä u kebera kwete jökrä munkän.

³ Erere arato, oro amne ngwian munkwe abko nena jialire jialire jökrä munkän abko erere tä niken ngwarbe jökrä amne ütiäte ñakare jire chi mda. Erere arato, mtare mun tä ngwian amne jändrän ükekrö kabre jae kore amne ñan tä ni mda mda die mike ngwian yebti, yebtä abko kä mrä angwane jiali tä neketaninkä orobtä amne ngwianbtä, ye ara jire kärke mun kitadi ngise. Amne munta jändrän munkwe üke kaibe jakrä, ye dokwäre Ngöbökwë mun mikadi ja ngie nuen ñukwä jutrate.

⁴ Kukwe rakadikä kore munbtä, ñobtä ñan angwane nitre nura ngwä ötake ötake munkrä abko ie munkwe sribi ütiä biani ñakare. Yebtä niaratre tä ja di kärere Ngöböye, këta ñäke krikri Ngöböye mun rüere amne, sribikätre ye abko kukwei jarabare Ngöbö di kri yeye. Ye mdenbtä abko kukwe taretare jatadi mun rüere.

⁵ Mun jändrän bkäne kabrekabre këta nüne kuin nuäre kä nebtä amne munta kä ngwen nuäre jabtä, aisete mun nena köteköte. Bäsi nbi kötikata kwetadre abko tä neme köte amne kämikata, ye kwrere jire kukwe rakadikä munbtä kä mrä näire, Ngöbökwë niara rüe gadikä angwane,

⁶ ñobtä ñan angwane ni kwati bobre bobre ngite ñakare abko munkwe kitani ngite amne munkwe kämikani, akwa niaratre kärke ñäkäbare ñakare ja dokwäre munye. Ye dokwäre abko Ngöbökwë mun mikadi ja ngie nuen.

Nikwe nünandrekä dite bätärekä

⁷ Akwa mun ti mräkätre abko ie ti bike niere krörö: Ni nura nökaka töta nebe nura ngwä kuin ötai angwane, tä kä nura öta näire ngibiare bätärekä ja täritäri amne tä kä nüere ngibiare jäme bätärekä arato, ye kwrere ni Dänkien Jesu kebera nüketä, ye munkwe ngibia bätärekä abti jatadi nüketä.

⁸ Munkwe ni Dänkien ngibia bätäreka amne munkwe nünanka dite jabtä, ñobtä ñan angwane ni Dänkien kebera nüketa.

⁹ Ti mräkätre tikwe, nita nūke jukwebtä amne kebera kite gwä, ye kwrere ni Dänkien kukwe ukatekä nīkrä nūkerate. Ni Dänkien ye abko kākwe ñan mun mikadre ja ngie nuen, abkokäre munkwe ñan ñākä ngwarbe jabtä kwärikwäri.

¹⁰ Mdakäre abko, ti mräkätre tikwe, nitre Ngöbö kukwei niekä kirakira nämane blite ni Dänkien käfti, ye dokwäre ja tare nikani kri kwetre, akwa jändrän jökrä ngibiabare bätäreka kwetre, ye munkwe ngwianta töre jae amne munkwe nūna niaratre kwrere,

¹¹ ñobtä ñan angwane nire nire kätä nūnenkä dite jabtä ja tare nika näire ni Dänkienkrä, ni ye abko ie Ngöböta ja di bien amne kätä nebe nuäre btä tä nebe ruen nie. Ni iti nūnanka kira kädian nämane Job abko kākwe ja tare nikani tödekabtä Ngöböbti angwane, nūnankabare dite jabtä kwe ja tare nika näire, ye abko munkwe kukwe nuani ruen tie. Amne mrä ni Dänkien kākwe kukwe kuinkuin nuenbare kräke amne mikani ütiäte ño kwe, ye gare kuin munye arato ruen tie. Ngöbö abko moto kuin nīkrä amne nita nebe ruentari tare ie.

¹² Mdakäre abko ti mräkätre tikwe, ni mda mdakwe mun kukwei mikadre era, ie mun tö raba ne ngwane, munkwe ñan ja kukwei bian jändrän kã käinbti käfti o kã temen ne käfti o jändrän jökrä mda mda käfti ja kukwei mikakäre täte. Akwa mun tö jän niei angwane, munkwe jän nie jirekåbe angwane, munkwe ja kukwei mika täte; akwa mun tö ñakare niei angwane, munkwe ñakare nie jirekåbe, ye ngwane munkwe ñakare nie kwatibe arato, Ngöbökwē ñan mun mikadre ja ngie nuen, abkokäre munkwe blita kore.

Ja di ribedre Ngöböye tödekare kwärä bti

¹³ Mdakäre abko ti mräkätre, nane ni ruäre tödekaka Jesubti abkobtä kukwe kri tä nakenkä angwane, blita kwe jakrä Ngöböbe. Erere arato, nane ni ruäre btä kätä nuäre ne ngwane, kanta kwe Ngöbö käikitakakäre.

¹⁴ Akwa nane ni ruäre tä bren mun ngätäite angwane, nitre ni jie ngwianka nitre gätäkã Jesu käfti ngätäite yete, ye munkwe kärä blite Ngöböbe kräke angwane, ni Dänkien käfti aseite kekadre kwetre ni bren yehti.

¹⁵ Ye abko, tödekadre kwatibe Ngöböbti kwe, kākwe blitadre Ngöböbe ni bren ye kräke angwane, ni bren ye jatadita mobe amne rabadita quinta Ngöbö diebti. Erere arato, nane ja mikani ngite kwe Ngöbö rüere, köböite tä bren ne ngwane, Ngöbökwē ngite ye diandikã mento btä arato.

¹⁶ Ne aasete, munkwe ja mikani ngite Ngöbö rüere, ye munkwe nie jae kwärikwäri, bti munkwe blita Ngöböbe jakrä kwärikwäri angwane, Ngöbökwē mun mikadita quinta, ñobtä ñan angwane ni tödekaka kwatibe Ngöböbti kätä blite Ngöböbe ja di käräkäre ie, ye köböire abko Ngöböta jändrän kri nuene.

¹⁷ Mden erere ti bike bä mike munye: Kira ni Ngöbö kukwei niekä nämane iti abko kädian nämane Eliás. Niara abko ni mda mda kwrere, akwa tödekani kwatibe kwe Ngöböbti, kākwe blitabare ben angwane, Ngöbökwē ñan ñū mikadre näkäen temen abko ribebare kwe ie, ye erere ñū näkäni ñakare temen kã komã bti ötare.

¹⁸ Abti blitabareta kwe Ngöböbe angwane, ñū mikadre näkäenta temen abko ribebare kwe ie, erere ñū näkäninta temen amne kri mu jatani nüketa mure jökrä arato.

¹⁹ Mdakäre abko ti mräkätre tikwe, nane mun ruäre kākwe trö kwitadre Ngöböye amne mun rikadreta ji blobti, akwa ni mda tödekaka Jesubti kākwe ngwiandreta Ngöbö kukwäre, ye köböire abko mun rabadre näinta Ngöböbe angwane,

²⁰ nire nire kätä niken ni ngite ngite ye ngwenante Ngöbö kukwäre amne tä niken ngwenante ji kuinbti, ye köböire ni ngite ñan rabadre ja tare nike kärekrä Ngöbö okwä bäre mento, abkokäre tä dentari amne, Ngöböta ni ngite ngite denkä jökrä mento nihtä, ye raba gare munye. Abko kore se. Ne ngörä.

Tärä Tikani Käne Pedrokwe 1 Pedro

Simón Pedro käkwe tärä ne tikani. Nitre ja töitkaka Jesube, ye ngätäite Pedro nämane bäri ütiäte. Akwa Jesu kani ngite müre ketadre angwane, Pedro aibe käkwe Jesu rükaninte. Abti namani moto ulire krübäte amne ja töi mikani kwatibe kwe Jesu miketa täte. Pedro nämane nüne mdenete metre angwane tärä ne tikani kwe abko gare ñakare metre. Niara nämane juta Babiloniate abko niarakwe niebare 1 Pedro 5.13 ye kánti, akwa juta Babilonia nämane kubu jene jene. Erere arato, Babilonia nie nämane juta Roma btä arato, ñobtä ñan angwane ni kwati nünanka Roma abko nämane nüne käme krübäte Ngöbö rüere nitre nünanka juta Babilonia käkwe nünabare ye kwrere, aiseite niarakwe tärä ne tikani angwane, nämane nüne juta Romate abko bäri ni kwati tä niere.

Nitre tödekaka Jesubti nünanka kä ketareketare temen kä kädianta Ponto, Galacia, Capadocia, Asia amne Bitinia ye kräke Pedrokwe tärä ne tikani. Mtare kä ye abko kä Turquía. Nitre tödekaka Jesubti nämane ja tare nike, aiseite Pedro tö namani niaratre die mikai nüne deme kärekäre Jesu kräke ja tare nika näire, abkokäre tärä ne tikani kwe ietre. Erere arato, Ngöbö ara jire käkwe nitre tödekaka Jesubti dianinkä jakrä, aiseite bäri ütiäte Ngöbökrä. Ye mden kisete, nitre tödekaka Jesubti käkwe ñan ja kwata taredre, akwa rabadre juto biare ja tare nike bätärekä Jesukristo kräke amne, Jesukwe ja tare nikani ye kwrere. Ja tare nikadre kwetre tödekabtä Jesubti angwane, kä rabadre nuäre btätre, ñobtä ñan angwane Ngöbö Üai Deme tä nüne era metre btätre abko Pedrokwe niebare.

Pedrota köbö kuin juen

¹ Ti Pedro abko Jesukristo kukwei ngwianka käta tärä ne tike munkrä. Mun dianinkä Ngöbökrwe tä nüne ni menteni kwrere kä ketareketare te kä kädianta Pontote, Galaciate, Capadociate, Asiate amne Bitiniate, mun ye mden kräke tita köbö kuin juen.

² Kira kena Ngöbö ni Rün nikwe käkwe mun ara jire diandikä jakrä abko nämane gare ie abko erere mun dianinkä kwe jakrä, niara Üai Deme köböire. Ngöbö Üai ye abko käta mun mike deme. Ngöbökrwe mun dianinkä jakrä, munkwe Jesukristo mikadre täte amne Jesukristo därebtä Ngöbö käkwe mun ngite diandrekä jökrä mento munbtä abkokäre.

Ngöbökrwe ja moto mika bäri kuin mun jökrä kräke amne mun mika nüne jäme kwe, ie ti tö.

Pedrota Ngöbö käikitekä

³ Ari Ngöbö käikitekä. Niara abko ni Dänkien Jesukristo Rün. Jesukristo krütani, akwa Ngöbökrwe mikaninta nire, ye köböire ni mikaninta därereta btin bobuta kwe, ñobtä ñan angwane niarakwe ni ngwiani ruentari tare kri jae. Ne aiseite nikwe nünandi kärekäre Jesukristo ben, yebti ni raba tödeke kwatibe era metre.

⁴ Amne jändrän kuin niken ngwarbe ñakare, jübente ñakare amne bä nikwite ñakare tä ükani Ngöbökrwe kä käinbti nikrä, ye abko biandi kwe munye.

⁵ Erere arato, munta tödeke Ngöböbti, ye köböire abko Ngöböta mun ngibiare ja di krihti, yebti Jesukristo jatadita angwane, mun rabadi dianintari ünän täte. Ye abko tä mikani Ngöbökrwe munkrä, ye erere rabadi mikani gare kä mrä, abkokäre Ngöböta mun ngibiare.

⁶ Yebtä käta nebe bäri nuäre munbtä, akwa bä jötrö munta ja tare nike bätäkä ngwarbe tödekabtä Jesubti.

⁷ Ñobtä munta ja tare nike kore abko krörö: Munta tödeke Ngöböbti, ye abko bäri ütiäte oro kwrere. Oro abko mikata ñukwäte, köböire oro metre ya, ñakare ya tä nuke gare, ye kwrere abko munta ja tare nike angwane, munta tödeke metre janknu Ngöböbti abko rükadi gare munbtä. Akwa munta tödeke metre janknu Ngöböbti, ye abko bäri ütiäte orobti ta, aiseite munta ja tare nike tödekabtä Jesubti angwane, munkwe tödekadre metre janknu angwane, Jesukristo jatadita angwane, mun käi rabadi nuäre btä amne mun mikadi ütiäte kwe arato.

⁸ Jesukristo abko munkwe ñan tuabare ja okwä jenbti, akwa munta tarere. Erere arato, mtare munta tuen ñakare, akwa munta mike era jae, käta tödeke bti, ye abko käita nebe bäri nuäre munbtä. Jesukristo käita nebe nuäre krübäte munbtä, aiseite kukwe ñakare jire mda bti mun raba kä nuäre ye niere,

⁹ ñobtä ñan angwane mun rabadre dianintari, bti munta tödeke ye ken mun kitera nebe.

¹⁰ Ngöbökrwe mun dianditari ja moto kuinbti, yebtä abko Ngöbö kukwei niekä kirakira käkwe blitabare amne Ngöbökrwe nuendi ño, yebtä abko namani ja töitike amne nikanintre ngwentari ja täritäri.

¹¹ Mdakäre abko, Kristo müre ketadre, bti mikadreta nire amne rabadre mikani ütiäte kri kä käinbti, ye abko Kristo Üai namani mike gare kira ietre angwane, kukwe ye abko rakadrekä ño amne ñongwane, ye abko niaratre tö namani gai bäri.

¹² Akwa kukwe btä nitre Ngöbö kukwei niekä käkwe blitabare ye abko ñakare kräke, akwa kukwe kuin ye abko munkrä mtare abko Ngöbökwé mikani gare ietre. Kukwe ye abko mikanina gare munye mtare angwane, Ngöbö kukwei Jesukristobtä mikani gare munye ni mda mdakwe. Ngöbö Üai Deme di kri kä käinbti juani ara jire köböire niaratre käkwe kukwe ye mikani gare munye. Kukwe ye abko angele kä käinbti tö gai bäri arato.

Munkwe nüna deme

¹³ Ye mden kisete, munkwe ja mika juto nüne Ngöbökrä amne munkwe töbika kuin ja käne. Erere arato, Jesukristo jatadita, ye näire Ngöbökwé mun dianditari ünän täte ja moto kuinbti, yebtä munkwe ja töi mika kwatibe.

¹⁴ Käne mun ngämi tödeke Ngöböbti angwane, mun tö namani kukwe kämekäme nuein abko erere munkwe nuenbare, akwa mtare abko, mun nena Ngöbö ngäbriänkäre amne munta Ngöbö mike täte, aisete mun nämane nüne käne, ye kwrere munkwe ñan nüna mda.

¹⁵ Akwa Ngöbö mun käräkä jakrä abko deme, aisete munta nüne ngwane, munkwe nüna deme niara kwrere,

¹⁶ ñobtä ñan angwane Ngöbö ara jire käkwe niebare krörö ja Kukweibtä:
Ti abko deme,

aisete munkwe nüna deme,
niebare kwe.

Levítico 11.44-45

¹⁷ Ye abko, munta blite Ngöböbe angwane, “Ti Rün” munta niere ie amne Ngöbö ye ara tä kukwe ükete nikrä angwane, ni jökrä tä ja kwrere Ngöbö okwäte, aisete nita dre dre nuene abko erere btä kukwe ükateta kwe. Ye mden kisete, munkwe nüna ni menteni kwrere kä nebtä amne munkwe Ngöbö mika ütiäte kärekäre jae,

¹⁸⁻¹⁹ ñobtä ñan angwane, mun mräkä kirakira nämane nüne ngwarbe amne kukwe ütiäte ñakare, btä nämane ja kite, ye kwrere mun jatani nüne siba niaratre täbti, akwa Ngöbökwé mun kökanintarita jakrä. Mun kökanintarita kwe, ye abko ñan oro amne ngwianbti mun kökanintarita kwe. Oro amne ngwian ye abko tä niken ngwarbe. Akwa kordero kuin deme, bren ñakare bian nämane Ngöböye ja ngite ütiäre, ye kwrere Kristo käkwe ja biani müre ketadre krusobtä abko däriebti Ngöbökwé mun kökanintarita, ye nena gare kuin munye.

²⁰ Ye abko, Ngöbö ngämi kä ne dätäre, ye känenkri Kristo mikanina biare kwe rükakäre kä nebtä, akwa kä mrä ne ngwane Ngöbökwé juani müre ketadre mun kräke.

²¹ Kristo köböire munta Ngöbö mike era jae, käta tödeke bti mtare. Kristo krütani ye abko Ngöbö ara jire käkwe mikaninta nire, bti nikani ngwenante kä käinbti, kanti mikani ütiäte kri kwe. Kristo ye mden köböire munta tödeke Ngöböbti amne munta ngbiare ngäbti kisere.

²² Mtare kukwe era metre Kristobtä mikata täte munkwe, ye köböire abko Ngöbökwé mun mikanina deme ja ngwäreki mun mräkä tarekäre era metre jökrä. Ne aisete ja di ngöi jökrä munkwe ja tare era metre kwärikwäri,

²³ ñobtä ñan angwane mun därebareta bobukäre. Mun meye amne mun rün tä krüte, yekri mun därebare käne, akwa Ngöbö Kukwei nire amne tä kärekäre, ye köböire mun därebareta.

²⁴ Ne aisete Ngöbö Kukwei käta niere krörö:

Ni jökrä kä nebtä abko tä mikä kwrere amne, ni kuin bä nuäre nuäre abko tä kri blü kwrere. Mikä tä bä ngrötökä jötrö amne kri blü tä näkäenkä jötrö, ye kwrere nita jötrö kä nebtä,

²⁵ Akwa ni Dänkien Ngöbö abko Kukwei tä kärekäre,

Isaías 40.6-8

abko nieta Ngöbö Kukweibtä. Ni Dänkien Kukwei ye mden abko Ngöbö kukwei kuin Jesukristobtä abko mikani gare munye.

2

¹ Ye mden kisete, kukwe käme bätäkä ngwarbe ni mda mda rüere, ye kite jökrä temen munkwe amne, ni ngöka bätäkä ngwarbe ye kite jökrä temen munkwe. Erere arato, ja bä mika kuin au, ye kite temen munkwe amne, jändrän ni mdakwe ie mun töta nebe jakrä amne ñäkä ngwarbe ni mda mda rüere, ye kite jökrä temen munkwe.

²⁻³ Ye abko, ni Dänkien moto kuin era metre nena gare täte munkwe, aisete ngäbäre chi tä däreke käta nebe kian känene duadre jae abko te tä niren, ye kwrere jändrän jökrä Ngöbökwé kuin deme mun mikakrä niren, ye abko munkwe kändantari kisere jae, Ngöbökwé mun dianintari ño rabadre nüke gare bäri munye abkokäre.

Jesukristo abko jä nire kwrere

⁴ Mdakäre abko, jä ütiäte kri mika nämane ju gräre, ye kwrere ni Dänkien Jesukristo abko ütiäte kri munkrä. Niara abko jä ütiäte ye kwrere, akwa niara abko nire. Niara ken

munkwe kröta. Ni Dänkien abko ütiäte kri jä ütiäte kwrere, akwa nitre kä nebtä käkwe trö kwitani ie, akwa Ngöböke dianinkä jakrä amne ütiäte kri kräke.

⁵ Ye abko, Jesukristo köböire Ngöböke mun mikanina nire arato. Jä jue mikata ño, ye kwrere Ngöböta mun ükekrö ketetibe, käkwe ja Üai mikani nüne munbtä mun mikakäre ju kwrere jakrä, mun rabadre sribire niarakrä ni blitaka Ngöböbe ni mda mda diäre deme kwrere amne, Jesukristo köböire mun rabadre jändrän kuin bien Ngöböye niara Üai diebti kä mikakäre nuäre Ngöböbtä.

⁶ Yebtä abko, Ngöböke niebare krörö abko tä tikani niara Kukweibtä:

Tita ni mike iti Siön nete abko jä bäri ütiäte ju mikakrä kwrere.

Ni jä kwrere ne abko bäri ütiäte kri ju gräre, aiseite tikwe dianinkä mikadre nete.

Aiseite nire nire käkwe tödekadre ni yebti abko Ngöböke ñan mikadi ja ngie nuen, aiseite ñan rabadre ja gaire, *Isaiás 28.16*

abko niebare Ngöböke Jesukristobtä.

⁷ Angwane mun Ngöbö mikaka era jae abko kräke ni jä ütiäte kri kwrere abko ütiäte kri, akwa nire nire käta tödeke ñakare Jesubti abkobtä Ngöbö Kukweita blite abko erere tä nebe bare krörö:

Jä ütiäte kri ju mikakrä metre abko nitre ju mikaka käkwe kitaninkä,

akwa jä ye abko ni Dänkien käkwe mikani bäri ütiäte ju mikakrä metre. *Salmos 118.22*

⁸ Mdakäre abko Ngöbö Kukwei tä niere krörö:

Niara abko jä kwrere btä ni mda mda ngoto ritadite angwane, näin ngitiekä temen jä yebti ta, erere Ngöböke mikadi ja ngie nuen, *Isaiás 8.14*

nieta Ngöbö Kukweibtä ni Dänkien Jesukristobtä. Niaratre tä ngoto ritete kore Jesukristobtä, ñobtä ñan angwane ñan tö Ngöbö Kukwei Jesukristobtä mikai täte, dokwäre Ngöböke kukwe mikanintbe kira kräke, ye erere rabadi bare btäre, käkwe ja ngie nuadi.

⁹ Akwa mun tödekaka Jesubti ara jire abko ja mräkäre dianinkä Ngöböke jakrä. Erere arato, ni blitaka Ngöböbe ni mda mda diäre tä sribire jrei ngwäreki, ye kwrere Ngöböke mun mikani sribire jakrä. Amne mun abko juta deme Ngöböke. Mdakäre abko, mun abko jen Ngöböke. Niarakwe mun dianinkä kore jakrä angwane, jändrän kuinquin nuenbare kri krübäte kwe munkrä, ye abko mun rikadre mike gare ni mda mdaye abkokäre. Mun nämane nüne kä ikote Ngöbö okwä bäre mento, akwa Ngöbö ara jire käkwe mun käräbaretä nüne kä trä kuin bä nuäre jen kwe te.

¹⁰ Mdakäre abko, käne mun nämane ngwarbe, ütiäte ñakare juta kwrere, akwa munkwe tödekani Jesubti angwane, mun juta Ngöböke mtare. Erere arato, mun ñan nämane ruentari tare Ngöböye, akwa munkwe tödekani Jesubti angwane, mun ruentari tare kri ie.

¹¹ Ti mräkäre tare tikwe, ti bike kukwe ribere krörö munye: Munta nüne ni menteni kwrere kä nebtä, aiseite kukwe käme mdeita nebe munye, käta rüre mun rüere, ye käkwe ñan mun ganandre, abkokäre munkwe ñan kä bian ie jabtä.

¹² Angwane nitre ie Ngöbö gare ñakare, ye okwäbti munkwe nüna kuin, ñobtä ñan angwane bäsi ni kukwe kämekäme nuenkä btä ñäkä blo, ye kwrere jire tädre ñäke mun rüere mtare, akwa munkwe jändrän kuin nuendi niaratre okwäbti ne ngwane, Ngöböke kukwe ükadite ni jökrä kräke, ye ngwane niaratre käkwe Ngöbö käikitadrekä kukwe kuin nuenbare munkwe yebtä.

Gobran kukwei amne ni bkänkä kukwei mikadre täte

¹³ Mdakäre abko, ni Dänkien rabadre ütiäte ni mda mda okwäte, abkokäre ni jökrä tä mikani gobrane ji dokwäte, ye munkwe kukwei mika täte abko krörö: emperador romanobo tä bäri ji dokwäte, aiseite munkwe mika ütiäte jae.

¹⁴ Erere arato, gobran mda mda juanta emperadorekwe nitre kukwe kämekäme nuenkä töi diänkäre amne ni jändrän kuin nuenkä abko mikakäre ütiäte, ye munkwe mika ütiäte arato,

¹⁵ ñobtä ñan angwane nitre töi ñakare käta blite ngwarbe mun rüere abko ngwäreki munkwe jändrän kuin nuendre niaratre kukwei ötakäre abko ie Ngöbö tö.

¹⁶ Ngöböke mun ngite dianinkä mento munbtä käkwe mun tikaninte, akwa ye köböire munkwe ñan bika kuin, kukwe kämekäme nuenkäre janknu tiebe. Akwa ni klaboré Ngöböke käkwe nünandre ño, ye kwrere munkwe nüna.

¹⁷ Mdakäre abko, munkwe ni jökrä mika ütiäte jae: Munkwe ja mräkäre tödekaka Jesubti tare amne munkwe Ngöbö jürä ngwian amne emperador abko mika ütiäte munkwe.

¹⁸ Mdakäre abko, mun klaboré ni mda mdakwe, ye abko käkwe mun bkänkä kukwei mika täte jökrä amne munkwe mika ütiäte jae arato. Ye abko mun bkänkä moto kuin amne moto jäme, ñan ye aibe munkwe kukwe mikadre täte kore, akwa mun bkänkä moto kämekäme ye kukwei mika täte munkwe arato,

¹⁹ ñobtä ñan angwane ni ja mike ngite ñakare, akwa ni mikata ja ngie nuen ngwarbe amne, nita Ngöbö mike täte, aisete nita nebe kwekbe jirekåbe ja tare nike bätårekå kore, ye abko tä nebe tuen kuin Ngöböye.

²⁰ Mun klabore kåkwe ja mikadre ngite abtä mun mikadre ja ngie nuen, yebtä abko tädre ja tare nike bätårekå, ye abko rabadre ütiåte ñakare, ñobtä ñan angwane mun mikadre ja ngie nuen metre kwe. Akwa munkwe jåndrån kuin nuendre, dokwåre mun mikadre ja ngie nuen angwane, mun tädre ja tare nike kwekbe bätårekå, ye abko tä nebe tuen kuin Ngöböye,

²¹ ñobtä ñan angwane Kristo kåkwe ja tare nikani kore kåne munkrå, ye kwrere munkwe ja tare nikadre arato, abkokåre Ngöbökwå mun kåråbare jakrå. Ne aisete ja tare nikadre ño, ye abko Kristo kåkwe bå mikani kåne abko erere munkwe nuendre abko kröbö:

²² Kristo kåkwe ja mikani ngite ñakare Ngöbö rüere amne, ni mda mda ngökani ñakare kwe, *Isaias 53.9*

abko nieta Ngöbö Kukweibtä.

²³ Akwa niara rüe namani ñåke taretare ie angwane, namani kwekbe, ñåkåbare ñakare tare kwe ietre. Erere arato, mika namani ja tare nike krübåte angwane, rüe råtåninkå ñakare kwe amne Ngöbö abko kukwe ükatekå metre, ye aibe ie namani ja mike gare jirekåbe.

²⁴ Kristo ara jire kåkwe kötå mikani au nikrå amne müre ketani krusobtä ni diåre, ye ngwane ni nåmane ja mike ngite krübåte Ngöbö rüere abko dianinkå jökrå mento nißtå kwe. Ne köböire abko ni krütani kåta ja mike ngite ñakare mda Ngöbö rüere, ye kwrere nikwe ñan ja mikadre ngite mda Ngöbö rüere amne nikwe nünandre kuin era metre, abkokåre Kristokwe ja biani müre ketadre au ni diåre. Erere arato, Kristo mikani träine ngrabare, bti krütani, ye köböire abko mun namaninta kuinta.

²⁵ Krütani kore munkrå, ñobtä ñan angwane obeja tä nente angwane, tä niken ngwarbe kwåråkwårå, ye kwrere mun nåmane nåin mente Ngöböye, akwa mtare mun jataninante Jesukristoye. Ni obeja ngibiaka tä obeja ngibiare kuin, ye kwrere Kristo tä mun ngibiare amne tä mokrere munbti.

3

Kukwe ni gure gure kråke

¹ Ne kwrere arato, mun merire gure gure kåkwe ni brare munkwe kukwei mikadre ütiåte, ñobtä ñan angwane nane ni brare ruåre abko ñan tä tödeke Jesubti, akwa mika ütiåte jae munkwe amne munkwe nünandre kuin, ne ngwane ñan munta blite Jesubtä ben abtä tödekadre bti kwe, akwa munta nüne kuin ye köböire jatadi tödeke bti,

² ñobtä ñan angwane Ngöbö kåikitarekå kwårå munta nüne kuin deme ni brare munkwe okwåbti, ye köböire jatadi tödeke Jesubti.

³ Akwa munkwe ñan ja dåte båtåkå ngwarbe ngrabare ja bå mikakåre nuåre amne, munkwe ñan ngwian gate ja dokwå sökåkrå båtåkå ngwarbe ja bå mikakåre nuåre. Erere arato, munkwe ñan jåndrån orore tuåretuåre mika ja ngrabare ja bå mikakåre nuåre amne ütiåte amne, munkwe ñan dån kuinkuin ütiåte krikri kita jabtå ja bå mikakåre nuåre ngrabare.

⁴ Akwa munkwe ja moto mika kuin, kåkwe nüna jåme ja bå mikakåre nuåre. Ja töi amne ja moto mikadre kuin kore munkwe, ye ngwane mun bå rabadi nuåre kårekåre. Ja bå mikadre nuåre kore, ye abko ütiåte kri Ngöbö ngwårekri.

⁵ Ne kwrere arato meri deme deme nünanka kira tödekaka Ngöböbti nåmane ja bå mike nuåre, kå nåmane ja moto mike kuin amne jåme ja bå mikakåre nuåre. Niaratre nåmane brare kwe mike ütiåte jae amne nåmane kukwei mike täte

⁶ Sara kwrere. Sara abko kåkwe brare kwe Abraham kukwei mikani täte kåkwe “ti dånkien” niebare ie. Mun merire merire abko kåkwe nünandre metre kore amne munkwe ñan kå jürå ngwiandre jabtå ne ngwane, mun rabai Sara kwrere.

⁷ Mun brare gure gure abko ie nüna rüka gare kuin meri munkwe yebe. Meri abko di ñakare ja kwrere munbe, aisete munkwe mika ütiåte amne munkwe ngibia arato, ñobtä ñan angwane ja moto kuinbti Ngöbökwå mun brare kåråbare nünakåre kårekåre jabe, ye kwrere Ngöbökwå meri ye kåråbare arato nünakåre kårekåre jabe, aisete munkwe meri munkwe ye mika ütiåte. Munkwe blitadre Ngöböbe angwane, Ngöbökwå mun kukwei kadre ngåbti, abkokåre munkwe nüna kore ben.

⁸ Mdakåre abko, mun jökrå kåkwe nüna jåme ketetibe jabe amne ja raba ruen ja kwrere jökrå munye ja die mikakåre kwåråkwårå. Erere arato, ni ja mråkåre kåta ja tarere, ye kwrere munkwe ja tare kwåråkwårå. Erere arato, munkwe ja moto mika kuin jakrå amne munkwe bika tidrå jabtå kwåråkwårå.

⁹ Ye abko, ni mdakwe kukwe nuen blo mun rüere angwane, munkwe ñan kukwe nuenta blo btå ja dokwåre. Erere arato, ni mdakwe ñåkå taretare munbtå angwane, munkwe ñan ñåkåta taretare btå ja dokwåre amne munkwe ja di kårå kråke Ngöböye jirekåbe, ñobtä ñan

angwane Ngöbö kwe mun käräbare jakrä ja di biankäre munye Kristo köböire, aisete munkwe ñan ja ngie mika.

¹⁰ Munkwe nünandre kore, ñobtä ñan angwane

Nire nire tö nünai kuin amne tö kä tuai nuäre jabtä,

ni ye abko käkwe ñan ñäkä taretare ni mda mdabtä amne ñan ni mda ngöka kwe.

¹¹ Erere arato, jändrän käme Ngöbö rüere, yebtä kä mikaka kwe amne jändrän kuin nuen kwe.

Mdakäre abko, ja töi mika kwatibe kwe nüne jäme ni mda mdabe amne rankwa janknu kä jäme ye jiebtä arato,

¹² ñobtä ñan angwane ni nüne metre abko ni Dänkien tä ngibiarebti.

Erere arato, tä blite Ngöböbe angwane, niara tä biare kukwe kaen ngäbti.

Akwa ni kukwe nuenkä kämekäme Ngöbö rüere abko kräke Ngöbö motota nebe romon, *Salmos 34.12-16*

abko nieta Ngöbö Kukweibtä.

¹³ ¿Ne aisete munkwe ja kitadre jändrän kuin aibehtä, ye ngwane nirekwe kukwe nuendre blo mun rüere? Bäsi ni ñakare jire.

¹⁴ Akwa nane nünanbtä kuin, ye dokwäre ni mdakwe mun mika ja tare nike ne ngwane, Ngöböta ja di bien munye, jaisete munkwe kä ngwian nuäre jabtä! Amne munkwe ñan ni ye jürä ngwian jabtä amne mun ñan rekwetaka käne arato,

¹⁵ akwa munkwe ja töi mika kwatibe Kristo mikakäre ütiäte ja Dänkien kwrere. Erere arato, ñobtä munta tödeke Kristobti, käta ngibiare ngäbti, ye ni mda mda ngämi kite ngwentari munye, känenkri munkwe ja mika juto biare kukwe kakäre ngäbti. Akwa ja moto jämenbti munkwe blita bentre amne munkwe ja mika bobre, käkwe ni mda mda mika ütiäte jae niaratre kukwei kare ngäbti.

¹⁶ Erere arato, ja ñan rabadre ruen ngite munye Ngöbö ngwärecri, abkokäre munkwe nuna kuin ni mda mda okwäbti, ñobtä ñan angwane munta tödeke Kristobti, abtä munta nüne metre, yebtä ni ruäre tä ñäke blo mun rüere, ye abko rabadreta ja gaire, abkokäre munkwe nuna metre.

¹⁷ Tita niere kore, ñobtä ñan angwane jändrän kuin nuenbtä nikwe ja tare nikadre, ie Ngöbö tö ne ngwane, rabadre kuin nikrä ja tare nike kore; akwa nikwe ja tare nikadre jändrän käme nuen dokwäre, ye abko rabadre käme nikrä,

¹⁸ ñobtä ñan angwane Kristo ara jire käkwe ja tare nikani amne krütani ni ngite Ngöbö rüere diankakäre mento nihtä, ye abko nuenbare batibe kwe amne namani ütiäte kärekäre. Kristo abko ngite ñakare jire chi Ngöbö rüere, akwa niara krütani ni ngite ngite ngwiankäreta Ngöböye. Ye abko, Kristo müre ketani, akwa ngwäkä ye abko Ngöbö Üai käkwe mikaninta nire.

¹⁹⁻²⁰ Ye kwrere üai kämekäme nämane kira Noé näire käkwe ñan Ngöbö kukwei mikani täte abko nämane kitani ngite abko ie Kristo käkwe dre dre nuenbare amne dre dre nuendi kwe abko Kristo Üai jananbare mike gare. Noé nämane ru dätere angwane, nire nire jatadita Ngöböye abko Ngöbö nämane ngibiare bätärekä, akwa ye ngwane ni braibe namani dianintari. Ni ni kwäbe namani dianintari ñöbti Noébe.

²¹ Nöbti niaratre namani dianintari kira, ye abko nitre tödekaka Jesubti ngökata ñöte bä mikani kwetre ye kwrere. Jesukristo krütani, bti Ngöbö kwe mikaninta nire, ye köböire abko nita nebe dianintari abko ni ngökata ñöte tä bä mike. Akwa ni ngökata ñöte, yebti ñan ni rabadre merebe ngrabare, abkokäre ni ngökata ñöte. Akwa ni ngökata ñöte angwane, Ngöbö kwe ni töi mikadre merebe abko nita kärere Ngöböye.

²² Amne Kristo mikaninta nire Ngöbö kwe, yebti abko nikaninta kä käinbti amne tä kä bäri ütiäte te Ngöbö küde ruenkri sete amne, angele btä üai käme mda mda dite krikri, ye abko namani mikani jökrä Kristo ngoto täni.

4

Nünandre Ngöbökrä

¹ Mdakäre abko, Kristo käkwe ja tare nikani ja ngrabarebti, ne aisete munkwe ja mika biare ja tare nikakäre niara kwrere, ñobtä ñan angwane nire nire käkwe ja tare nikanina ja ngrabarebti, ye abko nämänena biare kukwe kämekäme kite temen nünakäre Jesukristo kräke abko erere nuenbare kwe.

² Ye mdenbtä, kukwe kämekäme mdei ie, yebtä ñan tä ja kite mda, akwa nünandre ño kwe, ie Ngöbö tö, ye kwrere tä nüne.

³ Nitre ie Ngöbö gare ñakare tö nünai ño, ye kwrere munkwe nünabare raire arato abko krörö: Mun nämane nüne nukro kwrere, jändrän käme aibe mdei nämane nebe munye, amne mun nämane mröre krikri, kä nämane dröbare amne, mun nämane dö ñaen kabre krübäte kä

mikakäre nokre amne jändrän ngwarbe kämekäme abko mun nämame mike ütiäte ngöböre jae.

⁴ Akwa mtare abko, nitre ñakare tödekaka Jesubti käta kukwe kämekäme nuene kabre krübäte, ye ben munta dikekä ñakare gwaire mda, ye mdenbtä abko niaratre ñan töita nebe krütare munbtä, käta ñäke blo mun rüere mtare.

⁵ Akwa Ngöbö kukwe ükatekä ni nire kräke amne ni krütani kräke, ye ngwäreki niaratre käta kukwe nuene kämekäme ye rükadi niere jökrä.

⁶ Ngöbö rabadre kukwe ükete metre ni kräke, abkokäre ni ngämi krüte, känenkri Ngöbö kukwei kuin Jesubtä mikani gare ietre. Nire nire käkwe tödekani Jesubti abko Ngöbökwé ñan mikani ja ngie nuen. Abti niaratre krütani ni jökrä kwrere, akwa niaratre üai namani nüne kärekäre Ngöböbe.

⁷ Kä mrä kitera nüke, aisete mun rabadre blite Ngöböbe, abkokäre munkwe töbika metre amne munkwe töbika kuin ja käne arato.

⁸ Bärire mda abko, nita ja tarere ere metre kwärikwäri angwane, ni mdata ja mike ngite ni rüere angwane nita juto biare denkä jabti ta, aisete munkwe ja taredre kri kwärikwäri, ye abko bäri kuin.

⁹ Erere arato, munkwe ja ka ngäbti kuin kwärikwäri ja gwiriete, akwa yehti munkwe ñan ngra ngrata jabtä kwärikwäri.

¹⁰ Mdakäre abko, Ngöbökwé ja moto mikani kuin munkrä, käkwe ja di biani bätäkä ngwarbe munye abkobti munkwe sribidre, ye kwrere munkwe sribi kuin ni mda mdakrä, Ngöbökwé ja moto mikani kuin bätäkä ngwarbe munkrä, ye kwrere munkwe sribi abko krörö:

¹¹ Munkwe blita ni mda mdabe angwane, Ngöbö ara jire tä blite mun köböire ni mda ye die mikakäre, kwrere jire munkwe blita. Erere arato, munkwe sribi ni mda mda die mikakäre angwane, Ngöböta ja di bien ño munye, ye erere bti munkwe sribi nuen ja di ngöi jökrä ni mda mdakrä, munkwe dre dre nuendre, yehti Ngöbö rabadre käikitaninkä Jesukristo köböire abkokäre. Ngöbö aibe abko rabadri käikitaninkä amne di rabadri kri kärekäre arato. Abko kore se. Amen.

Munkwe ja tare nikadi tödekabtä Jesubti

¹² Ti mräkätre tare tikwe, ñukwä jutra ngire tä ni kukwe tare, ye kwrere jire munta ja tare nike tödekabtä Jesubti, yehti munkwe ñan töbika krübäte dikaro, ñobtä ñan angwane kukwe ye abko rabadri bare kore, aisete ñan raba tuen bä jene munye.

¹³ Akwa Kristo käkwe ja tare nikani ño, ye kwrere munta ja tare nike gwaire ben, ye abko munkwe käi ngwian nuäre jabtä, Kristo jatadita ja di kri bä nuärehti angwane, kä rabadre bäri nuäre munbtä niarabe gwaire abkokäre.

¹⁴ Erere arato, munta tödeke Kristobti, ye dokwäre ni mdakwe ñäkä taretare munye angwane, munkwe kä ngwian nuäre jabtä, ñobtä ñan angwane Ngöbö Üai bä nuäre tä nüne munbtä aisete.

¹⁵ Akwa nane mun raba ja tare nike angwane, ñan ni mda kämikabtä amne ñan gobtä mun tädre ja tare nike. Mdakäre abko, ñan ja mikabtä ngite bätäkä ngwarbe ni mda mda rüere amne ñan ja mikabtä kukwe jenenante ta, abtä mun tädre ja tare nike, ie ti tö.

¹⁶ Akwa mun abko tödekaka Kristobti, abtä munkwe ja tare nika ne ngwane, mun ñan raba ja gaire, akwa mun kädeka Kristobti angwane, munkwe Ngöbö käikitaka jirekäbe,

¹⁷ ñobtä ñan angwane mtare ni jen Ngöbökwé käta kukwe käme nuene Ngöbö rüere angwane, Ngöböta töi den käta mike ja tare nike. ¿Ye abko, ni tödekaka Kristobti ara jire btä kukwe tare rakadrekä kore, se abko nitre käta kukwe kuin Jesubtä mike ñakare täte abko kräke kukwe rabadri ño mrä? ¡Aitee, Ngöbökwé niaratre mikadi ja tare nike kri krübäte!

¹⁸ Mdakäre abko, nitre nünanka metre Ngöbö ngwäreki, akwa töi diankäre Ngöböta mike ja tare nike, akwa mrä niaratre rabadri dianintari.

¿Kore ne ngwane nitre diän diän ja mikaka ngite Ngöbö rüere abko Ngöbökwé dianditari ya?

Ñakare,

Proverbios 11.31

abko nieta Ngöbö Kukweibtä.

¹⁹ Ne aisete munkwe ja tare nikadre, ie Ngöbö tö ye erere munkwe ja tare nika ka ngäbti. Akwa Ngöbö mun dätäkä, ye kisete munkwe ja mika amne niarakwe ja kukwei mikadi täte, käkwe mun dianditari amne mun rika jändrän kuinkuin nuene janknu.

5

Ñan bikadre kri, akwa ja mikadre bobre

¹ Mtare nitre ji ngwianka tä mikani ji dokwäte mun ngätäite, ye abko ti tö töi diain mda, ñobtä ñan angwane ti abko unbre arato amne tita sribire nitre ji dokwäte ye kwrere. Erere

arato, Kristo kākwe ja tare nikani kri, ye tikwe tuaba ja okwä jenbti abko erere tita kädriere ni mda mdabe. Erere arato, Kristo jatadita angwane, rabadi ütiäte kri, ye ben gwaire ti rabadi mikani ütiäte arato abko gare kuin tie, aiseite

² mun unbre unbre ji dokwäte, ye ie ti bike niere krörö: Nitre tödekaka Jesubti tä obeja kwrere Ngöbö ngwärecri amne tä mikani ngibiadre munye, ye abko munkwe ngibia kuin, akwa munkwe niaratre ngibia ja moto kuinbti, Ngöbö tö ie ye kwrere. Akwa munkwe ñan ja moto mika iko niaratre ngibiabtä. Erere arato, munkwe ñan niaratre ngibia ngwian ganainkäre jae, akwa munkwe kä ngwian nuäre jabtä niaratre ngibiakäre.

³ Erere arato, nitre tä mikani ngibiadre munye, ye munkwe ñan ja mika dänkiene, akwa niaratre kākwe nünandre kuin, abkokäre mun ara jire kākwe nuna kuin niaratre okwäbti.

⁴ Abti Kristo, Obeja Ngibiaka Bäri Ütiäte Kri, ye jatadi nüketa angwane, korona bianta ni ganankaye, ye kwrere jändrän ütiäte biandi kwe munye, kākwe mun mikadi ütiäte kri amne ye abko ñan rikadi ngwarbe jire chi.

⁵ Erere arato, nitre unbre unbre tä ji ngwianka mun bati bati käne, ye munkwe kukwei mika täte. Erere arato, ja moto jämenbti mun jökrä kākwe bika tidrä jabtä kwärikwäri amne munkwe ñan bika kri jabtä, akwa munkwe ja mika ütiäte jae kwärikwäri, ñobtä ñan angwane Ngöbö Kukweita niere krörö:

Nire nire käta bike kri abko rüere Ngöbö motota nebe romon.

Akwa nire nire käta bike tidrä Ngöbö ngwärecri abko kräke Ngöböta ja moto mike kuin,

Proverbios 3.34

abko nieta Ngöbö Kukweibtä.

⁶ Kä jatadi angwane, Ngöbökwé mun mikadre ütiäte, abkokäre munkwe bika tidrä Ngöbö di kri yebtä.

⁷ Amne kukwe ño ño tä mun kisete, abtä munta töbike kri, ye munkwe kita jökrä Ngöbö kötäpä, ñobtä ñan angwane Ngöbö töita käre munbtä.

⁸ Mdakäre abko, kwra lion ie mröta nebe angwane, tä niken ngwäne krikri, käta niken jändrän känene kwetadre jae, ye kwrere jire mun rüe diablu Satana tä näin ni känene juankäre ngwarbe, aiseite munkwe töbika kuin ja käne amne munkwe mokre jabtä au.

⁹ Akwa munkwe tödeka kwatibe Ngöböbti amne munkwe nünanka dite jabtä rükäre mun rüe Satanabe, ñobtä ñan angwane munta ja tare nike, ye kwrere mun mräkä tödekaka Jesubti kä jökräbti temen tä ja tare nike arato. Yebtä munkwe töbika, kākwe nünanka dite jabtä.

¹⁰ Munkwe ja tare nikadi bä jötrö mda, yebti Ngöbö ja moto mikaka bäri kuin ni kräke kākwe ni käräbare nünakäre kärekäre kä nuärete kä känbti Jesukristo köböire, Ngöbö ye ara jire kākwe mun mikadi juto biare nüne jakrä. Erere arato, mun mikadi nünenkä dite kwe amne ja di biandi kwe munye amne mun mikadi dikekä janknu kwe Jesukristobe arato.

¹¹ Ne aiseite Ngöbö di raba kri jändrän jökrä bti ta kärekäre, ie ti tö. Abko kore se. Amen.

Kukwe mrä

¹² Mräkäre abko, ti mräkä Silvano abko tä tödeke era metre Kristobti tuen tie, aiseite niara köböire tita täpä tike chi munye, mun die mikakäre. Ngöbökwé ja moto mikani kuin munkrä, kākwe jändrän kuin nuenbare munkrä abko rabadre gare munye arato, abkokäre tita täpä ne tike. Ngöböta mun tarere kore, yebtä munkwe nünanka dite dite.

¹³ Amne juta Roma nete, ne arabe kädianta Babilonia arato, ne kanti nitre tödekaka Kristobti täpä arato abko käta köbö kuin juen munkrä. Ngöbökwé mun dianinkä jakrä, ye kwrere niaratre dianinkä jenena jakrä kwe arato. Erere arato, Marcos, ti ngobo tikwe Ngöbö käbti käta köbö kuin juen munkrä.

¹⁴ Amne munta ja tarere kwärikwäri, ye bä mikakrä abko munkwe ja demain kwärikwäri köbö ngwianretari kwärä jae. Mun abko nena Kristokwe, yebtä kä jäme raba jökrä. Abko kore se. Ne ngörä.

Tärä Tikani Bobukäre Pedrokwe 2 Pedro

Simón Pedro kákwe tärä ne tikani. Pedro kebera krüte abko namanina gare ie, ye abko niebare kwe 2 Pedro 1.12-15. Pedro kákwe tärä ne tikani kukwe era metre Jesubtä mikakäreta töre nitre tödekaka Jesubtiye, niaratre kákwe nünandre deme amne nünandre janknu kwetre Jesu kräke abkokäre. Mdakäre abko ni ruäre bikaka tödekaka Jesubti rükadre nitre tödekaka Jesubti ngätäite niaratre ngökakäre abko Pedro tö namani mikaita töre ietre. Nitre ye abko ni ño amne tätre nüne ño abko Pedrokwe niebare ietre. Nitre ni ngökaka ye abko Ngöbökwe mikadi ja ngie nuen kri. Mräkäre abko, kukwe rakadrekä ño ño kä mrä abko Pedrokwe mikaninta töre arato. Kä mrä ye jatadre jötrö, aisete ja di ngöi jökrä nünandre deme Jesukristo mikakäre ütiäte abko Pedrokwe niebare.

Erere arato, Jesukristo jataita era metre, akwa Ngöböta ni jökrä ngwen ruentari tare jae amne tö ni jökrä tuai ja töi kwite niara kukwäre amne tö bäri ni kwati tuai tödeke niara Odei Jesukristobti, ye aisete ñan tö Jesukristo juainta gwängwarbe, akwa tä ni ngibiare bätärekä bätärekä abko Pedro tö namani mikai gare. Kukwe kabre 2 Pedrobtä abko ja kwrere tärä Judabe.

Pedrota köbö kuin juen

¹Ti Simón Pedro, ti abko sribikä Jesukristokwe amne ti abko Jesukristo kukwei ngwianka arato. Ngöbö nikwe Jesukristo abko ni Diantarikä abko bti nunta tödeke, ye kwrere munta tödeke niarabti arato. Jesukristo abko ni metre, kákwe ni die mikani tödeke jabti. Mun ye abko kräke tita köbö kuin juen tärä nebtä.

²Angwane Ngöbö nükani gare munye amne Jesukristo nükani gare munye, aisete niaratre kákwe ja moto mika kuin mun jökrä kräke amne mun mika nüne jame kwetre, ie ti tö, kätä tärä tike munye.

Ngöbökwä ni käräbare abko erere nikwe nünandre

³Ngöbö nukanina gare nie, ye mden köböire ja di kribti jändrän jökrä ütiäte nünankrä metre biani kwe nie. Ja di kri bä nuärebtä amne ja moto kuinbti niarakwe ni käräbare jakrä.

⁴Ja di kri bä nuäre amne ja moto kuin, ye köböire abko jändrän kuin ütiäte kri köböi mikani Ngöbökwä nie. Jändrän kuin, ye köböire abko jändrän kämekäme mdeita nebe nie kákwe ñan mun juandre ngwarbe, akwa munkwe kwäräbedre amne, Ngöbö tö mun tuai nüne ño, ye kwrere mun rabadre nüne, abkokäre jändrän kuin köböi mikani kore kwe nie.

⁵Ye mden kisete munta tödeke kwatibe Jesubti, ye bäre mda abko nünandre kuin Ngöbökrä, ye jiebti mun rankwa ja di ngöi jökrä; amne nuna kuin Ngöbökrä, ye bäre mda abko Ngöbö rükadre gare bäri kuin munye abko jiebti mun rankwa; amne

⁶Ngöbö rabadre gare bäri kuin munye, ye bäre mda abko ja ngibiadre kuin au kukwe kämekäme ngäniene, ye jiebti mun rankwa. Erere arato, ja ngibia kuin au, ye bäre mda abko jändrän jökrä ngibiadre bätärekä, ye jiebti mun rankwa; amne jändrän jökrä ngibia bätärekä, ye bäre mda abko nuna metre Ngöbökrä, ye jiebti mun rankwa.

⁷Erere arato, nuna metre Ngöbökrä, ye bäre mda abko nitre tödekaka Jesubti, ie ja rabadre ruentari tare kwärikwäri, ye jiebti mun rankwa amne, ja rabadre ruentari tare kwärikwäri nie, ye bäre mda abko munkwe ja taredre kwärikwäri abko jiebti mun rankwa.

⁸Munkwe nünandre kore bäri mda köbö kwatirekwatire, ye ngwane ni Dänkien Jesukristo nükani gare munye, ye kräke munkwe jändrän kuin nuendi amne munkwe ñan nünandre ngwarbe.

⁹Akwa jändrän jiebti mun rankwadre tikwe nini, ye nire nire tä bkäne ñakare ne ngwane, ni ye abko tä nüne ni okwä kä ikote kwrere. Erere arato, ni ye tä töi ngitiekä ñakare metre, aisete kä tuen känime ja käne nie, kwrere jire tä nüne amne, niara nämane ja mike ngite käne Ngöbö rüere, ye abko ni Dänkien Jesukristo kákwe dianinkä mento btä amne bätäninte jökrä btä kwe, ye abko tä käikwitekä jabti.

¹⁰Ne aisete ti mräkätre tikwe, Ngöbökwä mun käräbarera jakrä amne mun dianinkära jenena jakrä kwe, ye rabadre era munkrä, aisete jändrän ye jiebti mun rankwa kisere janknu, ñöbtä ñan angwane munkwe ye nuendre ne ngwane, munkwe ñan ni Dänkien gibiadrekäta jire chi

¹¹amne ni Dänkien, ni Diantarikä Jesukristo tä gobrane kärekäre, ye kanti Ngöbökwä mun kadi ngäbtä kise kubu ja kanti sete.

Nire nire kukwei era metre abko ie olo ketadrete

¹²Ne aisete, kukwe era metre diribarera munye abko nena gare metre munye, yebtä munta nünenkä dite, akwa tikwe mikadiita töre käre munye.

¹³ Ti tā nūne kā nebtā ne ngwane, tikwe kukwe ye mikadreta tōre munye ruen tie,

¹⁴ űobtä űan angwane ti kebera krüte abko ni Dänkien Jesukristo kākwe mikani gare tie, aisete tita niere kore munye.

¹⁵ Ti krütadrera, ye tābti kukwe ye tādre tōre kāre munye, abkokāre ti ngāmi krüte, kānenkri tikwe sribidi ja di ngōi jōkrā kukwe ye mikakāreta tōre janknu munye.

¹⁶ Ti mrākātre, ni Dänkien Jesukristo abko di kribti jatadita, ye abko nunkwe diribare munye. Ye abko űan kukwe mikaninthe ngwarbe kira mun ngōkakāre abko niebare nunkwe munye, akwa nunkwe ni Dänkien di kri bā nuāre tuaba ja okwā jenbti abko erere nunta niere.

¹⁷⁻¹⁸ Nun nāma ngitio demenbti ni Dänkien Jesube angwane, Ngōbö ni Rūn kākwe ni Dänkien mikaba űitiāte kri abko trā rababa bā nuāre, ye nunkwe tuaba. Erere arato, kā ye kānti Ngōbö kukwei jaraba krōrō kā kāinbti nunye: “Ni ne abko ti Ngobo tikwe. Niara tare kri tikwe. Niara kāi nuāre kri tibtä”, nieba Ngōbökwē kā kāinbti, ye abko kukwe nuaba ja olo jenbti nunkwe arato.

¹⁹ Nitre Ngōbö kukwei niekā kirakira kākwe kukwe niebare ni Dänkienbtā, ye mikaba bāri era nun okwāte. Ne aisete nitre Ngōbö kukwei niekā ni Dänkienbtā abko munta tuente, yebtā munkwe ja tōitika kuin, űobtä űan angwane nitre Ngōbö kukwei niekā kirakira kākwe kukwe niebare ni Dänkienbtā, ye abko űotra trā kā ikote ye kwrere tā nunkrā mtare. Akwa ni Dänkien Jesu jatadita angwane, muke kri tā kite dekā kāin, abti kāta kite ngwen, ye kwrere ni Dänkien rükadita angwane, kā trā tikadikā jōkrā kwe mun tōite.

²⁰ Akwa kukwe krōrōkrōrō rabadre gare metre munye: Nitre Ngōbö kukwei niekā kirakira kākwe Ngōbö kukwei niebare, ye abko tā dre dre niere abko niaratrekwē űaninthe űakare jire au,

²¹ űobtä űan angwane nitre Ngōbö kukwei niekā era metre ye kākwe űan Ngōbö kukwei niebare jire chi ja tōi jenbti au, akwa Ngōbö űai Deme ara jire kākwe niaratre jie ngwiani Ngōbö kukwei niere abko erere niebare kwetere.

2

Ngōbökwē nitre dirikā blo mikadi ja ngie nuen

¹ Akwa ni ja bā mikaka Ngōbö kukwei niekā nāmanena kira nitre israelita ngātāite, ye kwrere arato rükai mun ngātāite. Niaratre ye abko tōi kāme, abkobti kukwe bāri blo diridi tiebe kwetere munye abko kōböite ni ruāre kākwe ni Dänkien Jesu tuadimetre. Ni Dänkien kākwe nitre ja bā mikaka dirikā kwrere kōkanintarita, akwa niaratrekwē rükandite. Niaratre kākwe diridi blo munye, ye dokwāre abko Ngōbökwē niaratre mikadi ja ngie nuen bāri jōtrō.

² Nitre ye kākwe kukwe gaidre nuendi, akwa ye jiebti ni kwati nāin. Ye kōböite abko ji era metre ni Dänkienkwe abko rüere ni kwati kākwe űākādi blo.

³ Mdakāre abko, nitre bikaka Ngōbö kukwei dirikā ye abko tō rabadi krübāte ngwianye, kākwe kukwe ngwarbe tandi ngwian diankakāre munkān. Akwa kira Ngōbökwē niaratre mikadre ja ngie nuen abko kōböi kitanina Ngōbökwē krāke, ye erere niaratre kākwe ja ngie nuadi kri amne űan kwārābedre kwetere.

⁴ Ye abko, nitre ye kākwe űan kwārābedre gare nie, űobtä űan angwane kira angele ruāre kākwe ja mikani ngite Ngōbö rüere, ye Ngōbökwē dianinkā űakare bti ta, akwa mākāninte kadenante kwe, bti kitanī ngite kwe kā bāri iko te kā ja tare nikakrā kānti. Abti mrā angwane Ngōbökwē mikadi ja ngie nuen abko tā ngibiare yete.

⁵ Ye kwrere arato, nitre kirakira nūnanka Noé nāire nāmane ja mike ngite Ngōbö rüere, ye Ngōbökwē dianinkā űakare bti ta, akwa űū juani kri temen kwe nitre moto kāmekāme gākakāre amne, Noé nāmane nūne metre abko kwrere nāmane dirire ni mda mdaye abko aibe namani dianintari mrākā ni kükū ben.

⁶ Ye kwrere arato, nitre nūnanka juta Sodomate amne Gomorrare nāmane kukwe nuene kāmekāme Ngōbö rüere, ye dokwāre Ngōbökwē mikani ja ngie nuen, kākwe kukwani jōkrā amne ngūbrūn aibe namani niaratre tābtā, ye abko nitre kukwe kāmekāme nuenkā Ngōbö rüere abko btā kukwe rakadikā űo mrā abko Ngōbökwē bā mikani kore juta yebtā.

⁷ Nitre Sodomabo amne Gomorrabo, ye ngātāite abko Lot aibe nāmane nūne metre Ngōbökrā, aisete niara aibe namani dianintari. Akwa Lot nāmane nūne yete angwane, nitre kukwe nuenkā kāme, ye kisete Lot nāmane nebe ulire krübāte,

⁸ űobtä űan angwane niara abko nūnanka metre Ngōbökrā, akwa nāmane nūne nitre ye ngātāite, aisete kōbö kwatirekwatire nitre ye nāmane kukwe nuene kāmekāme niara okwābti amne niara nāmane kukwe nuen, yebtā abko Lot nāmane ja tare nike, abtā moto nāmane iko kukwe tuare.

⁹ Ngōbökwē nitre nūnanka era metre ye dianintari kore, ye mden kwrere ni jōkrā nūnanka era metre Ngōbökrā abko Ngōbökwē diandretari űo kukwe taretare ngāniene, ye abko gare

kuin Ngöböye. Erere arato, nitre kukwe nuenkä kämekäme Ngöbö rüere abko Ngöböta ngbiare jenena mikakäre ja ngie nuen kä mrä, akwa mtare tätre mike ja tare nike arato.

¹⁰ Erere arato, nitre ie kukwe kämekäme aibe mdeita nebe amne tä nakwen jiebti, erere arato tätre bike kri amne tätre nitre dite ji dokwäte mike ngwarbe jae, ye abko ni Dänkien kärke mikadi ja ngie nuen bäri kä mrä.

Nitre dirikä blo ye abko ja gaire ñakare bikakäre krikri ni mda mda okwäbti amne kä jürä ñakare btätre ñäke blo üai käme di kri ye rüere.

¹¹ Akwa angele sribikä Ngöbökwé abko bäri dite dite amne ütiäte krikri abko ie nin jata nuke töre jire chi ñäke üai käme dite krikri ye rüere ni Dänkien ngwäreki.

¹² Dirikätre blo ye abko häsi jändrän ngwarbe kwrere, ñöbtä ñan angwane niaratre töi ñakare amne tätre nüene okwäbti be jändrän ngwarbe kwrere. Erere arato, jändrän ngwarbe tä däre abko ie kömikata amne tä nebe köte, kanti tä ngataen, ye kwrere rakadikä nitre dirikä blobtä, abkokäre därebare amne jändrän nuke gare ñakare ietre abko rüere tätre ñäke diän diän, akwa jändrän ngwarbe tä ngataen köte, ye kwrere niaratre jraindi arato.

¹³ Mdakäre abko, niaratre kärke kukwe nuenbare blo ni mda mda rüere, käta ni mda mda mike ja tare nike, ye dokwäre abko Ngöbökwé ja mikadi rüere abko kärke mikadi ja tare nike. Nitre dirikä blo tä ja mike gure bati bati, ye abko käita nebe nuäre btätre amne ja gaire ñakare, aiseté tätre ja mike gure kä trä ngwenbti. Erere arato, tätre möröe munbe Jesu mikakäre ütiäte jae angwane, käta nebe nuäre btätre, akwa ngwarbe tätre ni ngökö, käta ja bä mike ni kuin kwrere mun ngätäite, akwa jändrän kämekäme btä nita nebe ja gaire, ye kwrere tätre nebe mun ngätäite.

¹⁴ Mdakäre abko, meri ñan jatäre dirikätre bloye, okwäta nebe meribtä angwane, töi tärä nebe ie jakrä amne käre niaratre nebe dräre ñakare ja mike ngite Ngöbö rüere amne, meri ruäre töi braibe abko tätre näkwite kukwe käme nuenkäre jabe. Erere arato, jändrän ni mda mdakwe, ie töta nebe krübäte jakrä. Akwa mrä Ngöbökwé mikadi ja ngie nuen kärekäre.

¹⁵ Erere arato, nitre dirikä blo nikanani ji kuin metre Ngöbökwé bare mento, aiseté niaratre tä näin ngwarbe nianinte amne, Beor ngobo Ngöbö kukwei niekä kädian nämäne Balaam tö namani kukwe nuein blo ngwian ganainkrä jae, ye kwrere jire nitre dirikä blo tä näin.

¹⁶ Angwane kukwe nuenbare käme kore Balaamkwé, yebtä Ngöbökwé mäträbare krörö btä: Buro abko blite ñakare, akwa Ngöbökwé mikani blite ni nire kwrere, kärke ñäkäbare Balaamyé, aibe kärke ji ötani Balaam käne angwane, ñan nikanani Ngöbö kukwei niere ngwarbe janknu ngwian ganainkrä jae.

¹⁷ Mdakäre abko, dirikätre blo ye abko ñö okwä ngrötani kwrere amne müta juankata niken ja käne mürekwe ye kwrere, ñöbtä ñan angwane tätre ni die mikakrä tä niere, akwa ñan raba ni die mike jire chi, aiseté tätre dirire blo, ye dokwäre abko kä bäri iko te Ngöbökwé kitadi ngite kärekäre abko tä mikanintbe kräke.

¹⁸ Niaratre tä blite kuin bä nuäre, akwa tätre blite ngwarbe amne, ni ruäre kärke kwäräbare krire nitre nünanka blobtä, abti nikanani kukwe kämekäme kite temen, kärke tödekani krire Jesubti, aiseté di tä braibe näin metre Ngöböbe, ye abko niaratre tä näkwite ja kukwäre kukwe kämekäme nuenkäre ben, aiseté kukwe kämekäme mdei ietre, yebtä tä ni ye näkwite kore.

¹⁹ Erere arato, nitre dirikä blo abko kärke ni mda mda tikadrete tätre niere, akwa niaratre ara jire tä kukwe kämekäme ngoto täni, ñöbtä ñan angwane jändrän ñö ñö erere kräke ni tä ni klabore kwrere, ni ye abko tä jändrän ye ngoto täni.

²⁰ Akwa nire nire ie ni Dänkien amne ni Diantarikä Jesukristo nukanina gare amne kukwe kämekäme kä nebtä, ye ngänieni kwäräbebare kwe, abti tä niken nakwenta bobukäre kukwe kämekäme ye arabe jiebti, ye ngwane tä nibrenteta kukwe kämekäme te, aiseté niara töita nikenkä kukwe kämekäme ngoto täni amne tä nebe kukwe nuene bäri käme mda, aiseté ngämi tödeke Jesubti angwane, nämäne kukwe käme nuene ñakare abko erere tä nuene bäri mda.

²¹ Nitre ye abko, ie ji kuin era metre ni Dänkienkwé ñan rükadre gare jire chi abko rabadre bäri kuin kräke abko namani gare ietre, abti tätre kukwe kuin deme biani nuendre diribare ietre abko tätre kiteta temen.

²² Akwa kukwe nieta abko erere namani bare ietre abko krörö:

Nukro tä yen, abti tä kweteta,

Proverbios 26.11

abko nieta Ngöbö Kukweibtä. Erere arato, mtü jukateta tä neme merebe, akwa yebti tä niken jübenta dobrote abko nieta. Nitre ye ie ji kuin era metre ni Dänkienkwé tä nuke gare, abti tä niken kukwe kämekäme nuene bobukäre, ye abko mtü ye kwrere abkobtä tä nakenkä kore.

¹ Ti mräkätäre tare tikwe, tita tärä tiketa bobukäre munye. Tärä ketebu nebti abko ti tö kukwe mikaita töre munye amne jändrän kuin deme deme btä munkwe töbikadre, abkokäre tita tike.

² Nitre deme Ngöbö kukwei niekä käkwe dre dre niebare kira, ye munkwe ngwian töre käre jae. Erere arato, ni Dänkien amne ni Diantarikä Jesukristo käkwe kukwe biani nuendre nie abko nitre Jesukristo kukwei ngwianka käkwe diribare munye, ye tädre töre käre munye abko ie ti tö, käta tärä ne tike munye.

³ Ti mräkätäre, ti bike kukwe bäri ütiäte niere, nebtä munkwe töbika: Kä mrä angwane, ni jatadi ruäre abko kukwe kämekäme mdei ietre, ye aibe kräke nünandi kwetre amne jatadi Ngöbö Kukwei mike yakrä jae,

⁴ käkwe niedi krörö: ¿Kristo rükadita bobukäre kä nebtä niebare kwe abko ame? ¿Se ñan ngwarbe ni ngökata ya? Kristo ñan rükadreta, ñobtä ñan angwane ni mräkä känekäne krütanina jökrä, akwa Kristo ngämi nüketa amne kä dätebare ño kena abko erere kä tä ja täritäri abti kä nüke mtare, aisete ngwarbe ni ngökata, niedi kwetre.

⁵⁻⁶ Akwa niaratre tä töbike blo, ñobtä ñan angwane kena dekä ja kukweibti Ngöbökwä kä käinta dätebare amne kä tementa dätebare ñobti, ye niaratre ñan tö mikai era. Abti Noé näire nitre kukwe nuenkä kämekäme Ngöbö rüere abko Ngöbökwä ganinkä jökrä ñobti, aisete kä dätebare kena abti kä nüke mtare jändrän ñakare ja kwrere ja täritäri, ye abko ñan tö mikai era jae arato.

⁷ Akwa kä käinta amne kä tementa nita tuen mtare noko abko Ngöbö ara jire käkwe gadikä ñukwä jutrabti ja kukweibti amne, nitre kukwe nuenkä kämekäme Ngöbö rüere, ye abko Ngöbökwä gadikä ñukwä jutrabti kä käinta amne kä tementa noko ngöi jökrä, abkokäre Ngöbö tä kä ngibiare mtare.

⁸ Mdakäre abko, ti mräkätäre tare tikwe, kukwe ne munkwe ngwian töre käre jae: Kä köböiti ye abko kä mili krati kwrere ni Dänkienkrä amne kä mili krati ye abko kä köböiti kwrere kräke.

⁹ Ne aisete, ni Dänkien käkwe köbö mikaninta, akwa ñan tä ja kukwei mike täte jötrö abko ni ruäre tä nütüre ni Dänkienbtä, akwa ni jökrä kukwe nuenkä kämekäme Ngöbö rüere, ye abko käkwe tödekadre jökrä Jesubti amne ñan rikadre ja tare nike Ngöbö okwä bäre mento, ie Ngöbö tö, aisete tä köbö kite bätärekä ja käne rükakäreta, ye abko munkwe ngwian töre jae.

¹⁰ Akwa batibe ni gokä tä nüke, ye kwrere jire ni Dänkien köböi rükai. Köbö ye näire ñukwä juttra rabadi kri krübäte abko ngö rabadi juuu, käkwe kä käinta se gadikä jökrä. Erere arato, jändrän jökrä bti Ngöbökwä kä dätebare, ye ñukwä juttrakwe gadikä jökrä arato amne, jändrän jökrä tä kä nebtä, se abko rukwadi jökrä ñukwä jutrate kä temen noko ngöi jökrä.

¹¹ Ngöbökwä jändrän jökrä juandi ngwarbe kore ñukwä jutrabti, ne aisete munkwe nünandre bäri deme ni Dänkien aibe kräke,

¹² käkwe Ngöbö köböi ngibia ngäbti kisere amne, munkwe jändrän jökrä nuen kuin ja di ngöi jökrä Ngöbö köböi ye krötakäre bäri jötrö ja kukwäre. Köbö ye näire kä käinta se rukwadi jökrä ñukwäte amne jändrän jökrä bti Ngöbökwä kä temen ne dätebare abko güdadite jökrä ñukwä jutrate.

¹³ Akwa Ngöbökwä kä käinta amne kä tementa btin köböi mikani mda nie, ye abko nita ngibiare amne kä btin ye kanti abko ni nüne kuin era metre aibe käkwe nünandi.

¹⁴ Ne mden kisete ti mräkätäre tare tikwe, kukwe rakadikä jökrä kore, ye ngibiare ngäbti kisere kwärä munkwe nuna deme amne munkwe ñan ja mikä ngite amne munkwe nuna jame jabtä Ngöböbe amne ni mda mdabe.

¹⁵ Mdakäre abko, kukwe ne munkwe ngwian töre jae arato: Ni kwati rabadre dianintari, abkokäre ni Dänkien käta ni ngibiare bätärekä kore. Kukwe ye arabebtä ni mräkä tare kri nikwe Pablo käkwe tärä tikani munye arato amne Ngöbökwä niara mikani töbtä ruen tie. Tita kukwe tike munye, ye kwrere Pablota tike munye arato.

¹⁶ Akwa Pablokwe tärä tikani ketareketare, yebtä abko kukwe ruäre tare rükare gare, aisete nitre ie Ngöbö gare ñakare metre amne nitre töi mräme käta ja töi kwite jötrö jötrö, ye abko käta kukwe tikani Pablokwe kwite bä jene, abti tätre dirire blo. Ye kwrere arato, Ngöbö Kukwei mda mda kwitata kwetre, dokwäre Ngöbökwä mikadi ja ngie nuen abko kånänta au jakrä kwetre.

¹⁷ Ne aisete, ti mräkätäre tare tikwe, nitre dirikä blo jatadi ruäre tikwe niebare mun mikakäre mokre abko nena gare munye amne, nitre dirikä blo ye käkwe ñan mun ngökadre, abkokäre munkwe ja ngibia niaratre ngäniene. Erere arato, nitre moto kämekäme ye käkwe ñan mun kitadre ji blobti, abkokäre munta nünenkä dite jabtä, ye kwrere munkwe nünanka janknu, käkwe ja ngibia.

¹⁸ Angwane ni Dänkien ni Diantarikä nikwe Jesukristo ye munkwe mika gare bäri kuin jae amne ni Dänkien kâta mun tarere ja moto kuinbti ye abko rüka gare täte jökrä munye. ¡Ni Dänkien aibe raba käikitaninkä mtare amne kärekäre! Amen. Abko kore se. Ne ngöra.

Tärä Tikani Käne Juankwe 1 Juan

Ni ja töitkaka Jesube kädian nämane Juan käkwe tärä ne tikani. Niarakwe tärä mda mda tikani arato abko krörö: Kukwe Kuin Jesubtä Tikani Juankwe, 2 Juan, 3 Juan, Apocalipsis. Nitre tödekaka Jesubti nämane nüne juta kwatirekwatire te kākä Asiäte, kräke tärä ne tikani. Mtare kā Asia abko kādianta Turquía. Juan namanina unbre angwane tärä ne tikani kwe.

Jesukristo köböire Ngöbö nämane nitre tödekaka Jesubti tarere kri krübäte, käkwe kukwe kuin bätäkä ngwarbe nuenbare kräke abko Juan tö namani mikai gare ietre tärä nebti, käkwe tikani. Erere arato, nitre tödekaka Jesubti käkwe ni mda mda taredre era metre, ñobtä ñan angwane nita ni mda mda tarere metre angwane, Ngöböta ni bkäne era metre tä nuke gare nie, niebare Juankwe.

Mdakäre abko, Juankwe tärä ne tikani nitre tödekaka Jesubti mikakäre mokre dirikätre blobtä. Jesukristo abko ñakare ni kwrere abko dirikätre blo nämane niere. Niara bā namani ni kwrere amne ngrabare aibe ni ngrabare kwrere dirikätre blo nämane niere, akwa niara ñakare ja kwrere niibe amne ñakare Ngöbö Odei abko dirikätre blo nämane niere. Nitre tödekaka Jesubti käkwe ñan olo ketadrete jire chi nitre yeye, ñobtä ñan angwane dirikätre kore abko ni ni ngökaka, niebare Juankwe. Kukwe era metre Ngöböbtä amne Ngöbö Odei Jesukristobtä, ye abko Ngöbö Üai käkwe mikadi gare abko Juankwe niebare abko erere tikani täräbtä.

Jesukristo abko Kukwe Ngöbökw kwrere

¹ Ti Juan kätä tärä ne tike munye. Kena dekä, kā ne däte ngämi, kānenkri Jesukristo nämānena. Jesukristo ye abko nunkwe kukwei nuaba, nunkwe tuaba ja okwā jenbti amne nunkwe nuabtaba ja kise jenbti. Niara ye abko Kukwe kwrere nikrä, kätä ni mike nüne kärekäre Ngöböbe abko nunta mike gare munye.

² Jesukristo nämānena kena ni Rün Ngöböbe, akwa Ngöbökw juani nüne nun ngätäite nete angwane, nunkwe tuaba, aisete nunta blite btä munbe. Niara ni mikaka nüne kärekäre Ngöböbe abko nunta mike gare munye.

³ Nunkwe niara tuaba amne nunkwe kukwei nuaba abko erere nunta mike gare munye angwane, nunta ja gete era metre Ngöbö ni Rün nikwebe amne Odei kwe Jesukristobe, ye kwrere mun rabadre ja gete nunbe, abkokäre nunta kukwe era metre niarabtä ne mike gare munye,

⁴ kā rabadre nuäre täte jökrä munbtä, abkokäre nunta tärä ne tike munye.

Nünandre metre

⁵ Kukwe diribare Jesukristokwe nunye abko erere nunta mike gare munye abko krörö: Ngöbö abko ñotra kwrere amne kā iko ñakare jire chi btä.*

⁶ Ne aisete nita ja gete era metre Ngöböbe ni tädre niere, akwa ni tädre ja mike ngite käre Ngöbö rüere kā ikote, ye ngwane nita ni ngökö amne kukwe era metre Ngöbökw kätä nünamna metre nie, ye kwrere nita nüne ñakare.

⁷ Akwa ñotra trä dirare, te Ngöböta nüne deme amne metre, ye kwrere nita nüne deme amne metre ñotra träte ne ngwane, nita ja gete era metre jabe kwärükwäri amne, Ngöbö Odei Jesu krütani krusobtä nikrä angwane, ja däre ianinte nikrä kwe, ye köböire Ngöböta ni ngite bätete jökrä nibtä, kätä ni mike deme ja ngwärecri.

⁸ Akwa ni ja mike ngite ñakare Ngöbö rüere nikwe niedre ne ngwane, nita ja ngökö au amne nita ñäke ngwarbe, ñobtä ñan angwane Ngöbö Kukwei era metre ye gare ñakare nie.

⁹ Akwa nita kukwe nuene kāmekāme abtä ni ngite Ngöbö ngwärecri, ye nikwe niedre metre jökrä Ngöböye ne ngwane, Ngöbökw ni ngite diandrekä nibtä niebare kwe, aisete ja kukwei mikadi täte kwe amne Ngöbö abko metre, aisete ni ngite ye diandikā jökrä nibtä mento kwe amne ni mikadi deme ja ngwärecri kwe.

¹⁰ Akwa ni ngite Ngöbö rüere, Ngöbökw niebarerera nibtä, aisete ni ja mike ngite ñakare Ngöbö rüere nikwe niedre, ye ngwane nita Ngöbö bā mike ni ni ngökaka kwrere. Erere arato, ni ja mike ngite ñakare nikwe niedre, ye ngwane niara kukwei abko nita mike ñakare ütiäte jae.

* 1:5 Ngöbö abko ñotra kwrere amne kā iko ñakare jire chi btä. Ngöbö abko ñotra kwrere, ye abko kätä Ngöbö abko deme, era metre amne moto kuin bā mike. Niarata kukwe kame nuene ñakare jire chi abko “kā iko ñakare jire chi btä” kätä bā mike.

2

¹ Ti mräkätre, mun abko ti ngäbriänkätre tikwe kwrere. Munkwe ñan ja mikadre ngite Ngöbö rüere, abkokäre tita tärä ne tike munye. Akwa nane ni iti tödekaka Jesubti käkwe ja mikadre ngite angwane, Ngöbökwé niara ngite diandiká mento btä, ñobtä ñan angwane blitaka tärä níkrä ni Rün Ngöbö ngwäreki. Ni blitaka níkrä ye abko Jesukristo ara. Niara abko Ni Era Metre.

² Jesukristo kákwe ja mikani müre ketadre krusobtä Ngöbö mätä kri diankakäre nibtä amne Ngöbö moto mikakäreta jáme níkrä, erere arato ni ngite diankakäre nibtä. Ye abko ñan ni ne aibe kräke akwa, ni ká jökräbti temen kräke ja mikani müre ketadre kore kwe.

³ Ye abko, Ngöbökwé kukwe biani nuendre nie, ye erere nita mike täte ne ngwane, Ngöbö nena gare metre nie abko rükadi gare jabtä nie.

⁴ Akwa nire nire kákwe niedre: Ngöbö nena gare tie, niedre kwe, akwa kukwe biani Ngöbökwé nuendre nie abko mike ñakare täte ne ngwane, ni ye abko tä ni ngökö jirekåbe amne Ngöbö Kukwei era metre gare ñakare ie.

⁵⁻⁶ Akwa nire nire tä Ngöbö Kukwei mike täte angwane, ni ye abko tä Ngöbö tarere era metre bkänä. Ye abko, nire nire kätä niere, tita nüne kuin metre Ngöböbe abko tä niere, ye ngwane Jesukristo kákwe nünabare ño ká nebtä, ye kwrere nünandre kwe arato. Nita nüne kore ne ngwane, nita nüne ketetibe Ngöböbe abko tä gare era metre jabtä nie.

⁷ Mdakäre abko ti mräkätre tare tikwe, kukwe biani nuendre Ngöbökwé tita tike munye, ye abko ñakare biani btin abko tita tike, ñobtä ñan angwane mun jatani tödeke krire Jesubti angwane, munkwe ja taredre kwärikwäri abko niebarera munye, aisete kukwe ne abko garera munye, aisete ñakare btin munkrä.

⁸ Akwa kukwe ye abko kukwe btin kwrere abko tita tiketa munye. Kristokwe ni tarebare era metre, ye kwrere munta ja tarere era metre kwärikwäri, ñobtä ñan angwane Jesu jatani amne, jändrän kämekåme nämane Ngöbö rüere abko jatani jire jökrä ká ikokri ye abko kitera niken ta amne, Ngöbö trä kuin era metre kitera trä ngitiekä, ye mden abko kukwe btin, btä tita tärä tike munye.

⁹ Ye abko, nire nire tä nüne deme amne metre Ngöbö träte tä niere, akwa tä bätä ngwen mräkåbtä, ni ye abko tä dikekä ká ikote Ngöbö rüere.

¹⁰ Akwa nire nire kätä mräkä tarere era metre, ye abko tä nüne Ngöbö träte amne kukwe ñakare jire niara töite ká raba mike niken ngwarbe Ngöbö bäre mento.

¹¹ Akwa nire nire kätä bätä ngwen mräkåbtä, ni ye abko tä nüne amne tä dikekä ká ikote, ñobtä ñan angwane nita dikekä ji ngrabare ká ikote angwane, kätä neme tuen ñakare nie, ye kwrere ni ye tä nüne ká ikote, aisete tä niken mento Ngöböbtä abko tuen ñakare ie.

¹² Ne abko, mun ngåbåkrere, ie tita tärä ne tike, ñobtä ñan angwane Jesukristo krütani krusobtä, ye köböire Ngöbökwé mun ngite dianinkä jökrä munbtä, aisete tita tärä ne tike munye.

¹³ Mun tataretatare abko ie tita tärä ne tike arato. Ngöbö ngåmi ká ne dåtere, kånenkri Jesukristo nåmanena. Jesukristo ye abko nukanina gare munye, aisete tita tärä ne tike munye.

Mun bati bati abko kätä ni rüe Satana ngututu ganaine kwåräbe, aisete tita tärä ne tike munye.

Angwane mun ngåbåkrere abko ie ni Rün Ngöbö nukanina gare, aisete tita tärä ne tike munye.

¹⁴ Mun tataretatare abko Ngöbö ngåmi ká ne dåtere, kånenkri Jesukristo nåmanena. Jesukristo ye abko nukanina gare munye, aisete tita tärä ne tike munye.

Mun bati bati abko dite dite Ngöbö Kukweibtä. Ngöbö Kukwei tä kåre mun töite amne munta ni rüe Satana ngututu ganaine kwåräbe, aisete tita tärä ne tike munye.

Ni ñan rankwadre jändrän ká nebtä jiebtí

¹⁵ Mdakäre abko, jändrän kämekåme Ngöbö rüere ká nebtä, ye munkwe ñan tare jire chi, ñobtä ñan angwane nire nire tä jändrän Ngöbö rüere tarere, ni ye abko ñan tä ni Rün Ngöbö tarere,

¹⁶ ñobtä ñan angwane jändrän jökrä kämekåme Ngöbö rüere ye abko tä kite ñakare ni Rün Ngöbökwé, akwa jändrän jökrä ká nebtä tä Ngöbö rüere, yekri tä kite. Angwane jändrän kämekåme ká nebtä tä rüere Ngöbö rüere abko krörö: ja mika gure bati bati bätäkå ngwarbe abko mdeita nebe nie. Erere arato, jändrän tä nebe tuen kuin ni okwåye abko mdeita nebe nie amne, nita jändrän bkåne amne nita dre dre nuene, yebtä nita bike kri abko tä Ngöbö rüere ká nebtä.

¹⁷ Akwa jändrän jökrä kämekåme Ngöbö rüere mdeita nebe nie, ye abko rikadi jökrä ta, akwa Ngöbö tö dreye, erere nire nire tä mike täte, ni ye abko kákwe nünandi kårekåre Ngöböbe.

Nitre Kristo rüe, ye ngäniene nikwe ja ngibia

¹⁸ Ti mräkätre, mun abko ti ngäbriänkätre tikwe kwrere. Kä ne abko kä mrä. Kä mrä angwane, ni iti kädianta Kristo Rüe jatadi iti niebare, ye abko munkwe kukwe nuani, ye erere Kristo rüe nukanina kwati dirire mtare, ye mdenbtä abko kä mrä nükerä abko tä gare nie.

¹⁹ Nitre Kristo rüe ye abko nämane ja ükekrö ketetibe nibe, akwa niaratre nämane tödeke ñakare era metre Jesubti, aiseite nämane nekete ñakare era metre nibe, aiseite nikani nibtä mento. Niaratre tädre tödeke era metre Jesubti angwane, tädre nekete era metre gwaire nibe akräke tädre ketetibe nibe; akwa nämane tödeke ñakare era metre Jesubti amne nämane nekete ñakare era metre nibe abko rükadre gare btä, abkokäre nikani jökrä jenena nibtä mento.

²⁰ Ye abko nitre Kristo rüe rükadre gare metre munye, abkokäre Kristo Ni Deme käkwe Ngöbö Üai mikani nüne munbtä, aiseite kukwe era metre nena gare mun jökräye.

²¹ Tita tärä ne tike munye ye abko ñan kukwe era metre gare ñakare munye abtä tita tike, akwa kukwe era metre nena gare kuin munye, aiseite tita tärä ne tike kore munye, ñöbtä ñan angwane kukwe dirita ngwarbe, ye ñan tä kite kukwe era metreki ye garera munye, abtä tita tärä ne tike kore munye.

²² Nire nire ni ngökaka abko ti bike niere munye. Jesu abko Ni Dianinkä ñakare Ngöbökwë, ye nire nire tä niere, ni ye abko ni ngökaka amne ni ye abko Kristo rüe amne Ngöbö ni Rün nikwe mikata ütiäte ñakare kwetere. Erere arato, Jesu ye abko Ngöbö Odei abko mikata era ñakare kwe.

²³ Ne aiseite, nire nire käta Jesu mike ñakare ütiäte Ngöbö Odei kwrere, ni ye abko ie Ngöbö ni Rün gare ñakare; akwa nire nire käta Jesu mike ütiäte jae Ngöbö Odei kwrere, ni ye abko ie Ngöbö ni Rün nena gare era metre.

²⁴ Mdakäre abko, mun jatani tödeke krire Jesubti angwane, kukwe kuin Jesubtä diribare kena munye, ye munkwe ketate käre kisete jakrä. Munkwe nuendre kore ne ngwane, mun tädi nüne käre ketetibe Ngöbö Odeibe amne Ngöbö ni Rünbe arato.

²⁵ Ye abko, nikwe nünandre kore ketetibe bentre angwane, nikwe nünandi kärekäre ben, ye mden abko Jesukristokwe köböi mikani nie.

²⁶ Ye abko, ni ruäre tö mun ngökai, tö mun ngwian ji blobti Ngöbö bäre mento. Ni yebtä abko tita tärä ne tike munye mun mikakäre mokre.

²⁷ Akwa Jesukristo käkwe Ngöbö Üai Deme mikani nüne munbtä, ye abko tä kukwe jökrä Ngöböbtä amne Kristobtä dirire munye amne, kukwe dirita Ngöbö Üaikwe munye, ye abra era metre amne tä ni ngökö ñakare. Ye aiseite, ni mdakwe diridre munye ye abko ñakare ütiäte munkrä, aiseite Ngöbö Üai käkwe diribare ño munye Kristobtä, ye kwrere munkwe nuna ketetibe Kristobe.

Ni tödekaka Jesubti abko Ngöbö ngäbriänkätre

²⁸ Mdakäre abko, mun ti ngäbriänkätre tikwe kwrere. Kristo rükadita angwane, niara jürä ñan rabadre nibtä amne ni ñan rabadre ja gaire niara ngwäreki, akwa ja rabadre ruen jäme nie niara ngwäreki, abkokäre munkwe nuna käre ketetibe ben.

²⁹ Niara abko era metre, ye garera munye, aiseite nire nire käta nüne era metre, ni ye abko Ngöbö ngäbriänkä.

3

¹ ¡Anchinaa! Ngöbö ni Rün nikwe käta ni tarere kri krübäte tuen munkwe abko krörö: ni abko Ngöbö ngäbriänkätre ara niarata niere nie mtare. Ye abko, nitre kä nebtä tä nüne Ngöbö rüere, ie Ngöbö gare ñakare, aiseite ni abko Ngöbö ngäbriänkätre ñan tä nüke gare ietere arato.

² Ti mräkätre tare tikwe, ni abko nena Ngöbö ngäbriänkätre era metre bkänä, akwa ni rabadi ño mrä, ye abko Ngöbö ngämi mike gare. Akwa Jesukristo rükadita angwane, niara abko ño nikwe tuadi ja okwä jenbti, aiseite ni rabadi niara kwrere arato.

³ Ye abko nire nire tö ja tuai Jesube, käta ngibiare ngäbti kisere, ni ye abko tä ja ngibiare bäri kukwe käme ngäniene nünakäre deme, Jesukristo kuin deme ye kwrere.

⁴ Akwa nire nire käta kukwe nuene kämekäme ja mikakäre ngite Ngöbö rüere, ni ye abko tä kukwe biani Ngöbökwë nuendre nie kite temen, ñöbtä ñan angwane nita kukwe nuene kämekäme angwane, kukwe biani Ngöbökwë nuendre nie ye nita kite temen.

⁵ Akwa Jesukristo nükani kä nebtä ni ngite Ngöbö rüere ye diankakäre mento jökrä nibtä, ye abko nena gare munye amne, Jesukristo abko käkwe ja mikani ngite ñakare jire bati Ngöbö rüere.

⁶Ye aisete, nire nire tä nüne ketetibe niarabe, ni ye abko ñan tä niken ja mike ngite janknu Ngöbö rüere; akwa nire nire këta ja mike ngite këre Ngöbö rüere, ni ye abko kákwe ñan Jesukristo tuabare amne gare ñakare ie.

⁷Ti ngäbriänkätre tikwe, munkwe ñan ja ngökamna ni mda mdaye kukwe nebtä. Nire nire këta kukwe era metre nuene, ni ye abko ni era metre Ngöbö ngwärekre, ñobtä ñan angwane tä nekete Ngöbö era metre yekri.

⁸Akwa nire nire këta kukwe nuene kämekäme, këta ja mike ngite Ngöbö rüere, ni ye abko tä kite diablukri, ñobtä ñan angwane kira kena abti kä nüke mtare, këre diabluta ja mike ngite Ngöbö rüere. Ngöbö Odei nükani kä nebtä sribi diablukwe bätäkä ngwarbe juankäre ngwarbe.

⁹Nire nire Ngöbö ngäbriänkä abko ñan tä kukwe kämekäme nuene janknu ja mikakäre ngite, ñobtä ñan angwane Ngöbö Üai tä nura kwrere btä abko rikai Ngöbö ngäbriänkä töi kwite, Ngöböta töbike ño ye kwrere, aisete ñan raba ja mike ngite janknu Ngöbö rüere.

¹⁰Nire nire Ngöbö ngäbriänkä amne nire nire diablu ngäbriänkä tä nüke gare krörö nie: Nire nire ñan tä jändrän kuin nuene ni mdakrä amne ñan tä mräkä tarere, ni ye abko ñakare Ngöbö ngäbriänkä.

Nikwe ja taredre kwärikwäri

¹¹Mdakäre abko, mun nikani tödeke krire Jesubti angwane, kukwe diribare munye abko krörö: Nikwe ja taredre kwärikwäri abko diribare munye.

¹²Nikwe ja mikadre ngite ñakare Caín tukwe kwrere. Caín abko diablukwe, aisete moto käme diablu kwrere, kákwe etba Abel kämikani, ñobtä ñan angwane Caín moto käme, erere nämane kukwe nuene käme. Akwa Abel abko moto kuin, aisete nämane jändrän kuin nuene, ye dokwäre Caín moto nämane iko kräke amne namani bätä ngwen btä, kákwe kämikani.

¹³Ne aisete ti mräkätre tikwe, munta jändrän kuin nuene, dokwäre nitre nünanka Ngöbö rüere Caín kwrere këta bätä ngwen munbtä angwane, yebtä munkwe ñan töbika dikaro,

¹⁴ñobtä ñan angwane ni ngämi tödeke Jesubti, känenkri ni nämane ni ngwäkäre kwrere Ngöbö ngwärekre arato, akwa nikwe tödekani Jesubti, aisete mtare nita ni nire kwrere, ye abko nena gare metre nie, ñobtä ñan angwane mtare nita ni mräkä tarere aisete. Akwa nire nire ñan tä mräkä tarere, ni ye abko tä ni ngwäkäre kwrere.

¹⁵Ye abko, nire nire tä bätä ngwen mräkäbtä, ni ye abko ni kämikaka Ngöbö okwäbti amne, ni ni kämikaka kákwe ñan nünandi kärekäre Ngöböbe, ye nena gare munye.

¹⁶Akwa nikwe ja taredre ño kwärikwäri abko Jesukristokwe mikani gare krörö nie: Jesukristo kákwe ja biani müre ketadre nikä, ye kwrere nikwe ja taredre kwärikwäri angwane, ni rabadre biare krüte ni mräkä kräke arato.

¹⁷Ye abko ti bike bä mike krörö munye: Ni tödekaka Jesubti ngwian bkäne tädre iti amne niara mräkä bobre tädre siba, akwa ni ngwian bkäne ie rabadre ruentari tare ñakare, kákwe mräkä bobre ye die mikadre ñakare, ¿ni ye abko tä Ngöbö tarere ya? ¡Ñakare jire chi!

¹⁸Mun ti ngäbriänkätre tikwe kwrere, nikwe ñan ni mräkä taredre kadabti be ni ngwian bkäne ye kwrere, akwa nikwe jändrän kuin nuendre ni mräkäkrä amne nikwe ni mräkä taredre era metre arato.

¹⁹⁻²⁰Mdakäre abko, ja rabadre ruen ngite nie Ngöbö ngwärekre angwane, Ngöböta ni bkäne era metre amne kukwe era metre Ngöbökre, btä nita nekete era metre, ye tä nüke gare krörö nie, ni rabadre nüne moto jame blitakäre Ngöböbe: Ngöbö bäri töbtä ni ngwä amne ni moto amne ni töi ño ño abko gare metre ie.

²¹⁻²²Ne aisete ti mräkätre tare tikwe, ja rabadre ruen ngite ñakare nie Ngöbö ngwärekre ne ngwane, ni rükadi jame Ngöbö ngwärekre blitakäre ben, ñobtä ñan angwane Ngöbö tö dreye, erere nita nuene amne, kukwe biani bätäkä ngwarbe nuendre nie Ngöbökre, erere nita mike täte, aisete nikwe dre dre ribedre ie, erere biandi jökrä kwe nie.

²³Ye abko, kukwe bäri ütiäte biani keteti nuendre nie Ngöbökre abko nikwe tödekadre niara Odei Jesukristobti amne, Jesukristo kákwe ja taremma ño nie, ye kwrere nikwe ja taredre kwärikwäri.

²⁴Ngöbökre kukwe ye biani nuendre nie, ye nire nire tä mike täte abko tä nüne ketetibe Ngöböbe amne Ngöböta nüne ketetibe ben. Ngöbökre ja Üai mikani nüne nibtä, ye mden köböire abko Ngöböta nüne ketetibe nibe abko tä nüke gare nie.

4

Üai mden mden köböire dirita abko mikadre ñäräre

¹Ti mräkätre tare tikwe, ti bike kukwe mdara jire niere munye abko krörö: Ni jökrä jata dirire munye abko tä näin dirire Ngöbö Üai köböire jata niere, ni ye abko ie munkwe ñan ja ngwian nain jötrö ngwarbe, akwa tä näin dirire era metre Ngöbö Üai köböire ya, o üai käme

köböire ya, ye abko munkwe mika ñäräre kuin, ñobtä ñan angwane ngöbö ngwarbe kukwei niekã tá näin kwati mtare úai káme köböire, aisete munkwe ja ngibia kuin.

² Ye abko, nire nire btã Ngöbö Úai tá era metre bkänä abko köböire tá dirire abko rükadre gare krörö munye: Jesukristo abko därebare era metre ni kã nebtã kwrere, ye nire nire kãta mike era jae, erere tá niere, ni ye abra btã Ngöbö Úai tá era metre bkänä;

³ akwa Jesu därebare era metre ni kã nebtã kwrere, ye nire nire ñan tá mike era, akwa tá rükente ne ngwane, ni ye abko btã Ngöbö Úai ñakare amne niara abko tá näin Kristo Rüe úai kãmenbti. Nitre dirikã kore jatadi abko niebarera, ye munkwe kukwei nuani, ye mden abko nukanina kã ketareketare temen, aisete munkwe ñan ja ngwian nain.

⁴ Ti mräkãtre, mun abko ti ngãbriãnkãtre tikwe kwrere. Mun abko jen Ngöbökwë, aisete nitre ni ngökaka abko munkwe ganainbare kwärãbe, ñobtä ñan angwane Ngöbö Úai tá munbtã abko bãri di kri úai káme Ngöbö rüere kã nebtã ye ngwã, aisete munkwe ganaibarera kwärãbe.

⁵ Jãndrãn jökrã tá Ngöbö rüere, yekri nitre ye tá nekete, aisete tá ñãke Ngöbö rüere amne nitre nünanka Ngöbö rüere abko tá olo ketete niaratre kukweiye.

⁶ Akwa ni abko, ni jen Ngöbökwë, aisete nire ire Ngöbö gare abko tá olo ketete ni kukweiye; akwa nire nire ñan tá olo ketete ni kukweiye abko ñakare jen Ngöbökwë. Ne aisete nire nire btã Ngöbö Úai era metre tá abko tá ni kukwei mike era; akwa nire nire btã úai káme ni ngökaka tá abko ñan tá ni kukwei mike era jae.

Ngöböta ni tarere, kwrere nikwe ni mräkã taredre

⁷ Ti mräkãtre tare tikwe, Ngöbö aibe kãta ni kite ni mda mda tarere, aisete ari ja tarere kwãrikwãri. Nire nire kãta mräkã tarere abko därebare Ngöbökwë, aisete Ngöbö ngobo amne Ngöbö gare metre ie.

⁸ Ngöbö abko ni tarekã amne jãndrãn jökrã nuenta kwe abko tá nuene ni tarekãre, aisete nire nire ñan tá ni mda mda tarere, ni ye abko ie Ngöbö gare ñakare.

⁹ Ngöböta ni tarere ye abko bã mikani krörö kwe nie: Nikwe nünandre kãrekãre Ngöböbe, abkokãre Ngöbökwë ja Odei itibe juani kã nebtã. Ye kwrere Ngöböta ni tarere abko bã mikani kwe nie.

¹⁰ Erere arato, Ngöböta ni tarere kri abko krörö: Ñan nikwe Ngöbö tarebare kãne abtã Ngöböta ni tarere, akwa Ngöbö ara jire kãkwe ni tarebare kãne, kãkwe ja Odei juani krüte krusobtä ni krãke, Ngöbö mãtä kri nibtä diãnkakãre mento amne Ngöbö moto mikakãre jãme ni krãke amne ni ngite Ngöbö rüere ye diãnkakãre mento nibtä, abkokãre krütani.

¹¹ Ne aisete, ti mräkãtre tare tikwe, Ngöbökwë ni tarebare kri kore, ye kwrere nikwe ja taredre kwãrikwãri arato.

¹² Ni ngãmi Ngöbö tuen jire bati, akwa nita ja tarere kwãrikwãri, ye ngwane Ngöböta nüne nibtä abko tuata nibtä, amne nikwe Ngöbö taredre ño metre, erere arato nikwe ni mda mda taredre metre abko tá nũke gare nie.

¹³ Mdakãre abko, nita nüne ketetibe Ngöböbe amne Ngöböta nüne ketetibe nibe, ye abko gare nie, ñobtä ñan angwane Ngöbökwë ja Úai mikani nüne nibtä.

¹⁴ Ye abko, ni Rũn kãkwe ja Odei juani ni jökrã diãntarikãre, ye abko nunkwe tuani amne nunta mike gare ni jökrãye.

¹⁵ Jesu abko Ngöbö Odei era metre, ye nire nire krãke tá nebe era, kãta tödeke bti, ni ye abko tá nüne ketetibe Ngöböbe amne Ngöböta nüne ketetibe ben arato.

¹⁶ Ye abko Ngöböta ni tarere era bkänä, yehti nita tödeke amne nita mike era.

Ngöbö abko ni jökrã tarekã, aisete nire nire kãta kã bien Ngöböye ja tarekãre, ni ye abko kãta ni mda mda tarere amne tá nüne ketetibe Ngöböbe amne Ngöbö tá nüne ketetibe ben.

¹⁷ Ngöböta ni tarere, ye tá nebe era nĩkrã, ye ngwane Ngöbökwë kukwe úkadite ni jökrã krãke kã mrã angwane, kã jürã rabadre ñakare nibtä Ngöbö ngwãrekri, ñobtä ñan angwane Jesukwe nünabare kã nebtã, ye kwrere nita nüne, aisete ni rabadre moto jãme Ngöbö ngwãrekri.

¹⁸ Ye abko, Ngöböta ni tarere era metre gare nie angwane, kã jürã ñakare nibtä Ngöbö ngwãrekri, ñobtä ñan angwane Ngöböta ni tarere era metre, ye abko tá Ngöbö jürã nibtä juentari mento, akwa nane Ngöbö jürãta neme nibtä, ye ngwane Ngöböta ni tarere era metre ngãmi nũke gare tãte jökrã nie.

¹⁹ Mdakãre abko, Ngöbökwë ni tarebare kãne, ye mden kisete nita Ngöbö tarere amne nita ja tarere kwãrikwãri.

²⁰ Akwa nire nire kãkwe niedre: Tita Ngöbö tarere, niedre kwe, ye btãrãbe tãdre bãtä ngwen mräkãbtã, ni ye abko tá ni ngökö jirekãbe amne niara ñan raba Ngöbö tarere, ñobtä ñan angwane niara mräkã tuen ie abko nuãre taredre, akwa tá tarere ñakare, ¿se abko Ngöbö tuen ñakare ie abko tareta era kwe ya? ¡Ñakare jire chi!

²¹ Ne aisete niarakwe kukwe biani nuendre nie abko krörö: Nire nire këta Ngöbö tarere ye këkwe mräkä taredre arato abko biani nuendre kwe nie.

5

Nikwe tödekadre Ngöbö Odeibti

¹ Jesu abko Ni Dianinkä Ngöbökwé, ye nire nire këta mike era amne tä tödeke bti, ni ye abko därebare Ngöbökrü, aisete Ngöbö ngobo. Ye abko, ti mräkätäre, nire nire këta ni rün tarere, ni ye abko këta ni rün ye ngäbriänkätäre tarere arato,

² aisete nita Ngöbö tarere amne nita niara kukwei mike täte, ye ngwane nita Ngöbö ngäbriänkätäre mda mda tarere arato abko tä nüke gare nie.

³ Ye abko, nita Ngöbö tarere angwane, nita kukwe biani Ngöbökwé nuendre nie ye mike täte jökrä amne, kukwe biani nuendre kwe nie, ye abko ñakare tare nuene, ñakare tribe doboko kwrere,

⁴⁻⁵ ñöbtä ñan angwane Jesu abko Ngöbö Odei ye nire nire këta mike era jae, këta tödeke bti, ni ye abko Ngöbö ngäbriänkä. Erere arato, ni ye këta jändrän jökrä kämekäme Ngöbö rüere kä nebtä ganaine. Ye abko, tödeka kwatibe Jesubti, ye aibe köböire nita kukwe kämekäme Ngöbö rüere ganaine.

⁶ Mdakäre abko, Jesukristo abko Ngöbö Odei era metre nükani ni ngätäite, ye abko ñö amne däri këkwe bä mikani. Ye abko, ñan ñö aibe këkwe bä mikani, akwa ñö amne däri arato këkwe bä mikani. Erere arato, Ngöbö Üai ara jire këta kukwe ne mike gare metre nie Jesukristobtä amne, Ngöbö Üai tä ni ngökö ñakare jire. Jesukristo abko Ngöbö Odei era metre, ye abko Ngöbö Üai tä mike gare nie.

⁷ Ye abko, jändrän ketamä këta kukwe era niere kore Jesukristobtä abko krörö:

⁸ Ngöbö Üai amne ñö amne däri abko këta blite ja kwrere jökrä Jesukristobtä.

⁹ Ni mda abko tä kukwe niere ni mdabtä angwane, nita mike era. Ngöbö bäri ütiäte kri ni ngwä, aisete Ngöböta kukwe era erere niere Jesubtä ye abko bäri ütiäte, ñöbtä ñan angwane Ngöböta kukwe era erere niere nie niara Odeibtä, aisete bäri rabadre era nikkä.

¹⁰ Ne aisete, nire nire tä tödeke Ngöbö Odei Jesukristobti ye abko tä kukwe niebare Ngöbökwé niara Odeibtä ye mike era jae; akwa nire nire ñan tä kukwe niebare Ngöbökwé niara Odeibtä ye mike era jae, ni ye abko tä Ngöbö bä mike ni ni ngökaka kwrere, ñöbtä ñan angwane kukwe era niebare Ngöbökwé ja Odei Jesukristobtä abko ñan tä mike era jae aisete.

¹¹ Kukwe era metre niebare Ngöbökwé niara Odeibtä abko krörö: Ngöböta ni mike nüne kärekäre niara Odei köböire.

¹² Ye aisete, nire nire tä tödeke Ngöbö Odei Jesukristobti, ni ye abko rabadi nüne kärekäre Ngöböbe, akwa nire nire ñan tä tödeke Ngöbö Odei Jesukristobti, ye këkwe ñan nünandre kärekäre Ngöböbe.

Kukwe mrä

¹³ Mdakäre abko ti mräkätäre, munta Ngöbö Odei mike era jae, këta tödeke bti, ye köböire mun rabadi nüne kärekäre Ngöböbe abko rabadre gare metre munye, abkokäre tita tärä ne tike munye.

¹⁴ Mdakäre abko, nita krötö Ngöbö ken kukwe ribere ie, ye ngwane ni raba kukwe ribere jäme ie, ñöbtä ñan angwane, Ngöbö tö dreye nikkä abko erere nita kärere ie, ye ngwane tä ni kukwei kaen ngäbti ja moto kuinbti.

¹⁵ Nita jändrän kärere Ngöböye angwane, Ngöböta ni kukwei kaen ngäbti ja moto kuinbti abko garera nie, ye kwrere arato jändrän käräta ie nikkwe, ye biandi kwe nie abko gare kuin nie arato.

¹⁶ Mdakäre abko, mun mräkä mden tua ja mike ngite munkwe angwane, kukwe btä ja mika ngite kwe, yebtä Ngöbökwé ñan mikadre ja tare nikkwe kärekäre ja okwä bäre mento ne ngwane, munkwe blita kräke Ngöböbe angwane, Ngöbökwé mikadita nüne kärekäre jabe, ñöbtä ñan angwane kukweta kwati btä ja mikata ngite abko këta ni mike kärekäre Ngöbö okwä bäre mento, yebtä abko munkwe blitadre Ngöböbe kräke abko tita niere ñakare.

¹⁷ Kukwe jökrä kämekäme nuenta nikkwe, yebti abko nita ja mike ngite Ngöbö rüere, akwa kukwe tärä ruäre btä nita ja mike ngite abkobtä Ngöbö ñan tä ni mike ja tare nikkwe kärekäre ja okwä bäre mento.

¹⁸ Mdakäre abko, nire nire därebare Ngöbökrü abko Ngöbö ngäbriänkä, ni ye abko ñan tä niken ja mike ngite janknu Ngöbö rüere, ye abko garera nie, ñöbtä ñan angwane Satana ngututu käme këkwe ñan diandrekä jakri abko ngäniene Ngöbö Odei Jesu därebare Ngöbökrü, këta ngibiare ja kisete, ye abko gare nie arato.

¹⁹ Ni abko Ngöbö ngäbriänkätäre amne ni kä jökräbti temen tä nüne Ngöbö rüere abko tä Satana ngututu ngoto täni, ye garera nie.

²⁰ Akwa Ngöbö Odei nükani kä nebtä, käkwe ni töi tikani, Ngöbö era metre rabadre nuke gare nie abkokäre, ye garera nie arato. Ye mden kisete, Ngöbö era metre, ben nita nüne ketetibe mtare amne, nita nüne ketetibe Jesukristo Ngöbö Odei ara ben arato. Jesukristo ye abko Ngöbö era metre amne ni mikaka nüne kärekäre Ngöböbe arato abko nena gare nie ti mräkätre.

²¹ Mräkäre abko, mun ti ngäbriänkätre tikwe kwrere, jändrän ngwarbe sribebare ngöböre, ye ngäniene munkwe ja ngibia amne munkwe ñan mika ngöböre jae abko tita niere mrä munye. Abko kore se. Ne ngöra.

Tärä Tikani Bobukäre Juankwe 2 Juan

Juan ne mden käkwe tärä 1 Juan tikani arato. Niara abko Jesu kukwei ngwianka. Nire kräke tärä ne tikani kwe, btä töbikata jene jene. Meri nämane iti amne ngäbäkre kwe, kräke Juankwe tärä ne tikani abko ni ruäre tä nütüre. Akwa kukwe “meri” amne “ngäbäkre kwe” käta nitre gätäkä Jesu käbti bä mike kore abko ni kwati tä nütüre, aisete nitre tödekaka Jesubti kä nämane gätäre Jesu käbti, kräke Juankwe tärä ne tikani abko nütüta bäri.

Juankwe tärä ne tikani, ñobtä ñan angwane ni ni ngökaka nukani nitre tödekaka Jesubti ngätäite. Ni ni ngökaka ñan nämane kukwe era metre Jesubti dirire amne tö namani nitre tödekaka Jesubti ngwiani ji blobti. Yebtä abko Juankwe tärä ne tikani nitre tödekaka Jesubti mikakäre mokre. Erere arato, nitre tödekaka Jesubti käkwe ja taredre era metre kwärikwäri abko Juankwe niebare ietre.

Juanta köbö kuin juen

¹ Ti unbre amne ti nitre tödekaka Jesubti jie ngwianka käta köbö kuin juen mun gätäkä Jesukristo käbti kräke. Ngöbökwe mun dianinkä jenena jakrä. Tikwe mun taredre diribare Ngöbökwe, ye kwrere tita mun jökrä tarere era metre. Ne abko ñan ti aibe käta mun tarere, akwa ni jökrä ie kukwe era metre Ngöbökwe nukanina gare abko käta mun tarere arato,

² ñobtä ñan angwane kukwe era metre Ngöbökwe nukani gare nie abko nita mike era jae amne nita tödeke bti abko erere nikwe mikadi era kärekäre. Ye mden kisete tita mun tarere era metre.

³ Ti mräkätäre tikwe, Ngöbökwe nünamna metre munye, ye kwrere mun jökrä tä nüne amne mun tä ja tarere kwärikwäri. Ngöbö ni Rün nikwe btä Jesukristo ni Rün Odei kwe käkwe ja moto mika kuin mun jökrä kräke amne mun ngwian ruentari tare kwe jae amne munkwe nüna jene niara diebti abko ie ti tö.

Nikwe ja taredre kwärikwäri

⁴ Ti mräkätäre tikwe, Ngöbö ni Rün nikwe käkwe nünamna ño nie abko erere mun ruäre tä nüne, ye tikwe gaba angwane, käi rababa nuäre kri tibtä.

⁵ Ti mräkätäre tare tikwe, mtare nikwe ja taredre kwärikwäri abko tita kärere munye. Ne abko ñan kukwe mdara jire biani btin nuendre nie tikata tikwe munye, akwa kukwe bianina kena Ngöbökwe nuendre nie, arabe tita tiketa munye.

⁶ Amne Ngöbökwe kukwe biani nuendre nie, ye erere nita mike täte ne ngwane, nita ja tarere era metre kwärikwäri. Kukwe ne abko ñakare btin munkrä, ñobtä ñan angwane munkwe tödekani kena Jesubti angwane, munkwe ja taredre kwärikwäri abko diribare munye.

⁷ Mdakäre abko, munkwe ja taredre kore kwärikwäri, ñobtä ñan angwane ni kwati tä näin kwäräkwarä ni ngökakäre, käta niere krörö: Jesukristo abko därebare ñakare era metre ni kä nebtä kwrere amne niara ngrabare namani ñakare, tätre näin niere. Ni blitaka kore ye abko ni ni ngökaka amne Kristo rüe arato.

⁸ Nitre dirikä kore, ye ngäniene munkwe ja ngibia kuin, sribi munkwe Ngöbökrä ñan rikadre ngwarbe abkokäre. Akwa Ngöbökrä sribi ütiä biandre munye, abkokäre munkwe ja ngibia,

⁹ ñobtä ñan angwane Kristo käkwe kukwe diribare, yebti ta ni mda mda jatadre kukwe bä jene dirire mda ne ngwane, ni yebtä Ngöbö tä nüne ñakare. Akwa kukwe diribare Kristokwe ye kwrere nire nire tä nüne, ni yebtä abko Ngöbö ni Rün nikwe amne Ngöbö Odei kwe tä nüne.

¹⁰ Nane ni ruäre rika basare munye, akwa kukwe diribare Kristokwe tita niere ne kwrere tä dirire ñakare ne ngwane, munkwe ñan ka ngäbti ja gwiriete die mikakäre amne munkwe ñan köbö ngwiantari ie,

¹¹ ñobtä ñan angwane nire nire käkwe ni ye kwrere kadre ngäbti ja gwiriete abko käkwe sribi käme ye die mikadi siba, aisete ni dirikä kore, ye munkwe ñan ka ngäbti jire chi.

¹² Kukwe tä kabre mda tikwe niedre munye akwa, ti ñan tö tikai jökrä täräbtä munye, ñobtä ñan angwane ti tö rikai ja tuen gwärere munbe yete blitakäre munbe. Angwane nikwe kä ngwian dre nuäre gwaire jabtä, abkokäre ti tö rikai yete.

¹³ Angwane nitre gätäkä Jesu käbti nete abko Ngöbökrä dianinkä jakrä arato, käta köbö kuin juen mun jökrä kräke. Abko kore se. Ne ngörä.

Tärä Tikani Bämäkäre Juankwe 3 Juan

Juan ne ara käkwe tärä 1 Juan amne 2 Juan tikani arato. Niarakwe tärä ne tikani niara kukwe muko iti kädian nämáne Gayo kräke. Gayo nämáne nüne, ye kánti Juan käkwe ni juani ruäre kukwe kuin Jesubtä dirire, akwa ni iti kädian nämáne Diótfrefes nämáne bike kri, aiseite ñan tö namani nitre ye kain ngäbti. Ye ñan namani mate kuin Juanbtä, aiseite niarakwe tärä ne tikani Gayoye, Gayo mikakäre mokre Diótfrefebtä. Gayo abko nämáne dirikätre kaen ngäbti kuin abko namani tuen kuin Juanye abko Juan tö namani niere Gayoye. Erere arato, Gayo käkwe nitre dirikä ye kadre ngäbti janknu abko ie Juan tö namani, aiseite tärä ne tikani kwe Gayoye.

Juanta köbö kuin juen Gayoye

¹ Ti unbre amne ti nitre tödekaka Jesubti jie ngwianka. Ti ne ara kätä köbö kuin juen makrä ti mräkä tare kri tikwe Gayo. Tikwe mun taredre diribare Ngöbökwé, ye kwrere tita ma tarere era metre Gayo.

² Ti mräkä, ma tare kri tikwe. Ma tä nüne kuin jäme jabtä Ngöböbe, ye kwrere arato jändrän jökrä raba neme bare kuin mae amne ma ñan rabadre bren nike abko tita kärere Ngöböye makrä,

³ ñobtä ñan angwane kukwe era metre Ngöbökwé mata mike ütiäte janknu jae amne kukwe era metre Ngöbökwé diribare mae abko erere ma tä nüne, ye abko ni ruäre rükaba nete, käkwe nieba tie mikakäre, kätä kaen ngäbti kuin, ye abko tuen bäri kuin tie.

⁴ Kukwe era metre Ngöbökwé tä nünamna nie, ye kwrere ti ngäbriänkätre tikwe Jesu käfti ma kwrere tä nüne abko tita gain angwane, bäri kätä neme nuäre tibtä.

⁵ Ti mräkä tare tikwe, ni mräkä menteni tödekaka Jesubti, kräke ma tä sribi kuin nuene täte niaratre die mikakäre, kätä kaen ngäbti kuin, ye abko tuen bäri kuin tie.

⁶ Mata nitre menteni tödekaka Jesubti ye tarere kri, ye abko ja mräkätre gätäkä Jesu käfti tä nete abko ngwärekre tätre niere, aiseite jändrän ñakare kwetre, yebtä makwe die mika. Makwe niaratre die mikadre ño, ie Ngöbö tö, ye kwrere makwe die mika niken mentokwäre ji ngrabare abko tita ribere mae,

⁷ ñobtä ñan angwane niaratre tä dikekä kwäräkwärä sribikäre Jesukristo kräke amne tä ja di kärere ñakare nitre tödekaka ñakare Jesubti yeye.

⁸ Ni ye kwrere abko nikwe kadre ngäbti kuin ja gwiriete die mikakäre, ñobtä ñan angwane ye kwrere nikwe niaratre die mikadi kukwe kuin era metre Jesubtä ngwiankäre kwäräkwärä.

Kukwe Diótfrefebtä

⁹ Mdakäre abko, nitre gätäkä Jesu käfti tä yete, ie tikwe tärä tikaba, akwa Diótfrefes abko ñan tö nun kukwei mikai ütiäte jae, ñobtä ñan angwane tö rabai bäri ji dokwäte ni jökräbti abko erere tä bike kri kaibe, aiseite ñan tö nun kukwei mikai ütiäte jae.

¹⁰ Ne aiseite, ti näin nebe yete angwane, tikwe mäträdi btä mun jökrä ngwärekre, ñobtä ñan angwane tä näin blite ngwarbe nun rüere, ye kwe ñan tä neme dbe amne, ñan tä ja mräkätre Jesu kukwei dirikätre ye kaen ngäbti. Mdakäre abko, ni ruäre töta neme ja mräkätre ye kain ngäbti angwane, tä dokwä täke kån. Erere arato, ni ruäre tä Jesu kukwei dirikätre ye kaen ngäbti abtä niara tä kitekä mento nitre gätäkä Jesu käfti ye ngätäite, aiseite tikwe mäträdi btä.

¹¹ Ti mräkä tikwe, ni mdakwe jändrän käme nuen ma okwäbti Diótfrefes kwrere, ye kwrere makwe ñan nuen siba, akwa ni mdakwe jändrän kuin nuen ma okwäbti, ye kwrere makwe jändrän kuin nuen siba, ñobtä ñan angwane ni jen Ngöbökwé abko kätä jändrän kuin nuene, akwa ni jändrän käme nuenkä abko ie Ngöbö gare ñakare.

¹² Ni jökrä okwäbti abko, Ngöbö kukwei kuin era metre Jesubtä kätä nünamna nie, ye kwrere Demetrio tä nüne abko tätre niere Demetriohtä. Erere arato, Demetrio tä nüne metre abko nunta niere btä arato. Ne abko, nunta kukwe era erere niere abko gare kuin mae, ruen tie ti mräkä.

¹³ Ti mräkä, kukwe nämä kabre tikwe niedre mae, akwa ti ñan tö tikai jökrä täräbtä mae,

¹⁴ ñobtä ñan angwane bä jötrö ti tö ja tuai mabe angwane, tikwe blitadi gwärere mabe.

¹⁵ Ngöbökwé kä jäme mika mabtä, ie ti tö. Mdakäre abko, ma kukwe muko jökrä tä nete kätä köbö kuin juen makrä. Erere arato, nunta köbö kuin juen nun kukwe muko yete kräke abko makwe nie itire itire ie nunkrä. Abko kore se. Ne ngörä.

Tärä Tikani Judakwe Judas

Tärä ne tikaka abko kädian nämane Judas. Niara abko nire gare ñakare metre, akwa niara abko Jesu kukwei ngwianka kädian nämane Judas btä täräta tikani Lucas 6.16; Hechos 1.13 abko ni ruäre tä nütüre. Erere arato, Judas mdara jire abko ni Dänkien Jesu etba bati Santiago kwrere abko käkwe tärä ne tikani abko ni kwati tä nütüre arato, ñöbtä ñian angwane Mateo 13.55; Marcos 6.3 käta blite Jesu etba kädian nämane Judabtä. Tärä ne tikaka abko ñakare Judas Iscariote.

Judas käkwe tärä ne tikani nitre tödekaka Jesubti mikakäre mokre dirikätre blobtä, ñöbtä ñian angwane ni ruäre bikaka tödekaka Jesubti nükani nitre tödekaka Jesubti ngätäite niaratre ngökakäre amne niaratre ngwiankäre ji blobti. Nitre ye ngäniene nitre tödekaka Jesubti käkwe ja ngibiadre abko Judakwe niebare ietre. Ngöböta ja moto mike kuin ni kräke, käkwe ni ngite dianinkä mento nibtä, aisete ni rabadre ja mike ngite janknu abko rabadre dbe abko nitre ni ngökaka nämane dirire, akwa ñakare kore abko Judakwe niebare. Nitre nünanka kira käkwe nünabare Ngöbö rüere angwane, Ngöböke mikani ja ngie nuen kri, ye kwrere Ngöböke nitre ni ngökaka ye mikadi ja ngie nuen kri arato abko Judas tö namani mikai gare nitre tödekaka Jesubti yeye, aisete tärä ne tikani kwe kräke.

Judata köbö kuin juen

¹ Ti Judas käta tärä ne tike munkrä. Ti abko ni klaboré Jesukristo kräke amne ti abko Santiago etba. Ngöbö ni Rün nikwe käkwe mun käräbare jakrä, käta mun tarere amne, mun ye arabe Ngöböta ngibiarebti Jesukristo kräke. Mun ye mden kräke tita köbö kuin juen.

² Ngöbö raba mun ngwen ruentari tare jae amne mun mika nüne bäri jäme kwe. Erere arato, raba mun tarere bäri kri abko ie ti tö.

³ Ti mräkätre tare tikwe, nita dianintari gwaire siba Ngöböke, kukwe yebtä bäri ti tö rababa tärä tikai munye, akwa mtare kukwe mdara jire btä tikwe tärä tikadre jötrö munye ruen tie, aisete ti bike tärä tike munye, nebtä ti bike ribere krörö munye: Kukwe kuin Jesubtä ye abko Ngöböke biani batibe juta deme kweye abko ñian rabadre kwitani. Kukwe ye dokwäre munkwe rü abko ti tö nibi ribei munye,

⁴ ñöbtä ñian angwane ni nükani ruäre mun ngätäite. Nükani tiebe mun ngökakäre abko käta bike dirikätre kuin kwrere, akwa ñakare kore. Nitre ye ara Ngöböke mikadi ja ngie nuen abko Ngöbö Kukwei käkwe niebare kira. Ni ye abko ni ngututu moto kämekäme Ngöbö rüere. Ngöböta ni tarere ja moto kuinbti, aisete ni rabadre kukwe kämekäme nuene bätäkä ngwarbe, akwa Ngöböke ñian ni mikadre ja ngie nuen, tätre niere, erere tätre nuene. Erere arato, Jesukristo ni Dänkien amne ni Bkänkä itibe abko ie tä trö kwite, käta rükente.

⁵ Ti bike kukwe niere, ne garera munye, akwa ti bike miketa töre jirekäbe munye abko krörö: Ngöböke nitre israelita dianinkä Egipto bäre mento angwane, nire nire käkwe ñian Ngöbö kukwei mikani era ye abko Ngöböke ganinkä jökrä kä kaibete.

⁶ Bobukäre abko, angele ruäre nämane sribire Ngöbökrä, sribi ye abko kitani temen kwetre amne, namani bike kri, käkwe kä kuin Ngöbö kanti mikaninkä. Ye mden dokwäre abko kä iko te Ngöböke kitani ngite kärekäre abti kä mrä angwane, Ngöböke kukwe ükadite kräke abko tä ngibiare kä ye kanti.

⁷ Mdakäre abko, kukwe nakaninkä angelebtä, ye kwrere nakaninkä arato nitre Sodomaböbtä amne nitre Gomorraböbtä. Erere arato, nitre nünanka juta känimekänime Sodoma amne Gomorra bäre temen, yebtä nakaninkä. Nitre nünanka juta yete ye namani ja mike gure bati bati nekwäre sekwäre amne, nitre brare abko namani bike merire jae kwärikwäri. Erere arato, nitre merire namani bike brare jae kwärikwäri amne kukwe kämekäme kore ye aibe mdei namani krübäte ietre abköbtä ja kitani kwetre. Abtä Ngöböke mikani ja ngie nuen, käkwe ganinkä kärekäre ñukwä jutrate. Kukwe nakaninkä kore, ye abko namani ja töikrä ni jökrä kräke.

⁸ Kukwe nakaninkä kore ja töikrä, akwa nitre kirakira käkwe ja mikani ngite kore, ye kwrere jire nitre dirikä blo käta ja mike ngite mtare mun ngätäite. Ja mikadre ngite bätäkä ngwarbe kwetre abko dbe, ye abko mikata tuadre ietre köböre, tätre niere abko erere tätre ja mike ngite. Erere arato, ni Dänkien Jesukristo di kri, ye abko mikata ngwarbe kwetre. Erere arato, üai kämekäme amne angeletré Ngöböke tuen ñakare abko rüere ñian ñäkädre jire, akwa niaratre abko tä ñäke rüere.

⁹ Akwa angele ütiäte kri kädianta Miguel nämane ja kwete Moisés ngwäkäbtä diablube angwane, angele Miguel ye ie ja nükani töre ñakare ñäke taretare diabluye au jakrä, aisete

Ngöbö kwe diablu kada ketadre abkokäre, niebare krörö kwe diablu: ¡Ni Dänkien Ngöbö käre ma kada keta! niebare kwe ie.

¹⁰ Akwa dirikätre blo ye abko ie üai kämekäme amne jändrän mda mda gare ñakare, akwa tätre ñäke taretare rüere. Erere arato jändrän ngwarbe tõi ñakare käta jändrän gare ie aibe nuene, ye kwrere jire nitre ye tä nüne amne tätre kukwe nuene kämekäme. Ye dokwäre abko Ngöbö kwe mikadi ja ngie nuen abko kánänta au kwetre jakrä.

¹¹ ¡Aiteje, dirikätre blo ye bobre jakän! ñöbtä ñan angwane Caín käre nü nabare ño, ye kwrere niaratre tä nüne. Erere arato, kira ni iti kädian nämane Balaam abko nämane Ngöbö Kukwei niere ngwian ganainkrä jae, ye kwrere nitre dirikä blo käta dirire ngwian ganainkrä jae. Mdakäre abko, ni iti kädian nämane Coré abko moto namani romon Moisés rüere abko dokwäre Ngöbö kwe kämikani, ye kwrere rakadikä arato niaratrebtä.

¹² Mdakäre abko, dänta jübente bäta nebe käme, ye kwrere abko nitre dirikä blo tä mun ngätäite, ñöbtä ñan angwane munta ja tarere kwärükwäri, ye bä mikakrä munta mröre ketetibe, ye kánti abko dirikätre blo käta mröre kabrekabre, tä dö ñan kabrekabre abko käita nebe nuäre btätre amne tätre mun mike ütiäte ñakare. Ye abko, kukwe gaidre kri abko tätre nuene. Erere arato, tätre ja bä mike ni mda mda ngibiabtikä kwrere, akwa tätre ja ngibiare au. Mdakäre abko, müta aibe tä kite jüben amne ñü ñakare te, aisete müreta niken jüenkä mentokwäre, ye kwrere jire niaratre tä nüke, bti näin ta, akwa ñan tä ni die mike jire chí. Erere arato, kri rabadre ngwäre ngwäre abko käita nüke amne ngwäta nebe ñakare btä, ye kwrere jire niaratre tä amne, kri ngatanina kwrere jire bäta nebe abti diankata ngätiri ngöi kuin, ye kwrere jire niaratre tä arato.

¹³ Erere arato, mrenta nebe romon, tä niken nakwenkä käta niken däi dobrore kämekäme kite jate jate, ye kwrere jire nitre dirikä blo tä kukwe kämekäme gaidre kri ye nuene. Erere arato, muke tä niken mentokwäre amne ñan tä näin metre ta, ye kwrere jire tätre näin, ye dokwäre abko kä bäri iko krübäte, te Ngöbö kwe kitadi ngite käre käre.

¹⁴ Mdakäre abko ni iti kädian nämane Enoc käre nü nabare kira Adán mräkä ni kükü ja täritäri Adán täbti abko käre kukwe niebare krörö nitre dirikä blo yebtä: ¡Tuen nete! Angele deme mili kabre kabre krübäte abko ben ni Dänkien jatadi.

¹⁵ Angwane nitre ngututu moto kämekäme Ngöbö rüere käre kukwe nuenbare diän diän, erere arato ñäkäbare taretare kwetre Ngöbö rüere, ye dokwäre ni Dänkien jatadi mike ja ngie nuen jökrä, niebare Enokwe nitre dirikä blo yebtä.

¹⁶ Jändrän jökrä Ngöbö kwe btä tätre ñäke amne jändrän keta kabre abko rüere tätre blite taretare. Erere arato, kukwe kämekäme mdei ietre, ye aibe jiebti tätre nakwen. Mdakäre abko, tätre ja käikitekä krübäte au amne tätre niken blite nuäre nuäre ni mda mdabe jändrän diankakäre kän.

Nünandrekä dite

¹⁷ Akwa ti mräkätre tare tikwe, kukwe tä nakenkä mtare, yebtä nitre Jesukristo kukwei ngwianka käre diribare ño ño, ye munkwe ngwian töre jae.

¹⁸ Niaratre käre niebare krörö munye: Kä mrä angwane, ni jatadi ruäre abko käre Ngöbö mikadi yakrä jae amne kukwe kämekäme mdei ietre, ye aibe jiebti rabadi nakwen abko erere nünandi kwetre, niebare kwetre munye, ye munkwe ngwian töre jae.

¹⁹ Nitre dirikä blo ye abko tä mun mike rüre jabe kwärükwäri amne kukwe kämekäme mdei ietre, ye aibe jiebti tätre nakwen amne Ngöbö Üai ñakare btätre.

²⁰ Akwa ti mräkätre tare tikwe, kukwe kuin deme Jesukristobtä diribare munye, mikata era munkwe, yebtä munkwe ja die mikä nünenkä bäri dite mda amne munkwe blita Ngöböbe Ngöbö Üai Deme köböire.

²¹ Erere arato, Ngöböta mun tarere kri, yebtä munkwe nüna janknu amne, ni Dänkien Jesukristo käre ja moto mikadi kuin nikrä, käre ni mikadi nüne käre käre jabe, ye munkwe ngibia ngäbti.

²² Angwane nitre ruäre käre tödekadre janknu Jesukristobtä abko töita niken kwäräkwarä, ni ye abko munkwe ngwian ruentari tare jae, tõi mikakäre kwatibe ni Dänkienbti.

²³ Amne ni mda mda kebera Jesukristo rükente, abtä bikera niken ja tare nike ñukwä jutrate, ye abko munkwe diantari ñukwä jutra ngäniene, niaratre ñan rabadre nianinte käre käre abkokäre. Amne ni mda mda abko munkwe ngwian ruentari tare jae, akwa ni bren krübäte abtä kä jüräta nebe nibtä kise mike dän kwebtä, ye kwrere jire nitre ye abko krübäte, aisete munkwe ja ngibia niaratre ngäniene arato.

²⁴⁻²⁵ Mrä abko, Ngöbö itibe ni Diantarikä nikwe abko di tarä täte mun ngibiakrä, mun ñan rikadre niara bäre mento abkokäre. Amne kä bä nuäre Ngöbö kánti, ye te Ngöbö rabadre nebe mun gwena kuin deme amne kä rabadre nuäre munbtä nebe yete, abkokäre Ngöbö di tarä täte arato, aisete Ngöbö aibe bä nuäre, yebtä raba mikani ütiäte amne, niara aibe

raba mikani ütiäte jrei kwrere. Erere arato, niara aibe di kri jändrän jökräbti ta amne niara aibe jändrän jökrä bkänkä, yebtä abko kira dekä, mtare amne kärekäre Ngöbö aibe rabadre mikani ütiäte kri ni Dänkien Jesukristo köböire. Amen. Abko kore se. Ne ngörä.

Kukwe Mikani Tuare Juanye Apocalipsis

Ni ja tōitikaka Jesube kādian nāmane Juan kākwe tārā ne tikani. Niarakwe tārā mda mda tikani arato abko krōrō: Kukwe Kuin Jesubtā Tikani Juankwe, 1 Juan, 2 Juan, 3 Juan. Juan nāmane kitani ngite kā butu kādianta Patmos ye kānti angwane, niarakwe tārā ne tikani.

Jesu ara jire kākwe tārā ne tikamna Juanye. Nita jāndrān tuen űo kōbōre, ye kwrere jire kukwe jōkrā tā tikani tārā nebtā abko Jesukristo kākwe mikani tuare Juanye, amne kukwe jōkrā niebare Ngōbōkwe Juanye abko Juankwe kukwei nuani kōbōre, ye abko Jesukristo kākwe tikamna tārāre ie. Kāne abko, Jesukristo kākwe ja mikani tuare kōbōre Juanye angwane. Jesukwe kukwe tikamna tārābtā biandre nitre gātākā Jesu kābti nūnanka juta keta kükü kānti kā Asiate.

Mdakāre abko, Satana tā rüre kāre Ngōbō rüere, ye abko rakadrekā űo űo Juan nāire mentokwāre abko Juankwe tikani tārābtā Ngōbō amne Ngōbō Odei Jesukristo kākwe Satana btā sribikā kwekwe ganaindi kwārābe rükadre gare metre nitre tōdekaka Jesubti yeye abkokāre.

Kukwe kāne

¹ Kukwe mden mden rakadikā bā jōtrō abko rabadre gare nie abko Ngōbōkwe mikani Jesukristo kisete mikakāre gare sribikā kwekwe ie. Akwa kukwe ye rabadre gare, abkokāre Jesukristo kākwe angele kwe juani niere ti Juan sribikā kwe neye.

² Ye abko, tikwe dre dre tuaba Ngōbō kukweibtā amne Jesukristo kākwe kukwe mikani tuare űo űo tie abko tita niere metre jōkrā arato.

³ Kukwe biani Ngōbōkwe ni Ngōbō kukwei niekā neye, nebtā nire nire kākwe űākādre amne nire nire kākwe kukwe nuadre amne mikadre tāte kwe, ni yebtā abko kā rabadi nuāre kri amne Ngōbōkwe ja di biandi ie, űobtā űan angwane kukweta tikani tārā nebtā kebera nakenkā.

⁴⁻⁵ Nitre gātākā Jesu kābti kā keta kükü te kā Asiate, krāke ti Juan tā kōbō kuin juen krōrō: Ngōbō tā nire amne Ngōbō nāmanena nire amne arabe jatadi, erere arato űai ni kükü tā kūrā gobrankrā Ngōbōkwe ye ngwārekri, erere arato Jesukristo kāta kukwe niere era metre Ngōbōbtā amne niara aibe nūkaninta nire kāne amne niara tā gobrane jrei jōkrā kā nebtā bti ta—niaratre kākwe ja moto mika kuin munkrā amne mun mika nūne jāme kwetre, ie ti tō.

Jesukristo kāta ni tarere amne ja dārie ianinte krusobtā kwe angwane, ni tikaninte kwe, ni nāmane ngite Ngōbō rüere ye ngāniene.

⁶ Niarata gobrane nibtā. Erere arato, niarakwe ni mikani blitaka Ngōbōbe ni mda mda diāre sribikāre Ngōbō niara Rūn krāke, aisete ;Kristo raba kāikitāninkā kārekāre amne niara di raba kri kārekāre! Amen.

⁷ Olo ketete munkwe.

Kristo jatadita mūtābti, ye ni jōkrā kākwe tuadi.

Nitre kākwe niara dākāninte bukobti, ye ara jire kākwe tuadita arato.

Ye ngwane ni kā jōkrābtī temen rabadi nekwetekā ja jiebtī, kā rabadi ja müaire. Abko kore se. Amen.

⁸ Ni Dānkien Ngōbō kāta niere krōrō: Ti abko tārā okwā kena kādianta alfa amne tārā okwā mrā kādianta omega. * Ti nāmanena jāndrān jōkrā kānenkri kena amne ti rabadi jāndrān jōkrā tābti mrā. Ti abko Ngōbō Di Kri Jāndrān Jōkrā Nuenkrā kāta niere.

Ni bā Ni Kā Nebtā Ngobo kwrere abko Juankwe tuani

⁹ Ti abko Juan. Jesu kābti ti ne mun mrākā munkwe amne, munta ja tare nike tōdekābtā Jesubti, ye kwrere tita ja tare nike arato. Erere arato, Ngōbōta gobrane munbti, ye kwrere tā gobrane tibti arato amne, munta nūnenkā dite jabtā tōdekakāre janknu Jesubti, ye kwrere jire tita nūne arato. Ye abko, Ngōbō Kukwei kuin metre ti nāmane dirire amne kukwe kuin Jesubtā ti nāmane niere, dokwāre ti kitaba ngite, aisete ti nāma ngite kā butu kādianta Patmos ye kānti.

¹⁰ Angwane bati bāmānte, Ngōbō űai nāma tāte tibtā angwane, ti trōkri ni kukwei jaraba krikri bāsi drü kukwei kri kwrere tie se kwrere.

¹¹ Ni kukwei ye abko kākwe nieba krōrō tie:

* **1:8 alfa amne omega.** Alfa abko tārā okwā kāne alfabeto griegorebtā amne omega abko tārā okwā mrā alfabeto griegorebtā, ye kwrere Jesukristo abko nāmane kāne amne niara rabadi jāndrān jōkrā tābti mrā.

Jändrän tuata makwe, ye erere tike jökrä täräbtä, bti nitre gätäkä Jesu käbti tä juta keta kükü te kä Asiate, ye kanti makwe juan abko krörö: juta Efeso, Esmirna, Pérgamo, Tiatira, Sardis, Filadelfia amne Laodicea ye ie makwe tärä ye juan, nieba kwe tie.

¹² Ye btäräbe ti rikwitateba angwane, ni nämä blite abko tikwe tuaba angwane, oro dätebare ñotra gräre nämä krä kükü, btä ti okwä rababa.

¹³ Akwa ñotra grä krä kükü ye ngätäite abko ni nämä iti abko bä rababa Ni Kä Nebtä Ngobo kwrere abko btä dän nga nüke mate ngotobtä temen nämä amne, koria orore abko nämä kitani ja kötäbti ta kwe, btä ti okwä rababa.

¹⁴ Angwane niara dokwä drüen abko ngwen bürere jökrä obeja drüen bätäninte kuin deme kä lana bä ngwen bürere, kwrere jire bä rababa tuen tie amne, nieve ngwen bürere, kwrere jire bä rababa tuen tie amne okwä abko rababa trä ngitiekä ñukwä jutra kwrere jire rababa tuen tie.

¹⁵ Erere arato, bronse kukwata kuin ñukwäte abko tä nebe trä ngitiekä, ye kwrere jire niara ngoto rababa tuen tie amne ñöta kite kri abko ngöta nebe juuu, ye kwrere jire niara kukwei rababa ruen kri tie.

¹⁶ Amne niara kise ruenkri abko te muke nämä kwä kükü rababa tuen tie. Erere arato, ngitra tu grine grine jabtä jütre kwärikwäri ye kwrere kukwe rababa betekä kadate, rababa ruen tie amne, ñänä träta ngitiekä dirare, ye kwrere jire niara ngwäre, rababa tuen tie.

¹⁷ Ni ye btä ti okwä rababa kore angwane, ti rikaba ngitiekä ngwäkäre kwrere niara ngotobtä temen, akwa niarakwe ja kise ruenkri mikaba tibtä, bti nieba kwe tie:

Ma ñan rekwetaka tibtä. Ti nämänena jändrän jökrä känenkri kena amne ti rabadi jändrän jökrä täbti mrä.

¹⁸ Ti abko tä nüne kärekäre. Ti ne mden krütani bati, akwa ti nükaninta nire amne mtare tita nüne kärekäre. Mdakäre abko, ti bäri di kri gata yekrä, aiseté tita gata dänkiene amne ti di tärä ni juankrä kärekäre Ngöbö okwä bäre mento amne ti di tärä ni diantarikrä gata ngäniene, ye bä mikakrä llabe gatakwe kä nakebtä tä ti kisete.

¹⁹ Ne aiseté, makwe jändrän turi, ye erere tike jökrä täräbtä. Dre tä nakenkä mtare amne dre rakadikä mtare mentokwäre, ye tike jökrä täräbtä.

²⁰ Amne muke kwä kükü tä ti kise ruenkri makwe turi, erere arato ñotra grä orore krä kükü makwe turi, ye abko tä dre bä mike abko tä tiebe, aiseté ñan nibi nüke gare mae, ye abko ti bike niere mae abko krörö: ñotra grä orore krä kükü, ye abko nitre gätäkä ti käbti juta keta kükü kanti kä Asiate abko bä mikata amne, muke kwä kükü ye abko angeletre ni kükü tä nitre gätäkä ti käbti juta keta kükü ngibiabtikä abko bä turi kore makwe abko nieba kwe tie.

2

Tärä nitre gätäkä Jesu käbti juta Efesote kräke

¹ Angwane angele tä nitre gätäkä ti käbti juta Efesote ngibiare, ye ie tärä tike krörö:

Ti kise ruenkri abko te muketa kwä kükü amne ñotra grä orore krä kükü, ngätäite tita dikekä die mikakäre, ti ne mden käta niere krörö:

² Dre dre nuenta munkwe, ye gare jökrä tie abko krörö: Munta sribire tare krübäte Ngöbökrä, ye garera tie amne ja tare nikabtä munta nünenkä dite jabtä, ye gare tie. Mdakäre abko, ni ruäre diän diän tä nüne Ngöbö rüere, tä kite ja Ngöbö kukwei ngwianka niere abko ben munta ja gete ñakare, akwa munkwe mikani ñäräre kuin amne nämäne näin ni ngökö, ye abko munkwe gani btätre, aiseté munkwe juantari, ye abko gare kuin tie arato.

³ Mdakäre abko, munta nünenkä dite tibtä amne munta ja tare nike kri ti dokwäre, akwa mun nebe dräre ñakare tödekabtä tibti, ye abko gare kuin tie arato, yebtä käta nebe nuäre tibtä.

⁴ Akwa mun jatani tödeke krire tibti angwane, mun nämäne ti tarere kri, ye kwrere munta ti tarere ñakare mda, ye aibe tuen blo munbtä tie.

⁵ Ne aiseté mun nämäne ti tarere kri kena, ye ngwenta töre jae, bti mun jata ja mäketä Ngöböbe angwane, mun nämäne ti tarere kri kena, ye kwrere munkwe nuenta. Akwa munkwe ñan nuendreta kore ne ngwane, ñotra grä tä mun bä mike yete, ye ti bike denkä mento nitre gätäkä ti käbti mda mda ngätäite. Akwa munkwe ja mäkadita Ngöböbe ne ngwane, tikwe ñan ñotra grä ye diandikä mento munkän.

⁶ Akwa kukweta keteti munta nuene kuin abko nitre nicolaita käta kukwe nuene diän diän, kukwe yebtä mun mäta kri, ye abko kuin tuen tie, ñobtä ñan angwane kukwe nuenta kwetere yebtä ti mäta kri arato.

⁷ Ye abko, nitre gätäkä ti käbti tä nüne juta keta küküte kä Asiate, ye olo tärä, aiseté Ngöbö Üai tä dre niere, ye ie olo ketate kwe mikakäre täte. Angwane nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere. Ni

ye ie tikwe kā biandi kri ngwākā ni mikakrā nūne ye kwetadre angwane, rabadi nūne kārekāre kā kuin Ngōbōkwete abko nieba kwe tie.

Tārā nitre gātākā Jesu kābti juta Esmirnate krāke

⁸ Yebti nieba mda kwe tie:

Angele tā juta Esmirnate nitre gātākā ti kābti ngibiare, ye ie tārā tike krōrō:

Ti Jesukristo nāmanena jāndrān jōkrā kānenkri kena amne rabadi jāndrān jōkrā tābti mrā. Ti krūtani akwa nūkaninta nire abko kāta niere krōrō:

⁹ Munta ja tare nike amne mun bobre, jāndrān űakare munkwe, ye gare kuin tie, akwa jāndrān Ngōbōkwete tārā kabre munkwe kā kāinbti sete, aiseite Ngōbō ngwāreki mun jāndrān bkāne kabre amne űakare bobre era metre. Mdakāre abko, nitre ruāre tā ja israelita era metre niere abko tā űake blo mun rūere, ye gare kuin tie, akwa Ngōbōkrā niaratre abko űakare israelita era metre, űobtā űan angwane tā tōdeke űakare tibti, akwa niaratre tā gātāre Satanakrā.

¹⁰ Mdakāre abko, mun kebera ja tare nike tōdekabtā tibti angwane, diablukwe ni juandi mun ruāre kite ngite kā teri, akwa munkwe űan ja tare nikadi raire. Kōbō jātābe munkwe ja tare nikadi. Mun raba ja tare nike kore angwane, munkwe nūnanka dite jabtā abti mun krūtadi tōdekabtā tibti. Mun krūtadre kore ti dokwāre, ye ngwane munkwe mun rūe ganandi. Ye űitiāre tikwe mun mikadi nūne kārekāre Ngōbōbe.

¹¹ Ye abko, nitre gātākā ti kābti tā nūne juta keta kūkūte kā Asiate, ye olo tārā aiseite, Ngōbō űai tā dre niere, ye ie olo ketate kwetate mikakāre tāte. Nire nire kākwe ja tare nikadre tōdekabtā tibti, kākwe ti rükandrete űakare abko ni rūe ganainkā kwrere. Ngōbōkwete kukwe űkadite ni jōkrā krāke kā mrā angwane, Ngōbōkwete űan juandi ja okwā bāre mento, akwa kadi ngābti kwe nūnakāre kārekāre ben, aiseite űan krūtadi bobukāre abko nieba kwe tie.

Tārā nitre gātākā Jesu kābti juta Pērgamote krāke

¹² Yebti nieba krōrō kwe tie:

Angele tā juta Pērgamote nitre gātākā ti kābti ngibiare, ye ie tārā tike krōrō:

Ti Jesukristo kwe ngitra tu grine jabtā jūtre kwārikwāri tā abko kāta niere krōrō:

¹³ Satana tā gobrane Pērgamote, kānti munta nūne, ye abko gare kuin tie. Satana tā gobrane yete, akwa mun tā tōdeke kwatibe tibti, kāta nūnenkā dite tibtā. Juta munkwe, kānti Satana tā nūne, ye kānti ni iti tōdekaka tibti kādian nāmane Antipas nāma nūne, akwa kāmikani kwetate tōdekabtā tibti, akwa ti rükāninte űakare kwe. Ye nāire mun nāma tōdeke kwatibe tibti arato amne munkwe ti rükāninte űakare, yebtā kāta nebe nūare tibtā.

¹⁴ Akwa kukwe ruāre tā mun ngātāite yete abko űakare dbe tuen tie abko ti bike niere munye abko krōrō: Mekera Moisés nāire nitre israelita kākwe ja mikadre ngite Ngōbō rūere, abkokāre jāndrān kāmikani ngōbō ngwarbeye abko nitre israelita kākwe kwetadre ngōbō ngwarbe mikakāre űitiāte jae amne, ja mikadre gure bati bati kwetere* abko ni iti kādian nāmane Balaam kākwe diribare kira Balaye abko erere Balakwe bā mikani nūare nuendre nitre israelita okwāte. Mtare, ni ruāre mun kānti yete tā kukwe ye kwrere mike űitiāte jae, kāta ja mike ngite kore, ye abko tuen blo tie.

¹⁵ Mdakāre abko, kukwe diribare kira Balaamkwe, ye kwrere arato kukwe dirita nitre nicolaitakwe abkokri ni ruāre mun kānti yete tā nekete, ye abko tuen blo tie.

¹⁶ űNe aiseite, munkwe kukwe kāme ye kita temen amne munkwe ja makāta Ngōbōbel! Munkwe űan nuendre kore ne ngwane, ngitra tu grine jabtā jūtre kwārikwāri, kwrere jire ti kukweita betekā ti kadate, yebti ti nāin rūere jōkrā niaratrebe yete.

¹⁷ Ye abko, nitre gātākā ti kābti tā nūne juta keta kūkūte kā Asiate, ye olo tārā aiseite, Ngōbō űai tā dre niere, ye ie olo ketate kwe. Kira Ngōbōkwete mrō kādianta mana biani kwetadre nitre israelitaye nūnakāre. Angwane mtare nire nire kākwe ja tare nikadre tōdekabtā tibti, kākwe ti rükandrete űakare abko ni rūe ganainkā kwrere abko ie mana tā űkani tiebe abko tikwe biandi kwetadre ie. Erere arato, tikwe jā ngwen būere biandi ie nānkrā kā kāinbti amne jā yebtā abko ni kāi btin tādi tikani abko gare űakare ni mda mdaye, akwa nire nire ie tikwe jā ye biandi, aibe ie ni kāi btin ye rükadi gare.

Tārā nitre gātākā Jesu kābti juta Tiatirate krāke

¹⁸ Yebti nieba krōrō mda kwe tie:

Angele tā juta Tiatirate nitre gātākā ti kābti ngibiare, ye krāke tārā tike krōrō:

Ngōbō Odei okwā bā űukwā jutra kwrere amne bronse bātāninte kuin tā nebe trā ngitiekā, kwrere jire ngoto bā ie abko kāta niere krōrō:

* **2:14 ja mikadre gure bati bati kwetere.** Números 25.1-2 tā blite kukwe nebtā. Nitre israelita kākwe ja mikani gure bati bati ngōbō ngwarbe mikakāre űitiāte jae.

¹⁹ Munta dre dre nuene, ye gare jökrä tie abko krörö: Munta Ngöbö tarere amne ni mda mda tarere amne, munta tödeke kwatibe Ngöböti amne, munta sribire kuin amne munta ja tare nike tödekabtä tibti angwane, munta nünenkä dite jabtä, ye gare kuin tie. Mdakäre abko, munkwe tödekani krire tibti angwane, mun nämane jändrän kuinquin nuene, akwa mtare munta nuene bäri kuin, ye abko gare kuin tie arato.

²⁰ Akwa jändrän ketetibe nuenta munkwe abko tuen blo tie abko krörö: Meri tä iti mun ngätäite yete abko ja Ngöbö kukwei niekä tä niere au jabtä, ye abko tä näin dirire sribikä tikwetikwe ngökakäre, käta näin niere krörö: ja mikadre gure bati bati ngöbö ngwarbe mikakäre ütiäte jae amne mrö ngöbö ngwarbe mikakäre ütiäte abko kwetadre tä näin dirire. Meri kädian nämane Jreina Jezabel käkwe diribare kira, ye kwrere jire meri ye tä näin dirire abko munta tuemetre dirire mun ngätäite yete. Ye abko tuen ñakare dbe tie.

²¹ Meri ye abko käkwe kukwe käme Ngöbö rüere ye kitadre temen, bti tödekadre Ngöböti kwe, abkokäre tikwe kä bianina ie, akwa tö ja mikai gure bati bati janknu, ye abko ñan tö mikai temen arato.

²² Ne aisete, ti bike mike ja ngie nuen, käkwe mikadi bren jume amne rabadi ja tare nike jänbti. Erere arato, nire nire käta niara kukwei mike täte amne tä näin ja mike gure bati bati ben, ye abko tikwe mikadi ja tare nike kri krübäte meri ye kukwei mikabtä täte, akwa kukwe käme ye kitadre temen kwetre angwane tikwe ñan mikadi ja tare nike kore.

²³ Erere arato, nire nire tä nekete niarakri, ye abko tikwe gadikä jökrä. Yebtä abko kukwe kaibe ni jökrä töibtä abko gare jökrä tie abko rükadi gare tibtä ni jökrä gätäkä ti käbti kä ketareketare temen ie amne, ni itire itire käkwe dre nuendre, ye erere tikwe ütiä biandi ie.

²⁴ Angwane mun mda mda tä juta Tiatirate yete arato, akwa meri dirikä blo, jiebtä munta näin ñakare amne, kukwe ütiäte Satanakwe tä ükani kaibe tiebe nieta kwetre abko gare ñakare munye. Mun ye abko kötärä tikwe ñan kukwe mdara jire mikadi mda,

²⁵ akwa munta tödeke metre tibti, ye kwrere munkwe nuen janknu abti ti jatadi nüketa abko ti tö niei kore munye.

²⁶ Erere arato, nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere amne nire nire käkwe ti kukwei mikadi täte, ye abko tikwe mikadi gobrane nitre nünanäkä kä ketareketare temen yebti. Ti Rün käkwe ja di biani gobrankrä kore tie, ye kwrere tikwe ja di biandi ietre gobrankrä. Ti abko tä gobrane krörö:

²⁷ Angwane niara käkwe gobrandi ja di krikti amne, bäsi dobro sribeta kantrare metata krito ribi jjerore bti amne tä ngidiente kiakia jökrä, ye kwrere gobrandi kwe. *Salmos 2.9*

²⁸ Erere arato, nitre ganainkä abko ie tikwe muke kri tä kite käin dekä biandi.

²⁹ Ye abko, nitre gätäkä ti käbti tä nüne juta keta küküte kä Asiate, ye olo tärä aisete, Ngöbö Üai tä dre niere, ye ie olo ketate kwetre mikakäre täte abko nieba kwe tie.

3

Tärä nitre gätäkä Jesu käbti juta Sardite kräke

¹ Yebti nieba kwe tie: Angele tä juta Sardite nitre gätäkä ti käbti ngibiare, ye abko kräke tärä tike krörö:

Ti Jesukristo, kwe üai Ngöböke ni kükü amne muke kwä kükü tä abko tä niere krörö munye: Munta dre dre nuene, ye gare jökrä tie. Munta nüne kuin metre Ngöbökrä ni mda mda ngwärekre, aisete mun tuen kuin ni mda mdaye, akwa ni krütani kwrere jire munta Ngöbö ngwärekre, ñöbtä ñan angwane munta nüne käme, käta ja mike ngite krübäte Ngöbö rüere.

² Ne aisete mokrere jabtä munkwe amne munta dre dre nuene, yebtä munkwe töbika kuin ja käne! Kukwe ruäre kuinquin munta nuene, akwa kitera neme munye, ye käntarita ja dibti ja käne, tita niere munye, ñöbtä ñan angwane sribi nuenta munkwe Ngöbökrä, nin munta nuene täte jökrä tuen tie.

³ Ne aisete, kukwe diribare munye, munkwe kani ngäbti, ye munkwe ngwianta töre jae abko jiebtä mun rankwata, amne munta ja mike ngite Ngöbö rüere, ye kita temen munkwe, käkwe ja mäkätä Ngöböbe abko tita niere munye. Akwa munkwe ñan mokredre jabtä ne ngwane, ni gokä rükadre ñongwane gare ñakare nie, akwa batibe tä nüke, ye kwrere batibe ti rükadi mun mike ja ngie nuen yete.

⁴ Akwa nitre gätäkä ti käbti, ye ngätäite ni tärä ruäre juta Sardite yete abko tä nüne metre, ñan tä ja mike ngite ni mda mda kwrere, ye abko ni ngämi dän ngwen bürere kwetre mike dobrere kwrere. Ne aisete, niaratre abko käkwe dän ngwen bürere kitadi

jabtä, nünabare metre amne deme bä mikakäre. Niaratre rabadi dikekä tibe dän ngwen bürere te, ñobtä ñan angwane ganainbare jökrä kwetre aisete.

⁵ Ye abko, nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere. Nitre ye käkwe dän ngwen bürere kitadi jabtä, niaratre abko metre Ngöbö ngwärekre bä mikakäre, erere nünandre kärekre Ngöböbe kwetre. Erere arato, nünandi kärekre kwetre, aisete káita tikani tärä ni nünanka kärekre Ngöböbe mikakrä gare yebtä amne tikwe ñan kä diandrekä mento. Mdakäre abko, ni ye abko ni jen tikwe, tikwe niedi ti Rün ngwärekre amne angeletre Ngöbökre ngwärekre arato.

⁶ Ye abko, nitre gätäkä ti kábtí tá nüne juta keta küküte, ye olo tärä aisete, Ngöbö Úai tá dre niere, ye ie olo ketate kwe mikakäre táte abko nieba kwe tie.

Tärä nitre gätäkä Jesu kábtí juta Filadelfiate kräke

⁷ Yebti nieba kwe tie: Angele tá juta Filadelfia nitre gätäkä ti kábtí ngibiare, ye ie tärä tike krörö:

Ti Jesukristo abko kuin deme amne kukwe era metre niekä. Erere arato, llabe jrei Davikwe jukwe juta Jerusalén btin ye tikakrä abko tá kisete amne, jukwe dikadre kwe angwane, ni mda ñan raba tiketa jire chi. Erere arato, jukwe tikadre kwe angwane, ni mda ñan raba diketa jire chi. Ti Jesukristo ye abko káta niere krörö munye:

⁸ Munta dre dre nuene, ye gare kuin jökrä tie. Tikwe jukwe tikani kwati mun kánenkri, ye ni mda ñan raba diketa jire munkán abko tuen nete. Mun abko di ñakare bökan nünankrä tikrä, akwa munkwe ti kukwei mikani táte jökrä amne munkwe ti rükantinte ñakare.

⁹ Ye abko, nitre ruäre dárebare ni israelitakri tá ja israelita niere au jabtä, akwa niaratre tödeke ñakare tibti, aisete ñakare israelita era metre Ngöbö ngwärekre. Niaratre tá ngwarbe ni ngökö amne niaratre abko Satanakwe era metre. Niaratre ye abko tikwe ngwiandi nuke ja mike bobre ngukudokwábtí mun ngotobtä temen angwane, tita mun tarere kri abko niedi kore kwetre.

¹⁰ Angwane munkwe ja tare nikadre tödekabtä tibti angwane, munkwe nünandrekä dite jabtä, tikwe nieba, erere munkwe mikani táte jökrä. Ye mden kisete, Ngöbökre kukwe juandi kri ni jökrä kä nebtä nünanka Ngöbö rüere ye rüere, niaratre nuatekre ja káne angwane, nitre ye käkwe ja tare nikadi kri, akwa mun abko käkwe ti kukwei mikani táte abko útiäre tikwe mun ngibiadi ja tare nika ye ngániene.

¹¹ Ti abko jatadita jötrö ngwarbe, aisete munta nüne metre ti ngwärekre, ye kwrere munkwe ja ngibia janknu, ñobtä ñan angwane munkwe nünandi kärekre Ngöböbe abko korona kwrere, ye ni mda mda käkwe ñan diandrekáta munkán, abkokäre munkwe ja ngibia janknu.

¹² Angwane nire nire käkwe ja tare nikadre tödekabtä tibti, akwa ti rükandrete ñakare kwe abko rüe ganainkä kwrere. Ni ye abko ürä nökaní nguse Ngöbö tikwe jue ye táni ñan rabadre denká jire, ye kwrere jire ni mda ñan rabadre ni ganainká denká tikán Ngöbö kánti mento. Erere arato, niara abko jen Ngöbökre, abkokäre tikwe Ngöbö tikwe kái tikadi ni ganainkábtä amne, juta Jerusalén btin Ngöbökre tá ká káimti, akwa kebera kite temen, ye kái tikadi tikwe ni ganainkábtä niara abko nünanka juta Jerusalén btinte bá mikakäre. Angwane niara abko jen tikwe arato, ye bá mikakäre tikwe ja kái btin tikadi btä arato.

¹³ Ye abko, nitre gätäkä ti kábtí tá nüne juta keta küküte, ye olo tärä aisete, Ngöbö Úai tá dre niere, ye ie olo ketate kwe mikakäre táte abko nieba kwe tie.

Tärä nitre gätäkä Jesu kábtí juta Laodiceate kräke

¹⁴ Yebti nieba mda kwe tie: Angele tá juta Laodiceate nitre gätäkä ti kábtí ngibiare, ye kräke tärä tike krörö mda:

Jesukristo abko ká Amen, ñobtä ñan angwane niara abko káta ja kukwei mike táte metre amne niara abko kukwe era erere niekä. Jesukristo köböire jándrán jökrä namani bare Ngöböye kena. Niara káta niere krörö munye:

¹⁵ Munta dre dre nuene, ye gare kuin jökrä tie. Ni tibo abko ni tödekaka ñakare tibti kwrere amne ni ngire abko ni nüne ja di ngöi jökrä tikrä kwrere, akwa mun abko ñakare tibo amne mun ñakare ngire arato. ¡Mun ye rabadre tibo ni tödekaka ñakare tibti kwrere náre o mun rabadre ngire ni nünanka ja di ngöibti tikrä kwrere náre!

¹⁶ Akwa mun abko ñakare tibo amne mun ñakare ngire. Mun krube jirekábe, aisete mun abko ni útiäre ñakare jire kwrere, ye dokwäre abko tikwe mun yaidi jirekábe mentokwäre.

¹⁷ Mdakäre abko, mun jándrán bkáne kri, munta niere. Erere arato, munta jándrán mdei nike ñakare, aisete munta nüne kuin, munta niere. Akwa mun abko ni bobre, ngwarbe, amne jándrán bári útiäre Ngöbökre ñakare munkwe amne ká iko mun okwäte, ñobtä ñan angwane kukwe era metre Ngöbökre nuke gare ñakare munye. Erere arato, munta ja mike ngite krübáte, abtä munkwe ja gaidre, ye abko munta dikekä bütiere Ngöbö okwábtí ye kwrere abko munta gain ñakare jabtä, aisete mun abko bobre Ngöböta nútüre munbtä.

¹⁸ Ne aisete, mun rabadre jändrän Ngöbökwe bkäne era metre, abkokäre mun jata kökö tie. Ye abko, jändrän ütiäte kri krübäte Ngöbökwe oro kuin kukwani ñukwäte mikakäre orore metre, kwrere tarä tikwe makrä, aisete mun jata kökö tie. Erere arato, tikwe mun mikadre metre ja ngwäreki, ye bä mikakäre dän ngwen büreere ye mun jata kökö jökrä tie, bti munkwe mun bütiäkrä gaidre kri ye jue mika angwane, mun ñan rabadre dikekä bütiere mda. Mdakäre abko, kukwe Ngöbökwe ye gare ñakare munye, aisete kä iko mun okwäte kwrere, ye kräke abko mun jata kräkä kökö tie kitadre ja okwäte, ye köböire abko Ngöbö kukwei rabadi gare metre munye abko tita niere.

¹⁹ Nire nire taretä tikwe abko btä tita mäträre töi diankäre. Ne aisete, munkwe ja di mikata kri kärekäre nünakäre ja di ngöibti tikrä amne, munkwe kukwe käme kita jökrä temen amne munkwe ja makäta Ngöböbe amne tibe.

²⁰ ¡Tita nete! Ti abko tä jukwebtä, käta ñäke, ye mike ñäräre. Nire nire, ie ti kukwei jaradre, käkwe ti kärädre gwä angwane, ti näin kánti nebe gwi abko ben tikwe mrödi siä kwatibe te.

²¹ Angwane tikwe ja tare nikaba, akwa tikwe Ngöbö rükanteba ñakare abti ti krütaba, aisete tikwe kukwe blo ganainbare kwäräbe jökrä, ütiäre Ngöbökwe ti mikani tákänintbe gobrane ketetibe jabe, ye kwrere nire nire käkwe ja tare nikadre, akwa ti rükandrete ñakare kwe abko rabadre kukwe blo ganaine kwäräbe jökrä arato. Nitre ye abko tikwe mikadi tákänintbe gobrane ketetibe jabe arato.

²² Ye abko, nitre gätäkä ti käfti tä nüne juta keta küküte, ye olo tarä aisete, Ngöbö Üai tä dre niere, ye ie olo ketate kwe mikakäre täte abko nieba kwe tie.

4

Kürä gobrankrä, bti Ngöbö nämä tákänintbe

¹ Yebti tikwe nikraba angwane, jukwe nämä tikani kä káinbti, btä ti okwä rababa. Angwane ni kukwe kri, drü kri kwrere tikwe kukwe nuaba käne, ye kwrere jire kukwe jarabata tie abko käkwe nieba krörö tie:

Jakwe kä káinbti nete amne, kukwe rakadikä ño ño mda abko ti bike mike tuadre mae, nieba kwe tie.

² Ye btäräbe Ngöbö Üai rükaba täte jökrä tibtä angwane, kürä gobrankrä, yebti ni nämä tákänintbe iti gobrane kä káinbti, btä ti okwä rababa.

³ Angwane niara bä rababa tuen trä ngítiekä tie. Já ngwen büreere kädianta brillante, kwrere jire rababa tuen tie. Erere arato, já bä tain trä ngítiekä, kwrere jire bä rababa tuen tie amne, kürä niara täkräre, ye bäre temen abko mrüträ nämä krati. Mrüträ ye abko rababa trä ngítiekä rerebare bäsi já tuäre trä rerebare kädianta esmeralda, kwrere bä rababa tuen tie.

⁴ Mdakäre abko, kürä gobrankrä ye bäre ta abko kürä mdara jire nämä kwä gre bti kobkä. Kürä yebti abko nitre unbre unbre nämä tákänintbe ni gre bti nibkä. Nitre ye abko metre amne deme, ye bä mikakrä dän bä ngwen büreere nämä kitani btäre amne korona orore orore nämä mikani dokwäbti, btä ti okwä rababa.

⁵ Angwane kürä gobrankrä ye kánti merabe rababa trä ngítiekä amne kä ngö rababa ruen krikri be tie. Erere arato, unsuni aibe ngö rababa ruen tie amne kürä gobrankrä ye kánenkri ñotra nämä jutra ngítiekä krä kükü. Ñotra krä kükü nämä trä ngítiekä ye abko Ngöbö üai ni kükü, btä ti okwä rababa.

⁶ Mdakäre abko, kürä gobrankrä ye kánenkri abko mren trä ngítiekä bidrio kwrere nämä. Angwane kürä gobrankrä ye bäre ta abko jändrän nire nämä kräbkä. Jändrän ye abko okwä jökrä ngrabare, okwä jökrä ngwäreki amne trökri abko tikwe tuaba.

⁷ Jändrän kräbkä tikwe tuaba, ye abko krati rababa tuen lion kwrere jire tie. Krobukäre abko rababa tuen buey kwrere tie amne, krämäkäre abko ngwäre rababa tuen ni kwrere tie amne kräbkäkäre abko mü kri tä nakenkä káinta, ye kwrere jire rababa tuen tie.

⁸ Jändrän kräbkä tuaba tikwe, ye abko kratirekratire ngike krä ti rababa tuen tie amne ngike btä abko okwä rababa tuen jökrä btárikri amne terikri tie. Angwane jändrän ye abko käre dibire rare nämä jadúke ñakare, nämä niere krörö:

Ngöbö ni Dánkien Di Kri Jändrän Jökrä Nuenkrä, ma abko deme, deme, deme. Ma nämänena nüne kena amne, mata nüne amne ma ara jatadi, nämä niere.

⁹⁻¹⁰ Angwane Ngöbö nämä tákänintbe gobrane kürä gobrankräbti, ye abko jändrän kräbkä ye nämä käikitekä batire batire amne, nämä mike ütiäte kri jae, kä nämä kuin niere Ngöbö nünanka kärekäre yeye. Angwane nitre unbre unbre ni gre bti nibkä ye tä nebe nguku-dokwäbti niara ngwäreki, käta korona jakwe mike temen Ngöbö ngwäreki, Ngöbökwe kä biani gobrane ietre bä mikakäre, käta niere krörö:

11 Ni Dänkien Ngöbö,
 ma aibe ngöräbe käikitadrekä amne
 ma aibe raba mikani ütiäte amne
 ma aibe di kri,
 ñobtä ñan angwane makwe jändrän jökrä dätebare amne,
 ma aibe köböire jändrän jökrä tä mtare,
 abko nitre unbre unbre näma niere kore, rababa tuen tie.

5

Kordero abko ütiäte täräkwa mrianinkä ye metatekä

¹ Angwane kürä gobrankrä, bti Ngöbö näma tākānintbe. Niara kise ruenkri abko täräkwa mrianinkä ketaninte näma, btä ti okwä rababa. Täräkwa ye abko näma tikani jökrä terikri amne btäräkri amne, näma ketaninkä kuin bä kükü ja täritäri munkwatabti, rababa tuen tie.

² Angwane angele bäri di kri näma iti, btä ti okwä rababa amne, angele ye kākwe ngrateba kri kākwe nieba: ¿Nire bäri ütiäte kri abko kākwe täräkwa ne metadite amne, munkwata keta kükü mikani ja täritäri täräkwa ketakakrä abko nirekwe diandikä täräkwatabtä amarebti ye? rababa niere kore.

³ Akwa kä kämbti, kä temenbtä, amne dobo täni abko ni kwanba ñakare jire iti täräkwa ye metatekä amne ñākākä btä.

⁴ Ni ütiäte ñan kwanba jire iti täräkwa ye metatekä amne ñākākä täräbtä ti okwäbti, yebtä abko ti rababa müen krübäte.

⁵ Abtä nitre unbre unbre näma siba yete abko iti kākwe nieba tie:

Makwe ñan müa mda, ñobtä ñan angwane ni iti Judä mräkäkri abko dite kwra lion kwrere, niara abko jatani David bkünkri amne niarakwe jändrän jökrä Ngöbö rüere ganainbare kwäräbe, aisete niara abko bäri ütiäte kākwe tärä se metadite amne ketaninkä bä kükü ja täritäri se diandikä kwe arato, ni unbre ye kākwe nieba kore tie.

⁶ Ye btäräbe, Ngöbö näma tākānintbe kürä gobrankräbti, ye ngätäite amne jändrän kräbkä ye ngätäite amne nitre unbre unbre ni gre bti nibkä ye ngätäite ni näma iti abko rababa tuen Kordero kwrere tie. Ni ye abko näma nūnaninkä, akwa Kordero müre ketani, kwrere jire rababa tuen tie. Erere arato, ni ye abko di kri, aisete niara di ye abko rababa tuen kroture krä kükü tie amne niara okwä rababa tuen kwä kükü tie, ye abko Ngöbö üai ni kükü tä näin kä jökräbti temen abko tikwe tuaba.

⁷ Angwane Ngöbö nämane tākānintbe kürä gobrankrä yehti, ye kise ruenkri täräkwa näma, ye ni Kordero kwrere ye kākwe dianba kisete ti okwäbti.

⁸ Niarakwe täräkwa ye dianba kisete, ye btäräbe jändrän kräbkä näma yete amne nitre unbre unbre ni gre bti nibkä näma yete, ye rikaba ngitiekä ngukudokwäbti temen ni Kordero kwrere ye ngwäreki, niara mikakäre ütiäte jae. Angwane nitre unbre unbre ye kisetekisete abko arpa näma amne, blato kiakia orore orore ngwian näma kisetekisete kwetre arato abko te kri ngwäri mnüne rä bäne näma kwetre. Kri ngwäri mnü rä bäne näma blatote kwetre, ye abko ni itire itire tödekaka Jesubti tä nüne kuin deme Ngöbökrä käta blite Ngöböbe abko bä näma kore kwetre.

⁹ Angwane niaratre rababa ka btin niere krörö ni Kordero kwrere ie:

Ma aibe ütiäte kri, kä raba täräkwa ye den kisete amne ketaninkä munkwatabti, ye ma aibe raba denkä mento,
 ñobtä ñan angwane ma abko müre ketani ni kräke amne,
 ja däriebti makwe ni bätäkä ngwarbe kökanintarita Ngöbökrä.

Ye abko, ni kukwe bätäkä ngwarbe amne
 ni juta kwatirekwatire te amne
 ni nūnanka kä ketareketare temen,
 te makwe ni kökanintarita ruäre rabakäre ni jen Ngöbökwä.

¹⁰ Amne ma köböire Ngöböta gobrane ni tödekaka mabti yehti
 amne makwe mikani sribire ni blitaka Ngöböbe ni mda mda diäre kwrere Ngöbö nikwe kräke.

Amne niaratre kākwe gobrandi kä nebtä mabe,
 abko nieba kwe ti okwäbti.

¹¹ Yehti tikwe nikrabata mda angwane, Ngöbö näma tākānintbe kürä gobrankräbti, ye bäre temen amne jändrän kräbkä ye bäre temen, erere arato nitre unbre unbre näma ye bäre temen angele kukwei rababa ruen kwati krübäte tie. Ye erere bkänä, angeletre näma kwati kwati krübäte abko ni ñan rabadre tanre

¹² amne rababa Jesu bä mike Kordero kwrere, kä rababa ngrente ja dibti, kä rababa niere:

¡Kordero ye müre ketani ni diantarikäre,
 ye ütiäre abko Ngöböke ja di kri mikani niara kisete amne raba jändrän jökrä bkäne!
 ¡Erere arato, niara aibe raba töbtä kri amne di raba jändrän jökrä bti ta amne,
 niara aibe raba mikani ütiäte jae amne
 raba käikitaninkä amne demainbare!
 abko angele kukwei rababa ruen kore tie.

¹³ Yehti jändrän jökrä dätebare Ngöböke tä nüne kä käinbti, kä temenbtä, dobo täni amne
 mrente abko kukwei rababa ruen krörö tie arato:
 ¡Ngöböta tākānintbe gobrane küräbti amne Jesu Kordero kwrere, niaratre nibu ye aibe raba
 demainbare amne raba mikani ütiäte kri!
 ¡Erere arato, raba käikitaninkä amne raba ja di bkäne kri kärekäre!
 abko jändrän jökrä rababa niere kore.

¹⁴ Angwane jändrän kräbkä nämä kürä gobrankrä bäre temen, ye abko rababa niere: ¡jän,
 ye kwrere raba bare! ¡Amen! rababa niere. Angwane nitre unbre ni gre bti nibkä, ye
 rababa jökrä ngukudokwäbti temen Ngöbö amne ni Kordero kwrere ye ngwäreki, niaratre
 mikakäre ütiäte jae abko tikwe tuaba kore.

6

Munkwata diandrekä täräbtä angwane dre dre rakadrekä

¹ Yehti ni Kordero kwrere ye kākwe munkwata täräkwaata ketakakrä keta kükü ye dianka-
 aba keteti käne ti okwäbti angwane, jändrän kräbkä nämä kürä gobrankrä bäre temen, ye
 krati kākwe ñākāba kriki be abko kukwe rababa ruen unsuni ngö kwrere tie abko kākwe
 nieba: ¡jakwe! nieba kwe.

² Ye btäräbe tikwe nikraba angwane, mdä ngwen bürere nämä, btä ti okwä rababa.
 Angwane ni nämä näin mdä yehti abko nämä tukwen rürä ngwena kisete amne, niarakwe
 rüe ganaindre ye bä mikakäre korona bianba ie, bti niara rikaba ni jökrä ganaine rübtä.

³ Yehti ni Kordero kwrere ye kākwe munkwata ketebu täräkwaata ketakakrä ye diankaba
 angwane, jändrän nämä kürä gobrankrä bäre temen ye krobukäre kukwei jaraba tie, kākwe
 nieba krörö: ¡jakwe! nieba kwe.

⁴ Ye btäräbe, mdä mda jataba tuen tie. Mdä ye abko bä tain amne ni nämä näin bti abko
 kākwe kä jäme diandrekä jökrä nikän kä nebtä amne, ni rabadre ja kāmike jökrä kwärükwäri,
 abkokäre ja di bianba ie angwane, ngitra kri bianba rürä ie arato.

⁵ Yehti ni Kordero kwrere kākwe munkwata täräkwaata ketakakrä diankaba ketamakäre
 angwane, jändrän nämä kürä gobrankrä bäre temen ye krämäkäre kukwei jaraba tie, kākwe
 ¡jakwe! nieba. Ye btäräbe tikwe nikraba angwane, mdä bä drüne, btä ti okwä rababa amne,
 ni nämä näin mdä yehti abko nämä jändrän däbä nuatekrä ngwena kisete.

⁶ Angwane jändrän ketabkä, ye ngätäite Ngöbö kukwei jaraba krörö tie:

Makwe mrö gaka kä jökräbti temen. Yehtä abko ngwian ganaindre köböiti abko biandre
 jökrä trigo kilo kratibe btä. Erere arato, ngwian ganaindre köböiti abko bti sebada kökadre
 kilo krämäbe jökrä, akwa olibo köi amne uba döi,* ye abko makwe ñan jua ngwarbe jire
 chi, nieba kore kwe abko jaraba tie.

⁷ Yehti ni Kordero kwrere ye kākwe munkwata täräkwaata ketakakrä diankaba bäbkäkäre
 angwane, jändrän nämä kürä gobrankrä bäre temen, ye abko kräbkäkäre kākwe ¡jakwe!
 nieba.

⁸ Ye btäräbe tikwe nikraba angwane, mdä bä ngwen bürere nita kite krüte bäta nebe
 kwrere, btä ti okwä rababa. Mdä yehti abko ni kädekata Gata nämä näin amne Gata
 jiehti abko ni kä nakebtä ngibiabtikä nämä näin, ni kāmikani Gatakwe ngwiandre ja tare
 nike kä nakebtä abkokäre. Ngöböke köbö biani ietre ni kāmikakrä krörö: Nita nüne kä
 ketareketare temen abko tä ñäkänintbe ketabkä ye abko kāmikadre keteti rübtä. Erere arato
 ni krütadre mrö miare, bren kisete amne kwra krübätekrübäte kākwe ni ye kāmikadre abko
 erere Ngöböke köböi biani ietre.

⁹ Yehti ni Kordero kwrere ye kākwe munkwata täräkwaata ketakakrä diankaba bärikekäre
 angwane, nitre Ngöbö kukwei mikaka gare kākwe nünankabare dite Jesubtä amne niara
 rükaninte ñakare kwetre abtä kāmikani abko üai nämä ñukwä grä täni, sribi kwekwe Ngöbökrä
 nämane dbe kräke bä mikakrä, btä ti okwä rababa.

¹⁰ Angwane niaratre üai nämä ñäke ja dibti krörö:

Ngöbö, ma abko Gobranka jändrän jökräbti amne ma deme amne ma abko kukwe era
 niekä käre. Nitre nünanka ma rüere kä temenbtä kākwe nun kāmikani tödekabtä Jesubti, ye

* **6:6 olibo köi amne uba döi.** Mrö mda mda nämane krüte jökrä angwane olibo köi amne uba döi aibe nämane angwane
 yehti rabadre nüne, aisete mrö jökrä ngätäite ye abko bäri ütiäte nünankrä.

abko ḡñongwane kukwe ūkadite krāke, kākwe mikadi ja ngie nuen nun dokwāre amarebti ye? nāma niere kore.

¹¹ Angwane dān bā ngwen būrere bianba ietre, niaratre abko metre Ngōbō ngwāreki bā mikākāre. Kukwe ūkarete nitre niaratre kāmikaka krāke, ye abko ngibiadre ken kwetre abti niaratre mrākā sribikā Ngōbōkrā mda mda kāmikadre tāte jōkrā abko rabadre jōkrā ketetibe bentre angwane, Ngōbōkwe kukwe ūkadite niaratre rüekrā, kākwe rüe mikadi ja ngie nuen niaratre dokwāre, nieba kwe ietre.

¹² Yebti ni Kordero kwrere ye kākwe munkwata tārākwata ketakakrā diankaba bā tikāre angwane, tikwe mikaba nārāre angwane, dobo rababa nakaenkā kri krübāte kā temenbtā, rababa tuen tie amne nānā abko bā rikwitaba iko jōkrā. Bāsi dān drūne, ye kwrere jire nānā bā rababa. Sō abko bā rikwitaba tain būrere dāri kwrere rababa tuen tie.

¹³ Angwane kri ngwākā kādekata higo abko tā kite tain mrā abko müreta kite mate ribi kāta münente jōkrā higo kriebtā, ye kwrere jire muke rababa betekā timontimon kā temen nebtā rababa tuen tie.

¹⁴ Angwane tārākwata mriakata, ye kwrere jire kā kāinbti se rikaba nibrenkā, nibrenkā, nibrenkā angwane, nān rababa mda rababa tuen tie amne, Ngōbōkwe kā tokwā krikri amne kā butu mrente mrente diankaba jōkrā mento arato, rababa tuen tie.

¹⁵ Angwane nitre jirei kā nebtā gitiaba jōkrā kā mkāte amne jākwata mkāte ngitiobti Ngōbō ngāniene. Erere arato, nitre gobranka krikri amne nitre rükā dānkien amne ni jāndrān bkānkā krikri amne ni ūtiāte krikri, btā nitre klābore amne nitre nākare klābore nūnanka Ngōbō rüere gitiaba jire jōkrā kā mkāte jrei ben gwaire Ngōbō ngāniene,

¹⁶ kā rababa niere krōrō ngitiōye amne jākwataye: Ngōbōtā tākānintbe kūrā gobrankrābti amne ni Kordero kwrere mātā kri, se ngāniene nun ūke ja tāni amne jakwe nunbti temen,

¹⁷ nōbtā nān angwane Ngōbōkwe ni mikadre ja ngie nuen kri krübāte abko kāi nūra, ḡse abko nirekwe nūnandrekā jābtā Ngōbōbe se? nitre nūnanka Ngōbō rüere rababa niere kore ti okwābti.

7

Ngōbōkwe ni jen kwe ngibiadi jenena jakrā

¹ Yebti angele nāma nibkā, btā ti okwā rababa mda. Angele nāma iti kā driri, iti nindrini, iti ngwitārāki amne iti mōtariki. Angwane müre nān rabadre mate mda kā nebtā, mrenbtā amne kribtā, abkokāre niaratre nāma müre ketebtā.

² Ye btārābe angele mdara jire nāma kā driri jataba arato abko Ngōbō nire kāi nāma tikani jābtā abko ngwian nāma kisete kwe. Angele ye rükaba angwane, angele nibkā ie Ngōbōkwe ja di biani kā juankrā ngwarbe amne mren juankrā ngwarbe mürebti, yebti angele rükaba mrā kākwe ngrateba kri ja dibti, kākwe nieba krōrō:

³ Nitre sribikā Ngōbō nikwe krāke, ye okōbtā Ngōbō kāi ketaka ngāmi ngibiakāre Ngōbō mātā kri ye ngāniene, ye kānenkri munkwe nān kā temen ye juan ngwarbe. Erere arato, munkwe nān mren amne kri juan ngwarbe mürebti, nieba kwe ietre ti okwābti.

⁴ Angwane nitre israelita nibe btā Ngōbō kāi ketadrekā ngibiakāre kukwe taretare ngāniene nieba jōkrā abko 144,000 abko ni kukwei jaraba kore tie.

⁵ Nitre dārebare juta Judākri btā Ngōbō kāi ketakaba abko 12,000.

Nitre dārebare juta Rubénkri abko 12,000,

juta Gakri abko 12,000.

⁶ Juta Aserikri abko 12,000,

juta Neftalíkri abko 12,000,

juta Manasékri abko 12,000.

⁷ Juta Simeónkri abko 12,000,

juta Levíkri abko 12,000,

juta Isacarekri abko 12,000.

⁸ Juta Zabulónkri abko 12,000,

juta Josékri abko 12,000,

juta Benjamínkri abko 12,000 arato.

Ni kwati dān ngwen būrere kitani btā kākwe Ngōbō kāikitaninkā

⁹ Yebti tikwe nikraba angwane, ni kā jōkrābti temen nāma kwati, btā ti okwā rababa. Ni bātākā ngwarbe amne ni kukwe bātākā ngwarbe nāma, erere arato ni nūnanka juta bātākā ngwarbe, ye nāma kwati kwati krübāte nūnaninkā kūrā gobrankrā Ngōbōkwe ken amne ni Kordero kwrere ye ngwāreki, btā ti okwā rababa. Nitre rababa kwati krübāte, aisetē nān rababa tanre jire chi. Nitre ye abko ngite nākare mda Ngōbōkwe niebare btātre, ye bā

mikakrä abko dän bä ngwen бүрere бүрere te nämä näin amne nämä datile krikä* ngwena kisetekisete kä ngwiankäre nuäre jabtä.

¹⁰ Angwane rababa ngrente ja dibti, kä rababa niere krörö:
 ¡Ngöböta tākānintbe kürä gobrankräbti amne ni Kordero kwrere, ye aibe köböire nita nebe dianintari jökrä!
 rababa niere kore.

¹¹ Angwane kürä gobrankrä bti Ngöbö nämä tākānintbe ye bäre temen, nitre unbre unbre bäre temen btä jändrän kräbkä ye bäre temen angeletre nämä nūnaninkä jökrä, kākwe ja okokrä mikaba neme dobobtä temen, kākwe Ngöbö käikitakaba,

¹² krörö:
 ¡Amen!
 Ni jökrä raba Ngöbö demaine amne käikitekä amne, Ngöbö aibe töbtä kri amne ni jökrä raba kuin niere kärekäre ie.

Erere arato, Ngöbö aibe mika ütiäte jae amne niara aibe di kri jändrän jökrä bti ta.
 Ye aisete Ngöbö nikwe ye aibe abko mika ütiäte kri kärekäre ni jökräkwe. Abko kore se.

¡Amen!
 abko angeletre rababa niere kore.

¹³ Ye btäräbe nitre unbre unbre iti kākwe nieba krörö tie:
 ¿Nitre dän ngwen бүрere ngwen бүрere kitani jabtä, se abko nire amarebti se? Mdakäre abko, ¿niaratre kä mdenbo tä näin ruen? nieba kwe tie.

¹⁴ Angwane tikwe nieba mda ie:
 Ne abko. Niaratre garera mae ti mräkä, aisete makwe nie tie, tikwe nieba ie.
 Abtä niarakwe nieba krörö mda tie:

Ja tare nikani kri tödekabtä Jesubti angwane, nitre se kākwe ja tare nikani arato, akwa krütani tödekabtä bti abko mden se. Angwane dän bätäteta kuin tä nebe ngwen бүрere, ye kwrere niaratre kākwe tödekani Jesubti angwane, ja bätäninte ni Kordero kwrere däriete kwetre angwane, Ngöbökwere niaratre ngite dianinkä mento btä abko dän ngwen бүрere бүрere bä mikata btä mtare.

¹⁵ Ye mden kisete kürä gobrankrä Ngöbökwere, bti Ngöböta tākānintbe gobrane abko kanti niaratre tä sribire Ngöbökrä dibire rare mtare.
 Ngöbökwere niaratre ngibiadi kärekäre.

¹⁶ Ye kanti ñan mrö nikadre mda kwetre amne ja tare nikadi ñakare mda kwetre tomna miare.
 Erere arato, ñänänkwe ñan kukwadre jire chi mda amne kä ngire kākwe ñan nikadre jire chi mda,

¹⁷ ñöbtä ñan angwane ni Kordero kwrere tä kürä gobrankrä Ngöbökwere kanti abko kākwe niaratre ngibiadi.

Nitre obeja ngibiaka tä obeja ngibiare, ye kwrere ngibiadi kwe.
 Angwane ñö ni mikaka nüne kärekäre, ye kanti näin niaratre ngwena ñö tuen jae.
 Amne kukwe taretare btä tätre müen, ye ñan rabadi jire chi mda amne Ngöbökwere okwä ñöi rötadi jökrä ietre,
 abko nieba kore kwe tie.

8

Tärä ketaninkä bä kükükäre amne blato orore

¹ Yehti ni Kordero kwrere kākwe munkwata täräkwa ketakakrä diankaba bä kükükäre angwane, ñänä okwä ötare näre kä rababa kwekbe kä känbti sete.

² Yehti tikwe nikraba angwane, angele nämä nūnaninkä ni kükü Ngöbö ngwärecri, btä ti okwä rababa angwane, angeletre ye abko ie drü bianba krä kükü.

³ Bti angele mdara jire jataba. Angele ye abko nämä blato chi orore kri ngwäri mnü rä bäne kukwakrä ye ngwena kisete abko rükaba ñukwä grä ye kanti, rababa nūnaninkä. Ye btäräbe, kri ngwäri mnü rä bäne bäne bianba kabre kukwadre ñukwä grä ororebti kürä gobrankrä Ngöbökwere ye kanti amne, juta deme Ngöbökwere kākwe kukwe ribeba Ngöböye ye ben gwaire.

⁴ Angele rababa kri ngwäri mnü rä bäne kukwe ye ngübü rababa niken angele ye kisete kukwäne nebe Ngöbö ngwärecri, juta deme Ngöbökwere namani blite Ngöböbe abko bä mikaba kore.

⁵ Angwane angele rikaba ñukwä grä kanti, kākwe ñukwä bda diankaba, mikaba blato orore kri ngwäri mnü rä bäne kukwakrä te kwe, bti ñukwä bda ye kitaba kä temen nebtä kwe.

* **7:9 datile krikä.** Datile krie abko dba krie kwrere, akwa tukwä ñakare btä amne ngwä abko mane amne bänante, aisete kuin kwetadre.

Ye btäräbe unsuni ngö rababa krikri be. Erere arato, kä ngö rababa ruen krikri, mera trä rababa amne dobo rababa nakaenkä se kwrere.

Drü jükani krä kükü ja täritäri

⁶ Angwane angeletré ni kükü ye abko käkwe ja mikani juto biare drü krä kükü ye jükakäre.

⁷ Ye erere bkänä, angele iti käkwe drü jükaba käne, ye btäräbe nü bürere jä kukwän kwrerekwrere amne ñukwä jutra mritani däribe mni mni abko Ngöbökwe juamba kä temen nebtä, ye abko käta ñäkänintbe ketamä abko kukwaba keteti jire temen. Erere arato, kri krikri kukwaba keteti jire, akwa mikä rerebare kukwaba jire jökrä kwe.

⁸ Yehti angele nibukäre käkwe drü mda jükaba angwane, jändrän bäsi ngitio kri jutra ngitiekä jökrä, kwrere jire kitaba mrente angwane, mrenta ñäkänintbe ketamä abko keteti rikwitaba därire.

⁹ Angwane jändrän jökrä nünanka mrente rabadre ñäkänintbe ketamä abko gataba keteti näre. Erere arato, ru mrente ñäkänintbe ketamä abko juamba ngwarbe keteti näre.

¹⁰ Yehti angele nimäkäre käkwe drü jükaba. Ye btäräbe muke kri jutra ngitiekä ñotra kwrere näma kä kämbti, betakaba timon abko rikaba mate ñö krikri amne ñö kiakia ketamä abko keteti te rikaba mate.

¹¹ Muke ye abko kädian näma Kwaka abko rikaba mate ñöte, ñöbtä ñan angwane ñöta ñäkänintbe ketamä abko keteti rikwitaba kwaka jökrä. Ñö kwaka, ye kisete ni krütäba kwati krübäte ñö ye ñäbtä.

¹² Yehti angele nibkäkäre käkwe drü jükaba angwane, käta ñäkänintbe ketamä ñänänte amne söte abko keteti rikaba ngwarbe amne muketa ñäkänintbe ketamä abko keteti rikaba ngwarbe arato. Ne aisete, kä keteti näre ñänänte amne söte abko rikwitaba iko jökrä amne muke keteti näre rababa iko arato. Ye mden kisete, ñänä okwä krä kwä kä ngwenbti kä trä rababa ñakare. Erere arato, ñänä okwä krä kwä deo kä trä rababa ñakare arato.

¹³ Yehti tikwe nikraba angwane, mü kri näma nikenkä käinta abko ngö jaraba tie amne mü ye rababa ñäke ja dibti, kä rababa niere krörö: ¡Aingwaree, nitre nünanka Ngöbö rüere kä temenbtä abko bobre jakän, ñöbtä ñan angwane angele nimä mda kebera drü jüke ja täritäri aisete! rababa niere kore.

9

¹ Yehti angele nirikekäre käkwe drü jükaba angwane, angele bä muke kwrere näma kä kämbti betaninkära timon nüke kä temen nebtä abko tikwe tuaba. Angwane kä mkä kri kädianta Kä Timonbti kräke llabe bianba ie jukwe Kä Timonbti ye tikakrä.

² Ye erere bkänä, angele ye käkwe jukwe tikaba Kä Timonbti angwane, ngübü tä nebe neen krikri be, ye kwrere jire ngübü rababa kite kabre kukwäne abko käkwe ñänä trä mikaba diore amne kä käinta rababa diore ngübü kisete arato.

³ Angwane ngübü yete abko tröda jatäba kwati krübäte mda abko rikaba kä jökräbti temen kä nebtä. Tröda ye abko ie kä bianba ni tákätekäre bäsi dribe kwrere.

⁴ Tröda ye abko käkwe ñan mikä kwetadre amne kri mu jökrä rerebare ñan kwetadre kwetre. Erere arato, kri jökrä ñan kwetadre jire chi kwetre, nieba Ngöbökwe ietre; akwa nire nire tödekaka ñakare Jesubti, aisete Ngöbö kä ñakare ketaninkä okokrä btä, ni ye kwrerekwrere aibe mikadre bren kwetre, nieba Ngöbökwe ietre.

⁵ Akwa tröda ye abko ie Ngöbökwe kä bianba ni mikakrä bren jume jirekäre, akwa kä bianba ñakare kwe ietre ni kämikakrä. Angwane dribe tä ni tákete abko tä nebe tare krübäte nie, ye kwrere tröda ye käkwe nitre ye mikadre bren, käkwe ja tare nikadre krübäte sö krärike, Ngöbökwe nieba ietre.

⁶ Ne aisete nitre rababa ja tare nike tröda kisete, ni ye abko tö rabadi krütai jötrö, akwa rabadi krüte ñakare.

⁷ Angwane tröda nitre mikaka bren ye abko bä krörö: mdä mikata biare ngwiandre rübtä, ye kwrere jire bä rababa amne, dokwäbti bäsi korona orore kwrerekwrere näma angwane, ngwäre bä rababa ni ngwäre kwrere.

⁸ Mdakäre abko, dokwä drüen rababa tuen nga meri dokwä drüen kwrere tie amne tu rababa tuen kri krübäte lion tu kwrerekwrere.

⁹ Amne jändrän ribi ribi jiero kwrerekwrere näma mikani mäträbtä ngibiakäre rüe ngäniene amne, kareta kratu krübäte jakäta niken mdäkwe rübtä ngöta nebe krikri, ye kwrere jire tröda ye ngike ngö rababa ruen nikenkä käinta.

¹⁰ Erere arato, tröda ye abko niretu aibe rababa tuen kübarate dribe kübara kwrerekwrere. Tröda kübara ye abko di rababa ni mikakrä bren jume sö krärike.

¹¹ Angwane üai käme tä dänkiene Kä Timonbti abko tä tröda ye dänkiene. Üai käme tröda dänkiene ye abko kädianta Abadón hebreore amne Apoliön griegore. Ye abko Ni Gakaka nieta.

¹² Kukwe tare kri krübäte jatadre ketamä niebare mü krikwe abko erere tröda ye köböite kukwe tare rikaba bati käne ta, akwa kukwe tare kri tä ketebu mda.

¹³ Yebti angele ni tikäre käkwe drü jükaba angwane, ñukwä grä orore kri ngwäri rä bäne kukwakrä Ngöböye nāma Ngöbö ngwäreki, yebtä jändrän kroture kräbkä nāma abko te ni kukwei jaraba tie.

¹⁴ Angwane angele ni ti kisete drü nāma, ye ie ni kukwei käkwe nieba krörö: Angele nibkä tä mäkäninte Ñö Eufrates kánti ye tikete, nieba kwe.

¹⁵ Ye erere bkänä, ñänä okwä nuäi, köbö mden te amne sö mdenbtä amne kä mdenbtä angele nibkä ye rabadre tikaninte abko nāma mikanintbe, ye erere angele rababa tikaninte abko käkwe ni kāmikadre ketamä temen, abkokäre rababa tikaninte.

¹⁶ Angwane nitre rükä nāma nāin mdäbti mdäbti abko 200,000,000 nieba kore abko ni kukwei jaraba tie.

¹⁷ Ye ngwane abko, bäsi köböre kwrere Ngöbökwä mdä mikaba tuare tie angwane, nitre nāma nāin mdä yebti abko jändrän ribi ribi nāma mikani ja mäträbti kwetre ja ngibiakäre rüe ngäniene. Jändrän ye abko bä rababa tain ñukwä jutra kwrere, bä mire drüne amne bä nāma sübrüre asufre kwrere abko nāma kitani jabtä kwetre. Mdakäre abko, lion krübäte dokwä, ye kwrere jire mdä ye dokwä rababa tuen tie angwane, mdä ye kadate abko ñukwä jutra, ngübü amne asufre rababa betekä.

¹⁸ Ñukwä jutra, ngübü amne asufre rababa betekä mdä kadate ye abko käkwe ni ketamä kä temen nebtä nünanka Ngöbö rüere kāmikaba,

¹⁹ ñöbtä ñan angwane mdä ye abko di rababa kadate amne kübarate ni kāmikakrä. Mdä ye abko kübara rababa tbi kwrere abko bti rababa ni kwete amne rababa ni kāmike arato.

²⁰ Akwa ni mda mda rababa nire ja tare nika ye näire abko käkwe kukwe kāmekāme Ngöbö rüere ye kitaba ñakare temen, aisete nāma ja mike ngite janknu abko krörö: üai kāme gibiakaba ñakare kwetre. Mdakäre abko oro, plata, bronse, jä amne kri sribebare ngöbö ngwarbere abko ie kä tuen ñakare amne ni kukwei ruen ñakare ie amne dikekä ñakare abko mikaba ütiäte janknu kwete arato.

²¹ Mdakäre abko, nitre ye nāma ni kāmike, ye erere tä nuene janknu amne, kwra neme ñakare ietre amne, ja mika gure bati bati neme ñakare ietre amne tä gore janknu arato.

10

Angele käkwe täräkwa chi biani Juanye

¹ Yebti angele mda bäri dite jataba kä känbti timonkwäre mütate, btä ti okwä rababa. Angwane angele ye abko dokwäbti kainta mrüträ nāma amne, ngwäre abko rababa trä ngitiekä ñänä trä kwrere amne, ngüre abko rababa tuen ürä kri ñukwä jutra kwrere.

² Angwane angele ye abko nāma nāin täräkwa chi metaninte ngwena kisete. Angele ye abko käkwe ngoto küde ruenkri mikaba mrenbti amne ngoto küde ngeberekri abko mikaba dobo nötabti jate.

³ Bti lion tä ngwäne krikri ja dibti, ye kwrere jire angele ye käkwe ngrateba kri ja dibti angwane, unsuni krä kükü ngö rababa ruen tie.

⁴ Unsuni krä kükü kukwei käkwe kukwe nieba, ye ti rikabara tike täräbtä angwane, ni kukwei rababa ruen kä känbti tie, käkwe nieba krörö: Unsuni kukwei nibi krä kükü käkwe dre nini ye tuemetre tiebe. Makwe ñan tika täräbtä abko ni kukwei jaraba kore tie.

⁵ Angwane tikwe angele tuaba ngoto mike mrenbti amne dobo nötabti jate, angele ye ara käkwe kise ruenkri kākaba kāin amne kukwe niedi kwe abko kukwe era erere bä mikakäre,

⁶ bti nieba krörö kwe: Ngöbö Nünanka Käreäre amne Ngöbö kä kāin, kä temen dātekä ara käkwe mren dātebare amne jändrän jökrä tä te dātekä, Ngöbö ye kābti ti bike kukwe era erere niere krörö: jNgöbökwä ñan kä ngibiadi jire chi mda!

⁷ Akwa angele ni kükükäre käkwe drü jükadi angwane, batibe kukwe kaiibe tiebe Ngöbökwä ye rabadi bare täte jökrä, Ngöbökwä niebare niara kukwei niekä jökräye ye kwrere.

⁸ Angwane ni kukwei jaraba krire kä känbti tie ye käkwe niebata krörö mda tie: Angele tä nūnaninkä amne ngoto kwärä tä mrenbti amne ngoto kwärä abko tä dobo nötabti jate abko täräkwa chi metaninte tä kisete kwe, ye nän käreere ie, nieba kwe tie.

⁹ Ye erere ti rikaba käkwe nieba krörö angele yeye:

Täräkwa chi tä ma kisete, ye ngwen tie, tikwe nieba ie.

Angwane angele ye käkwe nieba mda tie:

Täräkwa ne, amne kweta makwe. Täräkwa ye bānān rabadi mane munkö kwrere ma kadate, akwa ma bülete abko bānān rabadi kwaka, nieba kwe tie.

¹⁰ Ye erere bkänä, täräkwa chi nāma angele kisete, ye tikwe dianba kisete, bti tikwe kwetaba. Angwane bānān rababa mane munkö kwrere ti kadate, akwa täräkwa ye rikaba mate ti teri angwane, bānān rababa kwaka.

¹¹ Angwane nieba krörö mda kwe tie: Mtare nitre juta kabre te amne nitre kukwei batakä ngwarbe amne, nitre nünanka kä ketareketare te amne nitre gobranka gobranka, yebtä makwe Ngöbö kukwei nieta btin mda abko nieba kore kwe tie.

11

Ni nibu Ngöbö kukwei niekä

¹ Yebti angele kwe krito bäsi nörä kroko kwrere bianba kä ñäkäkrä tie, käkwe nieba krörö tie:

Ju blitakrä Ngöböbe amne ñukwä grä, ye nän ñäke amne ni nibe tä Ngöbö käikitekä yete, ye makwe tan jökrä.

² Akwa kä mikani jenena nitre ñakare israelitarekrä ju blitakrä Ngöböbe kanti, ye abko makwe ñan ñäkä, ñobtä ñan angwane nitre ñakare israelitare, ie kä ye bianina. Sö gre ketebu bti krobu niaratre käkwe rätädi jökrä juta deme Jerusalén yebti, mikakäre ja tare nike.

³ Angwane tikwe ni juandi nibu abko käkwe blitadi tikrä. Tikwe ja di biandi ietre amne niaratre rikadi Ngöbö kukwei niere köbö 1,260. Ye abko, nitre Ngöbö kukwei niekä kirakira nämane dän jüräre kite jabtä, ye kwrere nitre ye käkwe dän jüräre kitadi jabtä.

⁴ Ni nibu ye abko tä olibo krie dobu kwrere amne ñotra grä krobu kwrere tä kä temenbtä ni Dänkien ngwäreki.

⁵ Nane ni mda mda tö rabadre niaratre nibu ye mikai bren angwane, niaratre kukwei tä betekä ñukwä jutra kwrere kadate käkwe rüe kukwadre jökrä. Ne aisetse nire nire tö mikai bren abko gatadre jökrä kore.

⁶ Mdakäre abko nitre nibu ye tä näin Ngöbö kukwei niere angwane, niaratre di tarä kä mikakrä töre, nü ñan räkandre jire chi temen abkokäre. Erere di tarä ñö jökrä kwitakrä därise amne tö rabadre ni mikai bren jume batakä ngwarbe, ye erere di tarä ni mikakrä ja tare nike bren batakä ngwarbe kisete arato.

⁷ Akwa nitre nibu ye käkwe blitadi ünän jökrä Ngöbökrä angwane, ni bä jändrän kri krübäte kwrere abko di Satanakri, aisetse tä Kä Timonbti abko jatadi rüre nitre nibu ye rüere, bti ni jändrän krübäte kwrere ye käkwe niaratre nibu ganaindi kwäräbe amne kämikadi kwe.

⁸ Angwane juta ütiäte kri Jerusalén, kanti ni Dänkien müre ketani krusobtä, juta ye kanti nitre nibu ye ngwäkä rabadi kitanintbe tementa ji ngrabare. Juta kri ye mden abko kädianta Sodoma amne Egipto arato, nitre nünanka juta yete tä nüne diän diän bä mikakrä.

⁹ Angwane köbömä bti ötare ni kä jökräbti temen, ni kukwe batakä ngwarbe amne ni batakä ngwarbe amne ni juta batakä ngwarbe te käkwe nitre nibu ye ngwäkä tuadi amne ñan doboi mikadre niedi kwetere.

¹⁰ Angwane nitre nibu kämikani ye abko käi rabadi nuäre nitre nünanka Ngöbö rüere btä, käkwe jändrän biandi ngwarbe jae kwärükwäri kä ngwiankäre nuäre jabtä, ñobtä ñan angwane nitre nibu Ngöbö kukwei niekä ye abko nämane ni nünanka Ngöbö rüere kä nebtä mike ja tare nike krübäte, aisetse kämikani angwane, käi rabadi nuäre btätre.

¹¹ Akwa yebti kä rikaba köbömä bti ötare ta angwane, Ngöbökwé nitre nibu ye mikabata nire amne rababa takänintbe krö. Ni jökrä käkwe tuaba nuketa nire abko rababa nekwetekä krübäte.

¹² Angwane ni nibu ye ie ni kukwei jaraba kri kä käinbti, käkwe nieba krörö ietre: Mun jakwe kä käinbti nete, nieba kwe ietre. Ye btäräbe rikaba müte käin amne rüe käkwe tuaba jökrä niken kä käinbti.

¹³ Ye btäräbe dobo rababa nakaenkä kri krübäte. Dobo rababa nakaenkä, ye kisete abko juta Jerusalén nämä ñäkänintbe keta jätä abko keteti rikaba ngwarbe temen amne ni kämikaba mili krä kükü dobo yekwe arato. Angwane nitre rüere nämä nire abko btä kä jürä rababa krübäte amne Ngöbö kä käinbti se käikitakaba kwetere.

¹⁴ Ye kwrere kukwe tare krübäte abko rikaba bobu ta, akwa kukwe tare ketamakäre abko kebera nuke mda.

Angele kwe drü krä kükükäre jükani

¹⁵ Yebti angele ni tikäre käkwe drü jükaba angwane, nitre kukwei rababa ruen krikri ja dibti kä käinbti, kä rababa niere:

Ni Dänkien Ngöbö amne Jesu Dianinkä Ngöbökwé abko kitera gobrane ni ngätäite.

Niaratrekwe gobrandi kärekäre, rababa niere.

¹⁶ Angwane nitre unbren unbren ni gre bti nibkä nämä takänintbe Ngöbö ngwäreki kürä gobrankrä kwekwebti rikaba, rababa ja okokrä mike nebe dobobtä temen Ngöbö mikakäre ütiäte jae amne rababa Ngöbö käikitekä,

¹⁷ kä rababa niere krörö:

Ni Dänkien Ngöbö, ma di kri jändrän jökrä bti ta amne ma tä kärekäre.

Nunta kuin niere mae, ñobtä ñan angwane ma di kribti ma kitera gobrane ni ngätäite.

¹⁸ Nitre kä jökräbti temen tä nüne ma rüere abko moto romon krübäte makrä,
akwa makwe kukwe ükarete ni krütani kräke, mikakäre ja ngie nuen abko käi nüra.

Amne nitre sribikä makwe käta ma kukwei niere, ye abko ie ma kitera sribi ütiä bien.

Erere arato, ni ütiäte krikri ya, o ni bobre bobre ütiäte ñakare, akwa tä ma käikitekä, ye abko
juta deme makwe, ye ie makwe sribi ütiä biandi.

Amne nire näta kä temen ne juen ngwarbe abko makwe juandi ngwarbe arato,
abko nitre unbren unbren rababa niere.

¹⁹ Angwane ju blitakrä Ngöböbe nämä kä käinbti abko jukwe tikaba amne ju yete abko
kaja nämä, btä ti okwä rababa. Kaja ye abko te kukwe ükaninte Ngöböke nitre israelitabe
abko nämä ükani abko btä ti okwä rababa. Angwane mera trä rababa, kä ngö rababa ruen
amne unsuni ngö rababa amne dobo rababa nakaenkä amne ñü järe järe rababa näkäen
kabre temen ti okwäbti.

12

Meri amne mökata kri

¹ Ye btäräbe Ngöböke jändrän kuin, ütiäte kri bä mikaba kä käinbti abko tikwe tuaba. Ye
abko, Ngöböke dre nuendi bä mikaba abko krörö: Meri iti nämä kä käinbti abko btä ñänä
trä nämä dän kwrere amne, sö abko nämä niara ngoto täni. Erere arato, korona nämä niara
dokwäbti abko btä muke bä nämä kwä jätäbti kubu.

² Meri ye ñakare mobe bren kwe kisetete, aisetete jataba ja ngibiare amne rababa ngrente
krikri be ja ngibiabtä.

³ Yehti jändrän mdara jire rababa kä käinbti sete abko mökata kri krübäte bä tain rababa
tuen tie. Mökata ye abko Satana ara bä mika nämä. Mökata ye abko dokwä kwä kükü amne
korona nämä mikani dokwä kwatirekwatire bti amne krotu krä jätä ie, niara bäri dite bä
mikakrä.

⁴ Angwane muke kä käinbti* se nämä ñäkänintbe ketamä abko mökata ye käkwe muke
sökakaba keteti ja kübarabti, bti kitaba timon kwe kä temen nebtä. Abti meri nämä ja ngibiare
amne ngäbäkre däredre kwe abko mökata ye tö rababa kwetäi jötrö kän, abkokäre rababa
nünankä meri kanti yete.

⁵ Angwane ngäbäkre däreba brare meri yekwe abko Jesu Dianinkä Ngöböke bä mikata.
Ngäbäkre ye abko käkwe gobrandi ja di kribti juta jökräbti, käkwe juta jökrä mikadi ja ngoto
täni. Akwa ngäbäkre ye däreba angwane, batibe Ngöböke dianinkä jenena mökata ngäniene
amne jirikaba nebe Ngöbö kanti, kürä gobrankrä Ngöböke ye kanti gobrane Ngöbö ben
gwaire.

⁶ Akwa meri ngäbäkre ngibiaka ye abko gitiaba kä kaibete. Ngöböke kä ükaninante biare
kräke, kanti gitiaba. Ye kanti abko Ngöböke bukadre köbö 1,260 abkokäre gitiaba yete.

⁷ Yehti rüba krörö mda kä käinbti: angele Miguel btä angele mda mda käkwe rüba mökata
amne angele üai käme kwekwe rüere.

⁸ Akwa niaratre abko di ñakare ganainkrä, aisetete angele Miguel btä angele mda mda ye
käkwe mökata ye ganainba kwäräbe, aisetete kä ñan rababa mda niaratrekrä nünankä kä
käinbti.

⁹ Abtä mökata kri kädekata tbi kira, arabe kädekata Diablu amne Satana tä näin ni ngökö
kwati kä jökräbti temen, ñan rikadre ji Ngöbökebtä abkokäre. Mökata ye btä angele üai käme
kwekwe ben kitaba jökrä timon nuke kä nebtä.

¹⁰ Angwane ni kukwei jaraba kri ja dibti kä käinbti tie, kä rababa niere krörö:

Kä ni diantarikrä nüra.

Ngöbö nikke di kri kitera gobrane amne, Ni Dianinkä Ngöböke abko nüra gobrane arato,
ñobtä ñan angwane dibire rare ni mräkä rüere Satana kä nämäni ni mräkä tödekaka
Jesubti kite ngise Ngöbö nikke ngwäreki abko kitaninkära kä käin bäre mento nuke
kä temen nebtä.

¹¹ Ni Kordero kwrere därie ianinte krusobtä ni ngite diankakäre mento btätre, ye köböire ni
mräkä tödekaka niarabti käkwe Satana ganainbare.

Erere arato, ni mräkä käkwe kukwe kuin Jesubtä nieba angwane, ja kwata namani ruentari
tare ñakare ietre, käkwe kä jürä ngwiani ñakare jabtä, aisetete nämäni biare ngataen
kukwe kuin niebtä.

Yehti Satana ganainbare kwetre arato.

¹² Ne aisetete mun nünanka kä käinbti kä ngwen nuäre jabtä munkwe.

Akwa aingwaree mun nünanka kä temenbtä amne mun nünanka kä butubti mrente.

* 12:4 Muke ye abko angele ngökani Satanakwe Ngöbö rüere bä mikata nütüta.

Mun ye abko bobre jakän, ñobtä ñan angwane kä kitera neme braibe diabluye rükäre Ngöbö rüere, aisete mäta kri mun nünanka kä temenbtä ye rüere, abko ni kukwei rababa ruen tie.

¹³ Mökata kitaba timon kä temen nebtä angwane, meri käkwe ngäbäkere ngibiabare ye jiebtü mökata rikaba kisere mikakäre ja tare nike.

¹⁴ Akwa meri ye abko gitiadreta kä kaibete tbi ngäniene, abkokäre mü kri ngike kwrere Ngöbökwie bianba ie rikakakrä, ye erere bkänä meri ye gitiabata mobe tbi ye ngäniene. Ye kanti Ngöbökwie ngibiaba kä komä bti ötare.

¹⁵ Angwane tbi ye käkwe ñö yaiba kabre meri ye rüere mda, ñö ye abko rabadre kri, kä rikadre meri ye ngwana nguse, abkokäre yaiba kwe.

¹⁶ Akwa dobo temen ye käkwe meri ye die mikaba amne, ñö kri yaiba mökatakwe, ye dobokwe ñakaba jökrä, aisete mökatakwe meri kämikani ñakare.

¹⁷⁻¹⁸ Yebtä abko mökata ye mäta rababa kri krübäte meri yebtä angwane, rikaba rüere meri ye bkün mda mda rüere. Meri bkün mda mda abko ni Ngöbö kukwei mikaka täte era metre amne ni blitaka Jesu kräke, ye rüere mökata rikaba rüere.

13

Ni jändrän kri krübäte kwrere jataba mrente käin

¹ Yebti mökata rababa nünaninkä mren köräbti. Yebti ni jändrän kri krübäte kwrere jire abko jataba mrente käin ti okwäbti mda. Ni ye abko dokwä kwä kükü amne krotu krä jätä ie, niara bäri dite bä mikakrä, btä ti okwä rababa. Angwane kukwe diän taretare tikani Ngöbö rüere näma ketaninkä kwati dokwä kwatirekwatire btä amne korona näma mikani krotu kratirekratire btä abko tikwe tuaba.

² Ni jändrän kri krübäte kwrere tikwe tuaba, ye abko bä rababa tuen kwra leopardo kwrere tie amne ngoto abko rababa tuen oso ngoto kri kwrere tie amne kada abko rababa tuen krübäte lion kada kwrere tie. Ni ye abko ie mökata käkwe ja di bianba kri gobrankrä nihtä.

³ Ni jändrän kri krübäte kwrere ye abko träin kri dokwä kwatibtä abko kisete gatadre, akwa träin ye abko rababa kuinta ie, bä rababa tuen tie. Yebtä abko ni jökrä ñan töi rababa krütare amne ni jökrä rikaba niara jiebtü.

⁴ Angwane mökata käkwe ja di bianba ni jändrän kri krübäte kwrere ie. Yebtä abko ni jökrä rababa mökata ye mike ütiäte Ngöbö kwrere. Erere arato, ni jändrän kri krübäte kwrere ye mika rababa ütiäte kwetre arato, kä rababa niere krörö: Ni jändrän kri krübäte kwrere tä nete, ne kwrere ni ñakare jire mda. ¿Nirekwe rüdre ni ne kwrere rüere se? rababa niere.

⁵ Mdakäre abko, ni jändrän kri krübäte kwrere ye abko ie ja di bianba kri kä nebtä sö gre ketebu bti krou. Erere arato, niarakwe bikadre kri, käkwe ñäkädre kämekäme Ngöbö rüere, abkokäre kä bianba kore ie.

⁶ Ye erere bkänä, ni ye käkwe ñäkäba kämekäme krübäte Ngöbö rüere amne kä käinta, kanti Ngöböta nüne, ye rüere ñäkäba diän diän kwe. Erere arato, nitre nünanka kä käinbti, ye rüere ñäkäba kwe.

⁷ Erere arato, juta deme Ngöbökwie rüere rüdre kwe, ye ganaindre kwäräbe kwe amne kämikadre kwe, abkokäre kä bianba ie rükäre bentre. Erere arato, ni bätäkä ngwarbe amne juta bätäkä ngwarbe amne ni kukwe bätäkä ngwarbe amne kä bätäkä ngwarbe bti rabadre gobrane, abkokäre ja di bianba ie arato.

⁸ Angwane Ngöbö ngämi kä ne dätäre, känenkri ni Kordero kwrere nämane mikani biare kämikadre ni mdaye ni jökrä kräke. Ye abko, nire nire ñakare jen niarakwe abko kä tä tikani ñakare tärä ni nünandi kärekäre mikakrä gare yebtä, ni ye abko käkwe ni jändrän kri krübäte kwrere mikadi ütiäte jae Ngöbö kwrere.

⁹ Nire nire olo tärä abko käkwe olo ketate kukwe neye:

¹⁰ Nire nire järkadre ngite tödekabtä Jesubti,
ye erere jänän ngite.

Nire nire kämikadre ngitrabti tödekabtä Jesubti,
ye erere kämikadi ngitrabti.

Kukwe rakadikä kore angwane, juta deme Ngöbökwie käkwe nünandrekä dite jabtä bätärekä ja täritäri amne Jesu rükandrete ñakare kwetre, akwa tödekadre kwatibe Jesubti janknu.

Ni jändrän kri krübäte kwrere mda jatani dobote käin

¹¹ Yebti ni mdara jire jataba dobote käin, akwa niara abko ni jändrän krübäte kwrere jataba, rababa tuen tie. Ni ye abko krotu krou ie abko rababa tuen kordero krotu kwrere tie, akwa ñan ñäkäba jäme kordero kwrere kwe, akwa rababa ñäke mökata kwrere.

¹² Amne ni jändrän kri krübäte káne ye di rababa jökrä kwe, kä rababa sribire ni káne ye diäre. Ni jändrän kri krübäte káne abko träin kri dokwä kwatibtä abko kisete gatadre akwa namaninta quinta ie, ye kräke ni mda ye rababa sribire, kä rababa ni káne ye mikamna ütiäte Ngöbö kwrere ni jökrä kä nebtäye.

¹³ Erere arato, ni ye rababa sribi kri ñan tuabare nuene, kä rababa ñukwä kä käinbti mike kite timonkwäre ni mda mda okwäbti, niara di kri Ngöbö kwrere abko ni jökrä käkwe nütüdre, abkokäre sribi kri ñan tuabare nuenbare kore kwe ni ngökakäre.

¹⁴ Angwane ni jändrän kri krübäte kwrere näma káne, ye mikakäre ütiäte, ni mda ye rababa sribi kri ñan tuabare nuene. Yebtä abko ni kwati ngökaba kwe. Erere arato, ni jändrän kri krübäte kwrere abko dokwä kwati tikaninkä ngitrabti kämikakäre, akwa träin namaninta quinta ie amne namani nüne janknu, ye bä sribemna kwe mikakäre ütiäte Ngöbö kwrere, ye erere ni jökrä käkwe sribebare.

¹⁵ Angwane ni jändrän krübäte kwrere nibukäre, ie ja di bianba bä ye mikakrä nire abko erere nuenba kwe. Amne nire nire käkwe ñan ni káne ye bä mikadre ütiäte jae Ngöbö kwrere abko kämikadre kwe abko jändrän bä näma niere.

¹⁶ Mdakäre abko, ni ngwarbe amne ni ütiäte, ni ngwian bkänkä krikri amne ni bobre bobre, ni klabore ñakare amne ni klabore abko btä ni jändrän kri krübäte kwrere näma káne ye kä tikadre ni kise ruenkri btä o ni okobtä abko ni mda ye käkwe nieba abko erere mikani nuene.

¹⁷ Akwa nire nire btä ni jändrän kri krübäte kwrere näma káne ye kä näma tikani ñakare, ni ye ñan rabadre jändrän rürümoine amne jändrän kökö jae. Ni käi ye abko ni jändrän kri krübäte kä o niara kä tikani kö okwä jändrän tankräbti.

¹⁸ Amne kö okwä jändrän tankrä, bti ni jändrän kri krübäte kwrere käita tikani, ye abko nire nire töbtä aibe ie ni ye raba nüke gare. Kö okwä jändrän tankrä yebti, aisete ni ye abko kä tikata kö okwä jändrän tankräbti abko 666.

14

Ni 144,000 abko Ngöbö kwe mikani jenena jakrä

¹ Yebti ni Kordero kwrere näma nünaninkä ngitio Siónbti, btä ti okwä rababa angwane, ni ye ben abko ni mda näma 144,000. Angwane nitre okobtä Kordero ye kä näma tikani amne Kordero rün kä näma tikani arato niaratre näma nitre ye bkäne bä mikakrä abko rababa tuen tie.

² Yebti ñö ngöta nebe kri, ye kwrere jire kä ngö rababa ruen kä käinbti tie. Erere arato, unsuni ngöta nebe krikri ja dibti, ye kwrere kä ngö rababa ruen tie. Mdakäre abko, ni kwati rababa arpa kabre täke gwaire jökrä abko kwrere jire kä ngö rababa ruen tie.

³ Angwane kürä gobrankrä Ngöbö kwe ye ngwäre kwi nitre 144,000 rababa ka btin niere. Erere arato, jändrän kräkkä näma kürä bäre temen ye ngwäre kwi amne nitre unbre unbre ngwäre kwi ka btin ye nieba kwetre arato. Akwa ka btin, yebtä ni mda mda ñan rababa töi ngitiekä jire chi amne nitre 144,000 kökanintarita Ngöbö kwe jakrä, ye aibe ie ka btin ye rababa nüke gare.

⁴ Nitre ye abko, ni deme ja mike gure ñakare meribe, ye kwrere jire nitre ye käkwe ja ngibiabare deme, käkwe ngöbö ngwarbe ngwarbe mikani ütiäte ñakare jae. Ni Kordero kwrere näma niken mdente erere abko jiebti niaratre nämane niken. Erere arato, ni Kordero kwrere krütani krusobtä angwane, ni jökrä ngätäite niarakwe ni ye kökani Ngöbökrä, bti nura ngwä ötata káne, ye bianta ngwarbe Ngöböye kuin niekäre ie, ye kwrere niaratre nämane biani Ngöböye amne ni Kordero kwrereye kuin niekäre ietre.

⁵ Amne blitabare era metre kwetre Ngöbökrä amne ni mda ngökani ñakare jire chi kwetre, aisete ni mda mda ñan rababa kite ngise jire chi. Nitre ye mden abko ie ka btin rababa nüke gare.

⁶ Yebti tikwe angele mdara jire tuaba abko rababa nikenkä käinta sete. Angele ye abko näma Ngöbö kukwei kuin kärekäre ngwena niedre ni jökrä nünanka Ngöbö rüere kä temenbtä yeye. Ye mden kisete, ni kä jökräbti temen amne ni bätäkä ngwarbe amne ni kukwe bätäkä ngwarbe amne ni nünanka juta kwatirekwatire te abko kräke angele ye näma Ngöbö kukwei kuin ye ngwena,

⁷ kä rababa niere krörö ja dibti: Ngöbö jürä ngwian jabtä munkwe amne niara käikitaka munkwe, ñobtä ñan angwane niarakwe kukwe ükarete ni kräke mikakäre ja ngie nuen abko käi nura amne, Ngöbö kä käimbti btä kä tementa dätekä amne Ngöbö mren dätekä btä ñö dätekä, Ngöbö ye abko mika ütiäte munkwe abko angele ye rababa niere kore ti okwäbti.

⁸ Yebti angele jataba nibukäre mda abko käkwe juta Roma bä mikaba juta Babilonia kwrere, kä jataba niere krörö: Meri bti kä ngwarbe käta ni brare brare näkwite ja mikakäre ngite, ye kwrere jire nitre nünanka juta kri Babilonia käkwe ni kwati kä jökräbti temen

näkwitani, aiseite ni kwati tõi nikwitani jãme kãkwe ja mikani ngite ben Ngöbö rüere, akwa juta kri ye abko nikira ngwarbe jökrã, angele ye rababa niere.

⁹ Yehti angele jataba nimãkãre mda. Angele ye abko jataba ñãke ja dibti, kã jataba niere krörö: Ni jãndrãn kri krübãte kwrere arabe bã sribebare, ye nire nire kãkwe mikadre ütiãte ngöbö kwrere jae amne nire nire kãkwe ja tuadremetre ni ye kã tike ja okobtä o ja kisebtã,

¹⁰ nitre ye abko btã Ngöbö mãtä rabadi kri krübãte abko uba döi kwaka ñata kwrere jire rabadi krãke, ñobtä ñan angwane uba döi ngãtare kwaka ye kwrere jire Ngöbö mãtä nibi, aiseite nitre ye abko kãkwe ja tare nikadi kri krübãte ñukwã jutrate amne asufrete angele deme Ngöbökwẽ ngwãrekri amne ni Kordero kwrere ngwãrekri arato.

¹¹ Ne aiseite, nitre ni jãndrãn kri krübãte kwrere mikaka ütiãte jae amne ni ye arabe bã sribebare abko nire nire kãkwe kã tikani jãbtã abko kãkwe ja tare nikadi kãrekãre dibire rare, aiseite kã rabadi ñakare jadükakrã ietre.

¹² Ngöbökwẽ ni ye mikadre ja tare nike kore, kukwe nebtã abko juta deme Ngöbökwẽ tödekaka Jesubti, kãta Ngöbö kukwei mike tãte ye abko kãkwe ja die mikadre nüne dite Ngöbökrã.

¹³ Yehti ni kukwei jaraba mda kã kãinbti tie, kãkwe nieba krörö tie: Tãrã tike krörö: Mtare mentokwãre nire nire tödekaka ni Dãnkienbti tã krüte, ni yehtã kã rabadi nuãre amne Ngöbökwẽ ja di biandi ie.

Jãn, abko kore era metre nieta Ngöbö Üaikwe, ñobtä ñan angwane nitre ye kãkwe jadükadi, ñan sribidre mda kwe, amne sribibare kuin kwetre, ye abko Ngöbökwẽ ütiã biandi ietre abko tike kore tãrãbtã, nieba kwe tie.

Ni jökrã ükaninkrö kukwe ükatekãre krãke

¹⁴ Yehti tikwe nikraba mda angwane, müta ngwen büre, btã ti okwã rababa. Angwane müta yehti abko ni iti Ni Kã Nebtä Ngobo kwrere rababa tuen tãkãnintbe tie. Angwane korona orore nõma dokwãbti amne ngitra tãnene tu grine ngwian nõma kisetẽ kwe.

¹⁵ Ye btãrãbe ju blitakrã Ngöböbe kã kãinbti te angele nõma abko jataba ju bãre kãkwe ñãkãba ja dibti ni nõma tãkãnintbe mütabti yeye, kãkwe nieba krörö ie: Ni kã jökrãbti abko nura ngwã nena tain jökrã kwrere, aiseite nura ngwã öta kãi nõra, aiseite ngitra tãnene tã ma kisetẽ, yehti nura ye tikekã, bti makwe ngwã öta, erere makwe ni jökrã ükãkrö Ngöbökrã, nieba kwe ie.

¹⁶ Ye erere bkãnä, ni nõma tãkãnintbe mütabti kãkwe ni jökrã ükaninkrö Ngöbökrã ye bã mikãkãre, ni ye kãkwe ngitra mnianteba nura tikakakrã kã temen nebtã amne, ni jökrã ükãkröba kwe kã nebtã.

¹⁷ Abti angele mdara jire nõma Ngöbö ngwãrekri ju blitakrã Ngöböbe te kã kãinbti, angele ye abko nõma ngitra tãnene tu grine ngwena kisetẽ arato.

¹⁸ Angwane ñukwã grã kri ngwãri mnü rã bãne kukwakrã Ngöböye, ye kãnti angele mdara jire nõma. Angele ye abko di nõma ñukwã jutrabti. Angele ye abko kãkwe ñãkãba ja dibti angele ngitra tãnene ngwianka kisetẽ yeye angwane, ni jökrã nõnanka Ngöbö rüere bã mikãba uba kwrere kwe, kãkwe nieba krörö ie: Uba nena tain btã amne kã uba ngwã ötakrã nõra, aiseite ngitra ye mniente kã temenbtã amne, makwe uba ngwã öta küdekrã ngöi ngöi, nieba kwe.

¹⁹ Ye erere bkãnä, angele ye kãkwe ngitra tãnene tu grine ye mnianteba kã temen nebtã angwane, uba ngwã tikakãba jökrã kwe uba kökrãibtã. Yehti jãndrãn kri uba tükakakrã, te uba kitaba jökrã kwe tükakakrã. Uba tükarekã ngotobti, ne abko Ngöbö mãtä kri nitre nõnanka niara rüere btã bã mikata, erere niarakwe gadite jökrã abko bã mikata kore.

²⁰ Mdakãre abko, jãndrãn mdara jire tuaba tikwe abko bã rababa tuen mren bidriore kwrere abko nõma mritani ñukwã jutrate ketetibe rababa tuen tie. Mren bidriore ye kãnti abko nitre nõma nõnaninkã arpa ketaninte kisetekisetẽ rababa tuen tie. Ni jãndrãn kri krübãte kwrere amne bã dãtebare, ye nire nire kãkwe mikani ñakare ütiãte ngöböre jae kãkwe ganainbare kwãrãbe amne niara kã tikani ñakare kwetre jãbtã amne kö okwã jãndrãn

15

Angele ni kükü jãndrãn taretare ngwianka ni rüere

¹ Yehti jãndrãn mda krikri rakadrekã abko bã rababa kã kãinbti abko btã ti ñan tõi rababa krütare mda abko krörö: Ngöbö mãtä kri ye abko rabadre bare tãte jökrã nitre nõnanka niara rüere btã abko angele ni kükü nõma nõin jãndrãn taretare keta kükü mrã ngwena kisetẽ, ni nõnanka Ngöbö rüere mikãkãre ja tare nike kri abko rababa tuen tie.

² Mdakãre abko, jãndrãn mdara jire tuaba tikwe abko bã rababa tuen mren bidriore kwrere abko nõma mritani ñukwã jutrate ketetibe rababa tuen tie. Mren bidriore ye kãnti abko nitre nõma nõnaninkã arpa ketaninte kisetekisetẽ rababa tuen tie. Ni jãndrãn kri krübãte kwrere amne bã dãtebare, ye nire nire kãkwe mikani ñakare ütiãte ngöböre jae kãkwe ganainbare kwãrãbe amne niara kã tikani ñakare kwetre jãbtã amne kö okwã jãndrãn

tankrä ni yekwe abko mikani ñakare kwetre jabtä, ye mden ie Ngöböke arpa biani abko nāma kisete tākākrä Ngöbö käikitakakäre.

³ Moisés, sribikā Ngöböke kākwe Faraón ganainbare angwane, ka niebare kwe Ngöbö käikitakakäre, ka ye kwrere niaratre nāma niere amne ni Kordero kākwe ka niebare, ye kwrere abko niaratre nāma niere abko krörö:

Ni Dänkien Ngöbö Di Kri Jändrän Jökrä Nuenkrä, makwe jändrän krikri krübäte nuenbare, ye abko bä nuäre jökrä.

Amne ma abko tä gobrane kärekäre.

Ma abko era metre amne ji makwe abko kuin metre jökrä.

⁴ Ni jökrä kākwe ma jürä ngwiandre ni Dänkien.

Erere arato, ni jökrä kākwe ma mikadi ütiäte jae ni Dänkien, ñobtä ñan angwane ma aibe kuin deme amne metre.

Erere arato, ni jökrä jatadi, kākwe ma käikitadikā, ñobtä ñan angwane mata kukwe ükete era metre ni jökrä kräke abko nena gare aisete,

abko nitre ye rababa ka niere kore.

⁵ Yehti tikwe nikrabata angwane, ju blitakrä Ngöböbe nuäre ngwiandre nāma kä käinbti abko jukwei gitiaba, rababa tuen tie amne, ju yete abko kukwe keta jätä biani nuendre nie Ngöböke abko nāma ükani.

⁶ Angwane ju blitakrä Ngöböbe ye te angele ni kükü nāma abko jataba ju bäre. Angeletre ye abko nāma kukwe taretare krübäte nuendre keta kükü Ngöböke abko ngwian nāma kisete kwetre. Angeletre ye abko nāma dän merebe trä ngitiekä kädekata lino kitani jabtä te nāma nāin amne koria orore nāma kitani ja kötābti ta kwetre abko jataba tie.

⁷ Angwane jändrän kräbkä nāma Ngöbö bäre temen, jändrän ye kratī abko kākwe blato orore te Ngöbö mätä kri nitre nünanka niara rüere btä nāma mikani abko bianba kwe angele itire itire ie. Ngöbö ye mden tä nüne kärekäre.

⁸ Angwane ju blitakrä Ngöböbe nuäre ngwiandre abko te Ngöbö di kri bä rababa abko ngübü aibe rababa gwita temen amne, kukwe tare kri krübäte ngwian nāma angele ni kükükwe ye ngāmi niken ta, känenkri ni ñan raba neme jire gwi ju yete, rababa tuen tie.

16

Blato kwä kükü te Ngöbö mätä kri nāma mikani

¹ Abti ju blitakrä Ngöböbe te ni kukwei rababa ruen kri ja dibti tie, kä rababa niere angele ni küküye: Ngöbö mätä kri tä mikani blato kwä küküte, ye mun nān iente kä temenbtä amne ni nünanka kä temenbtä sebti, nieba kore angeletreye.

² Ye kwrere bkänä, angele rikaba iti käne kākwe Ngöbö mätä kri nāma blatote ye ianteba kä temen yehti angwane, ni jökrä, btä ni jändrän kri krübäte kwrere ye kä nāma tikani amne, ni jändrän kri krübäte kwrere abko bä sribebare, ye nire nire nāma mike ütiäte ngöböre jae, nitre ye abko kwata rababa ngütüete käme jökrä ietre abko bä rababa käme amne rababa tare krübäte ietre.

³ Yehti angele nibukäre kākwe Ngöbö mätä kri nāma blatote ye ianteba mrenbti angwane, ñö mrente ye rikwitaba därire jökrä. Däri ye abko rikrakaba ribi ribi bäsi ni kämikata angwane, ni därīe tä nikrenkä ye kwrere jire mren ñöi rababa, aisete jändrän nünanka mrente mrente ye gataba jire jökrä.

⁴ Angele nimäkäre kākwe Ngöbö mätä kri nāma blatote ye ianteba ñö krikribti amne ñö okwä kiakiabti. Angwane ñö amne ñö okwä ye rikwitaba därire jökrä arato.

⁵ Angwane angele mdara jire abko ñö ngibiabtikä kukwei jaraba tie, kākwe nieba Ngöböye:

Ngöbö Deme, ma nāmanena kira kena amne ma tä käre mtare.

Mata ni mike ja tare nike kore, se abko mata nuene kuin era metre,

⁶ ñobtä ñan angwane nitre nünanka ma rüere kākwe juta deme makwe kämikani angwane, niaratre därīe ianinte kabre kä temen nebtä.

Erere arato, nitre ma kukwei niekä därīe ianinte kwetre.

Ye mden ütiäre abko mata däri bien ñadre ietre mtare.

Niaratre kākwe kukwe nuenbare kore, ye mden ütiäre mata nuene kore btätre arato ye.

Abko kore se,

nieba angelekwē Ngöböye.

⁷ Yehti ñukwä grä kanti abko ni kukwei jaraba mda tie, kākwe nieba Ngöböye: Ni Dänkien Ngöbö Di Kri Jändrän Jökrä Nuenkrä, ma abko tä kukwe ükete kuin era metre nitre nünanka ma rüere kräke, rababa niere kore Ngöböye.

⁸ Angwane angele nibkäkäre kākwe Ngöbö mätä kri nāma blatote ye ianteba ñänānbtī angwane, ñänān ye ie ja di bianba ni kukwakrä ñukwä kwrere.

⁹ Angwane ñanänkwe ni jökrä kwata kukwaba tare krübäte angwane, Ngöbö kukwe taretare kri juanka, ye rüere rababa ñäke kämekäme jirekäbe mda, akwa kukwe kämekäme kitaba ñakare temen kwetre amne Ngöbö mikaba ütiäte ñakare jire chi kwetre jae.

¹⁰ Yebti angele nirikekäre käkwe Ngöbö mätä kri näma blatote ye ianteba ni jändrän kri krübäte kwrere näma gobrane yebti. Angwane kä gobrankrä kwe, ye kanti kä rababa iko jökrä. Ye ngwane kukwe taretare nakaninkära nibtä, abtä ni jökrä rababa ja tare nike kri, kä rababa ja tüdrä kwete be tute ja tare nikabtä.

¹¹ Akwa niaratre nämane ja mike ngite ño ño Ngöbö rüere abko kitaba ñakare temen kwetre amne jirekäbe rababa ngütüete jökrä ngrabare, kisete rababa ja tare nike kri krübäte, abtä rababa ñäke kämekäme Ngöbö kä känbti se rüere.

¹² Yebti angele ni tikäre käkwe Ngöbö mätä kri näma blatote ye ianteba ñö kri Eufratebti angwane, nitre gobranka btä rükä kwekwe kä driri jatani abko rikadre kä nötabti ta, abkokäre ñö kri Eufrates ye grötaba jökrä.

¹³ Yebti tikwe jändrän tuaba krörö mda: Mökata kadate, ni jändrän kri krübäte kwrere kadate amne ni ngöbö ngwarbe kukwei niekä abko kadatekadate üai käme gwre kwrerekwrere jataba komä mentokwäre ti okwäbti.

¹⁴ Angwane üai käme komä bä rababa gwre kwrere ye rababa sribi kri ñan tuabare nuene abko rikaba nitre gobranka krikri kä jökräbti temen ükekrö rükäre Ngöbö Di Kri Jändrän Jökrä Nuenkrä ye rüere. Ye näire Ngöbökwäre rüe ganaindi kwäräbe.

¹⁵ Angwane ni Dänkien abko käkwe nieba: Ni gokä tä kite batibe, ye kwrere ti jatadita, aisete munkwe mokre jabti amne nire nire tädi mokrere jabti käkwe ja ngibiadre kukwe kämekäme Ngöbö rüere ye ngäniene angwane, ñan tädre dikekä ni bütiere kwrere, abkokäre tä dän ngibiare kuin jökrä jabtä amne bütiokrä gaidre kri kräke abko ñan tuadre ie, abkokäre tä dän ngibiare kuin jakrä, ye abko tädre ja ngibiare kukwe kämekäme Ngöbö rüere ngäniene. Ni ye abko btä kä rabadi nuäre amne Ngöbökwäre ja di biandi ie. Abko kore se, nieba ni Dänkienkwe.

¹⁶ Yebti üai käme nimä ye käkwe nitre gobranka krikri ükäröba jökrä kä kädianta Ar-magedón hebreore ye kanti rükäre Ngöbö rüere.

¹⁷ Angwane angele ni kükükäre käkwe Ngöbö mätä kri näma blatote ye ianteba mürete kainta. Ye btäräbe ju blitakrä Ngöböbe, kanti Ngöbö nämane täkänintbe kürä gobrankräbti, ye kanti ni kukwei rababa kri, kä rababa niere krörö: ¡jändrän jökrä nibira bare täte jökrä! ni kukwei rababa niere.

¹⁸ Angwane mera rababa trä ngitiekä, kä ngö rababa, unsuni ngö rababa krikri krübäte amne dobo jataba nakaenkä abko rababa dobo mike grükekä jökrä, ye abko ni nükani nüne kä nebtä angwane dobo ñan rakakabare kri krübäte abko erere dobo rakakaba.

¹⁹ Dobo rakakaba kri krübäte ye abko käkwe juta kri Babilonia* ñäkänintbe ketamä temen amne ju krikri juta mda mdate rikaba jökrä temen. Angwane Ngöbö mätä kri bä mikata uba döi kwaka kwrere jire, bti juta Babilonia mikadre ja ngie nuen kwe ye abko rükabata töre ie.

²⁰ Angwane kä butu mrente amne kä ngitiore krikri mentokwäre abko rikaba ngwarbe jökrä amne rababa tuen ñakare mda amne,

²¹ ñü jä kukwän kwrere kä känbti rababa näkäen temen nibti. Ñü järe ye abko däbä kilo gre ketebu näre abko rababa näkäen temen. Ngöbö rababa ni mike ja tare nike kri krübäte kore, yebtä abko ni jökrä rababa ñäke kämekäme Ngöbö rüere.

17

Meri täkänintbe jändrän krübäte yebti

¹ Abti angele ni kükü kisete Ngöbö mätä kri näma blatote abko ianteba kwetre, angele ye abko iti jataba käkwe nieba krörö tie:

Meri bti kä ngwarbe kri krübäte abko tä täkänintbe ñö bätäkä ngwarbe bti, se mikadi ja ngie nuen ño Ngöbökwäre abko ti bike mike tuare mae, aisete jakwe tuen, nieba kwe tie.

² Angwane nitre jreire kä jökräbti temen käkwe kä kwita kwitaba jabti meri ye ben gwaire. Erere arato, nita nebe dröbare angwane, käta nebe nenkä ni dokwäbti, ye kwrere jire nitre nünanka kä nebtä dokwäbti kä rababa nenkä, aisete kä rababa ngwarbe bti meri ye kwrere amne kukwe diän diän nämane nuene.

³ Yebti Ngöbö Üai rükaba täte jökrä tißtä angwane, angele ye rikaba ti ngwena kä kaibete mda. Ye kanti tikwe meri tuaba iti amne, ni jändrän kri krübäte kwrere bä tain, bti meri ye näma täkänintbe. Ni jändrän kri krübäte kwrere töi näma jökrä Ngöbö rüere, aisete kwatabtä kukwe kämekäme taretare näma tikani Ngöbö rüere. Mdakäre abko, ni jändrän kri krübäte kwrere dokwä kwä kükü amne krotu krä jätä ie abko bti meri ye näma.

* 16:19 Juta Babilonia käta juta Roma bä mike nütüta.

⁴ Meri tuaba tikwe ye abko btä dän ütiäte kri bä mikibare nâma amne dän nâma btä. Erere arato, meri ye kâkwe ja dâtebare kuin jândrän ororebti, jä tuâretuäre bti amne perlâbti. Meri ye kisete abko baso orore nâma arato. Baso yete abko jândrän kâmekâme Ngöbö rüere btä ni mätä kri Ngöbö rüere amne jândrän ngwarbe kâme nuen nâma niarakwe kâ mikakrä ngwarbe jâbti abko nâma basote kwe. Ye abko meri nâma töbîke kore amne nâma nüne kore Ngöbö rüere abko bä mikata baso yebtä.

⁵ Amne meri ye kâ nâma tikani krörö okobtä:

MERI NE ABKO NIRE ABKO TÄ ÜKANI TIEBE.

MERI NE ABKO TÄ JUTA KRI BABILONIA BÄ MIKE.

MERI JÖKRÄ, BTI KÄ NGWARBE ABKO NIARA KWRERE, AISETE DÄREBARE NIARAKRI.

AMNE KUKWE KÂME DIÂN DIÂN NGÖBÖ RÜERE JATANI NIARAKRI,

abko nâma tikani kore meri ye okobtä.

⁶ Yebti kâta neme nuäre nibtä dröba kisete, ye kwrere meri yebtä kâ nâma nuäre juta deme Ngöbökwê ye dârie kisete, ñobtä ñan angwane niarakwe nitre tödekaka Jesubti kâmikani blitabtä Jesukrä, ye kâi ngwian nâma nuäre kwe jâbtä abko kisete nâma ni dröbare kwrere tikwe gaba mda.

Angwane meri tuaba tikwe, yebtä ti töi ñan rababa krütare.

⁷ Abtä angele ye kâkwe nieba krörö tie:

¿Ye ñobtä abko ma ñan töi nebe krütare meri se tuare ye? Meri se tä kukwe ño bä mike abko tä kaibe tiebe abko ti bîke niere mae. Ni jândrän kri krübâte kwrere dokwä kwä kükü ie amne krotu krä jätä ie kâta meri se ngwena abko kâta dre bä mike abko ti bîke niere mae abko krörö:

⁸ Ni jândrän kri krübâte kwrere turi makwe, ye abko nâmane nüne kira, akwa mtare tä nüne ñakare mda, akwa jândrän ye abko juan ngâmi ngwarbe Ngöbökwê, kânenkri nâmane Kâ Timonbti abko jatadita kâ temen nebtä angwane, Ngöbökwê juandi ngwarbe. Angwane Ngöbökwê ni dâtebare kira kena, ye ngwane mentokwäre tarä ni nünanka kârekäre Ngöböbe mikakrä gare, yebtä nire nire kâita tikani ñakare abko kâkwe ni jândrän kri krübâte kwrere ye tuadi angwane, niaratre ñan töi rabadi krütare ni jândrän kri krübâte kwrere yebtä, ñobtä ñan angwane niara nâmane nüne kira akwa mtare tä nüne ñakare, akwa jatadita bobuta aisete.

⁹ Mdakäre abko, kukwe ne ti bikera niere mae abko ni töbtä ie rükadre gare abko krörö: Ni jândrän kri krübâte dokwä kwä kükü, ye abko ngitio kwä kükü, bti merita takânintbe abko bä mikata. Erere arato, jândrän dokwä kwä kükü ye abko tä jrei ni kükü bä mike.

¹⁰ Akwa jrei ni kükü ye ngätäite abko jrei nîrike kâkwe gobranbarera, bti nikanina ngwarbe amne tä gobrane ñakare mda. Jrei iti abko gwängware tä gobrane amne, iti mda abko ngâmi nûke gobrane, akwa rükadi angwane ñan gobrandre raire kwe.

¹¹ Angwane ni jândrän kri krübâte kwrere nâmane nüne kira akwa mtare tä nüne ñakare mda, ye abko jrei ni kwäkäre abko bä mikata. Jrei ye abko kâkwe sribidi ja kwrere jrei ni kükü yebe, akwa mrä Ngöbökwê juandi ngwarbe.

¹² Angwane krotu krä jätä turi makwe ye abko jrei ni jätä ngâmi nûke gobrane, akwa niaratre rükadi gobrane angwane, kâ biandi ñanä okwä kratibe ietre gobrankrä ni jândrän kri krübâte kwrere ye ben gwaire.

¹³ Jrei ni jätä ye abko töi ja kwrere jökrä, aisete ni jândrän kri krübâte kwrere ye ie ja di biandi kwetre, aisete ni jândrän kri krübâte tö dreye, erere nuendi kwetre kräke.

¹⁴ Angwane niaratre kâkwe rüdi ni Kordero kwrere ye rüere, akwa ni Kordero kwrere ye kâkwe ganaindi kwäräbe, nitre käräbare Ngöbökwê dianinkä jakrä tä nüne janknu Jesukrä ye ben gwaire. Ni Kordero kwrere kâkwe ganaindi, ñobtä ñan angwane ni Kordero kwrere ye abko tä nitre dänkien krikri dänkiene amne tä gobrane nitre gobranka krikri bti arato aisete.

¹⁵ Mdakäre abko, ñö bti meri bti kâ ngwarbe tä takânintbe turi makwe, ye abko ni jökrä amne ni kukwe bätäkä ngwarbe blitaka amne ni kâ jökräbti temen abko turi ñö kwrere makwe.

¹⁶ Angwane krotu krä jätä turi makwe amne ni jândrän kri krübâte kwrere turi makwe ye abko mätä rabai kri meri bti kâ ngwarbe yebtä angwane, meri juandi ngwarbe amne meri mikadite kaibe bütiere kwe. Erere arato, meri ye ngätä kwetadi jökrä kwetere amne kroko kiakia abko kukwadi jökrä ñukwäte kwetere.

¹⁷ Dre nuendre, ie Ngöbö tö namani, erere mikani kwe niaratre töite, aisete niaratre töi rabadi ja näre, kâkwe ja di gobrankrä ye biandi ni jândrän kri krübâte kwrere yeye abti Ngöbökwê dre niebare, ye erere rabadi bare täte jökrä.

¹⁸ Mdakäre abko, meri bti kâ ngwarbe turi makwe ye abko nitre nünanka juta kri tä gobrane jrei jökräbti abko turi kore makwe ye, nieba angelekwê tie.

18

Ngöbökwé juta Babilonia juani ngwarbe

¹ Yebti angele mda nämä kä käinbti jataba timonkwäre ti okwäbti. Angele ye abko bäri di kri abko jataba angwane, trä gitiaba ngwen jökrä kä nebtä,

² käkwe ñäkäba ja dibti krörö:

¡Juta kri Babilonia nikira ngwarbe!

Üai käme bätäkä ngwarbe, kräke kä nebe nete amne, nukwä bätäkä ngwarbe, ñakare dbe Ngöbö ngwärecri aibe nebe ja juda mike nete.

Erere arato, jändrän ngwarbe ngwarbe, btä ni mätä aibe kräke kä nebe nete.

³ Ngöbökwé juta ye juandi ngwarbe kore, ñobtä ñan angwane ni dröbare uba döi kwaka kisete tä ja mike ngite meri bti kä ngwarbe ben,

ye kwrere ni kä jökräbti temen namani ja mike ngite nitre nünanka juta yebe.

Angwane meri bti kä ngwarbe ben ja mika ngite,

kwrere jire jrei kä jökräbti temen käkwe ja mikani ngite.

Erere arato, nitre jändrän rürümoinkä abko namani jändrän bkäne kabre jändrän bäri kuinkuin kwetre ye rürümoinbtä ütiäte ütiäte, niebare angelekwé.

⁴ Yebti ni mdara jire kukwei jaraba kä käinbti tie, käkwe nieba krörö:

Mun jen tikwe abko käkwe ñan ja mikadre ngite siba nitre nünanka juta nete kwrere angwane, ja tare nika jatadre kri niaratre rüere arato, ye ngwane munkwe ñan ja tare nikadre arato, abkokäre mun jen tikwe ye nän mento juta ne bäre,

⁵ ñobtä ñan angwane kukwe käme nuenbare kwetre ye nena kabre Ngöbö ngwärecri kä käinbti angwane, kukwe kämekäme nuenta kwetre, ye abko känikwitekä ñakare Ngöböbti, aisete Ngöbökwé mikadi ja tare nike jötrö.

⁶ Niara käkwe dre nuenbare ni mda rüere, ye kwrere nuen niara rüere arato.

Niara käkwe dre nuenbare, yebti ta jändrän nuen bobu btä kukwe käme nuen dokwäre.

Erere arato, niarakwe ni mda mikani ja tare nike krübäte, ye abko ni bukata uba döi kwakate kwrere, yebti ta uba döi bäri kwaka bobu mda abko bian ie abko erere makwe mika ja tare nike bobu bti ta.

⁷ Mdakäre abko, niara namani bike kri amne kä namani bäri nuäre kri btä nüne bäri kuin, ye kwrere arato makwe nika janknu amne makwe mika ja tare nike kri.

Meri se tä bike kri, käta töbike krörö:

Ñan meri kän kwäräi krütani, kwrere tita nete amne ñan tita ja tare nike, akwa tita tākänintbe kuin nete jreina kwrere, tä nütüre jabtä.

⁸ Ye mdenbtä abko köbötira jire ja tare nika jatadi kri kräke abko krörö:

Ni rabadi krüte kwati krübäte amne

ni kwati rabadi müen jiebtü amne

ni kwati rabadi mrö nike amne kukwadi ñukwäte arato,

ñobtä ñan angwane Ngöbö ni Dänkien di kri käkwe mikadi ja ngie nuen bikabtä kri kore, aisete rakadikä kore btä.

⁹ Angwane meri bti kä ngwarbe, ben ja mikata ngite bati bati, ye kwrere jire ja mikani ngite. Jrei kä jökräbti temen käkwe ja mikani ngite amne ja mikani nuäre kwetre ben, ye abko juta rabadi nukwe amne ngübü rabadi tuen neen kukwäne ietre angwane, rabadi müaire, kä rabadi ngrente krikri be jiebtü.

¹⁰ Akwa nane mikadre ja ngie nuen arato, abtä kä jürä rabadi jrei kä jökräbti temen btätre, aisete rabadi nünaninkä mobe temen, käkwe niedi krörö:

¡Aingwaree, juta kri Babilonia juta di kri abko bobre jakän!

Ye ñobtä amarebti batibe mata ja ngie nuen jötrö dikaro ye, niedi jreikwe.

¹¹ Mdakäre abko, nitre jändrän rürümoinkä käkwe juta ye müaidi amne rabadi ngrente krikri be arato, ñobtä ñan angwane ni ñan rabadre mda jändrän kökaka ietre aisete.

¹² Nitre ye abko nämane oro, plata, jä ütiäte ütiäte amne jändrän jä kwrere kädekata perla rürümoiné. Erere arato, dän ütiäte kri kädekata lino amne dän sedare amne dän bä tain drüne amne dän tain rürümoin nämane kwetre nitre nünanka juta yete yeye. Erere arato, kri rä bäne bäne amne marfil sribebare jändräné amne kri kuinkuin sribebare jändrän ütiäte kwrere, bronse amne jiero sribebare jändräné amne jä kuin ütiäte kri kädekata mármol abko rürümoin nämane kwetre ietre.

¹³ Erere arato, canela amne jändrän rä bäne bäne mikadre ja dokwäte amne kri ngwäri rä bäne kukwadre kädekata incienso amne ñö rä bäne bäne amne kri ngwäri rä bäne kädekata mirra abko rürümoin nämane nitre nünanka juta yete yeye. Erere arato, uba döi, kri olibo köi amne arina kuinkuin, trigo amne nbi, obeja, mdä, kareta jakädre mdäye amne ni klabore, ni

ye abko ni ütiäte Ngöbökrä, akwa rürümoin nämane jändrän mda mda kwrere nitre jändrän rürümoinkäwe.

¹⁴ Ni ye käkwe niedi krörö juta yebtä: ¡Kri ngwäkä kuin amne jändrän jökrä mda mda nämane nebe bänänte mun kadate, ye abko ñakare mda makwe! ¡jändrän kabre makwe, bti mata nüne bä nuäre, ye abko nikanina ngwarbe jökrä makän! niedi kwetre.

¹⁵ Nitre jändrän rürümoinkä nämane jändrän rürümoinke juta yete abko köböire namani jändrän bkäne kabre, niaratre ye abko btä kä jürä rabadi, aisetse rabadi nünaninkä mobe temen, kä rabadi müen amne rabadi ngrente krikri be juta ye jiebtä.

¹⁶ Angwane rabadi niere krörö:

¡Aingwaree juta kri, maobre jakän!

Dän ütiäte kri kädekata lino, ye ma nämane kite jabtä.

Erere arato, dän bä mikibare amne dän bä tain drüne, bti ma nämane ja dätere.

Erere arato, oro amne jä tuäre mda mda ütiäte ütiäte amne perla, bti ma nämane ja dätere.

¹⁷ Angwane batibe jändrän kabre ye nikira ngwarbe jötrö makän,

abko rabadi niere.

Mdakäre abko, nitre ru ngwianka amne nitre nänkä rute mrenbti amne ni mda mda ru ngwianka mrenbti abko rabadi mobe temen juta mike ñäre arato.

¹⁸ Angwane juta ye rabadi nukwe abko ngübü jatadi ietre, abtä rabadi ngrente krörö: Juta ütiäte kri ne kwrere tua ñakare jire abko rabadi niere.

¹⁹ Rabadi ulire abko bä mikakrä niaratre käkwe dobro mnü kitadi ja dokwäbti amne rabadi müen amne ngrente krikri be, kä rabadi ñake ja dibti krörö:

¡Aingwaree juta kri, maobre jakän!

Nitre nünanka ma kanti abko jändrän bkäne kabre, ye köböire nun ru ngwianka mrenbti namani jändrän bkäne kabre arato,

akwa batibe Ngöbökrä ma junina ngwarbe jökrä,

rabadi niere.

²⁰ Yebti angele ye abko käkwe nieba mda:

Juta niki ngwarbe se abko kä ngwen nuäre jabtä munkwe kä käinbti yete.

Amne mun juta deme Ngöbökrä ye käkwe kä ngwian nuäre jabtä.

Erere arato, mun kukwe kuin Jesubtä ngwianka amne mun Ngöbö kukwei niekä ye käkwe kä ngwian nuäre jabtä,

ñobtä ñan angwane Ngöbökrä juta juni ngwarbe, ye abko mun dokwäre juni ngwarbe kwe, aisetse munkwe käi ngwian nuäre jabtä, nieba angelekrä.

²¹ Yebti angele dite kri käkwe jäkwata kri bäsi krü kri trigo ukwakrä kwrere jire dianba kisete, bti kitabä kwe mrente, käkwe nieba krörö:

Jäkwata kri kiti mrente, se kwrere makwe juta kri Babilonia juandi ngwarbe amne ni mda mda käkwe ñan ma tuadreta jire mda.

²² Mdakäre abko, arpa, tolero amne drü, ye abko ñan kukwei nuadi jire chi mda ma käite yete.

Erere arato, krü trigo ukwakrä ñan ngö nuadre jire chi mda yete.

²³ Erere arato, ñotra trä ñan tuadreta jire chi kwati yete amne, ni ja mikaka gure käi ngwianta nuäre jabtä yete,

ye kwrere käi ñan ngwianre nuäre jabtä mda yete, ñobtä ñan angwane nitre jändrän rürümoinkä yete abko namani jändrän bkäne kabre kabre abti namani dite dite.

Erere arato, nitre nünanka juta yete käkwe ni kä keta kabre te ngökani kwrasibti, abtä ja ngie nuadi kore kwe.

²⁴ Juta yete nitre Ngöbö kukwei niekä abko kämikani.

Erere arato, nitre deme Ngöbökrä kämikani amne ni kä jökräbti temen tödekaka Ngöbökti abko kämikani juta yete, aisetse Ngöbökrä mikadi ja ngie nuen kore,

nieba angelekrä juta Babiloniabtä.

19

Aleluya niebare kä käinbti Ngöbökrä

¹ Yebti ni kwati kukwei rababa ruen ja dibti tie, kä rababa niere krörö kä käinbti:

¡Aleluya! Ngöbö nikwe aibe ni diantarikä, aibe ütiäte kri amne di kri.

² Ye ñobtä ñan angwane meri bti kä ngwarbe tä ni brare näkwite,

ye kwrere jire juta ne nämane ni kwati näkwite kukwe kämekäme jiebtä kä jökräbti temen abko kräke Ngöbö tä kukwe ükete kuin era metre.

Amne nitre deme Ngöbökrä kämikani nitre nünanka juta yetekwe, ye dokwäre abko Ngöbökrä mirira ja ngie nuen krübäte.

³ Yebti nieba krörö mda kwetre:

¡Aleluya! Juta ne ngübue rabadi kärekäre kukwäne, ñobtä ñan angwane rabadi nukwe kärekäre aiseté.

⁴ Angwane nitre unbre unbre ni gre bti nibkä amne jändrän kräbkä nämáne nüne ye rababa ja okokrä mike nebe dobobtä temen, käkwe Ngöbö nämá tákäninbe kürá gob-rankräbti ye mike ütiäte jae abko rababa niere krörö: ¡Amen! ¡Aleluya! rababa niere.

⁵ Ye btäräbe kürá gobrankrä Ngöbökwé kánti ni kukwei rababa, käkwe nieba krörö: ¡Ngöbö nikwe ye káikitekä munkwe!

¡Mun ütiäte kri amne mun bobre káta sribire Ngöbökrä, káta Ngöbö mike ütiäte jae, ye käkwe Ngöbö nikwe káikitakal rababa niere.

⁶ Yebti ni kwati kukwei rababa ruen tie bási ñöta neme betekä jákwatabtä timon ngöta neme kri, ye kwrere jire ni kukwei rababa ruen tie amne, bási unsuni ngö kri, ye kwrere ni kukwei rababa ruen tie, ká rababa niere:

¡Aleluya!

¡Ngöbö ni Dänkien Di Kri Jändrän Jökrä Nuenkrä kitera gobrane!
rababa niere.

⁷⁻⁸ Ni Kordero kwrere kitera ja mike gure amne meri bati abko käkwe ja dátenirira rabakäre ben abko ie dán kuin lino trá ngítiekä bini kitakrä jabtä ja mikakäre gure.

Ne aiseté ari ká ngwen nuäre jabtä amne ari ká ngwen juto jabtä amne ari niara káikitekä. Nitre deme jen Ngöbökwé käkwe sribi kuin era metre nuenbare Ngöbökrä.

Sribi kuin era metre, ye abko dán kuin lino abko bá mikata kore.

⁹ Yebti angelekwé nieba mda tie:

Kukwe tike krörö táräbtä: Ni Kordero kwrere käkwe ja miri gure, ye kánti nire nire tá núbabare, ye abko btä ká raba nuäre kri krübäte, nieba kwe tie.

Abti jötrö nieba krörö mda kwe:

Tikwe kukwe nini, ye abko Ngöbö Kukwei era metre, erere tikwe nini mae, nieba kwe tie.

¹⁰ Angwane ti rikaba ngítiekä ngukudokwäbti temen angele ye ngotobtä mikakäre ütiäte jae, akwa angele ye käkwe nieba tie:

Ma amne ma mräkä mda mda káta nünenká dite jabtä kukwe era metre Jesukwe btä, káta sribire Jesukrä, ye kwrere tita sribire arato, aiseté makwe Ngöbö aibe mika ütiäte jae, ñobtä ñan angwane nitre Ngöbö kukwei nieká era metre, ye mden abko námáne blite Jesubtä, nieba angelekwé tie.

Jesu jatani mdä bä ngwenbti

¹¹ Angwane ká káinbti gitiaba sete, rababa tuen tie amne mdä bä ngwen nämá kratí. Mdä yebti ni nämá nänin iti abko káidian nämá Ni Ja Kukwei Mikaka Täte amne Ni Era Metre. Niara nämá kukwe úkete metre ta ni jökrä kräke amne kukwe era metre dokwäre nämá rüre Ngöbö rüebe.

¹² Angwane niara okwä abko rababa tuen trá ngítiekä ñukwä jutra kwrere tie jändrän jökrä gare ie bá mikakrä amne, dokwäbti abko korona nämá kabre kabre, niara abko gobran kri bá mikakrä amne, niara ká nämá tikani mda ye abko niara aibe ie nämá gare kaibe.

¹³ Mdakäre abko, dán jükani däre jökrä nämá kitani jabtä kwe niara krütani ni di-antarikäre bá mikakrä amne, niara káidian nämá Ngöbö Kukwei arato.

¹⁴ Niara ye jiebti abko nitre rükä ká káinbti nämá nänin kwati krübäte abko dán ngwen lino nämá kitani jabtä. Dán lino ye abko ütiäte amne merebe amne, niaratre nämá nänin mdä ngwen ngwenbti.

¹⁵ Niara rababa ñäke angwane, bási ngitra tu grine jabtä kwäríkwári, ye kwrere jire kukwe rababa betekä kadate nitre ká jökräbti temen nünanka Ngöbö rüre kámikakäre. Erere arato, “mökän jierore ni kámikakäre, bti niarakwe gobrandi tare,” amne bási uba tükakata ngotobti amne ñöi aibe diankata, ye kwrere jire niarakwe rátädi Ngöbö rüebti, yebti abko Ngöbö Di Kri Jändrän Jökrä Nuenkrä, Ngöbö ye abko mätä kri krübäte abko bá mikata kore kwe.

¹⁶ Dänbtä ie amne uliebtä abko niara ká nämá tikani mda abko krörö: JREI BÄRI KRI JREI MDA MDA KRÄKE AMNE DÄNKIEN BÄRI KRI DÄNKIEN MDA MDA KRÄKE abko nämá tikani kore btä.

¹⁷ Yebti ti okwä rababa angelebtä angwane, angele ye rababa nünaninkä ñänänbti angwane, nukwä jökrä ngri kwetakakwetaka jüden kwrere tá nikenká káinta, ie angele ye rababa ñäke krikri ja dibti krörö mda: Ngöbö kite mrö sribere kri krübäte mun bukakrä, aiseté mun jakwe ja úkekrö jökrä mröre.

¹⁸ Angwane munkwe jrei ngrie kwetadre, munkwe nitre rükä dänkien ngrie kwetadre, munkwe nitre rükä baliente baliente ngrie kwetadre, munkwe mdä rükrä ngrie kwetadre, munkwe nitre nänkä mdäbti rübtä ngrie kwetadre. Erere arato, munkwe ni jökrä ngrie

kwetadre abko ni ñakare klabore, ni klabore, ni bobre amne ni ütiäte kri ngrie kwetadre munkwe, aiseite jakwe, nieba angeleklewe nukwäye.

¹⁹ Angwane ni jändrän kri krübäte kwrere ye käkwe rükä kwekwe amne jrei kä jökräbti mikabara biare rükäre ni nänkä mdä ngwenbti ye rüere amne rükä kwekwe rüere arato. Nikani rüre,

²⁰ akwa ni jändrän kri krübäte kwrere ye kaba ngite amne ni ngöbö ngwarbe ngwarbe kukwei niekä käkwe sribi kri ñan tuabare nuenbare abko kaba ngite arato. Ni ngöbö ngwarbe kukwei niekä käkwe sribi kri ñan tuabare nuenbare, yebti abko ni kwati ngökani kwe amne, nitre yebtä abko ni jändrän kri krübäte kwrere ye kä tikani. Erere arato, ni jändrän kri krübäte abko hä sribebare ngöbö ngwarbere abko mikani ütiäte kwetre, yebtä abko ni jändrän kri krübäte kwrere btä ni ngöbö ngwarbe kukwei niekä kaba ngite, ye abko ñukwä jutra ngitiekä asufrebe, ye te kitaba nire jökrä ja tare nikakäre.

²¹ Angwane ni mda mda nämane rüre Jesukristo rüere abko Jesukristo nämä näin mdäbti ye käkwe kämikaba jökrä ja kukwei aibebti, ñobtä ñan angwane niara kukwei abko rababa betekä ngitra tu kwrere, aiseite ni kämikaba jökrä kwe. Angwane nukwä ngri kwetakakwetaka jüden kwrere käkwe nitre ye ngrie kwetaba trinetrine jökrä.

20

Kä mili krati

¹ Yebti angele nämä iti kä käinbti, jataba timonkwäre ti okwäbti. Angele ye abko nämä näin llabe jukwe Kä Timonbti ngwena kisete amne kadena kri ngwian nämä kisete kwe arato.

² Angele ye abko käkwe mökata kaba ngite. Mökata ye abko tbi nämane kira, arabe abko kädianta Diablu amne Satana arato. Mökata ye abko angeleklewe mäkäteba kadenanbti kä mili krati,

³ käkwe kitaba ngite Kä Timonbti, bti jukwe dikaba kuin bti kwe, bti Ngöbö kä tikani jukwebtä, ni mdakwe ñan tikadre abkokäre. Niara ñan rikadreta nitre ngököta kä jökräbti temen, abkokäre kä mili krati ngämi niken ta niara ñan tikaditeta. Akwa yebti mökata ye tikaditeta hä jötrö.

⁴ Yebti kürä gobrankrä nämä kabre kä käinbti btä ti okwä rababa. Kürä yebti abko nitre ie ja di biani Ngöböklewe kukwe ükatekäre nikrä abko nämä täkäninbe, tikwe tuaba. Erere arato, nitre käkwe ja tare nikani blitabtä Jesubtä amne kukwe kuin Ngöböklewe Jesubtä mikabtä gare ni mda mdaye, akwa nünankabare dite jabtä kwetre, käkwe Jesu rükaninte ñakare abko dokwäre dokwä tikaninkä, ye abko üai nämä siba yete. Mdakere abko nitre ye käkwe ni jändrän kri krübäte kwrere ye mikani ñakare ngöböre jae amne niara hä mikani ñakare ütiäte jae ngöbö kwrere. Erere arato, nitre ye okobtä o kisebtä abko ni jändrän kri krübäte kwrere ye kä tikani ñakare abko üai tuaba tikwe. Niaratre ye abko rükabata nire jökrä, käkwe gobranba kä mili krati Kristobe gwaire tikwe tuaba.

⁵ Ni ruäre mikabata nire käne kore Ngöböklewe, akwa ni mda mda abko mikadita nire ñakare kwe abti kä rikaba mili krati ta.

⁶ Nitre rükabata nire kore, ye abko deme amne ni yebtä kä rabadi nuäre kri. Niaratre ñan krütadre mda, ye abko Ngöböklewe ñan mikadi ja ngite nuen akwa, nünandi kärekäre kwetre Ngöböbe angwane, ni blitaka Ngöböbe ni mda mda diäre tä sribire, ye kwrere sribidi kwetre Ngöbökrä amne Kristokrä amne gobrandi kä mili krati kwetre ben gwaire arato.

Ngöböklewe Satana juani ngwarbe mrä

⁷ Yebti kä mili krati rikadi ta angwane, Satana tä ngite Kä Timonbti abko tikadite angwane,

⁸ näin ni ngökö kä jökräbti temen nebebe kä ñäre jökrä amne käkä Gog amne Magog angwane, ni ükadikrö kwati kwe rükäre Ngöbö rüere. Ye abko, mren ümain kwrere jire ni rabadi ja ükaninkrö rükäre Ngöbö rüere.

⁹ Angwane nitre rükä kwati ye rikaba mobe käkwe ja ükäröba jökrä juta deme Ngöböklewe bäre temen amne juta Jerusalén tarebare Ngöböklewe ye bäre temen, ni ye juankäre ngwarbe, akwa batibe ñukwä kä käinbti jataba timonkwäre käkwe ganinkä jökrä se kwrere.

¹⁰ Angwane diablu nämane niaratre ngökö, ye abko ñukwä jutra ngitiekä asufrebe mni mni te kitaba. Kä ye arabe kanti ni jändrän kri krübäte kwrere kitanina käne amne ni ngöbö ngwarbe kukwei niekä kitanina arato, ye kanti diablu kitaba. Kä ye kanti mikadi ja tare nike kärekäre dibire rare.

Ngöböklewe kukwe ükaninte ni krütanikrütani kräke

¹¹ Yebti kürä gobrankrä kri, ngwen bürere tuaba mda tikwe. Kürä yebti abko ni nämä täkäninbe iti. Niara ngwärekre abko kä temen ne amne kä kainta se gitiaba batibe jökrä abko ñan tuaba jire chi mda tikwe.

¹²⁻¹³ Angwane nitre müre neketani mrente, ye erere nukaninta nire jökrä. Erere arato, ni müre ketaniketani abko üai nämane kä nakebtä, ye erere nukaninta nire jökrä arato, aiseite nitre ütiäte krikri ya, o bobre bobre ya, krütanikrütani abko nämä nünaninkä jökrä kürä gobrankrä Ngöbökwé ye ngwäreki, btä ti okwä rababa. Ye btäräbe tärä metateba keteti. Erere arato, tärä ni nünanka kärekäre Ngöböbe mikakrä gare abko metateba arato. Angwane ni itire itire ngämi krüte, känenkri dre dre nuenbare kwetre, ye erere btä Ngöbökwé kukwe ükateba kräke, aiseite ni itire itire käkwe dre dre nuenbare nämä tikani täräbtä, ye erere kukwe ükateba kräke Ngöbökwé.

¹⁴ Yebti gata ara amne kä nakebtä kitaba ñukwä jutrate kä Timonbti juankäre ngwarbe. Ñukwä jutra kä Timonbti ne kanti abko nita krüte bobukäre.

¹⁵ Tärä ni nünanka kärekäre Ngöböbe mikakrä gare, tärä yebtä nire nire kä kwani ñakare, ye erere kitani jökrä ñukwä jutrate ja tare nikakäre kärekäre.

21

Juta Jerusalén btin

¹ Yebti kä käinta btin amne kä temen ne btin tikwe tuaba mda, ñobtä ñan angwane kä käinta se btä kä temen ne amne mren dätebare käne Ngöbökwé abko nikanina ta, aiseite ñan rababa jire mda.

² Yebti juta Jerusalén btin kuin deme nämä Ngöbö kanti kä käinbti abko jataba timonkwäre tikwe tuaba bäsi meri tä ja ükaninte kuin bä nuäre brare ngäbti ja mikakäre gure ben, ye kwrere jire juta ye rababa tuen tie.

³ Angwane btäräbe kürä gobrankrä Ngöbökwé tuaba tikwe, ye kanti ni kukwei jaraba kri tie, kä rababa niere krörö:

Mtare Ngöböta nüne ni jen kwe ben juta btin nete. Ngöbökwé nünandi bentre amne niaratre rabadi juta jen Ngöbökwé, aiseite Ngöbö ara jire tädi bentre Ngöbö jen kwetre kwrere.

⁴ Angwane Ngöbökwé niaratre okwä ñoi sökadite jökrä ietre amne ni ñan krütadre jire iti mda amne ñan ja müaidre jire chi mda amne ñan ja müaidre ja tare nikabtä, ñobtä ñan angwane kukwe nämäne ükaninte ño känekäne, erere nikanina jökrä ta.

⁵ Angwane Ngöbö nämä tükänintbe kürä gobrankräbti ye käkwe nieba krörö:

Jändrän jökrä tita sribereta btin, nieba kwe.

Bti niebata kwe tie:

Kukwe ne abko kukwe era metre, abtä ni jökrä rabadre tödeke bti, aiseite tike täräbtä, nieba kwe tie.

⁶ Yebti Ngöbökwé nieba krörö tie:

Jändrän jökrä nibira bare. Ti abko tärä okwä kena kädianta alfa amne tärä okwä mrä kädianta omega kwrere. Ti nämäna jändrän jökrä känenkri kena amne ti rabadi jändrän jökrä täbti mrä. Mdakäre abko, nire nire ie tomna ye abko ie tikwe ño okwä kuin nire käta ni mike nüne kärekäre ye biandi ngwarbe tomnane.

⁷ Mdakäre abko, nire nire käkwe ja tare nikadre tödekabtä tibti, käkwe ti rükandrete ñakare abko ni rüe ganainkä kwrere abko ie tikwe jändrän kuinquin jökrä ne biandi amne, ti rabadi Ngöböre kwetre amne niara rabadi ti ngäbriänkä tikwe.

⁸ Akwa ni käta ja ngwen ngwarbe amne ni tödeke ñakare Jesubti, akwa tä niara rükente, amne ni ñan tö Ngöbö Kukwei mikai era jae, erere arato ni ngututu diän diän, ni ni mda mda kämikaka amne ni ja mikaka gure tiebetiebe amne ni kwrarekwrare, amne ni sukiare sukiare, amne ni jändrän ngwarbe mikaka ngöböre jae amne ni ni ngökaka, ye abko ñukwä jutra ngitiekä asufrebe mni mni abko te kitadi. Ye kanti krütadi bobukäre.

⁹ Yebti angele ni kükü kisete blato nämä abko te Ngöbö mätä kri nämä iandrete, angele ye abko jataba iti, käkwe nieba mda tie:

Meri ben ni Kordero kwrere rabai, meri ye abko ti bike mike tuare mae. Jakwe tuen, nieba kwe tie.

¹⁰ Yebti Ngöbö Üaikwe ti mikani jändrän tuen köböre kwrere angwane, ngitio kri mobe käin, kanti angele rikaba ti ngwena, käkwe juta Jerusalén deme nämä kä käinbti Ngöbö kanti abko jataba timonkwäre, tikwe tuaba.

¹¹ Juta ye abko Ngöbö trä bä nuäre abko bti rababa trä ngitiekä amne bäsi jä tuäre ütiäte kri kädekata jaspe, kwrere jire juta ye rababa trä ngitiekä.

¹² Angwane juta ye bäre temen abko ki nämä mikani kri amne mobe käin. Ki yebtä abko jukwe nämä kwä jätäbti kubu amne jukwe kwatirekwatire btä angele nämä nünaninkä iti ngibiare. Erere arato, Jacob ngäbriänkä ni jätäbti nibu abko kä nämä tikani itire itire jukwe kwatirekwatire btä.

¹³ Jukwe ye abko nāma kwā jātābti kubu: komā kā dririkri, komā ngwitārākri, komā mōtarikri amne komā nindrinikri.

¹⁴ Amne ki mikani jutabti, ye abko jā nāma mikani kwā jātābti kubu grāre. Jā yebtā abko nitre Jesu kukwei ngwianka ni jātābti nibu kā nāma tikani.

¹⁵ Angwane angele nāma blite tibe ye nāma nōrā orore ngwena krati kisete juta nākākrā, jukwe nākākrā amne ki jutabti nākākrā arato.

¹⁶ Juta ye abko jā nāre jōkrā kwārikwāri, aisete kōrā jā nāre kwārikwāri. Angelekwē juta ye nākāba nōrā yebti angwane, rababa 2,200 kilometro jā nāre kōrā ngakri, kwatakri amne kukwāne rababa jā nāre jōkrā.

¹⁷ Yebti ki nāma jutabti, ye nākāba kwe arato angwane, ki ye abko rababa 65 metro ie, ye abko ni kā nebtā tā jāndrān nāke nō, ye kwrere angele nāma juta ye nāke.

¹⁸ Amne ki nāma mikani juta yebti abko jā kuin ūtiāte kri kādekata jaspe nāma mikani kire, akwa juta ara jire abko oro kuin trā ngitiekā bidrio kwrere.

¹⁹ Angwane jā kwā jātābti kubu mikani ki grāre abko btā jā tuāretuāre ūtiāte kri bātākā ngwarbe nāma mikani abko krōrō: jā kāne btā abko jā kuin ūtiāte kri kādekata jaspe nāma mikani, jā kubukāre abko btā jā kādekata zafiro nāma mikani, jā komākāre abko btā jā kādekata āgata nāma mikani, jā kobkākāre abko btā jā kādekata esmeralda nāma mikani amne

²⁰ jā kwārikēkāre abko btā jā kādekata ōnice nāma mikani, jā kwā tikāre abko btā jā kādekata cornalina nāma mikani, jā kwā kükükāre abko btā jā kādekata crisólito nāma mikani, jā kwā kwākāre abko btā jā kādekata berilo nāma mikani amne jā kwā ōkānkāre abko btā jā kādekata topacio nāma mikani, jā kwā jātākāre abko btā jā kādekata crisopraso nāma mikani amne jā kwā jātābti kwatikāre abko btā jā kādekata jacinto nāma mikani amne jā kwā jātābti kubukāre abko btā jā kādekata amatista nāma mikani.

²¹ Angwane jukwe kwā jātābti kubu juta yebtā abko perla aibe mikani jukwere, aisete jukwe kwatirekwatire abko perla kwatibe nāma mikani jukwere amne ji juta ye ngātāite ta abko oro kuin ara jire mikani jire amne nāma trā ngitiekā bidrio kwrere jire abko tikwe tuaba.

²² Mdakāre abko, ju blitakrā Ngōbōbe tikwe tuaba nākare juta Jerusalén btin yete, nōbtā nān angwane ni Dānkien Ngōbō Di Kri Jāndrān Jōkrā Nuenkrā abko tā yete amne ni Kordero kwrere tā yete abko ben ni raba blite gwāre, aisete ju blitakrā Ngōbōbe nākare yete.

²³ Erere arato, nānā amne sō trā rabadre juta yete abko nākare ūtiāte, nōbtā nān angwane Ngōbō trā kuin bā nuāre ye abko tādi juta yete amne ni Kordero kwrere abko tā nōtrare yete arato.

²⁴ Ye abko nitre nūnanka kā jōkrābti temen abko kākwe dikadikā nōtra ye trāte nebebe juta Jerusalén btin ye kānti amne nitre jreire kā jōkrābti temen abko kākwe jāndrān ūtiāte kwekwe biandi Ngōbōye niara mikakāre ūtiāte jae juta yete.

²⁵ Angwane jukwe juta yete abko nān dikadre jire chi rare amne juta ye kānti kā nān rabadre iko arato, aisete jukwe nān dikadre jire chi.

²⁶ Erere arato, nitre nūnanka kā jōkrābti temen abko jatadi jāndrān ūtiāte ūtiāte kwekwe ngwena biandre Ngōbōye niara mikakāre ūtiāte jae juta yete.

²⁷ Akwa jāndrān kāmekāme nān rikadi jire chi nebe juta yete amne, ni diān diān amne ni ni ngōkaka nān rikadi jire chi yete arato; akwa nire nire kākwe nūnandre kārekāre Ngōbōbe abko kāta tikani tārā ni Kordero kwrere yebtā, ni ye aibe abko rikadi nūne juta yete abko angelekwē mikani tuare tie.

22

Nō kri ni mikakrā nire kārekāre

¹ Yebti nō kri kuin dirare angelekwē mikaba tuare tie. Nō ye abko ni mikakrā nūne kārekāre amne nō ye abko kuin merebe jā cristal bā merebe ye kwrere. Erere arato, kūrā gobrankrā Ngōbōkwe amne kūrā gobrankrā ni Kordero kwrere kwe, ye kānti nō ye nāma neen.

² Angwane ji kri juta yete abko ōtōbu ta nō ye tā neen amne kri ni mikakrā nūne kārekāre nāma nūren nōbtā kwārikwāri. Kri ye abko ngwā nāma nebe sō kratirekratire, aisete kri ye ngwā nāma nebe bā jātābti bobu btā kā kwatirekwatire amne kri ye abko kā nāma ni jōkrā mikakrā quinta.

³ Mdakāre abko, juta Jerusalén btin yete abko jāndrān btā ngūrūn mikani Ngōbōkwe abko nān rabadi jire chi. Angwane kūrā gobrankrā Ngōbōkwe amne kūrā gobrankrā ni Kordero kwrerekwe abko tādi juta yete, aisete nitre sribikā kwekwe abko erere kākwe niaratre kāikitadikā kārekāre.

⁴ Angwane niaratre jökrä käkwe ja tuadi gwäerere Ngöböbe, kä näin niaratre kä ngwena tikani ja okobtä, niaratre abko ni jen Ngöböke bä mikakrä.

⁵ Juta yete abko kä ñan rabadre iko jire chi, aisete nitre nünanka juta yete, kräke ñotra ñan rabadre ütiäte. Erere arato, ñänä trä ñan rabadre ütiäte kräke, ñobtä ñan angwane Ngöbö ni Dänkien ara jire käkwe kä trä biandi nitre nünanka yete ie. Niaratre käkwe gobrandi kärekäre.

⁶ Yebti angeleklewe nieba mda tie:

Kukwe nieta tikwe mae, ne abko era amne kukwe kuin tödekakrä. Ye abko, ni Dänkien Ngöbö ara jire käta nitre niara kukwei niekä töi tike ja kukwei niere, Ngöbö ye ara käkwe angele kwe juani abko kukwe mden mden rakadikä bä jötrö mikakäre tuare sribikä kwekwe ie, nieba kwe tie.

Jesu jatadita

⁷ Angwane ni Dänkien Jesu abko käkwe nieba mda tie:

¡Ti rükadita jötrö! Kukwe biani Ngöböke nitre Ngöbö kukwei niekä köböire tä tikani tarä nebtä, ye nire nire tä mike era jae, yebtä abko kä rabadi nuäre amne Ngöböke ja di biandi ie, nieba kwe tie.

⁸ Angwane ti Juan, ti ne abko käkwe kukwe ne tuaba amne tikwe kukwe nuaba arato. Tikwe kukwe tuaba amne tikwe kukwe nuaba ünän jökrä, ye btäräbe angele käkwe kukwe mikaba tuare tie, ye ngotobtä ti rikaba ngitiekä ngukudokwäbti temen mikakäre ütiäte jae.

⁹ Akwa angele ye käkwe nieba mda tie:

Ma mräkä mda mda käta kukwe tä tikani tarä nebtä mikaka täte ye käta sribire Ngöbökrä, ye kwrere tita sribire arato, aisete makwe ñan ti mika ütiäte jae, akwa Ngöbö aibe makwe mika ütiäte jae, nieba kwe tie.

¹⁰ Erere arato, angeleklewe nieba krörö mda tie:

Ngöbö Kukwei biani niedre mae abko tä tikani tarä nebtä, ye abko kebera nebe bare, aisete makwe ñan üka kaibe tiebe, akwa makwe mika gare ni mda mdaye.

¹¹ Angwane kä kitera neme braibe ja töi kwitakrä nie, aisete nire nire käta kukwe kämekäme nuene Ngöbö rüere, ye tuametre nuene janknu amne, nire nire käta kukwe diän diän nuene, ye tuametre nuene janknu; akwa nire nire käta jändrän kuinkuin nuene ye käkwe jändrän kuin nuen janknu Ngöbökrä. Erere arato, nire nire käta nüne deme amne metre, ye käkwe nüna deme janknu Ngöbökrä, nieba angeleklewe tie.

¹² Angwane ni Dänkien Jesukristo käkwe niebata tie:

¡Ti rükadita jötrö! Akwa ni itire itire tä dre dre nuene, ye abko ti jatadi ütiä ngwena kräke amne,

¹³ ti abko tarä okwä kena kädianta alfa amne tarä okwä mrä kädianta omega. Ti nämanena jändrän jökrä känenkri kena amne ti rabadi jändrän jökrä täbti mrä.

¹⁴ Mdakäre abko, dän bätätä tä nebe ngwen bürere, ye kwrere nire nire käkwe tödekadre tibti rabakäre merebe Ngöbö ngwäreki abko rabadi nebe kri ni mikakrä nüne kärekäre kánti amne juta Jerusalén btin, ye kánti rabadi niken amne ni ye abko btä kä rabadi nuäre.

¹⁵ Akwa ni ngututu diän diän, ni kwrarekwrare, ni sukiare sukiare, ni ja mikaka gure bati bati, ni ni mda mda kämikaka, ni jändrän ngwarbe mikaka ngöböire jae amne ni jökrä käta ni ngöka tarere amne tä käi ngwen nuäre jabtä ni ngökakäre, nitre korekore abko rabadi jökrä Ngöbö okwä bäre mento.

¹⁶ Ti Jesu, ti ne mden käkwe angele tikwe juani kukwe ne mike gare jökrä mae abko erere makwe mikadre gare nitre gätäkä ti käbti yeye. Ti abko Jrei David bkün amne ti abko Muke Trä Dirare Dekä kwrere, nieba Jesukwe tie.

¹⁷ Ye abko, Ngöbö Üai Deme amne ni Kordero kwrere nän muko käta ¡Jakwe! niere Jesuye amne, nire nire tä ti kukwei nuen käkwe ¡Jakwe! nie Jesuye arato. Mdakäre abko, nire nire ie tomna abko tö tomna ñain nünakäre kärekäre, ye abko jata Jesuye, käkwe ñö ni mikakrä nüne kärekäre ye ña ngwarbe tomnane.

¹⁸ Angwane Ngöbö Kukwei niebare tä tikani tarä nebtä, ye nire nire tä kukwe nuen ye abko ie ti bike niere krörö: Kukwe tä tikani tarä nebtä, nebti ta nire nire käkwe kukwe mdara jire tikadi, ye dokwäre abko kukwe taretare tä tikani tarä nebtä abko bti Ngöböke mikadi ja tare nike kri krübäte.

¹⁹ Angwane kukwe tä tikani tarä nebtä, ne nire nire käkwe diandrekä ruäre, yebtä abko kri ni mikakrä nüne kärekäre, ye Ngöböke diandikä kan amne kri ye ngwäkä ñan kwetadre kwe, aisete ñan nünandi kärekäre kwe Ngöböbe. Erere arato, juta deme Jerusalén ye Ngöböke diandikä kan, aisete ñan nünandi kwe yete.

²⁰ Ti Jesu käta kukwe tikani tarä nebtä niere metre, käta niere krörö: ¡Ti nänta jötrö kä temenbtä! abko tita niere.

Ti Juan, ti ne abko käta niere krörö ni Dänkien Jesuye: ¡Amen! ¡Jakweta ti Dänkien Jesu! tita niere Jesuye.

²¹ Ni Dänkien Jesu kākwe ja moto mika kuin ni jen Ngöbökwe kräke abko ie ti tö. Amen. Abko kore se. Ne ngöra.